

YAYA DIOSPA MUSHU KILLKACHISHKAN SHIMI

**Kay killkapi riman inka shimipi Yaya Diospa Wawan
Jesukristu runakunata kishpichinanmanta**

El Nuevo Testamento
de nuestro Señor Jesucristo
en el idioma
quechua de Pastaza



La Liga Bíblica
Las Sagradas Escrituras para Todos

El Nuevo Testamento
de nuestro Señor Jesucristo
en el idioma
quechua de Pastaza

Primera edición, 1997
Segunda edición, 2008

Publicado por
© La Liga Bíblica 2008

Usted es libre de copiar, distribuir y comunicar
públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

Kay Yaya Diospa Mushu Killkachishkan Shimipi killkakunata tarinanchipa rikuchina

Mateopa Killkashkan Killka	· · · · ·	Mt.	· · · · ·	5
San Mateo				
Markuspa Killkashkan Killka	· · · · ·	Mr.	· · · · ·	86
San Marcos				
Lukaspa Killkashkan Killka	· · · · ·	Lk.	· · · · ·	136
San Lucas				
Juanpa Killkashkan Killka	· · · · ·	Jn.	· · · · ·	216
San Juan				
Jesusta Katikkunamanta Kwintak Killka	· · · · ·	Kkk.	· · · · ·	277
Hechos				
Romapi Kirikkunaryku Killka	· · · · ·	Rom.	· · · · ·	350
Romanos				
Korintopi Kirikkunaryku Puntiru Killka	· · · · ·	1 Kor.	· · · · ·	386
1 Corintios				
Korintopi Kirikkunaryku Ishkaynin Killka	· · · · ·	2 Kor.	· · · · ·	423
2 Corintios				
Galasiapi Kirikkunaryku Killka	· · · · ·	Gal.	· · · · ·	445
Gálatas				
Efesopi Kirikkunaryku Killka	· · · · ·	Ef.	· · · · ·	458
Efesios				
Filipospi Kirikkunaryku Killka	· · · · ·	Fil.	· · · · ·	470
Filipenses				
Kolosapi Kirikkunaryku Killka	· · · · ·	Kol.	· · · · ·	478
Colosenses				
Tesalonikapi Kirikkunaryku Puntiru Killka	· · · · ·	1 Ts.	· · · · ·	486
1 Tesalonicenses				
Tesalonikapi Kirikkunaryku Ishkaynin Killka	· · · · ·	2 Ts.	· · · · ·	493
2 Tesalonicenses				
Timoteorayku Puntiru Killka	· · · · ·	1 Ti.	· · · · ·	497
1 Timoteo				
Timoteorayku Ishkaynin Killka	· · · · ·	2 Ti.	· · · · ·	507
2 Timoteo				

Titorayku Killka	Tit.	514
Tito		
Filemonrayku Killka	Flm.	519
Filemón		
Hebreo Runakunaryaku Killka	Heb.	521
Hebreos		
Santiagopa Killkashkan Killka	Stg.	549
Santiago		
Puntiru Pedropo Killkashkan Killka	1 Pe.	558
1 Pedro		
Ishkaynin Pedropo Killkashkan Killka	2 Pe.	569
2 Pedro		
Puntiru Juanpa Kunashpa Killkashkan	1 Jn.	576
1 Juan		
Ishkaynin Juanpa Kunashpa Killkashkan	2 Jn.	585
2 Juan		
Kimsaynin Juanpa Kunashpa Killkashkan	3 Jn.	587
3 Juan		
Judaspa Killkashkan	Jud.	589
Judas		
Pasanan Kananmanta Kwintak Killka	Pas.	593
Apocalipsis		
Shuk shuk rimanakunata asirtachik killka	Glosario	631

MATEOPA KILLKASHKAN KILLKA JESUKRISTU RUNAKUNATA KISHPICHISHKANMANTA

**Jesukristupa yaya rukunkuna
wañupa shutinkuna**
(Lk. 3.23-38)

1 ¹Kay killkami Jesukristumanta riman. Pay wawayarirka ali kamachik David wañupa miraykunamanta. David karka Abraham wañupa miraykunamanta. ²Abraham Isaakpa yayanmi karka. Isaak Jakobpa yayanmi karka. Jakob Judapa yayanmi karka, chaymanta wawkinkunapapas. ³Judá Farespa Sarapa yayanmi karka, maman karka Tamar. Fares Esrompa yayanmi karka. Esrom Arampa yayanmi karka. ⁴Aram Aminadabpa yayanmi karka. Aminadab Naasonpa yayanmi karka. Naasón Salmonpa yayanmi karka. ⁵Salmón Boospa yayanmi karka, maman Rahab karka. Boos Obedpa yayanmi karka, maman Rut karka. Obed Isaipa yayanmi karka. ⁶Isaí atun apu Davidpa yayanmi karka.

Chay atun apu David Salomonpa yayanmi karka. Salomonpa maman manara Davidpa warmin kashpanra Uriaspas warminmi karka. ⁷Salomón Roboampa yayanmi karka. Roboam Abiaspa yayanmi karka. Abias Asapa yayanmi karka. ⁸Asa Josafatpa yayanmi karka. Josafat Jorampa yayanmi karka. Joram Usiaspa yayanmi karka. ⁹Usias

Jotampa yayanmi karka. Jotam Akaspa yayanmi karka. Akas Esekiaspa yayanmi karka. ¹⁰Esekias Manasespa yayanmi karka. Manasés Amonpa yayanmi karka. Amón Josiaspa yayanmi karka. ¹¹Josias Jekoniaspa wawkinkunapapas yayanmi karka. Chay uras Babilonia llaktamanta runakuna yaya rukunchi wañukunata watashpankuna aparkakuna llaktankunama, chaypi chay runakunapa munashkunkunata rurashpa kawsanankunapa.

¹²Chay apirishka kahushkunkunapi Jekonias warminta chichuchirka kari wawata. Chay wawaka Salatiel karka. Salatiel Sorobabelpa yayanmi karka.

¹³Sorobabel Abiudpa yayanmi karka. Abiud Eliakimpa yayanmi karka.

Eliakim Asorpa yayanmi karka. ¹⁴Asor Sadokpa yayanmi karka. Sadok Akimpa yayanmi karka. Akim Eliudpa yayanmi karka. ¹⁵Eliud Eleasarpa yayanmi karka. Eleasar Matanpa yayanmi karka. Matán Jakobpa yayanmi karka. ¹⁶Jakob Josepa yayanmi karka. José Mariapa kusanmi karka. Maria Jesuspa mamanmi karka. Chay Jesustami rimarkakuna *Kristu, chayka ninayan Yaya Diospa Kachashkan Kishpichik.

¹⁷Yaya rukunchi Abrahammanta pacha atun apu Davidkama chunka chusku kuti mirashka runakunami karkakuna. Atun apu Davidmanta pacha

yaya rukunchi wañukunata Babilonia llaktama apashkunkunakama chunka chusku kuti mirashka runakunami karkakuna. Paykunata chay Babilonia llaktama apashkunkunamanta pacha Kristu wawayarishkankama chunka chusku kuti mirashka runakunami karkakuna.

**Jesukristupa
wawayarishkanmanta riman
(Lk. 2.1-7)**

¹⁸Kunan kwintanayani imashnami Jesukristu wawayarirkka. Manara wawayarihushpan paypa maman Maria Josewa kwintashka karka kasarananpa. Manara Joseka pushahushpanra Yaya Diospa Espíritun yanapashpan Mariaka chichuna kiparirkka. ¹⁹Maria chichu kashkanta yachashpan Joseka manana munarkanachu payta pushanata warminrayku. Ali rurak runa kashpan mana munarkachu tukuy chay llaktapi kawsak runa masinkunapa puntankunapi Mariata pinkachichinata. Chayrayku yuyarirkka nima pita rimashpan payta sakinata. ²⁰Chasna yuyarihushkanpi shuk tuta muskuyinipi Yaya Diospa *angelka rimarka:

José, ñawpa atun apu Davidpa miraymanta kashpayki Yaya Dios munan mana pinkarishpa Mariata pushanaykipa. Chay wiksanpi kahushkanka kanmi Yaya Diospa Espíritun yanapashpan Mariaka chichuna kiparishkanrayku. ²¹Payka shuk kari wawata wawayanka. Na wawayashpan shutiyachinki Jesusta nishpa. Chasna Jesús rimashkanka kishpichikmi. Chasna kashpan chay angelka rimashpa katirka: Payka runakunata uchankunamanta kastigana kahushkakunamanta kishpichinka nishpa.

²²Chaywa paktarirkka Yaya Diospa ñawpa rimashkanka imashnami paypa

yachayninwa yachachik Yaya Dios payta yuyachishpan rimarka kasna:

²³Shuk shipas chichunkami, shuk kari wawata wawayanka. Wawa-yashpan shutiyachinka Emanuel nishpa.

Emanuel ninayan Yaya Dios ñukanchiwa. Chasna Yaya Dios rimashkanshina Mariaka shuk kari wawata wawayanan karka.

²⁴Chay angel rimashkanwasha Joseka puñushkanmanta likcharishpan Mariata pusharka warminrayku, imashnami Yaya Diospa angelka rimarka.

²⁵Pushashkanwasha manara kawsarkachu warminwashina wawayanankama. Mariaka wawayashpan chay wawanta shutiyachirka Jesús.

Istrillata yachak runakuna Jesusta kushichik rirkakuna

2 ¹Atun apu *Herodes Judea allpapi kamachihushkan uras Belén llaktapi Jesuska wawayarirkka. Chay Belén llaktaka Judea allpa chawpipi, apukunapa kawsana Jerusalén llakta kuchupi karka. Jesús wawayarishpanna inti llukshinan kuskamanta istrillata yachak runakuna Jerusalén llaktama shamurkakuna. ²Paktashpankuna chaypi kawsak runakunata rimarkakuna:

Karu llaktanchimanta rikushkanchi shuk suma punchahlla rikurik istrilla llukshishkanta. Chayta rikushpanchi yachashkanchi shuk kari wawa wawayarishkanta kankuna israel runakunata kamachinanpa. Chayraykumi shamushkanchi chay wawayarishkata mañashpa kushichinanchipa. ¿Maypitaya chay wawayarishka atun apuka?

³Chayta uyashpan atun apu Herodeska yapa mancharishpan tsala tukurka. Chay Jerusalenpi kawsak runakunapas yapa

mancharirkakuna. ⁴Chaypina chay Herodeska kayachirka tukuy *saserdoteke-napa apunkunata, Moisespa killkashkanta yachachikkunatapas. Paykunata tapurka:

Kankuna Yaya Diospa shiminta yachachinkichi. Ñukatapas rimawaychi ¿maykan llaktapita wawayarinka Yaya Diospa Kachanan Kishpichikka?

⁵Chaypina chay yachakkunaka aynirkakuna:

Kay Judea allpa chawpipi Belén llaktapimi wawayarinka. Chasnami ñawpa Yaya Diospa yachayninwa yachachikka Yaya Diospa rimashkanta killkarka maykanmi pasanan karka:

⁶ Judea allpapi Belén llaktamanta achka atun llaktakuna tiyashpanpas chay uchilla Belén llaktaka mana kanchu mana valikshina. Chay Belenpimi shuk wawaka wawayarinka ali kamachik kananpa. Paymi kankuna akllashkayni israel runakunata alita yachachinka nishpa.

⁷Chayta uyashpan Herodeska pakalla kayachirka chay istrillata yachakkunata. Paykunata tapurka:

¿Ima urasta chay istrillaka llukshirka? nishpa.

⁸Paykuna aynishpankuna Herodeska rimarka:

Kunanka riychi chay Belén llaktama. Chaypi maskaychi chay wawata. Payta tarishpaykichika rimak shamuwaychi ñukapas payta kushichik rinaynipa.

⁹Chasna llullachishpa rimashpanmi chay istrillata yachakkunaka Jerusalemanta llukshirkakuna chay Belén llaktama rinankunapa. Rihushpankuna kutikashka rikurkakuna chay llaktankunapi rikushkkuna istrillata. Chay istrillaka paykunapa puntankunapi rirka. Chasna rishpan Jesuspa kahushkan wasi kuskapi shayarirka. ¹⁰Paykunaka chay istrillata rikushpankuna yapa kushikurkakuna.

¹¹Chaymanta chay wasipi yaykuk rishpankuna rikurkakuna Maria wawanwa kahukta. Chaypina paykunaka chay wawata kunkurishpa mañashpa kushichir-kakuna kanka Yaya Diosmanta shamush-kami kanki nishpa. Chaypi apamushkan-kuna kahunta paskashpankuna yapa chaniyuta surkukakuna, orota, dioskun-rayku rupachina wikita, mishkinlla asnak kaspi wikita mirra shutiyuta. Tukuy chaykunata kurkakuna wawa Jesusta kushichinankunapa.

¹²Chaymanta Yaya Dioska paykunata puñushkankunapi rimarka mana kutinankunapa Herodesma. Chayrayku paykunaka Yaya Diospa rimashkanta kasushpankuna llaktankunama kutirkakuna shuk ñampitana.

Joseka Mariawa wawan Jesusta mitikuchirkakuna Egipto allpama

¹³Chay yachak runakuna llaktankunama kutishkankunawasha Yaya Diospa *angelka Josefa muskuyninpi rimarka:

*Herodeska maskankami kay wawata wañuchinanpa. Chayrayku utkalla atarishpayki kay wawata mamanwa pakta pushay Egipto allpama. Chay allpapi kipariyichi kankunata rimanaynima kuna kutinaykichipa.

¹⁴Chasna chay angelka rimashpan Joseka atarishpan wawata mamanwa pakta pusharka Egipto allpama. Chaypi kawsarkakuna apu Herodes wañunankama. ¹⁵Chasna paktarishka Yaya Diospa ñawpa rimashkanka, imashnami paypa yachayninwa yachachik Yaya Dios payta yuyachishpan rimarka kasna:

Chay Egipto allpamanta Wawaynita kayarkani shamenanpa nishpa.

Chay apu Herodeska achka wawakunata wañuchichirka

¹⁶Chay apu *Herodeska yankamanta chaparka chay yachakkunata. Kunanka

ñukata llullachiwashkakuna nishpa yuyarirka. Chayrayku yapa piñarirka. Chaypina timputa yuparka ima urasmi chay istrillaka puntiru rikurishka karka, imashnami chay yachakkunaka rimarkakuna. Chaywasha suntalunkunata Belén llaktama, kuchunpi kahuk uchilla llaktakunamapas kacharka tukuy manara ishkay watayu kari wawastukunata wañuchinankunapa.

¹⁷Chasna chay wawakunata wañuchishpankuna Yaya Diospa yachayninwa yachachik Jeremiaspa ñawpa killkashkan paktarirka. Payka killkarka maykanmi pasanan karka Belén llakta kuchupi, Ramá shutiyu llaktapi kasna nishpa:

¹⁸ Ramá llaktapi yapa llakiyuwa kaparishpa wakahukkunata uyankakuna. Israel runakuna wakanahun wawankuna wañuchiay tukushkankunaryku. Mana nima pi atipankachu paykunata kushillaryachinata.

¹⁹ Herodes wañushkanwasha Yaya Diospa *angelka chay Egipto allpapi Joseta puñuhushkanpi rimarka:

²⁰ Atariy, chay wawata mamanwa pakta pushay. Kutiychi Israel allpaykipichima. Chay wawata wañuchinayak runakunaka ñami wañushkakuna.

²¹ Chaypina Joseka angelta kasushpan chay wawata mamanwa pakta pusharka Israel allpanchima. ²² Ñampipi riushshpankuna Joseka yachashpan Herodespa wawan Arkelao Judea allpapi kamachik kananta, mancharka Judeama rinata. Yaya Dios muskuy-ninpi rimashpan Galilea allpamana rirkakuna. ²³ Chaypi paktashpankuna rirkakuna Nasaret llaktapi kawsanankunapa.

Yaya Diospa yachayninwa ñawpa yachachikkuna rimarkakuna maykanmi pasanan karka:

Nasaret llaktapi kawsashkanrayku paytaka shutiyachinkakuna Nasareno nishpa.

Chayraykumi Jesustaka shutiyachirkakuna Nasareno.

Bawtisak Juan kallarirka runakunata yachachinata
(*Mk. 1.1-8; Lk. 3.1-9,15-17;*
Jn. 1.19-28)

3 ¹Tukuy chaykuna unay pasashkan-washa Juanka rirka Judea allpapi chunlla chakishka allpama. Chaypi shamushka runakunata Yaya Diospa shiminta yachachirka. Achka runakunata bawtisashkanrayku payta shutiyachirkakuna Bawtisak Juan nishpa.

² Chaypi Juanka rimarka:
Ñami kallarihun Yaya Diospa ali kamachinanka kay allpapi. Chayrayku alita yuyarishpaykichi tukuy millaypa rurashkaykichita sakiychi payta kasunaykichipana nishpa.

³ Chay Juan shamunanmantami ñawpa Yaya Diospa yachayninwa yachachik Isaias wañuka killkarka:

Chunlla chakishka allpapimi shuk runa sinchita rimashpa yachachinka kasna:
Imashnami shuk anchu ñampita alichanchi, atun apu shamushpan purinarpa, chasnashina shunkuykichita alichariyichi. Millaypata rurashpa kawsashkaykichita sakiychi. Yaya Diospa Kachanan Kishpichik kankunapi kawsak shamunka nishpa.

⁴ Juanpa churarishkanka shuk pukripa churarinanshinami karka, wiwa kamillupa willmanmanta awarishka. Sinturunka karamantalla karka. Mana mikupayarkachu ñukanchipa mikunanchitashina. Mikupayarka upyapayarka imatachari taripayarka chay chunlla

chakishka allpapi, atun muru chilikkunata, mapa mishkitapas.⁵ Chaypina tukuy Judea allpapi llaktakunamanta, Jerusalén llaktamantapas, Jordán yaku mayanmantapas achka runakuna shamurkakuna Juanpa yachachihuskanta uyanankunapa.⁶ Chayta uyashpankuna uchankunata musyashpankuna rimarkakuna. Chasna rimashkankunawasha Juanka paykunata chay Jordán yakupi bawtisarka.

⁷ Chaymanta *fariseokuna *saduseoku-napas rirkakuna bawtisarinankunapa. Juanka paykunata rikushpan rimarka:

Machakuyashina runakuna kankichi yachachinaykichiwa runakunata pantachichishpa yuyayninkunata waklichikkuna. ¿Pita kankunata rimashka ña kuchuyamuhushkan Yaya Diospa manchaypa kastigananmanta chasnalla kishpinaykichiwa?⁸ Manara bawtisarihushpaykichira alitana ruraychi rikuchinaykichiwa Yaya Diosta kasuk kanaykichiwa.⁹ Ama rimaryichi-chu yaya rukunchi Abraham wañupa miraymantami kanchi, chayrayku Yaya Dioska kishpichinka ñukanchikunata nishpa. Yaya Dios munamaka, kay rumikunamanta rurama yaya ruku Abrahampa mirayninta.

¹⁰ Rikuyichi, shuk tarpu kaspi mana alita muyuyashpanka amunka sapinpi achawa kuchushpan ninapi rupachin. Chasnallatammi Yaya Dioska tukuy mana ali rurak runakunataka wichunka ninama rupanankunapa.

¹¹ Kankuna millaypata rurashkaykicha amirishpa sakishpaykichika ñukaka yakullawami bawtisashkaykichi Yaya Diosta katinaykichiwa. Ñukamanta ashwan yachayyu runami shamunka. Paymantaka ñukaka mana yapa yachay-yuchu kani. Paypa puntanpi nima imata atipanichu rimanata. Payka kankunata Yaya Diospa Espiritunta kushpami

shunkuykichita aliyachinka. Ninawa rupachihushkashina uchaykichita pichanka payta kushilla katinaykichiwa.

¹² Yuyariyichi, sarata triguta pallashpanchi tullunmanta tuyuntana wishkunchi. Chay tuyuntaka wakaychanchi, tullunkunataka minapi rupachinchi. Chay shamuhuk runaka chasnallatata ruranka. Paymi tukuy kirikkunataka siluma pushanka. Mana kirikkunataka nina mana wañukma kachanka nishpa yachachirka Bawtisarka Juanka.

Juanka Jesusta bawtisarka (Mk. 1.9-11; Lk. 3.21-22)

¹³ Chay uras Jesuska yugarirka Juan bawtisawachun nishpan Galilea allpamanta Jordán yakuma rirka. Chaypi Jesuska Juanta tapurka payta bawtisananpa.¹⁴ Chasna tapushpanna Juanka payta mana bawtisanayarkachu.

Kan ñukata bawtisawanayki imata, ñukata tapuk shamuwanki kanta bawtisanaynipa nishpa rimarka Juanka.

¹⁵ Chaypina Jesuska aynirka:

Tukuy Yaya Dios ñukanchita kamachishkanta kasunanchi tiyan. Chayrayku kanmi bawtisawanayki tiyan nishpa.

Chaypira Juanka payta bawtisarka.

¹⁶ Bawtisarishkanwasha Jesuska yakumanta llukshirkha. Chaypi siluka paskarishpan Jesuska rikurka Yaya Diospa Espiritunta shuk wiwa mukukushina paypi uraykumuuhuskanta.

¹⁷ Chaypina silumanta Yaya Diospa rimashkanta uyarkakuna:

Kay Jesuska munashkayni wawaynimi. Paymi sumakta kushichiwan nishpa.

Supay Jesusta uchata rurachinayarka (Mk. 1.12-13; Lk. 4.1-13)

4 ¹ Chaymanta Jesús bawtisarishkanwasha Yaya Diospa Espiritunka payta pusharka chunlla chakishka

allpama. Chayma pusharka supayka kamananpa, shutipachu Yaya Diosllata kasun nishpa. ²Chaypi Jesuska mana mikushpa karka chusku chunka punchata, chusku chunka tutata. Chaywasha yapa yarkarka. ³Chaypi supayka Jesusta kayllayashpan kamarka shutipachu Yaya Diosllata kasun nishpa. Shutipa Yaya Diospa Wawan kashpaykika rimay kay rumikunata pan tukunanpa, chayta mikunaykipa.

⁴Chaypina Jesuska aynirka:

Nima imashna rurashanchu. Yaya Diospa killkachishkanpi riman:

Mana mikunawallachu runaka kawsan. Ashwan Yaya Diospa rimashkanta kasushpanmi kawsanka nishpa.

⁵Chaymanta supayka Jesusta pusharka Yaya Diospa munashkan Jerusalén llaktama. Chaypi *Yaya Diospa wasin awama sikachirka.

⁶Chaypina Jesusta rimarka:

Shutipa Yaya Diospa Wawan kashpaykika saltay kay awamanta allpama. Yaya Diospa killkachishkanpi riman:

Yaya Dioska *angelkunata kachanka kanta kuyranankunapa. Paykunami makinkunapi kanta alita kuyrankakuna mana nima rumipi waktarinaykipa nishpa.

⁷Chaypina Jesuska aynirka:

Nima imashna rimawashpayki saltashanchu. Yaya Diospa killkachishkanpi kaytapas nin:

Ama Yaya Diosta yanka kamankichu yachanaykipa payka yanapawankachu manachu nishpa.

⁸Chaymanta supayka Jesusta pusharka yapa awa urku awama. Chay urku awamanta tukuy kay allpapi kamachik atun apukuna kamachinan allpakunata, suma atipak kanankunata, yapa suma rikurihushkankunata rikuchirka. ⁹Chaypina rimarka:

Ñukata kunkurishpa mañawashpaykika tukuy kay rikuwashpaykita kushkayki nishpa.

¹⁰Chaypina Jesuska aynirka:

Nima imashna kanta kunkurishpa mañashanchu. Ñukamanta anchuriy Satanás supaykunapa apun. Yaya Diospa killkachishkanpi nin:

Yayaykichi Diosllata kunkurishpa mañaychi. Payllata kasushpa kawsaychi nishpa.

¹¹Chasna Jesús sinchita Yaya Diospa yachayninwa rimashpan supayka anchurirkia. Chaypina Yaya Diospa angelkunaka Jesusta kayllayarkakuna yanapanankunapa.

Galilea allpa llaktakunapi Jesús kallarirka yachachinata
(Mk. 1.14-15; Lk. 4.14-15)

¹²Chaymanta Jesuska yachashpan Bawtisak Juanta karselpi churashkankunata, Galilea allpama kutirka.

¹³Galileapi Nasaret kikin llaktanmanta llukshishpan Kapernaum llaktama kawsanana rirka Galilea allpallapillata. Chay llaktaka karka Galilea kucha mayanpi, chay chunka ishkay israel runakunapa ayllunkunamanta Sabulonpa, Neftalipa miraykunapa allpankunapi. ¹⁴Chayma rishpan Jesuska paktachirka Yaya Diospa yachayninwa ñawpa yachachik Isaiaska killkashkanta kasna nishpa:

¹⁵ Tukuy kankuna Galilea allpapi kawsak Yaya Diosta mana kasuk, Galilea atun kucha mayanpi, Jordán yaku mayanpipas kahuk Sabulonpa, Neftalipa miraykunapa allpankunapi chapurishka kawsakkuna, uyaychi Yaya Dios kankunaryku rimashkanta kasna:

¹⁶ Tukuy chay runakuna mana alita rurashpa amsapishina kawsak-

kunaka Yaya Diospa yachay-ninta atun suma punchayakta-shina rikunkakuna. Chay runakuna wañunankunata yapa manchashpa kawsahushpan-kuna yapa suma punchayachik-tashina Yaya Diospa ali shiminta kishpichinanmanta uyankakuna.

¹⁷Chaymanta pacha Jesuska kallarirka yachachinata:

Ñami kallarihun Yaya Diospa ali kamachinanka kay allpapi. Chayrayku tukuy mana ali rurashkaykichita sakiychi payta kasunaykichipana nishpa.

**Jesuska chusku rediyak
runakunata kayarka**
(Mk. 1.16-20; Lk. 5.1-11)

¹⁸Chaymanta Galilea kucha mayanpi riushushpan Jesuska ishkay runa wawkipura kahukta rikurka. Paykunaka redinkunata yakupi kacharihurakuna. Karkakuna Simón Pedro shutiyu wawkin Andreswa. ¹⁹Chaypina Jesús rimarka:

Shamuychi, katiwaychi. Ñuka kankunata yachachisha. Imashnami kunankama challwata apishpa kawsash-kankichi, chasnashinami kunanmanta pacha runakunatana yachachishpa purinkichi paykunapas Yaya Diosta kasunankunapa.

²⁰Chasna rimashkanllapi chay rediyak runakunaka redinkunata sakishpa Jesustana katirkakuna. ²¹Chaymanta astalla chay kucha mayanta riushushpan-kuna Jesuska rikurka Sebedeopa wawankuna *Santiago wawkin Juanwa pakta kahukkunata. Botinkunapi yayanwa redinkunata rimintahurka-kuna. Chaypi Jesuska chay ishkay runakunatapas kayarka paywa pakta purinankunapa. ²²Chaypina atarishpan-

kuna yayankunata botinpi sakishpa Jesuswa pakta rirkakuna.

**Jesuska achka
runakunata yachachirka**
(Lk. 6.17-19)

²³Chaymanta Jesuska runankunawa tukuy chay Galilea allpa llaktakunapi yachachishpa purirka tukuy chay israel runa masinchikunapa tantarinankuna wasikunapi. Chaypi yachachirka kay suma ali shimita Yaya Diospa ali kamachinan kay allpapi ña kallarishkan-manta. Chasna yachachihushpan Jesuska runakunata tukuy unkuyinkunamanta parisinankunamantapas ampipayarka. ²⁴Chay Siria allpa llaktakunapi achkata rimarkakuna Jesuspa yachachihushkanmanta, unkushkakunata ampihushkanmantapas. Chayrayku Jesusma aparkakuna chikan chikan unkuyukunata, nanayyu runakunata, supay yaykushka runaku-natapas, kunkaymanta sinchiyarik kuchparik unkushkakunata, chakichik unkuyuyukunatapas. Tukuy chay unkush-kakunata Jesuska ampirka.

²⁵Chaymanta achka runakuna Galilea allpapi llaktakunamanta, Chunkallakta shutiyumanta, Judea allpapi llaktakunamanta, Judeallapillatata Jerusalén llaktamanta, Jordán yaku chimpamanta-pas Jesusta katirkakuna.

**Jesuska runankunata yachachin
imashnami kushilla kankakuna**
(Lk. 6.20-23)

5 ¹Chaymanta Jesuska chay achka runakunata rikushpan shuk luma awapi sikarka. Chaypi tiyarispan payta katihukkunaka kayllayarkakuna.

²Chaypina Jesuska paykunata yachachirka kasna nishpa:

³Kushilla kankichi yuyarishpa kawsashpaykichika Yaya Dios mana

yanapawashpanka nima imata atipani-chu ruranata nishpa. Yaya Diosmi kankunata yanapanka wiñayparayku paypa ali kamachihushkanpi kawsanay-kichipa.

⁴Kushilla kankichi llakiwa kahush-paykichika. Yaya Diosmi kankunata sinchikuchinka. Uchaykichimanta llakirishpaykichika Yaya Dios kankunata llakichishpa yanapanka.

⁵Kushilla kankichi mana piñarishpa, nima rimanakushpa kawsashpaykichika. Yaya Dioska chay mushu ruranan allpapimi kankunata churanka chaypi kawsanaykichipa.

⁶Kushilla kankichi yarkahukshina upyanayahukshina Yaya Diospa munashkanta ruranayshpaykichika. Yaya Diosmi kankunata yanapanka paypa munashkanta rurashpa kawsanaykichipa.

⁷Kushilla kankichi tukuy runa masiki-chita yuyashpa llakichishpa kawsash-paykichika. Yaya Dioska kankunatas yuyashpanmi llakichinka.

⁸Kushilla kankichi ali yuyayyu runakuna kashpaykichika. Yaya Diosta riksinkichi.

⁹Kushilla kankichi shukwa shukwa alichak runakuna kashpaykichika. Yaya Dios kankunata alita rikunka wawaynikuna kankichi nishpa.

¹⁰Kushilla kankichi runakuna kankunata chiknishpa yanka parisichishpankuna Yaya Diospa munashkanta alita rurashpa kawsahush-kaykichirayku. Chasna parisihushpaykichi Yaya Dios kankunata yanapanka wiñayparayku paypa ali kamachihushkanpi kawsanaykichipa.

¹¹Kushilla kankichi runakuna yankamanta millaypata kankunamanta rimashpankuna kankunata chiknishpa parisichishpankuna ñukaranti llullapi churashpa rimashpankuna. ¹²Chasnami

ñawpa Yaya Diospa rimashkanta yachachikkunatapas chiknishpankuna parisichirkakuna. Chayrayku, kankunatapas parisichihushpankuna kushikuchi. Shuk puncha silupi paktashpaykichi Yaya Dios kankunata atunta kushichinanta yachashpaykichi kushikuchi.

**Jesuska yachachin imashnami
payta katikkunaka
kawsanankuna tiyan**
(Mk. 9.50; Lk. 14.34-35)

¹³Imashnami kachiwa kachiyachinchimikunata ali kananpa, chasnallatata kankunaka runa masikichita yachachishpa yanapankichi mana uchata ruranankunapa. Chamu kachika manami alichu kachiyachinanpa mikunata. Chasnataka apishpa wichunchi kanchama chaypina runakuna sarunankunapa.

¹⁴⁻¹⁵Chaymanta shuk lamparinta apichishpanchi churanchi mesa awapi tukuy wasita punchayachinanpa. Chay apichirishkata mana churanchichu shuk kahun ukupi. Chaymantapas shuk llakta urku awapi kahukka mana atipanchu pakanata, tukuy runakuna rikunahun. Chay llaktatashinami chay lamparintashinami runa masikichika kankunata rikunkakuna. ¹⁶Chasna kashpaykichika alikunallata rurashpa kawsaychi, tukuy runa masikichi rikushpankuna silupi kawsak Yaya Diosta agradesishpa kushichinankunapa.

**Jesuska Yaya Diospa ñawpa
kamachishkanta yachachin**

¹⁷Yaya Dioska ñawpa yaya rukunkunata yachachirkakuna kamachishkankunata kasushpa kawsanankunapa. Tukuy chayta Yaya Diospa yachayninwa yachachikunka killkarkakuna. Ñukaka shamushkanimi tukuy chay killkashkankunapi rimashkanta ruranaynipa.

Manami shamushkanichu kankunata rimanaynipa chay killkashkankunata manana kasushpa kawsanaykichipa.

¹⁸Alita uyawaychi. Tukuy chay Yaya Diospa yachachishkanta kankuna alita kasunaykichi tiyan kay allpa kay silu chinkarinankama. Tukuy rimashkanka paktarinkami. Nima shuk paypa shiminka yanka nishpa kanchu.

¹⁹Kankuna mana imananchu nishpa shuklla Yaya Diospa kamachishkanta mana kasushpaykichika chaymanta shuk runakunatapas chasnallata ruranankunapa yachachishpaykichika Yaya Diospa kamachinani tukuymanta mana valikchu kankichi. Ashwan Yaya Diospa kamachishkanta alita kasushpa kawsashpaykichika chaymanta chasnallata runa masikichita yachachishpaykichika Yaya Diospa kamachinani tukuymanta ashwan valik kankichi.

²⁰Kankunata rimani, Moisespa killkashkanta yachachikkunamanta, *fariseokunamantapas Yaya Diospa kamachishkanta ashwan alita paktachinaykichi tiyan. Paykuna paktachinanchi tiyan nishpa rimashpangunapas manami tukuy shunkunkunamanta pacha paktachinahunchu. Paykunamanta mana ashwan alita paktachik kashpaykichika manami Yaya Diospa kamachishkan tukushpa ali kamachi-hushkanpi kawsankichichu.

**Jesuska yachachin mana shukwa
shukwa piñanakushpa
kawsanamanta**
(Lk. 12.57-59)

²¹Yaya Dios ñawpa yaya rukunchiku-nata rimarka:

Ama runa masikichita wañuchiyichi-chu. Wañuchishpaykichika apumi kankunatapas kastiganan tiyan.

²²Kunan ñuka kankunata rimani, runa masikichita piñarishkaykichillawa

kastigay tukunkichi. Chaymanta runa masikichita piñarishpa kamishpaykichi-chika *saserdotepa tantarishkan apunkuna kankunata ashwanta kastiganan tiyan. Chaymanta maykanpas runa masinta kushway wañunki nishpa yuminkashpanka nina mana wañukma kachay tukunka.

²³⁻²⁴*Yaya Diospa wasinpi shuk imata kunayahushpaykika payta kushichinaykipa, kunkaymanta runata piñachish-kaykita yuyarishpaykika manara kunayahushkaykita churahushpayki alichakriy chay piñachishkayki runawa. Chaywasha kutiy kunayahushkaykita Yaya Diosta kunaykipa.

²⁵Shuk runata liwiushkaykimanta pay piñarishpan kanta apuma pushahushpanka manarapas paktahush-paykichira alichaychi mana apuka kanta liwishkaykimanta kastigananpa. Apipi mana atipashpayki alichanata runantami kunka karselpi churananpa.

²⁶Chaymantaka manami llukshinkichu tukuy liwishkaykita paganaykikama.

**Jesuska yachachin mana shukpa
warminta munarishpa
kawsanamanta**

²⁷Kankuna yachankichi Yaya Dios ñawpa yaya rukunchikunata rimashkanta:

Nima maykan warmiyu kari shuk warmiwa musayachun. Kusayu warmipas ama musayachun shuk kariwa nishpa.

²⁸Kunan ñuka kankunata rimani, maykanpas shukpa warminta munarishpa rikushpanka ñami yuyaynинpi uchata rurashka.

²⁹Ñawiki rikushpan kanta uchata rurachinayashpanka ñawikita surkuhuh-shina sakiy mana uchata ruranaykipa. Ashwan ali kama shuk ñawillawa siluma rinaykipa, mana ishkanti ñawikiwa ninama wichuy tukunaykipa.

³⁰Makiki uchata rurachinayahushpanka chay makikitaka pitihukshina sakiy mana uchata ruranaykipa. Ashwan ali kama shuk makillawa siluma rinaykipa mana ishkay makikiwa ninama rinaykipa.

**Jesuska yachachin warmiyukuna,
kusayukuna mana
sakinakunamanta**

³¹Ñawpa yaya rukunchikunata rimarkakuna:

Kasarashka kahushpayki warmikita sakinayashpaykika konsehumariy killkachinaykipa kay warmitaka manami munaninachunishpa.

³²Kunan ñuka kankunata rimani, warmiki mana shuk runawa musayashpanka ama sakiychu. Chay warmiwa alita kawsahushkaykita sakishpaykika uchatami ruranka shuk runawa. Shuk warmi sakirishkata warmiyahushpaykika uchatami ruranki. Warmipas kari sakirishkawa kawsahushpanka uchatamiruran.

**Jesuska yachachin shutipallata
mana llullashpa rimananchipa**

³³Kankuna yachankichi Yaya Dios ñawpa yaya rukunchikunata rimashkanta:

Runakunapa puntankunapi shuk ruranaykichita rimashpaykichi Yaya Diospa rikushkanpi paktachinaynita rimani nishpa, ama llullashpa rimaychichu. Ashwan ñukata rimawashkaykicha paktachinaykichi tiyan nishpa.

³⁴Kunan ñuka kankunata rimani, mana llullashpa tukuy uras shutipallata rimanaykichi tiyan. Chayrayku nima ima uras runakunapa puntankunapi rimahushkaykicha kirichinayashpa

chay kirichinaykichi rimanakunawa rimaychichu. Yanka yuyarinkichi mana Yaya Diospa shutinta chay kirichinaykichi rimanakunapi churashpaykichika mana paktachishkaykichimanta mana yapa kastigay tukunaykichita. Chasna yuyaykichi pantachishpaykichimi kankunata rimani: Nima siluta churashpa kirichina rimanakunawa rimaychichu, siluka Yaya Diospa kawsanan kashkanrayku maymantami tukuya kamachin. ³⁵Nima allpata churashpa kirichina rimanakunawa rimaychichu, kay allpaka Yaya Diospa kamachinan kashkanrayku. Nima Jerusalenta churashpa kirichina rimankunawa rimaychichu, atun apu Yaya Diospa munashkan llaktan kashkanrayku. ³⁶Nima kankuna kikinta churashpa kirichina rimanakunawa rimaychichu. Nima chukchaykicha atipankichichu yanayachinata nima yurayachinata tukuy uras chasnalla kiparinanpa, Yaya Dioslla kankunata rurashkanrayku. ³⁷Kankuna rimashpaykichika ari nishpa, ari kachun. Rimashpaykichika mana nishpa, mana kachun. Chay ari chay mana nishkaykichimanta ashwanta kirichinayashpa rimanakunaka millaypakuñata rurachik supaypa yuyachishkanmi kan.

**Jesuska yachachin shuk runa
ñukanchita mana alita rurashpanka
mana rantipananchipa
(Lk. 6.29-30)**

³⁸Kankuna yachankichi ñawpa yaya rukunchikunata rimashkankunata:

Shuk runa piñarishpan runa masinpa ñawinta waklichishpanka apuka paytatas chasnallatata kastiganan tiyan. Chaymanta shuk runa piñarishpan runa masinpa kirunta pakishpanka apuka payta chasnallatata kastiganan tiyan nishpa.

³⁹Kunan ñuka kankunata rimani, ama rantipaychu shuk runa kanta millaypata rurashpanka. Uyaykipi sakmashpanka ama rantipaychu. Kutikashka sakmashpanpas ama piñarinkichu, ashwan alichay paywa. ⁴⁰Chaymanta shuk runa kanta kichunayashpanka kamisaykita, kan ñukata liiwashkanki, kamisayki raktata kuway nishpanka shuk kamisaykitapas kichunayashpanka sakiy, ama piñariychu payta. ⁴¹Shuk suntalu kanta rimashpanka shuk llasha wankurishkata mana pagashpa apanaykipa shuk waranka purina tuputa, ama piñariychu payta. Ari, apashami, munashpaykika ishkay waranka purina tuputapas apasha nishpa rimay. ⁴²Imaykita kanmanta tapuk runata mana mitsashpa kuy. Imaykita prestanarpa shamuk runata mana mitsashpa prestay.

**Jesuska yachachin tukuy chiknik
runakunata yuyananchipa**

(Lk. 6.27-28, 32-36)

⁴³Kankuna yachankichi ñawpa yaya rukunchikunata rimashkankunata: Runa masikichita yuyaychi. Kankunata chiknik runakunataka chikniyichi. ⁴⁴Kunan ñuka kankunata rimani, kankunata chiknik runakunataka yuyaychi. Shuk runakuna kankunata wañuchinayashpankunaka Yaya Diosta mañaychi paykunaryku. ⁴⁵Chasna alita kawsashpaykichika silipi kawsak Yaya Diospa wawankunami kankichi, payshina yuyak kahushkaykichirayku. Paymi intita llukshichin alita rurak runakunaryku, mana alita rurak runakunarykupas tukuy runakunata chasnalla yuyashpa yanapanampa. Chasnallatata tamyatapas kachan yanapanampa tukuy runakunata chasnalla. ⁴⁶Yachanchi llullachik runakunapas ayllunkunata yuyanankunata. Kankuna chasnallatata aylluypaykichikunallata

yuyashpaykichika paykunamanta mana ashwan alitachu rurahunkichi. Paykunashina rurashpalla kawsashpaykichika imamantata Yaya Dioska kankunata kushichinka. ⁴⁷Kankuna aylluypaykichillawa kwintak kashpaykichika shuk runakunawa mana kwintashpaykichika chay Yaya Diosta mana kirikkunamanta mana ashwan alitachu rurahunkichi. Paykunapas yuyashkankuna runa masinkunallawami kwintanahun. ⁴⁸Imashnami silipi kawsak Yayanchi Dioska tukuy runakunata yuyan, chasnashina kankunapas tukuy runakunata yuyanaykichi tiyan.

**Jesuska yachachin ali
ruranakunamanta**

6 ¹Kankuna runa masikichita yanapashpaykichika ama yuyariy-chichu, tukuy runakuna chay yanapashkaynita rikushpankuna rimankakuna yapa alita rurak runa kanaynita nishpa. Chasna tukunaykichillapa runa masikichita yanapashpaykichika silipi kawsak Yaya Dioska rurashkaykichi-manta kankunata manami kushichinkachu. ²Chayrayku, shuk nima imayuta yanapashpaykika ama nima pita rimaychu. Ama ruraychu chay yanka nishpa rimak runakunashina. Paykunaka tantarinankuna wasikunapi ñampikunapipas shukma shukma rimashpa purinahun tukuy runakuna yachashpankuna nima imayu runakunata yanapashkankunata paykunata atunyachinankunapa. Alita uyawaychi. Chasna yanapak runakunataka Yaya Dioska mananami kushichinkachu. Runakuna paykunata kushichishkankunnalla kiparinkakuna.

³Nima imayu runakunata yanapashpaykika ama nima pita rimaychu, nima yuyashkayki amiguykita kwintaychu yanapashkaykimanta. ⁴Chunllalla

rurashpaykika Yaya Dioska chay nima pi yachashkan rurashkaykita rikushpan alita rurashkaykimanta kanta kushichinka.

Jesuska yachachin imashnami Yaya Diosta mañashunchi
(Lk. 11.2-4)

⁵Kankuna Yaya Diosta mañahushpaykicha ama ruraychichu chay yanka nishpa rimak runakunashina, maykan-kunami kirichinayanahun alita kasukmi kani nishpa. Paykunaka tantarina wasikunapi, ñampikunapipas tukuy runakuna rikuhashkankunapi shayarish-pankuna Yaya Diosta mañanahun. Chasna ruranahun runa masinkuna paykunata rikushpankuna rimanankunapa, chay Yaya Diosta mañak runa alita kasukmi nishpa. Alita uyawaychi. Chasna rurak runakunataka Yaya Dioska mananami kushichinkachu. Runakuna paykunata kushichishkankunallawa kiparinkakuna.

⁶Yaya Diosta mañanayashpaykika kwartuykipi yaykuy. Punkuta tapashpa sapallayki Yaya Diosta mañay. Payka kanwa tantaylla kashpan tukuy rimashkaykita uyanmi. Chasna nima pi yachashkan mañashkaykita rikushpan alita mañashkaykimanta kanta kushichinka.

⁷Ama chay mana israel runakunashina mañaychichu. Paykunaka yanka diosninkunata mañanahun chay shimikunallata achka kuti rimashpa. Chasna mañashpankuna yuyarinahun diosninkuna paykunata ashwan alita uyanankunata. ⁸Kankunaka Yaya Diosta mañahushpaykichika ama paykunashina ruraychichu. Manarapas Yaya Diosta mañahushpaykichira paymi yachan tukuy munahushkaykichita.

⁹Chayrayku kasna rimashpa mañaychi:

Yaya Dios, kanllami kanki yayan-chika.

Silipi kawsak kashpayki yanapay tukuy runakuna kan yapa ali kanaykita yuyanankunapa.

¹⁰Kay allpata ali kamachinaykita ruray.

Imashnami silipi munashkaykita ruranahun, yanapay chasnallata kay allpapipas runakuna munashkaykita rurashpa kawsanankunapa.

¹¹Karan puncha ñukanchita kuy mikunanchita.

¹²Llakichiy ñukanchita mana alita rurashkanchikunamanta.

Imashnami ñukanchikuna runa masinchikunata llakichinchimaña alita ñukanchita rurashkankunamanta, chasnallatata ñukanchitapas llakichiy.

¹³Anchuchiy ñukanchita supaymanta. Ama sakiychu pantachichisha nishpa pay ñukanchita sinchita kamashpan mana alikunata rurananchipa.

Ashwan kishpichiy ñukanchita tukuy mana alikunamanta. Chasna kachun.

¹⁴Kankuna runa masikichikunata llakichishpaykichika kankunata mana alita rurashkankunamanta, silipi kawsak Yayanchimi kankunatapas tukuy millaypata rurashkaykichimanta llakichinka. ¹⁵Kankuna runa masikichita mana llakichishpaykichika Yayanchika manami kankunataka llakichinkachu uchaykichikunamanta.

Jesuska yachachin imashnami mana mikushpa Yaya Diosta kushichishunchi

¹⁶Kankuna Yaya Diosta yuyarishpa maykan punchami mana mikushpa kahushpaykichika ama uyaykichika

llakirishkashina kachun, chay yanka nishpa rimak runakunapashina. Yapa munashpan-kuna tukuy runakuna yachanankunapa yarkay wiksa chishiyahushkankunata llakirishka uyayu tukunahun. Alita uyawaychi. Chasna rurak runakunataka Yaya Dioska mananami kushichinkachu. Runakuna paykunata kushichishkankuna-lawa kiparinkakuna.

¹⁷⁻¹⁸Mana mikuspha Yaya Diosta mañahushpaykichika uyaykichita alita mayllaychi, chukchaykichita alita ñakchariychi kushilla rikurinaykichipa, nima pi yachanarpa mana mikuspha kahushkaykichita. Yaya Dioslla yachachun chasna kahushkaykichita. Chay nima pi yachashkan rurashkaykichi-ta rikushpan alita rurashkaykichi-manta kankunata kushichinka.

**Jesuska yachachin silipi kahuk sumakunata munashpa
kawsananchipa**
(Lk. 12.33-34)

¹⁹Kay allpapira kawsahushpaykichi ama imaykichikunata mirachishpa kawsaychichu. Shuk imakunata kumehenkunaka mikunahun, shuk imakunaka ismunahun. Chaymanta shuwakunapas wasikichipi yaykushpan-kuna imaykichikunata apanahun.

²⁰Ashwan Yaya Diosta alita kasushpa kawsaychi tukuy chay silipi kahuk sumakunata apinaykichipa. Chaypi nima shukta kumehen mikunchu, nima shuk ismunchu, nima shuwakuna yaykunahunchu apanankunapa. ²¹Chay-rayku alita yuyariychi imatata ashwanta munankichi. Imaykichikunata mirachishpa kawsahushpaykichika chayllatami yuyarinkichi tukuy shunkuykichimanta pacha. Yaya Diospa munashkanta rurashpa kawsahushpaykichika tukuy shunkuykichimanta pacha payllatami yuyankichi.

**Jesuska yachachin punchapishina
kawsananchipa**
(Lk. 11.34-36)

²²⁻²³Ñawinchika ñukanchirayku punchata rikuchikmi. Ñawikichi ali kashpanka alita rikuk punchapi purihushkashina kawsankichi. Ñawiki-chi mana ali kashpanka amsapi purihushkashina kawsankichi. Tukuy kankunapi punchata rikuchikshina tukuya alita riksichik asirtachik kashkaka waklishpa amsashina tukushka kashpanka nima imata asirtashpa yapa manchaypa amsa tutapi purihushkashinami kawsankichi.

**Jesuska yachachin mana
kullkiraykulla yuyarishpa
kawsananchipa**
(Lk. 16.13)

²⁴Nima maykan kamachishkan runa atipanchu chay ratulla ishkay patroyninrayku tarawanata. Shukllata kasunan tiyan. Shuk patroyninta kasushpanka shuktaka mana kasunkanca-chu. Kankunaka chay tarawak runashi-nami kankichi. Kullkita munashpalla kawsashpaykichika manami atipanki-chinachu Yaya Diosta kasushpa kawsanata.

**Jesuska yachachin Yaya Dios
wawankunata kuyrananmanta**
(Lk. 12.22-31)

²⁵Chayraykumi kankunata rimani, ama muspariyachichu, ¿imatashi mikusha, imatashi upyasha kawsanay-nipa? nishpa. Kawsananchimi mikunamanta ashwan valik kan. Chasnallata amá yuyariyachichu ¿imatashi churari-sha? nishpa. Aychanchimi churarinamanta ashwan valik kan. ²⁶Rikuychi, imashnami pishkukunaka pawashpa kawsanahun. Paykunaka nima shuk

muyuta tarpunahunchu mikunankuna-
napa. Paykunapaka nima tampunku-
naka tiyanchu pallashkankunata
wakaychanankunapa. Mana nima shuk
muyuta tarpushpankunapas silipi
kawsak Yaya Diosmi paykunataka
achka muyukunata kun mikunankuna-
napa. Ashwan kankunataka Yaya Dioska
pishkukunamanta pasatami yuyan,
tukuy munashkaykichita kun.²⁷ Chay-
mantapas kawsanaykichita yapa
yuyarishpaykichipas nima shuk urata
atipankichichu mirachinata.

²⁸ Mana nima chayta atipashpayki-
chika ñimaraykuta musparinkichi
imawami llachapaynita rantisha nishpa?
Rikuychi chay suma sisakunata,
imashnami wiñanahun. Paykunaka
nima tarawanahunchu, nima puchkana-
hunchu llachapankunaryku. Mana
tarawashpankunapas suma churarishka-
shina kanahun. ²⁹ Nawpa atun apu
Salomón wañupa yapa suma ali
churarishkanmanta chay sisakunaka
ashwan alita rikurinahun. ³⁰ Kiwaku-
naka chakirinalla, rupachinalla
kashpankunapas Yaya Dios suma
sisayukunata ruran. Chayta rikushpayki-
chi ñimaraykuta mana kirinkichichu
Yaya Dios kankunataka ashwan alita
kuyrananta? ³¹ Yaya Dioska kiwa
sisakunamanta kankunataka ashwan-
tami yuyan. Chayrayku ama
musparishpa kawsaychichu, imatashi
mikuša, imatashi upyasha, imatashi
churarisha nishpa. ³² Yaya Diosta mana
riksik runakunami chasna yuyawa
kawsanahun. Kankunaka ama paykuna-
shina kawsaychichu. Ashwan kankunapa-
ka tiyanmi alita kuyrak silipi kawsak
Yaykichi Dios. Paymi alita yachan
imakunami pishin kankunapaka.
³³ Chayrayku tukuy shunkuykichimanta
pacha munaychi Yaya Dios kankunata
kamachinanta, paypa munashkanta

rurashpa kawsanatapas. Chasna
kawsashpaykichimi payka tukuy
munashkaykichitapas kankunata kunka.
³⁴ Tukuy puncha Yaya Dios yanapak
kashpan ama yapa yuyarishpa rimaychi-
chu kayaka imashi pasawanka nishpa.
Kayantimapas Yaya Diosta yuyashpayki-
chika payka yanapankallami. Chasna
kashpan ama musparishpa yuyariyichi-
chu kayarayku, kayawasharaykupas.

**Jesuska yachachin mana shuk
runamanta mana alichu kanki
nishpa rimananchipa**
(Lk. 6.37-38,41-42)

7 ¹Ama shuk runa masikichimanta
rimaychichu payka mana alichu
kan nishpa. Chasna rimashpaykichika
Yaya Dioska kankunamantapas rimanka
paykunaka mana alichu kanahun
nishpa. ²Imamantachari kankuna runa
masikichimanta rimankichi payka mana
alichu kan nishpa chaymantallatamatii
Yaya Dioska kankunamantapas rimanka
paykuna mana alichu kanahun nishpa.
Imashnami kankuna munankichi runa
masikichi kastigay tukunanta, chasnalla-
tatami kankunapas kastigay tukunkichi.
Maykantachari kankuna chapankichi
runa masikichi rurananpa chaymantal-
latamatii Yaya Dioska kankunatapas
tapunka. ³⁻⁵Runa masikichipa ñawinpi
shuk uchilla susyastu tiyamaka, shuk
ratu rikunkichima. Ashwan kankunaka
kikin ñawikichipi ashwan atun susya
tiyamaka, mana rikunkichimachu.
Ñawikichipi ashwan atun susya
tiyamaka runa masikichipa ñawinpi
kahukmanta, mana alichu kama payta
rimanaykichipa ñawikimanta susyata
surkushara nishpa. Chasna rurankimaka
kan kikintami llullachirinkima. Ashwan
puntiru kan kikinpa ñawikimantara
chay atun susyata surkuy. Chaymanta
alita rikushpayki runa masikipa

ñawinmanta chay uchillastu susyata surkuy. Chasnallatata puntiru kan kikinpa uchaykita sakinayki tiyan. Chaypirami atipankichi runa masikita kunanata paypa uchanta sakinanpa.

⁶Chaymanta Yaya Diospa shiminta ama yachachiychichu mana kasunayak runakunata. Chasna runakuna allkukunashina, kuchikunashina mana yuyayyuchu kanahun. Paykunata yachachishpaykichika yapa chaniyu wallkata kuchikunarayku wichuhukshina kankichima kuchikunaka saru saru ruranankunapa. Chasnallatata shuk runakuna Yaya Diospa shiminta mana munanahunchu, nima uchillastuta. Paypa shiminka yapa chaniyushina kashpanpas paykuna mana valichishpa asichinahun. Kankunata chiknishpa piñarinahun. Chayrayku maykankunami Yaya Diospa shiminta munanahun, paykunallata yachachiychi.

**Jesuska yachachin tukuy
munashkanchita Yaya Diosta
mañashpa tapunanchipa**

(Lk. 11.9-13, 6.31)

⁷Yaya Diosta tapushpaykichika payka munashkaykichita kunkami. Maskashpaykichika Yaya Diosta, payta tarinkichimi.

Silipi yaykunayashpa punkunpi kayashpaykichika Yaya Dioska paskankami. ⁸Maykanmi tapun, paytaka kunkami. Maykanmi maskan, tarinkami.

Maykanmi punkupi kayan, payraykuka paskankami. ⁹Alita yuyariyichi. Wawaykichi panta tapushpanka kankunaka mana rumita kunkichimachu mikunanpa.

¹⁰Challwata tapushpanka mana machakuyata kunkichimachu mikunanpa.

¹¹Kankuna mana alita rurashpa kawsakkuna kashpaykichipas wawaykichi alikunallata kunkichi. Ashwan silipi kawsak Yayanchika kankunata alikunallatami kunka payta tapushpaykichika.

¹²Kankuna munashpaykichika runa masikichi kankunarayku alita ruranan-kunapa, ashwan kankunara paykunarayku alita ruraychi. Chasnallatata Moisespa killkashkanta yachachikkuna, Yaya Diospa yachayninya yachachikkunapas ñawpamanta pacha ñukanchita yachachirkakuna.

**Jesuska yachachin Yaya Diosta
katihushpanchi ñañu ñampita
purihukshina kananchita**

(Lk. 13.24)

¹³Kankuna ñañu punkutashina yaykuychi. Achka runakuna paykuna kikinpa munashkankunallata rurashpa kawsanahun. Paykuna anchu punkutashina yaykushpa anchu ñampipi purihukshina kanahun. Chay anchu ñampipi purihukshina kashpankuna nina mana wañukma paktankakuna.

¹⁴Chaymanta mana achka runakunachu Yaya Diospa munashkanta rurashpa kawsanahun. Paykunaka ñañu punkutashina yaykushpa ñañu ñampipi purihukshina kashpankuna parisishpa kawsanahun. Chay ñañu ñampipi purihukshina kashpankuna Yaya Diospa kawsanani paktankakuna.

**Jesuska yachachin llullachik
runakunamanta kuyrarinanchipa**

(Lk. 6.43-44)

¹⁵Kankunaka alita kuyrariyichi llullachishpa yachachikkunamanta. Paykunaka Yaya Diospa rimashkanta alita yachachihunchi nishpa Yaya Diosta alita kasukshina rikurinahun. Chasna kashpanpas mana tukuy shunkunkunamanta pachachu payta katinahun. Chayrayku mana ali yuyayyu kashpankuna kankunata pantachichinkakuna manana payta kasushpa kawsanaykichipa. ¹⁶Chasna llullachik runakunataka kawsanankuna-

mantami riksinkichi. Rikuychi, millaypa kasha kaspika mana muyuyamachu ali muyuta. Chinikunaka mana muyuyamachu mishki mikuna muyuta. ¹⁷Shuk ali kaspika ali muyullata muyuyan. Millaypa kaspika mana mikuya millaypa muyuta muyuyan. ¹⁸Ali kaspika mana atipanchu muyuyanata millaypa muyuta. Nima millaypa kaspika atipanchu muyuyanata ali muyuta. ¹⁹Tukuy millaypa tarpukunataka pitishpa ninama wichunchi, mana alita muyuyashkanrayku. ²⁰Chayrayku yachachikkunata kawsanankunaman-tami riksinkichi ali yachachikkunachu kanahun manachu.

**Jesuska yachachin Yaya Diosta
kasushpa kawsak runakunalla
siluma rinankunata**
(Lk. 13.25-27)

²¹Maykankunami Yayayni Jesús, Yayayni Jesús yanka nishpa rimanahun, Yaya Diosta mana tukuy shunkunkunamanta pacha katihushpankunaka chaykunaka Yaya Diospa kamachishkan tukushpa paypa ali kamachihushkanpi manami kawsankakunachu. Ashwan maykankunami ruranahun Yayaynipa munananta, chaykunallami kamachi-hushkanpi kawsankakuna. ²²Ñuka shamuhushkayni puncha rimasha, maykankunami siluma rinkakuna, maykankunami mana rinkakunachu. Chay puncha achka runakuna rimawan-kakuna: Yayayni Jesús, Yayayni Jesús, ñukanchimi kanpa shutikipi yachachirkanchi, kanpa shutikita rimashpa supaykunata llukshichirkanchi. Chaymanta kanpa shutikita rimashpa atun yachaywa achka ruranakunata rurashkanchi nishpa. ²³Chaypina paykunata aynisha: Kunkunaka yanka llullashpa shutimipi rimarkankichi. Mana ñukata katiwashkankichichu.

Millaypata rurakkuna kashpaykichi mana runaynikunachu kankichi. Chasna kashpaykichi anchuriychi ñukamanta nishpa.

**Jesuska ishkay runakuna wasita
rurashkankunamanta yuyachishpa
yachachin**
(Mk. 1.22; Lk. 6.47-49)

²⁴Maykanmi rimashkaynita alita kasushpa kawsan, chaymi shuk alita yuyarik runashina kan. Chay runaka luma awapi uchukunata allashpan orkonta sumakta shayachishpan wasinta rurashka. ²⁵Sinchita tamyashpan yaku untayka shamushpan sinchi wayra wasinta waktashpan mana urmankachu, luma awapi orkonkunaka sumakta shayachirishka kashkanrayku.

²⁶Maykanmi rimashkaynita mana kasunchu, chaymi shuk mana alita yuyarik runashina kan. Payka wasinta ruran tiyipi, mana yapa ukuta allashpan urkunkunata shayachin.

²⁷Sinchita tamyashpan yaku untayka shamushpan wayraka chay wasita waktashpan utkalla urman. Chasna urmeshpan paki paki tukun.

²⁸⁻²⁹Jesús yachachishkanta tukuchishpan tukuy runakuna mancharishpan-kuna paykunapura rimarkakuna: Kay Jesuska Yaya Diospa yachayninwami yachachin. Tukuy kay Moisespa killkashkanta yachachikkunamanta yapa alitami ñukanchita yachachin nishpa.

**Jesuska aycha ismochik unkuyyu
runata ampirka**
(Mk. 1.40-45; Lk. 5.12-16)

8 ¹Jesuska chay lumamanta urayku muhushpan achka runakuna payta katirkakuna. ²Chasnallapi shuk aycha ismochik unkuyyu runaka, nima pita kayllayanata atipashpantata Jesusta

kayllayarka. Puntanpi kunkurishpan rimarka:

Yaya Jesús, yachani ampinata atipawanaykita. Kamrayku ali kashpan kay unkuynimanta ampiway, ampirishpayni kuti atipanaynipa tantaylla kawsanata ayluynikunawa nishpa.

³Chaypina Jesuska chay runataka makinwa llankashpan nirka:

Ari, munanimi. Ñami ampirishkanki. Chasna nishkanllawa chay runaka tukuy unkuynimanta ampirishka karka. ⁴Chaymantapas rimarka:

Ama nima pita kwintankichu kanta ampinkaynimanta. Kunanka *saserdotellama riy ampirishkaykita rikunanpa. Chaymanta ñawpa Moisespä killkashkanpi kamachishkatashima ruray, Yaya Diosta kunayki kashkata apashpa churak rinki. Chasna rurashkaykimantam tukuy runakuna yachankakuna unkushkaykimanta ampirishkaykita.

Jesuska shuk romano kapitanpa runanta ampirka
(Lk. 7.1-10)

⁵Kapernaum llaktapi paktashpan shuk kapitan Jesusta kayllayarka. Payka *Roma llaktamanta suntalunkunata kamachik karka. Chaypi Jesusta tapurka yanapananpa:

⁶Yachachik, shuk runaynimi wasinipi yapa unkushkalla kawsan. Mana kuyurinata atipanchu. Yapa nanaywa parisishpa kawsan.

⁷Chaypi Jesuska aynirka:

Wasikima rishpayni paytaka ampisha.

⁸Chaypina chay kapitanka Jesusta aynirka:

Yachachik, ñukaka mana nima imachu kani wasinipi yaykunaykipa. Kaymantalla rimashpayki atipankimi runaynita ampinata. ⁹Ñukapapas tiyanmi apuynikuna kamachiwanankunapa. Paykuna kamachiwashpankuna

kasunayni tiyan. Chasnallatata ñuka suntaluynikunata kamachishpayni paykunapas kasuwanankuna tiyan. Shuk suntaluta maymapas rinanpa rimashpayni kunalla kasushpa rin. Shukta kayashpayni utkalla kasushpan shamen. Chaymanta shuk runaynita imatapas rurananpa rimashpaynika kunalla ruran. Chasnallatatami shuk shimillawa atipanki anchuchinata unkuya chay runaynimanta.

¹⁰Chay kapitan chasna rimashpan Jesuska yapa kushikurka. Chaymanta tukuy chay katihukkunata rimarka:

Kankunata rimani, tukuy israel masinikanamanta nima maykan ñukata tukuy shunkunmanta pacha kiriwashkanta tarishkanichu kay *romano runatashina. Ñukanchi israel runakuna Yaya Diospa akllashkankuna kashpanchitata kankunaka mana kay runashinachu kiriwankichi.

¹¹Chayrayku kankunata rimani, shuk punchami Yaya Dioska tukuy payta kirikkunallata, mana israel runakuna kashpankopas tantachinka inti llukshinamanta, inti yaykunamantapas. Chaypi ñawpa yaya rukunchikuna Abrahamwa, Isaakwa, Jakobwa pakta Yaya Diospa kamachinan mushu mundupi tiyarinkakuna mikunankunapa. ¹²Ñukanchi israel runakuna Yaya Diospa akllashkankuna kashpanchipas Yaya Diospa kamachinan-kuna kananchipa, achka kankunamanta ñukata mana kirishkankunaryku manchaypa amsamami wichuy tukunkakuna. Chaypi sincita parisishpa wakankakuna, piñaywa kirunkunata kanirkankuna nishpa.

¹³Chaypina kapitanta rimarka:

Tukuy shunkuykimanta pacha ñukata kiriwashkaykirayku runaykita amphis-kani. Chayrayku kutiy wasikima nishpa.

Chasna rimashkanllapi chay romano kapitanpa runanka ña ampirishka karka.

Jesuska ampirka Pedropas
warminpa mamanta
(Mk. 1.29-31; Lk. 4.38-39)

¹⁴Chaymanta Jesuska Pedropas wasinma rirka. Chaypi Pedropas warminpa mamanta tarik rirka kalinturawa sirihukta. ¹⁵Chaypina Jesuska chay warmipa makinta llankashpan kalinturanka pasapurka. Chay ratulla payka atarishtpan Jesusta runankunata-pas upyachirka kararka.

Jesuska achka unkushka
runakunata ampirka
(Mk. 1.32-34; Lk. 4.40-41)

¹⁶Ña amsayahushkanpi achka supay yakyushka runakunata pushamurkakuna Jesusma. Chaypi Jesuska shuk rimashkanllawa chay supaykunataka llukshichirka. Unkushka runakunatapas tukuya ampirka.

¹⁷Chasna Yaya Diospa yachayninha yachachik Isaias ñawpa paymanta killkarka:

Pay kikin parisishpan nanaykunata, unkuyninchikunamanta ampiy tukushunchi. Tukuy ima nanaykunamanta ñukanchita aliyachinka nishpa.

Chay killkashkanpi rimashkanshina Jesuska runakunata tukuy unkuykunamanta ampirka.

Shuk runakuna Jesusta
katinyarkakuna
(Lk. 9.57-62)

¹⁸Shuk puncha kutikashka achka runakuna Jesupsa kuchunpi tantarirkakuna. Jesuska paykunata rikushpan runankunata rimarka:

Akuychi chimpashunchi kay kuchata nishpa.

¹⁹Manara botipi yaykuhushpankunara Moisespa killkashkanta shuk yachachik Jesusta kayllayashpan rimarka:

Yachachik, maytapas rishpayki kanta katisha nishpa.

²⁰Jesuska payta aynirka:

¿Imata yuyarishpaykita katinyawanki? Rimashkaykichi, mahaskunapa tiyan uchkunkunaka. Pishkukunapapas tiyan wasinkunaka maypimi kawsanahun. Ñuka Yaya Diospa Kachashkan Runaka mana wasiyuchu kani maypimi samasha.

²¹Chaypina Jesusta shuk katik runa payta rimarka:

Yachachik, kanwa rinayashpaynipas manara atipanichu kunallaka. Yayaynita munanira kuyranata wañunan punchakama. Paypa aychanta allarishka urku uchkupi churashpa tapashkayniwasha kanwa risha.

²²Chasna rimashpan Jesuska mana munarkachu.

Kunalla aku ñukawa rishu. Sakiy Yaya Diospa shiminta mana kasunayak runakunaka wañushkankunata urku uchkupi churashpa tapanankunapa. Yayayki wañushpanka paykunami paypa aychanta uchkupi churashpa tapankakuna nishpa.

Jesuska sinchi wayra ulastapas
kasillayachirka
(Mk. 4.35-41; Lk. 8.22-25)

²³Chasna kwintashkankunawasha Jesuska runankunawa pakta shuk botipi uraykurakuna kuchata chimpanankunapa.

²⁴Chimpahushkankunapi kunkaymanta atun wayra shamurka. Chay wayraka yapa sinchita wayrahushpan atun ulaskuna shayarirkakuna. Botinkunapi yakuka untarihushpan ña tikranayarkakuna. Chay yaku wayrawa yapa ulasyahushpanpas Jesuska botipi puñurayahurka. ²⁵Chaypina paypa runankunaka yapa mancharishpankuna likchachirkakuna Jesusta.

¡Yaya Jesús, kishpicichy ñukanchita!
 ¡Ñami tikrahunchi!

²⁶Jesuska aynirka:

¿Imaraykuta chasna yapa manchari-hunkichi? ¿Kunankamachu manara tukuy shunkuykichimanta pacha ñukapi sinchikunkichi?

Chaymanta Jesuska atarishpan chay wayrata yakutapas sinchi shimiwa rimarka:

¡Kasillayay wayra! ¡Kasillayay ulas!

Chasna rimashkanllawa pasarirka wayraka, ulaspas mana ulasyarkanachu.

²⁷Chaypi runankunaka yapa mancharishpa tapunakurkakuna paykunapura:

Pishi kan kay runaka. Rimashkanllawa wayra yakupas kasushpa kasillayanahanu.

**Jesuska supayyashka
runakunata ampirka**

(Mk. 5.1-20; Lk. 8.26-39)

²⁸Chaymanta chay atun kuchata chimpashpankuna Jesuska runankunawa paktarkakuna *Gadara llakta kuchupi. Paktashpankuna ishkay supayyashka runakuna kallpashpa kayllayarkakuna. Paykuna kawsapayananun urku uchkupi, maypimi wañush-kakunata churashka karkakuna chaypi. Supayyashka kashpankuna yapa piñaywa manchaypa karkakuna, chayrayku nima pi atipapayananahunchu chay ñampita purinata. ²⁹Chay ishkay runa Jesusta kayllayashpankuna sinchita kaparishpa rimarkakuna:

Yaya Diospa Wawan Jesús, amara ñukanchita kastigayrachu. Manara chay kastigana punchaka paktarishkarachu nishpa.

³⁰Mana karupichu achka kuchikunaka mikuhlla karkakuna. ³¹Chaypina chay runakunapi kawsak supaykunaka Jesusta tapurkakuna:

Kay runakunamanta ñukanchita llukshichihushpaykika kachay ñukanchita chay kuchikunapi kawsananchipa.

³²Jesuska aynirka:

Ariya alimi, riychi.

Chasna rimashkanllawa chay supaykunaka chay ishkay runakunamanta llukshishpankuna kuchikunapina yaykuk rirkakuna. Chasnallapi tukuy chay kuchikunaka waykuma kallpashpa pultyarkakuna lumamanta yakuma. Chaypina chinkarirkakuna.

³³Chayta rikushpankuna kuchikunata kuyrak runakunaka yapa mancharirkakuna. Manchaywa kallparkakuna llaktankunama. Chaypi paktashpankuna tukuy runa masinkunata kwintarkakuna imashnami Jesuska chay supayyashka runakunata amphispa nishpa. Kuchikuna yakupi chinkarishkankunamantapas kwintarkakuna. ³⁴Chayta uyashpankuna tukuy chay llaktapi kawsak runakunaka llaktankunamanta llukshishpankuna Jesusta rikuk rirkakuna. Payta rikushpankuna rimarkakuna:

Yachachik, munanchi llukshinaykipa kay allpanchimanta, tukuy kuchinchikunata chinkachishkaykirayku nishpa.

**Jesuska shuk runata chakichik
unkuymanta ampirka**

(Mk. 2.1-12; Lk. 5.17-26)

9 ¹Chaymanta Jesuska runankunawa botipi uraykushpankuna kuti chay atun kuchata chimparkakuna. Chaypi paktarkakuna paypa llaktanma. ²Chaypina shuk runakuna shuk chakichik unkuyu runata llanchamanpi apamurkakuna Jesusma. Chay unkushkata apamuk runakunaka tukuy shunkunkunamanta pacha kirishpankuna yuyarirkakuna Jesús chay unkushkata ampinanta nishpa. Chaypi Jesuska paykunata rikushpan kirihushkankunata yacharka. Manara ampihushpan chay unkushkata rimarka:

Sinchikuriy wawki, tukuy uchaykikanamanta llakichirishkami kanki nishpa.

³Chayta uyashpankuna Moisespa killkashkanta shuk yachachikkuna yapa

piñarishpa yuyarirkakuna, kay runaka rimashkanwa Yaya Diosta yapa piñachihun. Yaya Diosshina tukunayashpa kay unkushkata rimashka tukuy uchankunamanta llakichihushkanta.

⁴Jesuska yuyarihushkankunata yachashpan paykunata rimarka:

¿Imaraykutaya chasna yuyarihunkichi ñukamanta? ⁵Kay runataka rimashkanimi uchayikunamanta llakichirishkami kanki nishpa. Chasna rimashpayni mana yachankichichu shutipa llakichishkachu manachu nishpa. Ñuka kay unkushkata rimaynima atariy, puriy nishpa. Pay alita purishpanna yachankichima ñuka payta ampiشكaynita. ⁶Yachanaykichiha ñuka Yaya Diospa Kachashkan Runa paypa yachayninwa runakunata uchankunamanta llakichinaynita kay allpapi, kunalla kay unkushkata ampisha.

Chasna rimashpan chay unkushkata rimarka:

Atariy. Llanchamaykita apishpayki kutiy wasikima.

⁷Jesús chasna rimashpan chay runaka ampirishka atarirka, llanchamanta apishpan wasinma kutirka.

⁸Chayta rikushpankuna runakunaka yapa mancharirkakuna. Yaya Diosta kushichishpa rimarkakuna: Yaya Dios, kushikunchimi kay runata atun yachaykita kushkaykirayku unkushkakunata ampinanpa.

Jesuska Mateota kayarka

(Mk. 2.13-17; Lk. 5.27-32)

⁹Chaymanta Jesuska llaktanmanta llukshishpan purihushkanpi ñuka *Mateota rikuwarka. Kullkita kobrana wasipi tiyarishpayni *impuestuta kobra payarkani *romano tukuy manta atun apurayku.

Chaypina Jesuska rikuwashpan rimawarka: Mateo, shamuy katiway.

Chasna rimawashpan atarishpayni Jesusta katirkanina. ¹⁰Chaymanta Jesusta

payta katihukkunawa pakta pusharkani wasinima chaypi mikunanchipa. Chaypi mikuhushpanchi achka *Roma llaktarayku *impuestuta kobra masinikuna, chaymantapas shuk millaypata rurak runakuna shamurkakuna, ñukanchiwa pakta tiyarishpankuna mikunankunapa. ¹¹Chaypina *fariseokunaka rikuhurakuna Jesusta ñukanchi millaypata rurak runakunawa pakta mikuhushkanta. Chaypina payta katikkunata tapurkakuna:

¿Imaraykuta kankunata yachachikka impuestuta kobra kkunawa, paykunashina mana alita rurak runakunawapas mikuhun?

¹²Jesús chayta uyashpan paykunata yachachirkha shuk yuyarinawa:

Rikuychi, alikunaka mana munanahunchu ampipta. Ashwan unkushkakunami ampipta munanahun ampirinankunapa.

¹³Yuyariyichi imatata Yaya Dioska rimanayan killkachishkanpi kasna nishpan:

Manami munanichu wiwakunata wañuchishpa kuwanaykichiha ñukata kushichiwanykichiha, ashwan munanimi runa masikichita llakichishpa yanapanaykichiha.

Chasna kashpanmi ñukaka mana shamushkanichu yanapanaynipa maykanmi riman mana uchayuchu kani nishpa. Ashwan shamushkanimi uchayukunata yanapanaynipa Yaya Diostana kasunankunapa.

Jesuska yachachin payta katikkuna

ñawpa katishkankunata manana

atipanankunata katinata

(Mk. 2.18-22; Lk. 5.33-39)

¹⁴Chaymanta Bawtisak Juanta katikkunaka Jesusta kayllayashpankuna tapurkakuna:

Ñukanchi, *fariseokunapas achka punchakuna mana mikushpa Yaya Diosta mañanchi. Ashwan kanta katikkunaka karan puncha mikunahunchu

lla. ¿Imaraykutaya mana ñukanchishina shuk shuk punchakuna mana mikushpa Yaya Diosta mañanahunchu? nishpa.

¹⁵Jesuska paykunata aynirka:

Rikuychi, shuk musuka warmiyahushpanka kayan tukuy ayllunkunata kushilla tantarishpa paywa pakta mikunkunkunapa. ¿Chasnaka chay kayashkankunaka llakirishkachu kanahuma? Mana. Ashwan shuk puncha kunrankunaka chay mushu warmiyahushkata anchuchishpanguna chay puncha shuti yapa llakirishpa shuk punchakuna mana mikunkakunachu nishpa. Chasna Jesuska rimarka pay kikin chay mushu warmiyahushkashina kashkanta yuyachishpa.

¹⁶Chaymanta Jesuska ashwanta paykunata asirtachinayashpan rimarka: Shuk yapa likirishka mawka kamisata mana rimintanchimachu shuk mushu llachapawa. Chasna chay mushuwa rimintashpanchika mawkaka ashwanta likirin.

¹⁷Chasnallatatami mushu *vinu putskuri-hushkata mana churanchimachu shuk mawka karamanta rurarishka bulsapi. Chay vinu urtiyashpan putskuri-hushpanka mawka karaka tukyashpan vinuka talirin. Ishkanti mana valinahunnachu. Chayrayku mushu vinuta mushu karamanta rurarishka bulsapi churanchi. Chasnaka ishkantimi mana waklinkachu.

Nukaka Yaya Diospa mushu shimentami yachachihuni. Ñawpa yaya rukuykichiku-naka mana chasnachu yachachipayarka-kuna. Kankunaka katinaykichi tiyan kay mushu yachachihushkaynitana. Mana atipankichichu chapuchinata chay ñawpa yachakushkaykichiwa.

**Jesuska Jairopa shipas
wawanta kawsachirka
(Mk. 5.21-43; Lk. 8.40-56)**

¹⁸Jesús chay runakunata yachachi-hushkanllapi, ñukanchi israel runaku-

napa shuk tantarinanchi wasipi kamachik payta kayllayarka. Payka Jesuspa puntanpi kunkurishpa tapurka:

Kunalla wawaynika wañushka.

Chasna wañushka kashpanpas kanka ñukawa wasinima rishpaykika makikiwi llankashpaykimi wawaynika kawsarinka nishpa.

¹⁹Jesuska atarispan ñukanchi runankunawa pakta chay apupa wasinma rirk'a. ²⁰Chasna rihuškanchipi, shuk unkushka warmi Jesusta washanmanta kayllayarka. Payka chunka ishkay watata unkushka karka. Tukuy uras yawar paymanta urmapayan. Chay warmika Jesuspa washanmanta churarishkanta llankarka.

²¹Jesuspa churarishkanpa shiminllata llankashpaynimi ampirisha nishpa yuyarirk'a. ²²Chasna chay warmika yuyarishpa llankashpan Jesuska washanma tikrashpan payta rikurka. Chaypina llakichishpan rimarka:

Pani, kushikuy. Tukuy shunkuykimantra pacha kiriwashkaykirayku ampirishka kanki.

Chayllata rimashpan chay unkushka warmika ampirirk'a.

²³Chasna ampishkanwasha Jesuska paktarka chay kamachikpa wasinpi. Chaypi achka runakuna sinchita kaparishpa wakahurkakuna. Kenata pukuk runakunaka chaparkakuna chay wañushkata urku uchkupi churashpa tapak rinankunapa. ²⁴Tukuy paykunata rikushpan Jesuska rimarka:

Llukshiychi kaymanta. Kay shipaska manami wañushkachu, puñuhunmi.

Chasna rimashpan tukuy chay runakunaka Jesusta asichirkakuna. ²⁵Chaypina Jesuska tukuy chay runakunata kanchama llukshichirka. Chaymanta yaykushpan chay shipasta makinmanta apirka. Chaypina chay shipaska atarirk'a. ²⁶Chaymanta tukuy chay

llaktakunapi kawsak runakunaka Jesús chay shipasta kawsachishkanmanta yacharkakuna.

**Jesuska ishkay
wisku runata ampirka**

²⁷Jesús chay apupa wasinmanta llukshishpan ishkay wisku runakuna sinchita kayashpa katirkakuna:

¡Davidpa Miraymanta Kishpichik, llakichiy ñukanchita! nishpa.

²⁸Jesús shuk wasima yaykushpan chay ishkay wiskukunapas yaykurakuna. Kayllayashpankuna Jesuska paykunata tapurka:

¿Kirinkichichu ñuka kankunata ampinaynita?

Ari yachachik, kirinchimi nishpa aynirkakuna.

²⁹Chaypina Jesuska ñawinkunata llankashpan rimarka:

Tukuy shunkuykichimanta pacha kiriwashkaykichirayku ampirishka kiparinkichi.

³⁰Chasna rimashpan chay ishkay runakunaka alitana rikurkakuna. Chaypina Jesuska paykunata alita kunarka:

Nima pita kwintankichichu ñuka kankunata ampishkaynimanta.

³¹Chasna kunashpanpas paykunaka kwintak rirkakuna tukuy chay llaktakunapi kawsak runakunata imashnamí Jesuska paykunata ampishka nishpa.

**Jesuska mana rimanata atipak
runata ampirka**

³²Chay ishkay runakuna llukshishkan-kunawasha shuk runata Jesusma apamurkakuna. Chay runaka supay yaykushka kashpan mana atiparkachu rimanata. ³³Jesuska supayta chay runamanta llukshichishpan chaypira chay runaka atiparka rimanata. Chayta rikushpankuna chay runakunaka

mancharishpankuna rimarkakuna paykunapura:

Nima ima uras rikushkanchichu chasna ampix runata kay Israel allpanchipi.

³⁴Chaypina *fariseokunaka rimarkakuna:

Kay ampix runaka supaykunapa apunpa yachayninwa supaykunata llukshichin nishpa.

Jesusta chiknishpankuna chasna rimarkakuna.

Jesuska runakunata llakichirka

³⁵Chaymanta Jesuska shuk llaktama shuk llaktama purirka tantarinankuna wasikunapi runakunata yachachinanpa kay suma ali shimita Yaya Diospa ali kamachinan kay allpapi ña kallarishkan-manta. Chasna yachachihushpan Jesuska runakunata tukuy unkuykunamanta parisinakunamantapas ampiayarka.

³⁶Jesuska chay achka runakunata rikuhushpan paykunata llakichirka, paykuna mana amuyu shikwarishka sampayashka obehakunashina kashpan-kuna. ³⁷Chaypina ñukanchita rimarka:

Kay runakuna ña pallanapa pukushka muyukunashina kahunkuna. Chasna kashpanpas Yaya Diospa shimita yachachikkunaka mana achkachu kanahun muyuta pallahuksina runaku-nata Yaya Diosrayku tantachinanku-napa. ³⁸Chayrayku Yaya Diosta mañaychi, paypa wawankunata tukuy llaktakunama kachananpa, runakunata yachachik rinankunapa.

**Jesuska chunka ishkayta akllarka
kachanan runankuna kanankunapa
(Mk. 3.13-19; Lk. 6.12-16)**

10 ¹Chaymanta Jesuska ñukanchi chunka ishkay akllashkan runankunata kayashpan rimarka:

Kunan ñuka Yaya Diospa yachayninta kankunata kusha tukuy supaykunata llukshichinaykichipa runakunamanta. Chaymantapas atipankichi ampinata runakunata tukuy unkuykunamanta parisinakunamantapas nishpa.

²Jesús *apostolnikuna kankichi nishpa chunka ishkay akllashkanpa shutinkunaka karkakuna: Simón, maykantami Jesuska shutiyachirka Pedro; Andrés Simonpa wawkin; *Santiago Juanpas Sebedeopa wawan-kuna; ³⁻⁴Felipe, Bartolomé, Tomás, ñuka *Mateo. Nawpa karkani *impuestuta kobrak *romano tukuymanta atun apurayku. Chaymanta Santiago Alfeopa wawan; *Tadeo, Simón, maykantami rimapayarkakuna *Selote. Chaymantapas Judas Iskariote, maykanmi chaywasha Jesusta apichinan karka.

**Jesuska chunka ishkay
akllashkankunata kacharka Yaya
Diospa kamachinanmanta
yachachinankunapa
(Mk. 6.7-13; Lk. 9.1-6)**

⁵Jesuska ñukanchi chunka ishkay akllashkankunata shuk shuk llaktakunama kachahushpan rimarka:

Riychi israel masinchikunapa llaktakunallapi. Ama riychichu mana israel runakunapa llaktankunamaka, nima *Samaria allpa llaktakunapi yaykunkichchu. ⁶Israel masinchikunallata yachachik riychi. Paykunaka mana amuyu obebakuna pantashkashinami kahunkuna.

⁷Rishpaykichi rimaychi ñami kallari-hun Yaya Diospa ali kamachinanka kay allpapi nishpa. ⁸Chasna yachachihush-paykichi unkushkakunata ampiychi, wañushkakunata kawsachiychi, aycha ismuchi unkuyyu runakunata ampiychi, supay yakyushka runakunamanta supaykunata llukshichiychi. Yaya

Dios kankunata yachayninwa yanapash-panmi tukuy chaykunata atipankichi ruranata. Yaya Dios kankunata yanka yanapashkanrayku, kankunapas nima imata tapunkichichu chay ampishkayki-chi runakunamanta.

⁹Chay ñampita rihushkaykichi nima kullkita apaychichu, ¹⁰nima bulsata, nima ashwan shuk churarinaykichita, nima chakikichirayku ashwan shuk churarinaykichita, nima ashwan shuk tulaykitchita apankichichu. Chay churarishkaykichillawa riychi. Runakunata yanapashpaykichi yachachishpaykichi paykunapas kankunata karanankuna tiyan.

¹¹Maykan llaktapi paktashpaykichi maskaychi shuk wasi amuta, maykanmi kankunata ali yuyaywa kayanka. Paypa wasinpi kipariyichi shuk llaktama rinaykichi punchakama. ¹²Chay runapa wasinpi yaykuhushpaykichi saludaychi tukuy chay wasipi kawsak runakunata.

¹³Paykuna kankunata alita kayashpanku-naka Yaya Dios paykunata yanapanka. Mana alita kayashpanku-naka Yaya Dios mana paykunata yanapankachu. ¹⁴Chay runakuna wasinkunapi mana kayashpanku-naka nima rimashkaykichita uyanayash-pankunaka llukshiychi chay wasimanta chay llaktamantapas. Lluukshihushpaykichi rimaychi Yaya Dios kankunata kastigankami, mana paypa shiminta uyanayashkaykichirayku nishpa. ¹⁵Alita uyawaychi. Shuk punchami Yaya Dioska tukuy runakunata tapunka rurashkankunamanta. Chay tapunan punchami Yaya Dioska ñawpa Sodoma llaktapi Gomorra llaktapi kawsak runakunata kastigashkanmanta pasatami chay mana kasunayak runakunata kastiganki.

**Jesuspa runankuna chikniy
tukunankunamanta riman**

¹⁶Chaymanta Jesuska rimarka: Rikuychi, ñuka kankunata kachani

obehakunatashina sacha allkukuna chawpipi. Chayrayku yapa yachaywa, ali yuyayllawa kawsaychi.¹⁷ Kuyrariyichi kankunata chiknik runakunamanta. Paykuna kankunata apishpa apukunama pushankakuna kastigachinankunapa. Tantarinkunkuna wasikunapi yaykush-paykichika kankunata asutichinkakuna.¹⁸ Nukamanta yachachishkaykichiraykumi chay runakunaka kankunata apishpankuna apunkunama pushankakuna. Shukkunata kankunamanta ashwan atun apukunamas pushankakuna. Chasna apirishka tukushpaykichi tukuy paykunata, mana israel apukunatas yachachishkaynita riksichinaykichi tiyan.¹⁹ Chay apukunama kankunata pushashpankunkuna ama mancharinkichchu, imatashi rimasha, imashnashi aynisha nishpa. Yaya Diospa Espiritunmi kankunata chay uras yuyachinka imatami rimanaykichi tiyan nishpa.²⁰ Pay kankunata yuyachishpanmi atipankichi tukuy apukunata ayninata. Manami kankuna kikinpa yuyaykichimantachu rimankichi.

²¹ Chay parisina punchakuna chiknik runakunaka kikin wawkinkunata yanka llullashpa apukunama pushankakuna wañuchichinankunapa, chaymantapas yayakuna wawankunata. Wawakuna yapa piña tukushpankuna yayankunata apichinkakuna wañuchichinankunapa.²² Tukuy runakuna kankunatas chikninkakunami ñukata kasushpa kawsahushkaykichirayku. Kankunata chiknishpankunapas wañunaykichi punchakama ñukata kirishpa kawsash-paykichika Yaya Diosmi kankunata chay atun kastigananmanta kishpichinka paywa pakta silipi kawsanaykichipa.²³ Shuk llaktapi kawsak runakuna kankunata wañuchinayashpankunkuna chay llaktamanta mitikuychi shuk llaktama. Alita

uyawayachi. Manarapas kankuna tukuy kay Israel allpanchi llaktakunapi yachachishpaykichira ñuka Yaya Diospa Kachashkan Runa kuti shamusha.

²⁴ Nima shuk katik runa payta yachachikmanta ashwan yachanchu. Nima shuk runa patronmanta ashwan kamachikchu kan.

²⁵ Shuk katik runa payta yachachikshina tukushpan kushilla kama. Chaymanta shuk runa patronshina tukushpan kushilla kama. Ñuka ali yachachik kashpaynipas shuk runakuna chikniwashpankuna rimawanahun supaykunapa apun *Belesbú kanaynita. Nukamanta chasna llullashpa rimashpankuna kankuna katiwak runaynkunamanta ashwan millaypata rimankakuna.

**Jesuska yachachin chiknik
runakunata mana manchananchipa
(Lk. 12.2-7)**

²⁶ Ama manchaychichu chay kankunata chiknik runakunata. Rikuychi, nima ima pakalla rimashkaka, nima pakalla rurashkaka pakalla kiparinkachu. Tukuy yuyayta shunkunchipi pakahushkanchita Yaya Dioska shuk punchami tukuy runakunata riksichinka.²⁷ Chasnallatatami kankunallata tutapi pakalla rimashkaynita tukuy runakunata mana pakashpa rimaychi. Chasnallatata chunllalla yachachishkaynita kankunana sinchita tukuy runakunata yachachiychi.²⁸ Ama manchaychichu kankunata wañuchinayak runakunata. Paykuna wañuchishpankunapas mana atipanhunchu kankunata nina mana wañukma kachanata. Yaya Diosllami atipan tukuy mana ali rurak runakunata wañushkunkunawasha nina mana wañukma kachanata. Chayrayku Yaya Diosllata manchaychi, payllata kasushpa kawsaychi.

²⁹ Yuyariyichi pishkukunapi. Mana yapa chaniyu kashpankuna ishkaystuta atipanchi rantinata shuk kullkistullawa. Chasna

mana yapa chaniyu kashpankunapas nima shuk wañunchu Yaya Dios mana munashpanka.³⁰⁻³¹ Yaya Dios kankunatapas alita kuyran. Pishkukunamanta ashwan pasatami kankunata yuyan. Kankunata yuyashpan alita riksin. Nima shuk uchilla chukcha umaykichipi tiyashkaka paymanta kishpinchu. Chayrayku ama manchaychichu nima pita nima imatapas.

**Tukuy runakunapa puntankunapi
Jesukristumanta rimananchi tiyan**
(Lk. 12.8-9)

³² Jesúz yachachihushkanllapi rimarka: Maykan runami mana pinkashpa ñukamanta runakunapa puntankunapi riman Jesusta katik kani nishpa, paymantaka ñukapas silipi kawsak Yayayni Diospa puntanpimi rimasha kay runata riksinimi nishpa.³³ Ashwan maykanmi runa masinkunapa puntanpi pinkashpa ñukamanta riman payta mana riksinichu nishpa, paymantaka ñukapas silipi kawsak Yayayni Diospa puntanpi rimasha kay runata mana riksinichu nishpa.

**Jesusta katihušhpanchimi payta
mana munakkunaka ñukanchita
chikninhun**
(Lk. 12.51-53, 14.26-27)

³⁴ Ama yuyariyichichu ñuka kay allpama shamushkaymirayku runakuna kushilla shuk yuyayllawana kawsanankunata. Ashwan shamushkaymirayku mana shiminita kasunayak runakuna kankuna ñukata kasuk runakunawa chikninkushkashina manana shuk yuyayllawa kawsankunkuna.³⁵ Kunanmanta pacha shuk wasipi kawsak ayllupura ñukaranti manana shuk yuyayllawa kushilla kawsankunkachu. Chasna kashpan shuk wawa yayanta, shuk shipas mamanta, shuk nuera swegranta chiknispah kawsankakunka.³⁶ Ñukata katishpa kawsahushkaykichirayku kikin aylluykichi kankunata chikninkakunka.

³⁷ Mana ñukata yayaykichimanta mamaykichimanta wawaykichimanta-pas ashwan alita yuyawashpaykichika manami ñukata katikkunachu kankichi.

³⁸ Kasuwashkaykichirayku runakuna kankunata yapa chiknispah parisichinakunka. Chasna parisichishpankunapas wañuchinayashpankunapas alita kasuwashpa katiwanaykichi tiyan. Chasna parisichinankunata mana awantanayashpaykichika manami ñukata katikkunachu kankichi.

³⁹ Munashkaykichillata rurashpa kawsashpaykichika manami nima ima uras Yaya Dioswa wiñaypa kawsankichichu. Ñukata kasuwahushpaykichi kankunata wañuchishpankunapas Yaya Dioswami wiñaypa kawsankichi.

**Jesuska yachachin Yaya Diospa
kachashkankunata yanapananchipa**
(Mk. 9.41)

⁴⁰ Maypipas kankunata wasinkunapi yaykuchishpankunaka ñukatami yaykuchiwanahun. Ñukata yaykuchiwashpankunaka kachamuwashka Yayayni Diostapas yaykuchinahun.

⁴¹ Kankuna shiminita yachachik rishpaykichi shukkuna kankunata yaykuchinkakunka. Paypa kachashkan kashkaykichirayku Yaya Dioska paykunata kankunatashina rimanka alita rurashkankichi nishpa. Chaymanta ali rurak runakuna kashpaykichi shukkuna kankunata yaykuchinkakunka. Paykunatapas kankunatashina Yaya Dioska rimanka alita rurak runakuna kankichi nishpa.⁴² Maykanmi shuk ñukata chayra katiwak runata suma chiri yakullatapas upyachishpanka ñukata katiwahushkan-rayku, chay runataka Yaya Diosmi chasna rurashkanmanta kushichinka.

11 ¹ Jesúz ñukanchi chunka ishkay runankunata chasna yachachishkanwasha purirka tukuy Galilea allpa

llaktakunapi Yayan Diospa shiminta yachachinampa.

**Bawtisak Juan Jesusmanta
yachanayashpan runankunata
payma kacharka**
(Lk. 7.18-35)

²Chay uras Bawtisak Juanka karselpi kahurka. Chaypi *Kristupa rurahush-kankunata yachashpan ishkay payta katikkunata Kristuma kacharka.

³Chaypina payta tapurkakuna:

¿Kanchu kanki maykantami Yaya Dios kachanan karka? Manapika ¿shuktachu chapashunchi?

⁴Jesuska paykunata aynirka:

Riychilla, Juanta kwintak riychi tukuy uyahushkaykichita, tuluy rikuushkaykic-chitapas. ⁵Rimak riychi: Wiskukunaka mushumanta rikunahun. Mana purinata atipakkunapas mushumanta purinahun. Aycha ismuchik unkuyukunapas ampirishka kanahun. Mana uyanata atipakkunapas mushumanta uyanahun. Wañushkakunapas kuti kawsarinahun. Nima imayu runakuna Yaya Diospa suma ali shiminta runakunata kishpichinanmanta uyahunkuna.^a ⁶Chaymanta Juanta rimaychi: Maykanmi mana sampayashpa ñukata kiriwan, chayka kushillami kanka.

⁷Chasna rimashpan Juanpa kachashkan runankunaka kutirkakuna Juanta rimanan-kunapa. Kutishkankunawasha Jesuska chaypi kahukkunata Juanmanta rimarka:

Kankunaka chunlla chakishka allpama rishpaykichi ¿imashna runatata rikunayar-kankichi? ¿Shuk muspa yuyayyu runatachu rikunayarkankichi? Mana chasnatachu rikuk rirkankichi. ⁸¿Shuk suma churarishka runatachu rikuk rirkankichi? Mana chasnatachu rikuk rirkankichi. Suma churarishka kahukkunaka apukunapa wasinkunapimi kawsanahun. ⁹Chasna

kashpan ¿imata rikunayashpaykichitaya rirkankichi? ¿Yaya Diospa yachayninwa shuk yachachiktachu rikunapa rirkankichi? Kankunata rimani, ari, chayraykumi rirkankichi. Mana chasna runallatachu rikunapa rirkankichi. Yaya Diospa yachayninwa ñawpa yachachikkunamanta ashwan yachaktami rikuk rirkankichi.

¹⁰Chay Juanmanta kasna killkarishka kan ñawpa Yaya Diospa rimashkanka:

Ñukaka shuk runata kachasha runaku-nata shiminita rimanarpa. Payka manarapas kanta kachahushpayni runakunata kanmanta rimak rinka shunkunkunata alichashpankuna alita kanta kayanankunapa nishpa.

¹¹Alita uyawaychi. Ñawpamanta pacha tukuy kay allpapi kawsak runakunamanta Juanka ashwan alita runakunata kunarka. Chasna Juan tukuy yachachikkunamanta ashwan yachak kashpanpas maykanmi Yaya Diospa kamachishkan tukushpa paypa ali kamachihushkanpi kawsan, mana yachak kashpanpas chaymi Juanmanta pasa kan.

¹²⁻¹³Ñawpamanta pacha Bawtisak Juan yachachinankama Moisés wañu tukuy Yaya Diospa yachayninwa yachachikkunapas Yaya Diospa ali kamachinan kay allpapi paktarinanmanta rimarkakuna. Bawtisak Juan shamushkanmanta pacha kunankama runakuna atipashkankunata ruranahun Yaya Diospa ali kamachinani kawsanankunapa. Maykunkunami sincikuru-nahun shunkunkunamanta pacha, paykunallami Yaya Diospa kamachishkan-kuna tukushpa ali kamachihushkanpi kawsankakuna. ¹⁴Mana kirishpaykichipas Juanmi kan, maykanmantami Yaya Dioska killkachishkanpi riman: Manara Kishpichikka shamuhushpanmi shuk yachayniwa yachachik Eliasshina rimak

shamunka nishpa.¹⁵ Tukuy kay yachachi-hushkaynikunata alita uyashpa yachakuy-chi.

¹⁶ Imashnata kankunata yachachinima. Imashna rimanakunawashi kankunata yachachinima. Kankunaka ñampipi tiyarishpa pukllahuk wawakunashina kankichi. Paykunaka pukllak wawa masinkunata kaparishpa rimanahun:
¹⁷ Ñukanchi kenata pukushpanchipes kankuna mana baylashkankichichu. Chaymanta llakiypata takishpanchipes mana wakashkankichichu nishpa.

¹⁸⁻¹⁹ Chasna nima pita kasunayak wawakunashina kashpaykichi nima Bawtisak Juanta, nima ñukata kasunayashkankichichu. Juanka Yaya Diosta yuyashpan shuk shuk punchakuna mana mikushkachu, nima upyashkachu. Chasna kashpanpas payta rimarkankichi, supay yaykushkami kanki nishpa. Chaymanta ñukana Yaya Diospa Kachashkan Runa shamurkani. Payta yuyashpayni mikuni upyani. Ñukataka rimawankichi mikuyiski upyaysiki kanki, mana ali rurak runakunapa, *Roma atun llaktarayku *impuestuta kobrakkunapa amigunmi nishpa. Chasna rimashpaykichiapas ñukanchi Yaya Diosta kasushpa tukuya alllata rurahushpanchi rikuchinchu Yaya Diospa suma yachayninwa kahushkanchita.

**Jesuska mana kasunayak
runakunata rimarka**

(Lk. 10.13-15)

²⁰ Chaymanta Jesuska yachachik rirka chay llaktakunapi, maypimi puntiru rishpan atun yachaywa achka ruranakunata rurarka. Chaypi kawsak runakuna Jesús atun yachaywa rurashkunkunata rikushpankunata Yaya Diosta mana kasunayashkakunachu. Chayrayku Jesuska paykunata piñarishpan rimarka:

²¹ Ay kankuna Korasín llaktapi kawsak runakuna. Ay kankuna Betsaida llaktapi

kawsak runakuna. ¡Imashna kastigushi kankunaryaku kanka! Kankunawa kashpayni atun yachaywa achka ruranakunata rurashpaynipas kankunaka Yaya Diosta mana kasunayashkankichichu. Chay Yaya Diospa mana akllashkan Tiro llaktapi, Sidón llaktapi kawsakkuna rikunahuma karka atun yachaywa rurashkaynikunata, paykunaka Yaya Diosta kasunahuma karka. Chay urasslapa paykunaka yapa pinkaywa llakirishpalkuna wakanahuma karka, millaypa rurahushkankunata sakishpankuna alitana ruranankunapa.²² Chayrayku kastiganan puncha Yaya Dioska chay Tiropi Sidonpi kawsak runakunamanta kankuna Korasínpi Betsaidapi kawsak runakunata ashwan sinchitami kastiganka.

²³ Kankuna Kapernaum llaktapi kawsak runakuna, ¿imaraykuta yuyarinkichi Yaya Dios ñukanchita siluma pushanka nishpa? Mana chasnachu. Nina mana wañukmami rinaykichi tiyan. Atun yachaywa achka rurashkaynikunata rikushpaykichiapas mana kiriwashkankichichu. Ñawpa Sodoma llaktapi chay atun yachaywa ruranakunata ruraynima karka, chaypi kawsak runakunaka kiriwanahuma karka, llaktankunaka mana chinkarimachu karka.
²⁴ Chayrayku kankunata rimani, Yaya Dios kastiganan puncha kankunata Sodoma llaktapi kawsak runakunamanta ashwan sinchitami kastiganka.

**Jesuska runakunata kayan paytana
katishpa kushilla kawsanankunapa**

(Lk. 10.21-22)

²⁵ Chay urassla Jesuska Yayan Diosta kushichishpan rimarka: Munashkayni Yayayni, yapa alimi kanki. Kanmi kay allpapi silupipas atun yachaykiwa kamachik kanki. Kushikunimi mana yachakchu kani nishpa yuyarik runakunnallata tukuy yachaykita asirtachishkaykirayku. Tukuy chay yachak kanankunata yuyarik runakunata mana

asirtachishkankichu yachaykita.²⁶ Ari Yayayni, kan kikin munashkaykirayku chasna rurashkanki nishpa.

²⁷Yayanta chasna rimashkanwasha, tukuy chay runakunata yachachirkka: Yayaynimi tukuyta kuwarka ñukalla tukuyta kamachik kanaynipa. Payllami yuyaynita yachashpan ñukata alita riksiwan. Kankunaka manami alitachu riksiwankichi. Yaya Diospa Wawan kashpayni ñukallami alita riksini imashnami Yayayni Dioska nishpa. Maykunkunallatami ñuka ricksichisha, paykunallami Yayayni Diosta riksinkakuna. Mana ñuka ricksichishpaynika Yayayni Diostaka manami nima pi riksinkachu. ²⁸Tukuy kankuna chay achka kamachirishka kashkata paktachinayashpa nitirishkashina, yapa llashata aparikhukshina sampayashka kahushpaykichi shamuychi ñukama kankunata samachinaynipa. ²⁹Ñuka kankunata yachachishkaynitana kasushpa kawsaychi. Ñukata katishpaykichi yachakuychi. Mana piñachu kani, ali shumku, mana atunyanayashpachu kani. Chayrayku ñukama shamushpaykichi ñukata kasuwashpaykichika samahukshina kushilla kawsankichi. ³⁰Kamachishkaynika ali kan kankunarayku. Maykantami kankunata rimashkani ruranaykicipa chayka manami kankunarayku kanchu shuk llasha nitihukschina. Ñuka kankunata yanapashpaynimi tukuy rimashkaynita atipankichi ruranata.

Jesuska yachachin samana
punchamanta
(Mk. 2.23-28; Lk. 6.1-5)

12 ¹Shuk *samana puncha Jesuska ñukanchiwa pakta trigu tarpu-rishkakuna chawpita rirkka. Chaypina ñukanchika yarkashpanchi shuk shuk trigu muyuta pallarkanchi mikunanchipa. ²Chayta *fariseokuna rikushpankuna piñarishpa Jesusta rimarkakuna:

Rikuy, samana puncha kashpanpas kanwa purihukkunaka trigu muyuta pallahunkuna mikunankunapa. Chasna pallahushpankuna Moisespa killkashkan kamachishkata, samana punchapi ama tarawaychichu nishkanta mana kasuhunkunachu.

³Chasna rimashpankuna Jesuska paykunata aynirka:

¿Manachu leyishkankichi, ñawpa yaya rukunchi Davidka, paywa purikkunapas yarkashpankuna imashnata rurarkakuna? ⁴Davidka *Yaya Diospa wasinpi yaykushpan Yaya Diosta rikuchinankuna mesapi churarishka pankunata apishpan mikurka Yaya Diosrayku rurarishkata. Paywa purikkunatapas kurka mikunankunapa. Chay panka mana karkachu payrayku, nima paywa purikkunaryakuchu, ashwan ñukanchi israel runakunapa *saserdotenchikunaryakkullami karka. Runankuna yarkashpankuna chay panta mikushpankunapas Yaya Dioska mana uchatashina rikushpa paykunata mana kastigarkachu.

⁵Chasnallatata ¿manachu leyishkankichi ñawpa Moisespa killkashkanpi, imashnami saserdotekuna Yaya Diospa wasinpi karan puncha samana punchapas tarawanahun? Chasna samana puncha paypa wasinpi tarawashpankunapas Yaya Diospa rikushkanpi mana uchata ruranahunchu. ⁶Kankunata rimani, chay Yaya Diospa wasinmanta ñukami ashwan ali kani.

⁷Yaya Dios killkachishkanpi riman: Kankuna wiwaykichikunata wañuchishpa rupachinkichi ñukata kushichiwanaykicipa. Chay wiwaykicha rupachishkaykichimanta ashwan munani runa masikichita llakichishpa yanapanaykicipa. Chasna Yaya Dios rimashpanpas kankunaka mana asirtashkankichichu. Alita asirtankichimaka, manami kay ñukawa purikkunata

rimankichimachu uchatami rurahunkichi, shuk shuk trigu muyuta pallashkay-kichirayku samana punchapi nishpa.

⁸Yaya Dioska ñuka paypa Kachashkan Runata yachayninta kuwashka kankunata rimanaynipa imakunami ali kan samana puncha ruranaykichipa.

Jesuska shuk chakirishka makiyu runata samana punchapi ampirka (Mk. 3.1-6; Lk. 6.6-11)

⁹Chaymanta Jesuska rishpan shuk tantarina wasipi yaykurka. ¹⁰Chaypi tiyarka shuk chakirishka makiyu runa. Chaypina *fariseokuna Jesusta chiknishpa rikurayarkakuna, pay shuk mana rurananchi kashkata ruramachu manachu nishpa payta uchachinankunapa. Pantachichinayashpangkuna Jesusta tapurkakuna:

¿Chasnachu Moisespa killkashkanpi ñukanchita riman, shuk unkushkata ampinanchipa *samana punchapi?

¹¹Jesuska paykunata aynirka:

Rikuychi, samana puncha kashpanpas shuk obehaykichi uchkupi urmamaka, kankunaka obehaykichita llakichish-pami surkunkichima. ¹²Shuk runa obehamanta ashwan valikmi kan. Chayrayku Yaya Dioska munan, samana puncha kashpanpas runa masinchita llakichishpa yanapananchipa.

¹³Chasna paykunata rimashpan Jesuska chay chakirishka makiyu runata rimarka:

Makikita chutachiy nishpa.

Chay runaka Jesusta kasushpan chakirishka makinta chutachirka. Chasna chutachishpan makinka ampirishka kiparipurka chay shuk ali makinhina.

¹⁴Jesús samana punchapi chay runata ampiškanrayku fariseokunaka chay tantarina wasimanta llukshishpangkuna paykunapura kwintarkakuna imashnashi Jesusta wañuchinchima nishpa.

Ñawpa Yaya Diospa yachayninwa shuk yachachik killkarka Jesusmanta

¹⁵Jesús yachashpan *fariseokuna payta wañuchinayahushkunkunata chay llaktamanta llukshirka. Llkshishpanna achka runakuna payta katirkakuna. Jesuska tukuy unkushkakunata ampiyarka. ¹⁶Chaymanta chay ampiškan runakunata rimarka:

Nima pita kwintankichichu ñuka kankunata ampiškaynita nishpa.

¹⁷Chasna rurashpan paktachirka ñawpa Yaya Diospa yachayninwa yachachik Isaiaspa killkashkan Yaya Dios paymanta rimashkanta:

¹⁸Rikuychi kay kasuwak runaynita.

Ñukami paytaka yuyashpa akllashkami. Paymi yapa kushi-chiwan. Espirituynimi paytaka yanapanka. Paymi tukuy kay allpapi kawsak runakunata shutipata yachachinka shunkunkunaka alicharishka tukunankunapa. ¹⁹Payka nima piwa piñanakunkachu, nima pita sinchi shimiwa kaparishpa rimankachu, llaktakunapi purihushpan runakunata mana piñachinkachu. ²⁰Paymi ñaño ramashina pakirinalla kashkata mana pakinkachu. Wañunalla ninashina kashkata mana wañuchinkachu. Ashwan llakichishpa yanapanka llakiypa kawsak runakunata, mana yapa shunkunkunamanta pacha ñukata kirihuukunata. Chasna yanapashpa katinka tukuy mana ali kashkata wins-nankama, tukuy parti runakunata yanapanankama mana alita rurashpa kawsahushkunkunamanta kishpichiy tukunan-

kunapa, mana munakkunataka kastigashpa anchuchinankama.

²¹Chayrayku tukuy kay allpapi kawsak runakuna kushikush-pankuna payta chapankakuna kishpichirishka kanankunapa nishpa.

Fariseokuna rimarkakuna supaykunapa apun Jesusta yanapahushkanta

(Mk. 3.20-30; Lk. 11.14-23, 12.10)

²²Chaymanta Jesusma pusharkakuna shuk supay yaykushka runata. Chay runaka mana atiparkachu rikunata nima rimanata. Chaypina Jesuska payta amipishpan atiparka rikunata rimanatas. ²³Chayta rikushpankuna tukuy runakunaka yapa mancharishpa tapuna-kurkakuna:

Kay runachari chapahushkanchi ñawpa atun apu Davidpa Miraymanta Kishpichik kan nishpa.

²⁴Chayta *fariseokuna uyashpankuna Jesusta mana kirishpankuna rimarkakuna:

Jesuska kay runamanta supaykunata atipashka llukshchinata, supaykunapa apun *Beelsebú yachayninta kushkan-rayku.

²⁵Jesuska chay fariseokunapa yuyari-hushkunkunata yachashpan paykunata rimarka:

Shuk llaktapi kawsak runakuna chikninakushpa makanakushpankunaka paykunapurami wañunakunahuma. Chasnallatatami shuk wasipi kawsak runakuna chikninakushpa makanakushpankunaka shikwarinahuma. ²⁶Chasnallatata supaykunapa apun maykantami Satanás Beelsebupas ninchi paypa kamachinankunata shuk runamanta llukshichimaka, supaypura piñanakushpankuna paykuna kikin rurahushkunkunata waklichinahuma. Chasnashpanku-

naka imashnataya Satanaska alita kamachima.

²⁷Kankuna rimankichi supaykunapa apun Beelsebupa yachayninha kay runamanta supaykunata llukshichish-kaynita. Chasna rimashpaykichi ¿pita yanapan kankunata katik runakunata supaykunata runakunamanta llukshichinankunapa? ¿Paykunapas Satanaspay yachayninha supaykunata runakunamanta llukshichinahunchu? Kankunaka alita yachankichimi Yaya Dios paykunata yanapananta. Chayraykumi paykuna kikin rikuchinahun kankuna yankamanta rimawahushkaykichita.

²⁸Yaya Diospa Espíritun yanapawashpanmi supaykunata llukshichini. Chay rurashkaynita rikushpaykichi yachankichi Yaya Diospa ali kamachinan chawpikichipi ña kallarishkanta.

²⁹Rikuychi. Shuk sinchi runapa wasinmanta manara amunta watashpankuna nima pi atipamachu shuwanata nima imata. Chasna chay sinchi runata watashpanrami tukuy paypa tiyapushkanta atipama kichunata. Chasnallatata ñukapas, Yaya Diospa yachaynilla-wami atipani supaykunapa apunta winsinata supaykunata llukshichinay-nipa runakunamanta.

³⁰Kankuna mana kiriwashpaykichika chikniwahunkichimi. Runakunata ñukamanta alita yachachishpa mana yanapawashpaykichika pantachichishpa ñukamanta anchuchinkichi.

³¹Chayrayku kankunata rimani, Yaya Dioska runakunata tukuy mana alita rurashkankunkunamanta, mana alita rimashkankunkunamantapas llakichinkami. Chasna kashpanpas manami llakichinkachu Yaya Diospa Espiritunmanta llullashpa paypa yachayninka supaykunapa apunpa yachaynini nishpa rimakkunata. ³²Maykan runami piñarishpan millaypata riman ñuka

Yaya Diospa Kachashkan Runamanta, paytaka Yaya Dioska llakichinkami. Maykanmi Yaya Diospa Espiritunmanta llullashpa riman paypa yachaynin supaykunapa apunpa yachayninmi nishpa, chaytaka Yaya Dioska manami llakichinkachu, nima kawsahushkanpi, nima wañushkanwasha.

³³Shuk kaspita muyunmanta riksinchis. Muyunkuna ali kashpankunaka riksinchimi ali kaspi kananta. Muyunkuna mana ali kashpankunaka riksinchimi mana ali kaspi kananta. ³⁴Kankuna machakyashina runakuna kankichi, yachachinaykichiwa runakunata pantachichishpa yuyayninkunata waklichikkuna. Shunkuykichika mana ali kashpan mana atipankichichu alikunata rimanata. Imatami shuk runaka yuyarin shunkun ukupi, chaytami riman. ³⁵Ali runaka shunkunpi ali yuyarishkantami riman. Mana ali runaka shunkunpi mana ali yuyarishkantami riman.

³⁶Kankunata rimani, Yaya Dioska kastiganan punchami tukuy runakunata tapunka, tukuy mana ali shimikunata rimashkankunamanta. ³⁷Yaya Dioska tukuy rimashkaykichita yachan. Chayrayku rimashkaykichi ali kashpanka kankunata ali runa kanki nishpa rimanka. Rimashkaykichi mana ali kashpanka kankunata sinchitami kastiganka.

**Mana kirinayak runakuna Jesusta
tapurkakuna Yaya Diospa
yachayninwa rurashkanta
rikuchinanpa**
(Mk. 8.12; Lk. 11.29-32)

³⁸Jesús yachachihushpan *fariseokuna, Moisespa killkashkanta yachachikkuna uyarkakuna. Chaypina rimarkakuna: Yachachik, yachanayanchi kan shutipachu Yaya Diosmanta shamush-

kanki manachu nishpa. Chayrayku munanchi rikunata shuk nima ima uras rikushkanchita Yaya Diospa yachay-ninwa ruranaykita nishpa.

³⁹Jesuska paykunata aynirka:

Kankuna Yaya Diosta mana kirinayak kashpaykichimi mana ali rurak runakuna kashpaykichi Yaya Diospa yachayninwa ruranaynita rikunayankichi. Munashpaykichipas manami rurashanchu. Chayllatami rikunkichi Yaya Dios chay ñawpa paypa yachay-ninwa yachachik Jonaspa pasashkanta-shinami ñukawa rurananta. ⁴⁰Ñawpa Jonasta shuk saltonshina atun challwa millpurka. Chaypina payka chay challwapa wiksanpi kimsa punchata, kimsa tutata karka. Chaymanta chay challwaka Jonastaka kiwnarka. Chasnashinami ñuka Yaya Diospa Kachashkan Runa kimsa punchata, kimsa tutata allpa ukupi kashkaynimanta kawsarimisha. ⁴¹Chay ñawpa Nínive llaktapi kawsak runakuna yapa millaypata rurashpa kawsapayarkakuna. Jonaska paykunata yachachishpanmi tukuy uchata ruranata sakirkakuna Yaya Diosta alita kasushpana kawsanankunapa.

Yaya Diospa kastiganan punchapi chay ñawpa Nínive llaktapi kawsak runakunami paypa puntanpi kankunamanta mana alita rurashkaykichita rimankakuna. Ñukaka Jonasmanta ashwan atun yachayyu kashpaynipas mana kiriwanayankichichu.

⁴²Chaymanta ñawpa karu llaktamanta shuk kamachik warmi shamurka Jerusalenma chay atun yachayyu Salomonta uyananpa. Ñukaka Salomon-manta ashwan atun yachayyu kashpaynipas kankunaka manami uyawanayankichichu. Chayrayku Yaya Diospa kastiganan punchapi chay kamachik warmika Yaya Diospa puntanpi kankunamanta mana alita rurashkaykichita rimanka.

**Jesuska supay shuk runamanta
llukshishkanmanta yachachin**
(Lk. 11.24-26)

⁴³Chaymanta Jesuska paykunata rimarka:

Shuk runamanta shuk supay llukshishpanka yaku illa allpakunapimi purin, maskashpa maypimi kawsanka nishpa. Mana maypi samananta tarishpanka yuyarishpa riman: ⁴⁴Kutishara chay llukshishkayni runamallatata nishpa. Kutishpan chay runata tarikrin shuk wasi suma chusha picharishkataschina. ⁴⁵Chaypi kanchis paymanta ashwan millaypata rurak supay masinkunata pushakrin. Tukuy paykuna chay runapi yaykushpankuna paywa kawsanahun. Chasnami chay runaka ashwan millaypakanata rurashpa kawsan. Kankunaka yapa millaypata rurak kashpaykichimi chay achka supay yaykushka runashina kankichi.

**Jesuspa wawkinkuna mamanwa
pakta kwintak rirkakuna paywa**
(Mk. 3.31-35; Lk. 8.19-21)

⁴⁶Jesús chay runakunata yachachihushkanpi paypa wawkinkuna mamanwa pakta chay wasima paktamurkakuna. Paykunaka Jesuswa kwintanayashpankuna wasi washaman-talla payta kayachirkakuna. ⁴⁷Chaypina shuk runaka Jesusta rimarka:

Mamaykimi wawkikunawa kanchapi chapahunkuna kanwa kwintanankunapa nishpa.

⁴⁸Chaypi Jesuska chay runata rimarka:

Mana mamaynillatachu kikin wawki-nikunallatachu yuyani.

⁴⁹Chaymanta ñukanchikunata makinwa rikuchishpan tukuy runakunata rimarka:

Kaykunami mamaynikuna, wawki-nikunapas. ⁵⁰Maykanmi ruran silipi

kawsak Yayayni Diospa munashkanta, paymi kan wawkinishina, paninishina, mamaynishina.

**Jesuska tarpuk runamanta
yuyachishpa yachachin**
(Mk. 4.1-9; Lk. 8.4-8)

13 ¹Chay punchalla Jesuska chay wasimanta llukshishpan tiyarik rirkakuna kucha mayanpi. ²Chaypi tiyahushpan achka runakuna payta kayllayarkakuna. Chayrayku Jesuska shuk botipi yaykurka tiyahushpan paykunata yachachinanpa. Chasna yachachihushpan tukuy chay runakuna kucha mayanmanta payta uyarkakuna.

³Chaypina Jesuska chay achka runakunata Yaya Diospa shiminta shuk yachachinakunawa yachachirka kasna nishpa: Akuychi yuyarishunchi, shuk runa arus muyuta tarpuk rirkakuna chakrani. ⁴Chaypi chay tarpuk runaka arus muyukunata wichashpa rirkakuna wiñanankunapa. Shuk muyukunaka urmarkakuna ñampipi. Chay ñampipi urmarshatkaka pishkukuna mikurkakuna. ⁵Shuk muyukunaka urmarkakuna llapcha allpa samantasapapi. Shuk ratu tukyarirkakuna chay muyukunaka, llapcha allpa kashkanrayku. ⁶Chaypi yapa intishpan arus wiñahukka wañurirka, mana ankunka yaykunata atipashpan samantapi. ⁷Shuk muyukunaka urmarkakuna kashasapa allpapi. Chay kashakunaka arus muyukunamanta ashwan utkalla wiñarkakuna. Chasna utkalla wiñahushpan chay kashakunaka nitirkakuna chay arus wiñahukta. Chayrayku aruska mana muyuyarkachu. ⁸Shuk muyukunaka urmarkakuna ali allpapi. Alita wiñashpankuna sumakta muyuyarkakuna. Shukkunaka muyuyarkakuna shuk pachak muyukunata. Shukkunaka muyuyarkakuna sokta chunka muyukun-

nata. Shukkunaka muyuyarkakuna kimsa chunka muyukunata. ⁹Tukuy kay yachachihushkaynikunata alita uyashpa yachakuychi.

**Jesuska runankunata
yachachishkanta asirtachirka**
(Mk. 4.10-12; Lk. 8.9-10)

¹⁰Chaymanta ñukanchika payta kayllayashpanchi tapurkanchi:

¿Imaraykuta runakunata chay yachachinakunawa yachachinki? nishpa.

¹¹Jesuska ñukanchita aynirka:

Kankunallata Yaya Dios yachachihun nima pi yachashkanta, imashnami paypa ali kamachinanka kay allpapi. Mana kasunayak runakunata Yaya Dioska manami yachachinchu. ¹²Tukuy payta kasukkunatami Yaya Dioska sumakta yanapanka ashwanta asirtanakunapa. Mana kasunayakkunata uchillastu yachashkankunata kunkachinkami.

¹³Tukuy chay runakunata yachachishpaynipas mana asirtanahunchu. Tukuy ali rurashkaynikunata rikushpankunapas mana yachanahunchu imaraykumi chaykunata rurani nishpa. Chayrayku mana yapa asirtaypa yachachinakunallawa paykunata yachachini. ¹⁴Ñawpa Yaya Diospa yachayninwa yachachik Isaias killkarka Yaya Diosta mana kasunayak runakuna tiyananta. Kasnami Isaiaska Yaya Diospa rimashkanta killkarka:

Kay runakunaka ali yachachishkakunata uyashpankunapas manami asirtanahunchu. Ali rurashkaynita rikushpankunapas nima imata asirtanahunchu, imaraykumi chayta rurani nishpa. ¹⁵Kay runakunapa yuyayninkuna taparishka kanahun. Ñawinkunaka

taparishkashina kashpankuna rurashkaynita mana rikunahunchu. Rinkrinkunaka taparishkashina kashpankuna rimashkaynita mana uyanahunchu.

Chasna tukushpankuna manana atipanahunchu uchankunamanta yuyarishpankuna llakirinata, ñuka llakichishpayni paykunata aliyachinayni.

¹⁶Chaymanta Jesuska ñukanchi runankunallata rimarka:

Tukuy kankuna kushilla kankichi, rurashkaynikunata rikushpaykichi asirtashkaykichirayku. Kushilla kankichi yachachihushkaynikunata uyashpaykichi kasushkaykichirayku. ¹⁷Alita uyawaychi. Ñawpa Yaya Diospa yachayninwa yachachikkuna, chaymanta achka ali rurak runakunapas yapa riksinayawarkakuna. Paykunaka mana atiparkakunachu riksiwanata, manara kay allpama shamushkaynirayku. Kunanka kankuna ña riksiwashkankichi. Chayrayku yapa kushikuychi.

**Jesuska asirtachin tarpuk
runamanta yuyachishpa
yachachishkanta**
(Mk. 4.13-20; Lk. 8.11-15)

¹⁸Kunan uyaychi imatami yachachinayan chay muyuta tarpuk runawa yachachishkaynika. ¹⁹Achka runakunami mana asirtakchu kanahun. Chasna kashpankunami ñampipi chakishka allpapi urmashka muyukunashina kanahun. Chasna runakunaka Yaya Diospa ali kamachinan kay allpapi ña kallarishkanmanta shimita uyashpankunapas manami asirtanahunchu. Supayka shamen Yaya Diospa shimita shunkunkunamanta kunkachinanpa.

²⁰Chaymanta shuk runakunaka Yaya Diospa shimita kushilla uyanahun. Chay runakunaka samantasapapi wiñak

muyukunashinami kanahun.²¹ Mana ukupi sapiyushina kashpankuna shuk ratullami Yaya Diosta kushilla katinahun. Kirishkunkunaryku runa masinkuna asichishpa parisichihushpan-kuna nanayta llakiya musyashpanguna sakinahunna Yaya Diosta katinata.

²²Chaymanta shuk runakunaka sumakta shunkunkunamanta pacha Yaya Diospa shiminta munanahun. Chasna alita munashpangunapas yapa kullkillata munashpanguna paykuna kikin munashkunkunallata rurashpa kawsashpanguna kunkarinahun Yaya Diospa shiminta. Chasna runakunaka muyukuna kashasapapi urmashka nima ima uras muyuyakkunashina kanahun.

²³Ashwan shuk runakunaka yapa sumaktami shunkunkunamanta pacha Yaya Diospa rimashkanta asirtashpa kasunahun. Paykunaka Yaya Diosta yuyashpalla kawsanahun. Chasna kashpangunami muyukuna ali allpapi wicashkashina kanahun. Paykunaka shuk muyumanta shuk pachak muyuta muyuyakshinami kanahun, shukkunaka sokta chunka muyuta muyuyakshinami kanahun, shukkunaka kimsa chunka muyuta muyuyakshinami kanahun.

**Jesuska trigu chawpipi millaypa
kiwa wiñashkata yuyachishpa
yachachin**

²⁴Chaymanta Jesuska chay achka runakunata shuk yachachinata rimashpa yachachirka kasna nishpa: Yuyariyichi imashnami Yaya Diospa ali kamachinanka kay allpapi. Shuk runa chakranpi ali trigu muyukunata tarpushkata rikuychi. ²⁵Shuk tuta tukuy puñuhush-kankunapi kuntranka chay tarpushka chakrama rirka millaypa muyukunata chay tarpurishkakunapi shikwachi-npana. ²⁶Chay trigu muyukuna wiñashpan ña muyuyahushkanpi chay millaypa

kiwakunapas sumakta wiñarkakuna.

²⁷Chaypina chay chakrayu runapa runankunaka amunta rimarkakuna: Patrón, kan ali trigu muyukunatami tarpurkanki. Maymantataya chay millaypa kiwakunaka wiñahunkuna nishpa. ²⁸Chay chakrapa amunka rimarka: Chikniwak runami chay millaypa kiwakunata tarpushka nishpa. Chaypi runankunaka patroyninta tapurkakuna: ¿Munankichu chay kiwakunata pitik rinanchipa? nishpa. ²⁹Chaypi patroyninka aynirka: Mana. Pitihushpaykichika chay millaypa kiwakunata, trigutapas pitinkichimi. ³⁰Sakiyichi parihulla wiñanankunapa pallananchi punchakama. Trigu muyu pukushpanka ñukami kachasha pallak runakunata, chay millaypa kiwakunata pitishpankuna tantachishpa rupachinankunapa. Chaywasharami trigu muyuta pallashpankuna wakaychana wasinipi churan-kakuna.

**Jesuska uchilla muyumanta
yuyachishpa yachachin
(Mk. 4.30-32; Lk. 13.18-19)**

³¹⁻³²Chaymanta Jesuska chay runakunata kaytapas yachachirka kasna nishpa: Yuyariyichi imashnami Yaya Diospa ali kamachinanka kay allpapi. Mostasa muyuta rikuychi. Tukuy muyukunamanta ashwan uchillastumi kan. Shuk runa chakranpi tarpushpanka shuk uchilla tarpukunamanta ashwan atuntami wiñan. Shuk kaspishinami atunta ramayan. Chaypi pishkukunaka shamunahun, wasinstukunata-patas ruranahun. Chasna rimashpan Jesuska yuyachirka puntiru shukkunalla Yaya Diospa kamachishkankuna tukunankunata, chaymanta kirikkunaka achka tukunankunata. Chasna kashpan shukkuna kushilla paykuna chawpipi kawsak shamunahun.

**Jesuska levaduramanta
yuyachishpa yachachin**
(Lk. 13.20-21)

³³Chaymanta Jesuska kuti yachachihushpan chay runakunata rimarka: Yuyariyichi imashnami Yaya Diospa ali kamachinanka kay allpapi. *Levadurata rikuychi. Shuk warmi panta rurahushpan kimsa mati harinapi uchillastu levadurata yakuwa chapurishkata churan. Chaywa chapushpan tukuy harinaka panrayku alita punkin.

**Jesuska imaraykumi chikan chikan
yachachinakunawa yachachin**
(Mk. 4.33-34)

³⁴Jesuska achka yachachinakunawa tukuya chay runakunata yachachirka. Nima ima uras rimarkachu kuska asirtana shimikunata. ³⁵Ñawpa Yaya Diospa yachayninwa yachachikka killkarka, imashnami Jesuska yachachinka nishpa. Chay killkashkan-pika kasnami riman:

Ñukaka chikan chikan yachachinakunawami runakunata yachachisha pakalla kashkakunata. Yaya Dios kay allpata rurashkanmanta pacha mana nima pi yachashkankunatachu yachachisha nishpa.

**Jesuska runankunata asirtachirka
chay millaypa kiwakunamanta
yachachishkanta**

³⁶Chaymanta Jesuska chay achka runakunata kutinankunapa rimashkan-washa yaykurka shuk wasipi. Chaypi ñukanchi payta kayllayashpanchi tapurkanchi chay millaypa kiwa chakrapi wiñashkamanta yachachishkanta asirtachinanpa. ³⁷Chaypina Jesuska rimarka: Ñuka Yaya Diospa Kachashkan Runami shuk chakrayu

runa ali muyukunata tarpuksinami kani. ³⁸Kay allpaka chakraynishinami. Yaya Diospa ali kamachihushkanpi kawsak payta kasuk runakunami chay ali muyukunashina kanahun. Supaypa kamachishkankunata kasuk runakunaka chay mana ali kiwakunashinami kanahun. ³⁹Supayka chay millaypa kiwakunata shikwachik runashinami. Kay allpa tukurinaka chay trigu muyuta pallana punchashinami. *Angelkunaka chay trigu muyukunata pallak runakunashinami kanahun. ⁴⁰Imashnami millaypa kiwakunata pichashpa rupachinchu ninapi, chasnallatatumi kay allpa tukurihushpan Yaya Dioska tukuy uchasapa runakunata nina mana wañukpi rupachinka. ⁴¹Ñuka Yaya Diospa Kachashkan Runami angelkunata kachasha, kamachinaynipi mana ali rurak runakunata, runa masinkunata uchata rurachikkunatas tantachinan-kunapa. ⁴²Tukuy paykunata tantachish-punkunami ñukaka wichusha nina mana wañukma. Chaypimi paykunaka sinchita parisishpa wakankakuna, piñaywa kirunkunata kanirinkakuna. ⁴³Chaymanta tukuy maykankunami Yaya Diospa munashkanta rurashpa kawsanahun, paykunaka Yaya Diospa kamachinan mushu mundumami rishpankuna inti sumakta punchayachi-hukshina rikurinkakuna. Tukuy kay yachachihushkaynikunata alita uyashpa yachakuychi nishpami yachachirka Jesuska.

**Jesuska yapa suma valik
imakunamanta yuyachishpa
yachachin**

⁴⁴Chaymanta Jesuska kuti yachachihushpan rimarka: Yuyariyichi imashnami Yaya Diospa ali kamachinanka kay allpapi. Shuk yapa valik oro pamparishkata rikuychi. Shuk runa

allpapi pakashka yapa valik orota tarirka. Chay tarishkantaka chayllapi cuti pampashpa sakirka. Chaypi yapa kushikushpa kutishpan tukuy tiyapushkanta rantichirka. Chay kullkiwana rantirka chay oroyu allpata.

⁴⁵Chaymanta Yaya Diospa ali kamachinanka shuk yapa achka valik perlashinami. Shuk wirakucha maskashpa purirka atun yapa valik yura wallkashina rikunayu perlata. ⁴⁶Chaypi achka valik atun yura perlata tarishpan tukuy tiyapushkankunata rantichirka. Chay kullkiwana rantik rirka chay yapa valik perlata.

**Jesuska redimanta
yuyachishpa yachachin**

⁴⁷Chaymantapas Yaya Diospa ali kamachinanka kay allpapi shuk atun yakupi aysay tukuhushka redishinami kan. Rediyak runakunata yuyariyichi. Rediyashpankuna chikan chikan challwakunata apinahun. ⁴⁸Chaymanta redinkunata tiyuma aysashpankuna challwakunata akllanahun. Tukuy ali challwakunata tasankunapi churana-hun mana ali challwakunata yakumami wichunahun. ⁴⁹Chasnallatamai kay mundu tukurihushkanpi, chay challwakunata akllak runakunashina *angelkunaka runakunata akllankakuna. Mana kasuk runakunata anchuchinkakunami Yaya Diosta alita katik runakunamanta. ⁵⁰Chay mana kasuk runakunata nina mana wañukmami wichunkakuna. Chaypimi sinchita parisishpa wakankakuna, piñaywa kirunkunata kanirinkakuna.

**Jesuska chikan chikan
yachachinakunawa
yachachishkanta tukuchirka**

⁵¹Yachachinankunata tukuchihushpan Jesuska ñukanchita tapurka:

¿Asirtankichichu kay yachachihush-kaynukunata? nishpa.
Chaypina aynirkanchi:
Ari, asirtanchimi nishpa.
⁵²Chaypi Jesuska ñukanchita rimarka: Rikuychi, shuk wasi amu achka mushu mawka charishkankunata wakaychakta. Chay charishkankunanta maykantachari munan chayta surkun. Chay wasi amuka Yaya Diospa killkachishkanta yachachikshina kan, maykanmi Yaya Diospa ali kamachinan kay allpapi ña kallarishkanmanta yachachishkaynita alita yachakurka. Chasna runaka yachan kay mushu yachachishkaynita, ñawpa Yaya Diospa yachachishkantapas runakunata yachachinata.

**Ayllunkunaka Jesusta Nasaret
kikin llaktanpi mana
kirinayarkakunachu
(Mk. 6.1-6; Lk. 4.16-30)**

⁵³Chaymanta Jesuska tukuy chay yachachinakunata rimashkanwashcha chay llaktamanta lluksirka. ⁵⁴Chasna rishpan kikin llaktanpi paktarka. Chaypina tantarinankuna wasipi Yaya Diospa shiminta yachachirka. Chasna yachachihushkanta uyashpankuna tukuy chay runakunaka mancharishpankuna nirkakuna:

¿Maypitaya kay runaka chay tukuya yachakushka? ¿Imashnataya ruran mana atipaypakunata? ⁵⁵¿Manachu kay runaka karpintirupa wawan? ¿Manachu mamanka Maria, wawkinkunaka *Santiago, José, Simón, Judas? ⁵⁶¿Paninkunaka manachu kay llaktanchipi kawsanahun? ¿Pitaya payta yachachishka chay tukuya yachananpaka? nishpa.

⁵⁷Chasna yuyarishpankuna chay llaktanmantalla kashpankunapas Jesusta mana kasunayarkakunachu. Chayrayku Jesuska paykunata rimarka:

Tukuy Yaya Diospa yachaynina
yachachiktaka kikin llaktanpika, kikin
wasinpika manami ayllunkunaka
kasunahunchu. Shuk llaktakunapimi
yachachishpan runakunaka alita
kasunahun nishpa.

⁵⁸Chasna llaktanpi kawsak runakuna
payta mana kirishkankunaryku Jesuska
kikin llaktanpi mana achkatachu atun
yachaywa ruranakunata rurarka.

**Apu Herodes Bawtisak Juanta
wañuchichirka**
(Mk. 6.14-29; Lk. 9.7-9)

14 ¹Chay punchakunapi Galilea
allpapi kamachik apu *Herodeska
uyarka Jesús achka mana
atipaypakuñata rurahushkanta. ²Chaypi
Herodeska runankunata yanka rimarka:
Chay Jesuska wañuchishkayni
Bawtisak Juanchari wañushkanmanta
kawsarimushka. Chayraykumi atipan
Yaya Diospa yachaynina ruraypakuñata
ruranata nishpa.

³Kay Herodeska ñawpa Juanta
kadenakunawa watashpan karselpi
churarka, wawkin Felipepa warmin
Herodias chasna munashkanrayku.
⁴Manara Juanka karselpi churay
tukushpanra apu Herodes chay
wawkinpa warminta apishkanraykumi
Juanka payta kunarka Yaya Dioska
mana munanchu kachuykiwa kawsanay-
kipa nishpa. Chayta rimashkanraykumi
Herodeska Juanta karselpi churarka.

⁵Herodeska piñarishpan Juanta
wañuchichinayashpanpas runakunata
manchashpan mana atiparkachu. Tukuy
runakuna yacharkakuna Juan Yaya
Diospa yachaynina yachachik
kananta.

⁶Chay punchakuna Herodespa
wawayarishkan puncha paktashpan
fiestata rurarka. Chaypi Herodiaspa
shipas wawanka sumakta baylarka

tukuy kayashkan runakunapa rikuhash-
kanpi. Chayta rikuhashpan Herodeska
yapa kushikurka. ⁷Chayrayku chay
shipasta tukuy runakunapa uyahushkan-
kunapi rimarka shutipa paktachinapa:

Imatachari tapuwanki, chayta
kushkayki nishpa.

⁸Chay shipaska mamanta tapuk rirkas:
¿Imatata tapusha? nishpa.

Mamanka Juanta wañuchichinayash-
pan wawanta kunarka Herodesta
tapunampa, Bawtisak Juanpa umanta
shuk kallanapi churashpa kuway
yachanaynipa shutipa pitichichishkay-
kita nishpa.

⁹Chasna tapushpan Herodeska
sinchita llakirirka. Achka kayashkan
runakunapa rikuhashkunkunapi rimash-
kanraykumi kamachirka Juanpa umanta
pitishpa kunankunapa. ¹⁰Shuk suntalun-
kunata kamachirka, karselma rishpan-
kuna Juanta wañuchishpa umanta
pitinankunapa. ¹¹Chasna pitishkankunawa-
sha shuk kallanapi apamushpankuna
chay shipasta kurkakuna. Chaymanta
chay shipaska mamantana kurka.

¹²Chayta yachashpankuna Juanpa
runankunaka paypa aychanta apashpan-
kuna urku uchkupi churashpa tapak
rirkakuna. Churashkankunawasha
Jesusta rimak rirkakuna Juan wañush-
kanmanta.

**Jesuska pichka waranka
runakunata kararka**

(Mk. 6.30-44; Lk. 9.10-17; Jn. 6.1-14)

¹³Jesuska Juanta wañuchishkunku-
nata yachashpan chay llaktamanta
llukshishpan sapallan rirkas shuk botipi
chunlla chakishka allpama. Chasna
Jesús riushkanta achka runakuna
yachashpankuna tukuy llaktakunamanta
kucha mayanta kallpashpa payta
katirkakuna. ¹⁴Jesuska botimanta
llukshihushpan achka runakunata

rikurka. Paykunata rikushpan llakichirka. Chasna llakichishpanmi chay apashkankuna unkushkakunata ampirka. ¹⁵Chaymanta ña tutayahushpan ñukanchika Jesusta kayllayashpanchi rimarkanchi:

Ñami chishiyashkanchi. Kaypika manami nima shuk runa kawsanchu. Tukuy kay runakunata kachay, llaktankunama rishpankuna mikunankunata rantinankunapa nishpa.

¹⁶Chaypi Jesuska ñukanchita aynirka:
Mana munanichu rinankunapa.
Kankuna karaychi paykunata.

¹⁷Chaypi ñukanchi aynirkanchi:
Pichka panstu, ishkay challwastullami tian ñukanchipaka.

¹⁸Jesuska ñukanchita aynirka:
Apamuychi ñukama.

¹⁹Kushpanchi Jesuska tukuy chay runakunata kamachirka pastuyu allpapi tiyarinkunapa. Chaymanta chay pichka panta, ishkay challwata apishpan siluma rikushpan Yayan Diosta agradesirka. Agradesishkanwasha chay pankunataka pakishpa pakishpa ñukanchita kurka.

Chaypina ñukanchikunaka chaypi kahukkunata mikunankunapa kurkanchi. ²⁰Chay achka runakunaka mikurkakuna saksanankunakama. Mikushkankunawasha ñukanchikunaka puchurishkanta tantachirkanchi chunka ishkay tasa untakta. ²¹Chay mikuk karikunaka pichka waranka karkakuna. Achka warmikuna wawakunapas mikurkakuna, paykunataka mana yuparkanchichu.

Jesuska yaku awata purirka
(Mk. 6.45-52; Jn. 6.16-21)

²²Chaymanta Jesuska ñukanchikunallata rimarka:

Ñuka tukuy kay runakunata wasinkunama kutinankunapa rimanaynikama,

kankunaka botipi kuchachimpama riychi.

²³Chay runakuna rishkankunawasha Jesuska sapallan shuk urku awama sikarka Yayan Diosta mañanampa. Tutayanankamami payka sapallan chaypi karka. ²⁴Jesús chay urkupi kanankama ñukanchika botipi ña chawpi kuchapi rihurkanchi. Chasna chimpahushpanchi puntanchimanta yakuka yapa sinchita wayrawa ulasyarka. Botinchita ulaska wayraka sinchita waktarka. ²⁵Ña pakarihushpan Jesuska yaku awata purishpa ñukanchita kayllayak shamurka. ²⁶Jesusta yaku awata purilushkanta rikushpanchi mana riksirkanchichu. Yapa mancharishpa kaparirkanchi:

¡Ay, almatami riku hunchi!

²⁷Chasna kaparihushpanchi Jesuska ñukanchita rimarka:

Sinchikuriychi. Ñukami kani,^b ama manchariychichu.

²⁸Chaypi Pedroka aynirka:
Kan Jesús kashpaykika rimaway
kanma rinaynipa, yaku awata purishpa.

²⁹Jesuska aynirka:
Shamuy ñukama.
Chayta uyashpan Pedroka botimanta uraykushpan Jesusma rirkay yaku awata purishpa. ³⁰Chasna rihushkanpi yaku awapi musyarka sinchi wayra paypi waktarihushkanta. Chaypi mancharirkay. Chasna mancharihushpan kallarirkay yaku ukuta yaykunata. Chaypi sinchita kaparishpa rimarka:

¡Kishpichiway Yaya Jesús! nishpa.

³¹Chay ratulla makinmanta apishpan Jesuska nirka:

Imaraykuta mana tukuy shunkuykimanta pacha ñukata kiriwankichu sinchikurinaykipa.

³²Ña Pedro Jesuswa botipi urayku hushkankunapi chay sinchi wayraka pasarirkay. ³³Chaypi ñukanchi botipi

b Chay Ñukami kani nishkaka kan Yaya Diospa shuk shutin

kahukkunaka Jesuspa puntanpi
kunkurishpanchi nirkanchi:
Shutipami Yaya Diospa Wawan kanki
nishpa.

**Jesuska achka unkushkakunata
ampirka Genesaret allpapi**
(Mk. 6.53-56)

³⁴Chay sinchi wayra pasarishpanna chay kuchachimpama Genesaret allpapi Jesuswa pakta paktarkanchi. ³⁵Chaypi kawsak runakunaka Jesusta riksishpankuna tukuy runakunata rimashpa purirkakuna ñami Jesuska paktamushka nishpa. Chayta yachashpankuna unkushkakunata Jesusma apamurkakuna. ³⁶Chay unkushkakunata Jesusta rimarkakuna:

Churarishkaykipa shiminllatami llankanayanchi ampirinanchipa nishpa.

Chasna rimashpankuna Jesuska chay unkushkakunata churarishkanpa shiminta llankachishpan ampirka.

**Jesuska yachachin imata
rurashpami alicharishka kanchi
Yaya Diospa rikushkanpi**
(Mk. 7.1-23)

15 ¹Chaymanta *fariseokuna, Moisespa killkashkanta yachachikkunapas Jerusalén llaktamanta rishpankuna Jesusta kayllayarkakuna tapunkunkuna. ²Chaypi paykunaka nirkakuna:

¿Imaraykutaya runaykikunaka yaya rukunchikuna wañupa rurashkankunata mana kasunahunchu? Ñukanchi yuyarinchi manara mikuhushpanchi makinchita yakuwa ukuchinanchi tiyan mana uchayu kananchipa. ¿Imaraykuta runaykikunaka mana chasna ruranahunchu?

³Chaypi Jesuska paykunata aynirka: Kankunaka Yaya Diospa kamachishkanta mana kasushpaykichimi yaya

rukuykichi wañupa rurashkankunallata kasushpa kawsankichi. Imaraykuta chasna rurankichi. ⁴Kasnamí Yaya Dioska kamachin:

Yayaykichita mamaykichita yuyashpa kasushpa kawsaychi nishpa.

Chaymanta:

Maykanmi yayanta mamanta chiknishpa riman mana ali kananta, chay runataka apuykichiwañuchinan tiyan nishpa.

⁵⁻⁶Chasna Yaya Dios rimashpanpas kankunaka chikantami yachachihunkichi. Runakunata rimankichi yayaykichiwañuchina pishihushpanpas mana yanapanaykichi tiyan rimashpaykichi kankunata yanapanayni kullkitaka Yaya Diostami kushkani. Chayraykumi manana tiyawannachu kankunata yanapanaynipa nishpa. Chasna yaya rukuykichi wañupa rurashkanllatami rurashpa kawsahushkaykichirayku Yaya Diospa kamachishkankunata mana kasuhunkichichu. ⁷Ali runakuna kanchi nishpa yuyarishpaykichipas llulla runakunami kankichi. Yaya Diospa yachayninwa yachachik Isaías wañuka alita rimarka kankunamanta Yaya Diospa ñawpa rimashkanta kasna:

⁸ Kay runakunaka shiminkunallawami yuyawanahun. Manami tukuy shunkunkunamanta pachachu yuyawanahun.

⁹Runakunapa kamachishkankunata rimashkaynitashina yachachishpankuna yankami ñukata mañana wasipi tantarinahun kushichiwanankunapa nishpa.

¹⁰Chasna rimashpan Jesuska shuk runakunatana kayarka payta kayllayanankunapa. Paykunata rimarka:

Alita uyawaychi asirtanaykichipa.

¹¹Imata mikushpaykichipas manami

uchata rurankichichu. Shunkuykichipi millaypata yuarishkaykichita rimashpaykichimi shuti uchata rurankichi nishpa.

¹²Chaymanta ñukanchika payta kayllayashpanchi rimarkanchi:

¿Yachankichu chay fariseokuna rimashkaykita uyashpankuna piñarish-kankunata?

¹³⁻¹⁴Chaypina Jesuska aynirka:

Ama llakiriyichichu chay fariseoku-naka piñarihushpankuna. Paykunaka Yaya Diospa kamachishkanta mana alita asirtashpankunami mana yachak runakunata pantachichinahun. Wawki-kuna panikuna rikuychi. Tarpushpanchi shuk muyuta, chaypi millaypa kiwaku-napas wiñanahun. Kankunaka millaypa kiwakunata surkushpaykichimi wíchun-kihi. Chasnallatatami Yaya Dioska mana ali yachachikkunataka kastiganka. Paykunaka wisku runakuna wisku masinkunata pushahuksinami kanahun. Chasna kashpankunami ishkanti uchkupi urmankakuna nishpa.

¹⁵Chaymanta Pedroka Jesusta rimarka:

Chay yachachishkaykita ashwan alita ñukanchita asirtachiy nishpa.

¹⁶Chaypi Jesuska aynirka:

¿Kankunapas manarachu asirtankichi chay rimashkaynita? ¹⁷Tukuy mikunami mikushpanchika wiksamchima rin. Chaymanta llukshin aychanchimanta. Imatas mikushpanchika manami uchatachu ruranchi. ¹⁸Maykantami rimanchi shunkunchipi yuyarishkanchi-manta shamun. Chaymi shuti uchaya-chin. ¹⁹Shuk runa manara millaypata rurahushpanra shunkunpi yuyarin chay millaypata rurananpa. Chaymanta tukuy chay millaypakanata ruran. Chay millaypa ruranakuna kanahun: Shuk runata chiknishpa wañuchina, shuk warmiyu kari shuk warmiwa musayana,

shuk kusayu warmi shuk kariwa musayana, chaymanta tukuywa musaya-nakuna, shuwana, llullana, runa masinta chiknishpa kamina. ²⁰Shuk runa chay mana alikunata rurashpan uchayan. Mana makinchita yakuwa ukuchishpa mikushpanchika manami uchayanchichu.

Shuk mana israel warmi Jesusta

tapurka yanapananpa (Mk. 7.24-30)

²¹Jesuska chay llaktamanta llukshish-pan rinka Tiro, Sidón llaktakunama.

²²Chaypi shuk warmika Jesusta kayllayarka. Chay warmika ñawpa Kanaán allpapi kawsak runakunamanta kashpan mana israel warmichu karka. Payka Jesusta kayllayahushpan kaparishpa rimarka:

¡Yachachik, Davidpa Miraymanta Kishpichik, llakichiway! Shipas waway-nipimi supayka yaykushpan payta yapa parisichihun nishpa.

²³Jesuska chayta uyashpanpas nima imata aynirkachu. Chaypina Jesusta kayllayashpanchi rimarkanchi:

Chay warmita rimay kaymanta anchurinarpa, yapami ñukanchita kaparishpa apanakuhun nishpa.

²⁴Jesuska chay warmita aynirka:

Yaya Dioska kachawashkami israel runa masinikunallata yanapanaynipa. Paykunami obeha chinkarishkashina kawsahunkuna nishpa.

²⁵Chayta uyashpan chay warmika Jesuspa puntanpi kunkurik rinka kasna nishpa:

Yachachik, yanapaway.

²⁶Chaypi Jesuska aynirka:

Manarapas chikan runakunata aliyachi-hushpaynira israel masinikunatarami yanapanayni tiyan. Manami alichu shuk runa mikunata wawankunamanta kichushpa allkukunata karananpa.

²⁷Chasna Jesús rimashpan chay warmika aynirka:

Ari yachachik, chasna kashpanpas allkukunapa amun mesapi mikuhushpanka mikunanmanta wicherishkatami allkukunapas mikunahun.

²⁸Chaypi Jesuska rimarka:

Pani, maytukuytata shunkuykimanta pacha kiriwanki. Chayrayku shipas wawaykitaka ñami ampishkani.

Chay ratulla chay shipaska ampirirka.

**Jesuska achka
unkushkakunata ampirka
(Mk. 7.31-37)**

²⁹Chaymanta Jesuska ñukanchikunawa chay llaktakunamanta llukshishpan Galilea kucha mayanpi paktarka. Chaypi shuk urku awama sikashpan tiyarik rirkta.

³⁰Chay urku awapi kahushpanchi achka runakuna achka unkushkakunata apamushpankuna Jesuspa puntanpi churak shamurkakuna. Mana purinata atipakkunata, wiskukunata, waklishka makiyu waklishka chakiyu runakunata, mana rimanata atipakkunatapas, chaymanta ashwan achka unkushkakunata apamurkakuna. Chaypina Jesuska tukuy chay unkushkakunata ampirka. ³¹Chasna ampirishpankuna mana rimanata atipakkuna kallarirkakuna rimanata. Waklishka makiyu waklishka chakiyu runakunapas aliyarkakuna. Mana purinata atipakkunapas alita purirkakuna. Wiskukunapas atiparkakuna rikunata. Chayta rikushpankuna tukuy runakuna mancharishpankuna ñukanchi israel runakunapa Yayanchi Diosta kushichirkakuna, Yaya Dios, kanmi tukuyta atipak kanki nishpa.

**Jesuska chusku waranka
runakunata kararka
(Mk. 8.1-10)**

³²Chaymanta Jesús ñukanchita kayashpan rimarka:

Llakichinimi kay runakunata. Ñami kimsa punchata ñukanchita katihunkuna. Mikuna illa kay runakunaka. Manami kachanayanichu mana mikushpa wasinkunama kutinankunapa. Chasna mana mikushpa rishpankunaka pakta ñampi chawpipi lismayanahuma nishpa.

³³Ñukanchika Jesusta nirkanchi:

¿Imashnataya kay tukuy achka runakunaraykuka tarinchima mikunata? Kaypika nima shuk runa kawsanchu.

³⁴Jesuska ñukanchita tapurka:

¿Masna pantata charinkichi?

Ñukanchika aynirkanchi:

Kanchis panllami, chaymanta masna challwastukuna.

³⁵Chaypina Jesuska chay runakunata rimarka allpapi tiyarinankunapa.

³⁶Chaymanta chay pankunata, challwas-tukunatapas apishpan Yayan Diosta agradesirka. Chaymanta paki paki rurashpan ñukanchita kurka chay tiyahuk runakunata kunanchipa.

³⁷Chasna kushpanchi chay runakuna tukuy mikurkakuna saksanankunakama. Mikushkankunawasha puchurishkatana tantachishpanchi kanchis tasata untachirkanchi. ³⁸Chay mikuk karikunami chusku waranka karkakuna. Achka warmikuna, wawakunapas mikurkakuna, paykunataka mana yuparkanchichu.

³⁹Chaywashami Jesuska chay runakunata rishara nishpan ñukanchiwa pakta shuk botipi uraykushpan chimparkanchi Magdala shutiyu llaktama.

**Fariseokuna, saduseokuna Jesusta
tapurkakuna Yaya Diospa
yachayninwa rurashkanta
rikuchinanpa
(Mk. 8.11-13; Lk. 12.54-56)**

16

¹Chaymanta *fariseokuna *saduseokunawa parihu Jesusta kayllayashpankuna yapa runakunata

riksichinayashpankuna mana Yaya Diospa kachashkan kananta tapurkakuna:

Ñukanchirayku ruray Yaya Diospa yachayninwa shuk nima ima uras rikushkanchita.

²Chasna tapushpankuna Jesuska paykunata aynirka:

Kankunaka inti pukanlla yakyuhushkata rikushpaykichi rimankichi kayaka ali punchami tukunka nishpa.

³Chaymanta shuk puncha tutamanta puyu pakarihushpan rimankichi ñami punchaka waklishka nishpa. Alita tukuy chaykunata yachashpaykichipas rurashkaynikunata rikushpaykichika ¿manachu asirtankichi imaraykumi chaykunata rurashkani? ⁴Kankunaka Yaya Diosta mana kasushpaykichimi mana ali yuyayyu runakuna kankichi. Tapuwashpaykichipas Yaya Diospa yachayninwa rurashkaynita rikuchinaynipa, manami rurashanchu yanka rikunaykichipaka. Kayllatami rikunkichi, imashnami Yaya Dioska ñawpa paypa yachayninwa yachachik Jonasta kimsa punchamanta wañuymanta kishpichirka, chasnallatatami kuti runaka ñukawa.

Chasna rimashkanwasha paykunata sakishpan shuk partima rirkta.

Jesuska yachachirka fariseokunapa yachachinankunata mana

kasunankunapa

(Mk. 8.14-21)

⁵Chaymanta ñukanchi Jesuspaprunankunaka kuchachimpama paktashpanchi yuyarirkanchi panta apanata kunkashkanchita. ⁶Chaypina Jesuska ñukanchita rimarka:

Alita yuyariyichi. Kuyrariyichi *fariseokunapa *saduseokunapa *levaduramanta.

⁷Chasna Jesús levaduramanta rimashpan maykanwami chapushpa panta

punkichinchí ñukanchipura tapunakurkanchi:

Panta mana apamushkanchiraykumi chasna ñukanchita rimahun.

⁸Chaypi Jesuska rimahushkanchita uyashpan rimarka:

¿Imaraykuta chasna kankunapura tapunakunkichi? Mana chay panta kunkashkaykichimantachu kankunata rimahuni. Kankunaka manachu ñukapi sinchikurinkichi. ⁹¿Manarachu asirtankichi pichka panwa pichka waranka runakunata karashkaynita? ¿Manachu yuyarinkichi masna tasatami untachirkankichi chay mikuna puchurishkanta? ¹⁰Chaymanta ¿manachu yuyarinkichi kanchis panwa chusku waranka runakunata karashkaynita? Chaymanta ¿manachu yuyarinkichi masna tasatami tantachirkankichi chay mikuna puchurishkanta? Tukuy uras chasnallata atipani ruranata. ¹¹¿Imaraykuta kankunaka mana alita asirtankichichu? Manami panmantachu rimahuni. Kutikashka rimani, kuyrariyichi fariseokunapa saduseokunapa levaduramanta nishpa.

¹²Chaypirami ñukanchika asirtarkanchi chay Jesuspaprimahushkanta. Manami kikin panta punkichik levaduramantachu rimahurka, ashwan fariseokunapa saduseokunapa waklichik yachachinankunaman-tami ñukanchita rimarka.

Pedro rimarka Jesús Yaya Diospa

Kachashkan Kishpichik kananta

(Mk. 8.27-30; Lk. 9.18-21)

¹³Chaymanta Sesarea Filipo shutiyu llaktapi paktashpanchi Jesuska ñukanchita tapurka:

Runakuna kwintahushpankuna ¿pimi kani ninahuntaya?

¹⁴Chaypi ñukanchika aynirkanchi: Shukkunaka ninahunmi Bawtsik Juanchari wañushkanmanta

kawsarishka kanaykita. Shukkunaka ninahunmi Yaya Diospa yachayninwa ñawpa yachachik Eliaschari kanaykita, maykanmi kuti shamunan karka. Shukkunaka ninahunmi Yaya Diospa yachayninwa ñawpa yachachik Jeremiaschari wañushkanmanta kawsarishka kanaykita. Mana kashpaka Yaya Diospa yachayninwa shuk ñawpa yachachikchari kawsarishka kanaykita nishpa.

¹⁵Chaymanta ñukanchitana tapurka:
Kankunaka, ¿pimi kani ninkichitaya?

¹⁶Chaypi Simón Pedro shutiyuka aynirka:

Kanmi kanki kawsa Yaya Diospa Wawan, paypa Kachashkan Kishpichik.

¹⁷Chasna Simón Pedro rimashpan Jesuska payta rimarka:

Kushilla kanki Simón, Jonaspa wawan. Chaytaka manami runachu kanta riksichishka, ashwan Yayayni Dios silipi kawsakmi riksichishka.

¹⁸Ñukami kanta rimani, kanmi kanki Pedro.

Pedro nishkanka rumimi. Chasna kashpan Jesuska rimashpa katirka:

Tukuy shunkuykimanta pacha ñukata kiriwashkaykirayku sinchi rumishinami kanki. Kan yachachishpayki achka runakunata yanapasha paykunapas ñukapi sinchikurishka kiriwanankunapa. Chasna shuk wasihuk runashina kankunawa wasinita rurahushpayni kantami churasha chay wasita sinchikurishka rumishina kanaykipa. Tukuy kiriwakkuna shuk sumakta rurarishka wasishina kashpaykichi nima wañuna atipankachu tukuchinata. ¹⁹Kanta churasha kay allpapi kamachihushkaynirayku punkupi kuyrahuk runashina kanaykipa. Shuk runata rimashpayki uchaykika llakichirishkami kan nishpa, Yaya Diospas ari, chasna kachun ninkami. Shuk runata rimashpayki

uchaykika mana llakichirishkachu kan nishpa, Yaya Diospas ari, chasna kachun ninkami.

²⁰Chasna Pedrota rimashkanwasha Jesuska ñukanchita nirka:

Ama nima pita rimankichirachu ñuka Yaya Diospa Kachashkan Kishpichik kanaynita.

**Jesuska wañunanmanta
kawsarimunamantapas rimarka**
(Mk. 8.31-9.1; Lk. 9.22-27)

²¹Chaymanta pacha Jesuska ñukanchita alita asirtachishpa rimarka:
Ñuka Jerusalenma rinayni tiyan.

Chaypimi ñukanchita kamachik israel masinchu rukukuna, *saserdotekunapa apunkuna, Moisespa killkashkanta yachachikkunapas yapa chikniwashpankuna parisichiwankakuna. Paykunaka chikniwashpami wañuchiwankakuna. Chasna wañuchiwashpankunapas kimsa punchamantami kawsarisha.

²²Chayta uyashpankuna Pedroka Jesusta chaynikstuma pushashpan rimarka:

Yaya Jesús, chaytaka ama rimaychu. Yaya Dioska manami munamachu chasna pasanaykipa nishpa.

²³Chayta uyashpan Jesuska tikrarishpan Pedrota rimarka:

Anchuriy ñukamanta, supaykunapa apunshina rimahunki. Llullachinayawahunkimi Yaya Diosta mana kasunaynipa. Manami Yaya Diospa munashkantachu rimawahunki, ashwan runapa yuyarinanllatami rimawahunki nishpa.

²⁴Chaymanta Jesuska tukuy ñukanchikunata rimarka:

Kankuna ñukata katinyawashpaykichika ama kankuna kikin munashkaykicha ruraychinachu. Kankunata chiknik runakuna piñarishpa wañuchinayahushpankunapas ñukallata katiwaychi.

²⁵Maykanmi wañuya manchashpan

sakiwan, chayka wiñaypami wañunka. Maykanmi ñukata katiwahushpan chiknina wañuya parisin, chayka wiñaypami Yaya Dioswa kawsak rinka. ²⁶Imata valin shuk runa tukuy kay mundupi tiyashkata apinanpa. Tukuy chaykunata apishpanpas wiñaypami wañunka. Masna kullkitapas kunayash-paykichika manami atipankichichu rantiñata chay wiñaypa Yaya Dioswa kawsanataka. ²⁷Ñuka Yaya Diospa Wawan silumanta *angelkunawa shamuhushpayni suma chuyahlla rikurishpami shamusha Yayaynipa yachayninwa. Chay urasmi mana alita rurak runakunataka kastigasha. Chaymanta kasuwak runakunataka rimasha ñukawami silipi kawsankichi. ²⁸Alita uyawaychi. Shuk kankunamanta kaypi kahukkunaka manara wañuhush-paykichira ñuka Yaya Diospa Kachash-kan Runata rikuwankichimi wañushkay-nimanta kawsarimushpayni kay allpapi kamachik tukunaynita.

Jesuska suma chuyahlla
rikunayu tukurka
(Mk. 9.2-13; Lk. 9.28-36)

17 ¹Chaymanta Jesuska sokta punchamanta Pedrowa, *Santia-gowa, paypa wawkin Juanwapas sikarka shuk atun urku awama. ²Chay urkupi kahushpankuna chay kimsa runankunaka Jesusta chuyahlla chickanyashkanta rikurakuna. Uyanka intishina punchayachirka. Churarish-kanpas yura chuyahlla sintihushkashina rikurirka. ³Chay kimsa runankunaka rikurakuna ñawpa yachachikkuna Moisesta, Eliastapas Jesuswa kwinta-hukkunata. ⁴Chayta rikushpan Pedroka mancharishpa rimarka:

Yaya Jesús, alitami kaypi kahunchi. Munashpaykika rurashu kimsa tampukunata, shukta kanrayku,

shuktaka Moisesrayku, shuktaka Eliasrayku nishpa.

⁵Chasna Pedroka rimahushkanpi shuk chuyahlla rikurik puyuka paykunata arkamurka. Chay puyu ukumanta uyarkakuna Yaya Diospa rimahush-kanta:

Kay Jesuska munashkayni Waway-nimi. Paymi ñukata sumakta kushichi-wan. Kasuychi payta.

⁶Chayta uyashpankuna chay kimsa Jesuspa runankunaka mancharishpan-kuna allpapi kunkurishpa kumurirkakuna. ⁷Chaypina Jesuska kayllayashpan paykunata llankashpan rimarka:

Atariychi, ama manchariyichichu nishpa.

⁸Paykunaka atarishpankuna Jesusta sapallantana rikurakuna. ⁹Chay urkumanta uraykuhushpankunana Jesuska paykunata rimarka:

Kay urkupi rikushkaykitchitaka ama nima pita kwintankichirachu, ñuka Yaya Diospa Kachashkan Runa wañush-kaynimanta kawsarimunaynikama.

¹⁰Chaypina chay kimsa runankunaka Jesusta tapurkakuna:

¿Imaraykutaya Moisespa killkash-kanta yachachikkunaka rimanahun, manara Yaya Diospa Kachanan Kishpichikka shamuhushpanrami Yaya Diospa yachayninwa ñawpa yachachik Eliasra kuti shamunka nishpa?

¹¹Jesuska paykunata aynirka:
Shutipami riman, puntiru Elias kuti yachachik shamunka runakuna kawsay-ninkunata alicharinankunapa Yaya Dioswa nishpa. ¹²Ñuka kankunata rimani, Eliasra ñami shamushka. Runakuna manami riksirkakunachu payta. Chasna mana riksishpankunami parisichishpa payta wañuchirkakuna. Chasnallatatami ñuka Yaya Diospa Kachashkan Runa kashpayni ñukatapas parisichishpa wañuchiwankakuna.

¹³Chasna Jesús rimahushpanrami chay runankunaka asirtarkakuna Eliasmana rimahushkanwa Bawtisak Juanmanta paykunata rimahushkanta.

**Jesuska shuk supay yaykushka
wawata ampirka**
(Mk. 9.14-29; Lk. 9.37-43)

¹⁴Chaymanta Jesuska chay kimsa runankunawa urkumanta uraykumushpan achka runakuna kahushkanpi paktamurkunkuna. Chaypi shuk runaka Jesusta kayllayashpan puntanpi kunkurishpan rimarka:

¹⁵Yachachik, wawaynita llakichish-payki ampipay. Yapa achkatami parisipahu. Maypipas kahushpan sinchiyarishpa allpama urman. Achka kuti ninapi yakupipas urmapan. ¹⁶Kay wawaynita apamurkani runaykikunama. Paykunaka mana atipashkakunachu ampinata.

¹⁷Chaypi Jesuska tukuy runakunata rimarka:

Mana ali yuyayyu runakuna, kankunaka manami sinchikunkichichu ñukapi. Ima uraskamataya kankunawa kiparishpa yachachishkaykichi. Apamuychi kayma chay unkuskata.

¹⁸Chay wawata pushamushpankuna Jesuska chay unkuchik supayta sinchi shimiwa kamachirka ɿlluksiy kay wawamanta! nishpa. Chay ratulla chay wawaka ampirishka kiparirka.

¹⁹Chaymanta tukuy ñukanchi Jesuspa runankuna shuk parti paywa tarishpanchi tapurkanchi:

¿Imaraykutaya mana ñukanchika atipashkanchichu chay supayta llukshichinata chay wawamanta? nishpa.

²⁰Chaypina Jesuska ñukanchita aynirka:

Kankunaka manami tukuy shunkuykichimanta pacha kiriwankichichu.

Chayraykumi mana atipashkankichichu chay supayta llukshichinata chay wawamanta. Alita uyawaychi. Uchillas-tullatapas Yaya Diosta kirinkichimaka, rimankichima kay urkuta anchuriy chaymanta nishpa, chay urkuka rimashkaykichita kasushpanmi anchurima. Yaya Diosta tukuy shunkuykichimanta pacha kirinkichimaka, payka yanapamami tukuy imata atipanaykichipa ruranata. ²¹Chasna supaytaka atipankichi runamanta llukshichinata mana mikushpma mañashpalla Yaya Diosta nishpa.

**Jesuska kutikashka rimarka
wañunanmanta**
(Mk. 9.30-32; Lk. 9.43-45)

²²⁻²³Chaymanta Jesuska ñukanchiwa pakta Galilea allpapi purihushpan ñukanchita rimarka:

Nuka silumanta shamushka runa kashpaynipas chikniwak runakunami apichiwashpankuna parisichishpa wañuchiwashpankunapas kimsa punchamantami Yaya Dios kawsachiwanka.

Chayta uyashpanchi yapa llakirirkan-chi.

**Jesuska rimarka Yaya Diospa
wasinrayku kullkita
paganankunapa**

²⁴Chaymanta Jesús ñukanchiwa pakta rishpan Kapernaum llaktapi paktarkan-chi. Chaypi shuk runakuna *Yaya Diospa wasinrayku kullkita kobrakkuna kashpankuna Pedrota kayllayashpa tapurkakuna:

¿Kankunata yachachik Jesuska manachu pagan Yaya Diospa wasinrayku?

²⁵Chasna tapushpankuna Pedroka aynirka:

Ari, paypas paganmi nishpa.

Chaymanta Pedro chay wasipi
yaykushpan manara nima imata rimash-
panra Jesuska payta tapurka:

¿Imatata yuyarinki Simón? Rimaway
¿pitata kullkita pagachinahun atun
apukunaka, kikin llaktankunamanta
runa masinkunatachu, shuk allpamanta
runakunatachu? nishpa.

²⁶Chaypi Pedroka aynirka:
Shuk allpamanta runakunatami
pagachinahun nishpa.

Chaypi Jesuska rimarka:
Chayrayku chay apukunapa kikin
llaktankunamanta runa masinkunaka mana
nima shuk imata paganankuna tiyanchu.
²⁷Ñuka Yaya Diospa Wawan kashpayni
Yayayni Diospa wasinrayku mana
paganayni tiyanchu. Mana paganayni
kashpanpas nima pita piñachinanchipa,
akuichi pagashunchi. Antsilukriy kuchama.
Chay puntiru challwata apishpay kimi
shiminpi kullkita tarinki. Chayta pagakriy
ñukarayku kanraykupas.

**Jesuska yachachin maykanmi
tukuymanta ashwan yachayyu kan**
(Mk. 9.33-37; Lk. 9.46-48)

18 ¹Chay uras Jesús Pedrowa
kwintahushpan ñukanchi payta
kayllayashpanchi tapurkanchi:

Yachachik, Yaya Dios tukuy runakun-
nata kamachishpan ¿pitaya ñukanchi-
manta ashwan yachayyu kanka?

²Chasna tapushpanchi Jesuska shuk
wawata kayashpan chawpinchipi
shayachirka. Payta rikuchishpan
ñukanchita yachachirka:

³Alita uyawaychi. Kankuna shuk
wawashina mana yachayyuchu kani nishpa
yuyarishpa kawsaychi. Mana sakishpayki-
chika yuyarinata runa masinkunamanta
ashwan yachayyu kani nishpa, manami
Yaya Diospa kamachishkan tukushpa
paypa ali kamachihushkanpi kawsankichi-
chu. ⁴Kay wawashina mana yachayyuchu

kani nishpa yuyarishpaykichika Yaya
Diospa kamachihushkanpi tukuymanta
ashwan yachayyu kankichi. ⁵Chaymanta
maykanmi ñukata yuyawashpan shuk
wawata yuyashpa wasinpi yaykuchin,
chayka ñukatami yaykuchiwan nishpa.

**Jesuska yachachin shuk runa
masinta uchata rurachishpan yapa
kastigarishka kananmanta**
(Mk. 9.42-48; Lk. 17.1-2)

6Chaymanta Jesuska rimarka: Maykanmi
shuk wawa chayra katiwhukta uchata
rurachin, paytaka Yaya Diosmi chaymanta
ashwan sinchita kastiganka. Ashwan ali
kama, kunkanpi atun rumiwa watashpa
wichuy tukushpan chawpi yakupi chinkari-
nanpa. ⁷Ay kay allpapi Yaya Diosta mana
kasukkuna, yapa tukuya uchata rurachina-
yashkankunarayku. Tukuy uras chasna
uchata rurachinayakkuna tiyashpanpas ay,
maykankunami uchata rurachikkuna
kanahun. ¡Imashna kastigushi paykuna-
rayku kanka!

⁸Chayrayku imapas kanta uchata
rurachinayashpanka sakiy. Makiki chakiki
kanta uchata rurachinayashpanka pitishpa
wichushkashina sakiy. Mana ishkanti
makikiwa, ishkanti chakikiwa nina mana
wañukma rinaykipa, ashwan alimi kama,
shuk makillawashina shuk chakillawashina
Yaya Diospa kawsanampi yaykunaykipa.

⁹Chaymanta ñawikiwa imatas
rikushpayki uchata ruranayashpaykika
ñawikita surkushkashina sakiy. Mana
ishkanti ñawikiwa nina mana wañukma
rinaykipa, ashwan ali kama, shuk
ñawillawashina silipi Yaya Dioswa kawsak
rinaykipa nishpa.

**Jesuska yachachin obeha
chinkarishkata yuyachishpa**
(Lk. 15.3-7)

¹⁰Chaymanta Jesuska yachachihush-
pan nirka: Rikuychi, nima shuk

wawastuta, nima shuk chayra katiwak runata chikniyichichu. Kay rimahush-kaynita alita uyaychi: Paykunapa *angelkunaka silupimi tukuy uras Yaya Diospa puntanpi kanahun.¹¹Ñuka Yaya Diospa Wawanka shamushkanimi tukuy runakunata sinchi kastigananmanta kishpichinaynipa.

¹²¿Imashnata yuyarinkichi? Shuk runapa shuk pachak obehankuna tiyama. Chay shuk pachak obehankunamanta shuklla chinkarishpan ¿imatata rurama? ¿Manachu chay iskun chunka iskunta sakishpan chay shuklla chinkarishkata maskak rinma?¹³Alita uyawaychi. Chay shuk chinkarishka obehanta tarishpanka chay achka mana chinkarishka obehankunamanta ashwantami kushikuma.¹⁴Chasnallatami silipi kawsak Yayanchika tukuy wawankunata alita yuyan. Chayraykumi payka mana munanchu nima shuk chayra katiwak runa paymanta chinkarishpa nina mana wañukma rinanpa nishpa.

**Jesuska yachachin imashnami runa masinchita llakichinanchi tiyan
(Lk. 17.3)**

¹⁵Chaymanta Jesuska yachachirka imashnami shuk kirik masinchita llakichinanchi tiyan nishpa. Kasnami nirka:

Shuk kirik masikichi kanta mana alita rurashpanka sapallayki rishpayki payta kunay. Kanta ari nishpanka alita alichashpa llakichinakuychi, chasnami kutikashka alitana paywa kawsankichi.

¹⁶Mana rimashkaykita uyashpanka ishkay kimsa kirik wawkunawa pakta alichak riychi. Chasna ishkay kimsa kirikkunapa rikushkanpi chay mana alita rurak runata kunashpaykichi tukuy yachankakuna shutipa rimashkaykicha.¹⁷Chay runaka kunashkaykicha

mana uyashpanka Yaya Diosta kasuk masikichikunata tantachishpa rimaychi paykunapas yachanankunapa. Paykunatapas mana uyanayashpanka Yaya Diosta mana kirik runatashinana rikuychi.¹⁸Alita uyawaychi. Kankuna shuk runata rimashpaykichi uchaykika mana llakichirishkachu kan nishpa, Yaya Diospas ari, chasna kachun ninkami. Shuk runata rimashpaykichi uchaykika llakichirishka kan nishpa, Yaya Diospas ari, chasna kachun ninkami.

¹⁹Alita uyawaychi. Kankuna ishkaymanta shuk yuyayllawa mañawashpaykichi Yaya Dios shuk imapi yanapanampa, payka kankunata yanapankami.²⁰Nukata kiriwashpaykichi ishkaymanta kimsamanta tantarishpaykichi chaypi kankunawa pakta kahuni.

**Jesuska yachachin mana
llakichinayak runamanta
yuyachishpa**

²¹Chaypi Pedroka kayllayashpan Jesusta tapurka:

Yachachik, shuk runa masini achka kuti mana alita rurawashpanka ¿masna kutitaya payta llakichinayni tiyan? ¿Kanchis kutichu llakichisha? nishpa.

²²Chaypina Jesuska aynirka:

Mana rimashkaykitchu kanchis kutilla llakichinaykipa. Rimashkayki kanchis chunka kuti kanchiskama llakichinayki tiyan. Mana yupashpa achka kuti llakichiylla.

²³Chaymanta ashwanta asirtachishpa rimarka:

Yuyariychi imashnami Yaya Diospa ali kamachinanka kay allpapi. Rikuychi shuk yachayyu patrón runankunata kushkanwa rurashkankunamanta tapunayashkata.²⁴Ña tapunata kallarishpan shuk payta liwik runata pushamurkakuna. Payka chay patronta

yapa achka, mana nima ima uras pagaypata waranka kullkita liwirka.²⁵ Chay liwik runa nima kullkiyuchu karka liwiskanta paganana. Chayrayku chay patronka runankunata rimarka: Mana paganata atipashpan kay runataka warminti, tukuy wawankunatas, tukuy paypa tiyapushkantapas rantichik riychi. Chay rantichishkayki-chi kullkita ūukata kuwaychi paypa liwinmanta nishpa.²⁶ Chasna rimashpan chay liwik runaka chay patronpa puntanpi kunkurirk. Yapa llakirishpan rimarka: Patroyni, ama piñariwaychu. Chapaway. Mana unayashpachu tukuy liwiskaynita pagashkayki.²⁷ Chasna yapa atunta tapushkanrayku chay patronka chay runanta llakichishpan rimarka: Kutiy ña wasikima. Tukuy liwiwashkaykimanta kanta llakichini. Kunanka manana liwiwankinachu nishpa.

²⁸ Chay llakichirishka runa llukshishpan shuk runa masinwa tinkunakurka. Chay tinkunakushkan runaka payta shuk uchillastu kullkita liwirka. Chaypina chay llakichirishka runana yapa piñarishpan chay uchillastu payta liwik runataka kunkamanta apishpan sipinayarka. Payta rimarka: Kunalla pagaway tukuy liwiwashkaykita nishpa.²⁹ Chasna rimashpan chay liwik runaka paypa puntanpi kunkurishpan rimarka: Ama piñariwaychu. Chapaway. Tukuy liwiskaynitami pagashkayki nishpa.³⁰ Yapa sinchita tapuhushpanpas chay sipinayak runaka mana munarkachu uyanata. Chay liwihuk runa masintaka karselma churachirk tukuy liwiskanta paganana punchakama.

³¹ Chay runata karselpi churachiskanta runa masinkuna rikushpankuna yapa llakirishpankuna chay patrontana rimak rirkakuna.³² Chaypina payka chay llakichishkan runanta kayachish-

pan rimarka: Kanka yapa millaypa runami kanki. Sinchita tapuwashkayki-raykumi chay achka mana pagaypa waranka kullkita liwiwashkaykimanta llakichirkani.³³ Kanta llakichishkaynishiha kanpas llakichinkima karka runa masikita nishpa.³⁴ Chaypina chay patronka yapa piñarishpan kamachirk chay runatapas karselpi churanankunapa tukuy liwihuskanta paganana punchakama.

³⁵ Chaymanta ūukanchita rimashpan katirk: Chay patrón millaypa rurak runanta kastigashkanshinami Yaya Dios kankunatas kastiganka, mana runa masikichikunata tukuy shunkuykichi-manta pacha llakichishpaykichika.

Jesuska yachachin kari warminwa,
warmipas kusanwa mana
sakinakunankunapa
(Mk. 10.1-12; Lk. 16.18)

19 ¹Tukuy chaykunata yachachish-kanwasha Jesuska Galilea allpamanta llukshishpan Judea allpama rirk, chay Jordán yaku chimpama.
² Chaypi achka runakuna payta katirkakuna. Jesuska chay uras achka unkush-kakunata ampirka.

³ Chaymanta *fariseokuna Jesusta kayllayashpankuna pantachichinayashpa tapurkakuna:

¿Alichu kama kusan warminta
sakinanpa shuk imastumantalla,
maykantami mana alita ruramachu?

⁴ Chasna tapushpankuna Jesuska aynirká:

¿Manachu Yaya Diospa killkachish-kanpi leyishkankichi runata rurashpan Yaya Dios karita warmita rurashkanta?

⁵ Yaya Dios chasna karita warmita rurashpan rimarka: Tukuy karikuna yayanta mamanta sakinankuna tiyan warminwana tantaylla kawsanankunapa. Paykunaka tantarishpankuna shuk

runashinallami kanahun nishpa.
⁶Chasna Yaya Dios paykunata tantachishpan shuk runashinalla kanahun, manana ishkay runashinachu kanahun. Chayrayku mana alichu nima shuk runa warminta sakinanpa.

⁷Chasna Jesús yachachihushpanmi chay fariseokunaka tapurkakuna:
 Chasna kashpanka ñimarakutaya Moiseska kamachirkira shuk kari warminta sakinayashpan apunkunapa puntanpi warminta shuk sakina killkata kushpan atipama sakinata nishpa?

⁸Chaypina Jesuska rimarka:
 Kankuna mana Yaya Diosta kasunayashpaykichi Moiseska rimarka shuk sakina killkata kushpa atipankichi sakinata warmikichita nishpa. Ñawpamanta pachami Yaya Dioska mana munarkachu sakinakunaykichita. ⁹Nuka kankunata rimani warmikichita ama sakiyichchu. Atipankichi warmikichita sakinata, shuk kariwa musayashkanraykulla. Mana chasna rurashpan warmikita sakishpaykichika uchatami rurankichi. Chaymanta shuk warmita apishpaykichika uchatami rurankichi. Chay sakishka warmita pushak karipas uchatami ruran.

¹⁰Chaypina ñukanchika payta rimarkanchi:

Yaya Dios mana munashpanka warminchita sakinanchipa, ashwan alichari kama shuk runa mana warmiyananpa nishpa.

¹¹Chasna rimashpanchi Jesuska ñukanchita aynirka:

Mana tukuy runachu asirtankakuna kay rimahushkaynita. Ashwan maykankunallatami Yaya Dioska asirtachin, chaykunami yachankakuna imamantami rimahuni. ¹²Tiyan achka runakuna chasna mana warmiyu kawsanankunapa. Shuk karikunaka wawayarinahunmi mana shuk warmiwa tupanata

atipakkuna. Chayrayku mana warmiyanahunchu. Shuk karikunaka chasna tukunahun, paykunata kapashkankunaryku. Chasna tukushpankuna mana warmiyanahunchu. Shukkunaka mana warmiyanahunchu Yaya Diospa kamachishkankunalla kanankunapa. Maykunkunami kay rimashkaynita asirtanahun, asirtashkankunashina kawsanahuchun nishpa.

Jesuska wawakunata llankashpan

Yayan Diosta mañarka

(Mk. 10.13-16; Lk. 18.15-17)

¹³Chaymanta shuk runakuna wawan-kunata Jesusma pushamurkakuna, Jesús llankashpan paykunarayku Yaya Diosta mañananpa. Chayta rikushpanchi ñukanchika piñarishpa paykunata arkahurkanchi Jesusta mana kayllaya-nankunapa kasna nishpa:

Ama chay wawastukunataka Jesusma pushamuychichu.

¹⁴Chasna piñaruhushpanchi Jesuska ñukanchita rimarka:

Ama arkaychichu chay wawakunata ñukama pushamunankunapa. Maykankunami kay wawakunashina ñukata kiriwahanahun, chaykunallami Yaya Diospa kamachishkan tukushpa paypa ali kamachihushkanpi kawsankakuna.

¹⁵Chasna rimashpan Jesuska tukuy chay wawakunata kuyashpan Yayan Diosta mañarka paykunarayku. Chaymanta llukshishpan rirka.

Shuk kullkiyu runa Jesuswa kwintarka wiñaypa kawsanamanta

(Mk. 10.17-31; Lk. 18.18-30)

¹⁶Chaymanta shuk runa Jesusta kayllayashpan tapurka:

Yachachik, ñima ali ruranatata ruranayni tiyan Yaya Dioswa wiñaypa kawsanaynipa?

¹⁷Chasna tapushpan Jesuska rimarka:

¿Imaraykuta tapuwahunki maykanmi ali kan ruranapa? Yaya Diosllami ali kan. Paywa kawsak rinayashpaykika Yaya Diospa kamachishkankunata alita kasushpa kawsay.

¹⁸Chay runaka tapurka:

¿Maykan kamachishkakunatata paktachinayni tiyan? nishpa.

Chasna tapushpan Jesuska rimarka:
Ama runa masikita wañuchiychu.
Ama shuk warmiwa musayaychu. Ama shuwayaychu. Ama nima maykan runamanta nima imata llullashpa rimayaychu. ¹⁹Yayaykita mamaykita yuyashpa kushichishpa kawsay.
Chaymanta kan kikinta yuyahuksina tukuy runa masikunata yuyay. Tukuy chayta kasushpa kawsanayki tiyan nishpa.

²⁰Chay runaka rimarka:

Tukuy chay Yaya Diospa kamachishkantaka kasushpami kawsashkani.

¿Imatata ashwan pishiwan ruranaynipa?

²¹Chaypina Jesuska aynirka:

Yaya Diospa munashkanta alita ruranayashpaykika rantichikriy tukuy imaykikunata. Chay kullkitaka nima imayu runakunata kuy. Chasna rurashpaykimi silipi achka imayushina tukunki. Chasna rurashkaykiwasha shuti katiway.

²²Chayta uyashpan chay runaka yapa llakirishpa wasinma kutirka. Yapa achka imayu kashpan mana munarkachu tukuy imankunata rantlichishpa kunata. Chayrayku yapa llakirirka.

²³Chay runa llakirishka rishpanna

Jesuska ñukanchita rimarka:

Alita uyawaychi. Kullkinllapi yuyarihuk runakunaka manami Yaya Diospa kamachishkan tukushpa paypa ali kamachihushkanpi kawsankakunachu.

²⁴Kutikashka rimani kankunata, shuk atun wiwa kamilluka manami atipamachu pasanata shuk aguha uchkunstuta.

Chasnallatatami shuk kullkiyu runaka kullkinllata munashpanka mana atipanchu Yaya Diospa kamachishkan tukushpa paypa ali kamachihushkanpi kawsanata nishpa.

²⁵Chayta uyashpanchi mancharishpa tapunakurkanchi:

Chasna kashpanka ¿pishi atipanka Yaya Diospa kamachinanpi yaykunata? nishpa.

²⁶Chaypina Jesuska ñukanchikunata rikushpan rimarka:

Manami nima shuk runa atipamachu pay kikinlla Yaya Diospa kamachinanpi yaykunata. Yaya Diosllami atipan runakunata kishpichishpa yaykuchinata.

²⁷Chaypina Pedroka rimarka:

Ñukanchika sakishkanchimi tukuy ñukanchipa tiyashkakunata kanta katinanchiranti. ¿Imatata Yaya Dios ñukanchita kunka? nishpa.

²⁸Jesuska ñukanchita aynirka:

Alita uyawaychi. Yaya Dios kay allpapi tukuyta mushuta rurashpanmi ñuka paypa Kachashkan Runami kutikashka shamusha suma yachayniwa tukuy runakunata kamachinaynipa. Chasna suma kamachik tukushpaynimi ñukata katiwashuskaykichirayku kankunatapas churasha ñukawa pakta kamachikkuna kanaykichipa. Chaypina chay chunka ishkay yaya rukunchikuna wañuta tukuy paykunamanta mirashka israel masinchikunawa pakta kawsashkankunamanta tapushpaykichi rimankichi pimi kishpinka pimi kastigarinka nishpa.

²⁹Chaymanta Jesuska rimarka:

Shuk runa ñukata katiwashuskayku wasinta, wawkinkunata, paninkunata, yayanta, mamanta, wawankunata, chakrankunata sakishpanka paytaka Yaya Dioska tukuy ima sakishkanmanta ashwantami kunka. Chay yuyawak runaka wañushkanwasha wiñaypatami

Yaya Dioswa silupi kawsanka.³⁰ Achka runakuna maykankunami kay allpapi kawsahushkanchipi runa masinkunapa rikushkampi tukuymanta ashwan valichirishka kanahun, paykunami Yaya Diospa rikushkanpi tukuymanta ashwan mana valikchu kankakuna. Achka runakuna maykankunami kay allpapi kawsahushkanchipi runa masinkunapa rikushkampi tukuymanta ashwan mana valikchu kanahun, paykunami Yaya Diospa rikushkanpi tukuymanta ashwan valichirishka kankakuna.

*Jesuska ali tarawachik
patronmanta yuyachishpa
yachachin*

20 ¹Chaymanta Jesuska rimash-nanpa chay runakunata yachachirka: Akuychi yuyarishunchi imashnami Yaya Diospa ali kamachinanka kay allpapi. Rikuychi, shuk patronpa tiyapurka shuk atun uva chakran. Shuk puncha tutamanta payka llukshirkha runakunata maskanarpa, uva chakranpi tarawachinanpa. ²Runakunata tarishpan rimarka: Tukuy puncha chishiyakta chakraynipi tarawashpaykichika kankunata pagasha shuk puncha valishkata nishpa. Paykunaka ari nishpanguna tarawak rirkakuna. ³Tutamantara kahushpan intika, chay patronka kutikashka maskak rirka ashwan runakunata. Plasapi achka mana tarawanayu runakunata rikurka. ⁴Paykunata rimarka: Kankunapas uva chakraynipi tarawak riychi. Tarawashkaykichimanta kankunata pagasha nishpa. Chasna rimashpan paykunapas tarawak rirkakuna. ⁵Chay chakrayu runaka chawpi puncha, chaymanta chishipi kutikashka maskak rirka runakunata tarawachinanpa. Kuti runakunata tarishpan kacharka chakranpi tarawa-

nankunapa. ⁶Ña chishiyahushpan kutikashka plasama rirka maskanarpa runakunata tarawachinanpa. Plasapi kutikashka mana tarawanayu runakunata rikurka. Paykunata tapurka: ¿Imaraykuta tukuy puncha kaypi kankichi nima imata rurashpa? nishpa. ⁷Chasna tapushpan paykunaka aynirkakuna: Nima pi ñukanchita tarawananchipa maskashkachu nishpa. Chaypina chay patronka rimarka: Kankunapas uva chakraynipi tarawak riychi nishpa.

⁸Chaymanta tutayahushpanna chay patronka paypa runanta rimarka: Tukuy tarawashka runakunata kayashpayki pagay. Ashwan washa shamushkakunamanta kallarishpa tukuya pagay nishpa.

⁹Chaypina shuk uralla tarawak runakunata pagarka tukuy puncha tarawashkata-tashina. ¹⁰Chayta rikushpankuna tutamanta pacha tarawashkakunaka

yuyarirkakuna, ñukanchita ashwanta paganka tukuy puncha tarawashkanchirayku nishpa. Chasna yuyarishpankunapas shuk puncha tarawashkakunaman-talla pagay tukurkakuna. ¹¹Chayrayku piñarishpankuna patronmanta yuyarirkakuna mana ali pagak patrón kananta.

¹²Chaypi payta rimarkakuna: ¿Imaraykuta ñukanchita kay washa tarawak shamushka runakunawa parihullata paganki? Paykuna shuk urallata tarawashkakuna. Ñukanchika tukuy puncha inti rupata awantashpa tarawashkanchirayku ashwanta paganayki tiyan. ¹³Chasna piñarishpa rimashpankuna chay patronka shukta rimarka: Amigu, ñukaka manami kanta llullachihunichu. ¿Manachu kwintashkanchi tukuy puncha tarawashkaykiranayku shuk puncha valishkata paganaynipa? ¿Imashnataya kunan ashwanta munanki paganaynipa? ¹⁴Chay

kushkayni kullkita apashpa riy. Ñuka paganayani washa shamushkakunatapas

kankunawa parihullata. ¹⁵Ñukapa kullkini kashpan munashkaynita rurani. Kanka matsankarashpaykika shukkunaka kanshinallatata kullkita apashkan-kunarayku, mana alitachu yuyarinki. ¿Piñarihunkichu ñuka ali shunku kashpayni mana mitsashpachu shukkunatapas kantashina kushkaynirayku?

¹⁶Chasnallatatami maykankunami kay allpapi kawsahushkanchipi runa masinkunapa rikushkanpi tukuymanta ashwan mana valikchu kanahun, paykunami Yaya Diospa rikushkanpi tukuymanta ashwan valichirishka kankakuna. Maykankunami kay allpapi kawsahushkanchipi runa masinkunapa rikushkanpi tukuymanta ashwan valichirishka kanahun, paykunami Yaya Diospa rikushkanpi tukuymanta ashwan mana valikchu kankakuna nishpa.

Jesuska kimsaynin kuti
wañunamanta
kawsarinanmantapas rimarka
(Mk. 10.32-34; Lk. 18.31-34)

¹⁷Chaypina Jesuska achka runakunawa pakta Jerusalén llaktama riushpan ñukanchi chunka ishkay runankunata chaynikstuma pushashpan rimarka:

¹⁸Ñami yachankichi Jerusalén llaktama riushkanchita. Chaypi chiknik runakunaka ñuka Yaya Diospa Kachashkan Runata apiwankakuna, *saserdote kunapa apunkunata, Moisespá killkashkanta yachachikkunatapas kuwankakuna. Chaypina paykunaka tantarishpangkuna shuk yuyayllawa wañuchiwanayankakuna.

¹⁹Chasna wañuchiwanayashpangkuna *romano runakunata kuwankakuna. Paykuna yapa asichiwankakuna, waktawankakuna, chaywasha kruspi klabawashpangkuna wañuchiwanakakuna. Chasna wañuchiwashpangkunapas kimsa punchamantami kawsarimusha.

Santiagopa, Juanpa maman Jesusta
tapurka shuk imata
wawankunaryku rurananpa
(Mk. 10.35-45)

²⁰Chaymanta Sebedeopa warmin ishkay Jesusta katik wawankunawa Jesusta kayllayarkakuna. Sebedeopa wawankuna *Santiago, Juan karkakuna. Chay warmika Jesusta tapunayashpan puntanpi kunkurirka. Chaypina Jesuska payta tapurka:

²¹¿Imatata munanki ruranaynipa? nishpa.

Payka aynirka:

Kan tukuy runakunata kamachihush-payki kay ishkay wawaynikunata karan shukta kuchuykipi tiyachipay tukuymanta ashwan alita kanwa pakta kamachinankunapa nishpa.

²²Jesuska aynirka:

Kankunaka mana alita yachashpayki-chi chayta tapuwahunkichi. Ñukaka achkatami parisinayni tiyan wañunayni-kama. ¿Atipankichimachu ñukashina awantanata chay tukuy parisinakunata wañunaykichikama?

Chasna rimashpan paykunaka aynirkakuna:

Ari, atipashunmi awantanata.

²³Chaypina Jesuska rimarka:

Ari, kankunapas ñukashina achkata parisinaykichi tiyan. Chasna parisishpayki-chipas ñukaka manami akllashanchu nima pita maykanmi kuchuynipi tiyarishpa kamachinka. Yayayni Diosllami akllanka, maykankunami kuchuynipi tiyarishpa kamachinkakuna nishpa.

²⁴Chasna chay warmi ishkay wawankunaryku tapushpan ñukanchi chunka runankunana uyashpanchi piñarirkanchi, chay ishkay wawkikuna ñukanchimanta ashwan atun tukunayashkankunaryku.

²⁵Chasna piñarihushkanchita rikushpan Jesuska ñukanchita kayashpan rimarka:

Kankunaka alita yachankichi, kay allpapi atun allpakuñapi kamachik atun apukuna kamachinanpi kawsak runakunata yapa manchachishpangkuna sinchita kamachish-kankunata. Kamachinanpi kawsak runakunata mana yuyashpa parisichishpa kasuchinahun.²⁶ Kankuna Yaya Diospa shimita kasukkunaka, ama chasna kanayaychichu. Shukkunamanta pasa kanayashpaykichika tukuy runa masikichikunata yanapashpa kawsaychi.²⁷ Kankuna tukuymanta ashwan yachak kanayashpaykichika tukuy runa masikichikunata kasushpa kawsaychi.²⁸ Nuka Yaya Diospa Kachashkan Runapas manami shamushkanichu kay allpama runakuna sirviwanankunapa. Ashwan shamushkanimi tukuy runakunata yanapanaynipa. Shamushkanimi achka runakunaranti wañushpayni kastigarina kashkunkunamanta kishpichinaynipa.

**Jesuska ishkay
wiskukunata ampirka**
(Mk. 10.46-52; Lk. 18.35-43)

²⁹ Jesuska ñukanchiwa pakta Jerikó llaktamanta llukshishpan achka runakuna katirkakuna.³⁰ Chaypina ishkay wisku runakuna ñampi mayanpi tiyahurkakuna. Paykunaka Jesús pasashuskanta uyashpangkuna sinchita kaparishpa rimarkakuna:

¡Yaya Jesús, Davidpa Miraymanta Kishpichik, ñukanchita llakichiy!

³¹ Chasna sinchita kaparishpangkuna Jesuswa purik runakunaka killarishpangkuna rimarkakuna:

Chunllayaychi nishpa.

Chay wiskukunaka mana kasushpachu ashwan sinchita kaparirkakuna:

¡Yaya Jesús, Davidpa Miraymanta Kishpichik, ñukanchita llakichiy!

³² Chaypina Jesuska rihushkanmanta shayarishpan chay ishkay wisku runakunata kayashpan tapurka:

¿Imatata munankichi kankunarayku ruranaynipa?

³³ Chaypina paykunaka aynirkakuna: Yaya Jesús, ñawinchita ampiy rikunanchipa.

³⁴ Chasna rimashpangkuna Jesuska paykunata llakichishpan ishkantipa ñawinkunata llankarka. Chayllawa kunkaymanta rikurakunana. Paykunaka ampirishpangkuna Jesustana katirkakuna.

**Jesuska Jerusalén
llaktapi yaykurka**

(Mk. 11.1-11; Lk. 19.28-40;
Jn. 12.12-19)

21 ¹⁻² Jesuska ñukanchiwa pakta Jerusalén llaktama rihushpan Bettagé llakta mayanpi paktarkanchi. Chay uchilla llaktaka karka Jerusalén kuchupi, Olivos shutiyu urku pampapi. Chay mayanpi paktashpanchi Jesuska ñukanchikunamanta ishkayta kacharka kasna nishpa:

Riychi chay rikuhashkanchi llaktama. Chaypi paktashpaykichimi tarinkichi shuk burru warmi watarishkata malta wawanwa pakta. Chay mamanta paskashpaykichi wawanwa pakta apamuychi.³ Shuk runa kankunata mitsashpan tapushpanka ¿imaraykutaya kay burruta apahunkichi? nishpa, payta rimaychi Yayanchi Jesusmi munahun awanpi tiyarishpa rinanpa. Kunanllatatami kutichik shamushu nishpa rimankichi.

⁴ Chayka pasashka ñawpa Yaya Diospa yachayninwa yachachikpa kasna nishkanka paktarinanpa:

⁵ Jerusalén llaktapi kawsak runakunata rimaychi: Rikuaychi, atun apuykichi ña shamuhun kankunata kishpichinampa. Yapa yachak apu kashpanpas mana yachak runashina llashata apak burrupa wawan maltapa awanpi tiyarishpa shamuhun nishpa.

⁶Chaypina chay ishkay runankunaka Jesús kamachishkanshina chay burruta apak rirkakuna. ⁷Chay burruta wawanti Jesusma apamushpankuna ñukanchika burrupa awanpi churarinanchita mantarkanchi. Chay awapi Jesuska tiyarishpan rirkta Jerusalenpi yaykunana. ⁸Chasna Jesús rihushpan achka runakuna payta kushichishpa katirkakuna. Shukkunaka paypa puntanpi rishpankuna kamisankuna awapi churarishkankunata Jesuspa puntanpi rihushkan ñampipi mantarkakuna. Shukkunaka chipati pankakunata pitishpa mantarkakuna ñampita sumayachishpa Jesusta shuk atun aputashina kushichinankunapa. ⁹Chaypina Jesuspa puntanpi rihuk runakuna, washanmanta katik runakunapas yapa kushikushpa kaparirkakuna:

¡Akuychi kushichishunchi kay ñawpa atun apu Davidpa Miraymanta Kispichikta! Yaya Diospa alita rikushkan yanapashkan runami kan. Yaya Diospa munashkanta rurananpa kachashkan kashpanmi shamuhun. ¡Akuychi kushichishunchi awa silipi kawsak Yaya Diosta! nishpa.

¹⁰Jesús Jerusalén llaktapi yaykuhushpan chaypi kawsak runakuna yapa mancharishpankuna tapurkakuna:

¿Pitaya kay runaka? nishpa.

¹¹Jesuswa purihuk runakuna rimarkakuna:

Kay runaka Yaya Diospa yachayninwa alita yachachik Jesusmi. Payka Galilea allpapi kahuk Nasaret llaktamanta runami nishpa.

**Jesuska rantichik runakunata Yaya
Diospa wasinmanta llukshichirka**
(Mk. 11.15-19; Lk. 19.45-48;
Jn. 2.13-22)

¹²Chaypi Jesuska *Yaya Diospa wasinpi yaykurka. Chay wasipi puntiru atun pampa kincharishkapi achka

rantichihuk runakuna, rantihuk runakunapas karkakuna. Chaymanta tiyarka kullkita kampyakkuna. Tukuy chaykunata rikushpan Jesuska kullkita kampyakkunapa mesankunata, wiwa mukukukunata rantichikkunapa mesankunatapas pultyachi pultyachi rurashpan amunkunata kamachirka llukshinankunapa. ¹³Chasna rurashpan Jesuska rimarka:

Yaya Diospa killkachishkanpi riman:
Kay wasinika ñukata mañanankuna
wasinimi kan nishpa.

Kankunaka kay Yaya Diospa wasinta shuwakunapa kushilla tantarinata rurashkankichi. [Chasna Jesuska rimashpan paykuna chaypi achkata kobrashpa kullkita kampyahushkankunaryku rantichihushkankunaryku shuwakunashina kanankunata yuyachirka.]

¹⁴Chaymanta Jesús chay wasillapi kahushpanra wisku runakuna, waklishka chakiyu runakuna payta kayllayarkakuna. Chaypina Jesuska paykunata llakichishpan ampirka. ¹⁵Chay *saserdotekunapa apunkuna, Moisespa killkashkan kamachishkata yachachikkunapas chay mana atipaypukunata rurashkanta rikushpankuna piñarirkakuna. Chaymanta ashwan piñarirkakuna, wawakuna Yaya Diospa wasinpi kaparihushkankunaryku akuychi kushichishunchi kay ñawpa atun apu Davidpa Miraymanta Kispichikta nishpa. Chayta uyashpankuna sacerdotekuna piñarishpa Jesusta rimarkakuna:

¹⁶¿Manachu uyanki chay wawakuna rimahushkankunata? ¿Imaraykuta munanki chasna kanta kushichishpa rimanankunata? nishpa.

Chaypina Jesuska rimarka:
Ari, paykunata uyahunimi. ¿Manachu leyishkankichi Yaya Diospa killkachishkanpi kasna nikta?

Kanmi Yaya Dios, uchilla wawakunata, chuchuk llullukunatas

yuyachinki kanta kushichishpa takinankunapa nishpa.

¹⁷Chayta rimashpan Jesuska chay runakunata sakirkana. Jerusalenmanta llukshishpan Betania llaktama rirka chaypi puñunanpa.

Jesuska yachachin,
Yaya Diosta kirishpa
tapushpanchimi yanapay tukunchi
(Mk. 11.12-14, 20-26)

¹⁸Kayantima tutamantalla Betania llaktamanta Jerusalenma kutihushpan Jesusta yarkayka apirka. ¹⁹Nampi mayanpi shuk *igu kaspita rikurka. Chayta kayllayarka muyunta mikunayashpan. Chay uras chay kaspika mana muyuyuchu karka, pankunkunallata tarirka. Chaypina Jesuska chay igu kaspita rimarka:

Kunanmanta pacha manana muyuyankinachu.

Chasna rimashpanlla chay igu kaspika kunkaymanta chakirirka. ²⁰Chayta rikushpanchi mancharishpa Jesusta tapurkanchi:

¿Imashnataya rimashkaykillawa kay igu kaspika kunkaymanta chakirishka? nishpa.

²¹Jesuska ñukanchita aynirka:
Alita uyawaychi. Kankunapas alita kirishpaykichika atipankichimi ñukashina ruranata. Yaya Diosta tapushpaykichika ama yuyarinkichichu uyawankachu manachu nishpa. Ashwan tukuy shunkuykichimanta pacha kirishpaykichi yuyariychi paymi shutipa uyawanka nishpa. Chasna kirishpaykichimi mana shuk igu kaspillatachu atipankichi chakichinata. Ashwan kay urkutapas rimankichimaka kaymanta warankarishpayki atun yakuma chinkariy nishpa, kay urkuka warankarimami. ²²Tukuy shunkuykichimanta pacha Yaya Diosta kirishpa mañashpay-

kichimi payka tukuy mañashkaykichita kankunata kunka.

**Jesuska yachayninmanta
tapuy tukurka**
(Mk. 11.27-33; Lk. 20.1-8)

²³Chasna yachachishkanwasha Jesuska Jerusalén llaktapi *Yaya Diospa wasinpi yaykurka. Chaypi yachachishshkanpi *saserdotekunapa apunkuna, ñukanchita kamachik israel masinchi rukukunapas Jesusta kayllayashpankuna tapurkakuna:

¿Pita kanta kamachishka chasna yachachinaykipa? ¿Pita kanta kamachishka tukuy rurahushkaykukunata ruranaykipa? nishpa.

²⁴⁻²⁵Chasna tapushpankuna Jesuska rimarka:

Ñukapas kankunata tapuni ¿pita Juanta kacharka bawtisananpa? ¿Yaya Dioschu shuk runachu payta kachamurka? Ayniwashpaykichika ñukapas rimashkaykichi pimi kachawashka nishpa.

Chasna Jesús paykunata tapushpan chay runakunaka shukwa shukwa tapunakurkakuna imatami ayninkakuna nishpa.

Aynishpanchika Yaya Diosmi Juanta kacharka nishpa, Jesuska ñukanchita rimankami Yaya Dios payta kachashka kashpanka ¿imaraykutaya Juanta mana kasushkankichichu? nishpa. ²⁶Chaymanta aynishpanchika pay kikinllami yuyarishpa Juanka yachachirka nishpa, tukuy runakuna yapa piñarinkakuna. Paykunaka kirinahun kay Juan wañuka Yaya Diospa yachayninya yachachik kashkanta.

²⁷Chasna tapunakushpankuna chay runakunaka Jesusta aynirkakuna:

Mana yachanchichu pimi Juanta kachashka nishpa.

Chaypina Jesuska aynirka:

Chasna kashpanka ñukapas mana rimashkaykichichu pimi kamachicwashka tukuy kaykunata ruranaynipa nishpa.

**Jesuska kasuk runakunamanta,
mana kasuk runakunamantapas
yuyachishpa yachachin**

²⁸Chaymanta Jesúz chay *saserdotekuna napa apunkunata, ñukanchita kamachik israel masinchí rukukunatapas rimarka:

¿Ima ninkichita kay kwintanaynimanta? Shuk runa ishkay musu wawayu karka. Shuk puncha shuk wawanta rimarka: Kunalla uva chakraynipi tarawakriy nishpa. ²⁹Chasna yayán kamachishpan chay musu wawanka aynirka: Mana rinayanichu nishpa. Ashwan shuk ratumanta kutikashka yuyarishpan tarawak rirkaya yanta kushichinanpa. ³⁰Chaymanta chay runaka shuk wawantana kamachirka uva chakranpi tarawak rinampa. Payka chay ratulla ari nishpa rimarka kunalla risha. Chaymanta mana tarawak rirkachu. ³¹Kunan tapushkaykichi: Chay ishkay wawankunamanta ¿maykanta yayampa munashkanta rurarka? nishpa.

Chasna tapushpan aynirkakuna: Chay tarawak rishka musu wawanmi yayampa munashkanta rurarka nishpa.

Chaypina Jesuska paykunata rimarka: Alita ayniwashkankichi. Kankuna yuyarinckichi chay *romano tukuymanta atun apurayku *impuestuta kobrakkuna, puta warmikunapas uchasapakuna kanankunata. Alita uyawaychi. Paykunami kankunamanta ashwan utkalla Yaya Diospa kamachishkan tukushpa paypa ali kamachihushkanpi kawsankakuna. ³²Chay Bawtisak Juanka shamushka kankunata yachachinanpa, tukuy uchaykichikunata sakishpa Yaya Diostana kasushpa kawsanaykichipa. Kankunaka payta mana kirirkankichchu. Chay impuestuta kobrakkunaka,

puta warmikunapas uchankunamanta llakirishpami sakirkakuna. Paykunaka chaymanta Yaya Diospa shiminta alita uyashpa kasurkakuna. Kankuna chayta rikushpaykichipas manami Yaya Diospa shiminta kirishpa kasuwashkankichichu.

**Jesuska mana
kasunayak tarawakkunamanta
yuyachishpa yachachin
(Mk. 12.1-12; Lk. 20.9-19)**

³³Chaymanta Jesuska kutikashka shuk yachachinawa yachachirka: Kunan shukta yachachishkaykichi. Tiyarka shuk chakrayu runa. Chay runaka chakranpi uva wiñarishkakunata tarpuchishkanwasha kinchachirka. Chaymanta chakranpi shuk atun batanta rurarka, chaypi uva muyukanata sarushpa chawanankunapa. Chaymanta shuk yapa awa wasita rurachirka awamanta shuk runa tukuya kuyrananpa chakranta, mana nima pi chay tarpunpa muyunkunata shuwananpa. Chaymanta chay amunka uva chakranta shuk tarawak runakunata kurka amunshina pichashpa kuyranan-kunapa. Chasna kushpan rimarka: Pallasipaykichi tukuy muyunkunamanta chawpita kuwankichi. Chasna rimashpan chay amunka rirksha shuk karu llaktamana. ³⁴Chaymanta pallana timpu paktarishpan chay amunka shuk runankunata kacharka chay chakranpi tarawakkunata rimak rinampa: Patroyninchimi ñukanchita kachashka uva muyuta pallashkaykichimanta chawpita payrayku apananchipa. ³⁵Chaypina chay chakrata kuyrak runakunaka patronpa kachashkan runankunata apishpankuna shukkunata makarkakuna, shukkunataka wañuchirakuna, shukkunataka rumikunawa tuksi tuksi rurarkakuna. ³⁶Mana nima imata kachashpankuna chay chakra

amuka kutikashka ashwan achka runankunata kacharka. Paykunatapas chay tarawakkunaka chasnallatata rurarkakuna.

³⁷Chaymanta chakra amuka shuklla wawantana kacharka, yuyarishpan kay wawaynitaka manchashpankunami kasunkakuna nishpa. ³⁸Chaypina chay tarawakkunaka amunpa wawanta rikushpankuna kwintarkakuna paykunapura: Rikuychi, kay shamuhuk runami chakra amunpa wawan. Yayan wañushpan kay chakraka payraykumi kiparinika. Akuychi kunalla wañuchishunchi tukuy kay uva chakraka ñukanchipana kananpa. ³⁹Chasna kwintashpankuna chay amunpa wawanta apirkakuna. Chaymanta uva chakra washama pushashpankuna wañuchirkakuna payta.

⁴⁰Jesuska chasna yachachishkanwa-sha chay chiknik runakunata tapurka: Chay chakra amuka rishpan *¿imanachi-mashi* chay wañuchik runakunata? nishpa.

⁴¹Paykunaka aynirkakuna:
Chay amuka tukuy chay yapa millaypa tarawakkunata mana llakichishpachu wañuchima. Chaymanta chakranta shuk tarawakkunatana kuma, maykankunami pallana uras tukuy pallahkankuna uvata chawpinakushpa amunta chay chawpita kunahuma.

⁴²⁻⁴³Chasna aynishpankuna Jesuska rimarka:

Ñuka kankunata rimani mana munawashkaykichirayku Yaya Dioska manami munannachu paypa kamachish-kankuna kanaykichi. Shuk chikan runakunatanami kayanka paypa kamachishkankuna kanankunapa. Paykunami shuti Yaya Diosta kasushpa kawsankakuna. Kankunaka Yaya Diospa ñawpa killkashkanta leyishpaykichipas manarachu asirtankichi. Kasna riman:

Shuk runa wasinta rumimanta
rurashpan tarawak runankunaka

shuk ali sinchi rumita mana munashpankuna mayanpi churarakuna mana alichu nishpankuna. Chay rumitaka wasinta rurak runaka akllashpan churarka chay wasinpi shuk orkonshina sinchi-kuchik kananpa. Chasnashinami Yaya Dioska akllashkan runawa ruranka. Ñukanchika chayta rikushpanchi yapa alimi kan nishpa rimanchi nishpa.

⁴⁴Chay akllashkan rumipi takakta tukushpaykichika tulluykichi pakiktami urmankichi. Chay atun rumi awaykichi pi urmeshpanka machuyakta nitishpa pulbu wañunkichi nishpa. [Chasna rimashpa Jesuska yuyachinayarka imashnami paypa yachachishkanta chaymantapas payta mana munakkunaka tukunkakuna.]

⁴⁵Chaypina chay *saserdote kunapa apunkuna, *fariseokunapas Jesuspa yachachihushkanta uyashpankuna paykunapura kwintarkakuna:

Payka ñukanchimanta yuyarishpan chasna uyachishpa yachachihun. Chay mana ali rurak tarawakkunashina kananchita, chaymanta chay rumipi takarik runashina kananchita nishpa.

⁴⁶Paykuna yapa piñarishpankuna Jesusta apinayarkakuna wañuchinankunapa. Chasna ruranayashpankunapas runakunapa piñarinankunata manchashpankuna mana payta apirkakunachu. Tukuy runakuna yuyarishkakuna Jesús Yaya Diospa yachayninwa yachachik kananta.

Jesuska shuk
kasaranapi mikunankunapa
kayashkakunamanta
yuyachishpa yachachin
(Lk. 14.15-24)

22 ¹Chaymanta Jesuska kutikashka chay runakunata shuk yachachinakunawa yachachirka: ²Yuyariyichi imashnami Yaya Diospa ali kamachi-

nanka kay allpapi. Rikuychi shuk atun apuka musu wawan warmiyahushkan-rayku kushikuna mikunata rurashkanta.³ Payka runankunata kacharka tukuy kayashkan runakunata kayak rinankunapa. Kayashpankunapas mana shamunayarkakunachu.⁴ Mana shamunayashpankuna chay apuka shuk runankunatana kayashpan rimarka: Tukuy kayashkayni runakunata rimak riyichi: Patroynika ñami wakrankunata, wirayachishkan wiwankunatapas wañuchishka. Mikunaka ñami yanushka kahun. Kunalla chay kasarahushkapi mikunata mikuk shamuychi nishpa.⁵ Chasna rimak rishpankuna chay kayashkakunaka manana shamunayarkakunachu. Shukka chakranma rirka. Shukka imankunata rantichinanpa rirka.⁶ Shukkunaka chay apupa runankunata apishpankuna makarkakuna wañuchinankunakama.⁷ Chayrayku chay apuka yapa piñarishpan suntalunkunata kacharka chay wañuchik runakunata wañuchinankunapa, llaktankunatapas rupachinankunapa nishpa.⁸ Chaymanta chay runankunata rimarka: Kasarashkapi mikunaka ñami chayashka. Chay kayashkayni runakunaka mana alita rurashkakunamanta mananami wasinipika yaykunkakunachu.⁹ Chayrayku anchu ñampikunama rishpaykichi rikushkaykichi runakunata kayaychi, kasarahushkapi mikunata mikuk shamunankunapa nishpa.¹⁰ Chasna rimashpan paypa runankunaka ñampikunapi purihuk runakunata kayak rirkakuna kasarahushkapi mikunankunapa. Ali rurak, mana ali rurak runakunatapas kayashpankuna chay apupa atun wasinpi achka runakuna tantarirkakuna.

¹¹ Chaypi chay apuka yaykushpan kayashkan runakunata kwintachirka. Chaypi shukta rikurka kasarana

kushikunarayku churarinata mana churarishkata.¹² Payta rikushpan rimarka: Amigu, ¿imaraykuta mana kasarana kushikunarayku churarinata churarishpa yaykushkankichu? nishpa. Chay runaka nima imata ayninata atipashpan pinkarishpan chunlla kiparirka.¹³ Chaypina chay apuka mesama mikunata apak runankunata rimarka: Kay runata chakinta makinta alita watashta chay manchaypa amsama wichuychi. Chaypi sinchita parisishpa wakanka, piñaywa kirunkunata kanirinka nishpa.¹⁴ Chasnallatata Yaya Dios achka runakunata kayashka paypa runankuna kanankunapa. Achka runakuna kayay tukushka kashpankunapas shuk shukkunalla kayashkanta kasushpankuna shamunahun Yaya Diosma.

**Jesusta chiknik runakuna
pantachichinayarkakuna
(Mk. 12.13-17; Lk. 20.20-26)**

¹⁵ Jesús yachachishkanwasha *fariseokunaka llukshishpankuna tantarishpa paykunapura kwintarkakuna: Akuychi, Jesusta pantachichishunchi shuk mana ayniypata tapunawa. Mana alita aynishpanka apunchikunata rimashunchi payta apishpankuna kastiganankunapa nishpa.

¹⁶ Chayta ruranayashpankuna fariseokunaka paykunata katik runakunata, chaymanta *Herodespa partidunta katikkunatapas kacharkakuna alishina tukushpa Jesusta pantachichinayashpa paywa kwintanankunapa kasna nishpa:

Yachachik, yachanchi mana llullachishpachu shutipa kashkata rimanki. Tukuy runakunata alita yachachinki Yaya Diospa munashkanta rurashpa kawsanankunapa. Kanmi mana manchashpachu nima shuk runata, nima apukunata tukuyta kuskata yachachinki.

¹⁷Kunanka rimay ñukanchita imashnata yuyarinki. ¿Alichu manachu ñukanchi israel runakuna chay *romano tukuymanta atun aputa *impuestuta pagananchipa? ¿Yaya Dios munanchu pagananchipa manachu?

¹⁸Chasna tapushpankuna Jesuska yacharka payta apichinayashpa rimashkankunata. Ari, pagananchi tiyan nishpa aynimaka ñukanchi israel runakunamanta apukunata rimak rinahuma payta kastiganankunapa. Mana alichu pagananchipa nishpa aynimaka romano apunchita rimak rinahuma. Chayrayku Jesuska rimarka:

Kankunaka mana ali yuyayyu runakunachu kankichi. ¿Imaraykuta apichiwanayashpa tapuwankichi? ¹⁹Rikuchiwaychi chay paganaykichi kullkita.

Chasna nishpan shuk kullkita payta rikuchirkakuna. ²⁰Jesuska chay kullkita rikushpan paykunata tapurka:

¿Pipa almantata rikunkichi kay kullkipi? ¿Pipa shutinta kay kullkipi killkarishka kan? nishpa.

²¹Paykunaka aynirkakuna:
Romano tukuymanta atun apupami.
Chasna aynishpankuna Jesuska paykunata rimarka:

Chay atun apupa kashkantaka kuychi amunta. Maykanmi Yaya Diospa kan, kuychi payta. Yaya Dios ñukanchikunata rurashkanrayku ñukanchikunapa amunchi kan. Chayrayku tukuy shunkuykichimanta pacha payta yuyashpa kawsaychi nishpa.

²²Chasna yapa yachaynwa aynishkanta uyashpankuna chay pantachichinayak runakunaka yapa mancharishpankuna chunllalla anchurirkakuna Jesusmanta.

**Jesuska yachachin wañuskakuna
kawsarinankunata**
(Mk. 12.18-27; Lk. 20.27-40)

²³Chaymanta chay punchallatata shuk *saduseokunaka Jesuswa kwintak

rirkakuna. Paykunaka yachachinahun wañushkanchimanta manana kawsari-mushunchinachu nishpa. Chayrayku paykuna Jesusta tapurkakuna:

²⁴Yachachik, ñawpa Moisés wañuka kasna yachachirka: Shuk warmiyu runa manara nima shuk wawayu kashpan wañushpanka wawkinka kachuynin mashintuta warmiyanan tiyan chay mashintuka atipananpa wawayanata. Chaypina kari wawata wawayashpanka chay wawkin wañupa wawanshina kanan tiyan nishpa. ²⁵Kunan kanta kwintanayanchi: Kay llaktanchipi tiyarka kanchis wawkikuna. Shuk puncha puntiru wawkika warmiyarka. Chay wawkika nima shuk wawayu kashpanra wañurka. ²⁶Pay wañushpan shuk wawkinna kachuyninta warmiyarka. Paypas wañurka nima shuk wawayu kashpanra. Chaypina shuk wawkinna chay kachuyninta warmiyarka. Paypas nima shuk wawayu kashpanra wañurka. Chaymanta shuk wawkinna chay kachuyninta warmiyarka. Paypas chasnallatata mana wawayuchu wañurka. Chasnallatata shukllankama shukllankama chay kanchis wawkikuna chay warmillatata warmiyashpankuna karan shuk mana wawayuchu wañurka. ²⁷Chasna tukuy kusankuna wañushkankunawasha chay warmipas wañurkana. ²⁸Kunanka rimay ñukanchita. Chay kanchis wawkikuna chay warmillata warmiyarkakuna. Wañushka runakuna kawsarimushpankuna chay kanchis wawkikunamanta ¿maykanpa warminshi kama?

²⁹Chasna tapushpankuna Jesuska paykunata aynirkta:

Kankuna kikintami llullachirinkichi, wañuskakuna kawsarinankunata mana kirishkaykichirayku. Yachashpaykichtata Yaya Diospa killkachishkanta mana asirtankichichu. Chaymanta Yaya

Diostapas mana riksinkichichu, wañushkakunata kawsachinata atipakta.³⁰ Yaya Dios wañushka runakunata kawsachimushkanwasha nima shuk kari warmiyankanachu, nima shuk warmi kusayankanachu. Silipi kawsak *angelkunashinami tukuy kawsankakuna.³¹ ¿Manachu leyishkankichi Yaya Diospa killkachishkanta? Chaypi riman wañushkakuna kawsarinankunamanta kasna:

³² Ñuka kani Yaya Dios, maykantami Abraham, Isaak, Jakob kushichiwanahun nishpa.

Chasna Yaya Dios rimashpan yachanchi chay yaya rukunchikuna wañushpanku-napas paywa paka kawsa kahushkankunata. Kawsakunallami Yaya Diosta kushichinahun, wañushkakunaka mana payta kushichinahunchu nishpa.

³³ Chayta uyashpankuna saduseokunaka chunlla kiparirkakuna. Jesús chasna alita yachachishkanrayku chay runakuna yapa mancharirkakuna.

Jesuska yachachin Yaya Diospa kamachishkankunamanta, maykanmi ashwan ali kan (Mk. 12.28-34)

³⁴ Chaymanta *fariseokunaka yachashpankuna Jesús *saduseokunata chunllayachishkanta, payta tapunkunapata tantarirkakuna.³⁵ Shuk paykunamanta Moisespa killkashkan kamachishkakunata yachachik kashpan Jesusta pantachichinayashpan tapurka:

³⁶ Yachachik, Yaya Diospa tukuy kamachishkankunamanta, ¿maykantaya ashwan ali kan?

³⁷⁻³⁸ Chayta tapushpan Jesuska aynirka:

Chay tukuymanta ashwan ali kamachishkanka riman tukuy shunkuykimanta pacha Yayayki Diosta yuyashpa munashpa kawsay. Payta yuyash-

payki alikunata yuyarishpa rurashpa kawsay nishpa.³⁹ Chaymanta chay ishkaynin kamachishkanka chasnashinallatatami riman runa masikita yuyay kan kikitashina nishpa.⁴⁰ Kay ishkaymi tukuy kamachishkakunamanta puntirukanan tiyan. Chaymantallami tukuy Yaya Diospa kamachishkankunata, Yaya Diospa shiminta yachachikkunapa yachachishkankunatapas asirtananchitiyan.

Jesuska yachachin pay tukuymanta ashwan ali kamachik kananta (Mk. 12.35-37; Lk. 20.41-44)

⁴¹⁻⁴²*Fariseokuna tantarishka kahushkankunallapi Jesuska paykunata tapurka:

Kankunaka ¿imatataya yuyarinkichi Yaya Diospa Kachanan Kishpichikmanta? ¿Maykan runapa miraymanta-taya? nishpa.

Chasna tapushpan fariseokunaka aynirkakuna:

Payka ñawpa atun apu David wañupa miraymantami kan nishpa.

⁴³ Chaypina Jesuska paykunata rimarka: Davidpa miraymanta kashpanka ¿imaraykuta Yaya Diospa Espíritun yuyachishpan Davidka rimarka payta kamachik kananta kasna nishpa?

⁴⁴ Yaya Dioska kamachiwakta rimarka: Tiyariy kuskayni parti kamachinaykipa ñukawa paka, tukuy kanta chiknik runakunata winsinaynikama kanta kasunankunapanapa nishpa.

⁴⁵ David Yaya Diospa Kachanan Kishpichikta kamachiwak nirka. Chay uras ña kawsa paymanta pasa kashpan David unay wañushkanwasha paypa miraymantallatata kashpan manami atipanchu runalla kanata.

⁴⁶ Chasna Jesús yachachihushpan chay fariseokunaka nima imata ayninata

atipashpankuna chunlla kiparirkakuna. Chaymanta pacha nima shuk runa Jesusta tapunayarkakunanachu.

Jesuska fariseokunata piñarka

(Mk. 12.38-40;

Lk. 11.37-54, 20.45-47)

23

¹Chaymanta Jesús chay *fariseokunata yachachishkawasha chay tantarishka runakunata, ñukanchikunatapas yachachirka:
²Ñawpamanta pacha Moisespa killkashkan kamachishkakunata yachachikkuna, fariseokunapas tantarina wasipi tiyarinahun chay kamachishkanta yachachinankunapa. ³Chayrayku, paykuna Yaya Diospa shiminta kankunata yachachishpankuna alita rurashpa kasuychi. Alita yachachishpankunapas paykuna kikin mana ruranahunchu yachachishkankunashina. Kankunaka ama paykunashina ali shimita yanka yachakushpa kawsaychichu. ⁴Chay fariseokunaka shuk patronkuna runankunata llasha kargata apachihu shinami kanahun. Kankunata yuyayninkunamanta achka kamachinan-kunata yachachinahun. Kankunaryku kanahun atun llasha kargashina. Chasna kankunata yachachishkankunawa nitishkashina rurahushpankunapas nima shuk uchillastuta yanapanahunchu kankunata. ⁵Paykunaka tukuya ruranahun runa masinkuna rikunkunnallapa, Yaya Diosta alita kasukmi nishpa yuyarinankunapa. Yaya Diospa shiminta shuk shukta suni ñaña karakunapi killkanahun. Chaykunata urintinkunapi makinkunapi watanahun. Churarishkankuna shimita sumayachinahun. Chasna churarishkankunawa Yaya Diosta alita kasuk kani nishpa yanka rikuchinayashpa purinahun.
⁶Fiestakunapi, tantarina wasikunapipas paykunaka tukuymanta suma tiyarina-

kunapi munanahun tiyarinata runa masinkuna paykunata aputashina rikuhashkankunata rikuchishpa.

⁷Ñampikunapi plasakunapi purihushpankuna yapa munanahun tukuy runakuna paykunata yuyashpankuna ali yachachik nishpa saludanankunapa.

⁸Yaya Diosllami kankunata kuskata yachachin. Chayrayku ama munaychichu runakuna kankunata yachachik nishpa rimanankunapa. Kankunaka wawkipurallami kankichi. Ñukallami kankunata yachachik kani. ⁹Chaymanta kay allpapi nima pita Yaya Diostashina yuyashpa Yayayni nishpa rimaychichu. Yayanchi Diosllatami yuyanaykichi tiyan, payllata kasunkichi. Yaya Dios shukllami, maykanmi silupi kawsan.

¹⁰Chaymanta ama munaychichu runa masikichikuna kankunata rimanankunapa kanmi kanki ñukata kamachik nishpa. Ñukallami Yaya Diospa Kachashkan Kishpichikka kankunata kamachik kani. ¹¹Maykanmi kankunamanta ashwan kamachik kan payka tukuy runa masinkunata sumakta yanapak kanan tiyan. ¹²Kankuna kikinmanta yuyarinkichima, ñuka tukuy runa masinikunamanta ashwan yachakmi kani nishpa. Chasna atun tukunayashpaykichika Yaya Diosmi kankunata mana alichu nishpa pinkachinka. Kankuna runa masikichikunamanta mana atun tukunayashpa paykunata yuyashpa yanapashpaykichika Yaya Diosmi sumakta kankunata atunyachinka.

¹³Chaypina Jesuska fariseokunata rimarka:

Ay fariseokuna, Moisespa killkashkanta yachachikkunapas, ¡imashna kastigushi kankunaryku kanka! Yaya Diosta mana kasunayashpaykichipas alita kasukshina tukunkichi. Llullachiy-sikikunami kankichi. Runakunata

arkankichi Yaya Diospa kamachishkankuna tukushpa paypa ali kamachihushkanpi mana kawsanankunapa.
Kankunaka manami Yaya Diospa kamachishkankuna tukunkichichu.
Chaymanta Yaya Diospa kamachishkankuna tukunayak runakunata arkankichi.

¹⁴⁻¹⁵Ay Moisespa killkashkanta yachachikkuna, fariseokunapas, ¡imashna kastigushi kankunaryaku kanka! Llullachiysikunami kankichi. Yakuta allpata purinkichi shuk runallata maskashpa yachachinaykichipa kankunata katinanpa. Chaymanta chay kankunata katik runa kankunamanta ashwanta uchata rurachinkichi kankunamanta pasa nina mana wañukpi atunta kastigarishka kananpa.

¹⁶Ay kankuna, ¡imashna kastigushi kankunaryaku kanka! Wiskushina mana rikunata atipak kashpaykichi shukkunata ñampita purichinayankichi. Llullashpa yachachinkichi: Shuk runa rimahushkanta kirichinayashpa *Yaya Diospa wasinta churashpa kirichina rimanakunawa rimashpanka mana shutipa kashpanpas Yaya Dioska payta mana kastigankachu. Yaya Diospa wasinpi kahuk orota churashpa kirichina rimanakunawa rimashpanka mana shutipa kashpan Yaya Dioska shuti payta kastiganka. ¹⁷Chasna llullachishpa yachachishpaykichi mana ali yuyayyu, mana asirtak runakunami kankichi. ¿Maykanta ashwan ali kan, Yaya Diospa wasinchu, chay wasipi tiyak orochu? Chay oroka Yaya Diospa wasinpi churashparami Yaya Diospa kan. Chayrayku Yaya Diospa wasinka chay churashka oromanta ashwan ali kan.

¹⁸Chaymanta kankuna llullashpa yachachinkichi: Shuk runa rimahushkanta kirichinayashpa Yaya Diospa wasinpi wiwakunata wañuchishpa

rupachina tuchpashinata churashpa kirichina rimanakunawa rimashpanka mana shutipa kashpanpas Yaya Dioska payta mana kastigankachu. Chay tuchpashinapi Yaya Diosrayku churashkankunata churashpa kirichina rimanakunawa rimashpanka mana shutipa kashpan Yaya Dioska shuti payta kastiganka. ¹⁹Chayta yachachishpaykichi nima imata asirtak runakunami kankichi. ¿Maykanta ashwan ali, chay wiwakunata rupachina tuchpashinachu, chay tuchpashinapi Yaya Diosrayku churashkaykichichu? Chay kushkaykichi chay tuchpashinapi churashka kashpanrami Yaya Diosrayku kan. Chayrayku churashkaykichikunamanta tuchpashinaka ashwan alimi. ²⁰Shuk runa rimahushkanta kirichinayashpa Yaya Diospa wasinpi wiwakunata rupachina tuchpashinata churashpa kirichina rimanakunawa rimashpanka mana chay tuchpashinallatachu yuyachishpa riman, ashwan tukuy chay tuchpashinapi churashkakunatapas.

²¹Shuk runa rimahushkanta kirichinayashpa Yaya Diospa wasinta churashpa kirichina rimanakunawa rimashpanka mana chay wasinllatachu yuyachishpa riman, ashwan Yaya Dios chay wasinpi kawsahushkantapas. ²²Shuk runa rimahushkanta kirichinayashpa siluta churashpa kirichina rimanakunawa rimashpanka mana silullatachu yuyachishpa riman, ashwan maymantami Yaya Dios kamachin chaytapas, chaymanta Yaya Dios kikintapas. Chayrayku imatapas rimashpaykichika tukuy uras shutipallata rimaychi.

²³Ay Moisespa killkashkanta yachachikkuna, fariseokunapas, ¡imashna kastigushi kankunaryaku kanka! Llullachiysikunami kankichi. Tukuy tarpushkaykichimanta pallashkaykichi uchillastu pankakunamantapas

chunkamanta shukta Yaya Diosta kankichi. Chasna Yaya Diospa kamachishkanta shuk parti paktachish-paykichipas chay ashwan ali kasna nishkan kamachishkankunata mana paktachinkichichu: Alillata rurashpa rimashpa kawsaychi. Runa masikichita llakichishpa kawsaychi. Yaya Diosllata tukuy shunkuykichimanta pacha kirishpa alita kasuychi nishpa. Chay kamachishkankunataka paktachinayki-chi tiyan chay shukkunawa pakta.

²⁴Kankunaka mana alita asirtashpay-kichi wisku runa shukkunata ñampita purichikshinami kankichi. Shuk uchillastu siputuchi upyanaykichipi chinkarishpan shushunkichi mana millpunaykichipa. Chaymanta nima imata yuyarishpa shuk yapa atun animalta millpunkichi. Chasnashinami kankunaka tukuy ñawpa yaya rukuykichikuna wañupa rimashkankunata kasunkichi. Maykantami Yaya Dioska ashwanta munan, chaytaka nima yuyarinkichichu.

²⁵Ay Moisespa killkashkanta yachachikkuna, fariseokunapas, ñimashna kastigushi kankunaryaku kanka! Llullachiysikunami kankichi. Tukuy rurashkaykichiwa alita rikurish-paykichipas shunkuykichipika millaypa yuyayyu kankichi, shukkunapa ima tiyapushkanta llullachishpa shuwakuna, tukuy imakunata munakkuna, mitsakkuna. Pusilluta, kallanata washanllata mayllak runakunashina kankichi, ukunta susyata sakinkichi.
²⁶Wisku runakunashina nima imata asirtak fariseokuna, puntiru shunkuykichiwa alichaychi. Chaymanta aliyashka shunkuykichi kashpan alikunallatana ruraychi.

²⁷Ay Moisespa killkashkanta yachachikkuna, fariseokunapas, ñimashna kastigushi kankunaryaku

kanka! Llullachiysikunami kankichi. Shuk yurawa pintarishka rumiwa taparishka wañushkakunata churana uchkushinami kankichi. Kanchamantaka sumakta rikurishpanpas ukupika wañushkapa tullunkunawa millanayaya ismukunawa untakta kan.²⁸Chasnashinami kankunapas runakunapa rikushkanpi Yaya Diospa kamachishkanta alita kasukshina rikurishpaykichipas yuyaykichipika yapa millaypata yuyarishpa llullachiysikunami kankichi.

²⁹Ay Moisespa killkashkanta yachachikkuna, fariseokunapas, ñimashna kastigushi kankunaryaku kanka! Llullachiysikunami kankichi. Chay Yaya Diospa yachayninwa yachachikkunapa aychanta churashkan-kunata sumayachinkichi paykunata yuyakkunashina tukushpa. Chay ñawpa alita rurashpa kawsak runakunata yuyarinaykichi rumikunata pantiyunpi sumayachinkichi.³⁰Chaymanta rimankichi: Ñukanchi ñawpa yaya rukunchikuna kawsashkan uras kawsanchima karka, manami paykunata yanapanchimachu karka Yaya Diospa yachayninwa yachachikkunata wañuchinata nishpa.
³¹Chasna yaya rukunchikuna nishpa rimashpaykichimi kankuna kikin rimankichi chay wañuchik runakunapa miraykuna kanaykichita paykunashina millaypa yuyayukuna.³²Kankunapas shutipa kashkata yachachikkunata wañuchinayashpalla kawsashpaykichimi yaya rukuykichikunapa ucha ruranakuna pishishkata paktachinkichi.

³³Machakuyashina runakuna kankichi, yachachinaykichiwa runakunata pantachichishpa yuyayninkunata waklichikkuna. ¿Imashnashi kishpinkichi chay nina mana wañukmanta?

³⁴Chayrayku ñuka kankunama kachasha Yaya Diospa yachayninwa yachachikku-

nata, ali yachayyukunata, Yaya Diospa shiminta alita yachakushka yachachikunata kankunata yachachinankunapa. Kankuna millaypa yuyayyu runakuna kashpaykichi shukkunata wañuchinkichi. Shukkunata kruspi klabashpa wañuchinkichi. Shukkunata chiknishpa tantarinaykichi wasikunapi makankichi. Chaymanta paykunata shuk llaktamanta shuk llaktama kallpachishpa chiknishpa parisichinkichi.³⁵ Nawpamanta pacha kunankama yaya rukuykichikuna alita paykunata yachachishpa kawsak runakunata wañuchishhkakuna. Chay ali rurak runa Abelta wawkinka wañuchirka. Chaymanta yaya rukuyichikuna wañuka achkata wañuchirkakuna, Bereki spa wawan Sakariasta wañuchishhkankunakama. Yaya Diospa wasinpi wiwakunata rupachina tuchpashinapa kuchunpi kahushpanpas wañuchirkakuna. Kankuna chasnalla katishkaykichirayku tukuy chay ñawpa wañuchishhkakunamantapas uchayu kankichi.³⁶ Alita uyawaychi. Kankuna tukuy chay ñawpamanta pacha mana ali ruranakunata yachashpaykicipas mana yachakushpaykichi chasnallatata runankichi. Chayrayku Yaya Dios kankunata sinchitami kastiganka.

Jesuska Jerusalenpi kawsak runakunata llakishpan wakarka
(Lk. 13.34-35)

³⁷ Chaymanta Jesuska Jerusalén llaktapi kawsak runakunata yapa llakishpan rimarka:

Ay Jerusalenpi kawsak runakuna, yapa llakini kankunaryku. Ñawpamanta pacha Yaya Diospa yachayninwa paypa shiminta yachachikkunata wañuchik kankichi. Yaya Dios kachashkan runakunatapas rumikunawa tuksishpa wañuchik kankichi. Kunanka ñuka achka kuti kankunata

wañuymanta arkanayashkani, imashnami shuk atallpa wawankunata rikran ukupi tantachishpan arkan wañuymanta. Sumakta kankunata arkanayashpaynipas manami munawashkankichichu.³⁸ Rikuychi, kunanka kankunata sakishpayni llaktaykichika chunllami kiparinka.³⁹ Chaymanta kankunata rimani, shuk puncha rimawankichi Yaya Diospa yanapashkan ali runami kanki. Yaya Diospa munashkanta ruranaykipa kachashkan kashpaykimi shamuhunki nishpa. Kunamanta pacha chasna rimawanaykichi punchakama mananami rikuwankichichu.

Jesuska Yaya Diospa wasinta urmachinankunamanta rimarka
(Mk. 13.1-2; Lk. 21.5-6)

24 ¹ Chayta yachachishkanwasha Jesuska *Yaya Diospa wasinmanta llukshirka. Rihushkanpi ñukanchi kayllayashpanchi rimarkanchi:

Rikuy kay suma ali rurarishka Yaya Diospa wasinta.

² Chasna rikuchishpanchi Jesuska rimarka:

Kunan rikuchiwahunkichi kay sumakta rurarishka wasikunata. Alita uyawaychi. Chiknik runakunami urmachik shamukakuna tukuy kay suma rikuhushkaykichita. Urmachishpankuna nima shuk rumi awapura rurarishkaka kiparinkachu.

Jesuska yachachin manara kay allpaka tukurihushpanra imakunami pasanka
(Mk. 13.3-13; Lk. 21.7-19)

³ Chaymanta Jesuska ñukanchiwa pakta Olivos urkuma rirk'a. Chaypi tiyarishpan sapallanchi kahushkanchipi payta kayllayashpanchi tapurkanchi:

Yachachik, ¿ima urastaya *Yaya Diospa wasintaka urmachinkakuna?

¿Imata rikushpanchita yachanchima

kutimunayki ña paktarihushkanta?

¿Imashnata yachanchima kay allpa
tukurinan ña paktarihushkanta?

⁴Chaypina Jesuska ñukanchita
rimarka:

Alita yuyariyichi, mana nima pi
kankunata llullachinanpa. ⁵Manara
kutimuhushpaynira achka runakuna
shamunkakuna kasna nishpa: Ñukami
kani Yaya Diospa Kachashkan
Kishpichik. Chasna llullashpankunami
achka runakunata kirichinkakuna.
⁶Uyashpaykichika runakuna chiknina-
kushpa kaypi chayma wañunakuhukku-
nata, ama mancharinkichichu. Tukuy
chaykunami pasanan tiyan. Wañuna-
kushpa kawsahushpankunapas chay
uras kay allpaka manarami tukurinkara-
chu. ⁷Shuk shimita rimakkuna shuk
shimita rimakkunawa chikninkushpan-
kuna wañunakunkakuna. Shuk allpapi
kawsak runakunaka shuk allpapi
kawsak runakunawa sinchita chiknina-
kushpankuna wañunakunkakuna.
Chaymanta achka llaktakunapi sinchi
yarkay tiyanka. Tukuy partimi allpaka
sinchita kuyunka. ⁸Tukuy chaykuna
kanka kallarinanlla. Chaywasha ashwan
sinchi llakiypa punchakunami
kankakuna.

⁹Chaypina kankunata chiknik runaku-
naka apukunapi pushashpankuna
rimankakuna parisichinankunapa.
Kankunamanta shukkunata wañuchin-
kakuna. Ñukata kirishpa kawsashkayki-
chirayku tukuy llaktakunapi achka
runakuna kankunata chikninkakuna.

¹⁰Chay uras achka runakunaka manana
munankakunanachu kirishpa
kawsanata. Chaymanta shukwa shukwa
chikninkushpankuna apunkunapi
paykunapura yanka millaypata
shukmanta shukmanta rimankakuna.

¹¹Yaya Diospa yachayninwa yachachik

kani nishpa achka llullachishpa
yachachikkuna tiyanka. Paykuna achka
runakunata llullachinkakuna. ¹²Achka
runakuna yapa millaypukunata
rurashpa kawsashpankuna kay allpapi
millaypa ruranakunata yapa mirachin-
kakuna. Chayrayku achka Yaya Diosta
kirikkunapas manana yuyanakushpachu
kawsankakuna. ¹³Kankuna wañunayki-
chi punchakama alita ñukallata kirishpa
kawsashpaykichika Yaya Dios
kankunata kishpichinka paywa pakta
silipi kawsanaykichipa. ¹⁴Kankunaka
tukuy kay allpapi kay suma ali shimita
yachachinaykichi tiyan Yaya Diospa ali
kamachinan kay allpapi ña kallarishkan-
manta tukuy runakuna yachananku-
napa. Chasna yachashpankuna manana
atipankakunachu rimanata mana
yachashkanichu nishpa. Chaypirami kay
allpapa tukurinanka kanka.

¹⁵Ñawpa Yaya Diospa yachayninwa
yachachik Daniel killkarka: Yaya Diosta
chiknik runaka Yaya Diospa wasinpi
yapa millaypata ruranka nishpa. Chay
killkashkanpi pasananta rikushpaykichi
leyishkaykichita yuyariyichi alita
asirtanaykichipa. ¹⁶Chaypina kankuna
Judea allpapi kawsakkunaka utkalla
urukunama mitikuychi. ¹⁷Wasi awapi
kahushpaykichika chaymantalla utkalla
mitikuychi. Ama wasikichipi yaykunki-
chinachu kankunapa imaykichi
tiyashkanta apanaykichipa. Utkalla
mitikunaykichi tiyan. ¹⁸Chakraykichipi
tarawahushpaykichika chaymantalla
mitikuychi. Amana wasikichima
kutiychinachu churarinaykichita
apanaykichipa. ¹⁹Chasna mitikuhsu-
kaykichi punchakunapi yapa llakiypa
kanka chay chichu warmikunarayku
chay llullu wawayu warmikunarayku-
pas. ²⁰Kankunaka Yaya Diosta mañaychi
ama chiri tamya punchakuna, nima
*samana puncha mitikunaykichi

punchaka paktanana. ²¹Chay punchakunapi tukuy runakuna sinchita parisinkakuna. Yaya Dios kay allpata rurashkanmanta pacha manami chasna sinchi llakina tiyarkachu. Nima chaywasha chasna llakina tiyankanachu. ²²Yaya Dioska tukuy akllashkan runakunata yuyashkanrayku chay llakina punchakunata uchillayachinka. Mana uchillayachimaka, nima shuk runa wañuymanta kishpimachu.

²³Chay punchakunapi maykanpas kankunata rimankakuna: Rikuyichi, kaypimi chaypimi Yaya Diospa Kachashkan Kishpichikka. Chasna rimashpankunapas ama paykunata kiriyichchu. ²⁴Chay punchakunapi achka runakuna llullachishpa purinkakuna ñukami Yaya Diospa Kachashkan Kishpichik kani nishpa. Shukkunaka llullachishpa rimankakuna ñukami Yaya Diospa yachayninha yachachik kani nishpa. Paykunaka achka suma mana atipaypakunata, atun yachaywa runakuna nima ima uras rikushkankunata rurankakuna. Chayta rurashpankuna Yaya Diospa akllashkankunatapas llullachinayanakakuna. ²⁵Chay uras yuyariyichi ña kankunata rimashkaynita chasna llullachik runakuna paktanankunata. ²⁶Shuk runakuna kankunata rimashpankunaka chaypimi Yaya Diospa Kachashkan Kishpichikka, payta rikuk riyichi chunlla chakishka allpapi nishpa, ama riyichchu. Shukkunaka kankunata rimashpankuna rikuk shamuyichi kaypimi pakashka nishpa, ama kiriyichchu. ²⁷Nuka Yaya Diospa Kachashkan Runa kutikashka shamuhushpayni tukuy runakunami rikuwankakuna. Imashnami shuk ilampa silipi shuk partimanta shuk partima kunkaymanta chuyahlla rikurin, chasnashinami ñukapas shamusha.

²⁸Maypimi wañushkakunaka sirihun-

kuna, chaypimi ullawankakunaka tantarinahun. Chasnashinami runakuna millaypa ruranankunata yapa mirachishpankuna millanayayapa ismushina tukushpankuna kastigay tukunkakuna. Chayka mana pakallachu kanka ashwan tukuyrayku yachaypa rikupya kanka.

**Jesuska rimarka imashnami
kutimunka kay allpama**
(Mk. 13.24-37;
Lk. 21.25-33; 17.26-30, 34-36)

²⁹Chaymanta Jesuska ñukanchita yachachihushkanllapi rimarka: Sinchi parisina puncha tukushpanna intika amsayanka. Killaka manana punchayachinkachu. Istrillakuna silumanta urmankakuna. Silipi tukuy punchayachikkuna sinchita kuyurinkakuna.

³⁰Chaypina ñuka Yaya Diospa Kachashkan Runa manarapas kutimuhushpaynira shuk imata silipi rikuchisha. Chayta rikushpankunami tukuy kay allpapi kawsak runakuna sinchita mancharishpa wakankakuna. Chaypina rikuwankakuna puyukuna awapi shamuhushkaynita, suma chuyahlla Yaya Diospa atun yachayninha. ³¹Chaypina *angelkunata kamachisha atun trompetankunata sinchita pukushpankuna tukuy partimanta akllashkaynikunata tantachinankunapa.

³²Shuk *igu kaspita rikushpa yachakuyichi. Paypa yakunka ramankunapi sikashpan achkata pankayahushpan yachankichi verano timpu kananta. ³³Chasnashinami tukuy kay rimashkaynita rikushpaykichi yachankichi ñuka ña shamunalla kahushkaynita. ³⁴Alita uyawayichi. Kunan kay punchakunapi kawsak runakunaka manara wañushpankunara tukuy kay rimahushkaynita rikunkichi. ³⁵Kay siluka allpapas tukurinankuna tiyan. Tukuy rimashkay-

nika manami chasnalla pasankachu,
shutipami paktarinan tiyan.

³⁶Ima punchami ima urasmi kutimusha, chaytaka Yaya Diosllami yachan. Nima shuk runa, nima silipi kawsak angelkuna yachanahunchu. Nima ñuka Yaya Diospa kikin Wawan kashpaynipas mana yachanichu ima urasmi kutimusha nishpa.

³⁷Ñuka Yaya Diospa Kachashkan Runa cuti shamenayni uras kanka imashnami ñawpa Noé kawsashkan uras^c karka. ³⁸Manara Yaya Dios allpata yakuwa untachishpanra tukuy runakuna kunkaylla mikushpa, upyashpa, warmiyashpa kawsapayarkakuna. Noeka chay atun lanchanpi yaykunan punchakama chasnalla kawsapayarkakuna. ³⁹Chay runakuna nima yuyarihushkankunapi Yaya Dioska allpata yakuwa untachishpan tukuy chinkarirkakuna. Chasnallatamai ñuka Yaya Diospa Kachashkan Runa kutimuhushpayni nima yuyarihushkankunapi runakunaka kullunkakuna. ⁴⁰Chay uras ishkay runakuna chakranpi tantaylla tarawashpa kahushpangkuna angelkuna shukta pushankakuna, shuktaka sakinkakuna. ⁴¹Ishkay warmi shuk batanllapi kutahushpangkuna angelkuna shukta pushankakuna, shuktaka sakinkakuna.

⁴²Mana yachankichichu ima urasmi ñuka Amuykichi kutikashka shamusha nishpa. Chayrayku shamenaynikama yuyashpalla chapawaychi. ⁴³Alita asirtaychi. Wasi amuka yachashpanka ima urasmi tutapi shuwaka shamenanta, mana puñushpachu uyashpalla chapama. Chasna chapashpan chay shuwak runaka nima imata shuwamachu chay wasimanta. ⁴⁴Chayrayku kankunapas tukuy uras alicharishka

chapawaychi. Kankuna nima yuyarihushkaykichipi ñuka Yaya Diospa Kachashkan Runaka shamusha.

**Jesuska ishkay kamachina
runakunamanta yuyachishpa
yachachin**
(Lk. 12.41-48)

⁴⁵Chaymanta Jesuska ñukanchita yachachishpalla katirka: Shuk patrón shuk llaktama rinanpa, shuk ali yuyayyu tukuy uras alita paktachik runanta kamachirka tukuy paypa runankunata tarawachinanpa, chaymanta mikuna uras alita karananpa.

⁴⁶Chay runanka kushillami kanka patroynin kutimushpan paypa kamachishkanta alita paktachishpa kahushkanpi tarik shamushpanka. ⁴⁷Alita uyawaychi. Chasna alita kasuk runanta patroyninka churanka tukuy ima tiyapushkanta kuyrak kananpa.

⁴⁸Ashwan chay kamachik runanka millaypa yuyayyu kamaka yuyarima, patroynika mana utka kutimunkachu nishpa. ⁴⁹Chasna yuyarishpan kallarima tarawak masinkunata makashpa parisichinata. Pay kikin machak runakunawa tantarishpan sumakta mikuma upyama.

⁵⁰Chasna rurashpa kahushkanpi, mana yuyarihushkanpi patroyninka kutimuma.

⁵¹Chaypina chay runanta sinchita kastigama. Chasnallatata Yaya Dioska payta mana kasuk, millaypa yuyayyu runata mana llakichishpan tukuy llullachik runakunawa parihu nina mana wañukpi kastiganka. Chaypina chay runaka sinchita parisishpa wakanka, piñaywa kirunkunata kanirinka.

Jesuska yachachin chunka
shipaskunamanta yuyachishpa

25 ¹Yuyariychi imashnami Yaya Diospa ali kamachinanka kay allpapi paktachirinka tukuy chay

rimashkaynishina pasahushkan uras. Rikuychi chunka shipaskunata. Chunka shipaskuna, kusayahuk warmipa amigankuna lamparinkunata apashpan-kuna tinkuk rirkakuna kasarahushkan musuta wasinma pushanankunapa.

²Chay chunka amigankunamanta pichka alita yuyarik karkakuna, pichka nima imata yuyarikchu karkakuna. ³Chay pichka mana alita yuyarik shipaskunaka lamparinkunata apashpankuna mana kerosenta aparkakunachu kutikashka untachinankunapa. ⁴Chay pichka alita yuyarik shipaskunaka lamparinkunata apashpankuna butillankunapi kerosenta aparkakuna. ⁵Chaypina kasarak musuka yapa unayashpan shamunarpa, chay chunka shipaskunaka chapahushhkankunapi yapa sampayashpankuna puñurkakuna. ⁶Ña chawpi tuta kahushpan uyarkakuna shuk runa karumanta kaparihushkanta: ¡Ñami musuka shamuhunna! ¡Payta tinkuk riychi! nishpa. ⁷Chaypina chay shipaskunaka utkalla atarishpankuna lamparinkunata alicharkakuna. ⁸Chay pichka nima imata yuyarikkunaka chay pichka yuyarik amigankunata rimarkakuna: Lamparinchikunapa kerosenka ñami tukurishka. Kuychi ñukanchitapas shuk uchillastu kerosenstuta. ⁹Chasna tapushpankuna chay pichka alita yuyarik shipaskunaka rimarkakuna: Kerosenchimanta kushpanchika ñukanchiraykupas pishinkami, tukuy lamparinchikunaka wañunka. Kerosenta munashpaykichika utkalla rantik riychi nishpa. ¹⁰Mana kunayashpankuna chay pichka nima imata yuyarikkunaka kerosenta rantik rirkakuna. Rinankunkama kasarak musuka paktamurka. Chaypina paywa pakta chay pichka alita yuyarik amigankunaka kasarana mikuna wasipi yaykurkakuna. Tukuy yaykushpankunana wasi punkuta

taparkakuna. ¹¹Chaywasha chay pichka nima imata yuyarik amigankunaka paktamurkakuna. Punkuta waktashpan-kuna kasarak musuta kayarkakuna: ¡Musu, musu, paskay punkuta ñukanchi-pas yaykunanchipa! ¹²Chaypina payka ukumanta rimarka: Kankunaka manami kayashkaynichu kankichi, manami kankunata riksinichu nishpa. ¹³Chasna kwintashkanwasha Jesuska ñukanchita rimarka: Kankuna mana yachankichichu ima urasmi, ima punchami kutimusha nishpa. Chayrayku alita tukuy uras alicharishka chapawanaykichi tiyan.

**Jesuska shuk patrón runankunata
kullkita kushpa sakishkanmanta
yuyachishpa yachachin**
(Lk. 19.11-27)

¹⁴Chaymantapas Yaya Diospa ali kamachinanka kay allpapi paktachirishpan kasnami kanka: Shuk patrón karu llaktama rinayashpan paypa runankunata kayashpan kullkinta kurka mirachi-punankunapa. ¹⁵Shuk runanta pichka waranka ullkita kurka. Shuktaka ishkay waranka ullkita kurka. Shuktaka shuk waranka ullkita kurka. Kimsanti runankunata atipanankuna tuputa kurka. Chay ullkita kushpana shuk karu llaktama rirkta. ¹⁶Chaypina chay pichka warankata apishka runanka chay kullkiwa tarawashpan mirachirka pichka waranka ashwanta. ¹⁷Chasnallata chay ishkay warankata apishka runanpas tarawashpan ishkay warankata mirachirka. ¹⁸Chaymanta chay shuk warankata apishka runanka chay kullkiwa mana tarawanayashpan chay ullkita allpapi pamparka.

¹⁹Chaymanta unayma chay patronka kutimurka. Chaypina ullkinta kushpan runankunata tapurka maytukuytata mirachishkakuna nishpa. ²⁰Chaypina pichka waranka ullkita apishka

runanka chunka warankata apamushpan patroyninta rimarka: Patroyni, kutichishkayki kay pichka waranka kuwashkayki kullkita. Chaymanta kushkayki kay pichka waranka mirachishkaynitapas nishpa.²¹ Chay mirachishka kullkita kushpanna patronka rimarka: Alitami rurashkanki. Kanmi kasuwak alita paktachik runayni kanki. Chay uchillastu kushkayni kullkiwa alita tarawashkanki. Chayrayku ashwanta kushkayki chaywa tarawanaykipa. Kunanka wasinipi yaykuy ñukawa pakta kushikunaykipa.²² Chaypina chay ishkay waranka kullkita apik runanka patroyninta kayllayashpan rimarka: Patroyni, ñukata kuwashkanki ishkay warankata tarawachinaynipa. Kunanka chaytami kanta kutichini. Chaymanta kay mirachishkayni ishkay warankatapas kushkayki nishpa.²³ Chasna chusku waranka kullkita kushpanna patronka rimarka: Alitami rurashkanki. Kanmi kasuwak alita rurak runa kanki. Chay uchillastuta kushkayni kullkiwa alita tarawashkanki. Chayrayku ashwanta kushkayki chaywa tarawanaykipa. Kunanka wasinipi yaykuy ñukawa pakta kushikunaykipa.²⁴ Chaymanta shuk waranka kullkita apik runanka patroyninta kayllayashpan rimarka: Patroyni, ñuka alita kanta riksini, sinchita tarawachik patrón kanaykita. Kanka shuk runapa tarpushkankunamanta pallanki. Chikan runapa mirachishkanta apinki.²⁵ Sinchi kamachik kanaykita manchashpayni kuwashkayki ullkita allpapi pampashkani. Kay shuk waranka ullki kuwashkaykillatata kutichishkayki.²⁶ Chasna kushpanna patroyninka rimarka: Kanka mana ali yuyayyu yapa killaysiki runaynimi kanki. Ñuka shuk runapa tarawashkanmanta pallanaynita, chikan

runapa mirachishkanta apinaynita yuyarinki.²⁷ Chasna kashpan ñimaraykuta ullkinita mana churarkankichu ullkita mirachina wasipi chaypi mirachipanankunapa? Ñuka kutimushpayni ullkinita mirashkantapas surkunima karka.²⁸ Chasna rimashpan patronka chaypi kahuk runakunata kamachirka: Chay shuk waranka ullkita kushkayni runata kichushpaykichi kuychi chay chunka waranka ullkiyu runata.²⁹ Maykan runami charishkanwa atipashkanwa alita ruran payka ashwanta kuy tukunkami tiyapushkan puchurinankama achkata atipak kanankama. Maykan runami uchillastu charishkanwa uchillastu atipashkanwa mana alita ruran payka chay uchillastu tiyapushkantapas atipashkantapas kichuy tukunkami.³⁰ Chayrayku chay nima imarayku valik runata chay manchaypa amsama wichuychi. Chaypina sinchita parisishpa wakanka, piñaywa kirunkunata kanirinka.

**Jesuska yachachin kutikashka
shamuhushpan tukuy
allpakunamanta runakuna
puntanpi tantarinankunamanta**

³¹ Chaymanta Jesuska ñukanchita yachachishpalla katirka: Ñuka Yaya Diospa Kachashkan Runa shuk puncha tukuy *angelkunawa pakta suma yachayniwa kutimusha tukuy runakunata kamachinaynipa. Chasna shamushpayni suma chuyahlla kamachina tiyarinaynipi tiyarisha.³² Chaypi tiyarishpayni tukuy allpakunamanta runakuna puntaynipi tantarinkakuna. Imashnami shuk runa obehankunamanta kabrakunata shuk partipi churananshina, chasnallatata ñukapas runakunawa rurasha.³³ Akllashkayni runakunataka kuskayni parti churasha.

Mana akllashkayni runakunataka llukini partimi churasha.

³⁴Chaypina ñuka atun apu kashpayni kuskayni parti churashkayni runakunata rimasha: Yayayni kankunata alita rikushpan aliyachishkanrayku shamuy-chi Yaya Diospa ali kamachinan mushu mundupi ñukawa paktekamachinaykipa. Chay kamachinan mushu mundupi kawsanaykichi Yaya Dios kay allpata rurashkanmanta pacha kankunaryku wakaycharka. ³⁵Ñuka yarkaywa kahushpayni kankuna karawarkankichi. Yakunayashpayni upyachiwarkankichi. Mana riksishkayki-chi runa kashpaynipas paktamushpayni wasikichipi kayawashpaykichi samachiwarkankichi. ³⁶Churarinayni pishiwashpan kankuna kuwarkankichi churarinaynipa. Unkushka kahushpayni kuyrawarkankichi. Karselpi kahushpayni rikuk riwarkankichi.

³⁷Chasna rimashpayni paykunaka tapuwankakuna: Yaya Jesús, ¿ima urastaya yarkaywa kahushpayki kanta kararkanchi? ³⁸¿Ima urastaya llaktanchipi paktashpayki mana riksishkanchi runa kashpayki wasinchipi kanta kayashpa samachirkanchi? ¿Ima urastaya churarinaykika pishishpan kanta kurkanchi churarinaykipa? ³⁹¿Ima urastaya unkushka kahushpayki karselpi kahushpayki kanta pasyarkanchi? ⁴⁰Chasna tapuwashpanguna ñukaka atun kamachik kashpayni paykunata rimasha: Alita uyawaychi. Kankunaka nima imayu runata yanapashpaykichi ñukatami yanapawashkankichi nishpa.

⁴¹Chaymanta llukini parti churashkayni runakunata rimasha: Ñukamanta anchuriychi, Yaya Diosmi kankunata kastiganka. Nina mana wañukma riyichi. Yaya Dios chay ninataka rurashka tukuy supaykunaryku kamachinankunawa

paktekaypi wiñayparayku kastigarishka kanankunapa. ⁴²Ñuka yarkaywa kahushpayni mana karawarkankichichu. Yakunayashpayni nima yakuta kuwarkankichichu. ⁴³Mana riksishkayki-chi runa kashpayni paktamushpayni wasikichipi mana kayawarkankichichu samanaynipa. Churarinayni pishiwashpan nima imata kuwarkankichichu churarinaynipa. Unkushka kahushpayni karselpi kahushpayni nima ima uras rikuk riwarkankichichu. Chayrayku Yaya Dios kankunata kastiganka.

⁴⁴Chasna rimashpayni tapuwankakuna: Yaya Jesús, ¿ima urastaya yarkaywa kashpayki kanta mana kararkanchichu? ¿Ima urastaya yakunayashpayki kanta mana yakuta kurkanchichu? ¿Ima urastaya llaktanchipi paktashpayki mana riksishkanchi runa kashpayki wasinchipi kanta mana kayarkanchichu? ¿Ima urastaya churarinaykika pishishpan kanta mana kurkanchichu churarinaykipa? ¿Ima urastaya unkushka kahushpayki karselpi kahushpayki kanta mana rikuk rirkanchichu? ⁴⁵Chasna tapuwashpanguna ñuka rimasha: Imashnami mana nima imayu runata mana yanapashkankichichu, chasnashnami ñukatapas mana yanapawashkankichichu nishpa. ⁴⁶Chay mana alita rurak runakunaka nina mana wañukmami rinankuna tiyan. Yaya Diosta kasushpa kawsak runakunami siluma wiñaypa kawsak rinankuna tiyan.

Israel apukuna paykunapura

kwintarkakuna Jesusta

wañuchichinankunapa

(Mk. 14.1-2; Lk. 22.1-2; Jn. 11.45-53)

26 ¹Tukuy chaykunata yachachish-kanwasha Jesuska ñukanchita rimarka:

²Kankuna yachankichi *Paskua punchakunaryku ishkay punchallana pishinanta. Manara chay punchakuna

kallarihushpanra chiknik runakuna ñuka Yaya Diospa Kachashkan Runata apunkunama pushawankakuna. Paykunata kuwankakuna kruspi klabachishpa wañuchiwanankunapa.

³Jesús chayta ñukanchita rimahushpan chay punchallatata *saserdotekunapa apunkuna ñukanchita kamachik israel masinchi rukukunawa pakta saserdotekunapa atun apu Kaifaspa wasinpi tantarirkakuna. ⁴Paykuna yuyarirkakuna llullachishpa Jesusta apichishpanguna wañuchichinankunapa. ⁵Chasna ruranata munashpangunapas paykunapura rimarkakuna:

Mana Paskua punchakunapi wañuchichunchichu, kay Jerusalenpi kahuk runakuna ñukanchita mana piñay tukunanchipa. Chayrayku manara chay punchakuna paktarikhushpanra apichishunchi nishpa.

**Shuk warmi mishkinlla asnak
perfumita Jesuspi talirka
(Mk. 14.3-9; Jn. 12.1-8)**

⁶Betania llaktapi kawsarka shuk runa Simón shutiyu. Paytami Jesuska ñawpa aycha ismuchik unkuymanta ampirkha. ⁷Jesús Simonpa wasinpi mikuhushpan shuk warmi yaykurka. Chay warmika apamurka yura rumimanta rurarishka butillapi yapa chaniyu mishkinlla asnak perfumita. Jesusta kayllayashpan umanpi chay mishkinlla asnak perfumita talirka. ⁸Chayta rikushpanchi piñarishpa rimarkanchi:

¿Imaraykushi kay warmika chay mishkihlla asnak perfumita usuchihun? ⁹Ashwan ali kama karka, chay perfumita rantichishpan chay apishkan kullkiwa nima imayu runakunata yanapananpa.

¹⁰Jesús chayta uyashpan rimarka: ¿Imaraykuta piñarishpaykichi kay warmita pinkachihunkichi? Chay

perfumita umaynipi talishpan alitami rurashka. ¹¹Nima imayu runakunaka tukuy urasmi kankunawa kawsankakuna. Ñukataka mananami tukuy uras rikuwankichinachu. ¹²Kay warmika chay mishkihlla asnak perfumita aychaynipi talishka, wañushpayni aychaynika alicharishka kananpa urku uchkupi churashpa tapanankunapa.

¹³Alita uyawaychi. Tukuy maypipas runakuna kay ali shimita ñuka runakunata kishpichinaynimanta yachachishpankuna kay warmipa rurashkanmantas rimankakuna. Payka ñukata yapa yuyawashpan chasna rurawashka. Chasna kashpan tukuy runakuna paymantapas alita yuyarinkakuna.

**Judaska Jesusta apichichirka
wañuchinankunapa
(Mk. 14.10-11; Lk. 22.3-6)**

¹⁴Ñukanchi Jesuspa chunka ishkay runankunamanta shuk karka Judas Iskariote shutiyu. Payka kullkiranti Jesusta apichinayashpan *saserdotekunapa apunkunata rimak rirkha:

¹⁵Ñuka rimashkaykichi imashnami Jesusta atipankichi apinata nishpa. ¿Masnatata pagawankichi?

Chasna Judas rimashpan paykunaka aynirkakuna:

Kimsa chunka kullkita kanta kushu nishpa.

¹⁶Chay kullkita apishkan urasmanta pacha Judaska yuyarinka imashnami Jesusta apichichinka nishpa.

**Jesuska runankunawa pakta
Paskua punchapi mikurka
(Mk. 14.12-25; Lk. 22.7-23;
Jn. 13.21-30; 1Kor. 11.23-26)**

¹⁷Chay *Paskua punchakunapi ñukanchi israel runakuna mikunchi pan mana punkichishkata, chaymantapas shuk obeha maltata. Chay Paskua

kallarinan punchapi ñukanchika payta kayllayashpanchi tapurkanchi:

¿Maypita munanki alichashpa obeha maltata kusananchipa, Paskua punchakunapi mikunanchipa? nishpa.

¹⁸Chaypina Jesuska ñukanchita aynirka:

Jerusalén llaktama riychi chay riksish kayni runapa wasinma. Chaypi payta rimankichi: Ñukanchita yachachikmi kanta riman, wañunayni puncha ñami paktarihun. Chayrayku wasikipi runaynikunawa Paskua punchapi mikunata mikunayani nishpa.

¹⁹Chasna Jesús rimashkanshina, ñukanchika chay Paskua punchapi mikunanchipa rurak rirkanchi.

²⁰Ña tutayahushpanna Jesuska tukuy ñukanchi chunka ishkay runankunawa pakta mesa muyukta siririshpa kahurkanchi mikunanchipana. ²¹Chay mikuhushkanchipi Jesuska rimarka:

Alita uyawaychi. Chikniwak runakuna apiwankakuna wañuchiwanankunapa. Shuk kankunamantami apichichiwanka nishpa.

²²Chasna rimashkanta uyashpanchi ñukanchika yapa llakirirkanchi. Chaypi Jesusta tapurkanchi shukllankama shukllankama:

Yaya Jesús, ¿pitaya ñukanchimanta chasna rurama? ¿Ñukachu apichichishkayki? Mana kaynima ñuka nishpa.

²³Chasna tapushpanchi Jesuska aynirka:

Ñukawa parihu kay kallanapi panninta ukuchishpan mikuhukmi kuntraynikunata apichichiwanka.

²⁴Imashnami Yaya Dios ñawpamanta killkachirka ñukamanta, chasnashinami ñuka Yaya Diospa Kachashkan Runaka wañunayni tiyan. Wañuna kashpaynipas chay apichichiwak runarayku llakirini, yapa parisinan tiyan. Ashwan ali kama karka, mana wawayarima karka.

²⁵Jesuspa rimashkanta uyashpan Judaska, maykanmi kuntrankunata apichinayarka, payta tapurkanchi:

Yachachik, ¿ñukachu apichishkayki? nishpa.

Chasna tapushpan Jesuska aynirka: Ari, kanmi kanki nishpa.

²⁶Mikuhushpanchira Jesuska panta apishpan Yaya Diosta agradesirk. Chay panta pakishpa pakishpa ñukanchita kurka. Chasna kuhashkanpi rimarka:

Kay panta mikuychi. Kay panka aychaynishinami kan. Kayta mikushpaykichi yuyariychi, ñuka wañushpayni kankunata kishpichinaynita.

²⁷Chaymanta shuk pusillu *vinuta apishpan Yaya Diosta agradesirk. Chay pusilluta ñukanchita kuhashpan rimarka:

Tukuy kankuna kay vinuta upyaychi.

²⁸Kay vinuka yawarnishinami kan. Wañushpayni yawarni shuturishpan Yaya Dios achka runakunata uchankunamanta llakichishpan kishpichinka. Kay yawarni shuturinanwa Yaya Dios runakunaryku paywa alichananta paktachin. ²⁹Kankunata rimani, ñukaka manami kutikashka kay allpapi kushilla kankunawa tantarishpa kay vinuta upyashanachu. Ña wañushami. Ashwan shuk puncha Yaya Diospa ali kamachinan mushu mundupi shuk mushu vinutana kankunawa upyahukshina tantaylla kushilla kashunchi.

Jesuska rimarka Pedro payta mana riksikshina tukunanta

(Mk. 14.26-31; Lk. 22.31-34;
Jn. 13.36-38)

³⁰Chasna Jesuska rimashkanwasha takirkanchi salmokunata. Chaymanta rirkanchina Olivos urkuma. ³¹Chaypina Jesuska rimarka:

Yaya Diospa killkachishkanpi ñukanchita riman:

Obehankunata kuyrak runata
wañuchisha. Chayrayku tukuy
obehankuna shikwarinkakuna
nishpa.

Chay killkapi rimashkanshina, kay
tuta tukuy kankuna kuntraynikunata
manchashpaykichi sakiwankichi.

³²Wañushkayniwasha Yaya Dios
kawsachiwashpan ñukara kankuna-
manta ñawpashpa Galilea allpama
risha.

³³Chasna Jesuspa rimashkanta
uyashpan Pedroka aynirka:

Tukuy katik masinikuna mancha-
rishpa kanta sakishpankunapas ñukaka
nima ima uras sakishkaykichi nishpa.

³⁴Chaypina Jesuska Pedrota rimarka:

Alita uyaway. Kay tuta manarapas
atallpa kantahushpan kimsa kuti mana
riksianaykita rimanki.

³⁵Pedroka sinchita rimashpan nirka:

Kanwa parihu wañunayni kashpanpas
wañusha, manami rimashanchu kanta
mana riksinaynita nishpa.

Chasnallatata tukuy ñukanchikunapas
payta rimarkanchi.

**Jesuska Getsemani kinchapi Yayan
Diosta mañarka**

(Mk. 14.32-42; Lk. 22.39-46)

³⁶Chaymanta Jesuska ñukanchiwa
pakte chay olivos tarpu kinchama,
Getsemani shutiyuma rirkka. Chaypi
paktashpanchi Jesuska rimarka:

Kayllapi tiyarishpa chapawaychi,
chaynikstupi rishpayni Yaya Diosta
mañanayníkama nishpa.

³⁷Chasna rimashkanwasha Pedrota,
Sebedeopa ishkay wawankunatapas
pusharka chaynikstuma. Chaypina
Jesuska wañunanta yuyarishpan
mancharishpa yapa llakirishpan
paykunata rimarka:

³⁸Wañunaynita yuyarishpayni
shunkuynipi yapa llakirini wañuhushka-

shina. Kankuna mana puñushpa kayllapi
kipariychi. Yaya Diosta mañaychi
yanapawanapan nishpa.

³⁹Chasna rimashkanwasha chaynik-
stuma rirkka, kunkurishpa kumurirk
umanka allpapi tupanankama.
Kumurishpa Yayan Diosta mañarka:

A Yayayni, atipashpaykika kishpichi-
way mana sinchita parisinaynipa.
Chasna tapushpaynipas ama ñukupa
munashkaynita ruraychu, ashwan kanpa
munashkaykillata ruray nishpa.

⁴⁰Chasna Yayan Diosta mañashkanwa-
sha Jesuska chay kimsa runankunama
kutirka. Puñushkakunata tarishpan
Pedrota rimarka:

¿Manachu nima shuk urastuta
atipashkankichi mana puñushpa
ñukawa pakta Yaya Diosta mañanata?

⁴¹Mana sampayashpa Yaya Diosta
mañaychi supay kankunata mana
uchata rurachinanpa. Kankunaka
munankichi Yaya Diosta mañanata.
Chasna munashpaykichipas sapallayki-
chika mana atipankichichu, shunkuyki-
chipi yapa sampayashka kashpaykichi.
Chayrayku Yaya Diosta mañaychi
shunkuykichita sinchikuchinanpa
nishpa.

⁴²Chaymanta kutikashka Yayan Diosta
mañak rirkka:

A Yayayni, parisinaynimanta mana
arkanata munashpaykika kaypi kahuni
munashkaykita ñukawa ruranaykipa
nishpa.

⁴³Chay kimsa runankunama kutishpan
kutikashka tarik rirkka puñurayahukku-
nata, paykuna yapa puñuywa kahush-
kankunaratayku. ⁴⁴Puñuhushkakunallata
sakishpan Jesuska kimsaynin kuti Yayan
Diosta chasnallatata mañak rirkka.

⁴⁵Chaymanta runankunama kutishpan
paykunata rimarka:

¿Kunankamachu puñuhunkichi? Ñami
paktarishka ñuka Yaya Diospa Kachash-

kan Runa uchasapa runakunamanta apiy tukunaynipa.⁴⁶ Atariyichi, akuychi. Ñami shamuhun chay apichichiwak runaka nishpa.

**Chiknik runakuna Jesusta
apirkakuna**
(Mk. 14.43-50; Lk. 22.47-53;
Jn. 18.2-11)

⁴⁷ Jesú斯 rimahushkanllapi paypa runan Judaska achka runakunata pushamushpan shamurka. Paykunaka ishkay wiluyu sablikunata, kaspikunatapas apamushpangkuna Jesusta apik shamurkakuna. Paykuna *saserdoteckunapa apunkunamanta, ñukanchita kamachik israel masinchi rukukunamanta kamachirishka karkakuna.⁴⁸ Judaska chay runakunata pusharka alita yachachishpa: Maykan runatami muchasha, chaymi kanka Jesuska. Payta apishpa pushankichi nishpa.⁴⁹ Chaypina Jesusta kayllayashpan rimarka:

Yachachik, shamushkanimi saludanaynipa kanta nishpa payta mucharka.

⁵⁰ Muchashpanna Jesuska rimarka:

Amigu, apichiwanayashpaykika apichiway nishpa.

Chaypina chay runakunaka Jesusta apirkakuna pushanankunapa.

⁵¹ Chayta rikushpan Jesuspá shuk runan sablinta apishpan saserdotekeuna atun apupa shuk runanta sumakta pitishpa wañuchisha nishpa pitihushpan rinkrinllata pitirka.⁵² Chasna pitishpan Jesuska rimarka:

Wakachay sablikita. Sabliwa makanakuk runakunaka sabliwallata-tami wañunankuna tiyan.⁵³ ¿Manachu yachanki Yayayni Diosta tapushpaynika payka chunka ishkay waranka *angelkunata kachamuma arkawanankunapa?

⁵⁴ Chasna arkawanahumaka ¿imashnataya paktarima ñawpa Yaya Diospa killkachishkanka ñuka wañunayni-

manta? Manami paktarimachu. Chayrayku Yaya Diosta mana tapunayanichu arkawanana wañuymanta.

⁵⁵ Chaywasha chay apik runakunatana Jesuska rimarka:

¿Imaraykutaya sablikunawa kaspikunawapas shamushkankichi apiwanaykipacha? ¿Wañuchik shuwa runachu kani? Tukuy puncha *Yaya Diospa wasinpi kankunawa pakta kahushpayni yachachirkani. ¿Imaraykuta mana chaypi apiwarkankichichu?⁵⁶ Yaya Diospa yachayninwa yachachikkuna ñawpa killkashkankunapi rimashkunkunashina, shutipata kunanka apiwahunkichi wañuchichiwanaykipicha nishpa.

Chaypina tukuy ñukanchi paypa runankuna yapa mancharishpanchi Jesusta sapallanta sakishpa mitikurkanchi.

**Jesusta pusharkakuna ashwan atun
israel apu Kaifasma**

(Mk. 14.53-65; Lk. 22.54-55, 63-71;
Jn. 18.12-14, 19-24)

⁵⁷ Chay apik runakunaka Jesusta *saserdoteckunapa atun apu Kaifasma wasinma pusharkakuna. Paypa wasinpi Moisespa killkashkanta yachachikkuna, ñukanchita kamachik israel masinchi rukukunawa pakta tantarishka kahrulkakuna.

⁵⁸ Jesusta pushashpankuna Pedroka karullapi katishpan chay atun apupa wasin pampam kincharishkapi yaykurka. *Yaya Diospa wasinta kuyrakkunapas chay pampapi tiyahlla kahrulkakuna. Pedroka paykunapa kuchunpi tiyarik rirka, rikunayashpan imatashi Jesusta rurankakuna nishpa.

⁵⁹ Chay wasi ukupi saserdoteckunapa apunkuna tukuy paykunawa pakta tantaylla yuyarishpa kamachik

masinkuna chiknik runakunata maskarakuna llullashpa millaypata Jesusmanta rimanankunapa. Yapa munarkakuna Jesusta wañuchinata.
⁶⁰Chaypina achka runakuna llullashpa millaypata Jesusmanta rimashpankunapas karan shuk chikanta rimashpan nima imata tarirkakunachu Jesusta atipanankunapa wañuchinata. Chaywashaña ishkay runakuna paktamushpankuna chasnallatata yanka millaypata Jesusmanta rimarkakuna:

⁶¹Kay Jesusmi rimarka: Ñuka Yaya Diospa atun wasinta urmachishpayni kimsa punchapi atipani kutikashka ruranata nishpa.

⁶²Chasna rimashpankuna Kaifaska shayarishpan Jesusta tapurka:

¿Manachu nima imata ayninki?
 ¿Manachu uyanki kanta uchachishpa rimahushkunkunata? nishpa.

⁶³Chaypina Jesuska chunlla uyarka. Nima imata aynishpan chay saserdote-kunapa atun apuka kutikashka rimarka:

Silipi kawsak Yaya Diospa shutinpi kanta rimani, mana llullashpa rimay ¿kanchu kanki chapahushkanchi Yaya Diospa Kachanan Kishpichik, Yaya Diospa Wawan? nishpa.

⁶⁴Chaypina Jesuska aynirka:

Ari, shutipami rimanki. Kunan ñukapas kankunata rimani, ñuka Yaya Diospa Kachashkan Runata rikuwankichi tukuya atipak Yayayni Diospa kuskan partipi tiyahushkaynita. Chasnallatata rikuwankichi puyu awapi kutikashka shamuhushkaynita nishpa.

⁶⁵Chaypina chay saserdote-kunapa atun apu Kaifaska yapa piñarishpan pay kikinpa kamisan awapi churarishkanta likirka kasna nishpa:

Kay runapa chasna rimashkanka Yaya Diostami yapa piñachihun. Manana ashwan payta uchachik runakunata maskashunchinachu. Tukuy kankunami

uyashkankichi paypa piñachinan shimikunata.
⁶⁶¿Imatata yuyarinkichi? nishpa.

Chay kamachik masinkuna aynirka-kuna:

Uchayumi, wañunan tiyan nishpa.

⁶⁷Chaypina Jesusta chiknishpankuna uyanpi tyukarkakuna sakmarkakuna. Shukkunaka kasiwa payta waktarkakuna.
⁶⁸Asichishpankuna rimarkakuna:

Kan Yaya Diospa Kachashkan Kishpichik kashpaykika rimay pimi kanta waktashka nishpa.

Pedroka Jesusta mana riksinichu nishpa rimarka

(Mk. 14.66-72; Lk. 22.56-62;
 Jn. 18.15-18, 25-27)

⁶⁹Chay wasi ukupi Jesusta asichihush-kunkunapi Pedroka chay wasi pampan kincharishkapi tiyahurka. Chaypi shuk atun aputa yanapak warmi kayllayash-pan rimarka:

Kanpas Galileamanta Jesuswa pakta purik kanki nishpa.

⁷⁰Chasna rimashpan Pedroka tukuy chay runakuna uyashkankunapi aynirka:

Manami yachanichu pimantami rimawahunki nishpa.

⁷¹Chaymanta Pedroka chay wasi punkuma rirk'a. Chaypi shuk yanapak warmi payta rikuuhushpan shukkunata rimarka:

Kay runaka Nasaretmanta Jesuswa purikmi karka nishpa.

⁷²Chaypina Pedroka kutikashka llullashpa Yaya Diospa shutinpi rimarka:

Ñukaka manami riksinichu chay runata nishpa.

⁷³Shuk ratumanta chaypi kahuk runakuna Pedrota kayllayashpankuna rimarkakuna:

Shutipami kanpas chay runawa purik kanki. Galilea runakunashina chikanna-

yak shimita rimahushkaykirayku
riksinchi kanpas Jesusta katik kashkay-
kita nishpa.

⁷⁴Chasna rimashpankuna Pedroka
sinchita rimarka:

Yaya Dios kastigawachun mana
shutipata rimashpayni. Manami
riksinichu chay runata nishpa.

Chasna rimahushkanllapi atallpaka
kantarka. ⁷⁵Chayta uyashpan Pedroka
yuyarirka Jesuspa rimashkanta, manara-
pas atallpa kantahushpanra kimsa kuti
rimanki mana riksiwanaykita nishpa.
Chayta yuyarishpan Pedroka kanchama
llukshishpan yapa llakirishpa sinchita
wakarka.

**Jesusta pusharkakuna
romano apu Pilatoma**

(Mk. 15.1; Lk. 23.1-2; Jn. 18.28-32)

27 ¹Chaymanta ña pakarishpan
tukuy *saserdotekunapa
apunkuna, tukuy ñukanchita kamachik
israel masinchi rukukunawa shuk
yuyayllawa kwintarkakuna Jesusta
wañuchinankunapa. ²Chaypina Jesusta
watashtankuna pusharkakuna chay
*romano apu *Pilatoma.

**Judaska pinkarishpan pay kikinta
siperishpan wañurka**

³Jesusta wañuchichinankunapa
pushahushkankunata Judaska rikushpan
yuyarirka payta apichichishpan mana
alita rurashkanta. Chayrayku llakirish-
pan Jesusta apinankunapa riksichish-
kanmanta apishkan kullkita kutichik
rinka. Chay *saserdotekunapa apunku-
nata, ñukanchita kamachik israel
masinchi rukukunatapas rimarka:

⁴Mana alitachu rurashkani, chay
mana uchayu runata kullkita apinayni-
ranti kankunata riksichishkani wañuchi-
naykichipa.

Paykunaka aynirkakuna:

Chayka kanpa uchaykimi. Ñukanchi-
rayku mana imananchu nishpa.

⁵Chasna rimashkankunata uyashpan
Judaska chay kullkita *Yaya Diospa
wasinpi wichurka. Chaymanta
llukshishpan kaspipi sikashpan shuk
waskawa kunkanpi watarishpan saltash-
pan wañurka.

⁶Chay saserdotekunapa apunkuna
chay wichushka kullkita apishpankuna
rimarkakuna:

Kay kullkika shuk runata wañuchi-
napa apichishkanrayku apishka
kullkimi. Chayrayku mana alichu
churananchipa ofrendapi. ⁷Ashwan ali
kama kay kullkiwa shuk uchilla urku
allpata rantinanchipa, shuk allpakuna-
manta runakuna wañushpankuna
uchkuta rurachishpanchi chaypi
churashpa tapanankunapa. Chasna
paykunapura kwintashpankuna
mankakunata rurak runapa allpanta
rantirkakuna. ⁸Chay kullkiwa rantish-
kankunaryku kunankama chay allpapa
shutinka kiparishka Yawar Allpa.

⁹⁻¹⁰Chasna ñawpa Yaya Diospa yachay-
ninwa yachachik Jeremiaspa kasna
rimashkanka paktarirka:

Israel masinikuna kimsa chunka
kullkillata chay runata chan-
chishpankuna apinankunapa
kurkakuna. Chay kullkita kuti
apishpa mankakunata rurak
runamanta allpata rantirkakuna
Yaya Dios kamachishkanshina
nishpa.

**Pilatoka Jesusta tapurka
kastigachishanchu manachu nishpa**

(Mk. 15.2-5; Lk. 23.3-5; Jn. 18.33-38)

¹¹Chaymanta Jesusta pusharkakuna
*romano apu *Pilatoma. Chaypi payka
Jesusta tapurka:

¿Shutipachu kanki israel masikiku-
napa Atun Apu? nishpa.

Chasna tapushpan Jesuska aynirka:
Ari, shutipami rimanki.

¹²Chay *saserdetekunapa apunkuna,
ñukanchita kamachik israel masinchi
rukukuna achka millaypakuñata
paymanta rimahushkankunapi Jesuska
chunllalla uyarayarka. ¹³Chayrayku
Pilatoka Jesusta tapurka:

¿Manachu uyanki tukuy kay runakuna
kanmanta millaypata rimahushkanku-
nata?

¹⁴Jesuska nima imata aynirkachu.
Chayrayku Pilatoka ¿imaraykushi mana
apirishka runashina ayninchu
kishpinanpa? nishpa yuyarishpan mana
yacharkachu imatami ruranka.

Jerusalenpi tantarishka runakuna
Jesusta kruspi klabashpa
wañuchichinata munarkakuna
(Mk. 15.6-20; Lk. 23.13-25;
Jn. 18.38-19.16)

¹⁵Karan wata *Paskua punchakuna
*romano apu *Pilatoka kacharipayarka
shuk runata karselpi kahukta. Ñukanchi
israel runakunata tapupayarka akllananchipa,
maykan runatami kacharinka
nishpa. ¹⁶Chay uras karselpi karka shuk
runa Barrabás shutiyu. Tukuy yacharka-
kuna yapa millaypata rurak runa
kashkanta. ¹⁷Chaypina Pilatoka chay
achka tantarishka runakunata tapurka:

¿Maykan runatata munankichi
kacharichinaynipa? ¿Barrabastachu
kacharichisha? ¿Kay Yaya Diospa
Kachashkan Kishpichik nishkankuna
Jesustachu kacharichisha? nishpa.

¹⁸Apu Pilatoka alita yacharka, Jesusta
chiknishpankuna yankamanta wañuchi-
chinayashkankunata. Chayrayku chasna
tapurka.

¹⁹Apu Pilatoka kamachinan
tiyarinanpi tiyahushkanpi paypa
warmin kacharka shuk runanta rimak-
rinanpa: Ama nima imata ruraychu

chay mana uchayu runata. Kayna tutapi
paymanta manchaypata muskushkani
nishpa. Chayrayku Pilatoka mana
munarkachu payta wañuchichinata.

²⁰Chasna kashpanpas *saserdeteku-
napa apunkunaka, ñukanchita kamachik
israel masinchi rukukunapas chay achka
tantarishka runakunata yuyachishpa
rimarkakuna: Pilatota rimaychi
Barrabasta kacharinanpa, Jesustana
wañuchichinanpa nishpa.

²¹Chaypina apu Pilatoka kutikashka
tapurka:

¿Pitata munankichi kacharichinay-
nipa? nishpa.

Chay tantarishka runakunaka kaparir-
kakuna:

¡Barrabasta kacharichiy! nishpa.

²²Apu Pilatoka paykunata tapurka:

¿Imatata rurasha kay Jesuswa, Yaya
Diospa Kachashkan Kishpichik nishkan-
kunawa?

Chasna tapushpan tukuy runakuna
kaparishpa aynirkakuna:

¡Kruspi klabashpa wañuchichiy!

²³Apu Pilatoka paykunata rimarka:

¿Ima millaypatataya rurashka?

Chaypi paykunaka kutikashka ashwan
sinchita kaparirkakuna:

¡Kruspi klabashpa wañuchichiy!

²⁴Chay runakuna yapa piñarishpa
kaparishpanguna Pilatoka nima imapi
atipashpan chunllayachinata, yakuta
apamunankunapa kamachirka. Chay
yakuwa makinta mayllarka tukuy
runakunapa rikushkanpi. Chaypi
paykunata rimarka:

Nukaka makinita mayllani yachanay-
kichipa kay runa wañushpanka mana
uchayu kanaynita, kankunami uchayu
kankichi nishpa.

²⁵Chasna rimashpan tukuy chay
runakunaka aynirkakuna:

Chay runa mana uchayu kashpan
yanka wañuchiy tukushpanka Yaya Dios

ñukanchita tukuy wawanchikunawa pakta kastigachun nishpa.

²⁶Chaypina Pilatoka Barrabasta kacharichirka. Jesustana kara waskawa asutichirka yawarnin llukshinankama. Chaywasha kamachirka shuk kruspi klabashpa wañuchinankunapa.

²⁷Chaypina suntalukunaka Jesusta pusharkakuna apu Pilatopa wasinma. Chaypi tukuy suntalu masinkunata tantachirkakuna, Jesusta asichinankunapa. ²⁸Jesusta llatanachishpankuna kamachik atun apupa puka churarinata-shina churachirkakuna. ²⁹Kashamanta llawtuta rurashpankuna atun apupa tawasampatashina umanpi churarkakuna. Kuska makinpi apichirkakuna shuk barata. Payta asichishpankuna pukllachishpa puntanpi kunkurirkakuna kasna nishpa:

¿Shamushkankichu israel runakunapa atun apu?

³⁰Payta tyukashpankuna chay kushkankuna barata apishpa umanpi waktarkakuna. ³¹Chasna pukllachish-kankunawasha chay puka churarinata llatanachishpankuna pay kikinpa churarinantana churachirkakuna. Chaymanta payta pusharkakuna shuk kruspi klabashpa wañuchinankunapa.

Jesusta kruspi klabashpa

wañuchirkakuna

(Mk. 15.21-32; Lk. 23.26-43;
Jn. 19.17-27)

³²Jesusta pushahushkankunapi kruspi klabashpa wañuchinankunapa, shuk runa Simón shutiyuta tinkurakuna. Chay Simonka karka Sirene llaktamanta. Suntalukunaka payta kamachirkakuna Jesuspa krusninta markanapa.

³³Rishpankuna chay Gólgota lumapi paktarkakuna. Gólgota ninayan wañush-kapa uman luma. ³⁴Chaypina suntalukunaka Jesusta upyachinayarkakuna aya

wikiwa chapurishka *vinuta. Jesuska chayta kamashpan mana upyanayarkachu.

³⁵Chaypina suntalukunaka Jesusta kruspi klabarkakuna. Chaywasha Jesuspa churarinankunata chawpinakunakunapa swirlinkunata kamarkakuna pishi apanka nishpa. ³⁶Chaywasha tiyarirkakuna chayllapi Jesusta kuyiranankunapa. ³⁷Jesuspa uman awapi shuk killkarishkata ratarkakuna tukuy runakuna yachanankunapa imaraykumi wañuchishkakuna nishpa. Chay killkarishkapi rimarka: Kay Jesuska israel runakunapa atun apumi kan nishpa.

³⁸Jesusta wañuchihushkankuna uras ishkay wañuchik shuwakunatapas karan shukta shuk kruspi klabarkakuna chaypi wañunankunapa, shukta kuskan parti, shukta llukin parti. ³⁹Achka runakuna Jesusta rikuk rirkakuna. Paykuna mana kirishpankuna Yaya Diospa Wawan kananta, umankunata kuyuchishpankuna payta asichirkakuna:

⁴⁰Kanmi rimashkanki Yaya Diospa atun wasinta urmachishpayki kimsa punchapi kutikashka ruranaykita. Kunanka kan kikinta kishpichiriy. Shutipa Yaya Diospa Wawan kashpaykika chay krusmanta uraykumuy nishpa.

⁴¹Chasnallatata *saserdote kuna apunkuna, Moisespa killkashkanta yachachikkunapas, ñukanchita kamachik israel masinchi rukukunapas payta asichishpa rimarkakuna paykunapura:

⁴²Payka achka runakunata kishpichishka. Kunanka pay kikinta mana atipanchu kishpichirinata. Ñukanchi israel runakunapa atun apunchi kashpanka kay krusmanta uraykumuchun. Chaypira kirishunchi payta. ⁴³Payka rimarkami Yaya Diospa

Wawan kananta. Rimarka Yaya Dios payta tukuy imapi yanapananta. Yaya Dios shutipa payta yuyashpanka kunalla chay krusmanta uraykuchichun.

⁴⁴Chasna asichishpankuna chay ishkay kruskunapi klabarishka wañuchik shuwakunapas Jesusta asichirkakuna.

Jesuska ña wañurkana
(Mk. 15.33-41; Lk. 23.44-49;
Jn. 19.28-30)

⁴⁵Jesús kruspi klabarishka kahush-kanpi chawpi punchamanta pacha kimsa urakama amsayarka. ⁴⁶Chay urasllatata Jesuska sinchita kaparishpa rimarka arameo shimpí:

Elí, Elí, lema sabaktani nishpa.

Chay rimashkanka ninayan: Yayayni Dios, Yayayni Dios, ¿imaraykutaya sapallaynita sakiwashkanki? nishpa.

⁴⁷Chasna kaparishkanta uyahspan-
kuna chaypi kahukkunaka rimarkakuna:

Kay runaka Eliastami kayahun, chay ñawpa Yaya Diospa yachayninwa yachachikta nishpa.

⁴⁸Chaypina shuk runa kallpashpa rirka utkuta apak rinanpa. Chayta shuk suni kaspi puntapi watashpan agru *vinipi ukuchishpan Jesuspa shimpí tupachirka, tsunkashpan upyananpa.

⁴⁹Shukkuna asichishpa rimarkakuna:

Aku rikushunchi, shutipachu Eliaska shamunka payta kishpichinanpa nishpa.

⁵⁰Chaypina kutikashka Jesuska sinchita kaparirka. Chasna kaparishpa wañurka. ⁵¹Jesús wañushkan uraslla *Yaya Diospa wasin ukupi Yaya Dioswa tinkunakuna kwartuta arkak rakta llachapaka^d awamanta pacha pitikta likirirka. Allpaka sinchita kuyurirka. Atun rumisapa urkukunapas partirirkakuna. ⁵²Wañushkakunapa taparishkan

uchkukunaka paskarirkakuna. Achka Yaya Diosta kirik wañushka runakunaka kawsarirkakuna. ⁵³Jesús kawsarishkan-washa chay kawsarishka runakunaka Jerusalén llaktapi yaykurkakuna. Chaypi achka runakuna paykunata rikurkakuna.

⁵⁴Allpa sinchita kuyurihushpan tukuy manchaypakuñata rikushpankuna kapitanka Jesusta kuyrak suntalunku-nawa pakta yapa mancharirkakuna:

Shutipami kay runaka Yaya Diospa Wawan kashka nishpa rimarkakuna.

⁵⁵Jesús kruspi klabarishka kashpan Galileamanta pacha payta katishpa yanapak warmikuna karumantalla rikurayarkakuna. ⁵⁶Chay rikuk warmikuna achka karkakuna. Paykuna-manta shuk karka Magdalamenta Maria. Shuk karka *Santiagopa Josepa maman Maria shutiyu. Shuk karka Sebedeopa wawankunapa maman.

**Jesuspa aychanta urku uchkupi
churashpa taparkakuna**
(Mk. 15.42-47; Lk. 23.50-56;
Jn. 19.38-42)

⁵⁷Chaymanta tutayahushpanna shuk achka kullkiyu runa José shutiyu Jesús kruspi wañushkanpi paktamurka. Chay Joseka karka Arimatea llaktamanta.

Paypas Jesusta katikmi karka. ⁵⁸Jesús wañushkanta rikushpan Joseka *Pilatota tapuk rirka Jesuspa aychanta urku uchkupi churashpa tapak rinanpa. Chasna tapushpan Pilatoka suntalunku-nata kamachirka kunankunapa. ⁵⁹Chay-pina Joseka Jesuspa aychanta shuk mushu yura llachapawa wankurka. ⁶⁰Alita wankushpan aparkakuna shuk mushu allarishka urku uchkupi churashpa tapanankunapa. Chay urku uchkuta Joseka rurachirka pay kikinpa

rantishkan allpapi. Jesuspa aychanta chay uchkupi churashkankunawasha atun rumiwa sumakta taparkakuna. Chaypi sakirkakuna.⁶¹ Chay uchku taparishka kuchupi Magdalamananta Maria shuk Mariawa pakta tiyarishpa rikurayarkakuna.

**Suntalukunaka Jesuspa aychan
churay tukushka uchku punkuta
kuyrarkakuna**

⁶²Kayantima ñukanchi israel runaku napa samananchi puncha karka. Chay puncha *saserdote kunapa apunkuna, *fariseokunawa pakta *Pilatota rikuk rirkakuna. ⁶³Chaypina payta rimarkakuna:

Apu, ñukanchi yuyarinchi chay llullachik runapa rimashkanta. Payka kawsa kashpanra rimarka: Wañushkayniwasha kimsa punchamanta kawsariشا nishpa. ⁶⁴Chayrayku kanta tapunchi, kimsa punchata suntaluykikuna Jesuspa aychanta churashkankuna uchku punkuta kuyranankunapa, paypa runankuna tutapi shamushpankuna paypa aychanta mana apanankunapa. Apashkankunawasha rimanahuma Jesuska ñami kawsarishka nishpa. Chasna llullashpankuna kutikashka tukuy runakunata ashwanta llullachinahuma nishpa.

⁶⁵Chaypina Pilatoka paykunata aynirka:

Chaykaya suntalukunaka. Pushaychi. Chay wañushkapa aychan churashkakuna uchku punkuta alita kuyraychi nishpa.

⁶⁶Chaypina chay apunchikunaka suntalukunawa pakta rirkakuna punkarawa sumakta ratachinankunapa chay uchku punkupa rumiwa taparishkata, nima pi anchuchinapana. Chaypi suntalukunata sakirkakuna alita kuyranankunapa.

Jesuska kawsarirka

(Mk. 16.1-8; Lk. 24.1-12; Jn. 20.1-10)

28

¹Chaymanta *samana puncha kayantima pakarihushpan Magdalamananta Maria shuk Mariawa pakta chay wañushkapa aychan churashkata rikuk rirkakuna. ²Chay warmikuna rihushkankunapi kunkaymanta sinchi allpa kuyuy tiyarka, Yaya Diospa *angel silumanta uraykumushpan chay uchku punkuta tapak rumita anchuchishkanrayku. Anchuchishpanna awanpi tiyarirka. ³Chay angelka chuyahlla ilampashina rikurirka. Tukuy churarinan karka suma yura, ñawinchita rantipak chuya. ⁴Chay angelta rikushpankuna chay kuyrak suntalukuna yapa mancharishpankuna chukchurishpa wañushkashina urmarkakuna allpama. ⁵Chaypina chay warmikuna paktashpankuna chay angelka rimarka:

Ama manchariyichihu. Yachani shamushkaykichita maskanapa kruspi klabarishka Jesusta. ⁶Kruspi wañushpanpas ñami kawsarishka rimashkashina. Rikuk shamuychi maypimi churarkakuna. Payka manami kaypinachu, ñami llukshishka. ⁷Rikushkaykichiwascha utkalla rimak riychi paypa runankunata: Yaya Jesús ña kawsarishka. Galilea allpama manara rishpaykichira payra rinka. Kankunapas riychi. Chaypimi payta rikunkichi nishpa. Chayllatami kankunata rimani.

⁸Chaypina chay ishkay warmikunaka mancharishpankunapas yapa kushikurkakuna. Kushikushpa kallparkakuna Jesuspa runankunata rimanankunapa. ⁹Rihushkankunapi Jesuska paykunata rikurishpan saludarka. Paykunaka kayllayashpankuna kumurishpa chakinta ukllarishpankuna payta yapa kushichirkakuna. ¹⁰Chaypina Jesuska paykunata rimarka:

Ama manchariychichu. Kunalla rimak riychi wawkinikunata Galilea allpapi llaktakunama rinankunapa. Chaypimi rikuwankakuna.

**Suntalukuna llullashpa
rimarkakuna Jesuspa aychanta
runankuna apashkankunata**

¹¹Chaymanta chay warmikuna Jerusalén llaktama rihushpankuna chay kuyrak suntalukunapas chay llaktallapita paktarkakuna. Paykunaka *saserdotekunapa apunkunata kwintarkakuna tukuy pasashkakunata. ¹²Chaypina chay apunkunaka ñukanchita kamachik israel masinchi rukukunapas tantarishpankuna kwintarkakuna imatami rurankakuna nishpa. Kwintashkankunawasha chay suntalukunata achka kullkita pagarkakuna. ¹³Pagashpa rimarkakuna:

Kankuna tukuy maykantapas rimanayki-chi tiyan: Tutapi puñuhushpanchi Jesuspa runankuna aychanta apashkakuna nishpa. ¹⁴Chayta apu *Pilatoka yachashpan kankunata kastiganayashpanka ñukanchi rimashu kankunata mana kastigananpa.

¹⁵Chay suntalukunaka llullanankunapa ari nishpankuna achka kullkita apirkakuna. Chaymanta chay llullata rimashpankuna mirachishpa mirachishpa tukuy israel masinchikuna yacharkakuna. Kunan punchakama Jesuspa runankuna aychanta apashkakuna nishpa rimashkakunata uyanchi.

**Jesuska runankunata kamachirka
tukuy parti paymanta yachachik
rinankunapa**
(*Mk. 16.14-18;*
Lk. 24.36-49;
Jn. 20.19-23)

¹⁶Chaymanta chay chunka shuk runankuna Galilea allpama rirkakuna, Jesús rimashkan urkuma. ¹⁷Chaypi paktashpankuna Jesusta rikurkakuna. Payta rikushpankuna puntanpi kunkurishpa kushichirkakuna. Shukkunaka yuyayninkunapi rimarkakuna paychari manachu nishpa.

¹⁸Chaypina Jesuska paykunata kayllayashpan rimarka:

Yaya Dios churawashka kay allpapi silupipas shuklla kamachik kanaynipa. ¹⁹Chayrayku tukuy kay allpapi kawsak runakunata yachachik riichi paykunapas ñukata katikkuna tukunankunapa. Chay ñukata katiwak runakunata bawtisaychi runakunata rikuchinankunapa Yaya Diosta, ñuka Wawanta, Yaya Diospa Espiritunta kasukkuna tukushkankunata. ²⁰Chaymantapas chay kiriwak runakunata tukuy yachachishkaynikunata yachachiychi paykunapas alita kasukkuna kanankunapa. Kankunata rimani, ñukaka mana anchurishpachu tukuy puncha kankunawa kahuni kay allpa tukurinan punchakama.

MARKUSPA KILLKASHKAN KILLKA JESUKRISTU RUNAKUNATA KISHPICHISHKANMANTA

Bawtisak Juan

Jesukristumanta rimarka

(Mt. 3.1-12; Lk. 3.1-18; Jn. 1.19-28)

1 ¹Ñuka Markus killkani suma ali shimita Yaya Diospa Wawan Jesukristumanta. Payka uchanchikunamanta kishpichikmi kan.

²Ñawpa manara Jesukristu shamu-hushpanra Yaya Diospa yachayninwa yachachik Isaiaska killkarka kasna Yaya Dios Wawanta rimashkanta:

Ñukaka shuk runata kachasha runakunata shiminita rimananpa. Payka manarapas kanta kachahushpayni runakunata kamanta rimak rinka shunkunkunata alichashpanguna alita kanta kayanankunapa nishpa.

³Chaymantapas Isaiaska killkarka chay yachachik runamanta:

Chunlla chakishka allpapi shuk runa sinchita rimashpa yachachinka kasna: Imashnami shuk anchu ñampita alichanchi, atun apu shamuhushpan purinanza, chasnashina shunkuykichita alichariychi. Millaypata rurashpa kawsashkaykichita sakiychi. Yaya Diospa Kachanan Kishpichik kankunapi kawsak shamunka nishpa yachachinka.

Tukuy chayta killkarka Isaiaska Yaya Diospa rimashkanta.

⁴Imashnami Isaiaska killkarka ñawpa, chasnashinami kunan Yaya Dioska kachashka shuk yachachik Juan shutiyuta. Chay yachachikka chunlla chakishka allpapi yachachirka runakunata: Kunanmanta pacha tukuy millaypata rurashkaykichitaka amirishpa sakiychi. Yaya Diospa rimashkanta kasushpana kawsaychi. Chasna rurahushkaykichita rikuchishpa bawtisariychi. Chaypina Yaya Dioska kankunata uchaykichimanta llakichinkami.

⁵Tukuy Judea allpa llaktakunamanta Jerusalén llaktamantapas achka runakuna shamurkakuna Juanpa yachachishkanta uyanankunapa. Chasna uyashpanguna musyarirkakuna uchayu kashkunkunata. Chaypina tukuy uchankunata rimashpanguna Juanka paykunata bawtisarka chay Jordán yakupi.

⁶Juanka mana suma churarishkachu karka. Shuk pukripa churarinanshina, imashnami ñawpa Yaya Diospa yachayninwa yachachik Elias pas churaripayarka, chasnallatatami Juanpa churarinapas wiwa kamillupa willman puchkashkawa awarishka karka. Sinturunka karamantami karka. Mana mikupayarka-

chu ñukanchishina. Mikupayarka chaypi kawsak chilikkunata, upyapayarka mapa mishkita.⁷ Yachachipayarka runakunata: Ñukamanta ashwan yachayyu runami shamunka. Paymantaka ñukaka mana yapa yachayyuchu kani. Paypa puntampi nima imata atipanichu rimanata.⁸ Ñukaka yakuwami kankunata bawtisashkani. Payka kankunata Yaya Diospa Espiritunta kushpami shunkuykichita aliyachinka.

Juanka Jesusta bawtisarka
(Mt. 3.13-17; Lk. 3.21-22)

⁹Chaymanta Jesuska Galilea allpapi kahuk Nasaret llaktamanta llukshishpan Jordán yakuma rirk'a. Chay yakupi Juanka Jesusta bawtisarka.¹⁰ Yaku-manta llukshihushpan Jesuska rikurka siluka paskarikhushkanta, chaymantapas Yaya Diospa Espiritunka shuk wiwa mukukushina paypi uraykumuhush-kanta.¹¹ Chasnallapi Yaya Dioska silumanta rimarka:

Kanmi kanki munashkayni Wawayni. Kanmi sumakta kushichiwanki nishpa.

Supayka Jesusta llullachinayarka
mana Yaya Diosta kasunanca
(Mt. 4.1-11; Lk. 4.1-13)

¹² Jesuska bawtisarishkanwasha Yaya Diospa Espiritunka payta pusharka chunlla chakishka allpama.¹³ Chay allpapi Jesuska chusku chunka punchata sapallan karka. Chaypi supaykunapa apunka payta llullachinayashpa karka. Chaypi achka manchaypa animalkuna chawpipi kahurka. Yaya Diospa *angelkunaka payta kuyrashpa karkakuna.

Jesuska Galilea allpa llaktakunapi
kallarirka yachachinata
(Mt. 4.12-17; Lk. 4.14-15)

¹⁴ Apu *Herodeska Juanta karselpi churashkanwasha Jesuska kutirka

Galilea allpapi llaktakunama Yaya Diospa suma ali shiminta yachachi-nanpa.¹⁵ Chaypi rimarka:

Ñami paktarishka Yaya Diospa rimashkan timpuka. Ñami kallarihun paypa ali kamachinanka kay allpapi. Chayrayku alita yuyarishpaykichi tukuy millaypa rurashkaykichita sakiyichi. Yaya Diospa suma ali shimintana kasushpa kawsaychi.

Jesuska chusku runakuna rediwa
challwata apikkunata kayarka
(Mt. 4.18-22; Lk. 5.1-11)

¹⁶ Jesuska Galilea kucha mayanpi rihushpan rikurka Simonta wawkin Andreswa kahushkata. Paykuna challwakunata apihurkakuna redinkunawa.¹⁷ Chaypi Jesuska paykunata kayarka:

Shamuychi. Katiwaychi. Ñuka kankunata yachachisha. Imashnami challwata apishpa kawsashkankichi, chasnashinami kunanmanta pacha runakunatana yachachishpa purinkichi paykunapas Yaya Diospa wawankuna tukunankunapa.

¹⁸ Chay ratulla redinkunata sakishpan-kuna Jesustana katirkakuna.¹⁹ Chaymanta astalla chay kucha mayanta rihushpankuna Jesuska rikurka Sebedeopa wawankunata *Santiagota wawkin Juantapas, botinkunapi redinkunata rimintahukkunata.

²⁰ Paykunatas katiwaychi nirka Jesuska. Chaypina atarishpankuna yayan Sebedeota, yanapakkunatas sakimurkakuna Jesuswa pakta purishpa kawsanankunapa.

Jesuska supay yaykushka
runata ampirka
(Lk. 4.31-37)

²¹ Chaymanta Jesuska chay chusku runankunawa chay Galilea kucha

mayanpi kahuk Kapernaum llaktapi paktarkakuna. *Samana puncha yaykukakuna israel masinchikunapa tantarina wasipi, maypimi tantarishka kahurkakuna Yaya Diospa shiminta yachakunapa. Chaypina Jesuska paykunata yachachirka. ²²Chay runakuna yachachishkanta uyashpankuna mancharishpa rimarkakuna paykunapura:

Kay Jesuska Yaya Diospa yachaynинwami yachachin. Tukuy kay Moisespa killkashkanta yachachikkunamanta yapa alitami ūukanchikunata yachachin.

²³Chay tantarina wasipi kahuk runakuna chawpipi shuk supay yaykushka runa tiyarka. Chay runaka Jesusta uyashpan sinchita kaparirka:

²⁴Jesús, Nasaret llaktamanta runa, ama ūukanchita kayllayaychu! ¿Shamushkankichu ūukanchita wichunaykipa ninapi wiñayapa parisinanchipa? Ñuka riksini kanta Yaya Diosmanta shamushka runa kanaykita nishpa.

²⁵Jesuska chay runapi kawsak supayta sinchi shimiwa piñashpa rimarka:

Chunllayay. Llukshiy kay runamanta.

²⁶Chaypina chay supayka kaparishpan chay runata sinchita chukchuchishpan sakirka. ²⁷Chayta rikushpankuna tukuy runakunaka mancharishpankuna tapunakurkakuna:

¿Pitaya kay runaka? Atun yachay-ninwa shuk mushu shimita yachachin. Supaykunatapas kamachin. Kamachishpan kasunahun.

²⁸Chay urasslla tukuy Galilea allpa llaktakunapi kawsak runakuna Jesuspa rurashkanmanta yacharkakuna.

**Jesuska Pedropa warminpa
mamanta ampirka**
(Mt. 8.14-15; Lk. 4.38-39)

²⁹Chay tantarina wasimanta llukshishpankuna Jesuska *Santiagowa Juanwa

Simonpa, Andrespa wasinma rirkakuna.

³⁰Chay wasipi Simonpa warminpa maman kalinturawa unkushka sirihurka. Jesuska yaykushpan chay wasipi, ayllunkunaka rimarkakuna unkushkamanta. ³¹Payka chay unkushkata kayllayarka. Makinmanta apishpan atarichirka. Chay ratulla kalinturanka pasarka. Ampirishpanna tukuy chaypi kahukkunata upyachirka kararka.

**Jesuska achka
unkushkakunata ampirka**
(Mt. 8.16-17; Lk. 4.40-41)

³²Ña inti yaykuhushkanpi runakunaka tukuy unkushkakunata, supay yaykushka runakunatapas apamurkakuna Jesusma. ³³Tukuy chay llaktapi kawsakkuna tantarimurkakuna chay Simonpa wasin punkupi. ³⁴Chaypina Jesuska achka unkushkakunata ampirka chikan chikan unkuykunamanta. Chaymantapas achka supaykunata kamachirka chunllalla llukshinankunapa chay runakunamanta. Chay supaykunaka rikshishpankuna Yaya Diospa Wawan kashkanta, Jesuska rimarka nima imata rimanankunapa.

**Jesuska Israel allpapi achka
llaktakunapi Yayan Diospa
shiminta yachachirka**
(Lk. 4.42-44)

³⁵Kayantima ña punchayahushkanpi manara inti llukshimuhushpanra Jesuska atarishpan chay llaktamanta llukshishpan chunlla kahushkama rirka Yayan Diosta mañananpa. ³⁶Jesús chayma rishpan Simonka paywa kahukkunapas likcharishpankuna illata rikurkakuna. Chayrayku ūampikunama maskanapa rirkakuna. ³⁷Tarishpankuna rimarkakuna:

Tukuy runakunami kanta maskahunkuna nishpa.

³⁸Chaypina Jesuska rimarka:
Akuychi rishunchi shuk llaktakunama chaypipas Yaya Diospa shiminta yachachinaynipa. Chayraykumi shamushkani kay allpama chasna yachachishpa purinaynipa.

³⁹Chaymanta Jesuska runankunawa purirka tukuy chay Galilea allpa llaktakunapi, tukuy chay israel masinchikunapa tantarina wasikunapi runakunata yachachirka. Chaymantapas achka runakunamanta supaykunata llukshichirka.

**Jesuska shuk runata aycha
ismuchik unkuymanta ampirka**
(Mt. 8.1-4; Lk. 5.12-16)

⁴⁰Shuk puncha shuk aycha ismuchik unkuyyu runaka nima pita kayllayanata atipashpantata Jesusta kayllayarka. Kunkurishpan rimarka:

Yachani ampinata atipawanaykita. Kanrayku ali kashpanka kay unkuynimanta ampiway, ampirishpayni kuti atipanaynipa tantaylla kawsanata aylluynikunawa nishpa.

⁴¹Chaypina Jesuska llakichishpan mana llankaypata makinwa llankashpan rimarka:

Ari, munanimi. Ñami ampirishka kanki.

⁴²Chay ratulla unkuyninmanta ampirishpan aychanka alina kiparirka.

⁴³Ña Jesuska sakihushpan chay ampinkan runata sumakta kunarka:

⁴⁴Nima pita kwintankichu kanta ampinkaynimanta. Ashwan *saserdote-llama riy ampirishkaykita rikuchinaykipa. Chaymantapas Yaya Diosta kunayki kashkata apashpayki churak rinki, ñawpa Moisespa killkashkanpi kamachishkashina. Chasna rurashkaykimantami tukuy runakuna yachankakuna unkushkaykimanta ampirishkaykita nishpa.

⁴⁵Chasna kunashpanpas chay ampirishkaka Jesús payta ampinkanta tukuy runakunata kwintak rirka. Chayrayku Jesuska manana atiparkachu nima maykan llaktapi kunkaylla yaykunata. Chasna kashpan chay llaktakunamanta karuyarka nima pi kawsahushkama. Chasna karuyashpanpas tukuy llaktakunamanta runakunaka payma shamurkakuna.

**Jesuska aycha chakirishka
runata ampirka**
(Mt. 9.1-8; Lk. 5.17-26)

2 ¹Masna punchamantalla Jesuska kutirka Kapernaum llaktama. Chaypina shuk wasipi paktashpan tukuy runakuna yacharkakuna ña chaypi kahushkanta. ²Chasna yachashpankuna achka runakuna utkalla tantarirkakuna chay Jesupsa paktashkan wasipi. Kichkikta punkumanta pacha karkakuna, nima pi atipaypa yaykunata. Chasna kahushkankunapi Jesuska Yayan Diospa shiminta yachachirka. ³Chay yachachihushkanpi chusku runakuna paktamurkakuna. Apamurkakuna llanchamapi shuk aychan chakirishka runata. ⁴Chay wasipi achka runakuna kichkikta kahushpankunana mana atiparkakunachu yaykunata. Chayrayku sikarkakuna iskalunu chay parihu washayu wasi awama. Chay wasi washata awamanta paskashpankuna Jesús kahushkan kuska chay unkuskata llanchamanpi uraykuchirkakuna ampinanpa payta. ⁵Jesuska paykunata rikushpan yacharka shunkunkunamanta pacha kirihushkankunata chay runata ampinanta. Chayrayku payta rimarka:

Wawki, tukuy uchaykikunamanta llakichirishkami kanki.

⁶Chaypi tiyarka Moisespa killkashkanta yachachikkuna. Jesús chasna chay runata rimashkanta uyashpankuna

shunkunkunapi piñarishpa yuyarirkakuna: ⁷ ¿Imashnata yuyarin kay runaka rimanarpa chasna? ¿Imashnata ñukanchishina runaka llakichima uchanchikunamanta? Yaya Diosllami atipan llakichinata uchanchikunamanta. Chay runaka Yaya Diosshina tukunayashpan Yaya Diosta piñachihun nishpa.

⁸Jesuska chay yuyarihushkankunata yachashpan paykunata tapurka:

¿Imaraykuta chasna yuyarihunkichi? ⁹Kay runataka rimashkanimi uchaykikunamanta llakichirishkami kanki nishpa. Chasna rimashpayni mana yachankichichu shutipa llakichishkachu manachu nishpa. Ñuka kay runata rimayima atariy, llanchamaykita apishpayki puriy nishpa, pay alita purishpanna yachankichima ñuka payta ampishkaynita.

¹⁰Yachanaykichipa ñuka Yaya Diospa Kachashkan Runa paypa yachayninwa kay allpapi runakunata uchankunamanta llakichinaynita, kunalla kay unkushkata ampisha nishpa rimarka Jesuska.

¹¹Chaymanta chay runata rimarka:

Kunanka atariy. Llanchamaykita apishpayki kutiy wasikima.

¹²Chaypina chay runaka utkalla atarimushpan llanchamanta apishpan llukshimurka chay wasimanta. Tukuy chay runakunaka rikushpankuna kushikushpa rimarkakuna:

Yaya Dios, suma ali yachakmi kanki. Nima ima uras chasna rurashkaykita rikushkanchichu nishpa.

Jesuska Levita kayarka

(Mt. 9.9-13; Lk. 5.27-32)

¹³Chaymanta Jesuska kutikashka rirkakay Galilea kucha mayanma. Chaypi achka runakuna payta kayllayashpankuna paykunata yachachirka. ¹⁴Yachashikanwasha chay kucha mayanta

rihushpanna rikurka Alfeopa wawan *Leví shutiyuta. Chay Levika ñukanchi israel masinkunata *impuestuta kobrapayarka chay *romano tukuymanta atun apurayku. Jesuska Levita kobranañ wasipi tiyahushkanta rikushpan rimarka:

Leví shamuy, katiway.

Chay ratulla Levika atarishpan Jesusta katirka.

¹⁵Achka runakuna Leviwa tantaylla Jesusta katirkakuna. Chaymanta Levika kayarka Jesusta runankunawa pakta paypa wasinpi mikunankunapa. Mikuhushpankuna achka *impuestuta kobrakkuna, shuk mana ali rurak runakunapas paykunawa tantaylla chay wasillapi mikuhurkakuna.

¹⁶Moisespa killkashkanta yachachikakuna, *fariseokunapas Jesusta rikushpankuna chay mana ali rurak runankunawa tantaylla mikuhukta, washancharkakuna. Chaypi Jesuspakunata tapurkakuna:

¿Imaraykutaya kankunata yachachikka mikun tantaylla impuestuta kobrakkunawa, paykunashina mana ali rurak runakunawapas?

¹⁷Chay rimahushkankunata uyashpan Jesuska rimarka:

Alikunaka mana munanahunchu ampipta. Ashwan unkushkakunami ampipta munanahun ampirinankunapa. Chasnallatata ñukaka mana shamushkanichu yanapanaynipa maykanmi mana uchayuchu kani nishpa riman. Ashwan shamushkanimi uchayukunata yanapanaynipa Yaya Diostana kasunankunapa.

Jesuska yachachin payta katikkuna ñawpa katishkankunata manana atipanankunata katinata

(Mt. 9.14-17; Lk. 5.33-39)

¹⁸Shuk punchakuna Juanpa runankuna, *fariseokunapa runankuna-

pas mana mikupayanahunchu Yaya Diosta mañanankunapa. Chaymanta shuk runakuna Jesusta kayllayashpan-kuna tapurkakuna:

Juanpa runankuna, fariseokunapa runankunapas shuk punchakuna mana mikunahunchu. ¿Imaraykutaya runayki-kunaka mana sakinahunchu mikunata nima shuk puncha?

¹⁹Jesuska paykunata aynirka:

Shuk musuka warmiyahushpanka kayan tukuy ayllunkunata kushilla tantarishpa mikunankunapa mushu warmiyahushkawa. Chasna chay warmiyahuk runawa kushilla tantarishushkankunapi nima pi atipanchu mana mikushpa kanata.

²⁰Chay mushu warmiyahuktami kunrankuna anchuchishpankuna chay urasmi mana mikushpa llakirinkakuna nishpa.

Chasna Jesuska rimarka pay kikin chay mushu warmiyahushkashina kashkanta yuyachishpa.

²¹⁻²²Chaymanta kutikashka Jesuska yachachirkka: Nima maykan rimintamachu mawka kamisanta shuk mushu kintiyak llachapawa. Maykanchari chasna mushu llachapawa rimintashpanka taksashpa kintiyashpan ashwan atunta likiripuma.

Chasnallatatami mushu *vinu putskuri-hushkataka mana untachinchimachu shuk mawka karamanta rurarishka bulsapi wakaychanapa. Chasna vinu shuk mawka karamanta bulsapi untachishpanchika karata tulkyachishpan talirin. Chayrayku mushu vinu putskuri-hushkata mushu karamanta bulsapi untachinanchi tiyan, nima kara likirinampa, nima vinu talirishpa usunampa.

Imashnami mana churanchimachu shuk mushu llachapata shuk mawka

churarinapi, nima mushu vinuta mawka karapi churanchimachu, chasnashinami mana atipankichichu katinata ñawpa yaya rukunchikuna yachachishkankunata, ñukapa mushu yachachihushkaynitapas. Chasna ishkantita katinaya-hushpaykichika mana atipankichichu katinata nima maykanta.

**Jesuska yachachin samana
punchamanta**

(Mt. 12.1-8; Lk. 6.1-5)

²³Shuk *samana punchapi Jesuska runankunawa pakta trigu tarpukuna chawpita rihurkakuna. Chay chakraku-napi rihushpankuna runankunaka shuk shuk trigu muyukunata chipi chipi pakishpa pallarkakuna mikunankunapa.

²⁴Chaypina shuk *fariseokunaka Jesusta rimarkakuna:

Rikuy runaykikuna samana punchapi rurahushkankunata. ¿Manachu yachankichi Yaya Diospa killkachishkanpi kamachishkanta samana punchapika mana tarawananchipa?

²⁵⁻²⁶Jesuska aynirka:

¿Manachu leyishkankichi chay ñawpa yaya rukunchi atun apu Davidmanta? Chay uras Abyatar shutiyu *Yaya Diospa wasinpi tarawak *saserdoteukuna atun apunkuna karka. Davidka runankunawa pakta yarkashpankuna Yaya Diospa wasinpi yaykurkakuna mikunata maskanankunapa. Chaypi Davidka chay Yaya Diosta rikuchinan-kunapa mesapi churashka pankunata mikurka Yaya Diosrayku rurarishkata.^a Chaymantapas runankunata kurka mikunankunapa. Chay pankunaka mana paykuna mikunankunapachu karka. Yaya Dios kamachirka saserdoteukunalla mikunankunapa. Chasna mikushpanku-napas Yaya Dioska mana uchatashina

rikushpan paykunata mana kastigarkachu. ¿Imaraykuta kankunaka runaynikunata piñarishpa uchatami rurahunkichi nishpa rimahunkichi?

²⁷Chaymanta Jesuska yachachishpalla katirka: Yaya Dios yapa yuyashpan runakunata, chay samana punchata rurarka. Payka mana yapa yuyarinchu samana punchataka, ashwan ñukanchikunata llakichishpan yuyan. Chayrayku munan samananchipa samana punchapi payta yuyarinanchipa.

²⁸Ñuka paypa Kachashkan Runa kashpayni Yaya Dios yachayninta kuwashka kankunata rimanaynipa maykunkunami ali kanahun samana punchapi ruranaykichipa.

Jesuska shuk chakirishka makiyu runata samana punchapi ampirka
(Mt. 12.9-14; Lk. 6.6-11)

3 ¹Kutikashka Jesuska yaykurka shuk tantarina wasipi. Chay wasipi tiyarka shuk chakirishka makiyu runa. ²Chaypina chay chiknik runakuna rikurayarkakuna Jesuska ampinkachu manachu *samana punchapika nishpankuna. Ampishpanka yuyirkakuna rimak rinankunapa apunkunata.

³Chaypina Jesuska llakichishpan nirka chay chakirishka makiyu runata:

Atariy, runakunapa chawpinkunapi shayariy.

⁴Chaymantana nirka chay chiknik *fariseokunata:

Kankunata tapuni, Yaya Diosta kasushpanchika ¿imatata ashwan ruranchima samana punchapika, alitachu, millaypatachu? ¿Alichu kama shuk unkushkata ampinanchipa samana punchapi, manapika sakinchimachu wañunanpa?

Chasna Jesús rimashpan chay runakunata chunlla uyarkakuna. ⁵Chaypina Jesuska chay runakunata piñarishpa

chunlla rikurka. Chay unkushkata mana llakichihushkankunaryku atunta llakirirka. Chaypina chay unkushkata rimarka:

Makikita chutachiy.

Chay runaka makinta chutachishpan ampirishka kiparipurka. ⁶Chaymanta chay fariseokunaka chay wasimanta llukshishpankuna apu *Herodeska katikkunata utkalla rimak rirkakuna Jesuspa rurashkanmanta. Chaypi tantarishpa yuyirkakuna imashna rurashpashi Jesusta wañuchinchima nishpa.

Jesuska Galilea kucha mayanpi achka runakunata ampirka

⁷Chaymanta Jesuska anchurimushpan runankunawa rirka Galilea kucha mayanma. Achka runakuna Galilea allpapi llaktakunamanta payta katirkakuna. ⁸Achka llaktakunapi kawsak runakuna Jesús mana atipaypa sumakunata Yaya Diospa yachayninllawa rurashkankunata yachashpankuna maskak rirkakuna payta. Chay uraypi Judea allpapi llaktakunamanta, chaypilletata kahuk Jerusalén llaktamantapas, Idumea allpamantapas achka runakuna shamurkakuna. Chay Jordán yaku chimpamanta, chay anakpi Tiro llaktamanta, Sidón llaktamantapas achka runakuna rirkakuna Jesusma.

⁹⁻¹⁰Chaypina Jesuska achka unkushkakunata ampispan ashwan achka payta kayllayarkakuna. Tankanakushpa rirkakuna, payta llankashpankuna ampirinankunapa. Runakuna yapa nitiruhushpankuna Jesuska runankunata kamachirka shuk botita apak rinankunapa, chaypi kishpinanpa. ¹¹Manara chay botipi uraykuhushpan achka supay yaykushka runakuna rirkakuna payma. Puntanpi kunkurishpankuna kaparirka kuna:

¹³Kanmi kanki Yaya Diospa Wawan!

¹²Chasna kaparishpankuna Jesuska kamachishpan rimarka:

Chunllayaychi. Ama nima pita rimaychichu ñuka Yaya Diospa Wawan kanaynita.

Chasna rimashpan chunllayarkakuna.

**Jesuska payta katikkunamanta
chunka ishkayta akllarka
(Mt. 10.1-4; Lk. 6.12-16)**

¹³Chaymanta Jesuska urkuma sikashpan tukuy chay achka runakunamanta shukkunallata kayarka paywa pakta rinankunapa. Chaypina kasushpankuna payta katirkakuna.

¹⁴Chay urkupi paktashpankunana Jesuska chay payta katikkunamanta akllarka chunka ishkay runakunata paywa pakta purinankunapa. Chaymantapas paykunata akllarka kachananpa Yaya Diospa shiminta yachachinankunapa. *Apostolnikuna kankichi, kachanayni runakuna nishpa rimarka.

¹⁵Chaymanta paykunata rimarka Yaya Dios yanapashpan supaykunata runakunamanta llukshichinankunapa.

¹⁶Chay chunka ishkay akllashkankunapa shutinkunaka karkakuna: Simón, maykantami Jesuska shutiyachirka Pedro, ninayan rumi. ¹⁷Shukka

*Santiago, shukka karka wawkin Juan, Sebedeopa wawankuna. Kay ishkaykunataka Jesuska shutiyachirka Boanerges, chayka ninayan rayupa wawankuna, sinchita rimak runakuna, tukuy shunkunkunamanta pacha Yaya Diospa munananta utkalla rurak runakuna.

¹⁸Shukka Andrés, shukka Felipe, shukka Bartolomé, shukka *Mateo, shukka Tomás, shukka Alfeopa wawan Santiago, shukka *Tadeo, shukka shuk Simón, maykantami rimapayarkakuna *Selote. Kay Simonka manara Jesusta katik kashpanra ñukanchita kamachik

*romano tukuymanta atun aputa piñarikkunawa tantarishka kapayarka.

¹⁹Shukka Judas Iskariote, maykanmi chaywasha Jesusta apichinan karka.

**Israel runakunata yachachikkuna
rimarkakuna supaykunapa apun
Jesusta kamachihun nishpa
(Mt. 12.22-32; Lk. 11.14-23, 12.10)**

²⁰Chaymanta Jesuska yaykurka shuk wasipi runankunawa pakta. Chaypipas achka runakuna tantarirkakuna. Chayrayku nima mikunata atiparkakunachu. ²¹Chayta yachashpankuna Jesuspa ayllunkunaka rirkakuna payta apishpa pushanankunata yuyarishpankuna. Paykunapura kwintarkakuna muspachari tukushka nishpa.

²²Chaymantapas Moisespa killkashkanta yachachikkunaka Jerusalén llaktamanta shamushpankuna Jesusmanta rimarkakuna: Supaykunapa apun *Beelsébú kamachihun kay runata. Supaykunapa apumpa yachayninwami Jesuska supaykunata kamachin runakunata sakinankunapa nishpa.

²³Chaypina Jesuska chay paymanta mana alita rimahukkunata kayashpan yachachirka: ¿Supaykunapa apukawichumachu aylluntaka? Nima ima uras atipamachuwichunata. ²⁴Makanaku-hushpankunaka llaktapi kawsakpura, chasnaka llampu tukurinahumami.

²⁵Chasnallatata shuk runakuna shuk wasillapi kawsakkuna makanaku-hushpankunaka paykunaka llampumi tukurinahuma. ²⁶Chasnallatatami supaykunapas paykunapura makanaku-hushpankunaka tukurinahumami.

²⁷Rikuychi, shuk sinchi runa alita wakaychan wasinta nima pi shuwananpa imankunata. Shuk runa ashwan sinchi paymanta shamushpanka paymi atipan wasi amuta watashpan imankunata shuwanata. Chasnashinami

supaykunaka kamachinahun shuk wasi amushina runakunata. Nima maykan paykunamanta kichumachu mana ashwan yachayyu kashpanka. Ñukami shamushkani Yaya Diospa yachayninwa runakunata kishpichinayni tukuy supaykunamanta.

²⁸Alita uyawaychi. Yaya Dioska runakunata tukuy uchankunamanta, tukuy payta millaypata rimashkankunamantapas llakichinkami. ²⁹Shuk runa Yaya Diospa Espiritunta chiknishpa millaypata rimashpanka chasna runataka Yaya Dioska manami llakichinkachu nima kishpichinkachu wiñayparayku.

³⁰Chasna Jesuska paykunata rimarka paymanta rimahushkankunaryaku supaykunapa apumi payta kamachihun nishpa.

**Jesuspa maman wawkinkunawa
pakta paywa kwintanayarkakuna**
(Mt. 12.46-50; Lk. 8.19-21)

³¹Jesuska manara tukuchihushpan rimanata, paypa maman, wawkinkunapas paktak shamurkakuna. Achka runakuna kahushkankunaryaku kanchapi kiparishpankuna shuk runata kacharkakuna Jesusta kayak rinanpa. ³²Jesuspa kuchunpi tiyahukkunaka payta rimarkakuna:

Mamayki wawkikikunapas kanchapi chapahunkuna kanwa kwintanankunapa nishpa.

³³Chaypi Jesuska aynirka:

Mana mamaynillatachu kikin wawkinkunallatachu yuyani.

³⁴Chaymanta kuchunpi kahukkunata rikushpan nirka:

Kankunatapas yuyanimi mamayni wawkinikunatashina, Yayayni munashkanta rurahushkaykichirayku.

³⁵Maykanmi ruran Yayayni Diospa munashkanta, paymi kan wawkinishina, paninishina, mamaynishina.

**Jesuska yachachin ali allpapi mana
ali allpapiwichashka
muyukunamanta yuyachishpa**
(Mt. 13.1-23; Lk. 8.4-15)

4 ¹Shuk puncha Jesuska rirkakutikashka yachachinapana runakunata Galilea kucha mayanpi. Chaypi achka runakuna tantarihushpankuna Jesuska shuk boti yakupi kahukpi uraykushpan tiyarirka, chay botimanta paykunata ashwan alita yachachinana. ²Chaymanta Jesuska yachachirka Yayan Diospa shiminta shuk yachachinakunawa.

³Chasna yachachihushkanpi rimarka: Akuychi yuyarishunchi shuk muyukunapi. Shuk puncha shuk runa arus muyuta tarpuksirkakuna. ⁴Chaypina chay tarpuksirkakuna arus muyukunata wicashpa rirkakutikashka yachachinakunawa. Shuk muyukunaka urmarkakuna ñampipi. Chay ñampipi urmashkakunataka pishkukanana mikurkakuna llamputa.

⁵Shuk muyukunaka urmarkakuna llapcha allpa samantasapapi. Shuk ratu tukyarirkakuna chay muyukunaka.

⁶Chawpi puncha yapa intishpan arus wiñahukka wañurirkakuna, mana ankunka yaykunata atipashpan samantapi. ⁷Shuk muyukunaka urmarkakuna kasha kiwa chawpipi. Kashawa pakta wiñahushpan chay kashaka llampu tapashpan wañuchirka chay arus wiñahukta.

⁸Shuk muyukunaka urmarkakuna ali allpapi. Alita wiñashpan sumakta muyuyarka. Shukkunaka muyuyarkakuna kimsa chunka muyukunata. Shukkunaka muyuyarkakuna sokta chunka muyukunata. Shukkunaka muyuyarkakuna shuk pachak muyukunata.

⁹Kay yachachihushkaynita alita uyashpa yachakuychi.

¹⁰Chay achka runakuna kutishkankunawasha Jesuspa kuchunpi kahukku-

naka chay chunka ishkay runankunawa pakta kiparishkakunaka Jesusta tapurkakuna:

¿Imatata yachachinayashkanki ñukanchita chay muyukunamanta rimashkaykiwa?

¹¹Jesuska aynirkas:

Kankunallata Yaya Dios yachachihun nima pi yachashkanta, imashnami paypa ali kamachinanka kay allpapi. Mana payta kasunayak runakunataka mana yapa asirtaypa yachachinakunawa yachachini. ¹²Chay runakuna Yaya Diospa munananta mana ruranayakkunataka yachachini mana yapa asirtaypa yachachinakunallawa. Chasna yachachini ali rurashkaynikunata rikushpankunapas mana yachanankunapa imaraykumi chayta rurani. Paykunata mana alita asirtaypkunata yachachini, yachachishkaynita uyashpankunapas mana asirtanankunapa. Chaymantapas chasna yachachini manana uchankunamanta llakirishpankuna Yaya Diosta kasunankunapa, Yaya Dios paykunata mana llakichinanpa.

¹³Chaymanta Jesuska runankunata rimarka:

¿Shutipachu mana asirtankichi yachachishkaynita? Kay yachachishkaynita mana asirtashpaykichika imashnataya asirtankichima shuk yachachinaynikunataka.

¹⁴Yaya Diospa shiminta yachachik chay muyuta tarpuk runashinami.

¹⁵Shuk runakuna mana asirtakchu kanahun. Paykunaka chay ñampi chakishka allpapi urmashka muyukunashinami kanahun. Yaya Diospa shiminta uyanahun. Chaymanta supay shamushpan chay uyashkan shimita kunkachin.

¹⁶Shuk runakunaka kushilla uyanahun Yaya Diospa shiminta. Paykunaka chay samantasapapi wiñak muyukunashinami kanahun. ¹⁷Mana ukupi ankuyushina

kashpankuna shuk ratullami Yaya Diosta kushilla katinahun. Yaya Diospa shiminta kirishkankunaryku runa masinkunaka paykunata parisichihushpankuna nanayta llakiya musyashpankuna sakinahunna Yaya Diosta katinata.

¹⁸Shuk runakunaka kashasapapi wiñak muyukunashinami kanahun.

¹⁹Yaya Diospa shiminta munashpankunapas paykuna kikin munashkankunallata yuyarishpa kawsanahun. Chaymantapas yapa kullkillata munashpa, tukuy rikushkankunata munarishpa kawsanahun. Chasna chay tukuy yuyarinanakuna kunkachinahun Yaya Diospa shiminta wiñaya.

²⁰Shuk runakunana shunkunkunamanta pacha Yaya Diospa shiminta kasushpa kawsanahun. Paykunaka chay ali allpapi wiñak muyukunashinami kanahun. Chay tarpu alita muyuyashina kashpankunami rikuchinahun ali kawsahushkankunawa Yaya Diosta mana sakishpa alita katihushkankunata. Shukkunaka shuk muyumanta kimsa chunka muyuta muyuyakshinami kanahun, shukkunaka sokta chunkata, shukkunana shuk pachakta.

Jesuska yachachin Yaya Diospa shiminta kasunamanta

(Mt. 13.31-35; Lk. 8.16-18, 13.18-19)

²¹Jesuska paykunata lamparinmanta pas yachachirka: Shuk lamparintaka apichishpa nima pi churamachu kawitu ukupi. Churanchimi kawitu awapi, lamparin tiyachinapi, alita punchaya-chinanpa. ²²Chasnashinami Yaya Diospa shiminta yachachishkaynika puntiru pakallahina kashpanpas runakunaryku mana pakallachu kiparinka. Runakuna puntiru mana asirtashkankunata chaymanta tukuya asirtankakuna. ²³Kay yachachihushkaynita alita uyashpa yachakuychi.

²⁴Chaymanta Jesuska rimarka: Alita uyayichi kay rimanaynita. Shuk parti Yaya Diospa shiminta asirtashpaykichika chay tupullatatum Yaya Dioska kankunata paypa shiminta ashwanta asirtachinka. ²⁵Maykanmi Yaya Diospa shiminta uchillastuta asirtashpan kasushpa kawsan, paytami Yaya Dioska ashwanta asirtachinka. Maykanmi uchillastuta asirtashpantata mana kasushpa kawsanchu, paytami Yaya Dioska kunkachinka tukuyta manana nima imata asirtananpa.

²⁶Chaymantapas Jesuska paykunata rimarka: Yuyariyichi imashnami Yaya Diospa ali kamachinanka kay allpapi. Chakrani muyukunata wicahashpa tarpuk runata rikuychi. ²⁷Chay muyukanata tarpushpanna sakin wiñanampa. Kutishpan wasinma puñukrin, puñushkanmanta atarin. Chasna kawsan masna punchakunata. Payka mana yachanchu imashnami wiñan chay muyuka. ²⁸Allpaka pay kikinlla wiñachin. Puntiru tukyarin tarpuka, chaymanta wiñan, sisan, muyuyan, pukun. ²⁹Ña pukushpan muyunkunaka amunka payrayku pallachin.

³⁰Chaymanta Jesuska rimarka: ¿Ima yachachinawashi ashwanta kankunata asirtachinima imashnami Yaya Diospa ali kamachinanka? ³¹Yuyariyichi imashnami mostasa muyustuka chakrapi tarpushpanchi wiñan. Chay muyustuka tukuymanta ashwan uchillastumi. ³²Chayta tarpunchi. Uchillastumanta wiñashpan tukuy tarpuknamanta ashwan atun tukun. Chaypi pishkukunaka ramankunapi tiyarinahun, wasinstukunata ruranahun.

³³Achka chasna yachachinakunawa Jesuska chay runakunata yachachirk, Yaya Diospa shiminta asirtanata atipashkunkunakamalla. ³⁴Chay achka yachachinakunawa mana kuska asirtaypata

yachachipayarka chay runakunata. Runankunallata tantachishpan tukuy chaykunata alita asirtachipayarka.

Jesuska sinchi wayrata, atun ulastapas kasillayachirk
(Mt. 8.23-27; Lk. 8.22-25)

³⁵Ña tutayahushpanna Jesuska runankunata rimarka:

Akuychi rishunchi kucha chimpama.

³⁶Chay achka runakunata sakimushpankuna paypa runankunaka Jesusta pusharkakuna shuk botipi chimpama. Shuk runakunapas shuk botinkunapi parihi rirkakuna. ³⁷⁻³⁸Ña chimpahushpankuna kunkaymanta sinchi wayraka paykunata apirka. Yapa sinchita wayrahushpan atun ulaska shayarirka. Chay ulaska waktashpan yakuka botipi untarirka. Ña tikrahushpan mancharishpankuna likchachik rirkakuna Jesusta boti sikipi llachapakunapi puñuhukta.

Yachachik, ¿manachu mancharinki ña tikrahushkanchita? ¡Yanapay ñukanchita!

³⁹Atarishpan Jesuska chay wayrata ulastapas rimarka:

¡Kasillayay wayra! ¡Kasillayay ulas!

Chay rimashkanllawa pasarirka wayraka ulaspas, manana ulasyarkanachu. ⁴⁰Chay sinchi wayra ulaspas pasashkanwasha Jesuska runankunata rimarka:

¿Imaraykuta mancharinkichi? ¿Manarachu sinchikunkichi ñukapi?

⁴¹Chasna Jesuska rimashpan runankunaka tapunakurkakuna paykunapura:

¿Pishi kay runaka? Shuk rimashkanllawa wayrata ulastapas kasillayachishka.

**Jesuska shuk supayyashka
runata aliyachirk**
(Mt. 8.28-34; Lk. 8.26-39)

5 ¹Chay atun kuchata chimpashpankuna *Geresa llakta kuchupi paktarkakuna. ²Chaypi paktashpangunka Jesuska sikashpan shuk supayyashka

runa kayllayak shamurka.³ Chay runaka kawsarka urku rumi allarishka uchukukunapi, maypimi wañushkakuna churarishka karkakuna. Chay supayyashka karitaka nima pi atiparkachu apishpa watashpa charinata, nima sinchi kadenawa.⁴ Apishpa makinta chakintapas kadenawa watashpankunapas piti piti rurashpa ripayan. Nima pi atiparkachu winsinata.⁵ PUNCHAPI tutapipas kaparishpa puripayan wañushkakunata churashkankuna rumi allarishka uchukukunapi, urukuna chawpipipas. Pay kikinta rumikunawa waktarishpa puripayan.⁶ Chaypi karumanta Jesusta rihukta rikurka. Payta rikushpan kalparka puntanpi kunkurik rinanpa.

⁷-⁸ Chaypi Jesuska chay runapi kawsak supayta sinchita rimarka:

Millaypa supay, llukshiy kay runamanta.

Chay supayka sinchita kaparishpan aynirka:

Jesús tukuymanta atun yachayyu Yaya Diospa Wawan ñimarakutu ñukama shamushkanki? Tapuni kanta Yaya Diospa uyashkanpi amara kastigawayrachu nishpa.

⁹ Chasna rimashkanwasha Jesuska tapurka:

¿Ima shutita kanki?

Chay supayka aynirka:

Shutinika kanmi Warankakuna, achka kashkanchirayku.

¹⁰ Chaymanta chay supaykunaka Jesusta sinchita tapurkakuna mana paykunata wichunarpa chay Gerasa allpamanta.¹¹ Chay urku kuchupi achka kuchikuna mikuhlla kahurkakuna.

¹² Chay supaykuna runapi kahukkunaka Jesús paykunata wichuhushpan tapurkakuna:

Kachay ñukanchita kuchikunapi kawsananchipa.

¹³ Alimi, yaykuychi kawsanaykichipa nishpa Jesuska rimarka.

Chaypi supaykunaka chay runamanta llukshirkakuna kuchikunapina kawsanankunapa. Chaypina chay ishkay waranka kuchikunaka kunkaymanta waykuma kallpashpa pultyarkakuna lumamanta yakuma. Chaypina chinkarirkakuna wiñaypa chay kuchapi.

¹⁴ Chay kuchita kuyrakkunaka mancharishpa llaktama kallpashpankuna tukuy rikushkankunata chay llaktapi, llakta mayanpipas kawsak runakunata kwintak rirkakuna. Chayta uyashpankuna achka runakuna rikuk rirkakuna urkuma, shutipachu kuchikuna chinkarishkakuna manachu nishpa.¹⁵ Jesús kahushkan urkupi paktashpankuna Jesuspa kuchunpi chay karita tarik rirkakuna, suma churarishka ali yuyaywana tiyahukta, maykanmi achka waranka supaykunawa kawsapayarka. Chay karita ali kahushkanta rikushpankuna mancharirkakuna.¹⁶ Chaypi Jesuspa rurashkanta rikushka runakunaka washa shamuhukkunata kwintarkakuna kasna nishpa:

Jesuska kamachirka supaykunata chay karimanta llukshinankunapa. Chaymanta sakirka supaykunata kuchikunapi yaykunankunapa. Chaypina chay kuchikunaka kay urkumanta yakuma saltashpankuna chinkarishkakuna.

¹⁷ Chasna kwintashkankunata uyashpankuna tukuy runakuna mancharishpankuna Jesusta rimarkakuna chay allpankunamanta llukshinarpa.

¹⁸ Jesuska botipi uraykushpanna chay aliyachishkan runaka payta tapurka:

Ñukapas rinayani kanwa pakta nishpa.

¹⁹ Jesuska mana munashpan chay runata rimarka:

Kutiy wasikima. Aylluyikunata kwintakriy, imashnami Yaya Dioska llakichishpan aliyachishka kanta.

²⁰Chasna rimashpan chay runaka rinka Dekápolis shutiyuma, ninayan chunka llakta. Chaypi paktashpan kwintashpa kwintashpa purirka karan llaktapi Jesuska alita aliyachiwashka supaykunamanta nishpa. Chayta uyashpankuna tukuy chay runakunaka kushikurkakuna, imashnashi chay Jesús tukuymanta atun yachayyuka nishpa.

**Jesuska shuk warmita ampirka,
shuk wawata wañushkanmanta
kawsachirka**
(Mt. 9.18-26; Lk. 8.40-56)

²¹Chaymanta Jesuska runankunawa kutirkakuna botinkunapi chay kucha chimpama. Chaypi paktashpankuna kutikashka achka runakuna Jesuspa kuchunpi tantarirkakuna. ²²Chasna tantarishkankunapi shuk kari Jairo shutiyu paktamurka. Payka chaypi kawsak israel masinchikunapa tantarina wasipi kamachik karka. Jesusta rikushpan puntanpi kunkurik rinka. ²³Chasna kunkurishpan sinchita tapurka:

Yachachik, yanapaway. Warmi wawayni ña wañuhun. Makikiwa llankashpayki ampix ripay mana wañunana.

²⁴Chaypina Jesuska paywa pakta rinka. Chay achka runakuna rihushkanunata rikushpankuna yapa tankanakushpa paykunawa pakta rirkakuna.

²⁵Chay runakuna chawpipi shuk unkushka warmipas rihurka. Chunka ishkay watata tukuy uras yawar paymanta urmapayan. ²⁶Chay warmika ampirinayashpan achka ampiikkunama ripayan. Parisishpa kawsapayan. Tukuy ima tiyapushkanta kushpanpas nima pi atiparkachu payta ampinata. Mana atipashpan ampirinata ashwan yapa unkushka tukurka. ²⁷⁻²⁸Manara Jesusma rihushpan yacharka atun ampix kananta. Chasna yuarishpan payka chay achka

runakunawa pakta rihushpan pakalla Jesuspa washanmanta kayllayarka churarishkanta llankanapta. Churarishkanta llankashpaynillami ampirisha nishpa yuyarirka. ²⁹Chasna llankashkanllapi yawarnin urmahushkaka pitirirka. Payka aychanpi musyarka chay unkuymanta ampirishkanta. ³⁰Jesuspas musyarka shuk runa churarishkanta llankashkanmantalla ampirishkanta. Chasnallapi tikrarishpan tukuy runa katihukkunata rikushpan tapurka:

¿Pita llankawashka? nishpa.

³¹Chaypi paypa runankunaka aynirkakuna:

¿Imaraykutaya tapunki pimi llankawashka nishpa? ¿Manachu rikunki achka nitinakushpa kahushkanchita?

³²Chasna rimashpankunapas Jesuska shukllankama shukllankama rikurka payta llankashkata tarinankama. ³³Chaypi chay warmika yachashpan imashnami ampirishka, yapa mancharishpan chukchurishpa Jesuspa puntanpi kunkurik rinka. Chasna kunkurishpan tukuy payta pasashkanta kasna nishpa rimarka:

Unaymanta pacha unkushka kashkay-nirayku kanta llankashkani ampirinay-nipa. Chasna llankashpaynillami kay unkuymanta ampirishkani.

³⁴Chaypina Jesuska rimarka:

Panini, ñuka kanta ampinaynita yuyarishpa ñukama shamushkaykirayku ñami ampirishka kanki. Kunanka kushillana wasikima kutiy, ñami sumakta ampirishkanki.

³⁵Jesuska chasna rimahushkanllapi chay tantarina wasipi kamachik Jairopa shuk runankunaka wasinmanta shamurkakuna payta rimanankunapa:

Wawaykika ñami wañushka. Ama yankamanta pushaychu kay yachachikta.

³⁶Chasna rimashpankunata Jesuska chay runakunata mana kasushpan chay wawapa yayanta rimarka:

Ama llakinkichu. Ñukallapi sinchikuy.

³⁷Chaymanta Jesuska pay kikinpa runankunata rimarka:

Kankunaka kayllapi kipariyichi.

Kimsa runankunallata, Pedrota,

*Santiagota, Juanta pusharka Jairopa wasinma. ³⁸Chay kamachikpa wasinpi paktak rishpankuna achka runakuna tantarishka kahukkunata rikurakuna, kaparishpa wakahukkunata uyarkakuna. ³⁹Chay wasipi yaykuhushpan Jesuska paykunata rimarka:

¿Imaraykuta chasna kaparishpa wakahunkichi? Kay wawaka manami wañushkachu, puñuhunmi nishpa.

⁴⁰Chasna rimashpan payta asichirkakuna. Chaypi Jesuska tukuy chay wasipi kahukkunata llukshichirka. Chay wawapa yayanwa, mamanwa, chay kimsa runankunallawa chay wañushkaka kwartunpi yaykurka. ⁴¹Chay wawata makinmanta apishpan ñukanchi israel runakunapa shimpipi rimarka:

Talita kumi.

Chayka ninayan warmi wawa, atariy.

⁴²Chasna rimashkanllawa chay chunka ishkay watayu warmi wawaka atarimushpan kallarirka purinata. Runakunaka atunta mancharirkakuna wañushkanmanta atarishkanrayku.

⁴³Tukuy parti kwintanayashpankunapas Jesuska sumakta kunarka mana nima pita kwintanankunapa. Chaymanta chay wawapa yayanta mamantapas rimarka:

Wawaykichita karaychi nishpa.

Nasaret kikin llaktanpi
ayllunkunaka Jesusta mana
kirinayarkakunachu
(Mt. 13.53-58; Lk. 4.16-30)

6 ¹Chaymanta chay Galilea kucha mayanmanta llukshishpan Jesuska kikin llaktanma rirka. Runakunaka payta katirkakuna. ²*Samana puncha paktashpan chaypi kawsak israel

masinchikunapa tantarina wasipi yaykurkakuna. Chaypi Jesuska Yaya Diospa shiminta alita yachachirka.

Chasna yachachihushpan achka runakuna uyashpankuna tapunakurkakuna:

¿Maypishi kay runaka kay suma rimanakunata yachakushka? ¿Imashnashi chasna atun yachayyu tukushka? ¿Imashnashi atipan tukuy chay atun yachaywa ruranakunata ruranata?

³Payta wawamanta pacha riksinci. Payka karpintirumi, Mariapa wawanmi, *Santiagopa, Josepa, Judaspa, Simonpa wawkinmi. Paninkunapas ñukanchiwa kawsanahum nishpa.

Chasna riksishkankunaryku mana munarkakunachu payta kasunata, rikushkankunapi wiñashkanta yuyarishpankuna.

¿Imashnata ñukanchikunamanta yachak kanka? nishpa rimarkakuna.

⁴Chasna yuyarihushkankunata yachashpan Jesuska paykunata rimarka:

Ñawpamanta pacha yaya rukunchikunaka rimapayanahun kasna: Yaya Diospa yachayninwa yachachikta tukuy parti runakuna uyashpankuna alita kasunahun. Kikin llaktanllapi mana munanahunchu kasunata. Payta riksikkuna ayllunkunapas mana payta kasunata munanahunchu. Chasnallata-tami kankunapas ñukata riksiwashpaykichi mana kasunayawankichichu nishpa.

⁵Paykunaka mana kirinayashpankuna Yaya Diospa kachashkan kananta, Jesuska mana atiparkachu paykunata yanapashpa atun yachaywa ruranakunata ruranata. Shuk unkushkakunallata makinta paykunapi churashpan ampirka. ⁶Payka yapa llakirirka mana payta kirishkankunaryku. Chaymanta kuchu llaktakunapi purirka Yayan Diospa shiminta yachachinanpa.

**Jesuska chunka ishkay akllashkan
runankunata kacharka Yaya Diospa
kamachinanmanta
yachachinankunapa
(Mt. 10.5-15; Lk. 9.1-6)**

⁷Shuk puncha Jesuska chay chunka ishkay akllashkan runankunata kayarka ishkay ishkayta kachananpa, Yaya Diospa shiminta yachachinankunapa. Chaymantapas paykunata yachayninta kurka supaykunata runakunamanta llukshichinankunapa. ⁸Paykunata kamachirka:

Ñampita rihushpaykichi nima imata apaychichu, nima bulsaykichita, nima mikunaykichita, nima kullkikichita. Munashpaykichika shuk tulata apaychi urkitarinaykichipa. ⁹Chakikichipi churarishkaykichillawa, shuk churari-nata churarishkaykichillawa riychi. Ama ashwan shuk churarinaykichitaka apankichichu.

¹⁰Chaymantapas paykunata kunarka: Shuk llaktapi paktashpaykichi shuk runa kankunata wasinpi kayashpan chay wasillapi kipariyichi shuk llaktama rinaykichikama. ¹¹Maykan llaktapimi Yaya Diospa shiminta mana uyanayashpankuna nima kankunata wasinkunapi kayanayash-pankuna chasna llaktamantaka llukshiychi. Llukshihushpaykichi rimaychi: Yaya Diosmi kankunataka kastiganka, paypa shiminta mana uyanayashkaykichirayku. Chasna rimaychi yachanankunapa imamantami kastigay tukunkakuna.

¹²Chaymanta chay runankunaka ishkay ishkay rishpankuna yachachirkakuna runakunata mana alita rurahush-kaykichitaka sakiychi Yaya Diostana kasunaykichipa nishpa. ¹³Chaymantapas achka runakunamanta supaykunata llukshichirkakuna, achka unkushkaku-nata aseitewa kakushpa Yaya Diosta mañashpa ampirkakuna.

**Bawtisak Juan wañuta
yuyarirkakuna
(Mt. 14.1-12; Lk. 9.7-9)**

¹⁴Chay llaktakunapi kawsak runakuna tukuy Jesuspa rurahushkankunamanta kwintapayanahun. Chasna chay allpapi kamachik apu *Herodespas paymanta kwintahushkankunata uyarka. Chay runakunaka tapunakurkakuna ¿pishi chay Jesuska? nishpa.

Shukkunaka yanka nirkakuna:
Chay Jesuska Bawtisak Juanchari wañushkanmanta kawsarimushka. Chayraykumi yachayninka tiyan mana atipaypakunata rurananpa.

¹⁵Shukkunaka nirkakuna:
Chay karika ñawpa Yaya Diospa yachayninwa yachachik Eliaschari, maykanmi kuti shamunan karka.

Shukkunaka nirkakuna:
Chay karika ñawpa Yaya Diospa yachayninwa yachachikshinami kan.

¹⁶Chasna rimashkankunata uyashpan chay Herodeska mancharishpan pantachishpa rimarka:

Chay karika Bawtisak Juanmi, maykantami kunkanta pitichishpa wañuchichirkani. Paymi wañushkan-manta kawsarimushka nishpa.

¹⁷⁻²⁰Chasna chay apu Herodeska rimarka, chay Juanta wañuchichish-kanta yuyarishpan. Manarapas Juanta wañuchichishpanra Herodeska wawkin Felipepa warminta apirka warminrayku. Chay warmipa shutinka karka Herodias. Herodeska wawkinpa warminta apishkanrayku Juanka payta kunarka Yaya Dioska mana munanchu kachuy-kiwa chasna kawsanaykipa nishpa. Chasna Juan kunashkanrayku Herodiaska yapa piñarishpan payta chiknishpan wañuchichinayarka. Warminta kasushpan Herodeska makinta chakintapas watachishpan

Juanta karselpi churachirka. Chasna rurashpanpas payta sumakta tapachirka karselpi mana Herodiaska wañuchichinanpa. Pay yachapayarka Juan ali rurak runa kananta, chaymantapas tukuy shunkunmanta pacha Yaya Diosta kasuk kananta. Herodeska Juanta karselpi tapachishpanpas yapa payta uyanayarka. Achka kuti shunkunpi mancharishpanpas paypa kunashkanta uyanayarka.

²¹Shuk puncha Herodeska fiestata rurarka, wawayarishkan puncha paktarishkanrayku. Kayachirka tukuy Galilea allpa llaktakunapi kamachik runankunata, tukuy kapitankunatapas, tukuy kullkiyukunatapas upyanankunapa mikunankunapa paywa pakta.

²²Chay fiestapi Herodiaspa shipas wawanka paykunapa chawpinkunapi sumakta baylarka. Baylahushkanta sumakta gustarkakuna. Apu Herodeska kushikushpan chay shipasta rimarka:

Alita baylashpayki kushichiwashkanki. Chayrayku kanta rimani: Tapuway imatachari munanki, ūukami kushkayki.

²³Imatachari tapuwanki chayta kushkayki. Munashpaykika chawpi kamachihushkayni allpata kushkayki. Tukuy kay runakuna uyahushkankunapi chayta rimani shutipa paktachinaynita nishpa.

²⁴Chaypi chay shipaska llukshishpan mamanta tapuk rirk'a:

¿Imatashi tapuynima? nishpa.

Mamanka aynirka:

Tapuy Bawtisak Juanpa umanta pitishpan kanta kunanpa.

²⁵Utkalla chay shipaska kutishpan Herodesta rimarka:

Kunalla munani Bawtisak Juanpa umanta kuwanaykipa. Shutipa pitichishkaykita rikunaynipa kallanapi churashpayki kuway.

²⁶Chayta uyashpan Herodeska yapa llakirirka. Llakirishpantata tukuy

kayashkankunapa uyashkankunapi rimashkanrayku mana munarkachu llullachinata. ²⁷Chayrayku chay ratulla kacharka shuk runanta Bawtisak Juanpa umanta pitishpan apamunanpa.

²⁸Chasna kachashpan chay runanka rirk'a karselma, maypimi Juanaka taparishka karka. Chaypina kunkanta pitishpan apamurka umanta shuk kallanapi shipasta kunanpa. Payna mamanta kuk rirk'a.

²⁹Chaymanta chay Juanpa runankunaka, yachashpankuna Herodes wañuchichishkanta, Juanpa aychanta apak rirkakuna allarishka urku uchkupi churashpa tapanankunapa.

Jesuska pichka waranka runakunata kararka

(Mt. 14.13-21; Lk. 9.10-17; Jn. 6.1-14)

³⁰Chaymanta chay chunka ishkay Jesuspa *apostolninkunaka kutimushpankuna mushumanta tantarirkakuna Jesuswa. Chasna tantarishpankuna paypa yachayninllawa atipaypukunata rurashkankunata yachachishkankunatas Jesusta kwintarkakuna.

³¹Chasna kwintahushkankunapi achka runakuna paykunapi paktarkakuna. Shukkuna kutihushpankuna shukkunaka paktarkakuna. Jesuska paypa runankunapas mana atiparkakunachu samanata, nima miikunata, achka runakuna shamuhushkankunaryku. Chayta rikushpan Jesuska runakunata rimarka:

Akuychi samak rishunchi maypimi mana runaka tiyanchu chaypi.

³²Chaypina paykunalla botipi rirkakuna chunllama. ³³Achka runakuna rihushkankunata rikurkakuna. Chaypina tukuy llaktakunamanta kallpassha kucha mayanta rishpankuna paykunara puntiru paktarkakuna, maypimi samanapa rihurkakuna.

³⁴Jesuska botimanta llukshihushpan achka runakuna tararishka kahukkunata rikurka. Paykunata rikushpan llakirirka mana nima pi tiyashkanrayku Yaya Diospa shiminta paykunata yachachinanpa. Mana amuyu obehakuna fiampita pantachishpa purihukkunashinami karkakuna. Chasna paykunata llakichishpan achkata Yaya Diosmanta asirtachishpa yachachirkka. ³⁵Ña chishiyahushpan runankunaka Jesusta kayllayashpankuna rimarkakuna:

Ñami chishiyahunchi. Kaypika manami nima shuk runa kawsanchu paymanta mikunata rantinanchipa. ³⁶Kay achka runakunata kachay, kay kuchullapi kahuk llaktakunama rishpankuna mikunankunata rantinankunapa.

³⁷Jesuska aynirka:

Kankuna karaychi kay runakunata. Paykunaka aynirkakuna:
¿Imashnata tarinchima chasna achka mikunata chay tukuy runakunata karananchipaka? Tarishpanchitas munanchimami yapa achka kullkita chay achka runakunaryku mikunata rantinanchipa. Munanchimami shuk runa pusak killata tarawashpan ganashkan kullkita nishpa.

³⁸Jesuska tapurka:

¿Masna panta tiyan kankunapa?
Rikuk riychi yachanaykichipa.
Rikuk rishpankuna aynirkakuna:
Pichka panstu, ishkay challwastullami tian.

³⁹Chaymanta Jesuska rimarka:

Runakunata rimak riychi allpapi tiyarinankunapa shuk muntun shuk muntun.

⁴⁰⁻⁴¹Chasna muntun muntun tiyarishpankuna Jesuska chay pichka panta, chay ishkay challwatapas apishpan siluma rikushpan mañarka:

Yayayni Dios, agradesini kanta kay mikunata kushkaykirayku nishpa.

Chaymanta chay pankunata, challwaku-natapas paki paki rurashpan runankunata kurka chay achka runakunata karanankunapa. ⁴²Tukuy runankunawa pakta saksakta mikurkakuna. ⁴³⁻⁴⁴Chay runakuna mikuhukkuna karkakuna pichka waranka karikuna, mana yupashpa warmikunata wawakunatapas. Mikushkan-kunawasha chunka ishkay tasata untachir-kakuna pan challwawa chapu puchurish-kata.

Jesuska yaku awata purirka

(Mt. 14.22-33; Jn. 6.16-21)

⁴⁵Chaymanta Jesuska runankunata rimarka:

Kankunaka puntapi riychi, ñukaka washami shamusha. Chimpahuychi botipi Betsaida llaktama. Ñukaka kiparishara kay runakunata wasinkunama kachanaynikama.

⁴⁶Ña chay runakunata kachashkanwa-sha shuk urku awama sikarka Yayan Dioswa kwintanarpa.

⁴⁷Ña tutayahushpanna Jesuspa runankunaka kucha chawpipi kahurkakuna, Jesuska sapallan allpapi kiparirka. ⁴⁸Chay kucha chawpipi runankunaka sinchita kawihushpankunata mana atiparkakunachu chimpanata, sinchi wayraka puntankunamanta shamuhushkanrayku. Jesús chasna kahushkunkunata rikushpan ña pakarihushkanpi yaku awata purishpan paykunata kayllayarka. Runankunaka kuskata pasahuktashina rikurkakuna.

⁴⁹⁻⁵⁰Chasna yaku awata purishpa rihukta rikushpankuna yapa mancharirkakuna. Mancharishpankuna kaparirkakuna:

¡Ay! ¿Imataya chayka shamuhun?
Almachari.

Chaypina Jesuska rimarka:

Sinchikuriyichi. Ñukami kani,^b ama manchariychichu.

b Chay Ñukami kani nishkaka kan Yaya Diospa shuk shutin

⁵¹Chaypina Jesuska botinkunapi uraykurka. Chasna uraykuhushkanllapi chay sinchi wayraka pasarirka. Chaypi runankunaka yapa mancharishpankuna rimarkakuna:

¿Imashnataya kay Jesuska wayrata pasachin? nishpa.

⁵²Jesús panta mirachishkanta rikushpankunatata shunkunkunapi manara shutipa yuyarirkakunachu Yaya Diospa Wawan kananta.

Jesuska Genesaret allpapi achka unkushkakunata ampirka
(Mt. 14.34-36)

⁵³Chay kuchata chimpashpankuna Genesaret allpa mayanpi paktarkakuna. Llutarishpankuna botinkunata watarkakuna. ⁵⁴Chaymanta sikahushkankunallapi chaypi kawsak runakunaka Jesusta riksirkakuna. ⁵⁵Chasna payta riksishpankuna karan wasikunapi rimashpa rimashpa kallparkakuna ñami Jesuska paktamushka nishpa. Chaypina kallarirkakuna unkushkakunata llanchamankunapi apamunata, maypimi Jesuska kahurka chayma. ⁵⁶Maypipas Jesús paktashpan uchilla llaktakunapi, atun llaktakunapi, wasikunapi, runakuna tantarina plasakunapipas, chaypi runakunaka unkushkakunata apapayanahun. Chaypina Jesusta tapurkakuna kay unkushkakunata yanapashpa churarishkayki shimillata llankachiy ampirinankunapa nishpa. Chaypina tukuy llankakkunaka ampirirkakuna.

Jesuska yachachin imata rurashpami alicharishka kanchi Yaya Diospa rikushkani
(Mt. 15.1-20)

7 ¹Jesús Genesaret allpa mayanpi kahushpanra *fariseokuna, Jerusalén llaktamanta shamushka shuk

Moisespa killkashkanta yachachikkunapas chaypi tantarirkakuna. ²Paykunaka rikurkakuna Jesuspa shuk runankuna ñukanchi israel runakunapa shuk kamachishkakunata mana kasushkankunata. Paykunaka mana makinkunata suma chuya yakupi mayllarishpachu mikurkakuna. ³Chay fariseokunaka tukuy ñukanchi israel runakunapas manara mikuhushpanchi makinchikunata shuk suma chuya yakupi mayllarinchi, chasna rurashpanchi Yaya Dioska ñukanchita alicharishka kananchita rikun nishpa. Chayta rurapayanchi ñawpa yaya rukunchikuna wañupa rurashkanta achka kamachishkakunata alita katishpa. ⁴Chasnallatata yaya rukunchikuna wañushina merkadumanta shamushpanchi manara mikuhushpanchi suma chuya yakuwa mayllaripayanchi, chasna rurashpanchilla atipanchi Yaya Dioswa kwintanata nishpa. Chaymantapas tiyan achka kamachishkakunaka, maykunkunatami yaya rukunchi wañukunamanta yachakushpanchi kasupayanchi. Shukkuna kanahun imashnami manara mikuhushpanchi suma chuya yakuwa mayllananchi tiyan tukuy pusillunchikunata, mukawakunata, tinahanchikunata, mankanchikunata, irmankanchikunata, tiyarinanchikunatas. ⁵Chasna kashpan chay fariseokunaka, chay Moisespa killkashkanta yachachikkunapas Jesusta tapurkakuna:

¿Imaraykuta runaykikunaka mana katihunkunachu yaya rukunchikuna wañupa rurashkankunata? ¿Imaraykuta makinkunata chuya yakupi mana mayllarishpa mikunahun?

Jesuska aynirka:

Chay Yaya Diospa yachayninwa ñawpa yachachik Isaiaska kasna kankuna llullachiysikunamanta Yaya Diospa rimashkanta killkarka:

Kay runakunaka shiminkunalla-wami yuyawanahun. Manami tukuy shunkunkunamanta pachachu yuyawanahun.
⁷Runakunapa yachachishkankunnallata katishkankunaryakumi yankamanta ñukata mañana wasipi tantarinahun kushichianankunapa nishpa.

⁸Chasnami kankunaka kankichi. Yaya Diospa kamachishkanta sakishpaykichi ñawpa yaya rukuykichikunapa yachachishkankunallata katihunkichi.

⁹Chaymantapas Jesuska rimarka:
 Ñawpa yaya rukuykichikunapa yachachishkankunallata kasuhushpaykichi Yaya Diospa kamachishkantaka mana kasunayankichichu. ¹⁰Moiseska Yaya Diospa kamachishkanta kasna killkarka:

Yayaykichita mamaykichita
 yuyashpa kasushpa kawsaychi.

Chaymantapas killkarka:

Maykanmi yayanta mamanta chiknishpa riman mana ali kanankunata, chasna runataka apukichimi wañuchichinan tiyan nishpa.

¹¹Chasna Yaya Dioska kamachishpan-tata kankunaka chikanta yachachihunkichi. Runakunata rimankichi: Shuk runa mamanta yayanta pishihushpan-tata mana kumachu, Yaya Diosta tukuy kullkinta kushkanranti. Chaymanta mamanta yayanta rimama kankunata kunayni kullkita ñami Yaya Diosrayku kushkani nishpa. Chasna runaka alitami rurahun nishpa rimankichi. ¹²Chasna rimashpaykichimi yachachinkichi wawakuna manana yayankunata yanapanankunapa. ¹³Yaya Diospa kamachishkanta sakinkichi manana ruranaykichi. Chayranti yaya rukuykichikuna wañupa yachachishkunatana yachachinkichi runakuna

chaykunatana kasunankunapa. Chasna-shinami achka Yaya Diospa kamachish-kankunatapas sakishpaykichi chikantana yachachinkichi nishpa Jesuska chay fariseokunata, chay shuk yachachikunatapas rimarka.

¹⁴Chaymanta chay achka runakunata kayashpan Jesuska kutikashka paykunta-na rimarka:

Alita uyawaychi yachakunaykichi. ¹⁵Kankunaka rimankichi: Makinchita chay ñawpa kamachishkankunashina mana mayllashpanchika ña uchata rurahunchi nishpa. Ñukaka kankunata rimani: Makikichita mana mayllashpa mikushpaykichipas mana uchata rurankichichu. Ashwan shunkuykichi-pi mana ali yuyarihuškaykichita rurashpaykichimi shuti uchata rurankichi. ¹⁶Tukuy kay yachachihushkaynita alita uyashpa yachakuychi.

¹⁷Chasna rimashkanwasha Jesuska chay runakunata sakimushpan shuk wasipi yaykurka. Chaypi paypa runankunaka payta tapurkakuna:

¿Ima ninayashkankitaya chay yachachishkaykiwa?

¹⁸⁻¹⁹Jesuska paykunata aynishpan rimarka:

¿Kankunapas manachu asirtashkankichi chay rimashkaynita? Tukuy mikush-kanchika wiksanchima rin. Chaymanta llukshin aychanchimanta. Mana yaykun-chu shunkunchipika yuyayninchita waklichinanpa. Chayrayku mana mayllashpa mikushpaykichipas mana uchata rurankichichu.

Chay rimashkanwami ninayan: Tukuy mikunami ali kan.

²⁰Chaymanta Jesuska rimashpalla katirka: Shunkuykichi kahuk mana ali yuyarishkaykichita rurashpaykichi shuti uchayankichi. ²¹⁻²²Manara millaypata rurahushpaykichira shunkuykichi-pi yuyarinkichi chay millaypata ruranayki-

chipa. Chaymanta tukuy chay millayapa-kunata rurankichi. Chay millaypa ruranakuna kanahun: Shuk warmiyu kari shuk warmiwa musayana, shuk kusayu warmi shuk kariwa musayana, chaymanta tukuywa musayanakuna, shuk runata chiknishpa wañuchina, shuwana, shuk runakunapata munarishpa kawsana, tukuy millayapa-kunata rurashpa kawsana, shukkunata llullachishpa kawsana, munashkanchillata rurashpa kawsana, tukuy rikushkanchita munarishpa kawsana, mana alita yuyarishpa shukkunata washanchashpa kawsana, ñukami kani shuk runakunamanta ashwan alita rurak runa nishpa kawsana, chaymantapas tukuy mana alita yuyarishpa kawsana.²³ Tukuy chasna ruranakunami ucha kanahun. Shunkuykichipi millaypa yuyarishkaykichita rurashpaykichimi tukuy chaykunata rurankichi. Manami uchata rurankichichu, makikichita mana mayllashkaykichirayku.

**Shuk mana israel warmi Jesusta
tapurka yanapananpa
(Mt. 15.21-28)**

²⁴ Chaymanta Jesuska runankunawa pakta kay Israel allpanchimanta llukshishpan Tiro llakta kuchuma rirkakuna. Chaypi paktashpankuna shuk wasipi yaykurkakuna runakuna paktash-kankunata mana yachanankunapa. Chasna rurashpankunapas shuk ratulla tukuy runakuna yacharkakuna Jesuska chay wasipi kahushkanta.²⁵⁻²⁶ Chaypi shuk mana israel warmipas Jesusmanta yacharka. Payka Sirofenisiamanta warmi karka. Chay warmipa shipas wawanpi supay yaykushka karka. Mamanka Jesús chay wasipi kahushkanta yachashpan wasima yaykushpan puntanpi kunkurik rirkka. Chaypi Jesusta tapurka:

Yachachik, wawaynimanta supayta llukshichiy nishpa.

²⁷ Chaypi Jesuska chay warmita rimarka:

Manara chikan runakunata ampiš-paynira israel runa masinikunatara yanapanayni tiyan. Alita yuyariy. Manara allkunchikunata karashpan-chimi puntiru wawanchikunatara karanchi saksanankunapa. Manami paykunata mikunankunata kichunchi-chu allkunchikunata karananchipa.

²⁸ Chaypi chay warmika mana payta sakishpan aynirka:

Ari yachachik, alita rimashkanki puntiru wawanchikuna mikunankuna tiyan nishpa. Chasna kashpanpas wawanchikuna mikuhushpankuna allkunchikuna wicherishkakunata mikunahun. Chikan runakunamanta warmi kashpaynipas kay shipas waway-nita ampipay nishpa.

²⁹ Chaypina Jesuska aynirka:

Alitami rimawashkanki. Chayrayku kunanka wasikima kutiy, ñami waway-kimanta chay supayta llukshishkishkani.

³⁰ Chay warmika wasinma kutishpan shipas wawanta alitana puñunanpi tiyahukta rikuk rirkka, ña chay supayka paymanta llukshishkanrayku.

**Jesusta ampirkra shuk runa mana
uyanata nima rimanata atipakta
(Mt. 15.29-31)**

³¹ Chaymanta chay Tiro llakta kuchumanta llukshishpankuna Jesuska runankunawa Sidón llaktama rirkakuna. Chaymanta Galilea kucha mayanma kutirkakuna, Dekápolis shutiyu allpama.

³² Chaypi paktashpan shuk runakuna shuk runata mana uyanata, nima rimanata atipakta Jesusma aparkakuna. Chaypi Jesusta tapurkakuna makinta churashpa chay runata ampinanpa.³³⁻³⁴ Chaypina Jesuska payta pusharka chay achka

tantarishka runakunamanta kinkrayma. Chaypi atunta samashpan awama rikushpan makinwa chay runata rinkrinpi tupachirka. Llawasanwa makinta ukuchishpan chay runapa kallunpi tupachirka. Chaymanta Jesuska rimarka:

Efata.^c

Chay ninayan paskariy. ³⁵Chasna rimashkanllawa chay mana uyak nima rimanata atipak runapa rinkrinta kalluntapas ampirka. Chaypina chay runaka alina karka, alitana uyarka, alitana rimarka. ³⁶Chaymanta Jesuska chay ampishkanta rikuk runakunata rimarka, nima pita kwintanankunapa chay karita ampishkanmanta. Chasna rimashpantata mana kasushpa ashwanta kwintarkakuna. ³⁷Atunta mancharishpa kushikushpankuna rimarkakuna:

Rikuychi kay Jesuspa rurashkanta tukuy yapa ali kananta. Mana uyak runatapas ampin, mana rimanata atipaktapas rimachin.

**Jesuska chusku waranka
runakunata kararka**
(Mt. 15.32-39)

8 ¹Shuk puncha kutikashka achka runakuna Jesuswa tantarirkakuna. Chaypina mikunankunaka tukurishpan yarkaywa kahurkakuna. Chasna kahushkunkunata rikushpan Jesuska paypa runankunata kayashpan rimarka:

²Llakichini kay runakunata. Ña kimsa punchata katiwahunkuna, mana tiyanchu nima ima mikunankunapa.

³Karu llaktankunamanta shamushkakuna. Chayrayku mana karashpa wasinkunama kachashpaynika yarkaywa sampayashpankuna wañuna-yankakuna ñampita riushkankunapi.

⁴Chaypi runakunaka Jesusta aynirkakuna:

¿Imatata karanchima paykunata kay nima maykan kawsahushkanpika? Kaypika mana kawsanchu nima shuk runa paymanta mikunata rantinanchipa.

⁵Chaypina Jesuska paykunata tapurka:

¿Masna panta tiyan kankunapa?
Paykunaka aynirkakuna:
Kanchis panllami tiyan.

⁶Chaymanta Jesuska rimarka tukuy chay runakunata tiyarinankunapa allpapi. Chaypina chay kanchis pankunata apishpan Yayan Diosta agradesirka. Chasna agradesishkanwasha paki paki rurashpan chay panta runankunata kurka chay achka runakunata karanankunapa. ⁷Chaymantapas masna uchilla challwakunapas tiyarka. Chaytapas Jesuska chasnallatata rurarka. Yayan Diosta agradesishpan runankunata kurka chay achka runakunata karanankunapa. ⁸Chasna karashpankuna tukuy saksakta mikurkakuna. Mikushkunkunawasha pan challwa puchurishkata kanchis tasata untachirkakuna. ⁹Chay achka runakuna mikushkakunaka karkakuna chusku waranka parti. Mikushkunkunawasha Jesuska paykunata rimarka:

Wasikichima kutiichi.

¹⁰Chaymantana paypa runankunawa shuk botipi uraykushpankuna Dalmanuta allpama rirkakuna.

Fariseokunaka Jesusta tapurkakuna

**Yaya Diospa yachayninwa
rurashkanta rikuchinanpa**
(Mt. 16.1-4; Lk. 12.54-56)

¹¹*Fariseokunaka shamushpankuna Jesusta tapurkakuna:

Shutipa Yaya Diospa kachashkan kashpaykika ñukanchirayku ruray Yaya Diospa yachayninwa shuk nima ima uras rikushkanchita.

^c Efata kan arameo shimi. Jesuska arameo shimita rimak karka.

Chasna tapurkakuna yapa runakunata riksichinayashpankuna mana Yaya Diospa kachashkan kananta.¹² Mana chay runakunaka kirinayashpankuna Jesuska llakirishpan atunta samashpan pay kikinlla nirka: ¿Imaraykushi kay runakunaka Yaya Diospa yachayninwa ruranaynita rikunayanahun? Chay tapukkunatana rimarka:

Kankunata rimani, tapuwashpaykichipas Yaya Diospa yachayninwa rurashkaynita rikuchinaynipa, manami rurashanchu.

¹³Chaypina washayamushpan chunlla-lla paykunata sakimurka. Chaymanta runankunawa pakta shuk botipi uraykurka chay kuchata chimpananku-napa.

**Jesuska yachachin fariseokunapa
yachachinankunata mana
kasunankunapa**
(Mt. 16.5-12)

¹⁴Chay runankunaka kuchata chimpan-hushpankuna yuyarirkakuna kunkamushkanchimi pankunata apamuñata. Shuk panllatami apahuñchi nishpa. ¹⁵Chaypina Jesuska sumakta kunashpan yachachirka:

Alita uyawaychi, ama munaychichu *fariseokunapa nima *Herodesta katikkunapa *levadurata.

¹⁶Chasna Jesús levaduramanta rimashpan maykanwami chapushpa panta punkichinchí chay runankunaka rimarkakuna paykunapura:

Mana achka panta apamushkanchiray-kumi chasna ñukanchita rimahun.

¹⁷Jesuska chasna rimahushkankunata yachashpan rimarka:

¿Imaraykuta kankunapura pan mana tiyanchu nihunkichi? Mana chay panta kunkashkaykichimantachu kankunata rimahuni. ¿Manarachu atipankichi asirtanata? ¿Manachu yuyayyu

kankichi? ¹⁸¿Manachu rikushkankichi rurashkaynita? ¿Manachu uyashkankichi yachachishkaynita? ¹⁹¿Manarachu asirtankichi pichka panllawa pichka waranka runakunata karashkaynita? ¿Masna tasatata untachirkankichi puchurishkata?

Paykunaka aynirkakuna:

Chunka ishkay tasatami untachirkanchi.

²⁰Chaymanta Jesuska rimarka:

Kutikashka karashpaynika kanchis panwa chusku waranka runakunata, ¿masna tasatata untachirkankichi puchurishkata?

Paykunaka aynirkakuna:

Kanchis tasatami untachirkanchi.

²¹Chaypi Jesuska rimarka:

¿Manarachu asirtankichi Yaya Diospa yachayninwa kahushkaynita?

**Jesuska ampirka shuk wiskuta
Betsaida llaktapi**

²²Chaymanta Jesuska runankunawa rishpan Betsaida llaktapi paktarkakuna. Chaypi Jesusma pushamurkakuna shuk wisku runata. Jesusta tapurkakuna chay wiskuta llankashpan ampinanpa.

²³Chaypina Jesuska chay wisku runata makinmanta apishpan chay llakta kanchama pusharka. Chaypi llawsanwa makin puntata ukuchishpan chay wiskupa ñawinta llankarka. Chaypina Jesuska tapurka:

¿Atipankichi rikunata? ¿Imakunatata rikunki?

²⁴Chay wiskuka aynirkaka:

Ari, rikunimi runakunata purihukkunata; mana yapa alitachu rikuñuni, kaspikunatashinami rikuñuni.

²⁵Kutikashka ñawinta llankarka. Chay llankashkanllawa chay runaka alina kiparirka. Tukuy imatapas shutillatana rikurka. ²⁶Chaymanta Jesuska chay runata kunashpan wasinma kacharka:

Kuskata wasikima kutiy. Ama kay llakta chawpita pasankichu.

**Pedroka rimarka Jesús Yaya Diospa
Kachashkan Kishpichik kananta
(Mt. 16.13-20; Lk. 9.18-21)**

²⁷Chaymanta Jesuska runankunawa purishpa rirka chay Sesarea Filipo shutiyu llaktama. Chay ñampita riushpankuna Jesuska runankunata tapurka:

Runakuna kwintashpankuna ¿pimi kani ninahuntaya?

²⁸Paykunaka aynirkakuna:

Shukkunaka ninahunmi Bawtisak Juanchari wañushkanmanta kawsarishka kanaykita. Shukkunaka ninahunmi ñawpa Yaya Diospa yachay-ninwa yachachik Eliaschari kanaykita, maykanmi cuti shamunan karka. Shukkunaka ninahunmi shuk ñawpa Yaya Diospa yachayninwa yachachik-chari kawsarishka kanaykita.

²⁹Chaymanta paykunatana tapurka:

¿Kankunaka pimi kani niwankichtaya?

Pedroka aynirkakuna:

Kanmi kanki Yaya Diospa Kachashkan Kishpichik.

³⁰Chaypina Jesuska rimarka:

Ama nima pita rimankichirachu ñuka Yaya Diosmanta shamushkaynita.

**Jesuska wañunanmanta
kawsarimunanmantapas rimarka
(Mt. 16.21-23; Lk. 9.22-27)**

³¹Chaymanta Jesuska paypa runankunata yachachiraka: Ñuka Yaya Diospa Kachashkan Runa yapa parisinayni tiyan. Ñukanchita kamachik israel masinchi rukukuna, *saserdote kunapa apunkunapas, Moisespa killkashkanta yachachikkunapas yapa chikniwashpan-kuna parisichiwanakuna. Chasna chikniwashpankuna wañuchiwanka-

kuna. Wañuchiwashpankunapas kimsa punchamantami kawsarisha.

³²Chay parisinanmanta shutillata Jesuska rimarka nima pakashpa. Chasna uyashpankuna Pedroka Jesusta chaynik-stuma pushashpan rimarka:

Ama chasna rimaychu Yachachik.

³³Chaypina Jesuska tikrarishpan runankunata rikushpan piñashpa Pedrota rimarka:

Anchuriy ñukamanta supaykunapa apunshina rimak. Chasna rimawashpay-kimi mana Yaya Diospa munashkanta-chu rimawahunki, ashwan runapa yuyarinallatami rimawahunki.

³⁴Chaymanta Jesuska runankunata, payta katihuk runakunatapas kayashpan rimarka:

Kankuna ñukata katinyawashpaykichika ama kankuna kikin munashkaykicha ruraychinachu. Kankunata chiknik runakuna piñarishpa wañuchinayahushpankunapas ñukallata katiwaychi.

³⁵Maykanmi wañuya manchashpan sakiwan, chayka manana atipanchu ñukawa wiñaypa kawsanata. Maykanmi mana sakishpa ñukata katiwahushpan chaymantapas Yaya Diospa suma ali shiminta yachachihuushpan chikninata wañuytapas parisin, chayka wiñaypami Yaya Dioswa kawsanka. ³⁶¿Imata valin shuk runa tukuy kay mundupi tiyashkata apinanpa? Tukuy chaykunaka mana yanapanchu wañuymanta kishpinanpa. ³⁷Masna kullkitapas kunayashpaykichika manami atipankichichu rantinata chay wiñaypa Yaya Dioswa kawsanata. ³⁸Shuk kankunamanta kay millaypata rurak, mana kiriwak runakunapa puntanpi

pinkarima ñukata katiwahushkanta rimanata, chaymantapas shiminita yachachinata. Chasna runataka ñuka Yaya Diospa Kachashkan Runapas kay allpama kutikashka shamushpayni

rimasha mana ñukapa kananta. Chay punchaka Yaya Diospa paypa atun yachayninwa tukuy paypa *angelkunawa pakta kutikashka shamusha.

9 ¹Chaymanta Jesuska rimarka:
Alita uyawaychi. Shuk kankunamanta kaypi kahukkunaka manara wañuhushpaykichira rikunkichimi Yaya Dios atun yachayninwa kay allpapi kamachihushkanta.

**Jesuska suma chuyahlla
rikunayu tukurka**
(Mt. 17.1-13; Lk. 9.28-36)

²Sokta punchamanta Jesuska shuk atun urku awama sikarka. Kimsa runankunallata pusharka Pedrota, *Santiagota, Juantapas. Chay urkupi kahushpankuna Jesús chikanyahushkanta rikurakuna.

³Churarishkanka utkumanta yapa yura, mana rikupya suma chuya tukurka.

⁴Chaypina chay kimsa runankunaka rikurakuna chay ñawpa yachachikkuna Eliasta, Moisestapas Jesuswa kwintahukkunata. ⁵⁻⁶Paykunata rikushpankuna yapa mancharirkakuna. Chaypi Pedroka Jesusta rimarka:

Yachachik, alitami kaypi kahunchi. Kunankaaku rurashu kimsa tampukunata, shukta kanrayku, shuktaka Moisesrayku, shuktaka Eliasrayku.

Pedroka yapa mancharishpan chasna rimarka.

⁷Chasnallapi shuk puyuka llantuya-chishpan llantupina kiparirkakuna. Chay puyu chawpimanta Yaya Diospa rimahushkanta uyarkakuna:

Kay Jesusmi munashkayni Wawaynikan. Kasuychi payta.

⁸Shuk ratumanta chay kimsa runankunaka alita rikushpankuna Jesusta sapallantana rikurakuna. Nima Elias, nima Moisés tiyarkanachu.

⁹Chay urkumanta uraykumuhushpankuna Jesuska paykunata kunarka:

Kay urkupi rikushkaykichita ama nima pita kwintankichirachu ñuka Yaya Diospa Kachashkan Runa wañushkaynimanta kawsarinaynikama.

¹⁰Chayrayku paykunaka manara nima pita kwintarkakunarachu. Chasna Jesús wañushkanmanta kutikashka kawsarimunanta rimashkanta uyashpankuna runankunaka mana asirtashpankuna tapunakurkakuna:

¹¹Ima ninayantaya chay rimashkanwa?

¹¹Chaypina Jesusta tapurkakuna:

¹²Imarayutaya Moisespa killkashkanta yachachikkunaka rimanahun, manara chay chapahushkanchi Yaya Diospa Kachanan Kishpichikka shamuhushpanra ñawpa yachachik Eliasrami shamunka nishpa?

¹²⁻¹³Jesuska paykunata aynirka:

Shutipami chay Yaya Diospa yachayninwa ñawpa yachachikka rimarka: Manarapas Yaya Diospa Kachanan Kishpichikka shamuhushpanra shuk ñawpa Yaya Diospa yachayninwa yachachik Eliasshinami shamunka. Tukuy runakunatami yachachinka shunkunkunata alicharinakunapa chay Kishpichiktana kasunankunapa nishpa.

Ñukaka kankunata rimani, ñami shamushka chay Eliasshina yachachikka. Runakuna mana payta riksishpankuna chiknishpa parisichishkakuna. Chasnallatamatí ñukamanta Yaya Diospa ñawpa killkachishkanpi riman: Yaya Diospa Kachanan Runa yapa parisinan tiyan. Runakunaka paytatas mana kasunayashpankuna parisichishpa wañuchinkakuna nishpa.

**Jesuska ampirka
supay yaykushka wawata**
(Mt. 17.14-21; Lk. 9.37-43)

¹⁴Chaymanta Jesuska chay kimsa runankunawa urkumanta uraykumuhushpankuna chay shuk runankuna kahushkankunapi paktak rirkakuna.

Chasna paktashpankuna achka runakuna muyukta kahukkunata tarik rirkakuna. Chaypipas Moisespa killkashkanta shuk yachachikkunaka rimana-kurkakuna Jesuspa runankuna kiparish-kakunawa.¹⁵ Chasnallapi Jesusta rikushpankuna tukuy kallpamurkakuna tinkunankunapa, sumakta payta yuyashpankuna.

Rikuchi Jesús paktamuhukta nishpa rimarkakuna.

Paktashpankuna rimarkakuna:
¿Ñachu shamushkanki Yachachik?

¹⁶ Ñami shamushkani aynishpan Jesuska paykunata tapurka:
¿Imatata runaynikunawa rimanaku-hunkichi?

¹⁷ Shuk runa chaypi kahulka aynirka:
Yachachik, wawaynitami apamushkani. Supay yaykushka kahushpanmi mana atipanchu rimanata.¹⁸ Maypipas kahushpan chay supayka wawaynita apishpan allpama urmachin. Putsku shiminmanta llukshin, kirunkunatapas trak trak kanirin. Lismayachishpan sinchiyarishkana kiparin. Runaykikunata rimashkani chay supayta wawaynima llukshichinankunapa. Manami atipashkakunachu.

¹⁹ Chaypi Jesuska tukuy runakunata rimarka:

Maná ñukapi sinchikuk runakuna, ima uraskamataya kankunawa kiparishpa yachachishkaykichi. Apamuychi chay wawata.

²⁰ Chaymanta chay wawata Jesusma aparkakuna. Chaypina chay supayka Jesusta rikushpan chukchuchishpan chay wawata allpapi urmachirka. Chay wawaka kuchpari kuchpari tukushpan putsku shiminmanta llukshirka.²¹ Chaypina Jesuska chay wawapa yayanta tapurka:

¿Maytukuy unaytata chasna kawsan kay wawaykika?

Yayanka aynirka:

Wawastumanta pachami chasna kawsan.²² Chay supayka wawaynita wañuchinayashpa achka kuti ninapi yakupipas urmachishka. Chayrayku kanta mañani atipashpaykika llakichishpayki amripay.

²³ Chaypi Jesuska aynirka:
¿Imaraykuta ninki atipashpaykika?
Tukuytami atipani ruranata ñukapi sinchikurikraykuka.

²⁴ Chaypina chay wawapa yayanka llakiwaya rimarka:
Nukaka chayra kirihuni kanta.
Chayrayku yanapaway ashwan shunku nimanta pacha kanpi sinchiku-rinaynipa.

²⁵ Jesuska rikushpan yapa achka runakuna tantarihushkankunata, chay mana uyanata nima rimanata atipachik supayta sinchi shimiwa kamachirka:
Millaypa supay, kay wawamanta llukshiy alita uyananpa, alita rimanapan. Ama kuti killachinkinachu kay wawata.

²⁶ Chaypina chay supayka kaparishpan chay wawata kuchpachishpa urmachirka. Chaywasha llukshishpan wañushkatashina sakirka. Chayta rikushpankuna chay runakunaka rimarkakuna:

Ñami wañushka nishpa.

²⁷ Chasnallapi Jesuska makinmanta apishpan chay wawata atarichirka. Chaypina chay wawaka shayarimurka.

²⁸ Chaymanta Jesuska shuk wasipi yaykuk rirka. Chaypi runankunallawa kahushpan payta tapurkakuna:

¿Imaraykutaya mana atipashkanchi-chu ñukanchika chay supayta llukshichinata chay wawamanta?

²⁹ Jesuska aynirka:
Sinchimi kan chasna supaykunata llukshichinapaka. Yaya Diosta kasushpa sumakta mañashpanchirami atipanchi llukshichinata chasna supaykunataka.

**Jesuska kutikashka rimarka
wañunanmanta**
(Mt. 17.22-23; Lk. 9.43-45)

³⁰⁻³¹Jesuska runankunawa chay llaktakunamanta llukshishpan Galilea allpa chawpita rirkakuna. Jesuska mana munarkachu nima pi yachanarpa Galileapi kahushkanta, runankunallata yachachihushkanrayku. Chaypina runankunata rimarka:

Ñuka Yaya Diospa Kachashkan Runa kashpaynipas chikniwak runakunami apichiwashpankuna parisichishpa wañuchiwankakuna. Chasna wañuchiwashpankunapas kimsa punchamantami kawsarisha.

³²Chasna Jesuska alita rimashpantata paypa runankunaka mana asirtarkakanachu. Mana asirtashpankunatata mancharishpankuna mana payta tapurkakunachu.

**Jesuska yachachin maykanmi
tukuymanta ashwan yachayyu kan**
(Mt. 18.1-5; Lk. 9.46-50)

³³⁻³⁴Ñampipi rihushpankuna Jesuspa runankunaka tapunakurkakuna paykunapura: ¿Pishi ashwan yachak kan ñukanchipuramanta? nishpa.

Kapernaum llaktapi paktashpankuna shuk wasipi yaykurkakuna. Ña wasipi kahushpankuna Jesuska paykunata tapurka:

¿Imatataya tapunakushpa shamuhur-kankichi ñampipi?

Chaypina pinkarishpankuna mana aynirkakunachu nima imata. ³⁵Chaymanta Jesuska tiyarishpan chay chunka ishkay runankunata kayarka payta kayllayanankunapa. Kayllayashpankuna rimarka:

Shutipa kankunapuramanta shuk ali kanayashpanka Yaya Diospa rikushkampi, ama munachun kamachik

tukunata, ashwan tukuy runa masinkunata yanapashpalla kawsanan tiyan.

³⁶Chaypina Jesuska shuk wawata makinmanta apishpan chawpinkunapi shayachirka. Chay wawata ukllarishpan runankunata nirka:

³⁷Maykanmi yuyawashpan shuk wawata yuyashpa wasinpi yakyuchin, chayka ñukatami yakyuchiwan. Maykanmi ñukata yakyuchiwan, chayka kachawak Yayayni Diostapas yakyuchinmi.

³⁸Chaypi Juanka nirka:

Yachachik, shuk runata rikushkan-chimi supaykunata llukshichihukta, Jesuspa yachayninwami llukshichini nishpa. Mana ñukanchiwa pakta purik kashpan chay runata kunashkanchi manana chasna rurananpa.

³⁹Chaypina Jesuska nirka:

Ama chasna rimaychichu chay runata. Maykan runami yachayniwa chasna supaykunata llukshichin, chay runaka manami rimankachu mana ali kanaynita. ⁴⁰Maykankunami ñukanchi-kunata mana chikninahunchu, chaykunaka ñukanchita ashwan yanapanahunmi. ⁴¹Maykanmi kankunata yakullatas upyachishpanka ñuka Yaya Diospa Kachashkan Kishpichikta katiwahushkaykichirayku chay runataka Yaya Diosmi chasna rurashkanmanta kushichinka.

**Jesuska yachachin shuk runa
masinta uchata rurachishpan yapa
kastigarishka kananta**
(Mt. 18.6-9; Lk. 17.1-2)

⁴²Ñukaka kankunata rimani: Maykanmi shuk wawa chayra katiwahukta uchata rurachin, paytaka Yaya Diosmi chaymanta ashwan sinchita kastiganka. Ashwan ali kama, kunkanpi atun rumiwa watashpa wichuy tukushpan chawpi yakupi, mana chay wawata uchata rurachinanpa.

⁴³⁻⁴⁴Imapas kanta uchata rurachinayashpanka sakiy. Makiki kanta uchata rurachinayashpanka pitishkashina mana kasushpa sakiy. Mana ishkanti makikiwa chay nina mana wañukma rinaykipa, ashwan alimi kama shuk makiyullashina Yaya Dioswa kawsanaykipa.

⁴⁵⁻⁴⁶Chakiki kanta uchata rurachinayashpanka pitishkashina mana kasushpa sakiy. Mana ishkanti chakikiwa chay nina mana wañukma rinaykipa, ashwan alimi kama shuk chakiyullashina Yaya Dioswa kawsanaykipa.

⁴⁷⁻⁴⁸Chaymanta ñawikiwa imatapas rikushpayki uchata ruranayashpaykika ñawikitá surkushkashina sakiy. Mana ishkanti ñawikiwa chay nina mana wañukma rinaykipa, ashwan ali kama shuk ñawiyullashina Yaya Diospa kamachishkan tukushpa paypa ali kamachihushkanpi kawsanaykipa.

⁴⁹Mana yankachu kankunata rimashkani chay sinchi shimikunata. Imashnami ñukanchi aychata kachiwa alichanchi, ninapi chayachinchí mikunanchipa, alita wakaychananchipapas, chasnashinami Yaya Dioska kankunata ninashina parisinkunawa alichanan tiyan alillata rurashpa kawsanaykic平pana. ⁵⁰Shukwa shukwa yuyanakushpa kawsashpaykichika ali kachiwa kachincharishkashinami kankichi. Shuk ali kachi chamu tukushpan manana nima imarayku valinnachu. Chayrayku kuyrariyichi yuyanakushpa, kushilla, shuk yuyallawa kawsanaykic平pana.

**Jesuska yachachin karika
warminwa, warmipas kusanwa
mana sakinakunankunapa**

(Mt. 19.1-12; Lk. 16.18)

10 ¹Chay Kapernaum llaktamanta llukshishpankuna Jesuska runankunawa Judea allpama rirka. Chaymanta rirkakuna Jordán yaku chimpama. Chaypi paktashpankuna kutikashka achka

runakuna tantarishpankuna Yaya Diospa shiminta yachachirka imashnami yachachipayan. ²Chaypi shuk *fariseokunka Jesusta pantachichinayashpankuna Yaya Diospa shiminmanta chikanta rimananpa nishpa, payta tapurkakuna:

Shuk karika warminta sakishpanka ñalichu kama?

³Payka aynirka:

¿Imatata Moiseska kankunata yachachirka?

⁴Paykunaka aynirkakuna:

Moiseska ñukanchita yachachirkami, shuk karika warminta sakinayashpanka apunkunapa puntanpi shuk sakinakillkata kushpanrami atipama sakinata nishpa.

⁵Jesuska paykunata aynirka:

Kankuna yapa millaypa shunkuyu kashpaykichimi Yaya Diosta mana kasunayashpaykichi Moiseska chasna kamachishkata killkarka. ⁶Puntiru Yaya Dioska siluta, punchata, allpata, tukuy imakunatapas rurahushpan karita warmitapas rurarka. ⁷Ñawpamanta pacha kasnami killkarishka kan:

Yaya Dios karita warmita rurashkan-rayku tukuy kari shuk warmita apishpan yayanta mamanta sakinan tiyan warminwana tantaylla kawsanapan. ⁸Chasna tantanakushpankuna shuk aychashinallana kanahun Yaya Diospa rikushkanpika. Manana ishkaynachu kanahun nishpa.

⁹Chasna Yaya Dios paykunata tantachishkanrayku mana alichu nima karika warminta, warmipas kusanta sakinapan.

¹⁰Wasinkunama kutishpankuna runankunaka Jesusta chay rimashkamanta tapurkakuna:

¿Imatata yachachinayashkanki chay rimashkaykiwa?

¹¹Jesuska aynirka:

Shuk kari warminta sakishpankuna shuk warmitana warmiyashpankuna chasnaka

uchatami ruran.¹² Chasnallatatami shuk warmipas kusanta sakishpan shuk runatana kusayashpanka chasnaka uchatami ruran.

**Jesuska wawakunata
kuyashpan paykunarayku
Yayan Diosta mañarka
(Mt. 19.13-15; Lk. 18.15-17)**

¹³ Chaymanta shuk yayakunaka wawakunata Jesusma apamurkakuna, makinwa llankashpan Yaya Diosta paykunarayku mañananpa. Jesuspa runakunaka rikushpankuna piñarishpa paykunata arkarkakuna mana Jesusta kayllayanankunapa kasna nishpa:

Ama wawaykichikunata Jesusma apamuychichu. Paytami killachinkakuna.

¹⁴⁻¹⁵ Chayta rikushpan Jesuska piñarishpan rimarka:

¿Imaraykuta chasna rimankichi? Ashwan kayaychi wawakunata ñukama shamenakunapa. Ama chay wawakunata arkaychichu. Wawakunashina ñukapi sinchikuk ñukata kiriwak runakunallami Yaya Diospa kamachishkan tukushpa paypa ali kamachihushkanpi kawsankakuna. Alita uyawaychi. Maykanmi mana wawakunashina ñukata yuyawashpa kasawan, chayka manami Yaya Diospa kamachishkan tukushpa paypa ali kamachihushkanpi kawsankachu.

¹⁶ Chasna rimashpan Jesuska wawakunata shukllanka shukllanka kuyashpa markarka. Makinwa llankashpan rimarka Yayan Dios paykunata yanapashpa kushchinanta.

**Shuk kullkiyu runa
Jesuswa kwintarka
(Mt. 19.16-30; Lk. 18.18-30)**

¹⁷ Jesuska runakunawa shuk llaktama rihushpan shuk karika kallpashpa

Jesuspa puntanpi kunkurik shamurka. Chaypi tapurka:

Ali yachachik, rimaway ¿imashna rurashpaynita atipaynima Yaya Dioswa wiñaypa kawsanata?

¹⁸ Jesuska aynirka:

¿Imaraykuta rimawanki ali kanaynita? Mana nima shuk ali runa tiyanchu. Yaya Diosllami ali kan.¹⁹ Kanka ñami yachanki Yaya Diospa kamachishkankunata: Ama runa masikita wañuchiychu. Ama shuk warmiwa musayaychu. Ama shuwaychu. Nima pimanta llullashpa rimaychu. Ama nima pita llullachiychu. Yayaykita mamaykita yuyashpa kasushpa kawsay nishpa.

²⁰ Chaypi chay karika aynirka:

Yachachik, wawamanta pacha tukuy chay Yaya Diospa kamachishkanta kasushpa kawsashkani.

²¹ Chaypina Jesuska payta kuyashpa rikushpan nirka:

Alitami rurashkanki. Ashwan shukta Yaya Dioska munan ruranaykipa. Rantichikriy tukuy imaykikunata. Chay kullkitaka nima imayu runakunata kuy. Chasna rurashpaykimi silipi achka imayushina tukunki. Chasna rurashkaykiwasha shuti katiway.

²² Chasna Jesús rimashpan chay runaka yapa llakirinka. Yapa achka imayu kashpan mana munarkachu tukuy imankunata rantichishpa kunata. Chayrayku llakirishpa wasinma kutirka.

²³ Jesuska washanma rikushpan runakunata rimarka:

Maytukuy sinchita kan kay kullkiyukunaraykuka Yaya Diospa kamachishkankuna tukunankunapa.

²⁴ Chay shimita uyashpankuna runakunaka mancharirkakuna. Chaypi Jesuska kutikashka nirka:

Wawkinikuna, sinchimi kan Yaya Diospa kamachishkan tukunapa.²⁵ Shuk atun wiwa kamilluka manami atipama-

chu pasanata shuk aguhapa uchkun-stuta. Chasnallatami shuk runaka kullkinllapi yuyarishpanka manami atipankachu Yaya Diospa kamachishkan tukushpa paypa ali kamachihushkanpi kawsanata.

²⁶Chasna Jesúis rimashpan runanku-naka ashwanta mancharishpankuna tapunakurkakuna:

Chasna Kashpanka ɔpishi atipanka kishpichiy tukunata Yaya Diospa ali kamachihushkanpi kawsanampa? nishpa.

²⁷Chaypi Jesuska alita rikushpan paykunata nirka:

Nima pi atipanchu kishpichirinata paykinta. Yaya Diosllami atipan runaku-nata kishpichinata paypa ali kamachi-hushkanpi kawsanankunapa. Payllami yachayninwa atipan tukuya ruranata.

²⁸Chaypina Pedroka rimarka:

Ñukanchika sakishkanchimi tukuy ñukanchipa tiyashkanta kanta katinan-chiranti.

²⁹⁻³⁰Jesuska aynirka:

Alita uyawaychi. Shuk runa ñukata katiwahushkanrayku, ñuka kishpichik kanaynita yachachihushkanrayku wasinta, wawkinkunata, paninkunata, turinkunata, ñañankunata, mamanta, yayanta, wawankunata, chakrankunata-pas sakishpanka Yaya Diosmi payta kunka sakishkanmanta ashwan achka wasinkunata, wawkinkunata, paninku-nata, turinkunata, ñañankunata, mamankunata, wawankunata, chakran-kunatapas. Kay allpapi kawsahushpayki-chira chasna kuy tukuna kashpaykichi-pas chayka kankami runakuna kankunata chiknishpa parisichihushkan-kunapi. Chaymanta chay chapahushkay-ki-chi mushu mundupi wiñaypa Yaya Dioswa kawsankichina. ³¹Kunanka shukkuna maykunkunami paykuna kikinkunamanta yuyarinahun,

tukuymanta ashwan ali kanankunata, shuk punchami paykunaka yapa pinkarinkakuna. Shukkunaka maykan-kunkunami runakunapa rikushkanpi mana ali kanankunata rikurinahun, paykuna-taka Yaya Diosmi rimanka yapa ali kanankunata.

**Jesuska kimsayin kuti rimarka
wañunanmanta,
kawsarinamantapas
(Mt. 20.17-19; Lk. 18.31-34)**

³²Jerusalén llaktama rihushpankuna Jesuska runankunata ñawparka. Paykunaka washanlla mancharishpa llakirishpa katirkakuna, Jerusalenpi kawsak runakunaka Jesusta chikninan-kunata yuyarishpankuna. Shuk payta katikkunapas manchaywa katirkakuna. Chaypina Jesuska chay chunka ishkay runankunata chaynikstuma pushashpan rimarka payta wañuchinankunamanta.

³³Kasnami nirka:

Ñami yachankichi Jerusalén llaktama rihushkanchita. Chaypi chiknik runakunaka ñuka Yaya Diospa Kachashkan Runata apiwankakuna *saserdotekunapa apunkunata, Moisespa killkashkanta yachachikkunatapas kuwanankunapa. Chaypina paykunaka tantarishpankuna shuk yuyayllawa ñukata wañuchiwanayan-akuna. Chasna wañuchiwanayashpankuna *romano runakunata kuwankakuna.

³⁴Paykunaka yapa asichiwankakuna, tyukawankakuna, sinchita asutiwankakuna, chaymanta wañuchiwankakuna. Chasna wañuchiwashpankunapas kimsa punchamantami kawsarisha.

**Santiago wawkin Juanwa Jesusta
tapurkakuna yachayninta kunanpa
(Mt. 20.20-28)**

³⁵Chaypi Sebedeopa wawankuna *Santiago Juanpas Jesusta kayllayash-pankuna rimarkakuna:

Yachachik, kanta tapunayanchi
¿atipankimachu ñukanchita yanapanata
shuk imawa?

³⁶Payka aynirka:

Rimawayachi ¿imawata munankichi
yanapanaynita? nishpa.

³⁷Paykunaka tapurkakuna:

Kan tukuy runakunata suma atun
yachaykiwa kamachihushpayki
ñukanchita tiyachiy kuchuykipi
ñukanchipas kanwa pakta parihu
kamachinanchipa nishpa.

³⁸Jesuska aynirka:

Kankunaka mana alita yachashpayki-
chi chayta tapuwahunkichi. Ñukaka
achkatami parisinayni tiyan wañunayni-
kama. Imashnami bawtisarishpanchi
yakuka awanchipi taparik shamun,
chasnashinami parisinakunaka ñukapi
tapakta shamunka wañuhushkaynipi.
¿Atipankichimachu ñukashina awanta-
nata chay tukuy parisinakunata
wañunaykichikama? nishpa.

³⁹Paykunaka aynirkakuna:

Ari, atipashunmi awantanata.

Jesuska rimarka:

Ari, kankunapas ñukashina achkata
parisinaykichi tiyan. ⁴⁰Chasna parisish-
paykichipas ñukaka manami akllashan-
chu pimi kuchuynipi tiyarik kanka
ñukawa pakta atun kamachik kananpa.
Yayayni Diosllami akllanka maykanku-
nami kuchuynipi tiyarik kankakuna
nishpa.

⁴¹Chaymanta chay chunka Jesusta
katik masinkunaka uyashpankuna
Santiago Juanpas paykunamanta pasa
tukunayashkankunata, paykunata yapa
piñarirkakuna.

⁴²Chasna piñarihushkankunata
rikushpan Jesuska tukuy paykunata
kayashpan rimarka:

Kankunaka alita yachankichi, kay
allpapi atun allpakunapi kamachik atun
apukuna kamachinani kawsak runaku-

napa amunkuna kanankunata yuyarina-
hun. Runakunata yapa manchachish-
pankuna sinchita kamachinahun.

Kamachinani kawsak runakunata
mana yuyashpankuna parisichishpa
kasuchinahun kamachik kani nishpa.

⁴³Kankuna Yaya Diospa shiminta
kasukkunaka, ama chasna kanayaychi-
chu. Shukkunamanta pasa kanayashpay-
kichika tukuy runa masikichikunata
yanapashpa kawsaychi. ⁴⁴Kankuna
tukuymanta ashwan yachak kanayash-
paykichika tukuy runa masikichikunata
kasushpa kawsaychi. ⁴⁵Ñuka Yaya
Diospa Kachashkan Runapas kay
allpama shamushpayni mana shamush-
kanichu runakuna sirviwanankunapa.
Ashwan shamushkanimi tukuy runaku-
nata yanapanaynipa. Shamushkanimi
achka runakunaranti wañushpayni
kastigarina kashkankunamanta
kishpichinaynipa.

Jesuska ampirkka shuk wisku

Bartimeo shutiyuta

(Mt. 20.29-34; Lk. 18.35-43)

⁴⁶Chaymanta Jesuska runankunawa,
achka runakunawapas rishpan Jerikó
llaktapi paktak rirkakuna. Chay Jerikó
llaktamanta llukshihushpankuna shuk
wisku runa ñampi mayanpi tiyahurka.
Payka Timeopa wawan, Bartimeo shutiyu
karka. Wisku kashkanrayku pasahukkunata
kullkita tapushpa kapayan. ⁴⁷Achka
runakuna pasahushpankuna kwintahush-
kankunamanta yacharka Nasaretmanta
Jesús chaypi pasahushkanta. Chayta
uyashpan sinchita kaparishpa rimarka:

¡Jesús, Davidpa Miraymanta
Kishpichik, llakichiway!

⁴⁸Chasna sinchita kaparishpan achka
runakunaka killarishpankuna chunlla-
yay nirkakuna.

Chasna nishpankunatata payka
ashwan sinchita kaparirka:

¹Davidpa Miraymanta Kishpichik, llakichiway!

⁴⁹Chaypina Jesuska rihushkanmanta shayarishpan nirka:

Chay runata pushamuychi.

Chaypi chay wisku runata kayashpan-kuna nirkakuna:

Sinchikuy. Atariy. Jesusmi kanta kayahun.

⁵⁰Chay ratulla chay wiskuka awaniru churarinanta allpama wichumushpan utkalla Jesusta kayllayak rirka. ⁵¹Chay-pina Jesuska tapurka:

⁵²Imatata munanki kanrayku ruranay-nipa?

Chay wiskuka aynirka:

Yachachik, ñawinita ampiray atipanaynipa rikunata.

⁵²Chaypina Jesuska aynirka:

Ñukapi sinchikurishkaykiraykumi ampirishkanki. Kunanka riylla.

Chasna rimashkanllawa Bartimeoaka atiparka rikunata. Kushikushpana Jesusta katirka.

Jesuska Jerusalén

llaktapi yaykurka

(Mt. 21.1-11; Lk. 19.28-40;

Jn. 12.12-19)

11 ¹Chaypi Jesuska runankunawa Jerusalén llaktama rihushpan shuk urku Olivos shutiyu mayanpi paktarkakuna. Chay urkuka karka Betfagé, Betania llaktakunapa kuchunpi. Chay Olivos urku mayanpi paktashpan-kuna Jesuska runankunamanta ishkayta kacharka kasna nishpa:

²Chay rikuushkaykichi llaktama riychi. Chaypi paktashpaykichi tarinkichi shuk malta burru watarish-kata, maykanpimi nima shuk runa purishkarachu. Chay malta burruta paskashpaykichi apamuychi. ³Shuk runa

kankunata mitsashpan tapushpanka ⁴imaraykutaya apahunkichi kay burruta? nishpa, payta rimaychi: Yayanchi Jesusmi munahun awanpi tiyarishpa rinanpa. Kunanllatatami kutichik shamushu nishpa rimankichi.

⁴Paykunaka rishpankuna paypa nishkanshina shuk malta burru watarishkata shuk wasi punku mayanpi tarik rirkakuna. Chayta paskarkakuna apanankunapa. ⁵Chasna paskahushpan-kuna chaypi kahuk runakunaka nirkakuna:

⁵Imatata rurahunkichi? ⁶Imaraykuta paskahunkichi chay malta burruta?

⁶Chaypi paykunaka aynirkakuna Jesuspa rimashkantashina. Chayta uyashpankuna chay runakunaka apaychi nirkakuna.

⁷Chaymanta chay malta burruta Jesusma aparkakuna. Chay burru awapi churarinankunata mantarkakuna. Chay awapi Jesuska tiyarishpan rirka. ⁸Achka runakuna payta rikushpankuna kushikushpa churarinankunata puntanpi mantarkakuna. Shukkunaka chipati pankakunata pitishpankuna puntanpi mantarkakuna ñampita sumayachishpa atun aputashina yaykuchinankunapa.

Chay churashkankuna awata Jesuska burrupi tiyashpa rirka. ⁹Chay Jerusalén llaktama rihushpankuna chay Jesuspa puntanpi rihuuk runakuna, washanmanta katik runakunapas yapa kushikushpa kaparirkakuna:

¹⁰Akuychi payta kushichishunchi! Yaya Diospa alita rikushkan yanapashkan runami kan. Yaya Diospa munashkanta rurananpa kachashkan kashpanmi shamuhun. ¹⁰Yaya Diosmi payta yuyashpan yachayninta kushpan kachamushka ñukanchikunata alita kamachinanpa ñawpa yaya rukunchi

atun apu Davidshina. Akuichi kushichi-shunchi awa silipi kawsak Yaya Diosta.

¹¹Chaypi chay achka runakuna kushikushpa kaparishpankuna Jesuska chay Jerusalén llaktapi yaykurka. Chay llaktapi yaykushpan *Yaya Diospa wasinma rirka. Chay wasipi yaykushpan tukuya muyukta rikurka. Chaymanta ña chishiyahushpanna chunka ishkay runankunawa kuchupi kahuk Betania llaktama rirka.

**Jesuspa rimashkanllawa igu
kaspika wañurka**
(Mt. 21.18-19)

¹²Kayantima Jesuska runankunawa chay Betania llaktamanta llukshishpan yarkaywa karka. ¹³Chasna yarkaywa kahushpan karumanta shuk *igu kaspi pankayuta rikurka. Chayta rikushpan alita rikunanpa kayllayarka, pakta muyuyu kahun nishpa. Chaypi paktashpan nima shuk muyuta tarirkachu, mana muyuyanan uraschu karka.

¹⁴Chasna mana muyuyuta rikushpan Jesuska chay igu kaspita nirka:

Nima ima uras kuti muyuyankichu. Nima maykan muyuykita kutikashka mikunkachu.

Chasna Jesuspa rimashkanta tukuy runankunaka uyarkakuna.

**Jesuska rantichik runakunata Yaya
Diospa wasinmanta llukshichirka**
(Mt. 21.12-17; Lk. 19.45-48;
Jn. 2.13-22)

¹⁵Chaymanta Jesuska tukuy runankunawa rishpan Jerusalén llaktapi paktak rirkakuna. Chaypi *Yaya Diospa wasinpi yaykurka. Chay wasipi puntiru atun pampa kincharishkapi achka rantichi-huk runakuna, rantihuk runakunapas karkakuna. Chaymanta tiyarka kullkita kampyakkuna. Tukuy chaykunata rikushpan Jesuska kullkita kampyakkuna-

napa mesankunata, wiwa mukukukunata rantichikkunapa mesankunatapas pultyachi pultyachi rurashpan amunkunata tukuy rantik runakunawa pakta kamachirka llukshinankunapa. ¹⁶Chaymantapas Jesuska manana munarkachu nima pi shuk ima rantichinakunawa chay Yaya Diospa wasinta pitikta pasanankunapa.

¹⁷Chaypina yachachirka kasna nishpa: Yaya Dioska killkachishkanpi riman:

Kay wasinika tukuy llaktakunamanta runakuna ñukata mañianankuna wasinimi kan nishpa.

Kankunaka kay Yaya Diospa wasinta shuwakunapa kushilla tantarinatashina rurashkankichi. [Chasna Jesuska rimashpan paykuna chaypi achkata kobrashpa kullkita kampyahushkankunarayku rantichihushkankunaraykus shuwakunashina kanankunata yuyachirka.]

¹⁸Chayta uyashpankuna *saserdotekunapa apunkuna, Moisespa killkashkanta yachachikkunapas tapunakurkakuna paykunapura:

¿Imashna rurashpashi wañuchinchima kay runata? nishpa. Chay chiknik runakuna payta wañuchinayashpankunata mancharkakuna chasna ruranata, achka runakuna yachachihushkanta yapa munashkankunarayku. ¹⁹Na tutayahushpanna runankunawa chay Jerusalén llaktamanta llukshirka, imashnami tukuy uras rurapayanahun.

**Jesuska yachachin Yaya Diosta
kirishpa tapushpanchimi yanapay
tukunanchita**
(Mt. 21.20-22)

²⁰Kayantima tutamanta kutihushpankuna Jerusalén llaktama, ñampipi chay Jesús rimashkan *igu kaspita rikurkakuna sapinmanta pacha chakirishkata.

²¹Chay igu kaspi mana muyuyuta rikushpan Pedroka Jesuspa rimashkanta yuyarirka. Chaypina Jesusta rimarka:

Yachachik, rikuy kay igu kaspita, maykantami kayna rimarkanki chakirichun nishpa. Kunanka ña chakirishka.

²²Chaypi Jesuska aynirka:

Yaya Diosta kiriychi. ²³Kankunata rimani, tukuy shunkuykichimanta pacha Yaya Diosta kirishpaykichimi kankunapas atipankichima ñukashina ruranata. Kay urkuta rimankichima, kaymanta warankarishpayki atun yakuma chinkariy nishpa. Tukuy shunkuykichimanta pacha Yaya Diosta kirishpa chayta rimashpaykichika kay urkuka warankarimami. Ama yuyariyichchu warankarinkachu manachu nishpa.

²⁴Chayrayku kankunata rimani, imatapas tukuy shunkumanta pacha Yaya Diosta tapushpa ña apishkanimi nishpa kirishpaykichika kuy tukunkichimi. ²⁵⁻²⁶Chaymanta manara Yaya Diosta mañahushpaykichi runa masikichita mana ali rurashkunkunamanta llakichinaykichi tiyan. Shuk runa masiki kanta chiknihushpanpas imatapas kanta buray tukushpaykika manana yuyariyachu. Chasna rurashpaykimi Yaya Diospas kanta uchaykikunamanta llakichinka, manana yuyarinanachu.

Jesuska tapuy tukurka
pimi payta kachashka
(Mt. 21.23-27; Lk. 20.1-8)

²⁷Chaymanta ña Jerusalén llaktama kutishpankuna kuti *Yaya Diospa wasinpi yaykurkakuna. Chay ukupi purihushpankuna *saserdotekunapa apunkuna, Moisespá killkashkanta yachachikkuna, ñukanchita kamachik israel masinchi rukukunapas Jesusta kayllayarkakuna. ²⁸Chaypi payta tapurkakuna:

¿Pita kanta kamachishka chay rantichihuk runakunata wichunaykipa kay Yaya Diospa wasinmanta? ¿Pita kanta kamachishka chasna yachachinaykipa? nishpa.

²⁹Chaypi Jesuska aynirka:

Ñukapas shukta tapushkaykichi. Alita ayniwashpaykichika ñukapas rimashkaykichi pimi kachawashka. ³⁰¿Pitaya Juantaka kacharka bawtisananpa? ¿Yaya Dioschu, pay kikinchu yuyarishpa shamurka? Ayniwaychi.

³¹Chaypi chay runakunaka tapunakurkakuna paykunapura imatami ayninkakuna nishpa. Yaya Diosmi Juantaka kacharka nishpanchika Jesuska ñukanchita rimankami, Yaya Dios payta kachashka kashpanka ¿imaraykutaya payta mana kasushkankichihu? nishpa.

³²Aynishpanchika pay kikinllami yuyarishpa Juanka yachachirka nishpa, tukuy runakuna yapa piñarinkakuna. Paykunaka kirinahun kay Juan wañuka shutipa Yaya Diospa yachayninwa yachachik kashkanta. ³³Chasna tapunkushpankuna Jesusta aynirkakuna:

Mana yachanchichu pimi Juanta kacharka nishpa.

Chaypina Jesuska aynirka:

Chasna kashpanka ñukapas mana rimashkaykichihu pimi kachawashka tukuy kaykunata ruranaynipa nishpa.

Jesuska mana kasunayak
tarawakkunamanta
yuyachishpa yachachin
(Mt. 21.33-46; Lk. 20.9-19)

12 ¹Chaymanta Jesuska tukuy chay runakunata shuk yachachinawa yachachirka kasna nishpa: Tiyarka shuk chakrayu runa. Chay runaka chakrangi uva wiñarishkakunata tarpuchishkanwasha rumikunawa muyukta kinchachirka. Chaymanta shuk atun batanta rurarka chaypi uva muyukunata sarushpa

chawanankunapa. Chaymanta rumikunawa shuk yapa awa wasistuta rurachirka shuk runa awamanta rikushpan chakranta kuyrananpa, mana nima pi chay tarpunpa tuyunkunata shuwananpa. Chaymanta chay amunka uva chakranta shuk tarawak runakunata kurka amunshina pichashpa kuyranakunapa. Chasna kushpan rimarka: Kay uva chakraynita pichashpa kuyrapankichi kutimunaynikama. Pallashpaykichi tukuy tuyunkunamanta chawpita kuwankichi. Chasna rimashpan chay amunka shuk karu llaktama rirkta.

²Na chay uvakunata pallanankuna uras paktarishpan chay amunka shuk runanta kacharka chay chakranpi tarawahukkunata rimak rinanpa patronchimi kachawashka uva tuyukunata pallashkaykichimanta chawpita kuwanaykichipa payrayku apanaynipa nishpa. ³Chay runaka uva tuyuta apanapa rishpan chay tarawakkunaka mana nima shukta kurkakunachu. Makashpankuna shinallata kacharkakuna. ⁴Chaymanta chay patroyninka kuti shuk runantana kacharka uva tuyukunata tapuk rinanpa. Paytapas chasnallatata mana kasushpankuna millaypata rimashpa pinkachirkakuna. Chaymanta umanpi waktashpa yawarsapata kacharkakuna. ⁵Chasna kashpanpas kuti shuk runantana kacharka. Chaytaka wañuchirkakunana. Chaymanta mana sakishpa ashwan runankunata kacharka. Shukkunataka makarkakuna, shukkunataka wañuchirkakunana.

⁶Chaymanta shuklla kiparirka, tukuy shunkunmanta pacha shuklla munashkan kari wawanllana. Chaypina payta kacharka yuyarishpan kay wawaynita shuti manchashpankuna kasunkakuna nishpa. ⁷Payta rikushpankunana chay tarawakkunaka kwintarkakuna

paykunapura: Rikuychi, kay shamuhuk runami chakra amupa wawan. Yayan wañushpan kay chakraka payraykunami kiparinka. Akuychi kunalla wañuchi-shunchi, tukuy kay uva chakraka ñukanchipana kananpa. ⁸Chaypina payta apishpankuna wañuchirkakuna. Wañuchishkankunawashana chakra mayanma wichurkakuna.

Chasna Jesuska payta chiknik runakunata ñawpa Yaya Diospa kachashkan yachachikkunata rurashkankunamanta payta wañuchinankunamantapas uyachishpa yachachirka.

⁹Chaymanta Jesuska nirka: Kunanka yuyariychi. ¿Imanachimashi wañuchik runakunata chay chakra amuka? Kankunata rimani, chay uva chakrama kutishpanka chay tarawakkunata wañuchinkami. Chaywasha chay chakrantaka kunkami shuk runakunata.

¹⁰Chaymanta Jesuska shuk yachachinawa chasnallatata yachachishpalla katirka: ¿Manachu yachakushkankichi alita Yaya Diospa ñawpa killkachishkanta? Kasnami nin:

Shuk runa wasinta rumimanta rurashpan tarawak runankunaka shuk ali sinchi rumita mana munashpankuna mayanpi churarkakuna mana alichu nishpankuna. Chay rumitaka wasinta rurak runaka akllashpan churarka chay wasinpi shuk orkonshina sinchi-kuchik kananpa. ¹¹Chasnallatami Yaya Dioska akllashkan runawa ruranka. Ñukanchika chayta rikushpanchi yapa alimi kan nishpa rimanchi.

¹²Chaypina Jesusta chiknik runakunaka yapa piñarishpankuna kwintarkakuna paykunapura:

Jesuska kay rimahushkanwa rimay tukuhunchi chay runakuna mana

amunta kasunayakkunatashina. Chasnallatatami kay rimahushkanwa rimay tukuhunchi chay ali rumita wichuk runakunatashina nishpa.

Chayrayku piñarishpankuna Jesusta apichinayarkakuna wañuchichinankuna- napa. Chasna ruranayashpankunapas chay achka Jesusta uyak runakunata manchashpankuna Jesusta sakishpanku- nana kutirkakuna.

**Israel runakunapa shuk apunkuna
munarkakuna Jesusta
rimahushkanpi pantachichinata
(Mt. 22.15-22; Lk. 20.20-26)**

¹³Chaymanta ñukanchi israel runaku- napa apunchikunaka Jesusta chiknishpa wañuchichinayashpankuna *fariseoku- nata, apu *Herodesta katikkunatapas Jesusma kacharkakuna payta shuk nima ayniyypata tapunawa pantachichinanku- napa.

¹⁴Chay kachashkan runakunaka Jesuspi paktashpankuna alishina tukushpa nirrkuna:

Yachachik, yachanchi mana llullachishpa shutipa kashkata rimanay- kita. Tukuy runakunata alita yachachinki Yaya Diospa munashkanta rurashpa kawsanankunapa. Kanmi mana manchashpachu nima shuk runata, nima apukunata, tukuyta kuskata yachachinki. Kunanka ñukanchita rimay. ¿Alichu manachu ñukanchi israel runakunaka chay *romano tukuymanta atun aputa *impuestuta pagananchipa? ¿Yaya Dios munanchu pagananchipa manachu? Kutikashka tapuk shamushpankuna ipaganchimachu manachu?

¹⁵Jesuska chay runakuna alishina tukushpa payta apichinayahushkanku- nata riksirka. Ari, pagananchi tiyan nishpa aynimaka, ñukanchi israel runakunamanta apukunata rimak

rinahuma payta kastiganankunapa. Mana alichu pagananchipa nishpa aynimaka, romano apunchita rimak rinahuma payta kastigananpa. Chasna yuyarihushkankunata riksishpan paykunata aynirka:

¿Imaraykuta apichiwanayashpa tapuwankichi? Rikuchiwaychi chay paganaykichi kullkita.

¹⁶Chasna nishpan shuk kullkita payta rikuchirkakuna. Chay kullkita Jesuska rikushpan nirka:

¿Pipa almantata kay kullkipi rikunki- chi? ¿Pipa shutinta kay kullkipi killkarishka kan?

Paykunaka aynirkakuna:

Romano tukuymanta atun apupami.

¹⁷Chasna aynishpankuna Jesuska paykunata rimarka:

Chay atun apupa kashkantaka kuychi amunta. Maykanmi Yaya Diospa kan, kuychi payta. Yaya Dios runakunata rurashkanrayku paykunapa amun kan. Chayrayku tukuy shunkuykichimanta pacha payta yuyashpa kawsaychi.

Chasna yapa yachaywa aynishkanta uyashpankuna chay runakunaka yapa mancharirkakuna.

**Jesuska yachachin wañushkakuna
kawsarinankunata
(Mt. 22.23-33; Lk. 20.27-40)**

¹⁸Chaymanta shuk *saduseokuna Jesuswa kwintak rirkakuna. Paykunaka yachachinahun wañushpanchi manana kawsarishunchinachu nishpa. ¹⁹Chay- rayku Jesusta kayllayashpankuna tapurkakuna:

Yachachik, ñawpa Moisés wañuka ñukanchirayku killkarka: Shuk warmiyu runa manara wawayu wañushpanka wawkinna chay kachuynin mashintuta warmiyanan tiyan atipapanpa wawayan- nata. Chaypina kari wawata wawayash- panka chay wawkin wañupa wawan-

shina kanan tiyan nishpa.²⁰Kunan kanta kwintanayanchi: Tiyarka kanchis wawkikuna. Shuk puncha puntiru wawkika warmiyarka. Manara nima shuk wawayu kashpanra wañurka.

²¹Chaymanta Moisespa killkashkanta kasushpan ishkaynin wawkina kachuy-nin mashintuta warmiyarka. Chay wawkipas chasnallatata nima shuk wawayu wañurka. Chaymanta kimsay-nin wawkina chay kachuynillatata warmiyarka. Paypas chasnallatata nima shuk wawayuchu wañurka. ²²Chay shuk wawkikunapas chay warmillata warmiyarkakuna. Tukuy paykuna nima shuk wawayuchu wañurkakuna. Chaymanta chay warmipas wañurkana. ²³Kunanka ñukanchita rimay. Chay kanchis wawkikuna chay warmillatata warmiyarkakuna. Wañushka runakuna kawsarimunankuna uras chay kanchis wawkikunamanta ¿maykanpa warmin-shi kama?

²⁴Chaypina Jesuska aynirka:
Kankuna kikintami llullachirinkichi, wañushkakuna kawsarinankunata mana kirishkaykichirayku. Yaya Diospa killkachishkanta yachashpaykichitata manami asirtankichichu. Yaya Diostapas mana riksinkichichu, yachayninwa wañushkakunata kawsachikta. ²⁵Wañush-kakunaka kawsarimushpankuna nima shuk kari warmiyankanachu, nima shuk warmi kusayankanachu. Silipi kawsak *angelku-nashinami tukuy kawsankakuna. ²⁶Yaya Dios wañushkakunata kawsachinanta yachakunaykichipa ¿manachu leyishkanki-chi ñawpa Moisespa killkashkanta? Yaya Dios payta shuk uchilla kaspi sintihuk-manta kasna rimarka:

Ñuka kani Yaya Dios, maykantami Abraham, Isaak, Jakob kushichi-wanahun nishpa.

²⁷Chasna Yaya Dios chay uras ña wañushka yaya rukunchikunamanta

rimashpan yachanchi wañushpankuna-pas paywa pakta kawsa kahushkanku-nata. Kawsakunallami Yaya Diosta kushichinahun, wañushkakunaka mana payta kushichinahunchu. Chayrayku kankunata rimani, manana kawsarimu-shunchinachu nishpaykichika llullachi-rishka kankichi.

**Jesuska yachachin maykanmi
ashwan ali Yaya Diospa
kamachishkanka**
(Mt. 22.34-40)

²⁸Chaypi Moisespa killkashkanta shuk yachachik kayllayashpan chay *saduseokuna Jesuswa rimanakuuhush-kankunata uyarka. Jesuspa alita aynihushkanta uyashpan payta tapurka:

¿Maykantaya tukuy Yaya Diospa kamachishkankunamanta ashwan ali kan?

²⁹Jesuska aynirka:

Chay tukuy Yaya Diospa kamachish-kankunamanta ashwan ali kamachish-kanka kan: Alita uyawaychi Yaya Diospa akllashkan runakuna. Yayanchi Dioska shukllami kan. Mana tiyanchu shuk ashwan paymantaka. ³⁰Pay shuklla Yaya Dios kashpan tukuy shunkuyki-manta pacha payta yuyashpa munashpa kawsay. Payta yuyahushpayki alikunata yuyarishpa rurashpa kawsay. Tukuy atipanaykiwa payrayku kawsay nishpa.

³¹Chaymanta chay ishkaynin Yaya Diospa kamachishkanka kasnami nin: Runa masikita yuyay kan kikitashina. Kay ishkaymi tukuy Yaya Diospa kamachishkankunamanta ashwan ali kanahun kasunaykichipa.

³²Chaypi chay runaka aynirka:

Alimi Yachachik. Shutipatami rimash-kanki shuk Yaya Diosllami tiyan, manami ashwan shuk Yaya Dioska tiyanchu nishpa. ³³Chaymanta yachanchi, ñukanchi Yaya Diosta tukuy

shunkunchimanta pacha yuyashpan-chika chaymantapas runa masinchiku-nata ñukanchi kikintashina yuyashpan-chika chasna shuti Yaya Diosta alita kushichinchi. Yaya Diosta runa masinchitapas yuyanaka wiwakunata wañuchishpa rupachinamanta, imatapas Yaya Diosta kuna kashkanchimanta ashwan alimi.

³⁴Chay Moisespa killkashkanta yachachikka chasna alita aynishpan Jesuska rimarka:

Chasna alita yuyarishkaykirayku uchillastu pishin Yaya Diospa kamachishkan tukunaykipa.

Chasna tukuyta alita aynishkanta yuyashpankuna nima maykan munarka-nachu pantachichinayashpa Jesusta tapunata.

**Jesuska yachachin pay tukuy manta
ashwan ali kamachik kananta**
(Mt. 22.41-46; Lk. 20.41-44)

³⁵Chaymanta Jesuska *Yaya Diospa wasinpi chay achka runakuna tantarish-kakunata yachachihushkanpi tapurka:

¿Imashna yuyarishpankunataya Moisespa killkashkanta yachachikku-naka yachachinahun, Yaya Diospa Kachanan Kishpichik atun apu David wañupa miraymanta kananta? ³⁶Yaya Diospa Espíritun chay David wañuta yuyachishpan chay shamunan kishpichikta yuyarishpa rimarka:^e

Yaya Dioska chay kamachiwakta rimarka: Tiyariy kuskayni parti kamachinaykipa ñukawa pakta, tukuy kanta chiknik runaku-nata winsinaynikama kanta kasunankunapana nishpa.

³⁷David kikin Yaya Diospa Kachanan Kishpichikta yuyarishpa kamachiwak nirka. Chay uras ña kawsa paymanta

pasa kashpan David unay wañushkan-washa paypa miraymantallatata kashpan manami atipanchu runalla kanata.

Tukuy chay achka chaypi kahuk runakunaka kushikushpa chay ali yachachihushkanta uyarkakuna.

**Jesuska Moisespa
killkashkanta yachachikkunata
uyachishpa rimarka**
(Mt. 23.1-14; Lk. 11.37-54, 20.45-47)

³⁸Chaymanta Jesuska yachachihush-kanllapi rimarka:

Ama kankunaka chay Moisespa killkash-kanta yachachikkunamanta llullachirishka kaychichu. Paykunaka yapa munanahun tukuy runakuna paykunata aputashina saludanankunapa. Chayrayku suma suni churarishkankunawa purinahun, ñampiku-napi plasakunapi runakuna saludananku-napa. ³⁹Tantarinanchi wasikunapi, mikuna-kunapi pas tukuy manta suma tiyarinaku-napi tiyarinahun, runa masinkuna paykunata aputashina rikunankunapa.

⁴⁰Mana pinkashpa mashintukunata tukuy imankunata llullachishpa tapunahun paykuna kikinrayku, Yaya Diosta kushichi-naykichipa kunaykichi tiyan nishpankuna. Mana ali rurak kashkankunata pakananku-napa tantarinanchi wasikunapi ali rurak runakunashina Yaya Diosta unayta mañianahun. Chasna kashpankuna Yaya Dioska paykunata tukuy runakunamanta ashwan sinchitami kastiganka.

**Shuk mashintu nima imayu tukuy
tiyashkan kullkinta
Yaya Diosta kurka**
(Lk. 21.1-4)

⁴¹Shuk puncha Jesuska chay *Yaya Diospa wasin punkupi tiyahurka. Kuchunpi tiyarka shuk kullkita churana kaha. Chaypi

runakunaka Yaya Diosta kushpa kullkinkunata churahurkakuna. Chaypi Jesuska chay runakuna kullkinkunata churahukkunata rikuhurka. Achka kullkiyu runakuna achka kullkita churahurkakuna.⁴² Chasnapi shuk mashintu nima imayu paktamurka. Paypas chay kahapi ishkay kullkinstuta churarka.

⁴³ Chaypina Jesuska runankunata kayashpan nirka:

Rikuychi. Kay mashintu nima imayuka chay ishkay kullkinstuta churashpan Yaya Diospa rikushkanpi tukuy churahuk runakunamanta ashwantami kushka.

⁴⁴ Tukuy kay achka kullkiyu runakunaka kullkinkuna puchurishkanmantalla kushkakuna. Chay mashintu nima imayuka tukuy tiyapushkanta Yaya Diosta kushka, maykanwami mikunanta rantinan karka. Chayrayku payka Yaya Diosta ashwanta kushichin.

Jesuska rimarka Yaya Diospa wasinta urmachinankunata
(Mt. 24.1-2; Lk. 21.5-6)

13 ¹Chay *Yaya Diospa wasinmanta Jesuska runankunawa llukshishpan shuk runanka nirka:

Yachachik, rikuy kay atun Yaya Diospa wasinta. Imashna suma rumikunawa rurarishkata kan.

² Chaypina Jesuska aynirka:

Ama kay suma atun wasikunata rikushpa kushikuychichu. Kunallapami rikuhunkichi. Kuntraykichikunami tukuy kay wasikunata urmachik shamunkakuna. Nima shuk wasi, nima shuk rumi awapura rurarishkaka kiparinkachu.

Jesuska yachachin manara kay allpaka tukurihushpanra imakunami pasanka
(Mt. 24.3-28; Lk. 21.7-24, 17.22-24)

³ Chaymanta Jesuska runankunawa Olivos urkuma rirkta. Chay urkuka karka *Yaya Diospa wasin chimpapura. Chay

urkupi paktashpankuna tiyarirkakuna. Chaypi Pedro, *Santiago, Juan, Andrés Jesusta kayllayashpankuna pakalla tapurkakuna:

⁴ Yachachik, ¿ima urastaya Yaya Diospa wasinta urmachinkakuna? ¿Imata rikushpanchita yachanchima chay puncha paktarihushkanta?

⁵ Jesuska aynirka:

Kuyrariychi nima pi kankunata llullachinanpa. ⁶ Manara kutimuhush-paynira achka runakunami shamunkakuna, kankunata llullachishpa rimankakuna ūukami kani Yaya Diospa Kachashkan Kishpichik nishpa. Chasna llullashpankunami achka runakunata kirichinkakuna.

⁷ Uyashpaykichika runakuna chikninkushpa kaypi chayma wañunakuhukkunata ama mancharinkichichu. Tukuy chaykunami pasanan tiyan. Wañunakushpa kawsahushpankunapas chay uras kay allpaka manarami tukurinkarachu. ⁸ Shuk shimita rimakkuna shuk shimita rimakkunawa chikninakushpankuna wañunakunkakuna. Shuk allpapi kawsak runakuna shuk allpapi kawsak runakunawa chikninakushpankuna wañunakunkakuna. Tukuy parti allpa kuyuyka tiyanka, chaymantapas sinchi yarkay. Tukuy chaykuna kanka kallarinanlla. Chaywasha ashwan manchaypukunami tiyanka.

⁹ Yuyawa kaychi. Chiknik runankunaka kankunata apishpa pushankakuna apukunama kastigachinankunapa. Tantaraykichi wasikunapi kankunata asutichinkakuna. ūukata katiwashush-kaykichiraykumi chiknik runakunaka kankunata apishpa pushankakuna atun apukunamas. Chasna apirishka tukushpaykichi tukuy paykunata yachachishkaynita riksichinaykichi tiyan. ¹⁰ Manara kay allpa tukurihushpanra tukuy allpukunapi kawsak

runakunata Yaya Diospa suma ali
shiminta runakunata kishpichinanmanta
yachachinaykichi tiyan.

¹¹Chay apukunama kankunata
pushashpankunaka ama mancharinki-
chihu, imatashi rimasha, imashnashi
aynisha nishpa. Yaya Diospa
Espiritunmi kankunata chayllapi
yuyachinka imatami rimanaykichi tiyan.
Paypa yachachishkantami rimanaykichi
tiyan, manami kankuna kikinpa
yuyaykichimantachu rimankichi.

¹²Chay parisina punchakuna chiknik
runakunaka kikin wawkinkunata yanka
llullashpa apukunama pushankakuna
wañuchichinankunapa, chaymantapas
yayakuna wawankunata. Wawakuna
yapa piña tukushpankuna yayankunata
apichinkakuna wañuchichinankunapa.
¹³Tukuy runakuna kankunatapas
chikninkakunami ñukata kasushpa
kawsahushkaykichirayku. Kankunata
chiknishpankunapas wañunaykichi
punchakama ñukata kirishpa kawsash-
paykichika Yaya Diosmi kankunata
chay atun kastigananmanta
kishpichinka paywa pakta silipi
kawsanaykichipa.

¹⁴Yaya Diosta chiknik runaka Yaya
Diospa wasinpi yapa millaypata
rurashkanta rikushpaykichi kay
leyishkaykichi shimita yuyariychi alita
asirtanaykichipa. Chaypina tukuy
kankuna Judea allpa llaktakunapi
kawsakkunaka utkalla urukunama
mitikuychi. ¹⁵Wasi awapi kahushpayki-
chika chaymantalla utkalla mitikuychi.
Ama ukuma uraykuychinachu shuk
imaykichi tiyashkanta apanaykichipa.
¹⁶Chakraykichipi tarawahushpaykichika
chaymantalla mitikuychi. Ama
wasikichima kutiychinachu shuk
churarinaykichita apak rinaykichipa.

¹⁷Chasna mitikuna punchakunapi, yapa
llakiypa kanka chay chichu warmikuna-

rayku, chay llullu wawayu warmikuna-
raykupas. ¹⁸Yaya Diosta mañaychi chay
mitikunaykichi punchakuna mana chiri
tamya punchakuna kananpa. ¹⁹Chay
punchakunapi tukuy runakuna sinchita
parisinkakuna. Yaya Dioska allpata
rurashkanmanta pacha manami chasna
sinchi parisina tiyarkachu. Nima
chaywasha chasna sinchi parisinaku-
naka tiyankanachu. ²⁰Yaya Dioska
tukuy akllashkan runakunata yuyash-
kanrayku chay parisina punchakunata
uchillayachinkami. Mana chasna
uchillayachimaka, nima shuk runa
wañuymanta kishpimachu.

²¹Chaymanta yachachishpalla katirka:
Chay punchakuna shuk runakuna
kankunata rimankakuna rikuychi,
kaypimi chaypimi Yaya Diospa
Kachashkan Kishpichikkka nishpa.
Chasna rimashpankunapas ama kiriychi-
chu. ²²Chay punchakunapi achka
runakuna llullachishpa purinkakuna
ñukami Yaya Diospa Kachashkan
Kishpichik kani nishpa. Shukkunaka
llullachishpa rimankakuna ñukami Yaya
Diospa yachayninwa yachachik kani
nishpa. Paykunaka achka suma mana
atipaypakunata, atun yachaywa
runakuna nima ima uras rikushkanku-
nata rurankakuna tukuy runakunata
llullachinankunapa. Yapa munankakuna
kankuna Yaya Diospa akllashkankunata-
pas pantachichinata. ²³Chayrayku
yuyaywa kaychi. Ña kunanka
kankunata chasna llullachik runakuna
tiyananmanta rimashkani. Chay rimash-
kaynita yuyariychi paktarishpan mana
llullachi y tukunaykichipa.

**Jesuska rimarka imashnami kuti
shamunka kay allpama**

(Mt. 24.29-35, 42, 44; Lk. 21.25-36)

²⁴Chaypi Jesuska runankunata
yachachishpalla katirka kasna nishpa:

Tukuy chay parisina punchakuna tukurishkanwasha intika amsayanka, killapas manana punchayachinkanachu.²⁵ Istrillakunaka silumanta urmankakuna. Tukuy silipi punchayachikkuna sinchita kuyurinkakuna.²⁶ Chaypina tukuy runakunaka ñukata Yaya Diospa Kachashkan Runata rikuwankakuna puyukuna chawpipi Yaya Diospa atun yachayinwa, intishina suma chuyahllapi shamuhushkaynita.²⁷ Chasna shamuhushpaynimi *angelkunata kachasha tukuy kankuna Yaya Diospa akllashkankunata tukuy partimanta tantachinankunapa ñukawana kawsanaykichipa.

²⁸Shuk *igu kasrita rikushpa yachakuychi. Paypa yakunka ramankunapi sikashpan achkata pankayahushpan yachankichi veranoka ña paktari-hushkanta.²⁹ Chasnashinami tukuy kay rimashkaynika paktarihukta rikushpaykichi yachankichi ña shamanalla kahushkaynita.³⁰ Kankunata rimani, kunan kay punchakunapi kawsak runakunaka manara wañuhushpanku-nara tukuy kay rimashkayni paktari-hukta rikunankuna tiyan.³¹ Kay siluka kay allpapas tukurinkakunami. Ashwan tukuy rimashkaynika manami chasnalla pasankachu, shutipami paktarinan tiyan.

³²Ima punchami ima urasmi kutimisha, chaytaka Yaya Diosllami yachan. Nima shuk runa, nima silipi kawsak angelkuna yachanahunchu. Nima ñuka Yaya Diospa kikin Wawan yachanichu ima urasmi kutimusha.³³ Chayrayku yuyaywa kawsaychi, tukuy uras alita Yaya Diosta kasushpa. Manami yachankichihu ima urasmi kutimusha.

³⁴Kasnashinami kanka: Shuk runa rinma shuk karu llaktama. Manara llukshihushpanra tukuy runankunata karan shukta rimama: Kanka kayta

ruranki. Kanka kay shukta ruranki nishpa. Chay wasinta kuyraktana rimama: Alita kuyrapanki kay wasinita kutimunaynikama. Chasna nishpa runankunata sakima.³⁵ Kankunaka chay wasi amupa runankunashinami tukuy uras ali yuyaywa kawsanaykichi tiyan. Mana yachankichichu imashnapimi shamusha, tutayahushkapichu, chawpi tutachu, atallpa kantahushkapichu, pakarinapichu. Mana yachashpaykichi ima urasmi kutimusha, chayrayku tukuy uras rimashkaynita alita kasushpa kawsaychi.³⁶ Kayta kankunata rimani, shamuhushkayni uras mana kankunata tarinaynipa millaypata rurashpa kawsahushkaykichita.³⁷ Kay kankunata rimashkaynika tukuyraykumi kan: Ñukallata kasushpa kawsaychi.

**Israel runakunapa apunkuna
paykunapura kwintarkakuna
Jesusta wañuchinankunapa**

(Mt. 26.1-5; Lk. 22.1-2; Jn. 11.45-53)

14 ¹Karan wata ñukanchi israel runakunaka tantaripayanchi kay *Paskua punchakunapi. Chay punchakunapi yuyaripayanchi ñawpa yaya rukunchikunata Yaya Dios kishpichish-kanta chay Egipto allpamanta. Chay punchakunapi mikupayanchi pan mana punkichirishkata. Chay tantarinayku ishkay puncha pishihushpanra *saserdoten-chikunapa apunkuna, Moisespa killkashkanta yachachikkunapas Jesusta chiknishpankuna munarkakuna llullachishpa apichinata wañuchichinankunapa.² Chasna ruranata munashpankunapas paykunapura rimarkakuna:

Paskua punchakunapi mana wañuchi-chishunchichu kay Jerusalenpi kahuk runakuna mana ñukanchita piñarishpa wañuchinayanankunapa. Chayrayku chay punchakunaka mana paktarihushpanra payta apichishunchi.

Shuk warmi suma mishkinlla asnak perfumita Jesuspi talirka
(Mt. 26.6-13; Jn. 12.1-8)

³Jesuska Betania llaktama rishpan aycha ismuchik unkuy manta ampishkan Simonpa wasinpi yaykurka. Paypa wasinpi mikuhushpankuna shuk warmi yaykurka. Chay warmika yura rumimanta rurarishka butillapi apamurka yapa chaniyu mishkinlla asnak perfumita. Chay butillapa kunkanta pakishpan chay mishkinlla asnak perfumita Jesuspa umanpi talirka.

⁴Chaypina shuk runakuna Jesuswa pakta mikuhukkunaka piñarirkakuna. Paykunapura kwintarkakuna:

¿Imaraykushi kay warmika usuchihun kay mishkihilla asnak perfumita? ⁵Chay perfumita rantichima karka shuk wata tarawashpan kullkita apinan tuputa apima karka, chaywa nima imayu runakuna yanapananpa.

Chasna chay runakunaka piñarishpankuna chay warmita yankamanta mana alita yuarishpankuna rimarkakuna.

⁶Chaypina Jesuska chay piñarihukkunata nirka:

Ama chasna rimaychichu. ¿Imaraykuti piñarishpaykichi kay warmita pinkachihunkichi? Kay perfumita umaynipi talishpan alitami rurashka. ⁷Nima imayu runakunaka tukuy urasmi kankunawa kawsankakuna. Ima uraspas paykunataka yanapaypallami kankichi. Ñukataka manana tukuy uras rikuwan-kichinachu. ⁸Kay warmika tukuy atipashkanta ñukarayku rurashka. Chay suma mishkihilla asnak perfumita aychaynipi talishka, wañushpayni aychaynika alicharishka kananpa urku uchkupi churashpa tapanankunapa.

⁹Alita uyawaychi, tukuy maypipas

runakuna Yaya Diospa suma ali shiminta runakunata kishpichinanmanta yachachishpankuna kay warmipa rurashkanmantapas rimankakuna. Kay warmika yapa yuyawashpan chasna rurashka. Chasna kashpan tukuy runakuna paymantapas alita yuyalinkakuna.

Judaska Jesusta apichirka wañuchinankunapa
(Mt. 26.14-16; Lk. 22.3-6)

¹⁰Chaymanta shuk Jesuspa chunka ishkay runankunamanta Judas Iskariote shutiyuka *saserdotekunapa apunkunata rimanarpa rirkakuna:

Munashpaykichika yanapashkaykichi Jesusta apinaykichipa. ¹¹Chasna Judas rimashpan chay apukunaka kushikushpankuna rimarkakuna:

Jesusta apinanchipa yanapashpaykika kanta ullkita pagashumi.

Chaymanta Judaska kallarirka Jesusta chapanata, imashna rurashpami apichichinka nishpa.

Jesuska runankunawa pakta Paskua punchapi mikurka
(Mt. 26.17-19; Lk. 22.7-23; Jn. 13.21-30; 1Kor. 11.23-26)

¹²Chay *Paskua punchakunapi ñukanchi israel runakunaka mikunchi pan mana punkichishkata. Kallarinan punchapi Yaya Diospa ñawpa rurashkanta yuarishpa wañuchinchi shuk obeha maltakunata, wasinchipi kawsakkunawa pakta mikunanchipa.^f Chaypina runankunaka Jesusta tapurakuna:

¿Maypita munanki alichanapa rinanchipa chaypi obeha maltata kusashpanchi Paskua mikunata mikunanchipa?

¹³Chaypina Jesuska ishkay runankunata akllashpan rimarka:

Chay Jerusalén llaktama riichi. Chaypimi shuk runawa tinkunakunkichi, shuk mankapi yakuta apahukwa. Chay runata katinkichi. ¹⁴Maykan wasipimi yaykun, kankunapas chaypi yaykunkichi. Chaypi wasi amuta rimankichi: Ñukanchita yachachikmi tapun, ¿maypitaya chay kwartuykika alichananchipa tukuy runankunawa chaypi mikuk shamunarpa? ¹⁵Chay wasi amuka rikuchinkami shuk atun kwartuta ishkaynin kawitu awama suma alicharishkata. Chaypi mikunanchipa kusaychi. Chasna rimashpan Jesuska chay ishkay runankunata kacharka.

¹⁶Paykunaka rishpankuna Jerusalén llaktapi paktarkakuna. Chaypi tukuya Jesuspa rimashkantashina tarik rirkakuna. Tukuya alicharkakuna chay Paskua punchakunapi mikunankunapa.

¹⁷Ña tutayahushpanna Jesuska chay chunka ishkay runankunawa chay wasipi paktamurka. ¹⁸Chaypi mesa muyukta siririrkakuna mikunankunapa. Mikuhushkankunapi Jesuska paykunata rimarka:

Alita uyawaychi. Shuk kankunamanta ñukawa pakta mikuhukmi apichiwanka chiknik runakuna wañuchiwanankunapa.

¹⁹Chasna rimashpan runankunaka yapa llakirirkakuna. Chaypina Jesusta shukllankama shukllankama tapurkakuna:

Yachachik ¿pitaya ñukanchimanta chasnaka rurama? ¿Ñukachu apichichishkayki? Mana kaynima ñuka.

²⁰Chaypi Jesuska aynirk'a:

Kankuna chunka ishkaymanta shuk, maykanmi ñukawa parihu kay kallanapi panninta ukuchin, chaymi apichichiwanka. ²¹Imashnami Yaya Dios ñawpamanta pacha killkachirka

ñukamanta, chasnallatatami ñuka Yaya Diospa Kachashkan Runaka wañunayni tiyan. Wañuna kashpaynipas chay apichichiwak runarayku llakirini, yapa parisinan tiyan. Payraykuka ashwan ali kama karka, mana wawayarima karka.

²²Mikuhushpankunara Jesuska shuk panta apishpan Yaya Diosta agradesirka. Chay panta pakishpa pakishpa karan shuk runanta kurka. Chasna kuhushkanpi nirka:

Kay panka aychaynishinami kan. Kay panta mikushipaykichi yuyariychi ñuka wañushpayni kankunata kishpichinay-nita.

²³Chaymanta shuk pusillu *vinuta apishpan Yaya Diosta agradesirka. Agradesishkanwashsha shukllankama shukllankama upyanankunapa kurka.

²⁴Paykunata nirka:

Kay vinuka yawarnishinami kan. Wañushpayni yawarni shuturishpan Yaya Dios achka runakunata uchankunamanta llakichishpan kishpichinka. Chay yawarnini shuturinanwa Yaya Dios runakunarayku paywa alichananta paktachin. ²⁵Alita uyawaychi, ñukaka manami kutikashka kay allpapi kushilla kankunawa tantarishpa kay vinuta upyashanachu. Ña wañushami. Ashwan shuk puncha Yaya Diospa ali kamachinan mushu mundupi shuk mushu vinuta kankunawa upyahukshina tantaylla kushilla kashunchi.

**Jesuska rimarka Pedro payta mana
riksikshina tukunanta**

(Mt. 26.30-35; Lk. 22.31-34;
Jn. 13.36-38)

²⁶Chasna Jesús rimashkanwashsha shuk Salmokunata takirkakuna. Takishkankunawasha Olivos urkuma rirkakuna.

²⁷Chaypi Jesuska rimarka:

Yaya Diospa killkachishkanpi ñukanchikunamantami riman:

Obehankunata kuyrak runata
wañuchisha. Chasna kashpan
tukuy obehankunaka shikwa-
rinkakuna nishpa.

Chay killkachishkanpi rimashkanshina
tukuy kankuna kay tuta kuntrayniku-

nata manchashpaykichi sakiwankichi.
²⁸Wañushkayniwasha Yaya Dios

kawsachiwashpan ñukara kankuna-
manta ñawpashpa Galilea allpama-
risha.

²⁹Chaypina Pedroka nirka:

Tukuy kay katik masinikunaka
mancharishpa kanta sakishpanunapas
ñukaka manami sakishkaykichu.

³⁰Jesuska payta aynirka:

Kanta rimani, kay tuta manarapas
atallpaka ishkay kuti kantahushpanra
kimsa kuti rimanki mana riksiwanay-
kita.

³¹Chaypi Pedroka kuti rimarka:

Shutipa rimani, kanwa parihu
wañunayni kashpanpas kanwa pakta
wañusha, manami rimashanchu kanta
mana riksinyanita nishpa.

Chasnallatata chay shuk runankuna-
pas rimarkakuna.

**Jesuska Getsemaní kinchapi Yayan
Diosta mañarka**
(Mt. 26.36-46; Lk. 22.39-46)

³²Chaymanta rishpankuna olivos tarpu
kincha Getsemaní shutiyipi paktarkakuna.
Chaypi Jesuska runankunata nirka:

Kayllapi tiyarishtpa chapawaychi,
chaynikstupi rishpayni Yaya Diosta
mañanaynikama.

³³Chasna rimashkanwasha Pedrota,
*Santiagota, Juanta, chay kimsallata
chaynikstuma pusharka. Chaypina
Jesuska wañunanta yuyarishpan sinchi
manchay apirka.

³⁴Chay kimsa runankunata nirka:

Wañunaynita yuyarishpayni shunkuy-
nipesi yapa llakirini wañuhushkashina.

Kankunaka kayllapi mañashpa kipariy-
chi, ama puñunkichichu.

³⁵Chasna rimashkanwasha Jesuska
chaynikstuma rirkta. Kunkurishpan
umanka allpapi tupanankama
kumurirka. Chaypi Yayan Diosta
mañarka payrayku ali kashpanka chay
parisishpa wañunananmanta kishpichi-
nanpa. ³⁶Kasna nishpa mañarka:

Yayaynistu, kanka tukuy munashkay-
kita atipanki ruranata. Kanta mañani,
kishpichiway, mana chasna sinchita
parisinaynipa. Chasna tapushpaynipas
ama ñukapa munashkaynita ruraychu,
ashwan kanpa munashkaykillata ruray.

³⁷Chasna Yaya Diosta mañashkanwa-
sha runankunama kutishpan puñuraya-
hukkunata tarik rirkta. Chaypi Pedrota
nirka:

Simón, ¿puñuhunkichu? ¿Manachu
atipashkanki nima shuk urastuta mana
puñushpa mañashpa kanata?

³⁸Tukuy runankunatana nirka:

Mana sampayashpa Yaya Diosta
mañaychi, supay mana kankunata
munachinanpa mana ali munashkayki-
chita ruranaykichi. Kankunaka yapa
munankichi Yaya Diosta mañanata.
Chasna munashpaykichiapas sapallayki-
chika mana atipankichichu, shunkuyki-
chipsi yapa sampayashka kashpaykichi.
Chayrayku Yaya Diosta mañaychi
shunkuykichi sinchikuchinanpa.

³⁹Chasna rimashkanwasha kutikashka
chaynikstuma rishpan chasnallatata Yayan
Diosta mañak rirkta. ⁴⁰Runankunama
kutishpan chasnallatata puñurayahuñku-
nata tarik rirkta, yapa puñuywa kahushkan-
kunarayku. Kutikashka likchachishpan
paykunaka mana yacharkakunachu
imatami ayninkakuna. ⁴¹Kimsayni kuti
chaynikstuma rirkta Yayanta mañananpa.
Kutikashka kutishpan paykunata nirka:

¿Kunankamachu puñuhunkichi? Ña
chayllami. Ñami paktarishka ñuka Yaya

Diospa Kachashkan Runata chay uchasapa runakuna apiwanankunapa.
⁴²Atariyichi, akuychi. Ñami shamuhun chay apichichiwak runaka.

**Chiknik runakuna
Jesusta apirkakuna**
*(Mt. 26.47-56; Lk. 22.47-53;
Jn. 18.2-11)*

⁴³Chasna Jesús rimahushpanra paypa runan Judaska chay kincharishkapi paktamurka. Paywa pakta achka runakuna kaspikunawa, ishkay wiluyu sablikunawa shamurkakuna Jesusta apinankunapa. Paykunaka *saserdote-kunapa apunkunamanta, Moisespa killkashkanta yachachikkunamanta, ñukanchita kamachik israel masinchi rukukunamantapas kamachirishka karkakuna. ⁴⁴Manara paktahushpanku-nara Judaska chay apikkunata rimarka:

Maykan runatami muchasha, chaymi kanka Jesuska. Payta apishpaykichi alita kuyrashpa pushaychi mana kishpinanpa.

⁴⁵Judaska paktashpan Jesusta kayllayashpan rimarka:

Yachachik, shamushkanimi kanta saludanaynipa nishpa payta mucharka.

⁴⁶Chaypina chay achka runakunaka payta apirkakuna pushanankunapa.

⁴⁷Chaypi Jesuspa shuk runan sablinta apishpan saserdote-kunapa atun aputa shuk yanapak runanta sumakta pitishpa wañuchisha nishpa pitihushpan rinkrin-llata pitirka.

⁴⁸Chaypina Jesuska chay apik runaku-nata nirka:

¿Imaraykutaya sablikunawa kaspiku-nawapas shamushkankichi apiwanayki-chipa? ¿Wañuchik shuwa runachu kani?

⁴⁹Tukuy puncha *Yaya Diospa wasinpi kankunawa pakta kahushpayni yachachirkani. ¿Imaraykuta mana chaypi apiwarkankichichu? Yaya Diospa

ñawpa killkachishkanpi ñukamanta riman apiy tukunaynita. Chay killka rimashkanshina shutipa kunanka apiwahunkichi.

⁵⁰Chaypi tukuy runankunaka Jesusta sapallanta sakishpankuna kallpa mitikurakuna.

⁵¹Shuk musullana llatan katarinan-llawa pillurishpa Jesusta katihurka. Paytapas apinayarkakuna. ⁵²Chasna ña apihushkankunapi chay musupas katarinanta sakishpan llatan mitikurka.

**Jesusta pusharkakuna tantaylla
yuyarishpa kamachik israel
apukunama**
*(Mt. 26.57-68; Lk. 22.54, 63-71;
Jn. 18.12-14, 19-24)*

⁵³Chaymantana chay apik runakunaka Jesusta pusharkakuna *saserdote-kunapa atun apuma. Chay atun apuwa tukuy saserdote-kunapa apunkuna, ñukanchita kamachik israel masinchi rukukuna, Moisespa killkashkanta yachachikkunapas tantarishka kahurkakuna. ⁵⁴Pedroka karullapi katishpan washankunalla chay atun apupa wasin pampan kincharish-kapi yaykurka. Chay pampapi *Yaya Diospa wasinta shuk kuyrakkunaka tiyahlla kahurkakuna nina kuchupi kunushpa. Pedropas chaypillatata tiyarik rirka.

⁵⁵Chay wasi ukupi saserdote-kunapa apunkuna, tukuy paykunawa pakta tantaylla yuyarishpa kamachik masinkuna chiknik runakunata maskar-kakuna llullashpa millaypata Jesusmanta rimanankunapa. Yapa munarkakuna payta wañuchichinata. Yapa munashpankunapas nima imata millaypata rurashkanta tarirkakunachu.

⁵⁶Achka runakuna llullashpa millaypata Jesusmanta rimashpankunapas mana tiyarkachu ishkay chasnallata rimakkuna. Karan shuk chikanta

rimashpankuna nima imata tarirkakunachu atipanankunapa payta wañuchichinata.

⁵⁷Chaypina shukkunaka shayarirkakuna llullashpa rimanankunapa:

⁵⁸Ñukanchika uyashkanchimi kay Jesú斯 rimahukta: Ñukaka kay runaku-napa rurashkan Yaya Diospa wasinta urmachisha. Chaymanta kimsa punchapi ñukaka rurasha shukta, mana runakunapa rurashkankunatashinana-chu.

⁵⁹Chasna rimahushpankunapas kutikashka mana parihuchu chasnallata rimarkakuna.

⁶⁰Chaypina chay saserdote kunapa atun apuka chawpinkunapi shayarishpan Jesusta rimarka:

¿Manachu nima imata ayninki?
¿Manachu uyanki kanta uchachishpa rimahushkankunata?

⁶¹Chaypi Jesuska chunlla uyarka, nima imata aynirkachu.

Kutikashka chay apuka tapurka:

¿Kanchu kanki chapahushkanchi Yaya Diospa Kachashkan Kishpichik, paypa kikin Wawan?

⁶²Chaypi Jesuska aynirka:

Ñukami kani.^g Chasna kashpan ñuka Yaya Diospa Kachashkan Runata rikuwankichi tukuya atipak Yaya Diospa kuskan partipi tiyahushkaynita, paywa pakta kamachinaynipa. Chaymanta rikuwankichi puyu chawpipi kutikashka shamuhushkaynita.

⁶³Chasna Jesuspa rimashkanta uyashpan chay atun apuka yapa piñarishpan pay kikinpa kamisan awapi churarishkanta likishpan nirka:

Manana munanchinachu ashwan shuk payta uchachikta. ⁶⁴Uyashkanchi kay runaka Yaya Dioswa parihuyashpa

rimashkanta. Chasna rimashpanmi Yaya Diosta yapa piñachihun. ¿Imatata yuyarinkichi?

Chaypina tukuy rimarkakuna:
Uchayumi, wañunan tiyan nishpa.

⁶⁵Chayllapi shukkunaka Jesusta chiknishpankuna uyanpi tyukarkakuna. Shukkunaka Jesuspa ñawinta tapashpankuna uyanpi sakmarkakuna. Chasna sakmahushpankuna asichishpa tapurkakuna:

Kunanka rimay, shutipa Yaya Diospa Wawan kashpaykika ¿pita kanta sakmashka? nishpa.

Payta kuyrakkunatana kushpankuna paykunapas Jesusta waktarkakuna.

Pedro Jesusta mana riksinichu nishpa rimarka

(Mt. 26.69-75; Lk. 22.56-62;
Jn. 18.15-18, 25-27)

⁶⁶Pedroka *saserdote kunapa atun apupa wasin pampapi kahurka. Chasnapi atun aputa shuk yanapak warmi shamurka. ⁶⁷Pedrota nina kuchupi tiyahukta rikushpan chay warmika payta kayllayashpan nirka:

Kanpas chay Nasaretmanta Jesuswa pakta purihurkanki.

⁶⁸Pedroka aynirka:

Manami riksinichu chay runataka. Nima yachanichu pimantami rimawahunki.

Chasna nishpan Pedroka llukshirkha chay pampamanta punkuma. Chasnallapi shuk atallpaka kantarka.

⁶⁹Chay warmika kutikashka Pedrota rikushpan rimarka chaypi kahulkkunata:

Kay runapas Jesuswa purikmi karka.

⁷⁰Chaypi Pedroka kutikashka aynirka:
Shutipami kankunata rimani, manami riksinichu chay runata nishpa.

Astalla unaystupi chaypi kahukkunaka Pedrota kutikashka nirkakuna:

^g Chay Ñukami kani nishkaka kan Yaya Diospa shuk shutin.

Shutipami kanpas Jesuswa purik kanki, Galileamanta runashina rimahuskaykirayku.

⁷¹Chaypina Pedroka sinchita nirka:

Yaya Dios kastigawachun mana shutipata rimashpaynika. Shutipami rimani kankunata, ñukaka manami riksinichu chay runatata.

⁷²Chasnallapi kutikashka atallpaka kantarka. Chaypi Pedroka yuyarirka Jesuspa rimashkanta manara ishkay kuti atallpaka kantahushpanra kimsa kuti rimanki mana riksiwanaykita nishpa. Chayta yuyarishpan Pedroka yapa llakirishpan sinchita wakarka.

**Jesusta romano apu
Pilatoma pusharkakuna**
(Mt. 27.1-2, 11-14; Lk. 23.1-5;
Jn. 18.28-38)

15 ¹Chaymanta tutamantastulla *saserdotekunapa apunkuna, ñukanchita kamachik israel masinchi rukukuna, Moisespa killkashkanta yachachikkuna, tukuy paykunawa pakta tantaylla yuyarishpa kamachik masinkunapas shuk yuyayllawa karkakuna. Chaypina Jesusta watashpa pushashpankuna chay *romano apunchi *Pilatotana kurkakuna.

²Chaypi Pilatoka Jesusta tapurka:

¿Shutipachu israel masikunapa Atun Apu kanki?

Jesuska aynirka:

Ari, shutipami rimanki.

³Chay saserdotekunapa apunkunaka yapa Jesusta wañuchichinayashpankuna Pilatota yankana rimarkakuna achkata Jesusta uchachishpa. ⁴Chaypi Pilatoka kutikashka Jesusta nirka:

Kay runakunaka kanta yapa uchachishpa rimahunkuna ¿manachu ayninkima?

⁵Jesuska nima imata aynirkachu. Chaypina Pilatoka yuyarirka ¿imarayku-

shi mana shuk apirishka runashina ayninchu kishpinanpa? nishpa. Mana yacharkachu imatami ruranka.

**Jerusalenpi tantarishka runakuna
Jesusta kruspi klabashpa
wañuchichinata munarkakuna**
(Mt. 27.15-31; Lk. 23.13-25;
Jn. 18.38-19.16)

⁶Karan wata chay *Paskua punchakuna *Pilatoka kacharipayarka shuk karselpi kahuk runata. Ñukanchi israel runakunata tapupayarka pitami kacharinka nishpa. ⁷Chay karselpi achka *romano runakunata piñarishpa wañuchik runakuna karkakuna. Shuk paykunamanta karka Barrabás.

⁸Chaypina Jerusalenpi chay achka tantarishka kahuk runakunaka Pilatoma rirkakuna tapunankunapa:

Imashnami karun wata kacharinki shuk runa karselpi kahukta, chasnallata kunanpas shukta kachariy.

⁹⁻¹⁰Pilatoka yacharka chay *saserdotekunapa apunkuna Jesusta chiknishpankuna yankamanta wañuchichinayashkunkunata. Paykuna yapa munashkakuna runakuna paykunallata kasunankunapa. Chayrayku chay apukunata tapurka:

¿Manachu munankichi kacharinaynipa kay Jesusta, kankuna israel runakunapa Atun Apuykichi nishkunkunata?

¹¹Chaypina chay saserdotekunapa apunkunaka chay achka runakunata yuyachishpa rimarkakuna:

Pilatota rimaychi Barrabasta kacharipanipa.

Chay runakunaka kasushpankunana kaparirkakuna:

¡Barrabasta kachariy!

¹²Pilatoka kutikashka tapurka chay achka runakunata:

¿Imatata munankichi ruranaynipa kay runata, maykantami ñukanchi israel runakunapa apunchi nishpa rimankichi?

¹³Paykunaka sinchita kaparishpa aynirkakuna:

¡Kruspi klabashpa wañuchichiy!

¹⁴Pilatoka aynirkakuna:

¿Ima millaypatataya rurashka?

Chaypi paykunaka kutikashka ashwan sinchita kaparirkakuna:

¡Kruspi klabashpa wañuchichiy!

¹⁵Chaypina Pilatoka Barrabasta kacharirka, mana chay runakunaka payta piñarinankunapa. Jesustana kirukunawa rurarishka karawa asutichirka. Chaywasha suntalunkunata kurka kruspi klabashpa wañuchinankunapa.

¹⁶Chaymanta chay suntalukunaka Jesusta pusharkakuna Pilatopa atun kamachinan wasima. Chay wasi chawpipi pampa tiyashkapi tukuy suntalu masinkunata tantachirkakuna Jesusta asichinankunapa. ¹⁷⁻¹⁸Payta shuk puka llachapa atun apupa churarinantashina churachirkakuna. Umanpi churarkakuna atun apupa tawasampatashina kashamanta rurarishkata. Chasna churashpangkuna payta shuk atun aputashina saludashpa asichirkakuna:

¿Shamushkankichu israel runakunapa atun apu? nishpa.

¹⁹Asishpa Jesuspa umanpi kasiwa waktarkakuna, tyukarkakuna uyanpi. Puntanpi kunkurishpangkuna makinta apishpa shuk atun aputashina mucharkakuna.

²⁰Chasna pukllachishkankunawasha chay puka llachapa churachishkankunata llatanachishpangkuna pay kikinpa churarinantana churachirkakuna. Chaymanta pusharkakuna kruspi klabashpa wañuchinankunapa.

Jesusta kruspi klabashpa wañuchirkakuna

(Mt. 27.32-44; Lk. 23.26-43;

Jn. 19.17-27)

²¹Jesusta pushashpangkuna kruspi klabashpa wañuchinankunapa, chay

ñampipi shuk runa Simón shutiyuta tinkurkakuna. Chay Simonka Sirene llaktamanta karka, Alejandropia, Rufopa yayan. Chakranmanta kutimuhurka. Chay suntalukunaka pasahukta rikushpangkuna payta kamachirkakuna Jesuspa krusninta markanarpa.

²²Chasna Jesusta pushashpangkunana chay Gólgota lumapi paktak rirkakuna. Gólgota ninayan wañushkapa uman luma. ²³Chaypina Jesusta *vinu mirra kaspipa aya wilkinwa chapurishkata upyachinayarkakuna mana nanayta musyananpa. Chaytaka Jesuska mana upyanayarkachu.

²⁴⁻²⁵Na intika awastupi kahushpan Jesusta kruspi klabarkakuna. Chay suntalukunaka Jesuspa churarishkankunata chawpinakunankunapa swirlinkunata kamarkakuna pishi apanka nishpa.

²⁶Chaypina Jesuspa krusninpí shuk killkarishkata ratachirkakuna tukuy runakuna yachanankunapa imaraykumi Jesusta wañuchishkakuna. Chay killkarishkapi nirka: Kay runaka israel runakunapa atun apumi kan nishpa.

²⁷Jesusta wañuchihushkankuna uras ishkay wañuchik shuwakunatapas karan shukta shuk kruspi klabarkakuna chaypi wañunankunapa. Shuk krusta shayachirkakuna kuskan parti, shuktaka llukin parti. ²⁸Chasnamí Yaya Diospa ñawpa killkachishkampi rimashkanka paktarirka kasna nishkaka:

Chay Yaya Diospa Kachashkan
Runataka shuk wañuchik
runatashinami wañuchinka-
kuna.

²⁹Chaypi achka runakuna Jesusta rikuk rirkakuna. Mana kirishpangkuna Yaya Diospa Kachashkan Kishpichik kananta, umankunata kuyuchishpangkuna payta asichirkakuna:

Kanmi rimashkanki Yaya Diospa atun wasinta urmachishpayni kimsa punch-

pimi kutikashka rurasha nishpa.
³⁰Kunanka chay krusmanta urayku-mushpayki kan kikinta kishpichiriy nishpa rimarkakuna.

³¹Chay *saserdote kunapa apunkunapas, Moisespa killkashkanta yachachik-kunapas chasnallatata asichishpa nirkakuna:

Payka achka runakunata ampi shpan kishpichishka. Kunanka pay kikinta mana atipanchu kishpichirinata.

³²Shutipa Yaya Diospa Kachashkan Kishpichik ñukanchi israel runakunapa atun apunchi kashpanka kay krusmanta uraykumuchun. Chasna rikushpanchi-rami paytaka kirishunchi.

Chay ishkay kruskunapi klabarishka runakunapas chasnallatata Jesusta asichirkakuna.

Jesuska ña wañurkana
*(Mt. 27.45-56; Lk. 23.44-49;
Jn. 19.28-30)*

³³Chawpi punchamanta pacha kimsa urata tukuy chay allpapi amsayarka.

³⁴Chay kimsaynin ura amsa kahush-kanpi Jesuska kikin arameo shiminpi sinchita kaparirka:

Eloi, Eloi, lema sabaktani.

Chayka ninayan Yayayni Dios, Yayayni Dios, ¿imaraykutaya sapallay-nita sakiwashkanki?

³⁵Chasna kaparishkanta uyashpan-kuna chaypi kahukkunaka rimarkakuna:

Uyaychi. Eliastami kayahun, chay ñawpa Yaya Diospa yachayninwa yachachikta.

³⁶Chaypi shuk runaka kallpashpa rirkapka shuk suni kaspipa puntanpi utkuta watananpa. Chayta agru *vinupi ukuchishpan Jesuspa shiminpi tupachirka tsunkashpa upyananpa. Chasnahu shpan nirka:

Akuychi rikushunchi, shutipachu Eliaska shamunka payta krusmanta uraykuchinanpa.

³⁷Chaypina Jesuska sinchita kaparish-pan wañurkuna.

³⁸Chay wañushkan uraslla *Yaya Diospa wasin ukupi Yaya Dioswa tinkunakuna kwartuta arkak rakta llachapaka^h awamanta pacha pitika likirirka.

³⁹Chaypi chay *romano suntaluku-napa kapitanka Jesuspa puntanpi rikushpa kahurka. Chay kapitanka Jesusta kaparishpa wañuhushkanta rikushpan rimarka:

Shutipami kay runaka Yaya Diospa Wawan kashka.

⁴⁰Achka warmikunapas karumantalla Jesusta rikushpa karkakuna. Paykunamanta karkakuna Magdalamenta Maria, Salomé, *Santiagopa Josepa maman Mariapas. Kay Santiagoka ashwan musu karka chay Jesuspa runan Santiago-manta. ⁴¹Jesuska manara wañuhushpanra Galilea allpapi kahushpan chay warmikunaka payta yanapashpa paywa pakta puripayarkakuna. Shuk achka warmikunapas paywa pakta rirkakuna Jerusalén llaktama payta yanapanankunapa. Paykunapas karumantalla Jesús wañuhushkanta rikushpa kahurkakuna.

Jesuspa aychanta urku uchkupi churashpa taparkakuna
*(Mt. 27.57-61; Lk. 23.50-56;
Jn. 19.38-42)*

⁴²⁻⁴³Tiyarka shuk runa José shutiyu Arimatea llaktamanta. Chay Joseka ñukanchi israel runakunata kamachik tantaylla yuyarishpa israel apunchikunamanta shuk karka. Payka ali apu karka. Yaya Diosta yuyak kashpan yapa chaparka paypa ali kamachinan kay

allpapi paktarinanta. Ña tutayahushpan chay Joseka yapa munashpan *Pilatopa wasinpi yaykuk rirkta Jesuspa aychanta tapununpa. Manara chay tuta *samana punchaka kallarihushpanra yapa munarka Jesuspa aychanta allarishka urku uchkupi churashpa tapanata.

⁴⁴Chasna Jesuspa aychanta tapushpan Pilatoka mana kirirkachu Jesús chasna utkalla wañushkanta. Chayrayku suntalunkunapa kapitanta kayashpan tapurka:

¿Shutipachu ña wañushka?

⁴⁵Chay kapitanka ari nishpan Pilatoka suntalunkunata kamachirka Jesuspa aychanta Joseta kunankunapa. ⁴⁶Chaypina Joseka shuk suma yura llachapata rantik rirkta. Chaywasha Jesús kruspi klabarishkata uraykuchishpankuna paypa aychanta chay llachapawa pillurka. Chasna wankushkanwashana aparka shuk mushu allarishka urku uchkupi churashpa tapananpa. Chay uchkupi churashpanna punkuntaka shuk atun rumiwa taparka.

⁴⁷Chaypina Magdalamanta Mariaka, Josepa maman Mariapas rikushpa kahurakuna yachanankunapa, maypimi Jesuspa aychanka churashirkha kahun.

Jesuska kawsarirka

(Mt. 28.1-10; Lk. 24.1-12; Jn. 20.1-10)

16 ¹Chay *samana puncha pasashka tutapi kimsa warmikuna, Magdalamanta Maria, Josepa maman Mariawa, Salomewa shuk mishkinlla asnak aseiteta rantik rirkakuna chaywa Jesuspa aychanta kakunankunapa mana asnananpa. ²Chay samana puncha kayantima, domingo tutamanta, ña intika llukshihushkampi Jesuspa aychanta churashkapi paktak rirkakuna. ³Rihushkankunapi tapunakurkakuna:

¿Pitaya ñukanchirayku anchuchinka chay atun rumitaka uchku punkumanta?

⁴Chaypi alita rikushpankuna chay atun rumita ña anchuchirishkatana rikurkakuna. ⁵Chay uchkupi yaykushpankuna Jesuspa aychanta kakunankunapa, chaypi shuk *angelta suma yura suni churarishkata rikurkakuna kuskan parti tiyahukta. Payta rikushpankuna yapa mancharirkakuna.

⁶Chasnallapi chay angelka paykunata nirka:

Ama manchariyichichu. Maskahunkichimi Nasaretmanta Jesusta, kruspi klabashpa wañuchishkankunata. Ñami kawsarishka. Rikuk shamuychi, maypimi churay tukushka kahurka. Manami kaypinachu. ⁷Kunanka paypa runankunata kwintak riyichi, Pedrota ashwan kwintaychi Jesús kawsarishkanta. Jesús kankunata rimashkanshina payra kankunamanta ñawpashpa Galilea allpama rinka. Chayma rishpaykichimi tinkunakunkichi nishpa paykunata rimankichi.

⁸Chasna chay angelka rimashpan chay kimsa warmikunaka yapa mancharishpankuna chukchurishpa kallpa mitikurkakuna. Manchaywa kutishpankuna chay rikushkankunata nima pita kwintarkakunachu.

Jesuska Magdalamanta

Mariata rikurirkha

(Jn. 20.11-18)

⁹Chay *samana punchawasha tutamanta Jesuska kawsarishkanwasha puntiru Magdalamanta Mariatara rikurirkha. Chay Mariamanta ñawpa kanchis supaykunata llukshichirka. ¹⁰Mariaka Jesús kawsarishkata rikushpan kwintak rirkta Jesuswa pakta purishka masinkunata. Paykunaka llakiwa wakashpa kahurkakuna.

¹¹Mariapa kwintashkanta uyashpankuna Jesuska ñami kawsarimushka, kawsarishkata rikushkanimi nishkanta, mana kirirkakunachu.

**Jesuska ishkay
runankunata rikurirká
(Lk. 24.13-32)**

¹²Mariata rikurishkanwasha Jesuska ishkay runankunata ñampita rihushkankunapi rikurirká. ¹³Paykunaka Jerusalén llaktama kutishpankuna chaypi kiparishka masinkunata kwintak rirkakuna Jesús kawsarishkata rikushkankunata. Chasna rimashpanku-napas mana paykunata kirirkakunachu.

**Jesuska runankunata kamachirka
tukuy parti paymanta yachachik
rinankunapa
(Mt. 28.16-20; Lk. 24.36-49;
Jn. 20.19-23)**

¹⁴Chaymanta shuk puncha Jesuska chunka shuk runankunata rikurirká mesa muyukta siririshpa mikuhushkankunapi. Chaypi rimarka:

¿Imaraykutaya mana kirinayashkankichu chay rikuwashka runakunata? Paykuna kawsarishkaynimanta kwintashpankunapas mana kirishkankichu. Yapa mana kirinayak runakuna kankichi.

¹⁵Chaymantapas rimarka:
Tukuy kay allpapi kawsak runakunata yachachik riychi kay Yaya Diospa suma ali shiminta runakunata kishpichinamanta. ¹⁶Maykankunami chay yachachi-hushkaykichita kirinahun, chaymantapas bawtisarinahun, chaykunaka

kishpichiy tukunkakunami. Maykankunami mana kirinahunchu, paykunaka wiñayparayku kastigarishka kankakuna.

¹⁷Kankuna Yaya Diosta kirik kashpay-kichi atipankichi Yaya Diospa yachay-ninwa runakuna nima ima uras rikushkankunata ruranata. Runakunapi yaykushka supaykunata atipankichi llukshichinata. Chaymantapas mana yachashkaykichi shimikunatapas rimankichimi. ¹⁸Shuk machakuyata apishpaykichi kanishpanpas mana imanachinkachu. Shuk sulimanta upyashpaykichipas mana imanachinkachu. Yaya Diosta mañashpa shuk unkushkakunapi makikichita churash-paykichi ampirinkakunami.

**Jesuska siluma rirká
(Lk. 24.50-53)**

¹⁹Chayta rimashkanwasha Yayan Dioska Jesusta siluma pusharka. Silipi Jesuska Yaya Diospa kuskan parti tiyarik rirká paywa pakta tukuya kamachik kananpa. ²⁰Siluma rishkanwasha Jesusta katikkunaka tukuy parti paymanta yachachik rirkakuna. Jesuska paykunata yanaparka runakuna nima ima uras rikushkankunata ruranankunapa, tukuy yachanankunapa chay yachachihushkankunaka shutipa ali kananta.

Chayllatami ñuka
Markus kwintani.

LUKASPA KILLKASHKAN KILLKA JESUKRISTU RUNAKUNATA KISHPICHISHKANMANTA

Lukas Teofilorayku killkashpan
riman imaraykumi killkan

1 ¹⁻³Munashkayni Teófilo, ñuka Lukas
kayta killkani kanrayku alita
yachanaykipa Jesuspa rurashkanmanta,
yachachishkanmantapas. Achka
runakuna Jesuspa rurashkankunata
rikushpa kallarinanmanta pacha
killkarkakuna. Paykunaka tukuy chayta
ñukanchita yachachirkakuna. Paykuna
karkakuna Yaya Diospa shiminta
yachachikkuna. Ñukapas tukuyta
kallarishkanmanta pacha alita
yachakushpayni ali kama killkanaynipa
nishpa kanrayku killkani. ⁴Chasnami
yachanki kanta yachachishkankunata
shutipa kashkanta.

**Shuk angel rimarka Bawtisak Juan
wawayarinanta**

⁵Ñawpa Judea allpapi apu *Herodes
kamachik kashpan chaypi shuk
*saserdote Sakarias shutiyu kawsapa-
yarka. Pay karka chay muntun saserdote
Abias wañupa shutinta shutiyachishka
tantaylla tarawak saserdoteukunamanta.
Warminpa shutin karka Isabel, paypas
saserdoteukunapa miraymanta karka.
⁶Yaya Diospa rikushkanpi ali
karkakuna, tukuy paypa kamachish-
kanta alita kasushpa kawsapayarka-

kuna. Chayrayku nima pi atiparkachu
paykunata uchachinata nima imapi.
⁷Isabelka machura kashpan paykuna
mana wawayuchu karkakuna.

Chaymantapas ña ruku karkakuna.

⁸Karan wata karan saserdoteukunapa
ayllun akllarishka karka, shuk punchaku-
kuna *Yaya Diospa wasinpi mañashpa
wiwakunata wañuchishpa Yaya
Diosrayku rupachinankunapa. Chay
punchakuna paktarispan Sakariaska
ayllunkunawa pacta Yaya Diospa
wasinpi runakunaryku mañarkakuna.
⁹Paykuna imashnamí rurapayarkakuna
saserdoteupura akllarkakuna shukta Yaya
Diospa wasin ukuma yaykunarpa chay
Yaya Diosta mañana kwartupi. Chaypi
payka mishkihlla asnak wiki
chapurishka *insienso nishkata

rupachishpan kushniyachinan karka
Yaya Diosta kushichinanpa. Chay
puncha Sakariaska akllarishka karka
Yaya Diosta mañana kwartupi
yaykunarpa. ¹⁰Chay wikita rupachi-
hushkanpi achka runakuna kanchapi
Yaya Diosta mañashpa karkakuna.

¹¹Chaypi Yaya Diospa kachashkan
*angelka Sakariasta rikurik shamurka
wikita rupachina tuchpashinapa kuskan
parti. ¹²Chay angelta rikushpan
Sakariaska yapa mancharirka. ¹³Chaypi
angelka rimarka:

Ama manchariychu. Yaya Dios uyashka mañashkaykita. Warmiki Isabelka shuk kari wawata wawayanka, maykantami shutiyachinkichi Juan.¹⁴Wawayarishkanrayku yapa kushillami kanki. Chasnallatata achka runakunapas kushikunkakuna.¹⁵Yaya Diospa rikushkampika atun yachayyumi kanka. Manami nima ima uras upyankachu urti upyanakunata. Manara wawayarihushpan Yaya Diospa Espiritunka paypi yaykunka kawsahushkanpi tukuypi yuyachinanpa.¹⁶Ña wiñashpan payka achka israel runa masinkunata yachachinka Yaya Diosta alita kirinan-kunapa.¹⁷Payka Yaya Diospa kachanan Kishpichikmanta puntiru rinka, paypa shamunanmanta rimanarpa. Nawpa Yaya Diospa yachayninwa yachachik Eliasshina atun yachayyu yachachik kanka. Chasna yanapanka yayakuna wawankunawa chikninakushpa kawsashkankunata sakishpa yuyana-kushpana kawsanankunapa. Yaya Diosta mana kasuk runakunata yachachinka alitana kasunankunapa. Chasna runakunata alichanka Yaya Diospa Kachanan Kishpichik paykunawa kawsak shamunanpa.

¹⁸Chasna chay angelka rimashkanwasha Sakariaska payta tapurka:

¿Imashnata yachasha rimawashkaykika shutipa kananta? Ñuka kani ruku, warminipas paya.

¹⁹Chasna Sakarias tapushpan angelka aynirka:

¿Imashna kashpataya mana kiriwankichu? Ñukami kani Gabriel, Yaya Diospa puntanpi shayarishpa kani paypa kamachinanta kasushpa. Yaya Dioska kachawashkami chay ali shimita kanta rimanaynipa.²⁰Chay rimashkaynita mana kirishkaykirayku kunanmanta pacha mana atipankichu rimanata wawayki wawayarinankama.

Imashnami ñukaka rimashkani, chasnami paktaranan tiyan.

²¹Chay angelka Sakariaswa Yaya Diospa wasinpi kwintahushkanpi chay kanchapi kahuk achka runakunaka Sakariasta chapahurkakuna. Unayta chapahushpankuna yuyarirkakuna ¿imaraykuta chay ukupi yapa unayan? nishpa.

²²Sakariaska Yaya Diospa wasin ukumanta llukshimuhushpan mana atiparkachu rimanata. Chayrayku yacharkakuna chay wasi ukupi shuk imata muskuypishina rikuskanta. Mana rimanata atipashpan makinwa umanwa paykunata asirtachirka imashnami chay ukupi paywa pasashkanta. Chaymanta pacha mana rimanata atipak kiparirka.

²³Yaya Diospa wasinpi mañanan punchakuna tukurishpan Sakariaska wasinma kutirka.²⁴Kutishkanwasha warmin Isabelka chichurkana. Ña chichu kashpan pichka killakama wasinmanta mana llukshirkachu.

²⁵Yuyarishpan nirka: Kunanka Yaya Dioska yapa alitami rurashka ñukapi runakuna manana pinkachiwanankunapa, mana wawayu kashkaynirayku.

Angel Gabriel rimarka Jesús wawayarinanta

²⁶Isabel ña sokta killa chichu kashpan Yaya Dioska *angel Gabriela Nasaret llaktama kacharka. Chay Nasaret llaktaka Galilea allpapi karka.²⁷Chay llaktapi kawsapayarka shuk shipas Maria, manara karita riksik. Josewa kwintashka karka kasarananpa. Joseka ñawpa kawsak atun apu Davidpa miraymanta karka. Chaypi angelka Mariawa kwintak rirka.²⁸Mariapa wasinpi yaykushpan rimarka:

Shamushkani kanwa kwintanaynipa. Yaya Diospa akllashkan warmimi kanki,

paymi kanwa kahun. Tukuy warmikunamanta kantami Yaya Dioska alita yuyashka.

²⁹Angel chasna rimashpan Mariaka mancharirka. ¿Ima shimitataya kwintak shamuhun chasna saludawanana? nishpa yuyarirka.

³⁰Chaypi angelka nirka:

Maria, ama manchariychu. Yaya Dioska kanta yuyashpan akllashka.

³¹Alita uyay. Chichunkimi. Chaymanta shuk kari wawata wawayanki, maykantami shutiyachinki Jesús. ³²Payka atun yachayyumi kanka. Runakuna paymanta rimankakuna tukuya atipak Yaya Diospa Wawanmi nishpa. Tukuya kamachik Yaya Diosmi payta ñawpa yaya rukun Davidtashina atun aputa ruranka. ³³Paymi kamachinka kankuna israel runakunata wiñayparayku. Paypa ali kamachinanka mana tukurinkachu nima ima uras.

³⁴Chayta uyashpan Mariaka angelta nirka:

Ñukaka manara kawsashkanirachu shuk kariwa. ¿Imashnataya chasnaka chichusha?

³⁵Chaypi angelka aynirka:

Yaya Diospa Espiritunmi tukuya atipak kashpan puyushina kanma shamunka. Chasnamtami chichu kiparinki. Chayrayku chay wawamanta, maykanmi wawayarinka, Yaya Diospa munananllata rurashpa kawsak, Yaya Diospa Wawanmi nishpa rimankakuna. ³⁶Awilayki Isabelpas paya kashpantata chichumi kahun, maykantami machura nishkakuna. Kunanka ñami sokta killa chichu kahun. ³⁷Yaya Diosmi tukuy imatapas atipan ruranata.

³⁸Chasna rimashpan Mariaka arí nirka, kaypi kahuni Yaya Diospa munashkanta ruranaynipa. Pay munashkanta ñukawa rurachun, imashnami rimashkanki chasna.

Chasna rimashkanwasha angelka paymanta anchurirka.

Maria ayllun Isabelta pasyak rirká

³⁹Chay punchakunalla Mariaka utkalla rirká ayllun Isabelta pasyananpa. Isabelka kusan Sakariaswa shuk llaktapi Judea allpa urkukuna chawpipi

kawsahurka. ⁴⁰Sakariaspa wasinpi paktashpan Mariaka yaykuhushpan Isabelta saludarka. ⁴¹⁻⁴²Chasna saludahushpan Isabelpa wawanka wiksan ukupi sinchita kuyurirka.

Chaypina Yaya Diospa Espíritun Isabelta tukuypi yuyachishpan payka kushikushpan Mariata sinchita rimarka:

Yaya Diosmi kanta tukuy warmikunamanta akllashka kushichinanza, wawaykitapas yapa kushichinka. ⁴³Ñukaka nima imachu kani kay atun apuynipa mamanka ñukama pasyak shamuwanana. ⁴⁴Saludashkaykita uyashkaynilawa, wiksayni ukupi wawaynika sumakta kushikushpan kuyurishka.

⁴⁵Tukuy Yaya Diospa rimashkanka paktarinaki nishpa kirishkaykirayku payka kanta atuntami kushichinka.

⁴⁶Chaypi Mariaka rimarka:

Shunkuymimanta pacha Yaya Diosta rimani kanmi kanki yapa ali.

⁴⁷Yaya Dios kishpichiwashkan-rayku yapa kushilla kani.

⁴⁸Nima ima kashpaynipas pay yuyawashpan rikuwashka.

Kunanmanta pacha runakunaka rimawankakuna Yaya Diospa kushichishkanmi kanki nishpa.

⁴⁹Pay atun yachayninwa ñukata rurawashka Wawanpa maman kanaynipa. Paypa ali kan.

⁵⁰Tukuy uras payta kasukkunata yuyashpa llakichishpan rikun. ⁵¹Pay atun yachayninwa rurashkanta rikuchirka. Shuk runakuna

alimi kani nishpa rimashpanku-napas shunkunkunapi mana ali yuyayyu kashpankuna payka yuyayninkunata waklichinka.
⁵²Atun kamachikkunatapas kamachik kashkankunamanta anchuchinka, mana yapa yachakkunata atunyachinka paypa wawankuna kanankunapa.
⁵³Maykankunami paypa yachachinanta shutipa munanahun, paykunata alita yachachinka pay kikin Yaya Dios kananta riksinankunapa. Maykankunami Yaya Diospa yachachinanta mana yapa munanahunchu, paykunatakanata mana yachachinkachu payta riksinankunapa.
⁵⁴⁻⁵⁵Imashnami ñawpa yaya rukunchi wañukuna Abrahantia, paypa mirayninkunatapas rimarka, chasnami ñukanchi payta katik israel runakunata yanapanka. Llakichinanta rimashkanta yuyarishpan kunanka paktachihun.

⁵⁶Mariaka kimsa killata Isabelpa wasinpi kawsashkanwasha kutirkana wasinma.

Bawtisak Juan wawayarirka

⁵⁷Wawayanan puncha paktarishpan Isabelka kari wawata wawayarka.

⁵⁸Chayta yachashpankuna tukuy ayllunkuna kuchupi kawsakkunapas payta rikuk rirkakuna. Yaya Dios payta alita yanapashkanta rikushpankuna kushikurkakuna.
⁵⁹Pusak punchamanta pitirkakuna kari wawapa ishpanan kara puntastuta. Chayta israel runakuna rurapayanahun ñawpamanta pacha, ninayan shutipa Yaya Diosta katinankunata. Chasna rurashpankuna ayllunkunaka shutiyachinayarkakuna yayanpa

shutinta Sakarias kanka nishpa, imashnami israel runakuna rurapayana-hun ñawpamanta pacha.
⁶⁰Mamanka mana munarkachu yayarpa shutinta shutiyachinata, chayrayku rimarka:

Shutinka kankami Juan.

⁶¹Chaypi nirakuna:

¿Imashnata chasnaka kanka? Tukuy ñukanchika ayllunchipa shutinkunallata shutiyachinchu. Nima shuk aylluysi tiyanchu Juan shutiyuka.

⁶²Chasna nishpankuna yayanta makinkunawa rikuchishpa tapurkakuna:

¿Ima shutita kanka?

⁶³Chaypi Sakariaska shuk tablastuta tapushpan killkarka shutinka kankami Juan nishpa. Chayta rikushpankuna tukuy mancharirkakuna ¿imashnataya chayka? nishpa.

⁶⁴Chasnallapi Sakariaska cuti atiparka rimanata. Chaypi kallarirka Yaya Diosta kushichinata kanmi tukuymanta ashwan atun kanki nishpa.

⁶⁵Chaypi ayllunkuna kuchupi kawsakkunapas yapa mancharirkakuna. Tukuy Judea allpa urkukunapi kawsak runakuna chayta uyashpankuna paykunapura kwintarkakuna Yaya Diospa rurashkanmanta.
⁶⁶Tukuy uyashka runakuna shunkunkunapi yuyarishpa tapunakurkakuna paykunapura:

¿Imashnashi tukunka chay wawaka wiñashpanka?

Chaymanta yacharkakuna Yaya Dios shutipa paywa kananta.

Sakarias Yaya Diosta kushichishpa takirka

⁶⁷Mushumanta rimanata kallarihushkan uras Juanpa yayan Sakariaska, Yaya Diospa Espíritun payta tukuypi yuyachishpan pasanan kananta rimarka kasna:

⁶⁸Yaya Dios ñukanchi israel runaku-narayku kachanka shuk kishpi-

chikta. Chayrayku akuychi tukuya atipak Yaya Diosninchita kushichishpa agradesi-shunchi.

⁶⁹ Ñawpa Yaya Diosta kasuk Davidpa miraymanta Yaya Dios kachamunka atun yachayyu kishpichikta. ⁷⁰ Ñawpamanta pacha kaytami Yaya Diospa yachayninwa yachachikkunata chay kachanan kishpichikmanta rimarkakuna kasna nishpa: ⁷¹ Paymi kishpichinka ñukan-chita tukuy kuntranchikmanta, tukuy ñukanchita chiknikkunamantapas.

⁷²⁻⁷³ Yaya Dios ñawpa yaya rukunchikunata yapa llakiyuwa kahushkankunata rikushpan rimarka llakichishpan yanapannanta. Chaymantapas rimarka ñawpa yaya rukunchi Abrahama rimashkanta mana kunkarinanta, ashwan shutipa paktachinanta kasna nishpa: ⁷⁴⁻⁷⁵ Kishpichirishkami kankichi kuntraykichikunamanta, kushikushpa, nima pita manchashpa, munashkaynita rurashpa kawsanaykichipa. Kawsanaykichikama rikushkaynipi allillata rurashpa, ñukata kasushpa kawsankichi.

⁷⁶ Chayta rimashkanwasha Sakariaska rimashpalla katirka:

Kanka, wawayni, shutipa Yaya Diospa Espiritunwa rimakmi kanki. Runakunata rimanki Yaya Diospa Kachanan Kishpichik shamunanmanta. Chayrayku shunkunkunata alicharishpa, tukuy mana alita rurashkankunata sakishpa, alitana runa masinkunawa kawsanankuna tiyan. ⁷⁷ Chay-

mantapas ñukanchi israel runakunata yachachinki, imash-nami Yaya Dios mana alita rurashkanchikunata llakichish-pan ñukanchikunata supaypa kamachinanmanta kishpi-chinka. ⁷⁸ Yayanchi Dios ñukan-chita yuyashpan llakichishpan kachanka Kishpichikta ñukan-chirayku. Inti punchayachihuk-shina silumanta ñukanchima shamunka. ⁷⁹ Mana alita rurashpa amsapishina kawsak, wañunankunata yapa manchashpa kawsak runakuna-rayku kishpichikta kachanka yachachinanpa riksichinanpa imashnami kushilla kawsashun-chi nishpa.

⁸⁰ Chaymanta chay wawaka Yaya Diosta alita riksishpan sinchikurishpa wiñarka. Wiñashpan chunlla chakishka allpapi kawsarka israel masinkunata yachachinata kallarinankama.

Jesuspa wawayarishkanmanta riman
(Mt. 1.18-25)

2 ¹ Chay punchakuna Augusto *romano tukuymanta atun apu karka, romano runakunapa israel runakunapapas. Pay tukuy kamachinanpi kawsakkunata kamachirka, shutinkunata rimashpankuna killkachik rinankunapa. Yachanayarka masna runakunami tiyan nishpa. ² Chay runakunapa shutinkunata killkachina karka puntiru killkachinan. Chay uras apu Sirenio shutiyu Siria allpapi kawsak runakunata kamachipayarka. ³ Tukuymanta atun apu Augustopa kamachishkanta kasushpa, tukuy runakuna kutirkakuna kikin llaktankunama, maypimi ñawpa yaya rukunkuna kawsapayarkakuna, chaypi killkachik rinankunapa shutinkunata.

⁴ Joseka ñawpa atun apu Davidpa miraymanta kashpan Davidpa llaktan

Belenma rinan karka. Chasna kashpan Joseka Nasaret llakta Galilea allpamanta llukshishpan Judea allpama rirka David wañupa kawsashkan Belén llaktama.⁵ Mariaka Josewa kasaranan kashpan paywa pakte rirka shutinkunata killkachinankunapa. Chay uras Mariaka Yaya Dios rimashkanshina chichu karka.

⁶⁻⁷ Belén llaktapi paktashpanguna nima shuk wasita tarirkakunachu puñunankunapa. Achka runakuna kashkanrayku wasikuna mana paktarkakunachu. Wiwakuna tampipi yaykurakuna. Chaypina wawayananka paktarishpan Mariaka puntiru kari wawanta wawayarka. Chay wawanta llachapawa pillushpan wiwata karana kanuwapi churarka.

**Angelkuna obebakunata kuyrak
runakunata Jesús wawayarishkanta
rimarkakuna**

⁸ Chay tutapi Belén llakta kuchullapi obebhata kuyrak runakuna tiyarkakuna.

⁹ Chaypi Yaya Diospa shuk *angelka paykunata rikurik shamurka. Paykunapi muyukta Yaya Diospa yachayin suma chuyahlla rikurirka. Chayta rikushpankuna yapa mancharirkakuna.¹⁰ Chaypina angelka rimarka:

Ama manchariyichichu. Suma shimita kankunata rimanayani Yaya Diosmanta. Kay shimita yachashpanguna tukuy runakunami kushikunkakuna.¹¹ Kunalla kay tuta David wañupa llaktan Belenpi kankunata Kishpichikka wawayarishka. Paymi chapahushkaykichi Yaya Diospa Kachanan Kishpichik, tukuymanta atun apu.¹² Kunan ryichi chay wawata riksinaykichipa. Kasnata tarishpaykichi yachankichi pay kananta: Shuk wiwa wasipi shuk llullu wawa pillurishkata wiwata karana kanuwapi sirihukta tarik rinkichi.

¹³ Kunkaymanta chay angel rikurihushkanllapi achka angelkuna rikurik shamurkakuna. Yaya Diosta kushichishpa nirkakuna:

¹⁴ Yaya Dios, awa silupi kawsak, tukuymanta atun yachayyu ali kanki. Allpapipas kanahuchun suma yuyayyu runakuna. Payta yuyakkunata Yaya Dios aliyachinka, ali yuyayyu kushilla kawsanankunapa paykunapura.

¹⁵ Chasna rimashkankunawasha angelkunaka siluma kutirkakuna. Chaypina obebhata kuyrakkuna paykunapura kwintarkakuna:

Akuychi rikuk rishunchi Belén llaktama Yaya Dios ñukanchita rimashkanta rikunanchipa.

¹⁶ Chay uraslla kallpashpa rirkakuna. Wiwapa tumpunpi paktashpanguna Mariata Josewa tarik rirkakuna, chaymantapas llullu wawastuta wiwata karana kanuwapi sirihukta.¹⁷ Chay wawata rikushpankuna angelka chay wawastumanta rimashkanta kwintarkakuna.¹⁸ Tukuy chay rimashkankunata uyakkuna mancharirkakuna ¿imashna wawataya chayka? nishpa.

¹⁹ Mariaka tukuy chay shimikunata yuyaynippi wakaychashpa yuyarirayarka.

²⁰ Chay obebhata kuyrakkuna kushilla kutirkakuna Yaya Diosta kushichishpa: Yaya Dios, uyashkanchi, rikushkanchi tukuy ali rurashkaykita. Imashnami rimashkanki tukuyta paktachishkanki. Kanmi kanki ashwan ali tukuymanta.

**Joseka Mariawa wawan Jesusta
Yaya Diospa wasinma aparkakuna**

²¹ Chay wawaka ña pusak punchayu kashpan ishpanan kara puntastuta pitirkakuna, imashnami israel runakuna rurapayanahun kunankama. Payta shutiyachirkakuna Jesús, imashnami *angelka rimarka manara Maria chichu kahushpanra chasna.

²²Chaymanta imashnami ñawpa Moisespa killkashkanpi rimashka, kari wawa wawayarishkanwasha ruranankunapa, Mariaka chusku chunka punchata wasinpi kiparirka. Chasna punchakunapi warmikuna mana atipapayanahunchu *Yaya Diospa wasinpi yakyunata. Chay punchakuna paktarishpanna chay wawata Jerusalenma aparkakuna Yaya Diospa wasinpi Yaya Diosta rikuchinankunapa. ²³Yaya Diospa kamachishkan karka: Tukuy puntiru kari wawa wawayarishkata ñukata rikuchinaykichi tiyan, kayka kahun kanta sirvinanpa nishpa.

²⁴Chasnallatata killkarishka karka: Yayankuna apanan tiyan ishkay yura wiwa mukukuta, mana tiyashpanka uchpa wiwa mukukuta Yaya Diosta yuyashpa kunankunapa nishpa. Chayrayku Jesuspa yayankuna Jerusalenma rirkakuna tukuy Yaya Diospa kamachishkanta paktachinankunapa.

Simeón Anapas kishpichikta riksirkakuna

²⁵⁻²⁶Chay punchakuna kawsarka Jerusalenpi shuk ruku Simeón shutiyu. Chay rukuka Yaya Diosta yuyashpa kasushpa kawsarka. Paykuna israel runakunata kishpichikta chapashpa kawsarka. Yaya Diospa Espíritun paypi kashpan kasna yuyachirka: Kan manara wañushpayki rikunayki tiyan Yaya Dios Kishpichikta kachashkanta nishpa. ²⁷Chasnallapi Yaya Diospa Espíritun yuyachishpan Simeonka *Yaya Diospa wasinma rirkta. Chaypillatata Jesuspa yayankunapas Yaya Diospa kamachishkanta paktachishpa wawanstuta aparkakuna. ²⁸Simeonka kayllayashpan wawata markashpan Yaya Diosta kushichishpa rimarka:

²⁹ Amuyni, kanmi kanki tukuymanta yapa atun. Rimawashkaykita

nami paktachishkanki. Kunan shuti kushilla wañusha.

³⁰Kunan ñuka kikin ñawiniwa kachashkayki Kishpichikta rikushkani. ³¹Tukuy allpakunamanta runakuna Kishpichik kananta yachankakuna.

³²Payka ali punchayachikshina kashpan tukuy runakunata riksichinka imashnami kanta yuyashpa kawsankakuna. Payranti tukuy runakuna ñukanchi israel runakunata valichinkakuna.

³³Chasna Simeón Jesusmanta rimashkanta uyashpankuna maman yayan mancharirkakuna ¿imashnataya chayka kanka? nishpa.

³⁴Chaypina Simeonka paykunata rimarka Yaya Dios yanapashpa paykunata kushichinanta. Chaymanta Jesuspa maman Mariata shuk shimita Yaya Diosmanta rimarka:

Achka israel masinchikuna kay wawata chiknishpankuna Yaya Diosmantawichurishka kankakuna. Shukkunaka payta yuyashpa kirishpankuna Yaya Dios paykunata uchankunamanta llakichishpan yanapanka payta kushichishpa kawsankunapa. Yaya Dios chay wawapi yachayninta rikuchushkanta achka runakuna mana kirishpankuna payta wichunkakuna.

³⁵Chaymanta wawayki tukuy runakunapa yuyayninkunata riksichinka. Kanka shunkuykipi waktashkashina nanayta musyanki, yapakta wawayki-rayku llakishpayki.

³⁶Chaypillatata kahurka shuk paya Yaya Diospa yachayninwa rimak Ana shutiyu. Payka Fanuelpa wawan, Aser wañupa miraymanta karka. Payka shipaslla kashpan kusayarka. Kusayashpan kanchis watamanta kusanka wañurka. ³⁷Chay urasmanta pacha

mashintu kashpan ña pusak chunka chusku watayu karka. Tukuy uras Yaya Diospa wasinpi kapayan, achka kuti mana mikushpa Yaya Diosta mañashpa kawsapayan. Tutapi punchapipas Yaya Diosta kushchipayan.³⁸ Chay Yaya Diospa yachayninwa rimak warmi Ana tinkurka Simeonta, Mariawa Josewa kwintahushkata. Simeonpa rimashkanta uyashpan kayllayak shamurka Yaya Diosta agradesinarpa. Chaymanta chay wawa Jesusmanta rimak rirka tukuy israel masinkunata, maykankunami Jerusalén llaktata kishpichikta chapahurakunka.

**Yayankuna Jesuswa pakta Nasaret
llaktama kutirkakuna**

³⁹ Chaymanta tukuy Yaya Diospa killkachishkanpi kamachishkanta paktachishpankuna yayan maman Jesuswa pakta kutirkakuna Galilea allpama, Nasaret kikin llaktankunama.⁴⁰ Chaypi kawsahushpankuna chay wawaka alita wiñarka. Yaya Dios payta yanapashpan suma yuyayyu yapa yachayyu tukurka.

**Jesuska musu kashpan
yayankunawa Yaya Diospa
wasinma rirka**

⁴¹ Karan wata Jesuspa yayankuna Jerusalenma ripayanahun chaypi *Paskua punchakunata pasanankunapa. Chay Paskua punchakunata Yaya Dios kamachishkan karka yuyarinankunapa, imashnami pay ñawpa yaya rukunkunata Egptomanta kishpichirka.⁴² Ña Jesú chunka ishkay watayu kashpan paykunawa pakta Jerusalenma rirka chay punchakunata pasanarpa, imashnami ñawpamanta pacha rurapayanahun chasna.⁴³ Chay punchakuna tukurishpanna Maria Josewa pakta kutirkakuna, mana yachashpan-

kuna wawa Jesuska Jerusalenpi kiparishkanta.⁴⁴ Nachari rishka runa masinchikuna chawpipi nishpa yuyarikakuna. Chasna yuyarishpankuna shuk punchata purirkakuna. Chaymanta ayllunkuna chawpipi riksishkankuna chawpipipas payta maskarkakuna.⁴⁵ Mana tarishpankuna Jerusalenmallata kutimurkakuna chaypi maskakanan-kunapa.

⁴⁶ Kimsa puncha maskashpankuna *Yaya Diospa wasinpi payta tarik rirkakuna, yachachikkunapa chawpin-kunapi tiyahukta. Paykunata uyashpa tapushpa kahurka.⁴⁷ Tukuy runakuna payta uyashpankuna yachayninwa aynihushkanta mancharirkakuna.

⁴⁸ Jesuspa yayan maman kunkaymanta payta rikushpankuna kushikurkakuna. Mamanka nirka:

Ay, wawayni. ¿Imaraykuta chasna rurashkanki ñukanchita? Yayayki ñukapas yapa llakishpa kanta maskashkanchi.

⁴⁹ Chaypi Jesuska aynirka:

¿Imaraykuta yapa maskawashkankichi? ¿Manachu yachankichi Yayayni Diospa wasinpi kanayni kashkata?

⁵⁰ Yayanka mamanka chay rimashkanta mana asirtarkakunachu.

⁵¹ Mamanka tukuy chay rimashkanta yuyaynippi wakaycharka. Chaymanta Jesuska paykunawa pakta Nasaret llaktama kutirkaka. Chaypi alita wiñarka, yayankunata kasushpa tukuypi.⁵² Tukuy uras ashwan yachak alita asirtak tukushpa wiñarka. Yaya Dios runakuna-pas payta yuyarkakuna.

**Bawtisak Juan Yaya Diospa
shiminta yachachirka
(Mt. 3.1-12; Mk. 1.1-8; Jn. 1.19-28)**

3 ¹ Jesú ña rukuyashpan *romano Tiberio tukuymanta atun apu karka. Chay Tiberioka ña chunka pichka

watata kamachishpan Judea allpapi Ponsio *Pilato shutiyu apu karka. Galilea allpapi *Herodes apu karka. Iturea allpapi Trakonite allpapi Herodespa wawkin Felipe apu karka. Abilinia allpapi Lisanias apu karka. Tukuy chay allpakuñapi apukunata romano tukuy manta atun apu Tiberio kamachipayan. ²*Saserdote kunata atun apunkuna Anás Kaifaswa karkakuna. Chay uras Sakariaspa wawan Juan chunlla chakishka allpapi kawsarka. Chaypi kahushpan Yaya Dioska payta rimarka kallarinanpa yachachinata. ³Chasna rimashpan Juan tukuy Jordán yaku mayanpi runakunata yachachishpa purirka kasna rimashpa: Kunanmanta pacha tukuy millaypa rurashkaykichtaka amirishpa sakiyichi. Yaya Diospa rimashkanta kasushpana kawsaychi. Chasna rurahushkaykichtita rikuchishpa bawtisariyichi. Chaypina Yaya Dioska kankunata uchaykichimanta llakichinkami.

⁴Ñawpa Juan manara wawayarihushpanra Yaya Diospa yachayninha yachachik Isaias Juanmanta killkarka:

Chunlla chakishka allpapi shuk runa sinchita rimashpa yachachinka kasna: Imashnami shuk anchu ñampita alichanchi atun apu shamuhushpan purinanpa, chasnashina shunkuykichta alichaychi. Millaypata rurashpa kawsashkaykichta sakiyichi Yaya Diospa Kachanan Kishpichikwa alita kawsanaykichta. ⁵Anchu ñampita rurashpanchi wayukunata allpawa untachishpa parihuyachinch. Lumakunata wichushpa parihu yachinch. Wistu ñampikunata kuskayachinch. Kaspikunata pitishpa wichunchi. Chasnashina shunkuykichta alichay-

chi tukuy mana alikunamanta. ⁶Chasna rurashpaykichimi tukuy runakuna yachankakuna imashnami Yaya Dios runakunata kishpichin nishpa.

⁷Achka runakuna bawtisarinankunapa Juanma shamurakuna. Chaypina Juan paykunata riksishpan mana ali yuyayyu kashkankunata rimarka:

Machakuyashina runakuna kankichi, mana ali yuyayyu waklichikkuna. ¿Pita kankunata rimashka chasnalla kishpinaykipa Yaya Diospa manchaypa kastiganamanta? ⁸Alitana ruraychi Yaya Diesta kasuk kanaykichita rikuchinaykipa. Ama yanka rimaychichu yaya rukunchi Abraham wañupa miraymantami kanchi, chayrayku Yaya Dioska ñukanchikunata kishpichinka nishpa. Yaya Dios munamaka, kay rumikunamanta yaya ruku Abraham wañupa mirayninta rurama. ⁹Rikuychi. Shuk tarpu kaspi mana alita muyuyashpanka amunka sapinpi achawa kuchushpan ninapi rupachin. Chasnallatatami Yaya Dioska tukuy mana ali rurak runakunata kastigankami.

¹⁰Chayta uyashpankuna runakunaka Juanta tapurakuna:

Chasna kashpanka ¿Imatata rurashunchi Yaya Diospa kastiganamanta kishpinanchipa?

¹¹Chaypi Juanka aynirka:

Pipachari tiyan ishkay churarinanka, maykanpachari mana tiyapunchu, chaytaka kuy shuk churarinata. Chasnallatata pipachari tiyan mikunanka, kuy mana tiyapuhukta.

¹²Romano tukuy manta atun apurayku *impuestuta kobra karkunapas paktamurakuna bawtisarinankunapa. Juanta tapurakuna:

Yachachik, ñukanchita rimay ¿imatata rurashunchi Yaya Diospa kastiganamanta kishpinanchipa?

¹³Chaypi Juanka aynirka:

Amana yapa kullkita kobraychinachu. Imashnachari apukuna kamachinahun, chasnalla kobraychi.

¹⁴Shuk suntalukunapas tapuk shamur-kakuna:

Ñukanchika ñimatata rurashunchi
Yaya Diospa kastigananmanta
kishpinanchipa?

Paykunatapas Juanka aynirka:

Amana kichuchinachu nima pita
nima imata, nima manchachishpa, nima
llullachishpa, nima yanka uchachishpa.
Chay kankunata pagashkankunawa
kushilla kawsaychi.

¹⁵Tukuy chaypi kahuk runakunaka
Juanpa rimahushkanta uyashpankuna
yuyarirkakuna, kaychari chapahushkan-
chi Yaya Diospa Kachanan Kishpichikka
nishpa.

¹⁶Chaypi Juanka tukuy chay runaku-
nata rimarka:

Nukaka yakuwami kankunata bawtisani.
Shukmi shamunka ashwan yachayyu
ñukamanta. Paymantaka ñukaka mana
yapa yachayyuchu kani. Paypa puntanpi
nima imata atipanichu rimanata. Payka
kankunata Yaya Diospa Espiritunta
kushpami shunkuykichita aliyachinka.
Ninawa rupachihuskashina uchaykichita
pichanka payta kushilla katinaykichipa.

¹⁷Yuyariyichi. Sarata, triguta pallashpanchi
tullunmanta muyuntana wishkunchi. Chay
muyuntaka wakaychanchi, tullunkunataka
ninapi rupachinchchi. Chay shamuhuk
runaka chasnallatata ruranka. Paymi tukuy
Yaya Diosta kirikkunataka siluma apanka.
Mana kirikkunataka nina mana
wañukmami wichunka.

¹⁸Chaymantapas ashwan shimikunawa
chaypi kahukkunata kunashpa Yaya
Diospa suma ali shimiinta runakunata
kishpichinanmanta rimarka. ¹⁹Apu
Herodestapas sinchi shimiwa kunarka,
wawkinpa warmin Herodiaswa kawsash-
kanrayku, chaymanta achka shuk mana

alita rurahushkankunaryakupas. ²⁰Chasna
rimashpan Herodeska payta karselpi
churarka. Chasna rurashkanwa mana ali
rurashkankunata ashwanta mirachirka.

Juan Jesusta bawtisarka
(Mt. 3.13-17; Mk. 1.9-11)

²¹*Herodes Juanta manara karselpi
churashpanra Juanka achka runakunata
bawtisahurka. Chay uras Jesustapas
bawtisarka. Chaypina Jesús Yayan
Diosta mañahushpan siluka paskarirka.
²²Chaypi Yaya Diospa Espiritunka wiwa
mukukushina uraykumurka Jesuswa
kawsanarpa. Silumanta Yaya Dioska
rimarka:

Kanmi kanki munashkayni wawayni.
Kanmi sumakta kushichiwanki nishpa.

**Jesukristupa yaya rukunkuna
wañupa shutinkuna**
(Mt. 1.1-17)

²³Jesuska kimsa chunka watayu
kashpan kallarirka Yaya Diospa
shiminta yachachinata.

Runakuna yuyarirkakuna paymi kan
Josepa wawan nishpa. José Elipa
wawanmi karka. ²⁴Elí Matatpa wawanmi
karka. Matat Levipa wawanmi karka. Leví
Melkipa wawanmi karka. Melki Janapa
wawanmi karka. Jana Josepa wawanmi
karka. ²⁵José Matatiaspa wawanmi karka.
Matatias Amospa wawanmi karka. Amós
Nahumpa wawanmi karka. Nahúm Eslipa
wawanmi karka. Eslí Nagaipa wawanmi
karka. ²⁶Nagai Maatpa wawanmi karka.
Maat Matatiaspa wawanmi karka. Matatias
Semeipa wawanmi karka. Semei Josekpa
wawanmi karka. Josek Judapa wawanmi
karka. ²⁷Judá Joanapá wawanmi karka.
Joanán Resapa wawanmi karka. Resa
Sorobabelpa wawanmi karka. Sorobabel
Salatielpa wawanmi karka. Salatiel Neripa
wawanmi karka. ²⁸Neri Melkipa wawanmi
karka. Melki Adipa wawanmi karka. Adi

Kosampa wawanmi karka. Kosam Elmadampa wawanmi karka. Elmadam Erpa wawanmi karka.²⁹Er Josuepa wawanmi karka. Josué Elieserpa wawanmi karka. Elieser Jorimpa wawanmi karka. Jorim Matatpa wawanmi karka. Matat Levipa wawanmi karka.³⁰Leví Simeonpa wawanmi karka. Simeón Judapa wawanmi karka. Judá Josepa wawanmi karka. José Jonampa wawanmi karka. Jonam Eliakimpa wawanmi karka.³¹Eliakim Meleapa wawanmi karka. Melea Menapa wawanmi karka. Mena Matatapa wawanmi karka. Matata Natanpa wawanmi karka. Natán Davidpa wawanmi karka.³²David Isaipa wawanmi karka. Isaí Obedpa wawanmi karka. Obed Boospa wawanmi karka. Boos Salapa wawanmi karka. Sala Naasonpa wawanmi karka.³³Naasón Aminadabpa wawanmi karka. Aminadab Adminipa wawanmi karka. Admin Arnipa wawanmi karka. Arni Esrompa wawanmi karka. Esrom Farespa wawanmi karka. Fares Judapa wawanmi karka.³⁴Judá Jakobpa wawanmi karka. Jakob Isaakpa wawanmi karka. Isaak Abrahampa wawanmi karka. Abraham Tarepa wawanmi karka. Taré Nakorpa wawanmi karka.³⁵Nakor Serugpa wawanmi karka. Serug Ragaupa wawanmi karka. Ragau Pelegpa wawanmi karka. Peleg Heberpa wawanmi karka. Heber Salapa wawanmi karka.³⁶Sala Kainanpa wawanmi karka. Kainán Arfaxadpa wawanmi karka. Arfaxad Sempa wawanmi karka. Sem Noepa wawanmi karka. Noé Lamekpa wawanmi karka.³⁷Lamek Matusalenpa wawanmi karka. Matusalén *Enokpa wawanmi karka. Enok Jaredpa wawanmi karka. Jared Mahalaleelpa wawanmi karka. Mahalaleel Kainanpa wawanmi karka.³⁸Kainán Enospa wawanmi karka. Enós Setpa wawanmi karka. Set Adanpa wawanmi karka. Adán Yaya Diospa rurashkan runami karka.

**Supay Jesusta mana alita
rurachinayarka**
(Mt. 4.1-11; Mk. 1.12-13)

4 ¹Bawtisarishkanwasha Jesuska paypi kawsak Yaya Diospa Espíritun payta yuyachishpan Jordán yakumanta kutirkana. Chay Espiritunka payta yuyachirka chunlla chakishka allpama rinanpa. ²Chaypi chusku chunka punchata karka. Chay punchakuna supayka Jesusta kayllayashpan kamarka shutipachu Yaya Diosllata kasun nishpa. Tukuy chay chusku chunka puncha Jesuska mana mikurka-chu. Ña tukurinan punchakuna yapa yarkarka. ³Chaypina supayka rimarka:

Shutipa Yaya Diospa Wawan kashpay-kika kay rumita rimay pan tukunanpa, chayta mikunaykipa.

⁴Chaypi Jesuska aynirka:
Nima imashna rurashanchu. Yaya
Diospa killkachishkanpi riman:
Mana mikunawallachu runaka
kawsan nishpa.

⁵Chaypi supayka Jesusta urku awama pushashpan kunkaymanta yuyaynillapi tukuy kay allpapi kamachik atun apukuna kamachinan allpakanata rikuchirka. ⁶Chaymanta rimarka:

Kanta kusha tukuy chay allpakanata, tukuy chaypi suma kahukkunatapas, maykantami ūukata kuwashka karka. Chayraykumi maykantachari munani, chayta kuni. ⁷Kunkurishpayki mañawashpaykika tukuy kamachishkay-nita rurashpaykika tukuytami kanta kusha chaypi kamachik kanaykipa.

⁸Chasna supay rimahushpan Jesuska mana munashpan rimarka:
Nima imashna rurashanchu. Yaya
Diospa killkachishkanpi riman:
Yaya Diosllata kunkurishpa
mañaychi. Payllata kasushpa
kawsaychi nishpa.

⁹Chaymanta supayka Jesusta Jerusalén llaktama pusharka. *Yaya Diospa wasin awama sikachirka. Chaymanta rimarka:
Kan Yaya Diospa Wawan kashpaykika kaymanta allpama saltay. ¹⁰Yaya Diospa killkachishkanpi nin:

Yaya Dioska *angelkunata
kachanka kanta kuyranankuna-
napa. ¹¹Paykunami makinku-
napi kanta alita kuyrankakuna,
mana nima rumipi waktarinay-
kipa nishpa.

¹²Chaypi Jesuska aynirka:

Nima imashna rimawashpayki saltashanchu. Yaya Diospa killkachish-
kanpi kaytapas nin:

Ama Yaya Diosta yanka kamankichu
yachanaykipa payka yanapa-
wankachu manachu nishpa.

¹³Chasna Jesús mana kasunayashpan supayka manana yacharkanachu imashnami payta llullachinka nishpa. Chayrayku Jesusmanta anchurimurkana shuk punchakama.

**Jesuska Galilea allpapi
kallarirka yachachinata**
(Mt. 4.12-17; Mk. 1.14-15)

¹⁴⁻¹⁵Chaymanta chay chunlla chakishka allpamanta Jesuska Galilea allpapi llaktakunama kutirka. Yaya Diospa Espíritun paypi kashpan yapa yachayyu karka. Tukuy llaktakunapi tantarina wasikunapi Yaya Diospa shiminta yachachipayan. Runakuna payta uyashpankuna tukuy rimarkakuna kay runaka yapa alimi kan nishpa.

**Nasaret kikin llaktanpi
ayllunkunaka Jesusta mana
kirinayarkakunachu**
(Mt. 13.53-58; Mk. 6.1-6)

¹⁶Chaymanta Jesuska wiñashkan Nasaret llaktanma kutirka. *Samana

puncha tantarina wasipi yaykurka, imashnami pay wiñay rurapayan chasna. Chaypi runakuna chawpipi shayarirka Yaya Diospa killkachishkanta leyinanpa. ¹⁷Chaypina payta kurkakuna Yaya Diospa yachayninwa yachachik Isaiaspa killkashkanta. Chay killkata paskashpan leyirka kasna nishkata:

¹⁸ Yaya Diospa Espiritunmi ūukawa kan. Yaya Diosmi akllawashka nima imayu runakunata, llakiywa kawsak runakunata paypa suma ali shiminta runakunata kishpichinanmanta yachachinaynipa. Kachawash-
kami watarishkashina kaws-
huk runakunata kishpishka kankichi nishpa rimanaynipa, mana rikunata atipakkunatapas yanapanaynipa kuti rikunanku-
napa, parisihuk runakunata parisichiy tukuhushkankuna-
manta kishpichinannipa.

¹⁹ Yaya Dios kachawashka runakunata rimanaynipa kunanka llakichiy tukunankunata.

²⁰Jesuska leyinata tukuchishpan chay killkata kuti wankurka. Chaymanta shuk runa chay tantarina wasipi yanapakta kutichishpan tiyarirka chay wasipi kahukkunata yachachinanpa. Tukuy runakuna payllata rikushpa chaparkakuna imatami rimanka.

²¹Chaypina rimarka:

Kunanmi kay killkarishkaka paktarishka. ūukami kani, maykanman-
tami riman.

²²Chaypi tukuy runakuna alita rimarkakuna paymanta. Mancharishpa tapunakurkakuna:

¿Maypishi kay runaka kay suma rimanakunata yachakushka? ¿Imashnashi chasna atun yachayyu tukushka?
¿Manachu kayka Josepa wawan?
¿Imashnataya chasna tukushka?

²³Jesuska paykunata aynirka:
Kankunaka rimankichi kay yaya
rukunchipa rimananta: Ampinata yachash-
paykika kan kikita ampiy nishpa.
Chasnallatata rimawankichi: Tukuy imata
Kaperenaum llaktapi rurashkaykita
uyashkanchi. Chasnallatata kunan ruray
kikin llaktaykipas Yaya Diosmanta
shamushka kanaykita yachananchipa.

²⁴Alita uawayaychi. Nima shuk Yaya
Diospa yachayninwa yachachikta kikin
llaktanpika alita yuyanahunchu.

²⁵⁻²⁶Chasna kananta ñawpamanta pacha
rikunchi. Elias yachachihushkan uras kikin
allpanpi achka mashintukuna yarkaywa
parisihukkuna tiyashpanpas Yaya Dioska
Eliasta mana paykunama kacharkachu
yanapananpa. Ashwan payta kacharkami
mana israel warmi mashintuma chay
warmillata yanapananpa.^a Chay warmika
kawsarka mana israel runakunapa llaktan
Sareptapi, Israel allpa anakpi Sidón llakta
mayanpi. Chay uras kimsa wata sokta
killata mana tamyarkachu. Chasna mana
tamyashpan tarpunkunaka mana wiñarka-
kunanachu. Chayrayku tukuy Israel allpapi
sinchi yarkay tiyarka. ²⁷Chasnallatata
ñawpa Yaya Diospa yachayninwa
yachachik Eliseo kawsashkan uras kikin
allpanpi achka runakuna aycha ismuchik
unkuywa kahushpankunapas nima shukta
Eliseoka ampirkachu. Siria allpapi shuk
kamachik mana israel runa Naamán
shutiyu chay unkuywa kahushpan payllata
ampirkaka.

²⁸Chaypina tukuy chay tantarina wasipi
kahukkunaka Jesuspa rimashkanta
uyashpankuna yapa piñarirkakuna.
²⁹Atarishpankuna Jesusta chay llaktamanta
llukshichirkakuna. Chay llaktaka urku
waykuyahushkanpi rurarishka kashpan
Jesusta chay urku awama pusharkakuna
chaymanta tankanankunapa.

³⁰Chaypina Jesuska chay achka
runakunapa chawpinkunata pasashpa
llukshirka.

**Jesuska supay
yaykushka runata ampirka
(Mk. 1.21-28)**

³¹Nasaret llaktamanta llukshishpan
Jesuska Kaperenaum llaktama rirka
Galilea allpapillatata. Chaypi *samana
puncha tantarina wasipi yaykurka
runakunata yachachinanpa. ³²Chay
runakunaka yachachishkanta uyashpan-
kuna mancharishpa paykunapura
rimarkakuna:

Kay Jesuska Yaya Diospa shiminta
yachachin Yaya Dios kikin ñukanchita
rimahushkashina.

³³Chay runakuna chawpipi shuk supay
yaykushka runa tiyarka. Jesusta uyashpan
supayka chay runata sinchita rimachirka:

³⁴Jesús, Nasaret llaktamanta runa,
ama ñukanchima kayllayaychu.
¿Shamushkankichu ñukanchita
wichunaykipa ninapi wiñaypa
parisinanchipa? Ñuka riksini kanta Yaya
Diosmanta shamushka runa kanaykita.

³⁵Chayllapi Jesuska sinchi shimiwa
supayta piñarka:

Chunllayay. Lluukshiy kay runamanta.

Chasnallapi chay supayka runakuna
chawpipi chay runata allpama
urmachishpan nima imanachishpan
paymanta llukshirka. ³⁶Chayta
rikushpankuna tukuy runakuna mancha-
rishpa paykunapura tapunakurkakuna:

¿Ima rimanataya kayka? Tukuy
rimashkanta kasunahun. Kay runaka
atun yachayyu kashpan supaykunata
rimashkanllawa runamanta llukshichin.

³⁷Chaymanta tukuy Galilea allpapi
kawsak runakuna Jesuspa rurashkan-
manta yacharkakuna.

**Jesuska ampirka Simón Pedropá
warminpa mamanta**
(Mt. 8.14-15; Mk. 1.29-31)

³⁸Chay tantarina wasimanta llukshishpan Jesuska Simonpa wasinpi yaykuk rirk'a. Chaypi Simonpa warminpa mamanka sinchi kalinturawa puñunanpi sirihurka. Chaypina Jesusta payrayku tapurkakuna ampipay nishpankuna.
³⁹Chaymanta Jesuska kayllayashpan chay unkushkapa kuchunpi kumurishpa sinchita rimarka kalinturanka pasananpa. Chay rimashkanllapi kalinturanka pasarka. Chasna kalinturanka pasashkan ratulla payka atarishpan Jesusta tukuy wasinpi kahukkunatapas mikunata kararka.

**Jesuska achka unkushka
runakunata ampirka**
(Mt. 8.16-17; Mk. 1.32-34)

⁴⁰Ña intika yaykuhushkanpi runakunaka tukuy unkushkakunata Jesusma pushamurkakuna. Chaypi Jesuska karan shukta makinwa llankashpan ampirka.
⁴¹Chasnallatata achka supay yaykushka runakunamanta supaykunata llukshichirka. Chay supaykunaka kaparishpa rimarkakuna:

¡Kanmi kanki Yaya Diospa kikin Wawan! nishpa.

Chasna kaparishpankuna Jesuska sinchi shimiwa piñarka. Paykuna yachashpankuna Yaya Diospa Kachashkan Kishpichik kananta Jesuska mana munarkachu chasna rimanankunapa.

**Jesuska Israel allpa llaktakunapi
Yayan Diospa shiminta yachachirka**
(Mk. 1.35-39)

⁴²Ña pakarimuhushpan Jesuska chay llaktamanta llukshishpan chunlla

kahushkama rirk'a Yayan Diosta mañananpa. Chayma rishpan achka runakuna payta maskarkakuna. Kahushkanpi paktak rishpankuna mana munarkakunachu nima mayma rinanta, ashwan munarkakuna paykunallawa kananta. ⁴³Chaypina Jesuska rimarka:

Shuk llaktakunapipas rinayni tiyan kay suma ali shimita yachachinaynipa Yaya Diospa ali kamachinan kay allpapi ña kallarishkanmanta. Chayraykumi kay allpama kachay tukushkani.

⁴⁴Chaymanta Jesuska tukuy chay allpapi yachachispa purirka Yaya Diospa shiminta israel runakunapa tantarinankuna wasikunapi.

**Jesuska rediwa challwata apik
runakunata yanaparka achka
challwata apinankunapa**
(Mt. 4.18-22; Mk. 1.16-20)

5 ¹Shuk puncha Jesús Genesaret^b kucha mayanpi kahushpan achka runakuna tantarirkakuna Yaya Diospa shiminta uyanankunapa. Yapa achka runa kashkanrayku tankanakushpa kichkikta Jesuswa pakta kahurkakuna.
²Chaypina Jesuska rikurka ishkay botikunata tiyupi llutachirishkakunata. Challwata apikkuna botinkunamanta llukshishpankuna redinkunata mayllahurkakuna. ³Chaypi Jesuska Simonpa botinpi uraykushpan Simonta nirka:

Aku astallastu chawpiyashu.

Chaymanta Jesuska botipi tiyarishpan chay achka runakunata yachachirka.

⁴Yachachinata tukuchishpan Simonta rimarka:

Chawpiyachiy botikita ashwan chawpima. Chaypi redikichita kachariy-chi challwata apinaykichipa.

⁵Chasna nishpan Simonka aynirka:

b Kay kuchapa shuk shutin kan Galilea kucha, shuk shutinka kan Tiberias kucha

Yachachik, kunan tuta pakarikta rediyashpanchipas nima shuk challwata apishkanchichu. Chasna kashpanpas kunan kan rimawashkaykirayku kuti mushumanta kacharishu redinchita nishpa.

⁶Jesuspa rimashkanta kasushpankuna redinkunata kacharirkakuna. Chaypina yapa achka challwata apirkakuna redinkuna likirinayanankama. ⁷Chay tukuy challwata rikushpankuna shuk botipi kahuk rediyak masinkunata umankunawa kayarkakuna yanapanan-kunapa. Chaypi tukuymanta ishkanti botinkunata challwawa untachirkakuna. Botinkunaka yapa untakta kashpan tikranalla karkakuna.

⁸⁻¹⁰Jesusta kasushkankunaryku achka challwata apishkankunata rikushpankuna Simón Pedroka, tukuy paywa kahukkunapas yapa mancharirkakuna. Chasnallatata shuk botipi kahuk Simonwa tantaylla rediyakkuna *Santiago, Juanpas, Sebedeopa wawankuna yapa mancharirkakuna. Chaypina Pedroka Jesuspa puntanpi kunkurishpan rimarka:

Yaya Jesús, anchuriy ūukamanta. Kanmi kanki ucha illa. ūukaka uchasapami kani.

Chaypina Jesuska Simonta rimarka:

Ama manchariychu. Imashnami challwata apishpa kawsashkanki, chasnashinami kunanmanta pacha, ūukata katiwahushpayki runakunata yachachinki paykunapas Yaya Diosta kasunankunapa nishpa.

¹¹Chaymanta botinkunata allpama sikachishpankuna tukuy paykunapa tiyashkanta sakishpankuna Jesuswa pakta rirkakuna.

**Jesuska shuk runata aycha
ismuchik unkuymanta ampirka**
(Mt. 8.1-4; Mk. 1.40-45)

¹²Shuk puncha Jesús shuk llaktapi kahushpan shuk aycha ismuchik

unkuyyu runaka paktamurka. Mana atipashpanpas chay unkuywa runakunata kayllayanata, Jesusma shamurka. Payta rikushpan puntanpi kunkurishpan tapurka:

Yaya Jesús, yachani ampinata atipawanaykita. Ali kashpan kanrayku kay unkuymanta ampiway, ampirish-payni kuti atipanaynipa tantaylla kawsanata aylluynikunawa nishpa.

¹³Chaypina Jesuska makinwa llankashpan rimarka:

Ari, munanimi. Kunanka ampirishkami kanki. Na atipanki aylluynikunawa tantaylla kawsanata.

Chasna nishkanllawa chay runaka chay unkuymanta ampirishka karka.

¹⁴Chaymantapas rimarka:

Ama nima pita rimankichu kanta ampiashkaynimanta, ashwan *saserdotellama rikuchik rinki ampirishkaykita. Moisespa killkashkanpi kamachishkashina Yaya Diosta kunayki kashkata apashpa churak rinki, tukuy runakuna ampirishkaykita yachanankunapa.

¹⁵Chasna Jesús kunashpanpas chay ampirishkaka tukuy runakunata ampirishkanmanta kwintak rirkta. Chaypi achka runakuna tantaripayana-hun payta uyanankunapa, unkuykunamantapas ampirinankunapa. ¹⁶Chay-rayku Jesuska anchuripayan nima pi tiyahushkama Yayan Diosta mañanarpa.

**Jesuska aychan
chakirishka runata ampirka**
(Mt. 9.1-8; Mk. 2.1-12)

¹⁷Shuk puncha Jesuska yachachihurka shuk wasipi. Chaypi shuk *fariseokuna, Moisespa killkashkanta shuk yachachik-kunapas tiyahlla kahurkakuna. Paykunaka tukuy Galilea allpapi llaktakunamanta, tukuy Judea allpapi llaktakunamanta, Judeapi kahuk

Jerusalén llaktamantapas shamurka-kuna. Chaypi Jesuska Yaya Diospa yachayninwa kashpan achka unkushka-kunata ampirkaka. ¹⁸Chaypina shuk runakuna apamurkakuna aychan chakirishka runata llanchamani sirihushkata Jesusma. Chay runaka mana atipapayanchu kuyurinata. Paykuna yuyarirkakuna, wasi ukuma yaykuchishpanchi Jesuspa puntanpi churashunchi chaypi ampinanpa payta nishpa. ¹⁹Chasna yuyarishpankunata mana atiparkakunachu yaykuchinata, yapa achka runa tiyashkanrayku. Chayraykuna iskalunta sikarkakuna chay parihu washayu wasi awama. Chaypi sapiramanta rurarishka tablastukunata anchuchishpankuna llanchamanpi sirihushkata chay awamanta uraykuchirkakuna achka runakuna chawpipi Jesuspa puntanpi. ²⁰Chayta rikushpan Jesuska yacharka paykuna yuyarihushkankunata, Jesuska atipama ampinata nishpa. Chaypina chay runata rimarka:

Wawki, tukuy uchaykikunamanta llakirishkami kanki nishpa.

²¹Chaymanta chay Moisespa killkashkanta yachachikkuna, chay fariseokunapas piñarishpankuna yuyarirkakuna:

¿Pitaya kay runaka chasna rimanapaka? Chasna rimahushpanmi Yaya Diosta piñachihun. Nima pi atipamachu runakunata uchankunamanta llakichinata. Yaya Diosllami atipan llakichinata uchanchikunamanta.

²²Jesuska chasna yuyarihushkankunata yachashpan rimarka:

¿Imaraykutaya chasna yuyarihunkichi shunkuykichipi? ²³Kay runataka rimashkanimi uchaykikunamanta llakichirishkami kanki nishpa. Chasna rimashpayni mana yachankichichu shutipachu llakichiy tukushka manachu nishpa. Ñuka kay unkushkata rimaynima atariy,

puriy nishpa. Pay alita purishpanna yachankichima ñuka payta ampishkay-nita. ²⁴Yachanaykichipa ñuka Yaya Diospa Kachashkan Runa paypa yachay-ninwa kay allpapi runakunata uchankunamanta llakichinaynita kunalla kay runata ampisha.

Chasna nishpan chay unkushkatana rimarka:

Kanta rimani atariy. Llanchamaykita apishpayki kutiy wasikima.

²⁵Chasna rimashkanllawa chay aychan chakirishka runaka atarispan llanchamanta apishpan Yaya Diosta takishpa, kushikushpa wasinma kutirka. ²⁶Chasna rikushpankuna tukuy chaypi kahukkunaka Yaya Diosta atunya-chishpa kushichirkakuna. Yapa mancharishpa rimarkakuna:

Kunan punchami rikushkanchi yapa sumata, nima ima uras rikushkanchita.

Jesuska Levita kayarka (Mt. 9.9-13; Mk. 2.13-17)

²⁷Chaywasha Jesuska chay llaktamanta llukshishpan *impuestuta kobrakta *Leví shutiyuta rikurka. Chay impuestuta kobrapayan *romano tukuymanta atun apurayku. Levika kobranan wasipi tiyahurka. Payta rikushpan Jesuska rimarka:

Leví, shamuy, katiway nishpa.

²⁸Chay ratulla Levika atarispan tukuy imanta sakishpan Jesustana katirka. ²⁹Chaywasha Levika Jesusrayku shuk atun mikunata wasinpi rurarka payta yuyashkanta rikuchinanpa. Chay mikunaryaku achka impuestuta kobrak masinkuna, ashwan shuk runakunapas chay wasipi tantarishka kahurkakuna. Chay runakuna Jesuspas runankunawa pakta tantaylla mikunankunapa mesa muyukta sirihurkakuna. ³⁰Chayta rikushpankuna *fariseokunaka, Moisespa killkashkanta yachachikkuna-

pas Jesuspa runankunata chiknishpan-kuna tapurkakuna:

¿Imaraykuta kankunaka chay mana alita rurak runakunawa, impuestuta kobrakkunawapas tantaylla mikuhunkichi upyahunkichi?

³¹Chaypi Jesuska aynirka:

Alikunaka mana munanahunchu ampipta. Ashwan unkushkakunami ampipta munanahun ampirinankunapa.

³²Chasnallatata ñukaka mana shamush-kanichu yanapanaynipa maykanmi riman mana uchayuchu kani nishpa. Ashwan shamushkanimi uchayukunata yanapanaynipa Yaya Diostana kasunankunapa.

**Jesuska yachachin payta katikkuna
ñawpa katishkankunata manana
atipanankunata katinata**
(Mt. 9.14-17; Mk. 2.18-22)

³³Chasna Jesús yachachihushpan runakuna chiknishpankuna rimarkakuna:

Bawtisak Juanpa runankuna, *fariseokunapa runankunapas achka kuti mana mikupayanahunchu Yaya Diosta yuyarishpa mañanankunapa. Ashwan kanpa runaykikunaka mana chasnahan-hunchu, kushilla kashpankuna mikunahunlla upyanahunlla. ¿Imaraykutaya chasnahanahun?

³⁴Chasna rimahushpankuna Jesuska aynirka:

Shuk musu warmiyahushpanka kayan tutuy ayllunkunata. Kushilla tantarishpa mikunahun mushu warmiyahushkawa pakta. Chasna chay warmiyahuk runawa kushilla tantarishushkankunapi nima pi atipanchu mana mikushpa kanata.

³⁵Shuk puncha kuntrankunaka chay mushu warmiyashkata pushak shamushpankuna chay uraska llakirinkakunami. Llakirishpan-kunaka mana mikunayankakunachu nishpa.

Chasna Jesuska rimarka pay kikin chay mushu warmiyashkashina kashkanta yuyachishpa.

³⁶Chaymanta Jesuska shuk yachachinawa yachachishpa katirka: Nima maykan runa llaktanchipi kawsak mushu kamisanmanta pitinchu shuk pitistuta, chaywa mawka kamisanta rimintanarpa. Chasna rurashpanpas mana alichu kiparinka, nima mushu nima mawka kamisanka aliyapunkachu.

³⁷⁻³⁸Chasnallatatami mushu *vinu putskurihushkataka mana churanchichu mawka karamanta rurarishka bulsapi apananchipa. Chay uva yakuka urtiyahushpan putskurin, mawka karamanta rurarishka bulsaka tukyashpan vinuka talirin, chay bulsapas manana valinnachu. Chayrayku mushu vinuta mushu karamanta rurarishka bulsapi churanchi.

³⁹Ñukaka mushu shimitami yachachihuni. Ñawpa yaya rukuykichikunapa yachachishkankunaka mana chasnachu kan. Maykanmi paykunapa yachachishkankunata kasunayashpanka manami ñukapataka kasunayankachu, ñawpamanta pacha ñukanchita yachachishkankunaka alimi nishpa.

**Jesuska yachachin samana
punchamanta**
(Mt. 12.1-8; Mk. 2.23-28)

6 ¹Shuk *samana punchapi Jesuska runankunawa pakta trigu tarpurish-kakuna chawpita rirkakuna. Chaypi runankunaka shuk shuk trigupa puntanta pakishpa, muyunta wishkushpankuna mikurkakuna.

²Chayta rikushpankuna shuk *fariseokuna piñarishpa paykunata tapurkakuna:

¿Imaraykuta kay samana punchapika tarawashpa pakihunkichi trigu muyuta mikunaykichipa? ¿Manachu yachankichi Yaya Diospa kamachishkanta

samana punchapika mana tarawananchipa?

³Chasna rimahushkankunata uyashpan Jesuska aynirka:
 ¿Manachu leyishkankichi ñawpa atun apu David wañuka paywa kahukkunapas yarkashpankuna imashnata rurarkunkuna? ⁴*Yaya Diospa wasinpi yaykushpan Yaya Diosta rikuchinankunapa mesapi churarishka pankunata apirka mikunarpa Yaya Diosrayku rurarishkata. Paywa purishpa kahukkunatapas kurka mikunankunapa. Chay pankunaka mana paykuna mikunankunapachu karka. Yaya Dios kamachirka *saserdotekunalla mikunankunapa. Chasna mikushpankunapas Yaya Dioska chaytaka mana uchatashina rikushpan paykunata mana kastigarkachu. Chayrayku kankunapas runaynikunata mana atipankichichu rimanata uchatami rurashkankichi nishpa.

⁵Chaymantapas Jesuska nirka:
 Yaya Dioska ñuka paypa Kachashkan Runata yachayninta kuwashka kankunata rimanaynipa imakunami ali kanahun samana punchapi ruranaykipicha.

**Jesuska chakirishka makiyu runata
 samana punchapi ampirka**
^(Mt. 12.9-14; Mk. 3.1-6)

⁶Shuk *samana puncha Jesuska tantarina wasipi yaykurka runakunata yachachinanpa. Chaypi tiyarka shuk runa kuska makin chakirishka.

⁷Chaypina Moisespa killkashkanta yachachikkuna, *fariseokunapas rikushpa kahurakunkuna, Jesuska ampinkachu manachu nishpankuna payta uchachinankunapa samana punchapi mana rurana kashkata rurashkanrayku. ⁸Jesuska yuyarihushkankunata yachashpan chay chakirishka makiyuta rimarka:

Atariy, chawpinchipi shayarik shamuy.

Chay runaka atarishpan chawpinkunapi shayarik rirkta. ⁹Chaypina Jesuska shukkunata rimarka:

Kankunata tapuni, Yaya Diosta kasushpanchika ¿imatata ashwan ruranchima samana punchapika, alitachu millaypatachu? ¿Alichu kama shuk unkushkata ampinanchipa samana punchapi, manapika sakinchimachu wañunarpa?

¹⁰Chasna nishpan Jesuska kuchunpi tuyukta kahukkunata rikushpan chay runata rimarka:

Chutachi makikita nishpa.

Chasna makinta chutachishpan ampirishka kiparipurka. ¹¹Chaypi shukkunaka Jesusta yapa piñarishpankuna paykunapura tapunakurkunkuna:

¿Imanachinchimashi kay runata? nishpa.

**Jesuska payta katikkunamanta
 chunka ishkayta akllarka**
^(Mt. 10.1-4; Mk. 3.13-19)

¹²Chay punchakuna Jesuska urku awama sikarka Yayan Diosta mañananpa. Chaypi tukuy tuta Yayanmañarka. ¹³Ña pakarihushpan payta katikkunata kayarka paykunamanta chunka ishkayta akllanarpa. Chaymanta chay akllashkankunata rimarka: Kankunami *apostolnikunka kankichi, kachanayni runakuna. Kankunata kachasha shiminita yachachinaykipicha.

¹⁴Chay akllashkankunapa shutinkunaka karkakunkuna: Simón, maykantami Jesuska shutiyachirka Pedro, Andrés Simonpa wawkin, *Santiago, Juan, Felipe, Bartolomé, ¹⁵*Mateo, Tomás, shuk Santiago Alfeopa wawan, chaymanta shuk Simón, maykantami rimapayanahun *Selote. ¹⁶Shukka karka

*Judas^c Santiagopa wawan, chaymanta shuk Judas Iskariote shutiyu, maykanmi chaywasha Jesusta apichinan karka.

¹⁷Chay chunka ishkay runankunata akllashkanwasha Jesús paykunawa pakta chay urkumanta uraykumurkakuna shuk pampama. Chaypi tantarirakuna achka payta katihukkunapas. Chaymantapas achka runakuna tukuy Judea allpamanta, Judeapi kahuk Jerusalén llaktamantapas, atun yaku mar mayanmanta, Tiro llaktamanta, Sidón llaktamantapas Jesusma shamurkakuna yachachihushkanta uyanankunapa, unkushkakunapas ampirinankunapa. ¹⁸Supay unkuchishka runakunatas Jesuska ampirka. ¹⁹Yapa yachay-ninwa tukuy unkushkakunata ampihushkanta rikushpankuna tukuy chaypi kahukkuna payta llankanayarkakuna ampirinankunapa.

**Jesuska runankunata yachachirk
imashnami kushikushpa
kawsashunchi**

(Mt. 5.1-12)

²⁰Jesuska runankunata rikushpan rimarka:

Kankuna kushilla kankichi, Yaya Dios mana yanapawashpanka nima imata atipanichu ruranata nishpa yuyarishpa kawsahushkaykichirayku. Yaya Diosmi kankunata yanapanka wiñayparayku paypa ali kamachihushkanpi kawsanaykichi.

²¹Kushilla kankichi yarkahukshina Yaya Diospa munashkanta ruranayashpa kawsahushkaykichirayku. Yaya Diosmi kankunata yanapanka paypa munashkanta rurashpa kawsanaykichi. Chasnallatata kushilla kankichi kunan wakashpa kawsahushkaykichirayku, shuk urasmi asinkichi.

²²Kushilla kankichi runakuna kankunata chiknishpankuna tantarinay-kichi wasikunamanta wichuy tukushpaykichi kamij tukushpaykichi washanchashpa rimay tukushpaykichi ñuka Yaya Diospa Kachashkan Runata katiwahushkaykichirayku. ²³Chasnallatami ñawpa chay chiknik runakunapa yaya rukunkuna wañuka Yaya Diospa rimashkanta yachachikkunata chiknishpankuna parisichirkakuna. Kunan kankunatas chasnallatata parisich-hushpankuna atunta kushikuychi. Shuk punchami silipi Yaya Dios kankunata atunta kushichinka tukuy chayta parisishkaykichirayku.

²⁴Chaymanta shukkunatana rimarka:
Ay kankuna kullkiyu runakuna,
¡imashna kastigushi kankunaryaku kanka! Ñami kushilla kawsashkankichi.

²⁵Ay kankuna kunan saksashkashina kahukkuna, ¡imashna kastigushi kankunaryaku kanka! Saksashkashina kahushkaykichi-manta yarkaywashinana kankichi.

Ay kankuna, maykankunami kunanka kushilla asihunkichi, ¡imashna kastigushi kankunaryaku kanka! Asihushkaykichi-manta llakirishpana wakankichi.

²⁶Ay kankuna, maykankunamantami tukuy runakuna ali kanaykichita rimahanun paykunapa uyanayashkunkunalla yachachishkaykichirayku. ¡Imashna kastigushi kankunaryaku kanka! Ñawpa chay runakunapa yaya rukunkuna wañupas llullashpa yachachikkunata ali kanankunata rimarkakuna.

**Jesuska paypa runankunata
yachachirkira chiknik runakunata
yuyanankunapa**

(Mt. 5.38-48, 7.12)

²⁷Jesuska yachachishpalla katihushpan rimarka:

Kunan kankuna, kiriwak runakuna kashpaykichimi yachachishkaykichi. Kankunata chiknik runakunata yuyaychi. Kankunata piñarihushpanku-napas alita ruraychi paykunata.
²⁸Kankunata millaypata rimakkunata rimaychi Yaya Dios kankunata yanapashpa kushichichun nishpa. Kankunata kamikkunarayku Yaya Diosta mañapuychi. ²⁹Shuk runa kanta makahushpan uyaykipi sakmashpanka ama rantipaychu. Kutikashka sakmashpanpas ama piñarishpa rantipaychu, ashwan alichay paywa. Chaymanta shuk runa kanta awaniru churarishkaykita kichunayashpanka kamisaykitapas kichunayashpanka sakiy. Ama piñariychu payta. ³⁰Maykanpas imaykita tapuhushpanka kuy. Maykanpas imaykita apashpanka ama rimaychu kutichiway nishpa. Chasna rurashpaykichimi riksinkakuna Yaya Diospa wawankuna kanaykichita. ³¹Kankuna runa masikichikunata yuyashpa alita rurashpa kawsaychi, imashnami kankunapas munankichi paykuna kankunata yuyashpa alita rurashpa kawsanankunapa.

³²Yachanchi llullachik runakunapas ayllunkunataka yuyanankunata. Kankuna chasnallatata aylluypaykichikunallata yuyashpaykichika paykunamanta mana ashwan alitachu rurahunkichi. Paykunashina rurashpalla kawsashpaykichika ¿imamantata Yaya Dioska kankunata kushichinka? ³³Yuyanakuk masikichillawa yanapanakushpaykichika uchata rurakkunashinalla kawsankichi. Chasna kawsashpaykichika ¿imamantata Yaya Dios kankunata kushichinka? ³⁴Chaymanta kankuna kutichik runallata shuk imaykichita prestashpaykichika ¿imamantata Yaya Dios kankunata kushichinka? Uchata rurakkunapas kutichik masinkunallata

shuk shuk kullkinkunata prestanahun, yuyarishpa ashwanta paykunamanta apinata.

³⁵Ñuka kankunata rimani, kankunata chiknik runakunata yuyanaykichi tiyan. Chaymantapas alita ruranaykichi tiyan runa masikichikunaryku. Chaymantapas shuk runa shuk imaykichita tapushpanka prestanaykichi tiyan nima chapashpa chayta kutichinana. Chasna rurashpaykichika Yaya Dios kankunata sumakta kushichinka. Paymi kan ali shunku, mana agradesikkunata, millaypata rurakkunatas chasnalla yuyan. Chasna kankunapas Yaya Diosshina yuyashpa kawsashpaykichimi atun yachayyu Yaya Diospa wawankuna kankichi. ³⁶Imashnami Yaya Dioska tukuy runakunata llakichishpa yuyan, chasnallatata kankunapas, paypa wawankuna kashpaykichi payshina llakichik kaychi.

Jesuska yachachin shuk runa masinchita mana alichu kanki nishpa mana rimananchipa

(Mt. 7.1-5)

³⁷Chaymanta Jesuska ashwanta yachachishpa katirka: Yaya Dioska mana kanta kastigananpa, ama rimankichu shuk runa masikichimanta payka mana alichu kan nishpa. Yaya Dioska kankunata nina mana wañukma mana kachananpa, ama rimankichichu uyachikshina shukkunamanta Yaya Diosmi kanta kachanka nina mana wañukma nishpa. Tukuy runa masikichita llakichinaykichi tiyan. Chasna runa masikichita llakichishpaykichika Yaya Diospas kankunata llakichinka. ³⁸Maykanpami tiyan imankunaka, pishihukkunata mana mitsashpa kuychi. Chasna mana mitsashpa kushpaykichika Yaya Diospas kankunata ashwan achkatami kunka.

Kankuna runa masikichita rurashkayki-chishina, chasnallatata Yaya Dioska kankunatapas ruranka.

³⁹Chaymanta Jesuska chaypi kahukkunata shuk yachachinawa rimarka: Shuk wiskuka wisku masinta pushahushpanka ¿atipamachu alita purichinata? Shuk uchku allarishka kashpan ¿manachu chaypi ishkanti urmanahuma? Chasnallatata maykanmi Yaya Diospa shiminta mana alita asirtanchu, mana atipanchu kankunata yachachinata. ⁴⁰Nima maykan yachakuk payta yachachikmanta ashwan yachak kanchu. Chasna kashpanpas tukuyta alita yachakushpan payta yachachikshinallatata kanka.

⁴¹⁻⁴²Runa masikipa ñawinpi shuk uchilla susyastu tiyamaka, shuk ratu rikunkichima. Ashwan kankunaka kikin ñawikichipi ashwan atun susya tiyamaka, mana rikunkichimachu. Ñawikichipi ashwan atun susya tiyamaka runa masikichipa ñawinpi kahukmanta, mana alichu kama payta rimanaykicipa ñawikimanta susyata surkushara nishpa. Chasna rurankimaka kan kikintami llullachirinkima. Ashwan puntiru kan kikinpa ñawikimantara chay atun susyata surkuy. Chaymanta alita rikushpayki runa masikipa ñawinmanta chay uchillastu susyata surkuy. Chasnallatata puntiru kan kikinpa uchaykita sakinayki tiyan. Chaypirami atipankichi runa masikita kunanata paypa uchanta sakinanpa.

**Jesuska yachachin muyunmanta
kaspita riksinchita yuyachishpa**
(Mt. 7.17-20, 12.34-35)

⁴³Chaymanta Jesuska shuk yuyayta rimarka: Tarputa yuyariychi. Ali tarpuka mana millaypatachu muyuyan. Chasnallatata millaypa tarpupas mana alitachu muyuyan. ⁴⁴Karan tarputa

muyuyananmanta riksinch. Papayu mana muyuyamachu kasha muyuta. Champiraka mana muyuyamachu papayuta. ⁴⁵Chasnami kan runakunawapas. Ali yuyayyu runaka ali shimikunallatami riman, alikuna shunkunpi kashkanrayku. Millaypa yuyayyu runaka millaypakuallatami riman. Chay millaypa yuyaykunaka shunkunpi kashpan millaypakuallatami riman. mirashpan shiminka riman.

**Jesuska ishkay runa wasita
rurashkankunata yuyachishpa
yachachin**
(Mt. 7.24-27)

⁴⁶¿Imaraykuta kankunaka karan uras rimawankichi Yaya Jesús, Yaya Jesús, kamachishkaynita mana kasushpaykitatata? ⁴⁷Kunan rimashkaykichi maykanmi ñukama shamushpan shiminata alita uyan, kamachishkaynitas pas kasun, payka kasnami kan: ⁴⁸Shuk runa sumakta wasinta lumapi rurarka, allpata ukuta allashpan orkonkunata shayachirka. Chaymanta atun untay shamurka. Chay wasita mana imanachirkachu, alita rurashka kashkanrayku. ⁴⁹Maykan runami shiminata uyashpanpas kamachishkaynita mana kasunchu, payka kasnami kan: Shuk runa wasinta tiyupi rurarka. Mana ukuta allashpan orkonkunata shayachirka. Chaymanta untay shamushpan chay wasita shuk ratu urmachirka. Llampu warankarishpan tukuya wichurka.

**Jesuska shuk romano kapitanpa
runanta ampirka**
(Mt. 8.5-13)

7 ¹Chay achka runakunata yachachish-kanwasha Jesuska Kapernaum llaktama rirka. ²Chay llaktapi shuk kapitan tiyarka *Roma llaktamanta. Paypa tiyarka

shuk yuyashkan runan sinchita unkushka, ña wañunalla karka.³ Chay kapitanka Jesusmanta uyarka achka unkushkakunata ampihushkanta. Chayta yachashpan israel runakunata kamachik rukukunamanta shukkunata kacharka Jesusta kayak rinankunapa runanta ampinanpa.⁴ Paktak rishpankuna Jesusta ali shunkuwa tapurukuna:

Yachachik, ali kama chay kapitanta yanapanaykipa.⁵ Payka Romamanta runa kashpanpas ñukanchi israel runakunata alita yuyashpan tantarinanchi wasita rurachishka.

⁶Chasna rimashpankuna Jesuska paykunawa pakta rirkta chay kapitanpa wasinma. Ña kuchuyahushpankuna chay kapitanka shuk amigunkunata kacharka Jesusta rimanankunapa:

Yachachik, amigunchi kapitanmi riman: Ñukamanta yapa pasa kashpayki imaraykuta wasinima shamuhunki. Ama shamuychu. Puntaykipi nima imachu kani wasinima shamunaykipa.⁷ Chayrayku mana ñuka kikin rishkanichu kanta kayanaynipa. Chaymantalla shuk shimita rimay runaynika ampirinanpa.⁸ Ñukapapas tiyanmi apuynikuna kamachiwanankunapa. Paykuna kamachiwashpankuna kasunayni tiyan. Chasnallata ñuka suntaluynikunata kamachishpayni paykunapas kasuwanankuna tiyan. Maykan suntaluynitami riy nishpayniika payka rinmi. Shukta shamuy nishpayniika shamunmi. Maykan runaynikunatapas kayta rurapaychi nishpayniika paykunaka kasushpankuna ruranahun. Chasnallata-tami kanka shuk shimillawa atipanki anchuchinata unkuya kay runaynimanta.

⁹Chasna chay kapitanpa rimashkanta rimashpankuna Jesuska yapa kushikurka. Chaymanta tukuy chay katihukkunama tikrashpan rimarka:

Kankunata rimani, tukuy israel masinikunamanta nima maykan tukuy

shunkumanta pacha kiriwashkanta tarishkanichu kay *romano runatashina. Ñukanchi israel runakuna Yaya Diospa akllashkankuna kashpanchitata kankunaka mana kay runashinachu kiriwankichi.

¹⁰Chasna Jesús rimashpanna chay kapitanpa kachashkan runakunaka kutirkakuna. Kapitanpa wasinpi paktashpankuna chay unkushkata tarirkakuna ña ampirishkatana.

Jesuska shuk mashintupa wawanta wañushkanmanta kawsachirka

¹¹Jesuska chay kapitanpa runanta ampiškanwasha runankunawa pakta Naín llaktama rirkta. Achka runakunapas paykunawa pakta rirkakuna.¹² Chay llakta kuchupi paktahushpankuna shuk wañushkata apahukkunata rikurakuna allarishka urku uchkupi churashpa tapanankunapa. Chay wañushkaka shuk mashintupa shulklla wawan karka. Achka runakuna chay llaktamanta chay mashintuwa pakta rihurakuna.

¹³Chayta rikushpan Jesuska sinchita llakirishpan chay mashintuta rimarka:

Ama wakaychu.

¹⁴Chasna nishpan chay wañushkata sirichishpa apahushkankunata kayllayashpan apik rirkta. Chaypina wañushkata apahukkunaka shayarirkakuna. Chaypi Jesuska chay wañushkata rimarka:

Musu, atariy.

¹⁵Chasna nishkanllapi chay wañushka musuka kawsarirka. Tiyarishpan kallarirka rimanata. Chaypina Jesuska kawsachishkan musuta mamantana kurka.

¹⁶Chayta rikushpankuna tukuy chaypi kahukkuna yapa mancharirkakuna. Yaya Diosta kushichishpa rimarkakuna:

Tukuymanta ashwan atunmi kanki, kay yachaykiwa rimak runata ñukanchima kachamushkaykirayku.

Chaymanta rimarkakuna:
Yaya Diosmi shamushka ñukanchi
paypa akllashkan runankunata yanapa-
nanpa nishpa.

¹⁷Tukuy Judea allpapi kawsak
runakuna, chay Judeawa pakta kahuk
allpakunapi kawsakkunapas yacharka-
kuna Jesús chay wañushkata
kawsachishkanta.

**Bawtisak Juan Jesusmanta
yachanayashpa runankunata
kacharka**
(Mt. 11.2-19)

¹⁸Bawtisak Juan apirishka kashpan
runankunaka kwintapayanahun Jesuspa
tukuy rurahushkankunata. Chayta
yachashpan Juanka ishkay runankunata
kayarka. ¹⁹Paykunata Jesusma kacharka
tapunkunapa: ¿Kanchu chapahush-
kanchi Yaya Diospa Kachanan Runa
kanki? Manapika ¿shuktachu
chapashunchi? nishpa.

²⁰Juanpa kachashkankunaka Jesusma
paktashpankuna payta tapurkunka:

Bawtisak Juan ñukanchita kachashka
kanta tapunanchipa: ¿Kanchu
chapahushkanchi Yaya Diospa
Kachanan Runa kanki? Manapika
¿shuktachu chapashunchi?

²¹Chay uras Jesuska achka runaku-
nata unkushka hahushkankunamanta
parisinankunamantapas ampirka. Supay
yaykushka runakunatapas aliyachirka.

Achka wiskukunapa ñawinkunata
aliyachirka alitana rikunankunapa.

²²Chay tukuy runakunata ampiškanwa-
sha Juanpa runankunata rimarka:

Juanta kwintak riychi tukuy
rikushkaykichita, tukuy uyashkaykichi-
tapas. Wiskukuna mushumanta
rikunahun. Mana purinata atipakkuna-
pas mushumanta purinahun. Aycha

ismuchik unkuyukunapas ampirishka
kanahun. Mana uyanata atipakkunapas
mushumanta uyanahun. Wañushkaku-
napas kuti kawsarinahun. Nima imayu
runakuna Yaya Diospa suma ali
shiminta runakunata kishpichinanmanta
uyahunkuna.^d ²³Kushillami kanka
maykanmi mana sakishpa katiwan
nishpa Jesuska Juanpa kachashkan
runankunata rimarka.

²⁴Paykuna kutishkankunawasha
Jesuska chaypi kahukkunata Juanmanta
rimarka:

Kankunaka chunlla chakishka allpama
rishpaykichi ¿imashna runatata
rikunayarkankichi? ¿Shuk muspa
yuyayyu runatachu rikunayarkankichi?
Mana chasnatachu rikuk rirkankichi.

²⁵¿Shuk suma churarishka runatachu
rikuk rirkankichi? Mana chasnatachu
rikuk rirkankichi. Suma churarishka
kahukkunaka apukunapa wasinkuna-
pimi kawsanahun. ²⁶Chasna kashpan
¿imata rikunayashpaykitchitaya rirkanki-
chi? ¿Yaya Diospa yachayninwa shuk
yachachiktachu rikunapa rirkankichi?
Kankunata rimani, ari, chayraykumi
rirkankichi. Mana chasna runallatachu
rikunapa rirkankichi, Yaya Diospa
yachayninwa ñawpa yachachikkuna-
manta ashwan yachaktami rikunapa
rirkankichi. ²⁷Chay Juanmanta kasna
killkarishka kan ñawpa Yaya Diospa
rimashkanka:

Ñukaka shuk runata kachasha runaku-
nata shiminita rimanarpa. Payka
manarapas kanta kachahushpayni
runakunata kanmanta rimak rinka
shunkunkunata alichashpankuna
alita kanta kayanankunapa
nishpa.

²⁸Ñukaka kankunata rimani,
ñawpamanta pacha tukuy kay allpapi

^d Rikuy kastellano Bibliapi Isaías 35.5-6, 61.1

kawsak runakunamanta Juanmi ashwan sumakta Yaya Diospa shiminta yachachik kan. Chasna Juan tukuy yachachikkunamanta ashwan yachak kashpanpas maykanmi Yaya Diospa kamachishkan tukushpa paypa ali kamachihushkanpi kawsan, mana yachak kashpanpas chaymi Juanmanta pasa kan.

²⁹Juanpa yachachihushkanta uyashpankuna achka runakuna *romano tukuymanta atun apurayku *impuestuta kobrakkunapas yacharkakuna Yaya Dios payta yuyachishpan yapa alita rimashkanta. Chayrayku munarkakuna Juan paykunata bawtisananpa. ³⁰*Fariseokuna, Moisespa killkashkanta yachachikkunapas mana munashkakunachu Yaya Dios paykunata yanapananpa. Chayrayku mana Juanma rirkakunachu bawtisarinankunapa.

³¹Chaypina Jesuska yachachishpalla katirka: Kankuna Yaya Diosta mana kasunayak runakuna ¿imawashi kankunata yachachinima? ³²Kankunaka ñampipi tiyarishpa pukllak wawakunashinami kankichi. Paykunaka shuk wawa masinkunata kaparishpa rimana-hun: Ñukanchi kenata pukushpanchipes mana baylashkankichichu. Chaymanta llakiypata takishpanchipes mana wakashkankichichu nishpa. ³³⁻³⁴Chasna nima pita kasunayak wawakunashina kashpaykichi nima Bawtisak Juanta, nima ñukata kasunayashkankichichu. Juan mana tukuy runakunashina panta mikushpan nima *vinuta upyashpan rimankichi supay yaykushka kananta. Chaymanta ñukana Yaya Diospa Kachashkan Runa shamushkani, upyani, mikuni. Ñukataka rimawankichi: Kanka mikuysiki upyaysikimi kanki, mana ali rurakkunapa, romano tukuymanta atun apurayku impuestuta kobrakkunapas amigunmi kanki nishpa. ³⁵Chasna

rimashpaykichipas ñukanchi Yaya Diosta kasushpa tukuyta alillata rurahushpanchi rikuchinchimi paypa suma yachayninwa kahushkanchita.

**Shuk fariseo Jesusta kayarka
wasinpi mikuk rinanpa**

³⁶Chaymanta shuk *fariseo Simón shutiyu Jesusta kayarka wasinpi mikuk rinanpa. Chay fariseopa wasinpi ña yaykushpan Jesuska mesa mayanpi siririka mikunanpa, imashnami mikupayanahun chasna. ³⁷Chay llaktapi tiyarka shuk mana alita kawsak warmi. Chay warmika Jesús fariseopa wasinpi paktashkanta yachashpan payma rirkka. Shuk yura rumimanta rurarishka butillapi mishkinlla asnak perfumita apashpan Jesusta kayllayarka. ³⁸Jesuspa washanmanta kayllayashpan chakin parti kunkurishpan wakarka. Ñawin yakuwa chakinta ukuchishpan mayllarka. Chaymanta chukchanllawa chakinta chakichishpan mucharka. Chaymantapas perfumita Jesuspa chakinpi talirka.

³⁹Chayta rikushpan Jesusta kayak fariseoka yuyarirka kay runa Yaya Diospa yachayninwa yachachik kashpanka yachama karka kay warmika mana alita kawsak kananta. ⁴⁰Jesuska fariseopa yuyayninta yachashpan nirka:

Simón, kanta shuk shimita rimanya.

Chaypi fariseoka aynirka:

Ari yachachik, rimaway.

⁴¹Jesuska rimarka:

Ishkay runakuna kullkita patronta liwirkakuna. Shuk liwirka pichka pachak kullkita, shukka liwirka pichka chunka kullkita. ⁴²Chaymanta patronka tapushpan kutichinankunapa, mana atiparkakunanachu kutichinata. Mana atipashpankuna kutichinata, ishkantita patronka rimarka: Liwiwashkaykichita

manana pagawankichinachu nishpa. Kunanka rimaway ishkanti llakichirishkankunamanta ¿maykanta ashwanta patronta yuyama? nishpa.

⁴³Simonna aynirka:

Ñuka yuyarini maykanmi ashwan kullkita liwirka, chaymi ashwanta patronta yuyama.

Jesusna rimarka:

Alitami ayniwashkanki.

⁴⁴Chasna nishpan chay warmita rikushpan Simonta nirka:

¿Rikushkankichu kay warmi rurawahushkanta? Wasikipi yaykuhushpayni kanka mana yakuta kuwashkankichu chakinita mayllanaynipa. Kay warmika ñawin yakuwa chakinita mayllapashka, chaywasha chukchanwa chakichipashka. ⁴⁵Kanka saludanakushpanchi mana muchawashkankichu. Kay warmika yaykushkaynimanta pacha chakinita muchapashka. ⁴⁶Kanka nima aseiteta umaynipi taliwashkankichu. Kay warmika yapa suma mishkihlla asnak perfumita chakinipi talipashka. ⁴⁷Chayrayku kanta rimani, payka yachan tukuy uchankunata llakichinaynita. Chayrayku yapa yuyawashpan chakinita mayllapashka. Kanka yuyarinki uchillastu uchayniku nishpa. Chasna yuyarishpaykimi uchillastu uchakunamanta llakichiy tukushkanki. Chayrayku mana yapa yuyawankichu.

⁴⁸Chasna nishpan chay warmitana rimarka:

Uchaykikunamanta llakichirishkami kanki nishpa.

⁴⁹Chaypina Jesuswa pakta kayay tukushka runakunaka paykunapura tapunkurkakuna:

¿Pitaya kay runaka, uchankunamanta chasna llakichinanpaka? ¿Yaya Diosshinachu tukunayan? nishpa.

⁵⁰Jesuska chay warmita ashwan rimarkalla:

Kanmi tukuy shunkuykimanta pacha kiriwashkanki. Chayrayku tukuy uchaykikunamanta llakichishkani. Kushilla wasikima riy nima pita manchashpa.

Jesusta yanapak warmikunamanta riman

8 ¹⁻²Chaymanta Jesuska achka llaktakunapi purirk, Yaya Diospa suma ali shiminta yachachishpa Yaya Diospa ali kamachinan kay allpapi ña kallarishkanmanta. Chay chunka ishkay akllashkan runankunaka paywa pakta rirkakuna, chaymantapas shuk warmikuna. Chay warmikunatami manara paywa puriushpangkuna Jesuska unkushka kahushkankunamanta ampirka, supay yaykushkankunamantapas aliyachirka. Shukka karka Magdal-manta Maria, maykanmantami Jesuska kanchis supaykunata llukshichirka.

³Shukka karka Kusapa warmin Juana. Chay Kusaka karka apu *Herodespa wasinpi kamachik. Shukka karka Susana. Chaymanta ashwan achka warmikunapas Jesusta katirkakuna. Paykuna tukuy ima tiyapushkankunawa Jesusta yanaparkakuna.

Jesuska tarpuk runamanta yuyachishpa yachachin (Mt. 13.1-9; Mk. 4.1-9)

⁴Achka llaktakunamanta runakuna Jesusma tantarimurkakuna. Chaypi Jesuska paykunata yachachihushpan kasna rimarka: ⁵Akuychi yuyarishunchi. Shuk runa llukshirka tarpunanpa arus muyukunata wichashpa. Chasna tarpushpan shuk muyukunaka ñiampipi urmarkakuna. Runakunaka awanta purishpangkuna pulbuchirkakuna. Chaypina pishkukunana mikurkakuna. ⁶Shuk muyukunaka llapcha allpa samantasapapi urmarkakuna, shuk ratu

tukyarirka. Chakishka allpaka kashkan-rayku llampu wañurakuna. ⁷Shuk muyukunaka kasha kiwa chawpipi urmarkakuna. Chay kashawa pakta wiñahushpan llampu tapashpan wañuchirka. ⁸Shuk muyukunaka suma allpapi urmarkakuna. Chay muyuka wiñashpankuna achkata muyuyarka. Shuk muyumantalla shuk pachak muyustukuna mirarka.

Chasna nishpan Jesuska sinchita rimarka: Kay yachachishkaynita alita uyashpa yachakuychi.

**Jesuska yachachishkanta
runankunata asirtachirka
(Mt. 13.10-23; Mk. 4.10-20)**

⁹Chayta uyashpankuna runankunaka Jesusta tapurkakuna:

Chay yachachishkaykika ,ima ninayantaya?

¹⁰Chaypi Jesuska paykunata aynirka: Kankunallata Yaya Dios yachachihun nima pi yachashkanta, imashnami paypa ali kamachinanka kay allpapi. Shukkunatami yachachini chasna mana yapa asirtaypa yachachinakunawa. Uyashpankunapas mana asirtankakunachu. Rikushpankunapas mana yachankakunachu imaraykumi chayta rurani nishpa.

¹¹Chaymanta rimarka:

Chay yachachishkaynika kasnami ninayan: Muyuka ninayanmi Yaya Diospa shimin. ¹²Muyu ñampipi urmeshkaka ninayanmi: Shuk runakuna Yaya Diospa shiminta uyanahun alita. Chaymanta supayka shamushpan chay Yaya Diospa shimin uyashkankunata kunkachin. Chasnaka manana kasunahunchu kishpishka kanankunapa.

¹³Muyu samantasapapi urmeshkaka ninayanmi: Shuk runakuna Yaya Diospa shiminta kushilla uyanahun. Chay muyukunaka wiñarishpan mana

sumakta ankuyashkachu kanahun. Chasnashinami chay runakunaka shuk ratulla Yaya Diosta kushilla katinahun. Chaymanta ima kamanakunapas paykunata Yaya Diosmanta anchuchin manana payta kasunankunapa.

¹⁴Muyukuna kashasapapi urmeshkaka ninayanmi: Shuk runakuna Yaya Diospa shiminta munashpankunapas mana sakinayanahunchu ñawpa kawsashkankunata. Paykuna kay allpapi kawsanankunapa munashkankunallata yuyarishpa musparinahun. Yuyarinahun kay mundupi imankuna tiyashkankunallata, kullkillata munashpa, imankunata mirachinayashpa, chaymanta paykuna kikinllata kushichinankunapa yuyarishpa kawsanahun. Chay runakunaka tarpu mana muyuyakshina kashpankuna Yaya Diospa shiminta kunkarinahun.

¹⁵Shuk muyukuna, ali allpapi urmeshkaka ninayanmi: Shuk runakuna ali yuyaywa Yaya Diospa shiminta shunkunkunapi wakaychanahun. Chaymantapas mana sampayashpa kasushpankuna alikunata yuyarishpa rurashpa kawsanahun.

**Jesuska lamparinmanta
yuyachishpa yachachin
(Mk. 4.21-25)**

¹⁶Nima pi lamparinta apichishpan shitik awarishka tasawa tapamachu, nima kawitu ukuma tiyachimachu. Ashwan tiyachinchimi lamparin tiyachina awapi chay wasipi yaykuhukunata punchayachinanza. ¹⁷Chasnallata Yaya Diospa shimin yachachishkaynika lamparinshina punchayachin runakunata. Puntiru mana asirtashkankunata chaymanta tukuyta asirtankakuna.

¹⁸Chayrayku alita uyaychi rimayanita. Maykanmi alita uyashpan Yaya

Diospa shiminta kasun, payka ashwan suma yuyaytami kuy tukunka.
Maykanmi Yaya Diospa shiminta uyashpan mana kasunayanchu, payka uchillastu uyashkankunatapas kunkachiy tukunka.

**Jesuspa ayllunkuna paywa
kwintanapa shamurkakuna**
(Mt. 12.46-50; Mk. 3.31-35)

¹⁹Chaymanta Jesuspa maman wawkinkunapas paktamurkakuna paypa kahushkanpi. Yapa achka runakuna chaypi kahushkankunaryku mana atiparkakunachu kayllayanata. ²⁰Chaypi Jesusta rimarkakuna:

Mamayki wawkikikunapas kahunku-nami kanchapi, kanta chapahunkuna kwintanankunapa.

²¹Chasna rimashpankuna Jesuska aynirka:

Yaya Diospa shiminta uyashpa kasukkunami mamaynishina wawkini-kunashina kanahun.

**Jesuska sinchi wayrata sinchi
ulasta kasillayachirka**
(Mt. 8.23-27; Mk. 4.35-41)

²²Shuk puncha Jesuska runankunata rimarka:

Akuychi chimpashunchi kay kuchata. Botipi uraykushpankuna chimpahur-kakuna. ²³Chimpahushkankunapi Jesuska puñushpa rihurka. Chaypi sinchi wayra shamurka, atun ulaskuna shayarirkakuna kucha tapakta. Botinkunapi yakuka untarihushpan, ña tikrana-yahurkakuna. ²⁴Chaypina runankuna yapa mancharishpankuna Jesusta likchachishpankuna rimarkakuna:

¡Yachachik, ñami tikrahunchi!

Chaypi Jesuska likcharishpan wayrata, atun ulasta sinchi shimiwa rimarka:

¡Kasillayay wayra! ¡Kasillayay ulas!

Chasna rimashkanllawa pasarirka wayraka, ulaskunapas, manana ulasyar-kanachu. ²⁵Chasna pasachishkanwasha Jesuska runankunata rimarka:

¿Ñukawa kahushpaykichitatachu mancharinkichi? Sinchikuychi ñukapi.

Chasna uyashpankuna runankunaka yapa mancharishpa tapunakurkakuna paykunapura:

¿Pishi kay runaka? Rimashkanllawa wayra yakupas kasushpa kasillayana-hun.

**Jesuska supayyashka
runata ampirka**
(Mt. 8.28-34; Mk. 5.1-20)

²⁶Jesuska runankunawa pakta chay kuchata chimpashpankuna *Geresa allpama paktarkakuna. Geresa karka Galilea allpa chimpapi. ²⁷Paktashpankuna Jesuska botimanta allpama sikahushpan tinkunakurka chay llaktamanta shuk supayyashka runawa. Chay runaka llatan kawsapayan. Mana wasipi kawsapayanchu, wañushkaku-nata churana urku uchkupi kawsapa-yan.

²⁸⁻²⁹Jesuska chay supayyashka runata rikushpan paypi kahuk supayta rimarka:

Llukshiy kay runamanta nishpa.

Chasnallapi chay runaka Jesuspa puntanpi kunkurik shamurka, sinchita kaparishpan nirka:

¡Ay tukuymanta atun yachayyu Yaya Diospa Wawan Jesú! ¿imaraykuta ñukama shamushkanki? Kanta tapuni amara kastigawayrachu.

Unaymanta pacha chay runaka achka supaykunawa kawsapayan. Runakuna achka kuti makinta chakinta kadenaku-nawa sumakta watashpankunapas supaykuna payta sumakta amuyashpankuna kadenata pitishpan mitikupayan nima runa tiyashkama.

³⁰Chaypina Jesuska tapurka:

¿Ima shutita kanki?
Supayyashka kashpan kasna aynirka:
Shutinika kanmi Warankakuna
nishpa.

Yapa achka supaykuna paypi
kashkankunaryku chasna aynirka.

³¹Chay uras chay supaykunaka
Jesussta tapurkakuna:

Ama ñukanchita kachankichu chay
manchaypa uchkuma, maypimi
taparishka kashunchi.

³²Chay urkupi achka kuchikuna
mikuñlla kahurkakuna. Supaykunaka
tapurkakuna:

Ñukanchita kachay kawsananchipa
chay kuchikunapi.

Alimi, yaykuychi kawsanaykichipa
nishpa rimarka Jesussta.

³³Chaypina chay supaykunaka chay
runamanta llukshirkakuna kuchikunapina
kawsanankunapa. Chay kuchikunaka
kunkaymanta tukuy waykuma
kallpashpanguna pultyarishpa yakuma
urmarkakuna. Chaypina tukuy
chinkarirkakuna.

³⁴Chasna pasahushkakunata rikushpanguna
chay kuchita kuyrakkunaka mancharirkakuna.
Chaymanta llaktama kallparkakuna
tukuy wasikunapi rimak rinankunapa.
³⁵Chaypina runakunaka shamurkakuna
rikunkunapa shutipachu kuchikuna
chinkarishkakuna manachu nishpa. Jesú
kahushkanpi paktashpanguna chay runa,
maykanmantami supaykunaka llukshishkakuna,
suma churarishka, ali yuyaywana

Jesuspa kuchunpi tiyahuktá tarirkakuna.
Chasna payta rikushpanguna mancharirkakuna.
¿Imanachishkashi kay runata?
nishpa yuyarirkakuna. ³⁶Chay Jesuspa
rurashkanta rikuk runakunaka kwintarkakuna,
imashnami chay runaka supaykunamanta
ampirishka. ³⁷Chaymanta tukuy
Geresa allpapi kawsak runakuna mancharishpanguna
Jesussta rimak shamurkakuna:

Anchuriy ñukanchimanta.

Chasna nishpanguna Jesuska botipi
uraykushpan runankunawa pakta
kutirka.

³⁸⁻³⁹Chasna rihushpanguna chay
ampirishka runaka Jesuswa rinayarka.

Ñukapas rinayani kanwa nishpa
rimarka.

Jesuska mana munashpan nirka:

Llaktaykima kutiy rimak rinaykipa
imashnami Yaya Dioska kanta ampishka
nishpa.

Chasna rimashpan chay runaka
llaktanma kutishpan tukuy runakunata
kwintak rirka Jesuska ñiami
ampiwashka nishpa.

**Jesuska Jairopa wawanta
kawsachirka, shuk unkushka
warmita ampirka**
(Mt. 9.18-26; Mk. 5.21-43)

⁴⁰Jesuska *Gerasa allpamanta kucha
chimpama kutirka. Chaypi paktashpan
achka runakuna payta chapahurkakuna
kushikushpa tinkunankunapa. Ali
yuyaywa payta kayarkakuna.

⁴¹Chaypi tantarina wasipi shuk
kamachik Jairo shutiyu Jesussta
kayllayak shamurka. Chay Jairopa
shuklla warmi wawan chunka ishkay
watayu wañuhurka. Chay runaka
Jesuspa puntanpi kunkurik shamurka.
Chaypi rimarka:

Yachachik, kanta tapuni wasinima
rinaykipa. ⁴²Shuklla warmi wawayni ña
wañuhun.

Jesuska Jairowa pakta rihushpan
achka runakuna tankanakushpa
kichikta paykunawa pakta rihuarkakuna.
⁴³Chay runakunapa chawpinpi
shuk unkushka warmipas rihuarka.
Chunka ishkay watata paymanta tukuy
uras yawarka urmapayan. Nima pi
atipapayanchu chay warmita ampinata.
Tukuy imankunata tukuchirka ampiKKuna
nata pagashpan. ⁴⁴Chay warmika

Jesuspa washanmanta kayllayashpan churarishkan shimi puntata llankarka. Chasna llankashkanllapi yawarnin urmahushkaka pitirirka.⁴⁵Chaypi Jesuska rimarka:

¿Pitaya llankawashka?

Karan shuk rimarka:

Ñukaka kanta mana llankashkanichu.

Chaypi Pedroka rimarka:

Yaya Jesús, kay tukuy runakuna muyukta tankanakushpa kahushpanku-nami kanta llankashkakuna. ¿Imarayktaya tapunki ñukanchita pita llankawashka nishpa?

⁴⁶Chasna aynishpankuna Jesuska rimarka:

Musyani yachayniwa ampiشكaynita. Chayrayku yachani, maykanmi llankawashka chaytami ampiشكان.

⁴⁷Chaymanta chay ampirishka warmika Jesús ña yachashka nishpan chukchurishpa kayllayak shamurka. Jesuspa puntanpi kunkurik shamushpan tukuyupa uyashkanpi rimarka:

Yapa unkushka kashpaynimi churarishkaykita llankashkani. Chay llankashkaynillawami ampirishkani.

⁴⁸Chaypi Jesuska rimarka:

Panini, ñuka kanta ampinaynita yuyarishpa ñukama shamushkaykirayku ñami ampirishka kanki. Kushilla riy. Ama manchankichu.

⁴⁹Jesús chasna rimahushkanllapira chay tantarina wasipi kamachik Jairopa shuk runan wasinmanta payta rimak shamurka:

Ña wawaykika wañushka. Ama yankamanta pushamuychu kay yachachikta.

⁵⁰Chayta uyashpan Jesuska Jairota rimarka:

Ama mancharinkichu. Ñukallapi sinchikuy. Chasna ñukapi sinchikushpayki wawaykika kishpichiay tukunka.

⁵¹Wasinpi paktashpankuna Jesuska mana munarkachu tukuy yaykunanku-

napa. Pedro, Juan, *Santiago, chay wawapa yayankuna, paykunalla paywa pakta yaykurkakuna.⁵²Tukuy wañushkata rikunapa shamuhukkunaka kanchapi sinchita kaparishpa wakahurakuna. Paykunata Jesuska rimarka:

Ama wakaychichu. Kay warmi wawaka manami wañushkachu, puñuhunmi nishpa.

⁵³Shutipa wañushka kashkata yachashpankuna Jesusta asichirkakuna.⁵⁴Jesuska chay wawapa kwartunpi yaykushpan wañushkata makinmanta apishpan sinchita rimarka:

Shipas, atariy.

⁵⁵Chasna rimashkanllapi chay wañushka shipaska kawsarishpa atarimurka. Chaypina Jesuska rimarka:

Karaychi.

⁵⁶Chayta rikushpankuna chay shipaspa yayan mamanpas yapa kushikurkakuna. Chaypina Jesuska paykunata rimarka:

Ama rimankichichu nima pita kay wawaykicha wañushkanmanta kawsachishkaynita nishpa.

Jesuska chunka ishkay akllashkan runankunata kacharka Yaya Dios ña runakunata kamachinata kallarihushkanmanta yachachinankunapa

(Mt. 10.5-15; Mk. 6.7-13)

9 ¹Shuk puncha Jesuska chay chunka ishkay runankunata tantachishpan yachayta kurka atipanankunapa runakunamanta supaykunata llukshchinata, unkushkakunatapas ampinata.

²Chaymanta paykunata rimarka:

Yachachik riychi Yaya Diospa ali kamachinan kay allpapi ña kallarishkanmanta. Unkushkakunatapas ampinkichi.

³Kachahushkanpi rimarka:

Rihushpaykichi ama apankichichu nima tulata, nima bulsaykichita, nima

mikunaykichita, nima kullkikichita. Shuk churarishkaykichillawa riychi. ⁴Shuk wasipi yaykushpaykichika chay wasillapi kipariychi shuk llaktama rinaykichikama. ⁵Shuk llaktapi paktash-paykichi chay runakuna Yaya Diospa shiminta mana uyanayashpankunaka kankunata mana kayankakunachu wasinkunapi. Chasna rurashpankunaka chay llaktamanta llukshiychi kasna nishpa: Yaya Dios kankunataka kastigankami, paypa shiminta mana uyanayashkaykichirayku. Chasna rimaychi yachanankunapa imamantami kastigay tukunkakuna.

⁶Jesús chasna rimashpan chay runankunaka llukshirkakuna. Tukuy llaktakunama rishpankuna Yaya Diospa suma ali shiminta Jesukristu runakunata kishpichinanmanta yachachishpa, unkushkakunatapas ampishpa purirkakuna.

**Apu Herodes yachanayarka
pimi kan Jesuska
(Mt. 14.1-12; Mk. 6.14-16)**

⁷Apu *Herodeska chay uras Galilea allpapi kamachik kashpan tukuy imashnami Jesús rurahushkanta uyashpan mana yacharkachu imatami yuyarinka. Shukkunaka Jesusmanta rimarkakuna: Chay Jesuska Bawtisak Juanchari, wañushkanmanta kuti kawsarimushka. ⁸Shukkunaka rimarkakuna: Chay runaka ñawpa Yaya Diospa yachayninwa yachachik Eliaschari, maykanmi kuti shamunan karka Kishpichikka manara shamuhushpan. Shukkunaka rimarkakuna: Shuk ñawpa Yaya Diospa yachayninwa yachachikkunamantachari kawsarimushka. ⁹Herodeska rimarka: Ñuka kikinmi kamachirkani Juanpa umanta pitinan-kunapa. ¿Paychu kawsarimushka? ¿Pishi kan chay runaka? Paymanta

runakunaka kwintawanahun achka alikunata rurashkanta nishpa. Chayrayku yapa Jesusta rikunayarka.

**Jesuska pichka waranka
runakunata kararka
(Mt. 14.13-21; Mk. 6.30-44;
Jn. 6.1-14)**

¹⁰Kutimushpankuna chay chunka ishkay Jesuspa *apostolninkunaka payta kwintak shamurkakuna imatami rurashkakuna. Chaypi Jesuska paykunallata pushashpa rirkka samanankunapa nima pi kawsahushkama Betsaida llakta kuchupi. ¹¹Chayta yachashpankuna achka runakuna Jesusta katirkakuna. Katihushkakunata Jesuska kushilla kayashpan yachachirkira Yaya Diospa ali kamachinan kay allpapi ña kallarishkmanta. Chaymantapas tukuy chaypi unkuywa kahushkakunata ampirka.

¹²Ña chishiyahushpan chay chunka ishkay runankunaka payta kayllayashpankuna rimarkakuna:

Kachay kay achka runakunata, kay kuchullapi kahuk llaktakunama rishpankuna puñunkunata mikunankunata maskak rinankunapa. Kaypika manami nima shuk runa kawsanchu.

¹³Chaypi Jesuska aynirkaka:
Kankuna karaychi kay runakunata.
Paykunaka aynirkakuna:

Pichka panstu, ishkay challwastulla tiyan ñukanchipaka. Mana kaystullaka paktankachu kay tukuy runakunaraykuka. ¿Rantik rinchimachu ashwanta?

¹⁴Chaypi karkakuna pichka waranka parti runakuna.

Chaymanta Jesuska runankunata nirka:
Paykunata rimaychi tiyarinankunapa,
karan shuk muntun pichka chunka
pichka chunka.

¹⁵Jesuspa rimashkanta kasushpankuna runankunaka tukuy chay runakunata chasna tiyachirkakuna.

¹⁶Chaypina Jesuska chay pichka panta ishkay challwatapas apishpan siluma rikushpan Yayan Diosta agradesirka.

Agradesishkanwasha chay mikunata paki paki rurashpan runankunata kurka chay runakunata karanankunapa.

¹⁷Tukuy saksakta mikurkakuna. Chaywasha puchurishkankunata tantashpankuna chunka ishkay tasata untachirkakuna.

**Pedro Jesusta Yaya Diospa
Kachashkan Kishpichikmi kanki
nishpa rimarka**

(Mt. 16.13-28; Mk. 8.27-9.1)

¹⁸Shuk puncha Jesuska chunlla kahushkapi Yayan Diosta mañarka. Runankunalla paywa pakta kahurkakuna. Chaypina paykunata tapurka:

Runakuna kwintahushpankuna ¿pimi kani ninahuntaya? nishpa.

¹⁹Chaypi paykunaka aynirkakuna: Shukkunaka ninahunmi Bawtisak Juanchari wañushkanmanta kawsarishka kanaykita. Shukkunaka ninahunmi, Yaya Diospa yachayninwa ñawpa yachachik Eliaschari kanaykita, maykanmi kuti shamunan karka. Ashwan shukkunaka ninahun, shuk ñawpa Yaya Diospa yachayninwa yachachikchari wañushkanmanta kawsarishka kanaykita.

²⁰Chaypi Jesuska paykunatana tapurka:

Kankunaka ¿pi kanaynitata yuyarinkichi?

Chayllapi Pedroka aynirka: Kanmi kanki Yaya Diospa Kachashkan Kishpichik.

²¹Pedro chasna nishpan Jesuska paykunata rimarka:

Nima pita chayta rimankichirachu.

²²Chaymantapas rimarka:

Ñuka Yaya Diospa Kachashkan Runaka achkata parisinayni tiyan.

Ñukanchita kamachik israel masinchi rukukuna, *saserdote kunapa apunkuna, Moisespa killkashkanta yachachikkunapas chikniwashpankuna wañuchiwankakuna. Wañushpaynipas kimsa punchamantami Yaya Dioska kawsachiwanka.

²³Chaymanta tukuy payta katihuk runakunatana rimarka:

Kankuna katiwanayashpaykichika ama kankuna kikin munashkaykichita ruraychichachu. Chiknik runakuna kankunata piñarishpa wañuchinayahushpankunapas karan puncha ñukallata mana sakishpa katiwaychi. ²⁴Maykanmi wañuyuta manchashpan sakiwan, manana atipanchu ñukawa wiñaypa kawsanata. Maykanmi mana sakishpa katiwhushpan chiknina wañuytapas parisin, chayka wiñaypami Yaya Dioswa kawsanka. ²⁵¿Imata valin shuk runa tukuy kay mundupi tiyashkata apinanpa? Tukuy chaykunaka mana yanapanchu wiñaypa ñukawa kawsanana.

²⁶Chasnallatata maykanmi runakunapa puntanpi pinkan ñukata katiwhushpan rimanata, shiminítapas yachachinata, chay runataka ñukapas, kay allpama kutimuhushpayni rimasha mana ñukapa kananta. Chay punchaka ñuka Yaya Diospa Kachashkan Runaka shamusha punchahlla rikurishpa, paypa atun yachayninwa paypa *angelkunawa pakta. ²⁷Alita uyawaychi. Shuk kankunamanta kaypi kahukkunaka manara wañuhushpaykichira Yaya Dios kay allpapi kamachihushkanta rikunkichimi.

**Jesuska suma chuyahlla
rikunayu tukurka**

(Mt. 17.1-8; Mk. 9.2-8)

²⁸Pusak puncha chasna rimashkanwasha Jesuska Pedrota, Juanta, *Santiago-tapas pushashpan shuk urku awama sikarka Yayan Diosta mañananpa.

²⁹Mañahushkanllapi uyanka chikanya-murka, intishina punchayachirka.

Churarishkanpas yura chuyahlla sintihukschina rikurirka.³⁰Chaypina ishkay runakuna rikurik shamurkakuna Jesuswa kwintanankunapa. Chaykunaka karkakunami ñawpa yachachikkuna Moisés Eliaspas.³¹Yaya Diospa kachashkan suma chuyahlla kahushka chawpipi rikurishpankuna kwintahurkakuna imashnami Jesuska Yaya Diospa munashkanta paktachishpa Jerusalenpi wañunka nishpa.³²Pedro paywa kahukkunapas yapa puñunayawa kashpankunapas likcharishka kiparirkakuna. Chaypi Jesús suma chuyahlla kahushkata rikurkakuna, chay ishkay runakunatapas paywa pakta shayahukkunata rikurkakuna.³³Chay ishkay runakuna Jesusmanta anchuriushpankuna Pedroka yapa suma kahushkakunata rikushpan mancharishpa rimarka:

Yachachik, alitami kaypi kahunchi. Ruranchima kimsa tampustuta, shukta kanrayku, shukta Moisesrayku, shukta Eliasrayku nishpa.

Payka mana alita yuyarishpan chasna rimarka.

³⁴Chasna rimahushkanlapi puyuka llantuyachishpan llantupina kiparirkakuna. Chay puyu ukupi yaykuhushpankuna mancharirkakuna.³⁵Chay puyu ukumanta uyarkakuna Yaya Diospa rimahushkanta:

Kaymi kan Wawaynika. Paytami akllashkani kankunama kachanaynipa. Payllata kasuychi.

³⁶Chasna rimashkanwashalla Jesusta sapallan kahukta rikurkakuna. Chaymanta paykunaka nima pita rimarkakunarachu maykantami rikushkakuna.

Jesuska supay unkuchishka wawata ampirka (Mt. 17.14-21; Mk. 9.14-29)

³⁷Chay kayantima urkumanta urayku-muhushpankuna achka runakuna

Jesusta tinkuk rirkakuna.³⁸Chaypi kahukkunapa chawpinkunamanta shuk runaka sinchita rimashpan tapurka:

Yachachik, kanta tapunayani llakichinaykipa wawaynita. Payka shuklla wawaynimi.³⁹Paypi shuk supay yaykushpan kunkaymanta kaparichin. Payta chukchuchin, putsku shimin-manta llukshinankama. Yapa nanaykunata parisichin, wawaynita mana sakinayanchu.⁴⁰Runaykikunataka ñami tapushkani supayta llukshichipanankunapa wawaynimanta. Chasna tapushpaynipas mana atipashkakunachu llukshichinata.

⁴¹Chaypi Jesuska aynirka:

Mana ali yuyayyu runakuna, kankunaka manami sinchikunkichichu ñukapi. ¿Ima uraskamanataya kankunata yachachishpalla kiparisha?

Chaymanta wawapa yayanta rimarka:
Wawaykita apamuy ñukama nishpa.

⁴²Chay wawaka kayllayahushpan supayka alppama urmachishpan yapa kuchpachirka. Chaypi Jesuska supayta sinchi shimiwa kamachirka llukshinanpa chay wawamanta. Chasna chay wawata ampirka. Ña ampirhan yayanta kurka.⁴³Tukuy chaypi kahukkunaka yapa kushikurkakuna, Yaya Diospa suma atun yachaywa rurashkanta rikushpankuna.

Jesuska kutikashka rimarka wañunanmanta (Mt. 17.22-23; Mk. 9.30-32)

Chasna kushikushpankuna Jesús yachayninwa rurashkanta rikushpankuna payka runankunata rimarka:

⁴⁴Kay rimanaynita alita shunkuyki-chipi wakaychaychi. Ñuka Yaya Diospa Kachashkan Runa kashpaynipas chikniwak runakunaka apichiwashpankuna parisichishpa wañuchiwankakuna.

⁴⁵Alita rimashpa yachachishpantata runankunaka mana asirtarkakunachu

chasna pasananta. ¿Imatashi chasna nishka? nishpa yuyarirkakuna. Yaya Dios yuyayinkunata tapachirka, chay Jesuspa yachachishkanta manara asirtanankunapa. Chaymanta pinkarkakuna Jesusta tapunata rimashkanmanta.

**Jesuska yachachin maykanmi
tukuymanta ashwan yachayyu kan**
(Mt. 18.1-5; Mk. 9.33-40)

⁴⁶Chaymanta Jesuspa runankunaka paykunapura rimanakurkakuna, pishi ashwan yachayyu kan paykunamanta nishpa.

⁴⁷Jesuska yuyarihushkankunata yachashpan shuk wawata makinmanta apishpan paypa kuchunpi shayachirka.

⁴⁸Chaypi runankunata rimarka:

Maykanmi yuyawashpan shuk wawata yuyashpan wasinpi yaykuchin, chayka ñukatami yaykuchiwan. Maykanmi ñukata yaykuchiwan, paymi kachawak Yayayni Diostapas yaykuchin. Chayrayku maykanmi tukuy kankunamanta ashwan mana valikshina kan, paymi yapa valik kan.

⁴⁹Chaymanta Juanka rimarka:

Yachachik, shuk runata rikushkanchi shuk runamanta supayta llukshichihukta, Jesús atipachiwashpan kanta kamachini llukshiy nishpa. Payka mana ñukanchiwa purikchu kan. Chayrayku rimarkanchi ama chasna rurankichu nishpa.

⁵⁰Chaypina Jesuska payta rimarka:

Ama chasna rimaychichu chay runata. Maykanmi kankunata mana chikninchu, chayka kankunata sumakta yanapahun.

**Jesuska mana munarkachu
samaritano runakunata kastiganata**

⁵¹Chaypina Jesús siluma kutinan punchakuna ña paktarishpan payka nima imata manchashpan Jerusalenma rirka. ⁵²*Samaria allpapi paktashpan-

kuna Jesuska ishkay runankunata kacharka shuk llaktama wasita maskanankunapa, chaypi puñunankunapa. ⁵³Chay llaktapi kawsak runanaka Jesusta mana yaykuchinayarkakunachu, Jerusalenma rihushkanrayku.

⁵⁴Jesuspa runankunaka *Santiago Juanpas chayta rikushpankuna nirkakuna:

Yachachik ¿munankichu rimanchipa silumanta nina urmananpa kay llaktapi kawsak runakunata rupachinpana?

⁵⁵Chasna nishpankuna Jesuska tikrarishpan chay ishkantita piñashpa rimarka:

Kankunaka mana yachankichichu imashnami shunkuykichika kanahun. Ñuka mana shamushkanichu runanata wañuchinaynipa, ashwan kishpichinaynipami shamushkani.

⁵⁶Chaymanta shuk llaktamana rirkakuna.

**Jesuska shuk runakunata
rimarka imashnami payta
katinankuna tiyan**
(Mt. 8.19-22)

⁵⁷Ñampita rihushkankunapi shuk runa kayllayashpan Jesusta rimarka:

Maytapas rishpayki kanta katinayani nishpa.

⁵⁸Chaypi Jesuska aynirka:

¿Imatata yuyarishpayki katinayawanki? Kankunata rimani, mahaskunapa tyian uchkunkunaka, maypimi kawsanahun. Pishkukunapapas tyian wasinstukunaka, maypimi samanahun. Ñuka Yaya Diospa Kachashkan Runapaka mana nima ima tiyawanchu maypimi samasha.

⁵⁹Chaymanta shuk runata Jesuska rimarka:

Ñukata katiway.
Payka aynirka:

Yachachik, chapawankira yayayni wañushkata urku uchkupi churanayinkama. Chaywasha shuti kanwa risha.

⁶⁰Chayta rimashpan Jesuska aynirka:

Yaya Diospa shiminta mana kasunayakkunaka wañushkakunashina kashpankuna paykuna chay wañushkakunata urku uchkupi churashpa tapanahuchun. Kanka runakunata yachachikri Yaya Diospa ali kamachinan kay allpapi ña kallarishkanmanta nishpa.

⁶¹Chaymanta shuk runaka Jesusta rimarka:

Yachachik, ñukapas kanta katinayani. Chapawankira aylluynikunata rimak rishara kanwa rinaynita.

⁶²Chasna nishpan Jesuska aynirka:

Shuk runa kanuwanpi kawishpa riushpanka manami washanma rikushpa rinmachu. Chasna rihumaka, shuk ratu kaspipi takarishpan tikrama. Chasnallatatum shuk runa ñukata katiwahukka tukuy shunkunmanta pacha munashpa katiwanan tiyan. Nawpa rurashkaykitashina ruranayashpaykika chasnaka manami valinkichu Yaya Diospa ali kamachihushkanpi kawsanaykipa.

**Jesuska kanchis chunka
runakunata kacharka**

10 ¹Chaymanta yachachishkanwasha Jesuska yuyarirka achka llaktakunama rinata. Manarapas riushpan kanchis chunka runakunata akllashpan kacharka paymanta puntiru rinankunapa. Ishkay ishkayta kacharka runakunata yachachinankunapa.

²Kachahushpan rimarka: Rikuychi, shuk atun chakrapi tarpu tuyukuna pukushka kashpanka achka runakunata munanchi utkalla pallanankunapa, mana ismunanpa. Chasnallatata achka kay allpapi kawsak runakuna Yaya

Diospa shiminta uyashpankuna kirinkakuna. Chasna kashpanpas mana achka yachachikkuna tiyanchu. Chayrayku Yaya Diosta mañaychi kachananpa ashwan paypa shiminta yachachikkunata. ³Kunan riychi. Kankunata kachahuni obeha wawakunatashina pumakuna chawpipi. Achka llaktakunapi purishpaykichi runakunaka kankunata chikninkakuna. Chayrayku ñukapi sinchikuychi. ⁴Rihushkaykichipi ama apaychichu bulsata, kullkita, nima chakikichirayku ashwan shuk churarnata. Ñampipi shuk runata tinkushpaykichika ama shayarinkichichu kwintayaykichipa.

⁵Shuk wasipi yaykushpaykichi chay wasipi kahushkakunata puntiru rimankichi Yaya Dios kankunata yanapachun wiñaypata kushilla kawsanaykicipa nishpa. ⁶Chasna kushilla kawsanata munashpankunaka Yaya Dios chay rimashkaykichita paykunaryaku paktachinkami. Mana munashpankunaka Yaya Dios paykunaryaku mana paktachinkachu. ⁷Maykan wasipimi kankunata kayanahun, chay wasillapi kipariychi. Ama puñuk riychichu shuk wasipi shuk wasipi. Imatachari karanahun upyachinahun, chayta mikuychi upyaychi. Shuk tarawak runaka munanmi pagay tukunata. Paykunaka chay mikunawami kankunata paganahun, Yaya Diospa shiminta yachachishkaykichirayku.

⁸Shuk llaktapi paktashpaykichi shuk runakunapas kankunata kayankakuna. Imatas kankunata karahushpankunaka mikuychilla. ⁹Chaypi unkushka kahukkunata ampiychi. Yachachihushpaykichi rimaychi ñami kallarihu Yaya Diospa ali kamachinanka kay allpapi nishpa.

¹⁰Shuk llaktapi paktashpaykichi chaypi kawsak runakuna kankunata mana

yaykuchinayashpankunaka kanchama llukshishpaykichi rimankichi:¹¹ Yaya Dios kankunata kastigankami, paypa shininta mana uyanayashkaykichirayku. Ñukanchita mana yaykuchinayashpankichipas kay rimananchita alita uyaychi ñami kallarihun Yaya Diospa ali kamachinanka kay allpapi nishpa.¹² Kunkunata rimani, Yaya Dios shuk puncha sinchita kastiganan tiyan chay llaktapi kawsak runakunata. Ñawpa Sodoma llaktapi millaypata rurak runakunamanta pasatami Yaya Dioska paykunata kastiganka.

**Jesuska mana kasunayak
runakunata rimarka**

(Mt. 11.20-24)

¹³Jesuska rimashpalla katirka: Ay kankuna Korasín llaktapi kawsak runakuna. Ay kankuna Betsaida llaktapi kawsak runakuna. ¡Imashna kastigushi kankunaryku kanka! Kankunawa kashpayni atun yachaywa achka ruranakunata rurashpaynipas kankunaka Yaya Diosta mana kasunayashkankichichu. Chay Yaya Diospa mana akllashkan Tiro llaktapi, Sidón llaktapi kawsakkuna rikunahuma karka atun yachaywa rurashkaynikunata, Yaya Diosta kasunahuma karka. Chay urasllapi paykunaka yapa pinkaywa llakirishpankuna wakanahuma karka, millaypa rurahushkankunata sakishpankuna alitana ruranakunapa.¹⁴ Yaya Dioska kastiganan punchapi Tiro, Sidón llaktakunapi kawsak runakunamanta kankuna Korasín, Betsaida llaktakunapi kawsak runakunata ashwan sinchita kastiganka.¹⁵ Kankuna Kapernaum llaktapi kawsak runakuna ¿imaraykuta yuyarinkichi Yaya Dios ñukanchita siluma pushanka nishpa? Mana chasnachu. Nina mana wañukmami rinaykichi tiyan, ñukata mana kiriwashkaykichirayku.

¹⁶Chaymanta Jesuska kachanan runakunata kutikashka rimarka:

Maykanpas kankunata uyashpankunaka ñukatapas uyawanahun. Maykanpas rimahushkaykichita mana uyanayanchu, ñukatapas mana uyanayawanchu. Chasnallatata ñukata mana kasunayak runaka kachamuwashka Yaya Diostapas mana kasunchu nishpa.

**Chay kanchis chunka ishkay
Jesuspa kachashkan runankuna
kutirkakuna**

¹⁷Chaymanta chay kanchis chunka ishkay Jesuspa kachashkan runankuna achka llaktakunapi yachachishpa purirkakuna. Chaypina yapa kushilla kutishpankuna Jesusta kwintarkakuna:

Yaya Jesús, kan ñukanchita atipachishpayki rimashpanchi supaykunapas ñukanchita kasushpankuna runakunamanta llukshishkakuna.

¹⁸Chasna chay runakunata kwintashpankuna Jesuska rimarka:

Ari, ñuka kankunata atipachishpay-nimi supaykunata winsishkankichi. Chasnashpaykichi rikushkani supaykunapa atun apunkunata rayushina silumanta urmahushkata.¹⁹ Chay supaykuna machakuya uputinti sulimanwa waklichikshina kankunata shunkuykichi waklichinayanahun. Ñuka kankunata atipachishkani tukuy supaykunata winsinaykichi, kankunata mana imanachinankunapa.²⁰ Yapa achkata kushikunkichi supaykunata runakunamanta llukshichishkaykichirayku. Kankunata rimani, ashwanta kushikuychi shutikichika silipi killkarishka kashkankunaryku wiñaypa Yaya Dioswa kawsanaykichi.

**Yaya Diospa Espíritun Jesusta
kushichirka**

(Mt. 11.25-27, 13.16-17)

²¹Chasna chay runakunata rimashpan Yaya Diospa Espíritun Jesusta

sumakta kushichirka. Chaypina Yayan Diosta rimarka: Yayayni, yapa alimi kanki. Atun yachaykiwa silipi allpapi-pas kamachikmi kanki. Kushikunimi mana yachakchu kani nishpa yuyarik runakunallata yachaykita asirtachish-kaykirayku. Chay yachak kanankunata yuyarik runakunata mana asirtachish-kankichu yachaykita. Ari Yayayni, kan kikin munashkaykirayku chasna rurashkanki.

²²Yayanta chasna mañashkanwasha runankunata rimarka: Yayaynimi rimawarka ñukalla tukuya kamachi-naynipa. Payllami ñukata alita riksiwan. Kankunaka manami alitachu riksiwankichi. Chaymantapas Yaya Diospa Wawan kashpayni ñukallami payta alita riksiwi-imashnami kan. Maykankunallatami ñuka riksichini, paykunallami Yayayni Diosta riksinkakuna.

²³Chaymanta runankunallawana kahushpan rimarka: Kushilla kankakuna kankunashina rurahushkaynita rikukkuna, yachachihushkaynita uyakkunapas.

²⁴Kankunata rimani, ñawpa Yaya Diospa yachayninwa yachachikkuna, achka apu wañukunapas ruranaynita yapa rikunayarakuna, yachachinaynita yapa uyanayarkakuna. Tukuy paykunaka mana rikuwash-pankunara mana uyawashpankunara wañurkakuna.

**Jesuska ali yanapak samaritano
runamanta yuyachishpa yachachin
(Mt. 19.16, 22.35-40; Mk. 12.28-34)**

²⁵Chaymanta shuk puncha Moisespa killkashkanta shuk yachachikkra Jesusta kayllayashpan tapurka:

Yachachik ñimata rurashpaynita atipaynima Yaya Dioswa silipi wiñaypa kawsanata?

²⁶Jesuska aynirka:

Chay ñawpa Yaya Diospa killkachish-kanpi ñimatata ruranaykipa riman?

²⁷Chay runaka aynirka:
Tukuy shunkuykimanta pacha
Yayayki Diosta sumakta yuyashpa,
sumakta munashpa kawsanayki tiyan.
Payta yuyahushpaykika alikunata
yuyarishpa rurashpa kawsanayki tiyan.
Chaymantapas runa masikunata
yuyay kan kikitashina nishpa.

²⁸Chaypina Jesuska aynirka:
Alitami ayniwashkanki. Tukuy
rimawashkaykita rurashpaykika Yaya
Dioswa silipi wiñaypa kawsak rinkimi.

²⁹Chay yachachikka runa masinta
mana yuyahushpanpas yuyanata
munakshina tukushpan Jesustana
tapurka:

¿Maykan runataya kan runa masinika
payta yuyanaynipa?

³⁰Chaypina Jesuska yuyaynimanta
shuk kwintuwa yuyachishpa aynirka:

Shuk runa Jerusalén llaktamanta
Jerikó llaktama rirkta. Ñampipi
rihushpan shuwakuna payta tinkurka-kuna. Chaypi tukuy paypa tiyapush-kanta kichurakakuna charishkankunta-tapas. Kaspiwa waktashpankuna lismayachishpa wañushkatashina sakimurkakuna.

³¹Chay uraslla shuk *saserdote shamuhurka chay ñampillatata.
Rikuhushpan chay makashka runa wañuhukta, mana yanapanayashpan karullata pasarka. ³²Chaymanta *Yaya

Diospa wasinpi saserdoteta shuk yanapak pasarka chay ñampillatata. Pay ñawpa kawsak Levipa miraymanta karka. Wañushkatashina rikushpan karullata pasarka. ³³Chaymanta *Samariamanta runa shamurka chay ñampillatata. Chay lismayashkata rikuhushpan yapa llakichirka. ³⁴Kayllayashpan chay runata, uchillastu *vinuta uchillastu aseitewa chapushpan pitirish-kankunata kakurka ampirinanpa. Chaymanta llachapawa wankupurka.

Atarichishpan sikachirka pay kikinpa burrun awapi. Shuk pufuna wasima pushashpan sirichik rirk auyanapana.³⁵ Kayantima chay Samariamanta runa shuk llaktama rihushpan wasi amuta kullkita pagashpan rimarka: Kuyrapanki kay unkushka runata. Kay kullki kuskaynimanta ashwanta gastashpaykika kutimushpayni kutichishkaykinishpa.

³⁶Chaypina Jesuska chay yachachikta tapurka:

Kunanka yuyariy. Chay kimsa runaku-namanta ¿maykanta chay shuwakuna lismayachishkata yuyak runa karka?

³⁷Chaypina chay runaka aynirka:

Chay llakichishpan yanapak runami makarishka runata sumakta yuyarka.

Chasna aynishpan Jesuska rimarka:

Kanpas chay yanapak runashina tukuy runa masikikunata yanapashpa kawsay.

**Jesuska Martapa Mariapa wasinpi
yaykushpan yachachirka**

³⁸Jesús runankunawa ñampita rihushpan shuk uchillastu llaktapi paktarka. Chaypi shuk warmi Marta shutiyu Jesusta kushikushpa wasinpi yaykuchirka.

³⁹Martapa tiyarka shuk ñañan Maria shutiyu. Mariaka Jesupsa chakin kuchupi tiyaturka yachachihushkanta uyananpa. ⁴⁰Chaykama Martaka mikunata yanuhurka Jesusta karananpa. Achkata tarawashpa musparihurka.

Chaypina Martaka Jesusta rimarka:

Yachachik ¿manachu llakichiwanki? Ñañaynka sakishka tukuya sapallayni ruranaynipa. Rimay payta yanapak shamuwananpa.

⁴¹Chasna nishpan Jesuska aynirka:

Marta, Marta, musparishpa kahunki chay tukuy imakunata ruranaykipa.

⁴²Tarawanaykimanta ashwan ali kama, yachachihushkaynita yachakunaykipa.

Mariaka alita yachakuhun. Mana munanichu yachakuhushkanta sakinanpa. Kay yachakuhushkantaka nima pi kichunkachu.

**Jesuska yachachin imashnami Yaya
Diosta mañashunchi**

(Mt. 6.9-15, 7.7-11)

11 ¹Shuk puncha Jesuska Yayan Diosta mañahurka. Mañanata tukuchishpan shuk runan kayllayashpa rimarka:

Yaya Jesús, ñukanchitapas yachachiy Yaya Diosta mañanata imashnami Bawtisak Juanka runankunata yachachirka.

²Chasna tapushpan Jesuska rimarka: Mañahushpaykichi kasna ninkichi:

Yaya Dios, kanllami kanki yayan-chika.

Yanapay tukuy runakuna kanta yapa ali kanaykita yuyanankunapa.

Kay allpata ali kamachinaykita ruray.

³ Karan puncha ñukanchita kuy mikunanchita.

⁴ Yaya Dios, ñukanchita llakichiy mana alita rurashkanchikunamanta. Chasnallatata ñukanchipas runa masinchikunata llakichinchi tukuy ñukanchita mana alita rurashkankunamanta.

Ama sakiychu supay ñukanchita pantachichisha nishpa sinchita kamashpan mana alikunata rurananchipa, ashwan kishpi-chiy ñukanchita tukuy millay-pakunamanta.

⁵Jesuska ashwanta asirtachinayashpan shuk yachachinata rimarka:

Akuychi yuyarishunchi. Shuk munashkayki amigu tiyashpanka chawpi tutapi wasinma tapuk rinkima: Wawkinistu,

shuk uchillastu mikunaykita kuway.
⁶Kunalla shuk wawki karumanta
 wasinipi paktamushka. Mana tiyawan-
 chu mikunaynika karanaynipa. ⁷Payka
 wasin ukumanta rimama: Ama killachi-
 waychu. Punkuka sumaktami
 taparishka. Wawaynikunaka puñuhun-
 kunami ñukawa. Mana atipanichu nima
 imata kanta kunata.

⁸Kankunata rimani: Yuyashkan
 amigun kashpantata mana kushpanka
 ¿manachu atarishpan kuma maykantami
 munahun mana ashwanta killachiy
 tukunanza?

⁹Chayta yuyachishpa rimani, munash-
 kaykichita tapuychi Yaya Diosta, payka
 kankunata kunkami. Yaya Diosta
 maskashpaykichika payta tarinkichimi.
 Paypa kamachinanpi yakyunayashpa
 punkupi kayahuksina kashpaykichi
 Yaya Dioska kankunata yakyuchinkami.
¹⁰Maykanmi tapun, paytaka kunkami.
 Maykanmi maskan, tarinkami.
 Maykanmi punkupi kayan, payraykuka
 paskankami.

¹¹Shuk wawa yayanta challwata
 tapushpanka yayanka mana kumachu
 shuk machakuyata mikunarpa. ¹²Chasnallata
 shuk lulunta tapushpanka
 lulunranti mana kumachu uputintita
 mikunarpa. ¹³Kankuna mana alita
 rurashpa kawsakkuna kashpaykichipas
 wawaykicha alikunallata kunkichi.
 Ashwan silipi kawsak Yayanchi Dios
 suma ali shunkuyuta tapushpaykichika
 kankunata paypa Espirituntami kunka.

Runakuna yanka rimarkakuna
 Jesuska supaypa yachayninwami
 kahun nishpa
 (Mt. 12.22-30; Mk. 3.20-27)

¹⁴Shuk puncha Jesuska shuk
 runamanta supayta llukshichihurka.
 Chay runaka supay paypi kashkanrayku
 mana atiparkachu rimanata. Supayka

chay runamanta llukshishpan chay
 runaka mushumanta rimarkana. Chayta
 rikushpankuna runakunaka mancharir-
 kakuna. ¹⁵Shukkunaka rimarkakuna:
 Kayka supaykunapa apun *Beelsebupa
 yachayninwami supaykunata
 llukshichin.

¹⁶Shukkunaka yapa runakunata
 riksichinayashpankuna Yaya Diospa
 mana kachashkan kananta Jesusta
 tapurkakuna:

Ñukanchirayku ruray Yaya Diospa
 yachayninwa shuk nima ima uras
 rikushkanchita nishpa.

¹⁷Jesuska yuyarihushkankunata
 yachashpan rimarka:

Maykan llaktakunapi apukunapura
 chikninakushpa wañunakuhushpanku-
 naka chaypi kawsak runakunaka
 llampumi tukurinkakuna. Chasnallata-
 tami shuk wasipi kawsakpura chiknina-
 kushpa makanakuhushpankunaka
 chasnaka shikwarinahumi. Supayka
 mana wichumachu supay masinkunata
 shikwarinankunapa paykunapura.

¹⁸Chasnallatata supaykunapa apun
 paypa kamachishkankunawa piñana-
 kushpankuna paykuna kikin rurahush-
 kunkunata waklichinahuma. Chasnash-
 pankuna ¿imashnataya payka alita
 kamachima? Kankuna niwankichi
 Beelsebupa yachayninwami supayku-
 nata llukshichin nishpa. ¹⁹Chasnna
 kashpanka ¿pita kankunata katikkuna-
 taka yanapan supaykunata runakuna-
 manta llukshichinankunapa? ¿Paykuna-
 pas Beelsebupa yachayninwachu
 supaykunata runakunamanta llukshichi-
 nahun? Kankunaka alitami yachankichi
 Yaya Dios paykunata yanapananta.
 Chayraykumi paykuna kikin rikuchina-
 hun kankuna yankamanta rimawahush-
 kaykicha. ²⁰Yayayni Diospa yachay-
 ninwami supaykunata llukshichini.
 Chay rurashkaynita rikushpaykichi

yachankichi Yaya Diospa ali kamachinan chawpikichipi ña kallarishkanta.

²¹Rikuychi. Shuk sinchi runa sumakta alicharishka kashpanka lansanwa wasinta sumakta kuyran, tukuy imankunata sumakta wakaychan mana shuwanankuna-napa nima imata. ²²Shuk paymanta ashwan sinchi runa shamushpanmi payta winsishpan lansanta kichunka, maypimi pay sinchikurishka kahurka. Tukuy ima tiyahushkata apashpan paywa pakta kahukkunawa chawpinakun. Chasnallatata ñukami kani chay winsik runashina, chayrayku supaykunata llukshichihuni. ²³Kankuna mana kiriwashpaykichika chikniwahunkichimi. Runakunata ñukamanta alita yachachishpa mana yanapawashpaykichika pantachichishpa ñukamanta anchuchinkichi.

²⁴Jesuska shuk yachachinata yachachishushpan kasna nirka: Shuk supay shuk runamanta llukshishpanka yaku illa allpkunapi purin maskashpa maypimi kawsanka nishpa. Mana maypi samananta tarishpanka yuyarin kutishara chay llukshishkayni runamallatata nishpa. ²⁵Kutishpanna chay runata tarikrin shuk wasi suma chusha picharishkatashima. ²⁶Chayta rikushpan kanchis paymanta ashwan millaypata rurak supay masinkunata kayakrin chaypillatata kawsak shamenankunapa. Pushamushpan chay runapina yaykunahun kawsanankunapa. Chaymantana chay runaka ñawpamanta ashwan millaypakanatana rurashpa kawsan. Kankunaka yapa millaypata rurak kashpaykichimi chay achka supay yaykushka runashina kankichi.

Pikunami kushilla kankakuna

²⁷Jesús chay shimikunata rimahushpan shuk warmi chawpinkunamanta kaparishpa rimarka:

¡Kushilla kachun, maykan warmimi kanta wawayashpa chuchuchishpa wiñachirka!

²⁸Payka aynirka:

Ashwan kushilla kankakuna, maykan-kunami Yaya Diospa shiminta uyanahun kasunahun.

**Mana kirinayak runakuna Jesusta
tapurkakuna Yaya Diospa
yachayninwa rurashkanta
rikuchinanpa**

(Mt. 12.38-42; Mk. 8.12)

²⁹Achka runakuna paypa kuchunpi tantarishpankuna Jesuska rimarka: Kankuna kay punchakunapi kawsak runakuna mana ali yuyayyukunachu kankichi. Yaya Diospa yachayninwa ruranaynita rikunayankichi. Chasna tapuwashpaykichipas manami rurashanchu. Kayllatami rikunkichi, imashnami Yaya Dios chay ñawpa paypa yachay-ninwa yachachik Jonás^e wañuta kacharka yachachinanpa, chasnallata-tami ñukatapas kachawashka. ³⁰Imashnami Jonaska Níneve llaktapi kawsakku-nata mana alita rurashkankunata rikuchirka, chasnallatatami ñuka Yaya Diospa Kachashkan Runa kay punchaku-napi kawsak runakunata millaypa rurashkankunata rikuchini. ³¹Ñawpa shuk atun apu warmi yapa karu llaktamanta shamurka, atun apu Salomón yapa yachaywa rimahushkanta uyananpa. Nukaka Salomonmanta ashwan atun yachayyu kashpaynipas manami kiriwanayankichichu. Chayrayku Yaya Diospa kastiganan puncha chay karu llaktamanta atun apu warmika atarishpan kankuna kay punchakunapi kawsak runakunamanta uchata rurashkankichi nishpa Yaya Diospa puntanpi rimanka. ³²Chasnalla-

tata Yaya Diospa kastiganan punchapi Ninivepi kawsak runakunaka kay punchakunapi kawsak runakunata atarishpa uchata rurashkankichi nishpa rimankakuna. Chay runakunaka Jonaspa rimashkanta uyashpankuna kallarirkakuna alita ruranatana. Ñukaka Jonasmanta ashwan atun yachayyu kashpaynipas manami kirinayawankichchu.

**Jesuska yachachin shuk lamparin
punchayachikshina kawsananchipa**
(Mt. 5.15, 6.22-23)

³³Chaymantapas Jesuska nirka: Nima pi lamparinta apichishpan pakashpa churamachu kawitu ukupi. Ashwan churanchima awapi lamparin tiyachinapi chay wasipi yaykuhukkunata punchayachinanpa. ³⁴Ñawiki kanrayku punchata rikuchikmi. Ñawiki ali kashpanka alita rikuk punchapi purihushkashina kawsanki. Ñawiki mana ali kashpanka amsapi purihushkashina kawsanki. ³⁵Chayrayku alita kuyrariy tukuy kanpi punchata rikuchikshina tukuya alita riksichik asirtachik kashkaka mana waklishpa amsashina tukushka kananpa. ³⁶Tukuy yuyaykika shunkuykika punchashina ali kashpanka tukuy kawsaykika ali kanka, imashnami shuk lamparin suma puncha rikuchihushkashina.

**Jesuska fariseokunata,
Moisespa killkashkanta
yachachikkunatapas piñarka**
(Mt. 23.1-36; Mk. 12.38-40;
Lk. 20.45-47)

³⁷Chasna rimashkanwasha shuk *fariseo Jesusta kayarka wasinpi mikuk rinanpa. ³⁸Manara mikuhushpankuna israel runakuna makinkunata mayllari-payanahun. Jesuska makinta mana mayllarishpa mikuhushpan chay

fariseoka rikurayarka. ³⁹Jesuska chay fariseopa mana alita yuyarihushkanta yachashpan nirka:

Rikuchi, kankuna fariseokunaka tukuy rurashkaykichiwa alita rikurish-paykichipas shunkuykic平ka millaypa yuyayyu kankichi, shukkunapa ima tiyapushkanta llullachishpa shuwakuna. Pusilluta kallanata washanllata mayllak runakunashina kankichi, ukunta susyata sakinkichi. ⁴⁰Mana ali yuyayyu runakunami kankichi. ¡Manachu yachankichi Yaya Dioska mana aychanchillata rurashkanta? Payka rurashka tukuy yuyayninchitapas. ⁴¹Chayrayku shunkuykic平ka yuyaykic平ka alichash-paykichi charishkaykichimanta nima imayukunata ali yuyawa kuchi. Chasna rurashp paykichirami shuti ali kankichi Yaya Diospa rikushkanpika.

⁴²Ay fariseokuna, ¡imashna kastigushi kankunaryku kanka! Kulantru, ali kiwa, tukuy mikuna yuyukunamantapas chunkamanta shukta Yaya Diosta kunkichi. Chasna Yaya Diospa kamachishkanta shuk parti paktachish-paykichipas chay ashwan ali kasna nishkan kamachishkankunata mana paktachinkichichu: Alillata rurashpa rimashpa kawsaychi. Runa masikichita yuyashpa yanapaychi. Yaya Diostapas yuyashpa kawsaychi nishpa. Chay kamachishkankunataka paktachinayki-chi tiyan chay shukkunawa pakta.

⁴³Ay fariseokuna, ¡imashna kastigushi kankunaryku kanka! Tantarinanchi wasikunapi munankichi tukuy manta suma tiyarinakunapi tiyarinata, runakuna kankunata aputashina rikuhushkankunata rikuchishpa. Ñampikunapi plasakunapi purishpaykichi yapa munankichi tukuy runakuna kankunata aputashina saludanankunapa.

⁴⁴Ay fariseokuna, ¡imashna kastigushi kankunaryku kanka! Llullachiysikiku-

name kankichi. Wañushkakunata churashpa kanchamanta mana riksiyapa sumakta tapashka uchukushinami kankichi. Mana rikuchinkichichu ukupi millaypa kahushkaykichita. Runanaka awanta purishpa pasanahuma, mana yachanahumachu imami ukupi tiyahun.

⁴⁵Chasna nishpan Moisespa killkashkanta shuk yachachikkira rimarka:

Yachachik, chasna rimashpayki ñukanchitapas piñahuksinami mana ali kashkanchita rimahunki.

⁴⁶Chaypi Jesuska ayinrika:

Ay Moisespa killkashkanta yachachikkuna, ñimashna kastigushi kankunaryku kuras kanka! Shuk patrón runakunata llasha kargata apachihukshinami kankichi. Yaya Diospa shiminta yachachihushpaykichi kuyaykichimanta achka kamachinakunata yachachinkichi Yaya Diospatashina kasunankunapa. Chasna yachachishkaykichiwi nitishkashina rurahushpaykipicas nima shuk uchillastuta paykunata yanapankichichi. ⁴⁷ Ay, imashna kastigushi kankunaryku kanka! Ñawpa yaya rukuykichi wañukuna Yaya Diospa yachayninwa paypa shiminta yachachikkunata wañuchirkakuna. Kankunaka paykunapa aychanta churashkankunata sumayachinkichi. ⁴⁸Chasna rurashkaykichiwi rikuchinkichi, ñawpa yaya rukuykichikunapa rurashkankuna ali kananta nihuksina kanaykichita. Paykuna Yaya Diospa yachayninwa yachachikkunata wañuchirkakuna. Kankunaka paykunapa aychanta churashkankunata sumayachinkichi.

⁴⁹Chayraykumi Yaya Dioska atun yachayyu kashpan rimarka: Kachashami yachayniwa yachachikkunata, chaymanta pas *apostolnikunata. Shukkunataka chiknishpa wañuchinkakuna, shukkuna-

taka parisichinkakuna. ⁵⁰⁻⁵¹Yaya Dioska munduta rurashkanmanta pacha kunankama runakunaka achka paypa yachayninwa yachachikkunata chiknishpankuna wañuchirkakuna. Abelta ali runa kashpantata wawkinka wañuchirkira. Chaymanta pacha runakunaka Yaya Diospa yachayninwa achka yachachikkunata wañuchirkakuna. Chaywasha Sakariastana *Yaya Diospa wasinpi wiwakunata rupachina tuchpashina kuchupi kahushpanpas wañuchirkakuna. Kunan kankunapas tukuy paykunapa mana alita rurashkankunata yachashpaykichiwas chasnalla rurashpa katinkichi. Chayraykumi Yaya Dioska manana chapankachu tukuy chaykunamanta kastigananpa. Kankunataka atuntami kastiganka.

⁵²Ay Moisespa killkashkanta yachachikkuna ñimashna kastigushi kankunaryku kanka! Mana alita yachachishpaykichi runakunata arkankichi shutipa ali kashkata yachanankunapa. Kankuna kikin mana munashkankichichu uyanata, imashnami Yaya Diosta riksinkichi. Chasna kashpaykichi Yaya Diosta riksinyak runakunatas pantachinkichi payta mana riksankunapa.

⁵³Jesuska chasna rimashpan Moisespa killkashkanta yachachikkuna, fariseokunapas yapa piñarishpankuna kallarirkakuna achkata tapunata. ⁵⁴Chasna tapurkakuna Jesús shuk shimita pantachishpa rimananpa, chaymanta payta uchachishpankuna apunkunana wañuchichinankunapa.

Jesuska yachachin mana ali kawsahushkanchita alishina tutushpa mana pakananchipa
(Mt. 10.26-27)

12 ¹Jesús yachachihushkampi achka waranka runakuna tantarirkakuna. Kichkikta shayarishpan-

kuna tankanakushpa paykunapura kahurkakuna. Chasna tantarishpanguna-pas Jesuska puntiru runankunallata rimarka: Kuyrariyichi *fariseokunapa yuyayninkunamanta. Paykunaka rimanahun Yaya Diosta alita kasunankunata. Chasna rimashpangunapas manami alitachu ruraspa kawsahunkuna. Chasna mana ali yuyayyu kashpankuna runakunata yachachina-hun paykunashina llullachikkuna tukunankunapa.

²Nima shuk rimashkanchika, rurash-kanchika pakalla kiparinkachu. Tukuy yuyayta shunkunchipi pakahushkanchi-taka Yaya Dios tukuy runakunata riksichinka. ³Chasna kashpan pakalla rimashkaykichita tukuy yachankakuna. Wasi ukupi punkuta tapashpa alimanta rimashkaykichita wasi awamanta kaparishkatashinami tukuy uyanka-kuna.

**Jesuska yachachin chiknik
runakunata mana manchananchipa**
(Mt. 10.28-33, 12.32, 10.19-20)

⁴Munashkayni wawkinikuna paninikuna, kankunata rimani, ama manchaychichu aychaykichillata wañuchinata atipak runakunata. Manami ashwanta kankunata atipana-hunchu ruranata. ⁵Ñukaka kankunata rimani pitami manchanaykichi tiyan. Kankunata wañuchishkankunawasha nina mana wañukma wichunata atipak Yaya Diosta, payta shuti manchaychi.

⁶Yuyariyichi pishkukunapi. Mana yapa chaniyu kashpankuna pichka pishkustu-kunata ishkay kullkistullawa atipanchi rantinata. Chasna kashpanunas Yaya Dioska mana kunkarinchu nima shukta paykunamanta. ⁷Yaya Dios kankunata-pas alita kuyran. Pishkukunamanta ashwan pasatami kankunata yuyan. Kankunata yuyashpan alita riksin. Nima

shuk uchilla chukcha umaykichipi tiyashkaka paymanta kishpinchu. Chayrayku ama manchaychichu nima pita nima imatapas.

⁸Kunan kankunata rimani, maykan runami mana pinkashpa ñukamanta riman runa masinkunapa puntankunapi ñukami Jesusta katik kani nishpa, paymantaka ñuka Yaya Diospa Kachash-kan Runapas *angelkunapa puntanpi Yaya Diosta rimasha kay runata riksinimi nishpa. ⁹Maykanmi runa masinkunapa puntanpi pinkashpa ñukamanta payta mana riksinichu nishpanka ñukapas angelkunapa puntanpi kay runata mana riksinichu nishpa Yaya Diosta rimasha.

¹⁰Maykan runami piñarishpan millaypata riman ñuka Yaya Diospa Kachashkan Runamanta, paytaka Yaya Dioska llakichinkami. Maykan runami Yaya Diospa Espiritunmanta piñarish-pan millaypata riman, chaytaka Yaya Dioska manami llakichinkachu.

¹¹Chiknik runakuna kankunata apishpa pushankakuna tantarina wasikunapa apunkunama, llaktayki-chipa apukunamapas. Chasna apiy tukushpaykichipas mana yapa yuyarishpa kaychichu ¿imashnashi aynisha? ¿imatashi rimasha? nishpa. ¹²Chay urasmi Yaya Diospa Espiritunka kankunata yuyachinka imashnami rimankichi.

**Jesuska shuk yapa achka kullkiyu
mitsak runakunamanta
yuyachishpa yachachin**

¹³Chaypi chay achka runakunapa chawpinkunamanta shuk runa Jesusta rimarka:

Yachachik, kanmi kanki atun yachayyu. Chasna kashpan wawkinita rimapay chawpinakunanchipa yayayni wañupa charishkanta.

¹⁴Jesuska mana munashpan aynirka: Runa masini, mana shamushkanichu shuk apushina kankunata yanapanay-nipa rimanakushpa kahushkaykichipi alichanaykichipa, nima yayayki wañupa charishkanta chawpinakunaykichipa.

¹⁵Tukuy runakunatana rimarka: Alita yuyariyichi. Ama imaykichita mirachinayashpa kawsaychichu. Runapaka achka iman tiyahushpanpas mana kushillachu kawsama kay mundupi.

¹⁶Chaymanta chaypi kahukkunata yachachinanpa Jesuska kwintarka: Tiyarka shuk runa achka imayu. Shuk wata chakrankunapi tarpunkunaka yapa achkata muyuyarkakuna. ¹⁷Chay runaka yuyarika ¿imatashi ruraynima? Mana tiyawanchu ashwan wasinika pallashkaynita wakaychanaynipa. ¹⁸Payka yuyarishpan nirka: Ña yachani imashnami rurasha. Kay uchilla wakaychana wasinikunata urmachishara ashwan atun wakaychana wasikunata ruranaynipa. Chaypi tukuy pallashkaynikunata ashwan ima tiyawashkakunatapas wakaychasha. ¹⁹Chaymanta ñuka kikinta rimasha: Kunanka tiyanmi achka wakaychashkaynikunaka achka watarayku. Chayrayku samashanllana. Mikushpa upyashpa kushilla kawsasha. Manana tiyawanchu nima imamanta yuyarishpa kanaynipa. ²⁰Chaypi Yaya Dioska payta rimarka: Kanka yuyay illa runami kanki. Kunan tutallami kawsaykita kichushkayki. Wakaychahushkaykika ¿piraykushi kanka? nishpa. ²¹Chasnami kan, maykanmi pay kikinraykulla tukuy imankunata wakaychan. Yaya Diospa rikushkanpika nima imayushinami kan.

**Yaya Dioska mana kunkarinchu
nima shuk wawanta**
(Mt. 6.25-34)

²²Chaymanta Jesuska runankunata rimarka: Kankunata rimani, ama yanka

muspariychichu ¿imatashi mikushu kawsananchipa, imatashi churarishu? nishpa. ²³Kawsananchimi mikunamanta ashwan valik kan. Chasnallatata aychanchimi churarinchimanta ashwan valik kan.

²⁴Yuyariyichi pishkukunapi. Paykunaka nima shuk muyuta tarpuna-hunchu mikunankunapa. Paykunapaka nima tampunkunaka tiyanchu pallash-kankunata wakaychanankunapa. Mana nima shuk muyuta tarpushpankunapas Yaya Diosmi paykunataka kun mikunankunata. Pishkukunamanta pasatami Yaya Dioska kankunata yuyan. Payka kankunata tukuy munashkaykic平 chitami kun. ²⁵Chaymantapas kawsanaykichita yapa yuyarishpaykichitas nima shuk urata atipankichichu mirachinata. ²⁶Nima uchillastuta atipashpaykichi mirachinata kawsaykicha ¿imaraykutaya musparinkichi shuk imakunarykuka?

²⁷Rikuychi chay suma sisakunata, imashnami wiñanahun. Paykuna nima tarawanahunchu, nima puchkanahunchu llachapankunaryku. Mana tarawashpankunapas suma churarishka kanahun. Ñawpa atun apu Salomonpa yapa suma ali churarishkanmanta chay sisakunaka ashwan alita rikurinahun.

²⁸Kiwakunaka chakirinalla rupachinalla kashpanpas Yaya Dioska suma sisayukunata ruran. Chayta rikushpa ¿imaraykuta mana kirinkichichu Yaya Dioska kankunata ashwan alita kuyrananta?

²⁹Chayrayku ama musparishpa maskaychichu mikunaykichita upyanaykicha. Nima yapa yuyarishpa kawsaychichu. ³⁰Yaya Diosta mana kasuk runakuna tukuy chaykunallata yuyarishpa kawsanahun. Kankunaka ama paykunashina kawsaychichu. Ashwan kankunapaka tiyanmi alita kuyrak yanapak Yayakichi Dios. Paymi

yachan tukuy ima munahushkaykichi-taka.³¹ Kankunaka tukuy shunkuykichi-manta pacha Yaya Dios kankunata kamachinanta munashpa kawsaychi. Chasna kawsashpaykichimi tukuy munashkaykichitapas Yaya Dioska kankunata kunka.³² Munashkayni obebakunashinami kankichi. Mana achka kashpaykichipas ama manchay-chichu nima imata. Yaya Diosmi kankunata yuyashpan munan paywa pakta wiñayparayku ali kamachihush-kanpi kawsanaykichipa.

³³Yaya Dios ūukanchita yuyashpan kankunapas runa masikichita yuyashpa yanapashpa kawsaychi. Kullkiwichi mana tiyashpanka rantichik riychi charishkaykichita. Chay kullkiwa nima imayu runakunata yanapaychi. Chasna rurashpaykichimi silipi apinaykichi sumakunata mirachinkichi. Chaypi charishkaykichika mana mawkyanka-chu, nima tukurinkachu. Chaypika shuwakuna mana yakyunahunchu, kumehenkunapas mana mikunahunchu.³⁴ Chayrayku alita yuyariyichi imatata ashwanta munankichi. Imaykichikunata mirachishpa kawsahushpaykichika chayllatami yuyarinkichi tukuy shunkuykichimanta pacha. Yaya Diospa munashkanta rurashpa kawsahushpay-kichika tukuy shunkuykichimanta pacha payllatami yuyankichi.

Suma alicharishka chapanamanta riman

³⁵⁻³⁶Jesuska runankunata rimashpalla katirka: Rikuychi, shuk patrón kasaranan fiestamanta wasinma kutimushpan runankunaka kayashkanta uyashpankuna utkalla punkuta paskana-hun payta yaykuchinankunapa. Chay runankuna alicharishka payta chapana-huma, paktashpan utkalla yaykuchinankunapa. Chasnashina kankunapas

alicharishka chapawaychi kutimunay-nita lamparín sintichishkawashina.

³⁷Kushilla kankakuna maykunkunatami patronka shamushpan payta chapashpa kahukkunata tarin. Alita uyawaychi. Paykunata tiyachinka, pay kikin alicharishpa paykunata karananpa.³⁸ Patronka chawpi tutapi, mana kashpaka pakarinapi paktamushpan kushilla kankakuna maykunkunatami payka alita chapashpa kahukkunata tarik shamun.

³⁹Kankuna alita yachankichi, wasi amuka yachashpan ima urasmi shuwaka shamunka, mana puñushpachu uyashpalla chapama wasinpi mana shuwaka yaykunarpa.⁴⁰ Chasnashina kankunapas tukuy uras alicharishka chapawaychi. Kankuna nima yuyarihushkaykichipi ñuka Yaya Diospa Kachashkan Runaka shamusha.

**Jesuska ishkay kamachina
runakunamanta yuyachishpa
yachachin
(Mt. 24.45-51)**

⁴¹Chay uras Pedroka tapurka:
Yaya Jesús ¿chay yachachinawa ūukanchillatachu yachachishkanki?
Mana kashpaka ¿tukuyraykuchu rimash-kanki?

⁴²Chaypi Jesuska aynirka:
Shuk patrón shuk llaktama rinanpa shuk ali yuyayyu tukuy uras alita rurak runanta kamachirkira tukuy runan masinkunata tarawachinanpa.
Chaymanta rimarka mikuna uras paykunata alita karananpa.⁴³ Chay runanka kushillami kanka patroynin kutimushpan paypa kamachishkanta alita paktachishpa kahushkanpi tarik shamushpanka.⁴⁴ Alita uyawaychi. Chasna alita kasuk runanta patroyninka churanka tukuy ima tiyapushkanta kuyrak kananpa.

⁴⁵Chay kamachishkan runanka millaypa yuyayyu kamaka, yuyarima patroynika unayahunra, mana utka shamunkachu nishpa. Chasna yuyarishpan kallarima chay tarawak runakunata, warmikunatapas makashpa parisichinata. Pay kikinlla mikushpa, upyashpa machashpa kawsama. ⁴⁶Chasna mana alita rurashpa kawsashpan mana nima yuyarihuskhanpi patroyninka kunkaymanta paktama. Chasna tarik shamushpan chay kamachishkan runantaka sinchita kastigama, imashnami tukuy mana kasuk runakunaka kastigay tukunahun chasna.

⁴⁷Shuk runaka yachashpantata patronpa munashkanta mana rurashpanka yapatami kastigay tukunka.

⁴⁸Maykan runachari mana alita yachashpan mana alita rurashka, chayka mana yapatachu kastigay tukunka. Achka yachayta kuy tukushkataka, achkatami Yaya Dioska tapunka *¿*yachashkaykita rurashpa kawsashkankichu? nishpa. Chasnallatata achkata kuyrananpa kuy tukushkataka, paytaka Yaya Dioska tapunka *¿*alita rurashkankichu maykantami kamachishkani? nishpa.

Jesusta katihushpanchimi payta mana munakkunaka ñukanchita chikninhun
(Mt. 10.34-36)

⁴⁹Jesusta yachachishpalla katirka: Nukaka shamushkanimi ninawa rupachi-hukshina tukuy mana ali kashkata kulluchinaynipa. Yapa munaynima chay ninaka ña sintishpa rupachishpa kahushkatashina rikunata. ⁵⁰Chasna kashpanpas yapa parisishpa wañunaynira tiyan. Chayta paktachinaynikama yapa manchayta llakiya parishuni.

⁵¹Ama yuyariychichu ñuka kay allpama shamushkaynirayku runakuna

kushilla shuk yuyayllawana kawsanan-kunata. Kankunata rimani, shamushkay-nirayku runakuna manana shuk yuyayllawa kawsankakunachu.

⁵²Kunanmanta pacha shuk wasipi kawsak ayllupura ñukaranti manana shuk yuyayllawa kushilla kawsankaku-nachu. Pichkamanta kimsa ishkayta chikninkakuna manana shuk yuyayllawa kawsashpankuna. Mana kashpkala ishkay kimsata chikninkakuna manana shuk yuyayllawa kawsashpan-kuna. ⁵³Shuk mana kiriwak yaya kiriwak wawanta chikninka. Mana kiriwak wawa kiriwak yayanta chikninka. Shuk mana kiriwak mama kiriwak wawanta chikninka. Mana kiriwak wawa kiriwak mamanta chikninka. Shuk mana kiriwak swegra kiriwak nueranta chikninka. Mana kiriwak nuera kiriwak swegranta chikninka.

Jesuska yachachin imashnami shamunan punchakunapi kawsashunchi

(Mt. 16.1-4; Mk. 8.11-13; Mt. 5.25-26)

⁵⁴Chaymanta Jesuska tukuy chaypi kahukkunata rimarka: Inti yaykuhushpan wayra shamuhushpan puncha amsayashpan chay uras ninkichi tamyankami nishpa. Chasnami kan. ⁵⁵Chasnallatatami uraymanta sinchita wayraka shamuhushpanka rimankichi rupa kanka nishpa. Chasnami kan. ⁵⁶Mana ali yuyayyu runakuna, yachakshina tukunkichi nima imata yachashpaykichitata. Siluta allpata rikushpaykichi yachankichi punchaka chasna tukuhukta. Rurahushkaynikunataka rikushpaykichi *¿*imaraykuta mana asirtanya-kichichu imatami niyan, imashna punchakunapimi kawsahunkichi nishpa?

⁵⁷*¿*Imaraykuta mana munankichichu yuyarinata kankuna kikin, maykanmi ali, maykanmi mana alichu ruranayki-

chipa? ⁵⁸Karan kankuna mana kasushkankichichu Yaya Diospa kamachishkanta. Chayrayku tukuy kankuna Yaya Dioswa alichanaykichi tiyan. Yuyariyichi. Shuk runata liwihush-payki payta mana pagashkaykiryaku kanta apuma pushama. Ñampipi riushpaykichi alichay chay kanta pushahukwa. Mana paywa alichashpaykika apupi kanta kastigachinka. Chay apuka runankunatami kunka paykuna kanta karselpi churanankunapa. ⁵⁹Kanta rimani, chaymantaka manami llukshinkichu, tukuy liwihuskaykita paganaykikama. [Chay rimashkanwami Jesuska yachachinayarka: Manara Yaya Diospa atun kastiganan puncha paktarihushpanra uchata rurananchimanta anchurishpanchi Yaya Diostana tapunanchipa ñukanchita llakichinanpa.]

Jesuska yachachin millaypata rurashkanchimanta alitana rurananchipa

13 ¹Chay urasllatata shuk runakuna Jesusta kayllayamushpankuna rimarkakuna:

Galileamanta shuk runakuna wiwakunata wañuchihushpankuna Yaya Diosrayku rupachinankunapa, *romano apu *Pilatoka paykunata wañuchichirka. Chasna wañuchi y tukushpankuna yawarninkunaka wiwakunapa yawarwa chapurirka.

²Jesuska paykunata aynirka:

Kankunaka yuyarinkichichari, chay Galileamanta runakunaka chasna kastigarishpa wañushkankunata tukuy Galileapi kawsak runakunamanta ashwan millaypata rurak kashkankunaryku. ³Mana chasnachu. Kankunata rimani, millaypata yuyarishpa rurashpa kawsahushkaykichita mana sakishpaykikicha kankunapas chasnallatatum kastigarishpa wañunkichi.

⁴Chaymantapas Jerusalén llaktapi Siloé yaku mayanpi rurarishka torreka urmashpan chunka pusak runakunata nitirka. Chasna wañushpankuna yuyarinkichichari tukuy Jerusalenpi kawsak runakunamanta ashwan millaypata rural kashkankunata.

⁵Mana chasnachu. Kankunata rimani, millaypata yuyarishpa rurashpa kawsahushkaykichita mana sakishpaykikicha kankunapas chasnallatatum kastigarishpa wañunkichi.

⁶Chasna nishpan shuk yachachinawa yachachishpalla katirka: Shuk runa igu muyuta chakrangi tarpurka. Chasna tarpushpan sakirka wiñananpa. Unaymanta rikunarpa rirkap tarpushkaynika muyuyashkachari nishpa. Chasna rishpan mana tarirkachu nima shuk muyuta. ⁷Chasna rikushpan chakranta kuyrakta rimarka: Kunanwa kimsaynin wata shamuhuni kay iguta rikunapa. Tukuy uras mana muyuyashkatachu tarishkani. Kuchuy. ¿Imaraykuta valin chasna tarpu mana muyuyakka? Yankamanta kaspi masinkunata yakuta kichuhun. ⁸Chasna nishpan chay tarpu kuyrakta aynirka: Patroyni, kay watallata sakipay. Ñukaka sapinpi allpata pulbushpaini atallpa ismaku-nawa chapushpa churashara. ⁹Chaywachari muyuyanka. Mana muyuyashpanka kuchushamiwichunaynipa. Ari nishpan patronka sakirka.

Chasnashinami Yaya Dioska mana shuk ratulla kastiganchu. Ñukanchita yapa yuyashpan yanapan. Chasna yanapashpanpas payta mana kasushpanchika shutipami kastigay tukushunchi.

Jesuska samana puncha shuk warmi kumu washata ampirka

¹⁰Shuk *samana puncha Jesuska shuk tantarina wasipi yachachihurka.

¹¹Chaypi tiyarka shuk warmi, maykanmi chunka pusak watata

unkushka karka, supay yaykushkan-rayku. Chay warmipa washanka kumu karka, mana atiparkachu nima ima uras kuskayanata.¹² Payta rikushpan Jesuska kayarka. Payta kayllayashpan rimarka:

Pani, ñami unkushka kahushkayki-manta ampirishka kahunki.

¹³Chaymanta chay warmita makinwa llankarka. Llankashkanllawa chay warmipa washanka kuska tukurka. Chaypina chay warmika Yaya Diosta atunyachishpa kushichirka.

¹⁴Chayta rikushpan tantarina wasipi kamachikka piñarirka Jesús samana punchapi ampiškanrayku. Chaypina tukuy chaypi kahukkunata rimarka:

¿Manachu sokta puncha tarawanapa kan? Chay punchakunapi shamuychi kankunata ampinanpa. Ama shamuychi-chu samana punchapika.

¹⁵Chaypina Jesuska rimarka:

Kankunaka mana ali yuyayyukunachu kankichi. Kankunapa burruykichi wakraykichi watarishkata ¿manachu paskankichima yakuta upyachinaykipa samana punchapika?¹⁶ ¿Manachu Yaya Dios kay warmita ashwanta llakichin? Kay warmika Abrahampa miraymantami, Yaya Diospa akllashkan runakunamanta. Supay payta unkuchishpan chunka pusak wata watarishkashina karka. ¿Manachu ali pay watarishkashina kashkanmanta samana punchapi kishpichinaynipa?

¹⁷Chasna rimashpan Jesuspa kuntran-kunaka pinkarishka kiparirkakuna. Ashwan tukuy runakuna Jesuspa achka suma rurashkankunata rikushpankuna kushikurkakuna.

**Jesuska yachachin imashnami Yaya
Diospa ali kamachinanka**
(Mt. 13.31-33; Mk. 4.30-32)

¹⁸Chaymanta Jesuska rimarka: Yaya Diospa ali kamachinanka kay allpapi

¿imawashi parihu kama? ¿Ima yachachinawashi kankunata asirtachinima?¹⁹ Yuyariyi mostasa muyuta. Shuk runa chakranpi tarpushpan uchillastu kashpanpas wiñan chillka kaspishina tukunankama. Chasna atun tukushpan pishkukuna ramankunapi tiyarinahun, wasinstukunata ruranahun.

²⁰Chaymanta Jesuska rimarka: Yaya Diospa ali kamachinanka kay allpapi ¿ima yachachinawashi kankunata asirtachinima?²¹* Levadurata yuyariyi-chi. Shuk warmi panta rurahushpan kimsa mati harinapi uchillastu levadurata yakuwa chapurishkata churan. Chaywa chapushpan tukuy harinaka panrayku alita punkin.

**Jesuska yachachin pimi Yaya
Diospa kawsanani
yaykunka nishpa**
(Mt. 7.13-14, 21-23)

²²Jesuska Jerusalenma rihushpan yachachirka atun llaktakunapi, uchilla llaktakunapipas, maytami pasarka.

²³Chaypi shuk runa payta tapurka: Yachachik ¿shutipachu masnalla kishpinkakuna Yaya Diospa kastiganan-manta silupi yaykunankunapa?

Chaypi Jesuska aynirka:

²⁴Manami chasnalla yaykuypachu Yaya Diospa kawsanani-pika, kichki punkuta yaykuhukshinalla yaykunkichi. Chayrayku tukuy atipashkaykichita ruraychi yaykunaykipa. Kankunata rimani, achkami yaykunayankakuna chay Yaya Diospa kawsanani-pi. Chasna kashpanpas manami atipankakunachu.

²⁵Yaya Dios shuk wasi amushina kashpan shuk puncha kasnami kanka: Amun atarispan wasin punkuta tapanka. Kanchapi kahushpaykichika rimankichi: Amigu, paskay punkuykita ñukanchipas yaykunanchipa. Wasi amuka ukumanta ayninka: Mana

riksinichu kankunata, pikunachari kankichi nishpa.²⁶ Chaypi kankunaka rimankichi: Mikupayarkanchi, upyapayarkanchi kanwa pakta. Kanmi yachachipayarkanki puntanchipi.²⁷ Chaypina payka ayninka: Ñami rimashkani kankunata, mana riksinichu pikunachari kankichi. Tukuy kankuna mana ali rurakkuna anchuriychi ñukamanta.

²⁸ Chasna wicherishka kahushpaykichi sinchita parisishpa wakankichi, piñaywa kiruykichikunata kanirinkichi. Yaya Diospa ali kamachinan mushu mundupi yaya rukuchi wañukuna Abrahamta, Isaakta, Jakobta, tukuy ñawpa Yaya Diospa yachayninwa yachachikkunatapas chaypi kahukkunata rikunkichi. Kankunaka wicherishka kahushkaykichita yachankichi.²⁹ Inti llukshinamanta, inti yakyunamanta, anakmanta, uraymanta runakuna tantarin-kakuna Yaya Diospa ali kamachinan mushu mundupi paywa pakta kushilla mikunankunapa.³⁰ Chasna kashpan maykunkunami kay allpapi kawsahushkan-chipi runa masinkunapa rikushkanpi tukuymanta ashwan mana valikchu kanahun, paykunamantami shukkuna Yaya Diospa rikushkanpi tukuymanta ashwan valichirishka kankakuna. Maykunkunami kay allpapi kawsahushkan-chipi runa masinkunapa rikushkanpi tukuymanta ashwan valichirishka kanahun, paykunamantami shukkuna Yaya Diospa rikushkanpi tukuymanta ashwan mana valikchu kankakuna.

Jesuska Jerusalenpi kawsak
runakunamanta llakirishpan wakarka
(Mt. 23.37-39)

³¹ Chay uras shuk *fariseokuna Jesusta kayllayashpankuna rimarkakuna:

Apu *Herodeska kanta wañuchichinamani munan. Chayrayku utkalla kaymanta llukshishpayki riy.

³² Chaypi Jesuska aynirka:
Rimak riychi chay mana ali yuyarikta, ñuka tukuy Yaya Diospa kamachiwash-kanta ruranaynikamami kawsasha. Runakunamantami supaykunata llukshichinaynira tiyan, unkushkakunatapas ampinaynira tiyan.³³ Kunan puncha, kayapas, ashwan shuk punchakunapas Yayayni Diospa kamachiwash-kanta rurashpa purisharami. Mana kaypichu wañuchiwankakuna. Ñawpamanta pacha Yaya Diospa yachayninwa yachachikkunata wañuchipayarkakuna Jerusalén llaktapi. Chayraykumi ñukapas wañuchiy tukunayni tiyan Jerusalenpillatata.

³⁴ Ay Jerusalenpi kawsak runakuna, yapa llakini kankunaratayku. Ñawpamanta pacha Yaya Diospa yachayninwa paypa shiminta yachachikkunata wañuchipayankichi. Chaymanta Yaya Dios kankunama kachashkan runakunatapas tukuy uras rumikunawa tuksishpa wañuchipayankichi. Ñukaka achka kuti kankunata wañuymanta arkanayashkani, imashnami shuk atallpa wawankunata rikran ukupi tantachishpan arkan wañuymanta. Chasna kankunata arkanayashpaynipas mana munashkankichichu.³⁵ Rikuychi, kunan kankunata sakishpayni llaktaykichipi chunlla kiparinka. Kankunata rimani, manami rikuwankichinachu alicharishka kanaykichi punchakama. Chay urasmi rimawankichi: Yaya Diospa yanapashkan ali runami kanki. Yaya Diospa munashkanta ruranaykipa kachashkan kashpaykimi shamuhunki nishpa.

Jesuska samana puncha shuk runa
punkirishkata ampirka

14 ¹ Shuk *samana punchapi Jesuska rirkamikunampa shuk *fariseo apupa wasinma. Chaypi shuk fariseokunaka Jesusta shuk kamachishkata mana kasunanta tarinayashpan-

kuna payta pakallamanta ñawinkunata sipuyachishpa rikurayarkakuna.

²Chaypi Jesuspa puntanpi shuk punkirishka runa kahurka. ³Payta rikushpan Jesuska Moisespa killkashkanta yachachikkunata, fariseokunatas pas tapurka:

¿Imashnata yachachin Moisespa killkashkanka? ¿Samana punchapika unkushkakunata atipanchimachu ampinata manachu?

⁴Chay runakunaka chunlla uyarkakuna. Mana aynishpankuna Jesuska chay unkushka runata llankashpan ampirka. Chaymanta rimarka wasinma kutinanpa. ⁵Chaypi kahukkunatana rimarka:

Kankunapa wawaykichi, wakraykichi uchkupi urmeshpanka ¿manachu llukshichinkichima samana punchakashpantata?

⁶Chasna tapushkanta uyashpankuna nima imata atiparkakunachu ayninata.

Jesuska yachachin shukmanta mana pasa tukunata munananchipa

⁷Chay *fariseopa wasinpi mikunapa yaykushpankuna kayarishkakunaka ashwan ali tiyarinakunata akllarkakuna tiyarinankunapa. Chayta rikushpan Jesuska paykunata shuk yachachinawa kasna yachachirka: ⁸Shuk runa kanta kasarana fiestama kayashpanka ama tiyari kiychu tukuymanta ashwan ali tiyarinapi. Chaypi tiyarishtaykika kanpa washayki shuk ashwan munashkan runa shamuma. ⁹Chasna kashpan chay kayak amuka kantaka rimama: Kay tiyarinamanta anchuriy, kay runa tiyarinanpa. Chasna nishpanka pinkarishpayki washama tiyari rinkima. ¹⁰Ashwan ali kama, kanta kayashpankuna kan washama tiyarinaykipa. Chasna rurashpayki kanta kayak amuka shamushpanka rimama:

Amiguyni, ashwan ali tiyarinapi tiyari shamuy nishpa. Chaypi shuti tukuy kanwa tiyahukkunaka yachankakuna munashkan runa kanaykita. ¹¹Kankuna kikinmanta yuyarinkichima tukuy runa masinikunamanta ashwan yachakmi kani nishpa. Chasna atun tukunayashpaykichika Yaya Diosmi kankunata mana alichu nishpa pinkachinka. Kankuna runa masikichikunamanta mana atun tukunayashpa paykunata yuyashpa yanapashpaykichika Yaya Diosmi sumakta kankunata atunyachinka.

¹²Chaymanta Jesuska payta kayak runata rimarka: Shuk atun mikunaryku kayashpaykika ama kayankichu munashkayki runakunallata, nima aylluuykikunallata, nima kuchuykipi kullkiyu kawsakkunallata. Chasna kayashpaykika paykunapas chasnallata-tami kantapas kushichishpa kayankakuna. Chasna rurashkaykimanta kay allpapi ña pagarishkashina tukunki. Nima ima kiparinchu Yaya Dios kanta kushichinanpaka. ¹³Ashwan ali kama mikunaryku kayanaykipa nima imayukunata, makin pitirishkakunatas, tulawa purikkunatapas, wiskukunatas. ¹⁴Paykuna kanta mana atipanahunchu nima imata kutichinata. Yaya Diosllami chayta kutichinka tukuy kirishpa wañushkakuna kawsarinan punchapi. Chasna kashpan kushillami kanki.

Jesuska shuk kasaranapi mikunankunapa kayashkakunamanta yuyachishpa yachachin

(Mt. 22.1-10)

¹⁵Chay Jesuspa yachachishkanta uyashpan chay mesapi mikuhuk runakunamanta shukka Jesusta rimarka: Kushillami kanka maykanmi kayashka kan Yaya Diospa ali kamachinan mushu

mundupi kushikuna tantarinapi
mikunarpa.

¹⁶Chayta uyashpan Jesuska shuk
yachachinawa aynirka:

Shuk runaka shuk atun mikunata
rurarka. Runankunata kacharka achka
runakunata kayananpa, wasinpi mikuk
shamunankunapa. ¹⁷Ña mikuna uras
paktarishpan shuk runanta kacharka
chay kayarishka runakunata rimak
rinanpa: Shamuychi. Ñami tukuy
alicharishka kahun. ¹⁸Chasna kayashpan
tukuy aynirkakuna: Manami atipanchi-
chu rinata. Shuk nirka: Kunallami shuk
chakrata rantishkani. Chayta rikuk
rinayni tiyan. Patroykita rimakriy
llakichiwananpa nishpa. ¹⁹Shukka nirka:
Kunallami chunka wakrata rantishkani.
Rikuk rinayni tiyan alikunachu
manachu. Patroykita rimakriy llakichi-
wananpa nishpa. ²⁰Kuti shukpas nirka:
Kunallami kasarashkani. Chayraykumi
mana atipanichu llukshinata. ²¹Ni
maykan kayashkankuna kasushpenna
chay runanka kutirka. Tukuya patronta
rimak rirka, imashnami payta rimashka-
kuna. Patroyninka chayta uyashpan
piñarishpan rimarka: Kunanka utkalla
kayakriy llaktapa ñampikunapi tiyahuk-
kunata, tukuy nima imayu runakunata,
mana purinata atipakkunatapas,
waklishka aychayu runakunatapas,
wiskukunatapas nishpa. ²²Patroyninta
kasushpan chay runanka kayak rirka
shuk runakunatana. Kutimushpan
patronta nirka: Ñami kanpa kamachish-
kaykita paktachishkani. Chasna
kashpanpas tiyanrami chusha tiyarina-
kunaka. ²³Chaypi patronka kuti
rimarka: Shuk ñampikunamana riy.
Chaypi kahukkunata rimay mana
pinkashpa shamunankunapa, wasinika
untakta kananpa nishpa. ²⁴Kunkunata
rimani: Chay kayay tukushka mana
shamushka runakunaka manami

mikunkakunachu chay alichashkayni
suma mikunata ñukawa pakta.

**Tukuymanta ashwan alita Jesusta
yuyananchi tiyan**
(Mt. 10.37-38)

²⁵Chay *fariseopa wasinpi mikushkan-
washa Jesús llukshishpan achka
runakuna payta katirkakuna. Chaypi
Jesuska tikrarishpan paykunata
rimarka:

²⁶Katinayawahushpaykichika ñukata
yuyawanaykichi tiyan tukuy aylluysi-
chikunamanta pasata. Chaymantapas
kankuna kikin munanaykichita sakinay-
kichi tiyan ñukapa munanaynitana
ruranaykichipa. ²⁷Ñukata katiwahush-
kaykichirayku runakunapa parisichish-
kunkunata awantanaykichi tiyan.
Maykanmi mana parisinayanchu
ñukashina, chayka manami runaynichu
kanka.

²⁸Shuk wasita rurakmanta yuyariyichi.
Shuk runa atun wasita ruranayashpanka
alita yuyarin imakunatami chay wasirayku
munan nishpa. ²⁹Mana alita yuyarishpanka
chayra wasita kallarihushkanllapi mana
tukuchinata atipashpan sakinan tiyan.
Chasna kashpan tukuy payta rikuk
runakunaka asichishpa rimankakuna:

³⁰Rikuychi chay runata. Pay kikinta
llullachirishpa kallarishka wasinata.
Kunanka mana atipanchu tukuchinata.

³¹Chasnallatata shuk atun apumanta
yuyariyichi. Shuk allpapi kamachik atun
apuwa munahumaka wañunakunata.
Manara llukshishpanra alita yuyarima,
chay apuka ishkay chunka waranka
suntalunwa shamuhushpanka chunka
waranka suntalunyiwa atipaynimachu
payta winsinata manachu nishpa.

³²Mana atipashpan chay apuka kuntran
chayra karipi shamuhushpan payma
kachama shuk suntalunta tapunanca,
mana wañunakushpa alichanankunapa.

³³Chasnashina kankunapas alita yuyarinaykichi tiyan katiwankichichu manachu nishpa. Mana tukuy imaykicha sakishpa katiwashpaykichika manami atipankichichu runaynikuna kanata.

³⁴⁻³⁵Yuyariyichi kachimantapas. Kachika ali kan. Chamu tukushpanka manana valinchu nima imarayku. Wichunchima. Chasnashinami kankunapas Yaya Diospa shiminta mana kasushpaykichika chamu kachishina kankichi, mana valinkichichu runa masikichita yanapanaykichi. Yaya Diospa shiminta kasushpaykichika ali kachishinami kankichi yanapanaykipa tukuy runakunata. Kay yachachihushkaynita alita uyashpa yachakuychi.

**Jesuska obeha chinkarishkata
yuyachishpa yachachin**

(Mt. 18.10-14)

15 ¹Jesús yachachihushpan achka runakuna payta kayllayarka-kuna uyanankunapa. Shuk runakuna karkakuna *romano tukuymanta atun apurayku *impuestuta kobrakkuna, shuk mana alita rurakkunapas. ²Chayta rikushpankuna *fariseokunaka, Moisespa killkashkanta yachachikkunapas washanchashpa rimarkunkuna:

Kay runaka uchasapakunata yuyashpan paykunawa pakta mikun. Chasnaka mana alichu.

³Chaypi Jesuska paykunata shuk yachachinawa kasna yachachirka:

⁴Kankunamanta shukpa tiyama shuk pachak obeha. Shuk chinkarimaka ⁵manachu chay iskun chunka iskunta pastupi sakishpan maskak rinma chay shuk chinkarishkata tarinankama?

⁵Tarishpan ⁶manachu sumakta kushikushpan apishpan markama?

⁶Chaymanta wasinma paktashpan riksishkankunata, kuchunpi kawsakku-

natapas tantachishpan rimama: Kushikuychi ñukawa. Ñami tarishkani chinkarishkka obehaynita nishpa.

⁷Kankunata rimanimi: Shuk chinkarishkata tarishpaykichika atunta kushikunkichi. Chasnallatatami silipi kawsakkuna kushikunkakuna, shuk rua mana alita rurashkankunata sakishpan Yaya Diostana kasunanpa. Iskun chunka iskun runakuna alita rurak runa kani yanka nishpa kawsakkunamanta mana yapa kushikunkakunachu.

**Jesuska shuk warmi kullkita
chinkachishkanta yuyachishpa
yachachin**

⁸Shuk warmipa chunka kullkikuna tiyamaka. Chay chunka kullkikunamanta shuk chinkaripumaka ⁹manachu lamparinta sintichishpan maskama kawitu ukupi sumakta pichashpan tarinankama? ¹⁰Chasna tarimaka, amigunkunata paypa kuchunpi kawsakkunata kayashpan rimama: Chay kullki chinkaripashkata ñami tarishkani. Chayrayku tukuy kankuna ñukawa pakta sumakta kushikuychi.

¹⁰Kankunata rimani: Chasnashinami Yaya Diospa *angelkunaka kushikunkuna, shuk runa mana alita rurashkankunata sakishpan Yaya Diostana kasunanpa.

**Jesuska shuk yaya musu wawanta
llakichishkanta yuyachishpa
yachachin**

¹¹Jesuska shuk yachachinawa yachachishpalla katirka: Shuk kullkiyu runa ishkay wawayu karka. ¹²Washaniru wawanka yayanta rimarka: Yayayni, shuk puncha tukuy kanpa tiyashkanmanta chawpichishpa ñukata wawkinitapas kunaykita kunalla kuway. Chasnara mashpan yayanka tukuy ima charishkanta chawpita kurka karan shuk

wawanta.¹³ Manana yapa unaymantachu chay washaniru wawanka tukuy ima tiyashkanta rantichishpan kullkita tantachishpan rirkashuk karu chikan runakunapa allpama. Chaypi mana ali ruranakunata rurashpan kullkinta llampu tukuchirka.¹⁴ Llampu tukuchishpan chay llaktakunapi kawsak runakunaryku sinchi yarkay paktarka. Chaypi paypas yapa yarkaywa karka.¹⁵ Chasna kashpan shuk chaypi kawsak runama tapuk rirkashuk payta tarawachinanpa. Chay runaka payta kacharka kuchinkunata kuyrananpa.¹⁶ Yapa yarkaywa kashpan kuchi mikunata mikunayarka. Chasna munashpanpas nima chayta payta karanayarkakunachu.

¹⁷ Chaypi yuyarirka: Yayaynipa runankunapaka achka mikuna tiyan. Ñukaka kaypi yarkaywa wañuhuni.¹⁸ Kunalla yayaynima kutishara. Paktashpayni rimak risha: Yayayni, kanmanta anchurishpayni manami alitachu rurashkani. Chaymantapas manami Yaya Diospa munashkantachu rurashpa kawsashkani.¹⁹ Chayrayku amana yuyawaynachu wawaykitashina. Shuk runaykitashina tarawachiway nishpa.

²⁰ Chasna yuyarishpan chay musuka yayanma kutirka. Ña paktahushpan yayanka karullapi rikushpan riksirka. Sumakta llakichirka, kallpashpa tinkuk rirkashuk. Wawanta ukllarishpan mucharka.

²¹ Chaypi wawanka rimarka: Yayayni, kanta mana alitachu rurashkani. Chaymantapas manami Yaya Diospa munashkantachu rurashpa kawsashkani. Amana yuyawaynachu wawaykitashina nishpa.

²² Yayanka paypa rimahushkanta mana kasushpan runankunata rimarka: Utkalla suma churarinata apak riychi payta churachinaykichipa. Chasnallatata makinpi anilluta churachiychi, chakinpipas sapatuta churachiychi.²³ Chaymantapa apak riychi wira wakra wawata wañuchinaykichipa, mikuhushpa tukuymanta sumakta kushikunanchipa.²⁴ Kay wawaynika wañushka

kashkanmantashina kawsarimushka, unay chinkarishkanmanta kunan ña rikurik shamushka. Chasna sumakta kushikushpan atun fiestata rurarkakuna.

²⁵ Chay fiestata rurahushpankuna puntiru wawanka chakranpi kahurka. Wasima kutimushpan uyarka bombota, kenata, tukuy kushilla kahukkunata.

²⁶ Chaypi shuk runanta kayashpan tapurka: ¿Ima fiestata rurahunkuna?

²⁷ Chay runanka aynirka: Wawkikimi kutimushka. Ali paktamushkanrayku yayaykika atun mikunata rurashka, wira wakra wawata wañuchichishka karananpa.²⁸ Chasna uyashpan chay wawkinka yapa piñarirka. Mana yaykunayarkachu wasipi. Paktashkanta yachashpan yayanka wasimanta llukshirka payta kayanana. ²⁹ Chaypi chay ruku wawanka aynirka: Yayayni, maytukuy watakunata kanta yanapashkani. Kamachishkaykita nima ima uras killashkanichu. Chasna rurashpaynitata nima ima uras kuwashkankichu nima shuk obebastuta kushikushpa amiguynikunawa mikunaynipa.³⁰ Kunanka chay shuk kanpa wawaykika mana ali warmikunawa kawsashpan kullkikita llampu tukuchishpan paktamushka. Payraykuka wira wakra wawata wañuchishkanki.

³¹ Chasna nishpan yayanka rimarka: Wawaynistu, kanka tukuy urasmi ñukawa kahunki. Tukuy tiyawahushkaka kanpapas kan.³² Chay wawkikika wañushkashina kashkamantami paktamushka. Chinkarishka kashkanmantashina paktamushka. Chasna kashpan ¿manachu yapa kushikushpa kay fiestata ruranchima?

Jesuska shuk yuyaysapa kamachina runamanta yuyachishpa yachachin

16 ¹ Kutikashka Jesuska runankunata yachachishpan rimarka: Shuk kullkiyu runapa tiyarka shuk

runan, maykanmi payrayku tukuyta rurapayan. Shuk puncha shuk runakuna chay runanmanta payta rimarkakuna: Chay kamachinanpa churashkayki runaykika kullkitami yanka gastahun mana valikkunallapi nishpa. ²Chaypi patronka chay runanta kayarka. Kayashpan rimarka: Kanmanta uyashkani llullachiwahushkaykita. Manana munaninachu ñukarayku tukuyta rurak kanaykipa. Kunanka rikuchiway tukuy rurashkaykimanta killkashkaykita.

³Chaypi chay runanka yuyarirka: ¿Imashnata rurasha kunanka? Patroynika llukshichiwahun manana payrayku tukuyta rurak kanaynipa. Mana ursayuchu kani sinchita tarawashpa kawsanaynipa. Pinkaypami kanka kullkita tapushpa purihushpaynika. ⁴Kunan ñami yuyarishkani imashnami rurasha runakuna yakyuchwanankunapa wasinkunapi.

⁵Chasna yuyarishpan patroyninta liwikkunata shukllankama shukllankama kayarka. Puntiruta tapurka: ¿Maytukuytata liwinki patroynita? ⁶Chay runaka aynirka: Liwinimi shuk pachak bidón aseiteta. Chaypina chay patronpa runanka rimarka: Ñuka yanapashkayki. Apiy chay liwiyki killkata. Utki tiyarishpayki killkay pichka chunka tupullata. Ñukapas chasnallatata killkasha chay patroynipa liwichinan killkapi parihu kanankunapa. ⁷Chasnallatata shuktapas tapurka: Kanka, ¿maytukuytata liwinki? Payka aynirka: Shuk pachak kostal arustami liwini. Chaypi chay patronpa runanka rimarka: Apiy chay liwiyki killkata, pusak chunka tupullatana killkay. Ñukapas chasnallatata killkasha chay patroynipa liwichinan killkapi parihu kanankunapa.

⁸Patronka chay runan rurahushkanta yachashpan rimarka: Chay llullachik runaynika yuyaysapami, alita yuyarishpa rurak runa.

Jesuska chay yachachinata tukuchishpan runankunata rimarka:

Mana alita rurak runakuna Yaya Diosta kasukkunamanta ashwan alita yuyarinahun, imatami ruranankuna tiyan runa masinkunawa alita kawsanankunapa. Mana chasna kachun. ⁹Kankunata rimani: Kay allpapi achka runakunata mana alita rurachik kullkiwa imakunawapas kankunaka runa masikichikunata yanapaychi kankunata yuyanankunapa. Chasna rurashpa kawsashpaykichika imaykichi manana yanapak kashpan kay allpapi kawsanaykichi tukurinan uras yaykuchi yukunkichimi wiñayparayku Yaya Dioswa kawsanaykichiipa.

¹⁰Maykanmi uchillastuwa alita ruran, chasnallatatami achkawapas alita ruranku. Maykanmi uchillastuwa mana alita ruranchu, chasnallatatami achkawapas mana alitachu ruranku. ¹¹Kay mundumanta imakunawa mana alita rurashpaykichika ¿imashnataya Yaya Diospa kunayashkanta kuy tukunkichima? ¹²Chaymanta runa masikichi kankunapi sakishkanwa paypa munashkantashina mana rurashpaykichika ¿Yaya Dioska kankunata kunayashkanta kumachu? Manami kumachu.

¹³Nima maykan kamachishkan runa atipamachu ishkay patroyninrayku chay ratulla tarawanata. Shukllata kasunantia. Shuk patroyninta kasushpanka shuktaka mana kasunkanachu. Chasna shinami kankunapas imaykichillata yuyarishpa kawsashpaykichika manana atipankichinachu Yaya Diosta kasushpa kawsanata.

Jesuska payta asichik fariseokunata rimarka

¹⁴Chasna uyashpankuna chay yapa kullkita munak *fariseokunaka Jesusta asichirkakuna. ¹⁵Chaypi Jesuska mirka: Kankuna mana ali rurak runakuna

kashpaykichimi runakunata llullachishpa kirichinkichi yapa ali rurahuk runakuna kanaykichita. Chasna rurashpaykichipas Yaya Dioska tukuy yuyarihushkaykichita alita riksinmi. Maykantami runakuna yuyarinahun yapa ali kashkata, Yaya Dioska chaytaka chikninmi.

¹⁶Ñawpamanta pacha Bawtisak Juan yachachinankama Moisespa killkashkanlla, chaymanta Yaya Diospa yachayinwa shuk yachachikunapa killkashkankunalla tiyarka yachanaykicipa imashnami alita kawsananchi tiyan Yaya Diospa rikushkanpi. Kunanka Juan yachachishkamanta pacha kankunata yachachinchina kay suma ali shimita Yaya Diospa ali kamachinan kay allpapi ña kallarishkamanta. Chasna kashpanmi achka runakuna atipashkankunata ruranahun Yaya Diospa ali kamachinanpi kawsanankunapa. ¹⁷Kay silu allpapas shuk puncha chinkarinkami. Yaya Diospa rimashkanmantaka nima shuk shimi chinkarinkachu. Tukuy paktarinan tiyan.

Jesuska yachachin karika
warminwa, warmipas kusanwa
mana sakinakunankunapa
(Mt. 19.1-12; Mk. 10.1-12)

¹⁸Maykan kari warminta sakishpan shuk warmitana warmiyashpanka uchatami ruran Yaya Diospa rikushkanpika. Chasnallatatami maykan kari shuk saikiy tukushka warmita warmiyashpanka uchata ruran.

Jesuska shuk yapa kullkiyu
runamanta, shuk nima imayu
runamantapas yuyachishpa
yachachin

¹⁹Jesuska shuk yachachinawa yachachishpalla katirka:
Tiyarka shuk yapa kullkiyu runa. Chay runaka suma churarinallata churaripayan. Karan puncha atun suma

mikunata rurachishpa kushilla kawsapayan. ²⁰⁻²¹Chaymanta tiyarka shuk runa nima imayu Lásaro shutiyu. Chay runaka llagawa llampu aychanka ismushka karka. Chay kullkiyupa wasin punkupi tiyaripayan mikunamanta shuk parti urmeshpan ñukapas mikunaynipa nishpa. Chaypi tiyarishpan allkukunaka payta kayllayapayanahun aychan ismushkata llawkanankunapa.

²²Shuk puncha chay nima imayuka wañurka. *Angelkuna paytaka aparkakuna siluma yaya ruku Abrahampa kuchunpi tukuy parisishkanmanta samananpa. Chaymanta kullkiyu runapas wañurka. Paytaka wañushkakunapa churana uchkupi churashpa taparkakuna.

²³Wañushkakunata wakaychanapi yapa parisishupan karumanta rikurka Lasarota Abrahamwa pakta kahushkanta. ²⁴Chasna rikushpan Abrahamta kaparishpa tapurka: Yaya Abraham, llakichiway ñukatapas. Yapami rupawa kaypi parisihuni. Kachapay Lasarota yakuwa ukuchishpa makin wawapa puntanwa kalluynita chiriyachiwananpa.

²⁵Chasna nishpan Abrahamka aynirka: Wawayni, yuyariy. Allpapi kawsahushpaykira tukuy munashkaykita Yaya Dios kanta kushka. Kunanka chaykunaka ñami tukurishkakuna. Lasaroka yapa parisishpa allpapi kawsarka. Chayrayku kunanka kay ali kawsanapi kushillayachiy tukushka. Kanka kunanka nanaywa llakiwaya parisihunki. ²⁶Chaymantapas ñukanchi kankunawa mana tinkunakunanchipa shuk atun waykumi tiyan. Maykankunami munanahun kaymanta kankunama rinata mana atipanahunchu, nima chaymanta kanwa kahukkuna atipanahunchu shamunata kayma.

²⁷Chaypina chay kullkiyu wañuka rimarka: Chasna kashpanka yaya Abraham, kanta tapuni, Lasarota kachapay yayaynipa wasinma. ²⁸Chaypi

pichka wawkinikuna kahunkuna.
Paykunata sinchita kunak richun
paykunapas kay yapa llakiyta nanayta
parisinama mana shamunankunapa.

²⁹Chaypi Abrahamka aynirka:
Paykunaraykuka tiyanmi Moisespa
killkashkankuna, Yaya Diospa yachay-
ninwa shuk yachachikkunapapas.
Chaykunata kasunahuchun.

³⁰Chay kullkiyu wañuka kuti aynirka:
Ari yaya Abraham, chay wawkinikuna
Yaya Diospa killkachishkanta mana
kasunayanañhunchu. Ashwan wañushka-
kunamanta shukka kawsarishpan
paykunama rinma, chaypirami shuti
uyashpankuna kasunkakuna.

³¹Chasna aynishpan Abrahamka rimarka:
Mana kasushpankunaka Moisespa killkash-
kanta, nima Yaya Diospa yachayninwa
shuk yachachikkunapa killkashkanta,
manami kasunkakunachu nima shuk
wañushka runa kawsarishkata.

**Jesuska yachachin uchamanta
kuyrarinanchipa**

(Mt. 18.6-7,21-22; Mk. 9.42)

17 ¹Chaymanta Jesuska runankunata
rimarka: Tukuy uras tiyankami
uchata rurachinayak runakunaka. Chasna
kashpanpas jay, imashna kastigushi kanka
chay uchata rurachik runakunaryku!
²Maykanmi runa masinta uchata rurachin,
paytaka Yaya Diosmi sinchita kastiganka.
Ashwan ali kama, atun rumiwa
kunkamanta watashpa atun kucha
chawpipiwichunapa chaypi chinkarinanpa.
³Alita kuyrariychi kankuna kikin uchata
mana ruranaykichipa.

Shuk kirik masiki mana alita
rurashpanka payta rimay mana chasna
rurashpa katinanpa. Mana alita rurashkan-
manta llakirisha llakichiway nishpanka
llakichiy. ⁴Chasnallatata shuk puncha
kanchis kuti kanta millaypata rurashpanka
karan kuti kanta rimak shamuma: Kunanka

sakini millaypa rurashkaynikunata,
llakichiway nishpa. Chay kanchis kuti
payta chasnalla llakichinkilla.

**Jesusta kirishpa
tukuy imata atipanchi**

⁵Chasna Jesúس yachachishpanna
*apostolninkunaka payta tapurkakuna:
Ñukanchita yanapay ashwan alita
kanpi sinchikunanchipa.

⁶Chaypi Jesuska aynirka:
Ñukapi sinchikunaykichika shuk
uchilla mostasa muyushina uchillastu-
llapas kamaka, kay kaspita rimanki-
chima: Kaymanta anchuriy, kuchapi
wiñakriy nishpa. Chay ratulla chay
kaspika kasuma.

**Jesuska yachachin imatami
rurashpa Yaya Diospa
kamachishkan runaka
kawsanan tiyan**

⁷Chaymanta Jesuska runankunata
rimarka: Nima maykan patrón runanta
rimamachu, chakranpi tarpushkanwasha,
wakrankunata kuyrashkanwasha kutimush-
pan: Tiyarik shamuy mesapi mikunaykipa.

⁸Ashwan paytaka rimama: Mikunaynita
yanupak shamuy. Chaymanta karaway,
upyachiway. Mikushkayniwasha
upyashkayniwasha kanka mikunki.

⁹?Tukuy kamachishkanta kasushkanrayku
chay patronka runanta agradesimachu?
Mana. Runan kashpan paypa tarawanan
kan patronta sirvinanpa. ¹⁰Chasnallatata
kankunapas, paktachishpaykichi tukuy
Yaya Diospa kamachishkanta, rimaychi:
Rurashkanchi maykantami Yaya Dios
munashka rurananchipa chayllata.

**Jesuska chunka runata aycha
ismuchik unkuymantamampirka**

¹¹Jesuska Jerusalenma rihushpan shuk
parti *Samaria allpa Galilea allpawa
tupanakushka mayanta rihurka. ¹²Shuk

uchilla llaktapi paktana kahushkanpi, chunka runakuna aycha ismuchik unkuywa kahukkunawa tinkunakurka. Chay unkushkakunaka mana kayllayanata atipashpankuna karullapi shayarirkakuna.

¹³Chaymantalla kaparishpa tapurkakuna:
¡Yaya Jesús, ñukanchita llakichiy!
nishpa.

¹⁴Jesús paykunata rikushpan nirka:

*Saserdotekunama riychi, karayki-chita rikushpankuna rimanankunapa ampirishkachu manachu nishpa.

Paykunaka kasurkakuna. Chayma rihushkankunapi ampirishka karkakuna unkushka kahushkankunamanta. ¹⁵Shukka ña ali kashkanta rikushpan Yaya Diosta sinchi shimiwa kushichishpa kutimurka. ¹⁶Jesuspa puntanpi kunkurik shamurka, allpakkama kumurishpa payta ampiškan-rayku agradesirka. Payka karkami Samaria-manta runa. ¹⁷Shukllata rikushpan Jesuska tapurka:

¿Kunanka shukkunakaya? ¿Manachu chunka ampiy tukushkankichi unkushka kahushkaykichimanta? ¿Maypitaya kahunkuna chay iskunkunaka? ¹⁸¿Imash-nataya kay mana israel runalla kutimushka Yaya Diosta agradesishpa kushichinanza?

¹⁹Chaypina chay runata rimarka:

Atarishpayki wasikima riy. Ñukapi sinchikushkaykiraykumi ña kishpishka kahunki.

**Imashnami Yaya Dios kallarin
runakunata kay allpapi kamachinata**
(Mt. 24.23-28, 36-41)

²⁰Chaymantalla *fariseokunaka Jesusta tapurkakuna:

¿Ima urasta Yaya Diospa ali kamachi-nanka kay allpapi kallarinka?

Jesuska aynirka:

Yaya Diospa ali kamachinan paktari-hushkanka manami rikuypachu. ²¹Mana

atipanchichu rimanata kaypimi, chaypimi Yaya Dios kamachihun nishpa. Kamachihushkanta mana rikushpayki-chipas paypa ali kamachinan chawpiki-chipi ña kallarishka.

²²Chaymanta runankunallata rimarka:

Shuk puncha paktarinkami, maypimi yapa rikunayankichi shuk punchallapas ñuka Yaya Diospa Kachashkan Runa ña kamachik kanaynita. Chayta rikunata munashpaykipas manami atipanki-chichu. ²³Chay urasmi kankunata llullachinayashpa rimankakuna: Kaykaya Yaya Diospa Kachashkan Runaka. Chaymami Yaya Diospa Kachashkan Runaka nishpa. Chasna nishpankunapas ama rinkichichu rikunaykicipa. ²⁴Imashnami ilampaka rikurin kayma chayma tukuy siluta punchayachishpa, chasnashinami ñuka Yaya Diospa Kachashkan Runaka kuti shamusha. ²⁵Chay puncha manara paktahushpanra achkata parisinayni tiyan. Kunan kawsak runakuna chiknishpa mana valiktashina wicuwankakuna.

²⁶Ñuka Yaya Diospa Kachashkan Runa kuti shamushpayni ñawpa Noé kawsashkan urasshina kanka^f runakuna kunkaylla kawsahushkankunapi kunkaymanta kastigay tukunkakuna.

²⁷Noé kawsashkan uras runakuna kunkaylla mikushpa upyashpa warmiyashpa kawsapayarkakuna Noé chay atun lanchapi yaykunan punchakama. Chasnallapi atun untay paktash-pan tukuy chinkarirkakuna.

²⁸Chasnallatata tukurka Lot shutiyu kawsashkan uraspas.^g Sodoma llaktapi kawsak runakuna kunkaylla mikupayar-kakuna, upyapayarkakuna, rantipayar-kakuna, rantichipayarkakuna, tarpupa-yarkakuna, wasikunata rurapayarka-

kuna. ²⁹Lotka chay Sodoma llaktamanta llukshishpan nina *asufriwa tamyashina silumanta urmarka. Chay ninaka tukuy runakunata wañuchirka. ³⁰Chasnashinami kanka Yaya Diospa kastiganan punchaka, ñuka Yaya Diospa Kachashkan Runa kuti shamushpayni.

³¹Chay puncha wasi awapi kahushpaykichika chaymantalla mitikuychi. Imaykikunaka wasi ukupi tiyahushpanka amana yakkunkichichu apak rinaykichipa. Chasnallatata chakraykipichi tarawahushpaykichika chaymantalla mitikuychi. Amana kutiychinachu wasiykichima. ³²Yuyariychi imashnami Lotpa warminka ñawpa wañurka. Chay warmika imankunallapi yuyarishpa mana utkallachu mitikurka kishpinanpa. Chayraykumi wañurka. ³³Maykanmi Yaya Diospa munashkanta kasushpa kawsan, chayka wañuchi y tukushpanpas Yaya Dioswa wiñaypa kawsanka.

³⁴Kankunata rimani: Chay uras ishkay runakuna tutapi shuk tulltullapi kashkunkunamanta, shukllami pushay tukunka wiñayparayku, shukka sakirishka kanka. ³⁵Chasnallatata ishkay warmikuna parihu kutahushkunkunamanta shukllami pushay tukunka, shukka sakirishka kanka. ³⁶Ishkay runakuna chakrapi tarawashpankuna shukllami pushay tukunka, shukka sakirishka kanka.

³⁷Chasna rimashkanta uyashpankuna runankunaka tapurkakuna:

Yaya Jesús, ¿maypita chasna kanka?

Chaypi Jesuska aynirka:

Maypimi wañushkakunaka kahunkuna, chaypimi ullawankakunaka tantarinahun. Chasnashina runakuna millaypa ruranakunata yapa mirachishpankuna millanayaypa ismushina tukushpankuna kastigay tukunkakuna. Chayka mana pakallachu kanka ashwan tukuyrayku yachaypa rikuypa kanka.

Jesuska yachachin mana sakishpa mañananchipa

18 ¹Chaymanta Jesuska runankunata shuk yachachinawa yachachirka mana sampayashpa Yaya Diosta mañanakunupa kasna nishpa: ²Shuk llaktapi tiyarka runakuna mana alita rurashkunkunamanta alichak apu. Chay alichak apuka mana manchapayanchu Yaya Diosta, nima runakunata. Yapa piña karka. ³Chay llaktapillatata kawsapayarka shuk mashintu warmi. Chay mashintuka chay alichak apuma ripayarka payta tapunanza: Ñukata yanapaway. Chikniwakta kayashpayki rimay, munahushkaynita mana yanka kichuwananpa. ⁴Achka kuti rishpanpas chay apuka payta mana kasunayarkachu. Chay warmika mana sampayashpa payta tapushpalla katishpan chay apuka yuyaynillapi nirka: Ñukaka mana manchanichu nima Yaya Diosta, nima runa masinikunata paykunata kasunaynipa. ⁵Chasna kashpanpas chay warmika yapa killachiwahushkanrayku kunanka kasunayni tiyan. Payta mana yanapashpaynika yapami killachiwanka nishpa.

⁶Chayta kwintashpan Jesuska rimarka: Chay alichak apuka Yaya Diosta mana manchak kashpanpas rimarka chay warmita yanapananza.

⁷Kankunaka Yaya Diospa akllashkan runakuna kashpaykichi payta punchapi tutapipas mañashpaykichi chay apumanta ashwanta mana unayashpanchu kankunata yanapanka. ⁸Kankunata rimani: Alita mañashpaykichika Yaya Dioska kushikushpa nima unayashpanchu kankunata yanapanka. Ñuka Yaya Diospa Kachashkan Runa kutikashka kay allpama shamushpayni, tarishanchari kirik runakunata, maykunkunami mana sakishpa Yaya Diospi sinchikushpa mañanahun?

**Jesuska yachachin mana
yuyarinanchipa runa
masinchikunamanta ashwan ali
kananchita**

⁹Chaypi shukkuna tiyarka mana alita yuyarikkuna. Paykunaka tukuymanta ashwan ali kanankunata yuyarishpa kawsarkakuna. Paykunata Jesuska shuk yachachinawa kasna yachachirka:
¹⁰Ishkay runakuna rirkakuna *Yaya Diospa wasinpi mañanankunapa. Shukka karka *fariseo, shukka karka *Roma llaktarayku *impuestuta kobra.
¹¹Chay fariseo shayarishpan pay kikinlla ali kananta yuyarishpa Yaya Diosta mañarka kasna: A Yaya Dios, kanta agradesini, mana runa masinikunashina kahushkaynirayku. Mana kanichu paykunashina shuwaysiki, uchata ruraysiki, shukpa warminwa musayak. Nima kanichu kay impuestuta kobra-shina. ¹²Ñukaka karan semana ishkay punchata kanta kushichishpa mana mikunichu. Chaymantapas karan chunkata ganashkaynimanta shukta kanrayku kuni nishpa. ¹³Chay impuestuta kobraffa pinkashpan karullapi shayarirka. Yapa uchasapa kananta yuyarishpan kumurishpa pichunta waktashpa Yaya Diosta mañarka: Yaya Dios, llakichiway. Yapa uchasapa kani. Uchaynikunamanta pichaway nishpa.

¹⁴Kankunata rimani: Chay impuestuta kobraffa uchankunamanta llakichirish-kana wasinma kutirka. Chay fariseotaka Yaya Dioska manami llakichirkachu. Kankuna kikinmantalla yuyaykichipi atun tukunayashpaykichika Yaya Diosmi kankunata mana alichu kankichi nishpa pinkachinka. Kankuna runa masikichikunamanta mana atun tukunayashpa paykunata yuyashpa yanapash-paykichika Yaya Diosmi kushikushpa kankunata atunyachinka.

**Wawakunata Jesusma
apamurkakuna**
(Mt. 19.13-15; Mk. 10.13-16)

¹⁵Jesús yachachihushpan yayankuna-ka llullu wawankunatapas payma aparkakuna, llankashpan paykunarayku Yayan Diosta mañananpana. Chasna rikushpankuna Jesuspa runankunaka piñarishpa paykunata arkarkakuna Jesusta mana kayllayanankunapa, kay wawastukunata Jesusma ama apamuy-chichu nishpa. ¹⁶Chaypi Jesuska yayankunata wawankunanti kayashpan runankunata rimarka:

Ama arkaychichu chay wawakunata ñukama apamunankunapa. Wawakuna-shina ñukapi sinchikuk runakunallami Yaya Diospa kamachishkan tukushpa paypa ali kamachihushkanpi kawsanka-kuna. ¹⁷Alita uyawaychi. Maykanmi wawakunashina ñukata yuyawashpa mana kasuwan, chayka manami Yaya Diospa kamachishkan tukushpa paypa ali kamachihushkanpi kawsankachu.

**Shuk apu kullkiyu
Jesuswa kwintarka**
(Mt. 19.16-30; Mk. 10.17-31)

¹⁸Chaymanta shuk apu Jesusta tapurka:

Ali yachachik, rimaway ¿imashna rurashpaynitaya atipaynima Yaya Dioswa wiñaypa kawsanata?

¹⁹Jesuska aynirka:

¿Imaraykuta rimawanki ali kanaynita? Mana nima shuk runa tiyanchu ali. Yaya Diosllami ali kan. ²⁰Kanka ñami yachanki Yaya Diospa kamachishkankunata: Ama shuk warmiwa musayaychu. Ama runa masikita wañuchiychu. Ama shuwaychu. Nima pimanta llullashpa rimaychu. Yayaykita mamaykita yuyashpa kushichishpa kawsay nishpa.

²¹Chaypi chay apuka aynirka:

Tukuy chay Yaya Diospa kamachish-kankunata wawamanta pacha kasushpa kawsashkani.

²²Chayta uyashpan Jesuska rimarka: Alitami rurashkanki. Shuk imastu-lami kasunaykipa pishin. Rantichikriy tukuy imaykikunata. Chay kullkitaka nima imayu runakunata kuy. Chasna rurashpaykimi silipi achka imayushina tukunki. Chasna rurashkaykiwasha shuti katiway.

²³Chayta uyashpan chay runaka sinchita llakirirkia. Yapa achka kullkiyu Kashpan mana munarkachu tukuy imankunata rantichishpa kunata.

²⁴Chasna llakirishkata rikushpan Jesuska rimarka:

Maytukuy sinchita kan kullkiyukuna-raykuka Yaya Diospa kamachishkan-kuna tukunankunapa. ²⁵Shuk atun wiwa kamilluka manami atipamachu pasanata shuk aguha uchkustuta. Chasnashinami shuk runaka kullkinllapi yuyarishpanka manami atipankachu Yaya Diospa kamachishkan tukunata.

²⁶Chaypi kahukkunaka chayta uyashpankuna rimarkakuna:

Chasna kashpanka ¿pitá atipama kishpichiy tukunata Yaya Diospa ali kamachihushkanpi kawsanankunapa?

²⁷Chaypi Jesuska paykunata rimarka: Nima pi atipanchu kishpichirinata pay kikinta. Yaya Diosllami atipan runakunata kishpichinata paypa ali kamachi-hushkanpi kawsanankunapa. Payllami atipan tukuya ruranata yachayninwa.

²⁸Chaypi Pedroka Jesusta rimarka: Ñukanchika sakishkanchimi tukuy imanchikunata kanta katinanchipa.

²⁹⁻³⁰Chaypi Jesuska runankunata rimarka:

Alita uyawaychi. Shuk runa Yaya Diospa kamachishkan tukushkanrayku wasinta, warminta, wawinkunkata, yayankunata, wawankunkata

sakishpanka kay allpapi kawsahush-panra Yaya Diosmi tukuy ima sakishkanmanta ashwanta kunka. Chaymanta chay chapahushkanchi mushu mundupi wiñaypa Yaya Dioswa kawsankana.

**Jesuska kimsaynin kuti rimarka
wañunanmanta**

(Mt. 20.17-19; Mk. 10.32-45)

³¹Jesuska chay chunka ishkay runankunata chaynikstuma pushashpan rimarka: Ñami yachankichi Jerusalén llaktama rihushkanchita. Chaypimi paktarinka, maykantami Yaya Diospa yachayninwa yachachikkunaka ñawpa killkarkakuna ñuka Yaya Diospa Kachashkan Runamanta. ³²Chikniwak runakunaka apiwankakuna *romano runakunata kuwanankunapa. Paykuna asichiwankakuna, pukllachishpa parisichiwankakuna, asishpa tyukawan-kakuna, sinchita asutiwankakuna.

³³Asutiwashkankunawasha wañuchi-wankakuna. Chasna wañuchiwashpan-kunapas kimsa punchamantami kawsarimusha.

³⁴Chasna nishkanta runankunaka mana asirtarkakunachu. Paykunaryku mana asirtaypa shimikuna karkakuna.

**Jesuska ampirka shuk wiskuta
Jerikó llaktapi**

(Mt. 20.29-34; Mk. 10.46-52)

³⁵Jesuska Jerikó llaktata kayllaya-hushpan shuk wisku runa ñampi mayanpi tiyahukta rikurka. Payka runakuna pasahukkunata kullkitapuhurka. ³⁶Achka runakuna pasahukkunata uyashpan chay wiskuka tapuraka:

¿Imaraykutaya chay tukuy pasahunki-chi? nishpa.

³⁷Shukkunaka rimarkakuna: Nasaretmanta Jesusmi pasahun.

³⁸Chayta uyashpan chay wiskuka sinchita kaparishpa rimarka:

¡Jesús, Davidpa Miraymanta Kishpichik, llakichiway!

³⁹Chaypi chay Jesuspa puntanpi rihuk runakunaka arkashpa chunllayay nirkakuna.

Chasna rimashpankunapas payka ashwan sinchita kaparirka:

¡Davidpa Miraymanta Kishpichik, llakichiway!

⁴⁰Chasna kaparishkanta uyashpan Jesuska shayarishpan rimarka:

Chay wiskuta ñukama apamuychi.

Ña kuchunpi kashpan payta tapurka:

⁴¹¿Imatata munanki kanrayku ruranaynipa?

Chay wiskuka aynirka:

Yaya Jesús, ñawinita amipipay rikunaynipa.

⁴²Jesuska aynirka:

Ari, kunallami rikunki. Ñukapi sinchikushpaykimi ampirishkanki.

⁴³Chasna rimashkanllawa chay wiskuka atiparkana rikunata. Ampirishkanrayku Yaya Diosta atunyachishpa kushichishpa Jesusta katirka. Chayta rikushpankuna tukuy runakunapas Yaya Diosta atunyachishpa kushichirkakuna.

Jesuska Sakeowa kwintarka

19 ¹Ña Jerikopi yaykushpan Jesuska chay llakta chawpita rihurka. ²Chaypi kawsahurka shuk yapa kullkiyu runa Sakeo shutiyu. Payka *impuestuta kobrakkunapa apun karka.

³Chay runaka yapa munarka Jesusta riksina. Chay llaktata pasahushkanta yachashpan munarka kayllayanata. Chasna munashpanpas uchillastu kashpan mana atiparkachu rikunata, yapa achka runakuna kahushkanrayku.

⁴Chasna kashpan Jesuspa rinan ñampita kallpashpa ñawparka runakunapa puntanma. Chaypi shuk kaspi Sikarka,

Jesús pasahushkanta atipanarpa rikunata.

⁵Jesús chayta pasahushpan awama rikuhashpan Sakeota rimarka:

Sakeo, utkalla uraykuy. Kunan puncha wasikipi kiparinayni tiyan.

⁶Chaypi Sakeoka utkalla uraykumurka. Kushikushpa Jesusta wasinpi yaykuchirka. ⁷Chayta rikushpankuna runakunaka Jesusta washanchashpa paykunapura rimarkakuna:

¿Imashnata Jesuska yaykun chasna uchata ruraysikipa wasinpi?

⁸Chasna rimashpankuna Sakeoka shayarishpan Jesusta rimarka:

Yachachik, rikuy, tukuy imayni tiyawashkakunamanta chawpita nima imaykunata kusha. Maykankunaman-tami ñawpa llullachishpa kullkiti tapushkani, chaykunataka kutichishami chusku kuti ashwanta.

⁹Jesuska payta aynirka:

Kunan puncha shuti kankuna kay wasipi kawsak runakuna kishpichirishka kankichi nishpa.

Chaymanta chaypi kahukkunata rimarka:

Kay runa mana alita rurak kashpanpas ñukanchishina Abrahampa mirayman-tami kan. ¹⁰Ñuka Yaya Diospa Kachash-kan Runa shamushkani chasna mana ali rurashkankunawa chinkarishkashina kahukkunata maskanaynipa, uchayukunata nina mana wañukma rina kahush-kankunamanta kishpichinaynipa.

**Jesuska shuk patrón runankunata
kullkiti kushpa sakishkanmanta
yuyachishpa yachachin**
(Mt. 25.14-30)

¹¹Jesuska Sakeopa wasinpi kashpan ña kahurka kamachikkuna kawsashkan Jerusalén llakta kuchupi. Runakunaka rimashkanta uyahushpankuna yuyarir-kakuna: Ñami rihun Jerusalenma

kamachik tukunanpa. Yaya Diospa ali kamachinan kay allpapi ñami kallarihun nishpa. Pantachishpa yuyarishkanku-nata riksishpan Jesuska paykunata shuk yachachinawa pay kikinmanta yachachirka:

¹²Tiyarka shuk runa apupa ayllun. Payka rirk'a karu allpama chaypi kawsak atun apu payta aputa rurananpa, chasna apu tukushpan kikin allpanpi kamachinanpa nishpa. Runankunata rimarka apu tukushkan-washa kutimunanta. ¹³Manara llukshishpan chunka paypa runanku-nata kayashpan karan shuk runanta chay tupullata yapa valik kullkita kuhushpan rimarka: Kay kullkiwa rantishpa rantichishpa mirachipanki shamunaynikama. Chasna karan runanta rimashpan chay apu tukunapa riukkha rirk'a.

¹⁴Chay allpapi llaktakunamanta runa masinkunaka payta chiknishpankuna paypa washanta shuk runakunata kacharkakuna chay atun aputa rimak rinankunapa: Mana munanchichu chay runaka apunchi tukunanpa nishpa.

¹⁵Mana munashpankunatata payka apunkuna tukurka. Chaymanta llaktanma kutirka. Paktashpan shuk runanta kacharka, pushak rinanpa maykankunatami kullkinta kushpa sakirka. Yachanayarka maytukuytami karan shuk runan mirachishka chay kullkimanta.

¹⁶Puntiru runanka paktashpan rimarka: Patroyni, kullkikita mirachish-kani chunka kuti ashwanta kanrayku.

¹⁷Chaypina chay patronka aynirka: Alita rurashkanki, ali runayni kanki. Kay uchillastu kushkayniwa sumakta tarawashkaykirayku churashkayki chunka llaktakunata kamachipanaykipa.

¹⁸Shuk runanpas rimak shamurka: Patroyni, kullkikita mirachishkani

pichka kuti ashwanta kanrayku.

¹⁹Paytapas aynirka: Kanka kamachi-panki pichka llaktakunata.

²⁰Chaymanta shukna rimak shamurka: Patroyni, kaykaya kullkikika. Sumakta llachapawa wankushpayni wakayhash-kani kanrayku. ²¹Yapa kanta manchash-payni kay kullkita mana llankashkani-chu. Shukkuna tarawashkanmanta kanka yanka kullkita apinki. Shukkuna tarpushkankunamanta kanka pallanki.

²²Chaypina chay apuka rimarka: Kanka millaypa yuyayyu runa kanki. Kan kikin rimashkaykimanta kastigarinki. Nuka sinchi kamachik kanaynita, shukkunapa tarawashkanmanta kullkita apinaynita, shukkunapa tarpushkankunamanta pallanaynita yuyarinki. ²³Chasna kashpanka, imaraykuta ullkinita mana churashkankichu ullkita mirachina wasipi, chaypi miranarpa? Chaypi churankima karka uchillastullapas mirashkawa pakta apinima karka.

²⁴Chaymanta chaypi kahukkunata rimarka: Payta kichuychi chay kushkayni ullkita. Chay chunka kuti mirachik runata kuychi. ²⁵Paykunaka aynirkakuna: Patrón, payka ña achka ullkita apishka. ²⁶Chay apuka aynirka: Kankunata rimani, maykanmi alita rurak runayni kan, paytaka kunimi ashwanta. Killaysiki runaka uchillastu tiyapushpanpas kichuy tukunkami. ²⁷Kunanka chay kuntrayniku-nata pushka ripaychi. Mana munashkanku-narayku ñuka apu tukunaynita kay puntaynipi apamushpa wañuchichyi.

²⁸Chasna nishpa yachachishkanwasha Jesuska Jerusalenma rirk'a.

Jesuska Jerusalén
llaktapi yaykurka
(Mt. 21.1-11; Mk. 11.1-11;
Jn. 12.12-19)

²⁹⁻³⁰Jerusalenma riushshkanpi Jesuska paktarka Betfagé llakta, Betania llakta

kuchupi. Chay llaktakunaka shuk urku Olivos shutiyu kuchupi karkakuna. Ña paktahushpan chay Olivos urku mayanpi, Jesuska ishkay runankunata nirk'a:

Riychi chay rikuhushkaykichi llaktama. Chaypi paktashpaykichi tarinkichimi shuk malta burru watarishkata, maykanpimi nima shuk runa purishkarachu. Chay malta burruta paskashpaykichi apamuychi. ³¹Shuk runa kankunata mitsashpa tapushpanka ñimaraykutaya paskahunkichi? nishpa, payta kasna rimaychi: Yayanchi Jesusmi munahun awanpi tiyarishpa rinanpa. Kunanllatatami kutichik shamushu nishpa.

³²Chasna Jesús nishpan chay ishkay runankunaka rirkakuna. Paypa rimashkantashina tarik rirkakuna. ³³Ña chay malta burruta paskahushpankuna amunkunaka tapurkakuna:

¿Imaraykuta paskahunkichi chay burruta?

³⁴Paykunaka aynirkakuna:

Yaya Jesusmi munahun.

³⁵Chaymanta Jesusma apashpa rirkakuna. Chaypi paktashpankuna churarinankunata burrupa awanpi mantashpankuna Jesusta tiyachirkakuna. ³⁶Chasna Jesús rihushpan puntanpi runakunaka churarinankunata ñampipi mantarkakuna, imashnami rurapayanahun shuk atun aputa kushilla yaykuchinankunapa. ³⁷Ña Jerusalenta kayllayahushpankuna Olivos urkuta uraykuhushpankuna Jesusta chay achka katihuk runakunaka yapa kushikushpankuna kaparishpa Yaya Diosta agradesirkakuna:

¡Yaya Dios, kay Jesús atun yachaykita rikuchishpa tukuy ali rurashkanta rikushkanchi! ³⁸Payka kanpa yanapashkayki ali runami kan. Kanpa munashkaykita rurananpa kachashkayki atun

apunchi kashpanmi shamuhun. Ñami tukuya alichashkanki kushilla paywa kawsananchipana. Kanta kushichinch'i awa silupi kawsak Yaya Dios.

³⁹Chaypi shuk *fariseokuna chay runakunapa chawpinkunapi kahukkuna rimarkakuna:

Yachachik, rimay kay kanta katik runakunata chunllayanankunapa.

⁴⁰Chaypi Jesuska aynirk'a:

Kankunata rimani, kaykuna chunlla-yashpankunaka rumikunanami kaparin-kakuna.

⁴¹⁻⁴²Jesús Jerusalén kuchupi paktashpan llaktata rikushpan wakarka. Chay llaktapi kawsakkunarayku wakashpa rimarka:

Imashna alishi kama karka, kay punchallapas asirtankichima ñuka Yaya Dioswa alichashka kushilla kawsayta kuk kanaynita kushillana kawsanayki-chipa. Kunankama mana munashpaykichi asirtanata, Yaya Dios kankunamanta kichushka asirtana yuyayta manana asirtanaykicipa. ⁴³⁻⁴⁴Mana munashpaykichi asirtanata Yaya Dios kachawashkanta kankunata kishpichinaynipa, kunanmanta pacha achkata parisinayki-chi tiyan. Parisina punchakuna paktarishpankuna kuntraykichikunaka llaktaykichi muyukta allpata lumayachinkakuna chaypi pakashpa wañunkushpa kankunata winsinankunapa. Tukuy kankunata winsishpa wañuchinakuna. Tukuy wasikichikunatapas waklichishpa urmachinkakuna. Nima shuk rumi awapura rurarishkaka kiparinkachu.

**Jesuska rantichik runakunata Yaya
Diospa wasinmanta llukshichirka**
(Mt. 21.12-17; Mk. 11.15-19;
Jn. 2.13-22)

⁴⁵Jerusalenpi paktashpan Jesuska

*Yaya Diospa wasinpi yaykurka. Chay

wasipi puntiru atun pampa kincharish-kapi achka rantichik runakuna karkakuna. Chayta rikushpan Jesuska piñarishpan llamputa llukshichirkira.
⁴⁶Llkshichihushpan paykunata rimarka:

Yaya Dioska killkachishkanpi riman:
 Kay wasinika ñukata mañanankuna wasinimi kan nishpa.

Kankunaka kay Yaya Diospa wasinta shuwakunapa kushilla tantarinata rurashkankichi. [Chasna Jesuska rimashpan paykuna chaypi achkata kobrashpa rantichihushkankunaryku shuwakunashina kanankunata yuyachirkira.]

⁴⁷Chaymanta pacha tukuy punchakuna Jesuska Yaya Diospa wasinpi yachachipayan. Achka runakuna payta uyashpanguna *saserdote kunapa apunkuna, Moisespa killkashkanta yachachikkunapas, chay llaktapa apunkunapas maskarkakuna, imashna rurashpami payta wañuchinkakuna.
⁴⁸Chasna yuyarishpangunkunata mana atiparkakunachu payta wañuchinata, tukuy uras achka runakuna paypa yachachihushkanta yapa uyanayashpa chayllapi kahushkankunaryku.

Jesuspa atun
yachaynimanta riman
(Mt. 21.23-27; Mk. 11.27-33)

20 ¹⁻²Shuk puncha Jesuska *Yaya Diospa wasinpi runakunata yachachirkira Yaya Dios runakunata kishpichinanmanta. Chaypi *saserdote kunapa apunkuna, Moisespa killkashkanta yachachikkunapas, paykunata kamachik israel masin rukukunapas tapuk shamurkakuna:

Ñukanchita rimay ¿pita kanta kamachishka tukuy chay rurashkaykikunata ruranaykipa? ¿Pita kanta kamachishka kasna yachachinaykipa?

³Chaypina Jesuska aynirka: Ñukapas shuk imata tapushkaykichi. Ayniwaychi. ⁴¿Pita Juanta kamachirkira bawtisananpa? ¿Yaya Dioschu runakunachu?

⁵Chaypi paykunapura tapunakurkuna:

Yaya Diosmi Juanta kacharka nishpanchika Jesuska ñukanchita rimankami: Yaya Dios payta kachashka kashpanka ¿imaraykutaya payta mana kasushkankichichu? ⁶Aynishpanchika runakuna rimashpanguna Juanka yachachirkira nishpa, tukuy runakuna piñarishpanguna ñukanchita rumiwa tuksishpa wañuchinkakuna. Paykunaka kirinahun chay Juan wañuka Yaya Diospa yachayninwa yachachik kashkanta.

⁷Chasna tapunakushpanguna Jesusta aynirkakuna:

Mana yachanchichu pimi Juanta kacharka nishpa.

⁸Chaypina Jesuska aynirka:
 Chasna kashpanka ñukapas mana rimashkaykichichu pimi kamachiwashka tukuy kaykunata ruranaynipa nishpa.

Jesuska mana kasunayak
tarawakkunamanta
yuyachishpa yachachin
(Mt. 21.33-46; Mk. 12.1-12)

⁹Chaymanta Jesuska tukuy chay runakunata shuk yachachinawa yachachirkira kasna:

Tiyarka shuk chakrayu runa. Chay runaka chakranpi achka uva wiñarishkakunata tarpuchirkira. Chaymanta chakranta shuk tarawak runakunata kurka amunshina pichashpa kuyrakanunapa. Chasna kushpan rimarka: Kay uva chakraynita pichashpa kuyrapankichi shamunaynikama. Pallashpaykichi tukuy muyunkunamanta chawpita

kuwankichi. Chasna rimashpan chay amunka rirka shuk karu llaktama, chaypi unayta kawsanarpa.

¹⁰Ña chay uvakunata pallana uras paktarishpan chay amunka shuk runanta kacharka chay chakranpi tarawahukkunata rimak rinanpa: Patronchimi kachawashka uva muyukunata pallashkaykichimanta chawpita kuwanaykichipa payrayku apanaynipa nishpa. Chay runanka uva muyuta apanapa rishpan mana kurkakunachu payta nima shukta. Makashpankunalla chay runata kacharkakuna.

¹¹Chaymanta chay patronka shuk runantana kacharka uva muyukunata tapuk rinanpa. Paytapas makashpankuna millaypata rimashpa pinkachishpankuna shinallata kacharkakuna.

¹²Kimsaynin runantana kacharka. Paytapas chasnallatata mana alitachu rurarkakuna. Makashpankuna aychan liki likita kacharkakuna.

¹³Chaymantana chakra amuka yuyarirka ¿imashnashi ruraynima? nishpa. Kachashara shuklla munashkayni wawaynita. Payta rikushpankunachari manchashpankuna kasunkakuna nishpa. Chaymanta wawantana kacharka. ¹⁴Payta rikushpankuna chay tarawak runakunaka kwintarkakuna paykunapura: Payka kay chakra amupa wawanmi. Yayan wañushpan kay chakraka payraykunami kiparinka. Akuychi kunalla wañuchishunchi, tukuy kay uva chakraka ñukanchipana kananpa. ¹⁵Chaypina chay chakramanta llukshichishpankuna payta wañuchirkakuna.

Chasna kwintashkanwasha Jesuska tapurka:

¿Imanachimashi chay chakra amuka chay wañuchik runakunata? ¹⁶Chay uva chakranma rishpan chay tarawakkuntaka wañuchinkami. Chaywasha chay

chakrantaka kunkami shuk runakunta nishpa.

Yachachishkanta uyashpankuna rimarkakuna:

Yaya Dioska ama chasna rurachun ñukanchiwa.

¹⁷Jesuska paykunata rikushpan pay kikin rumishina kananta yuyarishpan rimarka:

¿Ima ninayantaya kasna Yaya Diospa ñawpa killkachishkanka?

Shuk runa wasinta rumimanta rurashpan tarawak runankunaka shuk ali sinchi rumita mana munashpankuna mayanpi churarakuna mana alichu nishpankuna. Chay rumitaka wasinta rurak runaka akllashpan chay wasinpi churarka shuk orkonshina sinchi-kuchik kananpa nishpa.

¹⁸Chay akllashkan rumipi takakta tukushpaykika tulluyki pakiktami urmanki. Chay atun rumi awaykipi urmeshpanka machuyakta nitishpa pulbu wañunki.

¹⁹Chasna Jesús yachachishpan chay *saserdotekunapa apunkuna, Moisespa killkashkanta yachachikkunapas alita asirtarkakuna, paykuna amunta mana kasunayakkunashina kanankunata uyachishkanta, chaymantapas chay ali rumita wichukkunashina chay rumipi takarikkunashina kanankunata uyachishkanta. Chayrayku yapa piñarishpankuna Jesusta chay ratulla apinayarkakuna wañuchichinankunapa. Chasna ruranayashpankunapas Jesusta mana apirkakunachu runakunata manchashkankunaryku. Pakta wañuchi yukunchima nishpa yuyarirkakuna.

**Chiknik runakuna Jesusta
pantachichinayarkakuna
(Mt. 22.15-22; Mk. 12.13-17)**

²⁰Jesusta yapa *romano aputa apichichinata munashpankuna chay

payta chiknik runakunaka chaymanta pacha maskarkakuna, imamantami payta apinkakuna nishpa. Chasna kashpan shuk runakunata Jesusma kacharkakuna, alishina tukushpa payta llullachishpa pantachichinankunapa. Chasna rurashpa munarkakuna romano aputa Jesusmanta millaypata rimak rinata.

²¹Chay llullachik runakunaka Jesuspí paktashpankuna alishina tukushpa payta rimarkakuna:

Yachachik, yachanchi tukuy uras runakunata rimanaykika yachachinaykika shutipa kananta, mana manchashpa nima pita. Alita yachachinki runakunata Yaya Diospa munashkanta rurashpa kawsanankunapa. ²²Ñukanchita rimay ¿alichu manachu ñukanchi israel runakunaka chay romano tukuymanta atun aputa *impuestuta pagananchipa? ¿Yaya Dioska munanchu pagananchipa manachu?

²³Jesuska yacharka mana ali yuyarishkankunata. Ari, pagananchi tiyan nishpa aynimaka, israel apukunata rimak rinahuma payta kastiganankunapa. Mana alichu pagananchipa nishpa aynimaka, romano aputa rimak rinahuma payta kastigananpa. ²⁴Chasna kashpan paykunata rimarka:

Rikuchiwaychi shuk kullkita.

Chaymanta shuk kullkita apishpan tapurka:

¿Pipa almantata rikunkichi kay kullkipi? ¿Pipa shutinta kay kullkipi killkarishka kan?

Paykunaka aynirkakuna:

Romano tukuymanta atun apupami.

²⁵Chasna aynishpankuna Jesuska paykunata rimarka:

Chay atun apupa kashkantaka kuychi amunta. Maykanmi Yaya Diospa kan, kuychi payta. Yaya Dios ñukanchiku-

nata rurashkanrayku ñukanchikunapa amunchi kan. Chayrayku tukuy shunkuykichimanta pacha payta yuyashpa kawsaychi.

²⁶Chasna chay llullachik runakuna mana atiparkakunachu Jesusta pantachichinata nima shuk shimita, runakuna chawpipi rimashpan. Yapa yachayninwa aynishkanta uyashpankuna mancharishpankuna chunilla uyarkakuna.

Jesuska yachachin wañushkakuna kawsarinankunata

(Mt. 22.23-33; Mk. 12.18-27)

²⁷Chaymanta shuk *saduseokuna Jesusta kayllayarkakuna. Paykunaka kirinahun wañushkakuna manana kawsarinkakunachu nishpa. Chayrayku Jesusta rimarkakuna:

²⁸Yachachik, ñawpa Moisés wañuka ñukanchirayku killkarka: Shuk warmiyu runa manara wawayu wañushpanka wawkinna chay kachuynin mashintuta warmiyanan tiyan chay warmita wawayachinanpa wawkinranti.

Chaymanta chay warmin kari wawata wawayashpanka chay wawkin wañupa wawanshina kanan tiyan nishpa.

²⁹Kunan kanta kwintanayanchi: Tiyarka kanchis wawkikuna. Shuk puncha puntiro wawkika warmiyarka. Mana nima shuk wawayu kashpanra wañurka.

³⁰Chaymanta Moisespa killkashkan kamachishkata kasushpan ishkaynin wawkina kachuynin mashintuta warmiyarka. Chay wawkipas chasnallata wañurka. ³¹Chaymanta kimsaynin wawkina chay kachuynin mashintuta warmiyarka. Paypas wañurka. Chasnalatlata shukllankama shukllankama chay kanchis wawkikuna chay warmillatata warmiyashpankuna karan shuk mana wawaychu wañurka.

³²Chaymanta chay warmipas

wañurkana.³³Kunanka rimay ñukanchita. Chay kanchis wawkikuna chay warmillatata warmiyarkakuna. Wañushkakuna kawsarimushpankuna chay kanchis wawkikunamanta ¿maykanpa warminshi kama?

³⁴Chaypi Jesuska aynirka:

Kay allpallapimi karikunaka warmiyahnun, warmikunapas kusayanahun.³⁵Maykunkunami Yaya Diospa rikushkampi ali kanahun wañushkankunamanta kawsarinankunapa paypa ruranan mushu mundupi yaykunankunapa, paykunaka mana warmiyankakunanachu, warmikunapas mana kusayanakunanachu.³⁶Chaypika manami nima pi wañunkanachu. Chayrayku manana warmiyashpa kawsankakunachu miranankunapa. Paykunaka kankakunami *angelkunashina mana wañukkuna. Yaya Diospa wawankunami kankakuna wañushkankunamanta kawsarimushkankunaryku.³⁷Runkuna wañushkankunamanta kuti kawsarinankunata Moisés wañupas yachachirk. Chay uchilla kaspi sintihukmanta Yaya Dios payta kasna rimashkanta killkarkan: Ñuka kani Yaya Dios, maykantami Abraham, Isaak, Jakob kushichinahun nishpa.³⁸Yaya Dios chasna rimashkanrayku yachanchi chay yaya rukukuna wañushpankunapas paywa pakta kawsa kahushkankunata. Kawsakunallami Yaya Diosta kushichinun, wañushkakunaka payta mana kushichinahunchu. Yaya Diosraykuka tukuy paykuna wañushpankunapas kawsallami kanahun.

³⁹Chasna aynishkanta uyashpankuna Moisespa killkashkanta shuk yachachikunaka Jesusta nirkakuna:

Sumakta rimashkanki. Suma yachachik kanki.

⁴⁰Chaymanta pacha chay Jesusta pantachichinayak saduseokuna manana munarkakunachu tapunata ashwanta.

**Jesuska yachachin pay tukuy manta
ashwan ali kamachik kananta
(Mt. 22.41-46; Mk. 12.35-37)**

⁴¹Chaymanta Jesuska chay yachachik runakunata tapurka:

¿Imashna yuyarishpaykichitaya yachachinkichi Yaya Diospa Kachanan Kishpichikka atun apu David wañupa miraymanta kanka nishpa?⁴²⁻⁴³David kikin chay Kishpichikmanta rimashpan killkarka chay killka Salmospi:^h

Yaya Dioska chay kamachiwakta
rimarka: Tiyariy kuskayni parti
kamachinaykipa ñukawa pakta,
tukuy kanta chiknik runakunata
winsinaynikama kanta
kasunankunapanana nishpa.

⁴⁴David Yaya Diospa Kachanan Kishpichikta kamachiwak nirka. Chay uras ña kawsa paymanta pasa kashpan David unay wañushkanwasha paypa miraymantallatata kashpan manami atipanchu runalla kanata.

**Jesuska Moisespa
killkashkanta yachachikkunata
uyachishpa rimarka
(Mt. 23.1-36; Mk. 12.38-40;
Lk. 11.37-54)**

⁴⁵Chasna tapushpan Jesuska tukuy chaypi kahuk runakunapa uyahushkankunapi runankunata rimarka:⁴⁶Ama kankunaka chay Moisespa killkashkanta yachachikkunamanta llullachirishka kaychichu. Paykunaka yapa munanahun tukuy runakuna paykunata aputashina saludanankunapa. Chayrayku suma suni churarishkankunawa purinahun runakuna ñampikunapi plasakunapi

saludanankunapa. Tantarina wasikunapi, fiestakunapipas tukuy manta suma tiyarinakunapi tiyarinhun, runa masinkuna paykunata aputashina rikuhushkunkunata rikuchishpa.

⁴⁷ Paykuna kikinrayku mana pinkashpa mashintukunata tukuy imankunata llullachishpa tapunahun, Yaya Diosta kushichinaykichipa kunaykichi tiyan nishpankuna. Mana ali rurak kashkankunata pakanankunapa, tantarina wasikunapi ali rurak runakunashina Yaya Diosta unayta mañanahun. Chasna kashpankuna Yaya Dioska paykunataka tukuy runakunamanta ashwan sinchitami kastiganka.

**Shuk mashintu tukuy tiyashkan
kullkinta Yaya Diosta kurka**
(Mk. 12.41-44)

21 ¹Jesuska *Yaya Diospa wasinpi runankunata chasna rimahushpan rikurka yapa kullkiyu runakuna kullkinkunamanta Yaya Diosta kushpa kahapi churahushkunkunata.

²Chaymantapas rikurka shuk mashintu nima imayu ishkay kullkinstuta churahushpan Yaya Diospa rikushkanpi tukuy chay achka kullkiyu runakunamanta ashwantami kushka. ⁴Tukuy paykunaka achka kullkinkunamanta puchurishkata kushkakuna. Kay mashintuka tukuy tiyapushkanta Yaya Diosta kushka, maykanwami mikunanta rantinan karka. Chayrayku payka Yaya Diosta ashwanta kushichishka.

**Jesuska runankunata rimarka Yaya
Diospa wasin urmachiy tukunanta**
(Mt. 24.1-2; Mk. 13.1-2)

⁵Chaypi shukkunaka rimahurkakuna *Yaya Diospa wasinmanta:

Suma rumikunawa, Yaya Diosta kushkakunawa yapa suma rurarishka rikurin nishpa.

Chaypi Jesuska rimarka:

⁶Tukuy kay rikuhushkaykichiha shuk punchami urmachiy tukunka. Nima shuk wasi, nima shuk rumi awapura rurarishkaka kiparinkachu.

**Jesuska yachachin manara kay
allpaka tukurihushpanra
imakunami pasanka**
(Mt. 24.3-14; Mk. 13.3-23)

⁷Chaypi runankunaka Jesusta tapurkakuna:

Yachachik ¿ima urastaya *Yaya Diospa wasinta urmachinkakuna? ¿Imata rikushpanchita yachanchima chay puncha paktarihushkata?

⁸Jesuska aynirka:

Alita yuyariyichi nima pi kankunata llullachinanpa. Achka runakunami yanka nishpa rimak shamunkakuna: Ñukami kani Yaya Diospa Kachashkan Kishpichik nishpa. Shukkunaka rimankakuna: Ñami paktarihun Yaya Diospa Kachashkan Kishpichik kutimunan punchaka nishpa. Chasna rimashpankopas ama paykunata kiriyichihu. ⁹Uyashpaykichiha runakuna chiknina-kushpankuna wañunakushpa kawsahukunata, ama mancharinkichichu. Tukuy chaykunami puntiru pasanan tiyan. Runakuna wañunakushpa kawsahushpankopas chay uras kay allpaka manarami tukurinkarachu.

¹⁰Jesuska yachachishpalla katirka: Shuk shimita rimakkuna shuk shimita rimakkunawa chikninakushpankuna wañunakunkakuna. Shuk allpapi kawsak runakunaka shuk allpapi kawsak runakunawa sinchita chiknina-kushpankuna wañunakunkakuna.

¹¹Tiyankami sinchi allpa kuyuykuna. Tukuy partimi sinchi yarkay tiyanka,

chaymantapas achka utkalla shukma shukma chimpak sinchi unkuykuna. Silipi manchaypata nima ima uras rikushkankunata rikunkakuna runakunaka.

¹²Manara chaykuna tiyashpan kankunata chiknispas parisichinkakuna, apinkakuna karselpi churachinankunapa. Chiknik runakuna kankunata uchachishpa tantarina wasikunama pushankakuna. Chaymanta karselpi churachinkakuna. Ñukata katiwashkaykichirayku kankunata apishpa atun apukunama pushankakuna kastigachinankunapa. ¹³Chasna uray tukuhushpaykichi achka uyahushkankunapi atipankichi ñukamanta rimanata. ¹⁴Tukuy chayta uyashpaykichi ama yuyarishpa kaychichu imatashi aynisha nishpa. ¹⁵Chay urasmi kushkaykichi yachayta alita ayninaykichipa. Nima maykan kuntraykichi atipankachu kankunata ayninata.

¹⁶Chay uraska kankunata yapa chikninkakuna. Yayaykichi, wawkkichipas, shuk aylluykichipas, amiguylkipas apukunama pushankakuna kankunamanta llullashpa rimanankunapa. Chasna rurashpanguna apukunaka kankunamanta shukkunata wañuchinkakuna. ¹⁷Tukuy runakuna kankunata chikninkakuna ñukata katiwashkaykichirayku. ¹⁸Chasna kashpanpas Yaya Dios kankunata alita kuyrashpan manami atipankakunachu paymanta anchuchishpa chinkachinata. ¹⁹Imatapas kankunata rurashpanguna mana sakishpa ñukapi sinchikuychilla. Chasna shuti kishpishpa Yaya Dioswa wiñaypa kawsak rinkichi.

Jesuska rimarka Jerusalén llaktata urmachinankunata

(Mt. 24.15-21; Mk. 13.14-23)

²⁰Jesuska yachachishpalla katirka: Kay Jerusalén llakta muyukta achka suntalukunata rikushpaykichi yachanki-

chi ña urmachinalla kahukkunata.

²¹⁻²²Chay punchakunaka Yaya Diospa sinchi kastiganan punchakunami. Chay urasmi Yaya Dioska tukuy killkachishkan shiminkunata paktachinka. Chay punchakunapi kankuna Judea allpapi kawsakkuna urkukunama utkalla mitikuychi. Kankuna Jerusalén llaktapi kahukkunaka chaymantalla mitikuychi. Chakraykicipi kahushpaykichika manana Jerusalenma kutiychinachu.

²³Chasna mitikuna punchakunapi yapa llakiypa kanka chay chichu warmikunarayku, chay llullu wawayu warmikunaraykupas. Tukuy kay israel allpapi kawsak runakuna yapaka parisinkakuna. Yaya Dios paykunata yapa piñaywami kastiganka. ²⁴Wañuna-kuhushkankunapi shukkunaka sabliwa wañuchiy tukunkakuna, shukkunataka apishpankuna pushankakuna tukuy allpapi chikan chikan runakuna chawpipi kawsanankunapa. Mana israel runakuna kay Jerusalenta urmachishpankuna amuyankakuna Yaya Diospa rimashkan puncha paktarinankama.

Jesuska kutimunan punchamanta rimarka

(Mt. 24.29-35; Mk. 13.24-31)

²⁵Jesús runankunata yachachishpalla katirka: Kutimunayni puncha kuchuya-hushpan intipi, killapi, istrillakunapi manchaypami rikurinka. Chaymanta kay allpapi atun yaku mar attunta ulasyashpan manchaypa uyarinka. Tukuy kay allpapi kawsak runakuna yapa mancharinkakuna, imashi tukuhunchi nishpa. ²⁶Chay uras tukuy silipi punchayachikkuna sinchita kuyurinkakuna. Chay manchaypa pasahukta rikushpankuna runakuna lismayankakuna. ²⁷Chasna tukushpankuna ñuka Yaya Diospa Kachashkan Runa puyu chawpipi suma chuyahlla

Yaya Diospa atun yachayninwa shamuhushkaynita rikunkakuna.

²⁸Chasna manchaypa punchakuna paktarishpankuna kankunata kishpichinayni punchaka utkallami paktarinka. Chayta yachashpaykichi chay punchakunapi manana manchashpa sumakta kushikushpa chapawaychi.

²⁹Chasna nishpan shuk yachachinawa yachachispalla katirka:

Shuk *igu kaspita, chaymanta shuk kaspikunatapas rikushpaya yachakuychi. ³⁰Achkata mushumanta pankayahushkankunata rikushpaykichi yachankichi veranoka ña kuchuyahushkanta.

³¹Chasnashinami tukuy kay rimashkayni paktarihukta rikushpaykichi yachankichi Yaya Dios mushu munduta rurashpan chaypi ali kamachinanka ña paktarihuškanta.

³²Alita uyawaychi. Kay punchakunapi kawsak runakunaka manara wañushpankuna tukuy kay rimashkayni paktarinan tiyan. ³³Kay siluka, kay allpapas chinkarinkakunami. Tukuy rimashkayni shimikunamantaka nima shuk chinkarinkachu. Tukuy paktarinan tiyan.

Alicharishka kaychi

³⁴⁻³⁵Tukuy kay rimashkaynita uyashpaykichi alita kuyrariychi, shamushpayni alicharishka kanaykipacha. Chay puncha mana yuyarishkaykipichi kunkaymanta paktanka. Chasna kashpan ama kawsaychichu aychaykichi munashkanllata maskashpa. Chasna kawsashpaykichi kankichimi imashnami shuk animalka kunkaymanta shuk tukllapi urman. Ama kawsaychichu machashpa, tukuy munashkaykichi llata yuyarishpa. Chasna kawsashpaykichi shamunayni puncha kankunaryku wañuyka kanka, imashnami tukuy kay allpapi kawsakkunarykupas

paktamunka. ³⁶Mana chasna tukunaykipacha tukuy uras Yaya Diosta mañashpa yuyaywa kawsaychi, alita payta kasushpa. Chasna kawsashpaykichi tukuy chay pasana kahushkanpi mana sakiwashpa sinchikunkichi. Chasna sinchikushpaykichi tukuy chaykunamanta kishpishka kankichi. Ñuka Yaya Diospa kachashkan runapa puntanpi mana manchashpa shayarinkichi.

³⁷Karan puncha Jesuska *Yaya Diospa wasinpi yachachipayan. Tutapi Olivos shutiyu lumama ripayan chaypi puñunanpa. ³⁸Karan puncha achka runakuna tutamantastulla Yaya Diospa wasinma ripayanahun payta uyanankunapa.

Chiknik runakuna Jesusta
apinankunapa Judaswa
kwintarkakuna

(Mt. 26.1-5, 14-16; Mk. 14.1-2, 10-11;
Jn. 11.45-53)

22 ¹Ña *Paskua punchakuna kallarinanpa masna punchallana pishihurka. Karan wata israel runakunaka chay Paskua punchakunaryku tantaripayanahun. Chay punchakuna yuyaripayanahun Yaya Dios paykunata Egipto allpamanta kishpichishkanta, mikupayanahun pan mana punkichirishkata. ²Chay punchakuna ña paktarihušpan *saserdotekunapa apunkuna, Moisespa killkashkanta yachachikkunapas maskarkakuna, imashna rurashpashi apinchima Jesusta wañuchinanchipa nishpa. Achka runakuna payta katihushkankunata rikushpankuna mancharkakuna pakta ñukanchita wañuchinahuma nishpa.

³Chaypi supayka Judas Iskariotepa shunkunpi yaykurka. Chay Judaska Jesuspa chunka ishkay runankunamanta shuk karka. ⁴Payka saserdotekunapa apunkunama, Yaya Diospa wasinta

kuyrakkunamapas rirka, paykunawa kwintanarpa imashna rurashpami Jesusta apichichinka.⁵ Chasna kwintak rishpan paykunaka kushikurkakuna. Shuk yuyayllawa kashpankuna rimarkakuna:

Kanta kullkita kushunchi Jesusta apinanchipa yanapahushkaykirayku.

⁶Chaypi Judaska arí nirka.

Chaymanta maskarka imashnami Jesusta mana runakunapa rikushkanpi apichichinka.

**Jesuska runankunawa Paskua
puncha mikunata mikurka**
(Mt. 26.17-29; Mk. 14.12-25;
Jn. 13.21-30; 1Kor. 11.23-26)

⁷Ña chay puntiru *Paskua punchaka paktarishpan mikupayanahun pan mana punkichirishkata. Chaymantapas chay punchaka wañuchipayanahun obeha maltata mikunankunapa, imashnami ñawpamanta pacha rurapayanahun.ⁱ Chasna yuyaripayanahun Yaya Dios paykunata kishpichishkan punchata. ⁸Chay punchapi Jesuska kacharka Pedrota, Juantapas, rurak riychi mikunata Paskua punchapi mikunanchipa nishpa.

⁹Chasna rimashpan paykuna tapurkakuna:

[¿]Maypita munanki rurak rinanchipa?

¹⁰Chaypi Jesuska paykunata aynirka:

Chay Jerusalén llaktapi paktashpayki-chi shuk runata tinkunkichi shuk mankapi yakuta apahukta. Chay runata katiyichi. Maykan wasipimi yaykun chaypi paywa pakta yaykuychi.

¹¹Chaypi wasi amuta rimankichi: Ñukanchita yachachikmi yachanayan, maypimi payka kay Paskua mikunata ñukanchiwa mikunka. ¹²Chay wasi amuka rikuchinkami shuk atun

kwartuta ishkaynin kawitupi sumakta alicharishkata. Chaypi mikunata ruraychi.

¹³Paykunaka rishpankuna tukuyta Jesuspa rimashkantashina tarik rirkakuna. Chaypi mikunata rurarkakuna Paskua punchapi mikunankunapa.

¹⁴Ña mikuna uras paktarishpan Jesús chunka ishkay *apostolinkunawa pakta mesa muyukta siririrkakuna mikunankunapa. ¹⁵Chaypi Jesuska rimarka:

Maytukuyta munashkani kay Paskua mikunata kankunawa mikunata, manara wañunayni paktaruhushpan. ¹⁶Kankunata rimani, kay Paskua mikunata manami kuti kankunawa mikushanchu Yaya Diospa ali kamachinan mushu mundu kallarinankama. Chaypimi Paskua tantarinanchipi yuyarishkan-chika kishpichiy tukunamanta alita paktachirishka kanka, sumakta kishpichiy tukushkaykichirayku.

¹⁷Chasna nishpan Jesuska shuk pusillu *vinuta apishpan Yayan Diosta agradesishkanwasha rimarka:

Apishpaykichi shukma shukma pasachishpa karan shuk upyaychi.

¹⁸Kankunata rimani, ñukaka manami kutikashka kay allpapi kushilla kankunawa tantarishpa kay vinuta upyashannachu. Ña wañushami. Yaya Diospa ali kamachinanka mushu mundupi kallarisshpan chaypira shuti kuti kushilla tantarishunchi.

¹⁹Chay vinuta kushkanwasha pantana apirka. Yayan Diosta agradesishkanwasha panta pakishpa pakishpa paykunata kurka. Chasna kuhushpan nirka:

Kay panka aychaynishinami kan. Tukuy uras tantarishpaykichi shuk panta pakinakushpa mikuhushpaykichi yuyariyichi ñuka kankunarananti wañushkaynita kishpichinaynipa.

²⁰Ña mikushkankunawasha chasnalla-tata shuk pusillu vinuta apishpan rimarka:

Kay vinuka yawarnishinami kan. Wañushpayni yawarnika shuturishpan Yaya Dios kankunata uchaykichimanta llakichishpan kishpichinka. Wañuhush-payni tukuy kay mushu alichanawa rimashkaynita paktachisha.

²¹Kunan maykanmi apichiwanka chay runaka chawpinchipimi kahun.

²²Ñawpa ñukamanta rimashkashinami kunanka paktarihun. Ñuka Yaya Diospa Kachashkan Runaka wañunayni tiyan. Chasna kashpanpas ay chay runa apichiwak ñimashna kastigushi payrayku kanka!

²³Chaypi runankunaka mancharishpa tapunakurkakuna paykunapura: ¿Maykanshi ñukanchimanta Jesusta apichinka? nishpa.

**Jesuska runankunata yachachirka
mana kamachikkunashina
kanankunapa**

²⁴Chasna Jesuswa tantaylla mikuhushpankuna runankunaka kallarirkakuna rimanakunata paykunapura, maykanshi paykunamanta ashwan yachayyu kamachik kananta runanaka rimanahuma. ²⁵Chaypi Jesuska paykunata rimarka:

Kay allpapi kamachikkuna runanakunata sinchita kamachinahun. Chasna kashpankuna munanahun runakuna paykunata rimanankunapa runakunata alita yanapakkuna nishpa. ²⁶Kankunaka ama chasna apukunashina kaychichu. Maykanmi kankunamanta ashwan atun apu kanayan, payka shuk wawashina kasuk tukuchun. Maykanmi kankunata kamachik kan, payka tukuypi yanapak tukuchun. ²⁷Kay allpapi kamachik runakuna mikunankunapa tiyarinahun runankuna paykunata karanankunapa.

Ñukaka kankunaryaku mana chasna apushinachu kani, ashwan shuk runa apunta mikunata karakshinami kani.

²⁸Kankunami ñukawa tukuy uras kamay tukushkaynikunapi kashkankichi. ²⁹⁻³⁰Chayrayku imashnami Yayayni ñukata apu tukunaynipa rimawashka, ñukapas kankunata rimani apukuna tukunaykichipa. Chay ali kamachinayni mushu mundupi ñukawa pakta mesaynipi mikunkichi upyankichipas. Chaymanta kankunata suma kamachina tiyarinakunapi tiyachisha, chay chunka ishkay israel ayllukunamanta mirashka israel masikichikunata kamachinaykipa. Chasna kamachik tukushpaykipa chimi paykunata rimankichi alitachu manachu rurashkakuna nishpa.

**Jesuska rimarka Pedro payta mana
riksikshina tukunanta**
(Mt. 26.31-35; Mk. 14.27-31;
Jn. 13.36-38)

³¹Chaymanta Jesuska Pedrota rimarka:

Simón, alita uyaway. Supaykunapa apumi yapa kankunata kamanata munashpan Yaya Dioska ari nishka. Imashnami shuk shushunawa kuyuchishpa mana alikunata surkunchi, chasnashinami kankunaka kamay tukunkichi sakiwankichichu manachu nishpa. ³²Ñukaka kanrayku Yaya Diosta mañashkanimi, kanta yanapananpa mana sakiwanaykipa. Kan ñukata kutikashka katiwashpayki sinchikuchi kirik masikikunata, paykunapas ñukata alita katiwanankunapa.

³³Chaypi Simonka nirka:

Yaya Jesús, kanta karselpi tapashpan-kunaka chayma kanwa pakta rinayani. Kanta wañuchishpankunaka ñukapas kanwa pakta wañusha.

³⁴Chasna rimashpan Jesuska aynirka: Pedro, rimashkayki, kunan tutami manara atallpa kantahushpan kanka

kimsa kuti llullashpa rimanki Jesusta mana riksinichu nishpa.

**Jesuska runankunata rimarka
alicharishka kanankunapa**

³⁵Chaymanta Jesuska runankunata rimarka:

Yuyariyichi shiminita yachachinaykipacha kachashkayni punchakunata. Chay uras kankunata rimashkani nima imata apanaykichipa, nima bulsata, nima kullkiti, nima sapatuta. Chasna rishpaykichi ¿shuk imaka pishirkachu kankunarayku?

Paykunaka aynirkakuna:

Mana nima ima ñukanchita pishirkachu.

³⁶Chaypina paykunata rimarka:

Kunan shuti manana chasnallachu rinkichi. Maykanpachari tiyan bulsan, kullkin, chayka purihushkanpi munashkanrayku apachun. Maykanpachari mana tiyanchu sablinka, payka kamisanta rantichishpan sablinta rantichun. Kamisaykichimanta ashwanta munankichi sablikichita, tukuy parti kuntraykichikuna tiyashkan-rayku. ³⁷Kankunata rimani, kunalla Yaya Diospa killkachishkanpi ñukamanta killkarishkaka paktarinka kasna nishkaka:

Shuk millaypa rurak runatashina payta wañuchinkakuna.

Chasnashinami paktarihun ñukarayku.

³⁸Chaymanta rimarkakuna:

Yaya Jesús, kaypimi tiyan ishkay sablinchikuna.

Chaypina Jesuska aynirkaka:

Chaylla kachun.

**Jesuska Getsemaní kinchapi Yayan
Diosta mañarka**

(Mt. 26.30, 36-46; Mk. 14.32-42)

³⁹Mikushkankunawasha Jesuska chay wasimanta llukshishpan Olivos shutiyu

urkuma rirkka, imashnami wiñay rurapayan. Chasna rishpan paypa runankunaka katirkakuna. ⁴⁰Chaypi paktashpankuna Jesuska nirka:

Mañayichi Yaya Diosta, sinchita kamay tukuhushpaykichi mana sakinay-kichipa ñukapi sinchikunata.

⁴¹Chasna rimashpan Jesuska paykunamanta anchurirka astalla karunkstupi. Chaypi kunkurishpan Yayan Diosta mañarka:

⁴²Yayayni, munashpaykika kishpichi-way mana chasna sinchita parisinay-nipa. Chasna tapushpaynipas ama ñukapa munashkaynita ruraychu, ashwan kanpa munashkaykillata ruray.

⁴³Chasna mañahushkanpi silumanta shuk *angel rikurik shamurka sinchikuchinanpa. ⁴⁴Jesuska yapa parisinanta yuyarishpa sinchi manchayta musyashpan Yayan Diosta ashwan sinchita mañarka. Umpinka yawarshina tukushpa allpama shuturirka. ⁴⁵Chasna Yayan Diosta mañashkanwasha atarirka runankunama kutinanpa. Chaypi paykunata tarik rirkapuñuhukkunata. Yapa llakiyuwa sampayashpankuna puñuy apishpan puñuhurkakuna.

⁴⁶Chaypi rimarka:

¿Imaraykuta puñuhunkichi? Atarishpaykichi Yaya Diosta mañayichi mana sakinaykichipa ñukapi sinchikunata, sinchita kamay tukuhushpaykichi.

Jesusta apirkakuna

(Mt. 26.47-56; Mk. 14.43-50;

Jn. 18.2-9)

⁴⁷Jesús chayra rimahushkanpi achka runakunaka paktamurkakuna. Chay runakunapa puntanpi Jesuspa chunka ishkay runankunamanta Judas shutiyurirkka. Jesusta kayllayak shamushpan payta saludahushpan mucharka.

⁴⁸Chaypi Jesuska rimarka:

Judas ¿ñuka Yaya Diospa Kachashkan Runata muchashpaykichi apichiwanki?

⁴⁹Jesuswa kahukkunaka chasna pasahukta rikushpankuna tapurkakuna:

Yaya Jesús ¿wañunakushunchichu sabliwa?

⁵⁰Chasna nishpankuna Jesuspa shuk runan sablinta apishpan *saserdoteke-napa atum apupa shuk runanta sumakta pitishpa wañuchisha nishpa pitihushpan kuska parti rinkrinta pitirka. ⁵¹Chaypi Jesuska rimarka:

Sakiyi. Chaykamalla.

Chasna nishpan chay runapa rinkrinta llankashpan ampirka. ⁵²Saserdoteke-napa apunkuna, Yaya Diospa wasinta kuyrakkunapas, paykunata kamachik israel masin rukukunapas shamurka-kuna Jesusta apichinankunapa. Chay runakunata Jesuska rimarka:

¿Imaraykutaya sablikunawa kaspiku-nawapas shamushkankichi apiwanayki-chipa? ¿Wañuchik shuwa runachu kani? ⁵³Tukuy puncha Yaya Diospa wasinpi kankunawa kahushpayni ¿imaraykutaya mana chaypi apiwashkankichichu? Tuta kashpanmi kunan apiwanaykichi ura paktarishka. Kunan Yaya Dios sakin amsaka punchata winsikshina supayku-napa apun munashkanta rurananpa.

Pedroka Jesusta mana riksinichu nishpa rimarka

(Mt. 26.57-58, 69-75; Mk. 14.53-54, 66-72; Jn. 18.12-18, 25-27)

⁵⁴Jesusta apishpankuna *saserdoteke-napa atum apupa wasinma pusharkakuna. Chasna pushashpankuna chaypi yaykuchirkakuna. Pedroka karullapi katirka. ⁵⁵Chay wasi kincharishka pampan chawpipi kuyrakkunaka ninata sintichishpankuna muyukta tiyarirka-kuna. Chaypillatata Pedropas paykunapa chawpinpi tiyarik rirka. ⁵⁶Chaypi shuk chay aputa yanapak warmika payta nina kuchupi tiyahush-kata alita rikushpan rimarka:

Kay runapas Jesuswa pakta purikmi kan.

⁵⁷Chasna nishpan Pedroka

llullachishpa aynirka:

Manami paytaka riksinichu.

⁵⁸Unaystumanta kuti shuk runa payta rikushpan rimarka:

Kanpas chay runapa runankunamanta-llatatami kanki.

Pedroka aynirka:

Manami paykunamantachu kani.

⁵⁹Shuk uramanta shukna rimarka: Kay runapas shutipami Jesuswa purik kan, paypas Galileamanta runa kashkanrayku.

⁶⁰Chaypi Pedroka aynirka:

Pimantachari rimahunki manami yachanichu.

Chasna rimahushkanlapi atallpaka kantarka. ⁶¹Chaypi Jesuska tikrashpan Pedrota rikurka. Chasna rikushkanlapi Pedroka yuyarirka Jesuspa nishkanta: Kunan tuta manara atallpa kantahush-panra kanka kimsa kuti rimanki manami riksinichu payta nishpa.

⁶²Chasna yuyarishpan Pedroka kanchama llukshishpan yapa llakirish-pan sinchita wakarka.

Jesusta asichirkakuna

(Mt. 26.67-68; Mk. 14.65)

⁶³Chaymanta Jesusta kuyrak runaku-naka asichishpankuna waktarkakuna.

⁶⁴Ñawinta tapashpankuna uyanpi waktashpa tapurkakuna:

Yaya Diospa yachayninha kashpay-kika rimay pita kanta waktashka nishpa.

⁶⁵Chasna payta waktashpankuna achka mana alikunata paymanta rimashpa payta asichirkakuna.

Jesuska tantarishka atun apukunapa puntankunapi karka

(Mt. 26.59-66; Mk. 14.55-64; Jn. 18.19-24)

⁶⁶Ña pakarihushpan israel runakunata kamachik israel masin rukukuna,

*saserdote kunapa apunkunapas, Moisespa killkashkanta yachachikkunapas tantarirkakuna. Chay tantarishkanakunama Jesusta pusharkakuna, maypimi paykunaka apupura tantaylla yuyarishpa kwintanahun. Chaypi payta tapurkakuna:

⁶⁷Rimay ñukanchita ḡkanchu kanki chapahushkanchi Yaya Diospa Kachanan Kishpichikka?

Chaypi Jesuska aynirka:

Rimashpaynika chay Kishpichik kani nishpa, mana kiriwankichichu. ⁶⁸Nuka kankunata shuk imata tapuynimaka, mana ayniwankichimachu. ⁶⁹Kunamanta pacha ñuka Yaya Diospa Kachashkan Runa tukuya atipak Yaya Diospa kuchunpi tiyarisha tukuy runakunata kamachinaynipa.

⁷⁰Chayta uyashpankuna yapa piñarishpa tapurkakuna:

¿Shutipachu chasna rimahunki Yaya Diospa Wawan kanaykita?

Jesuska aynirka:

Ari, ñukami kani rimashkaykichishina.

⁷¹Chayta uyashpankuna paykunaka rimarkakuna:

Kunan shuti manana munanchichu nima shuk runata paymanta ashwan millaypata rimak shamenanpa payta wañuchichinanchipa. Ñukanchi kikin uyashkanchi pay kikin mana llakichiypa rimashkanta nishpa.

Jesusta apu Pilatoma pusharkakuna

(Mt. 27.2, 12-14; Mk. 15.1-5;
Jn. 18.28-38)

23 ¹Chaymanta tukuy chay tantarishkakunaka atarishpankuna Jesusta *romano apu *Pilatoma pusharkakuna. ²Chaypi Jesusta uchachishpa rimarkakuna:

Kay runaka israel masinchikunata yachachishka apunkunata mana

kasunankunapa. Chayraykumi payta apishpa pushamushkanchi. Paymi rimarka: Romano tukuy manta atun aputa ama *impuestuta kunkichichu nishpa. Chaymantapas rimarka: Yaya Diospa Kachashkan Kishpichik, Atun Apuykichimi kani nishpa.

³Chaypi Pilatoka Jesusta tapurka:

¿Shutipachu kanki israel masikukanapa Atun Apu?

Jesuska aynirka:

Ari, ñukami kani rimashkaykishina.

⁴Chaymanta Pilatoka *saserdote kuna pa apunkunata, tukuy chaypi kahukkunata rimarka:

Ñukaka mana tarinichu nima shuk millaypa rurashkanta kay runapata.

⁵Chasna rimashpan chaypi kahukkunaka ashwan sinchita llullashpa Jesusmanta rimarkakuna:

Kay runaka tukuy israel runa masinchikunata yachachishka apunchikunata mana kasunanchipa. Kallarishka Galilea allpapi, kunanka kay Judea allpapipas runakunata yachachishpa kahurka.

Jesusta apu Herodesma pusharkakuna

⁶Chasna uyashpan *Pilatoka tapurka:

¿Kay runaka Galileamantachu kan?

⁷Ari nishpankuna Pilatoka yachashpan *Herodeska Galilea allpapi kamachik apu kashkanta, payma kacharka. Herodeska chay punchakuna Jerusalenpi kahurka.

⁸Jesusta rikushpan Herodeska kushikurka. Paymanta uyashpan unaymanta pacha payta rikunayarka. Yuyarirka kunanchari ñukapas atun yachaywa shuk nima ima uras rikushkaynita Jesuspa rurananta rikusha nishpa. ⁹Chaypi Jesusta achkata tapurka. Unayta tapunata katishpanpas Jesuska nima imata aynirkachu.

^{10*}Saserdote kunapa apunkuna, Moisespa killkashkanta yachachikkunapas chaypi kashpankuna payta uchachishpalla kahurkakuna. ¹¹Jesús nima imata aynishpan Herodeska suntalunkunawa payta pukllachishpa asichirkakuna. Asichishpa atum apupa suma churarinantashina churachirkakuna. Chaymanta Pilatomallatata pusharkakuna. ¹²Chay puncha Herodeska Pilatowa ali amigu tukurkakuna, ñawpaka kuntrakunashina kapayarkakuna.

**Chiknik runakuna Pilatota
rimarkakuna pay Jesusta
wañuchichinanpa**
(Mt. 27.15-26; Mk. 15.6-15;
Jn. 18.39-19.16)

¹³⁻¹⁴Chaymanta *Pilatoka *saserdote kunapa apunkunata, chay Jerusalén llaktapi kamachikkunata, tukuy chaypi kahukkunatapas tantachishpa rimarka: Kay runata pushamushpaykichi rimak shamuwashkankichi: Payka runakunata yachachishpa purin apuykichikunata ama kasuychichu nishpa. Ñukaka alita yachanaynipa kankunapa puntaykichipi tapushkani. Ña rikushkankichi maykamtami mana alita rimawashkankichi, nima shuk millaypata rurashkanta tarishkanichu. ^{15*}Herodespas nima shuk millaypata tarishkachu. Chasna kashpan kuti ñukanchima kachashka. Kay runaka nima imata rurashkachu ñuka wañuchichinanypa. ¹⁶Kunanka asutishpalla kacharichisha.

¹⁷Karan wata ña chay *Paskua punchakuna paktarimuhushpankuna Pilatoka shuk karselpi kahukta kacharichipayan. Chasna kashpan chay wata Jesusta kacharichinayarka. ¹⁸Chasna rimashpan tukuy chaypi kahukkunaka piñarishpa kaparirkakuna:

¡Payta wañuchi! ¡Barrabasta kacharichiy!

¹⁹Chay Barrabaska runakunata chay llaktapi kamachik apukunata mana kasunankunapa rimashpa yuyachishkan-rayku shuk runata wañuchishkanrayku-pas karselpi kahurka. ²⁰Pilatoka Jesusta kacharinayashpan kuti rimarka paykunata. ²¹Chaypi ashwan sinchita kaparirkakuna:

¡Kruspi klabashpa wañuchichiy!
¡Payta kruspi klabashpa wañuchichiy!

²²Chaypi Pilatoka kimsaynin kuti rimarka:

¿Ima millaypatataya rurashka? Nima shuk millaypata rurashkanta paypi tarinichu wañuchichinaynipaka. Chayrayku asutichishpalla kacharichisha.

²³Chasna nishpan ashwan sinchita kaparishpankuna rimarkakuna:

¡Kruspi klabashpa wañuchichiy!
Yapa sinchita kaparishpankuna Pilatoka ari, wañuchichishami nirka.

²⁴Chasna mana sakishpa tapushpankuna Pilatoka suntalunkunata kamachirka Jesusta kruspi klabashpa wañuchinankunapa, paykuna munashkunkunatashina. ²⁵Chay karselpi kahuk Barrabasta, apukunawa kuntra kashpan-tata shukkunata wañuchishka kashpan-pas paytaka kacharichirka. Jesustana paykuna munashkunkunatashina ruranankunapa kurka.

**Jesusta kruspi klabashpa
wañuchirkakuna**
(Mt. 27.32-44; Mk. 15.21-32;
Jn. 19.17-27)

²⁶Ña suntalukuna Jesusta pushahush-kunkunapi kruspi klabashpa wañuchi-nankunapa, chay ñampipi apirkakuna shuk runata Jesuspa krusninta markachinankunapa. Chay runaka karka Sirene llaktamanta Simón shutiyu. Chay Simonka chakranmanta Jerusalenma kutimuhurka. Payta

Jesuspa krusninta markachishpankuna
Jesuspa washan apashpa rirka.

²⁷Achka runakuna Jesusta katirkakuna. Achka warmikunapas katihushpankuna payrayku llakiyuwa kaparishpa wakarkakuna. ²⁸Jesuska chay warmikunata rikushpan rimarka:

Jerusalén llaktamanta warmikuna, ama ñukarayku wakaychichu. Shuk parisina punchakuna paktarinkakuna, chaypi kankuna wawaykichikunawa yapa parisinaykichi tiyan. Chayta yuyarishpa kankunarayku wawaykichiraykupas wakaychi. ²⁹Chay parisina punchakuna paktarishpan runakuna rimankakuna: Kushilla kankichi machura warmikuna, chaymanta kankuna maykankunami nima ima uras wiksayu kashkankichi, nima chuchuchishkankichichu. ³⁰Chay uras tukuy runakuna yapa wañunayashpankuna urkukunata rimankakuna: Awanchipi urmaychi nishpa. Lumakunata rimankakuna: Ñukanchita tapaychi nishpa. ³¹Ñuka mana uchayu runa kashpaynitata yapa sinchita parisinayni tiyan, kankuna uchayu kashpaykichi ashwanta parisinaykichi tiyan.

³²Chay suntalukunaka Jesusta wañuchinankunapa pushahushpankuna ishkay wañuchik runakunatapas pusharakuna paywa pakta wañuchinankunapa. ³³Wañushkapa uman shutiyu lumapi paktashpankuna Jesusta kruspi klabarkakuna. Chay ishkanti wañuchik runakunatapas karan shukta shuk kruspi klabarkakuna wañunankunapa. Shuk krusta shayachirkakuna Jesuspa kuskan parti, shuktaka llukin parti. ³⁴Klabashushpankuna Jesuska rimarka:

Yayayni, llakichiy paykunata kay mana alita rurahushkankunamanta. Mana yachanahunchu imatami rurahunkuna.

Chaypina chay suntalukunaka swirlinkunata kamarkakuna pishi paykunamanta apanka Jesuspa churarinanta nishpa.

³⁵Tukuy chaypi kahukkunaka rikuhlla kahurakakuna. Israel apukunapas asichishpa rimarkakuna:

Shukkunata kishpichirka. Shutipa Yaya Diospa akllashkan kashpanka paypa Kachashkan Kishpichik kashpanka pay kikinta kishpichirichun.

³⁶Suntalukunapas asichishpa payma kayllayashpankuna agru *vinuta upyachishpa rimarkakuna:

³⁷Israel runa masikunapa Atun Apu kashpaykika kan kikinta kishpichiriy.

³⁸Jesuspa uman awapi ratacharishka karka shuk killkarishka tablapi kasna nishpa: Kay runaka israel runakunapa Atun Apumi. ³⁹Chay ishkanti wañuchik runa klabarishkankunamanta shukka Jesusta asichishpa rimarka:

¿Manachu Yaya Diospa Kachashkan Kishpichik kanki? Shutipa kishpichik kashpaykika kan kikinta kishpichiriy, ñukanchitapas kishpichiy.

⁴⁰Chaypi chay shukka Jesusta asichihukta aynirka:

Kanpas payshina kruspi klabarishka kashpayki ¿imarakutu chasna rimanki? ¿Manachu Yaya Diosta manchanki?

⁴¹Ñukanchi shuti kuskanchipi kastigarishka kahunchi, mana alita rurashkan chirayku. Kay runaka nima shuk millaypata rurashkachu.

⁴²Chasna chay wañuchik masinta rimashpan Jesustana rimarka:

Kan atun apu tukushpayki ñukatapas yuyariwanki.

⁴³Chaypina Jesuska payta rimarka:

Kunan punchami ñukawa pakta suma kushilla kawsanaynipi kanki.

Jesús ña wañurkana

(Mt. 27.45-56; Mk. 15.33-41;

Jn. 19.25-30)

⁴⁴⁻⁴⁵Jesús kruspi klabarishka kahushkanpi chawpi punchamanta pacha kimsa urakama intika amsayashpan

tukuy chay allpapi amsa tukurka. Chaypina *Yaya Diospa wasin ukupi Yaya Dioswa tinkunakuna kwartuta arkak rakta llachapakaj awamanta pacha pitikta likirirka.⁴⁶ Chasnapi Jesuska sinchita kaparishpa rimarka: ¡Yayayni, kaykaya makikipi kani, ñami wañuhuni!

Chasna nishpan Jesuska wañurka.⁴⁷ Tukuy chasna pasashkanta rikushpan suntalukunapa kapitanka Yaya Diosta kushichishpan rimarka: Kay runaka shutipami mana uchayuchu kashka.

⁴⁸ Tukuy chaypi tantarishka runanakuna tukuy chay pasashkata rikushpankuna mancharishpa mana alita rurashkankunata yuyarishpankuna Jerusalenma kutirkakuna. ⁴⁹ Tukuy Jesusta riksishkakunaka, Galilea allpamanta payta katik warmikunapas karumantalla tukuya rikurayarkakuna.

Jesuspa aychanta urku uchkupi churashpa taparkakuna
(Mt. 27.57-61; Mk. 15.42-47;
Jn. 19.38-42)

⁵⁰⁻⁵¹ Chaypi tiyarka shuk apu José shutiyu, alita rurak, ali runa. Payka Judea allpapi kahuk Arimatea llaktamanta karka. Israel runakunata kamachik tantaylla yuyarishpa israel apukunamanta shuk karka. Yapa chaparka Yaya Diospa ali kamachinan kay allpapi paktarinanta. Apu masinkunaka Jesusta wañuchinata munahushpankuna Joseka mana munarkachu.⁵² Payka *Pilatoma rishpan Jesuspa aychanta tapurka urku uchkupi churashpa tapananpa.⁵³ Pilato ari nishpan Joseka Jesuspa aychanta krusmanta uraykuchishpan suma yura llachapawa wankurka. Chaymanta

Jesuspa aychanta aparka shuk mushu allarishka urku uchkupi churashpa tapananpa. Chaypika nima shuk wañushkata churashka kahurkarachu.

⁵⁴* Paskua punchakunarayku alichanankuna puncha karka. *Samana punchaka chay tuta ña kallarinan karka.

⁵⁵ Galileamanta Jesusta katik warmikunaka Joseta katirkakuna rikunankunapa, maypimi Jesuspa aychanta churanka nishpa.⁵⁶ Kutishpankuna wasinkunama suma mishkinlla asnak aseitekunata rurarkakuna chaywa Jesuspa aychanta samana punchawasha kakunankunapa. Samana puncha samarkakuna Yaya Dios kamachishkanshina.

Jesuska kawsarirka

(Mt. 28.1-10; Mk. 16.1-8; Jn. 20.1-18)

24 ¹Domingo, semana kallarina puncha manara alita punchaya-hushpanra chay warmikunaka suma mishkinlla asnak aseiteta rurashkankunata apashpa rirkakuna Jesuspa aychanta churashpa tapashkankunama.
² Chaypi paktashpankuna chay uchkupa punkunta rumiwa taparishkaka paskarishkatana tarik rirkakuna.
³ Uchku ukuma yaykushpankuna Jesuspa aychanta mana tarirkakunachu.
⁴ Mana tarishpankuna mancharirkakuna. ¿Imanashkataya? nishpankuna mana yacharkakunachu imatami yuyarinkakuna. Chasna yuyarihushkankunapi ishkay suma chuyahlla churarishka runakuna kuchunkunapi shayahukta rikurakuna.⁵ Paykunata rikushpankuna chay warmikunaka ashwanta mancharishpa kumurirkakuna. Chaypi chay ishkay runakunaka rimarkakuna:

¿Imaraykuta kawsahukta maskahunkichi wañushkakunata churanapi?

⁶⁻⁷ Jesuska manami kaypichu. Ñami

kawsarishka. ¿Ñachu kunkarishkankichi Jesuspa yachachishkanta Galileapira kahushpaykichi kasna rimashkanta?: Ñuka Yaya Diospa Kachashkan Runata chiknik runakunaka apiwashpankuna kruspi klabashpa wañuchiwankakuna. Chasna wañuchiwashpankunapas kimsa punchamantami kuti kawsarinayni tiyan nishpa.

⁸Chasna chay ishkay *angelkunapa rimashkankunata uyashpankuna chay warmikunaka Jesuspa rimashkanta yuyarirkakuna. ⁹Chaymanta kutishpankuna Jesuspa chunka shuk *apostolninkunata, shuk paypa runankunatas tukuy rikushkankunata rimak rirkakuna.

¹⁰Chay warmikunaka karkakuna: Magdalamenta Maria, Juana, *Santa-gopa maman Maria, chaymanta ashwan shuk warmikunapas. ¹¹Chay Jesuspa apostolninkunaka chayta uyashpankuna musparishpami yanka rimahunkichi nishpa mana kirirkakunachu. ¹²Mana kirishpankunatata Pedroka atarishpan Jesuspa aychanta churashkankunama kallpa rirka. Paktak rishpan uchku ukuma kumurishpan rikurka. Chaypi rikurka Jesusta pillushkankuna llachapallata. Jesuspa aychanka manana tiyarkachu. ¿Imanashkataya? nishpa yuyarirka. Chaymanta kutirkana.

Jesuska ishkay runankunata Emaús

llakta ñampipi rikurirkka

(Mk. 16.12-13)

¹³Chay punchallatata ishkay Jesuspa runankuna Emaús llaktama riherkakuna. Chay Emaús llakta karka Jerusalenmanta chunka shuk kilometro, ishkay ura purina tupu. ¹⁴Tukuy Jesuspa pasashkanmanta kwintashpa riherkakuna. ¹⁵Chasna kwintashpa riherkakuna Jesuska paykunata kayllayashpan parihu rirkakuna.

¹⁶Payta rikushpankunatata mana

atiparkakunachu riksina Jesú kananta. ¹⁷Chaypi Jesuska paykunata tapurka:

¿Imamantata kwintashpa rihunkichi?

Chasna tapushpan llakirishpa shayarirkakuna. ¹⁸Chaypi Kleofas shutiyu aynirkakuna:

Kay punchakunapi Jerusalenpi pasashkata tukuy yachanahun. Chasna kashpan ¿kanllachu tukuy chaykunata mana yachanki?

¹⁹Chaypi Jesuska tapurka:

¿Imataya pasashka? nishpa.

Paykunaka aynirkakuna:

Chay Nasaret llaktamanta Jesuswa pasashkantami yuyarishpa kahunchi. Payka Yaya Diospa yachayninvia yachachik karka. Yaya Diospa rikushkanpi, tukuy runakunapa rikushkanpipas atun yachaywa rimak alikunata rurak karka.

²⁰*Saserdotenchikunapa apunkuna, ñukanchita kamachikkunapas payta apishpankuna *romano aputa kurkakuna wañuchichinanpa. Chasna kushpankuna kruspi klabashpa wañuchirkakuna.

²¹Ñukanchika yuyarirkanchi ñukanchi israel runakunata romano runakunamanta kishpichinanta. Kunan ña kimsa puncha kahu chasna payta wañuchishkankunaka.

²²Chaymantapas ñukanchipuramanta shuk warmikunaka ñukanchita kwintashpankuna manchachirkakuna. Pakarihushkanpi Jesuspa aychanta churashkankunama rishpankuna aychanta mana tarirkakunachu. ²³Chaymanta kutimushpankuna

*angelkunata rikushkankunamanta kwintak shamurkakuna. Chay angelkunaka paykunatashi rimarkakuna Jesuska kawsahumi nishpa. ²⁴Chasna nishpankuna shuk ñukanchiwa purihukkunaka Jesuspa aychanta churashkankunama rishpankuna illata tarik rirkakuna imashnami warmikunaka rimarkakuna. Jesustaka manami rikurkakunachu.

²⁵Rimahushkankunata uyashpan Jesuska paykunata rimarka:

Kankunaka mana asirtak runakunachu kankichi. Yapa unayankichi kirinaykipa Yaya Diospa yachayninwa ñawpa yachachikkunapa rimashkunkuna.
²⁶ ¿Manachu yachankichi, Yaya Diospa Kachashkan Kishpichikka manara atun apu tukushpan tukuy chaykunata parisinan kashkata?

²⁷ Chasna rimashpan Jesuska yachachihurka chay ishkay runankunata tukuy Yaya Diospa killkachishkanpi paymanta killkarishka kashkata. Kallarishpan Moisespa killkashkanku-nawa, chaymanta Yaya Diospa yachay-ninwa shuk yachachikkunapa killkash-kunkunamantapas yachachirka.

²⁸ Chasna Jesuska yachachihushkanpi llakta mayanpi paktarkakuna, maymami rihurkakuna. Jesuska ashwan chaynikma rihuksina tukurka.

²⁹ Chaypi chay ishkay runankuna mana munarkakunachu Jesús paykunamanta anchurinanpa.

Rikuy, ña tutayahunchi. Ñukanchiwa kipariy nishpa rimarkakuna.

Chasna yapa tapushpankuna Jesuska wasinkunapi yakyushpan paykunawa kiparirka. ³⁰ Mesa mayanpi sirihushpan-kuna mikunankunapa, Jesuska panta apishpan Yayan Diosta agradesirka. Chaymanta panta pakishpan paykunata kurka. ³¹ Chasnallapi ñawinkunaka paskarishkashina tukurka. Chaypira Jesús kananta riksirkakuna. Chasnallapi kunkaymanta illa tukurka, payta mana rikurakunananachu.

³² Chasna chinkarishpan paykunapura kwintarkakuna:

Ñampipi shamuhushpanchi Yaya Diospa shiminta alita asirtachishpa yachachihushkanpi ¿manachu shunkunkicha kushilla tukurka?

³³ Chasnallapi atarishpankuna Jerusalenma kutirkakuna. Paktashpankuna Jesuspa runan masinkunata tantarish-

kata tarirkakuna, ashwan Jesuswa shuk purik masinkunatapas. ³⁴ Chay ishkay paktashka runakuna manara nima imata rimahushpankunkuna chaypi tantarishka kahukkunaka paykunata rimarkakuna:

Yaya Jesuska shutipami kawsarishka. Simón payta rikushka.

³⁵ Chasna rimashkunkunata uyashpan-kuna chay ishkay Jesuspa runan masinkunapas kwintarkakuna imashnami Jesuska paykunata ñampipi Yaya Diospa shiminta yachachirka, chaymantapas imashnami panta pakishpan payta riksirkakuna.

Jesuska runankunata rikurirka

(Mk. 16.14-18; Jn. 20.19-29)

³⁶ Chasna rimahushkanllapi kunkay-manta Jesuska chawpinkunapi rikurirka. Paykunata saludashpan rimarka:

Yaya Dios kankunata kushillayachi-chun mana manchashpa kawsanayki-chipa.

³⁷ Chaypi paykunaka yapa mancha-rishpa yuyarirkakuna shuk almatami rikuhunchi. ³⁸ Chaypina Jesuska rimarka:

¿Imaraykuta mancharinkichi? Ñukami kani. ¿Imaraykuta mana kirinayankichi-chu ñuka kanaynita? ³⁹ Llankawashpay-kihi makinita chakinitapas rikuchichi. Ñukallatatami kani. Almaka mana aychayuchu kan, nima tulluyuchu ñukashina.

⁴⁰ Chasna nishpan makinta chakinta paykunata rikuchirka.

⁴¹ Paykuna kushilla mancharishka kahushkunkunapi manara kiriushpan-kunkuna Jesuska tapurka:

¿Tiyanchu mikunaka?

⁴² Chaypi payta kurkakuna shuk piti challwa kusarishkata mikunanza.

⁴³ Challwata apishpan rikuhsuskunkun-llapi mikurka mana alma ninankunapa.

⁴⁴ Chaymanta Jesuska paykunata rimarka:

Kankunawa pakta kahushpaynira kasna kankunata rimarkani: Moisespa killkashkanpi, Yaya Diospa yachay-ninwa shuk yachachikkunapa killkash-kanpi, Salmos killkapipas ñukamanta killkarishkaka tukuy paktarinan tiyan.

⁴⁵Chasna nishpan paykunata asirtachirka tukuy chay Yaya Diospa killkachishkankunata. ⁴⁶Asirtachishpan rimarka: Killkarishkapi nin Yaya Diospa Kachashkan Kishpichikka wañunan tiyan. Chaymantapas wañushkanwasha kimsa punchamanta kuti kawsarinan tiyan. ⁴⁷Chaymanta kamachishkan runankuna Jerusalenpi kallarishpan-kuna pay munashkanshina tukuy allpakunapi runakunata rimanankuna tiyan, mana ali rurashkankunata sakishpa Yaya Diostana kasunankunapa, Yaya Dios paykunata uchankunamanta llakichinanpa. ⁴⁸Kankunaka tukuy rurashkaynita rikushkankichi, tukuy rimashkaynita uyashkankichi. Chasna kashpan tukuy runakunata chayta yachachik riychi. ⁴⁹Kankunata rimash-kaykichi, ñukami Yaya Diospa Espiritunta kankunama kachasha

Yayayni rimashkanshina. Kunanka kankuna kay llaktallapi kipariychi chay kankunata sinchikuchik Yaya Diospa Espiritunta silumanta kankunapi kachanaynikama.

Jesuska siluma rirk'a

(Mk. 16.19-20)

⁵⁰Chaypina Jesuska runankunata Jerusalén llaktamanta pusharka Betania llakta kuchuma. Chaypi paktashpan-kuna makinta alsashpan paykunata rimarka Yaya Dios yanapashpa paykunata kushichinanta. ⁵¹Chasna paykunata rimahushkanpi rikuwashkan-kunallapi Yaya Dios payta siluma aparka. ⁵²Chasna paykunamanta anchurishpan runankunaka kunkurishpa payta mañashpa kushichirkakuna. Chaymanta sumakta kushikushpa Jerusalenma kutirkakuna. ⁵³Chaymanta pacha tukuy uras *Yaya Diospa wasinpi tantarishpankuna payta atunyachishpa kushichirkakuna.

Chayllatami Jesuspa runankuna kwintawashkankunata killkashkani.

JUANPA KILLKASHKAN KILLKA JESUKRISTU RUNAKUNATA KISHPICHISHKANMANTA

**Yaya Diospa yuyayninta riksichik
Kristu runa tukurka**

1 ¹Manara nima ima tiyashpanra ñukanchi runakunata Yaya Diospa yuyayninta riksichik *Kristuka ña tiyarka. Payka Yayan Dioswami karka chasnallatata Yaya Diosmi karka. ²Ñawpamanta pachami Yaya Dioswa karka. ³Chay Yaya Diospa yuyayninta riksichik Kristutami payka tukuy ima tiyashkakunata rurachirka. Mana nima ima pay kikinlla rurarishkachu, ashwan tukuyta Yaya Dioska chay yuyayninta riksichik Kristutami rurachirka. ⁴Chaymanta payllami ñukanchi runakunata Yaya Dioswa kushilla kawsayta kun. Chaymantapas ñukanchita riksichin imashnami ali ruranakunaka Yaya Diospa rikushkanpika. Chasna ali ruranakunata riksichishkanraykumi ñukanchi runakunarayku punchashina kan. ⁵Ali ruranakunata mana riksishpanchi amsapishina kawsanchi. Kristuka punchashina kashpanmi shamushka amsapishina kawsahukkunata riksichinpana imashnami ali ruranakunaka Yaya Diospa rikushkanpi. Shuk runa masinchikuna payta mana kasunayashpankunapas manami atipashkakunachu chay punchashina kahukta winsinata.

⁶⁻⁷Yaya Dios shuk runa Juan shutiyuta akllashpan kamachirka chay punchashina kahukmanta yachachinampa. Chasna yachachinanpami Juanta kamachirka tukuy ñukanchi runakuna uyashpanchi shunkunchimanta pacha Kristupina sinchikunanchipa. ⁸Juanka manami Kristu punchashina kahukchu karka, ashwan payka Kristu punchashina kahukmantami yachachik karka. ⁹Chay Yaya Diospa yuyayninta riksichik Kristumi shutipa punchashina karka tukuy ñukanchi runakunarayku. Paymi shamunan karka tukuy ñukanchi runakunata riksichinpana imashnami ali ruranakunaka nishpa. ¹⁰Tukuy uras kay allpapi kahushpanpas Yaya Dioska payta runakunata rurachishka kashpanpas runakunaka mana riksinayarkakanachu. ¹¹Pay runa tukushpan ñukanchi israel masinkunapi paktarka. Chasna kikin israel runa masinchi kashpanpas payta mana riksinayarkakanachu, chaymantapas mana yaykuchinayarkakanachu. ¹²Tukuy maykankunami payta yuyashpanchi shunkunchipi yaykuchirkanchi amunchi kananpa, paykunataka Kristumi yanapashka Yaya Diospa wawankuna tukunanchipa. ¹³Manami Yaya Diospa wawankuna tukushkanchi chu shuk warmi kusanmanta chichushpan nima shuk runa chasna munashkan-

raykuchu. Ashwan Yaya Dios munashpanmi shuk mushu kawsayta kushpan paypa wawankuna tukushkanchi.

¹⁴Chay Yaya Diospa yuyayninta riksichik Kristuka ñukanchishina runami tukurka. Pay kawsarka ñukanchiwa. Yuyaysiki llakichiysiki kashpan tukuyta rurarka ñukanchita uchanchikunamanta kishpichinanpa Yaya Diosta riksinan-chipa. Chaymantapas ñukanchi runaku-nata shutipa kashkata riksichik karka. Atun suma yachayyu kahushkanta riksishkanchi. Chay atun yachaynintaka Yaya Diosmi Kristuta kurka shuklla yuyashkan Wawan payshina Yaya Diosllatata kashkanrayku. ¹⁵Payman-tami Juanka rimashpan ñukanchita yachachirka kasna nishpa:

Chay Kristumantami rimashkani kasna nishpayni: Ñuka yachachinata sakishkayni-washa ñukamanta ashwan atun yachayyumi yachachinka. Manarapas wawayarishpaynira payka ña tiyarka. Chayraykumi paymanta rimani, ñukamanta ashwan atun yachayyu nishpa.

¹⁶Yaya Dioska ñukanchita yuyaysiki uchanchikunamanta llakichiysiki kashpanmi ñukanchi paypi sincikuk runakunata yanapashka atunta kushikushpa kawsananchipa. ¹⁷Ñawpa Yaya Dioska Moisés wañuta killkarishkata kurka ñukanchi runakunata riksichinanpa kamachishkunkunata, yachananchipa imashnami alita kawsashunchi. Chaymanta Wawan Jesukristutana kachashpan paywa tukuyta rurarka ñukanchita uchanchikunamanta kishpichinanpa paytana riksinan-chipa. Chaymantapas Wawanta kacharka ñukanchita shutipa kashkata riksichinanpa.

¹⁸Manami ashwan shuk runaka Yaya Diosta rikushkachu. Shukllami payta rikushka. Paymi kan shuklla Wawan Jesukristu payshina Yaya Diosllatata. Shuk yuyayllawa kashpankunami ñukanchita riksichirka imashnami Yaya Dioska.

**Bawtisak Juan
Jesukristumanta rimarka
(Mt. 3.1-12; Mk. 1.1-8; Lk. 3.1-18)**

¹⁹Alita yuyariyichi Bawtisak Juanpa rimashkanta Yaya Diospa Wawan Jesukristumanta. Paymanta yachachi-hushpan ñukanchi israel runakunapa apunchikuna Jerusalén llaktamanta kacharkakuna Juanta tapunkunapa. Chay tapuk runakunaka *saserdotekuna karkakuna. Paykunapa tarawanana kan ñukanchi israel runakunapa uchanchikunamanta Yaya Dioswa alichakkuna. Shukkunaka *levitakuna karkakuna. Paykunapa tarawanana kan *Yaya Diospa wasinpi yanapanankunapa. Juanpi paktashpankuna tapurkakuna: ¿Chapahushkanchi Yaya Diospa Kachanan Kishpichikchu kanki?

²⁰Chaypi Juanka aynirka:

Ama chasna rimawaychichu. Ñukaka manami Yaya Diospa Kachanan Kishpichikchu kani.

²¹Kutikashka tapurkakuna:

¿Ashwan pitaya kanki? ¿Yaya Diospa yachayninwa ñawpa yachachik Eliaschu kanki, maykanmi kutikashka shamunan karka?

Juanka aynirka:

Mana.

Yapa yachanayashpankuna pimi kan Juanka kuti tapurkakuna:

¿Kanchu kanki chapahushkanchi Moisés wañushina Yaya Diospa yachay-ninwa yachachik?

Chaypi payka aynirka:

Mana paychu kani nishpa.

²²Kuti tapurkakuna:

¿Pitaya kanki? Ñukanchita kachak runakuna yachanayanahun pimi kanki nishpa. Paykunata rimak rinanchipa ñukanchita rimay ¿pimi kanki nishpataya kan kikinmanta yuyarinki?

²³Juanka aynirka:

Ñukami kani shuk runa chunlla chakishka allpapi runakunata Yaya Diospa shiminta sinchita yachachik kasna nishpa: Millaypata rurashkaykicha llakirishpaykichi sakiychi Yaya Diospa Kachanan Kishpichik kankunapi kawsak shamunanpa. Chasnami Yaya Diospa yachayninwa ñawpa yachachik Isaias wañuka ñukamanta killkarka.

²⁴⁻²⁵Shuk chaypi kahukkunana *fariseokunapa kachashkan runakuna tapurkakuna:

Mana chapahushkanchi Yaya Diospa Kachanan Kishpichik kashpaykika nima Yaya Diospa yachayninwa yachachik Elias kashpaykika nima chapahushkanchi Moisesshina yachachik kashpaykika ñimayaykutaya runakunata bawtisanki?

²⁶Chaypina aynirka:

Ñukaka runakunata uchankunata yuyachishpa yakullawa bawtisani. Kushikuychi ñukamanta ashwan yachayyu ña ñukanchiwa pakta kahushkanrayku. Kunanka manara payta riksinkichirachu. ²⁷Manarami kallarihunrachu yachachinata. Ñuka yachachinata sakishkayniwasha payna yachachinka. Yapa yachayyu kashpan ñukaka paymantaka mana yachayyuchu kani. Paypa puntanpika nima imata atipanichu rimanata.

²⁸Chasna Juanka yachachirka Jordán yaku mayanpi Jerusalén llaktamanta chimpa partima Betania llaktapi. Chaypillatata runakunata Jordán yakupi bawtisarka.

**Juan rimarka Jesús
uchanchikunamanta Yaya Dioswa
alichak kananta**

²⁹Chasna yachachishkanwasha kayantima Juanka Jesusta rikurka shamuhushkanta. Chaypi rimarka: Rikuychi shamuhushkata, paymi kan Yaya Diospa akllashkan runa uchanchi-

kunarayku wañunanpa. Ñawpamanta pacha obeha maltakunata wañuchipayahnun Yaya Dios uchanchikunamanta llakichinampa. Kunanka paymi tukuy ñukanchi runakunapa uchanchikunaryku shuk obeha maltashina wañuchi y tukunka Yaya Dios uchanchikunata llakichinampa. ³⁰Paymantami kankunata rimashkani yachachihushpayni kasna: Ñuka yachachinata sakishkayniwasha payna yachachinka. Manarapas wawayarihushpaynira payka ñawpamanta pacha ña tiyarka. Chayrayku ñukamanta ashwan yachay-yumi nishpa. ³¹Ñuka kikinpas puntiru payta mana riksirkanicu pimi kan nishpa. Chasna kashpanpas shamushkanimi kankuna israel masinikunata paymanta yachachinaynipa. Kankunata uchaykichikunata yuyachishpa yakuwa bawtisani. Chayta rurani shunkuykipi alicharishpaykichi maykanmi shamunan kashkata riksinaykiciphi.

³²Chaymantapas Juanka payta riksishkanmanta rimarka:

Rikushkanimi Yaya Diospa Espiritunta silumanta shuk wiwa mukukushina paypi uraykumuhushkanta. Payllapimi kiparirka chay Yaya Diospa Espiritunka. ³³Puntiru ñukaka mana yacharkanichu pimi chay runaka nishpa. Chasna kashpanmi yakupi bawtisanaynipa kamachiwak Yaya Dioska rimawarka:

Maykanpimi rikunki Espirituyni uraykumushpan paypi kiparishkanta, paymi runakunata Espirituynita kunka. Kan runa masikunata uchankunata yuyachishpa yakullawami bawtisanki. Pay shuti Espirituynita runakunata kushpa shunkunkunata aliyachinka nishpa.

³⁴Ñukaka ñami rikushkani, rikushpayni yachachishkani pay Yaya Diospa Wawan kananta nishpa Juanka rimarka.

**Jesusta puntiru
katikkunamanta riman**

³⁵Chaymanta kayantima Juanka kutikashka chaymallatata rirkta. Chay uras ñuka, wawki Andrespas payta katik runakuna kashpanchi chaypi paywa pakta kahurkanchi. ³⁶Chaypina Juanka Jesusta pasahushkata rikushpan rimarka:

Rikuychi paymi kan Yaya Diospa akllashkan runa uchanchikunarayku wañunanpa. Shuk obeña maltashina wañuchiy tukunka Yaya Dios ñukanchikunata uchanchikunamanta llakichinana nishpa.

³⁷Ñukanchi ishkay payta katik runakuna chay rimashkanta uyashpanchi Jesustana katirkanchi. ³⁸Chaypi Jesuska tikrarishpan ñukanchita rikushpan tapurka:

¿Imatata munankichi? nishpa.
Ñukanchina rimarkanchi:
Yachachik ¿maypita kawsanki?
³⁹Jesuska ñukanchita aynirka:
Shamuychi riksinaykichipa maypimi kawsani.

Chasna rimashpan rirkanchi rikunanchipa maypimi kawsahurka. Chaypina paywa kiparirkanchi ña chishiyahushkanrayku. ⁴⁰Andreswa pakta chaypi kiparirkanchi. Payka Simonpa wawkin karka. Juan Jesusmanta rimashkanta uyashpanchi Jesustana katirkanchi.

⁴¹Andreska Jesusta rikshikanwasha wawkin Simontana maskanapa rirkta. Tarishpan wawkinta rimarka:

Chapahushkanchi Yaya Diospa Kachanan Kishpichiktami tinkushkanchi nishpa.

⁴²Chaymanta Andreska wawkin Simonta pushamurka Jesusma. Jesuska Simonta rikushpan rimarka:

Kanmi kanki Simón, Juanpa wawan. Kunanka shutikika kankami Kefas nishpa.

Kefas arameo shirimanta pasachishpa *griego shimipi kan Pedro, chayka ninayan rumi.

**Jesuska Felipeta Natanaelta
kayarka payta katinankunapa**

⁴³Chaymanta kayantima Jesuska ñukanchiwa pakta Galilea allpama ña rinanchipa kahushkapi Felipeta tinkurka. Chaypi payta rimarka:

Katiway nishpa.

⁴⁴Felipeka Galilea allpapi Betsaida shutiyu llaktamantami karka. Andrés Pedropas chay llaktamantallatamatmi karkakuna. ⁴⁵Felipeka Jesusta rikshikanwasha Natanaeltana maskanapa rirkta. Payta tarishpan rimarka:

Tinkushkanchimi maykanmantami Moisés wañuka ñawpa killkarka. Chaymantapas maykanmantami Yaya Diospa yachayninwa shuk yachachikunapas ñawpa killkarkakuna. Chay runapa shutinka kanmi Jesús, payka Josepa wawanmi Nasaret llaktamanta nishpa.

⁴⁶Chayta uyashpan Natanaelka aynirka:

Imashnata ali runaka tiyanka Nasaret llaktamantaka.

Chaypi Felipeka aynirka:

Shamuy kan kikin riksinaykipa nishpa.

⁴⁷Jesuska Natanael payta kayllayamu-hushkata rikushpan rimarka:

Kaykaya shuk ali israel masinchika Yaya Diosta alita kasuk mana llullachik runaka.

⁴⁸Natanaelka chaypi tapurka:

¿Imashnataya riksiwanki chasna kanaynita?

Jesuska aynirka:

Manarapas Felipe kanwa *igu kaspi ukupi kwintahushpanra yuyarishkaykita rikshikan.

⁴⁹Natanaelka mancharishpan rimarka:
Yachachik, kanmi kanki Yaya Diospa
Wawan, ñukanchi israel runakunapa
Atun Apunchi.

⁵⁰Chaypi Jesuska aynirka:
Ña kanka riksiwashkanki pimi kani
igu kaspi ukupi kanta rikushkani
nishkaynimantalla. Ñuka kanta rimani
chay rikushkaykimanta ashwan mana
atipaypakunata rurashkaynikunatami
rikunki.

⁵¹Chaymantapas Jesuska rimarka:
Alita uyawaychi. Nima ima uras
rikushkaykichitami rikunkichi Yaya
Diosmanta kashkaynita yachanayki-
chipa. Rikunkichimi siluka paskarish-
kata, *angelkuna ñuka Yaya Diospa
Kachashkan Runamanta sikahushkanku-
nata, chaymantapas ñukapi uraykuhush-
kankunata nishpa.

Jesuska Kaná llaktapi kasarana fiestapi karka

2 ¹Chaymanta ishkay punchawasha
tiyarka shuk kasarana fiesta Kaná
llaktapi Galilea allpapi. Jesuspa maman
chay fiestapi kahurka. ²Jesuspas ñukanchi
runankunawa pakta chaypi kahurka chay
fiesta amun kayashkanrayku. ³Chay
fiestapi upyahushkanchi *vinuka tukurirkta.
Tukurishkata rikushpan mamanka Jesusta
rimak shamurka:

Mana tiyannachu vinuka.

⁴Chaypi Jesuska aynirka:

Mamayni, ama chasna rimawaychu
imatami rurasha. Ñuka kikinmi yachani
imatami ruranayni tiyan. Manarami
Yayaynika rimawashkarachu imatami
rurasha.

⁵Chaypi mamanka rimak rirka chay
fiesta amuta yanapak runakunata:

Wawaynika kankunata kamachishpanka
kasuychi.

⁶Chay fiesta amupaka tiyarka sokta
tinahakuna rumimanta rurarishka

chaypi yakuta churanankunapa. Chasna
tinahakunapi kahuk yakuwami maylla-
riipayanchi, Yaya Diospa rikushkanpi ali
tukunanchipa nishpa yuyarishpanchi.

Chay fiesta amupa karan tinahanka
pichka chunka, kanchis chunka parti
butilla yakuwa untaripayan. Chay
tinahakunaka chushakunami karkakuna.

⁷Chaypi Jesuska yanapak runakunata
rimarka:

Untachiyichi yakuta kay tinahakunapi
nishpa.

Paykunaka chay tinahakunapa
shiminkunakama yakuta untachirka-
kuna. ⁸Chaymanta Jesuska rimarka:

Kunanka chay tinahakunamanta
wishishpaykichi uchillallata apaychi
fiesta amupa kamachishkan runa
kamananpa.

Paykunaka aparkakuna chay runama.

⁹Chay runaka yakumanta vinu
tukushkata kamarka. Mana yacharkachu
maymantami chay vinuka. Chay wishik
runakunallami yacharkakuna chay
vinuka yakumanta tukushkanta. Chay
fiesta amupa kamachishkan runaka
vinuta kamashpan chay warmiyahuk
runata kayarka. ¹⁰Shamushpan payta
nirka:

Puntirumi tukuy kayashkanchi
runakunata upyachinchii ali vinuta. Ña
achkata upyashkankunawashami
upyachinchina mana yapa ali vinuta.
Kanka ¿imaraykutaya wakaychashkanki
kay ali vinutaka kunankama?

¹¹Chay yakumanta vinuta Jesuska
rurashpan chaypi runakuna nima ima
uras rikushkankunata Yaya Diospa
yachayninwa puntiru rurashkanta
rikuchirka. Chayta rurarka Galilea
allpapi kahuk Kaná llaktapi. Chay
rurashkanwa Jesuska atun yachak
kananta riksichirka. Chayta rikushpan-
chi ñukanchi paypa runankunaka
kirirkanchi Yaya Diospa kachashkan

kananta.¹²Chaywasha Jesuska mamanwa wawkinkunawa ñukanchi paypa runankunawa pakta Kapernaum llaktama rirkanchi. Chay llaktapi masna punchakunallata karkanchi.

**Jesuska Yaya Diospa wasinmanta
runakunata wichurka**
(Mt. 21.12-13; Mk. 11.15-18;
Lk. 19.45-46)

¹³Karan wata ñukanchi israel runakuna tantaripayanchi Yaya Dios Egipto allpamanta yaya rukunchi wañukunata ñawpa llukshichishkamanta payta agradesinanchipa. Ña paktarihushpan tantarinanchi *Paskua punchakuna Jesuspas chay punchakunaryku Jerusalén llaktama rirka.

¹⁴Chaypi paktashpan *Yaya Diospa wasin kincha ukupi tarik rirka achka runakuna wakrakunata, obehakunata, wiwa mukukukunatas rantichihushkakunata. Shukkunaka chaypi karkakuna chikan kullkikunata ñukanchi israel runakunapa kullkinchikunawa kampyanankunapa. ¹⁵Chasna rurahushkakunata rikushpan Jesuska waskakunata apishpan kawpurka asutinrayku. Chaywa chaypi kullkita kampyahukkunata tukuy rantichihukkunatas obehankunawa pakta, wakrankunawa pakta llukshichirka. Kullkita kampyahukkunapataka mesankunata tankashpan tukuy kullkikunata shikwachirka. ¹⁶Wiwa mukukuta rantichihukkunata rimarka:

Kaymanta kay wiwaykichikunata llukshichiychi. Ama Yayaynipa wasinta rantichina wasita ruraychichu.

¹⁷Chayta rikushpanchi ñukanchi paypa runankunaka yuyarirkanchi Salmos killkapi killkarishkata paktachihushkanta. Chaypimi kasna nin:

Wasikita yapa alichanata munashpayni wañunayni tiyan nishpa.

¹⁸Chaypi ñukanchi israel runakunapa apunchikuna Jesusta tapurkakuna:

¿Kasna rurashpayki pimi kani nishpataya kan kikinmanta yuyarinki? Yaya Diospa kamachishkam runa kashpaykika Yaya Diospa yachayninha nima ima uras rikushkanchita rurashpayki ñukanchita rikuchiy.

¹⁹Jesuska aynirka:

Kay Yaya Diospa wasinta urmachishpa waklichiychi. Chaywasha ñukaka kimsa punchapi atarichisha kay wasita.

²⁰Chayta uyashpankuna rimarkakuna:

¿Imashnataya rimanki kimsa punchapi atarichisha nishpa? Chusku chunka sokta watata tarawashkakuna kay Yaya Diospa wasinta ruranankunapa. Kunankama manara paktachinahunra-chu nishpa.

²¹Chay Yayan Diospa wasinmanta rimahushkanka payta wañuchishpankuna kimsa punchamanta kawsarinamantami rimarka. ²²Chayrayku Yaya Dios payta wañushkanmanta kawsachishkanwasha ñukanchi runankunaka chasna rimashkanta yuyarirkanchi. Yaya Diospa killkachishkanta yachakushpanchi chaymantapas Jesuspa rimashkanta yuyarishpanchi shutipa kanankunata yacharkanchi Jesús chaykunata paktachishkanrayku.

**Jesuska tukuy runakunapa
shunkunkunata riksin**

²³Jesús *Paskua punchakunaryku Jerusalén llaktapi kahushpanra achka runa masinchikuna atun yachaywa nima ima uras rikushkanchita rurahushkanta rikushpankuna Yaya Diospa kachashkan kananta kirirkakuna.

²⁴Chasna kashpanpas Jesuska mana ashwanta paykunata rimarkachu pay kikinmanta pimi kan nishpa. Tukuy ñukanchi runakunapa shunkunchiku-

nata riksik kashpan chay runakuna mana shunkunkunamanta pacha paypi sinchikuhushkankunata yacharka.
²⁵Payka mana munarkachu nima maykan runa payta rimak shamunanpa. Pay kikinllami runakunapa shunkunkunata riksirka.

Jesuska Nikodemowa kwintarka

3 ¹Tiyarka shuk runa Nikodem shutiyu. Payka karka *fariseo. Fariseokuna atipashkankunata ruranahun Moisés wañupa killkashkan kamachishhkakunata alita paktachinan-kunapa. Chaymantapas Nikodemoka karka ūukanchi israel runakunapa apunchikunawa pakta apullatata. ²Chay runaka shuk tuta pakalla Jesusta pasyak rirka. Chaypi paktashpan rimarka:

Yachachik, yachanchi Yaya Diospa kachashkan ūukanchita yachachik kanaykita. Yaya Dios kanta yanapash-panllami atipanki tukuy chay nima ima uras rikushkanchita ruranata.

³Chaypi Jesuska aynirka:

Alita uyaway. Maykanmi mana mushumanta wawayarinchu, chayka manami Yaya Diospa kamachishkan tukushpa paypa ali kamachihushkanpi kawsankachu.

⁴Chayta uyashpan Nikodemoka tapurka:

¿Imashnataya shuk ruku runaka atipama mushumanta wawayarinata? Manami atipanchu mamanpa wiksanpi kutikashka yaykunata wawayarinanpa.

⁵Jesuska aynirka:

Alita uyaway. Maykanmi runamanta wawayarishpan mana chasnallatata Yaya Diospa Espiritunmanta mushu runa tukushpanka payka manami Yaya Diospa kamachishkan tukushpa paypa ali kamachihushkanpi kawsankachu.

⁶Maykanmi runamanta wawa tukushka chayka runallatatami kan. Chasnallatata

maykanmi Yaya Diospa Espiritunmanta mushu runa tukushka, chayka Yaya Diospa Espiritunpa kushkan kawsay-yumi kan. ⁷Tukuyumi mushumanta wawayarinaykichi tiyan nishpa rimashkaynita uyashpayki ama yuyarishpalla kipariychu. ⁸Wayrata yuyariy. Kunkay-manta maymantapas wayran. Mana yachanchichu maypimi kallarishka chaymantapas maypimi pasarinka nishpa. Mana wayrata asirtashpanchipas wayrashkanta uyanchimi. Chasnashi-nami runakunaka mana asirtashpanku-napas imashnami Yaya Diospa Espíritun shuk runata mushuyachishkanta, chay runa mushu tukushkantaka yachana-hunni.

⁹Chaypi Nikodemoka kutikashka tapurka:

¿Imashnataya chayka?

¹⁰Jesuska aynirka:

¿Kanka ūukanchi israel runakunata yachachik kashpaykitatachu mana yachanki imamantami rimahuni?

¹¹Alita uyaway. ūuka runaynikunawa pakta yachashkanchitami rikushkanchitami yachachinchi. Chasna shutipa kashkata yachachishpanchipas kankuna apunchikuna mana munankichichu kirinata. ¹²ūuka kankunata kay allpapi pasahushkanmanta rimashpayni mana kiriwankichichu. ¿Imashnataya kiriwan-kichima silipi pasahushkanmanta yachachinimaka? Manami kirinkichimachu. ¹³Nima maykan runa siluma sikashkachu chaypi kawsashpan silipi pasahushkanmanta yachakunanpa. ūuka Yaya Diospa Kachashkan

Runallami silipi kawsashpayni kay allpama shamushkani. ūukallami kankunata atipani tukuy chaykunamanta yachachinata. ¹⁴⁻¹⁵Ñawpa Moisés wañuka chunlla chakishka allpapi bronsementa machakuyata kaspipi watashpan shayachirka. Yaya rukunchi

wañukunaka chay warkurihushkata rikushpankuna wañunankuna kashkankunamanta kishpirkakuna. Chasnashinami ñuka Yaya Diospa Kachashkan Runatapas alsawankakuna. Runakunaka ñuka alsashkankuna runapi sinchikushpankunaka wiñayparayku chinkarinankuna kashkankunamanta kishpinkakuna wiñaypa Yaya Dioswa kawsanankunapa.

**Yaya Dioska runakunata
yapa yuyan**

¹⁶Yaya Dioska ñukanchi runakunata yapa yuyashpan shuklla Wawanta payshina Yaya Diosllatata kay allpama kacharka uchanchikunarayku wañunarpa. Chasna Wawanta kachashpanmi tukuy paypi sinchikkunaka manana anchurishka paymanta wiñaypa parisishunchichu, ashwan paywana wiñaypa kawsashunchi. ¹⁷Yaya Dioska manami Wawantaka kay allpama kacharkachu ñukanchi runakunata kastigananpa. Ashwan paytaka kacharkami uchanchikunarayku wiñaypa kastigarina kashkanchimanta kishpichinanpa. ¹⁸Maykan runami Yaya Diospa Wawanpi sinchikun payka manami kastigarinkachu. Maykan runami mana sinchikunchu paypa Wawanpi, payka ñami kastigarishka kan, shuklla Wawanpi payshina Yaya Diosllatata kashkapi mana sinchikushkanrayku. ¹⁹Kasna kan imashnami runakuna kastigarishka tukurkakuna: Chay punchashina ali ruranakunata riksichik runami kay allpama shamushpan payta mana kasunayashpankuna chiknirkakuna. Amsapishina kawsashpankuna uchata rurashpalla katirkakuna. Rurashkankunaka millaypa kashkanrayku chay mana ali kawsanata

ashwan munarkakuna chay ali kawsanamanta. ²⁰Tukuy millaypata rurak runakunaka mana munanahunchu uchankunata riksinata. Chayrayku chay punchashina ali ruranakunata riksichik *Kristuta chikninahun. Mana munanahunchu paypi sinchikunata pay mana riksichinanpa imashna millaypami rurashkankunaka. ²¹Tukuy ñukanchi Yaya Diospa munashkanta rurak runakunaka mana manchanchichu runa masinchikuna rurahushkanchikunata rikunankunapa. Ñukanchika punchata munanchi runa masinchikuna Yaya Diosta kasushpa kawsahushkanchikunata riksinankunapa.

**Bawtisak Juan kutikashka
Jesusmanta rimarka**

²²Chaywasha Jesuska ñukanchi runankunawa Jerusalén llaktamanta llukshishpanchi shuk partima rirkanchi chay Judea allpallapillatata. Chaypi Jesús runakunata bawtisahushpan^a masna punchakunata kiparirkanchi. ²³Chay uras Juanpas bawtisahurka Judea allpamanta ashwan anakpi Enón shutiyu achka yaku wawakuna umapi, Salim llakta kuchupi, chaypi achka yaku tiyashkanrayku. Runakuna chayma rirkakuna, Juanpa rimashkanta uyashpankuna bawtisarinankunapa. ²⁴Chay uras Juanka karselpi manara churay tukushkarachu kahurka. ²⁵Chaypi payta katik runakunaka shuk israel runa masinchicha rimanakurakunkuna imashna rurashpami uchankunamanta mayllarishkashina Yaya Diospa rikushkanpi kankakuna. ²⁶Paykunaka Juanta rimak rirkakuna:

Yachachik, maykanmi kanwa karka Jordán yaku chimpapi, maykanmantami ñukanchita rimarkanki, payka kunanka

bawtisahumi. Chaymantapas tukuy runakuna paytana katihunkuna.

²⁷Chayta uyashpan Juanka paykunata rimarka:

Yaya Dios payta yanapashkanraykumi runakuna katinahun. ²⁸Kankuna kikin uyashkankichi shutillata rimashkaynita kasna nishpayni: Ñukaka manami kanichu Yaya Diospa Kachanan Kishpichik, ashwan Yaya Diosmi kamachiwarka runakunata paymanta yachachinaynipa pay kikin manara yachachishpanra nishpa. ²⁹Ñukami kani shuk amigunta warmiyachik runashina. Shuk runa warmiyanayashpan paypa amigun warmita tapukrin. Ari nishpanka chay warmiwa amigunta kasarachin. Chay amigunka chay warmita mana tapunchu pay kikinrayku ashwan tapunmi amigunrayku. Chay warmiyak runa kasarahushpan amigunka atuntami kushikun warmiyahushkan warmiwa kushilla kwintahushkanta uyashpan. Ñuka chay amigunta warmiyachik runashina kashpayni kunanka atunta kushikuhuni runakuna paytana katihushkankunamanta rimawahushpaykichi. Ñami paktachishkani Yaya Dios kamachiwashkanta. ³⁰Kunanka ashwan ashwan runakunaka paytana uyanahuchun. Ñukataka sakiwanahuchun nishpa.

³¹Chay runa silumanta shamushkaka tukuymanta ashwan yachakmi kan. Ñukanchi kay allpapi kawsak runakunaka allpapi tiyashkakunallata yachanchi, chaykunamantalla rimanchi. Silumanta shamushka runaka chaypi tiyashkakunatapas riksin. Chayraykumi payka tukuymanta ashwan yachak kan. ³²Silipi rikushkantami uyashkantami riman. Chasna shutipa kashkata rimashpanpas achka runakuna payta mana kirinahunchu. ³³Shuk runa paypa rimashkanta kirishpanka yachankami

shutipa kashkata rimashkanta. Payka kasna runa masinkunata rimahuksinami kan: Yaya Dioska rimashkanta paktachikmi kan nishpa. ³⁴Yaya Dios paypa kachashkan runata mana mitsashpachu Espiritunta kun. Chayrayku paypa rimashkantami runakunata riman. ³⁵Yayan Dioska Wawantaka yuyenmi. Chayraykumi payta tukuymanta kamachikta rurarka. ³⁶Maykan runami Yaya Diospa Wawanta kirishpa kawsan payka wiñaypami Yaya Dioswa kawsanka. Maykan runami Yaya Diospa Wawanta mana kasushpa kawsanchu, payka manami Yaya Dioswa kawsankachu ashwan paypa kastiganan runami kiparinka.

Jesuska Samaria allpapi kawsak warmiwa kwintarka

4 ¹⁻³Jesús runakunata yachachinata kallarispan *fariseokuna uyarkakuna Bawtisak Juanta katihushkankunamanta ashwan achka runakuna Jesusta katihushkanchikunata. Chaymantapas uyarkakuna Jesús paymanta ashwan achka runakunata bawtisahushkanta. Chasna uyashpankopas manami Jesuschu bawtisarka ashwan ñukanchi runankunami bawtisarkanchi. Jesuska fariseokuna paymanta uyashkankunata yachashpan chay kawsanankuna Judea allpamanta llukshirkanchi Galilea allpama kutinanchipa.

⁴Chasna Jesuswa kutihushpanchi *Samaria allpa chawpita pitika rirkanchi. Ñukanchi israel runakuna chaypi kawsak runakunawa mana kwintak kashpanchipas Yaya Dios munashkanrayku kay allpata pasananchi tiyan nishpa rirkanchi. ⁵Na Samaria allpata pasahushpanchi shuk llakta Sikar shutiyu mayanpi paktarkanchi. Chay llaktaka Jakob wañupa wawan

José wañuta allpata kushkan mayanpimi karka. ⁶Chaypi tiyarka shuk poso allpa ukumanta tukyarik yakuba. Chay yakuta Jakobka allpata allashpan rumiwa kinchashkanrayku Jakobpa poson nirkakuna. Karuta purishkanchirayku yapa sampayashka kashpan Jesuska chay poso mayanpi tiyarirka. Chasna uras manara chawpi punchachu karka. ⁷⁻⁸Ñukanchi runankunaka llaktama rirkanchi mikunata rantinanchipa. Rishkanchiwasha paktarka shuk samaritano warmi yakuta wishinanpa. Chaypi chay warmita Jesuska tapurka: Kuway yakuta nishpa.

⁹Ñukanchi israel runakuna *samari-tano runakunawa mana kwintak kashkanchirayku chay warmika Jesusta aynirka:

¿Imashnataya kanka israel runa kashpaykitata yakuta tapuwanki ñuka samaritano warmitaka?

¹⁰Chaypi Jesuska aynirka:
Kan yachankimaka Yaya Dios runakunata kunayahushkanta, chaymantapas pimi kanta yakuta tapuhukka, ñukatami wiñaypa tukyarik yakuta tapuwankima. Chasna tapuwankimaka ñukami kanta kuynima.

¹¹Chaypi chay warmika aynirka:
Nima imawa yakuta wishinaykipa tiyanchu. Kay posopika ukupimi yakuka. ¿Maymantata yakuta kuwankima?

¹²Ñawpa yaya rukunchi Jakob wañuka kay posota ñukanchirayku sakirka. Payka kay posomanta upyarka wawankunawa achka wiwankunawa pakta. Ñukanchipas kay posomantallata upyahunchi, kunankama yakuka mana tukurinchu. ¿Kanchu kanki yaya rukunchi Jakobmanta ashwan yachak ñukanchita wiñaypa tukyarik yakuta kunaykipa?

¹³Chaypi Jesuska aynirka:
Tukuy kay yakuta upyak runakunaka kutikashkami yakunayankakuna.

¹⁴Ñuka yakuta kushkaynita upyashpan-kunaka mananami yakunayankakuna-chu. Shuk runata chay yakuta kushpay-nika paypi mana tukurik tukyarik yakushina tukunka wiñaypa kawsanpana, manana nima ima payta pishinkanachu.

¹⁵Chasna Jesús rimashkanta uyashpan chay warmika rimarka:

Chay yakuta kuway manana yakuna-yanaynipa, manana wishinaynipa kay yakuta.

¹⁶Jesuska rimarka:

Kusaykita kayakriy, chaymanta kutikashka shamunki.

¹⁷Chay warmika aynirka:

Mana tiyawanchu kusaynika.

Jesuska rimarka:

Alitami rimawashkanki manami kusaynika tiyawanchu nishpa. ¹⁸Kanka pichka kusayumi kashkanki. Kunanka maykan runawami kawsahunki chayka manami kusaykitchu. Chayrayku rimawashkaykika shutipami.

¹⁹Chay warmika rimarka:

Yaya Diospa yachayninwa yachachikmi kanki. ²⁰Chasna kashpayki yuyarishkaykita rimay. Ñukanchi samaritano runakunapa yaya rukunchi wañukunaka Yaya Diosta mañapayarka-kuna kay rikuhashkayki urkupi. Kankuna israel runakunaka rimankichi Jerusalenpimi runakuna Yaya Diosta mañanankuna tiyan nishpa.

²¹Chaypi Jesuska aynirka:

Kay rimashkaynita kiry. Nima rinaykichi tiyannachu chay urkuma nima ñukanchi Jerusalenma rinanchi tiyannachu. Kunan ña paktarihun Yaya Diosta tukuy parti mañashpa kushichinaykicipa. ²²Kankunaka mana yachankichichu pitami mañankichi. Runakuna ñukanchikunamanta kishpichirina kashpankuna ñukanchi israel runakunami yachanchi pitami mañanchi.

²³Kunan ña runakuna tukuy shunkunkunamanta pacha Yaya Diosta kushichishpa mañankakuna. Yaya Diospa Espíritun paykunata yanapashpanmi yuyachishkanshina Yaya Diosta kushichishpa mañankakuna. Chasna tukuy shunkunkunamanta pacha mañak runakunatami munan Yaya Dioska.

²⁴Payka mana ñukanchishina aychayu kashpan paytaka mana rikunchichu. Payka tukuyta atipakmi kan. Chasna mana runashina kashpanmi Yaya Diospa Espíritun ñukanchikunata yuyachishpanlla yachanchi imashnami tukuy shunkunchimanta pacha payta kushichishpa mañanchi. Chasnallami payta mañashpa shutipa kushichinchí.

²⁵Chaypi chay warmika rimarka:

Ñuka yachani chapahushkanchi Yaya Diospa Kachanan Kishpichikka shamunanta, maykantami rimanchi *Kristu. Pay shamushpanmi tukuyta ñukanchita asirtachinka.

²⁶Jesuska aynirka:

Ñuka kanwa kwintakmi chay rimahushkayki runaka kani.

²⁷Chasna kwintahushkankunapi ñukanchi runankunaka paktarkanchi. Jesús shuk warmiwa kwintahushkanta rikushpanchi mancharirkanchi. Chasna mancharishpanchipas nima maykan tapunayarkanchichu: ¿Imatata chay warmita tapunki? ¿Imamantata chay warmiwa kwintahunki? nishpa.

²⁸Chaypi kahushkanchipi chay warmika yakuta wishinan tinahanta sakishpan kallpa rirka llaktanma runakunata kayak rinanpa.

²⁹Shamuychi, tinkunakushkanimi shuk runawa. Aku rikuk rishunchi. Payka tukuy kawsashkaynitami rimawashka. Aku rikuk rishunchi, ¿manachari Yaya Diospa Kachanan Kishpichikchu? nishpa.

³⁰Chasna chay warmi rimashpan runakuna llaktankunamanta llukshish-

pankuna Jesusta rikunankunapa rirkakuna.

³¹Manarapas chay runakuna paktamushpankuna ñukanchika Jesusta karanyarkanchi:

Yachachik, mikuy. ¿Imaraykuta mana mikunayankichu?

³²Payka ñukanchita aynirka:

Ñukapaka ñami tiyan mikunayniká. Kankunaka chay mikunaynitaka manami riksinkichichu.

³³Chaypi ñukanchipura tapunakurkanchi:

Apamushkakunachari mikunata.

³⁴Chasna tapunaku hushpanchi Jesuska ñukanchita rimarka:

Mikunaynishinami kan ñukata kachawakpa munashkanta paktachish-payni. Paypa munashkanta rurashpayni mikushashina kushilla yuyani.

³⁵Shuk rimana kan kasna: Tarpushkanchi washa chusku killamanta muyunkunata pallanchi nishpa. Kankunapas chay rimanashinallatata yuyarihunkichi. Ñukaka kankunata rimani, rikuychi chay achka runakuna shamuhushkakunata. Paykunaka ña Yaya Diosta kasunankunapami kahunkuna.

Paykunata riku hunimi pukushka muyukunashina chapahushkankunata pallananchipa. ³⁶Paykunata Yaya Diospa shiminta yachachishpanchi shutipa paymanta kanaynita kirinka-kuna. Kirishpankuna wiñaypa Yaya Dioswa kawsankakuna. Chasna

kashpanmi yachachishkanchimanta pagay tukushashina kashunchi. Ñawpa paykunata yachachikkuna karkakuna shuk muyukunata tarpuk runakunashina. Ñukanchi chay muyukunata pallak runakunashinami kanchi. Chasna kashpanchimi tukuy parihu atunta kushikushunchi.

³⁷Kankunapi tiyan shuk rimana kasna nishpa: Shuk runa tarpun muyukunata

chakranpi shuk runana chaykunata pallan nishpa. Chay rimanaka shutipami.³⁸ Ñukami kankunata kamachishkani mana tarpushkaykichi muyukunata pallanaykichipa. Shuk runakuna sinchita chakranpi tarawash-pankunapas pichashpankuna tarpush-pankunapas mana pallashkakunachu, kankunana pallankichi. Kay samaritano runakunata yachachikkunami kashkakuna sinchita chakranpi tarawak runakunashina. Kankunana paykunata mana yachachishpaykichipas kasuwash-kankunatana rikushpaykichi pallak runakunashina kankichi nishpa.

³⁹Achka chay Sikar llaktapi kawsak samaritano runakuna Jesuspi sinchikur-kakuna chay warmi tukuy kawashkaynitami rimawashka nishpa kwintak rishkanrayku. ⁴⁰Paykuna Jesuspi paktamushpankuna payta yapa munashpankuna kipariy ñukanchiwa nishpa rimarkakuna. Chasna rimashpankuna Jesuswa pakta ishkay punchata paykunawa kiparirkanchi. ⁴¹Chasna kiparishpanchi ashwan achka samaritano runakuna pay kikinpa yachachishkanta uyashpankuna kirirkakuna. ⁴²Chaypi chay warmita rimarkakuna:

Kunanka kirinchimi mana kan ñukanchita rimashkaykiraykuchu ashwan kirishkanchimi ñukanchi kikin kay runapa yachachishkanta uyashkan-chirayku. Kunan yachanchi pay shutipa tukuy runakunata Kishpichik kananta.

Jesuska shuk apupa wawanta ampirka

⁴³Ishkay punchata *Samaria allpapi kahushkanchiwasha Galilea allpama rirkanchi. ⁴⁴Chay kikin allpanma rirkanchi Jesuska rimashka kashpanpas kasna: Shuk runa Yaya Diospa yachay-ninwa yachachiktaka pay kikinpa

llaktanpi runa masinkunaka mana yachaktashinami rikunahun nishpa. ⁴⁵Chasna mana alita payta rikunankunata yuyarishpanpas Jesùs Galilea allpanpi paktashpan tukuy chay llaktanpi runa masinkuna payta alita rikurkakuna. Jerusalén llaktama *Paskua punchakunata pasanapa rishkankunapi Jesùs tukuy mana atipaypakunata rurashkanta rikurkakuna. Chayrayku kutishpankuna alita yaykuchirkakuna. ⁴⁶Jesùs Galilea allpapi rihushpan Kaná llaktapi paktak rirka. Chay llaktapimi payka chayra yachachinata kallarihushpan yakumanta *vinuta rurarka. Chay Kaná llaktamanta chawpi puncha parti purina tupuri Kapernaum llaktaka kahurka Galilea allpallapillatata. Chaypi tiyarka shuk kamachik atun apupa churashkan. Paypa wawan unkushka karka. ⁴⁷Chay apuka Jesùs Judea allpamanta Galilea allpapi paktashkanta yachashpan payta rikunapa rirka. Jesuspi paktamushpan yapa munarka payta wasinma pushanata wawanta ampinampa. Yapa wañunalla kashpan Jesusta rimarka:

Kanka atipankimi unkushkata ampinata. Shamupay llaktaynima wawaynita ampinaykipa.

⁴⁸Chaypi Jesuska aynirka:

Kankunaka tukuy uras munankichi atun yachaywa nima ima uras rikushkaykicha rurashkaynita rikunata. Mana rikushpaykichika mana kirinkichichu.

⁴⁹Chay apuka aynirka:

Aku utkalla manarapas wawaynistuka wañushpanra.

⁵⁰Chaypi Jesuska rimarka:

Kutiy wasikima, wawaykika ampirish-kami.

Chay apuka Jesuspa rimashkanta kasushpan wasinma kutirka.

⁵¹Chasna wasinma kutihushpan
kamachinan runakunaka payta
tinkunapa shamurkakuna kasna nishpa:
Ñami wawaykika ampirishka.

⁵²Chay apuka tapurka:
¿Ima urata wawaynika aliyanata
kallarishka?

Paykunaka aynirkakuna:
Kaynami chawpi puncha kinkrayash-
kapi kalinturanta pasachishka.

⁵³Chaypi chay apuka yuyarirka
chasna uras Jesús payta rimashkanta,
wawaykika ñami ampirishka nishpa.
Chasna wawan ampirishpan chay apuka
tukuy ayllunkunanti Jesuspi sinchikur-
kakuna. ⁵⁴Chay wawata ampişpan
níma ima uras rikuskanchita Jesuspa
ishkaynin rurashkan karka runakunata
yachayninta rikuchinanpa. Chaytaka
rurarka Judea allpamanta Galilea
allpapi paktashkanchiwasha.

Jesuska Betsata yaku mayanpi shuk unkushkata ampirka

5 ¹Chaymanta masna punchakunapi
ñukanchi israel runakunapa shuk
tantarina Jerusalenpi tiyarka kushikushpa
Yaya Dios ñukanchita yanapashkanta
yuyarinanchipa. Chayrayku Jesuska
Jerusalenma rirka. ²Jerusalén llaktapa
kincharishkanpi shuk punku tiyarka
obehakunapa punku shutiyu. Chay punku
mayanpi shuk yaku karka Betsata shutiyu.
Chay yaku mayanpi pichka wasikuna
tiyarka unkushkakuna chaypi kananku-
napa. ³⁻⁴Chaypi achka unkushkakuna
karkakuna, wiškukuna, waklishka chakiyu-
kuna, aycha chakirishkakunapas, chay
yaku kuyurishpan yaykushunchi
ampirinanchipa nishpa yuyarikkuna. ⁵Chay
unkushkakunamanta shuk tiyarka kimsa
chunka pusak watata unkushka. ⁶Jesuska
chay unkushkata rikushpan unaymanta
pacha unkushka kashkanta yachashpan
payta tapurka:

¿Munankichu ampirinata?

⁷Chay unkushkaka aynirka:

Manami nima maykan tiyanchu kay
yaku kuyurihushpan churawanarpa
chaypi ampirinaynipa. Karan kuti
rihushpayni shukkunarami satirinahun
manara paktahushpayni.

⁸Chayta uyashpan Jesuska llakichish-
pan rimarka:

Atariy, llanchamaykita apishpayki riy.

⁹Chay runaka chay ratulla ampirirka.
Chasna ampirishpan llanchamanta
patarichishpan apashpa alitana purishpa
rirka.

Chay punchaka ñukanchi israel
runakunapa samananchi punchami
karka. ¹⁰Chaypi apunchikunaka chay
ampirishka runata rimarkakuna:

Kunan kan *samana puncha. Mana
atipankichu llanchamaykita apanata.

¹¹Chay runaka aynirka:

Maykanmi ampiwashka paymi
rimawashka: Llanchamaykita
apishpayki riy nishpa.

¹²Chay runapa rimashkanta uyashpan-
kuna apunchikunaka tapurkakuna:

¹³Pita kanta rimashka: Llanchamaykita
apishpayki riy nishpa?

¹⁴Chay runaka mana yacharkachu
pimi karka chay payta ampił runaka.
Chaypi achka runakuna kashpokane
Jesuska payta ampişkanwasha
runakuna chawpipi yaykushpan manana
riksiyapanachu karka.

¹⁵Chay apunchikuna tapushkankuna-
washa Jesuska chay runata maskashpan
*Yaya Diospa wasinpi kahushkata
tarirka. Chaypi payta rimarka:

Uyaway, kunanka ña ampirishkanki.
Mana kuti uchata ruraynachu, mana
chay unkushkaykimanta ashwan
tukunaykipa.

¹⁶Chasna Jesús rimashpan chay
runaka apunchikunata rimak rirka:
Jesusmi ampiwashka nishpa.

**Jesuska rimarka yachayninka Yaya
Diosmanta kashkanta**

¹⁶Chasna Jesúس samananchi punchapi ampiškanrayku chay apunchikunaka payta wañuchinayarkakuna. ¹⁷Chaypi Jesuska rimarka:

Yayaynika mana samashpachu tukuy urasmi alikunata ruran. Ñukapas chasnallatataki ruran.

¹⁸Chayta uyashpankuna apunchikunaka piñarirkakuna. Payta wañuchinayarkakuna samananchi puncha mana rurananchipa kamachirishka kashkata mana kasushkanrayku. Chaymantapas ashwan wañuchinayarkakuna kikin Yayaynimi Yaya Dioska nishpa rimashpan ñukapas Yaya Diosmi kani nishpa rimahukshina tukushkanrayku.

¹⁹Jesuska rimarka:

Alita uyawaychi. Ñuka Yaya Diospa Wawanka, ñuka kikin munayka mana atipanichu nima imata ruranata. Yayaynipe rurahuskanta yachashpami tukuy uras chasnallatata ruran. Tukuy imatapas Yayaynipe rurahuskantashinnallami ñuka Wawanpas ruran.

²⁰Yayaynika ñukata yuyawashpanmi tukuy rurahuskanta riksichiwan. Chaymanta ashwan atun mana atipapakunatami ruranaynipe ñukata riksichiwanka kankuna rurashkaynikunata rikushpaykichi mancharishpa kiparinaykichi. ²¹Imashnami Yaya Dioska wañushkashina kawsak mana payta riksik runakunata kushilla paywa kawsayta kun, chasnallatataki ñuka Wawanpas chasna kawsayta kuni maykunkunatami munani. ²²Chaymantapas Yaya Dioska ñuka Wawantami tukuy yachayninta kuwashka runakunata tapunaynipe imashna kawsashkankunamanta, chaymantapas rimanaynipe pimi kastigarinka pimi wiñaypa paywa kawsanka nishpa. Pay kikinka manami

nima maykanta tapunkachu: Kanka ñimashnata kawsashkanki? nishpa. Ñuka Wawantami chasna ruranaynipe kamachiwashka. ²³Chayta ruranaynipesi payka yachayninta kuwashka, tukuy runakuna tukuy manta yachak kanaynita rikushpankuna paytashina kushichawanankunapa. Maykan runami ñuka Yaya Diospa Wawanta mana kushichinchu, chayka manami Yayayni Dios ñukata kay allpama kachawakta kushichinchu.

²⁴Alita uyawaychi. Maykan runami alita uyashpan rimashkaynita kasun, chaymanta Yaya Dios kachawashkanta kirin, paymi chay kirishkanmanta pacha wiñaypa Yaya Dioswa kawsanka. Chay runaka manami kastigarinkachu ashwan chay kastigarina kashkanmantami kishpichiy tukushkana wiñaypa Yaya Dioswa kawsanarpa. Paymi wañushkashina kashkanmanta kawsarishkashinana tukushka. ²⁵Alita uyawaychi. Kunanmanta pacha wañushkashina kahuk runakunaka ñuka Yaya Diospa Wawanpa shiminta uyankakuna. Maykunkunami uyashpankuna kasuwanahun, paykunaka chay kasushkankunamanta pacha wiñaypami Yaya Dioswa kawsankakuna. ²⁶Yaya Dioska wiñaypa kawsayyumi. Chaymantapas payllataki chay paypa wiñaypa kawsayninta kukmi kan. Ñuka Wawantapas kuwashka payshina wiñaypa kawsayyu kanaynipe, ñukapas chasnallatata paypa wiñaypa kawsayninta runakunata kunaynipe. ²⁷Chaymanta ñuka Wawanruna masikichi kashpayni Yaya Dioska yachayninta kuwashka payranti tukuy runakunata kawsashkankunamanta tapunaynipe, chaymantapas rimanaynipesi pimi kastigarinka pimi wiñaypa Yaya Dioswa kawsanka nishpa. ²⁸Kay rimahushkaynita uyashpaykichi ama yuyarishpa kipariychichu. Shuk

punchami tukuy wañushkakunaka pamparishkankunamanta churarishka kahushkankunamantapas uyankakuna ñuka Yaya Diospa Wawan kayahushkaynita paykunata.²⁹ Chay urasmi wañushkakunaka kawsarishpankuna llukshinkakuna pamparishkankunamanta churarishka kahushkankunamantapas. Kawsashpankunara alita rurashkakuntaka yaykuchishami wiñaypa Yaya Dioswa kawsanankunapa, mana alita rurashkakunataka kachashami wiñaypa parisinankunapa.³⁰ Yaya Dios kamachiwashpanmi rimani, kanmi kastigarinki, kanmi kishpinki nishpa. Ñuka munay manami atipaynimachu nima imata ruranata. Chasna Yaya Diospa munashkanshina rimashpayni chay rimashkaynika alillami kan. Ñuka kikin munashkaynitaka manami ruranichu ashwan Yaya Dios kay allpama kachawakpa munashkantami rurani.

**Jesuska apukunata yuyachirka
imamantami atipanahun yachanata
Yaya Diospa kachashkan kananta**

³¹ Jesuska apunchikunata yachachispalla katirka:

Ñukalla rimaynimaka Yaya Diosmanta kanaynita atipankichima ñukamanta rimanata llullachihumi nishpa.³² Mana ñukallachu chasna ñuka kikinmanta rimani. Yaya Diospas paymanta kanaynita riman. Yachani ñukamanta rimashkanka shutipami,³³ Juanma kacharkankichi ñukamanta yuyarishkanta tapunaykichipa. Paymi kankunata shutipata ñukamanta rimashka, Yaya Diospa Kachashkan Kishpichik nishpa.³⁴ Ñuka mana munanchu nima maykan runa ñukamanta rimananpa pimi kani nishpa. Chasna Juan ñukamanta yachachishkanta rimani kankunata yanapanaynipa, kirishpaykichi atun kastigumanta kishpinaykichipa.³⁵ Juanka shuk lámpara sintihushpan

punchayachikshina karka. Paypa rimashkanka amsata punchayachikshina kashpan payta uyashpaykichi shuk ratu kushikushkankichi.³⁶ Juan alita ñukamanta rimashpanpas rurashkaynikunaka Juanmanta ashwan pasatami rikuchinahun Yaya Diosmanta kanaynita. Runakuna Yaya Diospa kamachiwashkanta rurashkaynikunata rikushpankunami shutipa paypa kachashkan kanaynita riksinahun.

³⁷ Chaymantapas ñukata kachawak Yaya Dios kikinpas ñukamanta paypa kachashkan kanaynita riman. Shiminta kankunaka nima ima uras uyashkankichichu, nima payta rikushkankichichu imashnami kan nishpa.³⁸ Uyashkaykichi shiminta shunkuykichipi manami wakaychankichichu ñuka Yaya Diospa Kachashkan Runata mana kirishkaykichirayku.³⁹ Kankunaka tukuy uras Yaya Diospa shimin killkarishka kashkata yachakunkichi. Yuyarinkichi, chasna rurashpanchimi yachashunchi imashna rurashpami wiñaypa Yaya Dioswa kawsashunchi nishpa. Chay yachakuhushkaykichi killkarishkakunapi ñuka chay kawsayta kukmantami riman.⁴⁰ Chasna kashpanpas kankunaka manami munankichichu kasuwanata shutipa wiñaypa Yaya Dioswa kawsanaykichipa.

⁴¹ Kankuna mana munawashpaykichi-pas ñukarayku mana imananchu. Manami maskanichu runakuna kushichiwankunata.⁴² Kankunata riksishpaynimi yachani Yaya Diosta mana yuyak kanaykichita.⁴³ Yayayni Dios kikin kachawashpanmi ñuka shamushkani runakunata payta riksichinaynipa imashnami kan. Paypa kachashkan kashpaynipas kankunaka mana munawankichichu. Shuk runa pay kikin munay shamumaka chaytami shuti kankunaka munankichima.

⁴⁴ Kankunapura yapa munankichi shukta shukta kushichinakushpa kawsanata, kanka yachakmi kanki nishpa. Mana

ashwan maskankichichu shuklla Yaya Dios kankunata rimanarpa ali runami kanki nishpa. Chasna kashkaykichi-rayku manami atipankichichu kiriwanata. ⁴⁵Ñukaka mana rimak rishanchu Yayaynita kankunamanta mana kiriwashkakunachu nishpa. Moisesmi rimak rinka kankunamanta. Yanka yuyarinkichi Moisés wañupa killkashkanta paktachishkanchiraykumi wiñaypa kawsashunchi Yaya Dioswa nishpa. ⁴⁶Moisés shamunaynimanta killkashpan paypa killkashkanta kirinkichimaka ñukatapas kiriwankichimami. ⁴⁷Moisespá killkashkanta mana kirishpaykichimi ñukapa rimashkaynitas mana kirinkichichu.

Jesuska achka runakunata kararka

(Mt. 14.13-21; Mk. 6.30-44;
Lk. 9.10-17)

6 ¹Chaymanta Jesuska kutikashka ñukanchi runankunawa pakta Galilea allpapi kashpan chay Galilea kuchata chimparkanchi. Chay kuchapa shuk shutinka karka Tiberias kucha. ²⁻³Chaypi paktashpanchi shuk urkuma sikarkanchi. Chaypi tiyarirkanchi. Achka runakuna yaku mayanta muyurishpankuna ñukanchita katirkakuna. Atun yachaywa mana ampiyapa unkushkakunata Jesús ampishkanta rikushpankuna payta katirkakuna. ⁴Chay uras mana achka punchachu pishirka ñukanchi israel runakunapa *Paskua punchakuna kallarinanpa.

⁵Chay urkupi kahushpanchi Jesuska rikushpan achka runakuna payma shamuhukkunata rikurka. Chaypi Felipeta tapurka:

⁶Maymantataya kay tukuy runakunaryuka mikunata rantishunchi?

⁶Jesuska yachashpantata imashnami chay runakunata karanka, chasna Felipeta tapurka yachananpa tukuyta

atipak kashkanta yuyarinchu manachu nishpa. ⁷Chaypi Felipeka aynirka:

Achka kullkitami munanchima mikunata rantinanchipa chay tukuy runakunata karananchipa. Shuk runa pusak killapi ganashkan kullkiwa mikunata rantinchimaka nima chay paktamachu karan runata uchillastuta kunanchipa.

⁸Chaypi Jesuspa shuk runan Pedropa wawkin Andrés rimarka:

⁹Kaypimi tiyan shuk wawa. Paypa tiyan pichka pan nima imayukunapa mikunan trigumanta rurarishka, chaymantapas ishkay challwa. Kay uchillastuka imashi paktanka kay tukuy runakunaraykuka.

¹⁰Chaypi pastuyu allpa tiyahpan Jesuska aynirka:

Rimaychi kay runakunata tiyarinan-kunapa.

Kasushpankuna rimarkakuna tiyarinankunapa. Chaypi tukuy tiyarirkakuna. Karkakuna pichka waranka karikuna, mana yupashpa warmikunata nima wawakunata.

¹¹Chaypi Jesuska chay pankunata apishpan Yaya Diosta agradesirka. Chasna agradesishkanwasha chay pankunata paki paki rurashpan runakunata kurka mikunankunapa. Chasnallata challwatapas kurka saksakta mikunankunapa.

¹²Saksakta mikushkankunata rikushpan ñukanchi runankunata rimarka:

Tantaychi tukuy chay puchurishkakuna mana usunankunapa nishpa.

¹³Chaypina chay pichka panmanta puchurishkakunata tantarkanchi chunka ishkay tasa untakta. ¹⁴Runakunaka chasna atun yachaywa nima ima uras rikushkanchita Jesuspa rurashkanta rikushpankuna rimarkakuna:

Paymi kan chapahushkanchi Yaya Diospa yachayninwa yachachik Moisés

wañushina, maykanmi shamunan karka kay allpama nishpa.

¹⁵Jesuska chay runakuna payta mana munakta pushanayahushkankunata apunkunarayku musyashpan anchurirka. Kutikashka urku awama sikashpan sapallanna rirk'a.

Jesuska yaku awata purirka
(Mt. 14.22-27; Mk. 6.45-52)

¹⁶Chaymanta ña tutayahushpan ñukanchi Jesuspa runankuna kucha mayanma uraykurkanchi. ¹⁷Chaypi paktashpanchi ña tuta tukurka. Jesús ñukanchipi mana paktamushpan shuk botipi yaykurkanchi Kapernaum llaktama chimpananchipa. ¹⁸Chasna chay atun kuchata chimpahushpanchi yakuka yapa ulasyarka sinchi wayrawa. ¹⁹Ña chimpahushpanchi pichka sokta kilometro chawpillapi Jesusta rikuranchi yaku awata purishpa shamuhushkanta. Payta mana riksishpanchi mancharirkanchi. ²⁰Chaypi Jesuska ñukanchita rimarka:

Ñukami kani,^b ama manchariyichihu nishpa.

²¹Jesusta botipi yaykuchinayahushpanchi musyarkanchi ña paktashkanchita maymami chimpahurkanchi.

Runakuna Jesusta maskarkakuna

²²Chay panta mikuk runakuna chayllapi kiparirkakuna. Kayantima alita yuyarishpankuna panta mikushkankuna puncha shuklla boti chaypi tiyashkata yuyarirkakuna. Chaymantapas yuyarirkakuna ñukanchi Jesuspa runankuna sapallanchi chay shuklla botipi rishkanchita chaymanta Jesuska mana ñukanchiwa rishkanta. ²³Chasna yuyarihushkankunapi Tiberias llaktamanta achka botikuna paktarka-

kuna maypimi Jesús Yaya Diosta agradesishkanwasha panta mikurkakuna chay kuchupi. ²⁴Mana Jesusta nima ñukanchi runankunata rikuushpankuna chaypi tantarishka kahuk runakuna botikunapi yaykushpankuna Kapernaum llaktama chimparkakuna Jesusta maskanankunapa.

Jesuska shuk mikuna
wiñaypa kawsayta kukshina
kananta rimarka

²⁵Chay runakuna chimpapi paktashpankuna Jesusta tarirkakuna. Chaypi tapurkakuna:

Yachachik, ¿imashnataya shamushkanki kayma?

²⁶Jesuska mana aynishpa tapushkanunata rimarka:

Alita uyawaychi, kankuna aychaykichillata saksachinata munashpaykichi maskawankichi mikushkaykichirayku saksanaykichikama. Mana maskawankichchu atun yachaywa nima ima uras rikushkaykichita rurashkayniwa rikuchishkaynita asirtashkaykichirayku.

²⁷Ama maskashpa kawsaychichu tukurik mikunallata, ashwan maskaychi kankunata wiñaypa Yaya Dioswa kawsayta kuk mikunata. Chay mikuntami kuni ñuka Yaya Diospa Kachashkan Runa. Chasna kunaynipami ñukata kachawashka.

²⁸Chaymanta tapurkakuna:
¿Imatata rurananchi tiyan Yaya Diospa munashkanta rurananchipa?

²⁹Jesuska aynirka:
Sinchikuchi ñuka paypa kachashkan runapi. Chayllatami Yaya Dioska munan.

³⁰Chaypi tapurkakuna:
¿Maykan nima ima uras rikushkanchita atun yachaywa rurashpaykita

b Chay Ñukami kani nishkaka kan Yaya Diospa shuk shutin.

kirinchima Yaya Diospa kachashkan kanaykita? ¿Maykantaya ruranaykukanaka? ³¹Ñawpa yaya rukunchi wañukuna mana mikunata tariyapa chunlla chakishka allpapi purishpa kawsahushpankuna karan puncha silumanta manata saksakta mikurkakuna. Kasnami killkarishka kan:

Payka silumanta mikunata kacharka nishpa.

³²Jesuska aynirka:

Alita uyawaychi. Mana kashkachu Moisés, maykanmi yaya rukunchi wañukunata kushka silumanta mikunata. Yayaynillami silumanta mikunata kun, maykanmantami shutipa kawsankichi. ³³Chay mikuna, maykan-tami Yaya Dioska kun, chayka silumanta shamushkami, runakunata wiñaypa Yaya Dioswa kawsayta kukmi.

³⁴Chaypina paykunaka rimarkakuna:

Yachachik, chay mikunata ñukanchita tukuy uras kuy.

³⁵Jesuska aynirka:

Ñukami kani chay wiñaypa Yaya Dioswa kawsayta kuk mikunamanta rimahushkaynika. Ñukapi sinchikuk runakuna nima ima uras shunkunkunapi yarkaywashina kankakunachu chaymantapas nima ima uras yakuna-yaytashina musyankakunachu.

³⁶Kankunaka rikuwashpaykichipas ñukapi mana sinchikunayankichichu imashnami ña kankunata rimarkani.

³⁷⁻³⁸Tukuy maykunkunamantami Yayaynika rimashka ñukapa kanankunapa, paykunaka ñukapi sinchikunahun. Yayaynipa munashkanta rurashpa kawsahushpayni ñukapi sinchikuhukkunata manami rimashanchu kanta mana munanichu nishpa. Silumanta shamushkani ñukata kachawakpa munashkanta ruranaynipa. Mana shamushkanichu ñuka kikinpa munashkaynita ruranaynipa. ³⁹Ñukata kachawakmi munan

karan kuwashkan runata alita kuyranay-nipa. Mana munanchu nima shukta paykunamanta chinkachinaynipa. Ashwan munan paykunata kawsachi-naynipa mundu tukurinan puncha. ⁴⁰Munanmi tukuy ñukata rikushpan-kuna ñukapi kirik runakuna wiñaypa paywa kawsanankunapa. Mundu tukurinan puncha ñuka paykunata kawsachishami.

Jesuska apukunata silumanta mikunashina kananta rimarka

⁴¹Chasna rimashkanta uyashpankuna chaypi kahuk shuk apunchikunaka millaypata Jesusmanta rimarkakuna paykunapura. Payta piñarirkakuna ñuka kani silumanta mikunashina nishpa rimashkanrayku. ⁴²Paykunapura kwintarkakuna:

Paymi kan Josepa wawan Jesús. Riksinchaykuna yayanta mamantapas. ¿Imash-nataya nin silumantami shamushkani nishpa?

⁴³Jesuska paykunata rimarka:

Sakiychi chasna mana ali rimanyaki-chita. ⁴⁴Nima maykan atipanchu ñukapi sinchikushpa kasuwanata Yaya Dios ñukata kachawak mana yanapashpanka. Chay kasuwakkunataka kawsachishami mundu tukurinan puncha. ⁴⁵Yaya Diospa yachayninwa ñawpa yachachikpa killkashkanpi riman: Yaya Dios tukuy runakunata yachachinka nishpa. Tukuy maykunkunami Yaya Diospa yachachishkanta uyanahun yachakunahun, paykunami ñukapi sinchikushpa kasuwanahun. ⁴⁶Chayta rimashpayni mana rimayanichu shuk runa Yaya Diosta rikushkanta. Paytaka nima shuk runa rikushkachu. Ñuka Yaya Diosmanta shamushkallami payta rikushkani.

⁴⁷Alita uyawaychi. Maykan runami ñukapi sinchikun payka Yaya Diospa

kawsayninwami kan.⁴⁸Ñuka kani silumanta mikunashina chay Yaya Dioswa kawsayta kuk.⁴⁹Yaya rukunchikuna chunlla chakishka allpapi manata mikurkakuna. Chasna silumanta mikuna nishkunkunata mikushpankunatata wañurkakuna. Manami chay wiñaypa Yaya Dioswa kawsayta tarirkakunachu.⁵⁰Ñukaka kankunata rimani shuk mikunamanta. Maykanchari chay silumanta mikunata mikun wiñayparayku Yaya Dioswa kawsanka.⁵¹Ñukami kani chay silumanta mikunashina Yaya Dioswa kawsayta kuk. Maykanmi chay mikunata mikun wiñayparayku paywa kawsanka. Chay mikunaka kanmi ñuka kikinpa aychayni. Runakunarayku wañushpayni chayta kusha Yaya Dioswa kawsanankunapa.

Runakuna shutipa kawsayta
tarinahun Jesús paykunarayku
wañushkanta yawarnin
paykunarayku shuturishkata
kirishpankuna

⁵²Chasna uyashpankuna chay apunchikunaka shukwa shukwa rimankurkakuna paykunapura:

¿Imashnataya kay runaka kuma mikunanchipa pay kikinpa aychantaka? nishpa.

⁵³Chaypi Jesuska paykunata rimarka: Alita uyawaychi. Mana mikushpaykichika ñuka Yaya Diospa Kachashkan Runapa aychaynita, chaymantapas mana upyashpaykichika yawarnita manami shutipa kawsayyuchu kankichi.⁵⁴Maykan runami aychaynita mikun yawarnitapas upyan, payka shutipa kawsayyumi wiñaypa Yaya Dioswa kawsanarpa. Ñukami payta kawsachisha mundu tukurinan puncha.⁵⁵Ñukapa aychaynika shutipa mikunami, yawarnipas shutipa upyanami.⁵⁶Maykan

runami mikun aychaynita, upyan yawarnita, payka wiñaypami ñukawa pakta kawsan. Ñukapas paywa pakta wiñaypa kawsani.⁵⁷Tukuyta kawsayta kuk Yaya Dios ñukata kachawashka. Paymi ñukata kawsayta kuwashka ñukapas kunaynipa maykunkunami aychaynita mikunahun. Imashnami ñuka kawsani Yayaynimanta, chasnallatamai aychaynita mikukkuna kawsanahun ñukamanta.⁵⁸Kay aychaynika shutipa mikunami silumanta. Chay mikunaka manami kanchu yaya rukuykichi wañukunapa mikushpankunkuna manashina. Paykunaka mikushpankunatata wañurkakuna. Maykanmi silumanta shutipa mikunata mikun payka wiñayparaykumi Yaya Dioswa kawsanka.⁵⁹Chasna nishpa Jesuska runakunata yachachirka Kapernaum llaktapi tantarinanchi wasipi.

Jesuspa rimashkanka riksichin
imashnami mana tukurik Yaya
Dioswa kawsayta tarinchi

⁶⁰Chasna yachachishkanta uyashpankuna Jesusta achka katikkuna kwintarakuna paykunapura:

Chay yachachishkanta sinchimi kan. Plikunashi atipankakuna chayta kasunata.

⁶¹Jesuska musyashpan mana alita rimahushkunkunata tapurka:

¿Kay rimahushkaynillachu kankunata killachin?⁶²¿Imashnashi tukunkichima ñuka Yaya Diospa Kachashkan Runaka, maymantami shamushkani chaymallatata sikahushkaynita rikunkichimaka?

⁶³Kankunata rimani, Yaya Diospa Espiritunmi kan shutipa kawsayta kuk. Runakunaka manami atipanahunchu chay Yaya Dioswa kawsayta kunata. Yaya Diospa Espiritun yuyachiwashpanmi kankunata yachachini. Paymi runakunata rimashkaynita yuyachishpa Yaya Dioswa kawsay mana tukurikta

kun. ⁶⁴Kankunamanta shukkuna tiyan rimashkaynita mana kirikkuna.

Chasna Jesuska rimarka puntirumanta pacha yachashpan pikunami payta mana kasunkakunachu, chaymantapas pimi payta apichinka. ⁶⁵Jesuska rimash-palla katirka: Chayta yachashpayni kankunata rimarkani nima pi ñukapi sinchikushpa kasuwamachu Yaya Dios payta mana yanapashpanka.

⁶⁶Chasna rimashkanmanta pacha achka katik runakuna payta manana katirkakunachu. Kutirkakunana maymantami shamur-kakuna. ⁶⁷Chaypi Jesuska ñukanchi chunka ishkay runankunata tapurka:

¿Kankunapas ñukata sakiwanayankichiku?

⁶⁸Pedroka aynishpan rimarka:

Yachachik, nima pi tiyanchu ashwan katinanchipa. Kanllami ñukanchita rimanki imashnami Yaya Dioswa mana tukurik kawsayta tarinchi. ⁶⁹Ñukanchika rimashkaykita kirirkanchi chaymantapas yachashkanchi Yaya Diospa kachashkan munashkanllata rurak runa kanaykita.

⁷⁰Jesuska aynirkas:

Ñukami kankunata akllashkani chunka ishkayta runaynikuna kanaykipa. Ñuka kikin kankunata akllashka kashpaynipas shuk kankunamanta kuntrayni kanka, supayta kasuk.

⁷¹Chasna Jesuska Simón Iskariotepa wawan Judasmanta rimarka. Pay ñukanchiwa pakta chay chunka ishkay Jesuspa runankunamanta kashpanpas payta apichinan karka. Tukuy chayta Jesuska Kapernaum llaktapi ñukanchi israel runakunapa tantarinanchi wasipi yachachirka.

Jesuspa wawkinkuna paypi mana sinchikurkakunachu

7 ¹Chaymanta Jesuska Galilea allpapi shuk llaktama shuk llaktama purishpa yachachishpa kawsarka. Judea

allpama mana kutinayarkachu chaypi apunchikuna payta wañuchinata munahushkankunaryku. ²⁻³Karan wata ñukanchi israel runakuna tantaripayan-chi ñawpa yaya rukunchikuna chunlla chakishka allpapi purishpa kawsahush-kankunapi tampustukunapi kawsash-kankunata yuyarinanchipa. Mana achka puncha pishihushpan chay tampu shutiyu punchanchikunaryku wawkin-kuna Jesusta rimarkakuna:

Ama kay nima imata ruraypa allpapi kipariychu. Judea allpama riy tukuy kanta katikkuna yachaykiwa rurashkay-kikunata rikunankunapa. ⁴Riksirishka runa kanayashpaykika ama kaypi pakallahina yachaykiwa rurashkaykita rikuchiychu. Ashwan Jerusalén llaktama riy tukuy runakunapa rikushkankunapi ruranaykipa.

⁵Chasna rimarkakuna paykunapas mana kirishpankuna Yaya Diospa Kachashkan Kishpichik kananta.

⁶Chaypi Jesuska rimarka:

Rinayni punchaka manara paktarihunchu Yaya Dios manara rimawahushkan-rayku rinaynipa. Kankuna rinaykichi-paka ali kan ima punchapas. ⁷Kankunata Yaya Diosta mana kasuk runakunaka mana chikninahunchu. Ñukata shuti chikniwanahun mana alita rurahushkankunata paykunata rikuchi-hushkaynirayku. ⁸Kankunaka riychi chayma. Ñukaka kankunawa manami rishanchu. Yaya Dios mana rimawahun-rachu rinaynipa. ⁹Chasna rimashpan Jesuska Galilea allpapi kiparirka.

¹⁰Wawkinkuna tampu shutiyu punchakunaryku Jerusalén llaktama llukshishkankunawasha Jesuspas rirkapu ñukanchi runankunallawa. Mana rirkachu achka runakuna rikuhushkapi chayma rihushkanta mana yachanankunapa. ¹¹Apunchikuna apinayashpan-kuna payta maskarkakuna. Nima pi

paymanta yachashpan ¿maypita kahun chay runaka? nishpa payta maskarka-kuna tantarinapi. ¹²Tukuy runakuna Jesusmanta pakalla kwintarkakuna paykunapura. Shukkunaka rimarkakuna: Chay runaka ali runami kan nishpa. Shukkunaka mana ali runachu, runakuna-nata llullachikmi nishpa rimarkakuna. ¹³Apunchikunata manchashpankuna nima maykan paymanta rimarkachu achka runakunapa uyashkankunapi.

**Jesuska Yaya Diospa wasinpi
yachachirka**

¹⁴Chusku punchata Jerusalén llaktapi tantarishpa katihushkanchipi, chusku puncha pishihushpan tukurinanpa Jesuska *Yaya Diospa wasinpi yaykurka yachachinanpa. ¹⁵Yachachishkanta uyashpankuna apunchikuna mancharirkakuna paykunashina Yaya Diospa shiminta alita yachak kashkanrayku. Mana asirtashpankuna rimarkakuna paykunapura:

¿Imashnataya yachakushka kay runaka chasna alita yachachinanpa? Manaya ñukanchika payta yachachishkanchichu.

¹⁶Jesuska paykunata aynirka:

Yachachishkaynika mana ñuka yuyaynimantachu. Ñukata kachawakmi chasna yachachinaynipa kamachi-washka. ¹⁷Maykan runachari munan Yaya Diospa shiminta kasunata, paymi yachanka yachachishkaynika Yaya Diosmanta kananta, mana ñuka yuyaynimantachu. ¹⁸Maykan runachari pay kikinpa yuyaynimantachu yachachin, paymi munan runa masinkuna payta alita yachachinki nishpa kushichinankunapa. Maykanmi mana munanchu runa masinkuna pay kikinta kushichinankunapa, ashwan munanmi payta kachak Yaya Diosta kushichinankunapa, payllami shutipa kashkata yachachin,

mana runa masinkunata llullachinchu.

¹⁹Ñawpa yachachik Moisés wañupa killkashkanpi kankunata yachachin imashnami Yaya Dios munan kawsanay-kichipa. Chasna kashpanpas nima maykan kankunamanta yachachishkanta kasunkichichu. Chasna kankuna kikin mana kasukkuna kashpaykichi ¿imaraykutaya ñukata wañuchiwanayankichi?

²⁰Chaypina payta aynirkakuna: Kanka musparihunkimi ¿Pita kanta wañuchinayan?

²¹Jesuska paykunata rimarka: Shuk runallata *samana punchapi ampishkaynimanta ñukata piñariwankichi. ²²Yuyariyichi kankuna kikin ñawpamanta pacha rurahushkaykitchita. Moisespa killkashkan kamachishkata kasushpaykichi kari wawaykicipa ishpanan kara puntastuta pitinkichi pusak puncha wawayarishkanwasha. Samana puncha kashpanpas chayta rurankichi. Manara Moisés wawayarishpanra yaya rukunchi Abraham wañu kawsashkanmanta pacha tukuy israel runakuna chasna ruranchi. ²³Shuk kari wawa wawayarishkanwasha pusak puncha paktarishpan ishpanan kara puntastuta pitinkichilla samana puncha kashpanpas chasna pitinanchipa Moisespa killkashkan kamachishkata kasunaykicipa. Chasna rurashpaykichi samana puncha kashpanpas ¿imaraykutaya ñukata piñariwankichi samana punchapi shuk runata ampishkaynirayku? ²⁴Ama yanka shuk runamanta millaypata yuyariyichichu, ashwan yuyariyichi imashnami Yaya Dios munan yuyarinaykicipa.

**Jesuska rimarka
maymantami shamurka**

²⁵Chaypi shukkuna Jerusalenpi kawsakkuna tapunakurkakuna:

¿Mana kay Jesusta apunchikunaka wañuchinayashpa kawsanahun?

²⁶Chayka kaypi rimahun tukuy ñukanchikuna chawpinchipi. Nima maykan payta rimanchu. Apunchikunaka yuyarinahunchari shutipa chapahushkanchi Yaya Diospa Kachanan Kishpichik kananta.

²⁷Yachanchi Yaya Diospa Kachanan Kishpichik shamushpan nima pi yachankachu pikunami yayankunaka. Kay runamantaka yachanchi pikunami yayankunaka. Chasna kashpan ¿kay runa kamachu Yaya Diospa Kachashkan Kishpichik?

²⁸Jesuska *Yaya Diospa wasinpi yachachihushpan rimahushkankunata uyashpan sinchita rimarka:

Kankuna yuyarinkichi ñukata riksiwashkaykichita, chaymantapas pikunami yayaynikunaka. Ñuka kankunata rimani manami riksiwankichchu. Nima Yaya Dios ñukata kachawaktapas riksinkichchu. Payka manami nima pita llullachinchu. Chasna mana llullachik kashpanmi ñukata kay allpama kachawashka. Manami shamushkanichu ñuka kikin munay.

²⁹Chasna Yaya Dios ñukata kachawashpan ñukallami payta alita riksini paymanta kashkaynirayku. ³⁰Chayta uyashpankuna apunchikunaka payta apinayarkakuna. Chasna kashpanpas mana atiparkakunachu payta apinata. Manara Yaya Dioska munashkachu chay uras wañunanca.

Fariseokuna Jesusta apinayarkakuna

³¹Apunchikuna Jesusta wañuchinayashpanapas achka runakuna paypi sinchikurakakuna. Alita rimarkakuna paykunapura:

Yachanchi chapahushkanchi Yaya Diospa Kachanan Kishpichikka

shamushpan achka nima ima uras rikushkanchita rurashkanwa Yaya Diospa atun yachayninha kahushkanta rikuchinka. Manami tiyanchu ashwan yachak runaka kay Jesusmanta.

³²*Fariseokuna uyashpankuna

Jesusmanta rimahushkankunata

*saserdote kunapa apunkunawa pakta kacharkakuna *Yaya Diospa wasinta kuyrak runakunata paykuna Jesusmanta apinankunapa. ³³Chaypi Jesuska tukuy runakunata rimarka:

Mananami achka punchakunatanachu kankunawa kasha. Nami paktarihuñ ñukata kachawakma kutinaynipa.

³⁴Chayma rishpaynimi kankunaka maskawankichi. Chasna maskawashpaykichipas manami tariwankichichu. Kankunaka mana atipankichichu rinata maytami ñukaka risha.

³⁵Chaypi apunchikuna tapunakurkakuna paykunapura:

¿Maytataya rinma ñukanchi payta mana atipananchipa tarinata? ¿Rinkachu karuma maypimi shuk israel masinchikunaka kawsanahun chikan runakuna chawpipi chaypi mana ñukanchikunamanta runakunata yachachinarpa? ³⁶¿Imatata rimanayan kasna nishpan maskawashpaykichipas manami tariwankichichu, chaymantapas maymami ñukaka risha manami atipankichichu rinata nishpa?

Jesuska wiñaypa tukyarik yakutashina kunayan

³⁷Chay tantarinanchi tukurinan punchami tukuy chay punchakunamanta ashwan ali kan. Chay punchapi Jesuska kutikashka runakunapa puntanpi shayarishpan sinchita rimarka:

Maykan runami shunkunpi yakunayta musyahuk runashina kan, payka sinchikuchun ñukapi saksakta upyashkashina kushilla kananpa. ³⁸Maykanmi

ñukapi sinchikun, paymanta llukshin wiñaypa tukyarik shutipa kawsyta kuk yakushina imashnami Yaya Diospa killkachishkanpi riman.

³⁹Chaywa payka rimanayarka Yaya Diospa Espiritunmanta, maykantami ñukanchi paypi sinchikukkunata chaymanta kunan karka. Chay uras Jesuska manara wañushkarachu karka nima kawsarimushkarachu karka Yayanma kutinanpa. Chayrayku Yaya Diospa Espiritunta manara kacharkachu ñukanchipi kawsananpa.

Runakuna Jesusmanta mana shuk yuyayllawachu karkakuna

⁴⁰Jesuspa yachachishkanta uyashpan-kuna shuk runakunaka rimarkakuna: Kay runaka chapahushkanchi Moisés wañushina Yaya Diospa yachayninwa yachachikmi kan.

⁴¹Shukkunaka rimarkakuna: Paymi kan chapahushkanchi Yaya Diospa Kachanan Kishpichik. Chaymanta shukkunaka rimarkakuna: Mana, mana Yaya Diospa Kachanan Kishpichikchu kan. Chay Kishpichik kamaka manami shamumachu Galilea allpamanta. ⁴²Yaya Diospa killkachish-kanpi riman chay Kishpichik atun apunchi David wañupa miraymanta kananta. Chaymantapas riman Davidpa kawsashkan Belén llaktamanta kananta nishpa rimarkakuna mana alita Jesusmanta yachashpanguna.

⁴³Chay runakuna Jesusmanta mana shuk yuyaywallachu karkakuna. ⁴⁴Shuk-kunaka payta apinayarkakuna. Chasna kashpanpas mana atiparkakunachu apinata.

Israel runakunapa apunkuna Jesusta mana kirirkakunachu

⁴⁵Chaymanta chay Yaya Diospa wasinta kuyrakkuna Jesusta mana

apashpachu kutirkakuna *fariseoku-nama *saserdotekunapa apunkunama-pas. Chaypi paykunata tapurkakuna: ¿Imaraykutaya chay runataka mana apamushkankichichu?

⁴⁶Chay kuyrakkuna aynirkakuna: Payka yapa alita yachachikmi. Mana tiyanchu nima shuk runa payshina yachaywa rimakka.

⁴⁷Chaymanta chay fariseokuna rimarkakuna:

¿Kankunatapas chay runaka llullachishkachu? ⁴⁸Tukuy apunchikunamanta ñukanchi fariseokunamantapas mana tiyanchu nima shuk payta kirik.

⁴⁹Chay mana yachak runakunalla Moisés wañupa killkashkanta mana asirtakkuna kiranahun. Paykunami Yaya Diospa kastiganan runakuna kanahun.

⁵⁰Chaypi shuk fariseo Nikodemo shutiyu shuk tuta Jesusma rishkanrayku paykunata rimarka:

⁵¹Moisespa killkashkanta kasushpan-chi mana atipanchichu kastiganata shuk runata manara alita yachashpanchi imatami rurashka. Uchayu kananta alita yachashpanchirami payta kastiganchi.

⁵²Chaypi Nikodemota aynirkakuna:

¿Kanpaschu kanki Galilea allpamanta runa chasna rimanaykipa? Yaya Diospa shiminta yachakuy yachanaykipa mana nima shuk Yaya Diospa yachayninwa yachachik Galilea allpamanta tiyanchu nishpa.

⁵³Chasna kwintashkankunawasha tukuy kutirkakuna wasinkunama.

Mana ali kawsak warmita Jesusma pusharkakuna

8 ¹*Fariseokuna wasinkunama kutishpankuna Jesuska Olivos urkuma rirka. ²Kayantima pakarihush-kanpi *Yaya Diospa wasinma kutirka. Chaypi paktashpanchi achka runakuna payta kayllayarkakuna. Chasna payta

kayllayashpankuna tiyarirka yachachinpana. ³Chaypi Moisés wañupa killkashkanta yachachikkuna fariseokunawa pakta shuk warmita pushamurakunkuna shuk kariwa musayahukta tarishkankunata. Paktashpankuna churarkakunta tukuy runakuna rikunankunapa.

⁴Chaypi Jesusta rimarkakuna:

Yachachik, kay warmita tarishkanchi shuk kariwa musayahukta. ⁵Moisespakillkashkanpi riman chasna warmikunata rumiwa tuksishpa wañuchinan-chipa. ¿Kanka, imashnata yuyarinki?

⁶Chay mana ayniyapata tapurkakuna yapa munashpankuna payta apinata. Chasna tapushkankunata Jesuska aynima karka wañuchiichi nishpa, ñukanchikunata winsishka *romano apunchikunapa kamachishkanta mana kasumachu karka kasna nishkata: Israel runakuna mana atipanahunchu nima pita kastigashpa wañuchinata nishpa. Chaymantapas Jesuska llakichiyichi nishpa aynima karka, Yaya Dios Moisesta killkachishkanta mana kasumachu karka. Chayrayku chasna payta tapushpankuna mana uyashkashina kumurishpan makin wawawa allpapi killkarayarka. ⁷Paykuna mana sakishpankuna tapunata Jesuska shayarishpan rimarka:

Maykanmi kankunamanta ucha illakan, payra tuksichun puntiru rumiwa.

⁸Chaymanta kuti kumurishpan katirka allpapi killkashpa. ⁹Paypa rimashkanta uyashpankuna washapuralla llukshirkakuna. Puntiru rirkakuna rukukuna chaymanta musukunana. Tukuy llukshispankuna Jesús chay warmi puntanpi kahukllawana kiparirka.

¹⁰Chaypi Jesús shayarishpan chay warmita rikurka. Chaymanta tapurka:

Pani, ¿maypitaya kahunkuna chay runakunaka? ¿Nima shukchu kanta tuksinayashka?

¹¹Chay warmika aynirka:

Nima pi, yachachik.

Jesuska payta rimarka:

Chasna kashpanka ñukapas mana rimanichu kanta kastiganankunapa. Kunanka kutiy. Manana uchata ruraynachu.

Jesuska runakunarayku punchashina kananta rimarka

¹²Chaymanta Jesús kiparishpan *Yaya Diospa wasinpi kuti runakunata yachachirka kasna nishpa:

Ñukami runakunarayku punchashina kani. Maykankunami ñukata katiwanahun mana kawsankakunachu amsapishina Yaya Diosta mana riksishpa. Ñuka punchatashina riksiwashkankunaryku yachankakuna imashnami ali ruranakunaka Yaya Diospa rikushkanpi. Chasna ñukata riksiwashpankuna wiñaypa Yaya Dioswa kawsankakuna.

¹³Chaypi *fariseokunaka rimarkakuna:

Kanlla kan kikinmanta rimanki punchashina kanaykita, chayrayku rimashkaykika mana valinchu. Mana tiyanchu ashwan shuk chasnallatata kanmanta rimakka.

¹⁴Jesuska aynirka:

Ñuka yachani maymantami shamushkani maymami risha. Chayrayku ñukalla ñuka kikinmanta rimashpaynipas shutipami kan. Kankunaka manami yachankichichu maymantami shamushkani maymami risha. ¹⁵Kankunaka kikin yuyaykichikunamanta runa masikichikunata uchachinkichi. Ñukaka manami kawsanichu runakunata uchayu kanki nishpa. ¹⁶Runakunata rimashpaynipas uchayu kanki nishpa, rimashkaynika shutipami, manami yanka nishpachu kan. Chasna rimashpayni mana ñukallachu uchayu kanki nishpa rimani,

ashwan kachawak Yayayniwa pakta chasna rimanchi. Chayrayku rimashkaynika shutipami.¹⁷ Katihushkaykichi Moisés wañupa killkashkanpi kasna nin: Ishkay runa shuk runamanta apupa puntanpi chasnalla rimashpankunaka shutipa kan nishpa.¹⁸ Ñukamanta tiyan ishkay chasnalla rimakkuna. Ñuka kani shuk ñuka kikinmanta rimak, chaymanta Yayayni ñukata kachawak-pas chasnallatata ñukamanta riman.

¹⁹ Chasna Jesuska rimashpan tapurka-kuna:

¿Maypita kahun yayykika?

Jesuska aynirka:

Kankunaka nima ñukata nima Yayaynita riksinkichichu. Ñukata riksiwankichimaka Yayaynitapas riksinkichimami karka.

²⁰ Tukuy chayta Jesuska Yaya Diospa wasinpi yachachishpan rimarka. Payka kahurka maypimi kullkita churanankunaka karkakuna. Chaypi tukuy runakunapa rikushkunkunapi yachachishpan nima pi payta apirkachu, manara Yaya Dios munashkanrayku apinankunapa.

**Jesusta mana kirik runakuna
siluma mana rinkakunachu**

²¹ Chaymanta Jesuska kutikashka payta chiknik runakunata rimarka: Ñukaka kankunata sakishami. Rishpayni kankunaka maskawankichi, ¿maypitaya chay kishpichikka? nishpa mana tariwankichichu. Ashwan, wañushpaykichi uchaykichimanta mana llakichirishkachu wañunaykichi tiyan. Yaya Dioska ñukata mana kirishkaykichi-manta kankunata mana llakichinkachu. Chayrayku manami atipankichichu rinata maymami ñukaka risha.

²² Chayta uyashpankuna apunchikuna rimarkakuna paykunapura:

¿Imatataya rimanayan, maymami risha kankunaka mana atipankichichu

rinata nishpa? Rimanayanchari pay kikin wañuchirinayashkanmanta.

²³ Chaypi Jesuska rimarka:

Kankunaka kay allpamantami kankichi, ñukaka awamantami kani. Kankunaka uchayu runakunami kankichi, ñukaka mana uchayuchu kani.

²⁴ Ñukami kani wiñaypa kawsak Yaya Dios. Kankuna pay kanaynita mana kirishpaykichika Yaya Dios uchaykichikunamantaka manami llakichinkachu. Chayrayku kankunata rimashkani wañushpaykichi uchaykichikunamanta manami llakichirishkachu wañunkichi.

²⁵ Chaypi payta asikshina tapurka-kuna:

¿Pitaya kanki kanka?

Jesuska aynirka:

Kankunata shutipa kashkata rimash-paynipas mana kiriwankichichu.

¿Imaraykutaya kankunawa kwintani?

²⁶ Ñukapa tiyawan achka kankunamanta rimanaynipa, chasnaykichimanta kastigarishka kanaykichipa. Rimashkaynita mana kirishpaykichipas shutipami kan. Ñukata kachawak shutipata rimak kashpanmi rimashkaynika shutipami, paypa rimawashkanllata runakunata rimashkaynirayku.

²⁷ Chasna Jesús rimashpan apunchikuna mana asirtarkakunachu, pay ñukata kachawak nishpan Yayan Diosmanta rimashkanta.²⁸ Chayrayku Jesuska paykunata rimarka:

Kankuna kruspi alsawashpaykichi Yayayni Diospa Kachashkan Runata, chaypirami riksiwankichi ñuka Yaya Dios kanaynita. Chaymantapas yachankichi nima imata ñuka kikin yuyaynimanta rurashkaynita, ashwan Yayaynipa yachachiwashkanllata kasushkaynita.

²⁹ Ñukata kachawak tukuy uras ñukawa kahun. Mana nima ima uras sapallaynita sakiwashkachu, payta tukuy uras rurashkayniwa kushichishkaynirayku.

³⁰Chasna Jesuska rimashpan achka runakuna paypi sinchikurkakuna.

**Jesusta mana kirikkuna
manami Yaya Diospa
wawankunachu kanahun**

³¹Chaypi shuk apunchikunapas Yaya Diosmanta kashkanta yuyarishpankuna Jesús paykunata rimarka:

Rimashkaynita yuyarishpa kasushpa kawsaychi. Chasna kawsashpaykichi shutipa ñukata katiwakkunami kankichi. ³²Yachachishkaynita kasushpaykichika riksiwashpaykichimi shutipa kashkata rimak kanaynita. Chasna kanaynita riksiwashpaykichimi kishpichirishka kankichi manana shuk mana ali patronpa kamachishkanshina kawsanaykichipa llullakunata kirishpa.

³³Paykunaka aynirkakuna:

Ñukanchi kawsanchi kunkaylla yaya rukunchi Abraham wañupa miraymanta kashkanchirayku. Payshina shuklla Yaya Diosta kasushpanchi nima ima uras tiyashkachu shuk runa ñukanchita kamachik shamenunpa. ¿Imaraykutaya kanka rimanki ñukanchika kashunchi kishpichirishka? ¿Pimantataya kishpichirishka kanchima?

³⁴Jesuska paykunata aynirka:

Alita uyawaychi. Uchata rurashpa katishpaykichika uchata rurachikpa kamachishkanllatana ruranaykichi tiyan, mana munashpaykichipas. ³⁵Chasna shukpa kamachishkan kashpaykichi manami Yaya Diospa wawankunachu kankichi. Wawankunallami paywa wiñaypa kawsankakuna. Mana wawankuna kashpaykichika manami atipankichichu paywa wiñaypa kawsanata.

³⁶Ñuka Yaya Diospa Wawan kashpayni atipani kamachirishka kahushkaykichi-manta kankunata kishpichinata. Ñuka kankunata kishpichishpaynimi shutipa kishpichirishka kankichi.

³⁷Ñuka yachani ñawpa yaya rukunchi Abraham wañupa miraymanta kanaykichi-chita. Chasna kashpanpas kankunaka rimashkaynita mana uyanayashkayki-chirayku wañuchiwanayankichi. ³⁸Ñuka rimani maykantami Yayaynika rimawashka, kankunaka rurankichi maykantami yayaykichika riman.

³⁹Chaypi payta aynirkakuna:

Yaya rukunchi Abraham wañupa miraymanta kashpanchi payshina shuklla Yaya Diosta kasunchi.

Jesuska paykunata rimarka:

Shutipa Abrahamshina kankichimaka payshinami alillata rurankichima.

⁴⁰Abrahamka nima ima uras shuk alita rimak runata wañuchinayarkachu. Kankunaka Yaya Diosmanta uyashkayni shutipa kashkata rimak kashpaynipas wañuchiwanayankichi. ⁴¹Kankuna kankichi chikan yayayu. Rurankichi maykantami yayaykichika ruran.

Chaypi payta aynirkakuna:

Ñukanchipa yayanchika shukllami.

Yaya Diosllami yayanchika. Mana kanchichu shuk yayamanta wawakunashina.

⁴²Jesuska aynirka:

Yaya Dios yayaykichi kamaka ñukata yuyawankichimami paymanta kashkaynirayku. Pay kachawashpanmi shamushkani.

Manami shamushkanichu ñuka kikin yuyaynimanta. ⁴³¿Imaraykuta mana asirtankichichu rimahushkaynita? Kankunata rimani, manami asirtankichichu mana alita shiminita uyanayashkaykichi-rayku. ⁴⁴Yayaykichika supaykunapa apunmi. Paypa wawankuna kashpaykichi tukuy munashkanta ruranayankichi. Yaya Dios runata rurashkanmanta pacha supayka runata wañuchik kan. Tukuy shutipa kashkata piñarin shunkunmanta pacha llullachik kashkanrayku. Chasna shunkunmanta pacha llullachik kashpanmi llullallata riman. Paymi llullaysiki, tukuy

llullaka paymantami.⁴⁵Ñuka shutipa kashkata rimak kashpayni manami kiriwankichichu.⁴⁶¿Pita kankunamanta atipan uchata rurashkaynita rimak rinata? Nima pi atipanchu. Shutipa kashkata rimak kashpayni ¿imaraykuta mana kiriwankichichu?⁴⁷Maykan runami Yaya Diospa wawan kan, paypa shiminta kasummi. Kankunaka shiminta mana kasunkichichu mana paypa wawankuna kashkaykichi-rayku.

Ñawpa kawsak Abraham manara tiyashpanra Jesukristu ña tiyarka

⁴⁸Jesuspa rimashkanta uyashpankuna apunchikunaka payta rimarkakuna:

Ñukanchika alita rimanchi *Samaria allpamanta runashina kanki supay yaykushka nishpa.

⁴⁹Chaypi Jesuska aynirka:

Mana supay yaykushka runachu kani. Ashwan Yayaynita kushichishpallami kawsani. Chasna kashpaynipas kankunaka millaypallata rimawankichi.⁵⁰Ñuka mana maskanichu runakuna ali kanki nishpa rimawanankunapa. Chasna kashpanpas tiyan shuk maykanmi munan runakuna kushichiwanankunapa. Paymi shuk puncha rimanka rurashkaynika alichu manachu nishpa.⁵¹Alita uyawaychi, maykan runami rimashkaynita kasun, chayka manami wañunkachu.

⁵²Chaypi apunchikunaka aynirkakuna:

Yaya rukunchi Abrahamka wañurka, chaymantapas Yaya Diospa yachayninwa ñawpa yachachikkuna tukuy wañurkakuna. ¿Imashnataya kanka rimanki, maykan runami shiminita kasun, payka manami wañunkachu nishpa? Kunan shuti yachanchi supay yaykushka runa kanaykita.⁵³Yaya rukunchi Abraham wañurka. Yaya Diospa yachayninwa ñawpa yachachikkunapas tukuy wañurkakuna. ¿Kanka paykunamanta pasachu kanki? ¿Pi kanaykitataya yuyarinki?

⁵⁴Jesuska aynirka:

Rimaynimaka ñuka kikinmanta atun yachayyu kani nishpa, rimashkaynika manami valimachu. Yayaynimi chasna atun yachayyu kanaynita riman, maykantami kankunaka rimankichi Yaya Diosminchi nishpa.⁵⁵Chasna rimashpaykichipas payta mana riksinkichichu. Ñuka shuti payta riksini. Mana riksinichu nishpa rimaynimaka kankunashina llullaysiki kaynima.

Chasna payta riksishpaynimi shiminta kasuni.⁵⁶Ñawpa kawsak yaya rukunchi Abraham atunta kushikurka allpama shamunaynita rikunanta yachashpan. Shamushkaynita rikushpan kushikurka.

⁵⁷Chayta uyashpankuna apunchikuna Jesusta rimarkakuna:

¿Imashnataya ñawpa Abraham kawsashkanta rikushkanki? Manara kankichu nima pichka chunka watayu.

⁵⁸Jesuska paykunata aynirka:

Alita uyawaychi, Abraham manara wawayarishpanra ñuka chasnalla kawsa Yaya Dios karkani.⁵⁹Chasna Jesuska runa kashpanpas Yaya Dios kananta rimashpan rumikunata apirkakuna payta tuksishpa wañuchinankunapa. Chaypi Jesuska pakashpan *Yaya Diospa wasinmanta llukshirka.

Jesuska shuk wisku runata ampirka

9 ¹Jesuska *Yaya Diospa wasinmanta llukshishkanwasha ñukanchi runankunawa purishpan wawayarishkamanta pacha wisku runata rikurkanchi.

²Chaypi Jesusta tapurkanchi:

Yachachik, ¿imamantataya kay runaka wisku wawayarishka, yayankunapa uchanmantachu, pay kikinpa uchanmantachu?

³Chaypi Jesuska ñukanchita aynirka:

Chasna wisku wawayarishkanka mana kanchu pay kikinpa uchanmanta nima yayankunapa uchankunamantachu.

Payka wisku wawayarishka Yaya Dios atun yachayninwa ampiishpan runakunata rikuchinanpa.⁴ Kawsa kahushpanchira kachawak Yaya Diosta kasushpa kamachishkankunata rurananchi tiyan. Wañushkanchiwasha nima imata atipashunchichu ruranata.⁵ Yaya Diosta mana kasuk runakuna chawpipi kahushpaynira paykunarayku punchashina ali ruranakunata riksichikmi kani.

⁶Chasna rimashkanwasha Jesuska allpapi tyukashpan allpawa chapushpan wiskupa ñawinpi kakurka.⁷ Chaymanta rimarka:

Mayllakriy ñawikitia runakunapa rurashkan Siloé yaku tantarinapi. Chay Siloé ninayan kachashka. Chaypi mayllarik rirkta chay wiskuka. Mayllarishpan chay wiskuka ampirirka. Na rikushpanna wasinma kutirka.

⁸Chay kuchunpi kawsakkuna, ñawpa kullkitia tapuhuskanta rikukkunapas tapunakurkakuna:

¿Mana kay tiyarishpa kullkitia tapupayraka?

⁹Shukkunaka rimarkakuna:

Ari, paymi.

Shukkunaka:

Mana paychu, payshina rikurishpanpas nishpa rimarkakuna.

Chay wisku ampirishkaka rimarka:

Ari, ñukami kani.

¹⁰Chaypi payta tapurkakuna:

¿Imashnamantataya kunanka ña atipanki rikunata?

¹¹Paykunata aynirka:

Chay Jesús shutiyu runami llawsanta allpawa chapushkanwa ñawinipi kakushpan rimawarka: Mayllakriy runakunapa rurashkan Siloé yaku tantarinapi nishpa. Chayma rishpayni ñawinita mayllarkani, chay ratulla rikurkanina.

¹²Chaymantapas payta tapurkakuna:

¿Maypita chay kanta ampix runaka? Payka aynirka:

Mana yachanichu maypichari kahun nishpa.

Israel runakunapa apunkunaka wisku ampirishkata tapurkakuna

¹³⁻¹⁴Jesús llawsanta allpawa chapushpan *samana punchapi chay wiskuta ampirka. Chay puncha nima pi atipapayanchu imata ruranata. Chayrayku chay ampirishkata *fariseokunama pusharkakuna.¹⁵ Paykunapas payta tapurkakuna:

¿Imashnamantata kunanka atipanki rikunata?

Chay ampirishkaka aynirka:

Chay ampiwak runaka llawsanta allpawa chapushkanwa ñawinipi kakurka. Chayta mayllak rirkani. Kunanka rikunknami kani.

¹⁶Shuk fariseokunaka rimarkakuna:

Chay kanta ampix runaka manami Yaya Diomantachu mana samashkan-rayku samana punchapi.

Shukkunaka paykunamanta rimarkakuna:

Uchasapa kamaka mana ruranata atipamachu karka tukuy chay nima ima uras rikushkanchita atun yachaywa rurashkankunata.

Chasnamanta mana shuk yuyayllachu karkakuna.¹⁷ Kutikashka chay ampirishkata tapurkakuna:

Rimashkanki pay kanta ampiishkanta. Chasna kashpanka ¿imatata kanka yuyarinki paymantia?

Ñukaka yuyarini payka Yaya Diospa yachayninwa rurak runa kananta nishpa aynirka.

¹⁸Chaypi chay apunchikunaka mana kirishkakunachu ñawpa wisku kashkanta. Chayrayku yayankunata kayachirkakuna.¹⁹ Paktashpankuna paykunatas tapurkakuna:

¿Kayka kanchu kikin wawaykichi?

¿Shutipachu wisku wawayarirka? Chasna kashpan ¿imashnamantataya kunanka rikuk tukushka?

²⁰Chaypi yayankunaka aynirkakuna: Ari, kikin wawanchimi. Shutipami wisku wawayarirka. ²¹Mana yachanchichu imashnamantami rikuk tukushka, nima yachanchichu pimi payta ampiishka. Pay kikinta tapuychi. Ñami ruku kan. Paymi kankunata rimanka.

²²Chasna rimarkakuna manchashpankuna tantarinanchi wasimanta wichuy tukunankunata. Manara Jesús chay wiskuta ampiishpan apunchikunaka runakunata rimarkakuna: Maykan runakunami Jesusmanta rimanahun: Chapahushkanchi Yaya Diospa Kachanan Kishpichik kan nishpa, chay runakunatami tantarinanchi wasimanta wichushunchi. ²³Chayta yachashpankuna yayankunaka rimarkakuna: Pay kikinta tapuychi. Ñami ruku kan. Paymi kankunata rimanka nishpa. ²⁴Chaypi apunchikunaka wisku ampirishkata kayachirkakuna kuti shamunanpa. Paktamushpan rimarkakuna:

Kunan shuti Yaya Diospa puntanpi mana llullashpa shutipata rimay chay ampiwashka runa nishkaykimanta. Ñukanchi yachanchi chay runaka uchasapa kananta.

²⁵Chay ampirishka runaka aynirka: Mana yachanichu uchayuchu manachu nishpa. Nukaka yachanimi wisku kashkaynita, kunanka rikuninami.

²⁶Chaypi kutikashka payta tapurkakuna: ¿Imashnataya rurarka kanta ampinanpa wisku kashkaykimanta?

²⁷Chay wisku ampirishkaka aynirka: Ñami kankunata rimashkani. Rimashpaynipas manami kiriwankichichu. ¿Imaraykuta munankichi kutikashka rimanaynipa? ¿Kankunapas payta katinata munankichichu?

²⁸Chayta uyashpankuna yapa piñarishpa millaypata rimarkakuna. Chaymantapas rimarkakuna: Kanka kasunki chasna runata, ñukanchika ali yachachik Moisés

wañupa killkashkan Yaya Diospa kamachishkanllata kasunchi. ²⁹Moisesmanta yachanchi Yaya Dios payta rimashkanta. Chay runamantaka nima imata yachanchichu. Nima yachanchichu maymantachari shamushka.

³⁰Chay wisku ampirishkaka aynirka: ¿Imashnataya chasnaka kanka? ¿Ñukan-chimanta pasa Yaya Diospa shiminta yachakukkuna kashpaykichitatachu mana yachankichi maymantami shamushka chay ñukata mana atipapypata rurashpa ampiwashka runaka? ³¹Alita yachanchi Yaya Dioska mana uyanchu uchayu runakunataka, ashwan uyanmi, maykankunami payllata kushichishpa paypa munashkanta rurashpa kawsanahun. ³²Nima ima uras uyashkanchichu shuk runa wisku wawayarishka ampirishkanmanta. ³³Chay runa mana Yaya Diosmanta kamaka manami atipamachu karka kay mana atipapypata ruranata.

³⁴Chaypi shuk runa wisku wawayarishpan uchamanta chasna tukushkanta yuyarishpankuna payta rimarkakuna: Wawayarishkaykimanta pacha uchasapami kanki. Chasna kashpaykika ¿imashnataya ñukanchi yachachikkuntaka yachachinayanki?

Chasna rimashpankuna tantarina wasimanta wichurkakuna.

Yaya Diosta mana kasukkuna wiskushina kanahun

³⁵Chasna wichushkankunata yachashpan Jesuska payta maskanarpa rirka. Chay wisku ampirishkata tarishpan tapurka: ¿Sinchikunkichu Yaya Diospa Kachashkan Runapi?

³⁶Chaypina aynirka: Rimaway wawki, ¿pitaya chay runaka paypi sinchikunaynipa?

³⁷Jesuska aynirka: Ñami rikushkanki chay runataka, ñukami kani maykanwami kwintahunki.

³⁸Chaypina paypa puntanpi kunkurirka. Kunkurishpan rimarka: Kunan shuti kanpi sinchikuni shutipa Amuyni kanki.

³⁹Jesuska rimarka:

Ñukaka kay allpama shamushkani runakunata riksichinaynipa imashnami kanahun Yaya Diospa rikushkanpi. Tiyan shuk mana alita rurak runakuna wiskushina Yaya Diospa shiminta mana riksikkuna. Chay runakunata yachachishpa yanapashami alita rikuk runakunashina Yaya Diospa shiminta riksik tukunankunapa. Shuk runakuna tiyan alita rikuk runakunashina Yaya Diospa shiminta riksik kanankunata yuyarikkuna. Paykunaka shutipa wiskushinami Yaya Diospa shiminta mana asirtashpa kiparinkakuna.

⁴⁰Chayta uyashpanguna kuchunpi kahuk *fariseokunaka tapurkakuna: ¿Kanka rimankichu ñukanchipas wiskushina kahushkanchita?

⁴¹Jesuska paykunata aynirka:

Shuk wiskushina kankichimaka Yaya Diospa shiminta mana riksishpa, nima pi kankunamanta mana ali kashkaykichiha rimak rimmachu. Kankunaka mana asirtashpaykichipas rikuk runakunashina kanchi Yaya Diospa shiminta riksik nishpa rimankichi. Chasna yanka rimashkaykichirayku uchaykichika manana llakichiypanachu.

Jesuska runankunawa kawsan, imashnami shuk alita obehanta kuyrakka obehankunawa kawsan

10 ¹⁻²*Fariseokuna yuyarinahun runa masinchikunata yachachik Kashpanchi obehankunata kuyrak runashina paykunata kuyrak kanchi nishpa. Jesuska chasna yuyarishkunkunata riksishpan paykunata kasna yachachishpa katirka:

Alita uyawaychi. Rikuychi shuk kuyrak amuta obehankunawa.

Obehakunapa tiyan shuk samanankuna kincharishkaka shuk punkuyulla. Chay punkuta yaykuk runaka kikin kuyrakmi. Maykankunami mana chay punkuta yaykunahunchu, ashwan shuk partita sikashpa yaykunahun, chaykunaka kanahunmi shuwakuna. ³Chay samanankuna kincha punkupi tiyan shuk kuyrak runa. Payka chay obehankunata kuyrakraykulla paskan. Chay kuyrak runaka yaykushpan obehankunata karan shukta shutinkunapi kayan. Paypa shiminta uyashpanguna kushikushpa kasunahun riksishkankunaryku. Chay kuyrak runaka obehankunata kayashpan chushama llukshichin. ⁴Ña tukuy llukshishpanguna obehankunapa puntankunapi purin. Paykuna payta katinahun, shiminta riksishkankunaryku. ⁵Mana riksishkankunataka manami katinahunchu, ashwan paymanta mitikunahun, shiminta mana riksishkankunaryku.

⁶Chasna Jesuska rimashpan mana shutillatachu payta chiknik runakunata yachachirka. Paykunaka mana asirtarkakunachu imatami chay rimashkanwa yachachinayarka.

Jesuska shuk alita obehankunata kuyrakmanta rimashpan yachachinayan runankunata kishpichinanmanta

⁷Jesuska paykunata yachachishpalla katirka: Alita uyawaychi. Ñukami kani obehakunapa samanankuna kincha punkushina. ⁸Ñukamanta puntiru achka llullachishpa yachachikkuna shamushkakuna. Mana punkuta yaykushpanku-nami mana kanahunchu kikin obehankunata kuyrakkuna. Kanahunmi obehanta shuwakunashina. Runakunata llullachishpa chinkachinahun. Obehay-nikunaka ñukata alita riksiwashpanguna manami paykunataka kasushkakunachu.

⁹Ñukami kani obebakunapa samanakuna kincha punkushina. Maykankunam iaykunahun, paykunataka wañuymanta kishpichishami. Chasna alita wakaycharishka tukushpankuna mana manchashpa yakyunahun llukshinahun, tukuy munashkankunata kushilla kawsanankunapa tarinahun.

¹⁰Obehata shuwakunaka shamunahun kichunapa, wañuchinapa, chinkachinapa. Chasnashinami mana alita yachachikkunaka runakunata ruranahun. Ashwan ñukaka shamushkanimi runakunata mana tukurik nima ima uras riksishkankuna shutipa kawsayta kunaynipa. ¹¹Ñukami kani alita obebakunata kuyrak runashina. Ali kuyrak runaka obebakunata yapa yuyashpan wañushanpas paykunata kishpichinaynipa nishpa wañuma. ¹²Maykanmi kullkita ganananllapa obebakunata kuyran, payka puma shamuhushpan sakin. Paykunamanta mitikun, mana kikin amun kashkarayku. Pumaka obebakunata apinapa shamuhushpan paykunata shikwachin tukuy partima. ¹³Chay kuyrakka mitikun, kullkita ganananllapa kuyrahushkanrayku. Mana obebakunata kuyranchu, paykunata yuyashkanrayku.

¹⁴Ñukami kani runaynikunarayku shuk alita obebakunata kuyrak runashina. Riksinimi pikunami runaynikunaka. Karan shukta yuyashpayni alita riksini. Chasnallatatami runaynikunapas alita ñukata riksiwanahun. ¹⁵Imashnami Yayayni Dios ñukata riksiwan, chaymantapas imashnami ñuka payta riksini, chasnallatatami ñukapas runaynikunawa alita riksinakuni. Paykunata kishpichinaynipami wañusha. ¹⁶Chaymantapas imashnami obebakunata kuyrak runapa tiyama chikan obebakuna shuk parti shuk kinchapi, chasnashinami ñukapapas

shuk parti tiyawan shuk runaynikuna mana israel runakunamantachu.

Paykunatapas yachachinayni tiyan kasuwanankunapa. Yachachishkaynita uyashpankuna kasuwankakuna. Tukuy partimanta runaynikunata tantachinayni tiyan tantaylla kawsanankunapania ñuka sapallana kuyrak kanaynipa.

¹⁷⁻¹⁸Paykunata kishpichishpa wañusha. Wañushkaynimanta kawsarisha. Nima pi atipawankachu wañuchinata, ashwan ñuka kikin munay wañusha. Chasnallatamia ñuka kikin munay kawsarimusha. Yayayni Diosmi kachawashka chasna wañunaynipa chaymantapas kawsarimunaynipa. Chasna payta kasuhushkaynirayku ñukata yapa yuyawan.

¹⁹Chasna Jesuspa rimashkanta uyashpankuna apunchikunaka kutikashka mana shuk yuyaywallachu karkakuna. ²⁰Achka rimarkakuna:

Kay runaka supay yaykushka muspa runami kan. Mana valinchu payta uyananchipa.

²¹Shukkunaka rimarkakuna:

Nima maykan runa supay yaykushka kamaka payshina rimamachu. Chasna supay yaykushka runa kamaka mana atipamachu karka wiskuta ampinata.

Jesuska Yaya Diospa Wawan kananta rimarka

²²⁻²³Chiri killakuna paktashkan uras Jerusalén llaktapi shuk tantarina tiyarka. Tantarishka kahurakuna kushikushpa yuyarinankunapa *Yaya Diospa wasinta kuntrankuna ñawpa urmachishkankunamanta kuti alichashkunkunata. Jesuspas Jerusalenpi kahurka. Yaya Diospa wasinpimi karka punku mayanpi Salomón shutiyu wasipi. Chiri kashpan chaypi puririrka.

²⁴Chaypi apunchikuna payta muyukta shayarishpankuna tapurkakuna:

¿Imaraykuta mana kuskata rimankichu pimi kanki? Yaya Diospa Kachashkan Kishpichik kashpaykika ñukanchita kuskata rimay.

²⁵Jesuska paykunata aynirka:

Ñami kankunata rimashkani, manami kiriwankichichu. Yayayni atun yachayninta kuwashkanrayku rurahushkaynikunata rikushpaykichi atipankichi yachanata pimi kani. ²⁶Kankuna mana munankichichu kiriwanata, mana obehaynikuna kashkaykichirayku.

²⁷Obehaynikunaka shiminita riksina-hun. Ñukapas paykunata riksiniimi. Paykunata kayashpayni katiwanahun.

²⁸Ñuka paykunata Yaya Dioswa mana tukurik kawsayta kuni. Manami rinkakunachu ñukamanta anchurishka wiñaypa parisinankunapa. Nima pi atipanchu ñukapi kirikkunata kichuwanata. ²⁹Yayayni paykunata kuwashka. Nima pi paytaka atipanchu kichunata tukuymanta ashwan atun yachayyu kashkanrayku. ³⁰Ñukapas Yayayniwa tukuypi shuk yuyayllawa parihu yachayyu kanchi.

³¹Chasna Jesús rimashpan kutikashka apunchikunaka rumikunata apirkakuna payta tuksishpa wañuchinankunapa.

³²Chasna wañuchinayahushkankunapi Jesuska paykunata rimarka:

Kankuna rikushkankichi Yayaynipa yachayninwa alikunata rurashkaynita. ¿Maykan chay ali rurashkaynikunaman-tata wañuchinayawankichi?

³³Chaypi apunchikunaka aynirkakuna:

Manami kanta rumiwa wañuchinaya-hunchichu alita rurashkaykimanta. Kanta wañuchinayahunchimi runa kashpaykitata Yaya Diosmi kani nishpa rimashkaykirayku. Chasna tukuy runakunamanta pasa Yaya Diesshina kanayashpaykimi kanta wañuchinaya-hunchi.

³⁴Chaypi Jesuska aynirka:

Alita yuyariyichi yachakushkaykichi ñawpa Yaya Diospa killkachishkanta. Chay killkachishkanpi apunchikuna wañuta kasna nin:

Kankunata rimani ñukashina dioskuna kanaykichita.

³⁵Yaya Dios kikin chasna rimashpan nima pi atipanchu rimanata mana ali kananta. Chay runakunamanta akllashkan apukuna wañuta rimarka payshina kanankunata. ³⁶Ñuka paykunamanta pasa kani Yayayni Dios ñukallata akllashkanrayku kay allpama kachawanapta tukuy munashkanta paktachinay-nipa. Runakunamanta akllashkan apunchikuna wañuta rimashpan payshina kanankunata, ashwan atipani ñuka rimanata Yaya Diospa Wawanmi kani nishpa. ¿Imaraykuta chasna rimashpayni piñariwankichi millaypata rimanki nishpa? ³⁷Yayaynipa kamachiwashkanta mana rurashpaynika chay uras shuti ama kiriwaychichu Yayayni Diospa kachashkan kanaynita.

³⁸Yayayni Diosmanta kani rimashpayni mana kiriwashpaykicipas Yayaynipa kamachishkanta rurashkaynita rikushpaykichi kiriwaychi Yaya Diospa kachashkan kanaynita. Chasna rikushkaykichirayku kiriwaychi yachanaykicipa ñuka Yayayniwa, Yayayni ñukawa shuk yuyayllawa kahushkanchita.

³⁹Chasna rimashpan Jesusta kutikashka apinayarkakuna. Chaypi paykunamanta payka kishpimurka.

⁴⁰Chasna kishpishkanwasha Jordán yaku chimpama kutirka maypimi Juanka bawtisapayarka. Chayllapi kiparirka. ⁴¹Achka runakuna payta rikuk shamurkakuna. Chaypi rimarkakuna paykunapura:

Juanka mana rurapayarkachu atun yachaywa nima ima uras rikushkanchi-

kunata kay Jesusshina. Chasna kashpanpas tukuy kay runamanta rimashkanka shutipami.

⁴²Chaypi achka runakuna Jesusta kirik tukurkakuna.

**Jesuska rimarka Lasaropa
wañushkanpi Yaya Diospa atun
yachayninta rikuchina
kashkanmanta**

11 ¹Tiyarka Jesuspa shuk yuyashkan runa Lásaro shutiyu. Payka sinchita unkushka karka. Ishkay paninkunawa pakta Judea allpapi kahuk Betania llaktapi kawsarka. Paypa paninkunaka karka Marta shukka Maria. ²Chay Mariami masna punchakunamanta Jesuspa chakinpi talina karka mishkinlla asnak perfumita, chaymanta chukchanwa chakichina karka paypa chakinta. ³Lásaro unkushka kashpan chay paninkunami shuk runata kacharkakuna Jesusta kayak shamunanpa: Kanpa kikin amiguyki Lasaromi wañuhun nishpa. ⁴Chayta yashpan Jesuska aynirka:

Chay amiguynika manami unkushkachu wañunanpa, ashwan Yaya Dios atun yachayninta rikuchinanpami, chaymantapas ñuka Yaya Diospa Wawan atun yachaynita rikuchinaynipa.

⁵⁻⁶Jesuska Lasarota paninkunanti yapa yuyashpanpas Lásaro unkushka kashkanta yakashpan mana utkallachu chayma rirkta. Chay kahushkanllapi ishkay puncha ashwan kiparirkta.

⁷Chaymanta ñukanchi paypa runankunata rimarka:

Akuychi kutikashka Judea allpama rishunchi.

⁸Chaypi payta rimarkanchi:

Yachachik, Judea allpapi apunchikuna kanta rumiwa tulkishpa wañuchinayashkakuna. Ama kuti chayma ryichu.

⁹⁻¹⁰Jesuska aynirka:

Karan shuk punchapa tiyan chunka ishkay uras. Chunka ishkay uras manara pasashpanka manara tutayanrachu. Chasnashinami Yayayni Diospa munashkanta manara paktachihushpaynika ñukata mana wañuchiwankakunarachu. Punchapi purihushpaykichi mana takarinkichichu, punchayachik rikuchihushkanrayku. Tutapi purihushpaykichi takarinkichimi, mana puncha tiyashkanrayku. Chasnashinami ñukata katiwashpaykichi Yaya Diospa munashkanta rurashpa punchapi purihukshina alita kawsankichi. Mana ñukawa pakta kawsashpaykichika amsapishina purishpa pantankichi.

¹¹Astalla unaystumanta rimarka:

Chay amigunchi Lasaroka samahumi, atarichik rishara.

¹²⁻¹³Jesuska wañushkata samahumi nishpa rimarka. Ñukanchi yuyarirkanchi kawsa runa puñuhuktashina. Chayrayku aynirkanchi:

Yachachik, puñuhushpanka ampirinkami.

¹⁴Chaypina Jesuska ñukanchita kuskata rimarka:

Lasaroka ña wañushkami. ¹⁵Yapa munashpayni ashwanta yachakunaykipacha ñukapi sinchikunata, kushikunimi wañuhushpan mana chaypi kashkaynirayku. Kunanka akuychina payta rikuk rishunchi.

¹⁶Chaypi chay chunka ishkay Jesuspa runan masinchi Tomás, maykantami rimapayarkakuna ishkay wawayarishka, ñukanchita rimarka:

Akuychi, ñukanchipas rishunchi yachachikwa pakta wañunanchipa.

Jesuska Lasarota kawsachirka

¹⁷Betania llaktama rishpanchi shukkuna Jesusta rimarkakuna ña chusku puncha Lasaropa aychanka urku

uchkupi taparishka kahushkanta.

¹⁸Chay Betania llaktaka karkami

Jerusalén kuchupi chawpi ura purishpa.

¹⁹Achka israel masinchikuna Jerusalenmanta rirkakuna Martata Mariata turin wañushkanmanta llakihushkankunapi sinchikuchinankunapa. ²⁰Marta Jesuspa paktahuskanta yachashpan tinkunapa shamurka. Mariaka wasillapi kiparirka mana yachashpan Jesús paktahuskanta. ²¹Chaypina Martaka Jesusta tinkushpan rimarka:

Yachachik, kan kaypi kankima karka, turinika mana wañumachu karka.

²²Kunanpas yachani Yaya Dios tukuy tapushkaykita rurananta.

²³Chaypi Jesuska Martata aynirka:

Turikika kuti kawsarinkami.

²⁴Chaypi Martaka rimarka:

Ari, yachani kay mundu tukurihushpan turinika tukuy wañushkakunawa pakta kawsarimunanta.

²⁵Jesuska aynirka:

Ñukami kani wañushkakunata kawsachik, runakunata wiñaypa Yaya Dioswa kawsayta kuk. Maykan runami ñukapi sinchikun, payka wañushpanpas kawsanmi. ²⁶Maykan runami ñukapi sinchikushpa kawsan, payka wañushpanpas nima ima uras ñukamanta anchurishka kankachu. ¿Kirinkichu kay rimashkaynita?

²⁷Martaka Jesusta aynirka:

Ari, kirinimi chapashkanchi Yaya Diospa Kachanan Kishpichik kanaykita. Yaya Diospa Wawanmi kanki, maykamtami Yaya Dios rimarka kay allpama shamanunta.

²⁸Chasna rimashkanwasha Martaka ñañan Mariata kayak rirkta. Alimanta rinkrinpi rimarka:

Ñukanchita yachachikmi shamuhun, kantami kayahun.

²⁹Chasna rimashkata uyashpanlla utkalla atarirka Jesusma shamunanza.

³⁰Jesús ñukanchi runankunawa manara chay llaktankunapi paktahurkanchira-chu. Maypimi Martaka ñukanchita tinkuk shamurka chayllapi karkanchi.

³¹Chay wasinpi Jerusalenmanta israel masinchikuna Mariata llakihushkanpi sinchikushpa kahurkakuna. Kallpa rishkanta rikushpankuna yuyarirkakuna Lasaropa aychanta churashkankuna uchkuma wakanarpa rihuskanta. Chasna yuyarishpankuna payta katirkakuna. ³²Chasna Mariata katihushpankuna paywa pakta Jesusta tinkuk shamurkakuna. Chaypi Mariaka Jesuspa puntanpi kunkurishpan rimarka:

Yachachik, kan kaypi kankima karka, turinika mana wañumachu karka.

³³Jesús Mariata paywa pakta kahuk runakunata wakahushkankunata rikushpan llakirirka, wañuya shunkunpi piñarirka. ³⁴Chaypina paykunata tapurka:

¿Maypita payta churashkankichi?

Paykunaka aynirkakuna:

Chaypimi churashkanchi. Akuychi rikuk rishunchi.

³⁵Chasna rimashpankuna Jesús paykunawa pakta llakirishpan wakarka.

³⁶Wakahushkanta rikushpankuna paykunapura rimarkakuna:

Rikuychi maytukuytata Lasarota yuyarka.

³⁷Shukkuna rimarkakuna:

Pay ampirka wisku wawayarishkata. Lásaro manara wañushpanra ¿imaray-kutaya mana ampishkachu?

³⁸Lasaropa aychanta churashkankuna uchkupi paktahushpanchi Jesús kutikashka shunkunpi wañuya piñarirka. Chay churashkankunaka karka shuk urku uchkupi. Punkunka atun rumiwa taparishka karka. ³⁹Chaypi Jesuska runakunata rimarka:

Anchuchiychi chay punkuta tapak rumita.

Chayta uyashpan wañushkapa panin Martaka rimarka:

Yachachik, kunanka ña millaypata asnan, ña chusku puncha chay uchkupi kahushkanrayku.

⁴⁰Chaypina Jesuska rimarka:

Ña kanta rimashkani, ñukapi sinchikushpayki Yaya Diospa atun yachayninta rikunkimi.

⁴¹Chayta uyashpankuna shukkunaka chay uchku punkuta tapak rumita anchuchirkakuna. Jesuska siluma rikushpan rimarka:

Yayayni, kanta agradesinimi tapushkaynita uyashkaykirayku. ⁴²Yachaniami tukuy uras tapushkaynita ruranaykita. Chasna yachashpaynipas sinchita rimashpa kanta agradesishkani kay runakuna uyanankunapa. Yapa munani kachawashkaykita kirinankunapa.

⁴³Chayta rimashkanwasha Jesuska sinchita kayarka:

¡Lásaro, llukshimuy chay uchcumanta!

⁴⁴Chay wañushkaka llukshimurkana. Paypa makin chakin pillurishka karkakuna ñaño llachapawa, uyan pillurishka karka llachapawa. Chaypina Jesuska rimarka:

Paskaychi pillurishkanta rinanpa.

**Apukuna Jesús tukuy
runakunaranti wañunanpa
kwintarkakuna**

(Mt. 26.1-5; Mk. 14.1-2; Lk. 22.1-2)

⁴⁵Chasna Lasarota kawsachishkanta rikushpankuna Mariawa pakta achka shamushka israel masinchikuna Jesuspi sinchikurakuna. ⁴⁶Shukkunaka *fariseokunama rirkakuna tukuy Jesuspa rurashkanta kwintanankunapa.

⁴⁷Chasna rimashkankunata uyashpankuna *saserdotekunapa apunkunaka tukuy paykunawa pakta tantaylla yuyarishpa kwintak atun apunchikunata

kayachirkakuna tantarinankunapa.

Tantarishpankuna paykunapura

Jesusmanta kwintarkakuna:

¿Imatataya rurashunchi? Chay runaka atun yachaywa achka nima ima uras rikushkanchikunata rurahu. ⁴⁸Shuk imata rurananchi tiyan manana chaykunata rurashpa kawsananpa. Chasna rurashpa katishpanka tukuy runakunami payta kasunkakuna, Yaya Diospa Kachashkan Kishpichikmi kuntranchikunamanta kishpichinanpa nishpa. Chasna kashpan ñukanchikunata winsishka *romano runakuna piñarishpankuna waklichinkakuna *Yaya Diospa wasinta, chaymantapas wañuchinkakuna tukuy ñukanchi israel runakunata. ⁴⁹Chay wata Kaifaska saserdotekunapa atun apu kashpan tukuy chay apunchikunamanta ashwan atun apumi karka.

Chaypi payka chay shukkunata rimarka:

Kankunaka nima imata yachankichi-chu. ⁵⁰Yuyariychi, ashwan ali kama shuk runalla tukuy runakunaranti wañunanpa, mana tukuy ñukanchi israel runakuna wañunanchipa.

⁵¹Chasna rimashkanka mana pay kikin yuyaynimantachu karka. Chay wata saserdotekunapa atun apu kashpan Yaya Dios payta yuyachirka Jesús ñukanchi israel runakunaranti wañunanmanta rimananpa. ⁵²Chaymantapas yuyachirka manami ñukanchi israel runakunarantillachu wañunanmanta rimananpa, ashwan wañushpan tukuy partimanta Yaya Diospa wawan-kunata shuk ayllullataschina rurananta rimananpa. ⁵³Chasna Kaifás rimashkankunanta pacha apunchikuna shuk yuyayllawa yuyarirkakuna imashnami ima urasmi Jesusta wañuchichinkakuna.

⁵⁴Chayta yachashpan Jesuska manana purirkanachu achka israel masinchikuna rikushkankunapi. Ñukanchiwa pakta chay llaktakunamanta llukshirka. Shuk

llakta Efraín shutiyuma rirkanchi. Chay llaktaka chunlla chakishka allpa mayanpi karka. Chaypi kiparirkanchi.

Runakuna Jesusta Jerusalenpi maskarkakuna

⁵⁵Ñukanchi israel runakunapa *Paskua punchakuna kuchupi kashpan achka llaktakunamanta israel masinchikuna Jerusalén llaktama rirkakuna tantarinankunapa. Chay tantarina manara paktarihushpanra paktarkakuna Yaya Diospa kamachishkanshina alicharinankunapa. Mayllaripayanahun atipanankunapa yaykunata chay tantarinapi. ⁵⁶Chaypi kashpankuna Jesusta maskashpa purirkakuna. *Yaya Diospa wasinpi tapunkushpa kahurkakuna paykunapura:

¿Imashnata kankunaka yuyarinkichi Jesusmanta, shamunkachu kay tantarinapi manachu?

⁵⁷Puntiru paktashpankuna *fariseokuna *saserdotekunapa apunkunapas kamachirkakuna, maykan runapas Jesusta rikushpanka rimak rinankunapa apinankunapa payta.

Maria mishkinlla asnak perfumita Jesuspi talirka

(Mt. 26.6-13; Mk. 14.3-9)

12 ^{1*}Paskuarayku sokta punchapishihushpanra Jesuska ñukanchiwa pakta kuti Betania llaktama rirkka. Chay llaktapi Lasaroka kawsarka, maykantami Jesuska wañushka kashkanmanta kawsachirka. ²Payta kawsachishkanrayku Jesuspa amigunkuna shuk atun mikunata rurarkakuna payta kushichinankunapa. Chaypi tantarishpanchi Martaka mikunata churanata yanaparka. Lásaro chaypi ñukanchiwa pakta mikuhurka.

³Chasnapi Mariaka apamurka shuk butilla perfumita yapa chaniyuta. Chay

perfumika nardo shutiyu anku yaku karka. Chayta talirka Jesuspa umanmanta chakinkama. Chasna talishpan chakichirka chukchanllawa. Tukuy wasi mishkihlla asnarka.

⁴Chaypina chay Jesuspa chunka ishkay runan masinchi Judas Iskariote, maykanmi payta apichina karka kasna rimarka:

⁵¿Imaraykuta chay perfumita mana kimsa pachak denariospi rantichishkanchichu? Apinchima karka maykantami shuk runaka shuk watata tarawashpan ganan, chay kullkiwa mana imayu runakunata yanapananchipa.

⁶Judaska mana chayta rimashkachu mana imayu runakunata yanapananpa. Chayta rimashkami pay kikin kullkiti shuwanata munashkanrayku. Kullkinchita wakaychak kashpan wakaychana kahamanta shuwapayan. ⁷Jesusa paypa rimashkanta uyashpan rimarka:

Ama chay panita chasna rimaychu. Payka wakaychashkami talinarpa wañunayni kuchupi kashkanrayku. ⁸Nima imayu runakunaka tukuy urasmi kankunawa kawsankakuna. Ñukataka mananami tukuy uras rikuwankichinachu.

⁹Israel masinchikuna Jesús Betaniapi kahushkanta yachashpankuna chayma shamurkakuna. Mana shamurkakunachu Jesussllata rikunankunapa, ashwan Lasarotapas rikunankunapami shamurkakuna, maykantami Jesús wañushka kashkanmanta kawsachirka. ¹⁰Achka runakuna Lasarota rikunapa shamushpankuna *saserdotekunapa apunkunaka yuyarirkakuna Lasarotapas wañuchinanata. ¹¹Jesús Lasarota kawsachishkamantami achka israel runa masinchikuna Yaya Diospa Kachashkan Kishpichik kananta kirirkakuna. Chasna kashpan chay apukuna Lasarotapas wañuchichinayarkakuna.

Runakuna Jesusta Jerusalén
llaktapi atun aputashina
yaykuchirkakuna
(Mt. 21.1-11; Mk. 11.1-11;
Lk. 19.28-40)

¹²Chay kayantima Jesuska rihurka Jerusalén llaktama. Achka runakuna *Paskua tantarina punchakunarayku chaypi kahushpankuna Jesús pakta hushkanta yacharkakuna.

¹³Chaypi chipati pankakunata pallashpankuna llukshirkakuna chay pankakunata kuyuchishpa Jesusta atun aputashina tinkunankunapa. Payta tinkushpankuna kushikushpa kaparirkakuna:

¡Ñukanchita kishpichiy! Yaya Diospa yanapashkan ali runami kanki. Yaya Diospa munashkanta ruranaykipa kachashkan kashpaykimi shamuhunki. Ñukanchi israel runakunapa atun apunchimi kanki.

¹⁴Jesuska shuk malta burruta tinkushpan awanpi sikashpan tiyarirka. Chasna paktachirka ñawpa killkarishkata.

¹⁵Kasna nin:

Manana nima imata manchaychina-chu Sión urku Jerusalén llaktapi kawsak runakuna. Rikuychi, atun apuykichimi ña shamuhun kankunata kishpichinapa. Shamuhunmi shuk burru maltapa awanpi tiyarishpa^c nishpa.

¹⁶Ñukanchi Jesuspa runankunaka chay uras manara asirtashkanchirachu Jesús chay rurashkanwa ñawpa killkarishkata paktachihushkanta. Jesús tukuymanta atun apu tukunarpa siluma sikashkanwashara asirtarkanchi. Chay uras yuyarirkanchina chasna paymanta killkarishka kashkanta, chaymanta

killkarishkashina paypi paktarishkanta. ¹⁷Jesús manara Jerusalén llaktama rihushpan Lasarota kawsachishkanta rikuk runakuna shukkunatana kwintak rirkakuna. ¹⁸Chay nima ima uras rikushkanchita atun yachaywa rurashkanta uyashpankuna chay achka runakuna Jesusta tinkuk shamurkakuna. ¹⁹Chasna achka rihushkankunata rikushpankuna *fariseokunaka paykunapura rimarkakuna:

Chay runata apichinanchipa yuyarishkanchika yanka nishpami kashka. Rikuychi, tukuy runakuna payta katihunkuna.

Jesuska wañunanmanta rimarka

²⁰Chay *Paskua punchakunarayku Jerusalén llaktama rishpankuna israel masinchikunawa pakta shuk *griego runakunapas rirkakuna. Ñukanchikunawa pakta munarkakuna chay tantarinapi ñukanchipa Yaya Diosninchita kushichishpa mañanata. ²¹Chay griego runakunaka Jesuspa chunka ishkay runan masinchi Felipeta kayllayarkakuna. Felipe karka Galilea allpapi kahuk Betsaida llaktamanta. Chaypi payta tapurkakuna:

Wawki, Jesustami riksinayanchi. Ñukanchita riksichiy.

²²Tapushkankunata uyashpan Felipeka Jesuspa chunka ishkay runan masinchi Andresta rimak rirkakuna. Chaymanta ishkanti Jesusta rimak shamurkakuna. ²³Chaypi Jesús paykunata rimarka:

Shuk allpamanta runakuna ñukata riksinata munawanankunata rimawankichi. Chayta uyashpayni yachani kunan shuti ña punchaka paktarishkanta Yayayni Dios runakunata rikuchinanpa ñuka paypa Kachashkan Runa yapa ali

^c Burrupi shamuhushkanwa rikuchin mana wañunakushpa kishpichik apushina kananta.

kanaynita.²⁴ Alita uyawaychi. Shuk muyu allpapi ismunan tiyan wiñananpa. Wiñashpan miranmi. Mana ismushpanka mana miranchu, muyulla kan. Ismushpanka wiñashpan muyuyan. Muyuyashpan achkata miranka. Chasnashinami ñuka wañunayni tiyan kawsarimushpayni achka runakunata uchankunamanta kishpichinaynipa. Mana wañushpaynika nima pi atipankachu Yaya Diospa kawsananpi yaykunata.²⁵ Chaymanta maykan runami pay kikinpa munashkanta rurashpa kawsan, chayka yankami kawsan. Manami nima ima uras Yaya Dioswa kawsankachu. Maykan runami kay allpapi kawsahushpanra pay kikinpa munashkanta sakin Yaya Diospa munashkantana rurashpa kawsananpa, chayka wiñaypami Yaya Dioswa kawsanka.²⁶ Maykan runami munashkaynita rurashpa kawsan, payka ñukashina kawsanan tiyan. Maykan runami chasna ñukata katiwan, maypipas kashpayni chaypimi paypas kanka. Maykan runakunami munashkaynita rurak kanahun, paykunatami Yayaynika kushikushpan atunyachinka.

²⁷ Kunanka atunta mancharihuni. ¿Imatataya rurasha? ¿Alichu kama tapunaynipa: Yayayni, kishpichiway mana chasna parisinaynipa nishpa? Chasnaka manami alichu kama. Chasna parisinaynipami shamushkani.²⁸ Yayayni, kay parisinayniwa runakunata ñukapi rikuchiy yapa ali atun yachayyu kanaykita.

Chasnallapi uyarkanchi silumanta rimahushkata:

Ñami runakunata kanpi rikuchishkani yapa ali atun yachayyu kanaynita, chasnallatatami kutikashka rikuchisha.

²⁹ Jesuswa pakta kahuk runa masinchikuna chay rimashkata uyashpankuna paykunapura kwintarkakuna:

Rayushina uyarishka.
Shukkunaka rimarkakuna:
Shuk *angelmi payta rimashka nishpa.

³⁰ Jesuska chaypi paykunata rimarka: Chasna uyashkaykichika mana karkachu ñukarayku, ashwan karkami kankunata yanapananpa Yaya Diosmanta kanaynita kirinaykichipa.³¹ Kunanka Yaya Dioska manana chapanchu tukuy runakunata uchankunaryku atun kastiguta paktachinanpa. Kunanka ñami supaykunata apunta tukuy runakunata kamachik kashkamanta wichunata kallarinka.³² Ñukata allpamanta awama alsawashpankuna tukuy partimanta runakunata munachisha riksíwanankunata, chaymantapas yanapasha ñukapi sinchikunankunata.

³³ Chasna rimashkanwa yachachinayarka imashnami wañunka.³⁴ Chaypi kahuk runa masinchikuna wañunamanta rimashkanta uyashpankuna aynirkakuna:

Yaya Diospa killkachishkanmanta yachanchi chapahushkanchi Yaya Diospa Kachanan Kishpichik wiñaypa kawsananta. ¿Imashnataya kanka ñukanchita rimanki Yaya Diospa Kachashkan Runa kashpayki kanta allpamanta awama alsashpankuna wañunaykita? Chasna kashpan manami Yaya Diospa Kachashkan Runachu kanki.

³⁵ Chasna shuk killkarishkakunata mana alita asirtashpankuna manana paypi sinchikunayashpankuna Jesuska paykunata rimarka:

Manana tiyannachu timpuka kankunata asirtachinaynipa. Ñuka punchashina kahukka shuk ratullami yachachishpa kankunawa kasha. Imashnami punchaka tukuya alita rikuchin, chasnashinami ñukapas kankunata shutipa kashkata riksichish-

kani. Chayrayku manara kankunata sakishpayni yachachishkaynimanta asirtashkaykichita kirishpa alita rurashpa kawsaychi, mana supayka shunkuykichi pi llullachishpan chay asirtashkaykichita kichunarpa. Asirtashkaykichita kichushpanka mananami nima ima uras kuti asirtankichichu. Chasna kashpan amsapishina purishpa kawsankichi, mana yachashpa maytami rinkichi.³⁶ Nuka punchashina kahuk kankunawa kahushpaynira ñukapi sinchikuychi kankunapas ñukashina punchayachik tukunaykichi pi.

Chasna rimashkanwasha Jesuska paykunata sakishpan pakarkana paykunamanta.

**Runakuna Jesuspi mana
sinchikurkakunachu**

³⁷ Chay runakunaka atun yachaywa achka nima ima uras rikushkanchita rurashkanta rikushpankunapas chaymantapas yachachishkanta uyashpankunapas Jesuspi mana sinchikunayarkakunachu. ³⁸ Chaywa Yaya Diospa yachayninwa ñawpa yachachik Isaias wañupa rimashkanka paktarirka. Payka chay runakuna mana kirkunamanta rimarka kasna:

Yaya Dios, runakunaka mana munashkakunachu yachachishkanchita kirinata. Mana atipay-pakunata rurashkaykita rikushpankunapas mana asirtashkakunachu chay rurashkaykiwa yachachinayashkaykita nishpa.

³⁹ Chay runakunaka mana munashpankuna Jesusta kirinata Isaias wañupa shuk killkashkanka paykunapi paktarirka kasna nishkaka:

⁴⁰ Yaya Dios ñawinkunata tapachishka mana rikunankunapa. Yuyay-ninkunata tapachishka mana asirtanankunapa. Yaya Dios

kasna nin: Chasna paykunata rurashkani taparishka ñawiyukunashina taparishka yuyayukunashina kanankunapa. Mananami munanichu uchankunamanta llakirishpankuna ñukata kasuwanankunata, mana paykunata llakichishpayni kuti aliyachinaynipa nishpa.

⁴¹ Chaykunatami Isaias wañuka ñawpa killkarka rikushpan Jesús yapa ali atun yachayyu tukunanta. ⁴² Isaias chasna killkashpanpas chay apunchikunamanta achka Jesuspi kirirkakuna. Chasna kashpanpas *fariseokunata manchashpankuna kirishkankunata mana

rimarkakunachu. Mana munarkakunachu chay kamachik masinkuna paykunata tantarina wasimanta wichunankunapa. Chasna wichuy tukushpankunaka manana atipanahu-machu paykunawa pakta tantarinata. ⁴³ Mana yuyarirkakunachu imashnami atipanahuma Yaya Diospa rikushkanpi ali kanata. Yapa munarkakuna runa masinkuna ali kanki nishpa rimankunata.

**Jesuska mana shamurkachu
runakunata kastigananpa**

⁴⁴ Chaypina Jesuska sinchita rimarka: Maykanmi ñukapi sinchikun, payka chasnallatamti sinchikun Yayaynipipas, maykanmi ñukata kay allpama kachawashka. ⁴⁵ Maykanmi ñukata rikuwan, chayka ñukata kachawaktapas rikunmi. ⁴⁶ Nuka runakunaryku punchashina kashpayni kay allpama shamushkani ñukapi sinchikukkuna mana amsapishina kiparinankunapa uchata rurashpa. ⁴⁷ Shuk runa rimashkaynita mana kasushpanka manami ñukaku payta kastigasha. Ñukaka kay allpama shamushkanimi runakunata uchata rurak kanankunamanta

kishpichinaynipa. Manami shamushkanichu uchankunamanta kastiganaynipa.⁴⁸ Maykan runami ñukata mana munawanchu, chaymantapas rimashkaynita mana kasunayanchu, paymi ña kastigarishka kan. Kay rimashkaynimantalla kastigarishka kananta yachan. Kay mundu tukurinan uras kay rimashkaynillatata uyashpan kastigarinanta yachanka, wiñaypa Yaya Diosmanta anchurishka kananta.⁴⁹ Kasna rimashkaynika manami ñuka kikin yuyaynimantachu. Ashwan Yayayni, maykanmi ñukata kachawashka tukuyta rimawarka imatami yachachisha.⁵⁰ Yachani Yayaynipeshiminka runakunata riksichinanta imashnami wiñaypa paywa kawsankakuna. Chayta yachashpayni tukuy Yayaynipesrimawashkanta kankunata alita yachachini.

**Jesuska runankunapa
chakinkunata mayllarka**

13 ¹Pishihushpanra shuk puncha *Paskua punchakuna paktarinankunapa Jesús yacharka ña wañunanta. Yacharka ña kay allpata sakinanta Yayanwana silipi tantaylla kawsak rinanpa. Tukuy uras Yaya Diosta mana kasuk runakuna chawpipi kawsak ñukanchi runankunata yapa yuyapayan. Kunanka ñukanchita yapa yuyashkanta rikuchinan karka ñukanchiranti wañushpan.² Jesús Paskua puncha ñukanchiwa tutapi mikuhushpan supaykunapa apunka ña yaykushka karka Judaspa shunkunpi. Payta yuyachirkay Jesusta apichinanpa. Chay Judaska Simón Iskariotepa wawan karka.³⁻⁴ Jesús yacharka Yayan Diosmanta shamuskanta, paymallatata kutinanta. Chaymantapas yacharka Yayanka payta atun yachayninta kushkanta tukuymanta atun kamachik kananpa. Chasna yachashpan mikuhush-

kanchimanta atarirka, awaniru kamisanta llatanarka. Chaymanta shuk llachapawa wiksampi watarirka.⁵ Yakuta mukawapi talishpan kallarirka chakinchikunata mayllanata. Karan shukpa chakinta mayllashkanwasha llachapa watarishkanwa chakichirka.⁶ Chaypina Pedropi paktarka chakinkunata mayllanarpa. Mancharishpan Pedroka rimarka:

Amuyni, ¿kanchu chakinita mayllawanki?

⁷Jesuska payta aynirka:

Manara asirtankirachu rurahushkaynita. Shuk punchami alita asirtanki.

⁸Pedroka Jesusta rimarka:

Nima ima uras chakinita sakishanchu mayllawanaykipa.

Jesuska payta aynirka:

Ñuka chakikita mana mayllashpaynika manami atipankichu ñukawa pakta kawsanata.

⁹Chasna uyashpan Pedroka rimarka:

Amuyni, chasna kashpan ama chakinnllata mayllawaychu ashwan umaynitas makinitapas mayllaway.

¹⁰Jesuska aynirka:

Maykanmi mushu armashka payka mana munanchu kuti armak rinata. Payka chakinllatami mayllanata munan. Tukuy aychanka ñami alita mayllarishka. Kankunaka ña alita mayllarishkashinami kankichi. Shukllami kankunamanta mana mayllarishkashinachu kan.

¹¹Jesuska ña yacharka pimi payta apichinka. Chayrayku rimarka manami tukuy kankunachu mayllarishkashina kankichi nishpa.¹² Chasna chakinchikunata mayllashkanwasha kuti churarirka awaniru kamisanta. Mesama kutishpan ñukanchita rimarka:

¿Asirtankichichu kay rurashkayniwa yachachinayashkaynita?¹³ Kankunaka Yachachik, Amuyni niwankichi. Alimi

kan. Ñukami kani.¹⁴ Chasna kankunata Yachachik Amuykichi kashpaynipas chakikichita mayllashkani. Kankuna parihu runaynikuna kashpaykichi ashwan kankuna munay yanapananaku-naykichi tiyan, karan shuk amun kamachishkanshina shukwa shukwa kankunapura. Chaymanta shuk kirik masikichi mana alita rurashpanka payta yanapanaykichi tiyan kutikashka alita rurashpa kawsanarpa. Chaymantapas llakichinakushpa kawsanaykichi tiyan, Yaya Dios uchaykichitapas llakichishpan alita mayllarishkashina kanaykichi-pa. ¹⁵ Imashnami ñuka kankunata rurashkayniwa rikuchishkani, chasnashina kankunapas ruraychi shukwa shukwa.

¹⁶ Alita uyawaychi. Nima shuk runan patroyninmanta pasa kanchu. Shuk kachashkan runa mana kanchu payta kachak runamanta pasa. Chasnashinami kankunapas mana ñukamanta pasa kankichichu. Imatami rurani ñukaka, kankunapas ruranaykichi tiyan. ¹⁷ Tukuy chay rurashkaynita kunan ña asirtash-kankichi. Kunanka chay asirtashkaykicha ruraychi. Chayta paktachishpa kawsashpaykichika kushillami kankichi.

¹⁸ Yayayni kankunata kushillary-chinka nishpa rimashpayni manami tukuy kankunata kushillaryachinanmantachu rimani. Riksiniimi imashna runakunatami akllashkani. Chasna kashpan yachani shuk kankunamanta mana ali yuyayyu kananta. Paktarinan tiyen imashnami killkarishka kan:

Maykanmi ñukawa pakta mikupayarka chayka kuntrayni tukushka nishpa.

¹⁹ Kunan manara paktarishpanra chayta kankunata rimashkani, ña paktarishpan yachanaykichi-pa Yaya Diosmanta kashkaynita. ²⁰ Alita uyawaychi. Ama llakiriyichichu. Kankunatami akllashkani

tukuy partima kachanaynipa. Maykan runami shuk kankunata wasinpi yaykuchin, payka ñukatapas yaykuchi-wanmi. Ñukata yaykuchiwashpan kachamuwashka Yaya Diostapas yaykuchinimi.

Jesuska rimarka Judas

payta apichinanta

(Mt. 26.20-25; Mk. 14.17-21;

Lk. 22.21-23)

²¹ Chasna rimashkanwasha Jesuska shunkunmanta pacha llakirirka. Chaypi ñukanchi runankunata rimarka:

Alita uyawaychi. Shuk kankunamanta ñukata apichiwanka.

²² Ñukanchi mancharishpanchi rikunkurkanchi. Mana yacharkanchichu pimantami chasna rimarka. ²³ Ñuka Jesupsa yapa munashkan runan kuchunpi mikuhurkani. ²⁴ Chaypi kahushpayni Pedroka makinwa rikuchiwarka Jesusta tapunaynipa pimantami chasna rimahurka. ²⁵ Ashwanta Jesusta kayllayashpayni alimanta tapurkani:

Amuyni, ¿pimantata chasna rimahunki?

²⁶ Jesuska ayniwarka:

Maykantami kay piti panta ukuchish-payni kusha, paymi kanka.

Chasnallapi *vinupi panta ukuchishpan Simón Iskariotepa wawan Judasta kurka. ²⁷ Chay pan pitita apishkan ratulla supaykunapa apunka paypa shunkunpi yaykushpan sumakta amuyarka. Chayta yachashpan Jesuska payta rimarka:

Yuyarishkaykita utkalla rurakriy.

²⁸ Ñukanchi paykunawa pakta mikuhukkunaka mana asirtarkanchichu imamantami chasna rimahurka. ²⁹ Judas kullkinchita wakaychak kashpan ñukanchimanta shukkuna yuyarirkanchi, Jesuska paytachari rimashka rantikriy nishpa tantarina punchakunapi

mikunanchipa, mana kashpaka nishkachari nima imayu runakunata kullkita kukriy nishpa.³⁰ Chasna panta apishkanwasha Judaska llukshirkana. Chay uras ña tutana karka.

Jesuska runankunata yachachirka
Yaya Diosta yuyashpa,
paykunapura yuyanakushpa
kawsanankunapa

³¹ Judas llukshishkanwasha Jesuska ñukanchita rimarka:

Kunanka tukuy runakuna rikunkakuna ñuka Yaya Diospa Kachashkan Runa yapa ali atun yachayyu kanaynita paykunaranti wañushpayni. Yaya Dioschasna wañunaynipa kachawashka. Chayrayku runakuna rikushpankuna paykunaranti wañushkaynita, Yaya Diospas yapa ali atun yachayyu kananta riksinkakuna.³² Chasna ñuka Yaya Diospa Kachashkan Runa runakunata rikuchishpayni paypa ali atun yachayyu kananta, Yaya Diospas runakunata riksichinka payshina ali atun yachayyu kanaynita. Mana unayankachu mana atipaypa kashkata rurashpa chasna kanaynita runakunata riksichinanpa.³³ Wawkunikuna, manana unaytachu kankunawa kasha, shuk ratustulla kiparisha. Kankunamanta rishpayni ñukata maskawankichi. Imashnami apunchikunata puntiru rimarkani, chasnallatatami kunanka kankunata rimani: Mana atipankichichu rinata maymami ñukaka risha.³⁴ Kunanka kankunarayku shuk mushu kamachinata sakihuni: Yuyanakushpa kawsaychi shukwa shukwa kankunapura. Imashnami ñukaka kankunata yapa yuyani, chasnallatata kankunapura alita yuyanakuychi.³⁵ Chasna yuyanakushpa kawsahushkaykichimanta runa masikichikunaka riksinkakuna shutipa ñukata katik kahushkaykichita.

Jesuska rimarka Pedro payta mana
riksikshina tukunanta
(Mt. 26.31-35; Mk. 14.27-31;
Lk. 22.31-34)

³⁶ Chaypina Pedroka Jesusta tapurka: Amuyni, ¿maymataya rinki?

Jesuska aynirka:

Maymami rihuni mana kunallaka atipawankichu katinata. Chaywasharami shuti katiwanki.

³⁷ Pedroka rimarka:

Amuyni, ¿imaraykuta mana atipashanchu kunalla katinata? Wañushanpas kanta kishpichinaynipa.

³⁸ Jesuska payta aynirka:

¿Shutipachu kishpichiwanaykipa wañunayanki? Kanta rimani, manarapas atallpaka kantahushpanra kimsa kutimi llullachishpa rimanki mana riksiwanaykita.

Jesusllami Yayan Diosta
riksichik kan

14¹ Chaymantana tukuy ñukanchita rimarka:

Wañushpayni ama manchariychichu nima llakiriychichu. Tukuy uras Yayayni Diospi sinchikuychi chasnallatata ñukapipas.² Yayaynipa kawsanampi tiyan achka wasikuna. Chayma risha alichanaynipa wasikichikunaryku. Mana chasna kamaka manami kankunata chayta rimaynimachu karka.³ Kaymanta rishpayni alichak risha wasikichikunaryku. Chaywasha kutimusha kankunata pushanaynipa ñukawa pakta kawsanaykicipa. Yapa munani kankunapas kanaykicipa maypimi ñukaka kasha chaypi.⁴ Ña kankunaka riksinkichimi ñampita maytami ñukaka risha.

⁵ Chaypina Tomaska Jesusta rimarka:

Amuyni, mana yachanchichu maytami rinki. ¿Imashnataya riksishunchi ñampitaka?

⁶Jesuska aynirka:

Ñukami kani shuklla Yaya Diospi paktak ñampishina. Maykanmi ñukata katiwan, payllatami riksichisha imashnami Yayayni Dioska shutipa kan. Ñukallami kani Yayayni Diosta riksichik, chaymantapas wiñaypa paywa kawsayta kuk. Nima pi atipanchu Yayayni Diospi paktanata mana ñukata katiwahushpanka. ⁷Kankunaka shutipa ñukata riksiwashpaykichika Yayaynitapas riksinkichimi. Kunanmanta pacha payta riksinkichimi ña rikushkaykichirayku.

⁸Felipeka aynirka:

Amuyni, Yayaykita ñukanchita rikuchiy. Chayllatami munanchi nishpa.

⁹Jesuska payta aynirka:

Felipe, ¿unayta kankunawa kahushpaynitätachu kunankama ñukata mana riksiwanki? Maykanmi ñukata rikuwan, payka rikuhami Yayaynitapas. ¿Imaraykuta tapuwanki Yayaynita rikuchinaynipa?

¹⁰¿Manachu kirinki ñuka Yayayniwa shuk yuyayllawa kahushpanchi shukllashina kahushkanchita? Manami ñuka kikin yuyaynimantachu kankunata yachachishkani. Tukuy uras ñukawa kahuk Yayayni Dioska munashkanta rurachiwan.

¹¹Kiriwaychi Yayayniwa shuk yuyayllawa kahushkanchita. Mana chayta kirinayashpaykichika rurashkaynita rikushpaykichi kiriwaychi.

¹²Alita uyawaychi, tukuy ñukapi sinchikkunami ñukashina rurashpa kawsankakuna. Mana chayllachu. Ñuka Yayaynima kutishpayni ashwan atun mana atipapakunatami rurankichi. ¹³Tukuy maykantami munashkaynitashina tapuwankichi ñuka rurashami Yayayni ali atun yachayyu kananta runakunata rikuchinaynipa. ¹⁴Ñuka munashkaynitashina tapuwashpaykichika tukuy tapuwashkaykichita rurashami.

¹⁵Ñukata yuyawashpaykichika kamachishkaynikunata paktachinki-

chimi. ¹⁶Chasna yuyawashkaykichita rikuchiwashpaykichimi Yayaynita tapusha ñukaranti kankunata sinchikuchik Espiritunta kachananpa tukuy uras kankunawa kananpa. ¹⁷Espiritunta kachananpa tapusha, maykanmi kankunata tukuy shutipa kashkata riksichinka. Yayayni Diosta mana riksik runakuna chay Espiritunta manami riksinahunchu payta mana rikushkankunaryku. Chayrayku mana atipanahunchu payta shunkunkunapi yaykuchinata. Kankunaka payta riksinkichimi kankunawa kahushkanrayku. Shunkuy-kichipimi kawsan, nima ima uras kankunamanta anchurinkachu.

¹⁸Ñukaka manami kankunata wakchatalshina sakishkaykichichu. Kutimushami kankunawa kanaynipa. ¹⁹Ñami wañunayni punchaka paktarishka. Ñukata mana riksik runakunaka manana rikuwankakunachu. Kankullami rikuwankichi. Ñuka wiñaypa kawsa kahushkaynirayku kankunapas wiñaypa kawsankichi. ²⁰Yaya Diospa Espíritun kankunapi paktashpan yachankichi ñuka Yayayniwa shuk yuyayllawa kahushkaynita. Chaymantapas yachankichi ñuka kankunawa shuk yuyayllawa kahushkaynita, kankunapas ñukawa. ²¹Maykan runami kamachishkaynita shunkunpi wakaychashpan kasun, payllami shutipa yuyawan. Maykanmi ñukata yuyawan, Yayaynipas payta yuyankami. Ñukapas payta yuyashami, chaymantapas yanapashami alita riksiwananpa.

²²Chaypi chay chunka ishkay Jesuspa runan masinchi Judas, mana Iskariotepa wawanchu, Jesusta tapurka:

Amuyni, ¿imaraykuta ñukanchillata riksichirinki pimi kanki? ¿Imaraykuta Yaya Diosta mana riksikkunatapas mana riksichirinkichu pimi kanki?

²³Jesuska aynirka:

Ñukaka riksichirishami pimi kanaynita yuyawak runallata. Maykan runami yuyawan payka yachachishkaynita kasun. Chasna yuyawak runata Yayaynipas yuyankami. Chaymantapas Yayayniwa pakta paypa shunkunpi kawsak shamushu.²⁴ Mana yuyawak runataka manami riksichirinichu pimi kani, yachachishkaynita mana kasunayashkanrayku. Manami ñuka kikin yuyaynimantachu kankunata chayta yachachini. Yayayni Diosmi kachawashka chasna yachachinaynipa.

²⁵Tukuy kaykunata kankunata yachachihuni kankunawa kahushpaynira. ²⁶Yayayni Dioska ñukaranti kankunata yanapak Espiritunta kachanka. Chay Espiritunka kankunata yachachishkaynita yuyachinka, chaymantapas yachachishpa tukuya asirtachinka. ²⁷Ñuka rishpayni kankunata sinchikuchisha mana manchashpa nima musparishpa kushilla kawsanaykichipa. Mana kankunata llullachishpachu yanapani kushilla kawsanaykichipa, imashnami Yaya Diosta mana kasuk runakunaka ruranahun. Ashwan shutipami kankunata shunkuykichipi kushillayachisha. Chayrayku rinaynimanta rimashpayni ama llakiriychichu nima manchariychichu. ²⁸Na uyashkankichi kankunata rimashkaynita, ñukaka rishami, chaymantapas kankunama kutimusha nishpa. Shutipa yuyawankichimaka kushikunkichimami karka yachashpaykichi Yayaynima rinaynita. Yayayni ñukamanta ashwan atun yachayyu kashpan ñuka payma rishpayni atipasha ashwan alita kankunata yanapanata. ²⁹Manara riushpaynira kankunata chayta rimani, paktarishpan yachanaykichipa rimash-

kaynika shutipa kashkata.³⁰⁻³¹ Kunanka manana achkata kankunata yachachishkaykichinachu. Shuk ratullami kankunawa kahuni. Ñami shamuhun tukuy Yaya Diosta mana kasuk runakunata kamachik supaykunapa apunka. Mana ñukata atipawashpantata nima imata ruranata ñuka munay sakini wañuchichiwananpa. Chasna wañushpayni Yayaynipe kamachiwashkanta kasusha tukuy runakuna payta yuyahushkaynita yachanankunapa. Kunan atariychi. Akuychi rishunchi.

Jesusta kasuk runakunalla shutipa payta yuyak kanahun

15 [Shuk parti Yaya Diospa ñawpa killkachishkanpi riman israel runakuna Yaya Diospa tarpushkan uva waskashina kanankunata.^d Chayta yachashpan Jesuska ñukanchita yachachishpalla katirk:a: Kankuna yuyarinkichi Yaya Diospa runankuna kanaykichita, israel runakuna kashkaykichirayku. Manami chasnachu. Ashwan ñukapi sinchikushpaykichimi Yaya Diospa runankuna kankichi. Manami tukuy ñukanchi israel runakunachu kanchi Yaya Diospa tarpushkan ali uva waskashina.] ¹Ñukami kani chay tarpushkan ali uva waskashina. Yayaynica chay uva tarpupa amunshinami. ²Kankunaka ramaynikunashinami kankichi. Mana muyuyak ramataka amunka pitinkami. Muyuyak ramataka alichankami ashwanta muyuyananpa. ³Kankunaka kankichimi chay alichashkan alita muyuyak ramaynikunashina. Yachachishkaynita kasushpaykichi Yaya Dios kankunata aliyachirka. ⁴Chasna kashpaykichi mana sakishpa ñukawa pakta kawsaychi. Chasna kawsashpaykichi ñukapas kankunawa pakta

^d Rikuy kastellano Bibliapi Salmos 80.8-18; Jeremías 2.21

kawsasha. Shuk rama mana sapinwa pakta kahushpanka manami atipanchu muyuyanata. Chasnashinami kankunapas mana atipankichichu alita rurashpa kawsanata, mana ñukawa pakta kawsahushpaykichika.

⁵Ñukami kani ali uva waskashina. Kankunaka kankichimi ramaynikunashina. Ñukawa pakta kawsashpaykichi ñukapas kankunawa pakta kawsashpayni achka alikunata rurashpa kawsankichi. Ñukamanta anchurishka kashpaykichi tukuy rurahushkaykichika yankami. ⁶Shuk rama manana waskanmanta yakuta aysashpanka wañunmi. Chasna shuk uva waskapa raman chakirishpan amunka pitinmi. Chaymanta chakirishkakunata tantachishpan rupachinna. Chasnashinami kankuna mana ñukawa pakta kawsahushpaykichika chay mana valik ramakunashinami wicherishka kankichi. ⁷Chasna kashpan mana sakishpa ñukawa pakta kawsaychi. Yachachishkaynita shunkuykichipi wakaychashpaykichi kasuychi. Chasna kawsashpaykichimi tukuy imatapas tapushkaykichita Yaya Dios kankunaryku rurankami. ⁸Ñukata kasushpa tukuy alikunata rurashpa kawsashpaykichi shutipa ñukata kirikkunami kankichi. Chasna alita rurashpa kawsashpaykichi runa masikichikuna yachankakuna Yaya Dios yapa ali kananta.

⁹Ñuka kankunata yuyani imashnami Yayaynika ñukatapas yuyawan. Chayrayku tukuy uras ñukawa pakta kawsaychi mana sakishpa kankunata yuyanaynipa. ¹⁰Kamachishkaynita kasushpa kawsashpaykichika kankunata mana sakishpa yuyashkaykichi. Ñukapas Yayaynipa kamachishkanta kasushpa kawsashkani. Chasna kawsashpayni paypas ñukata mana sakishpachu yuyawan. ¹¹Tukuy chayta

kankunata rimani, kasushpaykichi ñukashina atunta kushikunaykichipa. Yapa munani chay atun kushikunaykicha nima ima arkananpa.

¹²Kasna kankunata kamachini: Imashnami ñukaka kankunata yuyani, chasnallatata kankunapas yuyanakushpa kawsaychi shukwa shukwa.

¹³Shuk munashkanchi runata wañuna kashkanmanta kishpichinanchipa wañushpanchi payta shutipa yuyashkanchita rikuchinchi. Mana atipanchichu payta yapa yuyashkanchita ashwan alita rikuchinata. Ñukaka kankunata kishpichinaynipa wañushpayni shutipa yuyashkaynita rikuchisha. ¹⁴Kankuna kamachishkaynita paktachishpaykichimi munashkayni runakuna kankichi. ¹⁵Manana kankunata rimashkaykichinachu kamachinayni runaynikuna nishpa. Ashwan rimashkaykichimi munashkayni runakuna. Shuk patronpa kamachinan runaka mana yachanchu imaraykumi patroyninka kamachin. Kankunataka tukuya yachachishkani, maykantami Yayaynika rimawashka. Chayrayku kankunata rimani munashkayni runakuna. ¹⁶Chasna tukushkaykichika mana kanchu kankuna ñukata munawashkaykichirayku. Ashwan ñuka kankunata munashpaynimi munashkayni runakuna tukushkankichi. Chasna kankunata akllashkani, kasuwashpaykichi ñukashina ali tukunaykichipa.

Chaymantapas akllashkani runa masikichikunata Yaya Diospa shiminta yachachinaykichipa, paykunamantapas shukkuna ñukapi kirinankunapa. Chasna kasushpa yachachishpa kawsashpaykichika manami yankachu kanka. Yachachishkaykichimanta katiwakkunapas wiñaypa Yaya Dioswa kawsankakuna. Yapa munani alita kasuwak tukunaykichipa Yaya Dios tukuy munashkaynitashina tapushkayki-

chita rurananpa.¹⁷ Chayrayku kankunata kuti rimani: Yuyanakushpa kawsaychi shukwa shukwa kankunapura.

**Jesuska rimarka payta chiknikkuna
runankunatapas
parisichinankunata**

¹⁸ Jesuska ñukanchi runankunata yachachishpalla katirka:

Mana riksiwak runakunaka kankunata chiknispankuna ama manchariychichu. Yuyariyichi ñukata puntiru chikniwash-kankunata.¹⁹ Kankunaka manami kankichichu ñukata mana riksiwak runakunashina. Ñukami kankunata akllashkani mana riksiwak runakunamanta manana paykunashina kawsanay-kichipa. Paykunashina kankichimaka yuyanahumami. Manana paykunashina kahushkaykichiraykumi chay runa masikichikunaka kankunata chiknina-hun.²⁰ Yuyariyichi kankunata rimash-kaynita kasna: Shuk runan manami patroyninmanta pasa kanchu. Chasna-shinami kankunaka manami ñukamanta pasa kankichichu. Ñukata wañuchinayashpa katiwashpankuna kankunatapas chasnallatatami wañuchinayashpa katinkakuna. Ñukapa rimashkaynita mana kasushpankuna kankunapa rimashkaykichitapas mana kasunkaku-nachu.²¹ Ñukata kachawakta mana rikspankuna ñukata kasuwashkayki-chirayu chasna kankunata rurankakuna.²² Ñuka kay allpama shamushkani runakunata yachachinaynipa imashnami Yaya Diosta riksinkakuna. Yachachish-kaynita mana kasunayashpankuna uchayu kanahun. Ñuka mana yachachik shamuynima karka paykunaka manami uchayuchu kanahuma karka. Kunanka yachachishkaynita uyashpankunapas mana chayta kasushpankuna uchankunata manana llakichiyanachu kan.

²³ Ñukata chikniwashpankuna Yayayni-tapas chikninahunmi. ²⁴ Ñuka achka nima maykan atipashkanta chawpinku-napi rurashkani. Chay rurashkaynitu-nata rikushpankunapas ñukata Yayayni-tapas chiknishkakuna. Chayrayku uchayu kanahun. Chay mana atipapaku-nata mana ruraynima karka mana uchayuchu kanahuma.²⁵ Chay runakuna ñukanchita chikninahun Yaya Diospa shimin ñawpa killkarishkaka paykunapi paktarinanpa. Kasna nin:

Ñukata yankamanta chikniwarka-kuna nishpa.

²⁶ Ñuka Yayaynima rishpayni kankun-rayku kachasha kankunata sinchikuchik Yaya Diospa Espiritunta. Payka Yayaynimantami kan tukuy shutipata mana llulla kashkata riksichik. Kay allpapi kawsak runakunata Yaya Diospa Kachashkan Kishpichik kanaynita riksichinka.²⁷ Kankunapas runa masikichikunata chayta riksichiychi, runakunata yachachishkaynimanta pacha ñukawa pakta kawsashkaykichi-rayku.

16 ¹ Ñami kankunata rimashkani shuk runakuna kankunata chikninankunamanta. Chaymanta rimashkani kankunata sinchikuchik Yaya Diospa Espiritunta kachanaynitas-pas. Tukuy chaykunata rimashkani ñukapi sinchikunaykichipa, ñukamanta mana anchurinaykichipa.² Israel masinchikunaka kankunata tantarina wasikunamanta wichunkakuna manana paykunawa tantarinaykichipa. Mana chayllatachu kankunata rurankakuna. Ashwan paykunata wañuchishpanchi Yaya Diosta kushichinchu nishpa yuyarishpankuna shuk puncha kankunamanta shukkunata wañuchinkakuna.³ Chasna kankunata rurankakuna, mana ñukata nima Yayaynitapas rikshikkun-narayku.⁴ Chasna rimani paykuna

kankunata chiknishpankuna ña rimashkaynita yuyarinaykichipa. Kunankama kankunawa kahushpayni runakuna ñukallata chikniwashkakuna. Chayrayku yachachinata kallarishkaynima pacha manara rimashkanirachu kankunata chikninankunamanta.

**Jesuska rimarka Yaya Diospa
Espiritunta kachananta**

⁵Kunanka ñami risha ñukata kachawak Yayaynima. Chasna kashpanpas nima pi kankunamanta tapuwankichichu: ¿Maymata rinki? nishpa. ⁶Rinaynimanta kankunata rimashpayni shunkuykichika llakiya kichkirishkami kahun. ⁷Chasna llakiya kichkirishka kahushpaykichipas kuskata kankunata rimani: Alimi kankunaryku Yayaymima rinaynipa. Mana rishpaynika kankunata sinchikuchik Yaya Diospa Espiritunka mana shamunkachu kankunapi kawsanarpa. Ñuka rishpayni shuti payta kankunama kachasha. ⁸Chasna shamushpan payka runakunata riksichinka imami kan uchaka, chaymanta imashnami Yaya Diosta kasushpa alita kawsanankuna tiyan. Chaymantapas riksichinka uchakunamanta kastigu tiyananta. ⁹Uchamanta riksichinka, ñukata mana kirina, ñukapi mana sinchikuna, uchapa sapin kananta. ¹⁰Chaymanta ali kawsanata riksichinka ñuka tukuy uras Yayayni Diosta kasushpa kawsahushkaynirayku payma rishkaynita yuyachishpa. Chayma rishpayni kankunaka manana ñukata rikuwankichinachu.

¹¹Chaymantapas payka riksichinka uchakunamanta kastigu tiyananta Yaya Diosta mana kasuk runakunata kamachik supaykunapa apun ña kastigarishka kashkanta rikuchishpa. ¹²Ñukapa achka rimanayni tiyawahushpanpas kunan mana ashwanta kankunata rimashanchu. Kankunata ashwanta rimashpaynika manami atipankichichu asirtanata. Chayrayku manara tukuyta yachachishkay-

kichirachu. ¹³Yaya Diospa Espíritun shamushpan kankunata shuti riksichinka tukuy shutipa kashkata. Chaymantapas kankunata yuyachinka tukuya ñukamanta yachanaykichipa. Tukuy yachachishkaynita kankunata asirtachinka. Nima imata pay kikinpa yuyaynimanta yuyachinkachu. Ashwan Yaya Diosmanta uyashkanllatami kankunata riksichinka. Chaymantapas riksichinka imashnami pasanka silipi allpapi. ¹⁴Kankunata ñukamanta uyashkanta riksichishpan ñuka atun suma yachayyu kanaynita asirtachinka. ¹⁵Tukuy imatami Yayayni Dioska riman chaytami ñukapas rimani shuk yuyayllawa kashkan-chirayku. Chayrayku kankunata rimashkani Espiritunka ñukapa rimashkaynita kankunata asirtachinka nishpa.

**Jesuska runankunata rimarka
llakirishkankunawasha
kushikunankunata**

¹⁶Jesuska rimashpalla katirka:
Shuk ratumantami manana rikuwan-kichinachu. Chaymanta unaystuman-tami kutikashka rikuwankichi nishpa.

¹⁷Chasna Jesús rimashpan ñukanchi paypa chunka ishkay runankunamanta shukkunaka tapunakurkanchi:

¿Imatataya ñukanchita rimanayan Yayaynima risha chaymantapas shuk ratumantami manana rikuwankichinachu, chaymanta unaystumantami kutikashka rikuwankichi nishpa?

¹⁸¿Imatataya ñukanchita rimanayan unaystumanta nishpa? Mana asirtanchi-chu imamantami rimahun.

¹⁹Chasna ñukanchi kwintahushkan-chita rikushpan Jesuska musyarirka payta tapunayahushkanchita. Chaypi ñukanchita rimarka:

Kankunata rimashkani unaystuman-tami manana rikuwankichinachu, chaymanta shuk ratumantami kutikashka rikuwankichi nishpa.

¿Chasna rimashkaynimantachu tapuna-yawahunkichi?

²⁰Alita uyawaychi. Ñuka wañushpayni kankunaka sinchita llakishpa wakankichi. Chasna kahushpaykichi mana ñukapi kirikkunaka kushilla kankakuna. Kankunaka llakiya kahushpaykichipas chaymanta kushikunkichimi. ²¹Yuyariy-chi shuk warmi wawayahushkanmanta. Chay warmika wawayahushpan manchayta nanayta parisin. Wawayash-kanwasha manchayta nanayta parisish-kanta kunkarin. Wawanta rikushpan atunta kushikun. ²²Chasnashinami kunanka kankunapas manchaywa llakirinkichi. Chasna kahushpaykichipas kutikashka kankunata rikuk shamush-payni atuntami kushikunkichi. Chasna kushikushpaykichi nima pi atipankachu kankunata kutikashka llakiyi churanata. ²³⁻²⁴Kunankama ñukallata tapushkankichi yanapanaynipa. Manara nima imata kuskata Yaya Diosta tapushkankichirachu. Kuti kankunama shamushpayni manana nima imata ñukata tapuwankichinachu. Yaya Dios kikintanami tapunkichi. Munashkaynitashina tapushpaykichika paymi kankunata tukupi yanapanka kushikushpalla kawsanaykichipa.

²⁵Chaymanta rimarka:

Tukuy kay yachachishkaynikunata manara shutillatachu yachachishkani. Shuk punchami manana chasnalla yachachishkaykichinachu. Chay uras shutillatanami Yaya Diosmanta kankunata yachachisha alita yachanaykichi. ²⁶Chay punchamanta pacha munashkaynitashina kankuna kikinna Yaya Diosta tapunkichi. Chasna kankuna kikin tapushpaykichimi mana munankichinachu ñuka kankunaryaku payta tapunaynipa. ²⁷Yaya Diosmi kankunata yuyan ñukata yuyawahush-kaykichirayku chaymantapas paymanta

shamushkaynita kirishkaykichirayku.

²⁸Ñuka Yayayni Diosmanta llukshirkani kay allpama shamunaynipa. Kunanka kay allpata sakihuni paymallatata kutinaynipa.

²⁹Chasna Jesuspa rimashkanta uyashpanchi rimarkanchi:

Kunan shuti asirtaypata rimahunki, manana rimahunkinachu pakashpa rimahukshina. ³⁰Tapunakuuhushkanchita mana uyashpaykipas ñukanchita rimashkanki. Chayrayku kunan tukuy imata yachak kahushkaykita yachanchi. Manara tapuhushpanchira yuyarihush-kanchita riksinki. Chayrayku Yaya Diosmanta shamushka kashkaykita kirinchi.

³¹Chasna rimashkanchita uyashpan Jesuska aynirka:

Kankunaka nima kunan ñukapi yapa alitarachu kirihunkichi. ³²Ñami wañunaynika paktarihu. Chay urasmi kankunaka karan shuk llaktaykichima kutishpa shikwarinkichi. Ñukataka sapallaynitami sakiwankichi. Chasna kashpanpas manami sapallaynichu kahuni, Yayaynika ñukawa kahushkan-rayku. ³³Manara paktarishpanmi tukuy chayta kankunata rimahuni, paktarish-pan mana mancharinaykichi. Munani kushilla kanaykichipa, runaynikuna kahushkaykichirayku. Yaya Diosta mana kasuk runakuna chawpipi kawsahushpaykichira manchayta nanayta llakiya parisinkichi. Chasna kashpanpas sinchikuriychi yuyarishpaykichi ñuka parisishpayni winsishkaynita millaypata rurachikta.

**Jesuska Yayanta mañarka paypi
sinchikukkunarayku**

17 ¹Jesuska yachachishkanta tukuchishpan siluma rikushpan Yayanta mañarka: Yayayni, ñami wañunayni punchaka paktarishka.

Runakunata kishpichinaynipa wañush-payni paykunata rikuchiy ñuka wawayki yapa ali kanaynita. Chasna wañunaynipa kachawashpayki paykunaraanti wañushpayni ñukapas runakunata yapa ali kanaykita rikuchisha.² Kan kuwashkanki atun yachayta tukuy runakunata kamachik kanaynipa. Chasna atun yachayyu kashpayni wiñaypa kanwa kawsayta kusha maykunkunatami akllashkanki ñukapi sinchikunankunapa.³ Chay kawsayka rimanayan kanta riksishpa riksishpa rishpunkuna shulklla shutipa Yaya Dios kashkaykita, ñuka kachashkayki kishpichik wawaykitapas.

⁴Ñuka kay allpapi kawsashpayni tukuy kamachiwashkaykita paktachishkanki. Chasna rurashpayni runakunata atun ali yachayyu kanaykita rikuchishkanki.⁵ Kunanka Yayayni, churaway kuchuykpi. Kutikashka tukuymanta ashwanta atunyachishpa kushichiway, kuti kanaynipa imashnami karkani manara kay allpaka tiyahushpanra.⁶ Ñukata kuwashkayki runaynikunata yachachishkanki pimi kanki nishpa. Chay tukuy kanta mana riksik runakunamanta ñukapi sinchikushpanguna paykunata kuwashkanki. Kanpa kashpanguna kunan ñukata kuwashkanki. Shimikita kirishpanguna alita kasushpa kawsanahun.⁷⁻⁸ Paykunatami rimawashkaykita yachachishkanki. Rimashkaynita uyashpanguna shunkunkunapi wakaychashkakuna. Yachashkakuna shutipa kanmanta shamushkaynita. Chaymantapas kirirkakuna ñukata kachawashkaykita. Chayrayku kunanka yachanahun tukuy yachachishkaynka kanmanta kashkanta.

⁹Paykunaraykumi kanta mañani. Manami mañanichu kanta mana riksinyak runakunarayku. Mañanimi wawaykikunarykulla, maykunkunatami

kuwashkanki.¹⁰ Tukuy kanpa wawaykikuna ñukata kasuwanahun. Chasnallata-tami tukuy ñukata kasuwakkuna wawaykikuna kanahun. Runa masinkuna rikushpanguna runaynikunata yanapahushkaynita alita rurashpa kawsanankunapa, paykunaka riksinkunkuna yapa ali kanaykita.¹¹ Kunanmanta pacha ñukaka manana kawsashannachu uchata rurak runakuna chawpipi. Kutikashka kanwa kawsanaynipa rishpayni kuwashkayki runaynikunaka uchata rurak runakuna chawpipi kiparinkakuna. Yayayni, ucha illa atun yachayyu kanki. Chay atun yachaykiwa, maykantami ñukatas kuwarkanki, chaywa runaynikunata kuyray mana uchata ruranankunapa. Paykunata yanapay shuk yuyayllawa kanankunapa, imashnami kanpas ñukawa shuk yuyayllawa kanki.¹² Paykunawa kay allpapi kahushpaynira kuwashkayki yachaykiwa kuyrashkanki. Chasna alita kuyrashpayni nima pi paykunamanta chinkarishkachu. Ñawpa killkarishkaka paktarinanpa shulkllami chinkarishka, maykanmi kanmanta karupi wiñaypa parisina kan.

¹³ Kunanka risha maypimi kahunki. Kay allpapi kawsahushpaynira chasna runaynikunaryku kanta mañani kushikushpalla kawsanankunapa, imashnami ñukapas atunta kushikushpa kawsani.¹⁴ Paykunata shimikita yachachishkanki. Mana shimikita kasuk runa masinkuna paykunata chiknina-hun, wawaykikuna tukushpanguna manana paykunawa shuk ayllushina kashkankunaryku. Kanta mana kasukkunawa mana kanahunchu shuk ayllushina, imashnami ñukapas mana paykunawa shuk ayllushinachu kani.¹⁵ Runaynikunaryku mañashpayni manami kanta tapunichu uchata rurak runakunapa chawpinkunamanta

anchuchinaykipa. Kanta mañani paykunata kuyranaykipa supayka millaypata mana rurachinanpa.

¹⁶Paykunaka mana kanahunchu kanta mana kasuk runakunashina, imashnami ñukapas mana paykunashinachu kani.

¹⁷Yayayni, rimashkaykika shutipa kashkata riksichikmi kan. Kanta kasuk runakunata shimikita tukuy uras ashwanta yachachiy manana uchata ruranankunapa, ashwan munashkaykilata rurashpa kawsanankunapa.

¹⁸Nukata kachawashkanki kay kanta mana riksik runakunata kawsanayniwa yachachinayniwa kanta alita riksichinaynipa. Kunan ñuka paykunata kachani chasnallatata ruranankunapa.

¹⁹Ñuka munashkaykita paktachishpa wañusha paykunata uchankunamanta kishpichinaynipa. Chasna wañusha paykuna shutipa kashkata riksichik shimikita uyashpa kawsashpankuna ñukashina munashkaykita rurashpa kawsanankunapa.

²⁰Mana mañanichu paykunaraykulla. Mañanimi shukkunaraykupas, maykan-kunami paykunapa yachachishkankunata uyashpankuna ñukapi sinchikunkakuna. ²¹Tukuy paykunarayku tapuni shuk yuyayllawa kanankunapa. Chaymantapas mañani ñukanchiwapas shuk yuyayllawa kanankunapa, imashnami kampas ñukawa shuk yuyayllawa kanki. Mañanimi chasna kanankunapa, kanta mana riksik runakuna paykunata shukllashina rurashkaynita rikushpankuna kirinankunapa kan shutipa kachawashkaykita.

²²Kan ali yuyayta atun yachayta ñukata kuwashkanki. Chasnallatatami ñukapas runaynikunata ali yuyayta atun yachayta kushkani. Chayta paykunata kushkani shuk yuyayllawa shukwa shukwa kanankunapa, imashnami ñukanchipas shuk yuyayllawa kanchi.

²³Ñuka paykunawa, kan ñukawa shuk yuyayllawa kanchi runaynikuna shuk yuyayyullashina tukunankunapa.

Munani chasna tukunankunapa kanta mana riksik runakuna paykunata shukllashina rurashkaynita rikushpankuna kan shutipa kachawashkaykita yachanankunapa, chaymantapas yachanankunapa ñukata yuyawashkaykisha runaynikunatas yuyanaykita.

²⁴Yayayni yapa yuyawanki.

Chayrayku manara kay allpata rurashpaykira ali yuyayta atun yachayta kuwashkanki kanwa pakta tukuypa amun kanaynipa. Yapa munani kuti kanpi kashpayni kuwashkayki runaynikunaka ñukawa kanankunapa. Munani tukuymanta ashwanta atunyachiwashkaykita kushikushpa wiñayparayku rikunankunapa. ²⁵Yayayni, tukuypi alita rurakmi kanki. Mana alita rurak runakuna manami kanta riksinhanchu. Ñuka shuti tukuy uras kanta alita riksini. Runaynikunapas alita yachanahun kan kachawashkaykita. ²⁶Paykunata riksichishkani atun yachayyu yapa paykunata yuyak kanaykita, chaymantapas katishami chasna kanaykita riksichishpa. Chayta rurani paykunapas yuyanakushpa shukwa shukwa kawsanankunapa, chaymantapas runa masinkunata yuyashpa imashnami kan ñukata yuyawanki. Chasna kawsashpankuna ñuka tukuy uras paykunawa kasha. Chasna nishpa Jesuska Yayanta ñukanchi runankunaryku mañarka.

Jesusta apirkakuna

(Mt. 26.47-56; Mk. 14.43-50;
Lk. 22.47-53)

18 ¹Mañashkanwasha Jesuska ñukanchi chunka shuk runankunawa pakta chay mikushkanchi wasimanta llukshirka. Jerusalén llaktamanta rirkanchi chay kuchupi

kahuk wayku Sedrón shutiyu chimpama. Chaypi tiyarka shuk chakra tarpu kaspikunawa. Chay chakrapi yaykurkanchi. ²Chaypi achka kuti tantaripayanchi. Chasna kashpan Judas, pimi Jesusta apichinan karka, chay chakrata riksirka. ³Chaypi kahushpanchi Judaska achka suntalukunawa Yaya Diospa wasinta kuyrakkunawapas paktamurka. *Saserdoteckunapa apunkuna *fariseokunapas chay kuyrakkunata Judaswa kacharkakuna. Ña tuta kashpan lamparinkunawa, chaymanta-pas llachapata mapawa armachishkata watashpa kaspipi sintichishkakunawa paktamurkakuna. Apamurkakuna lansankunata sablinkunata. ⁴Jesusta yachashpan tukuy imashnami payka pasanka, paykunata tinkuk rirkta. Chaypi tinkuk rishpan tapurka:

¿Pitata maskahunkichi?

⁵Paykunaka aynirkakuna:

Nasaretmanta runa Jesustami maska-hunchi.

Jesusta rimarka:

Ñukami kani^e nishpa.

Payta apichihuk Judaspas chay apik runakunawa pakta kahurka. ⁶Jesusta ñukami kani nishpa rimashpan chay apik runakunaka washankunama kutirishpa allpama urmarkakuna.

⁷Chaypi Jesuska kutikashka tapurka: Rimawaychi ¿pitata maskahunkichi?

Paykuna kutikashka rimarkakuna:

Nasaretmanta runa Jesustami.

⁸Jesús kuti aynirka:

Ñami rimashkani ñukami kani. Ñukata maskawahushpaykichika kay katiwhuk runakunata sakiychi rinankunapa.

⁹Chasna Jesuska rimarka Yayanta mañashpan rimashkanshina paktari-nanpa: Kuwashkayki runaynikunata

alita kuyrashpayni nima pi chinkarish-kachu nishpa. ¹⁰Chaypina Pedropas shuk sablin tiyashpan sumakta pitishpa wañuchisha nishpa pitihushpan shuk runa Malko shutiyupa kuskan parti rinkrinta pitirka. Chay rinkrin pitiy tukushka runaka saserdotenchikunapa atun apupa runanmi karka. ¹¹Chaypi Jesuska Pedrota rimarka:

Churay chay sablikita maypimi kahurka. Yayayni munan wañuchiwanankunapa. Chasna kashpan mana munanichu nima pi kishpichiwananapa.

Jesusta Anasma pusharkakuna

(Mt. 26.57-58; Mk. 14.53-54;

Lk. 22.54)

¹²Chasna Jesuska Pedrota rimashpan chay suntalukunapa apunkunaka kamachir-kakuna Jesusta apishpa watanankunapa. Jesusta watashpankuna chay suntalukunaka chay Yaya Diospa wasinta kuyrakkunawa pakta pusharkakuna. ¹³Chay wata Kaifás *saserdotenchikunapa atun apu karka. Rukun Anaska chay uras paykunapa atun apu kashkanmanta llukshishka kashpanpas apulla karka. Chayrayku Jesusta puntiru pusharkakuna Anaspa wasinma saserdotenchikunapa atun apu Kaifasa rukun kashkanrayku. ¹⁴Chay Kaifasmi manara Jesusta apishpankuna tantaylla yayarishpa kwintak atun apunchikunata kunarka kasna: Ashwan ali kama shuk runalla tukuy runakunarananti wañunarpa, mana tukuy ñukanchi israel runakuna wañunanchipa nishpa.

Pedroka Jesusta

mana riksinichu nirka

(Mt. 26.69-70; Mk. 14.66-68;

Lk. 22.55-57)

¹⁵Jesusta Anasma pushashpankuna ñukapas Pedropas katirkanchi. Jesusta

^e Chay Ñukami kani nishkaka kan Yaya Diospa shuk shutin.

apikkuna payta pushashpa rishpankuna
ñukaka washalla yaykurkani chay
apupa wasin pampam rumikunawa
rurashka wasikunawa kincharishkapi.

*Saserdoteckunapa atun apupa
riksiwashkan kashpayni mana arkawar-
kakunachu yaykunaynipa.¹⁶Pedroka
punku mayanpi kiparirkka. Mana
ñukawa pakta yaykushpan punkuma
kutirkani. Chay atun apupa riksishkan
kashpayni punkuta kuyrak warmiya
kwintak rirkani Pedrota yaykuchinay-
nipa. Chasna kwintashpayni payta
yaykuchirkani.¹⁷Chaypi punkuta
kuyrak warmika Pedrota tapurka:

¿Manachu kanki chay apishkanchi
runawa purik?

Pedroka payta aynirka:

Manami chay runawa purikchu kani
nishpa.

¹⁸Chiri kashpan chay atun apunchipa
runankuna Yaya Diospa wasinta kuyrak-
kunapas chay kincharishkapi shinkiku-
nawa ninarkakuna. Muyukta shayarish-
pankuna kunuhurkakuna. Pedropas
paykunawa pakta kunuhurka.

Israel runakunapa atun apunkuna
Jesusta tapurkakuna
(Mt. 26.59-66; Mk. 14.55-64;
Lk. 22.66-71)

¹⁹Jesusta Anaspa puntanpi
shayachishpankuna chay puntiru
*saserdoteckunapa atun apu
kashkanmanta llukshishkaka payta
tapurka:

¿Imashna kashpaykitaya runakunaka
kanta katinahun? ¿Imamantata
yachachinki?

²⁰Jesusta payta aynirka:

Ñuka nima ima uras pakalla
yachachishkanichu. Tukuy uras runaku-
napa rikushkunkunapi tantarina wasiku-
napi *Yaya Diospa wasin pipas
yachachishkani.²¹Chasna kashpan

¿imaraykutaya ñuka sapallaynita
tapuwahunki? Tapuy yachachishkayni
runakunata imatami yachachishkani.
Paykunami rimashkaynita yachanahun.

²²Chasna Jesuska chay atun aputa
mana alita tapushkanta rimashpan shuk
chaypi shayahuk Yaya Diospa wasinta
kuyrak runa payta waktarka:

¿Chasnachu ayninchi saserdoteckikuna-
napa atun aputaka? nishpa.

²³Jesusta aynirka:

Rimashkaynika mana ali kashpanka
rimaway imatami mana alitachu
rimashkani. Rimashkaynika ali
kashpanka ¿imaraykutaya waktawash-
kanki?

²⁴Chasna Jesuska rimashpan Anaska
payta kacharka ishkanti makin
watarishkata saserdoteckikunapa atun
apu Kaifasmana.

Pedroka kutikashka Jesusta mana
riksinichu nirka
(Mt. 26.71-75; Mk. 14.69-72;
Lk. 22.58-62)

²⁵Anás Jesusta tapuhushpanra
Pedroka kahurkara kunushpa nina
kuchupi. Chaypi chay atun apupa
runankunaka payta tapurkakuna:

¿Manachu kanki chay apishkanchi
runawa pakta purik?

Pedroka kuti aynirka:

Manami chay runawa purikchu kani
nishpa.

²⁶Chay atun apupa runankunamanta
shuk runan Malkopa ayllun karka,
maykanpatami Pedroka rinkrinta
pitirka. Payka kuti Pedrota tapurka:

¿Manachu kanta rikushkani apishkan-
chi runawa pakta chay tarpu kaspikuna
chakrapi? Chaypimi kanta rikurkani.

²⁷Kuti Pedroka aynirka:

Manami chay runata riksinichu nishpa.
Chasna rimahushkanllapi atallpaka
kantarka.

Jesusta Pilatoma pusharkakuna
*(Mt. 27.1-2, 11-26; Mk. 15.1-10;
 Lk. 23.1-5, 17-19)*

²⁸Pakarihushkanpi apunchikunaka Jesusta aparkakuna Kaifaska wasinmanta *romano apunchipa atun kamachinan wasima. Romano runakuna ñukanchi israel runakunata winsishpan-kuna chaypi churarkakuna shuk paykunamanta ñukanchikunata kamachik runata. Chaypi paktashpan-kuna apunchikuna manami romano apunchipa wasinpichi yaykurakuna. Yaykunahuma karka chay mana israel runapa wasinpi, mana paktachinahuma-chu karka ñukanchi israel runakunata kasunanchi killkarishkakunata. Chay wasipi yaykunahuma karka mana atipanahumachu karka ñukanchi israel runa masinkunawa tantarinata *Paskua punchakunata pasanankunapa.

²⁹Chasna kashpan chay romano apunchi *Pilatoka wasinmanta llukshirka paykunawa kwintanapta. Paykunata tapurka:

¿Imatata kay runaka rurashka?
³⁰Chaypi paykunaka aynirkakuna:
 Kay runa millaypata mana rurak kamaka, manami kanma pushamunchi-machu karka.
³¹Pilatoka paykunata aynirkakuna:
 Kankunapa kamachishka killkapi riman imashnami kastiganaykichi tiyan shuk millaypata rurak runata. Chayta kasushpa kankuna kikin kay runata kastigaychi.

Apunchikuna aynirkakuna:
 Kankuna romano runakuna mana munankichichu nima pita kastigashpa wañuchinanchipa nishpa.

³²Romano runakuna millaypata rurakkunata kruspi klabashpa wañuchi-payanahun. Chayrayku Jesusta romano apunchima pushashpankuna wañuchi-

chinanpa, Jesuspa rimashkanka paktarirka imashnami wañunka nishpa.

³³Apunchikunawa kwintashkanwasha Pilatoka kuti wasinpi yaykurka. Chaypi Jesusta kayashpan tapurka:

¿Shutipachu kanki israel masikiku-napa Atun Apu?

³⁴Jesuska aynirkakuna:

¿Kan kikin yuyaynikimantachu chayta tapuwanki? Mana kashpaka ¿shukkuna-chu ñukamanta chasna rimashkakuna?

³⁵Pilatoka rimarka:

Ñukaka manami kanichu israel runa. Kan kikinpa allpaykimanta runa masikikuna *saserdotekunapa apunkuna kanta kuwashkakuna. ¿Ima millaypatata rurashkanki?

³⁶Jesuska aynirkakuna:

Ñukaka mana kanichu kay allpapi kamachik apukunashina. Kay allpapi apukunashina kamachinimaka runaynikuna kuntraynikunawa makanakunahuma apukuna mana apiwanankunapa. Mana kay allpapi kamachik apukunashinachu kani paykunashina kamachinaynipa.

³⁷Chaypi Pilatoka tapurka:

Atun apu kanki, ¿manachu?
 Jesuska aynirkakuna:

Ari, alita rimawashkanki atun apu kanaynita nishpa. Ñuka kay allpapi wawayarishpayni shamushkani runakunata shutipa kashkata rimanaynipa. Maykankunami yachachishkayni shutipa kashkata kirinahun, paykunaka ñukata kasushpa kawsanahun.

³⁸Pilatoka aynirkakuna:

Mana yachanichu imarami chay shutipa kashkaka.

Chasna rimahushkanllapi kutikashka kanchama llukshirka apunchikunawa kwintanapta. Chaypi apunchikunata rimarka:

Ñukaka mana tarinichu millaypata rurashkanta kay runapata.

³⁹Chaymanta tukuy chaypi tantarishka kahuk runakunata rimarka:

Karan wata Paskua punchakunapi shuk kastigachihushkayni runata kacharichinaynipa tapushkaykichita kacharichipayani. Chasna kashpan ^{qm}unankichichu kay wata kay atun apuykichita kacharichinaynipa?

⁴⁰Chaypi kaparishpa aynirkakuna:
¡Mana paytaka kacharichichu!
¡Barrabasta kacharichiy!

Barrabaska romano runakunata piñarik karka. Chasna kashpan runakunata wañuchishpa kawsapayarka.

Jesuska wañunan tiyan nirkakuna

(Mt. 27.13-14, 20-31;

Mk. 15.4-5, 11-20; Lk. 23.13-25)

19 ¹Chay achka runakuna mana munashpankuna Jesusta kacharichinanpa *Pilatoka suntalunkunata kamachirka Jesusta asutinankunapa shuk kirukunawa rurarishka karawa. Chasnami shuk mana alichaypa uchayu runata manarapas kruspi klabashpankuna rurapayanahun. ²Chasna asutishpankuna chay suntalukunaka kashamanta llawtuta rurashpankuna atun apupa tawasampatashina umanpi churarkakuna. Chaymantapas shuk atun apupa puka churarinanta asichishpa churachirkakuna. ³Payta shuk atun aputashina kayllayashpankuna asichishpa saludarkakuna:

¿Shamushkankichu israel runakunapa Atun Apu?

Chasna nishpankuna uyanpi sakmarkakuna.

⁴Chaypi kutikashka Pilatoka llukshirka wasinmanta apunchikunawa kwintananpa kasna nishpa:

Rikuychi, kay runata llukshichihushkaynita. Puntaykichipi churahumi yachanaykipa manami kay runapi tarishkanichu nima shuk mana ali rurashkanta nishpa.

⁵Chaypi Jesuska kanchama llukshirka chay kashamanta rurarishka tawasampatashina umanpi churachishkankunawa, chay atun apupa suma puka churachishkankunawa. Payta rikuchishpa Pilatoka rimarka:

Kaykaya rikuychi kay runata nishpa.

⁶Kanchama llukshishkata rikushpankuna *saserdotekunapa apunkuna Yaya Diospa wasinta kuyrakkunapas kaparirakuna:

¡Kruspi klabashpa wañuchichiy!

¡Kruspi klabashpa wañuchichiy!

Pilatoka aynirka:

Kankuna apaychi kruspi klabanaykipa. Ñukaka manami tarinichu nima shuk millaypa rurashkanta kay runapata.

⁷Chaypi apunchikuna payta rimarka:

Ñukanchipa tiyan shuk kamachina. Chay kamachinanchipi riman: Maykan runami yanka riman Yaya Diosmi kani nishpa, chay runaka wañunan tiyan. Kay Jesuska Yaya Diospa Wawanmi kani yanka nishpa rimashkanrayku wañunan tiyan.

⁸Pilatoka chasna Jesús Yaya Diospa Wawanmi kani nishkanta uyashpan yapa mancharirka. ⁹Kutikashka wasinpi yaykushpan Jesusta kayachishpan tapurka:

¿Maymantataya kanki? nishpa.

Jesuska chunlla uyarka. ¹⁰Chasna mana aynishpan Pilatoka payta rimarka:

¿Manachu ñukata ayniwanki? Ñuka munashpaynika kamachinima kanta kruspi klabashpankuna wañuchinankunapa. Chaymantapas munashpaynika kamachinima kanta kacharinankunapa.

¿Manachu chayta yuyarinki?

¹¹Chaypi Jesuska aynirka:

Yaya Dios mana munamaka nima imata atipawankimachu ruranata. Chasna kashpan maykanmi kanta

kuwarka, payka kanmanta ashwan uchayumi kan.

¹²Chaymanta pacha Pilatoka ashwanta maskarka payta kishpichinanpa. Mana munashpankuna apunchikunaka kaparirkakunalla:

¡Kan kishpichishpaykika chay runata mana kankichu *romano tukuymanta atun apuykita kasuk! Ñukanchi israel runakuna kankunapa winsishkaykichi kanchi. Chasna kashpan maykan runa masinchipas kay Jesusschina atun apunchi kanayan ñukanchikunata kankunamanta kishpichinanpa, chayka romano tukuymanta atun apuykipa kuntranmi kan.

¹³Pilatoka chasna rimashkunkunata uyashpan kamachirka Jesusta apak rinankunapa. Chaymanta tiyarirka chay tiyarinapi maypimi apirishka runakunata tapupayan. Chay tiyarinaka karka shuk rumikunamanta suma rurarishka chushapi, *hebreo shimpipi Gabata shutiyu. ¹⁴Shuk puncha pishihushpanra *Paskua punchakunaryku chawpi puncha parti Jesusta Pilatopa puntanpi churarkakuna. Pilatoka yacharka chay apukunaka mana shutipa yuyarishkunkunata Jesús israel runakunata kishpichik atun apunkuna kananta. Shutipa apunkuna kananta yuyarinahuma karka, manami payta kunahumachu karka. Chayta yachashpan apunchikunata pukllachishpa rimarka:

Kaykaya rikuychi Atun Apuykichita.

¹⁵Chasna rimashpan apunchikunaka kaparirkakuna:

¡Wañuchichiy! ¡Wañuchichiy! ¡Kruspi klabachiy!

Pilatoka paykunata aynirka:

¿Imashnataya yuyarinkichi? ¿Ñuka kankunata winsishka romano runakunamanta kashpayni munankichichu kankuna kikinpa Atun Apuykichita wañuchichinaynipa?

Chaypi saserdotekunapa apunkunaka aynirkakuna:

Ñukanchipa mana tiyanchu ashwan atun apunchika, romano tukuymanta atun apuykimi ñukanchipapas atun apunchika.

¹⁶Chaypi Pilatoka ari nishpanna Jesusta paykunata kurka kruspi klabachinankunapa.

Jesusta kruspi klabachirkakuna

(Mt. 27.32-38, 55-56; Mk. 15.21-27, 40-41; Lk. 23.26-38, 48-49)

*Pilatoka apunchikunata ari nishpan klabachinankunapa suntalunkunaka Jesusta aparkakuna. ¹⁷Krusninta markachishpankuna apashpa rirkakuna Jerusalén llaktamanta kanchama. Payta pusharkakuna Wañushkapa Uman shutiyu lumama. *Hebreo shimpipi shutinka kan Gólgota. ¹⁸Chaypina Jesusta kruspi klabarkakuna, chaymantapas ishkay runakunata karan shukta shuk kruspi chaypi wañunankunapa. Chay runawa pakta kruskunata shayachishpankuna Jesusta chay ishkay runakuna chawpinkunapi churarkakuna. ¹⁹Chasna Jesús kruspi klabarishkata shayachishpankuna Pilatoka shuk killkarishkata churachirka: Kayka Jesús Nasaretmanta israel runakunapa Atun Apunkunami nishpa. ²⁰Jesusta Jerusalén llakta mayandi kruspi klabashpa wañuchihurkakuna. Chay atun llakta kuchupi kashpan achka israel runa masinchikuna chay kruspi churashkunkuna killkarishkata leyirkakuna. Kimsa shimikunapi killkarishka karka, hebreo, *latino, *griego shimpipi. ²¹Chaypi *saserdotenchi-kunapa apunkunaka chay killkarishkata leyishpankuna Pilatota rimarkakuna:

Ama killkachiychu israel runakunapa Atun Apunkuna nishpa. Kasna killkachiy: Kay runaka rimarka: Ñukami kani israel runakunapa atun apunkuna nishpa.

²²Pilatoka paykunata aynirka: Maykantami killkachishkani, chayka chasnalla kiparinan tiyan.

²³Suntalukunaka Jesusta kruspi klabashkankunawasha llatanachishkankuna churarinankunata apirkakuna. Likishpankuna chay chusku suntalukuna karan shuk shuk pitikunata paykuna kikinrayku aparkakuna. Ukupi churarinanllata mana likirkakunachu. Chay churarinanka muyukta awarishka karka. Mana sirarishkachu karka. ²⁴Chasna suma rurarishka kashpan suntalukunaka kwintarkakuna paykunapura:

Ama likishunchichu. Akuychi swirtinchita kamashunchi pishi apanka nishpa.

Chasnapi Yaya Diospa ñawpa killkachishkanka paktarirka kasna nishkaka:

Churarinayita likishpankuna karan shuk runa shuk pitikunata aparka. Ukupi churarinaynitaka apishpankuna swirtinkunata kamarkakuna pishi apanka nishpa.

²⁵Chay Jesuspa krusnin mayandi chusku payta katik warmikuna kahurkakuna. Shuk karka Jesuspa maman, shukka mamanpa ñañan. Chaymanta karka Kleofaska warmin Maria shutiyu, shukka karka Magdala llaktamanta Maria shutiyu. ²⁶Jesuska mamanta ñukatapas rikushpan kuchunpi kahushkanchita, mamanta ñukata ñawinwa rikuchishpa rimarka:

Paymi kiparin wawaykishina.

²⁷Chaymantapas ñukata mamanmanta rimawarka:

Paymi kiparin mamaykishina nishpa.

Chasna rimawashpan Jesuspa mamanta pusharkani chay urasmanta pacha wasinipi kawsananpa.

Jesuska ña wañurkana
(Mt. 27.45-50; Mk. 15.33-37;
Lk. 23.36-37, 46)

²⁸Chaymanta Jesús yachashpan tukuy Yayan Diospa kamachishkanta ña paktachihushkanta rimarka:

Upyanayanimi nishpa.

Chasna rimarka ñawpa Yaya Diospa shuk killkachishkanka paktarinanpa.

²⁹Chaypi tiyarka shuk uchilla tinaha agru *vinuwa. Chay vinuwa shuk suni kaspipi watarishka utkuta upyachirkakuna. Chayta Jesuspa shimini tupachirkakuna upyananpa. ³⁰Jesuska chay agru vinuta tsunkashpa upyashpan sinchita rimarka:

Yayayni, ñami tukuy kamachiwash-kaykita paktachishkani nishpa.

Chasna rimashkanwasha umanta warkuchishpan pay munay wañurka.

Shuk suntalu Jesusta lansawa tuksirka wañushkachu nishpa

³¹Jesuska kruspi wañushpan *Paskua punchakunaryku alicharinankuna puncha karka. Chay Paskua punchakuna kallarinan punchaka tukuy *samana punchakunamanta ashwan atun samana puncha kapayan. Chay atun samana puncha kallaripayan ña intika yaykuhushkanpi. Mana munarkakunachu chay puncharayku kruspi wañushka runakunapa aychankunaka chayllapi kiparinankunapa. Chayrayku apunchikunaka *Pilatota tapurkakuna kruspi klabarishhkakunapa chakinkunata pakichinanpa utkalla wañunankunapa. Chaymantapas tapurkakuna chasna utkalla wañushpankuna aychankunata chay chishillapi krusmanta uraykuchinankunapa. ³²Chasna tapushkankunaryku Pilatoka suntalunkunata kacharka chakinkunata pakinankunapa. Puntiru chay ishkay Jesuswa pakta kruspi klabarishhkakunapa chakinkunatara pakik rirkakuna. ³³Jesusta kayllayashpankuna chakinta pakinankunapa rikurkakuna ña wañushka kahushkanta. Chayrayku chakinta mana pakirkakunachu. ³⁴Ashwan shuk suntalu kushtillan partipi lansawa tuksirka. Chasnallapi

yawarka yakuka llukshirka.³⁵Tukuy chaykunata ñuka Juan kikin ñawiniwa rikurkani. Shutipa rikushkaynita rimani kankunapas Jesukristupi sinchikurinay-kichipa.³⁶Imashnami Yaya Diospa ñawpa killkachishkanpi riman:

Mana nima shuk tulluta payta
pakinkakunachu nishpa.

Chasnashinami paktarirka. Chayrayku suntalukunaka nima shuk Jesuspa tullunta pakirkakunachu.³⁷Chaymanta-pas shuk parti Yaya Diospa ñawpa killkachishkanpi riman:

Shuk puncha atunta llakirishpa
yuyarinankuna tiyan payta
tukshikankunata nishpa.

**Jesuspa aychanta urku uchkupi
churashpa taparkakuna**
(Mt. 27.57-61; Mk. 15.43-47;
Lk. 23.50-56)

³⁸Chaypi tiyarka shuk apunchi José shutiyu Arimatea llaktamanta. Payka Jesuspa kirik runa karka. Chasna kashpanpas mana munarkachu nima pi yachananpa apu masinkunata manchashkanrayku. Chay runaka *Pilatoma rirkta tapunanpa Jesuspa aychanta allarishka urku uchkupi churashpa tapananpa. Pilatoka arí nishpan Jesuspa aychanta apak rirkta churashpa tapak rinanpa.³⁹Chay *fariseo Nikodemopas Joseta yanapak rirkta. Paymi karka maykanmi shuk tutapi Jesuswa kwintananpa shumurka. Chay runaka paktashpan kimsa chunka kilo parti mishkinlla asnak yapa chaniyu wikita apamurka. Chay wikika mirra kaspipa áloe kaspipa wikinwa chapurishka karka.⁴⁰Chaypi Josefa Nikodemowa Jesuspa aychanta chay wikipi armachishkan ñiañu llachapawa wankurakuna. Chasna ñukanchi israel runakuna wañushkakunawa rurapayan-chi chaymanta urku uchkupi churashpa

tapananchipa.⁴¹Jesusta kruspi klabash-kankuna parti tiyarka shuk chakra tarpu kaspikunawa. Chay chakrapi tiyarka shuk urku maypimi shuk parti allarishka karka wañushkakunata churashpa tapananchipa. Mushu uchku kashpan chaypi manara wañushkaku-nata churahurkakunarachu.⁴²Jesús wañushkan mayanllapi kashkanrayku chaypi utkalla paypa aychanta churashpa taparkakuna, atun samanan-chi puncha ña kallarinan kashkanrayku.

Jesuska kawsarirka

(Mt. 28.1-8; Mk. 16.1-8; Lk. 24.1-12)

20 ^{1*}Samana puncha kayantima manara alita pakarihushpanra Magdalamenta María rikunapa rirkta Jesuspa aychanta urku uchkupi churashkankunata. Chaypi paktashpan rikurka churashkankuna punku atun rumiwa taparishkaka anchuchirishka kahushkata.²Uchku ukuma illata rikushpan kallpa shamurka rimananpa maypimi Pedro ñukapas Jesuspa yapa yuyashkan runan kahurkanchi. Chaypi ñukanchita rimarka:

¡Ñukanchita yachachikpa aychantami churashkankuna uchkumanta apashkakuna! Kunanka manami yachanchichu maypimi churashkakuna.

³Chasna rimashkanta uyashpanchi Pedro ñukapas kallpa rirkanchi Jesuspa aychanta churashkankuna uchkuma.⁴Ishkanti parihu kallparkanchi. Ñuka Pedromanta ashwan sinchita kallpashpayni puntiru paktarkani.⁵Chay churashkankuna uchkupi paktashpayni kumurishpa punkumantalla ukuma rikurkani. Payta wankush-kankuna llachapallata rikurkani.⁶Washay-nilla Pedropas paktamurka. Payka ñukata pasamuwashpan Jesuspa aychanta churashkankunakama yaykurka. Chaypi paypas Jesusta wankushkankuna ñañu llachapallata rikurkana.⁷Chaymantapas

rikurka Jesuspa umanta wankushkankuna llachapata. Manami chay shuk wankushkankuna llachapawa pakta karkachu. Shuk parti kahurka suma alicharishka.⁸ Chasna Pedro churashkankuna uchkupi yaykushpan ūukapas yaykurkani. Jesusta wankushkankuna llachapata aychan illata rikushpayni kawsarishkanta kirirkani.⁹ Chay uras manara asirtarkanchirachu Yaya Diospa ūawpa killkachishkanta: Payka wañushkanmanta kawsarinan tiyan nishpa.¹⁰ Chayta rikushkanchiwasha chay wasimallatata kutirkanchi.

Jesuska Mariata rikurirkka
(Mk. 16.9-11)

¹¹ Pedro ūuka Jesuspa aychanta churashkankuna uchkuma kallpa rishpanchi Mariaka washata katimurka. Nukanchi kutishpanchi payka uchku mayanpi kaparishpa wakashpa kiparirkka. Chasna wakahushpan kumurishpa ukuma rikurka.¹² Chaypi rikurka ishkay *angelkuna yura churarishkakunata. Maypimi Jesuspa aychanta churarkakuna chaypi tiyarishka kahurkakuna. Shukka uman parti tiyaturka, shukka chakin parti.¹³ Chaypi chay ishkay angelkunaka payta tapurkakuna:

¿Imaraykuta wakahunki?

Payka aynirkha:

Apashkakunami ūukanchita yachachilkpa aychanta. Mana yachanichu maypichari churashkakuna.

¹⁴ Chasna rimashpan tikrarirkka. Chaypi shuk runata rikurka. Mana yacharkachu chay runa Jesús kananta.

¹⁵ Chaypi Jesuska payta tapurka: Pani, ¿imaraykuta wakahunki? ¿Pitata maskahunki? nishpa.

Payka chay tarpu kaspikunata kuyrak runa kananta yuyarishpan payta rimarka:

Turi, kan paypa aychanta apashpaykika rimaway maypimi churashkanki, chaymanta apak rinaynipa.

¹⁶ Chaypi Jesuska shutinpi rimarka Maria nishpa.

Shutinta uyashpan alita tikrarishpan rikurka. Jesusta riksishpan *hebreo shimpipi rimarka:

Yachachik, kanchu kanki nishpa.

¹⁷ Maria makinta apik rishpan Jesuska payta rimarka:

Kachariway. Mana arkawaychu Yayaynima rinaynipa. Manara payma rishkanirachu. Kanka riylla, wawkinikunata rimakriy Yayaynima ña rina kahushkaynita. ūukapa Yayaynika kankunapapas Yayaykichimi. ūukapa Yaya Diosnika kankunapapas Yaya Diosnikichimi.

¹⁸ Chasna Jesuspa rimashkanta uyashpan chay Maria Magdala llaktamanta warmika ūukanchi Jesuspa runankunata rimak shamurka payta rikushkanta. Chaymantapas ūukanchita rimarka Jesuspa tukuy rimashkanta.

Jesuska runankunata rikurirkka
(Mt. 28.16-20; Mk. 16.14-19;
Lk. 24.36-49)

¹⁹ Chay *samana puncha kayantima tutayahushpan ūukanchi Jesuspa runankunaka shuk wasipi tantarishka kahurkanchi. Apunchikunata manchashpanchi punkuta sumakta taparkanchi. Chay suma taparishkanchi wasipi yaykushpan Jesuska chawpinchipi shayarishpan rimarka:

Yaya Dios kankunata kushillayachichun mana manchashpa kawsanaykichipa.

²⁰ Chasna rimashkanwasha ūukanchita makinta kushtillantapas rikuchirka, litrankunata rikushpanchi pay kananta riksinchipa. ūukanchita yachachik kananta riksishpanchi atunta kushikurkanchi.²¹ Chaypi Jesuska kutikashka rimarka:

Yaya Dios kankunata kushillayachichun mana manchashpa kawsanaykichipa. Yayayni Dioska ūukata

kachawashka payta mana riksik runakunata kawsanayniwa yachachinayniwa payta riksichinaynipa. Kunan ñuka kankunata kachani chasnallatata ruranaykicipa.

²²Chasna rimashkanwasha ñukanchi parti pukurka kasna nishpa:

Kay kachahushkayni Yaya Diospa Espiritunta shunkuykichipi yaykuchiy-chi. ²³Chasna Yaya Diospa yachayninwa kashpaykichi paypa yayarishkanta riksinkichi. Chasna kashpan maykan runakunatami rimankichi uchaykichiku-namanta llakichirishka kankichi nishpa, paykunataka Yaya Dioska uchankuna-manta llakichinkami. Maykan runakunatami rimankichi uchaykichikunamanta mana llakichirishkachu kankichi nishpa, paykunataka Yaya Dioska manami uchankunamanta llakichinkachu.

Tomaska Jesús kawsarishkata rikurka

²⁴Jesús ñukanchita chasna rikurishpan Tomaska mana chaypichu karka. Paypas ñukanchi chunka ishkay Jesuspa runankunamanta karka maykantami rimapayanchi ishkay wawayarishka. ²⁵Tomaska ñukanchipi paktamushpan payta rimarkanchi:

Ñukanchita yachachiktami rikushkan-chi nishpa.

Payka ñukanchita mana kirishpan aynirka:

Mana rikushpaynika klabu makinpi yaykushka uchkuta kushtillanpi tuksish-kankuna uchkuta, chaymantapas mana llankashpaynika manami kawsarish-kanta kirishanchu.

²⁶Shuk semanamanta kuti chay wasipi tantarirkanchi. Chaypi Tomaspas ñukanchiwa pakta kahurka. Punktumakta taparishka kashpanpas Jesuska kutikashka yaykurka. Chawpinchipi shayarishpan rimarka:

Yaya Dios kankunata kushillayachi-chun mana manchashpa kawsanayki-chipa nishpa.

²⁷Chaymanta Tomasta rimarka:

Makinita alita rikuk shamuy.

Makikita satiy kay klabu yaykushkapi. Chaymantapas tuksiwashkankuna kushtillaynipi makikita satiy. Ama kaychu mana kirik runakunashina. Wañushkaynimanta kawsarishkaynita kiryi.

²⁸Chaypi Tomaska payta riksishpan rimarka:

Amuyni kanki, Yaya Diosnimi kanki nishpa.

²⁹Chasna uyashpan Jesuska kutikashka payta rimarka:

Rikuwashpaykirami kawsarimushkay-nita kirishkanki. Kushilla kankakuna maykan runakunami mana rikuwash-pankunapas kawsarimushkaynita kirinahun.

Kay killkaka imaraykumi killkarishka kan

³⁰Kay killkapi mana killkashkanichu Jesuspa tukuy rurashkanta. Killkash-kaynimanta ashwan achka nima ima uras rikushkanchita rurashka ñukanchi paypa runankunata Yaya Diospa yachayninwa kahushkanta rikuchi-nampa. ³¹Tukuy maykantami killkash-kani, killkashkanimi Jesús Yaya Diospa Kachashkan Kishpichik kananta kirinay-kichipa, chaymantapas Yaya Diospa Wawan kananta. Kankunaryku killkashkani kirishpaykichi Yaya Dios munashkanshina shutipa kawsayta tarinaykicipa.

Jesuska kanchis paypa runankunata rikurirká

21 ¹Chaymanta kanchis ñukanchi Jesuspa runankunaka Galilea allpama kutirkanchi. Chaypi shuk parti

Tiberias^f kucha mayanpi kahushpanchi Jesuska kutikashka ñukanchita rikurirka. ²Chaypi kahurkanchi Simón Pedro shutiyu, shukka Tomás maykantami rimapayanchi ishkay wawayarishka, shukka Natanael Galileapi kahuk Kaná llaktamanta runa, chaymanta ñuka wawkinwa Sebedeopa wawan-kuna, chaymantapas ishkay ashwan Jesuspa runankuna karkanchi. ³Pedroka ñukanchita rimarka:

Rediyak rishara nishpa.

Chasna rimashkanta uyashpanchi aynirkanchi:

Ñukanchipas rinayanchimi kanwa.

Chasna paywa rishpanchi botipi uraykurkanchi. Pakarikta rediyashpanchipas nima shuk challwata apirkanchichu. ⁴Na pakarihushkapi botillapi kahushpanchira shuk runata yaku mayanpi shayahukta rikurkanchi. Ñukanchika mana yacharkanchichu Jesús kananta. ⁵Payka ñukanchita tapurka:

Wawkikuna, ¿mana apishkankichi challwata?

Ñukanchika aynirkanchi:

Mana, nima shukta apishkanchichu.

⁶Chasna rimashpanchi payka aynirkaka:

Redikichita kachariychi botikichipa kuskan parti. Chaypimi apinkichi.

Payta kasushpanchi redinchita kacharirkanchi. Chaypi achka challwakunata wishishpanchi mana atiparkan-chichu redinchita uraykuchinata.

⁷Chaypi Jesusta riksishpayni Pedrota rimarkani:

Payka ñukanchita yachachikmi nishpa.

Chasna rimashkaynita uyashpan Pedroka tarawananca llatanashkan churarinanta churarishpan yakupi saltarka waytashpa Jesusta tinkuk

rinanpa. ⁸Botinchi shuk pachak metro tiyu mayanmanta chawpipi kashpan ñukanchi botinchipi kiparikkunaka redinchita achka challwakunawa aysachishpa tiyu mayanpi paktarkanchi. ⁹Botinchimanta tiyuma llukshishpanchi shuk shinkikunawa nina sintihushkata rikurkanchi. Chay nina awapi challwaka chayhurka. Chaymanta tiyarka pan. ¹⁰Chaypi ña Pedropas tiyu mayanpi paktarka. Jesús parti rina kashpanchi payka ñukanchita rimarka:

Kunalla apishkaykichi challwakunamanta shukkunata apamuychi nishpa.

¹¹Chayta uyashpan Pedroka botinchipi uraykushpan redita challwakunanti tiyu mayanma aysamurka. Chay redipi kahurkakuna shuk pachak pichka chunka kimsa atun challwakuna. Yapa achka challwakuna kashpankunapas redinchika mana likirirkachu. ¹²Jesuska chaypi ñukanchita rimarka:

Mikuk shamuychi nishpa.

Ña ñukanchita yachachik kashkanta yachashpanchi nima pi munarkanchichu tapunata ¿pita kanki? nishpa. ¹³Jesuska panta apishpan ñukanchita kayllayashpan kurka mikunanchipa, chaymanta challwatapas. ¹⁴Kayka kimsaynin kuti karka Jesús wañushkanmanta kawsarimushkanwasha ñukanchita rikurish-kanka.

Jesuska Pedrowa kwintarka

¹⁵Mikushkanchiwasha Jesuska Pedrota ñawpa shutinpi rimashpan tapurka:

Juanpa wawan Simón ¿kanka yuyawankichu ashwan kay shuk runaynikunamanta?

Pedroka aynirkaka:

Ari Amuyni, kan yachanki kanta yuyahushkaynita.

^f Chay kuchapa shuk shutinka kan Galilea kucha, shuk shutinka kan Genesaret kucha

Chaypi Jesuska nirka:
Imashnami obebakuna shuk kuyrakta
munanahun mana pantanankunapa
nima chinkarinankunapa chasnashinami
runaynikunapas shuk kuyrakta munana-
hun. Kanka kuyray ñukapi sinchikuk
runakunata.

¹⁶Chaymanta kutikashka tapurka:

Juanpa wawan Simón, ¿kanka
yuyawankichu ashwan kay shuk
runaynikunamanta?

Pedroka kutikashka chasnallatata
aynirka:

Ari Amuyni, kan yachanki kanta
yuyahushkaynita.

Chaypi Jesuska kutikashka rimarka:

Kuyray ñukapi sinchikuk runakunata.

¹⁷Chaymanta kimsaynin kuti Pedrota
tapurka:

Juanpa wawan Simón, ¿kanka
yuyawankichu ashwan kay shuk
runaynikunamanta?

Kimsaynin kuti payta yuyawankichu
nishpa tapushkanta uyashpan Pedroka
yapa llakirishpan aynirka:

Amuyni, tukuya yachak kashpayki
kanta yuyahushkaynita yachanki.

Chaypi Jesuska kutikashka payta
aynirka:

Kuyray ñukapi sinchikuk runakunata.

¹⁸Alita uyaway. Musu kashkayki uras
churarishkaykita wataripayarkanki
purihushkaykipi kanta mana arkananpa.
Chasna munashkaykita puripayarkanki.
Ashwanta rukuyashpayki makikita
alsanki kanta llakichinankunapa.
Shukkunana kanta watashpankuna
mana llakichishpa apirishkata pushan-
kakuna maymami mana rinayankichu.

¹⁹Chaytaka rimarka asirtachinanpa
imashnami Pedroka parisishpa wañunan

karka. Chasna Yaya Diosta kasushkan-
rayku wañushpan runakunata rikuchi-
nan karka Yaya Diosta yapa yuyash-
kanta. Chaymanta Jesuska payta
rimarka:

Ñukata kirishpalla katiway nishpa.

²⁰Pedroka tikrarishpan ñukata

rikuwarka washa shamuhushkaynita.
Ñuka Jesuspa yapa yuyashkan runan
karkani. Manara Jesúis wañushpanra
paywa pakta mikuhushkanchi uras
paypa kuchunpi kahushpayni tapurkani:
Amuyni, ¿pita kanta apichinka? nishpa.

²¹Ñukata rikuwashpan Pedroka Jesusta
ñukamanta tapurka:

Amuyni, ¿imashnata payka tukunka?

²²Chaypi Jesuska payta aynirka:

Munashpaynika pay kawsananta
kutimunayni punchakama ¿imaraykuta
yachanayki tiyan? Kanka ñukapi
kirishpa katiwaylla.

²³Chasna rimashpan Jesuspa chunka
ishkay runankunamanta shuk runan
masinikuna paykunapura rimarkakuna:

Manashi Juanka wañunkachu nishpa.

Jesuska mana chayta rimashpanpas
chasna yuyarirkakuna. Payka rimahur-
kami: Munashpaynika pay kawsananta
kutimunayni punchakama ¿imaraykuta
yachanayki tiyan kanka? nishpa.

Chayllata killkachishkani ñuka Juan
Jesuspa runan. ²⁴Chayllata killkachi-
washka chay rikushkanta. Ñukanchi
kirik masinkunaka yachanchimi paypa
rimashkanka shutipa kananta. ²⁵Tiyan
achka Jesuspa rurashkankuna maykan-
tami mana killkashkanchichu. Tukuya
shukllankama shukllankama killkan-
chima karka yuyarini killkashkanchi
killkakunaka mana paktanahumachu
karka kay allpapi.

JESUSTA KATIKKUNAMANTA KWINTAK KILLKA

Lukas killkarka Jesuspa
rimashkanta Yaya Diospa Espíritun
shamunanmanta

1 ¹Ñuka Lukas kan Teofilorayku
killkani: Munashkayni Teófilo:
Ñuka puntiru killkashkaynipi kanta
killkarkani Jesuspa tukuy rurashkanta,
yachachishkantapas, kállarishkanmanta
pacha siluma sikanankama. Kunan
kutikashkka killkahuni. ²Jesuska manara
siluma sikahushpan payta katikkunata
akllarka paypa shiminta yachachinanku-
napa tukuy runakunata. Yaya Diospa
Espíritun Jesusta yachachishpan chay
akllashkan runankunata kamachirka
imatami ruranankuna tiyan. Chaymant-
ana Yaya Dioska Wawanta siluma
sikachirka.

³Wañushkanwasha kawsarishpan
manara siluma sikahushpanra Jesuska
chusku chunka punchata runankunata
rikurirka. Chasna rikurishpan achka
chikan chikan rurashkanwa paykunata
riksichirka wañushkanmanta shutipa
kawsarishka kananta. Chaymantapas
katirkalla rimashpa imashnami Yaya
Diospa ali kamachinanka kay allpapi
nishpa. ⁴Chasna paypa runankunawa
tantaylla kahushpanra Jesuska
paykunata rimarka:

Kutishpaykichi Jerusalenma ama
llukshinkichirachu. Chayllapi chapaychi
Yaya Diospa Espíritun paktanankama,

Yaya Dios ñawpa rimashkanshina,
maykantami ñukapas kankunata
rimarkani. ⁵Bawtisak Juanka yakuwa
runakunata bawtisarka. Ashwan shuk
punchakunamantami Yaya Dioska
kankunata paypa Espiritunta kushpa
shunkuykichita aliyachinka.

Jesuska siluma sikarka

⁶Shuk puncha runankunaka
kutikashka Jesuswa pakta kahushpan-
kuna tapurkakuna:

Yaya Jesús, ¿kunanchu kanka Israel
allpanchapi atun apunchi tukunki?
Imashnami ñawpa atun apunchikuna
ñukanchikunata tukuy kuntranchiku-
nata winsishpa alita kamachipayarka-
kuna, chasnallatata ¿kunanchu
ñukanchikunata kishpichishpa
kamachinki?

⁷Chasna tapushpanguna Jesuska
aynirka:

Kankunaka chaytaka mana yachanayki-
chi tiyanchu. Yaya Diosmi yachayninwa
ñukata atun aputa rurawanka, ima
punchachari pay munan. ⁸Chasna kashpan-
pas Yaya Diospa Espíritun shamushpan
kankunata ashwan yachayta kunka sinchi
kanaykichipa, ñukamanta rimakkuna.
Chasna kashpaykichimi Jerusalén llaktapi
tukuy Judea allpapipas ñukamanta
rimankichi. Chaymanta *Samaria allpama
tukuy parti kay allpapi ñukamanta rimak
rinkichi.

⁹Chasna rimashkanwasha paykuna rikuhashkankunallapi Jesuska kallarirka awayanata siluma. Rikuhashkankunapi puyuka arkarka payta, manana atiparkakunanachu rikunata. ¹⁰Chasna sikahushkanta rikuhashpangkuna kunkaymanta ishkay runakuna yura churarishkakunaka kuchunkunapi rikurirkakuna. ¹¹Chaypina rimarkakuna:

Galileamanta runakuna, ¿imaraykuta awama rikurayahunkichi? Nami Jesuska siluma sikashka. Chay Jesusllatata, maykantami Yaya Dioska siluma sikachishka, imashna rihuhashkanta rikushkankichi, chasnallatatami kuti shamunka kay allpama.

Matiasta akllarkakuna Judasranti

¹²Chaypina Jesuspa akllashkan *apostol kunaka Olivos urkumanta kutimurkakuna Jerusalén llaktama. Chay urkuka Jerusalén kuchupi karka, *samana puncha purina tupullapi. ¹³Jerusalenpi paktashpangkuna shuk wasipi yaykurakuna, awaniru kawitupi sikashpangkuna tantarirkakuna. Chaypi kahurakuna Pedro, Juan, *Santiago, Andrés, Felipe, Tomás, Bartolomé, *Mateo, Alfeopa wawan Santiago, Simón, maykantami rimapayana-hun *Selote, chaymanta Santiagopa wawan Judas.^a ¹⁴Tukuy paykuna shuk yuyayllawa tantaripayahanun Yaya Dioswa kwintanankunapa. Chasnallatata paykunawa tantarishka karkakuna Jesuspa wawkin-kuna, maman Mariapas, ashwan shuk warmikunapas.

¹⁵Chay punchakunapi shuk pachak ishkay chunka Jesusta kirik runakuna tantarishka kahurakuna Yaya Dioswa kwintanankunapa. Shuk puncha Pedroka shayarirka rimananpa:

¹⁶Wawkinikuna paninikuna, ñawpa killkarishkaka paktarinan karka. Yaya

Diospa Espíritun ñawpa atun apunchi Davidta Judasmanta killkachirka, maykanmi Jesusta apichirka. ¹⁷Judaska ñukanchiwa pakta Jesuspa akllashkan karka Yaya Diospa shiminta rimashpa purinanchipa. ¹⁸Jesusta apichishkan-rayku apishkan kullkita kutichishpan chaywa shuk allpata rantirkakuna. Chaymanta Judaska wañuchirinayash-pan awamanta uray sinka partipta chunchulin shikwakta urmeshpan wañurka. ¹⁹Jerusalemanta runakuna chayta yachashpangkuna Judaspa kutichishkan kullkiwa rantishkankuna allpata Yawar Allpa nishpa shutiyachir-kakuna. Paykunapa shiminkunapi Aséldama ninahun.

²⁰Salmos killkapi Judasmanta kasna killkarishka kan:

Chay mana ali rurakpa wasinka chusha kiparinka. Nima pi chaypi kawsankachu.

Chaymantapas riman:

Shuk runana chay wañushka runapa tarawananta ruranan tiyan nishpa.

²¹⁻²²Chasna kashpan kay kirikkunamanta shuk runa yaykunan tiyan Judasranti ñukanchishina Jesuspa kachashkan runan tukunarpa. Payka kanan tiyan shuk runa, maykanmi Juan Jesusta bawtisashkanmanta pacha ñukanchiwa pakta tukuy Jesuspa rurashkankunata rikushka, tukuy yachachishkankunata uyashka, chaymantapas maykanmi Jesuspa wañushkanta, kawsarishkanta, siluma sikashkantapas rikushka. Chay runaka Jesuspa kawsarishkanta ñukanchishina rikushkanrayku ñukanchiwa pakta runakunata rimak tukunan tiyan.

²³Pedro chasna rimashpan chay tantarishka runakunaka ishkay runaku-

nata akllarkakuna paykunamanta shuklla akllarishka kananpa. Shuk karka José, paypa shuk shutinka Barsabás, shuk shutinpas Justo karka. Chaymanta shukka karka Matias.²⁴⁻²⁵ Chasna shutinkunata killkashkankunawasha Yaya Diosta mañarkakuna kasna nishpa:

Yaya Dios, kanmi tukuy shunkunchita riksinki. Ñukanchita rikuchiy kay ishkay runakunamanta maykantata akllash-kanki Judasranti shimikitayachachik runa tukunanza. Judaska uchata rurashkanrayku manana ñukanchiwa pakta kanmanta yachachinnachu. Wañushpan rirka maypimi parisinka wiñaypata.

²⁶ Mañashkankunawasha ishkay rumistukunawa swirltinkunata kamarkakuna yachanankunapa maykantami Yaya Dioska akllashka. Chasna rurashpankuna Matiaska akllarishka karka. Chay punchamanta pacha Matiaska chay chunka shuk Jesuspa shiminta yachachik apostolkunawa pakta apostollatata tukurka.

Yaya Diospa Espíritun shamurka

2 ¹Pichka chunka puncha Jesuspa kawsarishkanmanta israel runakunapa *Pentekostés shutiyu puncha karka. Chay punchapi tukuy Jesusta kirikkuna tantarishka kahurkakuna shuk wasillapi. ²Kunkaymanta sinchita silumanta uyarimuhukta uyarkakuna sinchi wayratashina. Chay tantarishka kahushkankuna wasipi tapakta uyarkakuna. ³Chaypi kunkaymanta rikurakuna karan shukpa umanpi nina sintihuktashina. ⁴Chaypina Yaya Diospa Espíritun paykunata tukuypi yuyachishpan kallarirkakuna rimanata chikan chikan shimikunata, mana yachashkankunata, Yaya Diospa Espíritun paykunata atipachishkanshina.

⁵Chay Pentekostés punchapi achka Yaya Diosta kasuk israel runakuna tukuy allpakanamanta shamushpankuna

Jerusalenpi kahurkakuna. ⁶Chay sinchita uyarimuhukta uyashpankuna achka runakuna mancharishpankuna tantarirkakuna. Chaypina uyarkakuna Jesusta kirikkunata karan shukpa shiminkunapi rimahukkunata. ⁷Imashnataya paykunaka shiminchikunata yachakushkakuna? nishpa mancharirkakuna.

⁷Yapa mancharishpankuna paykunapura tapunakurkakuna:

Kay rimak runakunaka ⁸manachuya Galileamanta kanahun? ⁸Imashnataya uyanchi karan shuk ñukanchikunapa wawamanta pacha rimananchi shimita rimahukkunata? ⁹Kaypika tukuy allpakanamanta runakuna achka tantarishka kahunchi. Shukkunaka Partia allpamanta kanahun, shukkunaka Media allpamanta, Elam allpamantapas, Mesopotamia allpamantapas, Judea allpamantapas, Kapadosia allpamantapas, Ponto allpamantapas, chasnallatata shukkuna Asia allpamantapas shamushkakuna. ¹⁰Shukkunaka Frigia allpamanta, Panfilia allpamantapas, Egipto allpamantapas, Libia allpamantapas Sirene allpa mayanmanta shamushkakuna. Chasnallatata *Roma llaktamantapas runakuna kayma shamushkakuna Yaya Diosta mañanan-kunapa. Shukkunaka kikin israel runakunami kanahun, shukkunaka israel runakunapa yachachishkanta kasukkunami kanahun. ¹¹Shukkunaka Kreta islamanta kaypi kahunkuna. Arabia allpamanta runakuna kaypillata kahunkuna. Chasna kashpanpas karan shuk uyanchi kikin shiminchita rimahushkankunata. Tukuy paykuna Yaya Dios suma atun yachayninwa rurashkankunata kwintahushkankunata uyanchi.

¹²Tukuy mancharishpankuna mana yacharkakunachu imatami yuyarinkakuna. Chaypi tapunakurkakuna:

¿Ima ninayantaya kay tukuy shimin-chikunata yachashkankunaka?

¹³Chasna kashpanpas shukkunaka asichirkakuna:

Kaykunaka machashkami kahunkuna, chayrayku chikan shimikunata rimahunkuna nishpa.

Pedro Yaya Diospa rimashkanka paktarishkanmanta yachachirkira

¹⁴Chaymanta chay chunka shuk *apostolkunawa pakta Pedroka shayarishpan sinchita rimarka:

Tukuy allpakuñamanta israel masinikuna, Jerusalenpi kawsakkunapas alita uyaychi. Kay pasashkakunamanta asirtachishkaykichi. ¹⁵Mana machashkachu kahunchi, imashnami kankuna yuyarihunkichi. Tutamantarami kahunchi. Chay uraska nima maykan machanchu. ¹⁶Ashwan Yaya Diospa yachayninwa yachachik Joelpa ñawpa rimashkanmi paktarishka. ¹⁷Joel kasna killkarka:

Yaya Dioska riman: Allpa tukurinan punchakunapi Espirituynita tukuy runakunama kachasha. Chasna Espirituynita kachashpayni kari wawaykichikunata, warmi wawaykichikunatapas yuyachishpayni shiminita rimankakuna. Musu wawaykichikuna muskuypishina rikuchinaynita rikunkakuna. Yaya rukuykichikunatapas muskuy-ninkunapi rimasha. ¹⁸Chaymantapas chay punchakunapi tukuy ñukata kasuk karikunama warmikunamapas Espirituynita kachasha. Chaypimi paykunaka kwintashkaynita rimankakuna. ¹⁹⁻²⁰Manara atun yachaynita rikuchinayni puncha paktarishpan allpapi silipi manchaypatami rikuchisha.

Allpapi runakuna wañunaku-nankunamanta yawar tiyanka, atun ninakuna tiyanka, chaymanta puyushina kushni. Intika amsayanka, killaka pukayanka yawarshina.

²¹ Chasna kashpanpas maykanpas rimawashpan Yaya Dios, uchay-nikunamanta llakichiyaw nishpa, ñukaka llakichishpa kishpichishami nishpa.

²²Israel masinikuna, uyaychi kay rimanaynita. Yachankichimi Yaya Dios yanapashpan chay Nasaret llaktamanta Jesú atun yachaywa achka ruranakunata, achka suma mana atipaypakunata, Yaya Diospa yachayninwa nima ima uras rikushkanchita rurashkanta.

Chaykunawa rikuchirkira Yaya Diosmanta shamushkanta. ²³Chasna kashpanpas Yaya Dios rimashkanshina chay Jesusta apishpaykichi pusharkan-kichi *romano apukunama. Kankuna millaypata rurak runakunata kamachishpaykichi Jesusta kruspi klabashpa wañuchichirkankichi.

²⁴Chasna wañuchishpaykicipas Yaya Dioska payta atun parisinamanta kishpichishpa wañushkanmanta kawsachirkira. Mana munashkachu wañushka kiparinanpa, chayrayku payta kawsachirkira. ²⁵Chayta atun apunchi David wañu Jesuspa kuti kawsarinanmanta ñawpa killkarka kasna:

Tukuy uras Yayayni Diosta rikush-kani puntaynipi ñukawa kahukta. Nukawa kuskayni parti kashpan nima imapas manchachiwanchu.

²⁶⁻²⁷Wañushpayni kanka almay-nitaka mana sakinkichu wañushkakunata wakaycha-napi. Ñuka munashkayki runa kashpayni wañushpayni nima

aychaynika ismunkachu. Chay-rayku yapa kushilla kahuni, tukuy shunku nimanta pacha kushilla takihuni. Wañushpay-nipas alita samasha, yachash-payni shutipa kawsarinaynita.²⁸ Yachachiwashkanki kanwa kawsanaynita. Kanmi ñukawa kahushpayki kushichiwanki nishpa.

²⁹ Wawkinikuna, shutipa rimashkayki-chi yayanchi ruku Davidmanta. Pay wañurka. Wañushkanwasha paypa aychanta allarishka urku uchkupi churashpa taparkakuna. Chay tapashka uchkuta kunankama rikunchi.³⁰ Chasna kashpan David chay Salmos killkapi mana kwintashkachu pay kikinmanta. Payka Yaya Diospa yachayninwa yachachik kashpan manara wañuhushpan Yaya Dios shutipa paktachinanta riksichik shimikunawa payta rimashpan kay paktachinan shimita rimarka:

Miraykimantami shukta churasha kanshina israel runakunapa atun apu kananpa nishpa.

³¹ Davidka ñawpamanta pacha riku hukshina yacharka chay apuka Yaya Diospa Kachanan Kishpichik kananta. Chaymantapas yacharka chay Yaya Diospa Kachanan Kishpichik kuti kawsarinanta. Chasna yachashpan paymantami rimarka: Payka manami kiparinkachu wañushkakunata wakaychanapi, nima aychan ismunkachu nishpa.

³² Chay Jesustaka Yaya Diosmi wañushkanmanta kawsachirka. Tukuy ñukanchi chayta rikushpanchi paymanta kankunata rimahunchi.

³³ Kunan Yaya Dios paytaka sikachishpan paypa kuskan partima churashka,

paywa pakta tukuya kamachinanpa. Ñawpa rimashkanshina Yaya Dios payta Espiritunta kushpan Jesusna ñukanchita kushka, imashnami rikushkankichi uyashkankichi.³⁴⁻³⁵ David mana rimarkachu pay kikinmanta. Mana Davidpa aychanka siluma sikarkachu. Chasna kashpan Davidka Salmos killkapi^b nirka:

Yaya Dioska kamachiwakta rimarka:
Tiyariy kuskayni parti kamachinaykipa ñukawa pakta, tukuy kanta chiknik runakunata winsinaynikama kanta kasunankunapana nishpa.

³⁶ Kunanka tukuy kankuna israel masinikuna sumakta yachanaykichi tiyan, chay kruspi klabashpa wañuchishkaykichi Jesusta Yaya Dioska atun apu kananpa churashka, chaymantapas ñukanchita Kishpichik kananpa.

³⁷ Chasna Pedropa rimashkanta uyashpankuna runakuna shunkunkunapi musyarkakuna sinchita waktay tukushkatashina, atun uchata rurashkankunarayku. Chasna kashpan Pedrota, shuk apostolkunatapas tapurkakuna:

Wawkinikuna, kunanka ñimatata rurananchi tiyan Yaya Dios ñukanchita llakichinanpaka?

³⁸ Chasna tapushpankuna Pedroka aynirka:

Karan shuk kankunamanta mana ali rurahushkaykichi yuyarishpaykichi sakiyichi Yaya Diosta kasushpa kawsanaykicipana. Jesukristuta katik tukushpa bawtisariyichi. Chasna rurashpaykichimi runakunata rikuchinkichi Yaya Dios uchaykichita llakichishkanta. Chaymanta payka Espiritunta kankunata kunkami.³⁹ Chasnami ñawpa

^b Rikuy kastellano Bibliapi Salmos 110.1, chaymanta inkapi Markuspa Killkashkan Killkapi 12.36

kankunata rimarka. Kunanmi chay rimashkanka paktarihun. Kankunata, kankunapa miraykichikunatapas, karupi kawsakkunatapas, maykunkunatami Yayanchi Dioska kayanka paypa wawankuna kanankunapa, chaykunatas Espiritunta kunkami.

⁴⁰Chasna nishpan ashwan shuk rimanakunawapas Pedroka paykunata yachachirka. Chasnallatata paykunata kunarka:

Anchuriyichi kay mana ali kawsak runakunamanta nishpa.

⁴¹Chasna Pedro yachachishpan chay punchalla kimsa waranka runakuna rimashkanta kirishpankuna bawtisarirkakuna. Chaypina chay puntiru kirik tukushkakunawa tukuy uras tantarirkakuna. ⁴²Tukuy chay kirikkunaka apostolkunapa yachachishkankunata uyashpa paktachishpa kawsapayanahun. Shukwa shukwa yanapanakushpa kawsapayanahun. Yaya Diosta mana sakishpa mañapayanahun. Tantarishpankuna Jesús paykunarayku wañushkanmanta kawsarishkanmantapas yuyarishpa panta pakishpa mikupayahanahun.

Imashnami puntiru kirikkunaka kawsapayarkakuna

⁴³Chay uras *apostolkunaka achka suma mana atipaypkunata, Yaya Diospa yachayninwa runakuna nima ima uras rikushkankunata rurarkakuna. Yaya Dios paykunata yanapashpan rurashkankunata rikushpankuna tukuy runakuna yapa mancharirkakuna.

⁴⁴Tukuy kirikkunaka parihu shuk yuyayllawa kawsapayanahun. Paykunapa charishkaka tukuyrayku kapayan. ⁴⁵Shukta pishihushpan shukka paypa tiyapushkanta rantichishka chay mana tiyapuhukta yanapananpa. Chasna paykunapura yanapanakurka-

kuna maykantachari pishipayan.

⁴⁶Karan puncha Yaya Diosta mañanan-kunapa paypa wasinpi tantaripayahanahun. Chasnallatata paykunapa wasinkunapi tantaripayahanahun Jesúz paykunaryku wañushkanta yuyarishpa panta pakishpa mikunankunapa. Ali yuyawaya kushikushpa shuk mikunakunatapas tantaylla mikupayahanahun. ⁴⁷Yaya Diosta atunyachishpa kushichishpa kawsapayanahun. Chasna kashpan tukuy Jerusalenpi kawsak runakunaka paykunamanta yuyarirkakuna ali kanankunata. Karan puncha Yaya Dioska ashwan runakunata kishpichishpa kirikkunata achkaya-chirka.

Mana purinata atipak runata Pedro Juanwa ampirkakuna

3 ¹⁻²Karan puncha Pedroka Juanwa ishkaymanta ripayanahun *Yaya Diospa wasinma mañanankunapa. Shuk puncha ña chishiyahushkapi rihushpankuna tarirkakuna shuk mana purinata atipak runata. Chay runaka wawayarishkanmanta pacha chasna karka. Karan puncha ayllunkunaka tiyachipayanahun Yaya Diospa wasin Suma shutiyu punkupi yaykuhuk runakunata kullkita tapunanpa, chaywa atipanana kawsanata. ³Pedroka Juanwa Yaya Diospa wasinpi yaykuhushkankunapi chay mana purinata atipakka paykunatapas kullkita tapurka. ⁴Chaypi payta alita rikushpankuna Pedroka rimarka: Rikuy ñukanchita.

⁵Chasna Pedro nishpan chay unkushka runaka paykunata rikuhashpan yuyarirka kullkitachari kuwahunkuna nishpa.

⁶Chaypi Pedroka rimarka: Mana tiyawanchu kullkinika. Ashwan ñuka kanta yanapashkaykimi. Nasaret-manta Jesukristu kamachiwashpan kanta rimani: Atariy puriyna.

⁷⁻⁸Chasna rimashpan kuska makinmanta apishpan chay runata atarichirka. Chayllapi chakin mukuka aliyashpan saltashpa shayarirka, kallarirka purinatana. Unkushikashkanmanta ampirishpan Pedrowa Juanwa Yaya Diospa wasinpi yaykurka. Kushilla musyashpan salta salta rurashpan purirka. Yaya Diosta atunyachishpa kushichishpa puririrk.

⁹⁻¹⁰Tukuy chaypi kahukkunaka chasna ampirishkanta Yaya Diosta atunyachishpa kushichishpa purihukta rikushpankuna mancharirkakuna.

¿Manachu kay runaka mana purinata atipak kashpanra Yaya Diospa wasin Suma shutiyu punkupi tiyari payarka kullkita tapunanpa? nishpa rimarkakuna.

¹¹Chay ampirishka runaka mana sakirkachu Pedrota Juantapas. Yaya Diospa wasinpi Salomón shutiyu wasipi kahushpankuna tukuy runakuna chayta yachashpankuna mancharishpankuna chayma kallparkakuna paykunata rikunkunapa.

**Pedro runakunata yachachirka
Yaya Diospa wasinpi Salomón
shutiyu wasipi**

¹²Pedro chay achka runakunata rikushpan kallarirka yachachinata: Israel masinikuna, ¿imaraykutaya kay ampirishka runata rikushpaykichi mancharinkichi? ¿Imaraykutaya ñukanchita rikunkichi yuyarishpa kikin yachayninchicha kay runata ampiškan-chitashina? Mana kikin yachayninchiwachu, nima Yaya Diosta mañak kashkanchiraykuchu kay runaka ña ampirishka, ashwan Yaya Dios kikinmi aliyachishkanrayku ña purihun. ¹³Chay Yaya Diosminchi, maykantami yaya rukunchikuna wañu Abraham, Isaak, Jakob kushichinahun, chaymi Wawan

Jesusta tukuypi kamachikta rurarka. Chasna kashpan Wawanpa yachayninta ñukanchita rikuchirka, payta kirishkan-chirayku yanapashka chay unkushkata ampinanchipa. Chay Jesustami kankunaka apunchikunata kurkankichi wañuchichinaykicipa. *Romano apu *Pilato Jesusta kacharichinayashpan kankunaka mana munarkankichichu kacharichinanpa. ¹⁴Jesuska Yaya Diospa munashkan ali kawsak runami karka, mana uchata rurak. Chasna kashpantata mana munarkankichichu Pilato payta kacharichinanpa, ashwan tapushkankichi payranti shuk wañuchik runatana kacharichinanpa. ¹⁵Chasna rurashpaykichi wañuchirkankichi maykanmi ñukanchita kawsayta kun. Chasna wañuchishpaykicipas Yaya Dioska payta wañushkanmanta kawsachirka. Chayta rikushpanchimi kankunata rimanchi.

¹⁶Chasna kashpanmi chay Jesuspi sinchikushpanchi kay riksishkaykichi rikuhashkaykichi runata aliyachishka. Jesús yanapashpan paypi sinchikushpanchi kay runaka sumakta ampirishka, imashnami kunan payta rikuhashkaykichi.

¹⁷Ña yachani, kankuna wawkinikuna, apunchikunapas mana alita yachashpaykichi Jesusta wañuchirkankichi.

¹⁸Chasna rurashkaykichiwa Yaya Dioska ñawpa rimashkanta paktachirka. Payka ñawpa yachayninwa yachachikkunata yuyachishpan kasna rimashkanta killkarkakuna: Kachanayni Kishpichikta parisichishpa wañuchinkakuna nishpa. Chay shimimi kunan paktarishka.

¹⁹Chasna kashpan kuti yuyariyichi. Uchata rurashkaykichita sakishpaykichi Jesustana kirishpa kasuyichi. Chasnash-paykichimi Yaya Dioska kankunata llakichishpan uchaykichimanta pichanka. ²⁰Chasna tukushpaykichi Yaya Dioska kankunata shunkuykicipi

samachishpa sinchikuchinka. Chaymantapas Jesusta kachanka kankunaryku Kishpichik kananpa, imashnami ñawpa rimarka chasna.²¹ Kunan Jesuska silupira kiparinan tiyan Yayan Dios tukuyta alichanankama, chay ñawpa paypa yachayninwa yachachikkuna rimashkunkunashina.²² Moisés wañupas ñawpa Jesusmanta rimarka yaya rukunchi wañukunata kasna:

Yaya Diosmi kachanka shuk
ñukashina paypa yachayninwa yachachikta. Payka israel masinchi kanka. Paypa tukuy rimashkanta kasunaykichi tiyan.²³ Maykanmi mana chay Yaya Diospa yachayninwa yachachikta kasunchu, Yaya Diospa akllashkan runakunamanta wiñayparayku anchu-chiy tukunka nishpa.

²⁴ Chaymantapas Samuelmanta pacha tukuy Yaya Diospa yachayninwa yachachikkuna manara paktarishpan ña rimarkakuna kay kawsahushkanchi punchakunapi pasahushkamanta.

²⁵ Kankunaryku Yaya Diospa yachay-ninwa yachachik yaya rukunchi wañukunapa rimashkunkunaka ñami paktarishka. Kankunama Yaya Dioska chay kishpichikta kacharka ñawpa rimashkantashina. Yaya rukunchi wañukunata Yaya Diospa ñawpa alichanan rimashkanka kankunaryku karka. Kasnami yaya rukunchi Abraham wañuta rimarka:

Shuk kanpa miraymanta runawa yanapasha tukuy kay allpapi kawsak runakunata nishpa.

²⁶ Kunanka Yaya Dioska Wawanta wañushkanmanta kawsachishpan puntiru kankunama kacharka yanapanpa, ucha rurashkaykichita sakishpaykichi Yaya Diostana kasunaykichiha.

Apukuna Pedrota Juanta apirkakuna

4 ¹Pedro Juanwa yachachishpa kahushkankunapi paykunapa *saserdotenkuna, Yaya Diospa wasinta kuyrakkunata kamachikpas, shuk *saduseokunapas shamurkakuna.

²Pedroka Juanwa runakunata yachachi-hurkakuna, Jesús kuti kawsarishkan-rayku tukuy wañushka runakunapas kuti kawsarinkakuna nishpa. Chasna yachachihushkankunaryku apukunaka yapa piñarishpankuna Pedrokunama shamurkakuna.³ Chasna piñarishpan-kuna paykunata apirkakuna. Ña chishiyahushkanrayku apukuna mana tutapi tantarinayashpankuna karsella-pina satirkakuna chaypi pakarinanku-napa.⁴ Manara karselpi churashpankuna Pedropka yachachihushkanta uyashpan-kuna achka runakuna Jesuspi sinchikur-kakuna. Chasna kirikkunaka achkayash-pankuna karikunalla pichka waranka parti karkakuna.

Pedro mana manchashpachu Jesusmanta rimarka

⁵ Chay kayantimana Jerusalenpi israel runakunapa apunkuna, israel masinku-nata kamachik rukukuna, Moisepa killkashkanta yachachikkunapas tantarirkakuna Pedrokunata tapunanku-napa.⁶ Chaypi kahurkakuna *saserdo-tenkunapa atun apu Anás, chaymanta ayllunkuna Kaifás, Juan, Alejandro, tukuy shuk ayllunkunapas.⁷ Chasna tantarishpankuna kacharkakuna pushak rinankunapa Pedrota Juantapas karselmanta. Pushashpankuna puntan-kunapi shayachirkakuna tapunanku-napa:

¿Pita kankunata kamachishka chasna ruranaykichiha? ¿Ima yachaywata amipshkankichi chay unkushkata? nishpa.

⁸⁻⁹Chasna piñarishpa tapuhushpan-kuna Pedroka Yaya Diospa Espíritun payta tukuypi yuyachishpan mana manchashpa paykunata aynirka:

Apukuna, ñukanchita kamachik israel masinchi rukukunapas, ñukanchita tapunkichi alita rurahushkanchimanta ¿imashnata chay mana purinata atipakta ampishkankichi? nishpa.
¹⁰Tukuy kankuna, israel masinikuna, puntaykichipi rimahushkaynita uyaychi. Nasaretmanta Jesukristumi kaypi shayahuk runata aliyachishka, mana ñukanchichu aliyachishkanchi. Kankuna chay Jesusta kruspi klabashpa wañuchirkankichi. Chasna kashpanpas Yaya Dioska payta kawsachirka.

¹¹Ñawpamanta pacha killkarishka kan kasna: Wasita rurakkunaka shuk rumita wichushpankuna chayta wasi amuka kutikashka apirka churananpa chay wasinta tukuy rumikunamanta sinchikuchik rumi kananpa. Chay Jesuska chay tukuy rumikunamanta sinchikuchik rumishinami kan. Kankunami kankichi wasita rurakkunashina. Wañuchishkankichi Jesusta, imashnami chay wasita rurakkunaka wichushkakuna chay ali rumita. Chay Jesustami Yaya Dioska akllashka atun apunchi kananpa.

¹²Jesusllami ñukanchita Kishpichik kan. Ashwan shukka mana tiyanchu tukuy uchanchikunamanta pichakka. Jesusllami ñukanchita atipan kishpichinata wiñaypa wañuymana.

**Apukunaka mana yacharkakunachu
imatami rurankakuna Pedroka
Juanapas**

¹³Chasna Pedro Juanpas mana manchashpa rimahushpankuna apukunaka yuyarirkakuna: Kay runakuna mana yapa yachakushkachu kanahun. ¿Imashnataya chay tukuya yachanahun? Paykunaka yapa suma

yachakkunami kanahun nishpa. Chasna mancharishpankunapas yacharkakuna Jesupsa runankuna kashkankunata.

¹⁴Chay ampirishka runapas paykunawa kahukta rikushpankuna manana atiparkakunachu nima imata rimanata.

¹⁵Chasna kashpan chay apukunaka kamachirkakuna Pedrokunata llukshichinankunapa chay tantarishka kahushkankunamanta. Chaywasha paykunapura kwintarkakuna:

¹⁶¿Imatataya kunanka rurashunchi chay runakunataka? Tukuy Jerusalenpi kawsakkuna yachanahun paykuna chay suma mana atipaypata rurashkankunata. Mana atipanchichu rimanata kankunaka llullachiysiki kankichi nishpa. ¹⁷Chasna kashpan manana ashwan runakuna Jesusmanta uyanankunapa, chay apishkanchi runakuna manana nima pita chay Jesusmanta rimanankunapa akuychi manchachishpa rimashunchi: Rimashpalla katishpaykichika kankunata sinchitami kastigachishunchi nishpa.

¹⁸Chasna yuyarishpankuna Pedrokunata kuti kayachirkakuna. Paktashpan-kuna rimarkakuna:

Manana nima ima uras kuti runakunata Jesusmanta rimankichichu, nima yachachinkichichu.

¹⁹Chasna nihushpankuna Pedroka Juanwa aynirkakuna:

Yuyariyichi kankuna kikin. ¿Alichu kama Yaya Diosta kasuhushkanchita sakishpa kankunatana kasunanchipa? Manami alichu kama. ²⁰Mana atipanchichu sakinata rimananchita maykankunatami rikushkan-chi uyashkanchi Jesuspsa yachachishkankunata rurashkankunatas.

²¹Chaypina apukunaka rimarkakuna:

Chasnalla rimashpa katishpaykichika kankunata kastigashunchimi nishpa.

Chaypina chasnalla kacharirkakuna. Tukuy runakuna chay runata ampish-

kankunayayku Yaya Diosta atunya-chishpa kushichishpankuna mana atiparkakunachu paykunata kastiganata.
²²Chay Jesuspa yachayninwa ampirishka runaka chusku chunka pasa watayu kashpan wawayarishkanmanta pacha unkushka kashkanmanta ampirishkanka yapa suma manchariyapakarka.

**Jesukristuta kirikkuna
mañarkakuna Yaya Dios paykunata
sinchikuchinanpa**

²³Pedro Juan kachariy tukushkankunawasha rirkakuna kirik masinkunama *saserdote kunapa apunkunapa, kamachik israel masin rukukunapapas rimashkanta kwintak rinankunapa.

²⁴Chasna kwintashkankunata uyashpankuna tukuy shuk yuyayllawa Yaya Diosta mañarkakuna kasna:

A Yaya Dios, kanmi kanki yapa atun. Kan tukuyta rurashkanki, siluta, allpata, atun yaku martapas, tukuy chaykunapi tiyashkakunatapas. ²⁵Kanmi ñawpa Espirituykiwa kanta kasuk atun apunchi David wañuta yuyachishpayki rimarkakasna:

¿Imaraykutaya Yaya Diosta mana kasunayak runakunaka sinchita piñarinahun? ¿Imaraykutaya tukuy llaktakunapi kawsak runakuna yanka yuyarishpa kawsanahun ruranankunapa, maykantami mana atipankakunachu paktachinata? ²⁶Kay allpapi kamachik apukuna tantarishpankuna kanta chiknishpankuna piñarinahun. Chaymantapas akllashkayki chapahushkanchi Kachanayki Kishpichiktapas piñarinahun nishpami Davidka mañarka.

²⁷A Yaya Dios, kunanka chay Davidpa rimashkanka ña paktarishka. Apu

*Herodes, apu *Pilatopas, israel masinchikuna, mana israel runakunapas kay llaktapi tantarirkakuna chay akllashkayki kanta kasuk wawayki Jesusta chiknishpa parisichinankunapa. ²⁸Chasnami rurarkakuna tukuyta ñawpa rimashkaykitashina. ²⁹Yaya Dios, kunanka rikuy imashnami ñukanchitas manchachishpa rimanahun: Rimashpalla katishpaykichika sinchitami kankunata kastigachishunchi nishpa. Chayrayku ñukanchi kanta kasukkunata sinchikuchiyanmana manchashpa shimikita rimananchipa. ³⁰Chasnallatata Yaya Dios, ñukanchita yanapay chay akllashkayki kanta kasuk wawayki Jesuspa yachayninwa unkushkakunata ampinanchipa, chasnallatata suma mana atipaypakunata, kanpa yachaykiwa runakuna nima ima uras rikushkankunata rurananchipa.

³¹Chasna Yaya Diosta mañashkankunawasha chay tantarishkankuna wasika kuyurirka. Chay wasi kuyurihushkanpi Yaya Diospa Espíritun tukuy paykunata tukuypi yuyachishpan sinchikuchirka. Chasna tukushpankuna manamanchashpa Yaya Diospa shiminta yachachirkakuna.

**Tukuy Jesusta katikkuna shuk
yuyayllawa yanapanakushpa
kawsarkakuna**

³²Chasna tukuy chay achka Jesusta mushu katikkunaka parihu shuk yuyayllawa yanapanakushpa kawsapayanahun. Nima maykan rimarkachu pay kikinpa charishkanta chayka ñukapallami. Ashwan nirakuna ñukanchipa charihushkaka tukuy pami nishpa.

³³Chay *apostolkunaka Yaya Diospa atun yachayninwa yachachipayahanun Jesukristu wañushkanmanta kawsarishkanta. Chasna alita yachachishpankuna Yaya Dioska tukuy paykunata suma ali

yuyayninwa yanaparka.³⁴⁻³⁵ Maykanparchari tiyapayan achka chakrankuna, wasinkunapas, chaykunata rantichipa-yanahun pishihukkunata yanapanankunapa. Chay rantichishkankunamanta tukuy kullkita apostolkunata kupayahanun chay pishihukkunata kunankunapa. Chasna paykunapura yanapanakushkankunaryku nima pipa pishirkachu.

³⁶ Shuk paykunamanta Leví wañupa ayllunmanta José shutiyu karka. Chipre islapi wawayarishka karka. Chay runaka kushillayachik sinchikuchik Kashpan apostolkunaka payta shutiyachirkakuna Bernabé, chayka ninayan llakirishkata sinchikuchik. ³⁷ Chay runaka shuk chakranta rantichirkka. Chay rantichishkanmanta kullkita apamushpan apostolkunata kurka, paykunana pishihukkunata kunankunapa.

**Ananias warmin Safirawa
apostolkunata
llullachinayarkakuna**

5 ¹ Chasnallatata shuk paykunamanta Ananias shutiyu, warmin Safiraka rantichirkakuna shuk chakrankunata. Paykunapas kirikkunapa rikushkanpi ali tukunayashpankuna kullkinkunata apamurkakuna. ² Chasna rurashpankunapas chay Ananiaska rantichishkankunamanta kullkita chawpita sakimurka wasinpi. Warminpas arí nirka chasna ruranankunapa. Chawpillata apashpan *apostolkunata kurka tukuyta kuhukshina.

³ Pedroka Ananias llullachihushkanta riksishpan rimarka:

Ananias, ¿imaraykutaya chasna llullachinki yanka nishpa Yayaanchi Diospa Espiritunta? ¿Imaraykuta supayta shunkuykipi yaykuchishkanki payta kasushpa ñukanchita llullachinayanaykipa? Rantichishkaykimanta chawpita wasikipi sakimushkanki kan

kikinrayku. Kaymi tukuy apishkayni kullkika nishpa rimashkanki. ⁴ Manara rantichishpayki chay chakraka kanpa karka. Rantichishkaykiwashapas kay kullkika kanpa karka munashkaykita ruranaykipa. ¿Imashna yuyarishpaykita chasna rurashkanki? Mana runallatachu llullachinayashpa rimashkanki, ashwan Yaya Diostapas.

⁵ Pedropo chasna rimashkanta uyashpan Ananiaska wañushka allpama urmarka. Chasna Ananiaspa wañushkanta yachashpankuna tukuy runakuna yapa sinchita mancharirkakuna.

⁶ Chaypina shuk musukunaka chay wañushkata llachapawa wankushpankuna llakta kanchama aparkakuna allarishka urku uchkupi churashpa tapanankunapa.

⁷ Ña kimsa ura Ananias wañushkanmanta warmin Safiraka mana yachashpan ima pasashkanta yaykuk rirka chay wasi ukuma. ⁸ Pedroka rikuchishpan chay Ananiaspa kushkan kullkita, warminta tapurka:

Rimaway ¿kay tupu kullkiraykuchu chakraykichita rantichishkankichi?

Payka aynirka:

Ari, chay tupumi rantichishkanchimanta apishkanchi kullkika.

⁹ Chaymanta Pedroka nirka:

¿Imaraykutaya kusaykiwa shuk yuyayllawa Yaya Diospa Espiritunta llullachinayashkankichi? Uyay, kunanka kusaykita urku uchkupi churanapa rishkakunaka shamuhunkuna, chasna-llatatami kantapas aparkakuna urku uchkupi churashpa tapanankunapa.

¹⁰ Chasna rimahushkanllapi chay warmipas wañushka urmarka Pedropo puntanpi. Chay musukuna yaykumuhushpankuna wañushkata tarirkakuna. Chaymanta paytapas surkushpankuna aparkakuna urku uchkupi churashpa tapak rinankunapa kusanpa kuchunpi.

¹¹Chasna tukushkata yachashpankuna tukuy Jesusta kirikkunaka, tukuy chaypi kawsak runakunapas yapa mancharirkakuna.

Chay apostolkunaka nima ima uras rikushkanchita Yaya Diospa yachayninwa rurarkakuna

¹²Chay *apostolkunaka yachachihushpankuna achka suma mana atipaypakanata, Yaya Diospa yachayninwa nima ima uras rikushkankunata runakuna chawpipi rurarkakuna. Tukuy uras tantaripayanahun *Yaya Diospa wasinpi, Salomón shutiyu wasipi.

¹³Chay mana Jesusta kasukkunaka manchashpankuna mana munarkakunachu rimanata kirikkunami kanchi nishpa. Pakta Yaya Dios ūukanchitapas kastigama nirkakuna. Chasna chay kirikkunawa mana tantaylla kanayashpankunapas tukuy runakuna paykunata yapa yuyapayanahun. Suma ali Yaya Diospa shiminta katikkunami kanahun nishpa rimarkakuna. ¹⁴Chasnapi puntirumanta ashwan achka runakuna

Jesusta kirirkakuna, achka karikuna, achka warmikunapas. Chay shuk kirikkunawa tantarishpankuna achka tukurkakuna. ¹⁵Runakuna rikushpankuna yachachikkuna achka unkushkakunata Yaya Diospa yachayninwa ampihushkakunata unkushkakunata apamurakuna churanankunapa maytami Pedro pasanka chay wasi mayanpi. Llanchamapi churarkakuna, Pedroka pasahushpan makinwa llankashpan paykunata ampinanpa. Mana makinwa llankashpa ampishpanpas Pedropa llantuyachihushkanllawa ampichun nishpa yuyarirkakuna.

¹⁶Chasnallatata kuchu llaktakunamanta achka runakuna unkushkakunata apamushpankuna Jerusalenma shamurkakuna. Chaymantapas supay

yaykushka runakunata apostolkunama pushamurkakuna ampichinankunapa. Tukuy chay unkushka runakuna ampirishka kiparirkakuna.

Pedrota Juanta Jesusranti parisichirkakuna

¹⁷Tukuy runakuna Pedrokunata kasuhushkankunaryku *saserdotekunapa atun apu, tukuy kamachik *saduseokunapas paykunata chiknirkakuna. ¹⁸Chayrayku *apostolkunata apishpankuna karselpi churarkakuna. ¹⁹Chasna rurashpankunapas chay tutalla Yaya Diospa kachashkan *angelka karsel punkuta paskarka Pedrokunata llukshichinanpa. Lluukshichishpan rimarka:

²⁰*Yaya Diospa wasinpi tukuy runakunata yachachik riychi Jesús mushu kawsayta Yaya Dioswa kunanta nishpa.

²¹Chayta uyashpankuna paykunaka kayantima tutamanta Yaya Diospa wasinma rirkakuna. Chaypi runakunata yachachirkakuna.

Chay punchallatata israel runakunapa saserdotenkunapa atun apu, paywa kahukkunapas kayarkakuna tukuy israel kamachik rukukunata tantaylla yuyarishpa kwintak atun apukunapura kwintanankunapa. Chasna tantarishka kahushpankuna Yaya Diospa wasinta kuyrakkunata kacharkakuna apostolkunata karselmanta pushak rinankunapa.

²²Chay kachashkankuna kuyrakkunaka paktak rishpankuna mana tarirkakunachu paykunata karsel ukupi. Mana tarishpankunana kutirkakuna kwintanankunapa apunkunata kasna nishpa:

²³Karselpi paktashpanchi tukuy punkukuna sumakta taparishkata tarishkanchi, chaymantapas punku mayanpi kuyrakkuna kuyrashpa kahukkunata. Chaypi punkuta paskash-

panchi ukuma rikushpanchi mana nima pita tarishkanchichu.

²⁴Chayta uyashpankuna Yaya Diospa wasinta kuyrakkunapa apu, saserdote-kunapa apunkunapas, tukuy paykunapura tapunakurkakuna:

¿Imashnata kishpishkakuna chay runakunaka? ¿Kunanka imashnata rurashunchi? nishpa.

²⁵Chasna rimahushkankunallapi shukruna paktamushpan paykunata rimarka:

Chay karselpi churashkaykichi runakunaka Yaya Diospa wasinpimi runakunata yachachishpa kahunkuna nishpa.

²⁶Chaymanta chay apuka chay kuyrakkunawa kuti paykunata apik rirkakuna. Yapa piñarishka kahushpankunapas mana makashpachu pusharkakuna. Makashpa pushahushpanchika runakunami rumiwa tuksishpa ñukanchita wañuchinahuma nishpa yuyarirkakuna. ²⁷Chasna apishpankuna pusharkakuna apunkuna tantarishka kahushkankunama. Chaypi paykunapa puntankunapi shayachishpankuna saserdotekekunapa atun apuka piñashpa tapurka:

²⁸¿Manachu kankunata rimarkanchi Jesusmanta mana yachachinkichinachu nishpa? ¿Imaraykuta yachachishpalla katinkichi? Tukuy kay Jerusalenpi runakuna yachachihushkaykichiya uyahunkuna. Chaymantapas ñukanchita uchachinkichi chay runa wañuchi yutushkanmanta.

²⁹Chasna nishpankuna Pedroka shuk apostolkunawa pakta aynirkakuna:

Ñukanchika Yaya Diosta kasunanchi tiyan. Chayrayku runakunata mana atipanchichu kasunata. ³⁰Kankunaka Jesusta kruspi klabashpa wañuchirkankichi. Chasna kashpanpas Yaya Dioska, maykantami yaya rukunchi wañukunapas kushichinahun, paymi chay Jesusta

kawsachirka. ³¹Chaymanta payta sikachirka paypa kuskan partima churananpa. Payta churarka ñukanchi israel runakunata kamachinanpa kishpichinanpas. Chasna kishpichik kashpan ñukanchita yanapan millaypa rurashkanchita amirishpa sakishpanchi Yaya Diostana kasunanchipa, payka uchanchikunamanta llakichinanpa.

³²Ñukanchi tukuy chaykunata yachashkanchiraykumi chaykunamanta rimanchi. Chaymantapas Yaya Diospa Espíritun, maykantami payta kasukkunapa shunkunkunapi churarka, paymi chaykunata riksichin.

³³Pedropo rimashkanta uyashpankuna apukunaka yapa piñarishpankuna wañuchishunchi nishpa rimarkakuna paykunapura. ³⁴Chasna rimahushkankunallapi paykunamanta shuk apu Gamaliel shutiyu shayarishpan rimarka:

Paykunata shuk ratu kanchama llukshichiychi nishpa.

Chay Gamalielka *fariseo karka, chaymantapas Moisespa killkashkanta yachachik. Tukuy runakuna payta yapa yuyashpankuna alita uyarkakuna.

³⁵Pedrokunata llukshichishpankuna Gamalielka apu masinkunata rimarka:

Israel masinikuna, alita yuyariychi manarapas kay runakunata imanachi-hushpaykichi. ³⁶Yuyariychi imashnami Teudaswa pasarka. *Romano runakunata winsishpa atun apu tukunanta rimarka. Chusku pachak runakuna payta katirkakuna. Chaypi romanokuna payta wañuchishpankuna tukuy payta katikkunaka shikwarirkakuna. ³⁷Chaywasha runakunapa shutinkunata killkachina punchakunapi Galileamanta runa Judas shutiyu achka runakunata tantachirka romano runakunata piñarishpa llaktankunamanta wichunankunapa. Paytapas wañuchirkakuna. Chasna wañuchishpankuna tukuy payta

katikkunaka shikwarirkakuna. ³⁸Chay-rayku rimashkaykichi: Chay Jesusta katikkunata mana wañuchinkichichu. Paykunapa rurahushkankunkuna yachachihushkankunapas paykuna kikin yuyayninkunamantalla kashpanka tukurinkami. ³⁹Yaya Diosmanta kashpanka chay yuyayninkunata mana atipankichichu winsinata. Yuyaywa kaychi. Tukuchishu nishpa yuyarihush-paykichika Yaya Diosmanta kashpanka paywami kuntrayankichi. Chayrayku paykunata kachariychi.

Chasna rimashkanta uyashpankuna apu masinkunaka shuk yuyayllawa rimarkakuna:

Ari, kacharishunchimi paykunata nishpa.

⁴⁰Chaymanta kayarkakuna apostolkunata. Chasna kayashpankuna asutichirkakuna. Kuti kamachirkakuna manana runakunata Jesusmanta yachachinankunapa. Chaymanta kacharirkakuna. ⁴¹Chay apostolkunaka apukuna tantarishkankunkunanta kushilla llukshirkakuna. Paykunaka kushikurkakuna Jesús rimashkanshina payranti parisishkankunarayku.

⁴²Chaymantapas mana sakirkakunachu yachachinata. Karan puncha Yaya Diospa wasinpi, paykunapa wasinkunapipas chay ali shimita yachachirkakuna Jesús Yaya Diospa Kachashkan Kishpichikmi kan nishpa.

Jesusta kirikkuna kanchis kirik masinkunata akllarkakuna yanapakkuna kanankunapa

6 ¹Chay punchakunapi ashwan ashwan runakuna Jesusta kirik tukurkakuna. Chaypi shuk llaktakunamanta *griego shimita rimak israel runakuna *hebreo shimita rimak israel runakunawa rimanakurkakuna. Rimana-kuhushpankuna griego shimita rimak israel runakuna nirkakuna:

Karan puncha mikunata imatapas kuhushkaykichi pi ñukanchimanta mashintukunata mitsankichi, kankunamanta mashintukunataka alita yuyashpa kunkichi.

²Chasna nihushkankunapi *apostolkunaka tukuy kirikkunata tantachishpankuna rimarkakuna:

Wawkinikuna paninikuna, mana alichu kan sakinanchipa Yaya Diospa shiminta yachachinata mikunata munahukkunata kunanchiranti.

³Chayrayku wawkinikuna, akllaychi kankunapuramanta kanchis runakunata ali yachak, suma yuyayyu, Yaya Diospa Espíritun tukuypi yuyachishka kahukkunata. Ñukanchi chay kanchis akllash-kaykichi runakunata churashu kankunata yanapakkuna kanankunapa.

⁴Ñukanchika Yaya Diosta mañashpa paypa shiminta yachachishpa katishun-chi.

⁵Chasna nishkata uyashpankuna tukuy alimi nishpa kushikurkakuna. Chaypina akllarkakuna Estebanta, alita kirik, Yaya Diospa Espíritun tukuypi yuyachishka kahukta. Chaymanta akllarkakuna Felipeta, Prokorota, Nikanorta, Timonta, Parmenasta, chaymanta Antiokiamanta Nikolastapas. Chay Nikolaska mana israel runa kashpanpas ña unay paykunapa yachachishkankunata kasuk karka.

⁶Chay akllarishka runakunata pusharkakuna apostolkunama paykunarayku mañanankunapa. Chasna mañahushpankuna umankunapi makinkunata churarkakuna, Yaya Dios, kay tarawanapi yanapay paykunata nishpa.

⁷Chay uras ashwanta ashwanta Jesukristumanta yachachihushpankuna ashwan runakuna Yaya Diospa shiminta kirirkakuna. Chasna kirikkunaka Jerusalenpi yapa achkayarkakuna. Israel runakunapa *saserdotenkunamantapas

achka kirirkakuna Jesukristumanta
yachachishkata.

**Chiknik runakuna Estebanta
apukunama pushashpankuna
uchachirkakuna**

⁸Yaya Dios Estebanta tukuyipi yanapashpan suma mana atipaypaku-nata, Yaya Diospa yachayninwa manchariyipa nima ima uras rikushkan-kunata runakunapa chawpinpi rurarka. ⁹Chaypi shuk runakuna kallarirkakuna Estebanwa rimanakunata. Paykunaka kamachirishka kashkankunamanta kacharishka kashpankuna paykunapura tantarinankuna wasita shutiyachirka-kuna Kacharishkakunapa Tantarinan-kuna. Paykunawa pakta karkakuna shukkuna Sirene llaktamanta, Alejandria llaktamanta, Silisia allpamanta, Asia allpamantapas. Chaykuna tantarirkakuna Estebanwa rimanakunkunapa. ¹⁰Estebanwa rimanakuhushpankuna mana atiparka-kunachu payta nima imata ayinata. Yaya Diospa Espíritun payta yuyachish-pan ali yuyawa, atun yachaywa yachachirka. ¹¹Chasna mana atipash-pankuna ayinata Estebanta, shuk runakunatana pakalla pagarkakuna llullashpa paymanta rimanankunapa kay Estebanka Moisesmanta Yaya Diosmantapas millaypata rimashkanta uyashkanchi nishpa.

¹²Chay llullak runakunapa rimashkan-kunata uyashpankuna tukuy runakuna, israel runakunata kamachik rukukuna, Moisespa killkashkanta yachachikkuna-pas Estebanta sinchita piñarirkakuna. Chasna piñarishpankuna payta apirkakuna. Pushashpankuna tantaylla kwintak atun apu masinkunawa tantarishpankuna puntankunapi churarkakuna. ¹³Chaymanta llullashpa rimakkunatapas pusharkakuna. Chaypi

chay llullak runakunaka Estebanmanta rimarkakuna:

Kay runaka mana chunllayanchu millaypa shimikunata rimanata *Yaya Diospa wasinmanta, Moisespa killkash-kanmantapas. ¹⁴Chaymanta uyashkan-chi chay Nasaretmanta Jesuska kay Yaya Diospa wasinta urmachinka nishpa rimashkanta. Chaymantapas Jesús rimarka Moisespa killkashkan kamachishkakunata amana kasuychina-chu. Ashwan kay mushu yachachishkay-nitana kasushpa kawsaychi nishpa Estebanka nishkanta uyashkanchi.

¹⁵Chaypina tukuy tantarishka kahukkunaka Estebanta rikushpankuna uyanta shuk *angelpatashina rikurakuna.

**Esteban apukunapa puntanpi
sumakta yachachirka**

7 ¹Chasna rimashkankunawasha israel runakunapa *saserdotenku-napa atun apuka Estebanta tapurka:

¿Shutipachu paykunapa rimashkanka? nishpa.

²Chasna tapushpan Estebanka aynirka:

Wawkikuna, yachayyu rukukunapas, uyaychi rimahushkaynita. Ñukaka mana millaypa shimikunatachu rimahurkani, nima Yaya Diosmanta, nima Moisespa killkashkanmanta. Tukuymanta ashwan atun Yaya Dioska rikurishka yayanchi ruku wañu Abrahamta Mesopotamia allpapi, manara Harán llaktama kawsak riushpanra. ³Chasna rikurishpan rimarka: Sakiy aylluykikunata, allpayki-manta llukshiy. Shuk allpama riy, maykantami rikuchishkayki. Chay allpama kawsakriy.

⁴Yaya Dios chasna nishpan Abrahamka Kaldea runakunapa alpanmanta llukshishpan rirka Harán llaktapi kawsanampa. Chaypi

kawsahushpan yayanka wañurka. Yayan wañushkanwasha Yaya Diospa kamachishkanta kasushpan kay allpama kawsak shamurka, maypimi ñukanchika kunan kawsahunchi.⁵ Chasna kawsashpanpas Yaya Dioska manara Abrahamta kurkachu kay allpata amun tukunanpa, nima shuk chushastuta. Ashwan payta shuk paktachinan shimita rimarka: Wañushkaykiwasha kay allpata kanpa miraykunatami kusha amunkuna kanankunapa nishpa. Abrahamka chay uras nima shuk wawayu kashpanpas Yaya Dioska payta chasna rimarka.⁶ Chaymantapas Yaya Dioska shuk paktachinan shimita Abrahamta rimarka: Kanpa miraykunaka chikan runakunapa allpankunapi kawsankakuna shuk allpamanta runakunashina. Chay allpapi kawsahukkunaka kanpa miraykunata tarawachishpa parisichinkakunami, chiknishpa kamachinkakuna chusku pachak watakama nishpa.

⁷ Chaymanta rimarka: Ñukami paykunata kastigasha, kanpa miraykunata yanka nishpa tarawachishkankunaryku. Chaywasha kishpichishpayni chay allpamanta paykunata llukshichisha. Chasna llukshichishpayni chay kushkayni allpapi kanpa miraykunaka munashkaynita rurashpa kawsankakuna.

⁸ Chaymanta Abrahamta kamachirka: Pitinayki tiyan karipa ishpanan kara puntata. Chaymi kanka rikuchinaykipicha akllashkayni runakuna kanaykichita. Tukuy kanpa miraykunapas kari wawankunawa chasnallatata ruranankuna tiyan wiñayparayku. Chasna Yaya Dios rimashpan Abrahamka wawan Isaakta pusak puncha wawayarishkamanta ishpanan kara puntata pitirka. Isaakpas wawan Jakobta chasnallatata rurarka. Jakobta chasnallatata rurarka chunka ishkay wawankunata, maykan-

kunamantami ñukanchikuna mirashkanchi.

⁹⁻¹⁰ Chay Jakobpa wawankuna ñawpa yaya rukunchi wañukuna shuk wawinkunkuna Joseta chiknishpankuna wawkin Kashpantata shuk runakunata rantichirkakuna. Chay runakunaka Joseta yanka nishpa tarawashpa kawsanana Egipto allpama aparkakuna. Chasna kashpanpas Yaya Dioska Joseta kishpichirka karan parisichiy tukushkanmanta. Pay Joseta yanapashkanrayku ali yuyayyu yachak karka. Chasna kashpan egipo runakunapa atun apu payta kishpichishpan tukuy Egiptopi kamachik kananpa churarka. Chasnallatata wasinpipas Joseta kamachik kananpa churarka.

¹¹ Chay uras tarpukuna mana wiñashkanrayku atun yarkay tiyarka. Tukuy Egipto allpapi, Kanaán allpapipas kawsak runakuna yapa sinchi yarkaywa karkakuna. Yaya rukunchi wañukuna mana atiparkakunachu tarinata mikunata. ¹² Josepa yayan Jakobka Egiptopi achka mikuna tiyashkanta yachashpan wawankunata kacharka rantinankunapa mikunkunaryku. Chaymi karka puntiru rishkunkunaka.

¹³ Chay puntiru mikuna apamushkankunaka tukurishpan Jakobka kutikashka wawankunata kacharka rantik rinankunapa. Paktashpankuna Joseka wawinkunkunata rikushpan rimarka: Ñukami kani wawkikichi José. ¿Manachu rikswankichi? nishpa. Joseka rikuchirka paykunata egipo runakunapa atun apuka. Kaykunami kikin wawkinikuna kanahun nishpa. Chasna chay atun apuka yacharka maykan runakunamantami Joseka karka.

¹⁴ Chaymanta Joseka yayan Jakobta kayarka tukuy ayllunkunawa pakta Egiptopi kawsak shamunankunapa. Chaypi yayan Jakobta tukuy ayllunkunawa pakta kanchis chunka pichka

runakuna Egipto allpama kawsak rirkakuna.¹⁵ Unayta chaypi kawsahushpankuna yayanka wañurka. Chaymantapas wawankuna chaypillata wañurkakuna, maykankunami ñukanchipa yaya rukunchikuna karkakuna.¹⁶ Chasna wañushpankuna Sikem shutiyu llaktama Kanaán allpapi aparkakuna, allarishka urku uchkupi churashpankuna tapanankunapa. Ñawpa Abrahamka chay allpata rantirka Sikem llaktapi kawsak Hamorpa wawankunamanta.

¹⁷ Yaya Dioska ñawpa Abrahamta kay paktachinan shimita rimarka: Kanpa miraykunaka chikan runakunapa allpankunapi kawsankakuna chusku pachak watata nishpa. Chay chusku pachak wata tukurihushpan yaya rukuchi wañukuna chay Egipto allpapi achka mirashka karkakuna.¹⁸ Chay uras shuk mushu atun apu yaykurka Eglipti kamachinanpa. Chay mushu apuka mana yacharkachu Josemanta, ña unay wañushkanrayku.¹⁹ Chay apumi yaya rukuchi wañukunata llullachishpa parisichipayarka. Mana munashpan yaya rukunchikuna miranankunapa, chay apuka kamachirka tukuy mushu wawayarishka kari wawaykichikunata sakiychi wañunankunapa nishpa.

²⁰ Chasna chay apuka kamachihushkan uras Moiseska wawayarirka. Chay llullu wawastuta Yaya Dioska yapa yuyarka. Mana munashpankuna wañunarpa, yayan mamanwa Moisesta kimsa killata wasinpi pakalla kuyrakkuna.²¹ Manana ashwanta pakanata atipashpankuna mamanka shuk kanuwastupi churashpan yakupi wampuchishpa kacharirka. Chasna sakirishkata atun apupa warmi wawan tarishpan pushashpan kikin wawantashina wiñachirka.²² Chaypi Moiseska yachakurka tukuy egipro runakunapa yachashkankunata. Chasna kashpan

payka yapa yachak karka rimanankunapi, tukuy rurashkankunapi.

²³ Na chusku chunka watayu kashpan yapa munarka kikin ayllunkunata, israel masinkunata rikuk rinata.²⁴ Chasna yuyarishpa purihushpan shuk egipro runa shuk israel runata yankamanta piñashpa asutihuskanta rikurka.

Chaypi Moiseska asutirishkata kishpichishpan chay makak egipro runatana waktashpa wañuchirka.

²⁵ Chayta rurashpan Moiseska yuyarirka, israel masinikuna rurashkaynita yachashpankuna asirtankakuna Yaya Dios kachawashkanta paykunata chay chiknik runakunamanta kishpichinaynipa nishpa. Chasna kashpanpas paykunaka mana asirtarkakunachu.

²⁶ Kayantima Moiseska rihushpan ishkay israel masinkuna makanakuhukkunata tarik rirka. Payka makanakuhukkunata sakichinayashpan rimarka: ¿Imaraykuta wawkipura piñanakushpa makanakuhunkichi?²⁷ Chasna rimahushpan chay israel masinta makahuk runaka Moisesta tankashpan piñarishpa aynirka: ¿Imaraykuta satirik shamunki? ¿Pita kanta kachashka kaypi shuk apushina kanaykipa, rurahushkanchimantapas tapunaykipa?²⁸ Ñukantapas wañuchiwanayankichu egipro runata kayna wañuchishkaykitashina?

²⁹ Chasna rimahushkanta uyashpan Moiseska karuma mitikurka. Egliptomanta mitikushpan Madián allpapi kawsak rirka. Chaypi chikan runakuna chawpipi kawsapayarka. Chay allpapi warmiyashpan warminka ishkay kari wawata wawayarka.

³⁰ Chusku chunka watamanta Moiseska Sinaí urku mayanpi chunlla chakishka allpapi purihushpan shuk allpalla kaspistu sintihushkampi shuk *angel rikurirkka.³¹ Chayta rikushpan Moiseska mancharirka ¿imanahuntaya

chay kaspika? nishpa. Kayllayahushpan rikunanpa, Yaya Diospa rimahushkanta uyarka:³²Ñukami kani Yaya Dios, maykantami yaya rukuyikuna wañukuna Abraham, Isaak, Jakob kushichiwanahun. Chasna nihushkanta uyashpan Moiseska mancharishpan chukchurirkka, manana rikunayarkachu ashwanta.³³Chaypina Yaya Dioska payta rimarka: Atun kashpayni chakikipi chararishkaykita surkuy. Kay allpaka ñukapami.³⁴Ñukaka rikushkanimi Egípto allpapi akllashkayni runakunata yapa parisichihushkankunata. Paykunapa wakahushkankunatas uyashkanimi. Wakashpa mañawahukkunata llakirishpayni kishpichik risha nishpayni kanta Egíptoma kachashkayki.

³⁵Chay Moisesta paykuna ñawpa chiknishpa rimarkakuna: ¿Pita kanta kachashka shuk apushina kanaykipa, rurahushkanchimantapas tapunaykipa? nishpa. Chasna mana munashpankunapas Yaya Dios chay Moisestaka kacharka apunkuna tukunanpa, chaymanta paykunata kishpichik kananpa. Chasna kananpa Yaya Dios payta rikuchirka shuk sintihuk kaspi rikurik angelwa.³⁶Chasna kishpichik tukushpan chay Moiseska yaya rukunchi wañukunata Egíptomanta llukshichirka. Chay Egípto allpapi kallarishpa, atun yaku Puka Mar shutiyuta chimpashpa, chunlla chakishka allpapi purihushpankuna yaya rukunchi wañukunata chusku chunka watata suma mana atipaypakanata, Yaya Diospa yachayninwa nima ima uras rikushkankunata rikuchirka.³⁷Chay Moisesllata yaya rukunchi wañukunata rimarka: Shuk puncha Yaya Dios ñukanchi israel runakunamantalla shuk runata kachanka, ñukashina paypa yachayninwa yachachik kananpa nishpa.

³⁸Chay Moisestami Sinaí urkupi angelka rimarka yaya rukunchi wañukunawa chunlla chakishka allpapi kahushpankuna. Chaymanta Moiseska paykunata chay angelpa rimashkanta yachachirka, imashna rurashpami wiñaypa Yaya Dioswa kawsankakuna nishpa. Chaymanta chay shimillatata killkarka ñukanchipas yachananchipa.

³⁹Yaya rukunchi wañukuna Moisesta mana kasunayarkakunachu. Ashwan payta piñarishpankuna Egíptoma kutinayarkakuna.⁴⁰Chasna yuarishpankuna Moisés Sinaí urkupi yapa unayashpan paypa wawkin Aronta rimarkakuna: Mana yachanchichu imashnami tukushka Moiseska, chay ñukanchikunata Egíptomanta llukshichimushkaka. ¿Imaraykuta chasna unayahun? Chayrayku ruray ñukanchirayku shuk mushu dioskunata chaykunatana katinanchipa nishpa.⁴¹Chasna rimashpankuna shuk wakra kari wawata oromanta rurarkakuna diosninkunaryku. Chaymanta shuk wiwakunata wañuchirkakuna chay oromanta yanka nishpa rurashkata kushichinankunapa. Kikin makinkunawa rurashkankunata rikushpankuna kushikurkakuna kaymi diosninchika nishpa.⁴²Chayta rurashkankunaryku Yaya Dioska sakirka chayllatana mañashpa kawsanankunapa. Mana kikin Yaya Diosta kunkurishpa mañanankunarananti, intita, killata, istrillakunata mañapaya-nahun. Imashnami ñawpa Yaya Diospa yachayninwa yachachikkuna killkarkuna kasna nishpa:

Yaya Dios riman: Israel runakuna, alita uyawaychi. Chay chunlla chakishka allpapi chusku chunka watata purihushpaykichi ¿ñukatachu kushichinayashpa wañuchirkankichi shuk wiwakunata?
⁴³Manami chasnachu. Ñukata

mañanaykichiranti, Molok shutiyu yanka diospa karpa wasinta aparkankichi, Refán shutiyu yanka diospa istrillantapas. Chaymanta ñukata mañahuukshina chaykunata mañashpa purirkankichi. Kankuna kikin rurashkaykichiunata mañashpa purirkankichi. Chayrayku allpaykichimanta llukshichishkaykichi, Babilonia allpamanta ashwan karuma kachashkaykichi chaypi parisishpa kawsanaykichipa nishpa.

⁴⁴Kankunami rimawarkankichi *Yaya Diospa wasinmanta mana alita rimashkaynita. Alita uyawaychi. Ñawpa yaya rukunchi wañukunaka chunlla chakishka allpapi purihushpankuna mana tiyarkachu Yaya Diospa wasinka. Paykunaka charirkunkuna shuk karpa wasita, maypimi Yaya Dios paykunawa kahushkanta rikuchirka. Manara chayka tiyashpanra Yaya Dios Moisesta yachachirka imashnami chay karpa wasita ruranka chay ukupi payta mañanankunapa.

⁴⁵Moisés wañushpan kawsak yaya rukunchi wañukunana chay karpa wasita charirkakuna. Josué paykunata kamachishpan Yaya Dios paykunata kunata rimashkan allpata amuyashpankuna chay karpa wasita aparkakuna. Chaypi Yaya Dioska paykunawa kiparirka. Chay allpapi kawsahuk runakunata kallpachirka yaya rukunchi wañukunana kawsanankunapa. Chaypina Yaya Diosta chay karpa wasipi mañapayarkakuna David atun apunkuna tukunankama. ⁴⁶Chay atun apu Davidka Yaya Dios yapa payta yuyashkanta yachashpan tapurka: Kanrayku ruranayani shuk atun suma wasita ñukanchi Jakobmanta mirashka runakuna chaypi kanta mañananchipa. ¿Ima ninkita? nishpa. ⁴⁷Yaya Dioska mana munashpan aynirka: Mana kanchu rurapanki wasinita.

Wawayki Salomonmi ruranka nishpa.

⁴⁸Chasna chay suma wasita rurashpanpas yachanchi Yaya Dios ashwan atun tukuymanta kashkanrayku mana runa rurashka wasipi kawsananta. Chasna ñawpa Yaya Diospa yachayninwa yachachik Isaiaska killkarka:

⁴⁹⁻⁵⁰Yaya Dioska kasna riman: Ñukaka awa silipi tiyarishpayni kamachini tukuy allpapi kawsak runakunata. ¿Manachu ñuka rurashkani tukuy siluta allpatapas? ¿Imashnata atipaynima kawsanata runa rurashka wasipika? Manami atipankichichu ñukarayku shuk wasita ruranata nishpa.

⁵¹Kankuna Yaya Diospa wasinmanta, Moisespa killkashkanmantapas mana alita rimashkaynita niwankichi. Ashwan kankunaka mana Yaya Diosta kasunayakkuna kankichi. Yaya Diosta mana riksikkunashina kashpaykichi tukuy uras Yaya Diospa Espiritunta arkankichi mana kankunata shutipa kashkanta riksichinanpa. Ñawpa yaya rukunchi wañukunashinallata kankunapas katihunkichi. ⁵²Paykunaka ñawpa Yaya Diospa yachayninwa yachachikkunata tukuya wañuchinayarkakuna. Shukkunataka chay ali rurak Jesuspa shamunanmanta rimakkunata wañuchirakuna. Kunanka chay Jesús paktashpan kankunaka apichishpa payta wañuchichirkankichi. ⁵³Kankunaka Yaya Dios angelkunata kachashpan kamachishkunkunata kuy tukushpaykipichas mana chayta kasushkankichichu nishpa Estebanka rimarka.

Estebanta wañuchirkakuna

⁵⁴Estebanpa rimashkanta uyashpankuna chay apukunaka sumakta piñarishpankuna kirunkunata kanirirkakuna.

⁵⁵Estebanka Yaya Diospa Espíritun payta tukuypi yuyachishpan siluma

rikushpan Yaya Diospa suma chuyahlla punchayachishkanta rikurka. Chasnallata Jesusta rikurka Yayan Diospa kuskan parti shayahukta.⁵⁶ Chasna rikushpan rimarka:

Rikuychi, siluka paskarishka kahukta rikuhuni. Chasnallatata rikuhuni Jesusta Yaya Diospa kuskan parti shayahukta.

⁵⁷ Chasna rimahushkanta uyashpan-kuna apukunaka rinkrinkunata tapashpankuna sinchita kaparishpan-kuna shuk yuyayllawa kallpa payta apik rirkakuna.⁵⁸ Llaktamanta tankashpa llukshichishpankuna rumiwa tuksishpa wañuchirkakuna. Manara rumiwa tuksihushpankuna churarishkunkunata llatanachishpa Saulo shutiyu musuta kurkakuna wakaychananpa.⁵⁹ Rumiwa tuksihushpankuna ña wañuhushpan Estebanka Jesusta mañashpa nirka:

Yayayni Jesús, ña wañuhuni. Kaykaya, kaypi kahuni kawsanaykipi yaykuchiwanaykipa.

⁶⁰ Chasna nishpan kunkurishpan sinchita Yaya Diosta mañashpa kaparirka:

¡Yaya Dios, ama kastigankichu kay wañuchiwiak runakunata!

Chasna mañashpa wañurka.

Sauloka Jesusta kirikkunata yapa parisichirka

8 ¹⁻² Sauloka Estebanta wañuchihush-kunkunata rikushpan alimi nirka. Yaya Diosta shuk sumakta kirik runakuna Estebanpa aychanta urku uchkupi churashpa tapak rirkakuna. Chasna churashpankuna achka llakirishpa sinchita wakashpa karkakuna.

Esteban wañuchiy tukushkan punchamanta pacha chiknik runakuna Jerusalenpi Jesusta kirik runakunata wañuchinayashpa katirkakuna. Chasna rurashpankuna kirikkunaka llampu

shikwarirkakuna tukuy Judea allpapi, *Samaria allpamapas. *Apostolkunalla Jerusalenpi kiparirkakuna.³ Sauloka chay chiknik runakunamanta kashpan yapa munarka Jesukristuta kirikkuna manana tiyananpa. Karan wasikunapi yaykurka kirikkunata apinanpa. Apishpan karikunata warmikunatapas apukunama aparka karselpi churangan-kunapa.

Kirikkuna yachachirkakuna suma ali shimita Jesukristu runakunata kishpichinanmanta

⁴ Jesukristuta kirikkunaka Jerusalen-manta shikwarishpankuna tukuy partima Yaya Diospa suma ali shimita Jesukristu runakunata kishpichinan-manta rimashpa purirkakuna.⁵ Chasnallatata Felipepas Jerusalenmanta llukshirkaka. *Samaria allpapi tukuymanta atun llakta Samariama rishpan Jesús Yaya Diospa Kachashkan Kishpichik kananta yachachishpa purirka.⁶ Chaypi yachachihushpan tukuy runakuna nima ima uras rikushkankunata Yaya Diospa yachay-ninwa rurahushkanta rikuhushpankuna paypa yachachishkanta alita uyarkakuna.⁷ Felipe achka runakunamanta supaykunata llukshichihushpan sinchita kaparishpa llukshirkakuna. Achka aycha chakirishka runakuna, mana alita purinata atipakkunapas ampirirkakuna.⁸ Chasna ampirishpankuna tukuy chay llaktapi kawsak runakuna yapa kushikurkakuna.

Puruhu Simón Jesukristuta kirik tukurka

⁹ Chay *Samaria llaktapi shuk runa tiyarka Simón shutiyu. Payka puruhu kashpan manara Jesukristuta kirikkuna tiyashpan sinchi yachayyu bankumi kani nishpa tukuy Samaria allpapi

kawsak runakunata yachayninwa rikuchishpa manchachipayan.¹⁰Tukuy runakuna, apukunapas payta kasupayar kakuna. Paymanta rimarkakuna Yaya Diosmi payta atun yachayta kushka nishpa.¹¹Unaymanta pacha chay puruhuka yachayninwa rikuchishpa paykunata manchachipayarka. Chayrayku payta alita kasukkuna kapayarkakuna.¹²Felipeka yachachishpan Yaya Diospa suma ali shiminta paypa ali kamachinan kay allpapi ña kallarishkanmanta, chaymantapas Jesukristu ūukanchita Kishpichik kananta nishpa, manana puruhuta kasurkakunanachu. Chaymanta achka runakuna, karikuna warmikunapas, yachachishkanta riksishpa, Jesukristuta kirishpa bawtisarirkakuna.¹³Chay puruhi Simonpas Jesukristuta kirishpan bawtisarirka. Chaymanta Felipewa pakta purirka. Simonka suma mana atipaypakunata, Yaya Diospa yachayninwa nima ima uras rikushkanta Felipe rurahushkanta rikushpan yapa mancharirka.

Yaya Diospa Espíritun samaritano runakunama shamurka

¹⁴Jerusalenpi kahuk *apostolkuna *Samaria allpapi kawsak runakuna Yaya Diospa shiminta kiriushkankunamanta yachashpankuna Pedrota Juanta chayma kacharkakuna.¹⁵Paykuna Samariapi paktashpankuna Yaya Diospa shiminta kirik runakunarayku mañarkakuna, Yaya Diospa Espíritun shunkunkunapi yaykuchun nishpa.¹⁶Paypa Espiritunka manara paykunama shamurkarachu. Chay runakuna Jesusta kirishkankunarayku bawtisarishkalla karkakuna.¹⁷Chaypina Pedroka Juanwa pakta makinkunata chay kirikkunapi churashpankuna Yaya Diospa Espiritunka paykunapa shunkunkunapi yaykurka.

Pedro Simonta rimarka mana ali yuyayyu kananta

¹⁸Simonka rikurka *apostolkuna makinkunata churashpankuna kirikkunapi Yaya Diospa Espíritun yaykuhukta. Chasna rikushpan kullkita apamurka apostolkunata kunanpa.¹⁹Chay kullkita rikuchishpan rimarka:

Ñukatapas kuwaychi chay yachayta, ñukapas makinita maykanpipas churashpayni Yaya Diospa Espíritun yakyunanpa.

²⁰Chasna nishpan Pedroka aynirka:

Yaya Diospa kushkan yachayta rantisha nishpaykika chay nina mana wañukma rinayki tiyan kullkikiwa pakta.²¹Kanka mana atipankichu ūukanchishina Yaya Diospa yachayninwa kawsanata. Shunkuykika Yaya Diospa rikushkanpika manami alichu.²²Millaypata yuyarihushkaykimanta llakirishpayki sakiy Yaya Dios munashkan-shinana yuyarinaykipa. Chaymantapas Yaya Diosta mañay shunkuykipi yuyarishkaykita pay munashpanka llakichinanpa.

²³Yapa tukuymanta atun yachayyu kanayashpaykimi millaypa yuyayllawa watarishka kahuktashina rikuni kanta.

²⁴Chasna Pedro rimashpan Simonka aynirka:

Kankuna Yaya Diosta ñukarayku mañapaychi mana rimashkaykishina pasanaynipa.

²⁵Pedroka Juanwa Jesusmanta sumakta yachachishkankunawasha chasnallatata Yaya Diospa shiminta yachachishpa Jerusalenma kutirkakuna. Kutihushpankuna *Samaria allpapi achka llaktakunapi Yaya Diospa shiminta yachachishpa rirkakuna.

Felipe Etiopia allpamanta kamachik runata yachachirka

²⁶Chaywasha Yaya Diospa shuk *angel Felipeta rimarka:

Atarishpayki Jerusalenmanta urayma
riy, Gasa llaktama rina ñampita.

Chay ñampika chunlla chakishka allpa
chawpita rin.

²⁷Chasna rimashkanta kasushpan
Felipeka rirkta. Chaypi shuk Etiopia-
manta runata tinkurka. Payka
kaparishka karka. Etiopiapi kamachik
atun apu warmi Kandase shutiyupa
kamachinan karka. Paypa churashkan
shuk atun kamachik karka. Chasnalla-
tata chay warmi apupa kullkinta
wakaychak karka. Chay runaka
Jerusalenpi Yaya Diosta mañanapa
rishkanwasha kutihurka. ²⁸Kaballu
aysashka karronpi tiyarihpán Yaya
Diospa shimin killkarishkata leyishpa
kutihurka. Chay killkaka ñawpa Yaya
Diospa yachayninwa yachachik Isaiaspá
killkashkan karka.

²⁹Chaypi Yaya Diospa Espíritun
Felipeta rimarka:

Kayllayay chay karrota.

³⁰Chasna nishpan Felipeka kayllayak
rirkta chay karrota. Kayllayashpan
Isaiaspá killkashkanta leyihukta
uyashpan tapurka:

¿Leyihushkaykita alita asirtankichu?

³¹Chasna Felipe tapushpan Etiopia-
manta runaka aynirkta:

Nima pi yachachiwashpanka
imashnata atipasha asirtanata.

Chasna nishpan Felipeta sikachirka
karronpi paypa kuchunpi tiyarinanpa.

³²Chay runa leyihushkan killkapi shuk
parti kasna nin:

Payta obehatashina wañuchinanku-
napa pusharkakuna. Imashnami
willmanta pitihushpankuna
obehaka mana kuchparinchu,
nima kaparinchu, chasnallatamatí
paypas chunlla kiparirka. ³³Payta
asichishpankuna pinkachirkakuna.
Mana uchayu kashpanpas
kastigarkakuna. Wañuchishkanku-

narayku mana tiyanchu paymanta
mirashka runakunaka nishpa.

³⁴Chayta leyishkanwasha chay
Etiopiamanta runaka Felipeta tapurka:

Rimaway ¿pimantata kay killkak
runaka chasna riman, pay kikinmantan-
chu, shuk runamantachu?

³⁵Chasna tapushpan Felipeka chay
killkashkamanta kallarishpa
yachachirka Jesúz Kishpichik kananta.

³⁶Chasna ñampita rihushpankuna
shuk yakupi paktarkakuna. Paktashpan-
kuna chay Etiopiamanta runaka nirka:

Rikuy kay yakuta. ¿Manachu kay
yakupi bawtisawankima?

³⁷Chaypina Felipeka aynirkta:
Tukuy shunkuykimanta pacha
Jesukristuta kirishpaykika bawtisash-
kayki.

Chaypi chay runaka ari nirka.
Kirinimi Jesukristuta, pay Yaya Diospa
Wawan kananta.

³⁸Chasna nishpan Etiopiamanta
runaka karrota aysahuk kaballukunata
shayachirka. Chaypi ishkanti yakupi
uraykushpankuna Felipeka chay
Etiopiamanta runata bawtisarka.

³⁹Bawtisashkanwasha ishkanti
yakumanta sikahushkankunapi kunkay-
manta Yaya Diospa Espíritun Felipeta
pusharka shuk partima. Etiopiamanta
runaka Felipeta manana ashwan
rikurkanachu. Chasna kashpanpas
kushilla ñampita rirkta.

⁴⁰Yaya Diospa Espíritun Felipeta Asoto
llaktama pusharka. Chaymanta tukuy chay
ñampipi kahuk llaktakunapi purishpan
Jesúz Kishpichik kananta yachachishpa
rirkta Sesarea llaktapi paktanankama.

Saulo Jesukristuta kirik tukurka
(JKK. 22.6-16; 26.12-18)

9 ¹Chay uras Sauloka mana sakirka-
rachu Jesukristuta kirikkunata
chikninata. Paykunata manchachishpa

rimapayarka: Mana sakishpaykichika Jesukristuta kirlinata kankunata sinchitami kastigachisha nishpa. Chaymantapas paykunata wañuchinayashpa kawsarka. Chasna kashpan *saserdote kunapa atun apuma rirkka. ²Chay aputa tapurka kamachina killkata Damasko llaktapi tantarinankuna wasikunapa apunkunata rikuchinanpa. Chay tantarina wasikunapi yakyushpan munarka apinata chay mushu yachachina Jesukristupa yachachish-kanta katihukkunata. Chaypina chayta katik karikunata warmikunatapas makinkunata watashpa Jerusalenma pushanayarka kastigachinanpa.

³Chasna rurananpa rihushpan ña Damasko llakta kuchupi paktahushpan silumanta chuyahlla ilampashina paypi muyukta rikurirkka. ⁴Chayta rikushpan Sauloka allpama urmarka. Chaypi shuk payta rimahushkata uyarka:

Saulo, Saulo, ¿imaraykuta chiknishpa parisichiawunki?

⁵Chasna tapuy tukushpan Sauloka aynirka:

¿Pitaya kanki? nishpa.

Chaypi silumanta rimahukka aynirka: Parisichiawushkayki Jesusmi kani.

⁶Kunanmanta pacha manana parisichishpa katiychu katiwakkunata. Atarishpayki chay Damasko llaktama riy. Chaypi shuk runaka kanta rimanka imatami ruranayki tiyan nishpa.

⁷Chay Saulowa riuhukkunaka payta rimahuk shimita uyashpankuna mancharirkakuna. Chay shimita uyashpankunapas nima shuk runata rikurkakunachu, mancharishpa chunlla shayarirkakuna. ⁸Sauloka atarishpan manana atiparkachu rikunata. Chasna wisku kashpan paywa riuhukkunaka makinmanta apishpa Damasko llaktama pusharkakuna. ⁹Chaypi kimsa punchata nima imata rikunata atiparkachu.

Chaymantapas mana mikurkachu, mana upyarkachu nima imata.

¹⁰Chay Damasko llaktapi kawsarka shuk runa Ananias shutiyu Jesukristuta kirik. Muskuyipishina rikurishpan Jesuska payta kayarka:

Ananias.

Chasna nishpan Ananiaska aynirka: Amuyni, ¿imatata niwanki?

¹¹Jesuska rimarka:

Atarishpayki Kuska shutiyu ñampita riy. Chaypi Judaspa wasinpi Tarso llaktamanta Saulo shutiyu runata maskakriy. Payka kuan Yaya Diosta mañashpa kahun. ¹²Payta muskuypishina rikuchishkani, kan Ananias, payma rihushkaykita. Chaymanta makikita umanpi churahushkaykita kuti rikunanpa rikuchishkani.

¹³Chasna Jesús rimashpan Ananiaska aynirka:

Amuyni, achka runakuna kwintawash-kakuna chay Saulo Jerusalenpi kanta kirishpa kawsahukkunata yapa parisichiawushkanta. ¹⁴Kunanka kaymapas shamushka saserdotenchiku-napa apunkunapa kamachishkawa kanta mañahuk runakunata apishpa kastigachinanpa.

¹⁵Chaypi Jesuska payta aynirka:

Riylla. Saulotaka ñukami akllashkani ñukamanta rimananpa mana israel runakunata, atun apunkunatapas, kankuna israel runakunatapas. ¹⁶Chasna kashpan payta asirtachisha imashna achkatami parisinan tiyan runakunata ñukamanta yachachihushpan.

¹⁷Jesuspas chasna nishkanta kasushpan Ananiaska Saulota rikuk rirkka. Chay tiyahushkan wasipi paktashpan yaykurka. Chaymanta makinta Saulopa umanpi churashpan rimarka:

Wawkini Saulo, shamuhushkayki ñampipi rikurik Jesukristumi ñukata kachawashka. Payka munan kanta

yanapanaynipa kuti mushumanta rikunaykipa, chaymantapas paypa Espíritun shunkuykipi yaykushpan tukuyipi paypa yuyachishkan kanaykipa.

¹⁸Chay ratulla challwa karashina Saulopa ñawinmanta wicherishpan kuti mushumanta atiparka rikunata. Chaywasha Sauloka atarishpan bawtisrik rirka. ¹⁹Bawtisarishkanwasha mikushpan kuti sinchikurka. Chaymanta kiparirka shuk punchakunata chay Damasko llaktapi Jesukristuta kirikkunawa.

Saulo kallarirka yachachinata Jesukristumanta

²⁰Chaypina Sauloka tantarinankuna wasikunapi kallarirka yachachinata Jesusmi Yaya Diospa Wawan kan nishpa. ²¹Chasna rimahushkanta uyashpanguna tukuy uyahukkunaka mancharishpanguna nirkakuna:

¿Manachu kay runaka Jerusalenpi Jesusta mañahukkunata parisichishpa purik karka? ¿Manachu kaymapas kirikkunata apishpa *saserdotekunapa apunkunama pushanampa shamushka?

²²Chasna rimashpangunapas Sauloka Yaya Diospa shiminta ashwan sinchita yachachirka Jesuska chapashkanchi Yaya Diospa Kachanan Kishpichikmi kan nishpa. Damasko llaktapi kawsak israel runakuna kunkaymanta chasna rimahushkanta mana asirtarkakunachu. Chaypina paykunapura tapunakurkakuna ¿alichu manachu? nishpa. Mana yacharkakunachu.

Saulo israel masinkunamanta kishpirka

²³Chasna achka punchakunata yachachihushpan israel masinkunaka yuyarirkakuna Saulota wañuchinata. ²⁴Chay runakunaka tutapi punchapipas llakta kincha punkupi chapapayanahun

Saulota apishpankuna wañuchinankuna. Chaypi Sauloka chasna yuyarihushkankunata yacharka. ²⁵Chay-rayku shuk tuta Saulota shuk atun tasapi churashpankuna kirikkunaka llakta kincha washama uraykuchishpankuna kacharkakuna. Chasna Sauloka kishpirka israel masinkunamanta.

Saulo Jerusalenpi kiparirka yachachinanpa

²⁶Chasna Damasko llaktamanta llukshishpan Sauloka Jerusalenna rirka. Paktashpan chaypi kirik masinkunawa tantarinayarka. Paykunaka mana kirishpankuna Saulo Jesukristuta kirik tukushkanta, tukuy mancharkakuna payta. ²⁷Chasna kashpanpas Bernabeka Saulota amiguyarka. *Apostolkunama pushashpan paykunata kwintarka: Amunchi Jesusmi ñampipi rikurishpan paywa kwintashka. Chasna kashpan Damasko llaktapi payka mana manchashpa Jesukristumanta yachachirka nishpa. ²⁸Chasna Bernabé kwintashpan Jesukristuta kirikkunaka Saulota yaykuchirkakuna paykunawa pakta tantarinanpa. Chaymanta pacha mana manchashpa Jerusalenpi Jesukristumanta yachachishpa purirka. ²⁹Chasna yachachishpa purihushpan *griego shimita rimak israel masinkunawa kwintarka. Chaymanta paykunawa rimanakushpa yachachirka. Mana kirinayashpankuna paykunaka Saulota wañuchinayarkakuna. ³⁰Chayta yachashpankuna Jesukristuta kirik masinkuna Saulota Sesarea llaktama pusharkakuna. Chaymanta kacharkakuna Tarso llaktanma.

³¹Chasna Saulo kirik tukushpan Jesukristuta kirik runakuna tukuy Judea, Galilea, *Samaria allpakunapi parisishpa kawsahushkankunamanta kushillana kawsarkakuna. Jesukristupa

yachachishkanta ashwan alita
yachakushpankuna sinchikurkakuna.
Payta yuyashpa munashkanta rurashpa
kawsarkakuna. Yaya Diospa Espíritun
paykunata yanapashpan ashwan
runakuna Jesukristuta kirirkakuna.

Pedro Eneasta ampirka

³²Chay uras Pedroka tukuy partima
kirik masinkunata rikunarpa rirka.
Chaypi Lida llaktapi kawsak kirik
masinkunamapas paktarka. ³³Chay
llaktapi tarirka Eneas shutiyu runata.
Chay runaka pusak watata kawitipi
sirishpa kawsapayan. Mana atarinata
atipapayanchu, aychan chakirishka
kashkanrayku. ³⁴Chaypi Pedroka chay
runata rikushpan nirka:

Eneas, Jesukristumi kanta ampihun.
Atariy, puñunaykita alichashpayki.

Chay ratulla Eneaska ampirishka
atarirka. ³⁵Chay ampirishkata rikushpan-
kuna tukuy Lida llaktapi kawsakkuna,
Sarón llaktapi kawsakkunapas ñawpa
yanka kirinankunata sakishpankuna
Jesukristutana kirirkakuna.

Pedro Dorkasta kawsachirka

³⁶Chay uras Jope llaktapi shuk warmi
Jesusta kirik tiyarka. Paypa shutinka
Tabita karka, *griego shimipi Dorkas. Chay
warmika alita rurashpa nima imayu
runakunata yanapashpa kawsak karka.
³⁷Pedro Lida llaktapi kahushpan Dorkaska
unkushpan wañurka. Chaypi aychanta
mayllashpankuna pillurakakuna. Chaymanta
awaniru kawitu kwartipi churarkakuna.
³⁸Jope llaktaka Lida llakta mayanpi karka.
Chaypi kawsak Jesukristuta kirik runakuna
yachashpankuna Pedro chay Lida llaktapi
kahushkanta, ishkay kirik masinkunata
kacharkakuna payta kayak rinankunapa,
Jope llaktama utkalla shamuy nishpa.
³⁹Chasna rimashpankuna Pedroka
paykunawa pakta rirka. Jopepi paktash-

pankuna payta pusharkakuna maypimi
wañushkata churashkakuna. Chaypi
yaykushpan mashintukunaka Pedrota
kayllayarkakuna rikuchinankunapa,
Dorkas kawsa kahushpanra paykuna-
rayku churarinankunata sirashkanta.
⁴⁰Chasna wakashpa rikuchishpankuna
Pedroka tukuya kwartumanta
kanchama llukshichirka. Paylla
kiparishpan kunkurishpan Yaya Diosta
mañarka. Chaywasha chay wañushka
warmita rikushpan nirka:

Tabita, atariy.

Chaypi chay wañushka warmika
ñawinta paskarka. Pedrota rikushpan
tiyarirka. ⁴¹Chasna tiyarishkanta
rikushpan Pedroka makinmanta
apishpan atarichirka. Chaywasha kirik
masinkunata, mashintukunatapas
kayashpan kawsarishkata rikuchirka.
⁴²Chasna rurashkanta tukuy Jopepi
kawsakkuna yachashpankuna achka
Jesukristuta kirirkakuna. ⁴³Chaymanta
Pedroka achka punchakunata Jopepi
kiparirka karakunata timplashpa
chakichik Simonpa wasinpi.

Pedro Korneliota yachachik rirka

10 ¹Sesarea llaktapi kawsarka shuk
runa Kornelio shutiyu. Payka
shuk waranka Italia allpamanta suntalu-
kunata kamachik kapitanmi karka.
²Chay Kornelioka tukuy wasinpi
kawsakkunanti Yaya Diosta
kushichishpa kawsapayan. Israel
runakunata yanapananpa achka kullkita
kupayan. Tukuy uras Yaya Diosta
mañashpa kawsapayan.

³Shuk puncha ña chishiyahushpan
muskuyishina Yaya Diospa kachashkan
*angelta rikurka. Chay angelka wasinpi
yaykushpan Kornelio nishpa kayarka.

⁴Chaypi Kornelioka angelta alita
rikushpan manchaywa ayinrka:

¿Imatata rimawanki, Señor? nishpa.

Chay angelka rimarka:
 Yaya Dioska mañashkaykita
 uyashkami. Nima imayu runakunata
 kullkikita kushkaykitapas rikushpan
 yapa kushikun. ⁵Kunanka shuk runayki-
 kunata Jope llaktama kachay shuk runa
 Simón Pedro shutiyuta pushamunanku-
 napa kayma. ⁶Chay Simón Pedroka
 shuk Simón tokayunpa wasinpimi
 kahun. Chay tokayunka karakunata
 timplashpa chakichikmi. Chay wasika
 atun yaku mar mayanpimi. Chay
 Pedromi kanta rimanka imatami
 ruranayki tiyan nishpa.

⁷Chay angel llukshishkanwasha
 Kornelioka ishkay runankunata kayarka,
 chaymanta alita Yaya Diosta kasuk shuk
 suntaluntapas. ⁸Tukuy rikushkanta
 uyashkantapas kwintashkanwasha
 paykunata kacharka Jope llaktama.

⁹Kayantima paykuna ña Jopema
 kayllayahushkankunapi, chawpi puncha
 kahushkapi, Pedroka wasi awama sikarka
 Yaya Diosta mañananpa. ¹⁰Yarkayta
 musyashpan mikunayarka. Shukkuna
 mikunata yanunankunakama payka
 mañahushkanpi muskuyipishina silu
 paskarihušhkanta rikurka. ¹¹Chay silu
 paskarishkamanta shuk anchu mantan-
 shina rikurirkha chuskunti puntanmanta
 watarishka uraykumuuhushkata. ¹²Chay
 mantana ukupi rikurirkha tukuy israel
 runakunapa mana mikunankuna
 aychakuna. Shukkuna chusku chakiwa
 purik, shukkuna aysarishpa purik,
 shukkuna pawakkuna karkakuna. ¹³Chasna
 rikuhashkanpi Pedroka Yaya Diospa kasna
 rimahushkanta uyarka:

Pedro, atariy. Apishpa wañuchish-
 payki mikuy.

¹⁴Chasna rimashkata uyashpan
 Pedroka aynirkha:
 A Yaya Dios, manami chaykunataka
 mikushanchu. Nima ima uras chasna
 millaypa aychakunata mikushkanichu.

¹⁵Chaypi Yaya Dioska kutikashka
 payta rimashpan nirka:

Ñuka ali mikunami nishkaynita ama
 yanka rimaychu manami mikunachu
 nishpa.

¹⁶Chasnallatata kimsa kuti rikurirkha.
 Chaywasha chay mantanaka silumalla-
 tata sikarka.

¹⁷Pedroka chay rikushkanta mana
 yachashpan yuyarishpa tiyahushkan-
 lapi Korneliopa kachashkan runanku-
 naka Simonpa wasinta maskashpa
 tapushpa paktarkakuna. ¹⁸Chay wasipi
 paktashpankuna tapurkakuna:

¿Kaypichu kahun shuk runa Simón
 shutiyu, maykantami ninahun Pedro?
 nishpa.

¹⁹Pedro rikushkanta yuyarishpanra
 Yaya Diospa Espíritun payta rimarka:

Rikuy, kimsa runakunami kanta
 maskahunkuna. ²⁰Atariy, kaymanta
 uraykuy. Paykunawa pakta mana
 manchashpa riy. Ñukami paykunata
 kachashkani kanta pushanankunapa.

²¹Chasna Yaya Diospa Espíritun
 rimashpan Pedroka uraykushpan
 Korneliopa kachashkan runankunata
 rimarka:

Ñukami kani maskahushkaykichi
 runaka. ¿Imaraykuta shamushkankichi?

²²Chay runakunaka aynirkakuna:
 Shamushkanchimi kapitanchi
 Kornelio kachashkanrayku. Payka Yaya
 Diosta sumakta mañashpa kawsan.
 Chayrayku tukuy payta riksik israel
 masikikuna yuyanahun. Yaya Diospa
 angel payta rimashka: Kachay runayki-
 kunata Pedroka pushamunankunapa
 wasikima. Pay rimahushkanta uyanayki
 tiyan. Chasna chay angel rimashkan-
 rayku Kornelioka ñukanchita kachashka
 kanta pushananchipa nishpa.

²³Chasna kwintashpankuna Pedroka
 paykunata wasi ukuma yaykuchishpan
 chayllapi chay tutaka puñurkakuna.

Kayantima Pedroka chay runakunawa Sesarea llaktama rirkka. Shuk kirik wawkikunapas Jope llaktamanta Pedrowa pakta rirkakuna.²⁴ Kayantima Sesareapi paktashpankuna Kornelioka ayllunkunata, yapa yuyashkan runakunatapas tantachishpan wasinpi Pedroka chaparka.²⁵ Pedroka chay wasipi paktashpan Kornelio tiyahushkanmanta atarishpan payta tinkuk rirkka. Tinkushpan Pedropo puntanpi kunkurik rirkka payta kushichishpa saludananza.²⁶ Chaypi Pedroka Korneliota atarichi-hushpan rimarka:

Atariy. Ñukapas kanshina runallata-tami kani nishpa.

²⁷Korneliowa kwintahushpan Pedroka wasi ukuma yaykuhushpan achka tantarishka runakunata rikurka.

²⁸Chasna rikushpan chay runakunata rimarka:

Kankunaka ñami yachankichi, ñukanchi israel runakunata Moisespa kamachishkanka nin, shuk mana israel runakunata mana kayllayankichichu. Chasna kashpantata Yaya Dioska ñukata yachachiwashka nima maykan runata Yaya Diospa rikushkanpi manami alichu kanki nishpa yanka rimanaynipa.²⁹ Chayraykumi kayawashpayki mana killashpa chay ratulla shamushkani. Kunanka yachanayani imaraykumi kayachiwashkankichi nishpa.

³⁰Chasna Pedro tapushpan Kornelioka aynirka:

Ñami chusku punchana kasna uras chishipi nima imata mikushpayni Yaya Diosta mañahurkani wasinipi. Chaypi kunkaymanta shuk suma chuya churarishka runa puntaynipi shayahukta rikurkani.³¹ Chay runaka kayawarka Kornelio nishpa, Yaya Dioska mañahushkaykita uyashkami. Nima imayu runakunata kullkiwa yanapash-kaykitapas Yaya Dios rikushkami.

³²Kunanka Jope llaktama runaykikunata kachay Simón Pedrota pushamunankunapa. Payka aycha karata chakichik Simón shutiyupa wasinpi kahun. Chay wasika atun yaku mar mayanpimi kahun. Chaypi kahuk Pedromi shamunka kanwa kwintananpa nishpa rimawarka chay angelka.³³ Chaypina utkalla runaynikunata kacharkani kanta maskanankunapa. Alimi shamushkay-kika ñukanchima. Kunanka tukuy tantarishka kahunchi Yaya Diospa puntanpi. Tukuy Yaya Dios kanta rimashkanta uyanayanchi nishpa.

Pedro chay tantarishka runakunata Jesukristumanta yachachirka

³⁴Chaymanta Pedroka kallarirka yachachinata kasna nishpa:

Kunanka alita yachani Yaya Dioska mana ñukanchi israel runakunallatachu yuyashkanta, ashwan tukuy runakunata-mi yuyan.³⁵ Maykan llaktamantapas Yaya Diosta manchashpa alita rurak runataka Yaya Dioska shutipami yuyashpan alita rikun, israel runata, mana israel runatapas.³⁶ Yaya Dioska ñukanchi israel runakunata rimarka, Jesukristuta kirik runakunata uchankunanta llakichinanta, kushilla paywa pakta kawsananchipa. Chay Jesuska tukuyupa apunmi kan.³⁷ Kankuna alita yachankichi Juan runakunata yachachishkanta mana ali rurahushkan-kunata sakishpankuna bawtisarinankunapa. Chaywasha Jesuska kallarirka runakunata yachachinata Galilea allpapi. Chaymanta tukuy Judea allpapi-pas yachachishpa purirkha.³⁸ Ña yachankichi Yaya Dioska chay Nasaretmanta Jesusta Espiritunta atun yachaynintapas kushkanta. Chasna Yaya Dios payta yanapashpan maytapas purishpan yapa alikunata rurarka, supay yaykushka runakunamantapas supayta

llukshichirka.³⁹Ñukanchimi rikushkan-chi Jesúس Jerusalén llaktapi, tukuy Judea allpapipas alita rurashkanta, chayraykumi kankunata chayta rimanchi. Chasna alikunallata rurashpanpas apunchikunaka kruspi klabachishpa wañuchichirkakuna.⁴⁰Paytaka Yaya Dios kimsa punchamanta kawsachirka. Chasna kawsarish-kataka ñukanchi rikushkanchi.⁴¹Payka mana tukuy runakunatachu rikurishka, ñukanchillatami payka rikurishka. Kawsarishkanwasha upyarkanchi mikurkanchi paywa pakta. Yaya Diosmi ñukanchita ñawpamanta pacha akllarka chasna kawsarishkanmanta kwintananchipa.⁴²Ñukanchita kamachirka tukuy runakunata rimananchipa Yaya Dioska payta aputa rurashkanta, tukuy kawsakunata wañushkakunatapas rurashkunkunata tapushpan rimananpa pimi kishpinka, pimi kastigarinka nishpa.⁴³Ñawpamanta pacha tukuy Yaya Diospa yachayninwa yachachikkuna-naka chay Jesusmanta kwintarkakuna: Maykanpas payta kirishpanka Yaya Diosmi tukuy ucha rurashkankunamanta pichanka nishpa.

Yaya Diospa Espíritun mana israel runakunapipas yaykurka

⁴⁴Pedro chayra rimahushkanllapi Yaya Diospa Espiritunka tukuy uyahu-kunapa shunkunkunapi yaykurka.⁴⁵⁻⁴⁶Chaypi chay mana israel masinikuna nima pi yachakushkan Yaya Dioslla yachashkan shimipi rimashpa Yaya Diosta kushichirkakuna. Chayta uyashpanguna Pedrowa kahuk Jesusta kirik israel masinkuna mancharishpa rikunakurkakuna kasna nishpa:

¿Imashnataya yaykushka Yaya Diospa Espiritunka kay mana israel runakunapipas?

⁴⁷Chaypina Pedroka rimarka:

¿Manachu ali kama yakupi bawtisan-nanchipa kay runakunata? Paykunapi-pas Yaya Diospa Espiritunka yaykush-kami ñukanchipishina.

⁴⁸Chasna nishpan Pedroka paykunata rimarka Jesukristuta kasukkuna tukushkankunata rikuchinankunapa bawtisaychi nishpa. Bawtsarishkanku-nawasha paykunaka Pedrota tapurka-kuna shuk punchakunata paykunawa kiparinanpa.

Jerusalenpi Pedro kirikkunata kwintarka

11 ¹Chaymanta *apostolkuna, tukuy Judeapi Jesukristuta kirikkunapas yacharkakuna ñukanchi mana israel runakunapas Yaya Diospa shiminta kirishkanchita.²Chayrayku Pedroka Jerusalenma kutishpan kirik israel masinkunaka payta piñarishpa tapurkakuna:

³¿Imaraykuta rishkanki pasyanapa mana israel runakunata? ¿Imaraykuta paykunawa mikushkanki? nishpa.

Israel runakunaka mana tantanakupa-yashpanguna nima mikupayashpanguna mana israel runakunawa chasna tapurkakuna.

⁴Chasna tapushpanguna Pedroka tukuyta kallarishkanmanta pacha kwintarka kasna:

⁵Ñuka Jope llaktapi Yaya Diosta mañashpa kahushkaynipi muskuypishina shuk mantanatashina rikurkani. Karan puntanmanta watarishka karka. Silumanta uraykumurka ñukakama.

⁶Alita rikushpayni tukuy allpapi kawsak chusku chakiyu animalkunata, manchaypa piña animalkunata, aysarishpa purik animalkunata, tukuy pawakkunatapas rikurkani.⁷Chaymanta Yaya Diospa shiminta uyarkani: Pedro, atariy. Apishpa wañuchishpayki mikuy.

⁸Chasna uyashpayni aynirkani: Ay

Yayayni, manami chaykunata mikushanchu. Nima ima uras chasna millaypa aychakunata mikushkanichu. ⁹Yaya Dioska kuti silumanta rimawashpan nirka: Ñuka ali mikunami nishkaynitaka ama yanka rimaychu manami mikunachu nishpa. ¹⁰Chasna kimsa kuti rikuchiwashkanwasha kuti siluma sikachi y tukurka. ¹¹Chay ratulla kimsa runakuna Sesareamanta, Korneliopa kachashkan runakunaka paktamurkakuna ñukata maskawanankunapa. ¹²Chasna paktamushpankuna Yaya Diospa Espíritu rimawarka: Mana manchashpa paykunawa riy nishpa.

Ñukawa pakta rirkakuna sokta kirik masinchikuna. Paykunawa chay Sesareapi chay runapa wasinpi yaykunkanchi. ¹³Chaypi yaykushpanchi chay runa Kornelio shutiyu ñukanchita kwintarka: Shuk *angel wasinipi shayahukta rikurkani. Chay angelka rimawarka: Jope llaktama runaykikunata kachay Simonta pushamunankunapa, maykantami ninahun Pedro. ¹⁴Paymi kanta ayllu ykikunawa pakta shuk shimita yachachinka kastigarina kashkaykichimanta tukuy kankuna kishpishka kanaykichipa. ¹⁵Chasna kwintawashkanwasha ñuka yachachihushkaymillapi Yaya Diospa Espíritu paykunapi shamurka, imashnami puntiru ñukanchikunapipas shamurka. ¹⁶Chaypi yuyarirkani Yaya Jesús kay allpapira kashpanra ñukanchita rimashkanta: Bawtisak Juan runakunata bawtisarka yakuwa, ashwan ñukaka kankunata Yaya Diospa Espiritunta kushpami shunkuykichita aliyahisha nishpa. ¹⁷Chayrayku Yaya Dios paykunatapas Espiritunta kushka, imashnami ñukanchita kurka Amunchi Jesukristuta kirishpanchi. ¿Imatayata ruraynima karka? Ñukaka Yaya Diosta mana atipanichu arkanata.

¹⁸Chasna Pedro rimahushkanta uyashpankuna Jerusalenpi Jesusta kirik israel masinkunaka mana ashwanta payta rimarkakunanachu. Ashwan Yaya Diosta kushichishpa rimarkakuna:

Tukuy mana israel runakunatapas Yaya Dioska yanapashka uchankunata sakishpa mushu kawsayta tarinankunapa.

**Antiokia llaktapi achka runakuna
Jesukristuta kirirkakuna**

¹⁹Estebanta wañuchishkankuna uras Jesusta kirikkunata apinata munahushpankuna mitikushpa shuk llaktakunama kawsak rirkakuna. Chasna purihushpankuna Fenisia allpama, Chipre islama, Antiokia llaktamapas paktarkakuna. Chaypi israel masinkunallata Jesús kishpichik kananta yachachirkakuna.

²⁰Paykunamanta shukkunalla, Chipremanta, Sirenemanta, Antiokiapi paktashpankuna *griego mana israel masinikunatapas yachachirkakuna chay suma ali shimita Jesukristu runakunata kishpichinanmanta. ²¹Jesukristu paykunata yanapashpan achka runakuna yachachishkankunata uyashpankuna ñawpa yanka kirinankunata sakishpankuna Jesukristutana kirirkakuna.

²²Antiokiapi runakuna chasna kirishkankunata yachashpankuna Jerusalenpi kirikkuna Bernabeta Antiokiama kacharkakuna. ²³Bernabeka Antiokiapi paktashpan Yaya Dios paykunata atunta yanapashkanta rikushpan yapa kushikurka. Chaypi paykunata kunarka:

Jesusta tukuy shunkuykichimanta pacha kasushpa, mana sampayashpa katiychi nishpa.

²⁴Bernabeka alita rurak runa karka. Yaya Diospa Espíritu payta tukuypi yuyachishkanrayku alita kirik karka.

Pay yachachishpan yapa achka runakuna Jesukristuta kirik tukurkakuna.

²⁵Chaywasha Bernabeka Tarso llaktama rirka Saulota maskanarpa.

²⁶Payta tarishpan Antiokiana pusharka. Chaypi paykunaka shuk watata Jesukristuta kirikkunawa kawsarkakuna. Achka runakunata Yaya Diospa shiminta yachachirkakuna. Chay Antiokiapi puntiru Jesukristuta kirikkunata shutiyachirkakuna Kristianukuna nishpa. Chayka ninayan *Kristuta katikkuna.

²⁷Bernabé Saulowa pakta Antiokiapi yachachihushkankunapi Yaya Diospa yachayninwa yachachikkuna Jerusalenmanta Antiokiama rirkakuna. ²⁸Chaypi Yaya Diospa yachayninwa shuk yachachik Agabo shutiyuka tantarishkankunapi shayarirka. Yaya Diospa Espíritun payta yuyachishpan rimarka tukuy llaktakunapi sinchi yarkay tiyananta. Chasna nishkanshina paktarishpan tukuymanta atun apu *romano Klaudio kamachik kashkan uras sinchi yarkay tiyarka. ²⁹Chayta yachashpankuna Antiokiapi kawsak kirikkunaka Judea allpapi kawsak kirik masinkunarayku karan shuk atipashkanchi tuputa kachashu paykunata yanapananchipa nishpa yuyarirkakuna.

³⁰Chasna yuyarishkankunashina rurarkakuna. Bernabewa Saulowapas kullkiti kacharkakuna kirikkunata sinchikuchik wawkikunata kunankunapa Judeapi kawsak kirikkunaratayku.

**Chiknik runakuna Santiagota
wañuchirkakuna, Pedrota karselpi
churarkakuna**

12 ¹Chay uras atun apu *Herodes kirikkunata parisichinata kallarirka. ²Chasnapi payka Juanpa wawkin *Santiagota sabliwa wañuchi-

chirka. ³Chasna wañuchichishpan israel runakunapa apunkuna kushikurkakuna. Herodeska kushikushkankunata yachashpan Pedrotapas kastigananpa apichirka. Chayta rurarka israel runakuna mana punkirishka panta mikunankuna punchakunapi *Paskua shutiyupi. ⁴Pedrota apishpankuna karselpi churachirka. Pedro mana kishpinanpa Herodeska chunka sokta suntalukunata churarka, chuskumanta tutapi punchapipas kuyranankunapa. Payka yuyarirka chay Paskua punchakunawasha payta llukshichishpan runakunapa puntanpi tapunanpa, chaymanta kastigananpa. ⁵Chasna kashpan Pedroka karselpi taparishka alita kuyrarishka kahurka. Chaypina tukuy kirikkunaka Yaya Diosta sinchita payrayku mañarkakuna.

**Yaya Dios Pedrota karselmanta
llukshichirka**

⁶*Herodeska kayantima runakunapa puntanpi churana kashpan chay tuta Pedroka ishkay suntalukuna chawpipi puñuhurka ishkay kadenawa watarishka. Chaymantapas shuk suntalukuna karsel punkupi kuyrahurkakuna. ⁷Chaypi Pedro puñushpa sirihushkanpi kunkaymanta Yaya Diospa *angelka shamurka. Chay karsel kwartupi punchahlla rikurirka. Chaypina chay angelka Pedrota kushtillanpi tupachishpa likchachirka kasna nishpa:

Pedro, utkalla atariy.

Chasna rimashkanllapi Pedropa makinmanta kadenakunaka paskarishpan urmarkakuna. ⁸Chaypi angelka rimarka:

Atariy, churarinyakita churariy. Sapatuykitapas churariy.

Pedro chasna rurashpan angelka kuti rimarka:

Awaniru churarinaykitapas churarish-payki katiway.

⁹Chaypina Pedroka angelpa washanta katishpa llukshirkka. Mana yacharkachu shutipa chay angelka payta llukshichi-hushkanta. Ashwan yuyarirka ¿musparihunkichu imataya? nishpa. ¹⁰Chasna rihushpankuna chay karsel ukipi kuyrahuk suntalukunata pasarkakuna, chaymanta shuk punkupi kuyrahuk suntalukunatas. Chaymanta chay llaktama llukshina karselpa punkun fierromanta rurarishkapi paktarkakuna. Chaypi paktashpankuna chay punkuka pay kikinlla paskarirka. Chaypina karselmanta llukshishpankuna shuk ñañu ñampita rirkakuna. Chayllapi kunkaymanta angelka Pedrota sakishpan rirka. ¹¹Chay ratu Pedroka yuyarishpan rimarka:

Kunan shuti yachani Yaya Dioska angelta kachamushkanta kishpichiwananpa apu Herodes wañuchinata munawahushkanmanta, ñukanchi israel runakunapa apunchikunamantapas.

¹²Chasna yuyarishpan Pedroka rirka Mariapa wasinma. Chay Mariaka Juan Markus shutiyupa maman karka. Chaypi achka runakuna Yaya Diosta mañanankunapa tantarishka kahurkakuna. ¹³Pedroka chaypi paktashpan kanchapi shayarishpan punkuta waktarka. Shuk yanapak shipas Rode shutiyu atarishpan ¿pitaya? nishpa rikuk rirka. ¹⁴Chay Rodeka Pedropka shiminta uyashpan sumakta kushikurka. Mana punkuta paskashpan ukumallatata kallparka.

Pedroka punkupimi shayahun nishpa rimak rirka.

¹⁵Rode chasna rimashpan paykunaka rimarkakuna:

¿Musparihunkichu imataya? nishpa.

Chasna rimashpankunapas Rodeka ashwan rimarka:

Shutipami rimahuni nishpa.

Chaypi aynirkakuna:

Mana Pedrochu, almanchari nishpa.

¹⁶Paykuna chasna rimahushkankunapi Pedroka punkuta waktashpalla katirka. Chasna uyashpankuna punkuta paskarkakunana. Pedrota rikushpankuna yapa mancharirkakuna. ¹⁷Pedroka yaykushpan makinwa rikuchirka chunlla tukunankunapa. Chunllayashpankuna kwintarka imashnami Yaya Dios karselmanta payta llukshichishka. Chayta kwintashkanwasha nirka:

Tukuy chayta rimaychi *Santiagota, chaymantapas chay shuk kirik masinchikunata.

Chasna rimashkanwasha llukshishpan rirka shuk partima.

¹⁸Ña punchayahushpan Pedro illa kashkata rikushpankuna suntalukunaka yapa mancharirkakuna. Mana yacharkakunachu imashnami llukshishka.

¹⁹Apu Herodes Pedrota maskachishpanpas nima tarirkakunachu. Chasna mana tarishpankuna Herodeska chay kuyrak suntalukunata tapurka:

¿Pedroka imashnata tukushka?
nishpa.

Paykunaka mana atiparkakunachu nima imata ayninata. Chasna kashpan Herodeska kamachirka chay suntalukunata wañuchinankunapa. Chaywasha Judea allpamanta llukshishpan Sesarea llaktama rirka chaypi kawsanampa.

Apu Herodeska wañurka

²⁰Chay uras apu *Herodeska Tiro llaktamanta runakunata, Sidón llaktamanta runakunatas yapa piñarishpa kawsapayan. Chay ishkay llaktakunapi kawsak runakuna Herodespa kamachinan allpakuñamanta mikunata rantishpa kawsak kashkankunarayku Herodeswa alichanayarkakuna mana mitsanampa mikunata rantinankunapa. Chasna kashpan Herodespa

wasinma rirkakuna kwintanankunapa. Tukuy parihu rishpankuna Herodespa yuyashkan runan Blasto shutiyuwa kwintarkakuna Herodesta alita kwintanapa paykunarayku.

²¹Chaymanta Herodeska kamachirka paykunata rimashkan puncha shamunankunapa. Chay rimashkan puncha paktarishpan Herodeska atun apu churarinanta churarispan atun apupa tiyarinanpi tiyarispan paykunata kunanata kallarirka.

²²Chasna rimahushkanpi tukuy chaypi kahuk runakunaka Herodesta kushichinayashpankuna kaparishpa rimarkakuna:

Kanka diosmi kanki, manami runachu.

²³Chasna rimashpankuna Herodeska mana rimarkachu manami dioschu kani nishpa. Chayrayku chay ratulla Yaya Diospa *angelka payta unkuchirka. Lumbriskuna mikushpankuna wañurka.

²⁴Chay uras Jesusta kirikkunaka tukuy partipi Yaya Diospa shiminta yachachishpa purirkakuna. Chasna yachachihushpankuna achka runakuna Jesukristuta kirirkakuna. ²⁵Bernabé Saulowa chay tantachishkunkuna kullkita Jerusalenpi kawsak kirikkunata sinchikuchik wawkunata kushpankuna Juan Markus shutiyuta pushashpa Antiokiama kutirkakuna.

Bernabé Saulowa achka llaktakunapi Yaya Diospa shiminta yachachishpa purirkakuna

13 ¹Antiokiapi Jesukristuta kirik runakuna tantarishkapi Yaya Diospa yachayninha yachachikkuna tiyarka. Paykuna karkakuna: Bernabé, shukka Simón, maykantami rimapayanahun Yana, shukka Sirenemanta Lusio, shukka apu *Herodeswa pakta wiñashka Manaén shutiyu, chaymantapas Saulo.

²Shuk puncha tukuy Jesukristuta kirikkuna tantarishka kahurkakuna, chay puncha mana mikushpa Yaya Diosta mañashpa pasanankunapa. Chasna kahushkankunapi Yaya Diospa Espíritun rimarka kasna:

Ñuka Bernabeta Saulotapas akllashkani shuk partima ñukamanta yachachik rinankunapa. Chayrayku paykunata mana mitsashpa kachaychi munashkaynita ruranankunapa.

³Chasna nishkata uyashpankuna kirik wawkikunaka chay puncha mana mikushpa Yaya Diosta mañashpankuna makinkunata umankunapi churashpankuna paykunata kacharkakuna Yaya Diospa shiminta yachachinankunapa.

Bernabé Saulowa Chipre islapi yachachirkakuna

⁴Chasna Yaya Diospa Espíritun rimashkanshina Bernabeta Saulowa pakta kacharkakuna Seleusia llaktama atun yaku mar mayanpi. Chaymanta lanchapi atun yaku marta chimpashpa Chipre shutiyu islapi paktarkakuna.

⁵Chay islapi paktashpankuna Salamina llaktama rirkakuna. Chaypi israel masinkunapa tantarina wasikunapi Yaya Diospa shiminta yachachirkakuna. Juan Markus shutiyupas paykunawa pakta purirka yanapananpa.

⁶Tukuy chay Chipre islapi purishkan-kunawasha Pafos llaktama paktarkakuna. Chaypi tarirkakuna shuk israel masinkuna Barjesús shutiyuta. Payka Yaya Diospa shiminta rimani nishpa rimak karka. Chasna rimashpanpas yanka llullachik puruhumi karka. Chay puruhu *griego shimihi Elimas shutiyachirishka karka. ⁷Chay puruhu Elimaska Chipre islapi atun apu Sergio Paulo shutiyuta yanapak karka. Chay Sergio Pauloka yapa yuyayyu runami karka. Chasna kashpan Yaya Diospa shiminta

uyanayashpan Bernabeta Saulotapas kayanankunapa kacharka. Saulopa shuk shutin Pablo karka.⁸ Shamushpankuna chay puruhu Elimaska mana munashpan apunka Jesukristuta kirinanpa, yachachihushkankunata waklichinayashpan sinchi shimiwa paykunata aynirka.⁹ Chaypina Pabloka Yaya Diospa Espíritun tukuypi yuyachishpan chay puruhuta alita rikushpan rimarka:

¹⁰Yapa llullaysiki, yapa waklichisiki kanki, tukuy imata rurashpaykipas mana alitachu ruranki, tukuypi supayta kasuk runami kanki. Mana munankichu nima pi alita rurashpa kawsanana. ¿Imaraykuta mana sakinkichu Yaya Diosta katinayahukkunata pantachichinata?¹¹ Kunanka Yaya Diosmi kanta kastiganka. Masna punchakunata wisku tukushpayki mana atipankichu punchata rikunata.

Chasna Pablo nishkanllapi kunkamanta chay puruhuka wisku tukurka. Chasna wisku tukushpan shuk runata maskarka makinmanta apishpa purichinana. ¹² Chayta rikushpan apu Sergio Pauloka Jesukristuta kirirka. Pablopia rurashkanta rikushpan Jesukristumanta yachachishkanta uyashpan sumakta mancharirka.

Pablo Bernabewa Pisidia allpapi yachachirkakuna

¹³ Chaymanta Pabloka paywa pakta purikkunawa lanchapi uraykushpankuna Pafos llaktamanta Perge llaktama rirka. Chay Perge llaktaka Panfilia allpapi karka. Chaypi Juan Markuska paykunata sakishpan Jerusalenma kutirka. ¹⁴ Pabloka Bernabewa Perge llaktata pasashpankuna shuk Antiokia llaktapi Pisidia allpapi paktarkakuna. Chaypi paktashpankuna *samana puncha israel masinkunapa tantarinankuna wasipi yaykushpankuna tiyarirka-

kuna. ¹⁵ Chaypi shuk runa Moisespa killkashkanmanta shuk ñawpa Yaya Diospa yachayninwa yachachikkunapa killkashkankunamantapas leyirka. Chay killkarishkata leyishkanwasha tantarina wasipa apunkunaka Pablokunata kayarkakuna:

Wawkikuna, kankunapa shuk yachachina tiyashpanka kay tantarishka kahukkunata yachachiychi sinchikurinankunapa.

¹⁶ Chasna chay apu rimashpan Pabloka atarirka. Makinwa rikuchirka chunlla tukunankunapa, chaymanta kallarirka yachachinata kasna:

Israel masinikuna, chikan runakunamanta Yaya Diosta kasuk runakunapas, alita uyawaychi.¹⁷ Nukanchi israel runakuna kushichinanchi Yaya Diosmi yaya rukunchikuna wañuta akllarka. Egipto allpapi shuk allpamanta runakunashina kawsahushpankunara paykunata mirachirka achka runakuna tukunankunapa. Chaymanta Yaya Dioska sinchi yachayninwa yanapashpan chay allpamanta llukshichirka.

¹⁸ Chasna llukshichishpan chusku chunka watata chunlla chakishka allpapi purichirka. Payta achka kuti piñarishpankunapas Yaya Dioska awantashpa paykunata kuyrarka chay tukuy watakunata. ¹⁹ Kanaán allpapi paktashpankuna paykunata yanaparka chaypi kanchis allpakanapi kawsak chikan shimita rimak runakunata kulluchinankunapa. Chaymanta chay allpata paykunata kurka chaypi kawsanankunapa. ²⁰ Chaykama karka chusku pachak pichka chunka wata yaya rukunchi wañukuna Egíptopí kawsashkankunawa pakta. Chaymanta Yaya Dioska paypa yachayninwa yachachik Samuel kawsanankama alichak apukunata churarka yaya rukunchi wañukunata yanapananku-

napa. ²¹Chasna chay alichak apunkunawa kawsashkankunawasha Samuel kawsahushpanra Yaya Diosta mañarkakuna:

Shuk atun aputa churay tukuy ñukanchikunata kamachinanpa nishpa.

Chasna mañashpanguna Yaya Dioska Saulta churarka, atun apu tukushpan paykunata kamachinanpa. Pay apu tukushpan chusku chunka watata yaya rukunchi wañukunata kamachishpa kawsarka. Saulpa yayan karka Sis, Benjaminpa miraymanta. ²²Chaymanta Yaya Dioska Saulta llukshichirka atun apu kananmanta. Payranti Davidtana churarka atun apu tukunarpa. Chay Davidmanta Yaya Dioska rimarka:

Isaipa wawan Davidta akllashkani.

Payka sumakta kushichiwak runami kan. Tukuy munashkaynita ruranka nishpa.

²³Chay David wañupa miraymanta karka Jesuska. Yaya Dios ñawpa rimarka Davidpa miraymanta shuk kishpichikta kachananta. Chay ñawpa rimashkanshina Jesusta kacharka ñukanchi israel runakunata kishpichinanpa. ²⁴Jesuska manara yachachishpa purihushpan Bawtisak Juan puntiru ñukanchi israel runakunata yachachirka kasna nishpa: Kunanmanta pacha millaypa rurashkaykichita amirishpa sakiychi. Yaya Diospa rimashkanta kasushpa kawsaychi. Chayta rurashpa bawtisariychi. ²⁵Ña wañunan punchapaktarihušpan Juanka tukuy runakunata rimarka:

¿Pimi nishpata yuyarinkichi ñukamanta? ¿Yaya Diospa Kachashkan Kishpichikchu kani? Mana ñukaka kishpichikchu kani. Ñukamanta washami chay kishpichikka shamunka. Paymantaka ñukaka mana yachayyuchu

kani. Paypa puntanpi nima imata atipanichu rimanata nishpa.^c

²⁶Wawkinikuna, yaya rukunchi Abraham wañumanta miray masinikuna, chaymanta kankuna chikan runakunamanta Yaya Diosta kasukkuna alita uyawaychi. Tukuy ñukanchirayku kay shimika paktamushka, Jesuska Yaya Diospa Kachashkan Kishpichikmi kan nishpa. ²⁷Jerusalenpi kawsak runakuna apunkunapas mana asirtarkakunachu chay Jesuska Yaya Diospa Wawan kananta. Karan samana punchapi ñawpa Yaya Diospa yachayniwya yachachikunka Jesusmanta killkashkata uyashpa kawsashpangunapas Jesusta mana riksirkakunachu pimi karka.

Chayrayku chay ñawpamanta pacha killkarishka kashkata paktachishpa payta wañuchirkakuna. ²⁸Paykuna mana millaypata Jesuspa rurashkanta tarishpangunapas apu *Pilatota tapurkakuna wañuchichinanpa. ²⁹Chasna chay Jesusmanta killkarishka kashkata paktachirkakuna. Chayta paktachishkakunkunawasha Jesuspa aychanta krusmanta uraykuchishpanguna allarishka urku uchkupi churashpa taparkakuna. ³⁰Chasma churashpangunapas Yaya Dios Jesusta wañushkanmanta kawsachirka. ³¹Kawsarishkanwasha achka kuti Jesuska payta katikkunata rikurirka. Jesús manara wañuhushpan paykunaka Galileamanta Jerusalenma payta katirkakuna. Kunanka paykunami tukuy runakunata yachachihunkuna Jesuska kawsarishkami nishpa.

³²⁻³³Ñukanchipas chasnallatatum chay suma ali shimita yachachihunchi. Yaya Dios yaya rukunchi wañukunata ñawpa rimashkanta kunan ñukanchikunapi paktachishka. Ñawpa rimashkan-

shina Jesusta kawsachirka. Salmos killkapi ishkaynin kapitulopi kasna Jesusmanta killkarishka kan:

Kanka wawaynimi kanki, ñuka
kanta kunan puncha kawsayta
kushkaynirayku.^d

³⁴Chaymantapas shuk killkapi Yaya
Dios rimarka Jesús wañushkanmanta
kuti kawsachinanta aychan mana
ismunanpa. Kasna nin:

Davidta rimashkaynishina suma
ruranaynikunata kankunapi
paktachisha.^e

³⁵Chasna David yachashpan shuk
Salmopi Yaya Diosta Jesusmanta
rimarka:

Yachani kanta sumakta kushichik
wawaykipa aychanta mana
sakinkichu ismunanpa.^f

³⁶Wawkinikuna, yachanchi Davidka
mana pay kikinmanta chasna rimash-
kanta. Paypas Yaya Dios munashpan
runa masinkunata yanaparka. Chasna
Yaya Diosta kushichishpan wañurka.
Wañushpan maypimi yaya rukunkunata
urku uchkupi churarkakuna, chaypimi
paypa aychantapas churashpankuna
taparkakuna. Churashkankunawasha
aychanka ismurka. ³⁷Ashwan Jesuspa
aychanka mana ismurkachu, Yaya Dios
payta kawsachishkanrayku.

³⁸⁻³⁹Munashkayni wawkinikuna,
rimashkanchita alita uyaychi. Chay
Jesús wañushkanmanta kawsarimush-
kanraykulla uchata rurashkanchikuna-
manta llakichiy tukunchi. Chaytami
kankunata rimahunchi. Moisespa
killkashkanka mana yanapanchu
uchanchikunamanta llakichiy tukunanchi-
pa. Ashwan Jesuspi sinchikushpan-
chillami uchanchikunamanta kishpichiy

tukushunchi. ⁴⁰Chayrayku yachachish-
kaynikunata alita kasuychi, mana
kastigay tukunaykichipa ñawpa Yaya
Diospa yachayninwa yachachikkuna
rimashkanshina. Paykunaka ñawpa
Yaya Diospa rimashkanta killkarkakuna
kasna:

⁴¹ Alita uyawaychi kankuna mana
munawak asichiwak runakuna.
Kawsahushkaykichi uras
rurahushkaynita rikushpayki-
chipas mana kirinkichichu.
Shuk runa kankunata rimash-
panpas mana kirinkichichu.
Chayrayku mancharishpami
wañunkichi, tukuyumi chink-
rinkichi nishpa.^g

⁴²Chasna yachachishkanwasha Pablo
paywa pakta purikkunawa chay tantarina
wasimanta llukshihushkunkunapi payta
tapurkakuna kuti samana puncha
paktarishpan chasnallatata yachachinanpa.

⁴³Chay tantarishkankunamanta
llukshishpankuna achka runakuna
Jesukristuta kirishpankuna Pablowa
Bernabewa rirkakuna. Karkakuna israel
runakuna, chaymanta chikan runakuna-
manta israel runakunashina Moisespa
killkashkhan kamachishkakunata
kasushpa kawsak runakuna. Chasna
tantaylla rihushpankuna Pabolokunaka
ashwanta kwintashpa yachachirkakuna:

Yaya Dios kankunata llakichishkanta
yuyarishpaykichi mana sakishpa paypi
sinchikuychi nishpa.

⁴⁴Samana puncha paktarishpan tukuy
chay llaktapi kawsakkuna tantarirka-
kuna Pablo Yaya Diospa shiminta
yachachihushkanta uyanankunapa.

⁴⁵Achka runakuna Pabolopa rimahush-
kanta uyanankunapa tantarishka

^d Rikuy Biblia kastellanopi Salmos 2.7; chaymanta inkapi Hebreo Kirikkunaryku Killkapi 1.5
^e Rikuy Biblia kastellanopi Isaías 55.3 ^f Rikuy Biblia kastellanopi Salmos 16.10 ^g Rikuy Biblia kastellanopi Habacuc 1.5

kahushkankunata rikushpankuna israel runakunapa apunkunaka piñarirkakuna. Chaypina Pablo Jesukristumanta yachachihushpan llullami nishpa chaymantapas asichishpa mana alikunata rimarkakuna.⁴⁶ Chasna piñarihushpanapas Pabloka Bernabewa mana manchashpachu aynirkakuna:

Yaya Dios ñukanchita kamachirka puntiru kankuna israel masinchikunata chay paypa shiminta yachachinchipa. Kankuna yachachishkanchita mana munashpaykichi kankuna kikinlla rikuchinkichi mana munahushkaykichi Yaya Dios kay mushu wiñaypa kawsayta kankunata kunayashkanta. Chayrayku kunanka mana israel runakunama yachachik rihunchi.⁴⁷ Chasnami Yaya Dios ñukanchita kamachirka killkachishkanpi kasna rimashpa:

Kanta akllashkani tukuy runakunaryku lamparinshina kanaykipa. Yachachik rinki tukuy llaktakunapi kawsak runakunata kay suma ali shiminata ñuka paykunata kishpichinaynimanta nishpa.

⁴⁸ Chayta uyashpankuna chay mana israel masinkunaka yapa kushikurkakuna. Yaya Diospa shimin yapa alimi nishpankuna Yaya Diosta kushichirkakuna. Chaypina kirirkakuna tukuy, maykunkunatami Yaya Dios kay mushu wiñaypa kawsayta kunayashka.⁴⁹ Chaymanta tukuy chay llaktakunapi runakuna Yaya Diospa shiminta Jesús Kishpichik kananmanta yacharkakuna.⁵⁰ Israel apukuna mana kirishpankuna Pablokunata piñarkakuna. Chasna kashpan paykunaka chay llaktapa apunkunata, maykan yachak Yaya Diosta mañak warmikunatapas rimak rirkakuna paykunapas Pablokunata

piñanankunapa. Chaypi paykunapas piñarishpankuna Pabloka Bernabetapas chay llaktankunamanta allpankunaman-tapas kallpachirkakuna.⁵¹ Pablokunaka llukshihushpankuna chakinkunamanta pulbuta chawsirkakuna. Chasna rurashpankuna llaktapi kawsakkunata rikuchirkakuna uchayu kanankunata, Yaya Diospa shiminta mana munash-kankunaryku. Chaymanta Ikonio llaktama rirkakuna.⁵² Chay Antiokiapi kawsak kirikkunaka yapa kushikurkakuna. Yaya Diospa Espíritun paykunata tukuypi yuyachishpan sumakta sinchikuchirkakuna.

Pablo Bernabewa Ikonio llaktapi unayta kiparirkakuna

14 ¹ Pablo Bernabewa Ikonio llaktapi paktashpankuna israel masinkunapa tantarina wasipi yaykurkakuna. Chaypi Yaya Diospa shiminta alita yachachishpankuna achka israel runakuna, mana israel masinkunapas Jesukristuta kirirkakuna.² Chasna achka kirishpankuna chay mana kirinata munak israel runakunaka chay mana israel masinkunata llullachishpa millaypata yuyachirkakuna, kay kirikkunaka mana alitachu yachachinahun nishpa.³ Chayrayku Pablokunaka chay llaktapi unayta kiparirkakuna. Jesukristupi alita sinchikushpankuna mana manchashpa shutipa rimarkakuna Yaya Dios Jesukristuta kachashkanta ñukanchita uchanchikunamanta llakichinampa. Yaya Dios paykunata yanaparka mana atipaypaku-nata ruranankunapa. Chaywa runakunata rikuchirka Pablokunapa yachachihush-kankunaka shutipa kananta.⁴ Chasna kashpan runakunaka ishkay muntun tukurkakuna, shukkunaka mana kirik israel runakunawa shuk yuyayllawa karkakuna, shukkunaka Jesukristuta

kirishpankuna *apostolkunawa shuk yuyayllawa karkakuna.⁵ Chaypina tukuy mana kirikkuna, israel runakuna, mana israel masinikunapas apunkunawa tantaylla yuyarirkakuna, aku paykunata makashunchi, rumiwa tuksishunchi nishpa.⁶ Chayta yachashpankuna Pablokuna Likaonia allpapi Listra llaktama, Derbe llaktamapas, chay llaktakuna muyukta kahuk allpakunamapas mitikurkakuna.⁷ Tukuy chay llaktakunapipas Yaya Diospa suma ali shiminta Jesukristu runakunata kishpichinanmanta yachachishpa purirkakuna.

Listra llaktapi Pablota rumiwa tuksishpa wañuchinayarkakuna

⁸ Chay Listra llaktapi shuk runa mana purinata atipak kawsarka. Payka wawayarishkanmanta pacha mana purinata atiparkachu.⁹⁻¹⁰ Chay runaka Pablopa yachachihushkanta uyashpan Jesusmi ampiwama nishpa yuyarirka. Chay yuyarihushkanta Pablo riksishpan payta alita rikushpan sinchita rimarka:

Atariy, kuskata shayariy.

Pabloka chasna nishpan chay runaka shuk saltaywa shayarishpan purirk'a.

¹¹ Tukuy runakuna Pablopa rurashkanta rikushpankuna Likaonia shimpipi sinchita kaparirkakuna:

¡Dioskuna runashiina tukushpankuna ñukanchima silumanta uraykumushkakuna! nishpa.

¹² Bernabeta *Seus shutiyu diosninch'i nishpa rimarkakuna. Pablota rimahuk runa kashpan *Hermes diosninch'i nishpa rimarkakuna.¹³ Chay llakta yaykunapi tiyarka shuk wasi Seus shutiyu diosta mañanankuna. Chay Seusta mañak saserdote wakrakunata apamurka, chaymanta suma watarishka sisakunatapas. Payka tukuy runakunawa munarka chay wakrakunata

wañuchishpa *apostolkunata diostashina kushichinankunapa.

¹⁴ Chasna ruranayahushkankunata yachashpankuna Pablo Bernabepas yapa mancharirkakuna. Yapa llakirishkankunaryku kamisankunata liki liki rurashpankuna kaparishpa runakunapa chawpinkunapi yaykukakuna kasna nishpa:

¹⁵ Likaonia runakuna ¿imaraykuta chasna rurahunkichi? Ñukanchika mana dioskunachu kanchi, kankunashina runallatatami kanchi. Suma ali shimita kankunata rimak shamushkanchi. Kankuna chay yanka dioskunata mana mañanaykichipana, ashwan kawsa Yaya Diosta kushichinaykichipa rimak shamushkanchi. Payka siluta, kay allpatapas, atun yaku martapas, tukuy chaykunapi tiyakkunatapas rurarka.

¹⁶ Nawpa Yaya Dioska tukuy runakunata sakirka paykuna kikin munashkankunata ruranankunapa.¹⁷ Chasna sakishpanpas yachayninwa alikunata rurashpan ñawpamanta pacha tukuy runakunata rikuchin paylla atun yachak Yaya Dios kananta. Awamanta tamyata kachamun, tarpukunata alita wiñachin. Tukuy mikunanchita kun, shunkunchipi kushillayachin.

¹⁸ Pablokuna chasna rimashpankunapas chay runakunaka chasnalla munarkakuna wakrankunata rupachishpa paykunata kushichinata. Pablokuna ashwan rimashpa katishpankunara ruranayahushkankunata sakirkakunana.

¹⁹ Chasnapi Antiokiamanta Ikoniomanipas shuk israel runakuna Listrama shamurkakuna. Pablokunata piñarishpankuna yankamanta runakunata piñachirkakuna. Chasna piñarishpankuna Pablopa rumiwa tuksirkakuna. Tuksishkankunawasha wañushkami nishpankuna aychanta llakta kanchama

aysashpa aparkakuna.²⁰ Pablo chasna sirihushkanpi, Jesukristuta kirik masinkunaka paypa kuchunpi muyukta tantarirkakuna. Chaypina Pabloka atarishpan kuti chay llaktamallatata kutirka. Kayantima Bernabewa Derbe llaktama rirkakuna.

²¹Chay Derbe llaktapipas Yaya Diospa suma ali shiminta Jesukristu runakunata kishpichinanmanta yachachishpankuna achka runakuna Jesukristuta kirirkakuna. Chasna yachachishkankunawasha Listra, Ikonio, Antiokia llaktakunamallatata kutirkakuna.

²²Chay llaktakunapi kirikkunata sinchikuchishpa purirkakuna, chaymantapas kunashpa rimarkakuna:

Ama sakinkichichu Jesukristuta kirinata. Achkata parisinanchi tiyan Yaya Diospa kamachinan mushu mundupi yaykunanchipa nishpa.

²³Chaymanta tukuy Jesukristuta kirikkuna tantarishkankunamanta Pablokunaka shuk ali unay kirikkunata akllarkakuna, kirik masinkunata yachachishpa sinchikuchik kanankunapa. Chaypi alita Yaya Diosta mañanankunapa mana mikushpankuna paykunarayku mañarkakuna: Amunchi Jesú, kay kanta kirikkunata alita kuyray nishpa. Chaypina sakirkakuna.

**Pablo Bernabewa Siria allpapi
kahuk Antiokia llaktama
kutirkakuna**

²⁴Chasna rishpankuna Pisidia allpata pasashpankuna Panfilia allpapina paktarkakuna. ²⁵Chaypi Perge llaktapi Jesukristumanta yachachirkakuna. Chaymanta Atalia llaktama rirkakuna.

²⁶Chaypi lanchapi uraykushpankuna atun yaku marpi rishpa Antiokia llaktama kutirkakuna. Chay Antiokiapi kawsak kirikkunami Pablokunata kachashka karkakuna chay rishkankuna

partikunama, chay uras paykunarayku Yaya Diosta mañashpankuna munashkanta ruranankunapa. Ña tukuya paktachishkankunawasha Pablokunaka chaymallatata kutimurkakuna. ²⁷Antiokiapi paktashpankuna kirikkunata tantachishpankuna kwintarkakuna imashnami Yaya Dioska paykunata tukuypi yanapashpa purichishka. Chaymantapas imashnami ñukanchi mana israel runakunata yanapashka ñukanchipas Jesukristuta kirinanchipa. ²⁸Chaymanta Pabloka Bernabewa chay Antiokiapi Jesukristuta kirikkunawa unayta kiparirkakuna.

**Jerusalén llaktapi achka
yachachikkuna tantarirkakuna**

15 ¹Chay uras shuk runakuna Judea allpamanta Antiokia llaktama rirkakuna kirikkunata yachachinankunapa kasna:

Kankuna Moisespa killkashkantashina mana ishpanaykichi kara puntata pitishpaykichika Yaya Dioska kankunata mana kishpichinkachu nishpa.

²Chasna yachachihushpankuna Pabloka Bernabewa mana chasmachu kan nishpa chay shamushkakunawa rimanakurkakuna. Mana alichanata atipashpankuna Pablota Bernabetapas shuk kirikkunawa pakta Jerusalenna kacharkakuna. Chaypi kahuk *apostolkunata, kirikkunata sinchikuchik wawkikunatas tapushunchi, Yaya Dios munanchu manachu tukuy ñukanchi Jesukristuta kirikkuna ishpananchi kara puntata pitichirishka kananchipa nishpa yuyarishpankuna kacharkakuna.

³Chasna chay Antiokiamanta Jesukristuta kirikkuna Pablokunata kachashpankuna Fenisia allpata *Samaria allpatapas pasashpa rirkakuna.

Chay llaktakunapi kirik wawkikunata kwintarkakuna, imashnami ñukanchi mana israel runakunamantapas achka ñawpa yanka kirinankunata sakishpankuna kikin Yaya Diostana kirirkakuna. Chasna kwintashkankunata uyashpankuna tukuy chay llaktakunapi kawsak kirikkunaka yapa kushikurkakuna.

⁴Pablokuna Jerusalenpi paktashpankuna tukuy kirikkuna, sinchikuchik wawkikunapas, apostolkunapas paykunata kushikushpa saludarkakuna. Chasna alita yaykuchishpankuna Pablokunaka kwintarkakuna Yaya Dios paykunata sumakta yanapashkanta.

⁵Chasna kwintahushkankunapi shuk kirikkuna Moisespa killkashkanta alita kasuk *fariseokunamanta atarishpankuna rimarkakuna:

Chay mana israel runakuna Moisespa killkashkan kamachishkatashina ishpanan kara puntata pitinankuna tiyan, chaymanta shuk Moisespa killkashkan kamachishkakunatapas paktachinankuna tiyan nishpa.

⁶Chasna chay fariseokuna rimashpankuna apostolkunaka kirikkunata sinchikuchik wawkikunawa tantarirkakuna tantaylla yuyarinankunapa alichu manachu chay fariseokunapa rimashkankunaka nishpa. ⁷Achkata rimankushkankunawasha Pedroka atarishpan rimarka:

Wawkinikuna, alitami yachankichi Yaya Dios ñawpa tukuy ñukanchikunamanta ñukata akllawashkanta chay mana israel runakunata paypa suma ali shiminta Jesukristu runakunata kishpichinanmanta yachachinaynipa. Chasna yachachihushpayni paykunaka Jesukristuta kirirkakuna. ⁸Yaya Dios shunkunkunata alita riksishpan alita kirishkankunata rikushpan Espiritunta paykunama kacharka ñukanchipishina. ⁹Yaya Diospa rikushkanpika mana

chikan chikan runakunachu kanchi. Chayrayku payka shunkunkunata picharka, Jesukristuta kirishkankunaryku. ¹⁰Kunanka ñimaraykuta chay wawkinchikunata rimankichi Moisespa killkashkanta paktachinankuna tiyan nishpa? Nima yaya rukunchi wañukuna chaykunata atiparkakunachu paktachinata, ñukanchipas manami atipashunchihu paktachinata. Chayrayku ñukanchika mana atipanchichu kamachinata chayta ruranankunapa. ¹¹Ashwan yachanchi Jesukristu ñukanchita llakichishkanraykulla kastigarina kashkanchimanta kishpichiy tukushkanchita. Chasnallatata paykuna-pas kishpichiy tukushkakuna.

¹²Chasna Pedropo rimahushkanta uyashpankuna chunlla uyarkakuna. Chaypina Pabloka Bernabewa paykunata kwintarkakuna imashnami ñukanchi mana israel runakunapa llaktanchikunapi purihushpankuna Yaya Dios paykunata yanaparka. Yaya Dios yanapashpan paypa yachayninwa nima ima uras rikushkankunata, suma mana atipaykunata rurashkanchi nishpa kwintarkakuna.

¹³Pablokuna ña tukuchishpankuna rimanata *Santiagoka rimarka:

Wawkinikuna, alita uyawaychi.

¹⁴Wawkinchi Simón Pedroka ñukanchita kwintashka imashnami Yaya Dioska mana israel runakunamanta shukkunata akllarka payta kushichik wawankuna kanankunapa. ¹⁵Chasna rurashpan kunan paktarishka ñawpa Yaya Diospa yachayninwa yachachikuna paypa rimashkanta killkashkankunaka. Kasnami nin:

¹⁶Atun apu David wañupa

miraymanta unay manana nima pi kamachik kashpanna ñuka Yaya Dios akllashkayni runakunata llakichishpayni kutikashka

yanapasha. Davidpa miray-manta runata churasha akllash-kayni runakunata Davidshina kuntrankunamanta kishpichishpan alita kamachinanpa.

- ¹⁷ Chasna kashpan israel runakuna, mana israel runakunapas akllashkayni runakuna kashpankuna maskawashpan-kunami kiriwankakuna.
- ¹⁸ Chay ñawpamanta pacha ruranata rimashkaynita paktachishami nishpa.^h

¹⁹ Chasna Yaya Dios killkachishkanpi rimashpan chay kirik tukushka mana israel runakunata mana killachishunchi-chu kamachinanchikunawa.

²⁰ Akuychi paykunaryku kasna killkashunchi: Ñawpa kirishkaykichikunata sakiyichi. Yanka dioskunata kushichinankunapa puntanpi churashka aychata ama mikuychichu. Ama musayanakuychichu. Sipirishpa wañushka animalkunata wiwakunata ama mikuychichu, nima yawarta upyaychichu nima mikuychichu nishpa.

²¹ Ñawpamanta pacha Moisés chasna killkashkanta uyapanahanun. Chay killkashkanta leyishpa rimakkuna karan llaktakunapi karan *samana punchapi tantarina wasikunapi yachachipayana-hun.

Jerusalenpi yachachikkuna mana israel runakunamanta kirikkunata shuk kartata killkarkakuna

²²* Santiago rimashkanta uyashpan-kuna chay *apostolkunaka, kirikkunata sinchikuchik wawkikunapas, tukuy kirikkunawapas tantaylla rimarkakuna: Alimi. Kunanka akuychi akllashunchi tantarishkanchimanta pikunatami kachashunchi Pablawa Bernabewapas

Antiokiana. Chasna nishpa akllarka-kuna Judasta, shuk shutinka karka Barsabás, chaymanta akllarkakuna Silastapas. Paykunaka kirikkunata alita yachachik karkakuna. ²³Chasna akllash-pankuna paykunawa kacharkakuna shuk killkarishkata kasna nishpa:

Ñukanchi apostolkuna, kirikkunata sinchikuchik wawkikunapas, tukuy kirikkunawa pakta kay kartata killkan-chi. Tukuy kankuna Antiokia llaktapi, Siria, Silisia allpakunapipas kawsak mana israel runakunamanta kirikkunata saludanchi.

²⁴Yachashkanchimi kay Jerusale-manta shuk kirik israel masinchikuna kankunapi paktashpankuna kankuna tantarishkaykichipi killachishkankunata ishpanaykichi kara puntata pitinaykichi tiyan nishpa ñukanchi israel runakuna-shina tukunaykicipa. Chaymantapas Moisespa killkashkan chay shuk kamachishkakunatapas paktachinayki-chi tiyan nishpa. Chasna rimahuk runakunataka ama yuyarinkichichu ñukanchi kachashkanchita. Ñukanchika manami kachashkanchichu.

²⁵Chasna killachiy tukushkaykichita uyashpanchimi akllashkanchi ñukanchi-kunamanta shuk wawkikunata, munash-kanchi wawkinchikuna Bernabewa Pablawa parihu kankunama kachananchipa, yuyarishkanchi shimikunata rimanankunapa. ²⁶Paykunaka Jesukristupa shiminta yachachihushkan-kunarayku wañuy tiyashpanpas mana manchanahunchu. ²⁷Judasta Silastapas kachahunchi paykuna kay killkashkan-chi shimita ñawipurapas kankunawa kwintanankunapa.

²⁸Yaya Diospa Espíritun ñukanchita yuyachirka, ñukanchipas chasnallatata yuyarirkanchi mana ashwanta killachi-

nanchipa kankunata, kayllata kamachinchic: ²⁹Ama mikuychichu yanka dioskunata kushichinankunapa puntanpi churashka aychakunata. Chaymanta siperishpa wañushka animal-kunata wiwakunata ama mikuychichu, yawartapas ama upyaychichu nima mikuychichu. Chaymanta ama musayanakuychichu. Tukuy chaykunata paktachishpaykichika alitami kawsankichi. Chayllatami kankunaryku killkashkanchi. Yaya Dios yanapanka kankunata.

³⁰Chasma chay Jerusalenpi tantarishka kirikkunaka killkashkankunawasha chay rihuk runakunaka rishara nishpankuna Antiokiama rirkakuna. Paktashpankuna tukuy kirikkunata tantachishpankuna chay killkata kurkakuna. ³¹Chayta leyishpankuna kirikkunaka yapa kushikurkakuna, chay killkawa sinchikuchiy tukushkankunaryku. ³²Chaymanta Judas Silaspas Yaya Diospa yachayninwa yachachik kashpankuna kirikkunata yachachishpa sinchikuchirkakuna. Chaymantapas kunarkakuna mana sampayashpa Jesukristuta katinankunapa. ³³Chasna paykunata sinchikuchishpa unayta chay kirikkunawa kiparirkakuna. Chaymanta kutina kashpankuna kirikkunaka Yaya Dios kankunata wakaychachun kushilla kanaykichipa nishpa kacharkakuna Jerusalemmallatata kutinankunapa. ³⁴Silaska kutiy yuyarishpan Antiokiapi kiparirka. Judaska sapallanna Jerusalemma kutirka. ³⁵Pablo Bernabewa pakta Antiokiapi kiparirkakuna. Chaypi shuk wawkikunawa parihu chay suma ali shimita Jesukristumanta yachachirkakuna.

**Pablo ishkaynin
kuti Jesukristumanta
yachachishpa purirka**

³⁶Chaymanta shuk punchakunawasha Pabloka Bernabeta nirka:

Aku rikuk rishu kirik masinchikunata chay llaktakunapi, maypimi ñawpa runakunata yachachishkanchi Jesukristumanta, yachananchipa imashnashi kawsahunkuna.

³⁷Ari nishpan Bernabeka Juan Markus shutiyuta pushanayarka paykunawa parihu rinanpa. ³⁸Puntiru paykunawa purihushpan Juan Markuska Panfilia allpapi paykunata sakirka wasinma kutinanpa. Manana yanaparkachu. Chayrayku Pabloka payta mana kutikashka pushanayarkachu. ³⁹Chaymanta mana shuk yuyayllawa kashpankuna rimanakurkakuna. Chasna chikanyanakushpankuna sakinakurkakuna. Bernabeka Juan Markusta pushashpan lanchapi uraykurkakuna Chipre islama rinankunapa. ⁴⁰Pabloka Silasta akllarka paywa pakta rinanpa. Kirik wawkinkunaka Yaya Diosta mañashpankuna paykunata Yaya Dios wakaychachun nishpa kacharkakuna.

⁴¹Chaymanta Siria allpata, Silisia allpatapas pasarkakuna chaypi kawsak kirikkunata yachachishpa sinchikuchinankunapa.

**Pablo Timoteotapas pusharka
yanapak kananpa**

16 ¹Chaymanta Pabloka Silaswa Derbe llaktama rirkakuna. Chaymanta Listra llaktapi paktashpankuna Jesukristuta kirik Timoteo shutiyuta tarirkakuna. Paypa mamanka Jesukristuta kirik israel warmi karka. Yayanka *griego runa karka. ²Chay Listrapi, Ikonioipi kirikkuna Timoteomanta ali kawsak runami nishpa rimarkakuna. ³Chayrayku Pabloka munarka paykunawa tantaylla purinanpa. Chay llaktapi tukuy israel runakuna yacharkakuna, yayan griego runa kashpan Timoteo mana paykunashina ishpanan kara punta pitirishka

kashkanta. Timoteowa pakta purihush-kanta rikushpankuna israel runakuna mana piñarinankunapa, Pabloka Moisespa killkashkan kamachishkata-shina Timoteopa ishpanan kara puntata pitirka. ⁴Chaymanta paywa pakta shuk llaktama shuk llaktama rishpankuna kirikkunata yachachirkakuna.

Jerusalenpi kawsak *apostolkuna kirikkunata sinchikuchik wawkikunawa tantaylla yuyarishkankuna shimita rimarkakuna chayta paktachiychi nishpa. ⁵Chasna rimashpankuna tukuy kirikkunata sinchikuchirkakuna ashwan alita Jesukristuta katinankunapa. Chasna rurashpankuna karan puncha kirikkunaka achkayarkakuna.

**Pablo muskuypishina rikurka
Masedonia runaka kayahushkanta**

⁶Chaymanta Asia allpama rinayashpankuna Jesukristumanta yachachinankunapa, Yaya Diospa Espíritun mana munarkachu rinankunapa. Chasna mana munashpan Frigia allpama, Galasia allpamapas yachachik rirkakuna. ⁷Misia allpa mayanpi paktashpankuna Bitinia allpama yachachishpa purinayarkakuna. Jesuspa Espiritunka mana munashpan mana atiparkakunachu chayma rinata. ⁸Misia mayanta purishpankuna Troas llaktama uraykurkakuna. Chay llakta atun yaku mar mayanpi karka. ⁹Troas llaktapi kahushpankuna shuk tuta Pabloka muskuypishina rikurka Masedonia allpamanta runata. Chay runaka Pablopka kuchunpi shayarishpan yapa munashpan paykunama rinanta rimarka:

Kay Masedoniamma shamuy ñukanchita yachachinaykipa nishpa.

¹⁰Chasna Pablo muskuypishina rikushkanwasha utkalla alicharirkakuna Masedoniamma rinankunapa. Ñuka Lukaspas Pablokunawa pakta rirkani. Pabloka muskuypishina rikushkanwa

yacharkanchi Yaya Dios munahush-kanta Masedoniapi chay suma ali shimita Jesukristu runakunata kishpichinanmanta yachachishpa purinanchipa.

**Pablokuna Filpos llaktapi
paktarkakuna**

¹¹Chasna Troas pertumanta lanchapi uraykushpanchi kuskata rishpanchi Samotrasia islapi paktarkanchi.

Kayantima Neápolis llaktapi paktarkanchi. ¹²Chaypi llutarishpanchi chakillawa Filpos llaktama rirkanchi. Filposka *romano runakunapa kamachishkan llakta karka. Tukuy Masedonia allpapi kahuk llaktakunamanta yapa valik llaktami karka. Chay llaktapi unayar-kanchi achka punchakunata. ¹³Shuk *samana punchapi chay llaktamanta llukshishpanchi yaku mayanma rirkanchi, israel runakuna chaypi Yaya Diosta mañanankunata yuyarishpanchi. Chaypi tarirkanchi tantarishka warmikunata. Paykunata chay suma ali shimita Jesukristu runakunata kishpichinanmanta yachachirkanchi.

¹⁴Chay tantarishka warmikunamanta shuk karka Lidia, Tiatira llaktamanta. Payka rantichipayan yapa chaniyu suma puka llachapakunata. Chay warmika Yaya Diosta yuyak kashpan Pablopka yachachishkanta alita uyarka. Yaya Dioska payta yuyayta kurka alita asirtananpa. ¹⁵Chasna kashpan chay warmika bawtisarirka tukuy wasinpi kawsak runakunawa pakta. Chaywasha ñukanchita kayarka:

Kankuna shutipa Jesukristuta kirik kanaynita yuyarishpaykichika shamuy-chi wasinima chaypi kiparinaykichipa rinaykichi punchakama nishpa.

Chasna mana sakishpa ñukanchita kayashpan wasinma rirkanchi chaypi kiparinanchipa.

**Supay yaykushka warmi
Pablokunata kaparishpa katirka**

¹⁶Shuk puncha Yaya Diosta mañanan-chipa rihushpanchi shuk patronyu shipaswa tinkunakurkanchi. Chay shipaska supay yaykushka kashpan mana yachaypaku-nata yachapayan. Runakunata mana yachaypaku-nata riksichishpan patroyninku-naka chay yachanamanta achka kullkitia apipayahanuhun. ¹⁷Chay shipaska Pablo-ta ñukanchitapas kaparishpa katirka:

¡Kay runakunaka atun Yaya Diosta kasukkunami kanahun! Paykunaka kankunata yachachinahun imashnami kastigarina kahushkaykichimanta kishpinkichi nishpa.

¹⁸Chasna chay shipaska tukuy punchakuna kaparishpa ñukanchita katipayan. Chaypina Pabloka piñarishpan washama tikrarishpan chay shipaspi kahuk supayta rimarka:

Jesukristu munashkanrayku kanta kamachini llukshiy kay warmimanta.

Chasna nishkanllawa supayka llukshirkha chay shipasmanta.

¹⁹Chay shipas manana chay yachaywa kashkanta yachashpankuna patronkunaka yapa piñarirkakuna. Manana atiparkakuna-chu kullkitia apinata chay shipaspa yachaynimanta. Chayrayku Pablo-ta Silastapas apirkakuna kastigachinankunapa. Chasna apishpankuna chay llaktapa plasanma aparkakuna chay llaktapa apunkunapa puntanpi churanankunapa.

²⁰Chasna Pablokunata apunkunapa puntanpi shayachishpankuna chay warmipa patroyninkunaka rimarkakuna:

Kay runakunaka israel runakuna kashpankuna yapa llaktanchita waklichina-yashpa mana alita yachachishpa purihunkuna. ²¹Shuk yuyaykunata yachachihunkuna. Ñukanchi *romano runakuna kashpanchi mana atipanchichu katinata chay yachachinankunata.

²²Chasna nishpankuna tukuy chaypi tantarishka runakunaka chay Pablokunata sumakta piñarirkakuna. Chaypina chay apukunaka kamachirkakuna Pablokunata churarishkankunata utkalla llatanachishpankuna asutinankunapa. ²³Unayta asutishkankunawasha shuk suntalukunata kamachirkakuna karselpi churanankunapa. Chay karselpi kamachik runata rimarkakuna paykunata alita kuyranankunapa mana llukshinankunapa. ²⁴Chay karselpi kamachikka chasna kamachiy tukushpan Pablokunata mana llukshiyipa karselpa ashwan ukuma yaykuchirkha. Chakinkuna mukunkunapi uchkurishka tablakunawa kanichishpankuna llawishpa sakirkakuna.

**Pablokuna karselpi kahushpankuna
Yaya Diosta kushichirkakuna**

²⁵Chasna karselpi churay tukushpanku-napas Pabloka Silaswa pakta chawpi tutapi Yaya Diosta mañashpa takishpa kushichirkakuna. Tukuy karselpi kahuk masinkuna rimashkankunata takishkankunata uyarkakuna. ²⁶Chaypi kunkaymanta allpaka sinchita kuyurka. Chasna kuyushpan tukuy karsel wasita sinchiku-chik allpa ukupi rumikuna sinchita kuyurirkakuna, punkunkuna llampu paskarirkakuna. Chasnallatata tukuy kastigarishkakunapa watarishkankuna kadenakunaka paskarirkakuna. ²⁷Chay karselpi kamachikka likcharishpan tukuy punkukuna paskarishkata rikushpan yuyarirka chay kastigarishkakunaka llukshishpankuna kishpishkakuna nishpa. Chasna yuyarishpan kuchillunta surkushpan pay kikinlla tuksirishpa wañuchirinayarka. ²⁸Chaypina Pabloka sinchita kaparishpa rimarka:

¡Ama wañuchiriychu! Tukuyumi kaypi kahunchi nishpa.

²⁹Chasna kaparishkanta uyashpan chay kamachikka runankunata kayarka: Lamparinta apamuyuchi nishpa.

Apamushpankuna Pablokunama kallpashpa rirk'a, chukchurishpa paykunapa puntankunapi kunkurik rirk'a.³⁰ Chaymanta Pablokunata kanchama llukshichishpan tapurka:

Señorkuna ¿imata rurashpaynita uchaynimanta llakichiy tukuynima? nishpa.

³¹ Chasna tapushpan Pablokunaka aynirkakuna:

Yaya Jesusta kiry. Paypi sinchikushpaykimi kastigarina kahushkaykimanta kishpichiy tukunki, chaymanta tukuy wasikipi kawsakkunapas.

³² Chasna nishpan karselta kuyrakta tukuy wasinpi kahukkunatapas Jesukristupa shiminta yachachirkakuna.³³ Chay tutalla Pablokunata wasinpi yaykuchishpan asutiy tukushkankunamanta liki liki tukushkan aychankunata mayllarka. Mayllay tukushkanwasha Pabloka chay karselpi kamachikta, tukuy wasinpi kahukkunatapas bawtisarka.³⁴ Bawtisarishkanwasha chay kamachikka wasinpi yaykuchishpan kararka. Tukuy wasinpi kahukkunanti yapa kushikurkakuna Yaya Diosta kirik tukushkankunaryaku.

³⁵ Ña punchayashpan apukunaka suntalunkunata kacharkakuna karselpi kamachikta rimanankunapa chay kayna karselpi churachishkanchikunata kachariychi nishpa.

³⁶ Chasna rimak rishpankuna karselpi kamachikka Pablota kwintak rirk'a:

Apukunaka kankunata ña kacharinankunapa kamachishkakuna. Kunanka llukshishpaykichi alilla riychi.

³⁷ Chasna rimashkanta uyashpan Pabloka chay kachashka suntalukunata rimarka:

Ñukanchi kankunashina *romano runakuna kashpanchitata tukuy runakunapa rikushkankunapi chay apukunaka ñukanchita asutishpa kastigachishka-

kuna, mana atun apu kamachishpanpas. Chaymantapas ñukanchita karselpi churachirkakuna. ¿Kunanka pakallachu munanahun ñukanchita kacharinata? Nima imashna. Mana alitachu ruranahun. Apukuna kikin shamunahu-chun ñukanchita runakuna rikushkankunapi kacharinankunapa.

³⁸ Pablo chasna nishpan suntalukuna apunkunama rirkakuna Pablopia rimashkanta kwintanankunapa. Pablokuna romano runakuna kanankunata uyashpankuna apukunaka yapa mancharirkakuna.³⁹ Chasna kashpan Pablokunama rishpankuna tapurkakuna: Llakichiychi ñukanchita nishpa.

Karselmanta llukshichishpankuna nirkakuna:

Kay llaktamanta llukshishpaykichi riychi nishpa.

⁴⁰ Chasna karselmanta llukshishpankuna Pabloka Silaswa Lidiapa wasinma rirkakuna. Chaypi tukuy kirikkunawa tinkunakurkakuna. Paykunata sinchikuchishpankuna rishara nishpa rirkakuna.

Tesalónika llaktapi runakuna Pablota parisichirkakuna

17 ¹ Pablo Silaswa Filiosmanta llukshishpankuna Anfípolis, Apolonia llaktakunata pasarkakuna. Chasna rishpankuna paktarkakuna Tesalónika llaktapi. Chaypi tiyarka israel masinkunapa tantarinankuna wasi. ² Pabloka chay tantarina wasipi yaykurka, imashnami tukuy llaktaku-napi rurapayan. Chaypi kimsa semanata karan *samana punchapi Yaya Diospa shiminta yachachirka. ³ Yaya Diospa killkarishka shiminta alita asirtachishpa yachachirka kasna: Yaya Diospa Kachanan Kishpichikka parisishpa wañunan karka, chaymantapas wañush-kanwasha kawsarinan karka nishpa. Chaymanta rimashpalla katirka: Chay

Kishpichikka kanmi Jesús. Paymantami kankunata yachachihunchi nishpa.

⁴Pablopia chasna yachachihushkanta uyashpankuna shuk israel runakuna kirishpankuna Pablokunawa tantarirkakuna. Chaymanta Yaya Diosta achka mañak *griego runakunapas, achka apukunapa warminkuna, achka warmi ayllunkunapas kirirkakuna. ⁵Chasna achka kirikkunata rikushpankuna mana kirik israel runakunaka Pablokunata piñarirkakuna. Chaypina mana ali rurak yanka purihuk runakunata tantachishpankuna kacharkakuna tukuy llaktapi runakunata piñachinankunapa. Chasna piñarishpankuna Jasonpa wasinma rirkakuna. Chaypi yaykushpankuna munarkakuna Pablota Silastapas apinata. Apishpa llukshichinayar-kakuna runakunapa makinpi kunankunapa, paykunata munashkunkunata ruranankunapa. ⁶Mana tarishpankuna Pablokunata Jasón shutiyu runata shuk kirik masinkunanti apirkakuna. Apunkunama pushashpankuna yanka llullashpa kaparirkakuna:

Kay runakunaka tukuy partipi waklichihunkuna runakunata. Kunan kayma shamushkakuna. ⁷Kay Jasonmi chay yanka nishpa waklichihuk runakunata wasinpi yaykuchishka. *Romano tukuymantata atun apunchipa rimashkanta mana paktachinahunchu. Paykunaka ninahunmi shuk atun apu tiyan Jesús shutiyu nishpa.

⁸Chasna rimashkunkunata uyashpankuna chay llaktapi tiyak apukunaka runakunawa pakta piñarirkakuna.

⁹Chasna kashpan Jasonka paywa parihu apirishkakunapas apukunata kullkita pagarkakuna paykunata llukshichinankunapa. Chayrayku kacharirkakuna.

Pablo Silaswa Timoteowa Berea llaktapi yachachirkakuna

¹⁰Chaymanta ña tutayashpan kirikkunaka utkalla Pablota Silaswa Berea llaktama kacharkakuna. Berea llaktapi

paktashpankuna israel masinkunapa tantarinankuna wasipi yaykurkakuna yachachinankunapa. ¹¹Chay Berea llaktapi kawsak runakuna Tesalónika llaktapi kawsak runakunamanta ashwan ali yuyayyu runakunami karkakuna. Yaya Diospa shiminta ali yuyaywa uyarkakuna. Karan puncha Yaya Diospa shimin killkarishkata alita yachakurkakuna yachanankunapa Pablo pia yachachishkanka shutipachu manachu nishpa. ¹²Chasna rurashpankuna achka israel runakuna Jesukristuta kirirkakuna. Chaymantapas achka yapa yuyayyu *griego runakuna, warmikuna, karikunapas kirirkakuna. ¹³Chasna Pablo Yaya Diospa shiminta Berea llaktapipas yachachihushkanta uyashpankuna Tesalonikamanta mana kirik israel runakuna chayma rirkakuna. Chaypipas tukuy llaktapi runakunata piñachirkakuna. ¹⁴Chasna kashpan Bereapi kirik wawikikunaka chay ratulla utkalla Pablota kacharkakuna atun yaku mar mayanma. Silaska Timoteowa chayllapi kiparirkakuna.

Pablo Atenas llaktapi yanka dioskunata rikushpan llakirirkira

¹⁵Pablawa pakta shuk kirik masinkuna Atenas llaktama rirkakuna. Chaypi Pablota sakishpankuna llaktakunama kutirkakuna. Paykunawa Pabloka Silasrayku Timoteorayku shimita kacharka utkalla ñukama shamuychi nishpa.

¹⁶Pabloka Atenas llaktapi Silasta Timoteotapas chapahushpan tukuy llaktapi yapa achka yanka dioskunata kaspimanta rumimantapas rurarishkakunata rikurka. Chayrayku yapa llakirirkira. ¹⁷Chasna llakirishpan israel masinkunapa tantarinankuna wasipi Pabloka kwintarka israel masinkunawa, Yaya Diosta mañak *griego runakuna-

wapas. Chaymantapas karan puncha chay llaktapa plasanpi tantarishka runakunawa kwintarka.¹⁸Chaypi Pablawa kwintarkakuna kawsananchimanta yuyarishpa yachakukkuna *epikúreo nishkanchi, *estoiko nishkanchipas. Shukkunaka asichishpa rimarkakuna:

Kay runaka maytukuytata kwintahun kay kwintaysikika.

Pabloska chay suma ali shimita Jesukristu runakunata kishpichinanmanta, wañushkanchimanta kawsarinanchitapas yachachihushpan rimarkakuna:

Payka chikan dioskunamanta ñukanchita yachachihun nishpa.

¹⁹Paykuna ashwanta yachanayashpan-kuna Pablota pusharkakkuna maypimi tukuy uras tantaripayanahun plasa *Areópago shutiyuma. Chaypi Pablota rimarkakuna:

Kunan atipanki rimanata imatami yachanki. Mushu yachachishkaykita yachanayanchi imashnami kan.²⁰Nima ima uras uyashkanchi shimikunata yachachihunki. Yachanayanchi sumakta yachachihushkayki shimika imashnata ninayan.

²¹Tukuy chay Atenas llaktapi kawsakkuna, shuk llaktakunamanta chay llaktapi kawsankunapa shamushkakunapas mushu shimikunata yapa uyanayashpa kwintashpa chishiyakta tapushpa kawsapayahanuh.

²²Chaypina Pabloska Areopagopi tukuy runakuna chawpipi shayarishpan kallarirka yachachinata:

Atenaspi kawsak runakuna, ñami riksishkani yapa mañak runakuna kanaykichita.²³Mañanaykichi wasikunata rikushpua purihushpayni shukta tarishkani MANA RIKSISHKANCHI DIOSPA WASIN nishpa killkarishkata. Chay mana riksishkaykichi mañahush-

kaykichi Diosta, ñuka alita yachachishpayni kankunata riksichishkaykichi.

²⁴Chay Yaya Dioska tukuy allpata, tukuy allpapi tiyakkunatapas rurashka. Silupa allpapa Amun kashkanrayku, runapa rurashkan mañana wasipika manami kawsanchu.²⁵Payka tukuy kawsananchita samananchitapas, tukuy munashkanchikunatapas kukmi kan. Chasna nima ima payta pishishpan mana munanchu nima imapi runakuna payta yanapanankunapa.

²⁶Shuk runamantalla tukuy allpapi kawsak chikan runakunata mirachirka. Paymi churarka runakunata maypimi kawsankakuna, chaymantapas ima uraskamami kawsayninta kichunka.

²⁷Payka munarka tukuy runakuna payta maskanankunapa, chasna maskashpan-kuna tarinankunapa. Yaya Dioska karan ñukanchikunamanta mana karupichu kahun.²⁸Paymanta kawsanchi, samanchi, kuyurinchi, imashnami suma uyaypata killkanata yachak runaykichi-kunamantapas shukkuna rimarkakuna: Dioska ñukanchita rurashka paypa wawankuna kananchipa nishpa.

²⁹Chasna ñukanchi Yaya Diosmanta kashpanchi akuychi ama pantachishpa yuyarishchichu, Yaya Dios oromanta, kullkimanta, rumimanta rurarishka kananta. Runakuna ruranahun dioskunata paykuna kikin yuyayninkunamanta.³⁰Ñawpamanta pacha kunankama Yaya Dioska runakunata llakichirka, chay tukuy pantachishpa rurashkankunamanta, payta mana riksik kashkankunaryku. Kunanka tukuy runakunata riman: Uchata rurashkaykichi-chitaka sakishpaykichi ñukatana kirishpa kasuychi nishpa.³¹Yaya Dioska ñami akllashka shuk runata shuk puncha tukuy runakunata rurashkankunamanta tapuchinanpa. Chay akllashkan runa mana llullachiypa kashpan

kuskata rimanka pimi kastigarinka, pimi kishpinka nishpa. Yaya Dioska chay akllashkan runata wañushkanmanta kawsachishpan tukuy runakunata riksichirka chasna atun apu kananta nishpa.

³²Chasna wañushkakuna kawsarina-manta rimashkanta uyashpankuna shukkunaka asirkakuna, shukkunaka nirkakuna:

Shuk puncha ashwanta rimashkaykita uyashu nishpa.

³³Chasna rimashkankunawasha Pabloka chay tantarinamanta llukshish-pan rirka. ³⁴Shukkunaka Pablop a rimashkanta uyashpankuna paywa pakta rishpankuna Jesukristuta kirirkakuna. Shuk karka Areopago-manta kamachik Dionisio shutiyu. Shuk karka Dámaris shutiyu warmi. Chaymanta ashwan shukkunapas Jesukristuta kirirkakuna.

Pablo Korinto llaktapi yachachirka

18 ¹Chaymanta Atenas llaktamanta llukshishpan Pabloka Korinto llaktama rirka. ²Chay Korintopi paktashpan Pabloka tinkunakurka shuk israel masin Akila shutiyuwa. Warminka Prisila shutiyu karka. Chay Akilaka Ponto allpamanta runa karka. Chaymanta warmin Prisilawa Italia allpapa kapitalnin ^{*Roma} llaktamanta mushulla paktamushkakuna karka. Chay ^{*romano} tukuymanta atun apu Klaudio kamachirka tukuy israel runakuna Romamanta llukshinanku-napa. Chayrayku Akilaka warminti Korintoma kawsak rirka. Chasna tinkunakushpankuna Pabloka paykunapa wasinma pasyak rirka. ³Chaypi Pabloka yacharka Akilap as payshina tampukunaryku karpata rurak kananta. Chayrayku chayllapi paykunawa kiparirka parihu karpata

ruranankunapa. ⁴Chasna kashpan karan ^{*samana} puncha Pabloka israel masinkunapa tantarinankuna wasima rirka paykunata yachachinarpa, tukuy mana israel masinikunatapas. Paykunata suma asirtaypa shimikunawa yachachirka Jesukristu Kishpichik kananta.

⁵Chaymanta Silaska Timoteowa pakta Masedoniamanta paktashpankuna Pabloka manana karpakunata rurashpa-chu kawsarka. Karan puncha israel masinkunata Yaya Diospa shiminta yachachishpa kawsarka Jesusmi chay chapashkanchi Yaya Diospa Kachanan Kishpichik kan nishpa.

⁶Chasna yachachihushpan chay israel masinkunaka mana kiriñayashpankuna Pablotra piñarishpankuna mana ali shimikunawa aynirkakuna. Chasna rurashpankuna Pabloka kamisanta chawsishpa rikuchirka paykunata sakinanta, manana ashwanta yachachi-nanta. Chasna rurashpan paykunata rimarka:

Yachachishkaynita mana kirishkayki-chirayku uchaykichimanta mana llakichiy tukunkichichu. Kankuna kikin munashpaykichi kastigarinkichi. Ñukaka chasna kashkaykichimanta mana uchayuchu kani. Kunanmanta pacha kankunata sakishpayni mana israel runakunatana yachachik risha.

⁷Chasna nishpan Pabloka chay tantarina wasimanta llukshishpan Yaya Diosta kasuk Tisio Justo shutiyupa wasinma rirka. Chay wasika tantarina wasi mayanpi karka. ⁸Chay israel runakunapa tantarinankuna wasipi kamachik Krispo shutiyu Jesukristuta kirirka tukuy wasinpi kawsakkunawa pakta. Chaymantapas achka Korintopi kawsakkuna Pablop a yachachishkanta uyashpankuna Jesukristuta kirishpan-kuna bawtisarirkakuna. ⁹Chaymanta

shuk tuta Yaya Jesuska muskuypishina rikurishpan Pablota rimarka:

Ama manchankichu. Katiylla ñukamanta yachachishpa.¹⁰Ñukami kahuni kanwa. Nima pi kanta atipankachu nima imata ruranata. Kay llaktapika achka runakunami kiriwankakuna.

¹¹Chasna rimay tukushpan Pabloka kiparirka shuk wata chawpita Korintopi chay llaktapi kawsak runakunata Yaya Diospa shiminta yachachinpana.

¹²Chasna yachachihushpan chay Akaya allpapi shuk mushu apu yaykurka Galión shutiyu. Pay kamachik kashpan chaypi israel runakuna shuk yuyayllawa tantarirkakuna Pablota chay apupa puntanma pushanankunapa.

¹³Chasna pushashpankuna Pablota uchachishpa chay aputa rimarkakuna:

Kay runaka mana yachachinchu Moisespa killkashkan kamachishkashina. Runakunata riman chikanta Yaya Diosta kushichinankunapa.

¹⁴Chasna rimashpankuna Pabloka ayninalla kahushpan apu Galionka chay israel runakunata rimarka:

Israel runakuna rikuychi, kay runaka shuk kamachishkata mana paktachima karka, atipaynima kastigachinata. Mana rikushkanichu nima imata rurashkanta atipanaynipa kastigachinata. Chayrayku mana munanichu ashwanta uyanata.

¹⁵Kankuna kay runata piñarinichi kamachinaykichikunamanta yuyarishkaykichikunamantapas chikanta yachachihushkanrayku, chaymanta shuk runakunamanta rimanakunkichi. Chaykunapi ñukaka mana satirinanichu, maykanmi ali, maykanmi mana alichu nishpa. Chasna kashpan kankunapuralla alichaychi.

¹⁶Chasna nishpan apu Galionka paykunata kamachinan wasimanta llukshirka.¹⁷Chaypina tukuy chay piñarik runakunaka chay tantarina wasipi kamachik Sostenesta apishpankuna apu

Galionpa rikushkanpi makarkakuna. Chasna makashkankunata rikushpanpas Galionka nima imatashina rikurka.

**Pablo kimsaynin kuti
Jesukristumanta yachachishpa
purirka**

¹⁸Chasna pasashpan Pabloka ashwan punchakunatara Korintopi kiparirka. Chaymanta kirik masinkunata rishara nishpan Prisilawa Akilawa pakta llukshirka. Lanchapi uraykushpankuna Siria allpama rirkakuna. Manara llukshishpankuna Senkreal llaktapi Pabloka Yaya Dioswa kwintashkanta paktachinpana chukchanta rutuchirka.¹⁹⁻²¹Efeso llaktapi paktashpankuna Pabloka israel masinkunapa tantarinankuna wasima yaykuk rirka tantarishka israel masinkunawa kwintananpana. Paypa yachachishkanta uyashpankuna tapurkakuna paykunawa ashwan punchakunata kiparinanpa. Pabloka mana munarkachu. Paykunata rishara nishpan rimarka:

Yaya Dios munashpanka kutikashka shamusha kankunata pasyanaynipa.

Chasna rimashkanwasha Pabloka lanchapi uraykushpan Efesomanta llukshirka. Akilata Prisilawa chay Efeso llaktapi sakirka.²²Sesarea llaktapi paktashpan lanchamanta llukshishpan Jerusalenma rirka. Chay llaktapi kawsak kirikkunata saludak rirka. Paykunawa kwintashkanwasha Antiokia llaktama rirka.²³Chaypi shuk punchakunalla kiparishkanwasha kutikashka llukshirka. Galasia Frigia allpakuñata pasarka. Chayta pasahushpan shuk llaktapi shuk llaktapi purishpan chaypi kawsak kirikkunata Yaya Diospa shiminta yachachishpa sinchikuchirka.

**Apolos shutiyu runa Efeso llaktapi
yachachirka**

²⁴Chay uras shuk israel runa Alejandria llaktamanta Apolos shutiyu Efeso llaktapi

paktamurka. Alita rimak runa karka, chaymantapas Yaya Diospa shiminta alita yachak.²⁵ Payka alita yacharka imashnami Jesukristuta katishpa kawsananchi tiyan. Kushikushpa mana sampayashpa alita yachachirka runakunata Jesús Yaya Diospa Kachashkan Kishpichik kananta. Chasna alita Jesukristumanta yachashpanpas Juan yakuwa bawtisashkarillata riksirkta. Mana yacharkarachu Yaya Diospa Espíritun ashwan ūtukanchita aliyachinanmanta.

²⁶ Apoloska mana manchashpachu israel masinkunapa tantarinankuna wasipi Yaya Diospa shimiinta yachachinata kallarirka. Chasna yachachihuskanta uyashpankuna Prislaka Akilawa payta wasinpi yakyuchishpankuna Jesusmanta ashwanta asirtachirkakuna manara uyashkantapas yachananpa.²⁷ Chaymanta Apoloska Akaya allpama chiimpanayahushpan Jesukristuta kirikkuna payta sinchikuchishpa yanaparakakuna. Akayapi kawsak kirikkunarayku shuk killkata rurashpankuna paywa kacharkakuna. Chay killkapi Akayapi kawsak kirikkuna tapurkakuna Apolosta alita yakyuchinankunapa. Apoloska Akaya allpapi paktashpan Yaya Dios payta ali yachachikta rurashkanrayku chaypi kawsak Jesukristuta kirikkuna achkata yanaparka.²⁸ Tukuy runakunapa rikushkanpi Apoloska Yaya Diospa shiminmanta rikuchishpan yachachirka Jesuska chapahushkaykichi Yaya Diospa Kachanan Kishpichikmi kan nishpa. Chasna tukuy chaypi kahuk yachachik israel masinkunata chunllayachirka. Manami nima imata atiparkakunachu payta ayninata.

**Pablo Efeso llaktapi Yaya Diospa
Espiritunmanta yachachirka**

19 ¹Apolos Korinto llaktapi kahushpan Pabloka urkukunata pasashpan Efeso llaktapi paktarka. Chay llaktapi Jesukristuta kirikkunata

tarirka.² Chaypina chay kirikkunata tapurka:

¿Kirik tukushpaykichi Yaya Diospa Espiritunka kankunapi yaykushkachu?

Chasna tapushpan Pablota aynirkakuna:

Mana. Yaya Diospa Espíritun tiyashkanta nima ima uras yachashkan-chichu.

³ Chasna aynishpankuna Pabloka kuti tapurka:

¿Imashna yachachishpankunata kirishpa bawtisarirkankichi?

Paykunaka aynirkakuna:

Bawtisak Juanpa yachachishkanta kirishpanchi bawtisarirkanchi nishpa.

⁴ Chaypina Pabloka paykunata rimarka:

Juanka bawtisarka runakunata uchankunata sakishkankunata rikuchinankunapa. Chaymantapas nirka: Ņuka yachachinata sakishkayniwasha ashwan ali yachachikta kiriychi, paymi Jesukristu kan nishpa.

⁵ Pablo chasna yachachihushpan paykunaka Jesukristuta kirishpankuna mushumanta bawtisarirkakuna.⁶ Chasna bawtisarishkankunawasha Pabloka makinta umankunapi churashpan Yaya Diospa Espiritunka paykunapi yaykurka. Chasna yaykushpan paykunaka mana yachashkankuna shimikunata rimarkakuna. Chaymantapas Yaya Dios yuyachishpan paypa munananta rimarkakuna.⁷ Chay bawtisarishka runakunaka chunka ishkay karkakuna.

**Pablo ishkay watata Efeso llaktapi
yachachirka**

⁸ Chasna bawtisashkanwasha Pabloka kimsa killata israel masinkunapa tantarinankuna wasipi yachachirka. Mana nima pita manchashpa, alita asirtachishpa yachachirka imashnami Yaya Diospa ali kamachinanka kay

allpapi. ⁹Chasna Pablo yachachihushpan shukkunaka mana kasunata munashpan-kuna mana kirinayarkakunachu. Tukuy runakunapa puntanpi rimarkakuna Pablo Jesukristumanta yachachishkanka mana ali kananta. Chayrayku Pablo chay runakunamanta anchurishpan kirikkunata pushashpan Tirano shutiyupa yachachinan wasima yachachik rirk'a. ¹⁰Ishkay watata chayllapi yachachishpa kawsarka. Chasna yachachihushpan tukuy Asia allpapi kawsakkunaka Jesukristumanta yachachihushkanta uyarkakuna, israel runakuna, mana israel masinikunapas. ¹¹Yaya Dios Pablota yachayta kurka atun yachaywa manchariypa ruranakunata rurananpa. ¹²Chasna rurashpan shuk runakuna Pablopia churarinankunata apashpankuna unkushkakuna awapi churarkakuna. Chasna churashpankuna unkushkakunaka ampirirkakuna. Chaymanta supay yaykushka runakunamanta supaykunaka llukshirkakuna.

Jesusta kirishpalla supayta winsinch'i

¹³Shuk israel runakuna llaktakunapi purishpa kawsakkuna tiyarka supaykunata llukshichik nishkankuna. Paykunamanta shukkuna Jesuspa shutinta rimashpa, supay yaykushka runakunamanta supaykunata kamachishpa llukshichinayarkakuna kasna: Chay Pablo yachachihushkan Jesuspa shutinpi kanta rimani llukshiy kay runamanta nishpa. ¹⁴Shuk chasna llukshichinayak runakunaka karkakuna israel *saserdotekunapa apu Esebapa kanchis wawankuna.

¹⁵Paykuna chasna rimahushkankunapi chay supayka aynirka: Jesustaka riksinimi, Pablomantapas yachanimi pimi kan payka. Paykuna-

shina Yaya Diospa yachayninwa kankichimaka, kankunata kasuynimami. Kankunaka ¿pitaya kankichi ñukata kamachiwanaykichipaka?

¹⁶Chasna nishpan chay supay yaykushka runaka chay runakunapa awanpi saltashpan urmachirka. Tukuy paykunata makashpan winsirka. Chasna winsishpan chay runakunaka yanayarishka aychayu chay wasimanta llatan mitikurakuna. ¹⁷Chaypi tukuy Efeso llaktapi kawsak israel runakuna, *griego runakunapas chayta uyashpankuna yapa mancharirkakuna. Chaymanta Jesukristu atun yachayyu kashkanta rimashpa payta kushichirkakuna.

¹⁸Chaypina Jesukristuta kirikkunaka tukuy runankunapa puntanpi ñawpa mana alita rurashkankunata rimarkakuna uchayu kani nishpa. ¹⁹Chasnallata achka puruhukunapas Jesukristuta kirishpankuna supaymanta yachachik killkankunata apamurkakuna tukuy runakuna rikushkankunapi rupachinanunapa. Chay rupachirishka killkankunapa chaninta yupashpankuna pichka chunka waranka kullkimanta rurarishka yapa chaniyu kullki tupu karka.

²⁰Chayta rikushpankuna ashwan ashwan runakunaka Yaya Dios yanapashpan paypa shiminwa shunkunkunapi sinchita waktay tukushpankuna kirirkakuna.

²¹Chaymanta Pablota yuyarirka kutikashka Jerusalenma rinanpa. Manara Jerusalenma rihushpan munarka kuti Masedonia allpama, Akaya allpamapas pasyak rinata. Jerusalenma rishkanwasha yuyarirka *Roma llaktama rinanpa. Chay Roma llaktapipas yachachinayni tiyan nishpa yuyarirka Pablota. ²²Chasna yuyarishpan Asia allpamanta manara llukshihushpan Pablota Timoteota Erastowa kacharka, chay ishkay paywa

pakta purihukkunata puntapi Masedonia allpama rinankunapa. Pabloka masna punchakunata Asia allpapi kiparirka.

**Efeso llaktapi yanka dios warmi
Artemisata kushichikkuna
Pablokunata piñarirkakuna**

²³Chasna Pabloka payta yanapakkunawa Efeso llaktapi Jesukristumanta yachachihushpankuna shuk runakunaka yapa piñarirkakuna. ²⁴Shuk runa Demetrio shutiyu kallarirka piñarinata Pablokunata. Paymi chay yanka dios warmi *Artemisapa wasintashina uchilla wasistukunata kullkimanta rurapayan. Payshina tarawak masinkunawa pakta chay rurashkankunata rantichishpanguna achka kullkita apipayahanuh. ²⁵Chay Demetrioka tukuy payshina kullkimanta chay wasistukunata rurak masinkunata tantachirka. Chaypi rimarka:

Wasistukunata rurak masinikuna, kankuna yachankichi chay Artemisa warmi diosninchipa wasintashina wasistukunata rurashpanchi chayta rantichishpa achka kullkita apinanchita. ²⁶Kunanka rikunkichi uyankichi Pablo yachachihushkanta kasna: Runa rurashka dioskuna, santokuna mana shutipa dioskunachu nishpa. Chasna yachachihun mana kay Efeso llaktallapichu, ashwan tukuy Asia allpapipas. Chayrayku achka runakunata kirichirka manana Artemisata atunyachinankunapa. ²⁷Pablo chasna yachachishpalla katishpanka tarawananchika tukurinkami. Chaymantapas runakuna manana munankakunachu chay warmi dios Artemisapa wasinta. Chay tukuy Asia allpapi, chaymanta tukuy mundupi kawsak runakuna chay atunyachirishka warmi diosninchipa Artemisata manana valichinkakunananachu.

²⁸Chasna Demetriopa rimashkanta uyashpanguna Pablokunata yapa piñarishpanguna sinchita kaparirkakuna:

¡Artemisaka ñukanchi Efeso runakunapa warmi diosninchimi! nishpa.

²⁹Tukuy chay llaktapi kahuk runakunapa yuyayninkunaka pantachirishka karka.

Chaypina ishkay Masedoniamanta Pablawa pakta purihuk runakunata Gayota Aristarkotapas apirkakuna. Chasna apishpanguna aysashpa tantarinankuna wasima pusharkakuna uchachinankunapa.

³⁰Chasna pushashpanguna Pabloka chay wasipi yaykunayarka, chay piñarik runakunawa kwintanapan. Jesukristuta kirik masinkunaka mana munarkakunachu Pablo yaykunapan. ³¹Chaymantapas Asia allpapi shuk kamachik apukunapas Pabloka amigunkuna kashpanguna kamachinankunata payma kacharkakuna rimanankunapa chay runakuna tantarishkapi ama yaykuchun nishpa. ³²Chay tantarishka runakunaka musparishkashina shukta shukta yanka nishpa kaparirkakuna.

Achka runakuna mana yacharkakunachu imaraykumi chasna tantarishkakuna. ³³Chaypina chay tantarishkapi kahuk israel runakunaka israel masinkuna Alejandrotaka llashpanguna tankashpa tukuy runakunapa puntanpi churarkakuna runakunata rimanampa. Payta kwintashpanguna imaraykumi tantarishkakuna, Alejandrotaka puntama pasashpan makinwa rikuchirka chunlla tukunankunapa.

³⁴Runakunaka yachashpanguna Alejandrotapas israel runa kashkanta, mana payta kasunayarkakunachu. Chaypina ashwan sinchita ishkay urata parihu kaparirkakuna:

¡Artemisaka ñukanchi Efeso runakunapa warmi diosninchimi! nishpa.

³⁵Chasna kaparihukkunata uyashpan chay llaktapa apukunaryku killkak runaka chunllayachishpan rimarka:

Efesopi kawsak runa masinikuna, tukuy llaktakunamanta runakuna

yachanahun ñukanchi kay Efeso llaktapi kawsakkuna atun dios warmi Artemisapa wasinta kuyrakkuna kananchita. Chaymantapas yachanahun Artemisapa alman silumanta urmashkata kuyrakkuna kananchita.³⁶ Chayta yachashpaykichi amana kaparishpa kaychichu. Manara alita yuyarishpaykichika amara nima imata ruraychichu.³⁷ Kay pushamushkaykichi runakunaka mana shuwashkakunachu Artemisapa wasinmanta, nima Artemisamanta millaypata rimashkakunachu.³⁸ Demetriowa tarawakkunapas ima piñarina shimikuna tiyashpanka apukunama rinahuchun kwintashpa alichanankunapa.³⁹ Kankuna shuk imata ashwan tapunayashpaykichika chay atun tantarina tiyashkapi tapuychi alichanaykichipa.⁴⁰ Kunan musparishpa kaparishkaykichimanta apukunaka ñukanchita tapushpankunaka nima imata rimaypachu kanchi. Chasna kashpan ñukanchi kikin kastigarishunchi.

⁴¹ Chasna rimashkanwasha chay aputa yanapak tukuy tantarishkakunata llukshichirka wasinkunama kutinankunapa.

Pablo kutikashka Masedonia Gresia allpakunama rirk'a

20 ¹Chasna chay kaparik runakuna wasinkunama kutishkankunawasha Pabloka kirikkunata kayarka yachachishpa sinchikuchinanpa. Chaymanta rishara nishpan sakimurka Masedonia allpama rinanpa. ²Masedoniapi paktashpan karan llaktakunapi pasyashpa rishpan chaypi kawsak kirikkunata Yaya Diospa shiminta yachachishpan sinchikuchirka. Chasna rishpan Pabloka Gresia allpama paktarka. ³Chay Gresia allpapi kimsa killata kiparirka. Chaymanta chimpanayarka Siria allpama. Chaypina lanchapi

rinan kahushkanpi yacharka shuk chiknik israel masinkuna chay lanchapi payta wañuchinata yuyarihushkankunata. Chayta yachashpan Pabloka mana lanchapi rirkachu. Chakillawana Masedonia allpamallatata pasyashpa kutirka. ⁴Chasna rishpan shuk kirik wawkikuna Pablawa pakta rirkakuna. Shuk karka Pirropa wawan Sópater, Berea llaktamanta. Shukkuna karkakuna Aristarko Segundowa Tesalónika llaktamanta. Shukkuna karkakuna Gayo Timoteowa Derbe llaktamanta. Chaymanta Asia allpamanta Tíkiko Trofimowa paywa pakta rirkakuna. ⁵Ñuka Lukaspas paywa pakta rirkani. Chay shuk wawkikunaka puntapi rishpankuna ñukanchita Troas llaktapi chaparkakuna. ⁶Pablo ñukapas chay mana punkirishka panta mikuna punchakunata Filipos llaktapi pasarkanchi. Chay punchakunawasha lanchapi uraykushpanchi Filipos llaktamanta llukshirkanchi Troas llaktama chimpananchipa. Pichka punchamanta Troaspi paktarkanchi. Chaypi kiparirkanchi kanchis punchata.

Pablo Troas llaktapi shuk tuta pakarikta yachachirka

⁷Troaspi kashpanchi domingo puncha chishipi kirik masinchikunawa tantarirkanchi Jesús ñukanchirayku wañuskanta yuyarishpa panta pakishpa mikunanchipa. Chasna tantarishkanchipi Pabloka kirik masinchikunata yachachirka. Kayantima llukshinan kashpa chawpi tutakama yachachirka. ⁸Chay tantarishkanchi awa kwartupi achka lamparinkunata sintichirkakuna. ⁹Chay wasipa ventananpi shuk musu Eutiko shutiyu tiyahurka. Pablo yapa unayta yachachihushpan chay musuta puñuya apirka. Chasna puñushpan kimsaynin kawitu awamanta allpama

urmarka. Shukkunaka uraykushpankuna payta atarichinankunapa wañushkata tarirkakuna.¹⁰ Chaypi Pablopas uraykumurka. Kunkurishpan chay musuta apishpan uklliarirka. Chasna ukllarihushpan chay kirikkunata rimarka:

Ama manchariyichichu. Kay musuka kawsami kahu.

¹¹⁻¹² Chasna wañushka kawsarishkata rikushpankuna chay runakunaka yapa kushikushpa sinchikurirkakuna. Kutikashka sikashpankuna Jesuspa wañushkanta yuyarishpa panta pakishpa mikurkakuna. Mikushkankunawasha Pabloka tuta pakarikta rinan uraskama yachachirka. Yachachishkanwasha rishara nishpa llukshirkanchi. Chay musutaka kawsatana wasinma pusharkakuna.

Pablo Troas llaktamanta llukshishpan Miletu llaktama rirka

¹³ Manara Troas llaktamanta llukshishpanchi Pabloka kwintarkanchi Aso llaktapi tinkunakunanchipa. Pabloka chakiwa risha nishpan rirka. Ñukanchika lanchapi puntapi rirkanchi. Aso llaktapi paktashpanchi Pablota chaparkanchi paywa paktana lanchapi rinanchipa.¹⁴ Chaypi tinkunakushpanchi Pablota lanchapi uraykuchirkanchi. Chaymanta Mitilene llaktama chimparkanchi.¹⁵ Chaymanta kayantima lanchapillatata rishpanchi Kiyo isla mayanta pasarkanchi. Kayantima Samos islapi llutarirkanchi. Chaypi shuk tutata puñushkanchiwascha llukshishpanchi chay punchalla Miletu llaktapi paktarkanchi.¹⁶ Pablo utkalla Jerusalenpi paktanayashpan mana Efeso llaktama rinayarkachu. Asia allpatu kuskata pasarkanchi mana chaypi unayananchipa. Pabloka yapa munarka *Pentekostés punchakunata Jerusalenpi pasanata.

Pablo Efeso llaktamanta kirikkunata sinchikuchik wawkikunata yachachirka

¹⁷ Miletu llaktapi kashpanchi Pablo mana Efeso llaktama rinayarkachu. Chayrayku chay llaktamanta kirikkunata sinchikuchik wawkikunata kayachirka Miletoma shamunankunapa.

¹⁸ Chaypi paktamushpankuna Pabloka rimarka:

Wawkikuna, alita yachankichi imashnami kay Asia allpaykichipi shamushkayni punchamanta pacha kankunapi kawsashkani.¹⁹ Tukuy uras kankunawa kahushpayni Jesukristuta kasushpa kawsashkani. Nima ima uras chawpikichipi ñuka kikinta atunyachirishkanichu. Achka kuti runakuna mana alita rurahushkankunata rikushpayni llakirishpa wakarkani. Parisihushpaynipas chikniwak israel masinikuna wañuchiwanayashpankunapas mana sakirkanichu Jesukristuta kasunata.

²⁰ Tantarishkaykichipi, wasikichikunapi pas tukuya kankunata yachachirkani maykantami munankichi alita kawsanaykichipa.²¹ Chasna yachachishpayni israel masinikuna, mana israel masinikuna kashpaykichipas tukuy kankunata kunarkani karan shukta sapalla sapallata, millaypa rurashkayki-chita sakishpaykichi Amunchi Jesukristuta kasunaykichipa nishpa.

²² Kunanka Yaya Diospa Espíritu kamachiwashkanrayku Jerusalenma rihuni. Mana yachanichu imashnami pasasha chaypi.²³ Kayllata yachani Yaya Diospa Espiritunka karan purihushkayni llaktapi rimawarka: Jerusalenpi kanta apinkakuna karselpi churanankunapa, chasnallatata achkata parisinayki tiyan nishpa.²⁴ Chasna kashpanpas mana manchachiwanahunchu. Wañuchiwashpankunapas mana imananchu. Amunchi

Jesuska kamachiwashka chay suma ali shimita Yaya Dios runakunata yapa yuyananmanta rimanaynipa runakunata. Chay kamachishkanta paktachinayni tiyan wañunayni punchakama.

²⁵Alita uyawaychi. Yachani tukuy kankuna, maykankunatami Yaya Diospa ali kamachinan kay allpapi ña kallarishkanmanta yachachishkani, kay allpapi mana kuti rikuwankichichu. ²⁶⁻²⁷Chasna kashpan ñuka kankunata tukuy Yaya Diospa munashkanta nima imata pakashpa alita yachachishkani. Kunanka shuk kankunamanta mana kasushpa wañushpanka ñukaka mana uchayuchu kani. ²⁸Chayrayku kankuna kikin alita kuyrarishpa kawsaychi. Chaymantapas Jesusta kirik masikichikunata alita kuyraychi. Yaya Diospa Espíritun kankunata churashka Jesukristuta kirik masikichikunata kuyranaykicipa. Yaya Dios paykunatas llakichishpan paypa Wawan Jesusta sakirka wañunarpa. Chasna Yaya Diosrayku yapa valik kashkankunata yuyarishpa, paykunata yachachishpa yanapashpa alita kuyraychi. ²⁹Yachani ñuka kankunata sakishkayniwasha mana alita yachachikkuna kankunapi paktamunankunata. Shuk puma obehatu mikunapa shamuhukshina kankunapi paktankakuna kirikkunata llullachishpa Jesukristuta kirishkankunamanta anchuchinankunapa. ³⁰Kankuna kikin chawpikichimanta llullaysikikuna tiyanka, kankunata llullakunata yachachishpanguna munankakuna kirikkuna paykunatana kasunankunapa. ³¹Chayrayku yuyaywa kawsaychi mana llullachirishka kanaykicipa. Ama kunkarinkichichu imashnami kimsa watata punchanti tutanti mana sakishpa karan kankunata wakashpa kunarkani.

³²Kunanka munashkayni wawkini-kuna, Yaya Diospa makinpi sakishkayki-

chi, pay kankunata wakaychachun. Yaya Dios paypa shiminta yuyachishpa kankunata yanapanka ashwanta ashwanta Jesukristuta kirishpa kawsanaykicipa, chaymantapas tukuy kankuna kishpichishkan runakunawa pakta Yaya Diospa suma kawsanani pi paktanaykicipa. ³³Ñukaka kankunawa kahushpayni nima pipa kullkinta churarinantapas munarishkanichu. ³⁴Kankuna alita yachankichi ñuka kikinrayku makiniwa tarawashkaynita, ñukawa purihukkunaraykupas, imatas munashkanchita rantinanchipa. ³⁵Chasna tarawashpa kawsashpayni kankunata alita rikuchishkani imashnami kankunapas sinchita tarawashpa kawsanaykichi tiyan mana tarawanata atipak runakunata yanapaynaykicipa. Jesukristupa kasna rimashkanta yuyarishpa kawsaychi: Ashwan kushilla kanchi shukkunata munashkankunata kushpanchi kuy tukunanchimanta.

³⁶Chasna rimashkanwasha Pabloka tukuy chay kirikkunata sinchikuchik wawkikunawa pakta kunkurishpan Yaya Diosta mañarka. ³⁷Chasna mañashkanwasha tukuy wakashpan-kuna Pablota ukllarishpa muchashpa alilla rinki nishpa rimarkakuna. ³⁸Yapa llakirirkakuna, Pablo kay allpapi mana kuti rikuwankichichu nishpa rimashkan-rayku. Chaymanta Pablokunawa pakta rirkakuna lanchakama.

Pablo Jerusalenma rirk'a

21 ¹Chasna Pablo ñuka Lukaspas chay wawkikunata sakishkan-chiwasha lanchapi uraykushpanchi kuskata rirkanchi Kos shutiyu islama. Chaymanta kayantima rirkanchi Rodas shutiyu islama. Chaymanta llukshishpanchi Patara llaktapi paktarkanchi. ²Chaypi paktashpanchi tarirkanchi shuk

lancha Fenisia allpama rina kahukta. Chaypi uraykushpanchi rirkanchi.
³Chay lanchapi rihushpanchi Chipre shutiyu islata lluki partita pasashpanchi Siria allpapi paktarkanchi. Chay lanchaka Tiro llaktapi imakunata sakinan kashpan chayma rirkanchi.
⁴Chaypi llutarishpanchi kanchis punchata kiparirkanchi imakunata sakihushpankuna. Chaypi kirik masinchikunata maskashpa tarishpanchi paykunawa pakta karkanchi. Chaypi kahushpanchi Yaya Diospa Espíritun chay kirikkunata Pablopaparisinanta rikuchirka. Chayrayku paykunaka ama Jerusalenma riychu nishpa rimarkakuna.
⁵Chay kanchis puncha paktarishpan tukuy kirikkuna warminkunawa wawankunawa pakta llaktankunamanta llukshishpankuna ñukanchiwa rirkakuna atun yaku mar mayanpi tiyu kahushkapi. Chay tiyupi kunkurishpanchi Yaya Diosta mañarkanchi.
⁶Chasna mañashkanchiwasha rishara nishpa llakiyya sakinakushpanchi lanchapi uraykurkanchi rinanchipa. Chay wawkikunaka chaymantalla wasinkunama kutirkakuna.

⁷Tiro llaktamanta rishpanchi Tolemaida llaktapi paktarkanchi. Chay llaktapi Jesukristuta kirik wawkikunaka shuk punchata pasyarkanchi.
⁸Chay kayantima llukshishpanchi Sesarea llaktapi paktarkanchi. Chaypi Yaya Diospa shiminta yachachik Felipepa wasinpi yaykurkanchi. Chay Felipeka ñawpa kanchis akllashkankunamanta *apostolkunata yanapak karka.
⁹Chay Felipeka chusku shipas wawayu karka. Paykunaka Yaya Diospa yachayninwa rimakkunami karkakuna.
¹⁰Chaypi achka punchakunata kahushkanchipi shuk Agabo shutiyu Judeamanta runa pasyanapa shamurka. Pay Yaya Diospa yachayninwa yachachik kashpan Yaya

Dioska payta kwintarka imashnami Pabloka pasanka.
¹¹Chay Agaboka ñukanchima shamushpan Pablopap sinturunta apishpan pay kikin makinkunata chakinkunatapas watarishpan rimarka:

Yaya Diospa Espiritunka kasnami nin: Jerusalenpi kawsak israel masinkuna Pablota apishpankuna kasna watankunkuna mana israel runakunata kunankunapa nishpa.

¹²Chasna rimashkanta uyashpanchi ñukanchi chay llaktapi Jesusuta kirik wawkikunapas Pablota rimarkanchi:

Ama Jerusalenma rinkihu nishpa.

¹³Chasna rimashpanchipas Pabloka aynirk'a:

¿Imaraykuta wakashpa llakiyp'i churawahunkichi? Mana watay tukunaynillapachu Jerusalenma risha, ashwan wañuchi y tukunaynipapas alicharishka kahuni, Jesukristuta katihushkaynirayku.

¹⁴Chasna rimashpanchipas mana kasunayashpan manana ashwanta rimarkanchinachu.

Yaya Diospa munashkanta rurachun nishpa sakirkanchi.

¹⁵Chay punchakunawasha alicharirkanchi Jerusalenma rinanchipa.

¹⁶Sesareamanta shuk kirik wawkikuna ñukanchiwa pakta rirkakuna Naasonpa wasinta riksichinankunapa, chaypi paktananchipa. Chay Naasonka Chipre islamanta runa karka, ñawpamanta pacha Jesukristuta kirik.

Pablo Jerusalenpi kirikkunata kwintarka tukuy Yaya Dios yanapashpan rurashkanta

¹⁷Jerusalenpi paktashpanchi chaypi Jesukristuta kirikkuna kushikushpa ñukanchita yaykuchirkakuna.
¹⁸Kayantima Pabloka ñukanchiwa pakta *Santiagoma rirka. Chaypi tukuy

kirikkunata sinchikuchik wawkikunapas tantarirkakuna.¹⁹ Saludashkanwasha Pabloka tukuya kwintarka chay ñukanchi mana israel runakunapa llaktanchikunapi Yaya Dios rurashkanta paypa yachachihushkanwa.²⁰ Pabloka chasna kwintahushkanta uyashpankuna Yaya Diosta kushikushpa agradesirkakuna. Chaymanta chaypi kahuk wawkikunaka Pablota rimarkakuna:

Rikuy wawkini, achka waranka israel runakuna kunanka Jesukristuta katihunchi. Chasna kashpanpas tukuy kirik israel masinchikuna Moisespa killkashkanta tukuy runakuna paktachinankuna tiyan nishpa yuyarinahun.²¹ Paykunaka rimashkaykita uyarkakuna, chay shuk allpakunapi chikan runakuna chawpipi kawsak israel masinchikunata rimashkaykita Moisespa killkashkan kamachishkata amana kasuychichu nishpa. Chasnallatata uyarkakuna kari wawankunapa ishpanan kara puntata manana pitinankunapa. Chaymanta uyarkakuna yaya rukunchi wañupa yachachishkankunata manana kasushpa kawsanankunapa.²² Chasna kashpan ¿imatata rurankima? Shamushkaykitaka yachankakunami.²³ Nima imata kanta ruranankunapa kayta ruray: Ñukanchipi tiyan chusku runakuna, maykunkunami Yaya Diosta shuk paktachina shimita rimashkakuna.²⁴ Chay chusku runakunawa tantarishpayki kamachirishka kashkata rurashpa alichariychi Yaya Diospa rikushkanpi alicharishka kanaykichipa. Paykunaryaku obehatta rantikriy wañuchishpankuna Yaya Diosrayku rupachinankunapa. Chaywasha chukchankunata rutuchiyl rimashkankuna shimita paktachinankunapa. Chayta rurashpaykika tukuy israel masinchikuna yachankakuna kanmanta uyashkankuna shimika mana shutipa kananta. Chaymantapas yachankakuna

kanpas Moisés wañupa killkashkan kamachishkata paktachik kanaykita.

²⁵ Mana israel runakuna Jesukristuta kirikkunaryku ñami killkashkanchi imashnami paykuna kawsanankuna tiyan kasna nishpa: Ama mikuychichu runakuna yanka dioskunata kushichinankunapa churashka aychakunata, nima sipirishpa wañushka animalkunata wiwakunata. Yawartapas ama upyaychichu, nima mikuychichu. Ama musayanakuychichu.

Pablota Yaya Diospa wasinpi apirkakuna wañuchinankunapa

²⁶ Chay wawkikunapa rimashkankunata kasushpan Pabloka chay chusku runakunata pusharka maypimi kawsahurka. Chay kayantima kamachirishka kashkata rurashpa alicharirkakuna Yaya Diospa rikushkanpi alicharishka kanankunapa. Chaywasha Pabloka *Yaya Diospa wasinma yaykurka *saserdotekunata rimanarpa kanchis punchamanta chay chusku runakunaryku karan shukrayku shuk obehatta rupachishpa kunanta Yaya Diosta rimashkankunata paktachinankunapa.²⁷ Chay kanchis puncha ña tukurina kahushkapi Asiamanta israel runakuna Yaya Diospa wasin ukupi Pablo kahushkanta rikurkakuna. Chaypina mana alita Pablomanta rimashpa tukuy chaypi kahuk runakunata piñachirkakuna. Chasna Pablota piñarishpankuna apirkakuna.²⁸ Payta apishpankuna kaparirkakuna:

¡Israel runa masinikuna, ñukanchita yanapak shamuychi! Kay runaka tukuy partipi mana alitachu yachachishpa purihun. Ñukanchi israel runakunapa yuyayka manashi valinchu. Moisés wañupa killkashkanpas manashi valinchu. Kay Yaya Diospa wasinpas manashi valinchu payta mañanapa.

Chasna tukuy chaykunata mana valichishpan kunanka mana israel runakunata kay Yaya Diospa wasin ukuma pushamushpan mana alita rurashkanwa Yaya Diosta piñachihun nishpa.

²⁹Chasna rimarkakuna Pablota Efesomanta mana israel runa Trofimowa pakta llaktapi purihushkanta puntiru rikushkankunaryku. Chayrayku yanka yuyarirkakuna chay runata Yaya Diospa wasinpi yaykuchishkanta.

³⁰Chasna kaparishpankuna tukuy chay llaktapi kawsak runakuna kallpashpa Yaya Diospa wasinma shamurkakuna. Chaypina Pablota apishpankuna Yaya Diospa wasinmanta aysashpa Ilukshichirkakuna. Chaywasha punkunkunata tran taparkakuna.

Romano suntalukunapa komandanten Pablota kishpichirka

³¹Chay chiknik runakuna Pablota ña wañuchinayahushpankuna shuk *romano komandanteka uyarka, tukuy Jerusalenpi kawsak runakuna piñarishpankuna tantarishkankunata. ³²Chasna uyashpan chay komandanteka suntalunkunata, kapitankunatapas tantachishpan kallpa rirka chay tantarishka runakunama. Chay komandante suntalunkunawa pakta kalpamuhukta rikushpankuna runakunaka sakirkakuna Pablota makanata. ³³Chaymanta chay komandanteka paktashpan Pablota apichishpan kamachirka ishkay fierro kadenawa watanankunapa. Chaywasha piñarihuk runakunata Pablomanta tapurka:

¿Pitaya kay runaka? ¿Imatata rurashka? nishpa.

³⁴Chasna tapushpan chay tantarishka runakunaka shukta shukta kaparishpa rimarkakuna. Chasna kaparishpankuna chay komandanteka mana atiparkachu

alita asirtanata. Chayrayku suntalukunata kamachirka Pablota paykunapa wasinkunama apanankunapa.

³⁵⁻³⁶Chasna apahushpankuna suntalukunapa washanta achka runakuna kaparishpa katirkakuna:

¡Wañuchiichi! ¡Wañuchiichi! nishpa.

Chaymanta iskalunpi paktahushpankuna runakuna ña wañuchinayahushpankuna suntalukunaka Pablota markashpa aparkakuna.

Pablota runakunapa puntanpi pay kikinmanta kwintarka

³⁷Suntalukunapa wasinkunama yaykuchinapa apahushpankuna Pablo *griego shimita rimak kashpan chay komandanteta rimarka:

Shuk shimita kanta rimanayani nishpa.

Pablo chasna rimashpan komandanteka payta tapurka:

¿Griego shimita rimanata yachankichu?

³⁸¿Manachu Egipto allpamanta runa kanki? ¿Manachu shuk uras ñukanchi *romano apukunata wañuchinayahsha chusku waranka runakunata tantachishpayki pusharkanki chunlla chakishka allpama? ¿Manachu chay runa kanki?

³⁹Chaypina Pablota aynirka:

Mana chay rimahushkayki runachu kani. Ñukaka israel runami kani. Silisia allpapi kahuk atun llakta Tarsomantami kani. Kanta tapuni shuk ratulla kachariway kay runakunata rimanaynipa.

⁴⁰Chasna tapushpan komandanteka rimarka:

Chasna kashpanka kwintay.

Chaypina Pablota iskalunpi shayarishpan makinta rikuchirka runakuna chunllayanankunapa. Chunlla tukushpankuna Pablota paykunapa kikin *hebreo shimipi rimarka:

22 ¹Yaya rukukuna, wawkikuna, rimay tukuhushkaynirayku aynishpa rimahushkaynita uyaychi.

²Chasna hebreo shiminkunapi rimahuskanta uyashpankuna ashwan chunllayarkakuna. Chaypina Pabloka rimarka:

³Ñukaka israel masikichimi kani. Silisia allpapi kahuk Tarso llaktapi wawayarishkani. Kay Jerusalén llaktapi wiñashkani. Ali yachachik Gamaliel wañumanta alita yachakurkani tukuy yaya rukunchi wañukunapa kamachishkankunata paktachinata. Tukuy shunkuynimanta pacha Yaya Diosta kushichinayashpa chay kamachishka kashkata paktachikmi karkani, imashnami kankunaka kunankama kahunkichi. ⁴Ñawpa parisichipayarkani Jesukristuta kirikkunata wañuchichinaynikama. Mana imanapayarkachu kari kashpan warmi kashpanpas apishpayni watashpa aparkani karselpi churanankunapa. ^{5*}Saserdotekunapa atun apu, tukuy ñukanchita kamachik israel masinchicu rukukunapas atipanahun chayta rimanata. Paykuna ñukata killkakunata kuwarkakuna kuk rinaynipa Damasko llaktapi kawsak israel masinchikunata. Chay killkakunapi killkarishka karka, ñuka Jesukristuta kirikkunata apishpayni Jerusalenma pushamunaynipa apukuna kastigachinankunapa. Chay killkata apishpayni Damasko llaktama rirkani.

Pablo Jesusta kirishkanmanta kwintarka

⁶Pabloka kwintashpalla katirka:

Chay Damasko llaktama rina ñampita rihushpayni ña chawpi puncha kahushkanpi, Damasko llaktata kuchuyuhushkaynipi kunkaymanta silumanta ñukapi muyukta chuyahlla rikuriwarka.

⁷Chasna rikuchiwashpan allpama urmarkani. Chaypi shuk shimi rimawahukta uyarkani kasna nishkata: Saulo, Saulo, ¿imaraykuta chiknishpa

parisichiwhunki? ⁸Chasna rimashkanta uyashpayni tapurkani: ¿Pitaya kanki, Señor? Chasna tapushpayni ayniwarka: Nasaretmanta Jesusmi kani, maykantami chiknishpa parisichihunki nishpa.

⁹Ñukawa rihuk runakunaka chay chuyahlla rikurishkallata rikurkakuna. Chay rimawahuk shimitaka mana uyarkakunachu. ¹⁰Chasna Jesusmi kani nishpan ñukaka kuti tapurkani: ¿Imatata rurasha Yaya Jesús? Payka ayniwarka: Atariy. Damasko llaktama riy. Chaypimi yachanki imatami ruranki, shuk runami kanta rimanka nishpa. ¹¹Chay chuyahlla rikurishkaka ñawinita wiskuyachiwashpan ñukawa pakta rihuk runakunaka makinimanta apishpa Damasko llaktama pushawarkakuna.

¹²Chay llaktapi shuk runa Ananias shutiyu kawsapayarka. Payka Moisespa killkashkan Yaya Diospa kamachishkankunata alita paktachik karka. Tukuy chay llaktapi kawsak israel masinchikunaka paymanta alillata rimarkakuna.

¹³Chay Ananiaska paktashpan ñukata rimak shamuwarka: Wawkini Saulo, kunanka kutikashka atipanki rikunata nishpa. Chasna rimawashkanllawa kuti rikuk tukushpayni payta rikurkani.

¹⁴Chaypina payka rimawarka: Yayanchi Dios, maykantami yaya rukunchi wañukunapas kushichinahun, paymi kanta ñawpamanta pacha akllarka paypa munashkanta yachanaykipa. Chaymantapas kanta akllarka chay alillata rurak Wawanta rikunaykipa, pay kikin rimahuskanta uyanaykipa.

¹⁵Chay rikushkaykita uyashkaykita purihushpayki kwintanayki tiyan tukuy kay allpapi kawsak runakunata.

¹⁶Kunanka mana unayashpa atariy bawtisarik rinaykipa. Yaya Jesusta tapuy uchaykikunamanta llakichiy tukunaykipa nishpa.

**Pablo mana israel runakunata
yachachishkanmanta kwintarka**

¹⁷Pabloka kwintashpalla katirka:
Chaywasha Jerusalenma kutirkani.
Chaypi *Yaya Diospa wasinpi yakyushpayni Yaya Diosta mañarkani. Chasna mañahushpayni shuk muskuypishina Jesusta puntaynipi rikurkani. ¹⁸Payka rimawarka: Kay Jerusalemanta utkalla llukshiy. Kaypi kawsak runakunaka ñukamanta rimahushkaykita mana kirinkakunachu. ¹⁹Jesús chasna rimawashpan aynirkani: Yaya Jesú, paykunaka alita yachanahun, tantarinankuna wasikunapi yakyushpayni kanta kirikkunata apishpayni asutichissha karselpi churachishkaynita. ²⁰Kanmanta yachachik Estebanta wañuchihushkankuna uras ñukapas chaypi kahurkani. Payta wañuchihushkankunata rikushpayni alimi nirkan. Chasnallatata chay wañuchihuk runakunapa awaniru churarinankunata llatanashkankunata wakaycharkani. ²¹Chaypina payka kutikashka rimawarka: Riylla. Ñukami kanta kachahuni karu llaktakunapi mana israel runakunama nishpa.

**Romano suntalukunapa
komandanten kuti Pablota
kishpichirka**

²²Chaykamalla tukuy israel runakuna Pablota kwintahushkanta alita uyarkakuna. Pay ñukanchi mana israel runakunamanta rimashpan tukuy runakuna kuti kaparirkakuna:

¡Wañuchiyychi kay runata! ¡Mana alichu chasna runaka kawsanampa!

²³Kaparispalla katishpankuna piñarishpa churarishkankunata chawsirkakuna, allpa pulbuta wichernakuna.

²⁴Chasna rurahushkankunata rikushpan chay komandanteka suntalunkunata kamachirka Pablota wasinkuna ukuma yaykuchinankunapa. Chaywasha suntalun-

kunata kamachirka Pablota asutishpa rimachinankunapa imaraykumi chay runakunaka chasna kaparihunkuna nishpa.

²⁵Asutinankunapa ña watarishka kashpan Pabloka chaypi kahuk suntalukunapa kapitanta tapurka:

¿Pita kankunata rimashka chasna asutiwanaykichipa kankunashina *romano runa kashpaynitata manara alita yachashpaykichi uchaychu kani manachu nishpa?

²⁶Pablo chasna rimashpan chay suntalukunapa kapitanka chay ratu rimak rirka komandanteta:

¿Imaraykuta kay runata asutichinki? Payka romano kananta rikuchik killkayushi nishpa.

²⁷Chayta uyashpan chay komandanteka Pabloma rirka tapunanpa:

Rimaway, ¿shutipachu romano kanaykita rikuchik killkayu kanki?

Pabloka aynirkana:

Ari, shutipami kani.

²⁸Chasna aynishpan chay komandanteka rimarka:

Ñuka romanoshina tukushkaynita rikuchik killkayu kanaynipa achka kullkiti pagarkani.

Chasna komandanteka rimashpan Pabloka kutikashka aynirkana:

Ñukaka Tarso llaptapi wawayarishkaynimanta romano kanaynita rikuchik killkayu kani.

²⁹Chasna Pablo rimashpan asutinankunapa kamachishkan suntalukunaka chay ratulla anchurimurkakuna. Chay komandantepas Pablo romano kananta rikuchik killkayu kashkanta yachashpan sinchita mancharirka payta watashpa asutinankunapa kamachishkanrayku.

**Pablo tantaylla yuyarishpa kwintak
atun apukunapa puntanpi rimarka**

³⁰Chay *romano komandanteka alita yachanayarka imaraykumi israel

masinkuna Pablota wañuchinayahun-kuna nishpa. Chayrayku chay kayantima Pablota kadenawa watarishka kashkanmanta kachari-chirka. Chaymanta israel runakunapa *saserdotenkunapa apunkunata kayachirka tukuy paykunawa pakta tantaylla yuyarishpa kwintak atun apukunawa tantarinankunapa. Chasna chay israel apukuna tantarishpangkuna Pablota chay tantarishkama pushashpan puntankunapi shayachirka.

23¹Pablo chay tantaylla kwintak apukunata rikushpan rimarka:

Wawkikuna, ñukaka kunan punchakama Yaya Diospa rikushkanpi ali yuyaywa kahushkaynita musyani.

²Pablo chasna rimashpan Ananias shutiyu saserdoteenkunapa atun apu Pablopia kuchunpi kahukkunata kamachirka:

Chay rimahukta shiminpi lapyaychi nishpa.

³Chayta uyashpan Pabloka Ananiasta aynirka:

Kan kaypi kahunki rimanaykipa rurashkaynita alichu manachu nishpa Moisespa killkashkan kamachishkakunashina. Kunanka kanka chaykunata mana kasushpa kamachishkanki ñukata lapyawanankunapa. Yaya Diosmi kanta kastiganka millaypa yuyayyu llullachiy-siki.

⁴Pablopia kuchunpi shayahukkunaka chasna rimashkanta uyashpankuna rimarkakuna:

⁵Imashnataya chasna millaypata rimanki Yaya Diospa churashkan saserdoteenkunapa atun aputa?

⁵Chasna rimashpankuna Pabloka aynirka:

Llakichiwaychi wawkikuna, mana yachashkanichu pay saserdotenchiku-

napa atun apu kananta. Yachaynima karka, mana chasna rimaynimachu karka. Yachani Yaya Diospa rimashkanka kasna nin: Ama millaypata rimankichichu apuykichita nishpa.

⁶Chay tantaylla kwintak atun apukunamanta shukkunaka *fariseokuna karkakuna, shukkunaka *saduseokuna. Fariseokunaka wañushkakuna kawsarinankunata kirik karkakuna. Saduseokunaka mana chaykunata kirikchu karkakuna. Pablo chay ishkay chikanta yuyarik kahushkakunata yachashpan tukuy uyanankunapa nishpa sinchita rimarka:

Wawkikuna, ñukaka fariseomi kani, yayaynipas fariseomi karka. Kunan wañushkakuna kawsarinankunata kirishkayniraykumi uchachiy tukuhuni.

⁷Pablo chasna rimashkanta uyashpankuna fariseokunaka saduseokunawa piñanakurkakuna. Manana shuk yuyayllawa kashpankuna ishkay muntun tukushpankuna rimanakurkakuna. ⁸Saduseokuna ninahun wañushkakunaka mana kawsarinankunata, chaymantapas *angelkunaka, almapas mana tiyananta. Fariseokunaka ninahun tukuy chaykuna tiyananta.ⁱ ⁹Chasna mana shuk yuyayllawa kashpankuna ashwan sinchita rimanakurkakuna. Chasna rimanakushpankuna shuk fariseokuna Moisespa killkashkanta yachachikkuna atarishpankuna rimarkakuna:

Kay runapata mana tarinchichu nima shuk millaypa rurashkanta. Yaya Diospa Espiritunchari, mana kashpaka shuk angelchari payta rimashka, mana yachanchichu nishpa.

¹⁰Chasna paykunapura yapa piñanakuushpankuna chay komandanteka mancharka Pablota liki liki rurananku-

nata. Chayrayku suntalunkunata kamachirka chay runakunapa makinmanta kichushpankuna kuti wasinkuna ukuma pushanankunapa.

¹¹Chay kayanti tutapi Jesukristuka muskuypishina Pabloma shamushpan rimarka:

Pablo, ama manchariychu, ama llakiriychu, ashwan sinchikuy. Ñuka munani kay Jerusalenpi ñukamanta rimashkaykishina kunan chay atun *Roma llaktapipas chasnallatata kwintanaykipa nishpa.

Chikniik runakuna Pablota wañuchinankunapa yuyarirkakuna

¹²⁻¹³Kayantima chusku chunka ashwan israel runakuna tantarishpankuna yuyarirkakuna Pablota wañuchinankunapa. Yaya Dios ñukanchita kastigachun kay rimahushkanchita mana paktachishpanchi. Mana upyashunchichu, nima mikushunchichu Pablota wañuchinanchikama nishpa rimarkakuna. ¹⁴Chasna yuyarishpankuna chay runakunaka *saserdotekunapa apunkunama, kamachik israel masinkuna rukukunamapas rirkakuna. Chaypi paktashpankuna rimarkakuna:

Nukanchika parihu yuyarishkanchi nima imata mikunanchipa, nima upyananchipa Pablota wañuchinanchikama nishpa. ¹⁵Kunanka kankuna tukuy tantaylla kwintak atun apukunanti komandanteta tapuychi kaya Pablota kankunama pushamunankunapa, ashwan alita yachanaykichipa paymanta nishpa. Ñukanchi pay ñampipi kahushpan manara kankunama paktamuhushpanra chawpillapi wañuchishunchi.

¹⁶Chasna rimashkankunata Pablopa paninpa musu wawan uyashpan suntalukunapa wasinkunapi yaykushpan Pablota rimak rirka. ¹⁷Chasna rimash-

pan Pabloka shuk kapitanta kayashpan rimarka:

Kay musupa shuk shimi tiyan. Komandantema pushay payta kwintanarpa.

¹⁸Chasna chay kapitanka chay musuta komandantema pushashpan rimarka:

Chay apishkanchi Pabloka kayawashpan rimawashka: Kay musuta pushay komandantema payta shuk shimita rimanarpa nishpa.

¹⁹Chasna chay kapitan rimashpan komandancka chay musuta makinmanta apishpan chay kwartu ukupi chaynikstuma pushashpan sapallanta tapurka:

¿Imatata kwintanayawanki? nishpa.

²⁰Chay musuka ayinrka:

Shuk israel masinikuna kantashi tapunkakuna kaya Pablota atun apunchikunapa tantarinankuna wasima pushanaykipa, paymanta ashwan alita tapushpa yachanankunapa. ²¹Chay apunchikunapa tapunantaka ama kasunkichu. Chusku chunka ashwan runakunami payta wañuchinayashpa pakashpa chapankakuna ñampipi. Paykunaka parihu yuyarishkakuna mana mikunankunapa, nima upyanankunapa Pablota wañuchinankunakama nishpa. Kunanka chapahunkunami.

²²Chasna rimashpan komandancka chay musuta rimarka:

Kunanka riylla. Nima pita kwintankichu ñukata tukuy chayta kwintawashkaykita nishpa.

Pablota apu Felixma pusharkakuna

²³Chaypina komandancka ishkay kapitankunata kayashpan kamachirka:

Alichariychi Sesarea llaktama rinaykichipa. Ishkay pachak suntalukuna chakiwa, kanchis chunka suntalukuna kaballupi, chaymanta ishkay pachak suntalukuna lansakunawa rinankunapa alicharinahuchun iskun ura tutapi

Sesarea llaktama rinaykichipa. ²⁴Chaymantapas kaballukunata alichaychi
Pablota chay awapi rinanpa, alita apu
*Felixpa puntanpi paktanpana.

²⁵Chaymanta chay komandanteka
shuk kartata killkarka kasna nishpa:

²⁶Munashkayni atun apu Felix, ñuka
Klaudio Lisias kanta saludani. ²⁷Kay
kachahushkayni runa Pablota israel
masinkunaka chiknishpankuna yanka
wañuchinayahunkuna. *Romano runa
kananta yachashpayni suntaluyniku-
nawa rirkani payta kishpichinaynipa.
²⁸Yachanaynipa imaraykuta chasna
wañuchinayahunkuna nishpa payta
israel runakunapa tantaylla kwintak
atun apunkunama pusharkani. ²⁹Chaypi
uyarkani Moisespa killkashkanta mana
kasushkanrayku payta uchachishkanku-
nata, maykanmantami paykuna kikin
mana shuk yuyayllawachu kashkakuna.
Mana yachashkanichu nima shuk mana
alita rurashkanta pay wañuchi
tukunpana, nima karselpi yaykunana.
³⁰Uyashpayni israel masinkuna tukuy
parihu yuyarishkankunata Pablota
wañuchinankunapa utkalla payta
kanma kachahuni. Chay uchachik
runakunata rimashkani kanpi alichak
rinankunapa. Chayllami kashka
killkashkaynika.

³¹Chay suntalukunaka komandantepa
kamachishkanta kasushpa Pablota
tutapi pusharkakuna. Rihushkankunapi
puntiru Antípatris llaktapi paktarka-
kuna. ³²Kayantima chay chakiwa rihuk
suntalukunaka wasinkunama kutirkakuna.
Chay kaballupi rihuk suntaluku-
nallana Pablota pusharkakuna.

³³Sesarea llaktapi paktashpankuna chay
apu Felixta killkata kurkakuna.
Chaymantapas Pablota paypa makinpi
sakirkakuna. ³⁴Chay killkata leyishkan-
washa chay apuka Pablota tapurka:
¿Maykan allpamantata kanki?

Pablota aynirka:
Silisia allpamantami kani nishpa.
Silisiamanta kashkanta yachashpan
rimarka:

³⁵Kanta uchachihuk runakuna
shamushpankuna kanmanta uyasha.
Chasna rimashpan suntalukunata
kamachirkira Pablota apu *Herodes
wañupa atun wasinpi tapashpa
kuyranankunapa.

Pablo apu Felixpa puntanpi rimarka

24 ¹Pichka punchawasha israel
*saserdotekunapa atun apu
Ananias shuk kamachik israel rukuku-
nawa *romanokunapa kamachishkanku-
nata alita riksik Tértulo shutiyuta
pushashpa Jerusalenmanta Sesareama
rirkakuna, apu *Felixpa puntanpi
Pablota alita uchachishunchi nishpa
yuyarishpankuna. ²Chaypina Pablota
taparishka kashkanmanta pushamush-
pankuna chay alita rimanata yachak
Tértulo kallarirka rimanata chay aputa
kasna nishpa:

Apu Felix, kanta agradesinchi alita
kawsashkanchirayku. Kan yachaykiwa
kamachishkaykirayku mana nima ima
llakiya pasashkanchichu, kushilla
kawsashkanchi llaktanchikunapi.

³Tukuy parti chasna kushilla kawsanchi,
achkata yanapashkaykirayku. Kunan
kanta atunta agradesinchi. ⁴Kunanka
mana yapa munanichu kanta unayachi-
nata, shuk ratulla uyaway kay
runamanta rimanayahushkaynita. ⁵Kay
runata tarishkakuna tukuy partipi yanka
llullashpa shuk mushu yuyaykunata
yachachihushkanwa israel masinkunata
piñachishpa purihushkanta. Shukku-
naka payta kasushpa ñawpa yaya
rukunkuna wañupa rimashkankunata
manana munanahunchu. Chaymanta
Nasaretmanta Jesús wañuta kirikkunapa

kamachik apumi kan. ⁶Kunan shuk mana israel runakunata *Yaya Diospa wasinpi yaykuchishpan uchata rurashka. Chayrayku payta apirkakuna kastigachinankunapa. ⁷Chasna kastiganganayahushkankunapi chay Lisias shutiyu komandante shamushpan Pablota makinkunamanta tankashpa kichurka. ⁸Chaymanta rimarka romano apupi alichak rinaykichi tiyan nishpa. Kunanka kan kikin Pablota tapuy alita yachanaykipa tukuy rimashkanchika shutipa kananta.

⁹Tértulo chasna rimashkanwasha tukuy chaypi kahuk israel runakuna kayka shutipatami rimashka nishpa rimarkakuna.

¹⁰Chaymanta chay apuka Pablota makinwa rikuchirka rimananpa. Chaypina Pabloka rimarka:

Apu Felix, kay allpanchipi kanka ña achka watakunata apu kashpayki mana manchashpachu puntaykipi rurashkaynikunamanta rimanayani. ¹¹Runakunata alita tapushpayki yachanki chunka ishkay punchami kahun Jerusalenpi Yaya Diosta mañanaynipa paktashkaynika. ¹²Manami nima pipas ñukata tariwashkachu nima shuk runawa piñanaku hushkaynita. Nima Yaya Diospa wasinpi, nima ñukanchi israel runakunapa tantarinanchi wasikunapi, nima kanchapipas nima piwa piñanakushpachu kwintarkani. Chasna rurashkaynita nima pi rikuwarkachu. ¹³Kay runakunaka nima shuk millaypata rurashkaynita rikushpankuna yanka chasna rimahunkuna. ¹⁴Shuk parti ñukamanta kwintashkankuna shimika shutipami kan. Nasaremtanta Jesukristupa yachachishkanta kirik kani. Chayta kirinanchipa mana alichu ninahun. Chasna rimashpankunapas chay Jesukristupa yachachishkanta kirishpayni yaya rukunchi wañukunapa kirishkankuna Yaya Diossalatammi kushichishpa kawsani. Tukuy Moisespa killkashkanta, ñawpa

Yaya Diospa yachayninwa shuk yachachikunapa killkashkantapas kirishpa kawsani.

¹⁵Kay puntaykipi ñukamanta rimak runakunashinallatata ñukapas kirini, alita rurak, mana alita rurak runakunaka wañushkankunawasha kuti kawsarinankunata. ¹⁶Chayrayku tukuy atipashkaynita rurani Yaya Diospa rikushkanpi, runa masinikunapa rikushkankunapipas ali yuyaywa, mana uchata rurashpa kawsanaynipa.

¹⁷Kunan achka watata karu llaktakunama purishkayniwasha Jerusalenma kutimurkani. Shuk llaktakunapi kawsakunapa kuwashkankuna kullkinkunata Jerusalenpi mana imayu kawsak runakunata kunaynipa shamurkani.

Chaymanta shuk wiwakunata wañuchishpa Yaya Diosrayku rupachichinayashkani. ¹⁸⁻¹⁹Chayta ruranaynipa kamachirishka kashkata rurashpa alicharirkani Yaya Diospa rikushkanpi alicharishka kanaynipa. Chaymanta Yaya Diospa wasinpi yaykurkani.

Chaypi kahushpayni nima maykan runakunata tantachishpa piñachishkanchu. Chaypi Asiamanta israel masinikuna tinkuwarkakuna. Chay tinkuwak runakunaka ñukamanta mana alita rimanayashpankuna paykuna kikin puntaykipi rimak shamanunkuna tiyan. ²⁰Mana kaypi kahushpankunaka kunan kaypi kahukkunaka rimawanahu-chun ima millaypatachari rurahushkaynita tariwashkakuna, tantaylla yuyarishpa kwintak atun apunchikunapa puntanpi kahushpayni. ²¹Chay apukunapa tantarishkankunapi kahushpayni sinchita rimarkani: Wañushkunkuna kawsarinankunata kirishkayniraykumi uchachiy tukuhuni nishpa. Chayllata rimarkani. Chasna rimashkaynimantalla atipawanahanu uchachinata.

²²Chasna Pablo rimashpan apu Felixka mana ashwanta uyanayarkachu.

Jesukristupa yachachishkanta alita riksirka. Chayrayku chay uchachik israel runakunata nirka:

Komandante Lisias shamushpan alita alichashunchi nishpa.

²³Chasna nishpan chay apu Felixka shuk kapitanta kamachirka:

Pablota kuti karselpi churashpayki ama watankinachu. Chaymantapas amigunkuna shamushpankunaka Pablota maykan munashkanta kunahuchun ama arkankichu nishpa.

**Felix warminti Pablo
rimashkanta uyarkakuna**

²⁴Shuk punchakuna pasashkanwasha *Felixka warmin Drusilawa rirkapasyanankunapa. Chay Drusilaka israel warmimi karka. Chay wasipi paktashpankuna Pablota kayachirkakuna Jesukristuta kirinamanta rimahukta uyanankunapa. Shamushpan yachachihuskanta uyarkakuna. ²⁵Pablota yachachirka mana paykuna kikin munashkanta rurashpa kawsanankunapa, ashwan Yaya Diospa munashkantashina alita rurashpa kawsanankunapa. Chaymantapas yachachirka wañushkan-chiwscha Yaya Dios rurashkanchikunamanta tapushpan tukuy mana alita rurak runakunata kastigananta.

Chasna uyashpan Felixka mancharishpa rimarka:

Chaylla kachun. Shuk puncha atipashpayni kuti kayachishkayki ashwanta yachachiwanaykipa nishpa.

²⁶Chayta rimarka, kullkita pagawashpan kacharisha nishpa yuyarishpan. Chasna kashpan achka kuti Pablota kayachirka paywa kwintananpa.

²⁷Chasna Pablota Sesareapi ishkay watata taparishka kawsarka. Chay Felixka ishkay watawasha apu kashkamanta llukshinan kashpan Pablota sakirka taparishkata israel runakunata

kushichinanpa. Payranti Porsio *Festo shutiyu yaykurka apu kananpa.

**Pablo apu Festopa puntanpi
rimarka**

25 ¹*Festoka *Roma llaktamanta Sesarea llaktapi paktashpan yaykurka mushu apu kananpa. Kimsa puncha apu tukushkanwasha Jerusalenma rirka. ²⁻³Chasna Jerusalenpi kahushpan *saserdotekunapa apunkuna shuk israel masinkuna kamachikkunanti Pablomanta yanka llullashpa uchachinankunapa payma rirkakuna. Chaypi paykunaka apu Festota tapurkakuna Pablota Sesareamanta chay Jerusalenma kachananpa. Yuyarirkakuna chawpi ñampipi pakashpa chapashpanchi Pablota wañuchishunchi nishpa. ⁴Chasna tapushpankuna Festoka aynirka:

Pablota Sesareapi taparishka kiparinka. Ñukapas ñallami chayma kutisha. ⁵Chay runa shutipa millaypata rurashka kashpanka akllashkaykichi apu masikichita kachaychi ñukawa pakta Sesareama rinankunapa. Chaypi pay mana alita rurashkanta rimanahuchun.

⁶Payka Jerusalenpi pusak puncha ashwanta unayarka. Chaymanta Sesarea llaktama kutirka. Kayantima Sesareapi paktashpan Pablota uchachik apukunawa tantarirka. Kamachinan tiyarinanpi tiyarishpan Pablota apak rinankunapa kacharka. ⁷Pablo chayra yaykuhushpan Jerusalenmanta shamushka israel masinkunaka payta muyukta kayllayamurkakuna. Chasna muyukta shayarishpankuna llullashpa sinchita uchachirkakuna. Chasna kashpanpas mana atiparkakunachu rikuchinata rimashkankunaka shutipa kashkanta.

⁸Chasna rimashpankuna Pablota rimarka:

Mana shutipachu. Ñukaka mana millaypata rurashkanichu. Nima imapi mana kasushkanichu ñukanchi israel

runakunapa killkanchikunapi kamachishkakunata. *Yaya Diospa wasinpi mana millaypata rurashkanichu Yaya Diosta piñachishpa. Chaymantapas *romano tukuymanta atun apumanta mana piñarishpa millaypata rimashkanichu.

⁹Festoka israel runakuna alita rikuwanahuchun nishpa yuyarishpan Pablota tapurka:

¿Jerusalenma rinayankichu chaypi kanwa alichanaynipa imatami rimahunkuna kanmanta?

¹⁰Festo chasna tapushpan Pabloka aynirka:

Mana. Kan alita yachanki, israel masinikunata nima ima millaypata rurashkanichu. Kunanka kan romano tukuymanta atun apupa churashkanpa puntaykipi shayahuni, maypimi alichanchi tiyan, mana Jerusalenpichu. ¹¹Ñuka millaypata rurashkaynita tarishpaykichika wañuchiwaychi, wañunata mana manchanichu. Paykunapa rimashkankuna mana shutipa kashpanka nima pi atipawanchu makinkunapi sakinata. Chayrayku romano tukuymanta atun apu ñukawa alichachun.

¹²Chasna nishpan apu Festoka paywa pakta yuyarik runankunawa kwintashkankunawasha aynirka:

Romano tukuymanta atun apuma rinata munashpaykiha payma kanta kachasha kanwa alichanapta nishpa.

Festoka atun apu Agripata Pablomanta kwintarka

¹³Mana achka puncha pasashkanwasha apu *Agripaka panin Bernisewa Sesareama shamurkakuna apu *Festota pasyanankunapa. ¹⁴Apu Agripa achka punchakunata chaypi kahushpan Festoka payta Pablomanta kwintarka:

Kaypi kahun shuk apirishka runa Pablo shutiyu. *Felixka mana alichanata atipashpan apu kananmanta llukshihush-

pan payta makinipi sakirka. ¹⁵Jerusalenma rishpayni israel runakunapa *saserdotenku-napa apunkuna, paykunata kamachik israel masin rukukunanti mana alita rurashkanta ñukama rimak shamurkakuna. Chay Pablota wañuchi nishpankuna rimawarkakuna. ¹⁶Chasna nishpa shamushpankuna ñukaka rimarkani: Ñukanchi *romano apukuna mana nima pita kastigachinchichu, manara alita yachashpanchi shutipa mana alita rurashkanta. Uchachihushka runawa payta uchachihukkunawa ñawipura apupa puntanpi shamushpa alichanchi nishpa israel runakunata rimashkani. ¹⁷Chasna rimashpayni chay uchachihukkunaka ñukawa pakta Jerusalenmanta kayma shamushpanchi kayantimalla alichanaynipa tiyarinapi tiyarishpayni Pablota kayachirkani ñawinpi rimanankunapa. ¹⁸Ñuka yuyarishkani atun millaypatachari rurashka nishpa. Mana chasnachu kashka. Chay uchachikkunaka nima imata kastigaypatachu rimarkakuna. ¹⁹Ashwan mana karkakunachu shuk yuyayllawa paykunapa shuk kirinankunamanta. Chaymantapas Jesúshutiyu runamanta kwintarkakuna. Israel runakuna ninahun Jesuska wañushkami. Pabloka nin Jesuska kawsahumi. Chayraykullami Pablota uchachishkakuna. ²⁰Chasna mana yachashpayni imatami rurasha nishpa Pablota tapurkani: ¿Jerusalenma rinayankichu paykuna kanwa alichanankunapa? nishpa. ²¹Chasna tapushpayni niwarka: Romano tukuymanta atun apu Augusto alichachun nishpa. Chasna nishpan ñukaka romano tukuymanta atun apu Augustoma kachanaynikama taparishkallata sakirkani.

²²Chasna kwintashkanta uyashpan Agripaka Festota nirka:

Ñukapas chay runapa rimashkanta uyanayani nishpa.

Festoka aynirka:

Kayami payta uyanki nishpa.

**Pabloka atun apu Agripapa
puntanpi kwintarka**

²³Kayantima *Agripaka panin Bernisewa suma churarishkakuna apu *Festopa kamachinan wasima rirkakuna, suntalupa apunkunanti, chay llaktapa apunkunawa pakta. Chaypi apu Festoka runankunata kacharka Pablota apak rinankunapa. ²⁴Pablota puntapi churashpangkuna Festoka rimarka:

Atun apu Agripa, tukuy ñukanchiwa pakta kahukkunapas, rikuychi kay runata. Jerusalenpi kawsak israel masinkuna, kay llaktapi kawsak israel masinkunapas yapakta piñarishpangkuna wañuchiychi kay runata nishpa kaparirkakuna. ²⁵Ñukaka mana tarishkanichu nima imata mana alita rurashkanta payta wañuchichinaynipa. Chasna kashpanpas pay munan *romano tukuymanta atun apunchi Augustoma alichak rinata. Chayraykumi payta chayma kachasha nirkaní. ²⁶Kunanka mana yachanichu imatami kay runamanta killkasha *Roma llaktapi kawsak tukuymanta atun apunchirayku. Chayrayku apu Agripa, puntaykipi kay runata apamushkani. Kan alita tapushpayki ima millaypatata rurashka nishpa yachasha imatami killkanayni tiyan. ²⁷Mana alichu kan shuk apirishka runata kachanaynipa, mana rimashpa imamantami payta uchachinahun nishpa.

**Pabloka pay kikinmanta apu
Agripata rimarka**

26 ¹Chaypina apu *Agripaka rimarka Pablota: Kunanka kan kikin rimay rurashkaykimanta nishpa.

Chaypina Pabloka makinta alsashpan rimarka:

²Atun apu Agripa, yapa kushillami kani puntaykipi rimashpa alichanaynipa israel masinkuna ñukata uchachiwash-

kankunamanta. ³Kan alita yachanki imashnami ñukanchi israel runakuna ñawpamanta pacha kawsapayanchi, chaymantapas maykanmantami mana shuk yuyayllawachu kanchi. Chayrayku kunan rimahushkaynita ali yuyawa uyaway.

⁴Ñuka wawamanta pacha Tarso llaktapi, chasnallatata Jerusalenpipas musumanta pacha kawsashkaynita tukuy runa masinkuna alita yachanahun. ⁵Paykuna munashpangkunaka tukuya kwintanahuma ñuka *fariseo kashkaynita, tukuy ñukanchi israel runakunamanta Moisespa killkashkan kamachishkakunata ashwan alita paktachikkunamanta. ⁶Yaya Dios ñawpa yaya rukunchi wañukunata rimashkanta kirishkaynirayku kunan ñukaka tapuy tukuhuni. Yaya Dioska rimarka tukuy wañushkakuna kuti kawsarinankunata. ⁷Tukuy ñukanchi chunka ishkay ayllukunamanta mirashka israel runakuna chasnallatata chapahunchi rikunata, Yaya Diospa rimashkantashina wañushkakuna kuti kawsarinankunata. Chayrayku Yaya Diosta kushichinchu punchanti tutanti. Apu Agripa, ñukapas chayta kirishpa kawsahushpayni kunanka chaymanta israel masinkunaka uchachiwanahun. ⁸Imaraykuta mana kirinkichichu Yaya Dios wañushkakunata kuti kawsachinanta?

**Pablo Jesukristuta kirik
tukushkanmanta kwintarka**

⁹Ñawpa ñukapas yuyaripayarkani ali kananta Nasaretmanta Jesusta kirikkunata parisichinaynipa. ¹⁰Chayrayku Jerusalenpi Jesusta kirikkunata parisichirkani. Chaymanta *saserdoten-chikunapa apunkuna arí nishpa killkashkakunata rikuchishpayni achka Jesukristuta kirikkunata karselpi churachirkani. Chaymantapas kirikku-

nata wañuchihushpankuna alimi nirkani.¹¹ Tukuy ñukanchi israel runakunapa tantarinanchi wasikunapi yaykushpayni achka kuti chay kirikkunata asutichirkani Jesukristuta mana kirishanachu nishpa rimanankunapa. Paykunata yapa sinchita piñarishpayni karu llaktakunamapas rirkani asutichishpa parisichinaynipa.

¹²Shuk puncha Jesukristuta kirikkunata kastigachisha nishpayni rihurkani Damasko llaktama. Rirkani saserdotenchikunapa apunkunapa killkashkankunawa, ali kan Jesukristuta kirikkunata apishpan kastigachinanpa nishpa.

¹³Atun apu *Agripa, rihushkaynipi chawpi ñampipi chawpi puncha intimanta pasa punchahlla ilampashina silumanta ñukanchipi muyukta rikurirka.¹⁴ Chasna rikurishpan tukuy mancharishpa allpama urmarkanchi. Chaypi shuk shimita, kikin *hebreo shiminipi rimahukta uyarkani: Saulo, Saulo, ¿imaraykuta parisichiwhunki? Jesukristuta kirikkunata parisichisha nishpaykika kan kikinmi parisinki. Imashnami tarawak wakraka piñarishpan puntayachishka kaspita patyashpan pay kikinta nanachin, chasnallatatami kanpas parisichiy tukunki nishpa rimawarka.

¹⁵Chasna nishkanta uyashpayni tapurkani: ¿Pitaya kanki, Señor? nishpa. Chaypina ayniwarka: Ñukami kani Jesús, maykantami parisichihunki nishpa.¹⁶ Kunanka atariy. Kanta rikurishkani ñukapa kamachinayni kanaykipa. Kunan ñukata rikuwashkaykimanta kwintashpa purikmi tukunki.¹⁷⁻¹⁸ Kanta tukuy partima kachashkayki ñukamanta yachachinaykipa. Chasna rurashpayni kanta israel masikikunapa makinkunamanta, mana israel runakunapa makinkunamantapas kishpichisha mana wañuchinankunapa. Runakunata

ñukamanta yachachinayki tiyan paykuna amsapishina kawsashkankunamanta llukshinankunapa, Yaya Diospa kamachishkankuna tukunankunapan. Paykunata yachachinayki tiyan paykunapas ñukata kirinankunapa. Chasna kirishpankuna uchata rurashkankunamanta llakichiy tukunkakuna, chaymantapas tukuy Yaya Diospa aliyachishkan runankunawa pakta wiñayparayku paywa pakta kawsankakuna nishpa.

¹⁹ Chayrayku atun apu Agripa, chasna uyashpayni Yaya Jesús chay silumanta rimawashkanta mana killashpachu kasurkani.²⁰ Puntiru Damasko llaktapi, chaymanta Jerusalenpi, tukuy Judea allpapipas, israel masinikunata, mana israel runakunatapas kwintashpa yachachirkani: Uchata ruranata sakishpaykichi Yaya Diosta kasushpa, alitana rurashpa kawsaychi. Chasna rurashpaykichimi mushu yuyayyu tukushkaykichita rikuchinkichi nishpa yachachirkani.²¹ Chasna yachachihushkaynirayku israel masinikunaka ñukata *Yaya Diospa wasinpi tariwashpankuna apiwarkakuna wañuchishunchi nishpa.

²² Chasna kashpantata Yaya Dios yanapawashkanrayku kunankama katihuni tukuy runakunata kwintashpa. Apukunata, mana apukunatapas yachachihuni Moisespa killkashkanta, chaymanta Yaya Diospa yachayninwa shuk yachachikkunapa killkashkankunata, imatami Yaya Dios ruranka nishpa.²³ Paykuna ñawpa killkarkakuna Yaya Diospa Kachanan Kishpichik parisishpa wañunanta, chaymanta wañushkanwasha tukuy wañushkakunamanta pay puntiru kawsarinanta. Chaymanta payka ñukanchi israel runakunata, mana israel runakunatapas yachachinan tiyan imashnami amsapishina kawsashkanchimanta kishpichiy

tukushunchi nishpa. Chayllatatami ñukapas yachachini.

**Pablo munarka Agripaka Jesukristuta
kirik tukunanza**

²⁴Pablo chasna rimashpan apu *Festoka sinchita rimarka:
Pablo, musparihunkimi. Yapa killkata yachakushpayki chasna muspa tukuhunki.

²⁵Chaypi Pabloka ali yuyawa aynirka:

Atun kamachik Festo, mana muspachu kani. Alita yuyarishpaynimi rimashkani shutipa kashkata. ²⁶Atun apu *Agripaka tukuy chaykunata alita yachan, chayraykumi paypa puntanpi mana manchashpachu rimahuni. Tukuy Jesukristumanta yachashkaynita payka ña uyarka. Mana pakallachu Jesusta wañuchirkakuna. ²⁷Apu Agripa, ¿Yaya Diospa yachayninwa ñawpa yachachikkunapa killkashkankunata kirinkichu? Yachani paykunata kirinaykita nishpa rimarka Pabloka.

²⁸Chasna Pablo tapushpan atun apu Agripaka aynirka:

Astalla pishin yachachiwashppayki ñukapas Jesukristuta kirik tukunaynipa.

²⁹Agripa chasna nishpan Pabloka aynirka:

Achkata mana achkata yachachish-painipas mana imananchu. Yaya Diosta mañani, kan, tukuy kaypi uyawahukkunapas Jesukristuta kirik tukunaykichipa ñukashina. Chasna kashpanpas mana munanichu kankuna ñukashina kadenawa watarishka kanaykichipa.

³⁰Pablo chasna rimashkanwasha atun apu Agripaka panin Bernisewa pakta, apu Festopas, tukuy chaypi tiyahukkunapas atarishpankuna llukshirkakuna. ³¹Kanchapi paykunapura kwintarkakuna:

Kay runaka nima imata rurashkachu wañuchichinanchipa, nima watarishka kananpa.

³²Chasna nishpankuna Agripaka Festota rimarka:

Kay runata kacharinchima karka, mana *romano tukuymanta atun apuma rinata tapumachu karka nishpa.

**Pablota Roma llaktama
kacharkakuna**

27 ¹Na apu *Festo Pablota lanchapi Italia allpapi kahuk *Roma llaktama kachanata munashpan chay shuk apirishkakunanti kapitan Juliota kurka. Chay kapitanka *romano tukuymanta atun apupa shuk muntun suntalukunata kamachikmi karka. Ñuka Lukaspas paykunawa pakta rirkani Pablota yanapananaynipa.

²Chaypi Tesalónika llaktamanta Aristarko ñukanchiwa parihu rirkka. Tesalónika llaktaka Masedonia allpapimi kan. Chasna ñukanchi Adramitio llaktamanta lanchapi uraykurkanchi. Chay lanchaka Asia allpapi llutarina karka. Chasna uraykushpanchi Sesarea llaktamanta llukshirkanchi.

³Kayantima Sidón llaktapi paktarkan-chi. Chaypi kapitan Julioka Pablota llakichishpan sakirka amigunkunama pasyak rinanpa, munashkanta kunankuna.

⁴Chay Sidón llaktamanta llukshishpanchi sinchi wayra ñukanchita arkarka. Chayrayku Chipre isla washata rirkanchi. ⁵Chipremanta chimpashpa Silisia allpa mayanta, Panfilia allpa mayantapas pasarkanchi. Chasna pasashpanchi Lisia allpapi kahuk Mira llaktapi paktarkanchi.

⁶Chaypi kapitan Julioka tarirka shuk lanchata Alejandria llaktamanta Italia allpama rihukta. Chay lanchapi ñukanchita uraykuchirka rinanchipa.

⁷Chaypina achka punchakunata alimanta rirkanchi. Chasna paktarkan-

chi Kinido llakta chimpapurapi. Chaypi-pas wayra mana pitikta pasaypata rurashpan Krete isla washata rirkanchi. Chasna rishpanchi chay isla punta Salmón shutiyu mayanta pasarkanchi.

⁸Achkata parisishpa isla mayanta alimanta rirkanchi. Chasna rihushpan-chi Lasea llakta mayanllata, Buenos Puertos llakta lancha llutarinapi paktarkanchi.

⁹Unayta lanchapi shamu hushkanchi-rayku lancha rina uras ña pasarka. Chay killakuna atun yaku marpi purinapa mana alichu karka. Sinchi wayra, atun ulas, sinchi tamyapas tiyashpan yapa manchaypa karka. Chasna kashpan Pabloka kunarka:

¹⁰Lanchata purichik runakuna, rihush-palla katishpanchika rikuni manchay-pata pasananchita. Lanchaka kargawa pakta chinkarinanta rikuni. Chaymanta ñukanchipas atipanchima chinkarinata.

¹¹Pablo chasna rimashpanpas chay kapitanca ashwanta kasurka lancha amupa rimashkanta, chaymanta lanchapa kapitanpa rimashkanta.

¹²Buenos Puerto spi mana alichu karka tamya punchakunata pasananchipa, sinchi wayra kashkanrayku. Chasna kashpan ña tukuy yuyarirkakuna ali kama chay pertumanta llukshinanchipa, Fenise llaktama rinanchipa, tamya punchakuna pasanankama. Chay Feniseka Krete isla puntapi kashpan lanchakunapa ali llutarina llaktami karka, mana sinchi wayra tiyashkan-rayku.

**Atun yaku marpi sinchi wayra
sinchi ulaspas tiyarka**

¹³Chasna kashpan shuk puncha ali wayra atun yaku mar kinkraymanta wayrashpan chay runakuna ali punchami tukunka Feniseka rinanchipa nishpa yuyarirkakuna. Chasna yuyarishpankuna lancha watashka-

shina shayarina fierrota yaku ukumanta surkushpankuna Krete isla mayanllata rirkanchi. ¹⁴Astalla unaypi chasna rihushkanchipi kunkaymanta yapa sinchita wayrashpan wayraka kallarirka lanchata kuchan partima apanata. ¹⁵Chasna sinchita wayrashpan mana atiparkakunachu lanchata alita kuskanchanata. Wayraka maytapan apachun nishpa sakishpankuna wampurishpa rirkanchi. ¹⁶Chasna rishpanchi shuk uchilla isla Kauda shutiyu washata pasarkanchi. Chaypi mana yapa sinchita wayrashpan sinchita tarawashpa lanchapi watarishpa rihuk botita lancha awama atiparkanchi aysanata mana waklinarpa. ¹⁷Chay botita aysashkanchi-washa tukuy lancha muyukta waskawa watarkakuna mana pakirinanpa nishpa. Chay kuchupi tiyarka shuk awalla Sirte shutiyu. Lanchaka chaypi takarishpan pakirinata yapa manchashpanchi lanchata wayrawa purichina llachapata watarishka kahukta kaspinmanta surkurakuna. Yanka chasnalla llachapa illa wayra apashkallawa rirkanchi. ¹⁸Kayantima chasnalla sinchi wayra ulaspas kahushpan lancha apahuk imakunata atun yaku marpi wichurkakuna lanchankunata pankallayachinankunapa.

¹⁹Ashwan kayantima lancharayku munahushkankunatas apishpankuna atun yaku marpi wichurkakuna. ²⁰Achka punchakunata sinchita wayrashpan intika istrillakunapas mana rikurirkakunachu. Yapa sinchi wayra, tamya, ulaspas chasnalla katihushpan wañunanchi punchami paktarihuñ nishpa yuyarirkanchi.

²¹Ña unay nima pi mikunayashpan Pabloka paykunapa chawpinkunapi shayarishpan rimarka:

Amigukuna, rimashkaynita kasunki-chima karka, Krete islamanta mana llukshinchimachu karka. Chasna rimashkayni shimita kasunkichima karka, mana kasnachu parisihunchima,

nima lancha apahuk imakunata wichunaka tiyamachu karka.²² Chasna kashpanpas kunanka ama manchariy-chichu, ashwan sinchikuychi. Nima shuk kankunamanta wañunkichichu. Lanchallami chinkarinka.²³ Ñukaka Yaya Diospa runan kashpayni payta kasushpa kawsashpayni kunan tuta Yaya Diospa shuk *angelka ñukata rikurik shamushka.²⁴ Chay angelka rimawashka: Pablo, ama manchariychu. Kanka *romano tukuymanta atun apupa puntanpi paktanayki tiyan. Kanta kushichishpa Yaya Dios tukuy kay lanchapi kahukkunata kishpichinkta, nima shuk runa kay atun yaku marpi chinkarinkachu.²⁵ Chayrayku amigukuna, karishina sinchikuychi. Yaya Diospa rimashkanka paktarinkami, imashnami paypa angelka rimawashka.²⁶ Chasna kashpanpas Yaya Dios ñukanchita kishpichishpan wayraka shuk islapi tankashpan wichunka.

²⁷Ishkay semanata rihushpanchi wayra tankashpan yanka wampurishpa Adria shutiyu atun yaku marpi paktarkanchi. Ña chawpi tuta lanchata purichikkunaka allpa mayanpi paktahushkanchita musyarkakuna.²⁸ Kuchachu nishpa tupushpankuna kimsa chunka sokta metro tupu kucha karka. Chaymanta chaynikpi kuti tupushpankuna ishkay chunka kanchis metro tupulla kucha karka.²⁹ Chayta rikushpankuna lanchanchimi samantapi takarishpan pakirinka nishpa mancharirkakuna. Chayrayku lancha watashkashina chusku shayarina fierrokunata lancha sikimanta yakuma kacharikunka lanchaka shayarinanpa. Mancharishka chaparkakuna pakarinanta.³⁰ Chasna chapahushkankunapi lanchata purichihukkunaka mitikushpa rishpanchi kishpishunchichari nishpa yuyarirkakuna. Ñukanchikunata llullachishpa

lancha shayarina fierrota punta partipas kacharishhunchi nishpankuna botita lancha puntamanta pakalla paskarkakuna, yakupi uraykuchinayarkakuna rinankunapa.³¹ Chasna rurahushpankuna Pabloka rikushpan suntalukunapa kapitanta, suntalukunatapas rimaika:

Chay runakuna mana lanchapi kiparishpankunaka kankunaka mana kishpinkichichu, yakupimi chinkarishpa wañunkichi.

³² Chasna nishpan chay suntalukunaka chay botipa watarishkan waskakunata pitishpankuna botita yakuma kacharirkakuna.

³³ Ña pakarihushkapi Pabloka chaypi kahukkunata mikunankunapa kunarka:

Mancharishka kahushkaykichirayku ña ishkay semanata mana mikushkankichichu.³⁴ Kunanka alita mikunaykichi tiyan, sinchikushpaykichi kishpinaykipicha. Ama manchariychinachu. Nima pi atun yaku marpi chinkarinkachu, nima ima pasankichichu.

³⁵ Chasna rimashkanwasha Pabloka panta apishpan tukuy runakunapa riku hushkankunapi Yaya Diosta agradesirka. Chaymanta panta pakishpan kallarirka mikunata.

³⁶ Chasna Pablo mikuhushpan tukuy paykunapas sinchikushpankuna mikurkakuna.³⁷ Chay lanchapi tukuy ñukanchiwa pakta karkanchi ishkay pachak kanchis chunka sokta runakuna.

³⁸ Chasna saksakta mikushkanchiwasha lanchaka ashwanta pankallayanana mikuna trigu muyukunata atun yaku marpiwichurkakuna.

Tukuy lanchapi rihukkuna wañuymanta kishpirkakuna

³⁹ Ña pakarihushpan chay lanchata purichik runakuna karumanta allpata rikushpankuna mana riksirkakunachu chay allpata. Chaypi shuk tiyu

rikutuyuta rikurkakuna. Chasna rikushpankuna yuyarirkakuna, atipashpanchika lanchata chayma llutachishun-chi nishpa.⁴⁰ Lanchata chayma llutachinayashpankuna lancha watashakashina shayarinan fierrokunapa waskankunata pitirkakuna chay rikutuma paktananchipa. Chaymanta lancha puntapi wayra tankana llachapata sikachishpa timplachirkakuna, chaymantapas timonkunata watana waskakunatapas paskarkakuna wayrawa tiyuma rinanchipa.⁴¹ Chasna rishpanchi lancha puntaka shuk awallapi sikakta rirka, mana kuyuchiypata. Siki partika kuchapi kiparirka. Ulas sinchita waktarishpan lancha siki parti tukuy pakirinata kallarirka.⁴² Chasna lancha pakirishpan suntalukunaka tukuy apirishka kahukkunata wañuchinayarakuna mana waytashpa mitikunankunapa.⁴³ Chasna wañuchinayashpankuna chay kapitanka Pablota kishpichinayashpan suntalunkunata arkarka nima pita wañuchinankunapa. Chasna arkashpan kamachirka waytanata atipakkunata puntiru yakuma saltanankunapa, waytashpa allpama paktak rinankunapa.⁴⁴ Chaymantapas kamachirka mana waytanata atipakkunata lancha pakirishka tablakunata, wampurik imakunatapas apishpankuna wampurishpa allpama rinankunapa. Chasna rurashpa rishpanchimi tukuy kawsa paktarkanchi.

**Imashnami Pablota
Malta islapi pasarka**

28 ¹Ña ñukanchi chay allpapi alita paktashkanchiwasha Malta shutiyu isla kashkanta yacharkanchi.
² Chay islapi kawsak runakunaka ñukanchita llakichishpankuna alita yanaparkakuna. Tamya kashpan chaymanta yapa chiru kashpan ninata

apichishpankuna tukuy ñukanchita kayarkakuna kununanchipa.³ Chaypi Pablitas yantakunata maskashpan ninapi churahurka. Chasna churahush-kanpi shuk machakuya rupata musyashpan llukshirka. Pablota makinpi kanishpan warkirka.⁴ Chaypi chay islapi kawsak runakunaka Pablota makinpi machakuya kanishpa warkuri-hushkata rikushpankuna paykunapura rimarkakuna:

Kay runaka runata wañuchikchari. Pay chasna atun yaku marpi wañunamanta kishpishpanpas kunanka rantipak diosninchi kastigahun.

⁵ Pablota machakuyata ninama chawsirka. Paytaka nima imata rurarchu.⁶ Chay rikuhuk runakunaka rikushpalla unayta chaparkakuna, makin punkishpan kunkaymanta wañushka urmanka nishpa yuyarirkakuna. Chasna yuyarishpankunapas Pablota nima imanachirkachu. Chasna kashpan chikanta yuyarishpankuna rimarkakuna:

Kay runaka shuk diosmi nishpa.

⁷ Chay paktashkanchimanta mana karupichu chay islapi kawsak apupa allpanka karka. Chay apu Publio shutiyuka ñukanchita llakichishpan wasinma pushashpan kimsa punchata yanaparka.⁸ Chasnapi yacharkanchi Publiopa yayan yawar kichawa, kalinturawapas wañuhurka. Chasna kahuskanta yachashpan Pablota chayma rirka. Sirihushkan kwartupi yakyushpan Yaya Diosta mañarka payta ampinanpa. Makinta unkushkapa awanpi churashpan ampirirkacha.⁹ Pablo chasna ampirishkanta rikushpankuna chay islapi kawsak unkushkakunapas shamurkakuna ampirinankunapa. Chasna shamushpankuna tukuy ampirirkakuna.¹⁰ Chay ampirishka runakunapas ñukanchita llakichishpankuna achkata kurkakuna.

Ña alicharishka kahushkanchipi shuk lanchapi uraykunanchipa Italia allpama rinanchipa, chay islapi kawsak runanaka tukuy purihushkanchipi munash-kanchita kurkakuna.

Pablo Roma llaktapi paktarka

¹¹Kimsa killata chay islapi kiparish-kanchiwasha Alejandria llaktamanta lanchapi uraykurkanchi *Roma llaktama rinanchipa. Chay lanchaka chay islapi tamya killakuna pasananta chapashpa karka. Chay lancha puntapika egipto runakunapa ishkay diosninkuna, Kastor, Polux shutiyunkuna almankuna kaspimanta rurarishka karkakuna. ¹²Chay Malta islamanta llukshishpanchi Sirakusa shutiyu llaktapi paktarkanchi. Chay Sirakusa llaktaka Sisilia shutiyu islapimi. Chaypi kimsa punchata kiparirkanchi. ¹³Chaymanta isla Sisilia allpa mayanta lanchapi wampurinlla rishpanchi Regio llaktama paktarkanchi. Chay Regio llaktaka Italia allpapimi. Kayantima ali wayraka uraymanta ñukanchita tankashpan Puteoli llaktapi paktarkanchi. ¹⁴Chay llaktapi tarirkanchi Jesukristuta kirik wawzikunata. Paykunaka ñukanchita kayarkakuna shuk semanata paykunawa kiparinanchipa. Chasna shuk semanata kiparish-kanchiwasha Roma llaktama rirkanchi.

¹⁵Chasna rihushpanchi chay Roma llaktapi Jesukristuta kirik wawzikuna shamuhushkanchita yacharkakuna. Chayrayku Roma llaktamanta llukshishpankuna Tres Tabernas shutiyu llaktakama, Foro de Apio shutiyu llaktakamapas ñukanchita tinkunankunapa shamurkakuna. Pabloka paykunata rikushpan Yaya Diosta agradesishpa yapa kushikurka. ¹⁶Chasna Roma atun llaktapi paktashpanchi kapitanka Pablotra sakirka sapallan shuk wasipi

kawsananpa shuk suntalulla payta kuyrachun nishpa.

**Pablo Roma llaktapi
Jesukristumanta yachachirka**

¹⁷Kimsa puncha paktashkanchiwasha Pabloka *Romapi kawsak israel masinkunapa apunkunata kayachirka. Shamushpankuna tantarishkankunapi Pabloka rimarka kasna nishpa:

Wawkinikuna, uyawaychi. Nima imata rurarkanichu Israel allpapi kawsak israel masinchikuna piñariwanankunapa. Yaya rukunchi wañukunapa yachachishkankunata mana pantachichirkanichu. Chasna kashpantata Jerusalenpi kawsak israel masinchikunaka apiwashpankuna runa wañuchikatashina *romano runakunapa makinkunapi sakiwarkakuna. ¹⁸Chasna romano apukuna ñukata tapuwashpankuna nima tarirkakunachu mana ali rurashkaynita kastigashpa wañuchiwanankunapa. Chayrayku kacharinayawarakakuna. ¹⁹Chasna kashpanpas israel masinchikunaka ama kachariyichichu nishpankuna arkarkakuna. Chasna arashpankuna ñukaka rimarkani romano tukuymanta atun apullami alichanan tiyan ñukawa nishpa. Chasna nishpaynipas israel masinikunawa piñarishkaynika mana tiyawanchu. ²⁰Kankunata rikushpayni tukuy chayta rimanaynipa kayachirkani. Kaypi kadenawa watarishka kahuni Yaya Dios Kishpichikta kachashkanmanta runakunata yachachihushkaynirayku maykantami tukuy ñukanchi israel runakuna yapa chapashkanchi.

²¹Chasna Pablo rimashpan paykunaka rimarkakuna:

Ñukanchika kanmanta mana nima shuk killkata chay Jerusalenpi kawsak israel masinchikunamanta apirkanchichu. Nima pi chaymanta kayma

shamushpan millaypata rurashkaykita ñukanchita rimarkachu.²² Kunanka yuyarishkaykita ñukanchita rimay. Yachanchi tukuy parti chay mushu yachachishkaykita kirikkunata piñarishpa rimanahun, chay mushu kirishkankuna mana ali kananta.

²³ Chasna rimashpankuna churarkakuna shuk puncha kwintanankunapa. Chay puncha paktarishpan achka runakuna Pablopa kahushkan wasima shamurakuna. Chaypi tantarishpankuna Pabloka tutamanta pacha tutayanankama yachachirka Yaya Diospa ali kamachinan kay allpapi ña kallarishkanmanta.

Chaymantapas Moisés wañupa killkashkanta, ñawpa Yaya Diospa yachayninha shuk yachachikkunapa killkashkankunatas leyishpan yachachirka Jesús Yaya Diospa Kachashkan Kishpichik kananta. Payka yapa munarka kirinankunapa.

²⁴ Chasna nishpan shukkunaka paypa rimashkanta kirirkakuna, shukkunaka mana kirirkakunachu.²⁵ Chasnamanta mana shuk yuyayllawa kashkankunaryku rimanakushpankuna shukkuna llukshihushpankuna Pabloka ashwanta rimarka kasna nishpa:

Shutipami Yaya Diospa Espíritun chay ñawpa Yaya Diospa yachayninha yachachik Isaiasta rimarka, yaya rukunchikunata Yaya Diospa rimashkanta rimananpa kasna:

²⁶ Runa masikunama riy. Paykunata yachachiy kasna nishkaynita: Kankuna yachachishkaynita alita uyahushpaykichipas mana asirtankichichu. Ali rurashkay-

nita rikuhashpaykichipas mana asirtankichichu imaraykumi chasna rurashkani.

²⁷ Yuyaykichika taparishka kahun. Ñawikichika taparishkashina kashpankuna ali rurashkaynita mana rikunkichichu. Rinkrikichika taparishkashina kashpankuna rimashkaynita mana uyankichichu. Chasna tukushpaykichi manana atipankichichu uchaykichikunamanta yuyarishpaykichi llakirinata, ñuka llakichishpayni kankunata aliyachinaynipa nishpa.

²⁸ Kunan kayta yachaychi: Kunanmanta pacha yachachisha mana israel runakunata, Yaya Dios paykunatapas uchankunamanta llakichishpan kishpichinanta. Chasna yachachishpayni paykuna shutipa kasunkakuna.

²⁹ Pablo chasna rimashpan israel masinkunaka paykunapura yapa rimanakushpa wasinkunama kutirkakuna.

³⁰ Pabloka ishkay watata chay pagashkan wasipi Roma llaktapi kawsarka. Tukuy payta pasyanapa shamuk runakunata chay wasipi yaykuchipayan.

³¹ Mana manchashpachu katirkalla yachachishpa Yaya Diospa ali kamachinan kay allpapi ña kallarishkanmanta. Chaymantapas katirkalla yachachishpa Jesukristu Yaya Diospa Kachashkan Kishpichik kananta. Nima pi paypa yachachihushkanta arkarkachu.

Chayllata ñuka Lukaska killkashkani.

PABLOPA KILLKASHKAN KILLKA ROMA LLAKTAPI JESUKRISTUTA KIRIKKUNARAYKU

Pablo kirik masinkunata saludan

1 ¹Munashkayni wawkinikuna paninikuna, ñukami Jesukristupa kamachishkan runa kani. Yaya Dios ñukata akllawashka *apostol kanaynipa, paypa suma ali shiminta Jesukristu runakunata kishpichinanmanta yachachinaynipa.

²Nawpa Yaya Diospa yachayninwa yachachikkuna ña chay kishpichik shamunanmanta killkarkakuna. Chay killkashkankuna shimika Yaya Diospami kan. ³⁻⁴Chay killkashkankuna Yaya Dios paktachirka Wawanta kachashpan. Runa tukushpan atun apunchi David wañupa miraymanta wawayarirka. Chaymantapas ucha illa Yaya Diosshina kashkanrayku Amunchi Jesukristu wañushkanmanta kawsarishpan Yaya Dios tukuy ñukanchikunata atun yachayninwa riksichirka kikin Wawan kananta.

⁵Chay Jesukristuka ñukata akllawashpan apostol kanki nishpa kachawashka paypa shiminta yachachinaynipa tukuy kankuna mana israel runakunapa llaktaykichikunapipas achka runakuna paytana kasushpa kawsanankunapa. ⁶⁻⁷Kankunatapas *Roma llaktapi kawsakkunata Jesukristu kayashka, payta kirishpaykichi paypa runankuna kanaykichipa. Kankuna Yaya Diospa

yuyashkan runankunaryakumi kay kartata killkahuni. Yayanchi Dios, Amunchi Jesukristupas kankunata llakichishpan yanapanahuchun kushilla kawsanaykichipa.

Pablo yuyarin Roma llaktama rinata Jesukristuta kirikkunata sinchikuchinanpa

⁸Manara ashwanta rimashpaynira kankunata rimani: Jesukristu alichashpan Yaya Dioswa kwintananchipa Yayanchi Diosta agradesini karan shuk kankunaryaku. Tukuy allpakunapi runakuna alita kirishpa kawsahushkaykichimanta uyashkakuna. ⁹Yaya Dioska yachanmi tukuy uras kankunaryaku mañahushkaynita. Tukuy shunkuynimanta pacha payta kasuk kashpayni chay suma ali shimita Wawan Jesukristu runakunata kishpichinanmanta yachachini. ¹⁰Yaya Dios yachan tukuy uras payta tapuhushkaynita munashpanka kachawanapanpa kankunata rikuk rinaynipa. ¹¹Yapa munani kankunata ñawipura riksik rinata. Munani Yaya Diospa Espíritun yanapanashpan kankunata yanapanata, ashwan alita Jesukristupi sinchikushpa kawsanaykichipa. ¹²Mana chayllachu, ashwan kankunawa kahushpayni kankunapas ñukata sinchikuchiwanki-

chima. Jesukristuta kiriushkanchimanta kwintashpanchi ashwan yuyayta kunakushunchi.¹³ Wawkikuna panikuna, kayta yachaychi, achka kuti munashkani kankunama rinata. Chasna rinata munashpaynipas kunan kama manara atipashkanirachu. Chasna kashpanpas yapa munani kankunata yachachinata, imashnami shuk llaktakunapi runakunata yachachishkani.¹⁴ Yaya Dios kachawashka tukuy runakunata paypa shiminta yachachinaynipa. Yuyayyu runakunata, mana yapa yuyayyu runakunatapas, killkata yachak runakunata, mana killkata yachak runakunatapas yachachinayni tiyan.¹⁵ Chasna kashpan yapa munani kankuna *Roma llaktapi kawsahukkunatapas Yaya Diospa suma ali shiminta Jesukristu runakunata kishpichinanmanta yachachinata.

Yaya Dios yachayninwa tukuyta atipan ruranata

¹⁶ Mana pinkanichu Yaya Diospa suma ali shiminta Jesukristu runakunata kishpichinanmanta yachachinata. Kay shimika Yaya Diospa yachayninwa kashpan maykanpas ūukanchi israel runakuna, kankuna mana israel runakunapas kay shimita shutipa kashkanta kirishpa kasunahun, chaykunami kishpishka kankakuna.¹⁷ Kay shiminmantami yachanchi imashnami Yaya Dios runakunaryku paywa alichashpan paypa rikushkanpi ali kashunchi. Payta kirishpa ūukanchirayku rurashkanpi sinchikurishpanchilla paypa rikushkanpi ali kashunchi. Chasnami Yaya Dios ūawpa ūa killkachirka kasna:

Maykanmi ūukapi kirishpa sinchikurin, payllami aliyachishka kashkanrayku ūukawa wiñaypa kawsanka nishpa.

Yaya Dioska tukuy runakunata mana alita rurashpa kawsashkankunamanta kastigankami

¹⁸ Yachanchi Yaya Dioska yapa piñarishpanmi kastiganka tukuy mana payta kasuk mana alita rurak runakunata. Paykunaka mana ali rurashkankunawa runakunata arkanahun Yaya Diospa shutipa kashkan shimita kirinakunapa.¹⁹ Yaya Diospa rimashkanka shutipa kashkata paykuna alita yachahanun, pay kikin paykunata riksichishkanrayku.²⁰ Kay allpata rurashkanmanta pacha tukuy runakuna atipanahun riksinata imashnami kan Yaya Dioska. Payta mana rikushpanchispas paypa rurashkanta rikushpa atipanchi riksinata, pay mana tukurik atun yachayyu Yaya Dios kananta. Chayraykumi nima maykan millaypata rurak runa rurashkanmanta tapuy tukushpan atipankachu rimanata mana yachashkanichu Yaya Dios tiyananta nishpa. Chayrayku mana ali rurashkanmanta mana llakichiy tukunkachu.

²¹ Yaya Diosta riksishpankunapas manami munarkakunachu payta Yaya Diostashina kushichinata, nima agradesinata. Payta kushichinankunarenti ashwanta mana alikunata yuyarishpa kawsanahun. Chasna mana alita yuyarishpankuna amsapishina kawsanahun, manana atipanahunchu riksinata maykanmi ali kan.²² Tukuyta yachakmi kanchi nishpankunapas yuyay illashina kanahun.²³ Mana munanahunchu atun yachayyu, mana wañuk Yaya Diosta kushichishpa kawsanata. Chasna kashpan paykunaka runakunapa rurashkankunata atunyachishpa mañanahun. Wañuk runashina, rikrayu pawakkunashina, allpapi purik animal-kunashina, machakuyakunashina

rurarishkakunatami atunyachishpa mañanahun Yaya Diostashina.

²⁴Chayrayku Yaya Dioska paykunata sakishka, paykuna kikin munashkankunata ruranankunapa. Chasna kashpan-kunami paykuna kikinpa aychanta waklichishpa paykunapura shukwa shukwa pinkaypata ruranahun. ²⁵Yaya Diospa shutipa rimak shiminta mana kasunata munashpangkuna llulla shimikunallata kasunahun. Yaya Diospa rurashkan imakunata yuyashpa kasushpa kawsanahun, mana munana-hunchu kikin Yaya Diosta yuyashpa kasushpa kawsanata. Chayka manami alichu. Ñukanchi runakunaka tukuy uras tukuya rurak Yaya Diosllata kushichishpa kawsananchi tiyan. Chasna kachun.

²⁶Runakuna mana Yaya Diosta yuyashpa kawsashkankunarykumi Yaya Dioska paykunata sakishka pinkaypata munashkankunallata rurashpa kawsanankunapa. Chasna kashpan rikuychi, warmikunapas kusankunawa tupanakushpa kawsanata sakishpangkuna warmipura pinkaypata ruranahun. ²⁷Chasnallatata karikunapas warminkunawa tupanakushpa kawsanata sakishpangkuna karipura pinkaypata ruranahun. Chasna pinkaypata rurahushkankunarykumi paykuna kikin aychankunata waklichishpangkuna kastigarishka kanahun.

²⁸Yaya Diosta mana kasunayashpan-kuna payka chay runakunata sakishka millaypa yuyayninkunawa pinkaypaku-nata ruranankunapa. ²⁹Chasna kashpan-kunami paykunaka tukuy mana alikunata rurashpa kawsanahun. Runa masinkunata mana alita ruranahun, tukuy imakunata paykuna kikinrayku munanahun, yapa millaypata ruranahun. Mana awantashpangkuna shuk runa shuk imapi paykunamanta

pasa kananta tukuy runakunawa parihuyanata munashpa kawsanahun.

Runakunata wañuchikkuna, rimanaky-sikikuna, piñariysikikuna, llullaysiki-kuna, millaypata yuyarikkuna kanahun.

³⁰Runa masinkunata washanchakkuna kanahun, Yaya Diosta chiknik, nima pita kasukkuna. Paykuna kikinlla yapa ali kanata yuyarik, paykuna kikinta atunyachishpa rimakkuna kanahun. Chaymanta millaypa ruranallata yuyarinahun. Yayankunata mana kasunahunchu. ³¹Mana asirtanata munanahunchu maykanmi ali, maykanmi mana alichu, rimashkanku-nata mana paktachinahunchu, mana nima pita yuyanahunchu, chaymantapas nima pita llakichinahunchu. ³²Chay mana alita rurak runakunaka yachana-hun Yaya Dios chay mana ali rurashkan-kunamanta kastigananta. Tukuy mana alita rurakkunaka wiñaypa wañuya parisinankunata yachanahun. Chayta yachashpangkunatataki mana alita rurashpalla kawsanahun. Mana chaylla-chu. Ashwan shuk runa masinkunata chasna mana alita rurahushkanta rikushpangkuna yapa kushikunahun alitami rurahunki nishpa.

**Yaya Dios shuk puncha tukuy
runakunata mana alita
rurashkankunamanta tapunka**

2 ¹Chayrayku yachashpanchi tukuy ñukanchi runakuna mana alita rurak kananchita, nima pi atipamachu rimanata runa masinmanta: Mana alita rurashpa kawsak kashpan kastigay tukunan tiyan, ñuka shuti alimi kani nishpa. Kankunapas chay runa masikichishina mana alita rurak kashkaykichirayku chasna rimanayki-chiwa kankuna kikinmanta kastigay tukunan tiyan nishpa rimakkuna kankichi. Chasna kashpaykichimi mana

llakichiy tukunkichichu. ²Yaya Diosllami atipan rimanata maykanmi shutipa alita rurashka, maykanmi mana alita rurashkachu nishpa. Chasna kashpan yachanchi mana yankamanta kastigananta. Ashwan tukuy chay mana alikunata rurakkunata kastigashpan alita ruran shutipa mana alikunata rurashkunkunaryku. ³Kankuna runa masikichishinallatata mana alita rurak kashpaykichi shukkunamanta ama rimaychichu: Mana alita rurak kashpan kastigay tukunan tiyan nishpa. Chasna rimak kashpaykichiaka ama yuyariyichchu Yaya Dios kankunata kastiganamanta kishpichinanta. ⁴Chasna runa masikichimanta rimakkuna kashpaykichiaka Yaya Diosta manami yuyankichichu. Payka yapa ali shunku kashpan ñukanchita yuyashpan mana shuk ratu kastiganchu. ¿Manachu yachankichi Yaya Dios ali shunku kashpan ñukanchita yanapananta manana millaypata rurashpa ashwan paytana kasushpa kawsananchipa?

⁵⁻⁶Chasna kashpanpas kankuna mana kasunata yachak runakuna kashpaykichi mana munankichichu mana alita yuyarishkaykichita sakinata. Chasnashpaykichi kankuna kikin Yaya Diospa sinchi kastigananta maskankichi. Pay alillata rurak kashpan shuk puncha tukuy runakunata rikuchinka pimi alita rurashka, pimi mana alitachu rurashka nishpa. Mana ali rurak runakunata kastigankami. Tukuy alita rurakkunata kushichinkami. ⁷Maykankunami mana sampayashpa alikunata rurashpa kawsanahun, maykankunami Yaya Diosta kushichishpa wiñaypa paywa kawsanata munanahun, chaykunata Yaya Diosmi kawsananpi yaykuchinka paywa parihu wiñaypa kawsananpa. ⁸Ashwan maykankunami tukuy uras paykuna kikinpa munashkanta

ruranahun, Yaya Diospa shiminta mana kasunahunchu, ashwan millaypa ruranakunallata katinahun, chaykuntaka Yaya Dioska piñarishpami kastiganka. ⁹Chay mana alita rurashpa kawsakkunaka, ñukanchi israel runakunamanta, kankuna mana israel runakunamanta kashpankunapas yapa llakiyya manchayta parisinkakuna. ¹⁰Ashwan tukuy alita rurak runakuna, ñukanchi israel runakunamanta, kankuna mana israel runakunamanta kashpankunapas kushilla kawsankakuna. Paykunataka Yaya Diosmi kushichinkika, chaymanta paywa wiñaypa silipi kawsankakuna. ¹¹Yaya Dioska tukuy runakunata chasnallami yuyan, mana imananchu maykan runa kashpanpas.

¹²Tukuy runakuna Yaya Diospa kamachishkanta mana yachashpankunapas yachanahun maykanmi ali rurana, maykanmi mana ali ruranaka nishpa. Chayrayku chay kamachishkanta mana yachak runakuna mana alikunata rurashpankuna Yaya Dioska paykunata kastiganka. Ashwan tukuy maykankunami alita chay kamachishkanta yachashpankunata mana alita rurashpa kawsanahun, paykunataka Yaya Dioska paypa kamachishkanta rikuchishpa kastiganka. ¹³Yaya Diospa rikushkanpika mana kanahunchu ali maykankunami paypa kamachishkunkunata uyakkunalla. Ashwan maykankunami chay kamachishkakunata kasushpa kawsakkunallami paypa rikushkanpika ali kanahun. ¹⁴Mana israel runakuna chay Moisés wañupa killkashkan kamachishkakunata mana yachashpankunapas shukkuna paykunamanta chay kamachishkakunatashina alita rurashpa kawsanahun. Paykuna kikin yachanahun alikunata mana alikunata ruranata. ¹⁵Chasna alita rurashpa kawsashpankunami rikuchina-

hun Yaya Diospa kamachishkankuna shunkunkunapi kahushkanta. Chasna kashpan alita yachanahun ruranankuna alichu manachu. Shuk uras shunkunkunapi rimay tukunahun alita rurashkanki nishpa. Shuk uras rimay tukunahun mana alitachu rurashkanki nishpa.¹⁶ Shuk punchami Jesukristuka Yayan Dios kamachishpan tukuy runakunapa pakalla yuyarinankunata rurashkankunatapas riksichishpan alichu manachu nishpa rimanka. Chasna kashpan shukkunata kastiganka, shukkunata kushichinka. Nuka Yaya Diospa suma ali shiminta yachachish-kaynishina paktarinka.

**Pikunami shutipa Yaya Diospa
runankuna kanahun**

¹⁷ Shukkuna kankunamanta atunyachirishpa rimankichi: Israel runakunami kanchi. Yaya Diospa kamachishkanta kasukkuna kashkanchirayku paywa wiñaypa kawsak rishunchi nishpa. ¹⁸ Chaymanta paypa munashkanta yachanchi nishpa rimankichi. Yaya Diospa kamachishkanka ūukanchita yachachin alita rurashpa kawsanata nishpa. ¹⁹ Yuyarinkichi shuk wiskuta ñampita purichikshina, amsapishina purikkunarayku punchayachikshina, Yaya Diosta mana riksik runakunata yanapak kanaykichita payta riksinankunana. ²⁰ Yaya Diospa kamachishkanta alita riksishpaykichimi alita yachankichi maykanmi ali, maykanmi mana alichu. Chayrayku yuyarinkichi mana yachakunataka atipanchi yachachinata, mana Yaya Diospa kamachishkanta riksikkunataka atipanchi kamachishkanta riksichinata nishpa. ²¹ Chasna shukkunata yachachik kashpaykichi ¿imaraykutaya mana kankuna kikinra yachakushkaykichita rikuchinkichichu? Ama shuwaychichu nishpa yachachik

kashpaykichi ¿imaraykutaya kankuna kikin shuwankichi?²² Shukkunata rimashpaykichi mana shukpa warminwa musayaychichu, nima shuk warmi shukpa kusanwa nishpa ¿imaraykutaya kankunaka chasna musayankichi? Kankuna runakunapa diostashina rurashkankunata chiknishpaykichi ¿imaraykutaya paykunapa wasinkunamanta achka suma imankunata shuwankichi?²³ Kankunaka rimankichi Yaya Diospa kamachishkanta riksishkanchiraykumi ali kanchi nishpa. Chasna kashpanpas chay kamachishkakunata manami paktachinkichichu. Chasna Yaya Diosta mana kasushpaykichi runakunata yuyachinkichi Yaya Diosmanta asichishpa rimanankunapa.²⁴ Yaya Diospa ñawpa killkachishkanpi chasna kanaykichimantami killkarishka kan:

Kankuna Yaya Diosta riksik runakuna mana alita rurashpa kawsahushkaykichiraykumi mana payta riksikkunaka Yaya Diosmanta asichishpa millay-pata rimanahun nishpa.

²⁵ Kankuna israel masinikuna shutipa Yaya Diospa kamachishkankunata kasushpa kawsahushpaykichika ishpanaykichi kara puntata pitishka kanaykichika ali kan. Chay kamachishkanta mana kasushpaykichika pitishka kashpaykichipas mana Yaya Diospa runankunachu kankichi. ²⁶ Ashwan mana israel runakuna mana ishpanankuna kara puntata pitishka kanahun. Chasna kashpankopas Yaya Diospa kamachishkanta kasushpanunkuna payka rimanka runaynikunami kankichi nishpa. ²⁷ Chay Yaya Diospa kamachishkanta kasushpa kawsak mana israel runakuna paypa rikushkanpika ali runakunami kanahun. Ashwan kankuna israel masinikuna kashpaykichi Yaya

Diospa kamachishkanta mana kasuk kashpaykichi Yaya Diospa rikushkan-pika manami alichu kankichi. Chasna kashpan Yaya Diosta kasuk mana israel runakunaka shuk puncha kankuna israel masinikunata Yaya Diospa puntanpi rimankakuna: Mana Yaya Diospa kamachishkanta kasushkaykichirayku wiñaypa kastiguma riychi nishpa.

²⁸Mana kanchichu Yaya Diospa runankuna israel runakuna wawayarish-kanchirayku, nima ishpananchi kara puntata pitiy tukushkanchirayku.

²⁹Ashwan Yaya Diospa Espíritu shunkunchipi yaykushpan paypa runankuna tukunchi. Chasna tukushkan-chi, Yaya Diospa Espíritu ñukanchipi kawsahushkanrayku, mana Moisespa killkashkanta kasushkanchirayku Yaya Diospa runankuna tukushkanchi. Chasna tukushpanchi mana runakuna-chu atipankakuna rimanata, ashwan Yaya Diosllami atipan ñukanchita rimanata ali kananchita paypa rikushkanpi.

3 ¹Kankuna tapuwankichima: ¿Imata valin israel runa kananchika? ¿Ima ali kanataya ishpananchi kara puntata pitinaka? nishpa. ²Alimi. Yaya Dioska achka alikunata rurashka ñukanchi israel runakunaryku. Tukuy alita rurashkan-manta pasa payka puntiru ñukanchi israel runakunallata shiminta riksichirka ñukanchikunana shuk runakunata yachachinanchipa. ³Shukkuna ñukanchiku-namanta shuti Yaya Diospa rimashkanta mana kasunayarkakunachu. Chasna kashpan ¿Yaya Dioska mananachu ñukanchi israel runakunata rimashkanta paktachima? ⁴Nima imashna. Yaya Dioska mana llullak kashpan tukuy uras rimashkanllatami ruran, tukuy runakuna llullaysiki kashpankunapas. Chasnallata-mi ñawparmanta pacha kasna killkarishka kan:

A Yaya Dios, tukuy runakuna riksinkunkuna tiyan rimashkay-kika tukuy uras shutipa kananta. Shuk runakuna shimi-kiita mana shutipa kananta rimashpankunapas kanka riksichinki tukuy rimashkay-kika shutipa kananta nishpa.

⁵Shuk runakuna yuyarinahuma, millaypata rurashpa kawsashpanchika ashwan alita asirtashunchi Yaya Dioska yapa ali kananta nishpa. Chasna kashpan ¿imaraykutaya ñukanchitaka uchanchikunamanta piñarispa kastiganka? Chasna rurashpanka payka manami alitachu ruran nishpa.

⁶Manami chasnachu. Yaya Dioska mana kanchu mana alita rurak. Mana alita rurak kamaka, manami atipamachu tukuy millaypata rurak runakunata kastiganata. ⁷Chasnallatata shuk runa rimama: Ñuka llullashkaynirayku tukuy runakuna ashwan alita yachankakuna Yaya Dios tukuy uras shutipa rimak kananta. Chaypina payta rimankakuna yapa ali kananta. Chasna kashpan ¿imaraykutaya ñukata Yaya Dioska uchata rurahuktashina kastigawanka? nishpa. ⁸Chasna rimashkanka ali kamaka, millaypata rurashpalla kawsan-chima runakuna rimanankunapa Yaya Dios ali kananta. Shuk runakuna llullashpa rimanahun chasna kawsan-chipa yachachihushkaynita. Ñukaka nima ima uras chasna yachachishkani-chu. Yaya Dioska chasna ñukamanta llullashpa rimakkunata sinchita kastigashpan alitami ruranku.

Tukuy runakuna uchayu kananchimanta riman

⁹¿Ñukanchi israel runakuna chay mana israel runakunamanta Yaya Diospa rikushkanpika ashwan alichu kanchi? Mana chasnachu. Ñami

yachachishkani tukuy ñukanchi israel runakuna, mana israel runakunapas chasnalla uchayu kananchita.¹⁰Yaya Dioska killkachishkanpi kasnami riman:

Mana tiyanchu nima shuk alita rurak runa, nima shuk ali tiyanchu.

¹¹ Mana tiyanchu nima shuk ali kashkata asirtak runa. Mana tiyanchu nima pi munashkaynita ruranayakka.

¹² Tukuy runakunami munashkaynita mana kasushpankuna ñukata sakishkakuna. Chasnallatatami tukuy runakuna millaypa yuyayllawa kawsanahun. Mana tiyanchu nima shuk alita rurak runa, nima shuk ali tiyanchu.

¹³ Millaypata rimak kashkankuna-rayku paykunapa shiminkunaka shuk wañushka, mana alita pamparishka asnahuukshinami kanahun. Rimahushkankunaka tukuy llullami kan. Kwintanan-kunaka machakuyapa suliman-shinami.

¹⁴ Rimanankunaka millaypa rimanakunallami kan, piñarishpa yumin-kashpa rimanakuna.

¹⁵ Kunkaymanta utkalla purinahun shukkunata wañuchinankunapa.

¹⁶ Maytapas purihushkankunapi runa masinkunata parisichinahun, kawsanankunata waklichinahun.

¹⁷ Manami yachanahunchu alita rurashpa kushilla kawsanata.

¹⁸ Yaya Diosta mana manchanahunchu nishpa.

¹⁹ Yachanchi tukuy chay Yaya Diospa ñawpa killkachishkanka ñukanchi israel runakunamanta rimashkanta, maykan-kunami arí nirvakuna Yaya Diospa kamachishkanta kasunata. Chasna

kashpan chay ñawpa Yaya Diospa killkachishkanpi riman ñukanchi israel runakunapas chay tukuy mana israel runakunawa pakta chasnalla uchayu kananchita. Nima pi atipanchu rimanata mana uchayuchu kani nishpa. Tukuy runakunami uchayu kanchi Yaya Diospa rikushkanpika.²⁰Yaya Diospa kamachishkankunata mana paktachinata atipashpanchi nima pi chay kamachishkankunata paktachishkan-raykuchu paypa rikushkanpika ucha illa kan. Ashwan chay kamachishkankunaka ñukanchita riksichin uchayu kananchita.

Jesukristuta kirishpalla kishpinamanta riman

²¹ Kunanka Yaya Dios ñukanchita rikuchirka imashnami atipashunchi paypa rikushkanpi ali kanata, mana chay Moisespa killkashkan kamachishkakunata paktachik kashpanchipas. Chasna ruranantami Moisés wañu, ñawpa Yaya Diospa yachayninwa shuk yachachikkunapas ña killkarkakuna.²²Yaya Dioska ñukanchita ucha illata rikunka, Jesukristuta kirishpa kawsashpanchi. Tukuy chasna kirikkunaka ali tukunchi Yaya Diospa rikushkanpika, mana imananchu pipas kashpanchi.

²³Nima maykan runa ali kanchu, atipanarpa Yaya Diosta kushichinata. Tukuy runakuna uchata rurashkanchi.

²⁴ Chasna kashpanchi Yaya Dios ñukanchita llakichishkanraykulla paypa rikushkanpi ucha illa tukushkanchi. Jesukristuta kachashpan ñukanchiranti uchanchikunamanta wañunarpa ñukanchita kastiganan kashkanmanta kishpichirka.²⁵⁻²⁶Yaya Dios Jesukristuta kacharka, mana uchayu kashpanpas ñukanchirayku wañunarpa, yawarnin ñukanchirayku shuturinanpa. Chasna tukuy runakunata riksichirka Jesukristu ñukanchiranti wañushkanraykulla uchanchikunamanta llakichiy tukunan-

chita. Chay ñawpa kawsak kirikkunatapas uchankunamanta mana kastigarkachu, Jesukristuta kachananta yuyarishpan. Kunan ñukanchi kawsahushkanchi uras rikuchinayarka imashnami ali tukunchi paypa rikushkanpi. Jesukristuta kirishkan-chiraykulla ñukanchita riman ucha illa ali kankichi nishpa. Pay wañushpan Yaya Dios ucharayku rimashkan wañuya paktachishpan rikuchirka alita rurak kananta.

²⁷Chasna kashpan ¿atipanchimachu rimanata, ñukanchi kikinllami alita rurak kashpanchi kishpishunchi Yaya Diospa kastiganamanta nishpa? Manami atipanchichu. Nima pi atipanchu Yaya Diospa kamachishkankunata paktachinata. Ashwan Jesukristuta kirishpanchillami kishpishunchi. ²⁸Yachanchi Jesukristuta kirishkanchiraykulla Yaya Dios ñukanchita uchanchikunamanta llakichishkanta. Manami chay kamachishkankunata paktachishkanchiraykuchi ñukanchita llakichishka. ²⁹¿Imatata yuyarinkichi? ¿Yaya Dioska ñukanchi israel runakunapallachu? ¿Manachu tukuy runakunapa? Manami ñukanchipallachu, ashwan tukuy runakunapa Yaya Diosninmi kan. ³⁰Yaya Dioska shuklla kashpanmi tukuy Jesukristuta kirishpalla kawsak runakunata ucha illata rikun, ñukanchi israel runakunata mana israel runakunatapas. ³¹Ñukanchi chasna Jesukristuta kirishkan-chimanta kishpichishka kashpanchipas Yaya Diospa kamachishkanta mana sakinchihu. Ashwan kunan paypa kamachishkanta ashwan alita atipanchi paktachinata.

**Yaya Dioska Abrahamta ali kananta
rimarka, payta kirishkanraykulla**

4 ¹Kunan yayanchi ruku wañu Abrahammanta yuyarishunchi, imashnami Yaya Dioska payta ali kananta rimarka. ²Abraham alita rurashkanmanta Yaya Diospa

rikushkanpi ali kamaka, pay kikinmanta rimama karka ñukaka yapa alimi kani nishpa. Mana chasnachu. Ashwan payta kirishkanraykumi Yaya Dios payta rimarka rikushkanpi ali kananta. Chayraykumi mana Yaya Diosta atiparkachu rimanata ñukami yapa ali kani nishpa. ³Kasnami Yaya Diospa killkachishkanpi riman:

Abraham kirirka Yaya Dios tukuy rimashkanta paktachik kananta. Chayraykumi Yaya Dioska payta rimarka rikushkanpi ali kananta nishpa.

⁴Alita yuyarishunchi. Shuk runaka tarawashkanmantami kullkita apin. Chay apishkan kullkita mana apishkachu, payta tarawachik llakichishkan-rayku. Ashwan tarawashkanmanta pagay tukushkami kan. ⁵Kunan yuyari-chi shuk runata, maykanmi Yaya Diosllapi sinchikun. Payka manami yuyarinchu alita rurashkanmanta Yaya Diospa rikushkanpi ali kananta. Ashwan payllata kirishkanraykumi uchayu runa kashpanpas Yaya Dioska payta llakichishpan rimanka ali runa kanki nishpa. ⁶Atun apu yaya rukunchi David wañu chasnallatatumtami rimarka kushilla kananta, maykantami Yaya Dioska riman ali runa kananta mana pay kikin shuk imata rurashkanraykuchi ashwan payta kirishkanraykulla. ⁷Kasna rimarka:

Kushillami kanahun maykan runakunatami Yaya Dioska uchankunamanta llakichishka.

⁸ Kushillami kan maykan runatami Yaya Dioska riman uchaykiku-namanta llakichirishka kahunki, manana chaykunata yuyarininachu nishpa.

⁹Chay David kushillami kan nishpa rimashkanka ¿pikunarykuta kan? ¿Maykankunatata Yaya Dioska uchanku-

namanta llakichinka? ¿Ñukanchi ishpananchi kara puntata pitirishka israel runakunallatachu llakichinka? ¿Mana israel runakunatapaschu llakichinka? Ña rimashkanchi Abraham payta kirishkanraykullami, Yaya Dioska ali runami kanki nishpa rimarka.¹⁰ ¿Ima urasta Yaya Dios Abrahamta chasna rimarka? ¿Payta rimarkachu ña ishpanan kara puntata pitirishka kashpan manarachu? Manarapas pitirishka kashpanrami Yaya Dioska Abrahamta rimarka ali runami kanki nishpa. Mana pitirishkanwashachu payta chasna rimarka.¹¹ Chayta rimashkanwasha Yaya Dioska Abrahamta rimarka ishpanan kara puntata pitichinanpa. Chay pitichishkanwa Yaya Dioska payta yuyachirka kirishkanrayku paypa rikushkanpi ali runa kananta. Chasnamatami Abrahamka tukuy kirik runakunapa yayankunashina tukurka, mana pitirishka kashpankunapas. Chasna maykunkunapas kirishpankunami Yaya Dioska Abrahamtashina paypa rikushkanpi ali kanankunata riman.¹² Chasnallatammi Abrahamka ñukanchi pitirishka israel runakunapa yayanshina kan. Abrahamka manara ishpanan kara puntata pitirishka kashpanmi Yaya Diosta kirishpa kawsapayarka. Chayrayku maykunkunami mana pitirishka kashpankuna Yaya Diosta kirishpa kawsanahun, paykunapas Abrahampa wawankunashinami kanahun Yaya Diospa rikushkanpi.

Abrahamshina kirikkunallatami
Yaya Dioska ali runa
kanki nishpa riman

¹³Ñawpa Yaya Dios Abrahamta rimarka: Kanmanta mirashkakunamatami shuk runa shamunka tukuy kay allpapi kawsak runakunata kamachinana nishpa. Chay uras Yaya Dios

kamachishkankunata manara runakunata kushkachu karka. Chayrayku yachanchi Abrahamta chasna rimashpan mana karkachu chay ñawpa Moisespa killkashkan kamachishkakunata paktachishkanrayku. Abraham payta kirishkanraykullami Yaya Dios payta llakichishpan ali kananta rimashpan chay paktachinan ali shimita rimarka.¹⁴ Yuyariychi, mana ñawpa kamachishkankunata paktachishkanchiraykuchu Yaya Dioska ñukanchita yanapan, ashwan payllata kirishkanchiraykumi. Mana chasna kamaka, yankamatami Yaya Diosta kirinchima. Paypa rimashkanpas yankami kama.¹⁵ Yaya Diospa kamachishkankunata riksishpanchi mana kasushpanchika payka ñukanchita piñarishpa kastiganka. Chay kamachishkankunaka mana tiyamaka, mana tiyamachu uchaka.¹⁶ Chay kamachishkakunaka ñukanchita mana yanapashpan ali tukunanchipa, Yaya Dios munarka Jesukristuta kirishkanchiraykulla ali tukunanchita. Payka munan Abrahamta rimashkanta tukuy ñukanchi kirikkunarykupas paktachinata. Chasna kashpan mana Moisespa killkashkan kamachishkakunata kasukkunallatachu Yaya Dioska yanapan. Ashwan maykunkunami Abrahamshina kirinahun, tukuy chaykunatami payka yanapan. Chasna kashpanmi Abrahamka tukuy ñukanchirayku yayanchishina kan.¹⁷ Kasnami Yaya Dios Abrahamta rimashkanka killkarishka kan:

Ñukami kanta achka chikan chikan runakunapa yayantashina turani nishpa.

Abrahamka chay rimashkanta kirirka. Chaymanta yacharka Yaya Dios yachayninwa wañushkakunata kawsachinata atipak kananta, chaymantapas manara tiyashkata ruranata atipak kananta.¹⁸ Yapa

ruku kashpanmi Abrahamka manana atiparkachu wawata ruranata. Chayta yachashpanpas Yaya Diosllapi tukuy yuyayninta churarka, payka rimashkanta paktachinkami nishpa. Chasna Yaya Diosta kirishpa chaparka rimashkanshina achka chikan chikan runakunapa yayanshina tukunanpa. Kasnami Yaya Dioska ñawpa rimarka: Kammantami achka runakuna mirankakuna nishpa.¹⁹ Abrahamka shuk pachak watayu kashpanpas mana sakirkachu Yaya Diosta kirinata. Abraham Sarapas ruku kashpapkuna yacharka, warmin manana chichunata atipananta, nima pay wawata ruranata atipananta. Chasna kashpanpas Yaya Diosllatami kirirka.²⁰ Mana yuyarirkachu Yaya Dioska yankachari rimawashka, manachari paktachinkachu nishpa. Ashwanta ashwanta Yaya Diospi tukuy yuyayninta churashpan kirirka rimashkanta paktachinanta. Payta kushichirka atun yachayyumi kanki nishpa.²¹ Abrahamka tukuy shunkunmanta pacha kirirka Yaya Dios yachayninwa tukuy rimashkanta paktachinanta.²² Chayrayku Yaya Dioska payta rimarka ali runa kanki nishpa.

²³⁻²⁴Chay rimashkanka mana Abraham-raykullachu ashwan ñukanchikunaryakupas kan. Amunchi Jesukristuta wañushkan-manta kawsachik Yaya Diospi tukuy yuyayninchita churashpanchi ñukanchiku-natas Yaya Dioska ali runakuna kankichi nishpa rimanka.²⁵ Amunchi Jesukristuka uchanchikunaryaku wañurka. Wañushkan-manta Yaya Dioska payta kawsachirka ñukanchikunata uchanchikunamanta llakichinanpa.

Yaya Dios ñukanchita kishpichishkanrayku paywa pakta kushilla kawsanchi

5 ¹Kunanka Amunchi Jesukristu wañushkanrayku Yaya Dios ñukanchikunata uchanchikunamanta

llakichishkanta kirishpanchi paywa pakta kushilla kawsanchi.^{2*}Kristu ñukanchiranti wañushkanraykumi payta kirishpanchi Yaya Dioska ñukanchita alita rikun. Chasna kashpanchimi payllapi sinchikushpa kawsanchi, yachashpanchi Yaya Dioswa pakta suma chuyahlla kawsanani kawsananchita. Chayrayku yapa kushikushpa chapashpa kawsahunchi.³Achkata parisishpanchim-pas llakirinakuna tiyashpanpas shuk runakuna ñukanchita chiknishpankunapas kushikuchillami, yachashpanchi chay parisinakunawa ashwanta ashwanta yachakunanchita mana sampayashpa Jesukristuta kirishpa kawsananchipa.⁴Chasna kawsashpan-chimi ashwan alita rurak runakuna tukushunchi. Chasna kashpanchimi yachanchi wiñayparayku paywa pakta kawsak rinanchita.⁵Chayta alita yachashpa kawsashpanchi mana yankachu kanka. Yaya Dios Espiritunta shunkunchipi churashpan yapa ñukanchita yuyahushkanta riksichirka.

⁶Mana ñukanchi kikin atipashpanchi uchayu kashkanchimanta kishpinata, chiknik kashpanchira Yaya Dios munashpan Kristuta kacharka ñukanchi-rayku wañunanpa.⁷Shuk runa munamachu shuk runa masinta kishpichinanranti wañunata? Mana chasnalla wañumachu. Runa masin alita rurak kashpanpas mana munamachu wañunata payranti. Shuk ali shunku runaranti munamachari wañunata payta kishpichinanpa.⁸Ashwan Yaya Dioska, uchasapa kashpanchira Wawan Kristuta kacharka ñukanchiranti wañunanpa. Chasnashpan ñukanchita riksichirka yapa yuyashkanta.⁹Kristu ñukanchiranti wañushpan yawarnin shuturish-kanraykumi Yaya Dioska ñukanchita riman ucha illa kanki nishpa. Chasna kashpan kastiganan punchapi Jesukristu

ñukanchita kishpichinka mana kastigay tukunanchipa.¹⁰Paypa kuntrankuna kashpanchira Yaya Dios Wawanta kacharka ñukanchiranti wañunampa. Chasna wañushkanraykumi Yaya Dios manana ñukanchita piñarishpa kannachu. Jesukristu wañushkanmanta kawsarishkanraykumi shutipa kishpichiy tukushunchi wiñaypa kushilla Yaya Dioswa kawsananchipa.¹¹Mana chayllachu, ashwan kunan ña kushikushpa kawsanchi, Yaya Dios Amunchi Jesukristuranti manana ñukanchita piñarishkanrayku. Payranti kunan kushilla Yaya Dioswa kawsanchi.

**Pablo Adanmanta Kristumantapas
yachachin**

¹²Chay puntiru runa Adán mana Yaya Diosta kasushpan payra uchata rurarka kay allpapi. Chasna uchata rurashkanrayku payka wañunan karka. Chaymanta pacha tukuy runakuna uchata rurashpa kawsarkanchi. Chasna uchayu runakuna tukushpanchimi tukuy ñukanchikuna wañunanchi tiyan.¹³Manarapas Moisés Yaya Diospa kamachishkanta killashpanrami ña tukuy runakuna uchata rurashpa kawsarkakuna. Rimankimachari: Chay kamachishkanka manara tiyashpanra Yaya Dioska mana atipanchu runakunata rimanata chay kamachishkata mana kasushkaykichirayku kankunata kastigasha nishpa.¹⁴Imashna kashpanpas yachanchi Adanmanta pacha Moisés kawsashkan uraskama runakunaka wañurakuna, imashnami kunankama wañunahun. Mana Adanshina chay uchallatata rurashpankunapas wañurakuna. Adán uchata ruranata kallarik runa kashpan ñukanchita yuyachin uchamanta shuklla alichak runallatata tiyananta.

¹⁵Chasna kashpanpas chay ishkayku-naka mana chasnallachu kanahun. Maykantami Yaya Dios nima imata

tapushpa ñukanchirayku ruran, chayka manami Adanpa uchata rurashkanshinchu. Shutipami shuklla runa uchata rurashkanrayku tukuy runakuna uchata rurak wañuk tukushkanchi. Ashwan Yaya Dios ñukanchita llakichishpa ñukanchirayku alikunata rurashkanka Adán uchata rurashkanmanta yapa pasami kan. Yaya Dios *Kristuta kachashpan pay munashpan achka runakunarayku yapa alikunata rurashka. Adanpa waklichishkanta alichashpan yapa pasatami ñukanchikunaryku rurashka.

¹⁶Adán uchata rurashkanmanta pacha tukuy runakuna uchata rurakkuna tukurkanchi. Chasna kashpan tukuy kastigarina karkanchi. Ashwan Yaya Dios munashpan Jesukristuta kacharka ñukanchiranti wañunampa. Chasna kashpan Yaya Dioska ñukanchita ucha illa kananchita rimarka.¹⁷Adán Yaya Diosta mana kasushpan uchata rurashkanraykumi tukuy runakuna wañunanchi tiyan. Ashwan Yaya Dios ñukanchi llakichinanta tapukkunata alita rurarka. Ñukanchita yapa yuyashpan pay kikin munashpan Jesukristu ñukanchiranti wañushkanrayku uchanchikunamanta llakichishka, chaymantapas ñukanchita rikunna ucha illa kananchita. Jesukristuwa pakta kawsashpanchi pay ñukanchita yanapashpan tukuy mana alikunata winsishpa kawsashunchi.

¹⁸Imashnami Adán uchata ruranata kallarishkanrayku tukuy ñukanchikuna kastigarina karkanchi, chasnallatata mi Jesukristu Yayan Diospa munashkanta rurashkanrayku ñukanchita kishpichishka chay kastigananmanta wiñaypa paywa kawsananchipa.

¹⁹Chayka ninayan, shuk runalla mana Yaya Diosta kasushkanrayku tukuy runakuna uchayu tukurkakuna. Chasna-

llatata shuk runalla Yaya Diosta kasushkanrayku achka runakuna ucha illa tukunkakuna.

²⁰Runakuna ña uchata rurak kashpan-kuna Yaya Dioska Moisesta kamachish-kanta kurka tukuy ñukanchikunaryku. Chay kamachishkanta riksishpanchipas ashwanta uchata rurashpa kawsapayar-kanchi. Chasna uchasapa tukushpanchi alita riksirkanchi Yaya Dios ñukanchita yapa yuyashpan uchanchikunamanta llakichinanta. ²¹Chasna yapa mana alita rurashkanchimantami tukuy wañunanchi karka. Ashwan Yaya Dios ñukanchikunata yapa yuyashpan uchanchikunamanta llakichishpan Amunchi Jesukristu wañushkanraykumi aliyachirka paywa pakta wiñaypa kawsananchipa.

Uchanchimanta wañushkashinami kanchi, ashwan Kristu ñukanchita kishpichishpan wiñaypa paywa kawsashunchi

6 ¹⁻²Shuk runakuna yanka yuyarishpa rimanahuma: Akuychi uchata rurashpalla kawsashunchi, Yaya Dios ñukanchita uchanchimanta llakichishpan ali shunku kahuskanta ashwan alita rikuchinanpa nishpa. Mana chasna yuyarishchinchu. Ñukanchika *Kristuta kiriushpanchimi ña uchanchimanta picharishka runakuna kahunchi. Shuk runa wañushkaka manana atipannachu uchata ruranata. Chasnallatata ñukanchikunapas manana uchata rurashpa kawsashunchinachu. ³Manachu yachankichi ñukanchi Kristuta kirishpa bawtisarishpanchi paywa shukllashina tukushpa ñawpa kawsashkanchita sakishpanchi paywa pakta wañushkanchita? ⁴Chasnami Kristuwa pakta wañushkanchiwascha allarishka urku uchkupi churashpa taparishkashina tukushkanchi.

Chaymanta Yaya Dios yachayninwa Kristuta wañushkanmanta kawsachish-kanshinnami, ñukanchita mushu kawsayta, mushu yuyaytapas kushka, alita rurashpana kawsananchipa.

⁵Jesukristuwa shukllashina tukushpanchi pay wañushkanraykumi ñukanchipas wañushkashina tukushkan-chi tukuy millaypa rurananchikunata manana rurananchipa. Payka wañushkanmanta kawsarishka kashpan ñukanchipas wañushkashina kashkan-chimanta kawsarishkashina kanchi alikunallata rurashpa kawsananchipa. ⁶Yachanchi, Kristu kruspi klabarishka wañushkanwa ñukanchipas wañushkashina tukushkanchi. Chasnami ñawpa uchata rurashpa kawsashkanchita sakishkanchi. Chasna tukushkanchi manana supayta kutikashka kasushpa uchata rurashpa kawsananchipa.

⁷Yuyariyichi, shuk wañushka runaka mananami uchata ruranachu.

⁸Jesukristu wañushkanrayku ñukanchi-pas wañushkashina tukushpanchi yachanchi pay kawsarimushkanrayku ñukanchipas paywa pakta kawsananchita. ⁹Yachanchi Kristu wañushkanmanta kawsarishpan mana kutikashka wañunanta. Chasnami payka wañuya winsishka. ¹⁰Chasna tukuy uchanchikunaryku Yaya Diospa kastigananta parisishpan shuk kutilla wañurka. Chaymanta kawsarimushpanni Yaya Dioswa kawsahun. ¹¹Chasnallatata kankunapas yuyariyichi wañushkashina kanaykichita manana uchata rurashpa kawsanaykichipa. Yuyariyichi Kristu Jesuswa pakta kawsarishkashina kanaykichita Yaya Diosta kushichishpa kawsanaykichipa.

¹²Chayrayku amana munaychinachu uchata rurashpa kawsanata. Amana munashkaykichillata rurashpa kawsaychinachu. ¹³Nima ima uchata rurashpa

kawsaychichu. Ashwan wañushkashina kashkaykichimanta kawsarishkashina mushu kawsayyu kashpaykichi Yaya Diosta kasuychi, ñukami kani kampa, munashkaykillata ruranayani nishpa.

¹⁴Chasna Yaya Diospa munashkanta rurashpa kawsashpaykichimi supayka mana kankunata atipankachu millaypaku-nata rurachinata. Yaya Dios kankunata uchaykichikunamanta llakichishpan nima pi atipankachu kankunata rimanata Moisespa killkash-kan kamachishkakunata mana kasushkaykichirayku kastigarina kankichi nishpa.

**Shuk patronpa kamachinan runata
yuyarishpa yachakunchi Yaya
Diosllata kasushpa kawsanata**

¹⁵Shuk runakuna yanka yuyarishpa rimanahuma: Akuychi uchata rurashpalla kawsashunchi, yachashpanchi Moisespa killkashkan kamachishkata mana kasuk kashpanchipas Yaya Dios ñukanchita llakichishpan manana uchanchimanta kastigankachu nishpa. Mana chasnachu.

¹⁶Yuyariychi. Shuk runa patronrayku tarawashpanka chay patroynipa kamachishkanllatami kasun. Chasnامanta chay runaka patroynipa kamachinan kan. Chasnallatata supayta kasushpalla uchata rurashpa kawsahushpaykichika paypa kamachinankunami kankichi. Chasna kawsashpaykichika wañuytami maskankichi. Ashwan kankuna Yaya Diosta kasushpaykichika alita rurashpa kawsankichi.

¹⁷Kankuna supayta kasushpa uchata rurashpa kawsahushkaykichita sakishkankichi. Kunanka tukuy shunkuykichimanta pacha Yaya Diospa shiminta kasunkichina. Chayrayku Yaya Diosta agradesini.

¹⁸Chasna uchata rurashpa kawsahushkay- kichimanta kishpichiy tukushpaykichi kunanka alitana rurashpa kawsahunkichi.

¹⁹Kankuna runa yuyayllata yuyarishpa

kawsashpaykichimi manara Yaya Diospa yuyayninta alita yachashpaykichi tukuy kaykunata runakuna asirtaypatami rimahuni. Ñawpa manara Yaya Diosta kasuk kahushpaykichi tukuy millaypaku-nata rurapayarkankichi. Kunanka Yaya Diostana kasuychi, munashkaykillata ruranayani nishpa. Chasna tukuy alikunallata rurashpa Yaya Diosta kushichishpa kawsaychi.

²⁰Kankunaka supaypa kamachinan-kuna kashpaykichira uchakunata rurashpa kawsarkankichi. Nima pi atiparkachu kankunata rimanata alikunata rurashpa kawsanaykichipa.

²¹Chasna kawsashpaykichi ¿imapita yanapashka kankunata? Nima imapi, ashwan wañuyllatami maskashkankichi. Kunanka chay ñawpa millaypa rurashkaykichita yuyarishpaykichi pinkarinkichi.

²²Ashwan kunanka Yaya Dios kankunata uchata rurashpa kawsashkaykichimanta kishpichishpan payta kasukkuna tukurkankichi. Chasna kawsashpaykichimi kankunaryku ali kan. Yaya Diosllata kasushpaykichimi alikunallata rurankichi, chaymanta wiñaypa Yaya Dioswa pakta kawsak rinkichi.

²³Uchata rurashpa kawsashpanchika wiñaypa wañuya parisinanchi tiyan. Ashwan Yaya Dioska ñukanchita Amunchi *Kristu Jesuswa shukllata-shina rurashpan mushu kawsayta kun wiñaypa paywa pakta kawsananchipa.

**Jesukristuta kirishpa
kawsashpanchi manana ñawpa
kamachirishkashina
kawsashunchinachu**

7 ¹Wawkikuna panikuna, kankunaka alitami yachankichi killkarishka kamachishkakunamanta. Chaymantapas yachankichi, ñukanchikuna kawsahushpan-chira chay kamachishkakunata kasunanchi tiyan. Wañushpanchika mananami chay

kamachishkakunataka kasunanchi tiyanchu.²⁻³ Rikuychi, kasnami Moisespa killkashkan kamachishkaka ñukanchita yachachin: Shuk kusayu warmika kusanta kasushpa payllawa kawsanan tiyan kusan wañunankama. Kusan wañushpan chay warmika manana kusayuchu kan. Munashpanka atipama shuk runatana kusayanata. Chasna kusayashpanmi mana uchata ruranchu nishpa.

⁴Wawkinikuna paninikuna, chasnami ñukanchikunapas kanchi. *Kristuwa shukllashina tukushpanchi pay wañushpan ñukanchipas wañushkashina tukushkanchi. Chasna kashpanchi manana Moisespa killkashkan kamachishkata kasushpa kawsananchi tiyanchu. Kunanka Kristupa runankuna kanchi, maykantami Yaya Dios wañushkanmanta kawsachirka. Paywa paktana kawsanchi alita rurashkanchiwa Yaya Diosta kushichinanchipa.⁵ Ñawpaka manami alitachu rurashpa kawsapayarkanchi, munashkanchillata rurashpa kawsahuskanchirayku. Moisespa killkashkan kamachishkaka ñukanchita riksichishpan mana alita rurahuskanchita ashwanta ashwanta ruranayarkanchi millaypukunata. Chasnanchimantami wiñaypa wañuyma rina karkanchi.⁶ Kunanka Kristuta kasushpa kawsashpanchimi chay ñawpa kawsashkanchita sakishpa chay kamachishkata manana kasunanchi tiyanchu. Kunanka kishpichirishka kanchi, Yaya Diospa Espíritun ñukanchita yuyachishpan ali yuyawvana ali munaywvana tukuy paypa munashkanta rurananchipa. Manana kamachirishkashina kasushunchinachu, imashnami ñawpa kamachishkakunata kasupayarkanchi.

**Mana uchata ruranata
munashpanchipas ñukanchi munay
mana atipanchichu sakinata**

⁷Chay ñawpa Moisespa killkashkan kamachishkaka ñukanchita uchata

riksichishkanrayku shukkuna kankunamanta rimanahuma chay kamachishkaka manami alichu nishpa. Ama chasna yuyariyichichu. Ashwan mana chay kamachishkaka tiyama karka, manami yachanchimachu karka imami uchaka nishpa. Chay kamachishkaka nin ama shukkunapa tiyashkanta munaychichu nishpa. Yuyarishu. Moisespa killkashkan kamachishkaka mana chayta rimama karka, manami yachanchimachu karka shukkunapa tiyashkanta munananchika ucha kananta.⁸ Moisespa killkashkanka uchata rikuchishkanmanta pacha munarinakunatapas ñukanchita riksichirka. Chay Moisespa killkashkan kamachishkata mana riksinima karka, mana uchata riksinimachu karka. Yaya Dios ama munarinkichu nishpa rimashkanta riksishpaynimi kallarishkani tukuy imata munarinata.⁹ Ñuka manara chay kamachishkata riksishpayni alitachari rurashpa kawsahuni nishpa kunkaylla kawsapayarkani. Chasna kahushkaynipimi chay kamachishkata riksishpayni tukuy mana alikunatana munashkani ruranata.¹⁰ Chasna kawsashpayni Yaya Diospa rikushkanpi wañushkashina tukushkani, nima imapi payta kasuk. Moisespa killkashkan kamachishkaka rimawanmi imashnami alita rurashpa kawsasha wiñaypa Yaya Dioswa kawsak rinaynipa. Ashwan chayta mana kasushkaynirayku nina mana wañukpi wiñaypa parisinayni karka.¹¹ Moisespa killkashkan kamachishkata riksishpayni tukuy mana alikunata ruranayashkani. Chay kamachishkaka yanapawan alita rurashpa kawsanaynipa nishpa yuyarishpayni llullachiy tukurkani, mana paktachinata atipashkaynirayku. Chasna mana paktachishpaynimi uchata rurashpayni wañunayni karka wiñaypa parisinaynipa.

¹²Moisespa killkashkan kamachishkakunaka Yaya Diosmantami. Karan

kamachishkaka Yaya Diospa kushkanmi. Tukuy runakunata chasnalla riman maykanmi ali, maykanmi mana alichu. Chayka manami chikanyachiypachu. Karan kamachishkaka alimi.¹³ Mana wañunchichu Yaya Dios kamachishkanta kushkanrayku ashwan paypa kamachishkanta mana kasushpanchimi wañunanchi tiyan. Moisespa killkashkan kamachishkami ñukanchita yachachin, Yaya Dios ñukanchita kastiganan tiyan uchata rurashkanchirayku. Chay ali kamachishkakunata riksishpanchi ashwan uchata rurashpa kawsashkan-chirayku wiñaypa kastigay tukunanchi tiyan. Chasna ali ruranakunata riksishkanchirayku ashwan mana alikunata rurashpanchi Yaya Dios kamachishkanwami ñukanchita alita riksichin imami kan uchaka, chaymantapas imashna millaypami uchaka kan.

¹⁴Yachanchi chay kamachishkaka Yaya Diosmanta payshina ali kananta. Ashwan ñukaka mana chasnachu kani. Mana ali munashkaynikunata rurashpa kawsani. Ucha kamachinanshina kashpayni mana atipanichu chasna kawsahuskaynita sakinata.¹⁵ Manami asirtanichu imaraykumi mana atipanichu alita rurashpa kawsanata. Alikunata ruranata munashpaynipas manami chaykunata ruranichu, ashwan chay mana alikunata mana munashpaynipas ruranimi.¹⁶ Ali munanaynikunata ruranayniranti chay mana munashkaynikunata rurashpayni shunkuynipi rimay tukuni rurashkaynika mana alichu nishpa. Chasna kashpanmi Yaya Diospa kamachishkanka ali kan nishpa rimani.¹⁷ Chasna mana munashkaynikunata rurashpayni yachani mana ñuka munay chayta rurashkaynita. Chay shunkuynipi kawsak mana ali munanakunami uchata rurachiwan.¹⁸ Yachani ñuka kikinlla nima imapi alikunata

ruranata atipak kanaynita. Mana tiyawanchu alikunata rurachik yuyaykunaka, nima munanakunaka. Alita ruranata munanakuna tiyawashpanpas chay alikunata ruranata atipachiwakka mana tiyawanchu.¹⁹ Alita ruranata munashpaynipas mana ruranichu. Ashwan millaypakuallatami rurani mana munashpaynipas.²⁰ Chasna mana munashkayni ruranakunata rurashpayni mana ñukachu kani chayta rurak, ashwan ñukapi kawsak mana ali munanakunami chay millaypakuallatami rurachiwan.

²¹ Chasna kashpanmi yachani alita ruranata munashpaynipas uchata rurak kashpayni alita ruranata mana atipanaynita.²²⁻²³ Shunkuynimanta pacha munani Yaya Diospa kamachishkankunata kasunata. Chasna kashpanpas uchata rurak kashpaynimi ishkay yuyayyushina kani chay ali yuyarinay-nikunawa. Uchata rurak kahushkaynipi watarishkashina kashpayni mana munashpaynipas uchata rurashpa kawsanayni tiyan.²⁴⁻²⁵ Yaya Diospa munananta mana paktachinata atipashpaynimi atunta llakirini. ¿Pita kishpichi-wanka chay uchata rurashpa kawsahuskaynimanta mana wiñaypa-rayku parisinaynipa? Yaya Diosmi Amunchi Jesukristuta kachashpanpas kishpichiwashka. Chayraykumi payta atunta agradesini. Ñuka kikin atipanay-nillawa uchata rurashpa kawsani Yaya Diospa kamachishkanta yuyaynipi kasunayashpaynipas.

Yaya Diospa Espiritunta kasushpa
kawsashpanchimi Yaya Diospa
wawankuna kanchi

8 ¹Kunanka *Kristu Jesuswa pakta kawsahukkunaryukuka manami tiyankachu chay kastiguka Yaya Diosmanta wichurishka wiñaypa

parisinankunapa. ²Yaya Diospa Espíritun ñukanchita Kristu Jesuswa shukllatashina rurashpan mushu kawsayta kushka. Pay ñukanchita yuyachik tukushpan kishpichishka manana uchata rurashpa kawsananchipa. Chaymantapas ñukanchita kishpichishka uchata rurashkanchirayku wañushpanchi wiñaypa parisina kashkanchimanta. ³Ñukanchi uchata rurakkuna kashkanchiraykumi Moisespa killkashkan kamachishkaka mana atiparkachu ñukanchita yanapanata manana uchata rurashpa kawsananchipa. Chayraykumi Yaya Dios kikin ñukanchita yanaparka. Wawanta kacharka ñukanchishina uchata ruranayak runa tukunanpa. Chasnami shuk uchata ruranayak runa kikin tukuy uchanchikunarayku kastigu tiyananta parisishpa ñukanchiranti wañushpan Yaya Dios kastigananta tukuchirka, chaymanta uchapa kamachinanshina kashkanchimanta kishpichirka. ⁴Chayta rurarka atipananchipana paypa kamachishkanpi kamachi y tukushkanchita kasunata. Payka munan tukuy chay kamachishkan ali ruranakunata rurashpanchi chay kamachishkanka kawsashkanchiwa alita paktachiy tukunanta. Ñukanchi manana kawsanchichu ñukanchi kikin mana ali munananchikunata rurashpa, ashwan Yaya Diospa Espiritunpa yuyachishkantami rurashpa kawsahunchi.

⁵Chay mana alita rurak runakunaka paykuna kikinpa munashkankunallatami rurashpa kawsanahun. Ashwan Yaya Diospa Espiritunta kasuk runakunaka chay Espiritupa yuyachishkantami rurashpa kawsanahun. ⁶Paykuna kikinpa munashkankunallata rurashpa kawsak runakunaka wiñaypa wañuytami parisinkaku. Ashwan Yaya Diospa Espiritunta kasuk runaku-

naka kushilla wiñaypata Yaya Dioswa kawsankakuna. ⁷Chay munashkankunallata rurak runakunaka Yaya Diospa kuntrankunami kanahun. Manami munanahunchu, nima atipanahunchu Yaya Diospa kamachishkanta kasushpa kawsanata. ⁸Chayrayku munashkankunallata rurak runakuna mana atipanahunchu Yaya Diosta kushichinata.

⁹Ñukanchika Yaya Diospa Espíritun ñukanchipi kawsahushkanraykumi paypa munashkanta ruranchi. Manana ñukanchi kikin munashkanchita rurachinachu. Maykan runakunapimi Kristupa Espíritun mana kawsanchu, paykunaka manami Kristupa runankunachu kanahun. ¹⁰Kristuka ñukanchipi kawsahushpan Yaya Diosta mana kasuk kashkanchiwa uchanchimanta wañushkashina kanchi, tukuy aychanchi mana ali munananchiwa, musyananchiwa, yuyayninchia pakta. Ashwan Yaya Diospa rikushkanpi ali tukushkanchirayku paypa Espíritun ñukanchita wiñaypa Yaya Dioswa kawsayta kushka. ¹¹Jesusta wañushkanmanta kawsachik Yaya Diospa Espíritun shunkunchipi kawsahushpan chay Kristuta kawsachik ñukanchipi kawsak Espiritumi chay ña wañushkashina tukushka wañuna aychanchitapas kawsachinka.

¹²Wawkikuna panikuna, chasna Yaya Diospa Espíritun ñukanchita yanapashpan Yaya Diosta kasushpa kawsananchi tiyan. Manana ñukanchi kikin munashkanchikunata rurashpa kawsashunchichi.

¹³Kankuna kikinpa munashkaykichita rurashpa kawsashpaykichika wiñaypa wañuytami parisinkichi. Ashwan Yaya Diospa Espíritun kankunata sinchikuchishpan kankuna kikin munashkaykichita manana rurashpaykichika Yaya Dioswami wiñaypa kawsankichi.

¹⁴Tukuy ñukanchi Yaya Diospa Espiritunta kasushpa kawsak runaku-

nama Yaya Diospa wawankuna kanchi.
¹⁵Yaya Dioska Espirituntami shunkunchipi churashka mana payta shuk piña patrontashina manchashpa kawsananchipa. Ashwan paypa wawankuna tukunanchipami Espiritunta shunkunchipi churashka. Chasna paypa Espíritun shunkunchipi kawsahushpanmi Yaya Diosta munashkayni Yayayni nishpa rimanchi. ¹⁶Chasna Yaya Diospa Espíritun shunkunchipi kawsahushpanmi ūukanchita riksichin paypa wawankuna kananchita. ¹⁷Yuyariyichi, chasna Yaya Diospa wawankuna kashpanchimi payka Wawan Jesusta kushichishkanshina ūukanchitapas kushichinka. Kristuta kirishpa kawsahushpanchimi payshina parisihunchi. Chasna payshina parisihushpanchimi paywa pakta Yaya Diospa suma kawsanampi achkata kushikushunchi.

**Kaypi parisihushpanchipes
yachanchimi siluma rishpanchi
Yaya Dioswa kushikunanchita**

¹⁸Kay allpapi kawsahushpanchira parisihushpanchipes yachanchi Yaya Dioswa pakta silipi atunta kushikunanchita. Chayta yakashpanchi kay allpapi parisinanchika manami imananchu.

¹⁹Tukuy Yaya Diospa rurashkanka yapa chapahun Yaya Dios rikuchinanta pikunami wawankunaka nishpa.

²⁰⁻²¹Runa uchata rurashkanraykumi tukuy kay Yaya Diospa ali rurashkanka waklichiy tukurka. Mana pay kikin munashpanchu chasna tukushka, ashwan Yaya Dios munarka tukuy rurashkanka rukuyashpan wañunanta. Chaymanta rimarka shuk puncha ūukanchi wawankunata tukuy rurashkantapas kishpichinanta tukuy parihu kushilla paywa pakta kawsananchipa. ²²Yachanchi tukuy Yaya Diospa

rurashkanka ñawpamanta pacha kunankama yapa parisishpa kananta. ²³Manami chaykunallachu parisinahun, ashwan ūukanchipas Yaya Dios Espiritunta ūukanchita kushpanpas chasnallatatami parisihunchi. Chasna ūukanchita wawankunata rurashpanpas chapahunchimi Yaya Dios kawsanampi yaykuchishpan aychanchita mushuya-chishpan wawankuna kananchita rikuchinanta. ²⁴Kirishpanchimi kishpichiy tukushkanchi. Kirina ninayan manara apihushkanchita chapana. Na apishpanchika manami chapanchinachu apinanchipa. ²⁵Chasna manara apishkanchita chapashpa kawsahushpanchi mana sampayashpa chapashpalla katinanchi tiyan.

²⁶Chay chapahushkanchika manara paktaruhushpan llakirishka kahushpanchi Yaya Diospa Espíritun ūukanchita sinchikuchin. Sampa kashkanchirayku mana alita mañanata yakashpanchi Yaya Diospa Espíritummi ūukanchirayku mañahun. Payka sinchita tapushpa mana shimikunawa rimaypata Yaya Diosta ūukanchiranti mañahun ūukanchita yanapananpa. ²⁷Yaya Diospa Espíritun Yaya Diospa munashkanllata tapushpan chaymanta Yaya Dioska yuyayninchikunata alita riksik kashpan yachan imatami paypa Espíritun ūukanchikunaryaku tapun.

**Yaya Dios ūukanchita yanapan
nima ima paymanta anchuchinanpa**

²⁸Ūukanchi Yaya Diospa akllashkankuna kashpanchi paypa munananta rurananchipa yachanchi payta yuyashpanchi tukuy pasahushkanchika alirayku kananta ali tukunanchipa.

²⁹Yaya Dioska ñawpamanta pacha yakashpan pikunami payta kasunkakuna, paykunamanta rimarka Wawan-shina ali tukunankunata. Chasna

kashpanmi Jesukristuka achka wawan-kunamanta puntiru wawan kan. Ñukanchika paypa wawkinkunashina paninkunashina kanchi.³⁰ Ñawpamanta pacha Yaya Dioska ñukanchita akllash-pan kayarka paywa pakta kawsananchipa. Chasna ñukanchita kayashpan uchanchikunamanta llakichishpan kunanka ucha illana kankichi nishpa rimarka. Chasna ucha illa kankichi nishpa rimashpan ñukanchikunata sumakta aliyachishka alitana rikuchishpa paywa pakta kawsananchipa.

³¹Tukuy chayta yakashpanchi ñimatata ashwan Yaya Diosta tapunchima? Chasna Yaya Dios ñukanchita yapa yuyashpanmi runakuna ñukanchita chiknihushpanku-napas manami atipanahunchu paymanta anchuchinata.³²Yaya Dioska manami mitsashpachu kikin Wawanta kay allpama kacharka ñukanchikunaryku wañunanpa. Chasna mana mitsashpa kikin Wawanta kachashpan ñmanachu paywa pakta ñukanchita tukuy imapipas alita yanapama?³³ Ñpitaya ñukanchi Yaya Diospa akllash-kankunataka rimama mana ali runakuna kananchita? Manami nima pi atipanchu chasna rimanata, Yaya Dios kikin uchanchikunamanta llakichishpan rimashkanrayku ali runakunana kankichi nishpa.³⁴ Ñpitaya atipama ñukanchita kastiganata? Nima pi.

*Kristu Jesusmi ñukanchiranti wañurka. Mana chayllachu. Ashwan wañushkan-manta kawsarishpanmi Yaya Diospa kuskan parti tiyahun, ñukanchirayku mañashpa kahun.³⁵ ÑImata atipama Jesukristu ñukanchita yapa yuyahush-kanta arkanata? Nima ima. Nima parisina, nima manchay, nima chikniy tukuna, nima apinayahushpankuna, nima yarkay, nima churarina pishina,

nima wañuchinayahushpankuna, nima wañuchiay tukuna, nima ima arkanata atipanchu Jesukristu ñukanchita yuyahushkanmantaka.³⁶ Kasnami Yaya Diospa shiminka killkarishka kan:

Yaya Dios, kanta kasushpa kawsa-hushpanchimi tukuy uras runakunaka ñukanchita wañuchinayanahun. Shuk obehashinami apay tukunalla kahunchi wañuchiay tukunan-chipa nishpa.

³⁷Chasna parisishpa kawsahushkanchipi Jesukristumi ñukanchita yapa yuyash-pan yanapan tukuy chay parisinakunata awantananchipa payllata kasushpa kawsananchipa.³⁸ Alita yachani, wañushpanchitas kawsahushpanchitas tukuy imakuna ñukanchipi pasahush-pantas Yaya Dios ñukanchita yuyashpa-lла kananta. Nima *angelkuna, nima sachapi yakupi wayrapi kamachik supaykuna, nima kay allpapi runaku-nata kamachik apukuna, nima kunan pasahushkakunapas, nima shuk manara pasahushkapas atipanchu arkanata Yaya Dios ñukanchita yuyahushkanmantaka.

³⁹Chasnallatatami nima wayrapi kawsak kamachikkuna, nima allpapi kawsak kamachikkuna, nima allpa ukupi kawsak kamachikkuna, nima maykan Yaya Diospa rurashkankuna atipana-hunchu arkanata Yaya Dios ñukanchita yuyashpalla katinanta. Amunchi Kristu Jesusta ñukanchima kachashpanmi rikuchishka ñukanchita yapa yuyahush-kanta.

Yaya Dios akllashka
israel runakunata

9 ¹Wawkikuna panikuna, kunan kankunata rimanaynika shutipami kan. Ñukaka *Kristuta kirik kashpay-nimi Yaya Diospa Espíritun shunkuynipi riksichiwahun rimahushkayni shutipa

kananta. ²⁻³Israel masinikuna wawkinishina kashpankuna yapami llakirishpa kawsahuni, Kristuta mana kirihushkankunaryku. Mana Kristuta kirihushpan-kunami Yaya Dios paykunata kastig-nan tiyan. Chayrayku ūuka atipayni-maka, munaynima paykunaranti Yaya Dios Kristumanta anchuchiwashpan kastigawananta chay israel masiniku-nata kishpichinaynipa. ⁴Ñawpa kawsak yaya rukunchi Israel shutiyupa miraymantami kanchi. Yaya Dioska ūukanchita akllarka paypa wawankuna kananchipa. ūukanchikunata rikuchirka suma atun yachayyu kananta. Ñawpa yaya rukunchi wañukunata tukuy ūukanchi israel runakunaryku paktachinan shimita rimarka. Yaya rukunchi Moisés wañuta kamachish-kanta kushpan ūukanchikunata yachachirka imashnami alita rurashpa kawsanaka. ūukanchikunata yachachirka imashnami payta kushichishpa kawsanaka. Chaymantapas yaya rukunchi wañukunata ūukanchiku-narykupas ñawpa rimarka shuk puncha kankunata kishpichikta kachasha nishpa. ⁵Chay israel masiniku-naka ūukawa pakta Yaya Dios ñawpa akllashkan yaya rukuchikunapa miraymantami kanahun, maykunkuna-mantami Kristuka runa wawa tukushpan wawayarinka. Chaymantapas payta tukuya kamachik kikin Diosmi kan. Chasna kashpan akuychi tukuy uras payta kushichishpa kawsashunchi. Chasna kachun.

**Yaya Dios tukuy
rimashkanta ruranka**

⁶Manami rimanichu Yaya Dios ūukanchi israel runakunata rimashkanta mana paktachihushkanta. Ashwan rimanimi mana tukuychu yaya rukunchi Israel wañupa miraymanta runakuna

Yaya Diospa wawankuna kanahun. ⁷Chasnallatata chay yaya rukunchi Abraham wañupa miraymanta runaku-napas mana tukuychu kikin miraynin kanahun Yaya Diospa rikushkampika. Ashwan Yaya Dioska Abrahamta rimarka kasna: Wawayki Isaakmantallami kikin miraykikuna kankakuna nishpa. ⁸Chasna Yaya Dios Abrahamta rimashkanka ūukanchita asirtachinmi mana shuk runamanta mirashkanchiray-kuchu Yaya Diospa wawankuna kanchi. Ashwan maykunkunatami Yaya Dios shuk rimashkan shimita paktachishkan-rayku wawankunata ruran, paykuna-llami shutipa wawankuna kanahun, chaymanta shutipa Abrahampa miray kanahun Yaya Diospa rikushkampi. ⁹Yaya Dios Abrahamta Isaakwa paktachinan shimita rimashkanka karka kasna: Shuk watamanta kuti shamuhushpaynimi warmiki Saraka kari wawata wawayanka nishpa.

¹⁰Chaymantapas rikuychi, ishkaytami chay ñawpa yaya rukunchi Isaak wañupa warmin Rebekaka wawayarka. Chay ishkay wawankunaka yaya rukunchi Isaakmantami karkakuna. ¹¹⁻¹³Chay ishkay wawakuna manara wawayarihushpankuna manara nima ali nima millaypa ruranata yachahushpan-kunara Yaya Dioska Rebekata rimarka: Chay puntiru wawayarishka wawaykimi washa wawayarishka wawaykita kasunka nishpa. Chaymantapas Yaya Diospa rimashkanka kasnami killkarishka kan: Jakobtami yuyashkani, ashwan wawkin Esautaka mana yuyash-kanichu nishpa. Chasnami Yaya Dioska pay kikin munashpan akllan maykanmi paypa wawan kanka nishpa. Chay ishkay Isaakpa wawankunamantaka shukllatami akllarka paypa wawan kananpa. Manami shuk paykunamanta alita rurahushkanraykuchu akllarka.

¹⁴Chasna Yaya Dioska shukkunataka yanapashpan shukkunataka mana yanapashpan ñrimanchimachu Yaya Dioska manami alitachu rurahun nishpa? Manami chasnachu. ¹⁵Ñawpa Yaya Dioska Moisesta rimarka: Llakichishami maykantami munani llakichinata. Yanapashami maykantami munani yanapanata nishpa. ¹⁶Chasna kashpanmi mana ñukanchi kikin munashpallachu sinchikushpa atipanchi kishpinata. Ashwan Yaya Diosmi ñukanchita llakichishpan kishpichiy tukunchi. ¹⁷Chasnallatata ñawpa killkachishkanpi Yaya Dioska Egipto allpapi kamachik atun aputa rimarka: Ñukami kanta churashkani atun apu kanaykipa. Mana kasuwashkaykirayku kanta kastigashpa atun yachaynita rikuchisha. Chasna rurashkaynimanta tukuy allpapi kawsak runakuna ñukamanta uyankakuna nishpa. ¹⁸Chay apuwa rurashkanmanta yachanchi Yaya Dioska shuk runakunataka pay kikin munashpan llakichinanta, chaymanta shuk runakunataka paykuna kikin munashkankunallata ruranankunapa sakinanta. Chasna sakishpanmi paykunaka mana payta kasunahunchu.

**Yaya Dioska pay kikin
munashpanmi shuk shuk
runata akllan**

¹⁹Shukkunaka rimanahuma: Yaya Dios kikin ñukanchiwa munashkanta rurashpanka ñimaraykuta ñukanchita mana alita rurashkanchimanta kastiganayan? Manami nima maykan atipanchu Yaya Diospa munahushkmanta chikanta ruranata nishpa. ²⁰Ama chasna yuyariyichihu, Yaya Dios mana ali kananta. Kanka runa kashpayki ñita kanki chasna atun yachayyu Yaya Diosta piñarinaykipaka? Rikuychi, sapiramanta rurashka manaka manami

atipanchu rimanata payta rurakta manami alitachu rurawashkanki nishpa. Chasnallatatumi ñukanchita rurak Yaya Diosta mana atipanchichu rimanata manami ñukanchita alitachu rurashkanki nishpa. ²¹Chay mankata rurakka munashkantami ruran. Chay sapiramantallami shuk mankata fiestaraykulla ruran, shuktaka tukuy uras llankanana ruran.

²²Chasnallatatumi Yaya Dioska uchayu runakunata kastigashkanwa piñayninta yachayninta rikuchinayarka. Paykuna Yaya Diospa kastigananmanta mana kishpinata atipashpankunapas Yaya Dioska achkata llakichishpanmi unayta awantarka payta piñachik runakunata manara kastigashpa.

²³Payka yapa atun ali yachayyu kananta rikuchinanpami ñukanchita yuyashpan uchanchikunamanta llakichishka, aliyachishpan paywa pakta wiñaypa kawsananchipa. Ñawpamanta pachami yachashpan pikunami payta kasunkakuna, pikunami mana kasunkakunachu, yuyarishka ñukanchita chasna sumakta aliyachishpan kawsanani yaykuchinata. ²⁴Chasnami Yaya Dioska ñukanchita wawankuna kananchipa kayashka tukuy allpakanamanta. Israel runakuna mana israel runakuna kashpanchipas payka shukkunata ñukanchimanta akllashka paypa wawankuna kananchipa.

²⁵Chasnallatatumi chay ñawpa Yaya Diospa yachayninha yachachik Oseaspas killkarka Yaya Diospa rimashkanta kasna:

Ñukaka chay mana kasuwak runakunatami kayasha wawaynikuna kanankunapa. Chasna kayashpaynimi chay mana yuyashkayni runakunaka kikin yuyashkayni runaynikunami kankakuna nishpa.

²⁶Chaymantapas chay yachachik Oseas Yaya Diospa rimashkanta killkarka kasna:

Maykankunatami ñawpa rimashkani kankunaka mana runaynikunachu kankichi nishpa, paykuntaka runakunaka shuk puncha rimankakuna kawsa Yaya Diospa wawankunami kankichi nishpa.

²⁷Chaymanta ñawpa Yaya Diospa yachayninwa yachachik Isaiaspas ñukanchi israel runakunamanta kasnami rimarka:

Chay yaya rukunchi Israelpa^a miraykuna tiyushina mana yupapya kashpanchipas shuk shukkunallami kishpichiy tukushunchi. ²⁸Yaya Dioska rimashkanta utkalla paktachik kashpan tukuy kay allpapi payta mana kasuk runakuntaka kastiganka nishpa.

²⁹Chaymantapas chay yachachik Isaiaska killkarka kasna:

Tukuya atipak Yayanchi Dios mana ñukanchita llakichima karka, chay Sodoma llaktata, Gomorra llaktatapas kastigashkanshunami ñukanchitapas sinchita kastigama karka nishpa.

Pablo yachachin israel runakuna
Kristuta mana
kirinayashkankunamanta

³⁰¿Imatata chay killkarishkaka ñukanchita yachachin? Kankuna mana israel runakuna Yaya Dios kankunata uchaykichikunamanta llakichinanta mana yuyarihushpaykichipas *Kristuta kirihushkaykichiraykumi payka kankunata llakichishka. ³¹Ashwan ñukanchi israel runakuna, Moisespa

killkashkan kamachishkata paktachinayashpa Yaya Diospa rikushkanpi ali tukunata munashpanchipas manami atiparkanchichu. ³²¿Imaraykuta mana atiparkanchichu ali tukunata Yaya Diospa rikushkanpi? Kristuta mana kirinayashkanchiraykumi mana atiparkanchichu ali tukunata. Ashwan yuyarirkanchi Moisespa killkashkan kamachishkata kasuhushkanchiwami ali tukunchi Yaya Diospa rikushkanpi nishpa. Kristuta mana munashpanchika shuk atun rumipi takarishpa urmakku-nashinami kanchi. ³³Kristu shuk rumishina kananmanta Yaya Dioska ñawpa killkachishkanpi kasna riman:

Llaktayni Jerusalenpimi churasha shuk atun rumita. Chay rumipimi achka runakuna takarinkakuna. Ashwan maykan runami chay rumipi kimirin, payraykuka mana yankachu kanka, yanapay tukunkami nishpa.

Kristuta kirishkanchiraykulla Yaya Diospa rikushkanpi ali tukunchi

10 ¹Wawkikuna panikuna, ñukaka tukuy shunkuynimanta pacha munashpaynimi Yaya Diosta mañahuni israel masinikuna *Kristuta kirik tukunankunapa, uchata rurak kanankunamanta kishpichirishka kanankunapa.

²Yachani chay israel masinikuna Yaya Diosta kasunata yapa munahushkankunata. Chasna kasunata munahushpanku-napas manami alita asirtanahunchu Yaya Diospa munashkanta. ³Paykunaka mana yachanahunchu, Jesukristu wañushkanrayku Yaya Dios ñukanchita uchanchikunamanta llakichishpan ali kananchita rikunanta. Ashwan paykuna kikin rurashkankunawa ali tukunayash-

pankuna mana munanahunchu Jesukristuta kirishpankuna Yaya Dios paykunata alita rikunanta.⁴ Moisespa killkashkan kamachishkata paktachinata mana atipashpanchimi Kristuka shamurka tukuy uchanchikunaryku wañunarpa. Kristuta kirishpanchimi Yaya Diospa rikushkanpi ali tukunchi.

⁵ Shuk runa pay kikin rurashkanwa Yaya Diospa rikushkanpi ali kanayashpanka tukuy Moisespa killkashkan kamachishkakunata alita paktachishpa kawsanan tiyan. Moiseska killkarka: Shuk runa tukuy Yaya Diospa kamachishkanta paktachishpa kawsashpanka wiñaypata Yaya Dioswa kawsanka nishpa.⁶ Maykankunami ali tukunahun Yaya Diospa rikushkanpi Kristuta kirishkankunaryku, paykunaka atipanahun rimanata: Kristuka ña allpama shamushka. Ama yuyariyichihu ¿pita atipama Yaya Diospa Kachanan Kishpichikta silumanta pushak rinata? nishpa.⁷ Kristu ña kawsarimushka. Ama yuyariyichihu ¿pita atipama wañushkakunama rinata Yaya Diospa Kachashkan Kishpichikta wañushkanmanta kawsachinanpa? nishpa.⁸ Kristuta kirikkunaka yachanchi mana karupi maskananchita. Kasna killkarishkaka shutipa kan:

Yaya Diospa shimin kankunawa kahun asirtaypa. Shimikichiwa chay shiminta rimashpa kahunkichi, chaymantapas shunkuy-kichipi wakaychahunkichi nishpa.

Chay shimitami ñuka Pablo kankunata yachachishpayni rimani Jesukristuta kiriychi nishpa.⁹ Kankuna rimashpaykicha Jesusmi Amuyni nishpa,

chaymantapas shunkuykimanta pacha kirishpaykichika Yaya Dios payta wañushkanmanta kawsachishkanta, Yaya Dioska kankunata kastigananmanta kishpichinka.¹⁰ Shunkuchimanta pacha Jesukristuta kirishpanchimi Yaya Dioska uchanchikunamanta llakichishpan ñukanchita ali kananchita rikunka. Chaymanta Jesukristuka Amuynimi nishpa rimashpanchimi Yaya Dioska ñukanchita kastigananmanta kishpichinka.

¹¹ Chasna Yaya Diospa ñawpa killkachishkanpipas^b kasnami nin:

Maykan runami Yaya Diospi sinchikun, chay runaka wiñaypata kawsanka nishpa.

¹² Israel runakuna mana israel runakuna kashpanchipas Yaya Dioska manami valichinchu shuk runata ashwanta shukmanta. Payllami tukuy runakunapa apun kan. Tukuy payta mañakkunatami chasnalla achkata yanapan.¹³ Yaya Diospa rimashkanka kasnami nin:

Tukuy Yaya Diosta tapuk runakunta-mi payka uchankunamanta llakichishpan kastigananmanta kishpichinka nishpa.

¹⁴ Chasna kashpanpas ¿imashnataya Yaya Diosta mañanahuma, mana Kristuta kirik kashpankunaka? ¿Imashnataya Kristuta kirinahuma, paymanta nima maykan runa rimashkanta uyashka kashpankunaka?

¿Imashnata uyanahuma, nima maykan runa Kristumanta yachachihushpanka?

¹⁵ ¿Imashnataya shuk runa Kristumanta yachachima, nima maykan payta kachashpanka? Yaya Dios ñawpa killkachishkanpi riman:

Yapa ali kanahun Yaya Diospa kishpichik shiminta runakunata yachachishpa purikkunaka nishpa.

¹⁶Chasna chay yachachik runakuna yachachishpankunapas manami tukuychu kasunahun chay suma ali shimita Jesukristu runakunata kishpichinanimanta. Chasnallatatami Yaya Diospa yachayninwa yachachik Isaias wañupas rimarka:^c

Yayayni Dios, rimashkaykita yachachishparyipas achka runakuna manami kirinahunchu nishpa.

¹⁷Chasna kashpan yachanchi runakuna yachachinanchita puntiru uyanankuna tiyan kirik tukunankunapa. Chay yachachinanchi shimika kanmi Jesukristu runakunata kishpichin nishpa.

¹⁸Shukkunaka yuyarinkichichari ¿manachu tukuy israel runakuna uyashkakuna Yaya Diospa shiminta? Ari, uyashkakunami. Kasnami Yaya Dioska David wañuta killkachirka:

Tukuy allpapi runakunaka Yaya Diospa shiminta yachachikkunapa rimashkankunata uyashkakuna. Paykunapa yachachishuskunkuna shimika nima pi yuyarishkan karu llaktakunamapas paktashka nishpa.

¹⁹Chaymantapas yuyarinkichichari ¿manachu israel runakuna asirtashkakuna Yaya Dios tukuy kay allpapi kawsak runakunata kishpichinayahushkanta? Ari, yachashkakunami. Moisés wañu Yaya Diospa rimashkanta puntiru killkarka kasna:

Kankuna israel runakuna mana kasuwashpaykichimi ñukaka manara riksiwak mana israel runakunata yuyashpa yanapasha. Chasna rurashpayni kankunata munachisha yanapanaynita. Chay kankunapa rikush-

kaykichihi mana asirtak runakunata yuyashpayni kankunata piñachisha nishpa.

²⁰Chaymanta Isaias wañupas mana manchashpa Yaya Diospa rimashkanta killkarka kasna:

Ñukata mana maskawak runakuntami yanapashkani tariwanankunapa. Ñukata mana riksiwakunata riksichishkani Yaya Dios kanaynita nishpa.

²¹Chaymantapas ñukanchi israel runakunamanta Yaya Diospa rimashkanta Isaiaska killkarka kasna:

Tukuy punchami mana kasuwak, mana munawak runaynikunata makiyashpa chapashpaynipas mana ñukama shamushkakunchu nishpa.

Israel runakunamanta Kristuta kirikkunalla kishpishka kankakuna

11 ¹Kunanka yuyarinkichichari ñukanchi paypa runankunata Yaya Dioska sakishkachari nishpa. Manami sakishkachu. Ñukapas israel runami kani. Yaya rukunchi Abraham wañupa miraymanta, paymanta mirashka Benjamín wañupa miraymantami kani. ²Yaya Dioska ñawpamanta pacha ñukanchi israel runakunata akllarka paypa wawankuna kananchipa. Chasna paypa runankuna kashpanchimi kunanka ñukanchikunata mana sakishkachu. ¿Manachu yachankichi Yaya Diospa yachayninwa yachachik Elias ñawpa killkashkanta? Payka Yaya Diosta mañashpan yaya rukunchi wañukunapa uchankunamanta rimarka kasna:

³ Yayayni Dios, israel masinikunaka kanpa yachaykiwa shimikita alita yachachikkunata

wañuchishkakunami. Chaymanta uchanchikunata llakichinaykipa wiwakunata rupachinanchi tuchpashinakunatapas waklichishkakunami. Ñukallami kanta kasuk kawsa kiparishkani. Kunanka ñukataspas wañuchiwanayashpa katihunkunami nishpa.

⁴Chasna Elias rimashpan Yaya Dioska aynirka:

Manami kanllachu paykunamanta kishpishkanki. Ashwan kanchis waranka kasuwak runakunataspas yanapashpayni kawsa kahunkuna. Paykunapas runa rurashka yanka dios *Baalpa puntanpi mana kunkurishpankuna mañashkakunachu nishpa.

⁵Chasnallatatami kunanpas Yaya Dioska yapa yuyak kashpan ñukanchi israel runakunamanta shukkunata akllashka payta kasushpa kawsananchipa.

⁶Chasna ñukanchita akllashpan yapa yuyahushkanraykumi payta mana kasuk kashpanchipas yachanchi mana alita rurahushkanchiraykuchu Yaya Dios ñukanchita akllashkanta paypa runankuna kananchipa. Alita rurahushkanchirayku ñukanchita akllama karka, mana atipanchimachu rimanata ñukanchita llakichik kananta.

⁷Tukuy chayta yachashpanchi ñimatata ñukanchita yuyachin? Tukuy ñukanchi israel runakuna yapa munashpanchipas Yaya Diospa rikushkanpi ali tukunata manami atiparkanchichu. Yaya Diospa akllashkankunallami ali tukushkanchi paypa rikushkanpika. Chay shukkunaka mana Jesukristuta kirishpankunami taparishka rinkriyushina tukushkakuna. ⁸Chasna tukunan-

kunamantami Yaya Diospa ñawpa killkachishkanpi nin:

Mana payta kasushkankunaryku Yaya Dioska paykunapa yuyayninkunata pantachichirka mana asirtanankunapa. Chasna kashpan ñawiyu kashpankunapas wiskushinami kanahun, rinkriyu kashpankunapas taparishka rinkriyushinami kanahun nishpa.

Kunankamami chasna runakunaka kanahun. ⁹Kasnami ñawpa apu David wañuka killkarka:^d

Yaya Dios, kastigay chay kanta mana kasuk runakunata. Maykunkunapimi kushikunahun, chaytaka ruray paykunaryku shuk tukllataschina. Paykuna kikin kushikushpa rurashkankunawa paykunata kastigay. ¹⁰Wiskushina tukunahuchun shutipa kashkata mana riksinata atipanankunapa. Llashata aparihushkashina wiñaypata parisishpa kawsanahuchun nishpa.

**Mana israel runakuna ama
yuyarinahuchun israel
runakunamanta ashwan ali
kanankunata**

¹¹Kunanka yuyarinkichichari ¿Yaya Dioska mana kasuk israel runakunata wiñaypachu sakishka nima ima uras kuti llakichinana? Manami wiñaypachu sakishka. Ashwan Yaya Dioska israel masinikuna mana payta kasushkankunarykumi kankuna mana israel runakunata llakichishpan yanaparka paypa runankuna tukunaykipa. Payka yuyarishka israel runakuna chayta rikushpankuna paykunapas

chasna yanapay tukunankunapa
Wawaynita kasushpa sinchikunkakuna
nishpa.¹² Israel masinikuna mana payta
kasushpankunami Yaya Dioska kankuna
mana israel runakunatana llakichishpan
achka alikunata kankunarayku rurarka.
Chay israel masinikuna kutikashka Yaya
Diosta kasushpankuna payka ashwan
alikunatami tukuy runakunarayku
ruranka.

¹³ Chasna kashpan kankuna mana
israel runakunata rimani: Kushikuni
Yaya Dios kachawashkanrayku tukuy
kankuna mana israel runakunata
Jesukristumanta yachachinaynipa.

¹⁴ Yapa munani kankunata yachachish-
kaynirayku israel masinikunapas chayta
munashpankuna rimanankunapa
ñukanchitapas yachachiy Yaya Diospa
shiminta nishpa. Chasna munani
paykunatapas yanapanata, Jesukristuta
kirishpankuna Yaya Diospa kastiganan-
manta kishpichiy tukunankunapa.

¹⁵ Yaya Dios israel masinikunata
sakishpan kankuna mana israel runaku-
natana yanapashka paywa kushilla
kawsanaykichipa. Chasna kashpan
imashna atuntashi runakuna yanapay
tukunkakuna Yaya Dios israel masiniku-
nata kuti llakichinan uras? Paykunaka
wañushkamanta kawsarishkashinami
kankakuna.¹⁶ Yaya Dios ñukanchi israel
runakunapa yaya rukunchikunata
runankunata rurashpan payta kirishpan-
kuna yachanchi ñukanchi paykuna-
manta mirashka runakunapas paypa
runankuna kananchita paykunashina
kirishpanchi. Imashnami shuk kaspiqa
ankunkuna ali kashpankuna ramakuna-
pas ali kanahun, chasnashinami chay
ñawpa kirikkuna Yaya Diospa
runankuna kashpankuna ñukanchi
paykunamanta mirashka Yaya Diosta
kirikkunaka chasnalla paypa runankuna
kanchi.

¹⁷ Imashnami shuk tarpu kaspiqa
raman mana muyuyashpanka amunka
pitishpan chay ramata wichun, chasna-
shinami israel masinikunamanta mana
kirikkunata Yaya Dios wichurka
manana paypa runankuna kanankunapa.
Sachapi wiñashka kaspiqa ramanta
pitishpan chay tarpu kaspiqa wiñananpa
ratachishpa watashkatashina Yaya Dios
kankuna mana israel runakunatana
akllashka ñukanchi israel runakuna-
manta kirikkunawa pakta paypa
runankuna kanaykichipa. Imashnami
chay sachamanta rama ratachirishkaka
chay ali tarputa yakunmanta upyashpa
alita wiñan, chasnashinami Yaya Dios
ñukanchi israel runakunarayku ali
ruranayashkanka kuan kankunarayku-
pas tukurka.¹⁸ Chasna kashpan ama
yuyariychichu Yaya Diospa wkichushkan
israel masinikunamanta ashwan ali
kanaykichita. Ama yuyariychichu
kankuna Yaya Diospa runankuna
tukushkaykichirayku ñukanchi israel
runakunamanta paypa runankuna
sinchikuchiy tukushkanchita. Yuyari-
chi kaspiqa ramanka sapinta mana
wiñachinanta. Ashwan paypa sapinmi
ramankunata wiñachin.

¹⁹ Kankunaka yuyarinkichichari Yaya
Dioska ñukanchi ali kananchita
rikushpan israel runakunata wkichushka
ñukanchitana akllananpa nishpa. Ama
chasna yuyariychichu.²⁰ Shuti Yaya
Dioska chay israel masinikunata
sakishkami, Jesukristuta mana
kirishkankunarayku. Kankunata
Jesukristuta kirihushkaykichirayku
Yaya Dioska runankunata rurashka.
Chasna kashpanpas ama yuyariychichu
kankuna kikinmanta ali kanaykichita,
ashwan Yaya Diosta manchashpa alita
kasushpa kawsaychi.²¹ Yaya Dios kikin
ñukanchi akllashkan israel runakuna-
manta Jesukristuta mana kirikkunata

paymanta anchuchirka. Chasna kashpan ashwan kankunataka paymanta anchuchinkami mana payta kasushpaykichika.²² Rikuychi, Yaya Dioska runakunata yapa yuyak kashpanpas paypas kastigakmi kan mana payta kirikkunataka. Ñukanchi israel runakunamanta mana payta kirikkunataka kastigarkami. Kankunataka shutipa payta kirihuskaykichita rikushpanmi llakichirka. Chayrayku payta kirishpalla katyichi paypas kankunata yuyashpalla katinanpa. Payta sakishpaykichika kankunatapas wichunkami.²³ Ñukanchi israel runakunamanta Jesukristuta mana kirikkuna paytana kirishpankuna Yaya Dioska paykunata mushumantami runankunata ruranka. Yaya Dioska atipan chay sakishkan runakunata kutikashka paypa runakunata ruranata.²⁴ Kuti kankunata yuyachini. Kankuna mana israel runakuna kashpaykichipas Jesukristuta kirishpaykichi Yaya Dioska kankunata runankunatami rurashka, imashnami sachapi wiñak kaspiqa ramanta pitishpa ali tarpu kaspiqa ratachishpa watashkata-shina, maykanmi nima shuk tarpupa amun rurama. Chasna kankunawa rurashpan Yaya Dios ashwan israel masinikunata payma kutishpankuna kushikushpa kutikashka runankunata ruranka, ali tarpumanta pitishka ramakunata kuti kikin kaspinpillatata ratachishpa watashkatashina.

Yaya Diosmi israel runakunatapas kishpichinka

²⁵ Wawkikuna panikuna, munanimi Yaya Diospa yuyayintia ñawpa pakalla kashkata kunanka alita yachanaykipcha, mana yuyarinaykipcha mana kirik israel runakunamanta pasa kanaykichita. Rikuychi, achka israel masinikunaka Jesukristuta manara

kirinkakunachu, tukuy chay Yaya Diospa kayanan mana israel masikichikuna Jesukristuta kirkankunakama.

²⁶ Chasna achka mana israel masikichikuna Jesukristuta kirkushpankuna tukuy israel masinikuna payta kirishpankuna Yaya Dioska paykunatas uchankunamanta llakichishpan kishpichinka. Kasnami killkarishka kan:

Chay Jerusalén llaktamanta shuk kishpichik shamunka yaya rukunchi Jakob wañupa miraymanta runakuna mana alita rurashkankunata pichananpa.²⁷ Chasna uchata rurashkankunata chay kishpichik pichashpanmi uchankunamanta llakichishpayni pichasha nishkaynita paktachisha nishpami Yaya Dioska rimarka.

²⁸ Achka israel masinikuna chay suma ali shimita Jesukristu runakunata kishpichinanmanta mana munashkankunarykumi Yaya Diosta piñarirkakuna. Chasna mana munashkankunarykumi *Kristumanta yachachikkuna kankunama paktashkakuna Kristupa kishpichishkan runakuna tukunaykipcha. Chay israel masinikuna Yaya Diosta piñarik kashpankopas payka ñawpa yaya rukunchi wañukunata akllashkanraykumi paykunataka munahunlla.²⁹ Yaya Dioska akllashkan runakunataka manami sakinchu. Llakichinanpa rimashkantaka paykunapi paktachinkami.³⁰ Ñawpa kankunaka Yaya Diosta mana kasushpachu kawsapayarkankichi. Kunanka israel masinikuna mana Yaya Diosta kasushpankunami payka kankunatana llakichihun.³¹ Kunankamami chay israel masinikunaka Yaya Diosta mana kasunayanahunchu. Paykuna mana kasunayashpankunami Yaya Dioska kankunata llakichishka. Shuk puncha

paykuna kuti Yaya Diosta kasushpanku-nami payka kankunatashina paykunata-pas llakichinka.³²Yaya Dioska tukuy runakunatami sakishka payta mana kasushpa kawsananchipa. Chasna kawsahushkanchita mana sakinata atipashpanchi Yaya Dios munarka ñukanchi israel runakunata, kankuna mana israel runakunatas llakichishpa-lia kishpichinata.

³³Maytukuy yachayyutaya Yaya Dioska. Payka tukuya yachak, tukuya asirtakmi. Manami nima pi atipanchu yuyayninkunata yachanata. Nima pi atipanchu asirtanata ruranankunata.

³⁴Kasnami killkarishka kan:

{Pita atipan Yaya Diospa yuyay-ninta riksinata? {Pita payta yachachirka imatami rurana-tyian nishpa? Nima pi.

³⁵Chaymantapas kasnami killkarishka kan:

{Pita payta shuk imata kushka chaymanta tapushpan kutichi-narpa nishpa? Nima pi.

³⁶Yaya Diosmi tukuy ima tiyashkaku-nata rurarka. Pay munashkanraykulla tukuy chay tiyashkakunaka kunankama tiyan. Tukuya rurarka payllapa kananpa, payllata kushichishpa kawsanarpa. Chayrayku akuychi tukuy uras Yaya Diosllata kushichishpa kawsashunchi. Chasna kachun.

Jesukristuta kirikkuna Yaya Diospa munashkanllata rurashpa kawsanahuchun

12¹Wawkinikuna panikuna, Yaya Dios kankunata llakichish-kanrayku kankuna kikinta kawsata payta kuriychi kawsanaykichikama tukuy shunkuykichimanta pacha paypa munashkanta rurashpa kawsanayki-chipa. Chasna rurashpa Yaya Diosta kushichiychi. Chasna munashkanta

rurashpa payta kushichishpanchilla Yaya Dioska kushikun.²Ama kawsay-chichu Yaya Diosta mana kasuk runaku-nashina. Ashwan Yaya Diospa yuyarihushkantashina alikunallata yuyarinata munashpa payta tapuychi yuyaynikichita mushuyachinanza. Chasna Yaya Diosshina yuyarishpayki-chika paypa munashkantami asirtankichi. Yaya Dioska munanmi ashwanta ashwanta alikunallata rurashpa kushikushpa payllata kushichinayki-chipa.

³Yaya Dioska ñukata yuyawashpanmi akllawashka kankunata yachachinay-nipa. Chayraykumi tukuy kankunata rimani, ama kankuna kikinmanta yuyariyichichu kanaykichimanta ashwan kanaykichita. Ashwan shutipa kanayki-chillata yuyariychi, imashnami Yaya Dios kankunata atipachishka payta kirishpa alikunata ruranaykichipa.

⁴Rikuychi, shuklla aychayu kashpanchi-pas achka imanchikunami tiyan, umanchi, makinch, chakinchi, ñawinchi, shinchi, rinkrinchi. Tukuy chay imanchikunaka chikan chikantami ruranahun.⁵Chasnallatatumi ñukanchi-kunapas kanchi. Achka runakuna kashpanchipas *Kristuta katihushkan-chiraykumi shuk aychashinalla kanchi. Chasna shuk aychashinalla kashpanchi-pas chikan chikanta ruranata atipak kashpanchi shukwa shukwa parihu yanapanakushpa kawsananchi tiyan.

⁶Yaya Dios kikin munashpanmi ñukanchikunata karan shukta shukku-namanta chikan chikanta atipachirka. Chasna kashpanmi shuk ñukanchiku-nata yachayta kushka paypa shiminta rimananchipa. Chasna yachayninta kushpanmi payta kirishpa runakunata shiminta rimananchi tiyan.⁷Shuk ñukanchikunata Yaya Dios yachayninta kushka shukkunata yanapananchipa.

Chasna kashpanka alita paykunata yanapananchi tiyan. Shuk ñukanchikunata Yaya Dios yachayta kushpan alita yachachinanchipa, alita yachachinanchi tiyan.⁸ Yaya Dios shuk ñukanchikunata yachayta kushpan kirik masinchikunata sinchikuchinanchipa, alita shuk runakunata sinchikuchinanchi tiyan. Yaya Dios shuk ñukanchikunata imakunata kushpan shukkunata yanapananchipa, mana mitsashpa ali shunkuwa yanapananchi tiyan. Shuk ñukanchikunata Yaya Dios yachayta kushpan kirik masinchikunata kamachinanchipa, ali yuyaywa kamachinanchi tiyan. Yaya Dios shuk ñukanchikunata yachayta kushpan parisihushkakunata yanapananchipa, paykunata yuyashpa kushilla yanapananchi tiyan.

Kristuta kirikkuna alita ruranankunamanta yachachin

⁹Wawkikuna panikuna, ^{*}Kristuta kirikkuna kashpaykichi shukwa shukwa shutipa yuyanakushpa kawsaychi. Tukuy mana ali ruranakunataka chiknishpa ama ruraychichu. Ashwan alikunallata rurashpa kawsaychi. ¹⁰Yuyanakuk wawkikunashina shukwa shukwa sumakta yuyanakushpa kawsaychi. Kirikpura karan shuk kirik masinkunamanta alita yuyarishpa kawsachun ñukamanta alimi nishpa.

¹¹Alikunata ruranata ama killaychichu. Tukuy shunkuykichimanta pacha kushikushpa Amunchi Jesukristuta kasushpa kawsaychi. ¹²Kushikushpa chapaychi Jesukristuwa pakta kawsak rinaykichita. Parisihushpaykichipas payllapi sinchikuychi. Tukuy uras mana sampayashpa Yaya Diosta mañaychi.

¹³Yaya Diosta kasuk masinchikunapa munashkankuna pishishpanka yanapaychi. Maykan Kristuta kirik runakuna kankunata pasyanapa shamushpanka kushilla wasikichipi yaykuchiychi.

¹⁴Ama kankunata parisichik runakunata piñariyichichu. Ashwan paykunata rimaychi Yaya Dios kankunata yanapashpa kushichichun nishpa.

¹⁵Shuk runakuna kushilla kahushpanku-naka kankunapas kushilla paykunawa pakta kaychi. Shuk runakuna llakiyya wakahushpankunaka kankunapas llakirishpa paykunawa pakta wakaychi.

¹⁶Kankunapura parihu shuk yuyayllawa kawsaychi. Ama shukkunamanta pasa tukunayaychichu. Ashwan maykankunami runakunapa rikushkanpi mana valikshina kanahun, paykunata alita yanapak kaychi. Ama yuyariyichichu kankunalla tukuymanta ali yachak kanaykichita.

¹⁷Shuk runa kankunata mana alita rurashpanka ama kankunapas payta chasnallatata ruraychichu. Ashwan alikunallata ruranata munaychi tukuy runakuna yachanankunapa Yaya Diospa wawankuna kanaykichita. ¹⁸Shuk runakuna kankunata piñachiushpanku-naka ama piñariyichichu. Tukuy runakunawa kushilla kawsaychi. ¹⁹Wawkikuna panikuna, shuk runakuna kankunata parisichishpankunaka ama paykunata rantipaychichu. Ashwan chasnalla sakiychi Yaya Dios paykunata kastigananpa. Kasnami Yaya Dios ñawpa killkachishkanpi riman:

Ñukami tukuy mana alita rurak runakunawa rurashkankunamanta alichasha. Ñukami paykunata kastigasha nishpa.

²⁰Chaymantapas kasnami riman:

Kankunata chiknik runakuna yarkahushpankunaka karaychi, upyanayahushpankunaka upyachiychi. Chasna paykunata karashpaykichi upyachishpaykichi paykunaka pinkarinkaku-nami nishpa.

²¹Shukkuna kankunata millaypata rurahushpankuna ama yuyariyichichu

ñukapas payta millaypata rurashara nishpa. Ashwan Yaya Diospi sinchikushpa ali yuyawa paykunata kunaychi mana ashwan millaypata rurashpa katinankunapa.

**Pablo yachachin apukunata
kasunamanta**

13 ¹Wawkikuna panikuna, Yaya Dios munashpanmi shuk runa apu tukun. Pay mana munashpanka nima pi atipamachu apu tukunata. Chayraykumi kankunaka tukuy chay kamachik apukunata kasunaykichi tiyan. ²Maykankunami chay apukunata mana kasunahunchu, Yaya Diostami mana kasunahunchu. Chayraykumi paykunaka kastigarishka kankakuna. ³Alita rurak runakunaka manami apukunata manchanahunchu, ashwan mana alita rurak runakunami manchanakuna tiyan kastigarinankunata. Apukunata manhashpa kawsanata mana munashpaykichika alita rurashpa kawsaychi. Chasna kawsashpaykichimi apukunaka kankunata ali runakuna kanaykichita rimankakuna. ⁴Yaya Dios munashpanmi chay apunchikunata churashka ñukanchita kuyranankunapa. Kankuna mana alita rurak kashpaykichika paykunata manchanaykichi tiyan. Mana yankachu Yaya Dioska paykunata churashka runakunata kastiganankunapa. Chay apukuna Yaya Diospa kamachishkan kashpankunami mana alita rurak runakunata kastiganahun. ⁵Chasna kashpanmi tukuy chay apukunataka kasunanchi tiyan. Mana kastiganankunata manhashpanchillachu paykunata kasunanchi tiyan, ashwan kasuna ali kananta yachashkanchiraykupas.

⁶Chay apunchikuna Yaya Diospa churashkan kashpankunami ñukanchi alita kawsananchipa tarawanahun.

Chayrayku ñukanchi kullkita kunanchi tiyan chaywa tukuyta ruranankunapa.

⁷Karan runata imatami kunaykichi tiyan, chayta kuychi. Shuk apu kankunata kamachishpanka tarawanaykicipa, tarawaychi. ^{*}Impuestuta paganaykichi kashpanka pagaychi. Apukunata kasuna kashpan kasuychi. Maykantami yuyashpa kushichinaykichi tiyan, payta yuyashpa kushichiychi.

**Yuyanakushpa alikunata rurashpa
kawsanamanta yachachin**

⁸Tukuy liwiskaykichikunata utkalla pagaychi. Liwiskaykichi kullkita pagahushkaykichishina tukuy uras shukwa shukwa yuyanakushpa kawsanaykichi tiyan. Runa masinchikunata yuyashpanchimi tukuy Yaya Diospa kamachishkankunata paktachinchichi. ⁹Kasnami Yaya Diospa kamachishkanka riman: Warmiyu kashpaykichika ama shuk warmiya musayaychichu. Kusayu kashpaykichika ama shuk kariwa musayaychichu. Ama runa masikita wañuchiychichu. Ama shuwaychichu. Ama shukpa imankunata munariyaychichu nishpa. Chaymanta shuk kamachinakuna ashwan tiyan. Tukuy Yaya Diospa kushkan kamachishkankunata kayllata yuyachinahun: Runa masikita kan kikintashina yuyay nishpa. Chay shuklla kamachishkata paktachishpanchimi tukuy Yaya Diospa kamachishkankunata paktachinchichi.

¹⁰Runa masinchita yuyak kashpanchika manami payta millaypata ruranchichu. Chayrayku runa masinchita yuyashpanchimi alita tukuy Yaya Diospa kamachishkankunata paktachinchichi.

¹¹Chayrayku mana sampayashpa Yaya Diospa kamachishkankunata kasuychi. Puñushkashina kahushkaykichimanta likchariychi. Ña yachankichi Yaya Dios ñukanchita kishpichinan punchaka

kunan ashwan kuchupi kananta, Jesukristuta puntiru kirishkanchi punchamanta.¹² Yaya Diospa kawsananma rinanchi punchaka ñami paktarihun. Chayrayku manana amsapi kawsakkunashina mana alikunata rurashpa kawsashunchinachu. Akuychi Yaya Diospa munashkanllata rurashpa kawsashunchi. Chasna kawsashpanchimi shuk suntalu wañunakunarpa sumakta alicharishkashina kanchi kuntranchi supayta winsinanchipa.¹³ Akuychi punchapishina alita rurashpa kawsashunchi mana nima pi ñukanchimanta millaypata rimanankunapa. Ama machashpa yapa achkata mikushpa kawsashunchichu. Fiestakunapi millaypata rurahuskankunapi ama yaykushunchichu. Ama musayanaku-shunchichu. Ama piñanakushpa kawsashunchichu. Nima runa masinchikunapa imankuna tiyashkanta munarishpa, nima paykunawa parihuyanayashpa kawsashunchichu.¹⁴ Sakiyichi Amunchi Jesukristu tukuyipi kankunata yuyachinanpa pay kawsashkanshina kawsanaykichipa, munashkanta rurashpa. Ama munaychichu kankuna kikinpa mana ali munashkaykichita rurashpa kawsanata.

**Pablo yachachin mana
munananchipa tukuy kirikkuna
chasnalla rurashpa
kawsanankunapa**

14 ¹Wawkikuna panikuna, shuk kirik masinchi manara alita Jesukristupi sinchikuuhushpanka ama paywa yanka rimanakuychichu. Ashwan payta yuyashpa kayaychi kankunawa parihu tantarinanpa. ²Rikuychi, shuk kirik masinchikunaka tukuy ima mikunankunata alimi ninahun. Shukkuna manara yapa alita Jesukristupi sinchikukkunaka manami

aychata mikunahunchu. Paykunaka tarpu pankakunallata tarpu muyukunallata mikunahun. ³Yaya Dioska tukuy aychata mikuk runakunata, mana aychata mikuk runakunatapas chasnallami yuyan. Chayrayku tukuy aychata mikuk runakuna kashpaykichika ama chay mana aychata mikuk runakunata rimaychichu manami alitachu rurahunkichi nishpa. Chaymanta aychata mana mikuk runakuna kashpaykichika ama tukuy aychata mikuk runakunata rimaychichu manami alitachu rurahunkichi nishpa. ⁴Karan shuk Yaya Diospa kamachinan kashpanchi ¿pi kanaykitata yuyarinki paykunata chasna rimanaykipa? Yaya Diosllapa kashpankuna paylla atipan rimanata, alitachu ruranahun manachu nishpa. Payllami tukuya atipak kashpan runankunata yanapanka alillata rurashpa kawsanan-kunapa.

⁵Shuk kirikkunaka yuyarinahun kay punchami ali kan tantarishpa Yaya Diosta kushichinanchipa nishpa. Shukkuna yuyarinahun karan punchanta tarinanchi tiyan Yaya Diosta kushichinanchipa nishpa. Chasna chikanta yuyarishpanchipes karan ñukanchikuna imashnami yuyarinchi, akuychi chasnalla Yaya Diosta kushichunchi. ⁶Jesukristuta shuk kirik masinchika shuk punchakunalla Yaya Diosta kushichinayashpanka chasna kushichichun. Jesukristuta shuk kirik masinchika Yaya Diosta kushichishpan tukuy imata mikushpanka payta agradesishpa mikuchun. Shukka mana tukuy imata mikushpanka Yaya Diosta kushichinanpa, mana mikuchun. Paypas Yaya Diosta agradesinmi.

⁷Nima maykan ñukanchi kikinrayku kawsanchichu, nima maykan ñukanchi kikinrayku wañunchichu. ⁸Kawsara kahushpanchika Amunchi Jesukristuta

kushichinanchipa kawsanchi. Wañushpanchika Amunchi Jesukristuta silipi kushichinanchipa wañunchi. Chasna kashpanmi kawsa kahushpanchi wañushka kahushpanchipas Amunchi Jesukristullapa kanchi. ⁹*Kristuka wañurka, wañushkanmanta kuti kawsarimurka wañushkakunata kawsakunatapas kamachik kananpa.

¹⁰Shuk puncha tukuy ñukanchikuna Yaya Diospa puntanpi shayarik rinanchi tiyan payka ñukanchita rimanarpa, alitachu manachu alita rurashkanchi nishpa. Chayrayku nima maykan Yaya Diosta kirik masinta rimachun kanka manami alitachu Yaya Diosta kasunki nishpa. Nima maykan kirik masimanta yuyarichun mana valik kananta. ¹¹Chasnallatami Yaya Dioska ñawpa killkachishkanpi riman:

Ñukalla rimashkaynita paktachik kawsa Yaya Dios kashpaynimi rimani: Tukuy runakunami shuklla tukuya kamachik kanaynita riksishpankuna puntaynipi kunkurinkakuna. Tukuymi yapa ali kanki nishpa kushichiwankakuna.

¹²Chasna killkarishka kashpanmi yachanchi, tukuy runa pay kikin rurashkanmanta Yaya Diosta rimanan tiyan.

**Pablo yachachin kirik masinchipa
yuyayninta mana
pantachichinanchipa**

¹³Yaya Dios ñukanchita tukuy rurashpanchikunamanta tapunanta yachashpanchi amana ñukanchi kirikkunapura washanchanakushpa kawsashunchinachu, payka manami alitachu kawsahun nishpa. Ashwan karan shuk kankuna yuyariyichi alikunallata rurashpa kawsanaykichipa, kirik masinchikunata mana uchata rurachinaykichipa.

¹⁴Ñukaka Jesukristuta kirik kashpay-nimi alita yachani tukuy mikuna aycha ali kananta mikunanchipa. Chasna kashpanpas shuk kirik masinchikuna yuyarinahun, Yaya Dios mana munanchu ñukanchi shuk aychakunata mikunanchipa. Mikushpanchika uchatami ruranchi nishpa. Chasna yuyarik runakunaraykuka mana alichu kan chay aychata mikunankunapa.

¹⁵Chasna kashpan mikuhushkaykichiwa shuk kirik masikichita pantachichish-paykichika manami payta yuyahunkichchu. Yuyariyichi *Kristuka chay wawkiraykupas wañushkanta.

Chayrayku ama munaychichu mikushkaykichiranti payka Jesukristumanta anchurinarpa. ¹⁶Chayra kirik masikichi chasna aychata mikuhushkaykichirayku kankunamanta millaypata rimashpankuna chay aychataka ama mikuchichu.

¹⁷Yaya Diospa kamachishkan tukushpa paypa ali kamachihushkanpi kawsashpanchika manami mikunallapi upyanalapi yuyarishpa kawsanchichu. Ashwan Yaya Diospa Espíritun yanapashpan allilla rurashpa, kushikushpa, shukwa shukwa yuyanakushpa kushilla kawsashunchi. ¹⁸Chasna Kristullata kasushpa kawsashpanchimi Yaya Diosta kushichishpa kawsanchi. Runa masinchikunapas rimankakuna alitami paykunaka rurahunkuna nishpa.

¹⁹Chayrayku akuyichi tukuytua rurashunchi shukwa shukwa yuyanakushpa kushilla kawsananchipa. Chaymantapas akuyichi sinchikuchinakushpa kawsashunchi ashwanta ashwanta Jesukristuta kirishpa kawsananchipa. ²⁰Yachanchi tukuy mikunakuna Yaya Diospa rikushkanpi ali kananta. Chasna ali kashpanpas shuk kirik masiki yuyrima mana ali kananta shuk shuk aychakunata mikunarpa. Chayta mikushpanka payrayku ucha

kan. Chayrayku ama mikushkaykichiwa yuyayninta pantachichichichu. Chasna rurashpaykika payka manana kirinkachu Yaya Diosta. ²¹Chayrayku chasna aychakunata ama mikuchichu, ama *vinuta upyaychichu, nima shuk imata ruraychichu, maykanwami kirik masikichipa yuyayninta pantachichinkichi. ²²Yaya Diospa rikushkanpi ali kanata yuyarishkaykichita shunkuykichillapi wakaychaychi Yaya Dioslla yachananpa. Shuk runa rurahuskanta ali kanata yuyarishpanka kushillamikanka. ²³Ashwan maykanpas yuyarishpan manachari alichu chay aychata mikunaynipa nishpa, chayta mikushpanka mana alitachu ruran, mana kirishkanrayku chay mikuna ali kananta. Kirishpanchi rurahuskanchika mana ali kananta, chayta rurashpanchika uchami kan.

Kristuta kirikkunapura alita yanapanakanunmanta riman

15 ¹Wawkikuna panikuna, ūukanchi Jesukristuta alita kirik kashpanchi chay manara yapa alita kirihukkunata yuyashpa yanapananchatiyan. Mana ūukanchi kikin ali kananta yuyarishkanchillata rurashpa kawsashunchichu. ²Karan ūukanchikuna akuychi rurashkanchiwa runa masinchikunata kushichishpa yanapashunchi, chaymantapas sinchikuchishunchi ashwan alita Jesukristuta kirinankunapa. ³*Kristupas manami munarkachu pay kikinllata kushichinata. Ashwan Yayan Diosta kushichishpa kawsashkanraykumi runakuna payta chiknishpa kamirkunkuna. Kasnami Yaya Diospa ūawpa killkachishkanpi Jesukristumanta riman:

Yaya Dios, chiknik runakuna kanta asichishpa millaypata rimash-

pankuna ūukata parisichiwanahun nishpa.

⁴Tukuy ūawpa Yaya Diospa killkachishkanka ūukanchita yachachinanpami killkarishka kan. Chay tukuy killkachishkanwa Yaya Dioska ūukanchita sinchikuchin parisishpanchitas alita payta kasushpa kawsananchipa, chaymantapas wiñaypata paywa kawsak rinanchita chapananchipa.

⁵Yaya Dios ūukanchita yanapak kashpan mana sakishpa katinanchipa, chaymanta llakirishkakunata sinchikuchik kashpan kankunata yanapachun Jesukristushina shuk yuyayllawa yuyanakushpa kawsanaykichipa.

⁶Chasna kawsashpaykichimi tukuy kankuna parihulla Amunchi Jesukristupa Yayan Diosta kushichinkichi tukuymanta yapa alimi kanki nishpa.

Yaya Dioska Pablota rimarka Kristumanta yachachinanza mana israel runakunata

⁷*Kristu ūukanchita imashna kahushpanchitas yuyashpan kayashkanshina, chasnallatata kankunapas yuyanakuychi. Chasna yuyanakushpa kawsaychi Yaya Diosta kushichinaykichipa. ⁸Alita uyawaychi. Kristuka shamurkami ūukanchi israel runakunata yanapananpa. Chasna yanapashpanmi Yaya Dios chay ūawpa yaya rukunchi wañukunata yanapananpa rimashkanta paktachirka. Chasna Kristu Yaya Diospa rimashkanta paktachishpanmi yachanchi Yaya Dios tukuy rimashkanta alita paktachik kananta. ⁹Chaymanta Kristuka shamurkami kankuna mana israel runakunatas yanapananpa. Chasna yanapashpanmi Yaya Diosta kushichinkichi kankunata llakichishkanrayku. Ūawpa yaya rukunchi atun apu David wañuka Yaya Diosta rimashkanka kasnami killkashkanpi riman:

Ñukaka mana israel runakunawa
pakta kanta kushichisha.
Paykunawa pakta kushikushpa
kanta atunyachishpa takisha
nishpa.

¹⁰Chaymanta Moisés wañupa rimash-
kanka kasna killkarishka kan:

Kankuna mana israel runakuna,
ñukanchi Yaya Diospa akllash-
kan israel runakunawa pakta
kushikuychi nishpa.

¹¹Chaymanta kasnami Salmos killkapi
riman:

Tukuy llaktakunapi kawsak
runakuna Yaya Diosta kushi-
chichi nishpa.

¹²Isaias wañupas kasnami killkarka:
Shuk kuchushka kaspi ankumanta
kuti wiñahuksina Isaí shutiyu
runa wañupa miraymantami
shuk kamachik runa tiyanka.
Payka tukuy allpapi kawsak
runakunata kamachik kanka.
Chay mana israel runakunaka
paypi sinchikunkakuna ñukan-
chita kishpichinkha Yaya Diospa
kastigananmanta nishpa.

¹³Tukuy rimashkanta paktachik Yaya
Diostami kankunaryku mañahuni
kankuna Jesukristuta kirikkunata
yanapananpa, sumakta kushikushpa
mana piñanakushpa kushilla kawsanay-
kichipa. Yaya Dios kankunata
Espiritunwa yanapachun ashwanta
ashwanta tukuy rimashkanta paktachi-
nanta kirinaykichipa.

¹⁴Wawinkikuna paninikuna, yachani
kankuna ali shunkuyu runakuna
kanaykichita. Alitami Yaya Diospa
rimashkanta yachankichi. Chasna
kashpaykichimi alita yachankichi
shukwa shukwa sinchikuchinakunata.
¹⁵Chasna alita yachashpaykichipas
yachachishkaynita mana kunkarinayki-
chipami, yuyarishkaynita mana

pakashpa kuskata rimashpa kay kartata
kankunaryku killkahuni. Yaya Dios
yuyawashpan kamachiwashka
kankunata yachachinaynipa. ¹⁶Chasna
paypa kamachishkan kani kankuna
mana israel runakunata Yaya Diospa
suma ali shimita Jesukristu runaku-
nata kishpichinanmanta yachachinay-
nipa. Yaya Diospa Espíritu kankunata
yanapashpan Kristuta kirikkuna
kankichi. Chasna kashpaykichimi ñuka
kankunata Yaya Diospa puntanpi shuk
suma imata kunayahushkaynitashina
churashpayni payka kankunamanta
sumakta kushikunka.

¹⁷Kristu Jesusta kirik kashpaynimi
pay yanapawashka kankunata yanapa-
naynipa. Nuka kankunata yanapash-
payni kirishkaykichirayku Yaya Diospa
puntanpi sumakta kushikushami.

¹⁸Kristu rurashkaynikunapi mana
yanapawama karka, nima shuk
rurashkaynimanta atipaynimachu
rimanata. Paymi ñukata yachayta
kuwashka kankunata ali rurashkayniwa
rimashkayniwa yachachinaynipa,
kankuna mana israel runakunapas payta
kirishpaykichi Yaya Diostana kasunayki-
chipa. ¹⁹Chasna Yaya Diospa
Espiritunpa yachayninllawa nima ima
uras rikushkaykichita, suma mana
atipaypakanata rurashkaynita
rikushpaykichi achka kankuna mana
israel runakuna Kristuta kirishkankichi.
Chasnami Jerusalén llaktamanta pacha
tukuy karu llaktakunapipas Iliria allpapi
kahuk llaktakunapi paktanaynikama
chay suma ali shimita Kristu runakunata
kishpichinanmanta tukuy parti
yachachishkani. ²⁰Maypimi manara
nima maykan runa chay suma ali
shimita Jesukristu runakunata
kishpichinanmanta yachachishka, chay
llaktakunapimi ñukaka munani
yachachinata. Shuk yachachik masini

Kristumanta yachachishka llaktakunapi ñukaka manami rinayanichu yachachinapa, mana shukpa tarawanapani satirinaynipa.²¹ Yaya Diospa ñawpa killkachishkanpi kasnami riman:

Maykankunami nima shuk kuti
Yaya Diosmanta yacharkakunchu, paykunami kunanka payta riksinkakuna. Maykankunami nima ima uras paymanta uyarkakunachu, paykunami uyankakuna nishpa.

**Pablo Roma llaktama
rinayashkanmanta riman**

²²Achka llaktakunapi Yaya Diospa shiminta yachachihushpaynimi yapa munashpaynipas mana atiparkanichu kankunama rinata. ²³Kunanka ñami paktachishkani Yaya Diospa shiminta yachachinata kay llaktakunapi. Achka watakunami yapa munashkani kankunata pasyak rinata. ²⁴Chayrayku España allpama rishpayni yuyarihuni rihushkaynipi kankunata rikuk rinaynita. Chaymanta shuk punchakunata kushikushpa kankunawa kahushpayni munani kankuna yanapawanaykipcha EspaÑama rinaynipa.

²⁵Manara kankunama rishpaynira Jerusalén llaktama risha chaypi *Kristuta kirik masinchikunata yanapanaynipa. ²⁶Masedonia allpapi, Akaya allpapi kawsak kirik masinchikunami munanahun chay Jerusalén llaktapi Yaya Diosta kirik nima imayu runakunata yanapanata. Chayraykumi paykuna kikin munashpankuna tantachihunkuna shuk ofrendata chay mana imayu wawkinchikunama kachanankunapa. ²⁷Jerusalén llaktapi Kristuta kirik israel masinikunami tukuy parti mana israel masikichikunata yachachishpankuna Jesukristuta kirishkakuna. Chasna kashpan Kristuta kirik israel masiniku-

nata agradesishpa ali kan shuk ofrendata kachashpa yanapanankunapa, paykuna kikin munashkankunashina.

²⁸Nuka chay kirik masinchikunata Jerusalenpi chay tantachishka ofrendata kushkayniwashami EspaÑama risha. Chasna EspaÑama rihushpaynimi kankunata rikunata munani. ²⁹Alita yachani, kankunama rishpaynika Kristu tukuy imapi alita yanapawananta.

³⁰Wawkikuna panikuna, Amunchi Jesukristu ñukanchita yapa yuyashpan chaymantapas Yaya Diospa Espíritun ñukanchita yanapashpan shukwa shukwa yuyanakunchi. Chayrayku kankunata tapuni ñukawa pakta yapa sinchita Yaya Diosta mañanaykipcha, pay ñukata sinchikuchiwananpa.

³¹Mañapaychi Judea allpapi Kristuta mana kirik runakuna mana wañuchiwanankunapa. Chaymantapas mañaychi Jerusalenpi Kristuta kirik masinchikuna paykunaryku apahushkayni ofrendata alita apinankunapa. ³²Chasna Jerusalemmanta alilla kutimushpayni Yaya Dios munashpanka kushilla kankunapi paktasha chaypi samanaynipa.

³³Mañahunimi kushilla kawsyta kuk Yayanchi Dios tukuy kankunawa kananpa. Chasna kachun.

Pablo kirikkunata saludan

16 ¹Wawkikuna panikuna, paninchi Febe kankunata pasyanpana rishpan alita yaykuchiyichi. Payka Senkrea llaktapi Jesukristuta kirik masinchikunata yanapakmi kan.

²Imashnami shuk Yaya Diosta kirikkunata yuyanchi, chasnallatata chay paninchita Yaya Diosta kirik kashpan kushilla kayaychi. Chaymantapas payta yanapaychi tukuy ima munashkanpi. Payka Yaya Diosta kirik masinchikuntami achkata yanapashka, ñukatapas achkatami yanapawashka.

³Chaymanta saludapaychi *Kristu Jesusupa shiminta yachachinata yanapawak paninchi Priskata, kusan Akilatapas. ⁴Paykunami yapa parisirkakuna ñukata wañuchina kahushkankunamanta kishpichiwanankunapa. Chayraykumi achkata agradesini paykunata. Manami ñukallachu agradesini, ashwan tukuy mana israel masikichi kirikkunapas achkatami paykunata agradesinahun. ⁵Chaymanta saludapaychi Priskapa Akilapa wasinpi tantarik kirikkunatas. Saludapaychi munashkayni wawkini Epenetota. Payka Asia allpapi Kristuta puntiru kirik runa kashka. ⁶Saludapaychi paninchi Mariata, payka achkatami tarawashka kankunata yanapananpa. ⁷Chaymantapas saludapaychi chay ishkay israel masinikunata Andronikota Juniastapas. Paykunaka karselpi churay tukushka masinikuna karkakuna. Tukuy kirikkunapa yapa yuyashkankuna *apostolkunami kanahun. Ñukamanta puntiru Kristuta kirikkunami kanahun.

⁸Amunchi Jesukristuta ki- rik munashkayni wawkini Ampliatotapas saludapaychi. ⁹Chaymanta Yaya Diospa shiminta yachachik wawkinchi Urbanota saludapaychi. Chay yapa yuyahushkayni wawkinchi Estakistapas saludapaychi. ¹⁰Wawkinchi Apelestapas saludapankichi. Payka Kristuta katihushkanrayku achkata parisishka. Parisihushpanpas Kristuta kirishpalla katihun. Chaymanta Aristobulopa ayllunkunatas saludapaychi. ¹¹Israel masini Herodionta saludapaychi, chaymantapas Narsisopa ayllunkunamanta Amunchi Jesukristuta kirikkunata saludapaychi. ¹²Chaymanta paninchikuna Trifenata Trifosatapas saludapaychi. Paykunaka Amunchi Jesukristupa munashkanta rurashpa tarawahunkuna. Chasnallatata yuyashkanchi paninchi Persidata saludapaychi.

Paypas Amunchi Jesukristuta sirvishpa sinchita tarawashkami. ¹³Amunchi Jesukristuta alita kirik Rufota saludapaychi, paypa mamantapas. Mamanka ñukapa mamaynishinami kan.

¹⁴Chasnallatata saludapaychi Asinkrito, Flegonteta, *Hermesta, Patrobasta, Hermasta, chaymanta tukuy paykunawa tantarik kirik masinchikunatas.

¹⁵Filologota, warmin Juliata, chaymanta Nereota, panintapas, Olimpastas, chaymanta tukuy paykunawa tantarik Amunchi Jesukristuta kirikkunatas saludapaychi.

¹⁶Kankuna kirikpura shukwa shukwa yuyanakushpa saludanakuychi. Tukuy kaypi kawsak Kristuta kirikkuna kankunaryaku saluduta kachanahun.

Pablo yachachin yanka llulla shimikunata mana kasunanchipa

¹⁷Wawkinikuna paninikuna, alita uyawaychi kankunata rimashkaynita. Tiyan shuk runakuna ali yachachishkaynimanta chickanta yachachikkuna. Chay yachachishkankunawa kankunapa yuyaykichita pantachichishpankuna shukwa shukwa piñanakushpa kawsankichi. Chasna yachachikkunata ama uyaychihu, ashwan paykunamanta anchuriyichi. ¹⁸Paykunaka manami Amunchi Jesukristuta kasunahunchu, ashwan paykuna kikiipa munanankunallata rurashpa kawsanahun. Mishki uyaypa shimikunawa rimashpankuna mana yapa yachak runakunata llullachinahun. ¹⁹Kankunamanta tukuy runakuna yachanahun alita Yaya Diosta kasushpa kawsahushkaykichita. Chayta yachashpayni yapa kushikuni. Munani kankuna yachakunaykichipa alillata rurashpa kawsanata, mana alikunataka mana ruranaykichipa. ²⁰Ñukanchita kushilla kawsayta kuk Yayanchi Dioska manana unayankachu kankunata

atipachinanpa supaykunapa apunta winsishpa winsishpa rihushkaykichipi sumakta winsinaykichipa. Amunchi Jesúis kankunata llakichishpan yanapachun.

²¹Chaymanta ñukawa parihu Yaya Diospa shiminta yachachik Timoteo kankunata saludan. Chasnallatata israel masinikuna Lusio, Jasonpas, Sosipaterpas kankunata saludanahu. ²²Ñuka Tersio Pablopia rimashkanta killkak, chaymantapas Jesukristuta kirik kashpayni kankunata saludani. ²³Gayopas kankunata saludan. Paypa wasinpi kahunchi. Kaypi kawsak kirikkunapas paypa wasinpimi tantarina-hun. Kay llaktapi kullkita wakaychak Erastopas kankunata saludan. Chaymantapas kirik masinchi Cuarto kankunata saludanmi. ²⁴Amunchi Jesukristu tukuy kankunata llakichishpan yanapachun. Chasna kachun.

Yaya Diosta kushichina

²⁵Wawkinikuna paninikuna, akuychi Yayanchi Diosta atunyachishpa kushichishunchi. Paymi atipan kankunata sinchikuchinata mana sampayashpa Jesukristuta kirishpa kawsanaykichipa. Chasnallatata Yaya Diospa suma ali shiminpi Jesukristu runakunata kishpichishkanmanta riman, maykantami kankunata yachachishkani.

Chay shiminpi kunan Yaya Dios ñukanchita riksichishka ñawpa mana riksishkanchita, Wawan Jesukristu wañushkanrayku ñukanchita kishpichishkanta. Manara kay allpata rurahushpanra Yaya Dioska yuyarika ñukanchita kishpichinanta. Chasna yuyarishpanpas ñawpa payta kasuk runakuna manara alita asirtarkakunara-chu imashnami Yaya Dioska ñukanchita kishpichinka nishpa. Kunanka ñami ñukanchita riksichishka. ²⁶Chay wiñaypa kawsak Yaya Dioska chay ñawpa paypa yachayninwa yachachikunata kamachirka killkanankunapa pay ñukanchita kishpichinanta. Kunanka ñukanchita chay ñawpa killkachishkanta alita riksichishka. Chaymanta tukuy allpakuñapi kawsak manara Yaya Diosta riksik runakunatas riksichishka, paykunapas payta kirishpankuna kasushpa kawsanankunapa.

²⁷Jesukristu ñukanchita kishpichish-kanrayku akuychi kushichishunchi tukuy uras chay shuklla tukuya yachak Yayanchi Diosta. Chasna kachun.

Chayllata killkashkani.

Wawkikichi turikichi
Pablo

PUNTIRU PABLOPA KILLKASHKAN KILLKA KORINTO LLAKTAPI JESUKRISTUTA KIRIKKUNARAYKU

1 ¹⁻²Munashkayni wawkinikuna paninikuna, Yaya Dios munashpan Jesukristu ñuka Pablota kachawashka paypa shiminta yachachik kanaynipa. Wawki Sóstenes ñukata yanapawahun kay kartata killkanata tukuy kankuna Korinto llaktapi Yaya Diosta kasukkunaryku. Kankuna Jesukristuta kirishpa kawsashpaykichi Yaya Dios kankunata akllashka paypa wawnkuna kanaykipa, chaymantapas paypa munashkanta rurashpa kawsanaykipa. Chaymanta tukuy maypipas kahuk Jesukristuta mañak runakunaryku pas kay kartata killkahuni. Jesukristu ñukanchikunata paykunatapas alita kamachik kan.

³Yayanchi Dios, Amunchi Jesukristupas kankunata llakichishpan yanapanahuchun kushilla kawsanaykipa.

**Pablo Yaya Diosta agradesin
kirikkunata yanapashkanrayku**

⁴Wawkikuna panikuna, Yaya Diosta tukuy uras agradesini kankunaryku pay kankunata Jesukristuwa yanapashpan aliyachishkanrayku. ⁵Kankuna Jesukristuta kirishkaykichiraykumi Yaya Dioska kankunata Espiritunwa sumakta atipachishka, alita yachachi-

nata yachak, alita paypa rimashkanta asirtak kanaykipa. ⁶Chasna kashpaykichi yachanchi *Kristumanta kankunata yachachishkaynita alita kirishpa katihushkaykichita. ⁷Chasna alita yachachishkaynita katihushkaykichiraykumi Yaya Dioska tukuy atipachinayashkanta kankunata Espiritunwa atipachirka. Chasna chapahunkichi Amunchi Jesukristu suma atun yachayninwa shamunanta. ⁸Chasna payta chapashpa kawsahushpaykichimi Yaya Dioska kankunata sinchikuchinka alita rurashpa kawsanaykipa. Chasnami Amunchi Jesukristu shamuhushpan manana nima pi atipankachu millaypata rimanata kankunamanta. ⁹Yaya Dioska tukuy rimashkantami paktachin. Chasna paktachik kashpan munan ñukanchikuna Wawan Jesukristuwa parihu kawsananchipa, pay Amunchi kashkanrayku.

**Pablo yachachin kirikkunapura
mana chikninakushpa chikan
chikan muntun tukunankunapa**

¹⁰⁻¹¹Wawkikuna panikuna, shukkuna Kloepa ayllunkuna rimawashkakuna kankuna piñanakushpa kawsahushkaykichimanta. Chayrayku Amunchi Jesukristu kamachiwashpan kankunata

rimani: Tukuy kirik masikichikunawa parihu yuyanakushpa yanapananakushpa shuk yuyayllawa kawsaychi. Ama rimanakushpa piñanakushpa kawsaychi-chu. ¹²Kankunaka mana alitachu yuyarihunkichi. Shuk kankunamanta rimanahun: Ñukanchika Pablo pacha yachachishkantami katihunchi. Shukkunaka rimanahun: Ñukanchika Apolospa yachachishkantami katihunchi. Shukkunaka rimanahun: Pedropa yachachishkantami katihunchi. Shukkunaka rimanahun: Ñukanchika *Kristupa yachachishkanllatami katihunchi nishpa.

¹³Kristuwa shukllashina kashpanchi ¿alichu kama chikan chikan tantarishka kanaykichipa? Manami alichu kan. ¿Ñuka Pablottachu kruspi klabashpa wañuchiwashhkakuna kankunata kishpichinaynipa? Mana, ashwan Jesukristutami chasna wañuchirkakuna. ¿Ñukata kasuk tukushkaykichita rikuchishpachu bawtisarishkankichi? Manami ñukata kasuk tukushkaykichita rikuchishpachu, ashwan Jesukristuta kasuk tukushkaykichita rikuchishpami bawtisarishkankichi. ¹⁴⁻¹⁵Yaya Diosta agradesini ishkay wawkillata bawtisashkaynirayku Krispotra Gayotapas. Ñukata mana munashkanichu kankuna shukkunata rimanaykichipa: Pablo ñukata bawtisashpanmi ñukaka kankunamanta ashwan ali kani nishpa. Chayrayku nima shukta ashwan kankunamanta bawtisashkanichu. ¹⁶Ari, chaymantapas wawkinchi Estefanaspa ayllunkunata bawtisashkani. Paykunallatami yuyarini bawtisashkaynita. ¹⁷Jesukristuka mana kamachiwashkachu bawtisanaynipa, ashwan kamachiwashkami chay suma ali shimita runakunata kishpichinanmanta yachachinaynipa. Runakunata yachachishpayı mana shuk yachak runashi-

nachu ali shimikunawa yachachini. Chasna yachachinimaka, runakunata arkaynima alita asirtanankunapa imaraykumi Kristu kruspi wañushka.

Kristuka Yaya Diospa yachaynintami alita rikuchin

¹⁸Jesukristu runakunata kishpichinanpa kruspi wañushkanta yachachishpanchi tukuy nina mana wañukma rihuk runakuna yuyarinahun muspashina yanka rimashkanchita. Ashwan ñukanchikuna Yaya Diospa akllashkan kashpanchi paywa kawsak rinanchipa, chay shimika Yaya Diospa atun yachaynintami rikuchin.

¹⁹Kasna Yaya Dios ñawpa killkachishkanpi riman:

Ñukaka yachakushka runakunata
yachanankunata kichusha,
chasnallatata yuyayninkunata-pas kichusha nishpa.

²⁰¿Imata valin chay yachayyukuna, tukuy chay yachachikkuna, maykankunami paykuna kikin yanka nishpa yuyayninkunamantalla rimanakunahun? Mana valinchu, paykuna mana Yaya Diospa yachayninwa yachachik kashkankunaryku. Yaya Dioska ñukanchita rikuchishka chay runakunata yuyayninkunaka yanka nishpa kanankunata. ²¹Yaya Dios yapa ali yachak kashpan munarka runakunata mana atipanankunata paykuna kikin yuyayninkunallawa payta riksinata. Runakuna chay yachachishkanchimanta rimashpankunapas muspashina yanka rimanahun nishpa, Yaya Dioska munan chayta kirikkunallata kishpichinata.

²²⁻²³Ñukanchi israel runakunamanta achkakuna nima ima uras rikushkanchi atun yachaywa ruranakunata rikunayashpankunapas kankuna mana israel runakunamanta achkakuna yachayta maskashpankunapas

ñukanchika yachachinchi *Kristu kruspi wañushkanmanta. Chasna yachachishpanchi ñukanchi israel runakunamanta shukkunaka rimanahun: Shuk kruspi wañushka runaka Yaya Diospa kastigashkanmi. ²⁴Imashnataya atipama ñukanchita kishpichinata Yaya Diospa kastigananmantaka? nishpa. Kankuna mana israel runakunamanta achka asichishpa rimanahun: Kristu kruspi wañushkanrayku Yaya Diospa kastigananmanta kishpinchi nishpa rimashpayki muspa runashina rimanki.

²⁴Chasna rimashpanapas ñukanchi Yaya Diospa kayashkan runakunarayku, israel runakuna, mana israel runakuna kashpanchipas Kristuka kruspi wañushkanmanta kawsarishkanwa rikuchirka Yaya Diospa atun yachayninwa kashkanta. ²⁵Maykanmi runakunarayku yanka nishpa Yaya Diosmanta uyarin, chayka kanmi ashwan suma yachay runakunapa yachayninkunamanta. Maykanmi runakunarayku sampa rikurin Yaya Diosmanta, chayka kanmi runakunapa atipanankunamanta ashwan pasa atipana.

²⁶Wawkikuna panikuna rikuyichi, ñukanchimanta mana achka kanchichu yachak, kamachik, achka kullkiyu runakuna. Chasna kashpanchipas Yaya Dios ñukanchita akllashka kishpishka kananchipa. ²⁷Chasna runakunapa rikushkanpi mana yachak runakuna kashpanchipas Yaya Dioska ñukanchita akllashka, chay yachak runakunata pinkachishpan rikuchinanpa, paykuna kikin yachayninkunawa mana kishpinata atipanankunata. Chasna sampa runakuna kashpanchipas Yaya Dioska ñukanchita akllashka kishpishka kananchipa, chay kamachik runakunata pinkachishpan riksichinanpa paykuna kikinpa yachayninkunawa mana kishpinata atipanankunata. ²⁸Yaya

Diosta mana kirik runakunaka ñukanchita chiknishpankuna mana ali runakunachu kankichi nishpa rimashpanapas Yaya Dioska ñukanchita akllashka kishpichirishka kananchipa. Chayrayku maykankunami yuyarinahun yachak kanankunata, paykunataka Yaya Dios rikuchin mana paykuna kikin yachayninkunawa kishpinata atipanankunata. ²⁹Chayrayku nima maykan atipanchu Yaya Diosta rimanata ñukami yachak kani, mana munanichu yachachiwanaykita nishpa.

³⁰Yaya Dioska ñukanchita kishpichishka Jesukristuwa tantaylla kawsananchipa. Payka ñukanchita yanapan Yaya Diospa shiminta asirtananchipa. Tukuy uchanchikunamanta ñukanchita llakichishpa yanapan paypa munashkanta rurashpa kawsananchipa. Ñawpa mana ali rurashkanchikunaryku kastiganan kashkanchimanta ñukanchita kishpichin manana uchata rurashpa kawsananchipa.

³¹Kasnami Yaya Dios ñawpa killkachishkanpi ñukanchita riman:

Maykanmi yuyarin ñuka kani
ashwan ali shukkunamanta
nishpa, chayka yuyarichun
Yaya Dios tukuya rurak
kashpan paylla tukuymanta ali
atun kananta nishpa.

Pablo yachachin Jesukristu kruspi wañushkanmanta

2 ¹Wawkikuna panikuna, ñuka kankunama rishpayni mana ñuka kikinpa yachaynitachu kankunata yachachirkani. Nima rimarkanichu ñukaka alita yachachikmi kani nishpa. Ashwan runakunapa mana yachashkan Yaya Diospa rimashkantami yachachinaynipa rirkani. ²Kankunawa kahushpayni kankunata yachachirkani

Jesukristu kruspi wañushpan ñukanchita kishpichishkanta. Chayllatami kankunata yachachirkani. Mana munarkanichu chikanta yachachinata.

³Chasna kankunama rishkayni uras yapa sampa kanaynita musyarkani, imashnashi yachachisha mana yapa rimanata yachakchu kani nishpa. Yapa manchaywa karkani imashi pasawanka nishpa yuyarishpayni. ⁴Chasna yachachihushpayni mana ñukaka yachaynitachu shuk alita rimanata yachakshina kankunata yachachirkani. Ashwan Yaya Diospa Espíritunmi yachayninwa yanapawashpan yachachirkani alita asirtanaykichipa.

⁵Mana munarkanichu runakunapa yachayninkunata uyashkaykichirayku payta kirik tukunaykichipa. Ashwan munarkani kankuna Yaya Diospa yachayninwa payta kirik tukunaykichipa.

**Yaya Diospa Espíritun ñukanchita yanapashpan alita riksinchí
Yaya Diosta**

⁶Kankuna Yaya Diosta alita kasunata yachakushpaykichika ñukaka ashwantami kankunata Yaya Diospa rimashkanta yachachisha. Manami runakunapa, nima kamachik runakunapa yachayninkunatachu kankunata yachachihuni. Chay yachaykunaka shuk ratullami.

⁷Yaya Dioska manara kay allpata rurahushpanra yuyarirka, ñukanchita kishpichishpan silipi paywa kawsananchita. Chasna Yaya Diospa yuyarishkanta nima pi yacharkarachu. Chay manara runakunapa yachahushkantami ñukaka kankunata yachachihuni. ⁸Chay kamachik runakunaka Yaya Diospa yuyarishkanta manami yachanahunchu. Yachanahuma karka, manami chay silumanta shamushka Jesukristuta

kruspi klabashpa wañuchinahumachu karka. ⁹Ashwan ñawpamanta pacha Yaya Diospa killkachishkanpi rimashkashina paktarirka kasna nishkaka:

Yaya Dioska payta alita yuyakkunaryku shuk ali kawsana llaktata rurashka. Chaytaka nima maykan rikushkarachu, nima uyashkarachu, nima yuyarishkarachu nishpa.

¹⁰Yaya Dios Espíritunwami kunanka tukuy chaykunata ñukanchita riksichishka. Paypa Espíritun tukuypi alita riksichik kashpan Yaya Diospa yuyaynintapas alita yachashpan riksichin. ¹¹Mana nima pi yuyayninchitaka atipanchu yachanata, ñukanchi kikinllami yachanchi. Chasnallatamatami nima pi Yaya Diospa yuyaynintaka yachanchu. Yaya Diospa Espíritunlla paypa yuyaynintaka yachan. ¹²Chay Espíritunta ñukanchikunaka kuy tukushkanchi Yaya Dios ñukanchita yuyashpa kushkanta ñukanchirayku rurashkanta riksichinanpa. Mana kuy tukushkanchichu Yaya Diosta mana kasuk runakunata kamachikpa yuyayninta chay runakuna yuyarishkankunashina yuyarinanchipa. ¹³Chasna Yaya Diospa Espíritun ñukanchita yachachishpanmi tukuy chaykunata runakunata yachachinchi. Mana ñukanchi kikinpa yuyayninchimantachu yachachihunchi. Ashwan Yaya Diospa Espíritun riksichishkantami paypa Espíritunwa kahukkunata yachachihunchi.

¹⁴Chay mana Yaya Diospa Espíritunwa kawsakkunaka manami riksinyayanahunchu Yaya Diospa Espíritun riksichishkanta. Paykunarykuka muspa yuyayyu yanka rimahushkashinami. Mana munanahunchu kirinata, nima atipanahunchu asirtanata. Chaytaka Yaya Diospa

Espiritunwa kawsakkunallami asirtana-hun.¹⁵Ñukanchi Yaya Diospa
Espiritunwa kawsakkunami tukuy
riksichishkanta alita asirtashpanchi
yachanchi maykunkunami ali, maykan-
kunami mana alichu Yaya Diospa
rikushkanpi. Ashwan ñukanchitaka
nima maykan atipanchu asirtanata,
Yaya Diospa Espíritun mana paypi
kawsashpanka.

¹⁶Ñawpa Yaya Dios killkachishkanpi
riman:

Nima pi Yaya Diospa yuyayninta
riksinchu. Nima pi atipanchu
paytaka yachachinata nishpa.
Paypa Espíritun ñukanchipi kashpanmi
ñukanchika *Kristupa yuyayninta
riksinchu.

**Pablo riman tukuy ali
yachachikkuna chasnalla
yanapaklla kanankunata**

3 ¹Wawkikuna panikuna, kankuna
*Kristuta kirik runakuna kashpayki-
chipas manara alita asirtahunkichirachu
Yaya Diospa yachachinanta. Manara
Yaya Diospa Espiritunta kasunata
yachakushpaykichi shuk llullu wawaku-
nashina kankichi. Chayraykumi ñukaka
kankunata manara tukuy Kristupa
yachachiwashkanta atipashkanichu
yachachinata, imashnami Yaya Diospa
Espiritunta kasuk runakunata
yachachini. ²Yaya Diospa rimananka
shuk suma mikunashinami. Paypa
rimashkanta manara kasuhushpayki-
chimi shuk chuchuk llullu wawakuna-
shinara kankichi, chay suma mikunata
manara mikunata atipak. Chayraykumi
manara tukuytarachu kankunata
yachachihuni. Manarami atipankichira-
chu yachakunata. ³Mana ali munanayki-
chikunata katinkichira. Kankunapura
parihuyanayashpa, rimanakushpa,
piñanakushpa kawsahunkichira. Chasna

kawsahushpaykichi manarami Yaya
Diospa Espiritunpa yuyachishkanchu
kankichi, ashwan Yaya Diosta mana
kasuk runakunashina kankichira.

⁴Kankunamanta shukkunaka rimankichi
ñukaka Pablo pachachishkanllatami
katini nishpa. Shukkunaka rimanahan
ñukaka Apolospa yachachishkanllatami
katini nishpa. Chasna rimashpaykichimi
kankunaka kawsahunkichi mana Yaya
Diosta kasukkunashina.

⁵Alita yuyariyichi. Ñuka Pablo, chay
wawki Apolospas Yaya Diosta kasushpa
kankunata yanapak runa masikichimi
kanchi. Kankunata yachachishpanchimi
kankunapas Yaya Diosta kasuk
tukushkankichi. ⁶Yaya Diospa rimash-
kanka shuk tarpu muyushinami.

Kankunapa yuyaykichika shuk ali
allpashinami. Ñuka kankunata Yaya
Diospa shiminta yachachishpayni shuk
muyuta tarpuksinami kashkani. Wawki
Apoloska kankunata yachachishpan
shuk muyuta wiñanarpa yakuwa
wichahukshinami kashka. Chasna
kashpanchipas Yaya Dioska kankunata
asirtachishka paypa rimashkanta. Pay
yanapashpanlla shuk wiñahuk muyuku-
nashina kankichi. ⁷Chasna kashpan
maykan tarpu, maykan yakuta wkichak
kashpanpas mana imachu kan. Ashwan
Yaya Diosmi ruran tukuya, payllami
atipan wiñachinata tukuy tarpuksinata.

⁸Shukkuna tarpushpankunapas shukku-
naka yakuta wichashpankunapas
chASNALLAMI kanahun. Yaya Dios karan
shukta kun paypa tarawashkanmanta.

⁹Wawki Apoloska Yaya Diospa shiminta
alita yachachik masinimi. Chasna
yachachik masini kashpanmi payka
ñukawa parihu Yaya Diosta alita
kasushpa kawsahun. Kankunami Yaya
Diospa chakrashina kankichi. Yaya
Diosmi ñukanchita kachashka parihu
paypa chakranpi tarawananchipa.

Chaymantapas Yaya Dios shuk wasita rurahukschina kashpan kankuna chay wasihushkanshina kankichi.¹⁰Nukaka Yaya Diospa kuwashkan yachaywa Jesukristumanta yachachishpayni shunku orkonkunata alita shayachik-shina kani. Ñuka yachachishkayniwasha yachachikkuna pishishkata churakkunashina kanahun. Tukuy yachachik runa yuyarinan tiyan imashnami alita yachachinka.¹¹Yaya Dioska Jesukristuta kachashka paypa wasinpi orkonkunashina kananpa, payta kasukkuna payllapi sinchikushpa kawsanankunapa. Chasna kashpanmi nima pi atipanchu chickanta yachachishpa rimanata, shukpi sinchikushpa kawsananchi tiyan nishpa.

¹²Kunan Jesukristupi sinchikushpa kawsashpanchipas mana tukuy chasnalla alikunata rurashpa kawsanchichu. Shukkunaka Yaya Diospa rimashkanta alita kasushpankuna oromanta, aserumanta, yapa chaniyu rumimanta wasinta alita rurahuksshima kanahun. Shukkunaka mana alita kasukkunaka kaspimanta, pintumanta, pankamanta wasinta mana alita rurahuksshima kanahun.¹³Tukuy rurashkanchikunaka riksirishka kanka imashna kanahun. Amunchi Jesukristu kuti shamuhushpan imashna rurashpa kawsashkanchikunata, imashna yachachishkanchikunata rikushpan rimanka, alitachu manachu rurashkanchi nishpa. Tukuy chay rurashkanchikuna ninapi churay tukuskashina kamay tukunkakuna alichu manachu nishpa.¹⁴Jesukristupi sinchikuk runapa rurashkankunaka ninapi churay tukuskashina kamay tukushpan ali kananta rikuchishpanka Jesukristuka rurashkankunamanta payta kushichinka.¹⁵Ashwan shukpa rurashkanka shuk wasi llampu rupash-kashina kashpan nima imata kuy

tukunkachu. Paylla kishpichiy tukunka ninamanta kishpishkashina nima imayu.

¹⁶Wawkkuna panikuna yuyariyichi kankuna Yaya Diospa wasinshina kanaykichita. Yaya Diospa Espíritun kankunapi kawsahun shuk wasipishina.

¹⁷Shuk runakuna Yaya Diospa wasinta waklichishpankunaka Yaya Dioska paykunata kastiganka, chay wasika paypa kashkanrayku. Chay wasinshinami kankunaka kankichi.

¹⁸Ama kankuna kikinpa yuyaykichipi pantachiriyichichu. Kankuna runaku-napa yachashkankunata yachashkayki-chirayku yachak kani nishpa yuyarish-paykichi llullachirinkichimi. Shutipa yachak kanaykichipaka runakunapa rikushkanpi mana yachashkina tukunay-ichi tiyan.¹⁹Maykanwami shuk runa yachak tukun runakunapa rikushkanpi chaykunamantami Yaya Dioska riman yanka nishpa kananta. Paypa killkachishkanpi riman:

Maykankunami paykuna kikin yuyarinahun yachak kanankunata, chaykunataka Yaya Dioska chay yachanankunallawa pantachichin paykuna kikin waklichirinankunapa nishpa.

²⁰Chaymantapas riman:

Yaya Dios yachan tukuy yachak kani nishpa yuyarik runaku-napa yuyayninkuna yanka kananta nishpa.

²¹Chayrayku nima maykan yuyarichun ñukata yachachiwakka tukuy yachachikkunamanta ashwan alimi nishpa. Tukuy Yaya Diospa churashkan ali yachachikkunaka kankunarykumi.

²²Tukuy ñukanchi yachachikkunata, ñuka Pablota, Apolosta, Pedrotapas Yaya Diosmi kankunaryku kachashka kankunata yachachishpa yanapananchipa. Chaymanta Yaya Dioska tukuy

ima kay allpapi tiyakta kankunata kushka kankunarayku kananpa. Kawsay, wañuy, kunan pasahushkaykichi, chaywasha pasanaykichi, tukuy shukkunapas, tukuy chaykuna kankunarayku kanahun yanapak kanankunapa.

²³Chasna kashpanpas kankunaka Kristupa kankichi. Kristuka Yaya Diospa Wawanmi. Yaya Dioska tukuya kukmi kan.

**Tukuy ali yachachikkunata
chasnalla yuyananchi tiyan**

4 ¹Wawkikuna panikuna, ^{*}Kristu ñukata, Apolosta, Pedrota kachashka kankunata yanapananchipa, tukuy manara yachashkaykichi Yaya Diospa yuyarishkankunata yachachishpanchi asirtanaykichipa. Chayrayku ñukanchimanta yuyariyichi tukuy chay yachachikkunaka chasnalla Kristuta kasuk ñukanchita yanapakkuna kanahun nishpa. ²Chasna Kristupa kamachishkan kashpanchi mana sakishpa paypa munashkanta rurashpa kawsananchi tiyan tukuy runakuna yachanankunapa alita yachachihuskanchita.

³Kankuna chasna, manachu chasna kanaynita rimashpaykichi mana imananchu. Kay allpapi kamachik apukuna chasna, manachu chasna kanaynita rimashpankuna mana imananchu. Nima ñuka kikin rimanichu chasna, manachu chasna kanaynita nishpa. ⁴Yuyarini alillata rurahushkaynita. Chasna kashpanpas mana chayraykuchu Yaya Diospa rikushkanpika ali tukushkani. Amunchi Jesukristullami yachashpan atipan rimanata alitachu yachachihuni manachu nishpa.

⁵Chayrayku manara Jesukristu shamuhushpanra ama yankamanta yuyarishpa rimaychichu kanka mana alitachu yuyarishpa rurahunki nishpa.

Amunchi Jesukristu shamuhushpan paymi alita ñukanchita riksishpan rimanka rurashkanchikuna yuyayninchikuna alichu manachu nishpa. Tukuy pakashka yuyayninchikunata rurashkanchikunata riksik kashpan ñukanchita riksichinka. Alita rurashkanchita yachashpan pay ñukanchita kushichishpa rimanka alitami rurashkankichi nishpa.

⁶Wawkikuna panikuna, tukuy chaykunata kankunata yuyashpa yachachihuni Apolosmanta ñukamantapas yuyachishpa alita asirtanaykichipa. Ama rimaychichu: Pabloka Apolosmanta ashwan ali yachachikmi.

Chayrayku Pablollata kasushpa kawsani nishpa. Chasnallatata ama rimaychichu: Apoloska Pablomanta ashwan ali yachachikmi. Chayrayku Apolosllata kasuhuni nishpa. Ñuka kankunata yachachishkani yachakunaykichipa Yaya Diospa rimashkanllata kasushpa kawsanaykichipa. Ama kirik masikichita rimaychichu: Ñukata yachachikka kanta yachachiknanta ashwan alimi nishpa.

⁷Kankunaka mana shukkunamanta ashwan alichu kankichi chasna rimanaykichipa. ⁱManachu yuyarinkichi tukuy ali yachana tukuy charihushkaykichipas Yaya Diospa kushkan kananta? Yaya Dios mana kankunata yanapashpanka mana atipankichichu ruranata nima yachanata nima imata. Chayrayku ama kankuna kikinta atunyachiriyochichu.

⁸Kankuna yuyarinkichi ña tukuy imata yachak kanaykichita. Yuyarinkichi tukuy munashkaykichita apishkaykichita, chaymanta ña kamachinata atipanaykichita. Ñukanchimanta manana nima imata munankichichu yachakunata. Kushikuynimami kankuna chasna suma yachak ali kamachikkuna tukushka kankichima karka. Chasna

kankichimaka, ñukanchipas kankunawa parihu kamachikkuna tukunchima karka. ⁹Ñukanchi Jesukristupa kachashkan runankunaka mana chasnachu yuyarinchi. Yuyarini Yaya Dios ñukanchita churashkanta tukuy runakunamanta washanirukunatashina, imashami shuk wañuchi y tukunapa kahuktashina. Tukuy runakuna *angekunapas ñukanchita rikunahun piña animalwa makanakuhuktashina yachanankunapa alitachu manachu Yaya Diosta kasushpa kawsahunchi nishpa.

¹⁰Kristumanta yachachihushpanchi runakuna ñukanchita yanka rimanahun muspa yuyay illa runakunashina kananchita. Kankunataka rimanahun, Kristuta kirishpa kawsashpaykichi yapa ali yachak kanaykichita. Runakunapa rikushkampi ñukanchika nima imata atipak runakunashinami kanchi.

Kankunaka paykunapa rikushkankunapi tukuya atipak runakunashina kankichi. Runakuna ñukanchita mana yuyanahunchu, kankunataka sumakta yuyanahun-

¹¹Kunankama yarkayta, yakunayayta, churarinanchimanta parisishpa kawsahunchi. Runakuna ñukanchita chiknishpa makanahun. Wasi illashina purishpa kawsahunchi. ¹²Makinchiwa sampayakta tarawashpa kawsahunchi. Chasna kahushkanchita rikushpankunapas shuk runakuna chiknishpa rimanhun mana ali kananchita. Ñukanchi paykunataka ali shunkuwa ayninchii Yaya Dios kankunata yanapashpa kushichichun nishpa. Runakuna chiknishpa ñukanchita makashpankunapas paykunata nima imata ruranchichu.

¹³Pinkachinayashpa mana alikunata ñukanchimanta rimashpankunapas ñukanchika yuyashpa paykunamanta alikunallata rimanchi. Tukuy runakuna ñukanchita wasuratashina rikunahun.

Kunankama tukuy runakunaryaku tukuy manta mana valikshina kanchi.

¹⁴Wawkinikuna paninikuna, kankunaka munashkayni wawaynikunashinami kankichi. Chayraykumi chasna rimashpa alita kankunata kunahuni. Mana pinkachinaynipachu chasna rimahuni. ¹⁵Ñuka kankunata yachachishkani Jesukristu chay mana ali rurashkanchikunamanta llakichishpan ñukanchita kishpichinanmanta. Chasna yachachishkaynimanta Jesukristupi sinchikushpaykichi ñukaka kankunaryku yayaykichishina kani. Achka ali yachachikkuna kankunaryku tiyashpanpas ñukallami yayaykichishina kani. ¹⁶Chasna kashkayniraykumi kankunata rimani, imashnami ñukaka alita rurashpa kawsani, chasna kankunapas alita rurashpa kawsaychi nishpa.

¹⁷Chayrayku wawkinchi Timoteota kankunama kachahuni. Paypas munashkayni wawaynishinami, alita yachachik kan. Kay wawkinchita kachahuni kankunata yuyachinanpa, imashnami ñuka alita Kristu Jesusta kasushpa kawsahuni nishpa. Kankunata yachachinka tukuy purishkayni llaktakunapi tukuy Jesukristuta kirikunnata yachachishkaynikunata. ¹⁸Shukkuna kankunamanta paykuna kikinlla yachakshina rikurinayashpankuna ñukamanta rimanahun manashi pasyak shamunkachu nishpa. ¹⁹Chasna rimashpankunapas Yaya Dios munashpanka kankunata pasyak rishami. Chasna rishpayni rikusha chay paykuna kikin atunyachirishpa rimak wawkikuna shutipachu manachu Yaya Diospa yachayninwa kahushkankunata rikuchinahun. ²⁰Yachanchi Yaya Diospa kamachishkan tukushpa paypa ali kamachihushkanpi kawsashpanchika yachayninwa alikunata rurashkanchiwa

rikuchinchi, mana rimashpalla kiparinchichu.²¹ Kankunama rishpayni ¿imashnata munankichi ruranaynipa? ¿Kankunata asutihuksina sinchi shimiwa rimanaynipachu risha? ¿Kankunata yuyahushkaynita alita rikuchishpa ali shunkuwa rimanaynipachu risha?

Pablo yachachin mana ali rurak kirikta kastiganapa

5 ¹Wawkikuna panikuna, shuk runakuna rimawashkakuna chay llaktaykichi shuk kirik wawki maman tukuta warminrayku apishkanta. Ñukaka chayta yachashpaynimi yapa llakirishka kahuni. Nima Yaya Diosta mana kirik runakuna chasna millaypata rurashpa kawsanahunchu. ²Chay wawki chasna kawsahushpan yapa llakirishpa pinkarinkichima karka. Chasna rurashkanta rikushpaykichi llakirinaykichiranti ali kawsaktashina payta kushichinkichi. Chay mana alita rurahuk wawkitaka rimaychi ³Yaya Diospa wasinpi manana kankunawa parihu tantarinanpa. ³Ñuka kankunawa mana kahushpaynipas yapami kankunata yuyarishpa kahuni. Amunchi Jesukristu kamachishka kashpayni kankunata rimani: Chay yapa millaypata rurak wawkitaka kastiganaykichi tiyan. ⁴Kankuna Amunchi Jesukristuta kasuk kashkaykichirayku tantariyichi kwintanaykichipa. Ñukapas yuyaynipy kankunawa kasha. Chasna tantarishpaykichi Amunchi Jesukristumi yachayninwa kankunata yanapanka. ⁵Chasna kashpan chay runata kamachiychi kankunamanta anchurinanpa. Pay munashkanshina supaykunapa apunpa munashkanta rurashpa kawsachun yapa parisipan chay mana alikunata ruranayashkanka tukurinanpa, Amunchi Jesús shamuhushkan punchapi kishpichiy tukunanpa. ⁶Ñukanchimi

shukkunamanta ashwan ali kanchi nishpa rimashkaykichika mana alichu. ¿Manachu yuyarinkichi shuk uchilla *levadurawa urtiyachishkaka panrayku chapushkanchipi churashka kashpan tukuya urtiyachinanta? ⁷Chayrayku chay mana ali rurak wawki urtiyachik levadurashina kashpan anchuchiychi kankunamanta shuk wawkikuna mana yuyarinankunapa payshina mana alita ruranata. Chay runata anchuchishpaykichi shuk mana urtiyachishka pashina kankichi. Chasna tukunaykichi pami Yaya Dioska ⁸Kristuta kachamurka, *Paskua punchakunapi shuk obeha maltashina uchanchiranti wañunanpa. ⁸Chayrayku akuychi Paskua punchakunapishina alicharishka kishpichiy tukushkanchita yuyarishpa kushiku-shunchi. Imashnami levadurawa urtiyashka chapurishkata wichupayanchi pan mana urtiyachishkata mikunanchipa, chasnashina tukuy mana ali rurananchikunata sakishunchi ali yuyaywana alikunata rurashpa, mana llullashpa kawsananchipa.

⁹Shuk kartaynipy ña kankunata rimashkani mana tantarinaykichipa musayaysiki runakunawa. ¹⁰Chasna yachachishpayni mana kankunata rimahunichu tukuy musayaysiki runakunamanta, tukuy imata munashpa kawsakkunamanta, shuwakunamanta, runa rurashka dioskunata mañakkunamanta anchurinaykichipa. Chasna kama karka, kay allpamanta llukshinaykichi tiyama.

¹¹Ashwan kankunata rimani chasna runakunawa mana tantarinaykichipa kirikmi kani nishpa rimashpankunaka. Shuk wawkikuna Jesukristuta kirikmi kani nishpa rimashpankunapas musayashpa, tukuy ima tiyashkata munarishpa, runakuna rurashkankuna dioskunata mañashpa, llullashpa,

machashpa, shuwashpa kawsanahun. Chasnakunawa nima mikuhushkayki-chipi tantariyichichu.

¹²⁻¹³ Mana Yaya Diosta kasuk runakuna mana alita rurahushpanku-naka paykunata nima imata rimaychi-chu. Yaya Diosmi paykunata rimanka mana alitachu kawsahunkichi nishpa. Ashwan shuk wawki Yaya Diosta alita katihushkanmanta mana alita rurahushpanka payta shuti rimaychi mana chay millaypata rurashpa kawsaynachu nishpa. Chay wawki mana kasunayashpanka kastigaychi. Chayrayku chay rimashkayni millaypata rurakta chawpi-kichimanta wichuychi.

Kirikkunapura alichanamanta riman

6 ¹Wawkikuna panikuna, ²imashnataya kankunamanta shukkunaka Jesukristuta kirik masikichiwa shuk imamanta mana alichanata atipashpanku-naka rimak rinahun Yaya Diosta mana kasuk alichak apuykichita chaypi alichanankunapa? ³Imaraykutaya mana rimak rinahunchu Yaya Diosta kasukkunata kankunapura alichanaykicipa?

² ⁴Manachu yachankichi shuk puncha ñukanchi Jesukristuta kirikkuna tukuy mana payta kirikkunata rimananchi kashkata kanmi alita rurashkanki, kanka mana alitachu rurashkanki nishpa? Chasna kashpan ⁵manachu ashwan yachankichima alichanata kay allpallapi uchilla alichanaykichi kashkata? ³Manachu yachankichi tukuy Yaya Diosta yanapak ⁶angellkunatapas rimananchi kashkata kanmi alita rurashkanki, kanka mana alitachu rurashkanki nishpa? Chasna kashpan ⁷manachu ashwan alichanata yachankichima kay allpapi kawsahushpanchira alichanaykichi kashkata?

⁴Chasna alichanaykichi kashkaka kankunapurapi tiyashpan ⁸imaraykuta

rimak rinkichi chay nima imapi Yaya Diospa munashkanta yachakchu nishkaykichita pay kankunaryaku alichananpa? ⁵Kayta kankunata rimani pinkarinaykicipa. ⁶Manachu kankunapuri tiyan yachakka, maykanmi atipama alichanata kirikkunapura rimanakushpa kahushkankunamanta? Ari tiyanmi. ⁶Chasna kashpantata kirikkunapura rimanakushpa katinkichi. Mana chayllachu, ashwan Jesukristuta mana kirik apukunapa puntankunapi rimak rinkichi.

⁷ Jesukristuta kirik masikichiwa rimanakushpa kawsashpaykichilla ña rikuchin mana alita rurahushkaykichita. Chasna kashpan ashwan ali kama kirik masikichi kankunata mana alita rurahushpanku-naka mana piñarishpa awantanaykicipa, chaymantapas shuk kirik masikichi kankunamanta shuk imata shuwashpanka apananpa sakinaykicipa. ⁸Ashwan kikin kirik masikichikunata kankunaka mana alikunata rurankichi, llullachishpa paykunamanta shuwankichi.

⁹ ⁵Manachu yachankichi chay mana alita rurak runakuna Yaya Diospa kamachinan mushu mundupi mana yaykunankunata? Ama llullachiriyichi-chu kankuna kikin. Runa rurashka dioskunata mañak runakunaka, shukpa warminwa musayak runakunaka, shukpa kusanwa musayak warmiku-naka, kari masinwa musayakkunaka, shuk musayakkunapas, tukuy paykunami mana yaykunkakunachu Yaya Diospa kamachinan mushu mundupi. ¹⁰Chasnallatatami tukuy shuwakunata, shukkunapa imankunata munaysikunata, machaysikunata, nima wasi wasipi yaykushpa yanka rimakkunata, llullachiysikunata Yaya Dioska manami yaykuchinkachu paypa kamachinan mushu mundupi.

¹¹Ñawpa kankunamanta shukkuna chasna mana alita rurak runakunami karkankichi. Kunanka Yaya Diosta tapushkaykichirayku payka tukuy chay millaypa rurashkaykichimanta kankunata llakichishpan pichashka, paypa aliyachishkan runakuna kanaykipcha. Kunanka Amunchi Jesukristu wañushkanraykumi Yaya Dioska Espiritunwa kankunata yanapashpan ucha illa kashkaykichita rikuhun.

**Uchamanta anchurishka
kashpanchi tukuy aychanchiwa
Yaya Diosta kushichinanchi tiyan**

¹²Kankunaka rimankichi ñukaka tukuy munashkaynita atipani ruranata nishpa. Ari, rimashkaykichika shutipami. Chasna kashpanpas manami tukuychu ali kama ñukanchirayku. Ari, atipanchima tukuy munashkanchita rurashpa kawsanata. Chayta rurashpa kawsahushpanchika alimanta aliman-tami ashwanllatana munanchima ruranata chay mana alikunata. Chasna kashpanka chay mana ali ruranakunata mana ruranayashpanchipas manami atipanchimachu sakinata. Chayrayku mana alichu tukuy munashkanchita rurananchipa mana kuti kamachirishkashina tukunanchipa. ¹³Shuk runakuna rimahanun: Yaya Dioska tukuy ima mikunata ñukanchita kushka mikunanchipa. Wiksanchita rurashka mikunata apinanpa nishpa. Ari, chayka shutipami. Chasna kashpanpas yuyariyichi Yaya Dios ishkantita kulluchinanta. Chaymantapas chasna yuyarishpaykichi-pas manami shutipachu Yaya Dios aychanchita rurashka musayanakushpa kawsananchipa. Ashwan payka aychanchita rurashka payllata kasushpa kawsananchipa. ¹⁴Chaymantapas imashnami payka atun yachayninwa Jesukristuta wañushkanmanta

kawsachirka, chasnallatatami ñukanchi-tapas wañushkanchimanta kawsachinka.

¹⁵¿Manachu yachankichi *Kristu aychanchipa amun kananta? Chasna kashpan alichu kama chay Kristupa aychanta puta warmikunapa aychanwa tantachinanchipa? Manami alichu. ¹⁶¿Manachu yachankichi shuk kari puta warmiwa musayashpanka paywa shuk aychashinalla tukunanta? Ñawpamanta pacha Yaya Diospa killkachishkanpi riman shuk kari warmiyashpanka chay warmiwa shuk aychashinallami tukun nishpa. ¹⁷Ashwan maykunkunami Amunchi Jesukristuta kasuk tukunahun paywami shuklla kanahun, Yaya Diospa Espiritun shukllata-shina rurashkanrayku.

¹⁸Chasna Amunchi Jesukristuwa shuklla kashkanchirayku ama musayanakushpa kawsaychichu. Shuk uchakunata rurashkaykichimanta aychaykichika manami mapayachishkashina tukunchu. Ashwan musayashpa kawsahushpaykichika kikin aychaykitchitami waklichinkichi.

¹⁹¿Manachu yachankichi aychaykichika Yaya Diospa Espiritunpa kawsanan wasishina kananta? Yaya Dios Espiritunta kankunama kachashka kawsanarpa shunkuykichipi shuk wasipishina. Chayrayku mana kankuna kikinchu aychaykicipa amun kankichi.

²⁰Jesukristumi yapa nanayta parisishpa wañurka supaypa kamachishkankunamanta ñukanchita kishpichishpan Amunchi tukunarpa. Chasna paypa kashpanchi Yayanchi Diosllata aychanchiwa kushichinanchi tiyan munashkanllata rurashpa kawsananchipa.

**Warmiyu karika, kusayu warmipas,
imashnami kawsanankuna tiyan**

7 ¹Wawkikuna panikuna, kankuna kartaykichipi tapuwashkankichi alichu manachu kasarananchipa nishpa.

Ñuka rimashkaykichi, ali kama mana warmiyu, warmikunapas mana kusayu kawsanaykichipa. ²Chasna kashpanpas mana musayashpa uchata rurashpa kawsanaykichipa, ali kan tukuy Yaya Diosta kasuk runa warmiyashpan kikin warminwa kawsanana, warmipas kusayashpan kikin kusanwa kawsanana. ³Tukuy kari warminwa, tukuy warmi kusanwa alita kuyrashpa, parihu yuyanakushpa, yanapanakushpa kawsanankuna tiyan. Warmipas kusanwa, karipas warminwa munash-kankunata ruranankuna tiyan, nima shuk mana munanichu nishpa. ⁴Tukuy kusayu warmika mana pay kikin aychanpa amunchu. Chasnallatata tukuy warmiyu karipas mana pay kikin aychanpa amunchu. Kusan warminpa aychanpa amun kashpan warminpas kusanpa aychanpa amun kashpan parihu kasunakushpa kawsanankuna tiyan. ⁵Chaymanta shuk kari warminwa ishkanti parihu alita kwintashpanguna alimi kama shuk punchakuna mana tupanakunkunapa, Yaya Dioswa kwintanakunkunapa. Chasna mañanata paktaçishkankunawasha kuti tupanakushpa kawsanahuchun, mana karipas, nima warmipas shukwa musayanankunapa. Tupanakunata sakishpaykichi supaykunapa apunmi atipama kankunata uchata rurachinata. Chayrayku mana ishkanti shuk yuyayllawa kashpaykichika manami alichu tupanakunata sakinaykichipa.

⁶Tukuy chayka shuk kunanami kan, mana Yaya Diospa kamachishkanchu kan. Ashwan ñuka kikinpa yuyaynimantami kankunata chayta kunashpa yachachihuni. ⁷Ñuka munaynima tukuy kankunapas ñukashina warmi illa kawsanaykichipa. Chasna rimashpaynipas yachani, mana tukuychu atipankichima warmi illa kawsanata. Chayrayku

Yaya Dioska ñukanchita alita riksishpan yanapashka, shukka warmiyananpa, shukka mana warmiyananpa.

⁸Tukuy kankuna musukunata, shipaskunata, mashintukunatapas rimani, ali kama ñukashina mana kasaranaykichipa. ⁹Chasna shuk kari warmi illa, shuk warmi kusa illa kawsanata mana atipashpaykichi ali kama kasaranaykichipa, mana karika yapa warmiyanata munashpa, warmipas mana yapa kusayanata munashpa parisishpa kawsanaykichipa.

¹⁰Chaymanta ñia kasarashkakunata rimani: Kan kari, warmiyu kashpaykika ama warmikita wichuychu. Kan warmi, kusayu kashpaykika ama kusaykita wichuychu. Kay kunahushkaynitaka Yaya Diosmi kamachiwashka kankunata yachachinaynipe. ¹¹Shuk warmi kusanta wichushka kashpanka ali kama chay kusanwa alichashpan kutikashka tantarinanpa. Mana munashpanka ama shukta kusayachun. Chaymantapas Yaya Dios mana munanchu shuk kari warminta wichunanpa.

¹²Tiyanchari shuk wawkipa warmin mana Jesukristuta kirinata munak. Jesukristuka mana chaykunamanta yachachishkan kashpanpas ñuka rimashkaykichi, chay warminka payllawa kawsanata munashpanka chay wawkika ama warminta wichuchun.

¹³Chaymanta tiyanchari shuk panipa kusan, mana Jesukristuta kirinata munak. Chay kusan payllawa kawsanata munashpanka chay panika ama kusanta wichuchun. ¹⁴Chay panipa kusan mana Jesukristuta kirik kashpanpas Yaya Dioska payta warminranti uchankunamanta pichay tukushkatashina rikushpan chay kirik warminta mana uchayachinchu paywa kawsahushkan-rayku. Chasnallatata shuk wawkipa warmin mana Jesukristuta kirik

kashpanpas Yaya Dioska payta kusanranti uchankunamanta pichay tukushkatashina rikushpan chay kirik kusanta mana uchayachinchu paywa kawsahushkanrayku. Mana chasna kamaka wawankunapas mana alichu kanahuma Yaya Diospa rikushkanpi. Ashwan kunanka wawankunatapas Yaya Dioska uchamanta pichay tukushkatashina rikun.

¹⁵Shuk panipa kusan mana Yaya Diosta kasuk kashpan payta sakinata munashpanka sakichun. Chasnallatata shuk wawkipa warmin mana Yaya Diosta kasuk kashpan kusanta sakinata munashpanka sakichun ama arkaychichu. Chasna sakinakushpankuna manana kasarashkashinachu kiparina-hun. Yaya Dios munan kushilla mana piñanakushpa kawsananchipa. ¹⁶Shuk pani yuyarima ūukami atipasha yanapanata kusaynita paypas kishpichirishka kananpa nishpa. Chasna yuyarishpan mana kusanta sakinayama. Chay panita rimani: Manami yachankichu pay kishpishka kankachu manachu. Chayrayku chay mana Jesukristuta kirik kusaykitaka sakiy llukshinanpa munashpanka. Chasnallatata shuk wawki yuyarima: ūukami atipasha yanapanata warminita, paypas kishpishka kananpa nishpa. Chasna yuyarishpan mana sakinayama warminta. Payta rimani: Manami yachankichu pay kishpishka kankachu manachu. Yaya Diosllami shuti atipan chasna kishpichinataka. Chayrayku chay mana Jesukristuta kirik warmikitaka sakiy llukshinanpa munashpanka.

Karan shuk kushilla kachun Yaya Dios churashkanpi

¹⁷Wawkikuna panikuna, karan shuk Yaya Dios churashkanpi kushilla kawsachun. Imashnami kashka Yaya

Dios payta kayashpan paypa runan kananpa, chasna kushilla katicun. Chasnallatata chay shuk llaktakunapi tantarik Jesukristuta kirik masinchikunatapas yachachini.

¹⁸Shukkuna kankunamanta israel karikuna kashpaykichi ishpanaykichi kara puntata pitirishka kankichi. Chasna pitirishka kahushkaykichipi Yaya Dios kankunata kayashpan paypa runankuna kanaykichipa ama munay-chichu mana pitirishkashina tukunata. Kankuna mana israel karikuna mana pitirishkachu kankichi. Chasna kahushkaykichipi Yaya Dios kankunata kayashpan paypa runankuna kanaykichipa ama munaychichu ishpanaykichi kara puntata pitirinata. ¹⁹Ñukanchikuna pitirishka kashpanchipas kankuna mana pitirishka kashpaykichipas mana imananchu. Ashwan Yaya Dioska munanmi paypa kamachishkanta kasushpa kawsananchita. ²⁰Chasna Yaya Diosta kasushpa kawsahushpaykichi imashnachari kashkankichi, pitirishkachu manachu, Yaya Dios kankunata kayashpan runankuna kanaykichipa, chasnalla kipariyichi.

²¹Yaya Dios kayashkan uras shuk runapa rantishkan runa kashpayki chasnalla katinayki kashpan ama llakiriychu. Chasna kashpanpas amuykita paganata atipankimaka, pagay kanta kacharinanpa, manana kamachishkan kanaykipa. ^{22*}Rantishka runakuna kashpaykichipas Jesukristuta kirishpa kawsashpaykichi chushana kawsankichi, manana shukpa kamachishkanshinanachu, Jesús kankunata kishpichishkanrayku. Mana rantishka runakuna kashpaykichimi Jesukristu kankunata rantishkanrayku manana chushashinanachu kawsankichi, paypa kamachinan runakuna tukushkaykichirayku. ²³Jesukristumi

yapa nanayta parisishpa wañushpan achkata pagakshina kankunata rantishka payllata kasushpa kawsanaykichipa. Chayrayku ama kuti tukuychchu runakunapa kamachinankunashina runata kasukkuna.²⁴ Wawkikuna panikuna, kamachina runa mana kamachina runa kashpaykichi Yaya Dios kankunata kayashkan uras paypa runankuna kanaykichipa, karan shuk mana chikan tukunayashpa, imashnachari kan chasnalla Yaya Diospa munashkanta rurashpa kawsachun.

²⁵⁻²⁶Kankuna mana warmiyu wawki-kunata, mana kusayu panikunata yachachinayani yuarishkaynita. Kunan yapa manchaypa timpupi kawsahunchi. Chayrayku ali kama, tukuy mana warmiyu wawki-kunata chasna warmi illa kawsanaykichipa, chaymantapas tukuy mana kusayu warmikuna kusa illa kawsanaykichipa. Jesukristuka chayta mana yachachiwarkachu, ñukallami chayta yuarini.²⁷ Wawkikuna, kankuna warmiyu kashpaykichika ama warmiki-chita wichuychichu. Mana warmiyu kashpaykichika ama warmiyanata munashpa kawsachichu.²⁸ Chasna rimashpaynipas warmiyashpaykichika alimi, chasna rurashpaykichi manami uchatachu rurankichi. Chasnallatata shuk shipas kusayashpanka manami uchatachu ruran. Nuka munaynima mana warmiyu mana kusayu kanaykicha mana yapa yuarishpa llakirishpa kawsanaykichipa.

²⁹Wawkikuna panikuna, manana unaytachu kawsashunchi kay allpapi. Chayrayku kunanmanta pacha kankuna warmiyu karikuna, kusayu warmikunapas sapalla Yaya Diosrayku kawsashina kawsaychi, tukuy shunkuykichimanta pacha Yaya Diospa munashkanta rurashpa.³⁰ Chaymanta kankuna llakiywa kashpaykichika amana chay

llakihushkaykichillata yuarishpa kawsaychichu. Chaymanta kushilla kashpaykichika ama kushiku hushkaykichillata yuarishpa kawsaychinachu. Shuk imata rantishpaykichi ama chay rantishkaykichillata yuarishpa kawsaychinachu.³¹ Tukuy kay allpapi rikunanchikunaka tukurinkakunami. Chayrayku warmiyu kashpaykichipas llakishpa kahushpaykichipas kushikushpa kahushpaykichipas tukuy imaykichi kankunaryku tiyahushpanpas ama chaykunallata yuarishpa kawsaychinachu, ashwan Yaya Diosta yuarishpa, munashkanta rurashpa kawsaychi.

³²Ñuka munaynima mana kay allpapi tukuy ima tiyahukkunallata yuarishpa kawsanaykichipa. Shuk kari mana warmiyu kashpan ashwan atipan yuyarinata Yaya Diospa munashkanllata, imashnami Yaya Diosta kushichinka nishpa.³³ Shuk kari warmiyu kashpan yuyarinan tiyan, imashnami warminta kushichishpa kawsanka.³⁴ Chasnaka payka shukta shuktami yuarishpa kawsan. Shuk warmi mana kusayu kashpan ashwan yuyarin Yaya Diospa rimashkanllata kasunata, chaymantapas imashnami Yaya Diosta yuyashpa kushichishpa kawsanka. Shuk warmi kusayu kashpan yapa achkata yuyarinan tiyan kusanta kushichishpa kawsananpa.

³⁵Tukuy chayta kankunata rimani, Yaya Diosta tukuy shunkuykichimanta pacha yuyashpa kasushpa, alita rurashpa kawsanaykichipa. Manami rimahunichu yuyarinaykichipa kasaranaka manami alichu nishpa.

³⁶Shuk musu shuk shipaswa kwintashka kahushkankunapi yuyarina-huma manana kasaranankunapa. Chasna yuarishpankuna chay musuka kuti yuyrima chay shipasta mana alita rurananta mana payta warmiyashpan.

Chaymantapas sinchi munanata musyama. Ashwan ali kama warmiyaynypa nishpa yuyarima. Chasna kashpan munashkanshina warmiyachun. Chayka mana uchachu.³⁷ Shuk musu shuk shipaswa kwintashka kahushkanapi nima pi payta mana munakta yuyachishpan paylla shunkunpi shuk yuyayylla tukuma, kikin munanapi alita kuyrarik kama, chaymanta shunkunpi arí nishpan sinchikunapa yuyarima chay kwintashkan shipaska shipas kiparichun nishpa kuyrananpa, alitami ruran.³⁸ Chayrayku maykan musumi kwintashkan shipasta warmiyan, payka alitami ruran, maykanmi mana warmiyanchu ashwan alitami ruran.

³⁹ Shuk kusayu warmika alita kusanta yuyashpa, chay kusanllawa kawsanan tiyan kusan wañunankama. Chay kusan wañushpan shuti atipan munashpanka kuti kusayanata. Ashwan chay kusayanayashkanka Yaya Diosta kasuk masin kachun.⁴⁰ Chasna kashpanpas ñuka rimani, chay mashintuka ashwan kushilla kama mana kuti kusayashpan. Shukkuna mana chasnallatata yuyarishpankopas ñuka yuyarini Yaya Diospa Espíritun paykunapapishina shunkuynipas kahushpan chasna rimani.

Runakunapa rurashkan dioskunata kushka mikunakunamanta riman

8 ¹Kunanka rimashkaykichi maykan-tami kankunaka tapuwashkankichi kartaykichi: ¿Alichu kama runakunapa rurashka dioskunata kushka aychakunata mikunanchipa? nishpa. Ñukanchikunaka yachanchi chay rurashka dioskunaka nima imata ruranata atipanankunata. Chay rurashka dioskunata mañak runakunaka mana chayta yachanahunchu. Chasna paykunamanta ashwan yachak kashpan-

chipas chay yachanaka nima imapi yanapanchu mana yuyakkuna kashpan-chika. Ashwan ñukanchi kikinllata atunyachirinchima ñukaka chay rurashka dioskunata mañak runakunamanta ashwan alita yachakmi kani nishpa. Ñukanchi yuyakkuna kashpan-chilla shukkunata yanapashpa kawsanchi Yaya Diosta ashwan alita kasunankunapa.² Kankuna kikinlla alita yachashina kanaykichita yuyarishpaykichika manarami alita Yaya Diospa shiminta yachahunkichirachu, imashnami yachanaykichi tiyan.³ Kankuna alita Yaya Diosta yuyashpa kawsahushpaykichika Yaya Diospas kankunata riksishpanmi alita rikun.

⁴ Chasna kashpan runakunapa rurashka dioskunata kushka aychakunata mikushunchichu manachu mikushunchi nishpa yuyarihushkanchipi kayta yuyariyichi: Yachanchi runakunapa rurashka dioskunaka nima ima kananta. Yaya Dioska shukllami, paymanta ashwan shukka mana tiyanchu.⁵⁻⁶ Runakuna rimashpankunapas kay allpapi wayrapipas achka dioskuna tiyan nishpa, chaymanta shutipa achka dioskuna achka kamachikkuna tiyashpanpas runakuna paykunata kasushpa kawsahushkankunaryaku ñukanchikunaka shuklla Yayanchi Dios kananta yachanchi. Paymi tukuyta rurashka, ñukanchikunata-pas rurashka payta kasushpa kawsananchipa. Chaymanta tiyan shuklla Amunchi Jesukristu. Paymi Yayan Dios munashpan tukuy imata rurashka, ñukanchikunatapas rurashka.

⁷ Ashwan mana tukuy runakunachu chayta alita yachanahun. Chaymanta shukkuna Yaya Diosta kasuk masinchikuna chay runakunapa rurashkan dioskunata aychakunata kushkata mikushpankuna yuyarinahun mana alita

rurashkankunata. Ñawpaka chay runakunapa rurashkan dioskunata kushichishpa kawsashpankuna paykunata kushka aychakunata mikupayarkakuna. Chaymanta pacha kunankama chayta mikushpankuna yuyarinahun chay runakunapa rurashkan dioskunata yuyahushkankunata. Chasna mana alita yachashpa mikushpankunami yuyarinahun uchatami rurashkani nishpa. Chasna mapayachiy tukushkashina musyashpankuna manana atipanahunchu kushilla kawsanata.⁸ Ñukanchikunaka yachanchi chay mikunata mikushpanchi mana mikushpanchipas Yaya Dioska ñukanchita chasnallami yuyananta.

⁹Chayta yachashpaykichi runakunapa rurashka dioskunata kushka aychakunata kushilla mikunkichima. Chayka alimi kan. Chasna kashpanpas chay aychata mikushkaykichiwa atipankichima shuk mana kankunashina alita yachak kirik masikichita uchata rurashnata. Chasna kashpan alita kuyrariychi mana chasna ruranaykichipa.

¹⁰Kankuna runakunapa rurashka dioskuna nima ima kananta yachakkuna shuk yanka diosrayku rurashka wasima rinkichima. Chaypina shuk mana alita yachak kirik masikichika kankuna chaypi mikuhushkaykitchita rikuma. Chasna kashpan ¹¹manachu paytapas munachinkichima chay aychata mikushpayni uchatami rurani nishpa shunkunpi rimay tukushpanpas? ¹¹Chaypina paypas mikuma. Chaymanta yuyarima kunanka uchatami rurashkani nishpa. Chaymanta pacha manana Yaya Diosta kasushpa kawsama. Kankuna alita yachak kashkaykichiranti chay kirik masikichika wiñayparayku Yaya Diosmanta anchurima, maykanraykumi *Kristuka wañurka kishpichinanpa.

¹²Chasna chay kirik masikichita uchata rurachishpaykichiwa uchatami rurankichi. Mana alichu nishpa yuyarishkanta rurachishkaykichiwa shunkunta waklichinkichima manana atipanapna alita sinchikunata. Chasna rurashpaykichi Kristutami mana alita rurankichi.

¹³Chayrayku shuk mikunata mikushkayniwa shuk kirik masinita uchata rurachinimaka, nima ima uras kuti aychata mikuynimma chay kirik masinita mana pantachichinaynipa.

**Yaya Diospa kachashkan
yachachikkunata ima
munashkankunata kunanchi tiyan**

9 ¹Kunanka ²tukuy runakunapa kamachinanshinachu kani? Manami chasnachu kani. Ashwan ³apostolmi kani, Jesukristupa kachashkan ñukanchita kishpichishkanmanta yachachinaynipa. Amunchi Jesukristuta rikushkani. Pay kamachiwashpanmi kankunata yachachishkani. Chayrayku kunan kankunaka payta kasushpa kawsahunkichi.

²Shuk runakuna mana yachanayana-hunchu Jesukristu yachachinaynipa kachawashkanta. Chay runakuna mana yachanayashpankunapas kankuna chayta alita yachankichi. Ñuka Yaya Diospa shiminta yachachishkayniray-kumi kunanka payta kasushpa kawsahunkichi. Chasna kashpan shutipa Yaya Diospa kachashkan kanaynita rikuchinkichi.

³⁻⁴Chay ñukamanta mana alita rimak runakunata tapuni: Jesukristupa kachashkan kashpayni Yaya Diospa shiminta yachachinaynipa ⁵manachu ali kama yachachishkaynimanta mikunata upyanata tapunaynipa? ⁵Manachu ñukapas Jesukristuta kirik warmiwa kasaraynimaka, chay warminawiwa pakta purinata atipaynima? Pedropas, Jesuspa

wawkinkunapas, chay shuk apostol masinikunapas warminkunawa pakta purinahun Yaya Diospa shiminta yachachinankunapa.⁶ ¿Manachu ñukapas wawki Bernabepas atipanchima mana shukpi tarawashpa Yaya Diospa shiminta yachachihushkan-chimantalla kawsanata imashnami shukkunapas ruranahun?⁷ Shuk runa suntalupi kahushpan ¿pay kikinllachu mikunataka rantin? Mana. Ashwan payta kamachikkunami kunahun. Shuk runapa chakrapi tarpukuna tiyashpanka ¿manachu chay tarpukuna- napa muyunkunata mikuma? Ari, mikumami. ¿Manachu chasnallatata shuk obebakunata kuyrak runa chay obebakunapa chuchun yakuta upyama? Ari, upyamami.⁸ Chayta nishpayni mana runapa yuyayninllatachu kankunata yachachihuni. Ñawpa yachachik Moisés wañupas killkash- kanpi chasnami yachachin.⁹ Chay killkashkanpi kasnami nin:

Shuk tarawak wakra triguta wishku- hushkanpi ama shiminta tapay- chichu nishpa.

Chayka mana rimanayanchu Yaya Dios yapa wakrata yuyananta.¹⁰ Yaya Dioska ñukanchi paypa shiminta yachachikkunatami yuyarishpa chasna riman. Tarawananchimanta chapashpa kawsan- chipa kasna yuyachin: Shuk chakrapi tarpuk runa allpata tuksishpan muyuta tarpun. Chaymanta chay tarpushkan alita pukushpan shuk runa pallashpan chay muyukunata apan wishkunarpa. Ishkanti tarawanahun chapashpa chay muyukunata chawpinakunankunata.

¹¹ Ñukanchi Yaya Diospa shiminta yachachikkunaka chay chakrapi tarawak runakunashinami kanchi. Kankunata Yaya Diospa shiminta yachachishkanchirayku shunkuykichipi mana tukurik kawsayta kuk muyuta

tarpukshina kashpanchi ¿manachu atipanchima kankunata tapunata tukurik imakunata, maykantami munan- chi kawsananchipa?¹² Chay shuk yachachikkuna kankunata tapunahun ima pishihushkanta kunaykichipa. Ñukapas chay yachachishpa purik masinikunashinami chasna kankunata tapunata munashpaynika tapuynima. Chasna ñukanchika tapunata atipash- panchitata mana kankunata tapushkan- chichu. Ashwan achkata parisishpanchi- pas tarawashpa kawsanchi nima pi rimanarpa, chay suma ali shimita *Kristu runakunata kishpichinanmanta yachachinahun kullkiti imatapas apinankunallapa nishpa.

¹³ Yuyariyichi Jerusalén llaktapi *Yaya Diospa wasinpi tarawak runakunata. Israel masinchikuna shuk wiwakunata Yaya Diosta kushichishpa kunahun. Chay wiwakunata wañuchinata yanapak Yaya Diospa wasinpi tuchpashinapi rupachik runakunaka chay wiwakunapa aychanmanta shuk partita mikunahun.

¹⁴ Chasnashinami Yaya Dioska munan chay suma ali shiminta Jesukristu runakunata kishpichinanmanta yachachikkunapas yachachishpa tarawashkankunamanta kankuna yanapashpaykichi kawsanankunapa.

¹⁵ Kankunata yachachihushpayni munashkaynita kuwanaykichi kashpan- pas ñukaka nima imata kankunamanta tapushkanichu. Kunallapas mana kay kartata kankunaryku killkahunichu ñukata imatapas kuwanaykichipa. Yarkaywa wañuhushpaynipas manami nima imata kankunata tapushkanichu nima pi atipanarpa chasna yanka yachachishkaynirayku kushikunaynita kichuwanata.

¹⁶ Yaya Diospa suma ali shiminta Jesukristu runakunata kishpichinan- manta yachachishpayni manami

atipanichu rimanata yachachishkayni-rayku yapa alimi kani nishpa. Yaya Diosmi kamachiwashka chayta yachachinaynipa. Chayrayku yachachinayni tiyan. Mana yachachinimaka, imashnashi tukuynimma. ¹⁷Ñuka arí nishpa rimashkaynirayku yachachish-payni kushichiy tukuynimami. Mana arí nishpayni chasnalla yachachinayni tiyan Yaya Dios yachachinaynipa kamachishwashkanrayku. ¹⁸Chasna kashpanka ñimawashi kushichiy tukuhuni? Kaymi kan kushikunaynika kankunata Yaya Diospa suma ali shiminta Jesukristu runakunata kishpichinanmanta yachachishpayni nima imata kankunamanta tapushpayni. Atipaynima karka kankunamanta imatas tapunata. Chasna kashpanpas nima imata tapunichu. Chasnampanta pagay tukushkashina yapa kushikuni.

¹⁹Nima shuk runa ñukata kamachiwak kashpanpas shuk kamachina runashina tukuy runakunata yanapashpa

kawsahuni ashwan achka runakuna Kristuta kasushpa kawsanankunapa.

²⁰Ñukanchi israel runakunamanta achka Moisés wañupa killkashkan kamachish-kakunata kasushpa kawsanahu. Ñuka israel runa kashpaynipas yachani mana chay kamachishkakunata paktachish-kanchiraykuchu kishpichirishka kananchita. Chasna yachashpaynipas ñukanchi israel runakunamanta Jesukristuta mana kirikkunawa parihu kawsashpayni paykunashinami chay kamachishkakunata kasushpa kawsani. Chasna kawsahushpaynimi munani paykunata yanapanata paykunapas Jesukristuta kasushpa kawsanankunapa.

²¹Chaymanta tiyan kankuna mana Moisespa killkashkan kamachishkakunata kasushpa kawsak mana israel runakuna. Jesukristuta mana kirik mana israel masikichikunawa kahushpayni

paykunashinallatatami kawsahuni. Chasna kawsahushpaynimi munani paykunata yanapanata paykunapas Jesukristuta kasushpa kawsanankunapa. Chasna paykunashina kawsahushpaynipas mana sakinichu Yaya Diospa kamachishkanta kasushpa kawsanata, Kristupa kamachishkankunata kasuk tukushkaynirayku. ²²Tiyan Yaya Diosta kirik masinchikuna, manara tukuy shunkunkunamanta pacha alita paypi sinchikunata yachakkuna. Paykunawa kahushpayni ñukapas paykunashinami kawsani. Maykankunawapas kahushpayni paykunashinami kani. Alita paykunata yuyashpami yachachini chay tukuymanta shukkunallapas Jesukristuta kirishpa kishpichiy tukunankunapa. ²³Ñukaka Yaya Diospa suma ali shiminta Jesukristu runakunata kishpichinanmanta yachachini ñukapas Yaya Dios chay shiminpi paktachinan rimashkankunata kuy tukunaynipa.

²⁴Tiyan shuk runakuna sinchita kallpashpa shuk pukllak masinkunata gananata munakkuna. Chay gananata munak runakunaka sinchita kallpanankuna tiyan. Shukllami puntiru paktan shuk suma llawtuta ganashpan apananpa. Akuychi ñukanchikunapas chay ganak runakunashina kashunchi. Chayrayku alikunallata rurashpa, Yaya Diosllata kasushpa kawsashunchi Yaya Dioswa wiñaya kawsananchipa.

²⁵Chasna pukllashpa gananata munak runakunaka shuk mikunata upyanata sasinahun chay pukllahushkan puncha mana sampayanana. Chasnami sasinahun shuk ratu wañurik pankakunamanta rurashka llawtullata gananankunapa. Ashwan ñukanchikunaka akuychi chay gananata munak runakunashina kashunchi, tukuy mana alikunata sakishpa, yachashpanchi

mana shuk wañurik llawtullatachu apinanchita, ashwan Yaya Dios ñukanchita wiñaypa kawsayta kunanta.²⁶ Chayrayku ñukaka gananata munak kallpahuk runashina kawsani paktanay-nipa maypimi munani paktanata. Chasnallatatumi sinchita makanakuhuk kuntranta waktahukshina kawsani kuntraynita winsinaynipa. Mana kanichu shuk yanka wayrapi waktahuk runashina.²⁷ Ashwan ñukaka aychayni-tami alita kuyrani tukuy uras alita ruranaynipa. Chayta rurani shukkunata yachachinaynipa imashnami alita rurashpa kawsanankuna tiyan. Ñuka kikin mana alita rurashpa kawsayni-maka ¿imashnata atipaynima shukku-nata yachachinata alita rurashpa kawsanankunapa?

**Runakunapa rurashka
dioskunata mana kushichishpa
kawsanamanta riman**

10¹Wawkikuna panikuna, ama kunkaychichu chay ñawpa yaya rukunchi wañukuna chunlla chakishka allpapi purihushpankuna Yaya Dios tukuy paykunata kunrankunamanta shuk puyuwa arkashpa kuyrashkanta. Chaymanta chay atun kucha Puka Marpi paktashpankuna Yaya Dios chay atun marta shuk parti shuk parti anchuchishpa ñampitashina rurashpan tukuy paykunata yanaparka allpata purishpa pasashpankuna kishpinankunapa.² Chasná Yaya Dios chay puyuwa paykunata arkashpan chay marta pasahushpankuna bawtisarishkakunashina karkakuna Moisesta kasushpa katinankunapa.³ Tukuy chay ñawpa yaya rukunchi wañukunaka Yaya Diospa kushkan silumanta mikunaku-nata mikupayarkakuna.⁴ Chaymanta yaku mana tiyashpan shuk rumi urkumanta Yaya Dioska yakuta

llukshichishpan tukuy chay runakuna upyarkakuna. *Kristumi chay Yaya Diospa kushkan rumi urkushina kan. Paymi paykunawa kashpan paykunata kishpichirka mana yarkaywa yakuna-yaywa wañunankunapa.⁵ Chasná Kristu tukuy paykunata yanapashpanpas shuk shukkunallata alita rikurka rimashkan allpapi yakyuchinanpa. Achka paykunamanta mana kasushkankunaryku kastigay tukushpankuna chay chunlla chakishka allpapi wañurkakuna.⁶ Yaya Dioska chay yaya rukunchi wañukunata chasná kastigarka, mana alita rurashkankunaryku. Ñukanchikuna paykunata yuyarishpa yachakunanchi tiyan mana paykunashina millaypata rurananchipa.

7Kankuna ama chay yaya rukunchi wañukunashina yanka dioskunata kushichinayashpa kawsaychichu. Ñawpa chay yaya rukunchikuna rurarkakuna shuk wakrata oromanta. Chay wakrata kushichinayashpa tantarirkakuna. Chasná rurashkankunamanta Yaya Diospa killkachishkanpi riman:

Runakunaka fiestata rurashpa
achkata mikurkakuna, upyarka-kuna, baylarkakuna nishpa.

⁸Chaymanta ama chay ñawpa yaya rukunchi wañukunashina musayaychichu. Paykunamanta shukkuna musayashpankuna shuk punchalla ishkay chunka kimsa waranka wañurkakuna.

⁹Chaymantapas ama chay yaya rukunchi wañukunashina rimaychichu manami Yaya Diosta kasunayaninachu nishpa. Chay runakuna chasná rimashpankuna Yaya Dioska machakuyakunata kacharka paykunata kanishpankuna wañunankunapa.

¹⁰Chaymanta ama chay ñawpa yaya rukunchi wañukunashina rimaychichu

Yaya Dioska mana ali kananta. Chasna rimashpankunami Yaya Diospa *angelka chay mana ali rimak runakunata wañuchirka.

¹¹Yaya Dioska chay ñawpa yaya rukunchikunata kastigarka ñukanchi yachakunanchipa mana paykunashina kawsananchipa. Tukuy chayta Moiseska killkarka ñukanchikuna yachakunanchipa alita rurashpa kawsananchipa. Kunanka ñukanchikunaka kawsahunchimi kay mundu tukurinan punchakunapi. Chayraykumi chay Yaya Diospa killkachishkanmanta yachakunanchi tiyan imashnami alita kawsashunchi.

¹²Shuk kankunamanta yuyarishpankunaka ñukaka mana atipanichu millaypata ruranata nishpa, kuyrariyichi mana kunkaymanta millaypata ruranaykichipa. ¹³Kamay tukushpaykichi Yaya Diosta kasukchu kankichi manachu nishpa, chayka manami pasashkachu runarayku atipaypata. Kamanakuna sinchi kashpankunapas Yaya Dios rimashkanta paktachik kashpan manami sakinkachu sinchikunata atipanaykichimanta pasa kanata. Ashwan payka yanapan mana ali ruranayaykichikunata mana ruranaykichipa. Chasna kankunata sinchikuchishpan yanapan kamanakunamanta alita llukshinaykichipa.

¹⁴Chayrayku munashkayni wawkini-kuna paninikuna, chasna Yaya Dios kankunata yanapahušpan ama chay runakunapa rurashka dioskunata kushichiyichihu. ¹⁵Kankuna alita asirtak kashpaykichi maykanmi ali, maykanmi mana alichu, yuyariyichi alitachu manachu kankunata yachachi-huni nishpa. ¹⁶Ñukanchikuna Yaya Diosta yuyashpa tantarishpanchi *vinuta upyashpanchi Yaya Diosta agradesinch. Chasna chay vinuta upyashpanchi Kristupa yawarnin

ñukanchirayku shuturishkanrayku paywa shuklla kanchi. Chaymantapas panta pakishpa mikushpanchi Kristu wañushkanrayku paywa shuklla kanchi.

¹⁷Achka kashpanchipas parihu shuk panllata mikunchi. Chasna chay panllata parihu mikuhushpanchi yachanchi shuk runapa aychanshinalla kananchita.

¹⁸Rikuychi, achka ñukanchi israel runakunamanta wiwakunata wañuchinahun, tuchpashinapi shuk pitikunata rupachinahun Yaya Diosta kushichinankunapa. Chasna chay wiwakunata Yaya Diosta kushpankuna chay tarawakkuna chay aycha puchurishkata tukuy parihu mikunahun. Chasna parihu mikuhushpankunami tantaylla Yaya Diosta kushichipayanahun. ¹⁹Chayta kankunata yuyachishpayni mana rimanayanichu runakunapa rurashka dioskunaka shutipa kanankunata, nima chay dioskunata kushka aycha shuk aychakunamanta chikan kananta.

²⁰Ashwan kaytami rimani: Runakunaka chay rurashka dioskunata kushichinankunapa wiwakunata wañuchishpa kushpankuna supaytami kunahun, manami kikin Yaya Diostachu kunahun. Mana munanichu kankuna paykunawa parihu yanka dioskunata karana fiestama rishpaykichi supaykunata kushichinaykichipa. ²¹Kristupa yawarnin shuturishkata yuyarishpa vinuta upyashpaykichi manami atipankichichu supaykunaratayku churashkankuna upyanakunatapas upyanata. Chasnallatata Kristupa wañushkanta yuyarishpa panta mikush-paykichi manami atipankichichu supaykunaratayku churashkankuna aychakunatapas mikunata. ²²Ñukanchi Yaya Diosta kasukkuna supaykunata kushichishpanchika Yaya Diostami piñachinch. Chasna Yaya Diosta

piñachishpanchika manami kishpishunchichu paypa kastigananmanta. ¿Yaya Diosmanta ashwan yachayyuchu kanchi paypa kastigananta mana manchananchipa?

**Mana ñukanchi kikinllata
yuyarishpa kawsanamanta
yachachin**

²³Shuk runakuna rimanahun tukuy kan ali rurananchipa nishpa. Ari, chayka shutipami. Chasna kashpanpas mana tukuychu ali ñukanchirayku, chaymantapas mana tukuychu yanapan Yaya Diosta kasuk masinchikuna ashwan alita payta kasushpa kawsanakunapa. ²⁴Akuychi tukuy wawkinchikunawa paninchikunawa yanapanakushpa kawsashunchi. Mana ñukanchi kikinpa munashkanchita rurashpa kawsashunchichu.

²⁵⁻²⁶Yaya Dios tukuy kay allpata, tukuy kay allpapi tiyashkakunata rurashka. Chayrayku payka kay allpapa, tukuy kay allpapi tiyashkapa Amun kan. Chasna kashpanmi tukuy chay aychakuna rantichinapa kashkata atipankichi rantishpa mikunata. Shunkuykichipi mana killachirinaykipa ama tapuychichu ¿kay aychaka runakunapa rurashka dioskunata kushkachu? nishpa. Chasna mana yuyarishpa mikushpaykichika manami uchata rurankichichu.

²⁷Chaymanta Yaya Diosta shuk mana kasuk runa kankunata kayashpanka munashpaykichika riychi paywa mikunaykipa. Shunkuykichipi mana killachirinaykipa ama tapuychichu ¿kay mikunaka runakunapa rurashka dioskunata kushka mikunachu? nishpa.

²⁸Chasna kashpanpas chay kanta kayahuk runa rimama kay mikunaka diosnita kushichishpa wañuchishkakunami nishpa. Chasna kashpanka chay

aychata ama mikuychichu, chay kankunata rimakpa yuyayninta mana pantachichinaykipa, chaymantapas nima pi shunkunpi killachirinampa paypas chay diosta kushichin nishpa. ²⁹Mana rimanichu kankuna shunkuykipa killachirinaykipa, ashwan rimanimi shukkuna shunkunkunapi killachirinankunamanta. Ñukanchimanta yuyarishpa ñukarayku ali kashpan chay aychata mikunaynipa, nima pi atipamachu rimanata rurashkaykika mana alichu nishpa, paychasna ruranamanta shunkunpi killachirishka tukushkankunaryku. ³⁰Ñukanchi shuk imata mikushpanchi Yaya Diosta agradesishpa ¿imaraykuta shuk runakunaka ñukanchita rimanahuma manami alitachu rurashkanki nishpa? Chayka manami alichu.

³¹Chayrayku mikuhushpaykichi mana mikuhushpaykichi, upyahushpaykichi mana upyahushpaykichi, chaymanta imatapas rurahushpaykichi ruraychi tukuy runakuna rimanankunapa Yaya Dios kankunata yanapashpanmi kankunaka alita rurahunkichi nishpa.

³²Ama rurashkaykichiwa runakunata pantachichishpa nima arkashpa kawsaychichu Jesukristuta alita kirinankunapa, nima israel runakunaryku, nima mana israel runakunaryku, nima Jesukristuta kirik masinchikunarykupas. ³³Ñukapas chasnallatatami kawsani tukuy runakunata yanapanaynipa. Manami ñuka kikinrayku shuk imata apinaynipachu chasna kawsahuni, ashwan tukuy runakunata yanapanaynipami, paykunapas ñukashina kishpinankunapa Yaya Diospa kastigananmanta.

11 ¹Imashnami ñuka *Kristumanta yachakushpa alita rurashpa kawsahuni, chasnallatata kankunapas ñukamanta yachakushpa alita rurashpa kawsaychi.

**Yaya Diospa wasinpi imashnami
warmikunaka kanankuna tiyan**

²Wawkikuna panikuna, kankuna
ñukata yuyawashpaykichimi tukuy chay
yachachishkaynikunata alita kasuhunkichi.
Chaywa alitami rurahunkichi.

³Kunan ashwan shuk tiyawan maykantami munani alita asirtanaykichipa.

*Kristuka tukuy runakunarayku atun kamachikmi. Warmikunarayku kusankunaka kamachikkunashinami kanahun. Kristurayku Yayan Dioska atun kamachikmi kan.

⁴Chasna kashpan kankuna karikuna

*Yaya Diospa wasinpi kashpaykichi mañashpa Yaya Diospa shiminta yachachishpa umaykichita wankushpaykichi Jesukristuta pinkachinkichi.

⁵Ashwan kankuna kusayu panikuna tantarishkaykichipi Yaya Diospa rimashkanta rimahushpaykichi Yaya Dioswa kwintahushpaykichi karishina mana umaykichita llachapawa wankushpaykicha kusaykichitami pinkachinkichi. Shuk warmipa chukchanta rutushkankunashina pinkaypami. ⁶Shuk pani umanta mana llachapawa wankunata munashpanka chukchanta karishina pitichichun. Yuyarishpanka karishina chukchanta pitichina rutuchina pinkaypami nishpa, umanta llachapawa wankuchun.

Chasna tantarishkaykichipi, kankuna kusayu panikuna, Yaya Diospa rimashkanta rimahushpaykichi chasnallatata Yaya Dioswa kwintahushpaykichi karishina mana chukchaykichita llachapawa wankushpaykicha pinkaypami. Mana chukchaykichita llachapawa wankushpaykicha rutuchishkashina pinkaypami. Shuk pani chukchanta mana llachapawa wankunata munashpanka karishina pitichichun. Yuyarishpanka karishina

chukchanta pitichina rutuchina pinkaypami nishpa, chukchanta llachapawa wankuchun.

⁷Kankuna karikunaka Yaya Diospa wasinpi tantarishpaykichi ama warmikunashina umaykichita llachapawa wankuchichu. Yaya Dioska karita rurashka payshina kananpa, chaymanta rikuchinanpa imashnami payka tukuymanta pasa kan. Warmikunaka rikuchinahun imashna alitami Yaya Dioska karikunata rurashka.

⁸Karitaka Yaya Dioska manami warmipa aychanmantachu rurashka, ashwan warmitami karipa aychanmanta rurashka. ⁹Chasnallatata Yaya Dioska karitaka manami warmiraykuchu rurashka, ashwan warmitami rurashka karirayku kusanta alita yanapashpa kasushpa kawsanarpa. ¹⁰Chayrayku ali kama, tukuy kusayu panikuna umankunata llachapawa wankunankunapa. Chasna wankushpankuna tukuy chay Yaya Diospa *angelkunapas kushikunahun, chay kusayu warmikuna kusankunata alita kasushpa kawsahushkankunata rikuchihushkankunaryku.

¹¹Chasna kashpanpas Amunchi Jesukristuta kirik kashpanchi karikuna warmikuna chasnalla yanapanakunanchipa kanchi. Nima karikuna atipanahunchu rimanata warmikunata mana munanchichu nishpa, nima warmikuna atipanahunchu rimanata karikunata mana munananchichu nishpa. ¹²Warmi karipa aychanmanta rurashkami. Chayka shutipami. Chasnallatata shutipami karikunaka warmipa wawayashkankunami. Ashwan tukuy ñukanchimi Yaya Diospa rurashkankuna kanchi.

¹³Kankuna kikin rimaychi: ¿Alichu shuk kusayu warmi tantarishkaykichipi mana umanta llachapawa wankushpa Yaya Diosta mañananarpa? ¹⁴Chaymanta

kankuna karikuna yacharinkichi chukchaykichita pitichishpa kawsanata. Kankunaka warmishina suni chukchayu kawsashpaykichika pinkaypami kama.¹⁵ Kankuna warmikunaraykuka suni chukchayu kanaykichika yapa sumami. Yaya Dios chukchaykichita kushka chaywa tulturishkashina kanaykichipa.¹⁶ Shuk runakuna kankunata rimana-huma mana alichu chasna yacharinaykichika nishpa. Ñukaka chay runakunata rimaynimami kasna: Ñukanchi tukuy maypipas tantarik Yaya Diosta kasuk masinchikunapas chasnami yacharishkanchi nishpa.

**Imashnami mana alihu kan
mikunanchipa upyananchipa
Jesukristu wañushkanta yuyarishpa
mikuuhushkanchipi**

¹⁷ Wawkikuna panikuna, alita uyaway-chi. Kankuna tantarishpaykichi Yaya Diosta kushichinaykichipa, manana yuyanakushpa sinchikuchinakunkichinachu. Chayrayku llakirishpayni kankunarayku killkahuni. ¹⁸ Shuk runakuna rimawashkakuna, kankunashi tantarishkaykichipi shukwa shukwa manana shuk yuyayllawa kahushkaykicha, ashwan yapashi rimanakushpa kahunkichi. Yuyarini shuk parti rimash-kankuna shutipa kananta. ¹⁹ Shutipami tantaylla kahushkaykichimanta shuk muntun shuk muntun tukunaykichi tiyan rikuchinaykichipa pikunami kankunamanta alita Yaya Diosta kasukkuna kanahun.

²⁰ Chasna muntun muntun tukushkakuna tantarishpaykichi chay panta mikunaykichi chay *vinuta upyanaykichi manami shutipachu Jesukristupa wañushkanta yuyarishpa mikunaka.

²¹ Chasna mikunaykichipa tantarishpaykichi karan shuk apashkankunatara mana chapashpa mikunahun upyana-

hun. Chasna shukkunapaka mana tiyashpan mana mikushpa mana upyashpa yarkaywa kiparinahun, shukkunaka saksakta mikushpa upyashpa machashka kanahun.²² ¿Manachu tiyan wasikichika mikunaykichipa upyanaykichipa? ¿Imaraykuta mana imayu kirik masikichita mana yuyashpa mana karashpa pinkachinkichi? Chayrayku ¿imatata rimashkaykichi? Chasna kanaykichimanta kankunata rimaynimachu alitami rurankichi nishpa? Manami atipanichu.

**Pablo yachachin Jesukristu
wañushkanta yuyarishpa tantaylla
mikunanchipa upyananchipa**

²³ Wawkikuna panikuna, Amunchi Jesusmi ūukata yachachiwashka tantarishpanchi panta mikunanchipa, chasnallatata *vinuta upyananchipa. Chaymanta yachachishkani tukuy kay Amunchi Jesús yachachiwashkanta. Kunan kutikashka yachachishkaykichi: Amunchi Jesús apichiy tukunan tuta paypa runankunawa parihu mikushpan shuk panta apirka. ²⁴ Yayanta agradesishpan chay panta pakishpa pakishpa runankunata kuhushpan mikunankunapa rimarka: Kay panka aychaynishinami. Tukuy uras tantarishpaykichi shuk panta pakinakushpa yuyariyichi ūuka kankunaranti wañushkaynita nishpa.

²⁵ Chay panta mikushkankunawasha shuk pusillu vinuta apishpan rimarka: Ñawpa kankuna shuk wiwakunata wañuchishpa, yawarninta shutuchishpa Yaya Diosta tapushpaykichi payka mana ali rurashkaykichita llakichishka. Kunanmanta pacha ūuka wañushpayni yawarni shuturishkanrayku Yaya Dioswa mushu alichanata rurasha payka kankunata tukuy mana ali rurashkaykichimanta llakichinanpa. Kay vinuta

upyashpaykichi yuyariyichi yawarni shuturishkanta nishpa. Chasna Amunchi Jesuska yachachirka tukuy paypa runankunata.²⁶Chayrayku kunanmanta pacha Jesukristu shamanankama chay panta mikushpa, chay vinuta upyashpa shukkunata riksichinkichi Amunchi Jesukristu uchanchikunaranti wañushkanta.

**Imashnami tantaylla mikunanchi
upyananchi tiyan Jesukristu
wañushkanta yuarishpa**

²⁷Shuk runa tiyashpanka kirik masinkunata mana yuyashpa chay panta mikushpanka chay *vinuta upyashpanka uchatami ruran. Chasna rurashpan payka kasna rimahuksinami Amunchi Jesukristu wañushpan yawarnin shuturishkanka nima imachu nishpa.²⁸Chayrayku manara chay panta mikuhushpanchira manara chay vinuta upyahushpanchira shunkunchimanta pacha yuyarinanchi tiyan, kirik masinchikunata yuyashpachu kawsahunci manachu.²⁹Chay panta mikushpa, chay vinuta upyashpa alita yuyarinanchi tiyan Amunchi Jesukristu tukuy ñukanchirayku wañushkanta. Shuk yanka mikunatashinalla mikushpanchika Yaya Diosmi ñukanchita kastiganka.³⁰Chayraykumi shukkunaka unkushka kankichi, shukkunaka sampakuna kankichi. Shukkunaka ña wañushkakunapas.³¹Ñukanchi kikin yuyarinchimaka kirik masinikunata yuyashpachu kawsahuni manachu nishpa yuyashpana kawsananchipa, chay mikunata mikushpanchi Yaya Dioska mana ñukanchita chasna kastigamachu.³²Mana yuyanakushpa kawsashpanchi paymi ñukanchita kastigashpan yachachinayan alillata rurashpa yuyanakushpa kawsananchipana. Chasna kawsashpanchimi mana kastigarishun-

chichu Yaya Diosta mana kasuk runakunawa pakta nina mana wañukpi.

³³Chayrayku wawkikuna panikuna, tantarishpaykichi chay panta mikunaykicipa, chay vinuta upyanaykicipa, chapaychi tukuy parihu mikunaykicipa upyanaykicipa.

³⁴Shuk wawki yapa yarkashpanka puntiru wasinllapi mikuchun. Chasna mikushpa shamushpanmi tantarishkaykicipi ashwan Jesuspa wañushkanllata yuyarishpa mikunka. Chasnami shuti Yaya Dioska payta mana kastigankachu. Chayllata kaykunamanta kankunata rimashkani. Kankunama rishpaynimi ashwanta yachachishkaykichi.

**Yaya Diospa Espíritun yanapashpan
tukuy imata atipanchi ruranata**

12 ¹Wawkikuna panikuna, munani alita yachanaykicipa Yaya Diospa Espíritun tukuy ñukanchi Yaya Diosta kasukkunata shukta shukta alita ruranata atipachinanmanta.²Alitami yachankichi manara Yaya Diosta kasushpa kawsahushpaykichira shuk mana ali yachachikkuna kankunata llullachirkakuna runakunapa rurashkan mana rimak dioskunata mañashpa kawsanaykicipa.³Chayrayku kankunata kayta rimani. Shuk runa rimashpanka Jesuska manami Yaya Diospa Wawanchu nishpa, manami Yaya Diospa Espíritun munashkantachu rimahun. Ashwan shuk runa rimashpanka Jesuska Yaya Diospa Wawanmi, paymi Amuyni nishpa, Yaya Diospa Espiritunmi yanapashpan rimahun.

⁴⁻⁵Chaymanta Yaya Diospa Espíritun tukuy ñukanchi Yaya Diosta kasuk runakunata shukta shukta alita ruranata atipachin. Chasna tukuy ñukanchikuna chikan chikanta ruranata atipachiy tukushpanchipas chay shuklla Yaya Diospa Espiritunmi ñukanchita

atipachin, chaymantapas chay shuklla Jesukristumi tukuy ñukanchipa Amunchi kan. ⁶Yaya Diosmi karan shuk ñukanchita yachayninta kun chikan chickanta rurananchipa. Chasna kashpanpas shukllami Yaya Dioska, tukuy imata yachayninwa rurakka.

⁷Yaya Diospa Espiritunka chasnami karan shukta chikan chickanta alikunata ruranata atipachin tukuy Jesukristuta kirik masinchikunawa yanapanakushpa kawsananchipa. ⁸Yaya Diospa Espiritunka shukkunataka yanapan shuk runakunata yachayninwa alita kunanan-kunapa. Shukkunataka yanapan Yaya Diosta alita riksishpan yachachinankunapa. ⁹Chaymanta Yaya Diospa Espíritun shukkunataka yanapan tukuy shunkunkunamanta pacha payllapi sinchikushpa shuk mana yachashkankunata alita ruranankunapa. Shukkunataka yachayninta kun unkushkakunata ampinankunapa. ¹⁰Chasnallatata shukkunata yachayninta kun atun yachaywa ruranakunata ruranankunapa. Shukkunataka yachayninta kun yachachinankunapa imashnami alita Yaya Diospa munananta rurashpa kawsananchi tiyan, chaymantapas imatami Yaya Dios ruranayan nishpa. Chaymanta Yaya Diospa Espiritunka shukkunataka yachayta kun yachanan-kunapa pimi alita Yaya Diosta kasushpa yachachin, pimi supayta kasushpa yachachin nishpa. Chaymanta shukkunataka yachayta kun mana yachakushkan Yaya Dioslla yachashkan shimipi rimanankunapa. Shukkunataka yachayta kun chay shimipi rimashkan-kunata asirtachinankunapa.

¹¹Tukuy chaykunata shuklla Yaya Diospa Espiritunmi atipachin. Imashnami pay munan chasnashinami *Kristuta kirikkunata karan shukta chickanta atipachin.

**Tukuy Jesukristuta kirikkuna shuk
runashinallami kanchi**

¹²Ñukanchi runakunapa tiyan makinchikuna, chakinchikuna, ñawinchikuna, sinkanchikuna, rinkrin-chikuna. Tukuy chaykuna ñukanchiku-napa tiyashpanpas shuk runallami kanchi. Chasnallatatami ñukanchi *Kristuta kirikkunapas Yaya Dios karan shukta chikan chickanta atipachishpan-pas shuk runashinallami kanchi. ¹³Shuk-kuna ñukanchikunamanta israel runakuna kanchi, shukkunaka mana israel runakuna kankichi. Shukkuna patronyu, shukkunaka mana patronyu-chu kanchi. Chasna chikan chickan runakuna kashpanchipas Yaya Diospa Espíritun tukuy ñukanchita shunkunchipa aliyahishpa mushuta rurashpan shuk runashinalla tukushkanchi. Chaymanta Yaya Dios tukuy ñukanchipa shunkunchipi kawsanarpa chay shuklla Espiritunta churarka kawsayta kunanpa.

¹⁴Chasnallatata aychanchipas kan. Makinchikuna, chakinchikuna, rinkrin-chikuna tiyashpanpas shuk runallami kanchi. ¹⁵Chakinchi ñukanchita rimamaka ñukaka mana makikichu kani, chayrayku mana aychaykichu kani nishpa. Chasna rimashpanpas aychanchillami. ¹⁶Rinkrinchi ñukanchita rimamaka ñukaka mana ñawikichu kani, chayrayku mana aychaykichu kani nishpa. Chasna rimashpanpas aychanchillami kan. ¹⁷Ñawiyulla, mana rinkriyu kanchimaka, mana atipanchimachu uyanata. Rinkriyulla, mana sinkayu kanchimaka, mana atipanchimachu samanata. ¹⁸Yaya Dioska rinkrin-chita, sinkanchita, ñawinchita chickanta ruranankunapa aychanchipi churashka pay munashkanshina. ¹⁹Rinkrinchillata, ñawinchillata,

sinkanchillata rurama karka, aychanchika manami tiyamachu.²⁰ Ashwan paymi aychanchipi tukuy tiyakta rurarka. Chasna rinkriyu, sinkayu, ñawiyu, makiyu, chakiyu kashpanchipas shuk runallami kanchi.

²¹ Chasna kashpan ñawinchika mana atipamachu makinchita rimanata kanka mana rikunata atipashpayki mana munanichu kanta nishpa. Chaymanta umanchipas mana atipamachu chakinchita rimanata kanta mana munanichu nishpa.²² Ashwan tukuy kay aychanchipi kahukkunaka alimi kan ñukanchikunaryku. Shuk parti aychanchi mana yapa valik kananta yuyarishkanchitami ashwan shukkunamanta munanchi.²³ Shuk parti aychanchita mana rikuchiypa kananta yuyarishpanchi ashwan alita kuyrashpa sumayachishpa kawsanchi. Maykankunami aychanchipi pinkaypa kananta yuyarinchchi, chaykunatami ashwanta valichishpa kuyrashpa kawsanchi.²⁴ Chay shuk parti aychanchita mana chasna kuyrashpachu kawsananchi tiyan. Yaya Dioska aychanchita rurashka chay ashwan pinkaypa kananta yuyarishkanchi partikuna ashwan valichirishka kuyrarishka kanankunapa.

²⁵ Chasnami Yaya Dioska rurashka karan shuk parti aychanchipi mana sapallan anchurishkashina kananpa, ashwan shukwa shukwa parihu alita yanapanakunankunapa.²⁶ Chasna kashpanmi makinchii ñawinchi nanayta parisishpanka tukuy aychanchipi chay nanayta parisinchii. Chasnallatamatii makinchicha shuk imata alita rurashkanchimanta kushichiy tukushpanchi tukuy aychanchipi chay kushikunata musyanchi.

²⁷ Tukuy ñukanchi Yaya Diospa wawankuna Kristupa aychanshinami kanchi. Karan shuk ñukanchikunami

shuk parti Kristupa aychanchi kahukshina kanchi.

²⁸ Yaya Diosmi ñukanchita karan shukta chikan chikanta atipachin. Shukkunataka yanapashpan kachan, maytapas rishpankuna paypa rimashkanta yachachinankunapa. Shukkunataka yanapan wawkikunata panikunata pasanan kashkata alita asirtachinankunapa. Shukkunataka yanapan paypa rimashkanta alita yachachinankunapa. Shukkunataka Yaya Dioska yanapan atun yachaywa ruranakunata ruranakunapa. Shukkunataka yanapan unkushkakunata ampinankunapa. Shukkunataka yanapan kirik masinkunata tukuy imapi yanapanankunapa. Chaymanta shukkunataka Yaya Dioska yanapan kirik masinkunata yanapanankunapa, alita parihu kawsanankunapa. Shukkunataka yanapan mana yachakushkan Yaya Dioslla yachashkan shimikunata rimanankunapa.

²⁹ Chasna Yaya Dios ñukanchita chikan chikanta atipachishpan manami munanchu tukuy chasnalla kananchipa. Manami tukuytachu kamachishka maytapas rishpanchi paypa shiminta yachachinanchipa. Manami tukuytachu kamachishka yachachinanchipa imatami payka ruranayan nishpa. Chaymanta Yaya Dioska manami tukuytachu yanapan shuk wawkikunata paypa shiminta yachachinanchipa. Chaymanta manami tukuytachu yanapan atun yachaywa ruranakunata rurananchipa.³⁰ Chasnallatata Yaya Dioska mana tukuytachu yanapan unkushkakunata ampinanchipa. Manami tukuytachu yanapan paylla yachashkan nima pi yachakushkan shimipi rimanchipa. Manami tukuytachu yanapan chay nima pi yachakushkan shimipi rimashkanchi shimikunata asirtachinanchipa.³¹ Chayrayku Yaya

Diosta mañaychi kankunata yanapanpa, ashwan ali ruranakunata ruranaykichipa. Chasna mañashpaykichi ashwan alita yuyanakushpa kawsankichi.

Imashnami Yaya Diosta runa masinchitapas yuyanaka kan

13 Kunanka kankunata riksichisha ashwan ali kawsanata.

¹Chikan runakunapa, ^{*}angelkunapa shiminkunapi rimashpanchipas mana runa masinchita yuyashpanchika yankamantami tukuy chay shimikunata rimanchima. Shuk bombota yanka waktashpa uyaruhukshinami kanchima.

²Yaya Diospa Espíritu ñukanchita atipachishpanpas Yaya Diospa munananta runakunata yachachinata, runa masinchita mana yuyahushpanchika yankamantami yachachinchima. Tukuy runakunapa mana yachaypa kashkata yachashpanchipas ali yachak Kashpanchipas mana runa masinchita yuyahushpanchika yankamantami yachak kanchima. Alita Yaya Diosta kirishpanchi paypa yachayninwa urkukunata wichunata atipashpanchipas mana runa masinchita yuyahushpanchika yankamantami ruranchima.

³Tukuy imanchita mana imayu runakunata kushpanchipas mana chay runakunata yuyahushpanchika yankamantami kunchima. Yaya Diosta kushichishpa aychaynita rupachiwaychi nishpa wañushpanchipas Yaya Diosta runa masinchitapas mana yuyahushpanchika yankamantami wañunchima.

⁴Runa masinchita shutipa yuyahushpanchika ali shunkumi kanchi. Ñukanchita mana alita rurashpanka ali yuyaywa awantanchi. Mana munarinchihu payshina charinata, nima paywa parihuyanata. Chasnallatata mana rimanchichu: Ñukapa tiyan ashwan

kanpamanta. Ñukami kanmanta ashwan ali kani nishpa. ⁵Runa masinchita yuyahushpanchika mana millaypata rimanchichu, mana ñukanchiraykulla tukuy imata munanchichu, mana paywa shuk ratu piñarinchichu. Ñukanchita chiknishpanpas mana payta chikninchichu, nima shunkunchipi mana ali rurashkanta wakaychanchichu. ⁶Mana alita rurashpanka mana kushikunchichu, ashwan shutipata rimashpa rimashkanta paktachishpa alita rurashpanmi kushikunchi. ⁷Runa masinchita shutipa yuyahushpanchika ñukanchita chiknihushpanpas sincikurishpa mana piñarishpa ali yuyaywa awantashpalla kawsanchi. Runa masinchita shutipa yuyahushpanchika tukuy ali kashkata kirinchi mana maskashpa mana ali kashkata. Ñukanchita mana alita rurashpanpas payta yuyanchilla Yaya Dios munashpan aliyachinka nishpa.

⁸Amunchi Jesukristu shamushpan manana Yaya Diospa munananta runakunata yachachishunchinachu. Nima chay Yaya Dioslla yachashkan nima pi yachakushkan shimipi rimashunchinachu. Chasnallatata nima yachayta munashunchinachu. Tukuy chay Yaya Diospa Espíritu ñukanchita atipachishkankunaka tukurishpanpas yuyananchika manami tukurinkachu. ⁹Kunan kay allpapi kawsahushpanchira achkata yachashpanchipas mana tukuytachu yachanchi Yaya Diospa ruranayahushkankunata. Yaya Diospa munananta yachachishpanchipas mana tukuy munananta rikishpanchichu yachachinchi. ¹⁰Amunchi Jesukristu shamushpanmi tukuy alita yachashuchi. Chay puntiru uchillastuta yachakushkanchika yuyayninchimanta chinkarinkami.

¹¹Wawa kashpanchi manara atipashkanchichu alita rimanata, yuyarinata,

nima yachanata. Ña ruku kashpanchi manana wawashinachu kanchi.¹²Shuk matipi yakuta churashpa uyanchita rikushpanchi mana yapa alitachu rikunchi. Kunan kay allpapi kahushpanchi chay yakupi mana alita rikuhushkanchishinami Yaya Diospa yachayninta mana alitarachu riksinchi. Shuk punchami tukuy chay mana yachashkanchikunata tukuya yachashunchi. Imashnami Yaya Dioska ñukanchita ña alita riksin, shuk punchami ñukanchikunapas Yaya Diostaka alitana riksishunchi.

¹³Tukuy chaykuna tukurishpankuna kimsallami mana tukurinkachu: Yaya Diosta kirina, chapana maykanmi paktarinan tiyan, Yaya Diosta runa masinchita yuyana. Tukuy chaykunamanta ashwan alimi kan Yaya Diosta runa masinchikunatapas yuyana.

**Yaya Diospa Espíritun shuk
kirikkunata atipachin nima pi
yachakushkan shimipi
mañanankunapa**

14 ¹Wawkikuna panikuna, alita yachakuychi shukwa shukwa yuyanakushpa kawsanata. Chaymanta munaychi Yaya Diospa Espíritun kankunata chikan chickanta atipachinanta. Tukuy chay atipachinakunamanta ashwanta munaychi Yaya Diospa Espíritun kankunata atipachinanta Yaya Diospa munananta shukkunatapas yachachinata. ²Yaya Diospa Espíritun kankunata atipachishpan paylla yachashkan nima pi yachakushkan shimipi mañanata Yaya Diosllatami kwintankichi. Mana runakunatachu kwintankichi, paykuna mana asirtak kashpankuna. Yaya Diospa Espiritunmi ñukanchita yuyachishpan rimanchi nima pi yachashkata. ³Ashwan Yaya Diospa Espíritun ñukanchita atipachish-

pan Yaya Diospa munananta shukkunata yachachinata, tukuy uyakkunatami asirtachinchi paykunapas Jesukristuta ashwan alita kasushpa kawsanankunapa. Chasna yachachishpanchimi paykunata sinchikuchinchi, llakiwyahukkunatapas kushillayachinchi.

⁴Chay Yaya Dioslla yachashkan nima pi yachakushkan shimipi mañashpanchika ñukanchi kikinllami ashwan alita Yaya Diosta katishpa kawsanchi. Yaya Diospa munananta yachachishpanchimi chay Jesukristuta kirik masinchikunata yanapanchi paykunapas ashwan sinchikushpa kawsanankunapa.

⁵Ñuka munaynima Yaya Diospa Espíritun tukuy kankunata atipachinanta chay nima pi yachakushkan shimipi rimanaykichipa. Chasna munashpaynipas ashwan munanima Yaya Diospa Espíritun kankunata atipachinanta Yaya Diospa munananta shukkunata yachachinaykichipa. Kankuna tantarishpaykichi Yaya Dioslla yachashkan shimipi rimashpaykichika tiyachun shuk wawki chay rimashkaykichi shimikunata asirtachik, tukuy kirik masikichikunata yanapananpa ashwan alita kirinankunapa. ⁶Wawkikuna panikuna, yuyariychi. Ñuka kankunata pasyak rishpayni Yaya Dioslla yachashkan shimipi rimaynimaka, manami kankunata yanapaynimachu. Ashwan ali kama Yaya Diospa yachachiwashkanta kankunata rimanaynipa, chaymantapas kankunata yanapanaynipa ashwan alita asirtanaykichipa pimi kan Yaya Dioska nishpa. Chaymanta ashwan ali kama kankunata Yaya Diospa munananta yachachinaynipa, chaymantapas alita kunashpa yanapanaynipa.

⁷Shuk uyarikkunamanta yuyarishunchi. Shuk runa kenata pukushpan guitarra uyachishpan mana ali uyarinanpi uyachishpanka mana

yachanchichu imatami uyachihun.

⁸Chasnallatata shuk suntalu trompetata mana shutillata pukushpanka nima maykan suntalu yachamachu wañuna-kunapami pukuhun nishpa alichari-nanpa.

⁹Chasnallatata ñukanchikunapas tantarishka kahushkanchipi nima pi yachakushkan shimikunata rimashpan-chika mana nima pi asirtamachu. Chasna mana asirtashpankunaka yankamantami rimanchima chay shimikunata. Chasna yanka rimashpan-chika chay trompetata mana alita pukuhuk runashinami kanchima. ¹⁰Kay allpapi achka chikan shimikuna tiyan. Chasna kashpanpas karan shimi asirtaypa kan chay shimita rimakkunaryku. ¹¹Ashwan ñuka shuk runapa rimashkan shimita mana asirtashpay-nika payraykuka shuk allpamanta runashinami kani. Paypas ñukaraykuka shuk allpamanta runashinami kan, mana kwintanata, nima riksinata atipashkaynirayku. ¹²Chasna kashpan imashnami munankichi Yaya Diospa Espíritun kankunata atipachinanta paylla yachashkan nima pi yachakush-kan shimikunata rimanata, chasnashina ashwan munaychi Yaya Diospa Espíritun kankunata atipachinanta tukuy maykankunawami kirik masikichikunata yanapankichi Jesukristuta ashwan alita kasunanku-napa.

¹³Chayrayku Yaya Dioslla yachashkan shimikunata rimashpanchika akuychi Yaya Diosta tapushunchi pay Espiritunwa ñukanchita asirtachishpan shukkunatapas asirtachinanchipa. ¹⁴Ñukanchikuna Yaya Dioswa kwintashpa paylla yachashkan nima pi yachakushkan shimikunata rimashpanchika payllatami kushichinch. Ñukanchika yuyayninchipi manami asirtanchichu chay rimashkanchikunata.

¹⁵Chasna kashpan akuychi Yaya Diosta mañashunchi paypa Espíritun yuyachish-kan paylla yachashkan shimikunawa, chaymantapas asirtaypa shimikunawa. Akuychi Yaya Diosta kushichishpa takishunchi paypa Espíritun yuyachishkan paylla yachashkan shimikunawa, chayman-tapas asirtaypa shimikunawa. ¹⁶Yaya Diosta paypa Espíritun yuyachishkan paylla yachashkan shimikunallawa kushichihushpaykichika shuk runakunami mana asirtankakunachu rimahushkayki-chita. Chasna mana asirtashpankunami mana atipankakunachu kankunawa parihu Yaya Diosta kushichinata. ¹⁷Alita Yaya Diosta agradesishpaykichipas chay mana asirtak runakunata mana yanapankichichu Jesukristuta ashwan alita kasushpa kawsanankunapa.

¹⁸Ñukaka kankunamanta ashwan achkatami chay nima pi yachakushkan Yaya Dioslla yachashkan shimikunata rimani. Chayraykumi Yaya Diosta agradesini. ¹⁹Chasna kashpanpas Jesukristuta kirik masinikunawa tantarishpayni chay Yaya Dioslla yachashkan shimikunawa achkata yanka rimashpa rimanayniranti, ashwan munaynima asirtaypa masna shimikuna-llawa yachachinata.

²⁰Wawkikuna panikuna, ama yuyariy-chichu manara alita yuyarinata atipak wawakunashina. Shuk partilla ali kan wawakunashina yuyarinaykicipa. Shuk uchilla wawa manara yapa yachanchu uchata ruranata. Kankunapas chay uchilla wawashina mana uchata rurashpa kawsaychi. Chasna ali kashpanpas chay parti wawakunashina yuyarinaykicipa shuk parti rukukuna-shina alita yuyarik kaychi. ²¹Yaya Diospa killkachishkanpi kasna nin:

Karumanta chikan shimita rimakku-nata kachashami kay mana kiriwanayak runakunama

paykunata rimanankunapa.
Chasna kachashpaynipas mana
kasuwanayankakunachu
nishpami Yaya Dioska riman.

²²Chayka ninayanmi mana asirtaypa
shimikunawa rimashkanchiwa Yaya
Dios mana kirikkunata yachayninta
rikuchinanta. Kirikkunataka manami
chasnachu yachayninta rikuchin.
Ashwan Yaya Diospa Espíritun
ñukanchita atipachishpan Yaya Diospa
munananta yachachinanchipa, chay
shuti kirik masinchikunata yanapan
ashwan alita payta kasunankunapa.
Mana kirikkunataka mana yanapanchu
Yaya Diosta kasunankunapa.

²³Chasna kashpan tantarishka kahush-
kaykichipi chay nima pi yachakushka
Yaya Dioslla yachashkan shimikunallata
rimashpaykichika Jesukristuta mana
kirik runa kankunawa tantarishpanka
mana asirtashpan rimama kay runaku-
naka muspa runakunami kahunkuna
nishpa. ²⁴⁻²⁵Ashwan Yaya Diospa
munananta asirtaypa shimikunapi
yachachishpanchimi chay Jesukristuta
mana kirik runaka uyashpan rimama:
Yaya Dioska yapa alitami shunkuynta
riksin. Kankuna yachachiwashpayki-
chimi ñukapas yachahuni mana alita
rurashpa kawsahushkaynita nishpa.
Chasnami chay runaka kunkurishpan
Yaya Diosta kushichima. Chaymanta
rimama shutipami Yaya Dioska
kankunawa kawsan nishpa.

**Imashnami tantarishkanchikunapi
shukta shukta alita
rurananchi tiyan**

²⁶Kunan wawkinikuna paninikuna,
Yaya Diosta kushichinaykichipa
tantarishpaykichi shukkunaka shuk
mushu takinata yachankichi, shukku-
naka yachankichi Yaya Diospa
shiminmanta shuk imata asirtachinata.

Shukkunaka yachankichi Yaya Diospa
munananta rimanata. Shukkunaka chay
nima pi yachakushkan Yaya Dioslla
yachashkan shimipi rimanata yachanki-
chi. Shukkunaka yachankichi chay
shimikunata kirik masikichikunata
asirtachinata. Chasna kashpan tukuy
chaykunawa yanapanakuychi ashwan
alita Jesukristuta kasushpa kawsanayki-
chipa.

²⁷Chay nima pi yachakushkan Yaya
Dioslla yachashkan shimipi rimashpay-
kichika ishkaylla kimsalla rimachun
shukllankama shukllankama. Chasna
rimashpaykichi shuk asirtachik runa
chay shimikunata asirtachinan tiyan.

²⁸Mana shuk asirtachik runa
tiyashpanka chay shimikunata mana
rimanahuchun. Ashwan karan shuk
sapallan wasinllapi Yaya Diosta
mañashpa chay shimipi rimachun.

²⁹Chasnallatata tantarishka kahush-
kaykichipi Yaya Diospa munananta
yachachikkuna ishkaylla kimsalla
shukllankama shukllankama yachachi-
nahuchun. Chaymanta tukuy kankuna
chaypi Jesukristuta kirikkuna chay
yachachishkankunata alita uyashpa
yuyarishpaykichi kwintaychi, chay
yachachihukka shutipachu manachu
Yaya Diospa munashkanta yachachihun
nishpa. ³⁰Shuk yachachihushpan shuk
uyashpa tiyahuk wawkita Yaya Dios
yuyachima shuk shimita paymanta
rimanarpa. Chaypina chay yachachihuk
wawkika chunllayanan tiyan, chay
shukna rimanarpa. ³¹Tukuy Yaya
Diospa yuyachishkanta yachachinayak
wawkikunaka atipanahun yachachinata.
Chasna kashpanpas shukllankama
shukllankama yachachinankuna tiyan
tukuy kankuna Jesukristuta kirikkuna
alita yachakunaykichipa, ashwan alita
payta kasushpa sinchikunaykichipa.
³²Yaya Dios Espiritunwa shuk

yachachikta yuyachishpan paypa
munananta yachachinpanpa chay
yachachikka yuyarinan tiyan ima
urasmi chayta rimanka.³³Yaya Dioska
ali kashkallata yuyak kashpanmi mana
munanchu kankuna llampu shukllapi
rimanaykichipa, ashwan munanmi
shukllankama shukllankama alita
yachachinaykichipa.

Imashnami shuk llaktakunapi
Jesukristuta kirik masinchikunaka
tantarishkankunapi rurahunkuna,
kankunapas chasnallatata ruraychi.³⁴Tantarishkaykichipi mana alichu
kama panikuna tukuy runakunapa
uyashkanpi rimanankunapa. Mana
kanahuchun kirikkunata kamachikkuna-
shina, imashnami Yaya Diospa
kamachishkanka ñukanchita yachachin.³⁵Panikuna mana asirtashpangunkuna
shuk yachachihushkata, tantarishkayki-
chiwasha wasinkunapi paktashpangunkuna
kusankunata tapunahuchun. Manami
alichu Yaya Diospa wasinpi tantarihush-
kaykichipi rimanankunapa.

³⁶Wawkikuna panikuna, kankuna
yuyarinkichichari ¿imaraykutaya payta
kasunchima? nishpa. Alita yuyariyichi,
kankunaka manami kankichichu
tukuymanta puntiru kirik runakuna,
maykunkunami kallarishkakuna Yaya
Diospa shiminta yachachinata. Manara
kankuna chay shimita yachachishpayki-
chira achka shuk llaktakunapi kawsak
runakuna chayta yachachishkakuna.
Chaymanta mana kankunallatachu
asirtachishka Yaya Dioska paypa
shiminta. ³⁷Shuk wawki Yaya Diospa
munananta yachachik kani nishpa
yuyarishpanka chasnallatata shuk
wawki Yaya Diospa Espiritunwa yachak
kanayashpanka asirtachun tukuy kay
killkahushkaynika Yaya Diospa
kamachishkan kananta. ³⁸Shuk runa
chay rimashkaynita mana kasunayash-

panka ñukanchipas paytaka mana
kasushunchichu.

³⁹Wawkinikuna paninikuna, kankuna
Yaya Diosta kushichinaykichipa
tantarishpaykichika munaychi Yaya
Diospa munananta yachachinata.
Chasnallatata nima pita rimaychichu
ama chay nima pi yachakushkan Yaya
Dioslla yakashkan shimpipi rimaychu
nishpa. ⁴⁰Chasna kashpanpas tukuy
kachun ali asirtaypa mana shukllapi
tukuy rimashpa.

Jesukristupa kawsarishkanmanta riman

15 ¹Wawkikuna panikuna, kunan-
munani kutikashka yuyarinayki-
chipa Jesukristu runakunata kishpichi-
nanmanta yachachishkaynita. Chay
yachachishkaynita kankunaka kasurkan-
kichi. Chayraykumi Jesukristuta
kirishpa, kunankama payta kasushpa
kawsahunkichi. ²Tukuy chay
yachachishkaynukunata kirishpa
kawsahushpaykichimi Yaya Dioska
kankunata mana ali rurashkaykichi-
manta llakichishka. Mana shutipa Yaya
Diosta kasushpa kawsashpaykichika
yankamantami rimankichi ñukapas
Jesukristuta kirikmi kani nishpa.

³Kay tukuymanta ali shimita Yaya
Dios yachachiwashkanta kankunata
yachachishkani kasna: *Kristumi
wañurka ñukanchita kishpichinanpa
uchanchikunamanta Yaya Dios kastiga-
nan kashkanmanta nishpa. Chasnami
Yaya Dioska ñawpa payta kasuk
runakunata killkachirkka ñukanchipas
yachananchipa. ⁴Wañushkanwasha
Jesuspa aychanta allarishka urku
uchkupi churashpa taparkakuna.
Chaymanta kimsaynin punchapi Yaya
Dioska payta kawsachirka, imashnami
ñawpamanta pacha killkarishka karka.
⁵Jesukristu wañushkanmanta kawsari-

mushpan paypa runan Pedrotara rikurirka. Chaywasha tukuy paypa runankunatana rikurirka.⁶Chaymanta pichka pachak kirik masinchikunata rikurirka. Kunankamami chay payta rikuk runakunaka kawsahunkuna. Shukkunaka ñami wañushkakuna. ⁷Chaymanta paypa runan *Santiagotapas rikurirka. Chaymanta rikurirka tukuy *apostolkunatapas.

⁸Tukuy paykunata rikurishkanwasha ñukatapas rikuriwarka. Kunkaymanta nima yuyarihushkaynipi rikuriwashka kawsanaynipa mana valikshina kahushkaynipi. ⁹Tukuy Jesukristupa apostolninkunamanta mana valikshina kani. Manara Jesukristuta kirishpayni payta kirik runakunata chiknishpayni wañuchichirkani. Chayrayku mana valinichu Jesukristupa apostolnin kanki nishpa rimawanankunapa. ¹⁰Ashwan Yaya Dioska llakichiwashpan akllawashka apostol kanaynipa. Chasna akllawashkanta mana yanka usuchishkanichu. Ñukami tukuy Jesukristupa apostolninkunamanta yachachihushkaynipi ashwan sinchita tarawashpa kashkani. Mana ñuka kikin kashpaynipa ashwan Yaya Dios yanapawashpan chasna yachachishkani. ¹¹Chasna kashpanpas mana imananchu pimi kankunata yachachishkka. Ñuka yachachishpayni shuk apostolkuna yachachishpankuna chasnallami tukuy yachachinanchika. Chay ali yachachishkanchita uyashpaykichimi Jesukristuta kirik tukushkankichi.

**Jesukristuta kirikkuna
wañushkankunamanta
kawsarinkakuna**

¹²Yaya Dioska *Kristuta wañushkanmanta kawsachishkanta yachachishkanchi. Chay yachachishkanchita kirishpaykichika ñimaraykuta kankunamanta

shukkunaka rimankichi wañushpanchi mananami kawsarishunchinachu nishpa?

¹³Rikuychi. Yaya Dioska wañushka runakunata mana kawsachimaka, payka Kristutapas wañushkanmanta manami kawsachimachu karka. ¹⁴Kristu mana kawsarishka kamaka, yankamantami yachachinchima karka. Chasnallatata kankunapas chay yachachishkanchita yankamantami kirinkichima. ¹⁵Chaymantapas ñukanchi llullachishpa yachachikkuna kanchima, Yaya Dios Kristuta kawsachishkanta yachachihushkanchiwa. Yaya Dios Kristuta mana kawsachishka kamaka wañushkakunata mana kawsachishkanrayku ñukanchi nishkanchiwa Yaya Diospa rurashkmanta chikanta yachachinchima.

¹⁶Yaya Dios wañushkakunata mana kawsachimaka, Kristutapas mana kawsachimachu karka. ¹⁷Kristu mana Yaya Diospa kawsachishkan kamaka, yankamantami kay yachachishkaynita kirinkichima, chaymantapas kunankama uchaykichimanta mana llakichiy tukunkichimachu karka.

¹⁸Chasna kamaka, chay Kristuta kirishpa wañushkakunaka manami silipi Yaya Dioswa kawsanahumachu.

¹⁹Kunan kawsahushkanchillapi Kristu ñukanchita yanapananta yuyarinchi-maka tukuy runakunamanta ashwan llakiya kawsakkuna kanchima.

²⁰Ashwan Kristuka shutipami wañushkanmanta kawsachiy tukurka. Manara nima pi wañushkanmanta kawsarishushpanra mana kuti wañunarpa Kristurami manana wañunarpa kawsarirka. Chasnallatata ñukanchikunapas wañushkanchimanta kawsarimunanchi tiyan.

²¹⁻²²Ñawpa yaya rukunchi Adanka Yaya Diosta mana kasushkanraykumi wañurka. Adanmanta miray kashpanchi

ñukanchikunapas payshina wañunchi. Chaymanta Kristu wañushkanmanta kawsarirka mana kuti wañunanpana. Chasnallatamatí ñukanchikunapas payta kasushpa kawsashpanchika wañushkan-chimanta payshina kawsachiy tukushun-chi mana kuti wañunanchipana.

²³Karan shuk Yaya Dios munashkan uras kawsarimushunchi. Tukuy runakunamanta Kristumi puntiru kawsarirka. Chaymanta pay kutikashka shamushpan ñukanchi paypa kashpanchi wañushkan-chimanta kawsarimushunchi. ²⁴Kristuka tukuy kamachik runakunata, tukuy kamachik supaykunatapas kamachinan-kunamanta winsishpa wichushpan chay uras shuti tukuy Yaya Diospa rimash-kanka paktarinka. Yayan Diosta rimanka: Kaykaya, kunan shuti kanlla tukuya kamachik kanki nishpa. ²⁵Kristumi kamachik kanan tiyan tukuy kuntrankunata winsinankama payllata kasunankunapana. ²⁶Tukuy kuntrankunata winsishkanwasha sinchi kuntran wañuytana sumakta winsishpa tukuy wañushka runakunata kawsachinka.

²⁷Yaya Dios tukuy kuntrankunata kasuchirka Jesukristuta kasunankunapa. Kristuta rimashpan tukuya kamachi-nanpa, yachanchi Jesukristu Yaya Diosta mana kamachinanta. ²⁸Yaya Dios yanapashpan Kristu tukuya amuyash-panmi paypa kasuk Wawan kashkan-rayku, Yayanta rimanka: Yayayni, tukuytami amuyashkani, kunanka paykunatami kamachihuni. Kunan shuti kanna tukuya kamachiy nishpami rimanka. Chaypimi Yaya Dioslla tukuypa amun kashpan tukuya kamachinka.

²⁹Shukkuna wañushka runakunaranti bawtisarishpankuna ¿imapi yanapa-nanta yuyarishpantaya chasna ruranahun? Wañushka runakunaka mana kawsarinahumaka ¿imaraykuta

wañushka runakunaranti bawtisarina-huma?

³⁰Ñukanchi Yaya Diospa rimashkanta yachachishkanchirayku shuk runakuna karan uras ñukanchita wañuchinayana-hun. Mana kuti kawsarimunanchita yachanchimaka, mana munanchimachu yachachishpalla katinata. ³¹Wawkikuna panikuna, tukuy urasmi chay chikniwak runakuna wañuchiwanayananahun.

Wañuchinata munawashpankunapas ñukaka kushillami kahuni, kankuna Amunchi Jesukristuta kasushpa kawsahushkaykichita yachashpayni.

³²Chay Efeso llaktapi achka chikniwak runakuna wañuchiwanayashpa achkata parisichiwashpankuna wañuchik piña animalkunawa makanakuuhkshima kashkani. Runapa yanka yuyarishkanku-nata yachachinima karka yankaman-tami chasna parisichiy tukuynima karka. Mana kuti kawsarimunanchimaka shuk runakunashina rimaynima: Kayakamami wañushunchi. Wañushpan-chika tukurishumi. Chayrayku kawsahushpanchira akuychi alita mikushpa upyashpa munashkanchita rurashpa kawsashunchi nishpa.

³³Kankunkaka ama chasna rimak runakunashina llullachiriychichu. Kankuna yachankichi, mana ali rurak runa masinchiwa ishkayashpanchika payshinallatamatí ruranchi. ³⁴Chay-rayku Yaya Diosllatana kasushpa alita rurashpa kawsaychi, amana uchata ruraychichu. Shukkuna kankunamanta Yaya Diosta mana riksikshinara kanahun. Pinkarinaykicipami chasna kankunata rimahuni.

Imashnami wañushkanchimanta kawsarimushunchi

³⁵Wawkikuna panikuna, kankunkaka tapunkichima: ¿Imashnashi wañushkan-chimanta kawsarimushunchi? ¿Imashna

rikunayushi kawsarishpanchi
rikurishunchi? nishpa.

³⁶Chayka yuyay illa runapa tapush-kanshunami kama. Yuyariyichi, chakran-chipi muyukunata tarpushpanchi ñawinka mana wiñamachu, chay muyuka mana tukyarishpanka.

³⁷Tarpushpanchi manami wiñashka tarputachu tarpunchi, ashwan muyullatami tarpunchi, trigu muyuta, mana kashpanka maykan muyukunatas.

³⁸Yaya Dioska karan muyuta wiñachishpan munashkanshina karan shuk chikan muyukunata chay muyupa kaspín rikunayuta wiñachin, muyunmanta chikan rikunayuta.

³⁹Aychakunapas mana tukuychu chasnalla kanahun. Shukka runapa aychan kan, shukka animalkunapa wiwakunapas, shukka rikrayukunapa, shukka challwakunapa aychan kan.
⁴⁰Chasnallatata tiyan chikan kawsanayukuna, shukkuna silipi kawsanankunapa, shukkunaka kay allpapi kawsanankunapa. Silipi kawsakkuna suma rikunayukuna kanahun. Kay allpapi kawsakkunapas chikan suma rikunayukuna kanahun. ⁴¹Silipi tiyakkunapas chikan chikan kanahun. Intika chikanta punchayachin killamanta. Killaka chikanta punchayachin istrillakunamanta. Karan istrillapas istrilla masinkunamanta chikanta punchayachin.

⁴²Chasnallatata kanka ñukanchikunawapas, wañushkanchimanta chikan rikunayumi kawsarishunchi. Imashnami muyuta tarpushpanchi aychanka ismun ñawin wiñananpa, chasnashinami wañushpanchi aychanchika ismun. Chay wañushkanchimanta Yaya Dios ñukanchita kawsachishpan chikanmi rikurishunchi mana kuti wañunanchipa.
⁴³Imashnami ismuk aychayu muyuta tarpunchi, chasnashinami wañushpan-

chi ismuk aychanchita pampanchi. Yaya Dios ñukanchita kawsachishpan mushu suma aychayuna kashunchi. Wañuk aychanchita pampanchi. Yaya Dios ñukanchita kawsachishpan manana wañuk aychayuna kashunchi. ⁴⁴Imashnami tarpuka tarpushkanchi muyumanta chikan rikunayu kan, chasnashinami aychanchiwapas. Wañushpanchi wañuk aychanchita pampanchi. Chaymanta chikan aychayumi kawsarishunchi silipi kawsananchipa. Wañuk aychayu kashkanchirayku yachanchi mana wañuk aychayupas kananchita.

⁴⁵Kasnami killkarishka kan: Yaya Dios puntiru runa Adanta rurashpan kawsayta kurka kay allpapi kawsanarpa. Chaymanta Yaya Dios Jesukristuta churarka payshinallatata mana tukurik kawsayyu kashpan ñukanchita Yaya Dioswa kawsayta kuk kananpa. ⁴⁶Chasna kashpanpas manara chay Yaya Dioswa kawsayta charik kashpanchira kay allpapi kawsananchipa kawsayyulla kanchi. Chaywasha Yaya Dioswa kawsayta charik tutunchi.

⁴⁷Chay puntiru runaka allpamanta runami karka kay allpapi kawsanarpa. Jesukristu silumanta shamushpan silumanta runa kan. ⁴⁸Ñukanchikunapas Adanmanta miray kashpanchi payshina kay allpamanta rurarishka kanchi kay allpapi kawsananchipa kawsayykuna. Silumanta shamushka Jesukristu Yaya Dioswa kawsayyu kashpan ñukanchipas paywa pakta kawsakkuna payshina Yaya Dioswa kawsayyu kanchi. ⁴⁹Kay allpapi kawsahushpanchira allpamanta rurarishka Adanshina wañuk aychayu kanchi. Chaymanta silipi kawsarishpanchika Jesukristushinami kashunchi.

**Jesukristupa kuti shamunanmanta
yachachin**

⁵⁰Wawkikuna panikuna, alita uyawaychi. Kay allpamanta rurashka aychankunawa mana atipanchichu Yaya Diospa kamachinan mushu munduma paywa pakta kawsak rinata. Kay wañuk aychanchiwaka manami wiñaypachu kawsashunchi.

⁵¹⁻⁵²Kunan yachachishkaykichi manara yachashkaykichita. Mana tukuy ñukanchichu wañushunchi. Chasna kashpanpas Jesukristu kuti shamuhushpan kawsa kashpanchi wañushka kashpanchi tukurina trompetaka uyarihushkanpi tukuy ñukanchi payta kasulkunapa aychanchita ñawita tapa tapa rurashkashina chay ratulla chikanyachinka. Chay trompetaka uyarihushpan Jesukristuka tukuy payta kasushpa wañushkakunataka kawsachi-munka manana kutikashka wañunankunapa. Ñukanchi kawsa kahushpanchira Yaya Dioska ñukanchikunatapas chikan aychayuta ruranka. ⁵³Kay ismuk aychanchika mana ismuk aycha tukunan tiyan. Kay wañuk aychanchika mana wañuk aycha tukunan tiyan.

⁵⁴Chasna *Kristu ñukanchita chikan aychayuta rurashpan wiñaypa kawsay-yuna kananchipa Yaya Diospa killkachishkanpi kasna rimashkaka paktarinka:

Yaya Dios tukuya winsishpa alichankami runakuna manana kuti wañunankunapa nishpa.

⁵⁵Chaymantapas kasna rimashkaka paktarinka:

Manana manchashunchinachu wañunanchita. Manana wañuyka ñukanchita winsinkachu nishpa.

⁵⁶Uchata rurashkanchiraykumi chasna wañunanchi tiyan. Uchata rurakkuna

kahushkanchipi sinchikuchi tukushka-shina kanchi, Yaya Diospa kamachish-kankunata riksishpanchi ashwan uchata ruranayakkuna tukushkanchirayku.

⁵⁷Ashwan Yaya Dios Amunchi Jesukristuta kachashpa ñukanchita yanaparka manana chasna uchata rurakkuna kananchipa, chaymantapas wañushpanchi kawsachiy tukunanchipa. Chayta yuyarishpanchi akuychi kushikushpa Yaya Diosta agradesishunchi.

⁵⁸Chayraykumi munashkayni wawki-nikuna pamnikuna, tukuy chaykunata yuyarishpaykichi alita Jesukristuta kirishpa kasushpa kawsaychi. Tukuy uras yapa munashpa Amunchi Jesukristu ruranata munananta rurashpa kawsaychi. Jesukristupi sinchikushpa rurahushkaykichika manami yankachu kanka.

**Pablo killkan Jerusalenpi nima
imayukunaryku kullkita
tantachinamanta**

16 ¹Kunanka wawkikuna panikuna, Jerusalenpi nima imayu Jesukristuta kasukkunaryku kullkita tantachinamanta rimashkaykichi. Galasia allpapi tukuy Jesukristuta kirikkunata yachachishkani imashnami chay kullkita tantachinchu nishpa. Kankunapas chay yachachishkaynishina ruraychi. ²Karan domingo puncha atipashkaykicha kullkikichimanta churaychi. Chasna tantachishpaykichika wakaychaychi, ñuka paktashpayni mana chaypira tantachinaykichipa. ³Kankunapi paktashpayni churay tukushkankunapi alita rurak kashkankunaryku akllashkaykichi runakunata Jerusalenma kachasha. Paykunata alita yaykuchinankunapa kartakunata killkasha Jerusalenpi kawsak wawkikunata chay tantachishkaykichi kullkiwa

pakta kunankunapa.⁴Ali kashpanka
ñukapas Jerusalenma rinaynipa
paykunawa pakta risha.

**Pablo Korinto llaktapi kawsak
kirikkunata pasyak rinata
munashkanmanta riman**

⁵Kankunama rihushpayni puntiru Masedonia allpapi kahuk llaktakunama risha. Chay Masedoniamanta risha Korinto llaktaykichima. ⁶Chaymanta yuyarini shuk killakunata kankunapi kiparinata, ashwan ali kama tukuy tamya timpu kankunapi kiparinaynipa. Chaymanta shuk llaktama rihushpayni kankuna atipawankichima yanapanata. ⁷Mana munanichu shuk ratulla kankunata rikunata. Yaya Dios munashpanka shuk killakunata kankunawa kiparisha.

⁸Kay Efeso llaktapi kiparisha chay ñukanchi israel runakunapa ^{*Pentekostés punchakuna paktarinan-kama.} ⁹Kay llaktapi alita Yaya Diospa shiminta yachachihuni. Achka chikniwak runakuna mana munashpan-kunapas achka runakuna chay yachachi-hushkaynita alita uyahunkuna. Chayrayku manara risharachu kankunama.

¹⁰Wawkinchi Timoteo kankunapi paktashpan yanapaychi kankunawa kushilla kananpa. Paypas ñukashinami alita Yaya Diospa shiminta yachachin. ¹¹Chayrayku nima maykan rimaychichu payka manami Pablo shinachu alita yachachin nishpa. Ashwan payta yanapaychi kushilla ñukama kutimu-nanpa. Ñukami payta chapahuni shuk wawkikunawa pakta shamunanpa.

¹²Wawkinchi Apolosta achka kuti rimarkani chay shuk wawkinchikunawa kankunama pasyak rinanpa. Payka mana munanchu kunan rinata. Shuk punchachari kankunama rinka.

**Pablo kartanta tukuchihushpan
kirikkunata saludan**

¹³Yuyaywa kawsaychi, Jesukristuta alita yuyashpa, alita kirishpa, nima pita manchashpa. Sinchikuriychi mana sampayashpa payta kasunaykichipa.

¹⁴Tukuy uras imapipas yanapanaku-hushpaykichi ali shunkuwa yuyana-kushpa ruraychi.

¹⁵Wawkinchi panikuna, kankuna riksinkichi wawkinchi Estefanasta. Chay Akaya allpapi manara nima maykan Jesukristuta kirihiushpanra wawkinchi Estefanasra tukuy ayllunkunawa pakta kirik tukurkakuna. Paykuna Jesukristuta kirik wawkinchi panikunata alita yanapashpa kawsahunkuna. ¹⁶Estefanasta shukkunatapas payshina alita tarawashpa kirik masinkunata yanapashpa kawsahuk-kunata alita kasushpa yanapashpa kawsaychi. ¹⁷Yapami kushikuni wawkin-chikuna Estéfanas, Fortunato, Akaiko yanapanawanankunapa shamushkankunaryku. Kankuna mana shamunata atipashpaykichi kay wawkinchikuna alita yanapawahunkuna. ¹⁸Kay kimsa wawkiku-nami ñukata sumakta yanapashpa sinchikuchiwashkakuna, kankunatapas chasnallatata yanapashpa sinchikuchirkakuna. Chasna yanapak wawkikunata alita yuyaychi.

¹⁹Kay Asia allpapi Jesukristuta kirik masinchikuna kankunata saludanahun. Chaymanta wawki Akila warmin Prisilawa kankunata saludanahun, maykankunawami shukllashina tukushkakuna Amunchi Jesukristuta kirishkaykichirayku. Chaymanta tukuy paykunapa wasinpi tantarik Jesukristuta kirikkunapas kankunata saludanahun. ²⁰Tukuy wawkinchikunapas kankunata saludanahun. Kankunapas tantarishpaykichi alita yuyanakushpa shukwa shukwa saludanakuychi.

²¹Ñuka Pablo kikin makiniwa kay
saluduta killkashpayni kankunarayku
kachahuni. ²²Maykanmi Amunchi
Jesukristuta mana yuyanchu, Yaya Dios
payta kastigachun. Amunchi Jesús,
utkalla shamuy. ²³Amunchi Jesukristu
kankunata llakichishpan yanapachun.

²⁴Tukuy kankunata yapa yuyani *Kristu
Jesusta kirik kashpaykichi.

Chayllata killkashkani.

Wawkikichi, turikichi
Pablo

ISHKAYNIN PABLOPA KILLKASHKAN KILLKA KORINTO LLAKTAPI JESUKRISTUTA KIRIKKUNARAYKU

1 ¹Munashkanchi wawkinchikuna paninchikuna, ñuka Pablo wawki Timoteowa pakta kay kartata killkahunchi. Ñuka Pablo Yaya Dios munashpan Jesukristupa *apostolnin tukushkani. Tukuy kankuna Korinto llaktapi Jesukristuta kirishpa Yaya Diosta kasukkunarayku, tukuy Akaya allpapi Yaya Diospa akllashkan runankunaraykupas kay kartata killkahunchi. ²Yayanchi Dios, Amunchi Jesukristupas kankunata llakichishpan yanapanahu-chun kushilla kawsanaykichipa.

Pablokuna parisinakunamanta rimanahun

³Akuychi kushichishunchi Amunchi Jesukristupa Yayan Diosta. Payka Yayanchi Dios kashpanmi ñukanchita llakichin, llakirihushkanchipi sinchikuchin. ⁴Tukuy parisihushkanchipi payka ñukanchita sinchikuchin ñukanchipas atipananchipa sinchikuchinata parisihushkakunata. Yayanchi Dios sinchikuchishkanshina ñukanchipas atipanchi parisihuk runakunata yanapashpa sinchikuchinata.

⁵*Kristushina achkata parisihushkanchirayku pay ñukanchita yanapashpan alita sinchikuchin. ⁶Chayrayku ñukanchi parisishpanchi atipanchi

kankunata sinchikuchinata yachanaykipa Jesukristu kankunata kishpichik kananta. Yaya Dios ñukanchita llakirihushkanchipi sinchikuchishpan atipanchi kankunata sinchikuchinata. Chasna sinchikuchishpanchi kankunapas atipankichi ñukanchishina achkata parisishpa mana sakishpa Jesukristuta katinata. ⁷Kankunata yuyarihushpanchi kushikunchi, parisihushpaykichipas sinchikushpa kahushkaykichirayku. Chasna parisihushpaykichimi yachanchi Yaya Dioska kankunatapas ñukanchishina sinchikuchinanta.

⁸Wawkinchikuna paninchikuna, kankunata yuyachinayanchi maytukuy parisishkanchita Akaya allpapi kahuk llaktakunapi kashpanchi. Yapa sinchita parisirkanchi. Manana atiparkanchichu awantanata. Yuyarirkanchi wañuchi-nankunamanta mana kishpinanchita.

⁹Chaymanta yuyarirkanchi ña wañuna kananchita. Yapa parisihushpanchi Yaya Dioska ñukanchita yachachirka mana ñukanchi kikinpi sinchikurinanchipa, ashwan paypi wañushkakunata kawsachik Yaya Diosllapi sinchikurishpa kawsananchipa. ¹⁰⁻¹¹Yaya Diosmi ñukanchita wañuna kashkanchimanta kishpichirka. Chasnallatatami ñukanchita kishpichinka atun parisinan-

chikunamantapas. Yaya Diospi sinchikurinchi, yachashpanchi ñukanchita achka kuti kishpichinanta, kankuna mañahushkaykichiwa yanapashpayki-chi. Achkamanta ñukanchirayku mañahushpaykichika Yaya Dios ñukanchita yanapashpan achka runakunami payta kushichishpa agradesinkakuna.

**Imaraykumi Pablo mana rirkachu
Korintoma**

¹²Kushillami kahunchi yuyayninchipi, mana llullashpa, tukuy imapi alita rurashpa kawsahushkanchita yachashpanchi. Manami ñukanchi kikin yachay-ninchiwachu atipashkanchi chasma kawsanata, ashwan Yaya Diosmi ñukanchita yuyashpan yanapashka chasna paypa munashkanta rurashpa kawsananchipa, payta mana kasuk runakunawa kahushpanchi, chaymanta ashwan kankunawa kahushpanchi.

¹³Kartanchikunapi killkashkanchishinallam yuyarinchi, mana chikan chikantachu killkashkanchi, ashwan asirtaypatami kankunaryaku killkashkanchi. Munanchimi alita asirtanaykichipa.

¹⁴Kunan ña shuk shukkunata asirtankichi yachachishkanchimanta, chaywashami shuti tukuya sumakta yachankichi. Chasna kashpaykichimi Amunchi Jesús shamushpan kushikunkichi alita kankunata yachachishkanchirayku. Chasnallatatami ñukanchipas kushikushu kankuna alita yachakushkaykichirayku.

¹⁵Chasna tukunanchita yuyarishpayni ñuka Pablo kankunata ishkay kuti rikuk rinata yuyarirkani ishkay kuti kushikushpa kanaykichipa. ¹⁶Yuyarirkani puntiru kankunata pasyak rinata Masedoniamra rihushpayni. Chaymanta kutihushpayni kutikashka kankunata pasyanata yuyarirkani. Chasna pasyash-

payni yanapawankichima Judea allpapi llaktakunama rinaynipa nishpa yuyarirkani. ¹⁷Chasna kankunama rinata munashpaynipas mana rishpayni ¿mana alita yuyarishpa rimak kashkaynirayku-chu kankunama rinaynita rimashkani? Imashnami chay mana Yaya Diosta kirik runakuna shamusha nishpankunapas chaymanta chikanta yuyarishpankuna mana rishanchu nishpa rimanahun ¿chasnachu ñukapas kani? Manami chasnachu kani. ¹⁸Yaya Dios mana llullachik kashpan yachanmi kankunata shutipa rimahushkaynita. Pasyak shamushami nishpa rimashpayni mana kankunata llullachirkanicu. Tukuy rimashkaynika shutipami. ¹⁹⁻²⁰Yaya Diospa Wawan Jesukristumi paktachik kan, maykanmantami Silvano, Timoteo, ñukapas kankunata yachachirkanchi. Chasna kashpan yachankichi ñukapas paktachik kanaynita. *Kristuka rimashkanmanta mana shuk ratu shuktana rimanchu. Payka Yaya Diosmanta shamushkanwa tukuy Yaya Diospa rimashkan paktachinan shimikunata paktachirka. Chayrayku Yaya Diosta kushichishpanchi Jesukristu ñukanchirayku alichashpan paywa kwintananchipa rimashhunchi rurashkaykika alimi chasna kachun nishpa.

²¹Yaya Diosmi ñukanchita kankunatas akllashpan sinchikuchishka wiñaypa Kristupa runankuna kananchipa. ²²Yaya Dioska paypa Espiritunta shunkunchipi churashka, paypa wawankuna kananchipa. Chasna Espíritun ñukanchipi kawsashpan yachanchi, tukuy uras paywa kawsananchita rimashkanka shutipami.

²³Manara rishkanirachu kankuna Korintopi kawsakkunama, imashnami puntiru yuyarirkani. Mana alita kawsahushkaykichita yachashpayni mana rirkanicu kankunata mana

pinkachinaynipa. Yaya Dioska riksiwanmi, rimashkaynika shutipa kananta. Mana shutipa kashpanka kastigawankami. ²⁴Ñukaka mana kankunata kamachikchu kani maykantami kirinaykichi tiyan nishpa. Ashwan ñami kankunaka Jesukristuta kiriushpaykichi kankunata yanapakmi kani kushilla payta kasushpa kawsanaykipicha.

2 ¹Chayraykumi manara munashkanichu kankunata pasyak rinata mana ali kawsahushkaykichimanta pinkachishpayni mana kutikashka llakirinaykipicha. ²Ñuka kankunata pinkachishkaynimanta llakiya kashpaykichika ¿pitaya ashwan ñukata kushillayachiwanka? Kankunallami atipankichi kushillayachiwanata. Chayraykumi mana munanichu pinkachinata kankunata.

³Chayrayku shuk kartaynita killkarani kankunaryku manara kankunama rishpayni mana alita kawsahushkaykchita alichanaykipicha. Rishpayni mana munanichu llakirik rinaynita. Ashwan kankunami kushillayachiwanaykichi tiyan. Yachani kushilla kashpayni kankunapas kushilla kanaykchita.

⁴Chay kartaynita killkahushpayni yapa yuyarishpa llakiya kahushpayni wakarkani. Chasna kashpanpas mana killkarkanichu llakirinaykipicha, ashwan killkarkanimi yachanaykipicha maytukuytami kankunata yuhani.

Pablo riman chay millaypata rurak runata llakichinankunapa

⁵Killkarkanici chay mana alita rurak wawkinchi tukuy ñukanchikunata pinkachishkanta. Chasna millaypata rurashpan mana ñukallatachu pinkachishwashka, ashwan tukuy kankunatapas pinkachishkami. Mana tukuy kashpanpas shuk shukkunatami pinkachishka.

⁶Kankuna tantarishkaykichi pay millaypata rurashkanmanta rimarkankichi, manana kankunawa tantarinanpa. Chasna ña payta kastigashkankichi. Chaylla kachun. ⁷Kunanka payta llakichishpaykichi yanapaychi alita kawsanarpa. Mana chasna rurashpaykicha shunkun yapa llakiya kipuruyashpan wañunayanka.

⁸Chayrayku kankunata mushumanta rimani tukuy shunkumanta pacha payta yuyashpaykichi yanapaychi. ⁹Puntiru kankunaryku killkarkani yachanaynipa, alitachu manachu yachachishkaynita kasuhunkichi nishpa. ¹⁰Chay runapa millaypata rurashkanta manana yuyarishpaykichika ñukapas manami yuyarishanachu. Shuk kankunamanta ima millaypata rurashpanka ñuka llakichinayni kashpanka tukuy kankunata yuyashpayni payta ^{*}Kristupa rikushkanpi llakichini. ¹¹Chasna llakichinanchi tiyan runa masinchita supaykunapa apun Satanaska mana ñukanchita winsinarpa. Yachanchi imashnami payka munan urmachinata ñukanchita.

Pablo Troas llaktapi paktashpan llakirin

¹²Troas llaktapi paktashpayni chay suma ali shimita ^{*}Kristu ñukanchita kishpichinanmanta yachachinaynipa, suma yachachina karka, Yaya Dios runakunapa shunkunkunata llankarka alita uyawanankunapa. ¹³Chasna kashpanpas mana kushillachu karkani, wawkinchi Titota mana tarishkaynirayku. Chayrayku rishara nishpayni paykunamanta Masedonia allpapi llaktakunama rirkani.

Jesukristuta kirikkuna supayta winsinahun

¹⁴Yaya Diosta agradesishunchi, ñukanchita yanapashkanrayku ^{*}Kristuta

kirishpa kawsananchipa. Shuk tukuyta winsik apu runakunata marchachik-shina Kristu ñukanchita purichin kushikushpa payta katinanchipa. Tukuy runakuna ñukanchita rikunahun manana supayta kasunanchita. Chasna kashpanchimi tukuy parti runakuna shuk mishkihlla asnak perfumita muktikshina asirtankakuna pimi Yaya Dioska.¹⁵ Kristu ñukanchikunapi kashpan ñukanchita yanapan Yaya Diosta kushichishpa payrayku shuk ali mishkihlla asnakshina kananchipa. Chasna ali mishkihlla asnak perfumi-shina kanchi uchankunamanta llakichi-rishka runakunarayku, uchankunamanta mana llakichirishka runakunaraykupas.¹⁶ Chay mana kirik runakunaraykuka chay mishkihlla asnakka wañuypata asnakshinami kan. Kristuta kirikkunaraykuka suma wiñaypa kawsayta kuk mishkihlla asnahuksinami kanchi. Nima maykan atipanchu chasna mishkihlla asnakshina kanata, Yaya Diospa yachayninllawami atipanchi chasna kanata.¹⁷ Ñukanchika mana kanchichu imashnami shukkunaka kanahun. Manami yachachinchichu Yaya Diospa shiminta yachachishkan-chimanta kullkita apinanchipa, imashnami shukkunaka ruranahun. Ashwan Yaya Dios ñukanchita kachash-kanraykumi mana llullachishpa paypa rikushkanpi yachachinchic, Kristupa kamachishkan runakuna kashpanchi.

**Pablokunaka Jesukristupa shiminta
yachachik kanankunamanta
rimanahun**

3 ¹Tukuy kaykunata killkashpanchi kankuna yuyarinkichichari kutikashka paykuna kikinta yuyarishpa ali runa kanchi nishpa kawsanahun. Kankuna ñukanchita alita riksishpayki-chi kankunama rihushpanchi mana

nima kartata apanchichu mana riksishka runakunashina. Nima shuk kartata tapushkanchichu kankunamanta shuk llaktama rinanchipa.² Kankuna kikinmi ñukanchimanta alita rimak kartashina kankichi. Shunkunchipi killkarishkashina kahunkichi. Tukuy runakuna chayta yachanahun, imashnami shukkunaka shuk killkata rikushpangkuna shutillata yachanahun chasna.³ Kankunaka kawsahushkayki-chiwa rikuchinkichi *Kristupa killkachishkan kartashina kanaykichita. Ñukanchika chayta killkak runakuna-shina kanchi. Mana payka rurashkachu tintawa killkashkashina, ashwan kawsa Yaya Diospa Espiritunta kankunapi churashka mushu kawsayta charinayki-chipa. Mana Moisés wañupa rumimanta tablapi killkashkatashinachu kuy tukushkanchi Yaya Diospa kamachish-kanta kasunanchipa, ashwan kunanka Yaya Dios shunkunchipimi Espiritunta churashka paypa munashkanta ruranan-chipa.

⁴Kristu ñukanchita kishpichishkan-rayku ñukanchi Yaya Diospi sincikurinchi. ⁵Maná ñukanchi kikinchu atipanchi runakunata Kristumanta alita yachachinata. Ashwan Yaya Dios yanapashpanllami chasna yachachihun-chi. ⁶Paymi ñukanchita yachayta kushka chay mushu alichanata runaku-nawa rurashkanmanta yachachishpa purinanchipa. Chay mushu alichashkan-manta yachachinanchika manami ñawpa Moisespa killkashkanshinachu, ashwan Yaya Dioska Espiritunwami ñukanchita wiñaypa kawsayta kun. Moisés Yaya Diospa kamachishkanta killkashkanka mana kasukkunataka kastigachinmi wañunankunapa. Ashwan Yaya Diospa Espiritunka Yaya Diosta kirishkanchiraykumi wiñaypa kawsayta kun.

⁷Yaya Diospa kamachishkanta Moiseska rumimanta tablayachirishkapi killkahushpan Yaya Diospa puntanpi uyanka chuya tukurka. Chay killkashkanta apamuhushpan uyanka yapa chuya, nima rikupya karka. Chasna ñukanchi israel runakunapa yaya rukunchi wañukuna mana rikunata atipashpankunapas chay uyanpi yapa chuya manchaypata rikurihushkaka chinkarishpa chinkarishpa rirkta.

⁸Chasna ñawpa Moisesta kamachishkanta kushpan Yaya Dioska atun yachayninta rikuchirka. Kunanka maytukuy ashwan atun yachaynintami rikuchinka, paypa Espiritunwa mushu shiminta yachachishpanchi. ⁹Ashwan alita asirtachishkaykichi. Chay ñawpa kamachishkanka ali kashpanpas mana paktachishkanchirayku ñukanchita kastigachinlla. Chasna kashpan maytukuy ashwan alitaya Yaya Dios ñukanchita rimashkanka, Jesukristu kankunaranti wañushkanrayku uchaykichikunamanta llakichirishka tukushkan-kichi nishpa.

¹⁰Chay ñawpa Yaya Diospa kamachishkan shiminka suma kashpanpas kunanka mana yapa alinachu, Jesukristupa kishpichik shimin ashwan suma kashkanrayku. ¹¹Chasna Yaya Diospa ñawpa kamachishkan shimi tukurinan kashpanpas Yaya Dios yapa ali atun yachayyu kananta rikuchirka. Chaymanta ashwan sumakta Jesukristupa kishpichik shiminka rikuchin Yaya Dios yapa ali atun yachayyu kananta chay shimi mana tukurik kashkanrayku.

¹²Chasna chay suma kishpichik shimin mana nima ima uras tukurinanta yachashpanchi atipanchi kankunata nima imata manchashpa shutillata yachachinata.

¹³Ñukanchika kankunata mana Moisés wañushinachu yachachinchi. Yaya Diospa

kuchunpi kahushpan uyanka yapa chuya tukurka. Chasna yapa chuya rikurishkanka chinkarishpa rihushkanta yaya rukunchi-kuna wañu mana rikunankunapa, Moiseska uyanta llachapawa taparipayarka.

¹⁴Mana Moisespaa uyanllachu chasna taparishka karka, ashwan chasnallata-tami yaya rukunchi wañukunapa yuyayninkunapas taparishkashina karka Yaya Diospa shiminta mana asirtanan-kunapa. Kunanpipas chasnallatataami Moisespaa killkashkanta yachakuhukkuna-pa yuyayninkunaka taparishkashina kanahun. Kristuta kirishpallami Yaya Dioska tukuyta asirtachin kishpichik shiminta. ¹⁵Kunankamapas Moisespaa killkashkanta yachakuhushpankuna yuyayninkunaka taparishkashina kanahun, mana asirtashpankuna Yaya Diospa rimashkanta. ¹⁶Ashwan maykan runami Jesukristuta kirishpan kasun, chaypa yuyaynimmi taparishkashina kahushkanmanta paskachin asirtananpa paypa rimashkanta.

¹⁷Jesukristuka Espiritunwami shukllashina kan. Chay Espíritu ñukanchiku-napi kawsahushpan manana uchata rurashpa kawsanchinachu, ashwan kishpichirishkami kanchi Yaya Diospa munashkanta rurashpa kawsananchipa. ¹⁸Ñukanchi kirikkunapa yuyayninchika manami taparishkashinachu kahun, ashwan Kristu atun yachayyu yapa ali kananta alita riksinchii. Chasna kashpanchi ali kawsananchiwa shukkunatapas riksinchii imashna alimi Kristuka. Payta rikshishpa rihushkanchipi ñukanchikunata ashwanta ashwanta aliyachin payshina yapa ali tukunanchipa. Payka Yaya Diospa Espiritunwa shukllashina kashpanmi chay Espirituwa chayta ruran.

4 ¹Chasna kashpanmi mana sakinchichu Jesukristupa shiminta rimanata, Yaya Dios ñukanchita llakichishpan yachachi-

nanchipa kamachishkanrayku. ²Mana pinkaypakanata rurashpachu kawsahunchi, maykunkunatami shukkuna pakalla ruranahun. Mana llullachishpachu, nima chikanyachishpachu Yaya Diospa shiminta rimahunchi. Ashwan shutipallatami Jesukristumanta yachachihunchi. Yaya Dioska ñukanchita rikuhami, tukuy kankunata rimahushkanchika ali kananta. Tukuy kankunapas ali yuyaywa kashpayki-chi chayta alita yachankichi.

³Jesús runakunata kishpichinanmanta yachachishkanchi shimika ali kashpanpas mana kirikkunaka mana asirtanahunchu. Wiñaypa kastigarina kashpankuna manami atipanahunchu asirtanata. ⁴Supay paykunapa yuyayinkunata chinkachish-kanrayku wiskushina kashpankuna mana asirtanahunchu. Chay suma ali shimi runakunata kishpichik Kristu yapa suma atun yachayyu kananmanta suma punchayachiakshina tukuya alita asirtachik kananta mana atipanahunchu riksinata. Kristuka Yaya Dioswa chasnalla yachayyu yuyayyu kashpan ñukanchita rikschin imashnami payka kan. ⁵Ñukanchi yachachihunchi Jesukristu tukuyapa apun kananta. Mana ñukanchi kikin yachayyu kananchitachu yachachinchii. Ashwan Yaya Jesusta yuyashpanchi kankunata yachachishpa yanapakkunallami kananchita rimanchi.

⁶Yaya Dioska tukuya ruranata kallarihushpan nirka puncha tukuchun nishpa. Chasna rimashkanshina puncha tukurka. Chasnashinami Yaya Dios uchanchikunata pichashpan shunkunchikunapi punchatashina rurashka alita yachananchipa paypa atun suma yachayninta. Chay yachaynintaka Jesukristumi ñukanchita rikuchin.

Kirishpa kawsanamanta riman

⁷Yaya Dios chay ñukanchipi punchatashina rurashkanwa yapa chaniyuta

kuy tukushkashina kanchi. Chasna kashpanpas chay chaniyuta shuk pakirik mankashina aychanchipi charinchii.

Chasnami tukuy runakuna riksinkakuna Yaya Diospa kananta chay yapa atun yachayka, maykanwami yanapay tukunchi, mana ñukanchi kikinpachu.

⁸Runakuna ñukanchita tukuypi parisichishpankunapas yachani Yaya Dioska tukuy uras ñukanchita yanapannanta. Achka kuti mana yachashpanchispas imashna yuyarinata, mana sakinchi-chu Yaya Diospi sinchikunata.

⁹Runakuna ñukanchita wañuchina-yashpa katishpankunapas Yaya Dioska mana ñukanchita sakinchu. Ñukanchita makashpankunapas mana atipankaku-nachu wañuchinata. ¹⁰Maytapas yachachishpa rishpanchi wañuchiyy tukunallami kashpanchi Jesús wañuchiyy tukushpan parisishkanshina aychanchipi parisihunchi. Chasna parisishpa kawsahushpanchi tukuy runakuna Jesú ñukanchipi kawsahushpa alita yanapahushkanta rikushpankuna yachankakuna kawska kananta. ¹¹Ñukanchi kawsahushpanchira ima uraspas wañuchiyy tukuna kanchi, Amunchi Jesuspa kamachishkanta kasuhushkan-chirayku. Chasna kashpan kunankama kawsalla katihushpanchi chay wañuk aychanchiwa rikuchinchi Jesú kawska kananta. ¹²Ñukanchi yachachihushkan-chirayku wañuchiyy tukunalla kahunchi. Kankunaka yachachishkanchita kirishkaykichirayku kushillalla wiñaypa Jesukristuwa kawsankichi.

¹³Ñawpa shuk runa Yaya Diosta mañashpa rimashkanka kasna killkarishka kan:

Kanllapimi sinchikuni, chayrayku
kanmanta rimahuni nishpa.

Chasnallatatami ñukanchipas Amunchi Jesukristupi sinchikuhushpanchi mana sakinchichu paymanta rimanata. ¹⁴Yaya

Dioska Amunchi Jesusta wañushkan-manta kawsachishkanrayku yachanchi ñukanchitapas wañushpanchi kawsachi-nanta. Chaymanta ñukanchita kankunawa pakta pushanka tantaylla paywa kawsananchipa.

¹⁵Kay tukuy parishihuskaynitaka awantahuni kankunata yuyashpayni. Chasna kashpan achka runakuna rikushpankuna yachanahun imashnami Yaya Dios paykunata yuyashpan alikunallata ruran paykunarayku. Chaypina ashwan achka runakuna Yaya Diosta kushichishpa agradesinkakuna.

¹⁶Chayrayku mana sampayanchichu Jesuspi sinchikushpalla kawsananchipa. Aychanchi rukuyahushpanpas karan puncha Yaya Dios ñukanchipa yuyayinchita mushuyachin. Chayray-kumi ashwanta sinchikushpa rihunci, Jesukristu ñukanchita yanapahushkan-rayku. ¹⁷⁻¹⁸Mana yuyarishpa kawsanchi-chu kay mundupi rikushkanchikunata, tukuy chaykunaka tukurinkakunami.

Ashwan yuyarishpa kawsanchimi Yaya Dioswa suma kushilla kawsanata, chayta manara rikushpanchipas. Chay mana rikuhushkanchikunaka nima ima uras tukurinkachu. Chasna kashpan kay allpapi kawsahushkanchipi parishish-kanchikunaka mana imachu kanahun. Shuk ratullami tukurinka. Chaymanta chay parishishkanchikunaka ñukanchita yanapan wiñayparayku Yaya Diospa suma kawsananpi mana yuyariya yapa kushilla kawsananchipa. Chayka tukuy parishishkanchikunamanta ashwan yapa pasami kanka.

5 ¹Kay aychanchika tampushinami shuk raturaykulla kay allpapi kawsananchipa kan. Yachanchi kay aychanchi utkalla ismuk tampushina tukurishpan Yaya Dioska wañushkan-chimanta kawsachishpan ñukanchita shuk mushu kawsananchita kunanta

chaywa wiñaypa silupi kawsananchipa. Chay mushu kawsananchika mana runapa rurashkan kawsanashinachu kan. ²Kay wañuna aychanchiwa parishishpa wakashpa kawsahushpan-chira yapa munanchi kawsanata chay mushu aychashina kawsananchiwa Yaya Diospa kawsananpi. ³Yaya Dios ñukanchita chay mushu aychashinata kunka, kay aychanchita sakishpanchi mana llatanshina kananchipa. ⁴Kay shuk raturaykulla tampushina aychanchiwa kawsahushpanchira parishishpa kawsanchi. Mana kay aychanchita sakinata munashpanchi wañuya manchashpa kawsanchi. Yapa munanchi kay wañuk aychanchita Yaya Dios kampyananta chay wiñaypa kawsak mushu aychashinawana kawsananchipa. ⁵Yaya Diosmi ñukanchita ña aliyachishka paywa silupi kawsananchipa. Ñami Espiritunta ñukanchita kushka yachananchipa paywa kananchita.

⁶Chayrayku kay allpapi kawsahushpanchira tukuy uras sinchikushpa kawsanchi. Yachanchi kay wañuk aychanchiwa kawsahushpanchira allpanchimanta karupi kawsakkuna-shina kananchita. Manara Amunchi Jesuswa silupi kawsahunchirachu. ⁷Kunan Jesuspi sinchikushpalla kawsahunchi. Mana payta rikushpachu kawsahunchi. ⁸Chasna manara Jesusta rikuhushpanchipas kushilla sinchikush-pami kawsahunchi. Chasna kashpanpas yapa munanchi kay wañuk aychanchita sakishpa kikin allpanchipina Amunchi Jesuswana kawsak rinata.

⁹Chayrayku mana imananchu kikin allpanchi silupi kawsahushpanchi allpanchimanta karupi kawsakkuna-shina kay allpapi kawsahushpanchira sinchikuchi tukuy uras Jesukristupa munashkanta rurashpa payta

kushichishpalla kawsananchipa.
¹⁰Yachanchi shuk punchami *Kristuka
 ñukanchita puntanpi churanka
 tapunanpa kawsashkaykichipi alitachu
 manachu rurashkankichi nishpa.
 Chaymanta payka karan shukta
 imashnachari rurashka alitachu
 manachu, chay tuputa kunka.

**Kristumi ñukanchita kishpichishka
 kushilla Yaya Dioswa
 kawsananchipa**

¹¹Yachashpanchi *Kristu ñukanchita
 puntanpi churashpan tapunanta tukuy
 rurashkanchimanta, payta sumakta
 yuyashpanchi munanchi runakunata
 alita asirtachishpa yachachinata
 paykunapas Yaya Diosta alita kasunankunapa. Paymi yuyayninchita yachan,
 nima pita llullachishpa yachachihush-kanchita. Yapa munani kankunapas
 chayta yachanaykicipa.

¹²Mana kuti ñuka kikinmantachu
 alikunata rimahuni kankuna ñukanchita
 kushichinaykicipa. Ashwan kayta
 rimahuni kankuna ali kiparinaykicipa,
 chay ñukamanta washata rimakkunata
 alita aynishpa chunllayachinaykicipa. Paykunaka rikuypakunamantalla
 rimahanuhun shuk runa alichu manachu.
 Mana shuk runata valichinahunchu
 shutipa ali kananta yachashkankunaryku. Ñukanchita rikurinanchimantalla
 riksishpankuna mana alichu nishpa
 rimahanuhun. Mana yachanahunchu
 yuyayninchika shunkunchika alichu
 kahu manachu. ¹³Shukkuna ninahun
 musparihukschina kanaynita. Chasna
 kahushpaynika Yaya Diosta kushichinaynipami chasna kahuni. Ashwan
 mana musparihukschina kahuni ali
 yuyaywa shutillata kankunata yachachinaynipa.

¹⁴Kristu ñukanchita yuyahushkanta
 yachashpanchi tukuy imatapas

rurahushpanchika ali yuyaywami
 rurahunchi. Jesukristu tukuy ñukanchiranti wañushkanta yachashpanchi tukuy
 ñukanchipas wañushkakunashina
 tukushkanchita yachanchi. ¹⁵Kristu
 tukuy runakunaryku wañurka manana
 munashkanchita rurashpa kawsananchipa,
 ashwan ñukanchirayku wañushkanta
 kawsarishkantapas yuyarishpa,
 paypa munashkantana rurashpa
 kawsananchipa.

¹⁶Chayrayku kunamanta pacha
 manana nima pimanta yuyarinchinachu,
 imashnami Yaya Diosta mana kasuk
 runakunaka yuyarinahun. Ñawpa
 ñukanchipas chay runakunashina
 Kristumanta yuyarishpanchipes
 kunanka manana chasna yuyarinchinachu
 paymanta. ¹⁷Maykunkunami
 Kristuwa pakta kawsanahun, paykunaka
 Yaya Diospa mushu rurashkan runaku-nami kanahun. Ñawpa imashnachari
 kapayarkakuna chayka tukurirkana.
 Rikuychi kunanka mushuna
 tukushkanta.

¹⁸Tukuy chayka Yaya Diospa
 rurashkanmi. Payka Kristuta kachashpan
 ñukanchiranti wañunarpa ñukanchita
 piñarinanta pasachishpan aliyachishka
 kushillana paywa kawsananchipa.
 Chaymanta ñukanchita kamachishka
 shukkunata yanapananchipa, paykunapas
 pay ñukanchirayku rurashkanpi
 sinchikushpankuna kushillana paywa pakta
 kawsanankunapa. ¹⁹Alita yachakuychi,
 Kristu wañushkanraykumi Yaya Dioska
 tukuy runakunapa uchankunata llakichishpan
 piñarishkanta pasachirka kushillana
 paywa kawsanankunapa. Chasna
 kashpanmi manana uchanchikunataka
 yuyarinachu. Chayta yachachinanchipami
 ñukanchita kamachishka shukkunatapas
 riksichinanchipa.

²⁰Kristupa kachashkan runakuna
 kashpanchimi kankunata rimahunchi

Yaya Dios kikin rimahushkanshina. Kristuranti kankunata rimanchi: Yaya Dios kankunaryku ña alichashka, chayrayku kankunapas paytana yuyashpa kawsaychi.²¹ Kristuka mana uchayu kashpanpas Yaya Dioska uchanchiranti payta maytukuy uchayutashina kastigarka. Chayta rurarka ñukanchi Kristupi sinchikkuna paypa rikushkanpi ali kananchipa.

6 ¹Kunanka Yaya Diospa kamachishikan runankuna kashpanchi kankunata kutikashka sinchita rimahunchi: Kawsaychi Yaya Diosta kasushpa. Pay kankunata llakichishpan kishpichishkanta mana yanka usuchiyichchu kankuna kikin munashkaykichita rurashpa. ²Yaya Dioska kasnami riman: Munahushkayni uras mañahushkaykita uyashami.

Kishpichina puncha kanta yanapashkayki kishpinaykipa nishpa.

Kunanmi Yaya Dioska kankunata yanapanayan. Kunanmi ña paktarishka punchaka kastigarina kahushkaykichimanta kishpichiy tukunaykichiha.

Yaya Diospa kamachishikan runakuna parisinakunapipas alita rikuchishpa kanankuna tiyan

³Ñukanchi Yaya Diospa kamachishkan yachachikkunaka manami nima ima millaypata rurahunchichu runakuna mana millaypata rimanankunapa yachachihushkanchimanta.⁴⁻⁵ Ashwan tukuy imapi rikuchinchu Yaya Diospa kamachishkan runakuna kananchita. Tukuy parisinakunapi mana sampayashpa Yaya Diospi sinchikunchilla. Imata parisihushpanchipas ima ñukanchita pishishpanpas ñukanchita asutishpankunapas karselpi churashpankunapas ñukanchita chiknishpankunapas sinchita tarawashpanchipas mana

puñushpanchipas yarkashpanchipas Yaya Diospa kamachishkankuna kananchita rikuchinchilla.⁶ Ali yuyaywa alikunata rurashpa kawsahushkanchiwa, Yaya Diospa shiminta alita yachak kananchiwa, ñukanchita parisichihushpankunapas mana piñarinanchiwa, ali shunku kahushkanchiwa, Yaya Diospa Espíritu ñukanchipi kawsahushkanta rikuchihushkanchiwa, runa masinchikunata sumakta yuyashpa yanapashpa kawsahushkanchiwa,⁷ Yaya Diospa shutipa kashkata rimak shiminta alita yachachihushkanchiwa, tukuyipi Yaya Dios ñukanchita yanapashpan paypa yachaynin ñukanchipi kahushkanta rikuchihushkanchiwa, Yaya Diospa rikushkanpi alita kawsahushpanchimi kunrankunata arkahushkanchiwa mana ñukanchita winsinanpa, chaymantapas paykunata winsishpa rihushkanchiwa, achka Yaya Diosta kasuk tukushpankuna rikuchinchu Yaya Diospa kamachishkankuna kananchita.

⁸Shukpika runakuna ñukanchita kushichinahun, shukpika ñukanchita chikninahun. Shukpika ñukanchimanta alita rimahanuhun, shukpika mana alitachu rimahanuhun. Shutipa kashkata yachachihushpanchipas llullashpa rimakkunami kankichi nishpa rimahanuhun ñukanchimanta.⁹ Sumakta ñukanchita riksishpankunapas mana riksishkankunatashina rikunahun. Ñukanchita wañuchinata munashpankunapas kawsahunchillami. Ñukanchita asutishpankunapas manami wañuchiay tukunchichu.¹⁰ Llakirishka kahushpanchipas tukuy uras kushikushpami kahunchi. Kullki illa kashpanchipas achka runakunatami Yaya Diospa shiminta yachachishpa yanapashpanchi yapa imayutashina ruranchi. Mana imayu kashpanchipas tukuy Yaya Diospa rurashkanka ñukanchipami.

Chay tukuyta pasahushkanchiwa
rikuchinchi Yaya Diospa kamachishikankuna kananchita.

¹¹Korintopi kawsak kirik masinchikuna, yapa kankunata yuyashpanchimi tukuy chay pasahushkanchikunata mana pakashpa kuskata kankunata rimashkanchi. ¹²Ñukanchika kankunata tukuy shunkunchimanta pachami yuyahunchi. Kankunaka manami chasnachu ñukanchita yuyahunkichi. ¹³Chasna kashpan ñuka Pablo shuk yaya wawankunata kunashpa rimahukshinami kankunata rimani: Imashnami ñukaka kankunata kuskata rimahuni, chasnallatata kankunapas kuskata rimawaychi. Imashnami ñukaka kankunata yuyahuni, chasnallatata kankunapas yuyawaychi.

**Jesukristuta kirikkuna mana
kirikkunawa ama shuk yuyayllawa
tukunayashpa kwintanahuchun
ishkayyanankunapa**

¹⁴Kankuna *Kristuta kirikkuna mana Kristuta kirikkunawa ama shuk yuyayllawa tukunayashpa kwintayichi-chu ishkayyanaykichi, mana paykunawa parihu yuyarishpa rurashpa kawsanaykichi. Mana parihuchu chay yuyayllata charinkichi. Alita yuyarik runaka mana atipanchu shuk millaypata yuyarik runawa parihu alita yuyarinata. Chasnallatata punchaka mana atipanchu parihu tutawa pakta kanata. Chasnallatata kankunapas mana atipankichi-chu shuk yuyayllawa kanata mana kirikkunawa. ¹⁵Kristuka manami atipanchu parihu shuk yuyayllawa kawsanata supaykunapa apunwa. Chasnallatata shuk kirik runapas mana atipanchu parihu yuyarinata shuk mana kirik runawa. ¹⁶*Yaya Diospa wasinka atipamachu runakunapa rurashkan dioskunapallatata kanata?

Manami atipamachu. Ñukanchi kawsa Yaya Diospa wasinshinami kanchi, Espiritu shunkunchipi churashkarrayku. Chayta ñawpa payta kasukkunata ña rimarka kasna:

Kawsashami purishami paykunawa pakta.

Ñukami kasha kikin Yaya Diosnin-kuna.

Chasnallatataki paykunapas kikin runaynikuna kankakuna nishpa.

¹⁷Chasna kashpan Yaya Dioska kaytapas runankunata rimarka:

Chay uchata rurak runakunamanta anchuriyichi.

Chay mana ali ruranankunata ama ruraychichu.

Chaypina ñukaka kankunata yuyashpa yanapashkaykichi kushilla ñukawa kawsanaykipcha.

¹⁸ Ñukaka yayaykichimi kasha.

Kankunaka wawaynikunami kankichi.

Ñuka Tukuyta Atipak Yayaykichi Dios chayta rimani.

7 ¹Munashkayni wawkinikuna, chay ali shimikunata Yaya Dios ñukan-chita rimashpan akuychi tukuy chay mana ali ruranakunata manana rurashunchinachu, nima yuyarishunchinachu. Ashwan akuychi Yaya Diosta yuyashpa, paypa kastigunta manchashpa, alikunata rurashpa kawsashunchi tukuypi Yaya Diosta kasukkuna alillata rurakkuna tukunanchipa.

**Pablokuna Korintopi Jesukristuta
kirikkunata tapunahun alitana
paykunamanta yuyarinankunapa**

²Wawkikuna panikuna, alishunkuyaychi ñukanchiwa. Manami nima maykanta millaypata rurashkanchichu.

Manami nima maykan runapa yuyayninta waklichishkanchichu kuti uchata rurashpa kawsanarpa. Nima maykanta llullachishkanchichu.

³Chasna rimahushpayni manami kankunata uchachinaynipachu rimahuni. Kankunataka ñami rimashkani yapa yuyahushkaynita. Kankunawa shukllashina tukushpayni kawsashpayni wañushpaynipas yuyashpalla katini.
⁴Yapami kankunamanta alita yuyarishpayni kushikushpa shukkunatapas kwintani. Parisihushpaynipas kankunata yuyarishpa sinchikushpayni yapa kushikushpa kahuni.

⁵Kay Masedonia allpapi paktashkanchimanta pachami mana samashkanchichu parisinamanta. Runakuna chiknishpa ñukanchita parisichinahun. Shunkunchipi yuyarishpalla kahushpanchi parisihunchi. ⁶Chasna kahushpanchi tukuy llakihukkunata sinchikushpa kushillayachik Yaya Dioska wawkinchi Titota kachashpan ñukanchita sinchikuchishka. ⁷Mana wawkinchi Tito paktamushkanllawachu ñukanchita sinchikuchishka. Ashwan kankuna ñukanchita alita yuyahushkaykitchita rikushpan kushilla kahushkanraykupas sinchikuchishka. Paymi kwintashka yapa ñukanchita rikunayahushkaykitchita. Chaymanta mana alita rurashkaykitchimanta llakiyuwa kahushkaykitchitas kwintashka. Chaymantapas ñuka Pabloryku yapa yuyarishpa kahushkaykitchita kwintashka. Tukuy chaykunata kankunamanta yachashpaynimi ashwan sinchita kushikushkani.

⁸Kartaynipi rimashkaynita yachashpaykichi llakirishpaykichipas ñukaka kunanka mananami llakirihunichu chay kartata kachashkaynirayku. Puntiru shuti llakirirkani, kartaynipi tukuyta kankunata rimashkaynita yachashpaykichi llakirishkaykichirayku. Chasna

kashpanpas shuk ratulla llakirirkankichi. ⁹Kunanka yapa kushikuhuni. Mana kushikunichu llakirishkaykichirayku. Ashwan kushikuhunimi killkashkaynita yachashpaykichi llakirishkaykichimanta Yaya Diosta kutikashka kasuhushkaykichirayku. Kankunaka chay llakirinata alita awantashkankichi, Yaya Dios munashkanshina. Chasna kashpanmi killkashkayniwa mana kankunata waklichishkanichu. ¹⁰Yaya Dios munashkanshina llakirishpanchika manami yankachu kan. Ashwan ñukanchita yanapan kutikashka payta kasushpanchi kastigarina kahushkanchimanta kishpinanchipa. Chay llakirinan-chika chasna yanapak kashpan llakirishkanchirayku nima ima uras llakirishpa yuyarishhunchichu. Ashwan mana Yaya Diosta kasukkunaka llakirishpankunapas atunta kastigarishpa wañunankuna tiyan.

¹¹Yuyariyichi imashna alimi kankunaka tukushkankichi chasna Yaya Dios munashkanshina llakirishkaykichirayku. Kunanka kankuna kikinna ali munaywa kirikkunapura tukuy mana alikuna kashkata alichakkuna kankichi. Uchachiy tukuhushkaykitchipi runakunata mana uchata rurak kanaykitchita rikuchishpa alita ayninkichi. Mana ali kashkakunamanta piñarirkankichi. Imashnashi tukushhunchi nishpa mancharirkankichi. Chaypina yapa rikunyawashkankichi. Atipashkaykitchita rurashkankichi manana kankunamanta llakirishka kanaynipa. Chay millaypata rurak runata llukshichishkankichi tantarihushkaykitchimanta. Tukuy chayta rurashpaykichimi shuti riksichishkankichi *Kristuta kasuk runakuna kanaykitchita, millaypata rurak runawa mana ishkayyakuna kanaykitchita.

¹²Chay kartaynipi killkashkaynika mana chay uchata rurak runaraykuchu, nima chay uchata rurashkanwa

parisichik runaraykuchu killkarkani. Ashwan kankunaryakumi killkarkani Yaya Diospa rikushkanpi shukkunata rikuchinaykichipa, ñukanchita kasushpaykichi sumakta yuyahushkay-kichita.¹³ Chaymi ñukanchita sinchikuchirka. Mana chayllachu ñukanchita sinchikuchirka, ashwan wawkinchi Tito ñukanchipi paktamushpanmi achkata kushikuhushkanta rikushpanchi yapa kushikushkanchi. Payka kushilla karka, kankuna payta kushichishkaykichi-rayku.¹⁴ Ñuka Pablo kankunamanta wawkinchi Titota alikunata rimashkanya mana yankachu karka. Kankunawa kashpan mana pinkachichiwarkankichichu. Ashwan imashnami kankunata tukuy uras shutipallata rimashkanchi, chasnallatamti kankunamanta Yaya Diosta alita kasuk kanaykichita Titota rimashkanchika shutipa kan.¹⁵ Wawkinchi Titoka kankunata yapa yuyak tukurka. Chay ñukanchipi manaali tiyashkamanta imashna tukushunchi nishpa payta manchaywa alita yuyashpa yaykuchishkankichi. Yaya Diosta kasuhushkaykichita rikuchishkankichi. Tukuy chayta yuyarishpanmi Titoka yapa kankunata yuyahan.¹⁶ Kushikuhunimi yuyarishpayni tukuya rurahushkaykichita Yaya Diosta alita kasunaykipicha.

Ali yuyaywa ofrendata kunamanta yachachin

8 ¹Wawkinchikuna paninchikuna, kunanka kankunata munanchi kwintanata imashnami Yaya Dioska alita yanapashka kay Masedonia allpapi kahuk llaktakunapi kawsak kirikkunata. ²Paykunaka *Kristuta kirik kashpan-kuna achkata parisihushpankunapas atuntami kushikushpa kahunkuna. Chaymantapas paykuna mana imayu kashpankunapas shukkunata ali

yuyaywa yanapashpa kurkakuna. ³Ñukami rikushkanpi ali yuyayninkunawa kuhushkankunata tukuy atipashkankunata. Mana chayllatachu rikushkanpi, ashwan atipashkankunamanta pasatami kuhushkankunata rikushkanpi. ⁴Paykunaka ñukanchita atunta tapurkakuna arí ninanchipa nima imayu Jesukristuta kirik masinchikunata yanapanankunapa. ⁵Yuyarishkanchimanta pasatami kurkakuna kirik masinchikunata yanapanankunapa. Manara nima imata kuhushpankuna Yaya Diosta rimarkakuna paypa munashkanta rurashpa kawsanankunata. Chaymantapas Yaya Diosta kasushpa ñukanchitapas alita yanaparakakuna.

⁶Chasna kashpan wawkinchi Titota rimashkanchi kankunama rinanpa, kirik masinchikunata yanapanaykichipa ali yuyaywa tantachishkaykichi kullkita apak rinanpa. Imashnami ñawpa kushkaykichi kullkita apamurka, chasna kunganpas apamunanpami kachahunchi. ⁷Kankunaka tukuy imapimi yapa alita rurahunkichi. Jesukristuta alita kirishpa kawsahunkichi, paypa shiminta alita riksishpa shukkunatas alita asirtachishpa yachachihunkichi. Chasna shukkunata yanapahushpaykichi alitami rurahunkichi. Chaymantapas ñukanchi kankunata yuyahushkanchishinami kankunapas yuyanakuhunkichi. Chasna kashpaykichimi yapa munanchi shukkunata pishihushkankunapi kushilla yanapahushkaykichiwas yapa ali kanaykichita rikuchinaykichipa.

⁸Chaytaka ñuka Pablo mana rimahunichu kankunata kamachishpayni. Ashwan shuk kirik masinchikunapa ali yuyaywa kushkankunata kankunata rimashkanpi, kankunapas paykunashina kirik masinchikunata pishihushkankunata kushpaykichi yachanaynipa

shutipa paykunata yuyahushkaykichita.
⁹Kankunaka ñami yachankichi,
 Amunchi Jesukristuka yapa ali shunku
 kashpan suma ali kawsayta Yaya
 Dioswa pakta charishkanta sakishpan
 ñukanchirayku shamurka kay allpama.
 Chasna shamushpan nima imayu runa
 tukurka chay suma ali kawsayta
 ñukanchita kunanpa.

¹⁰Ashwan alita rurashpa kawsanayki-chipami kankunata kunahuni chay ofrendaykichita kunaykichipa. Chay shuk watawasha kankuna kikin munash-paykichi chay ofrendata kushikushpa tantachinata kallarirkankichi. ¹¹Imash-nami puntiru ali yuyaywa kallarirkankichi, chasnallatata kunanpas atipashkaykichi kullkikichita churashpa paktachiy-chi. Mana kunata munashpalla kipariy-chihu. ¹²Shuk runa ali munaywa atipashkanta kushpanka Yaya Dioska chaytaka alitami rikun. Yaya Dioska manami rimanchu shuk imata churananchipa, nima ima tiyashpanka.

¹³Ñuka mana rimanyanichu shukkunata yanapanaykichiranti nima imayu kiparinaykichipa. ¹⁴Kunan kankunapaka tiyahumi shukkunata pishihushkata kunaykichipa. Shuk punchami paykunapa tiyanka kankunata pishihushkata kunankunapa. Chasnami tukuy ñukanchipa tiyanka, maykantami munanchi kawsananchipa. ¹⁵Yaya Dios ñawpa killkachishkanpipas chasna riman. Yaya rukunchi wañukuna chunilla chakishka allpapi purihushpankuna Yaya Dioska paykunata manata kurka mikunankunapa. Chayta karan puncha tantachirkakuna. Chasna rurashkankunamanta kasnami killkarishka kan:^a

Achkata tantachik runakunapaka mana puchurirkachu. Uchillas-tuta tantachik runakunapaka mana pishirkachu nishpa.

**Pablokuna rimanahun
 kachahushkankuna kullkita
 tantachinapi yanapakkunamanta**

¹⁶Yaya Diosta agradesinchi wawki Titota yuyachishkanrayku paypas ñukanchishina kankunata munanarpa yanapanata. ¹⁷Kankunata yapa yuyashpan pay kikin yuyarirka kankunata yanapanarpa rinanta. Chayrayku payta rinanpa rimashpanchi kushilla aynirka.

¹⁸Wawkinchi Titowa pakta kachashu shuk wawkinchita, maykanmantami tukuy kirikkunaka alita rimanahun. Payka sumakta chay ali shimita Jesukristu runakunata kishpichinan-manta tukuy tantarinakunapi yachachishka. ¹⁹Tukuy kirik masinchikunamanta payka akllarishka kan ñukanchiwa pakta Jerusalenma rinanpa, chay tantachishkaykichi kullkita kirik masinchikunata kunanchipa. Nukanchi-pas munanchimi pay ñukanchiwa rinanpa kay ali rurahushkanchiwa Yaya Diosta kushichinanchipa, chaymantapas runakunata rikuchinanchipa ali munaywa yanapakkuna kananchita.

²⁰Chay achka tantachishkaykichi kullkita Jerusalenma apahushpanchi chay wawkiwa pakta rinayanchi nima pi atipanarpa ñukanchimanta rimanata manami alitachu wakaychashkankichi nishpa. ²¹Munanchi Yaya Diospa rikushkanpi, runakunapa rikushkanku-nipas alita ruranata.

²²Chay ishkay wawkipuna pakta shuk wawkinchita kankunama kachashu. Achka kuti rikushkanchi pay tukuy uras ali paktachik kashkanta. Payka kankunamanta yuyarishpan Yaya Diosta alita kasuk kanaykichita yapa munahun kankunama rinata.

²³Titomanta rimashkaykichi, payka

ñuka Pablowa pakta purishpan ñukashina ali yachachik kan kankunata yanapananpa. Chay ishkay wawkiku-naka tukuy *Kristuta kirik runakuna-manta kachashka runakunami kanahun, Kristuta sumakta kushichikkuna.
²⁴Chayrayku paykunata ali shunkuwa wasikichipi kayaychi tukuy Jesukristuta kirik runakuna yachanankunapa kankuna paykunata alita yuyakkuna kanaykichita. Chasna kashpaykichimi yachankakuna ñukanchi kankunamanta yapa ali kanahun nishpa rimashkan-chika shutipa kananta.

**Pablo riman kullkita tantachishpa
 Jesukristuta kirikkunata
 yanapanamanta**

9 ¹⁻²Chay Jerusalenpi kawsak Jesukristuta kirikkunaryku kullkita tantachinamanta mana ashwanta killkanayni tiyanchu, kankuna ali shunkuwa kunaykichita yachashkay-nirayku. Tukuy uras kay Masedonia allpapi kahuk llaktakunapi kawsak Jesukristuta kirikkunata rimani, chay shuk watamanta pacha kankuna Akaya allpapi llaktakunamanta kirikkuna kallarishkankichi kullkita tantachinata chay nima imayu kirikkunata yanapanaykichipa. Chayrayku kay Masedonia-manta kirik masinchikunapas kankunashina kallarishkakuna kullkita tantachinata yanapanankunapa chay nima imayu kirikkunata. ³Manami munani-chu yanka kananpa kay rimashkaynika, Akayapi kirikkuna ña tantachishkakuna kullkinkunata Jerusalenpi kawsak kirikkunata kunankunapa nishpa. Chayrayku alicharishka kanaykichipa kay kimsa wawkinchikunata kachasha kankunama rinankunapa. ⁴Kay Masedonia-manta ñukawa purihuk wawkikuna kankunama rishpankuna kankuna manara kullkikichita tantachishkayki-

chita rikushpankunaka yuyalinkaku-nami Pabloka llullaysikimi nishpa. Chasna kashpanka mana ñukallachu pinkarisha, kankunapas pinkarinki-chimi. ⁵Chayrayku mana pinkarinayki-chipa yuyarishkani, ali kama chay kimsa wawkikunata ñukamanta puntiru kankunama kachanaynipa, kankunata yanapanankunapa chay rimashkaykichi kullkita tantachinaykichipa. Chasna tantachishpaykichi ñukanchi paktash-panchi tantachishkaykichitana tarik rishunchi. Chasna tantachihushkayki-chiwa runakunata rikuchiychi ali shunkuwa mana mitsaywa kuhushkayki-chita.

⁶Wawkikuna panikuna, yuyariyichi. Shuk runa mana achka tuyukunata tarpushpanka manami achkatachu pallan. Shuk runa achka tuyukunata tarpushpanka achkatami pallan.

⁷Chasnallatata karan wawki pani yuyarinan tiyan masna kullkitami munan churanata. Chayta mana llakirishpa, nima mitsashpa, pay kikin ali munaywa churachun. Chay kushkanka mana kachun mana munakta. Yaya Dioska kushilla kuk runakunatami yuyan. ⁸Payka atipan kunata tukuy kankunapa pishihush-kanta achka puchurinankama. Chasna kankunaryku nima ima uras pishinkachu, ashwan kankunapa achka tiyanka tukuy ali ruranakunapi yanapanaykichipa. ⁹Chasnallatata Yaya Diospa killkachishkanpi riman:

Muyukunata wicashpa tarpukhina nima imayu runakunata mana mitsashpa kuktaka Yaya Dioska nima ima uras kunkarinchu nishpa.

¹⁰Yaya Dioska tarpu muyukunata kun tarpunanchipa. Mikunanchitapas kun. Chasna Yaya Dioska muyukunata tarpu runakunata kuhukshinami kankunatapas

achkata yanapan nima imayu runakunata yanapanaykichipa. Chaymantapas yanapanmi yanapashkaykichirayku shukkunapas paypi sinchikurinankunapa.

¹¹Yaya Dioska kankunata achkata kunka tukuy uras shukkunata yanapashpa mana mitsashpa kunaykichipa. Chasna kushpaykichi paykunaka Yaya Diosta agradesishpa kushichinkakuna, kankuna paykunata sumakta yanapashkaykichirayku.

¹²Chasna Jerusalenpi kawsak kirikkunarayku kullkikichita apashpanchi munahushkankunata kushpa paykunata yanapanchi. Mana chayllachu. Ashwan paykunata yanapanchi Yaya Diosta atunta kushichishpa agradesinankunapa.

¹³Kushkaykichita apishpankuna Yaya Diosta agradesishpa kushichinkakuna chasna kushkaykichiwa rikuchishkaykichirayku chay suma ali shimita Jesukristu runakunata kishpichinanmanta alita kirishpa kasushpa kawsahushkaychita. Chaymantapas Yaya Diosta agradesishpa kushichinkakuna, paykuna Jerusalenpi pishihuk kirik masinchikunata, shuk llaktapi kawsakkunatapas ali shunkuwa yanapashkaykichirayku.

¹⁴Yaya Dios kankunata alita yanapashkanta rikuchishkaykichirayku Jerusalenpi kawsak kirikkunaka kankunata yuyashpankuna Yaya Diosta mañankakuna kankunaryku.

¹⁵Akuychi atunta agradesishunchi Yayanchi Diosta, paypa yuyashkan Wawan Jesukristuta ñukanchita kushkanrayku. Shimikunaka ñukanchita pishin payta sumakta agradesinanchipa.

Pablo Yaya Diospa kachashkan
kananta rikuchishpa payta
washanchak runakunata
chunllayachin

10 ¹Wawkikuna panikuna, kunan
ñuka kikinmanta kankunata
rimasha. *Kristushina kankunata
yuyahushpayni ali shunkuwa kunashpa
rimani. Shukkuna kankunamanta

rimanahun: Pablo ñukanchiwa kashpan alishina tukushpan riman. Ñukanchimanta karipi kashpan yapa sinchi shimiwa riman nishpa.

²Ama munaychichu kankunama rishkayni uras sinchi shimiwa kankunata rimanaynipa. Mana manchanichu sinchi shimiwa rimanata, maykunkunami ñukamanta rimanahun Pabloka Jesukristuta mana kirik runakunashina munashkanllata rurashpa kawsahun nishpa.

³Ñukanchi runakunalla kashpanchipas manami runakunashina piñanakushpa-chu makanakushpachu kuntranchikunata winsinchi.

⁴Kay allpapi kawsak runakuna lansakunawa wañunakunahun. Ñukanchika mana chasnachu lansakunawa wañunaku hunchi. Ashwan Yaya Dioska ñukanchita yachayninta kushka paypa kuntrankunapa sinchita kamachishpa tiyahushkankunata kulluchinanchipa, chaymantapas runakuna yanka yuyarishkankunata riksichishpa yuyayninkunamanta anchuchinanchipa.

⁵Yaya Dios ñukanchita yachayninta kushpan tukuy runakunapa rikushkanpi atun yachay kananta, maykanmi arkahun runakuna Yaya Diosta riksinankunapa, mana yachay kananta riksichishpa kulluchinchi. Mana kunkaylla yuyarishpa kawsanchichu, ashwan tukuy yuyarinanchikunata kasuchinchii Kristu munashkanshina kanankunapa.

⁶Kankuna yachakushpaykichi Kristuta alita kasushpa kawsanata, chay uras shuti ñukanchi tukuy kankunamanta mana alita kasukkunata kastigashun-chimi.

⁷Wawkikuna panikuna, kay asirtaypa kashkata asirtaychi. Shuk pay kikinmanta yuyarishpanka Kristupa runanmi kani nishpa, payka yuyarinan tiyan ñukapas Kristupa runan kanaynita.

⁸Ñuka kikinta atunyachikshina rimash-

paynipas rimashkaynika shutipami. Yaya Diospa kachashkan kashpaynimi paypa yachayninka tiyawan. Payka ñukata yachayninta kuwashka kankunata yanapanaynipa, ashwan alita riksinaykichipa payta, mana kuwashka-chu yuyaykichita waklichinaynipa. Chayrayku nima pi atipawankachu pinkachinata mana shutipachu nishpa.

⁹Chayta rimani mana yuyarinayki-chipa kay killkashkayniwa kankunata manchachinayahushkaynita. ¹⁰Shuk runakuna rimanahun: Pabloka killkashpan yapa sinchi shimiwa ñukanchita riman. Ashwan ñukanchiwa kahushpan sampa kan ñukanchita rimahushkanpi nishpa. ¹¹Maykanmi chasna riman, payka yachanan tiyan, imashnami sinchi shimiwa killkashkani kankunamanta karipi kahushpayni chasnallata-tami atipaynima sinchita kamachinata kankunawa kahushpayni.

¹²Ay ñukastu imashnata atipaynima paykunawa parihuyanata, maykanku-nami paykuna kikinmanta alita rimana-hun. Paykuna kikin yuyayninkuna-manta surkushpankuna ali kanankunata yuyarinahun. Paykunapurallapi yuyarishpankuna rimanahun pimi ali pimi mana alichu nishpa. Shutipa ali kashkata mana asirtakkunachu kanahun. ¹³Ashwan ñukanchika mana yanka atunyachirishpachu ñukanchi kikinmanta rimanchi. Yaya Dios ñukanchita kamachishkanta paktachish-panchillami ali rurashkanchita rimanchi. Pay ñukanchita kachashpan kankuna Korinto llaktapi kawsakkunapi-pas paktashkanchi. ¹⁴Mana yanka atunyachirishpachu chayta rimanchi, ashwan shutipa kankunakama paktash-kanchimi chay suma ali shimita Kristu runakunata kishpichinanmanta yachachinanchipa. ¹⁵Ñukaka mana yanka atunyachirishpachu rimani

ñukami kayta rurashkani nishpa, maykantami shukkuna rurashkakuna. Ashwan chapahunchi kankuna ashwan alita Jesukristupi sinchikushpa kawsash-paykichi kankunata ashwanta yachachi-nanchipa tukuypi alita asirtanaykichi-kama. Chay ruranayashkanchika kankami maykankamallami Yaya Dios munan. ¹⁶Chaymanta Korinto llaktayki-chimanta ashwan karu llaktakunapipas yachachinayani chay suma ali shimita Kristu runakunata kishpichinanmanta. Mana rinayanichu maypimi shukkuna ña yachachishkakuna. Mana shuk yachachikpa tarawananpi yaykunayani-chu chaymanta ñuka kikinta atunyachiri-shipa rimanaynipa ñukami paykunata yachachishkani nishpa.

¹⁷Yaya Diospa killkachishkanpi nin: Maykanmi yuyarin ñuka kani ashwan ali shukkunamanta nishpa, chayka yuyarichun Yaya Dios tukuya rurak kashpan paylla tukuymanta ali atun kananta nishpa.

¹⁸Shuk runa pay kikinmanta rimash-panka ñukami alita rurashkani nishpa, mana yachanchichu shutipa alita rurakchu manachu. Ashwan Yayanchi Dios rimashpanmi chay runami alita rurak nishpa, chay runa shuti alita rurak kan.

Pablo riman llullachishpa yachachikkunamanta

11 ¹¿Atipawankichimachu uyanata shuk muspashina rimashkay-nita? Ña yachani kankuna uyawanayki-chita. ²Uyawaychi. Ñukaka kankunata yuyashpayni yapa munani Jesukristullata kasushpa kawsanayki-chita, imashnami Yaya Dioska ñukanchita yapa yuyashpan munan payllata kasushpa kawsananchipa. Imashnami shuk ali yaya warmi

wawanta kuyran kwintachishkan runallata kusayanankama, chasnallata-tami ñukapas kankunata kuyrakshina kani Jesukristupa kwintachishkanshina kashpaykichi paymanta mana anchorishpa shamunanta chapashpa kawsanaykichipa. ³Yapa manchanai mana ali yachachikkuna kankunata llullachinankunata, imashnami chay machakuyaka chay puntiru warmi Evata llullachirkka chasna. Yuyaynikichipi llullachirishka kashpaykichi manana *Kristuta yuyarishpa kawsankichichu, nima payta yuyankichichu, nima kasunkichichu. ⁴Kankuna utkalla kasunkichi shuk shamuk runata, maykanmi ñuka Jesusmanta yachachishkaynita chikanyachishpa yachachin. Yaya Diospa Espiritunta charishkaykichimanta ali munanawa yaykuchinkichi shuk chikan espiritu-tana. Ñuka yachachishkaynimanta Yaya Diospa suma ali shiminta Jesukristu runakunata kishpichinanmanta chikan yachachishkankunata ali munanawa uyankichi.

⁵Kankuna yuyarinkichi chay yachachikkuna Yaya Diospa kachash-kankuna kanahun, Pablomanta ashwan yachak nishpa. Ñukaka mana yuyarinichu chasna kananta. Mana yuyarinichu ñuka chay yachachikkunamanta mana yapa yachak kanaynita. ⁶Mana sumakta rimanata atipashpaynipas chay Yaya Diospa suma ali shiminta yapa alitami yachani. Chayta tukuy uras alita rurashkayniwa kankunata riksichish-kani.

⁷Kankunata Yaya Diospa suma ali shiminta yachachihushkaynipi nima imata tapushkanichu kankunamanta. Chasna rurashpayni ñuka kikinita uchillayachirishkani kankunata sinchikuchinaynipa, Jesukristuta ashwan alita katinaykichipa. ¿Chayka

manachu ali kashka? ⁸Kankunata yachachihushkaynipi shuk llaktapi kawsak kirikkunaka munahushkaynita kuwashkakuna. Paykunamanta apishkani kankunata ashwan alita yanapanaynipa. ⁹Kankunapi kahush-payni mana tapushkanichu munahushkaynipi yanapanawanaykichipa. Masedoniamanta kirikkunaka tukuy munahushkaynita apamushkakuna. Imashnami rurashkani, chasnallatata tukuy uras rurashpalla katisha mana kankunata killachinaynipa. ¹⁰Imashnami Jesukristu runakunata kishpichinanmanta shimika shutipa kan, chasnallatata tukuy rimahushkaynipas shutipa kan. Chay kawsahushkaykichi Akaya allpapi nima pi atipawankachu arkanata chasna ali kawsahushkaynita. ¹¹¿Imaraykuta chasna rimahuni? ¿Manachu kankunata yuyani? Yaya Diosmi yachan kankunata yapa yuyahushkaynita.

¹²Yapa kankunata yuyahushpaynipas nima imata kankunamanta apishpa katihunilla. Chasna rurashpalla katisha nima maykan chay yanka rimakkunamanta rimanata atipanarpa, Pabloshima Yaya Diospa kachashkanmi kani nishpa. Ñukaka paykunamanta chikan kawsakmi kani, mana parihuchu kani. ¹³Paykuna Yaya Diospa kachashkan kani nishpa rimashpan-kunapas llullaysikunikunallami kanahun, mana Kristupa kachashkankunachu kanahun. Yanka llullashpa yachachihush-pankunapas kikin Kristupa kachashkankunashina tukunahun. ¹⁴Chayka mana manchariypachu. Supaykunapa apunpas chasnallatata Yaya Diospa *angelshina punchahlla rikunayu tukushpan llullachin. ¹⁵Chayrayku asirtaypallami payta yanapak-kunapas Yaya Diosta kasushpa alita rurakkunashina tukushpankuna. Chasna runakunataka Yaya Dioska rurashkankunamanta munashkankunata kushpa sinchita kastiganka.

**Pablo Yaya Diospa kachashkan
kashkanrayku parisishkanmanta
kwintan**

¹⁶Kutikashka rimashkaykichi, ama yuyariyichihu muspa runa kanaynita. Chasna yuyarishpaykichika sakiwaychi shuk muspa runashina ñuka kikinta atunyachirishpa rimanata. ¹⁷Kunan kay rimashkaynika mana Yaya Diospa rimawashkanshinachu kan. Ashwan tukuy runakunashina ñukapas atunyachirishpayni muspa runashina rimahuni. ¹⁸Achka runakuna paykuna kikin ali kanankunata yuyarishpa atunyachirinahun. Chasna kashpan ñukapas ñuka kikinta atunyachirisha. ¹⁹Kankuna yapa yachayyu kankichi. Chayraykuchari muspashina rimak runakunata kushilla uyankichi. ²⁰Chasna kashpan shukkuna kankunata kamachishpa kawsanahun, shukkuna kullkikichita kichunahun, shukkuna kankunata llullachinahun, shukkuna kankunata mana ali yuyaywa rimashpa kawsanahun, shukkuna kankunata lapyanahun. Tukuy chasna rurak runakunata kankunaka kushillalla awantankichi. ²¹Pinkashpaynitata kayta rimashkaykichi: Ñukaka yapa sampashina kashkani, mana chay runakunashina kankunata rurashkaynirayku.

Chasna kashpanpas chay runakuna paykuna kikinkunamanta alita rimashpankuna ñukapas atipani chasnallatata ñuka kikinimanta alita rimanata. Chasna kashpanpas paykunashina rimashpayni muspa runashinami kani. ²²Paykuna ninahun ñukanchi *hebreo runakuna kanchi nishpa. Ñukapas hebreo runa kani. Paykuna rimanahun Yaya Diospa akllashkan israel runakuna kanchi nishpa. Ñukapas israel runa kani. Paykuna rimanahun Abraham wañupa miray kanchi nishpa. Ñukapas

Abrahampa miray kani. ²³Paykuna *Kristupa kamachishkan runankuna kashpankunaka ñuka muspa runa rimakshina rikurishpaynipas kankunata rimani, paykunamanta ashwan ali Jesukristupa kamachishkan runanmi kani. Paykunamanta ashwan sinchita tarawashkani Jesukristurayku, paykunamanta ashwan achka kuti karselpi kashkani, paykunamanta ashwanta asutiwashkakuna, achka kuti wañuna kashkani. ²⁴Pichka kuti ñukanchi israel runakunamanta apukuna kimsa chunka iskun asutiwa kastigachiwarkakuna. ²⁵Kimsa kuti *romano runakuna ñukata asutiwarkakuna. Shuk kuti runakuna rumikunawa wañuchinayashpa tuksiwarkakuna. Kimsa kuti lanchapi purihushpayni lanchaka tirkarka. Chaypi shuk kuti ñukaka shuk tuta shuk puncha atun yaku marpi wampurishpa kahurkani. ²⁶Achka kuti purihushkaynipy parisishkani, yaku untaykunamanta, shuwakunamanta, ñukanchi israel runakunapa masinchikunamanta, kankuna mana israel runakunapa masikichikunamantapas parisirkani. Chaymantapas llaktakunapi runakuna chiknishpa wañuchiwanayarkakuna. Chunlla chakishka allpapi, atun yaku mar chawpipi wañuna kashkani. Achka kuti kirikkunashina tukushka runakunapas chiknishpa wañuchiwanayarkakuna. ²⁷Sinchita sampayakta tarawashpa kawsarkani. Achka parisina tiyarka ñukarayku. Achka kuti mana puñurkanchu tutapi, achka kuti parisirkani yarkayta yakunayayta. Achka kuti mana mikushpa pasarkani. Achka kuti chirita parisirkani, chaymantapas churarinaynimanta.

²⁸Ashwan tiyashpanpas rimanaynipa kayllata ashwan rimani: Karan puncha yapa yuyarishpa kahuni, imashnashi Jesukristuta kirikkunata tukuy chay

kawsahushkankuna llaktakunapi kunashpa yanapaynima nishpa.²⁹ Shuk wawki sampa kashpan ñukapas payta llakichishpayni sampa kanaynita musyani. Shuk runa shuk wawkita panita uchata rurachishpanka ñuka atunta llakirishpayni yapa parisini.

³⁰Kankuna munashpaykichi ñuka kikinta atunyachirinaynita, sampa kanaynita rikuchik parisishkayniwami ñuka kikinta atunyachirisha.³¹ Yaya Dios Amunchi Jesukristupa Yayan yachan tukuy rimashkaynita shutipa kananta. Payta runakuna tukuy uras kushichishpa kawsanahuchun.

³²Damasko llaktapi kahushpayni chay llaktarayku atun apu Aretaspa churashkan apuka suntalunkunata llakta punkupi churarka kuyranankunapa, llukshihushpayni apiwanankunapa.
³³Chasna kuyrahushkankunaryku kirik masinikunaka ñukata llakta kincha awa punkumanta shuk tasapi uraykuchiwarakuna. Chasna rurashpankuna chay chikniwik runakunamanta kishpichi-warkakuna.

**Yaya Dioska yachayninta Pablota
rikuchishkanmanta riman**

12 ¹Atunyachirishpa rimanaka nima pirayku ali kashpanpas kankuna chayta tapuwakshina kashpaykichi ñuka kikinta atunyachirishpa rimanayniwa katinayni tiyan. Chasna kashpan kunan rimashkaykichi Yaya Dios rikuwashkaynillapi muskupishina rikuchiwashkanmanta, chaymantapas mana riksishkaynita riksichiwashkanmanta. ²Ñuka *Kristuta kirik runa kashpayni ña pasashka chunka chusku wata Yaya Dios muskupishina kimsaynin siluma apawashkanka. Aychaynintichu apawarka, mana kashpaka aychayni illatachu apawarka, mana yachanichu. Yaya Diosmi yachan. ³⁻⁴Kayllata

yachani, ñuka suma kushilla kawsanama apashka kashkaynita. Aychaynintichu rirkani, achayni illachu rirkani, mana yachanichu. Yaya Diosmi yachan. Chay suma kushilla kawsanapi uyarkani runarayku nima rimaypa suma shimikunata, maykankunatami nima pita atipanichu kwintanata.

⁵Chasna rikushkaynirayku atipaynima ñuka kikinta atunyachirinata. Ashwan mana munanichu ñuka kikinta chasna atunyachirinata. Sampa kanaynita rikuchik parisinaynillawa atunyachirisha. ⁶Chay Yaya Dios riksichiwashkanwa atunyachirinayaynimaka, nima chasna muspa rimakshinachu kaynima. Shutipa kashkallatami rimaynima. Chasna kashpanpas mana munanichu chaywa atunyachirinata nima maykan runa ñukamanta yuyarinanpa ashwan ali kanaynita chay rikuwashkanmanta uyawashkanmanta.

⁷Yaya Dios chay achka mana yachashkaynita riksichiwashkanrayku mana ñuka kikinmanta yuyarinaynipa shukkunamanta pasa kanaynita, Yaya Dioska kuwarka shuk sinchi nanayta aychaynipi, shuk kashapi chukrishkatashina. Chay nanayka supaykunapa apunmantami kan ñukata parisichiwananpa, mana shukkunamanta pasa kanaynita yuyarinaynipa. ⁸Kimsa cuti Yaya Diosta tapurkani chay nanayta ñukamanta anchuchinanpa. ⁹Chasna mañashpayni Yaya Dioska rimawarka: Tukuy munashkaykunaka kanmi ñuka kanta yuyahushkayni. Shuk runa sampa kashpanmi ashwan alita rikuchin yachayniwa kashkanta nishpa. Chayrayku parisishpaynipas sampa kashkaynimanta kushikuni. Yapa munani Kristupa yachaynin kawsaynipi kahushkanta alita rikuchinata. ¹⁰Chayrayku achka imapi Kristurayku parisihushpaynipas kushikuni. Sampa

kashpayni, chiknirishka kashpayni, washancharishka kashpayni, tukuy ima pisiwashpan, runakuna ūukata piñarishpa wañuchinayawashhpankunapas kushikuni. Chasna sampa kahushkaynita rikuchishpa parisishpaynimi yachani Kristu sumakta yanapawashpan yachayninwa tukuya ruranata atipanaynita.

**Pablo Korintopi kawsak
kirikkunata yapa
yuyarishkanmanta riman**

¹¹Ñuka muspashina ūuka kikimanta alikunata rimashkani. Kankunami chasna rimachichiwashhkankichi. Alita riksishashpakykichi ali kama karka kankuna ūukamanta chasna alikunata rimanaykichipa. Nima ima kanaynitarchari yuyarinkichi. Chasna kashpanpas chay yuyarishkaykichi yapa ali yachachikkunaka ūukamanta nima imapi pasa kanahunchu. ¹²Yaya Dios yanapawashpan kankunapi kawsahushpayni mana sampayashpa achka kuti kankunata paypa atun yachayninta riksishashpakykichi. Yaya Diospa yachayninwa runakuna nima ima uras rikushkankunata, suma mana atipaypakuñata, atun yachaywa ruranakunata rurarkani. ¹³¿Shuk llaktakunapi kawsak kirikkunamanta kankunata mana valiktashina rikunaynita yuyarinkichichu, nima imata kankunata tapushkaynirayku? Chasna kashpanka llakichewaychi chay mana alita rurashkaynima.

¹⁴Alicharishkami kahuni kimsaynin kuti kankunata rikuk rinaynipa. Kunanpas rishpayni nima ima charishkaykichita tapushkaykichichu. Shuk yayaka mana atipanchu uchilla wawanmanta chapanata munashkanta apinanpa, ashwan yayanmi uchilla

wawanta munashkankunata kunantiyán. Chasnallatatumi ūukapas kankunamanta mana chapanichu munashkaynita apinata. Ashwan munanimi, kankuna yachakushhpakykichi alita Jesukristuta kasunaykichipa.

¹⁵Ñukaka ima charishkaynitapas kushilla kusha kankunata yanapanaynipa. Kankunaranti wañushanpas. Ñuka kankunata ashwanta ashwanta yuyashpa rihushpayni ¿imaraykuta kankunaka manana yapa yuyawahunkichichu? ¹⁶Kankunata chasna mana imata tapushka kashpaynipas shukkunaka rimanahunchari: Yapa yachaywami kankunata llullachik shamushka kankunamanta kawsananpa nishpa.

¹⁷Ñuka runaynikunata kankunama kachashpayni ¿shuk imata kankunamanta tapunankunapachu kacharkani? Manami chayraykuchu paykunata kacharkani. ¹⁸Titota kankunama pasyananpa kachashpayni paywa pakta shuk wawkitapas kacharkani. Chasna pasyak rishpankuna ¿Titoka kankunamanta shuk imata tapurkachu? Mana. Ñukaka Titowa shuk yuyayllawa kanchi. Ishkanti chasnalla alillata rurashpa kawsanchi.

¹⁹Chasna rimahushpayni yuyarinkichichari payka chasna rimahun Titowa pakta alita rikuy tukunankunapa nishpa. Mana chasnachu. Ashwan ūukanchika *Kristupa runankuna kashpanchimi Yaya Diospa rikushkanpi tukuy chaykunata rimahunchi. Munashkanchi wawkinchikuna paninchikuna, tukuy kay rimahushkanchiwa kankunata yanapanayanchi ashwan alita Jesukristuta katinaykichipa. ²⁰Yapa yuyarishpa kahuni, kankunama rishpayni mana munashkaynitashina rurahushkaykitchitachari tarik risha nishpa. Chasna kashpan kankunapi paktashpayni kankunapas ūukatachari

mana munashkaykitchitashina rikuwan-kichi. Yapa yuyarishpa kahuni, kankunatachari tarik risha rimana-kushpa, runa masikichiwa parihuyana-yashpa, piñarishpa, tukuya kankuna kikinraykulla munashpa, shuk runaku-nata washanchashpa, mana alita rimashpa, kankuna kikinlla yachak kanayashpa, mana shuk yuyayllawa kawsahushkaykichita.²¹ Mana munani-chu kankunata kuti pasyanapa rishpayni Yayayni Dios kankunamanta pinkachi-wananta. Mana munanichu llakirishpa kanata achka kankunamanta uchata rurashkaykichirayku, ñawpamanta pacha mana sakishkaykichirayku uchata ruranata, musayanata, machanata, chaymantapas tukuy pinkaypa ruranakunata.

**Korintopi kirikkunaryku shuk
kunananaka chaymanta
saludukuna**

13 ¹⁻²Kunan kimsaynin kutimi kankunata pasyak risha. Maykantami rimarkani chay uchata rurahuk wawkikunata, tukuy wawkiku-natapas ishkaynин kuti pasyak rishpayni kunan karupi kahushpaynipas chayta kutikashka kankunata rimashkaykichi: Kay rihushkaynipi manami llakichishpa-chu kankunata sinchita kunashkaykichi. Kay kimsaynin kuti kankunata pasyak rishpayni uchallata rurashpa katihush-kaykichita rikushpaynika kankunata kastiganayni tiyan, imashnami Moisespa killkashkanpi riman: Ishkay kimsa kankunamanta rikushpaykichiha shuk runa mana alita rurahushkanta, chaytaka kastiganaykichi tiyan nishpa.³ Kankunaka munankichi rikuchinaynipa *Kristupa yachayninwa kahushkaynita. Kristu kankunapi rurashkanka manami shuk sampa runapa rurashkanshinachu, ashwan tukuy kankunapi rurahush-

kanka atun yachaynintami rikuchin.

⁴Kristu shuk sampa runashina kruspi klabay tukushpa wañushpanpas kunanka Yaya Diospa atun yachayn-inwami kawsahun. Chasnashinami ñukanchipas Kristu wañushkanpishina sampa kanchi. Chasna kashpanchipas paywa kawsahushpachina kankunapi paktashpanchi Yaya Diospa yachay-niwa kahushkanchita rikuchishu.

⁵Tukuy kankuna yuyariyichi yachanaykicipa, Jesukristupi sinchiku-hushpachu kawsankichi mananachu. ⁶Manachu yachankichi Jesukristu kankunapi kawsahushkanta? Mana kashpaka shuti manana Jesukristupi sinchikushpachu kawsahunkichi.

⁶Imashna kashpanpas yuyarini kankuna alita riksinaykichita ñukanchi alita Jesukristupa rimashkanta yachachik-kuna kananchita. ⁷Yaya Diosta mañahunchi mana millaypakunata ruranaykicipa. Mana kayta kankunata rimahunchichu runakuna ñukanchi-manta rimanankunapa alita yachachish-kakuna nishpa. Ñukanchi shuk runaku-napa rikushkanpika yanka rimahuk-shina rikurishpachipas mana imananchu. Kayllatami munanchi, kankuna alita rurashpa kawsanaykichita. ⁸Nima maykan atipanchu chikanyachinata kikin shutipa kashkata, mana shutipa-chu nishpa rimashpanpas. Chayrayku shutipa kashkallata rimashpa kawsananchi tiyan. ⁹Sampa runakunashina rikurishpachipas kushikushhunchimi kankuna Jesukristupi sinchikushpa kawsahushpaykichi. Mañashpallami katishu kankuna alikunallata rurak runakuna tukunaykicipa.

¹⁰Kay kartata killkahuni kankunaryku sinchi shimiwa, manarapas kankunata rikunapa rihushpayni. Kankunama rishpayni manana munani-chu sinchi shimiwa kankunata

kunanata. Amunchi Jesukristu ñukata churawashkanrayku kankunata yachachik kanaynipa, atipani kankunata sinchi shimiwa kunanata. Tukuy chayka kanmi kankuna yanapay tukunaynikichipa, ashwan alita payta kasunayki-chipa, chayka manami kanchu waklichiy tukunaykichipa.

¹¹Kay killkahushkanchita tukuchinanchipa, wawkinchikuna paninchikuna, tukuy chay rimashkanchikunata kasuychina alikunallata rurak kanaykichipa. Kunashkanchikunata ali yuyawa uyaychi. Mana piñanakushpa, shuk yuyayllawa kushilla kawsaychi. Chasna kawsashpaykichi mi ñukanchita yuyak kushilla

kawsayta kuk Yaya Dioska kankunawa kanka. ¹²Tantarishpaykichi alita yuyanakushpa shukwa shukwa saludanakuychi. ¹³Jesukristuta tukuy kirik masinchikunami kankunata saludanahun.

¹⁴Amunchi Jesukristu kankunata llakichishpan yanapachun. Yaya Dios kankunata yuyashpan paypa Espiritunka karan uras tukuy kankunata sinchikuchishpan kankunawa kawsachun.

Chayllata killkashkanchi.

Wawkipichikuna turikichikuna
Pablo, Timoteo

PABLOPA KILLKASHKAN KILLKA GALASIA

ALLPAPI KAWSAK JESUKRISTUTA

KIRIKKUNARAYKU

Pablo wawkikunata
panikunata saludan

1 ¹⁻²Munashkayni wawkinikuna paninikuna, ñuka killkahuni kay kartata tukuy kankuna Galasia allpapi kahuk llaktakunapi kawsak Jesukristuta kirikkunarayku.

Ñukaka mana runakunapa kachashkan runachu kani, ashwan Jesukristu, payta kawsachik Yaya Diospas kachawashka paypa shiminta yachachinaynipa. Tukuy ñukawa pakta kahuk Jesukristuta kirikkunawa kay kartata killkahuni kankunama kachanaynipa. ³Yayanchi Dios, Amunchi Jesukristupas kankunata llakichishpan yanapanahuchun tukuy uras kushilla kawsanaykichiha. ⁴Jesukristuka pay kikin munashpan Yaya Diospa munananta kasushpan uchanchikunaryaku kruspi wañurka ñukanchita kishpichinanpa, manana kawsananchipa Yaya Diosta mana kasukkuna millaypata yuyarishpa rurashpa kawsahushkankunashina. ⁵Akuychi Yaya Diosta tukuy uras wiñayparayku atunyachishpa kushichishunchi. Chasna kachun.

Pablo yachachin shuklla shimi
tiyananta imashnami kishpishunchi

⁶Jesukristu ñukanchikunata yuyashpan wañushkanrayku Yaya Dios

ñukanchita akllarka paywa pakta kawsananchipa. ⁷Chasna Yaya Diospa akllashkan kashpaykichitatachu shuk ratu chay kankunata akllak Yaya Diosmanta anchurishkankichi? ⁸Imaraykuta utkalla shuk chikan yachachinata kasuk tukushkankichi, imashnami kishpinaka nishpa yachachishkankunata? Chayrayku yapa llakirini. ⁷Ñukanchi yachakuhushkanchi suma ali shrimantaka manami tiyanchu shuk shrimika. Tiyan runakuna chay suma ali shrimanta chikanta yachachishpankuna kankunapa yuyaynikicha waklichikkuna. Chay runakunaka chay suma ali shrimita ⁹Kristu runakunata kishpichinanmanta yachachinankunanti chikantana yachachinahun. ⁸Kankunata rimani maykan runapas kay yachachishkayni suma ali shrimanta chikanta yachachishpanka chaytaka Yaya Dioska kastigankami. Nima ñuka, nima shuk ¹⁰angel silumanta shamushpan atipanchichu chikanta yachachinata. ⁹Nawpa kayta rimarkani, kunan kutikashka rimashkaykichi: Jesukristullata kirishpanchimi Yaya Dioska ñukanchita kastiganamanta kishpichin. Maykanpas chasna yachachiy tukushkaykichimanta chikanta yachachishpanka chaytaka Yaya Dioska kastigankami.

¹⁰Kunanka chasna rimashkayniwa ñrunakunatachu kushichinayani? Mana kashpaka ñYaya Diostachu kushichinayani? ñRunakunapa rikushkanpichu ali kanayani? Chasna kamaka manami Kristupa kamachishkanchu kaynima.

¹¹Wawkinikuna paninikuna, munani yachanaykichipa kay yachachihush-kayni shimika Jesukristu runakunata kishpichinanmanta mana runakunapa yuyayninmantachu kananta. ¹²Mana yachakushkanichu runakunamanta, ashwan Jesukristu kikinmi chayta riksichiwashka.

Imashnami Pabloka Jesukristupa apostolnín tukurka

¹³Kunkunaka ñ yachankichi ñukanchi israel runakunapa yachachinanchikunata katilushipayni Jesukristuta kirikkunata piñarishipayni yapa parisichishkaynita, paykunata kulluchinata munashipayni. ¹⁴Achka ñukashina watayukunamanta pasa ñukanchi israel runakunapa yaya rukunchi wañukunapa kamachishkankunata alita paktachik karkani.

¹⁵⁻¹⁷Chasna kashpaynipas ñuka manara wawayarishipayni Yaya Dioska akllawarka paywa pakta wiñaypa kawsanaynipa. Chasna Yaya Dios munashpan Wawan Jesukristuta riksichiwarka pay runakunata kishpichinanmanta kankuna mana israel runakunata yachachinaynipa. Yaya Dios akllawashpan mana rirkanicu runakunata tapunaynipa yachachiwanankunapa, nima Jerusalenma rirkanicu ñukamanta puntiru Jesukristupa *apostolninkuna yachachiwanankunapa. Ashwan mana unayashpachu kuskata rirkani Arabia allpama, chaymantalla Damasko llaktama kutirkani.

¹⁸Chaywasha kimsa watamanta rirkani Jerusalén llaktama Pedrota

riksinaynipa. Chaypimi paywa chunka pichka punchata karkani. ¹⁹Mana rikurkanichu nima shuk Jesukristupa apostolninkunata. Ashwan Jesuspa wawkin *Santiagollatami rikurkani. Chay ishkayllawa kwintarkani. ²⁰Kay killkahushkaynika shutipami kan, kaytaka Yaya Diospas yachanmi.

²¹Jerusalenmanta llukshishpayni Siria allpapi llaktakunama, Silisia allpapi llaktakunamapas rirkani. ²²Chayrayku Judea allpapi kahuk llaktakunapi *Kristuta kirikkunaka manara ñukata ñawipura riksiwarkakunarachu.

²³Paykunaka uyarkakunalla ñukamanta: Maykanmi ñawpa ñukanchi kirikkunata apichishpa wañuchichipayarka, payka kunanka runakunata yachachishpami purihun chay suma ali shimita Jesukristu runakunata kishpichinan-manta kirinankunapa, maykantami yapa sakichinata munapayarka nishpa.

²⁴Chasna tukushkaynita yachashpan-kuna Yaya Diosta agradesishpa kushichirkakuna.

Pablo Jesukristupa shuk apostolninkunawa tantarishkanmanta kwintan

2 ¹⁻²Chaymanta chunka chusku watamanta Yaya Dios rimawashpan kutikashka rirkani Jerusalenma Bernabewa pakta, wawki Titotapas pusharkani. Chay Jerusalén llaktapi tantarirkanchi Jesukristuta kirikkunata kamachikkunallawa kwintananchipa yachachishkaynikunamanta. Mana munarkanichu chay wawkikuna yachachishkaynita mana rikshipankuna mana alichu nishpa rimanankunapa, Yaya Diospa shiminta yachachishkay-nika kankuna mana israel runakunata mana yankamanta kananpa. Chayrayku paykunata yachachishkaynita rimash-payni tapurkani ñalichu manachu chay

yachachishkayni shimika Jesukristu runakunata kishpichinanmanta? nishpa. Paykunaka ayni warkakuna alimi nishpa.

³Nima rimawarkakunachu ñukawa pakta purik *griego runa Titomanta paypa ishpanan kara puntata pitinay-nipa, ñukanchi israel runakunashina tukunanpa. ⁴Ashwan ñukanchi israel runakunamanta shukkuna tiyarka chayta mana ali kananta yuyarikkuna. Jesusta katikkunami kanchi nishpa yanka rimashpa ñukanchiwa chapurish-pankuna rikunayarkakuna imashnami kawsanchi Jesukristullata kirishpa. Mana Jesukristullata kirishpanchichu atipanchi kishpinata Yaya Diospa atun kastigananmanta, ashwan Moisespa killashkan kamachishkakunata pakta chishpanchimi kishpishunchi nishpa rimashpankuna ñukanchita kuti chay kamachishkakunata kasuchinayar-kakuna. ⁵Paykunata nima shuk ratu kasurkanchichu. Yapa munarkanchi chay suma ali shimi shutipa kananta kirishpalla katinaykichipa Jesukristullami runakunata kishpichin nishpa.

⁶Chay kirikkunata kamachik wawki-kunaka Jerusalenpi nima ashwan rimawarkakunachu imatami rurasha, mana paykunata tapunapa rishpaynipas. Ñukaraykuka mana imananchu paykuna Jesuswa purik kashkankunaka. Yaya Diospa rikushkanpika tukuy ñukanchi yachachikkunaka parihullami kanchi. ⁷Chay wawkikunaka yachachihushkay-kika ali kananta yachashpankuna asirtarkakuna Yaya Dioska kachawash-kanta paypa suma ali shimita mana israel runakunata yachachinaynipa, imashnami Pedrota kacharka chay shimita israel runa masinchikunata yachachinanpa. ⁸Imashnami Yaya Dioska Pedrota yachayninwa yanapash-pan kacharka ñukanchi israel runaku-

nata yachachinanpa, chasnallatatami ñukatapas yachayninwa yanapawash-pan kachawarka kankuna mana israel runakunata yachachinaynipa.

⁹Chayrayku tukuy ñukanchi kirikkuna-pa yapa yuyashkanchi wawkikunaka *Santiago, Pedro, Juanpas Jerusalenpi kirikkunata ali yachachikkuna kashpan-kuna riksiwarkakuna ñuka Yaya Diospa kachashkan kanaynita kankuna mana israel runakunama. Ñukata Bernabeta-pas Yaya Diospa kachashkankuna kananchita riksishpankuna ñukanchiwa shuk yuyayllawa kanankunata rikuchishpa makinchita apirkakuna. Chasna ñukanchita kacharkakuna kankuna mana israel runakunata yachachinanchipa. Paykunana israel masinchikunata yachachinankunapa kiparirkakuna. ¹⁰Chasna kashpan kayllata ñukanchita rimarkakuna: Ama kunkaychichu kay Jerusalenpi nima imayu kirikkunata yanapanaykichipa nishpa. Chayta yuyarishpayni tukuy uras ali munaywa paykunata yanapani.

**Pablo Pedrota mana alita
rurashkanmanta kunashkanta
kwintan asirtachinanpa
Jesukristuta kirishpanchilla Yaya
Dios ñukanchita kishpichinanta**

¹¹Chaymanta Pedro Antiokia llaktama shamushpan chaypi shuk mana alita rurahushkanpi payta kunashpa ñawinipi kuskata rimarkani mana alitachu rurashkanki nishpa. ¹²Puntiru chaypi kawsak mana israel kirik masinchiku-nawa pakta mikupayarka. Shuk israel kirik masinchikuna *Santiagopa yachachishkanta kasukkuna Jerusalen-manta shamushpankuna Pedroka sakirkana mikunata chay mana israel kirik masinchikunawa. Chasna kuti kasurkana israel runakunaka nima ima uras mikunahuchun mana israel runaku-

nawa nishpa kamachirishkata, chay israel kirik masinchikuna paymanta mana ali israelchu nishpa yuyarinankunata manchashkanrayku.¹³ Chasnallatata tukuy Antiokiapi kawsak ñukanchi israel runakunamanta Jesukristuta kirikkunapas ashwan alita yachashpan-kunapas Pedroshina rurakkunallatata tukushpankuna mana alita rurarkakunachu. Paykunapas manana mikurkakunachu chay mana israel runakunamanta kirik masinchikunawa. Bernabepas yachashpantata mana ali kashkanta, paykunashinallatata rurarka.¹⁴ Ali kashkata riksichik suma ali shimita Jesukristu runakunata kishpichinan-manta manana kasuhushkunkunata rikushpayni tukuy kirikkuna tantarishka kahushkunkunapi Pedrota kunashpa rimarkani: Kanka ñukanchi israel runakunamanta kashpaykitata Jesukristuta kirik kahushkaykirayku kaypi puntiruka kay mana israel runakunashina kawsapayarkanki, manana Moisespa killkashkan kamachishkakunata kasushpa. Kunanka ñimaraykutaya kuti ñukanchi israel runakunashinalla Moisespa killkashkan kamachishkakunata paktachishpa kawsahushpayki munanki mana ñukanchi israel runakunamanta kirik masinchikunata chayta kasuchinata ñukanchi israel runakunashina kawsanankunapa? Chasnashushpayki yuyarinkakunami Jesuska sapallanka mana ñukanchita kishpichinkachu, ashwan Moisespa killkashkan kamachishkakunatapas kasunanchi tiyan kishpichirishka kananchipa nishpa.

¹⁵ Ñuka kanpas wawayarishkanchi-manta pachami israel runakuna kanchi, mana kanchichu Yaya Diospa kamachishkanta mana riksik runakunashina. ¹⁶ Chasna kashpanpas yachanchi,

nima maykan runa Yaya Diospa rikushkanpika ucha illa kanchu, Moisespa killkashkan kamachishkata paktachihushkanrayku, ashwan Jesukristuta kirishkanraykullami. Chayraykumi ñukanchipas israel runakuna kashpanchitata kishpichiy tukushkanchi Jesukristuta kirishkanchiraykulla, manami Moisespa killkashkan kamachishkata paktachishkanchirayku-chu nishpa Pedrota kunarkani.

¹⁷ Wawkikuna panikuna, ñukanchi Moisespa killkashkanta kasuk israel runakuna kashpanchipas munanchi *Kristupi sinchikushkanchirayku Yaya Dios ñukanchita rimananpa rikushkay-nipi ali tukushkankichi nishpa. Chasna kashpanmi tukuy runakunashina uchayu kananchita riksishkanchita rikuchinchi. Kunanka Kristupi sinchikushkanchirayku manana Moisespa killkashkan kamachishkaku-nata kasushpanchi ¹⁸ Kristuchu ñukanchita uchata rurak runakunata ruran chay kamachishkakunata mana kasuchishkanrayku? Manami chasnu-chu. Ashwan ñuka Moisespa killkashkan kamachishkakunata manana paktachishanchu nishpa rimashkayni-washa kutikashka chayllatata paktachinaynimaka, mana alita rurakchu kaynima. ¹⁹ Moisespa killkashkan kamachishkakunapi riman mana paktachikkuna wañunankuna tiyan nishpa. Ñawpa kawsashkaynita sakishkayniwa chay kastiguta pasashpayni manana chay kamachishkakunata kasunayni tiyanchu, ashwan mushu kawsayyuna Yaya Diosrayku kawsani. Jesukristu uchayniranti kruspi wañushpan ñuka paywa pakta wañush-kashina kashkani. ²⁰ Mushu kawsayyuna kani. Chasna kashpan manana ñuka kikin munashkaynitachu rurashpa kawsahuni, ashwan Kristu ñukapi

kawsahushpan paypa munashkanta rurashpa kawsahuni. Chasna kashpanmi kay mundupi kawsahushpaynira Yaya Diospa Wawanpi sinchikushpa kawsahuni. Payka yapa yuyawashpan ñukaranti wañurka. ²¹Moisespa killkashkan kamachishkata paktachishpa kawsashkaynirayku Yaya Dioska uchaynimanta llakichimaka, Kristuka yankamantami wañuma karka. Chasna kashpan manana kuti chay kamachishkata paktachishpa ñuka kikinta kishpichirinayanichu, Yaya Dios paylla munashpan kishpichiwananta mana munanichu nishpa rimakshina.

**Yaya Diosta kirishpanchilla
kishpichiyi tukunanchimanta riman**

3 ¹Ay Galasiapi kawsak wawkikuna panikuna, Jesukristuta kirishpaykic平tata yuyay illa kankichi. ¿Imaraykuta Jesukristuta katihushkaykichimanta anchorishpaykichi llullachishpa yachachihukkunata kasuhunkichi? Ñukami kankunata shutillata asirtachishpa yachachishkani, Jesukristu kruspi wañushkanrayku Yaya Dios ñukanchita uchanchikunamanta llakichishpan kastigananmanta kishpichishkanta. ²Chayrayku munani yuyarinaykichiipa kayta: Yaya Diospa Espiritunka mana Moisespa killkashkan kamachishkata kasushkaykichiraykuchu kankunapa shunkuykichiipi shamurka, ashwan Yaya Diospa shiminta uyashpaykichimi Jesukristuta kirishkaykichirayku shunkuykichiipi shamurka. ³Kankunaka yapa yuyay illami kankichi. ¿Imaraykuta mana alita asirtankichi-chu? Puntiru kirishpaykichi Yaya Diospa Espíritun yanapashpan Jesukristuka kankunata aliyachirka Yaya Diospa rikushkanpi ali kanayki-chipa. Chasna kashpanpas kunanka kankuna kikinpa rurahushkaykichillawa

munankichi ali tukunata Yaya Diospa rikushkanpi. ⁴Kankunaka Yaya Diospa atun rurashkankunata rikushkankichi Jesukristuta katihushkaykichirayku. ¿Yankamantachu chasna rikurkankichi? Mana atipanichu kirkunata yankamanta kashkanta. ⁵Yaya Dioska kankunata Espiritunta kushpan kankunapi suma mana atipaypakunata rurashpan ¿imaraykuta chasna ruran? Mana Moisespa killkashkan kamachishkata kasushkaykichiraykuchu, ashwan Jesukristupa shiminta uyashkaykichiwa-sha kirishkaykichiraykumi chasna ruran.

⁶Yuyariyichi Abrahammanta. Payka kirirka Yaya Dios tukuy rimashkanta paktachik kananta. Chayraykumi Yaya Dios payta rimarka rikushkanpi ali kananta. ⁷Chasna kashpanmi yachankichi, ñukanchipas Yaya Diospa rikushkanpi ali kananchipa payta kirinanchi tiyan. Chaypira Abrahampa mirayshina kanchi. ⁸Ñawpamanta pacha Yaya Dios yacharka kankuna mana israel runakunatapas kirishkaykichirayku paypa rikushkanpi ali tukushkaykichita rimananta. Yaya Dios chayta yachashpan Abrahamta kay ali shiminta rimarka: Kanta yanapanaynita kirishkaykirayku, ñukaka kantashina tukuy allpakanapi kirik runakunatapas yanapasha nishpa. ⁹Abraham Yaya Diosta kirishpan Yaya Dioska payta yanaparka. Chayrayku, maykanmi Jesukristuta kirkun Abraham Yaya Diosta kirishkanshina, paytaka Yaya Dioska yanapankami.

¹⁰Ashwan maykanmi Moisespa killkashkan kamachishkakunata kasushkanwa Yaya Diospa rikushkanpi ali tukunayan, paytaka Yaya Dioska kastigankami mana paktachinata atipashkanrayku. Paypa killkachishkanpi ñukanchita kasna riman:

Maykan runapas tukuy Moisespa killkashkan kamachishkakunata mana alita paktachishpa kawsashpanka paytaka kastigashami nishpa.

¹¹Nima pi atipanchu ucha illa kiparinata chay kamachishkakunata paktachinayashkanrayku. Yaya Diospa rimashkanka kasnami killkarishka kan:

Maykanmi ñukapi kirishpa sinchikurin, payllami aliyachishka kanka ñukawa wiñaypa kawsanpanpa nishpa.

¹²Moisespa killkashkan kamachishkaka manami *Kristuta kirinamantachu riman. Ashwan rimanmi, maykanmi chay kamachishkakunata alita paktachin, paymi Yaya Dioswa kawsanka nishpa.

¹³Kristu ñukanchita kishpichirka chay atun kastigumanta, maykanmantami chay kamachishkapi riman mana paktachik runakunarayku tiyananta. Ñukanchirayku yapa uchayu runashina uchanchikunarananti kruspi wañushkanwa chayta rurarka, kasna killkarishka kashkata paktachishpa:

Maykantami kaspipi warkushpankuna chaypi warkurishka wañun, chayka kanmi atunta kastigarishka nishpa.

¹⁴Chasna Kristu Jesúz tukuy runakunarayku kruspi wañushpan Yaya Dios ñawpa Abrahamta rimashkanta paktachishka. Chasna kashpanmi tukuy ñukanchi israel runakunama, kankuna mana israel runakunamapas, Yaya Dios rimashkanshina Kristuta kirishpanchi paypa Espiritunka shamunka.

**Yaya Diospa
kamachinankunamanta,
paktachinan shimikunamantapas
riman**

¹⁵Wawkikuna panikuna, yuyachishkaykichi imashnami ñukanchi runaku-

napura ruranchi. Shuk runa runa masinwa kwintashpanka ima munashkanta rurananpa, chay runaka aynima ari, rurashami nishpa. Chasnaynishpanka nima maykan runa atipanchu sakichinata mana alichu ruranaykipa nishpa. Chasnallatata nima maykan runa atipanchu rimashkamanta ashwanta rurachinata. ¹⁶Chasnashinami Yaya Dioska ñawpa Abrahamta ali paktachinan shimita rimarka imashnami payta kushichinka nishpa. Chaymantapas chay shimika paypa mirayninraykupas karka. Yaya Dios mirayki nishpa rimashpan mana rimarkachu achka mirayninkunamanta, ashwan shuklla miraymantami rimarka. Chaymi kan *Kristu. ¹⁷Kay rimashkayniwa ninayani Yaya Dios Abraham wañuta kay paktachinan shimita rimashpan kanpa miraykimantami shuk runa shamunka runakunata kishpichinanpa nishpa, mana yanka nishpa kashkanta. Chusku pachak kimsa chunka watawascha Yaya Dios Moisesta kamachishkanta kushpan chaywa Abrahamta ñawpa rimashkanta mana tukurirkachu. ¹⁸Ñukanchi Moisespa killkashkan kamachishkata kasushpanchi kishpinchimaka, mana kishpinchimachu imashnami Yaya Dios ñawpa Abrahamta rimarka: Ñuka munashpaynillami runakunata yanapasha nishpa.

**Imaraykumi Yaya Dioska
ñukanchita kamachishkanta kurka**

¹⁹Yaya Dios Abrahamta ali paktachinan shimita rimashkanraykulla yanapashpan ¿imaraykuta Moisesta kamachishkanta kurka? Chay kamachishkanta kurka runakunata riksichinampa mana payta kasuk kanankunata. Yaya Dios rimashkan Abrahammanta miraynin Jesukristu shamunankamalla chay kamachishkan-

kunata kurka. Chay Yaya Diospa kamachishkantaka *angelkunami Moisesta yachachirkakuna Moisesna runakunata chayta yachachinanpa. Chasnami Moiseska runakunata yanaparka Yaya Diospa kamachishkanta yachanankunapa.²⁰ Ñawpa Yaya Dioska Abrahamwa kwintananpa mana kacharkachu shuk angelta, nima shuk runata, ashwan pay kikinmi Abrahamwa kwintarka ñawipuramanta.

²¹ Kayka ninayanchu Moisespa killkashkan kamachishkaka Yaya Diospa rimashkanraykuka kuntranmi nishpa? Mana chasnachu. Ñukanchi Moisespa killkashkan kamachishkamanta wiñaypa kawsayta tarinchimaka, chay kamachishkata paktachishpanchi ucha illami kanchima. Ashwan manami atipanchichu paktachinata.²² Ashwan Yaya Dioska ñawpamanta pacha killkachishkanpi rimarka, tukuy runakuna uchata rurashkankunaryku tukuy uras uchata rurashpalla kawsanankunata. Yanapananmanta rimashkan ali shimitami Jesukristupi sinchikukkunallapi paktachinayarka, paypi sinchikushkunkunarykulla yanapay tukunankunapa.

²³ Manarapas Jesukristuta kirihush-panchira Moisespa killkashkan kamachishkata mana munashpanchipas paktachishpa kasunanchi karka. Imashnami shuk runa karselpi kahush-pan mana munakta tukuy kamachishka-kunata ruranan tiyan, chasnami ñukanchikunapas kawsahurkanchi, Yaya Dios ñukanchita Jesukristuta riksichinankama.²⁴ Imashnami yayankuna shuk llaktama rihushpan-kuna uchilla wawankunata kuyrananpa shuk kuyrak runata kun, mana millaypata ruranankunapa, chasnallata-tami Yayanchi Dioska ñukanchita Moisespa killkashkan kamachishkawa

kuyrarka mana millaypata rurananchipa Jesukristu shamanankama. Yaya Dioska munarka Jesukristuta kirishkanchiray-kulla ñukanchita uchanchikunamanta llakichishpan aliyachinata.²⁵ Chayrayku kunanka Yaya Dioska Wawan Jesukristuta ñukanchima kachashpan payta kirishpanchi ucha illa tukunanchipa, manana munanchichu chay ñawpa kamachinakuna shuk kuyrak-shina ñukanchita kamachinanta.

²⁶*Kristu Jesusta kirishkanchiraykumi tukuy ñukanchikuna Yaya Diospa wawankuna kanchi.²⁷ Chayta yachani Kristuta kasuk tukushkanchita rikuchishpa bawtisarishpanchimi mushu churarinata churarishkashina tukushkanchirayku Kristu kawsahush-kanshina kawsananchipa.²⁸ Chasnaka shpanchi mana imananchu israel runa mana israel runa kashpapas, patronyu runa mana patronyu runa kashpapas, kari kashpapas warmi kashpapas, mana imananchu. Kristu Jesusta kirihushkan-chiraykumi shukllashina tukushkanchi.²⁹ Kristupa runankuna kashpanchimi Abrahampa miraykunashina kanchi payshina kirihushkanchirayku. Chasnaka shpanchimi Yaya Dios Abrahamta ali paktachinan shimita rimashkanshina ñukanchipas yanapay tukushunchi.

4 ¹⁻²Wawkuna panikuna, kay rimahushkaynita asirtachishkayki-chi. Shuk kullkiyu runa wañushpan wawanmi chay tukuy imankunapa amun kan. Chasnaka shpanpas wawara kahushpanra manara atipanrachu wasinpi kamachinata. Yayan manara wañushpanra shuk kamachinan runata churama wañushkanwasha wasinpi chay wawata imankunatapas kuyrak kananpa. Chay runaka chay wakcha wawata kuyrahushpan tukuy uras payta kamachima musuyanankama. Chay wawa tukuypa amun kashpanpas

wiñanankama kamachina runashinalla kawsama. Musu tukushpanra chay wakcha wawaka yayan rimashkanshina wasinpi kamachik tukuma. ³Chasnashinami ñukanchipas chay wakcha wawa chay runanpa kamachishkanta kasushpa kawsakshina kasuna karkanchi chay yaya rukunchi wañukunapa kamachishkankunata Yaya Diospa rimashkan puncha paktarinankama. ⁴Chay rimashkan puncha paktarishpan Yaya Dioska Wawanta kay allpama kacharka. Shuk warmimanta wawayarika. Yaya Dios munashpan israel runa karka Moisespa killkashkan kamachishkakunata kasushpa kawsanarpa. ⁵Chasnami Jesukristuka ñukanchita kishpichirka chay kamachinakunapa kamachinan runakunashina kashkanchimanta, Yaya Dioska ñukanchita wawankunata rurananpa.

⁶Chasna paypa wawankuna kashpanchi Yaya Dioska paypa Espiritunta shunkunchima kacharka, maykanmi Wawan Jesukristupipas kawsarka. Chay Espiritunmi ñukanchita yuyachishpan Yaya Diosta yayayni nishpa rimanchi. ⁷Chayrayku kankunaka manana kamachirishka runakuna kankichinachu, ashwan Yaya Diospa wawankunami kankichi. Chasna paypa wawankuna kashpaykichimi pay munashpan tukuy maykanmi paypa kan, kankunapapas kan.

Pablo yapa yuyarin Galasia allpapi kawsak kirikkunaryku

⁸Ñawpaka kankuna manarapas Yaya Diosta riksishpaykichira mana kikin shuklla Yaya Diostachu ashwan yanka dioskunatami kasushpa kawsapayarkanichi. ⁹Kunanka kankunaka ña Yaya Dioswa aylluyashkankichi, ashwan alita rimashpaka Yaya Diosmi kankunawa aylluyashka. Chasna kashpaykichi

¿imaraykutaya kuti munankichi chay mana valik nima imapi yanapanata atipak yaya rukunchi wañukunapa kamachishkankunata kasushpa kawsanata? ¹⁰Shuk punchakunata, shuk killakunata, shuk watakunata shukkunamanta chikanyachishpa yuyarinkichi Yaya Diosta kushichinata. Atun tantarinanchikunawa Yaya Diosta kushichinanchi tiyan ñukanchita alita rikunarpa nishpa tantarinkichi. ¹¹Chasna yuyarishpaykichimi yapa llakirishpa yuyarini, llaktakunapi kahushpayni yankamantachari paykunata yachachirkani nishpa.

¹²Wawkikuna panikuna, ñukashina kawsaychi manana chay ñawpa kamachishkakunata kasushpa. Ñukapas kankunawa kahushpayni kankunashina tukushkani mana chay kamachishkakunata kasuk. Chay uras nima imapi mana alita rurawarkankichichu. ¹³Yuyariyichi, puntiru kankunata Jesukristu runakunata kishpichinanmanta shimita yachachishkaynita. Unkuy apiwashkan-rayku mana atipashpayni ashwan shuk llaktakunama rinata kankunapi yachachinaynipa kiparirkani. ¹⁴Chasna unkushka kashpaynipas mana asichiwarkankichichu, nima chikniwar-kankichichu. Ashwan Yaya Diospa *angeltashina alita rikuwarkankichi, Wawan Jesukristutashina munawarkankichi. ¹⁵Kunanka ¿imanashkataya kankunawa kahushkaynirayku kushilla kanaykichiha? Manana chasna alita rikuwankichinachu. Ñukaka kankunata rimani: Chay unkushkayni uras imatapas, kawsaynikichitapas kuwanayarkankichi. Chasna yapa yuyawarkankichi. ¹⁶¿Imaraykuta kunanka shutipa kashkata yachachihuskaynirayku, kuntraykichitashina rikuwahunkichi?

¹⁷Chay Moisespa killkashkan kamachishkata yachachikkunaka

kankunata yuyakshina tukushpa mana ali yuyaywa rimashpa katinahun manana rimashkaynita kasuk kanaykipcha. Paykunallata kasushpa kawsanaykichita munanahun.¹⁸ Alimi shuk runakuna kankunata rimashpa katishpankuna paykunata katinaykipcha alirayku kashpanka. Chasna kachun tukuy uras, kankunawa kahushpayni mana kankunawa kahushpaynipas.¹⁹ Wawkinikuna paninikuna, ñukaka kutikashkami achkata llakirishpayni parisihuni. Imashnami shuk warmika wiksanta nanachishpan parisin wawayanarpa, chasnallami parisishpa katinayni tiyan, *Kristu kankunapi kawsahuskanta alita rikuchinaykichikama.²⁰ Chaypi kankunawa kaynimaka, yachaynima imatami yuyarihunkichi nishpa. Chaypi shuti atipaynima alita yachachinata. Karupi kahushpaynimi mana yachanichu imatami rimashpa killkashkaykichi.

**Pablo chay ishkay warmi
Agarmanta Saramantapas shuk
yachachinata kwintan**

²¹ Uyaychi kunan rimahushkaynita. Kankuna chay Moisespa killkashkan kamachishkata kasushpa kawsanaykuna ¿manachu yachankichi chay Moisespa killkashkanpi rimashkanta?
²² Chay killkashkanpika kasnami riman: Abrahamka ishkay wawayu karka, shukka kamachinarpa rantishkan warmi Agarmanta, shukka kikin warmin Saramanta, maykanmi mana rantishkanchu kashka paypa kamachinan kananpa.
²³ Chay Abrahampa kamachinan warmi paymanta chichurka shipas kashpan chichunata atipashkanrayku. Chay mana rantishkan kikin warminta Abrahamka chichuchirka paya kashpanpas Yaya Dios rimashkanta paktachishpa yanapashkanraykulla.

²⁴⁻²⁵ Chay ishkay warmikunaka ñukanchita yuyachin imashnami Yaya Dioska ñukanchita yanapanayan. Chay ishkay warmikunatashina Yaya Dioska ishkay rimashkan shiminwa ñukanchita yanaparka. Shuk rimashkan shiminwa Moisespa killkashkanmi, shuk mushu rimashkan shiminwa kanmi Jesukristuta kirishpa kishpina. Chay puntiru rimashkan shimintaka Yaya Dioska Moisesta Arabia allpapi Sinaí urkupi kurka. Chay Moisespa killkashkanta kasuk runakuna Abrahampa kamachinan warmi Agarshinami kanahun. Chay kamachinan warmika Sarata kasushpa kawsarka. Chasnami kunankama ñukanchi israel runakunamanta Jerusalén llaktapi kawsakkuna Moisespa killkashkanta kasushpa kawsahushpankuna Agarpa wawankunashina kanahun kamachirishka runakuna.

²⁶ Ñukanchi Yaya Diospa wawankuna kashpanchi chay silipi mushu Jerusalenpi Yaya Dioswa kawsana kanchi. Chasna kashpan chay mana rantishkan Abrahampa kikin warmin Sarapa wawankunashina kanchi, manana kamachina runashinachu kawsanchi.²⁷ Ñawpa Yaya Diospa yachaynina yachachik Isaiaska kasna killkarka:

Machura warmi kushikuy, mana
wawayu kashpaykipas.

Mana wawayana nanayta riksik
kashpayki kushikushpa
kapariy.

Kusaykimanta sakiy tukushka
kashpaykipas miraykikunaka
ashwan achka kankakuna chay
kusana kawsak warmimanta
nishpa.

[Chasnami Abrahampa kikin warmin Sara shutiyuka tururka. Machura kashpanpas wawayarka Isaakta, Yaya Dios ñawpa Abrahama rimashkanshina.

Kaytapas Yaya Dioska rimarka: Chay wawayki Isaakmantaka achka runakunamirankakuna nishpa.]

²⁸Kunanka wawkikuna panikuna, imashnami Sarapa wawan Isaak tiyarka Yaya Dios rimashkanraykulla, chasnashinami ūukanchipas Yaya Dios rimashkanraykulla paypa wawankuna kanchi.

²⁹Ñawpa chay Abraham wañupa kamachinan warmipa wawan runa munashkanrayku tukushkaka chiknipayarka chay Abraham kikinpa warmin Sarapa wawan Isaakta Yaya Dios yanapashkanrayku tukushkata. Chasnashinami kunankama Moisespa killkashkan kamachishkata kasushpankuna kamachirishkashina kawsak runakuna ūukanchi Yaya Dios yanapashkanrayku kirik tukushkakunata chiknahun.

³⁰Kunanka ñimatata Yaya Diospa killkachishkanpi ūukanchita yachachin? Kasnami Yaya Dioska Abrahamta rimarka:

Chay kamachinayki warmita wawanwa pakta llukshichiy. Wañushpaykika chay wawaka manami atipankachu apanata sakishkaykita chay shuk wawaykiwa pakta. Ashwan kikin warmikimanta wawayki Isaakllami apanka tukuy sakishkaykitaka nishpa.

[Chasnashinami ūukanchipas Moisespa killkashkan kamachishkata paktachinayashpa kawsahushkanchita sakinanchitiyan, Yaya Dios ūukanchita Isaakta-shina yanapanata munahushkanrayku paypa wawankuna kananchipa.]

³¹Wawkikuna panikuna, ūukanchi manami kanchichu chay kamachirishka kawsak warmipa wawankunashina Moisespa killkashkan kamachishkakunata kasukkuna. Ashwan chay mana rantishkan warmipa wawankunashinami kanchi nima pipa kamachinankuna.

Pabloka yachachin Jesukristuta kasushpalla kawsanamanta

5 ¹*Kristuka ūukanchicha kishpichishka manana shuk kamachirishka runashina kawsananchipa. Chayrayku chay Moisespa killkashkan kamachishkakunata kasunata munak runakunataka ama kasuchichu. Ama munaychichu kutikashka shuk kamachirishka runashina chay kamachishkakunata kasushpa kawsanata.

²Chay runakunaka munanahunmi kankuna Moisespa killkashkanta kasushpa ishpanaykichi kara puntata pitichishpaykichi paykunashina kanaykicipa. Alita uyawaychi, ūuka Yaya Diospa kachashkan kashpayni kankunata rimani: Moisespa killkashkan kamachishkakunata paktachishpa kishpichirinayashpaykichika Kristu kankunaryku wañushkanka yankami kama. ³Kutikashka rimashkaykichi, maykankunami Moisespa killkashkan kamachishkata kasushpa ishpanan kara puntata pitichinayanahun, paykunaka tukuy chay kamachishkatami paktachishpalla kawsanankuna tiyan Yaya Diospa rikushkanpi ali kanankunapa. ⁴Chay kamachishkata kasushpa kawsashkaykichiwa Yaya Diospa rikushkanpi ali kanayashpaykichimi manana Kristuta kirishpanachu kawsahunkichi. Manana munankichinachu Yaya Dios kankunata llakichishpan kishpichinanta. ⁵Ashwan ūukanchika Kristullapi sincikushpanchimi Yaya Diospa Espiritunwa pakta kawsanchi. Chayrayku chapanchi Yaya Dios ūukanchita Jesukristuranti aliyachishkanrayku paypa kawsanansi yaykuchinanta. ⁶Kristu Jesuswa pakta kawsashpanchi mana imananchu ishpananchi kara puntata pitirishka, mana pitirishka

kashpanchipas. Paypi sinchikunallami ali kan. Chasna paypi sinchikushpa kawsashpanchimi shukwa shukwa yuyanakushpa kawsanchi.

⁷Puntiru kankuna Kristupi alita sinchikushpa kawsahurkankichi. Kunanka ɿpitaya kankunata arkaška shutipa kashkata yachachishkaynita manana kasunayanaykichipa? ⁸Chayka manami kashkachu kankunata kayak Yaya Dios, maykanmi shuktana kirichishka. ⁹Yuyariyichi, uchillastu urtika tukuyta urtiyachin. Chasnash-nami pantachichik runakunaka. ¹⁰Ñukaka kirini Amunchi Jesukristuwa shukllashina tukushkanchirayku mana shuktana kirik tukunaykichita. Chay pantachichik runakunata Yaya Dioska kastigankami, mana imananchu maykanpas kachun.

¹¹Wawkikuna panikuna, ñuka kunankama kankunata yachachinimaka ishpananchi kara puntata pitinamanta kishpishka kananchipa, chay Moisespa killkashkan kamachishkata yachachik-kunaka manami chikniwanahumachu. Chasna yachachinimaka Jesukristu kruspi wañushkanrayku Yaya Dios shunkunchita aliyahishkanta yachachi-hushkaynimanta nima pi ashwan piñarinahumachu. ¹²Chay kankunata killachik runakuna yapa munashpan-kuna ishpana kara puntata pitichinata sukama llampu pitichinahumaya.

¹³Wawkikuna panikuna, Yaya Dioska ñukanchita kishpichishka manana chay ñawpa kasushkanchita katishpalla kamachirishkashina kawsananchipa. Chasna kishpichirishka kashpanchipas ama yuyariyichihu, kunanka atipanchi ñukanchi kikinpa munananchikunata rurashpa kawsanata nishpa. Ashwan Yaya Dioska munan shukwa shukwa yanapanakushpa yuyanakushpa kawsanaykichipa. ¹⁴Yaya Dios

killkachishkanpi riman: Runa masikita kan kikintashina yuyay nishpa. Chasna kawsashpaykichimi tukuy Yaya Diospa kamachishkanta paktachinkichi.

¹⁵Kankunapura kaninakuk mikunakuk piña animalkunashina kawsashpayki-chika yuyariyichi chasnaka tukurinki-chimi.

Yaya Diospa Espiritunta kasushpa kawsanamanta yachachin

¹⁶Wawkikuna panikuna, alita rimash-kaykichi: Yaya Diospa Espiritunta alita kasushpa kawsaychi. Chasna kawsash-paykichika manana kankuna kikin munashkata rurashpa kawsankichinachu. ¹⁷Kankuna kikin munashkaykichita rurashpa kawsashpaykichika mana atipankichichu Yaya Diospa Espiritunta kasushpa kawsanata. Yaya Diospa Espiritunta kasushpa kawsashpayki-chika mana atipankichichu kankuna kikin munashkaykichita rurashpa kawsanata. Chasna kashpanmi kankuna kikin munashkaykichita rurashpa kawsashpaykichika manami atipanki-chichu alita ruranata, imashnami munankichi. ¹⁸Ashwan Yaya Diospa Espiritun kankunata yuyachishpanka manami kamachirishkashinachu kamachishkakunata kasushpa kawsankichi.

¹⁹⁻²⁰Runakuna paykuna kikin munash-kankunata rurashpa kawsashpankuna kaykunatami rikunchi: Tukuywa musayana, aychankunawa millanayaypa ruranakuna, musyanankunata yapa kasushpa kawsana, yanka dioskunata mañana chaymanta kushichina, supaykunata kayashpa ruranakuna, chikninakushpa rimanakushpa piñanakushpa kawsana, runa masinkunawa parihuyanata munana, shukkunamanta pasa kanayana, manana shuk yuyayllawa kawsana, chikninakushpa chikan chikan muntun tukuna.

²¹Chaymantapas runa masinkunapa imankunata munarina, machashpa kawsana, achkata mikushpalla kawsana, ashwan shuk chasna mana alikunata rurashpalla kawsana. Ñawpa kankunata rimashkaynita kutikashka rimashkayki-chi: Tukuy chasna rurashpa kawsak runakunaka manami atipankakunachu Yaya Diospa kamachinan mushu munduma paywa pakta kawsak rinata.

²²Ashwan Yaya Diospa Espiritunta kasushpa kawsashpanchika shukwa shukwa yuyanakushpa, kushikushpa, mana piñanakushpa, ali yuyaywa kahushkanchipi mana sampayashpa, ali shunkuwa, shukta shukta yanapashpa, rimashkanchita paktachishpa kawsanchi. ²³Runa masinchikunata llakichishpa kawsanchi, manana chasnallachu aychanchipa munashkanta ruranchi. Chasna alita rurashpa kawsashpanchi nima pi atipankachu rimanata mana alitachu rurahunki nishpa.

²⁴Tukuy ñukanchi Jesukristupa runankuna manana ñukanchi kikinpa munashkanchita rurashpa kawsanchinachu. Ñawpa kashkanchika tukuy mana ali munananchiwa paywa pakta kruspi klabarishpa wañushkashina tukushka.

²⁵Kunanka Yaya Diospa Espíritun ñukanchita yuyachishpan akuychi munashkanllata rurashpa kawsashunchi. ²⁶Manana ñukanchi kikinta atunyachinayashpa kawsashunchichu. Ama shukkunamanta pasa tukunayashpa kawsashunchichu. Ama runa masinchipa imankunata munarishpa, nima paykunawa parihuyayanayashpa kawsashunchichu.

Shukwa shukwa yanapanakushpa kawsanamanta yachachin

6 ¹Wawkikuna panikuna, shuk kirik masikichi millaypata rurashpanka kankuna alita Yaya Diosta kasuk

kashpaykichi chay mana alita rurahukta yanapaychi mana ashwanta millaypata rurananpa. Alita yuyashpa yanapaychi payta. Chasna kirik masikichita yanapashpaykichi alita kuyrariyichi mana kankunapas shuk millaypata ruranaykichipa. ²Shuk kirik masikichi llashawashina parisihukta rikushpaykichi yanapaychi sinchikurishpa kawsanarpa. Chasna shukwa shukwa yanapanakushpaykichimi *Kristu yuyanakunanchipa rimashkanta kasuhunkichi.

³Kankuna shukkunamanta pasa kanaykichita yuyarishpaykichika mana kashpaykichipas kankuna kikimmi llullachirihunkichi. ⁴Chayrayku ñukanchi kikinllapa rurananchikunata yuyarishunchi, alitachu manachu rurahunchi nishpa. Alita rurashpanchika atipanchi kushikunata. Mana kushikushunchichu rurashkanchika shukkunapa rurashkankunamanta ashwan alimi nishpa. ⁵Karan shukpami pay kikinpa ruranan kashkaka tiyan, maykanmanti tapuy tukushunchi.

⁶Tukuy Yaya Diospa suma ali shiminta kankunata yachachikkunata yanapanaykichi tiyan mana iman pishinanpa.

⁷Ama kankuna kikin llullachiriyichi-chu alitami Yaya Diosta katihuni nishpa, mana chasna kashpanka. Nima pi atipanchu Yaya Diosta pukllachinata. Maykan runapas mana alita rurashpa kawsashpanka rurashkanmanta parisinan tiyan. Imatami tarpunchi, chayllatami pallanchi. ⁸Shuk suliman tuyuta tarpunchimaka, suliman tuyullatatami pallanchima. Chasnashinami mana alita rurashpa kawsashpanchika wiñaypa kastigarishka kashunchi. Chaymanta shuk ali tuyuta tarpunchimaka, ali tuyullatata pallanchima. Chasnashinami alita Yaya Diospa

Espiritunta kasushpa kawsashpanchika wiñaypa Yaya Dioswa kawsashunchi.

⁹Chayrayku mana sampayashunchi-chu alita rurashpa kawsanata. Chasna mana sampayashpa alita rurashpa kawsashpanchimi Yaya Dioska munashkan uras ñukanchita alita kushichinka. ¹⁰Chayrayku maypipas runa masinchikunata atipashkanchiwa yanapashunchi. Shukkunamanta ashwanta tukuy Yaya Diosta kasuk masinchikunata yanapashpa kawsashunchi.

**Pabloka kirik masinkunata
saludashpa kay kartata tukuchin**

¹¹Rikuychi, ñuka kikin makinwami atun letrakunawa killkashpa kay kartata tukuchihuni. ¹²Chay kankunata ishpanaykichi kara puntata pitichinayki-chi tiyan nishpa rimak runakunaka chayta rurachinayanahun runakunapa rikushkampi ali kanankunallapa. Mana munanahunchu, *Kristu wañushkan-rayku Yaya Dios ñukanchita llakichish-kanta yachachishpankuna ñukanchi israel runakunamanta paykunata parisichinankunata. ¹³Nima paykuna kikin pitirishka kashpankunapas tukuy Moisespa killkashkan kamachishkakunata kasunahunchu. Ashwan ishpanaykichi kara puntata pitichinaynanahun paykuna kikinta atunyachirinankunapa, tukuy runakuna yuyarishpankuna paykuna yachachishkankunaryakuumi chasna ruranahun nishpa.

¹⁴Ñukaka mana paykunashina runakunapa rikushkankunapi ñuka kikinta atunyachirinayanichu. Ashwan Amunchi Jesukristu kruspi wañushkan-raykulla, Yaya Dios ñukanchita llakichishkantami yachachihuni.

Chayllatami yachachini. Jesukristu kruspi wañushkanrayku kishpichiy tukushpayni manana Yaya Diosta mana riksikkunashina rurashpa kawsanichu. Runakunapa yuyarishkan ñawpa kasushkayni yachachishkakunaka kirinakunaka manana atipawanahunchu kamachinata. Chaykunaryku wañushkashina tukushkani, manana nima imapi kasuk. ¹⁵Chasna kashpan mana imananchu ishpanan kara puntata pitishka runa, mana pitishka runa kashpanchipas. Maykantami shuti munanchi, chayka kan Yaya Dios ñukanchita llakichish- pan mushu runata rurananta. ¹⁶Kankuna chay ali yachachishkaynita alita kasushpa kawsashpaykichika Yaya Diospa akllashkan runankuna kankichi. Chasna Yaya Diospa wawankuna kashpaykichi payka kankunata yuyashpan llakichishpan yanapachun, kushilla kawsanaykipa.

¹⁷Jesukristumanta yachachishkaynirayku, chikniwak runakuna achkata makawashpankuna aychaynika litra litra kahun. Chasna rikuchini, Jesús ñukata yachachinaynipa kachawashpan shutipa payta kasuk kanaynita. Chayrayku mana munanichu nima pi yachachishkaynirayku ashwanta parisichiwananta.

¹⁸Wawkinikuna paninikuna, Amunchi Jesukristu kankunata llakichishpan munashkanta karan shuk kankunapi paktachichun. Chasna kachun.

Chayllata killkashkani.

Wawkikichi turikichi
Pablo

PABLOPA KILLKASHKAN KILLKA EFESO LLAKTAPI JESUKRISTUTA KIRIKKUNARAYKU

**Pablo Efeso llaktapi kawsak
Jesukristuta kirikkunata saludan**

1 ¹Munashkayni wawkinikuna paninikuna, ñuka kani Pablo, Yaya Dios munashpan Jesukristupa *apostol-nin tukushkani. Kankuna Efeso llaktapi kawsakkunaka Yaya Diospa akllashkan runankunami kankichi, *Kristu Jesusta katik tukushkaykichirayku. Kankunaryku kay kartata killkahuni. ²Yayanchi Dios, Amunchi Jesukristupas kankunata llakichishpan yanapanahuchun kushilla kawsanaykichipa.

**Pablo yachachin imashnami Yaya
Dios ñukanchita yanapan nishpa**

³Ñukanchikuna *Kristuwa pakta kawsahushpanchi payka ñukanchita kushichishpan Espiritunwa tukuy imapi yanapan. Chayrayku akuychi kushichi-shunchi silipi kawsak Amunchi Jesukristupa Yayan Diosta. ⁴⁻⁵Yaya Dios manara kay allpata rurahushpanra ñukanchita yuyashpan yuyarirka Jesukristuta kachamunanta, ñukanchi paywa tantaylla kawsananchipa. Chayta yuyarishpa ñukanchita akllashka, payllata kasushpa, ucha illa kawsananchipa. Yaya Dios ñukanchita yuyashpan yapa munashka paypa wawankuna kananchipa. Chasna kashpan

Jesukristuta kachamurka uchanchikunanti wañunanpa, ñukanchikunata munashkanshina kikin wawankunata rurananpa. ⁶Chasna ñukanchita rurarka payta kushichishpa kawsananchipa, ñukanchita yuyashpa llakichishkanka yapa suma kashkanrayku. Yapa ali shunku kashpan yuyashkan Wawan Jesukristuta kachamurka ñukanchita yanapananpa. ⁷Wawan kruspi wañushpan yawarnin shuturishkanrayku Yaya Dioska ñukanchita uchanchikunamanta llakichishpan kastigananmanta kishpichishka. Chasna rurashpan ñukanchita rikuchirka imashna atunmi ñukanchita yuyananka kan. ⁸Yachay-ninta yuyaynintapas ñukanchita kushpan yapa yuyananta riksichirka. ⁹⁻¹⁰Ñawpamanta pacha Yaya Dios munarka Wawan Jesukristuta kay allpama kachanata, munashkan puncha paktarishpan tukuy silipi allpapi kawsahukkunata tantachinanpa, Kristullata kasushpa kawsanankunapa. Chasnami tukuy chay munashkanta paktachinka. Ñawpa manara chayta ñukanchita riksichirkarachu, kunan ña riksichishka.

¹¹Ñawpamanta pacha Yaya Dioska munarka ñukanchikuna Wawan Kristuwa pakta kawsananchita. Chasna Kristuwa pakta kawsahushpanchimi

Yaya Dioska tukuy ima kunayahushkan-kunata kuy tukushunchi. Yaya Dios tukuy paypa munashkanta rurak kashpanmi tukuy yuyarishkanta paktachinka.¹² Kunan munanmi ñukanchi puntiru Kristuta kirikkuna payta kushichishpa kawsananchipa, yapa ali atun kashkanrayku.¹³ Yaya Dios munashpanmi kankunapas paypa shutipa rimashkanta uyashkankichi paypa suma ali shiminta Jesukristu ñukanchita kishpichishkanmanta. Chasna kankuna Kristupi kirishpaykichi payta kasuk tukushkankichi. Chasna kahushpaykichimi Yaya Dioska rimashkanshina Espiritunta kankunata kushka yachanaykichipa Amuykichi kananta.¹⁴ Chasna Yaya Diospa Espíritun shunkunchipi kashpanmi alita yachanchi Yaya Dios tukuy chay ñukanchita kunayashkanta shutipa kunanta. Chasna kashpanmi yachanchi ñukanchi paypa wawankunata kishpichihushkanta alita paktachinanta ñukanchi payta kushichishpa kawsananchipa yapa ali atun kashkanrayku.

**Pablo Yaya Diosta mañan tukuy
kirikkunarayku**

¹⁵⁻¹⁶ Chayrayku kankuna Amunchi Jesusta kirishkaykichita, tukuy kirik masikichiwa yuyanakushpa kawsahushkaykichita yachashpayni mañahushkaynippi kankunata yuyarishpa tukuy uras Yaya Diosta kankunaryku agradesini.¹⁷ Amunchi Jesukristupa Yayan Diosta, yapa ali atun yachayyu Yayanchi kashpan payta mañani kankunata yachayta kunanpa, chaymantapas alita riksichinarpa imashnami payka kan nishpa.

¹⁸ Chaymanta Yaya Diosta mañani yuyaynikichita paskachinarpa, alita asirtanaykichipa imashna ali tukunaykicha chapashpa kahunkichi, Yaya Dios

kankunata kayashkanrayku. Chaymantapas mañani asirtanaykichipa imashna tukuy ima riksishkanchimanta pasami yapa suma ali Yaya Dios kankunata kunayashkanka tukuy ñukanchi payta kasuk masikichikunawa pakta.¹⁹ Yaya Diosta mañani yachanaykichipa imashna tukuy manta pasa atunmi paypa atipayninka, maykantami ñukanchi payta kirikkunapi rurashkanwa rikuchin.²⁰ Chay atipaynillatata Yaya Dios rikuchirka *Kristuta wañushkamanta kawsachishpan kawsanan silipi kuskaynin parti tiyachishpan tukuya kamachik kananpa.²¹ Tukuy apukuna, tukuy kamachikkuna, *angelkuna, supaykuna, tukuy tiyakkunapas kunan kay mundupi chaymanta mushu mundupipas wiñaypa kanta kasunankuna tiyan nishpa Yaya Dioska Kristuta tukuy manta pasa kananpa churarka.²² Payta tukuy imata kushpan payna kamachinarpa rimarka. Payta churarka tukuy ñukanchi kirikkunapa umanchishina kananpa, payta alita kasushpa kawsananchipa.²³ Jesukristu umanchishina kashpanmi paypa aychanshina kanchi. Pay tukuy tiyashkata kuyrak ñukanchipi kawsahun tukuy atipayninta ali kananta rikuchishpa.

**Yaya Dios ñukanchita yuyashpan
kishpichin**

2 ¹ Ñawpa kankuna Yaya Diosta mana kasushpa, uchakunata rurashpa kawsapayarkankichi. Chasna nima imapi Yaya Diosta kasushpaykichi payraykuka wañushkashinami karkankichi.² Chasna uchakunata rurashpa kawsahushpaykichimi Yaya Diosta mana kasuk runakunapa ruranankunalla rurashpa kawsapayarkankichi. Supaykunapa apupa munashkanllata rurapayarkankichi. Payka kunankama tukuy Yaya Diosta mana kasuk runaku-

natami millaypata yuyachishpa rurachin. ³Chasnami ñukanchikunapas ñawpa mana ali rurak runakuna kapayarkanchi, tukuy mana ali munashkanchikunata rurashpa kawsapayarkanchi. Wawayarishkanchimanta pacha tukuy mana ali yuyayinchikunallata kasushpa kawsapayarkanchi. Chasna kawsashkanchimantami Yaya Dioska ñukanchita chay tukuy payta mana kasuk runakunatashina yapa sinchita kastiganan karka.

⁴Chasna kashpanpas payka yapa ñukanchita yuyashkanrayku atunta llakichin. ⁵Yaya Diosta mana kasushpa kawsashkanchirayku wañushkashina karkanchi. Chasna kashkanchimanta Yaya Dioska ñukanchita kishpichirka Wawan *Kristuwa pakta wañushkamanta kawsachishkanshina paywa parihu kawsananchipa. Yaya Dios munashpanlla uchanchikunamanta llakichishpa ñukanchita kishpichishka. ⁶Yaya Dioska Kristu Jesusta wañushkamanta kawsachishkanshinami ñukanchikunatapas wañushkashina kashkanchimanta kawsachishka. Chaymantapas Kristu Jesuswa shukllashina tukushkanchirayku kay allpapi kawsahushpanchispas paywa pakta silipi tiyachiy tukushkatashina rurarka Kristuwa pakta tukuyta winsik kananchipa. ⁷Chayta rurashka wiñayparayku rikuchinanpa imashna tukuy ima riksishkanchimanta pasami ñukanchita yuyashpa llakichishkanka. Ñukanchita yapa yuyahushkanta Kristu Jesusta kachashkanwa rikuchishkanta tukuy runakunata riksichinka.

⁸Yaya Dioska ñukanchita yapa munashpan payta kirishpanchi kishpichiy tukushkanchi. Mana ñukanchi kikin munashkanchiraykuchu kishpichiy tukushkanchi. Ashwan Yaya Dios munashpanllami ñukanchita llakichishpan kishpichishka. ⁹Yaya Dios

mana ñukanchita kishpichishkachu alita rurashkanchirayku. Payka mana munanchu nima pi pay kikinta atunyachirishpa rimanata, alita rurashkayniraykumi Yaya Dioska kishpichiwashka nishpa.

¹⁰Yaya Dios ñukanchita rurarka imashna kunan kanchi. Kristu Jesuswa ñukanchita mushu runakunata rurarka alikunata rurashpa kawsananchipa. Ñawpamanta pacha Yaya Dios munashpan alikunata rurashpa kawsananchipa, chay ali ruranakunatapas ñami rurarka ñukanchi chayta rurashpa kawsananchipa.

**Jesukristu wañushkanrayku tukuy
paypi sinchikkuna shuk
ayllushinalla kanchi**

¹¹Yuyariyichi pikunami kapayarkankichi. Yaya Diosta mana riksik runakunamanta miraykuna kashpaykichi israel masinikunapa mana valichishkankuna kapayarkankichi, ishpana kara puntata mana pitichishkankunaryku Yaya Diospa chiknishkan runakuna nishpa rimashkankuna. Paykuna shuti yuyarinahun Yaya Diospa runankuna kanankunata, ishpanankuna kara puntata pitichishkankunaryku, runapa aychanllapi rurashka kashpanpas.

¹²Alita yuyariyichi Jesukristuta ñawpa mana kasushpa kawsashkaykichita. Yaya Diospa mana runankuna kashpaykichi ñukanchi israel runakunamanta anchurishka karkankichi. Yaya Diospa kamachishkanka, chaymanta pay ñukanchita kishpichinanpa rimashkanka mana kankunarykuchu karka. Mana kankunatachu kamachishkankunata kurka, nima kankunatachu rimarka shuk kishpichik shamunanta. Nima ima ali kankunata pasananta yachashpachu kawsapayarkankichi. Manami Yaya Dioswachu kawsapayarkankichi tukuy mana alikunata rurashpa. ¹³Ashwan

*Kristu Jesúś wañushpan yawarnin shuturishkanraykumi kankunaka paywa pakta kawsak tukushkankichi. Yaya Diosta ñawpa mana kirishpaykichipas kunanka ña paywa pakta kawsahunkichi. ¹⁴Kristu tukuy ñukanchirayku wañushpan yanaparka kushilla manana piñanakushpa kawsananchipa.

Ñukanchi israel runakunata, kankuna mana israel runakunatapas tantachirka paywa pakta shuk yuyayllawa shuk ayllushinalla kawsananchipa. Chasna ñukanchita yanaparka manana kuntrakunashina kawsananchipa.

¹⁵Kristu wañushkanraykumi ñukanchita kishpichishka, manami Moisespa killkashkan kamachishkakunata paktachishkanchiraykuchu. Kristu wañushkanraykumi paywa tantaylla kawsanchi. Mana ishkay ayllushinachu kanchi ñukanchi israel runakuna kankuna mana israel runakunawa, ashwan shuk ayllushinalla kanchi. Chasna paywa pakta kawsashpanchimi mana piñanakushpa kushilla kawsanchi. ¹⁶Kruspi wañushkanraykumi Kristuka ñukanchi israel runakuna kankuna mana israel runakunawa chikinakuk kashkanchita aliyachishka, Yaya Dioswa alita kushilla shuk ayllushinalla kawsananchipa.

¹⁷Kristumi kay allpama shamushpan tukuy ñukanchi israel runakunata, kankuna mana israel runakunatapas yachachirka shuk yuyayllawa kawsanata. ¹⁸Pay wañushkanraykumi Yaya Diospa Espíritun ñukanchita yanapashpan ñukanchi israel runakuna, kankuna mana israel runakunapas atipanchi Yaya Dioswa pakta kawsanata. ¹⁹Chayrayku kunanka kankuna mana israel runakunamanta Jesukristuta kirikkuna kashpaykichi manana ñukanchi Yaya Diosta kasuk israel runakunamanta chikannachu

kankichi. Manana kankichichu Yaya Dioswa mana kawsakkuna. Ashwan tukuy payta kasukkunawa parihu Yaya Dioswa pakta kawsakkuna kankichi, paypa kikin ayllunkuna.

²⁰Tukuy ñukanchikunami rumikunamanta Yaya Diosrayku rurarishka wasishina kanchi. Yaya Diospa yachayninwa ñawpa yachachikkuna, Jesukristupa *apostolinkunapas chay suma wasipi churashka tukuy rumikunata sinchikuchik rumikunashinami kanahun. Jesukristuka tukuy chay sinchikuchik rumikunamanta ashwan sinchikuchik rumishinami kan. ²¹Yaya Dios ñukanchita Jesukristuwa tantachishpan paypa wasinraykushina rurahun. Kristupi sinchikushpa rihunchi Yaya Dios chay wasinraykushina rurahushkanta sumakta tukuchinan-kama. Pay chaypi kawsanarpa kashpanmi nima ima mana ali tiyankachu. ²²Kankunapas chay wasirayku rumikunashina kashpaykichi Yaya Dioska chay wasinraykushina rurahush-kanpi churahun, tukuy ñukanchiwa parihu tantanakushka kawsanaykichipa. Chasna tantanakushka kawsahushpan-chimi Yaya Diospa Espíritun tukuy ñukanchipi kawsahushpan Yaya Diospa wasinshina kanchi.

**Yaya Dios Pablotá kacharka mana
israel runakunata yachachinanpa**

3 ¹Wawkikuna panikuna, *Kristu Jesuska ñukata kamachiwashka kankuna mana israel runakunata paypa shiminta yachachinaynipa. Chasna kankunata Kristu Jesusmanta yachachishkaynirayku karselpi churawashkakuna. ²Kankunaka ñami yachankichi, Yaya Dios yapa ali shunku kashpan ñukata kachawashkanta kankuna mana israel runakunata yachachinaynipa. ³Yaya Dios kankuna-

tapas ñukanchiwa pakta runankunata rurananta ñawpa manara yachashkanchita pay kikinmi kunan riksichiwashka, imashnami ña kankunaryku mana achka shimikunawa killkashkani. ⁴Chay killkashkaynita leyishpaykichi ña yachankichi chay ñawpa manara yachashkanchita Kristu rurashkanmanta Yaya Dios alita asirtachiwashkanta.

⁵Ñawpa Yaya Dioska manara nima pita chay rurananta riksichirkarachu.

Kunanka Espiritunwami ña chay suma rimashkanta payllata kasuk *apostolinkunata, paypa yachayninwa yachachik-kunatapas riksichishka. ⁶Kaymi chay ñawpa manara yachashkanchika: Tukuy kankuna mana israel runakuna paypa suma ali shimita uyashkaykichimanta Kristu Jesusta kirishpaykichi ñukanchi israel runakunamanta Kristuta kirikkunawa pakta Yaya Diospa wawankuna kankichi. Chasna tukuy Kristu Jesusta kirik runakuna shuk aychashinalla kanchi. Chaymanta Yaya Dios ñukanchi israel runakunata kunanpa rimashkanta kankuna mana israel runakunatapas kunkami.

⁷Chay suma ali shimita yachachik tukushkani. Yaya Dioska tukuya atipak kashpan yapa yuyawashpan akllawashka chay shimita yachachik kanaynipa. ⁸Ñuka tukuy Yaya Diosta kasukkunamanta ashwan mana llakichiy tukunapa valiktami Yaya Dioska yachayninwa yanapawashka suma ali shimita kankuna mana israel runakunata yachachinaynipa, Kristu ñukanchita mana yuyariypa tukuy ima riksishkanchimanta pasata kunayash-kanmanta. ⁹Tukuya rurak Yaya Dioska tukuy imata rurashkanmanta pachami yuyarirka kankuna mana israel runakunatapas kishpichinata. Chasna yuyarishpanpas manara nima maykanta rimarkarachu paypa suma ali yuyayninta.

Kunanka ñukata akllawashpan kamachiwashka chay yuyayninta riksichinay-nipa.

¹⁰Kunanka Jesukristu wañushkan-manta kawsarimushkanraykumi achka ñukanchi israel runakuna, kankuna mana israel runakunapas Yaya Diostana kasushpa kawsahunchi. Jesukristuta tantaylla kirishpa kawsahushkanchi-mantami tukuy wayrapi kawsak atun yachayyu *angelkuna, supaykunapas yachankakuna imashna ali atun yachay-yumi Yaya Dioska, achka chikanta rurahushkanwa rikuchishpan.

¹¹Manara nima ima tiyahushpanra Yaya Dioska ña yuyarirka ñukanchi kirikkunawa atun yachayyu kananta rikuchinampa. Kunanka ñami chayta paktachishka. Amunchi Jesukristuta wañushkanmanta kawsachishpan tukuy paypi sinchikuk runakunata kishpichishpa shukllatashina rurarka.

¹²Chasna Kristuwa shukllashina tukushkanchiraykumi paypi sinchikushpa kawsahushpanchi atipanchi kushikushpa mana manchashpa Yaya Dioswa kwintanata.

¹³Chayrayku kankunata mañashkayki-chi, Jesukristumanta kankunata yachachishkaynirayku parisihushkay-nita rikushpaykichipas ama sakiychichu payta kirishpalla kawsanata. Chay parisinaynika alimi kan kankunaryku, chayrayku kushikuychilla.

**Pablo Yaya Diosta mañan kirikkuna
asirtanankunapa Jesukristu yapa
paykunata yuyahushkanta**

¹⁴Kankuna ashwanta sinchikurinaykipa Yayanchi Diospa puntanpi kunkurishpa mañani kankunata yanapananpa. ¹⁵Payka tukuy allpapi silipi kawsakkunapa amun kashpan karan chikan munton kawsakkunaka paymanta apinahun kikin kanankunata.

¹⁶Atun yachayyu yapa ali kashpan payta mañahuni mana tukuchiypa alikunata charishkanmanta kushpa Espiritunwa shunkuykichipi kankunata sinchikuchinanpa, alita paywa pakta kawsanaykipa. ¹⁷Chaymanta mañahuni, *Kristuta kirishkaykichirayku payka shunkuykichipi kawsanapta. Mañahunimi pay kankunata yuyahushkanta yachashpaykichi tukuy ruranaykichi yuyarinaykichi kananpa Kristuta runa masikichikunatapas yuyahushkaykipa. ¹⁸Mañahuni chasna yuyakkuna tukunaykipa, tukuy ñukanchi Amunchi Kristuta kirik masikichikunawa pakta yachakunaykipa imashna atunmi Kristu kankunata yuyahushkanka tukuy uras maypi kashpaykipas. ¹⁹Mana atipashpanchipas alita asirtanata imashna atunmi paypa yuyahushkanka, mañahuni ñukanchita yuyahushkanta sumakta riksinykipa, Yaya Dios kankunapi kawsashpan tukuypi yuyachik kananpa.

²⁰Payka mañananchikunamanta yuyarinanchikunamanta yapa pasata ñukanchita atipan yanapanata. Ñukanchipi rurahushkanwa rikuchishkan atipayninka yapa atunmi. ²¹Akuychi tukuy Kristu Jesusta kirik runakuna tantaylla kushikushpa tukuy uras wiñayparayku Yaya Diosta atunyachishpa kushichishunchi. Chasna kachun.

Yaya Diospa Espíritun ñukanchita yanapashpan parihu yuyanakushpa kawsanchi

4 ¹Jesukristu ñukanchita kishpichishkanmanta yachachishkaymiraykumi karselpi churawashkakuna. Chasna Amunchi Jesukristuranti karselpi kahushpayni kankunata kunahuni alita rurashpa kawsanaykipa. Yaya Diosmi kankunata akllashka paypa wawankuna

kanaykipa. Chayrayku paypa wawan-kunashina alita rurashpa kawsaychi.

²Shukkunamanta mana atunyanya-yashpa, runa masikichikunata llakichishpa kawsaychi. Shukwa shukwa yuyanakushpa mana sampayashpa ali yuyaywa awantanakuychi. ³Yaya Diospa Espíritun tukuy kankunapi kawsashpan ali munaywa atipashkaykipa ruraychi tukuy uras mana piñanakushpa, shukwa shukwa kushilla shuk yuyayllawa kawsanaykipa.

⁴Tukuy ñukanchi shuk aychashinalla kanchi. Tukuy ñukanchipi shuklla Yaya Diospa Espíritunmi kawsan. Yaya Dioska tukuy ñukanchikunata akllashka shukllata chapashpa kawsananchipa, chayka silipi paywa pakta kawsak rinanchimi. ⁵Chaymanta shukllami kan tukuy ñukanchikunapa amunchika, chayka Amunchi Jesukristumi. Tukuy ñukanchi payllata kirishpa kawsanchi. Payllata kirishpanchimi bawtisarishkanchi. ⁶Yaya Dioska shukllami. Payllami tukuy ñukanchipa Yayanchika. Payllami tukuy ñukanchita kamachikka. Paymi tukuy ñukanchita yuyachin munashkanta rurananchipa. Paymi tukuy ñukanchikunapi kawsan.

⁷Chaymanta pay kikin munashpan-llami *Kristuka karan shuk ñukanchita atipachinayashkanshina chikan chikanta atipachirka. ⁸Chayraykumi Yaya Dios killkachishkanpi ñukanchita Jesukristumanta riman:

Paypa kunrankunata winsishpan apishkankunata apashpa siluma sikarka. Chaymanta tukuy payta kasuk runakunata kushichishpa chikan chikanta atipachirka nishpa.

⁹¿Imatata ñukanchita rimayan siluma sikashka nishpa? Kaytaka rimahunmi: Jesukristu silumanta puntiru kay allpama shamushpan chaywasha

kutikashka silumallatata kutishkan.
¹⁰Jesukristu shamushka kashpan
 payllatata Yaya Diospa kawsanan
 siluma, puyumanta ashwan awama
 kutirka, kaypi chaypipas tukuy parti
 kashpan tukuyta kamachik kanampa.

¹¹Chasna Jesukristu ñukanchita
 kamachik kashpanmi payllatata shuk
 ñukanchikunata churashka paypa
 *apostolninkuna kananchipa. Shukkuna-
 taka churashka, Yaya Dios ruranaya-
 nanta riksichishpan chayta rimakkuna
 kanankunapa. Chaymanta shukkunataka
 churarka, maypipas rishpankuna
 Jesukristu ñukanchita kishpichishkanta
 riksichinankunapa. Shukkunataka
 churarka kirik masinchikunata
 kuyranankunapa. Shukkunataka
 churarka chayra kirikkunata Yaya
 Diospa shiminta yachachishpa yanapa-
 nankunapa, ashwan alita Jesukristuta
 katinankunapa.

¹²Chasnami Kristuka ñukanchita
 churashka tukuy kankuna payta kirik
 masinchikunata yachachishpa sinchiku-
 chishpa yanapananchipa, tukuy paypa
 munashkanta kay allpapi rurashpa
 kawsanaykichipa. Chasnami tukuy
 ñukanchi kirikkuna ashwan alita
 Kristupi sinchikurishpa kawsashunchi.
¹³Chasna kashpan ashwanta ashwanta
 shuk yuyayllawa ashwan alita payta
 katishpa kawsashunchi, chaymantapas
 Yaya Diospa Wawanta ashwan alita
 riksishunchi. Chasna payta ashwan alita
 riksishpa rishpanchimi parihu tukuypi
 alita wiñashkashina kashunchi. Kristupa
 aychanshina kashpanchi tukuypi alitana
 rikuchinchi imashna alimi Kristuka.

¹⁴Chasna kashpanchimi manana
 wawakunashina kanchichu, maykan-
 kuna manara alita yuarishpa shuk ratu
 llullachik runakunata kirinahun. Chay
 llullachik runakunaka tukuy yanka
 millaypa llullakunata yachachishpa,

chay wawakunashina kahuk runakunata
 pantachichinahun. ¹⁵Ashwan
 ñukanchika mana chasna wawakuna-
 shina yuyarishpa, akuychi shukwa
 shukwa yuyanakushpa, tukuy uras
 shutipata rimashpa kawsashunchi.
 Chasna rurashpanchimi ashwanta
 ashwanta Kristullata kasushpa
 kawsashunchi. Payka ñukanchirayku
 tukuy aychata purichik umashina
 kashpan tukuypi ñukanchita yuyachi-
 nan tiyan. ¹⁶Kristu ñukanchita shuklla
 aychatashina ruran. Tukuy partita chay
 aychashinapi ankukunawashina
 tantachishpa tullmachin, chaymanta
 tukuy kawsa kanankunapa munashkan-
 kunata karan shukpi paktachin tukuy ali
 kanankunapa. Imashnami karan parti
 aychapi rurana kashkata rurashpan-
 ramu chay aychaka alita wiñan,
 chaymantapas alita sinchikurishka
 kawsan, chasnashnami tukuy ñukanchi
 parihumanta yanapanakushpa yuyana-
 kushpa kawsashpanchi alita sinchiku-
 rishpa katihunchi.

Kristuta kirishpanchi mushu kawsayta tarinchi

¹⁷Wawkikuna panikuna, Amunchi
 Jesukristupa yachachiwashkanta
 kankunata rimani. Ama kawsaychichu
 Yaya Diosta mana riksik runakunashina.
 Paykunaka yankamanta yuyarishpa,
 paykuna kikinpa munashkankunallata
 rurashpa kawsanahun. ¹⁸Paykunaka
 Yaya Diosta mana kasunayashpanku-
 nami mana atipanahunchu asirtanata
 paypa shiminta. Chasna kashpankunami
 wisku runakunashina kanahun. Yaya
 Dioswa tantaylla kawsanata mana
 riksinahunchi. ¹⁹Chasna paykunaka
 pinkay illa runakuna tukushpankunami
 tukuy millaypakanata rurashpa
 kawsanahun. Machashpa musayashpa
 kawsanahun. Tukuy uras sinchi

munanankunata katishpa millaypata rurashpalla kawsanahun.

²⁰Ñukanchika mana chasna kawsananchipachu *Kristumanta yachachiy tukushkanchi. ²¹Paymanta tukuyta alita uyashkankichi. Kristuta kirishpa kawsashpaykichimi shutipa kashkata riksichishkanta alita yachachiy tukushkankichi.

²²Chasna kashpan yachankichi Jesusta alita kasushpaykichi manana atipankichinachu ñawpa kawsashkaykichishina kawsanata. Ñawpaka kankuna kikin munashkaykichillata millaypakanata rurashpa llullachirishpaykichi ashwanta ashwanta waklishparishpa kawsapayarkankichi. ²³Kunanka Jesukristuta kasushpa alitana yuyarishpa Yaya Diosta ashwanta ashwanta yuyashpa kushichishpa kawsaychi. ²⁴Yaya Dioska ñukanchita mushu runata rurashka payshina ucha illa kananchipa. Chayrayku akuychi nima ima llullapi satirishpa, alikunallata rurashpa kawsashunchi.

²⁵Karan shuk ñukanchikuna shuk parti shuklla aychapishina kashpanchimi manana runa masikichita llullashpa kawsaychichu, ashwan karan kankuna karan shukta shutipa kashkallata rimashpa kawsaychi.

²⁶Piñarishpaykichipas ama uchata ruraychichu. Chaymantapas ama chishiyakta piñariychichu, manarapas amsayahushpan alichaychi. ²⁷Piñarishpalla katishpaykichika supay atipan kankunata uchata rurachinata. Chasna kashpan piñarishkaykichimanta alichashpaykichi ama sakiychichu supay kankunata uchata rurachinanpa.

²⁸Maykan shuwa runa kashpanka sakichun shuwanata. Ali tarawanapi alita tarawashpa kawsachun, chasna ganashkanwa atipananpa pay kikin kawsanata shukkunatapas ima pishihushkanpi yanapanata.

²⁹Ama millaypata shimikunata rimaychichu, ashwan yanapak shimiku-

nallata rimashpa shukta shukta sinchikuchiichi, imapichari paykunaryku sinchikunaka pishin, kankunata uyahukkuna yanapay tukunankunapa. ³⁰Yaya Dioska Espiritunta kushka kankunata yanapananpa. Chasna Yaya Dios Espiritunwa kankunata yanapashpanmi shuk runakunata riksichin pay kankunapa amuykichi kananta.

Jesukristu kuti shamushpanmi tukuy kankuna silipi paywa pakta kushikuspalla kawsankichi. Chay kushikunayki-chi punchakamami Yaya Diospa Espiritunka kankunapi tukuy uras kawsahun. Chayrayku ama millaypata rurashpa Yaya Diospa Espiritunta llakichichichu.

³¹Shunkuykichi tukuy wakayhashkaykichi piñaykunata anchuchiyichi. Tukuy piña kanata, piñanakunatapas, kaminakunatapas, rimanakunatapas sakiychi. Chaymantapas tukuy millaypa yuyaywa kanata shunkuykichimanta anchuchiyichi. ³²Ali shunku runakuna kaychi, shukwa shukwa yanapanakushpa kawsaychi. Kristu wañushkan-rayku Yaya Dioska ñukanchita uchanchikunamanta llakichishkanshina, kankunapas shuk runawa piñanakush-paykichiaka llakichinakuychi.

Imashnami ñukanchi Yaya Diospa wawankuna kawsananchi tiyan

5 ¹Wawkikuna panikuna, Yaya Diospa yuyashkan wawankuna kashpaykichi sinchikuriychi kankunapas payshina shukkunata yuyashpa kawsanaykichipas. ²*Kristuka ñukanchita yapa yuyashkanraykumi kruspi wañurka. Chasna ñukanchiranti wañushpanmi Yaya Diosta kushichishpan shuk mishkihlla asnak wikita rupachishkashina karka. Chasna Kristu ñukanchita yapa yuyashkanhina kankunapas tukuy uras yuyanakushpalla kawsaychi.

³Kankuna Yaya Diospa runankuna kashpaykichimi manana kankunapi tiyachun nima shuk musayanaka, aychaykichiwa mana ali ruranaka, nima imakunata munarishpa kawsana. Nima chay millaypakanamanta yuyarishpa kwintaychichu. ⁴Ama rimaychichu millaypa kwintukunata, nima yanka nishpa asichinaykichipa ukupanakunata rimaychichu. Kankuna Yaya Diospa wawankuna kashpaykichi manami alichu chaykunata rimanaykichipa. Ashwan Yayanchi Diosta agradeshpa kushichiychi. ⁵Kankunaka ña yachankichi, maykan runami musayan, aychanwa mana alikunata ruran, chay runaka manami atipankachu Kristupa, Yaya Diospa kamachinan mushu munduma kawsak rinata. Tukuy imakunata munarishpa kawsakpas manami atipankachu chayma kawsak rinata, Yaya Diosta yuyana imata imakunallata yuyak kashkanrayku. ⁶Shuk llullachik runakuna kankunata yanka shimikunawa uchata rurachinayashpanpas ama paykunata kasuychichu. Yaya Dioska tukuy payta mana kasuk runakunatacha chasna millaypakanata rurashkunkunaryku sinchitami kastiganka. ⁷Kankunaka ama chay millaypata rurak runakunawa parihi rurashpa kawsaychichu. ⁸Ñawpa kankunaka tukuy millaypata rurashpaykichi amsapishina kawsapayarkankichi. Kunanka Amunchi Jesukristuwa pakta kawsahuskaykichiraykumi, punchapishina kawsahunkichi. Chayrayku punchapishina kawsak runakunashina alita rurashpalla kawsaychi. ⁹Chasna punchapishina kawsashpaykichimi ali shunku, alita rurak, shutipa kashkallata rimak runakuna kankichi. ¹⁰Tukuy shunkuykichimanta pacha Amunchi Jesukristupa munashkanta ruranayashpa, kay ruranayanaynika

paypa rikushkanpi alichu manachu nishpa tapuriyichi.

¹¹Ama amsapishina kawsak runanawa parihi mana ali nima imarayku valik ruranakunata rurashpa kawsaychichu. Ashwan paykunata kunashpaykichi amsapishina pakalla millaypata rurahushkunkunata riksichiychi manana chasna ruranankunapa. ¹²Paykunapa pakalla rurahushkunkunaka yapa pinkaypami, nima kwintaypachu kan.

¹³Yaya Dios shutipa kashkata rimashkanka punchashina kashpanmi rurashkanchikunata riksichin. Chaypina shutillata atipanchi rikunata imashnami kanahun. ¹⁴Chasna punchapishinana kawsashpanchi manana amsapishinanchu rurashpa kawsanchi. Chayrayku rimanchi:

Kanka puñushkashina kashkaykimanta likchariy.

Wañushkashina kashkaykimanta atariy.

Chasna atarishpaykimi Kristuka kanta yanapanka, alita rurashpa punchapishina kawsaykipa nishpa.

¹⁵Chayrayku alita kuyrariyichi mana millaypata ruranaykichipa. Ama Yaya Diospa munashkanta mana riksik runakunashina kawsaychichu, ashwan ali yuyaywa kawsaychi. ¹⁶Kay punchakunapi runakunaka ashwanta ashwanta millaypakanata rurashpallami kawsanahun. Kankunaka karan atipashkaykichi uras mana killashpa alikunata ruraychi.

¹⁷Ama kawsaychichu mana yuyayyu runashina nima imata asirtashpa, ashwan Amunchi Kristupa munashkanta yachakushpa asirtaychi. ¹⁸Ama machaychichu. Machashpaykichika tukuy pinkaypakanatami rimankichi rurankichi. Ashwan Yaya Diospa Espíritun kankunapi kawsashpan paypa munashkanllata rurashpa kawsashpaykichi

tukuyipi paypa yuyachishkan kaychi.
¹⁹Chasna kashpaykichi salmokunata, kantukunata, Yaya Diospa Espíritun yuyachishkan takinakunata takishpa sinchikuchinakuychi. Shunkuykichipi kushiwa takishpa Amunchi Jesukristuta kushichiychi. ²⁰Amunchi Jesukristuta kirishpa tukuy uras tukuyrayku Yayanchi Diosta agradesiychi.

Karika warminta yuyachun Kristu kirikkunata yuyahushkanshina

²¹*Kristuta yuyashpa kasushpa kawsashpaykichi shukwa shukwa kasunakushpa kawsaychi.

²²Kankuna kusayu panikuna, Amunchi Jesukristuta kasuhushkaykichi shina kusaykichtapas alita kasushpa kawsaychi. ²³Kristuka ūukanchita kishpichik kashpan paypa aychanshina kanchi. Imashnami umanchika aychanchita purichin, chasnashinami Kristuka payta kirikkunata alita yuyachishpa purichin. Chasnallatatami kusanka warminpa umanshina kashpan warminta purichinan tiyan. ²⁴Imashnami ūukanchi kirikkuna Kristuta kasunchi, chasnashina warmikunapas tukuy imapi kusankunata kasunankuna tiyan.

²⁵⁻²⁶Kankuna warmiyu karikuna warmikichita yuyaychi, imashnami Kristuka ūukanchi kirikkunata yapa yuyan. Payka ūukanchita yapa yuyashpan kishpichinanpa wañurka payllapan kañanchipa. Ūukanchita yachachishkanwa yakuwa mayllashkashina aliyachishka. ²⁷Chasna ūukanchita aliyachishka chuyana suma ucha illata paypa puntanpi churananpa. Payka munan payllata kasushpa ali runakuna kananchipa.

²⁸Chasnashina kankuna warmiyu karikuna warmikichita yuyashpa kuyraychi, imashnami kikin aychan-

chita tukuy imamanta kuyranchi mana ima pasananpa chasna. Shuk kari warminwa shuk runashinalla kashpan warminta yuyashpana pay kikintami yuyan. ²⁹⁻³⁰Nima maykan runa pay kikinpa aychanta chikninchu, ashwan tukuy ali kananpa munashkanta kushpa alita kuyran. Imashnami Kristuka ūukanchi payta kasukkunata paypa aychanshina kashpanchi kuyran, chasnashina kankunapas alita warmiki-chita kuyranaykichi tiyan.

³¹Chayrayku Yaya Dioska puntiru runata rurashpan rimarka:

Karika yayanta mamanta sakinkami warmiyashpan warminwana kawsanropa. Chasnana warminwa shukllashina kankuna nishpa.

³²Chay shimiwa rimanayashkanka manara yapa asirtanya kashpanpas yapa manchariypa sumami. Chayka yuyachinayan ūukanchi Kristuta kasukkuna paywa shukllashina kahushkanchita.

³³Chasna kashpan rimashkaykichi: Tukuy kankuna warmiyu runakuna warmikichita yuyaychi kikin aychaykitchashina. Kankuna kusayu warmikuna kusaykitchita yuyashpa kasuychi.

**Wawakunata yayakunatas
Pabloka yachachin**

6 ¹Wawakuna, Jesukristuta yuyashpaykichi yayakichita mamaykichita kasuychi. Chasna paykunata kasunaykichtami Yaya Dioska munan. ²Kasna nin:

**Yayakichita mamaykichita
kasushpa yuyaychi nishpa.**

Chay Yaya Diospa kamachishkanllami tukuy kamachishkankunamanta puntiru kan maykanpimi tiyan Yaya Diospa paktachinan shimika. ³Chay paktachinan shimika kasnami nin:

**Yayakichita mamaykichita
yuyashpa kawsahushpayki-**

chimi kushilla achka watakunata kay allpapi kawsankichi nishpa.

⁴Yayakuna mamakuna, wawaykichi-kunata ama piñachiychichu. Ashwan alita kuyrashpa asirtachishpa paykunata yachachiyichi, Amunchi Jesukristuta yuyashpa kasushpa wiñanankunapa.

**Patronyu runakunata
patronkunatapas Pabloka
yachachin**

⁵Kankuna patronpi tarawakkuna, chay patroykichita yuyashpa kasuychi. Kastiganata atipananta yachashpaykichi alita payrayku tarawaychi. Ali yuyaywa mana llullachishpa payta kasushpa tarawaychi *Kristuta kasuhushkaykichisha. ⁶Patroykichi rikuuhushpan mana rikuuhushpanpas alita kasushpa tarawaychi. Ama munaychichu ali tarawakshina tukushpa runakunata kushichinata. Ashwan Kristuta kasuk kashpaykichi tukuy shunkuykichimanta pacha Yaya Diospa munashkantashina ruraychi. ⁷Patroykichirayku tarawahushpaykicha ali munaywa tarawaychi, Amunchi Kristurayku tarawahukshina. Ama tarawaychichu runarayku tarawahukshina. ⁸Kankuna ña yachankichi, patronyu kashpaykichipas mana patronyu kashpaykichipas alikunata rurashpaykichika Yaya Dioska kankunata chay tupu alikunallatata mi kunka.

⁹Kankuna patronkuna, chasnallatata runaykichikunawa ruraychi. Ama paykunata manchachishpa rimaychichu mana kasushpaykichika kankunata sinchitami kastigashunchi nishpa. Alita yuyariyichi, kankunapa Amuykichi tiyananta silipi. Chay amuykichimi runaykichikunapa amunllatata kan. Paypa rikushkanpika patronkuna, patronyu runakunapas parihullami kanahun.

**Imashnami Jesukristuta kirikkuna
atipanahun sinchikurishpa
kawsanata**

¹⁰Kunanka wawkikuna panikuna, tukuy chay rimashkayniwa kaymi rimashkaynika: Amunchi Jesukristuwa pakta kawsahushpaykichi sinchikuychi. Paypa sinchi yachayninpi sinchikush-paykichi sinchikuriyichi. ¹¹Suntalukuna kuntrankunawa wañunakuhushpangkuna tukuy aychankunata arkanahun aserumanta rurarishka kamisankunawa kaskunkunawa. Chasnashina kankunapas alita arkarishka kaychi supay kankunata llullachishpa winsinayahush-kanpi mana winsiy tukunaykicipa.

¹²Wañunakuhushkapishina kahushkan-chipi kuntranchikuna manami kanahun-chu runakuna. Ashwan wayrapi kawsak sinchita kamachik mana rikuypa supaykunawami makanakuhkshina kawsanchi. Paykunaka ñukanchita llullachinayak millaypata rurachishpa waklichinayakkunami kanahun, kay amsashina kahuk allpapi kamachikkuna.

¹³Chayrayku Yaya Dios kankunaryku rurashkanpi kankunata kushkanpi sinchikushpa arkarishkashina kaychi chay sinchi kamachik supaykuna kankunata waklichinayahushkunkuna punchakunapi mana llullachishpa winsinankunapa. Alita alicharishka kaychi wañunakuhushkapishina kahush-kaykicipi winsishpalla katinaykicipa.

¹⁴Shutipa kashkallata rimashpa kirishpa kawsashpaykichi sinchikurishka kaychi. Chasnashina kawsashpaykicha shuk suntalu sinturunwa watarish-kashina kankichi. Chaymantapas alita rurashpa kawsaychi. Chasnashina kawsash-paykichika shuk suntalu aserumanta kamisayushina kankichi kuntraykichiku-namanta kuyrarinaykicipa. ¹⁵Alicharishka kaychi karan llaktakunama

rishpa Yaya Dios runakunata uchankunamanta llakichinanta yachachinaykipichi. Chasna alicharishka kashpaykichi shuk suntalu kuntrankunama rinanpa sapatunta churarishkashina kankichi.¹⁶ Tukuy uras Yaya Diosllapi sinchikushpa kawsaychi. Paypi sinchikushpaykichi shuk suntalu aychanta arkanan eskudunwa wachikunamanta kuyrarihuksina kankichi. Chasnami supaykuna wachi ninayuwa tuksihuksina mana alita yuyachishpa winsinayahushpankuna atipankichi chay wachi ninayutashina arkashpa wañuchinata.¹⁷ Chaymanta Yaya Dios kankunata llakichishpan kishpichishkanta alita kirishpa sinchikuriyichi. Chasna sinchikurishpaykichi suntalu umanta kaskunwa arkahuksina kankichi supay kankunata mana llullachinanpa. Chaymantapas Yaya Diospa shiminta alita yachakushpa kirishpa rimashpa kawsaychi. Yaya Diospa Espíritun kankunata chayta yuyachishpa yanapanka, uyakkunatapas asirtachinka. Chasna kashpanmi Yaya Diospa shimin ishkay wiluyu sablishina kashpan shuk suntalu ishkay wiluyu sabliwa makahuksina kankichi supayta kallpachinaykichipa.

¹⁸ Yaya Diospa Espíritun kankunata yanapahushpan tukuy uras Yaya Diosta mañashpa kawsaychi. Sinchikushpalla mana sampayashpa mañaychi tukuy *Kristuta kirik masikichita yanapanaykipichi. ¹⁹ Chaymanta ñukaraykupas Yaya Diosta mañaychi yanapawanampa. Chasna yanapawashpanmi atipasha sinchita mana manchashpa yachachinata chay ñawpa mana yachashkanchi suma ali shimita Jesukristu runakunata

kishpichinanmanta. Chasna yachachishpaynimi achka runakuna yachankakuna Yaya Dios paykunatapas kishpichinaya-hushkanta.²⁰ Yaya Diospa kachashkan kashpaynimi paypa suma ali shiminta yachachinayipa, piñariwashpankuna karselpi churawashkakuna. Chayrayku Yaya Diosta mañaychi, karselpi kashpaynipas nima imata manchashpa Jesukristumanta yachachinayipa, imashnami yachachinayni tiyan.

**Pabloka kartanta tukuchihushpan
Jesukristuta kirik
masinkunata saludan**

²¹ Kankunapas ñukamanta yachanaykipichi imata rurashpami kay karselpi kahuni nishpa, munashka wawkinchi Tikikota kachasha. Payka alita Jesukristupa shiminta yachachinata yanapawakmi kan. ²² Payta kankunama kachahuni kankunata kwintak rinanpa, imashnami kahunchi nishpa, chayta yachashpaykichi shunkuykichipi sinchikurishka kanaykichipa.

²³ Yayanchi Diosta, Amunchi Jesukristutapas kankunaryku mañahuni, tukuy kankunata yanapashpan kushilla kawsanaykipichi, chaymantapas shukwa shukwa yuyanakushpa, tukuy uras payllapi yuyarishpa sinchikunaykichipa.

²⁴ Tukuy kankuna Amunchi Jesukristuta mana sampayashpa yuyahukkunata Yaya Dios llakichishpan yanapachun.

Chayllata killkashkani.

Wawkikichi turikichi
Pablo

PABLOPA KILLKASHKAN KILLKA FILIPOS LLAKTAPI JESUKRISTUTA KIRIKKUNARAYKU

**Pablo Timoteowa kirikkunata
saludanahan**

1 ¹Munashkanchi wawkinchikuna paninchikuna, ñuka Pablo wawki Timoteowa, Jesukristupa kamachish-kankuna kashpanchi kankuna Filios llaktapi Jesukristuta kirik Yaya Diospa akllashkan runankunaryku, sinchik-chik wawkikunarykupas, yanapak wawkikunarykupas kay kartata killkahunchi. ²Yayanchi Dios, Amunchi Jesukristupas kankunata llakichishpan yanapanahuchun kushilla kawsanaykipa.

**Pablo mañan Yaya Diosta
kirikkunaryku**

³Karan kuti kankunata yuyarishpayni Yayayni Diosta atunta agradesini. ⁴Yaya Diosta mañahushpayni yapa kushikushpa mañani kankunaryku. ⁵Jesukristuta kirishkaykichimanta pacha kunankama yanapawahunkichi chay suma ali shimita Jesukristu runakunata kishpichinanmanta yachachinata. ⁶Yaya Dios kallarirka kankunata aliyachinata paypa munash-kanta rurashpa kawsanaykipa. Chasna kashpan alita yachani, pay kankunata aliyachihushkanta Jesukristu shamunankama alita paktachinanta.

⁷Chasna kankunamanta yuyarinayni tiyan, kankunata yapa yuyahushkaynirayku. Karselpi apirishka kahushhpayni apukunapa puntanpi tapuy tukuhushkaynipi Yaya Diospa suma ali shimita Jesukristu runakunata kishpichinanmanta shutipa kananta riksichihush-payni kankunaka yanapawashkankichi. Yaya Dios ñukata yuyawashpan tukuy chaykunata ruranaynipa churawarka. Kankunaka tukuy chay rurahushkaynukuniapi mañashpa, munashkaynita kachashpa sumakta yanapawashkankichi. ⁸Jesukristu ñukanchikunata yuyahushkanshina ñukapas kankunata yuyani. Yaya Dios yachan yapa kankunata yuyashpayni rikunayahushkaynita. ⁹Yaya Diosta tapuni tukuy uras ashwan alita yuyanakushpa kawsanaykipa. Chaymantapas tapuni ashwan alita Yaya Diosta riksinaykipa, tukuy uras ashwan alita yachanaykipa, maykanmi ali, maykanmi mana alichu ruranaykipa. ¹⁰Chaypirami atipankichi akllanata alikunamanta ashwan ali kashkata. Chasnami atipankichi alita rurashpa kawsanata, Jesukristu kutimu-hushkan punchapi nima pi kankunamanta millaypata rimanarpa. ¹¹Chasna Jesukristu yachayninwa kankunata yanapashpan tukuy uras alikunallatana rurashpa kawsashpaykichi tukuy

runakuna rimankakuna Yaya Dios yapa ali kananta.

**Pablo karselpi kahushpanpas achka
runakuna uyanahun Yaya Diospa
shiminta**

¹²Wawkinikuna paninikuna, munani yachanaykichipa karselpi churay tukushkaynika yanapashka ashwan achka runakuna uyanankunapa Yaya Diospa suma ali shiminta Jesukristu runakunata kishpichinanmanta. ¹³Tukuy kay atun apupa kamachinan wasipi kuyrak suntalukuna, tapuy tukushkaynita tukuy uyak runakunapas kunan yachashkakuna karselpi kahushkaynita *Kristuta katihushkaynirayku. ¹⁴Chasna karselpi kahushkaynirayku achka Kristuta kirik masinikuna ashwanta sinchikushkakuna Jesukristumanta suma ali shimita mana manchashpa yachachinankunapa.

¹⁵Shutipami shukkunaka chikniwashpankuna ñukami Pablo manta ashwan sumakta yachachini nishpa yachachihunkuna. Chasna kashpanpas shukkunaka ñukata yuyawashpa ali munaywa Kristumanta yachachihunkuna. ¹⁶Chay yuyak kashkankunaryku yachachik wawkkunaka yachanahun, Yaya Dios munashpan kay karselpi kahushkaynita, paypa suma ali shimin Jesukristu runakunata kishpichinanmanta shutipa kananta riksichinaynipa. ¹⁷Chay mana yuyawak wawkkunaka Jesukristumanta yachachinahun shukkunamanta pasa kanayashpa. Mana ali yuyaywa yachachishpankuna munanahunlla, ñuka kay karselpi kahushpayni ashwanta parisichiwanankunata. ¹⁸Mana imananchu mana ali yuyaywa yachachishushpankuna ali yuyaywa yachachihushpankuna ishkantimi Kristumanta chasnalla yachachihunkuna. Chayraykumi kushikuni. Ashwanta kushikushpalla katisha.

¹⁹Yachani kankuna Yaya Diosta mañahushkaykichirayku Jesukristupa

Espíritun yanapawashpan ñukaka tukuy manta kishpichiy tukunaynita.

²⁰Tukuy shunku nimanta pacha munani, chaymanta kirini alillata rurashpa katinaynita. Chasna kashpan nima imapi pinkachiy tukushanchu. Imashnami tukuy uras alita yachachishkani, chasnalla munani mana manchashpa Kristumanta yachachishpalla katinata. Kaw sahushpayni wañushpaynipas yapa munani tukuy runakuna ñukata rikuwashpankuna yachanankunapa Kristu yapa ali atun kananta.

²¹Nukaraykuka kay allpapi kawsahushpayni Kristuta yuyashpa paywa pakta kawsanallami ali. Wañushpayni ashwan alita kushikushpa Kristu wa pakta kawsasha. ²²Kay allpapi kawsahushpayni atipani ashwanta runakunata yachachinata Kristumanta. Chayrayku mana atipanichu rimanata maykantami munani ashwanta, kawsanatachu, wañunatachu. ²³Ishkanti chasnalla ali kashpan mana yachanichu imashna yuyarinata. Yapa munani Kristu ñawipurana kawsak rinata. Chaymi ashwan ali kama ñukarayku. ²⁴Kankunaryku ashwan ali kan kay allpapi kawsashpa katinaynipa, kankunata ashwanta yanapanaynipa. ²⁵Chasna kashpan yachani ashwanta kay allpapi kawsanaynita. Chasnami atipani kankunata yanapanata, Jesukristuta ashwan alita kasushpa, ashwanta kushikushpa kawsanaykichipa.

²⁶Chasna kashpan ñuka kutikashka kankunawa kashpayni Jesukristuta agradeshpa kushichishpa yapa kushikushunchi.

²⁷Imashna pasahushpaynipas kankunaka alita rurashpa kawsaychi. Runa masikichikuna chayta rikushpankuna Yaya Diospa suma ali shimin Jesukristu runakunata kishpichinanmanta alimi nishpa rimanankunapa.

Ñuka kankunama rishpaynipas mana kankunama rishpaynipas yapa munani yachanata Jesukristuta alita kasushpa kawsahushkaykichita. Munani parisish-paykichipas shuk yuyayllawa shuk munayllawa chay suma ali shimita Jesukristu runakunata kishpichinan-manta yachachinaykichipa, achka runakuna paypi sinchikunankunapa.²⁸ Kankunata chiknik runakunata ama manchaychichu. Chasna mana manchashpa kawsahushkaykichita rikushpankuna yachankakuna Yaya Dios paykunata uchankunamanta wiñaypara-rayku kastigananta. Chaymantapas yachankakuna Yaya Dios kankunata kishpichinanta wiñaypa Jesuswa pakta kawsak rinaykichipa.²⁹ Yaya Dios kankunata yapa yuyashpan yanapashka Kristuta kirinaykichipa. Mana chaylla-chu, ashwan kankunata yapa yuyashpan sakin Kristuta kasuk kahushkaykichi-rayku parisinaykichipa.³⁰ Chasna kashpan kankunapas ñukashina parisihunkichi. Ñami yachankichi imashnami runakuna chikniwashpan-kuna yapa parisishkani. Chaymantapas kunankama chasnalla parisihuni.

Pablo yachachin Jesukristushina yuyarishpa kawsananchipa

2 ¹Wawkikuna panikuna kankuna *Kristuwa shukllashina tukushkay-
kichirayku sinchikuchiy tukushkankichi
alillata rurashpa kawsanaykichipa.
Llakiwa kahushkaykichipi yanapak
shimikunawa kankunata yuyashpa
sinchikuchishkanta riksishkankichi.
Yaya Diospa Espíritun kankunapi
kawsahushkanrayku shukwa shukwa
yanapanakushpa kawsanata, chayman-
tapas yuyanakushpa llakichinakushpa
kawsanata riksishkankichi.² Chasna
kashpan yapachiychi kushikunaynita
kankunamanta kushikushpalla

kanaynipa. Shuk yuyayllawa kawsaychi. Shukwa shukwa yanapanakushpa, yuyanakushpa, llakichinakushpa kawsaychi, shuklla tukushkashina shuk munayllawa.³ Ama shukwa shukwa piñanakushpa rimanakushpa kawsaychi-chu. Ama runakunata kankuna kikin munashkaykichillata rurachinayashpa kawsaychichu, ñukami kani ashwan yachak nishpaykichi. Ashwan karan shuk shukkunamanta yuyarishpa kawsaychi payka ñukamanta ashwan alimi nishpa.⁴ Ama munashkaykichillata yuyarishpa rurashpa kawsaychichu, ashwan shukkunapa munashkankunatas puyarishpa kawsaychi.

⁵ Kankunapura kawsahushkaykichipi Jesukristu yuyarishkanshina kankuna-pas yuyarishpa kawsaychi.

⁶ Jesukristu tukuypi Yaya Diossalina kashpantata mana rimarkachu kashinalla kanayani nishpa.

⁷ Ashwan siluta sakirká, ñukanchi-shina shuk warmimanta wawa-yarishka runa tukushpan tukuy runakunata yanapashpa kawsan-napa.

⁸ Pay tukuyta yanapak tukushpan Yayan Diosta kasushpan mana alita rurak runashina pinkariy-pata shuk kruspi wañurka.

⁹ Chayrayku Yaya Diroska payta tukuy runakunamanta ashwan atun yachak kananpa churarka. Paytaka wañushkanmanta kawsachishpan kuchunpi churarka, tukuy kamachik runakunamanta ashwan atun kamachik kananpa.

¹⁰ Yaya Dios payta chasna churashka tukuy silipi kawsakkuna, tukuy kay allpapi kawsakkunapas, tukuy wañushkakunapas Jesukristuta kushichishpa paypa puntanpi kunkurinankunapa.

¹¹ Chay uras tukuy runakuna
Jesukristu tukuy manta ashwan
atun kamachik kananta riksish-
pankuna chayta rimashpa Yaya
Diosta kushichinkakuna.

**Jesukristuta kirikkunaka kay
amsashina mundupi punchashina
kanahun**

¹² Munashkayni wawkinikuna
paninikuna, imashnami tukuy uras alita
kasuwashkankichi chasna kunganpas
kasuwaychi. Yaya Dios kankunata
kishpichishkanta yachashkaykichirayku
tukuy shunkuykichimanta pacha payta
kasuhushkaykichiwa ashwanta
ashwanta kishpichiy tukuhushkayki-
chita rikuchiychi. Nuka kankunawa
kahushpayni chayta alita rikuchishpay-
kichi, kungan kankunamanta karupi
kahushpayni ashwan alita rikuchishpa
kawsaychi. ¹³ Yaya Dios kikin kankunata
munachin alita kishpichiy tukunata. Pay
kikin kankunata yanapan ashwanta
ashwanta kishpichiy tukunaykichipa.
Chasna kashpanmi atipankichi alita
kishpichiy tukunata, imashnami pay
yuyarirka kankunaryku ali kananta.

¹⁴ Imatas rurahushpaykichi mana
rimarishpa, mana killashpa, nima
rimanakushpa, ashwan tukuya ali
yuyaywa ruraychi. ¹⁵ Chasna kawsash-
paykichiha nima pi kankunamanta
millaypata rimankachu. Chasnashpayki-
chimi Yaya Diospa wawankuna kahush-
kaykichiha rikuchinkichi. Chay mana
alita rurak millaypa yuyayyu runakuna
chawpipi alita rurashpa kawsahushpay-
kichi amsa tutapi punchayachik
istrillashina kankichi. ¹⁶ Chasna kanayki-
chipa, Yaya Diospa shiminta, maykan-
pimi kushilla Yaya Dioswa kawsayta
tarinchi, chayta alita shunkuykichihi
wakaychashpa kawsaychi. Chasna
kawsashpaykichiha *Kristu shamuhush-

kan uras ūuka kankunamanta sumakta
kushikusha. Chaypi yachasha manami
yankachu kankunapi sampayakta
yachachishpa purishkaynita. ¹⁷ Nukata
wañuchiwankakunachari. Chasna
kashpanka Yaya Diosta kawsaynita
kushpa kushichishami, imashnami
*saserdotenchikuna shuk obeha maltata
wañuchishpa Yaya Diosta kushichishpa
rupachihushkankunapi *vinuta talishpa
rurapayanahun. Kankuna Jesukristuta
kirishkaykichirayku Yaya Diosrayku
kawsahushkaykichiwa ūawpa wiwata
rupachihushkawashina payta kushichi-
hunkichi. Chayrayku wañuchiwanan-
kuna kashpaynipas kushikunilla, tukuy
kankunawa pakta kushikunilla Yaya
Diosta kushichishpa kawsahushkanchi-
rayku. ¹⁸ Chasnallatata kankunapas
ñukawa parihu kushikuychi.

**Pablo kwintan Timoteomanta
Epafraditomantapas**

¹⁹ Amunchi Jesús munashpanka
Timoteota utkalla kankunama kachasha
kankunata sinchikuchinanpa. Pay
chaymanta kutimushpan kwintawanka
imashnami kawsahunkichi nishpa.
Chayta yachashpaynimi ūukapas
kushikushpayni sinchikusha. ²⁰ Mana
tiyanchu Timoteomanta ashwan shuk
runa ñukashina kankunata yuyakka.
Paymi tukuy shunkunmanta pacha
munan kankunata yanapanata alita
rurashpa kawsanaykichiha. ²¹ Chay
shukkunaka paykuna kikinraykulla
yuyarishpa kawsanahun manami
yuyarinahunchu Jesukristupa munash-
kanta. ²² Kankuna yachankichi Timoteo
alita rurashpa kawsahushkanta. Shuk ali
wawa yayanta yanapahushkashina
payka ñukata yanapawan Yaya Diospa
suma ali shiminta Jesukristu runaku-
nata kishpichinanmanta yachachinata.
²³ Chayrayku yuyarini payta utkalla

kankunama kachanata, apukuna kay karselmanta llukshichiwankakunachu manachu nishpa yachashkayniwasha.
²⁴Payta kachanayashpaynipas Amunchi Jesukristupi sinchikuni, pay yanapawashpan ñukapas kankunata utkalla rikuk rinata.

²⁵Shukta kunan kachanayni tiyan nishpa yuyarishpayni wawkinchi Epafroditota kuti kankunama kachahuni. Payka ñukaraykuka ali yanapawakmi. Ñukawa pakta Yaya Diospa shiminta yachachik kan. Runakuna ñukanchita parisichishpanku-napas ñukawa pakta Jesukristumanta rimashpalla katirka. Kankuna kikin payta ñukama kachashkankichi tukuy munashkaynikunapi yanapawananpa.
²⁶Pay tukuy kankunata yapa rikunayashpan kankunama kachahuni. Yachashpan unkushka kahushkanta yachashkaykichita, yapa yuyarishpa kahu kankunaryku.
²⁷Shutipami unkushka karka. Ña wañunalla kahurka. Chasna kashpanpas Yaya Dioska payta llakichishpan ampirka. Chasna payta ampishpan mana payllatachu llakichirka. Ashwan ñukatapas llakichirka chay achka llakirihushkaynimanta mana ashwanta llakirinaynipa.
²⁸Chayrayku payta utkalla kankunama kachahuni kankunata rikuk rinampa, payta rikushpaykichi kushikunaykipicha. Chasna pay kankunapi kahushpan ñukapas kankunamanta manana yapa yuyarishpachu kasha.
²⁹Kankunapi paktrashpan Jesukristuta kirik wawkinchi kashkanrayku payta kushikushpa yaykuchiychi. Tukuy payshina kirik wawkikunatapas alita yuyashpa kawsaychi.
³⁰Jesukristupa kamachishkanta rurahushkanpi Epafroditoka yapa sinchita unkushpan ña wañunalla karka. Wañushanpas nishpa yanapawananpa shamushka kashpan kankunaranti

yanapawahun kankuna karu llaktapi kahushkaykichirayku mana atipawashpaykichi yanapanata.

Jesukristuwa kawsanamanta kwintan

3 ¹Wawkinikuna paninikuna, imashna pasanaykichi kashpanpas kayta kankunata rimani: Amunchi Jesusta yuyashpa kushikuchi. Achka kuti chasnallata killkashpaynipas mana amirinichu kutikashka chayllatata kankunata rimanata. Chasna kuti rimashkaynika kankunata yanapankami.

²Alita kuyrariychi chay kankunata waklichinayak runakunamanta. Paykunaka llullachishpa yachachikkuna kashpankunami yuyaykichita pantachichishpa waklichinayanahanun. Ñukanchishina ishpanaykichi kara puntata pitinaykichi tiyan Yaya Diospa wawankuna kanaykicipa nishpa yachachinahun.
³Yaya Diospa Espíritu ñukanchita yanapashpan Yayanchi Diosta tukuy shunkunchimanta pacha kushichishpa kawsashpanchi paypa wawankuna kanchi. Jesukristuranti kishpichiy tukushpanchimi yapa kushikunchi. Mana yuyarinchinachu ishpananchi kara puntata pitishpara Yaya Diospa wawankuna kananchita nishpa.

⁴Ñawpa ñukapas yuyaripayarkani, alita Moisespa killkashkan kamachishkakunata paktachishpaynimi Yaya Diospa wawan kani nishpa. Ñukami tukuy runakunamanta ashwan alita Moisespa killkashkan kamachishkakunata kasushpa kawsashkaynita yuyarin.

⁵Moisespa killkashkanpi rimashkan-shina yayaynika pusak punchayu kahushpayni ishpanayni kara puntata pitirka. Kikin israel runami kani, yaya rukunchi wañu Benjaminpa miraymanta. Yayaynipas, mamaynipas kikin israel runakuna kashkankuna-

rayku, ñukapas kikin israel runami kani. Moisespa killkashkan kamachishkakunata kasukkunamanta ashwan alita kasuk *fariseokuna nishkankuna muntunmanta karkani. ⁶Nima pi atiparkachu ñukamanta mana alita rurashkaynita rimanata. Yapa munashpayni tukuy israel masinikuna Yaya Diosta alita kasushpa kawsanankunapa, Jesukristuta kirikkunata yapa piñarirkani. Runakunata yuyayninkunapi pantachichinahun nishpayni paykunata apishpa kachapayarkani apukuna kastiganankunapa.

⁷Ñawpa yuyarirkani tukuy chay kamachishkankunata kasushpayni Yaya Diospa rikushkanpi ali kanaynita. Kunanka *Kristuta kirishpayni yuyarini, tukuy chay ñawpa yuyarishkaynikunaka mana ali kashpankuna runakunata arkanahun uchankunamanta llakichiy tukunankunapa. ⁸Tukuy ñawpa yachakushkaynikunata kunanka nima imatashina rikunina Yaya Diospa Kachashkan Kishpichik Jesuska Amuyni tukushpan. Tukuy maykantami runakuna ali kananta yuyarinahun, chaytaka wasuratashina sakishkani Kristullapi sinchikunaynipa. ⁹Paywa tantaylla kawsanallatami munani. Manana yuyarinichu Moisespa killkashkan kamachishkakunata kasushkaynirayku ali tukunata Yaya Diospa rikushkanpi. Ashwan yachani Kristupi sinchikushpaynilla Yaya Dios uchaynimanta pichawashkanta paypa rikushkanpi ali kanaynipa. ¹⁰Yapa munani Jesukristuta tukuy uras ashwan alita riksinata. Payka Yaya Diospa atun yachayninwa kashpan wañushkanmanta kawsarimushka. Yapa munani ñukapas chay atun yachayninta riksinata. Munani Kristushina parisinata tukuypi Yaya Diospa munashkanllata rurak kanaynipa. Imashnami pay wañushpan

tukuypi Yayan Diosta kasuk kananta rikuchirka, chasnami ñukapas munani payshinallatata kasunata wañunaynigma. ¹¹Chasna payta kasushpa kawsashpayni kirini ñukapas payshina wañushkaynimanta kawsarinaynita.

**Pablo kirikkunata kunan payshina
tukuy uras Jesukristupa
munashkanta ashwan alita
rurashpa kawsanankunapa**

¹²Ñukaka manara yachanirachu Jesukristushina alillata rurashpa kawsanata. Chayta yachashpayni mana munanichu chasnalla kiparinata. Ashwan tukuya rurani, Yaya Dios munashkanshina alillata rurak tukunaynipa, Jesukristu ñukata paypa yuyashkan runanta rurawashkanrayku. ¹³Wawkikuna panikuna, kuti rimashkaykichi manarami Yaya Dios munashkanshinarachu tukushkani. Chasna kashpan tukuy chay ñawpa rurashkaynita sakishpayni manana yuyarininachu. Tukuya rurani Yaya Diospa munashkanta tukuypi alita rurak tukunaynipa. ¹⁴Tukuy atipashkaynita rurani siluma kushilla paywa pakta kawsak rinaynipa. Yapa munani Yaya Dios kushikushpa yaykuchiwashpa kushichiwananta. Jesukristu ñukanchita yanapashpan siluma kawsak rinanchipami Yaya Dioska ñukanchita akllashka.

¹⁵Kankuna shutipa Jesukristuta kirishpa kawsashpaykichika chay rimashkaynishinami kankunapas yuyarinaykichi tiyan. Shuk parti mana yachachishkaynishina yuyarishpaykichika Yaya Diosmi chaytapas kankunata asirtachinka. ¹⁶Tukuy ña yachakushkanchikunata akuychi alita rurashpa katishunchi.

¹⁷Wawkikuna panikuna, ñukashina kankunapas kawsaychi. Chaymantapas yachachishkanchita kasukkunapa

kawsahushkankunata rikuychi, chasnallatata kankunapas kawsanaykichipa. ¹⁸Achka runakuna yachachishkaynita uyashpangunatata Jesukristu kruspi wañushkanta chiknishpankuna mana kirinahunchu. Paykunaka Jesukristupa kuntrankunami kanahun. Achka kuti ña paykunamanta kankunata rimashkani. Kunan kutikashka llakirishpa wakashpa rimahuni. ¹⁹Chay runakunata Yaya Dioska nina mana wañukma kachanka. Yaya Diosta mana kasunayashpangunkuna mikunallata yuyarishpa kawsanahun. Pinkaypangunkata rurahushpangunkunas kushilla kawsanahun. Yaya Diosta mana yuyarishpangunkuna tukuy kay allpapi tiyashkakunallata yuyarishpa kawsanahun. ²⁰Ñukanchika mana chasnaka kawsananchi tiyanchu. Yachanchi siluka llaktanchi kananta. Chay silumanta Amunchi Jesukristu shamenanta chapashpa kawsahunchi ñukanchita pushashpan kishpichinanpana. ²¹Chasnaka silumanta shamuhushpan pay tukuyta kamachik tukuyta atipak kashpan kay wañuna aychanchita mushuyachinka paypa suma mana wañuk aychanshina kananpana.

Kushikushpa Jesukristuta katishunchi

4 ¹Chayrayku munashkayni wawkini-kuna paninikuna, Jesukristuta alita katiychi payta kasushpa kawsanaykichipa. Kankunata yuyashpayni yapa rikunayani. Kankuna Yaya Diospa shiminta yachachishkaynimanta alita kirishkaykichirayku yapa kushichiwan-kichi.

²Pani Evodia, pani Síntike, kankunata rimani: Jesukristuta kirishkaykichirayku yuyanakushpa shuk yuyayllawa kawsaychi. ³Yachachik masini, kanta tapuni chay panikunata yanapanaykipa shuk yuyayllawa kawsanankunapa. Chay

panikunaka parisinakunata mana manchashpa yapa yanapashkakuna wawki Klementewa shuk wawkunawa pakta Yaya Diospa suma ali shiminta Jesukristu runakunata kishpichinan-manta yachachihushkanchipi. Yaya Dios tukuy paykunata alita riksin. Shutinkuna killkarishka kanahun wiñaypa paywa kawsak runakunapa shutinkuna killkarishkapi.

⁴Jesukristuta kirishpa kawsahushpay-ichi tukuy uras kushikuychi. Kutikashka rimani: Kushikushpalla kawsaychi. ⁵Tukuy runakuna riksinan-kunapa llakichik yuyak runakuna kashkaykichita, yuyanakushpa kawsay-chi. Jesukristuka ñami shamunka.

⁶Mana nima imarayku yapa yuyarishpa kawsaychichu. Ashwan Yaya Diosta tukuyti tapuychi kankunata yanapananpana. Ali yuyaywa agradesishpa tapuychi. ⁷Chasnashpaykichi Yaya Dioska kankunata kushilla-yachinka yuyarinanchimanta pasa, nima imata manchashpa kawsanaykichipa. Paymi kankunata yanapanaka shunkuykichi, yuyaykic平ipas kushikushpa Jesukristuwa pakta kawsanaykichipa.

Ali ruranakunallata yuyariychi

⁸Chaymanta wawkikuna panikuna, tukuy shutipa rimanakunata, tukuy maykanmi Yaya Diospa rikushkanipi, runakunapa rikushkanipas ali rimanakuna, ali ruranakunapas kan, chaykunata yuyarishpa kawsaychi. Tukuy ali yuyaykunallata, ali ruranakunallata, tukuy munaypangunkuna, tukuy ali kushichik rimanakunata yuyarishpa kawsaychi. Tukuy runakunapa ali rurahushkankuna, maykanmantami shukkunaka rimanahun yapa alimi nishpa, tukuy chaykunata yuyarishpa kawsaychi.

⁹Tukuy yachachishkaynita alita kasushpa kawsaychi. Kankuna ali

rimashkaynita uyashkankichi, alita rurashkaynitapas rikushkankichi. Chayrayku kankunapas ñukashina alita rimashpa rurashpa kawsaychi. Chasna kawsashpaykichimi ñukanchita kushilla kawsayta kuk Yaya Dioska kankunawa pakta kawsanka.

**Pablo Filipošmanta kirikkunata
agradesin yanapashkankunaryku**

¹⁰Amunchi Jesukristuta kushikushpa agradesini, kankuna yuyawashpaykichi kuti kullkita kachawashkaykichirayku. Yapa yanapawanana munashpaykichipas unayta mana atiparkankichichu kullkita kachawanata. ¹¹Mana rimanayanichu, kullkini pishiwahushpan kachapaychi nishpa. Nukaka ñami yacharishkani tiyawashkanllawa kunkaylla kawsanata. ¹²Achka tiyawashpan mana tiyawashpanpas yacharishkanimi kushilla kawsanata. Saksakta mikushpayni mana mikushpaynipas achka imayu kashpayni mana imayu kashpaynipas ñami yacharishkani kushilla kawsanata.

¹³Parisishkaynipi Jesukristu sinchiku-chiwashpan tukuy paypa munashkanta atipani ruranata. ¹⁴Chasna kashpanpas alita rurashkankichi munahushkaynipi yanapawashkaykichirayku.

¹⁵Kankuna Filipoš llaktapi kawsakkuna alita yachankichi nima shuk llaktapi kawsak kirikkuna yachachishkaynirayku agradesiwashpa kullkiwa yanapawashkankunata. Masedonia allpaykichipi llaktakunamanta llukshishpayni shuk llaktakunapi chay suma ali shimita Jesukristu runakunata kishpichinanmanta yachachinaynipa, puntirumanta pacha kankunallami alita yachachishkaynirayku agradesiwashpa kullkita kachapashkankichi.

¹⁶Tesalónika llaktapira kahushpayni ña achka kuti ofrendaykichita ñukarayku kachashkankichi shuk ima pishiwahush-

kata rantinaynipa. ¹⁷Tukuy chaykunaryku agradesishpayni kankunata mana tapunichu kutikashka ñukarayku ofrendaykichita kachapanaykichipa. Ashwan munanimi ofrendaykichita kuwashkaykichirayku Yaya Dios kankunata alita rurak runakuna kankichi nishpa kushichinanpa. ¹⁸Ñami apishkani kachawashkaykichi kullkita wawkinchu Epafroditomanta. Chayraykumi kunanka mana nima ima pishiwahunchu, ña achka tiyawan. Chasna kachapashkaykichiwa Yaya Diosta yapa kushichishkankichi. ¹⁹Chasna kashpan Yaya Dios maykantami kasushpa kawsani kankunatapas tukuy ima pishihushkanta kunka. Tukuy ali tiyashkakunapa amun kashpan Yaya Dios Jesukristuwa kankunata tukuy munashkaykichita kunka. ²⁰Chasna yapa ali kashpan akuychi tukuy uras wiñayparayku Yayanchi Diosta atunya-chishpa kushichishunchi. Chasna kachun.

Pablo kirikkunata saludan

²¹Tukuy chaypi Jesukristuta kirik masinchikunata saludapaychi. Tukuy ñukawa kahuk wawkikunapas kankunata saludanahan. ²²Chaymanta tukuy kaypi kahuk Jesukristuta kirik masinchikunapas kankunata saludanahan. Kankunata yapa yuyashpankuna tukuymanta ashwan saludanahan *romano tukuymanta atun apupa runankunamanta Jesukristuta kirikkuna.

²³Amunchi Jesukristu kankunata llakichishpan munashkanta karan shuk kankunapi paktachichun.

Chayllata killkashkanchi.

Wawkikichikuna turikichikuna
Pablo, Timoteo

PABLOPA KILLKASHKAN KILLKA KOLOSA LLAKTAPI JESUKRISTUTA KIRIKKUNARAYKU

**Pablo Timoteowa Kolosa llaktapi
kawsak Jesukristuta kirik
masinkunata saludanahun**

1 ¹⁻²Munashkanchi wawkinchikuna paninchikuna, ñuka Pablo wawki Timoteowa pakta kay kartata killkahunchi. Ñuka Pablo Yaya Dios munashpan Jesukristupa *apostolnin tukushkani. Kankuna Kolosa llaktapi Jesukristuta kirik masinchikuna Yaya Diospa akllashkan runankunarayku kay kartata killkahunchi. Yayanchi Dios kankunata llakichishpan yanapachun kushilla kawsanaykicipa.

**Pablokuna Yaya Diosta kirik
masinkunarayku mañahanuhun**

³Tukuy uras Amunchi Jesukristupa Yayan Diosta kankunarayku mañashpa agradesinchi. ⁴Sumakta *Kristu Jesusta kirishpa kawsahushkaykichita uyashkanchi. Chaymantapas yakashkanchi tukuy ñukanchi kirik masikichikunata yuyashpa kawsanaykicipa. ⁵Chasna kawsahunkichi yakashkaykichirayku siluma rinaykichita, chaypi Yaya Dios kankunarayku wakayhashkan alikunata kuy tukunaykicipa. Chasna tukunaykichita yakashkanchi shutipa kashkata riksichik suma ali shimita Jesukristu runakunata kishpichinanmanta uyashpaykichi.

⁶Chay yachakuhushkaykichi shimi tukuy llaktakunapipas paktahun. Achka runakuna chayta kirishpankuna Jesukristuta kasuk tukuhunkuna.

Chaymantapas imashnami kankuna puntiru chay shimita uyashkaykichimanta pacha ashwanta ashwanta kasushpa kawsahunkichi, chasnallatata tukuy parti kirikkunapas kawsahunkuna. Chay shimita uyashpaykichi asirtashkankichi Yaya Diosmanta shutipa kashkata rimak kananta, paylla munashpan ñukanchita uchanchikunamanta pichananta ñukanchirayku rurashkanpi sinchikushpanchi.

⁷Chaytaka munashka wawkinchi Epafrasmi ñukanchiwa pakta sumakta kankunata yachachirka. Kristuta alita kasuk kashpan kankunata sumakta yanapashka. ⁸Chaymantapas paymi ñukanchita kwintak shamurka Yaya Diospa Espíritun kankunata yanapashpan yuyanakushpa kawsahushkaykicha.

⁹Chasna wawkinchi Epafras kwintawashkanmanta pacha tukuy uras mañahunchi Yaya Dios kankunata yanapananpa. Kankunarayku mañahanuchi Yaya Diospa munashkanta alita riksinaykicipa, chaymanta paypa Espíritun kankunata yanapananpa, yachaywa kawsanaykicipa alita

asirtashpa maykanmi Yaya Diosmanta maykanmi supaymanta.¹⁰Chasna atipankichi Yaya Diospa munashkanta rurashpa, payta kushichishpa kawsanata, tukuy alikunata rurashpa, imashnami kawsanaykichi tiyan payta riksishkaykichirayku. Chaymanta ashwanta ashwanta Yaya Diosta riksishpa rihunkichi.¹¹Chasna kawsash-paykichimi Yaya Dios kankunata atun yachayninwa yanapanka, parisinakuna kankunapi paktashpanpas sinchikurispalla katinaykipa. Chasnami imashnina pasahushpaykichipas mana sampaayashpa payllata kasushpa kawsan-kichi.

¹²Chaymanta kushikushpa Yaya Diosta agradesinkichi. Payka kankunata tukuy ñukanchiwa pakta wawankunata rurarka shuk puncha paywa pakta silipi suma chuya punchapi kawsananchipa.

¹³Payka ñukanchita kishpichishka supaypa kamachishkan kashkanchimanta, yuyashkan Wawanpa kamachishkan tukushpa paypa ali kamachihushkanpi kawsananchipa.

¹⁴Pay ñukanchirayku kruspi wañushpan Yaya Dioska uchanchikunamanta llakichishpan ñukanchita kishpichishka.

**Jesukristu wañushkanrayku Yaya
Dioska ucharanti piñayninta
pasachirka**

¹⁵Jesukristu Yayanwa chasnalla yachayyu yuyayyu kashpan runa tukushpan ñukanchita riksichirka imashnami mana rikuypa Yayan Dioska. Manara nima ima rurashka kashpanra pay ña tiyarka. Chayrayku tukuy rurashkakunamanta pasami kan.¹⁶Yaya Dios munashpan *Kristuka tukuy silipi allpapi tiyashkakunata rurarka, rikuypakunata, mana rikuypakunatapas. Tukuy mana rikuypa atun yachayyu kamachikunata, tukuy shuk kamachikkunatapas

Kristumi Yayan Diospa yachayninwa rurarka tukuy payrayku kanankunapa.¹⁷Manarapas nima ima tiyahushpanra Kristuka ña tiyarka. Pay mana tiyamaka, ñukanchipas manami tiyanchimachu karka. Pay tukuyta kuyrashkanrayku-llami kunankama tukuy tiyan.¹⁸Chaymantapas Kristumi tukuy kirikkunata kamachik tukushka, imashnami umanchika tukuy aychanchita purichin. Payka tukuy wañushkakunamanta puntiru wiñayparayku kawsarirka tukuymanta atun apu kananpa.¹⁹Kristu paypa Wawan kashkanrayku Yaya Dioska munarka tukuypi paywa parihu chasnalla yuyayyu musyayyu yachayyu atipayyu kananpa.²⁰Chaymantapas Yaya Dios munarka Kristuwa tukuyrayku paywa shuk alichanata ruranata. Kristu kruspi wañushpan yawarnin shuturishkanrayku ucharanti piñayninta pasachirka. Chasna kashpan tukuy silipi tiyakkunarayku, kay allpapi tiyakkunaraykupas Yaya Dios Kristuwa alichashka tukuy atipananchipa paywa kushilla kawsanata.

²¹Kankuna ñawpa manara Yaya Diosta kasuk kashpaykichi uchallata rurashpa, Yaya Diosta chiknishpa piñarishpa kawsapayarkankichi.

²²Kunanka Yaya Diospa Wawan Kristu runa tukushpan wañushkanrayku Yaya Dios uchaykichikunantari piñayninta pasachirka kushillana paywa kawsanaykichi. Chayta rurarka shuk puncha kankunata paypa puntanpi suma ucha illata churananpa, nima pi kankunamanta atipanarpa millaypata rimanata.

²³Chasna paypa puntanpi paktanaykipa kankuna tukuy uras chasnalla payta kirishpa kawsanaykichi tiyan. Chaymantapas silipi Yaya Dioswa pakta kawsak rinaykichita chapashpalla kawsanaykichi tiyan. Chayma rinaykichita yachashkankichi chay suma ali

shimita Jesukristu runakunata kishpichinanmanta uyashpaykichi kirishkaykichirayku. Chay uyashkayki-chi suma ali shimita tukuy mundupi kawsak runakunapas uyashkakuna. Ñuka Pablopas chay shimitami yachachik kani.

Pablo riman Yaya Dios payta akllashkanta tukuy kirikkunata yanapananpa

²⁴Kay karselpi parisihushpaynipas mana imananchu. Kushikuhunilla yachashpayni kay parisihushkaynika kankunata yanapak kananta. *Kristu parisirka ñukanchi runakuna atipananchipa payta kirikkuna tukunata. Ñuka kunan aychaynipi parisihuni, maykanmi pishin Kristu parisinaynita rimashkanta paktachinaynipa. Chasnami payta kirikkunata sinchikuchini, chaymantapas achka runakunata yanapani paywa shuk aychashina tukunankunapa. Ñukanchi Kristuta kirikkunaka paypa aychanshinami kanchi. ²⁵Kristuta kirikkunatami yanapanaynipa Yaya Dioska ñukata akllawarka. Payka munanmi tukuy paypa shiminta mana pishichishpa kankunata yachachinaynipa. ²⁶Chay shimita Yaya Dioska tukuy yaya rukunchi wañukunata manara riksichishkanta kunan shuti ñukanchi payta kirikkunata riksichishka. ²⁷Yaya Dios kikin munashpan ñukanchi kirikkunata riksichirka chay ñawpa mana riksishkanchi rimashkan yapa ali suma ruranayashkanka tukuy allpakunamanta runakunaryku kananta. Chay ñawpa mana riksishkanchi shimika kan Kristu kawsan kankuna mana israel runakunapipas nishpa. Chasnashina kashpan kankunapas paywa pakta tantaylla silipi kawsanata chapashpa kushillana kawsankichi.

²⁸Kristu ñukanchita kishpichik kanantami tukuy runakunata yachachichunchi, tukuy paykunata kunashpa

yachachishpa Yaya Dios tukuy yachayta kushkanwa. Munanchimi Kristuta kirishpankuna yachakushpa yachakushpa rishpankuna ali kirikkuna tukunankunata. ²⁹Chayrayku Kristu sinchikuchiwashpanmi alita asirtachishpa, mana sakishpa tukuy kankunata yachachihuni.

2 ¹Wawzikuna panikuna, munani yachanaykicipa, kankunata mana riksishpaynipas yapa yuyashpayni mana sakishpa mañahuni Yaya Diosta kankunaryku. Chasnallatata rurahuni Laodisea llaktapi kirikkunaryku shuk mana riksiwak kirikkunarykupas.

²Payta mañahuni tukuy kankunata yanapananpa parihulla ashwan yuyankushpa kawsashpaykichi shunkuykipi sinchikuchiy tukunaykicipa. Atunta payta tapuni ñawpa manara nima pita alita riksichishkanta kunan alita riksishpaykichi sumakta asirtanaykicipa. Chay ñawpa manara riksichishkanka kanmi Kristuta kachashpan ñukanchirayku rurashkan.

³Jesukristullami Yaya Diospa suma ali yachayninta, ali yuyayninta ñukanchita riksichin.

⁴Chayta kankunata rimani nima pi ali shimikunawa llullachishpa yuyaykicha pantachichinanpa. ⁵Kankunawa mana kahushpaynipas yuyaynipika kankunawa pakta kahuni. Chayrayku shuk yuyayllawa kahushkaykicha, Kristuta alita katihushkaykicha yachashpayni kushikuni.

Jesukristuwa tantaylla mushu kawsanamanta riman

⁶Imashnami Jesukristuta yuyashpa kayashkankichi Amuykichi kananpa, chasnashina payllata kasushpa kawsaychi. ⁷Shuk kaspi sumakta ankuyashpan alita wiñan. Chasnashina kankunapas yachakushkaykichishina Jesukristuta

sumakta kirishpa, mana sakishpa kawsanaykichi tiyan, Yaya Diosta achkata agradesishpa.

⁸Alita yuyariyichi, mana shukkuna runakunapa yuyarishkankuna kirinakunawa yanka llullachina shimikunawa kankunata pantachichinankunapa. Chayka runakuna yaya rukunkunamanta yachakushkankunallami, chaymantapas kay mundupi kamachik supaykunapa yuyachishkankunami, manami *Kristumantachu. ⁹Kristulla Yaya Diosllatata kashpan tukuypi paywa parihu chasnalla yuyayyu musyayyu yachayyu atipayyu kan.

¹⁰Kankunaka Kristuwa shukllashina kashkaykichirayku Yaya Dios kankunapipas kawsan. Kristuka tukuy apukunapa apunmi, tukuy yachaywa kahukkunamanta, *angelkunamanta, supaykunamantapas ashwan atun kamachikmi.

¹¹Kankuna Kristuwa shukllashina tukushkaykichi uras payka tukuy mana alita rurashkaykichimanta kankunata kishpichirkka manana chay mana alikunata rurashpa kawsanaykichipa. Chasnami shunkuykichi pitichirishkashinana tukushkankichi, mana aychallapichu, imashnami ñukanchi israel runakuna rurapayanchi.

¹²Bawtisarishpanchimi Kristuwa shukllashina kashpa ñawpa kawsashkanchita sakishpanchi paywa pakta wañushpa urku uchkupi taparishkashina tukushkanchi. Chasnallatata kirishkanchiraykumi paywa pakta kawsarishkashina mushu kawsaytana charinchi. Yaya Dios yanapashpan kirishkanchi Kristuta wañushkanmanta kawsachishka kashpan yapa atun yachayyu kananta. ¹³Imashnami shuk wañushka runa mana atipanchu ruranata nima imata, chasnashinami ñawpaka kankunaka shuk wañushka

runashina mana atipashkankichichu alikunata ruranata. Uchayu kashpaykichi yapa millaypata rurashpa kawsashpaykichi Yaya Diospa rikushkanpi wañushkashina karkankichi. Chasna kashpanchi Yaya Dioska ñukanchita Kristuwa pakta kawsachishkashina, uchanchikunamanta llakichishpan yuyayninchita mushuyachishka, Kristuwa shuk yuyayllawa alita rurashpa kawsananchipa.

¹⁴Yaya Diospa kamachishkanta mana alita paktachishpanchi uchayu karkanchi. Chay uchanchimantami Yaya Dios ñukanchita kastiganan karka. Kristu ñukanchiranti kruspi wañushpan Yaya Dioska ñukanchita uchanchikunamanta llakichirka. Chasna liwishkanchita pagakshina ñukanchita uchanchikunamanta kishpichirkka manana nima pi payta atipanarpa rimak rinata mana alita rurashkanchikunamanta.

¹⁵Kristuka kruspi wañushpan Yaya Dioska tukuy chay ñukanchita kamachik supaykunata winsirka manana ñukanchita kamachikkuna kanankunapa. Chasna rurashpan rikuchirkka Kristu tukuy paykunamanta yapa pasa atipak kananta.

**Pablo yachachin runakunapa
yuyayninkunata katina mana ali
kananta**

¹⁶Tiyan kasna rimak runakuna: Shuk mikunakunata mikushpaykichika shuk upyanakunata upyashpaykichika Yaya Diospa rikushkanpi mana alitachu rurankichi nishpa. Chaymanta karan watapi tantarina punchakunata, mushu killakunata, *samana punchakunata kamachishkakunapi rimashkashina mana pasashpaykichika Yaya Diospa rikushkanpi mana alitachu rurankichi nishpa. Chasna rimashpankunapas paykunata mana kasuychichu. ¹⁷Tukuy

chaykunawa manara Jesukristuta kachashpan Yaya Dios yuyachinayarka ñukanchi Jesukristupi sinchikukkunaryku ruranan kashkata. Kunanka Jesukristu shamushpan ñukanchirayku rurashkanwa mushu kawsayta kushkanwa Yaya Dioska ñami paktachishka tukuy chay ñawpa kamachishkan mikunawa, tantarinakunawa, tantarina punchakunapi ruranakunawa yuyachinayashkanta.

¹⁸Chay kunkunata llullachik runakunata ama kiriychihu. Paykuna Yaya Diospa puntanpi nima imachu kani nishpa alishina tukushpankuna *angelkunata mañashkankunawa paykuna kikinta atunyachirinahun. Muskuypishina rikushkankunamanta kwintashpankuna shukkunata kasuchinayanahun. Paykuna kikin yuyayninkunnallata katishpa yanka munay atunyachirinahun. ¹⁹Chasna yuyarik runakunata *Kristuta mana kasunahunchu. Ñukanchi kirikkunaka Kristupa aychashinami kanchi. Payka chay aychata purichik umashina kashpan tukuy ñukanchita kamachihun. Tukuy ñukanchi shuk yuyayllawa payta kasushpa alita yanapanakushpa kawsashpanchika ashwanta ashwanta sinchikushpa Yaya Diospa munashkanta rurashpa rihunchi.

²⁰Imashnami shuk wañushka runaka ñawpa kawsashkanta sakishka, chasnashina kankunapas wañushkashina kashkaykichirayku sakishkankichi kasunata runakuna kasuhushkankuna kirinakunata. Kristuwa shukllashina tukushkaykichirayku pay wañushpan kankunapas ñawpa kawsashkaykichita sakishpaykichi wañushkashina tukushkankichi. Chasna kashpan ñimayaykutaya kunan kuti Yaya Diosta mana kasukkunashina runapa yuyarishkunkunata kasunayankichi? ²¹Payku-

naka rimahanuh: Kayta llankanaka mana alichu. Chaykunata mikunaka mana alichu. Chay shuk imakunatapas apinaka mana alichu nishpa. ²²Chay kamachinakunaka yachachinakunaka runa yuyaylla kanahun. Imakunawa ruranakunamantalla rimahanuh, maykankunami tiyan shuk raturaykulla runata sirvihushkanpi tukurinankunapa. ²³Puntiru yuyarishpa chay kamachinakunaka yachachinakuna ali yachaywa rimarishka kanahun. Ñukanchita rimahanuh runakuna yuyarishkankunata imashnami Yaya Diosta kushichinanchi tiyan nishpa. Yachachinahun imashna rurashpami ñukanchi kikinta mana atunyachirinchihu nishpa, imashnami aychanchita parisichinanchi tiyan ali tukunanchipa nishpa. Tukuy chaykuna ali rikurishpankunapas manami alichu kanahun. Nima imapi yanapakchu kanahun Yaya Diosta kushichishpa kawsananchipa. Ashwan runakunata sinchikuchinahun mana ali munashkankunata katishpa, paykuna kikin yuyarishkankunamanta rurashkankunamanta atunyachirishpa kawsanan-kunapa.

Jesukristuwa pakta kawsanamanta riman

3 ¹Kankuna Jesukristuwa shukllashina tukushkaykichirayku Yaya Dios payta wañushkanmanta kawsachi-mushpan kankunapas wañushkashina kashkaykichimanta kawsachiy tukushkashina kahunkichi alitana rurashpa kawsanaykicipa. Chayrayku yachashpaykichi *Kristu Yaya Diospa kuskan parti tiyahushkanta tukuy ima tiyashkata kamachinanpa, ashwanta ashwanta paypi sinchikushpa tukuy munaywa paypa munashkanta rurashpa kawsaychi. ²Yaya Diosma rina kahushkaykichita yuyarishpa payllata

kushichishpa kawsaychi. Manana kay allpallapi kawsanata yuyarishpa runapa munashkanta katishpa kawsaychichu.
³Yuyariyichi wañuskashina tukushkay-kichita manana ñawpashina kawsanay-kichipa. Kunanka kawsachiy tukushka-shina Kristuwa kawsahunkichi Yaya Dioswa pakta. Chay mushu kawsanayki-chika runakunaryaku pakallahinami mana asirtaypa kan. ⁴Kristu kankunata paywa pakta kawsayta kuk kuti kay allpama shamuhushpan tukuy runakuna payta rikushpankuna kankunatapas paywa pakta suma ucha illa chuyahlla kahushkaykichita rikunkakuna.

⁵Chayrayku ama munaychichu Yaya Diosta mana kasuk runakunashina kawsanata. Millaypata ruranaykichita sakiyichi. Manana musayaychichu. Manana aychaykichiwa pinkaypa ruranakunata ruraychichu. Manana tukuy sinchi musyanaykichita kasushpa, nima millaypata munanaykichita yuyarishpa kawsaychichu. Manana tukuy imakunata munarishpa kawsaychichu. Chasna imakunata munarishpa kawsashpaykichika Yaya Diosta yuyanaykichi imata imakunallatana yuyashpa kawsankichi. ⁶Chasma mana ali ruranakunamanta Yaya Dios sinchita piñarishpan tukuy payta mana kasukkunata sinchita kastiganka.

⁷Ñawpa kankunapas Yaya Diosta chay mana kasukkunashinallatatami mana alita rurashpa kawsapayarkankichi.
⁸Kunanka Yaya Diosta kasushpa kawsashpaykichi manana piñarishpa, nima pita chiknishpa kawsaychinachu. Manana millaypata rurashpa, kaminkushpa, nima pinkaypa shimikunata rimashpa kawsaychinachu. Tukuy chaykunata sakiyichi.

⁹⁻¹⁰Manana shukwa shukwa llullanakushpa kawsaychinachu. Imashnami shuk yapa mawka liki liki llachapata

wichunchi, manana valinnachu nishpa, chasnashina chay ñawpa millaypa kawsashkaykichita sakiyichi. Yaya Dios kankunata mushu runata rurashkan-rayku chay mushu runashina kawsaychi. Chasna kashpaykichi Yaya Dios mushu runata rurashkaka yanapashpan yuyaykichika mushuyashpa rihun ashwanta ashwanta payshina aillata rurak tukushpa payta alita riksinayki-chipa.

¹¹Mana imananchu israel runa, mana israel runa kashpanchipas. Mana imananchu ishpananchi kara puntata pitishka, mana pitishka kashpanchipas. Mana imananchu shuk allpamanta runa kashpanchipas, killkata mana yachak runa kashpanchipas, patronyu runa, mana patronyu runa kashpanchipas mana imananchu. Tukuy ñukanchikuna chikan chikan runakuna kashpanchipas kunanka Kristu ñukanchipi kawsahushpan Yaya Diospa rikushkanpika tukuy parihulla kanchi. Kristuka tukuy ñukanchipi kawsak kan, paylla tukuyta ruran.

Alikunallata rurashpa kawsananchi tiyan

¹²Yaya Dios kankunata yapa yuyashpan akllarka paypa wawankuna kanaykichipa. Chasna Yaya Diospa wawankuna kashpaykichi shukwa shukwa llakichinakushpa kawsaychi. Ali shunku runakuna kaychi. Ama yuyariy-chichu shukkunamanta ashwan ali kanaykichita. Shukkuna kankunata chiknishpa rimashpankunaka ali yuyaywa aillata ayniyichi. Ama utkalla runa masikichita piñariyichichu, nima sampayaychichu paykunata yanapanata.

¹³Shuk runakuna kankunata mana alita rurashpa piñachinayashpankunaka ali yuyaywa awantaychi. Shuk runa kankunata mana alita rurashpanka

llakichiychi. Amunchi Jesukristu kankunata uchaykichimanta llakichish-kanshina, kankunapas runa masikichita mana ali rurashkankunamanta llakichishpa kawsaychi.¹⁴ Tukuy ali ruranaykichimanta ashwan alimi kan shukwa shukwa yuyanakushpa kawsana. Yuyanakushpa kawsashpaykichimi shuk yuyayllawana kawsankichi, nima ima arkašhpa.¹⁵* Kristu ūukanchirayku alichashpan Yayan Dioswa, chaymanta-pas shukwa shukwa kushillana kawsananchipa, tukuy uras atipashkay-kichita ruraychi tukuywa kushilla kawsanaykicipa. Yaya Dioska ūukanchita akllarka shuk aychashinalla kashpanchi shukwa shukwa yuyana-kushpa kushilla kawsananchipa. Chayrayku Yaya Diosta agradesishpa kawsaychi.

¹⁶Kristupa ali shiminta tukuy uras yachakushpa yuyarishpa kawsaychi. Chay shimita yachaywa yachachinakushpa, sinchikuchinakushpa kankunapura kawsaychi. Chasna shukwa shukwa yanapanakuychi Kristuta ashwan alita katinaykicipa. Yaya Diosta tukuy shunkuykichimanta pacha agradesishpa takiychi salmokunata, korokunata, Yaya Diospa Espíritu yuyachishkan takinakunatapas.¹⁷ Tukuy rimahushkaykichi, tukuy rurahushkaykichi Amunchi Jesukristu munashkanshina kachun. Pay alichashpan Yaya Dioswa kwintananchipa Yaya Diosta agradesishpa kawsaychi.

Imashnami Jesukristuta kasushpa kawsanaka

¹⁸Kankuna kusayu panikuna, kusayki-chita alita kasushpa kawsaychi. Chasnami Jesukristuka munan kawsanaykicipa payta kirikkuna kashpaykichi.¹⁹ Warmiyu wawkikuna, warmikichita alita yuyaychi. Warmiki-chita ama chiknishpa kawsaychichu.

²⁰Wawakuna, mamaykichita yayayki-chita alita kasushpa kawsaychi. Chasna kasushpaykichimi Yaya Diosta kushichinkichi.²¹ Yayakuna mamakuna, wawaykichita yuyashpa mana yankamanta piñachishpa wiñachiychi, paykuna manchak mana tukunanku-napa yachakunata manana munakkuna.

²²Patronyu runakuna, patroykichita tukuypi alita kasushpa kawsaychi. Ama paypa rikuhashkanllapi alita kasukshina kaychichu paykunata kushichinayki-chipa. Ashwan patroykichi rikuhashpan mana rikuhashpanpas ali yuyawa alita tarawaychi Jesukristuta alita kasukkunashina.²³ Tukuy ima rurahushkaykichi-chipi kushilla mana killashpa alita tarawaychi Amunchi Jesukristuta kushichinaykicipa mana runakunata-chu.²⁴ Ña yachankichi payta kushichishpa kawsashpaykichi kankunata paywa pakta silipi kawsanata kunanta. Chayrayku *Kristu Amuykichi kashpan payta kasushpa kawsaychi.²⁵ Maykan runami mana alita rurashpa kawsashpanka paytaka Yaya Dios chay millaypa rurashkan-manta kastigankami, mana imananchu pipas kashpan, paypa rikushkanpi tukuy runakuna parihulla kashkanchirayku.

4 ¹Kankuna patronkuna, kamachinay-ki-chi runakunata alita kuyrashpa tarawachiychi, chaymantapas paykunata kuychi imatami munanahun alita kawsanankunapa. Ña yachankichi kankunapas Amuykichi tiyananta silipi.

Ali kunanakuna

²Wawkikuna panikuna, ama sakiyichi-chu Yaya Diosta mañanata. Tukuy uras sinchikushpalla, mana sampayashpa, Yaya Diosta agradesishpa mañaychi.

³Chasna mañahushpaykichi ūukarayku-pas Yaya Diosta mañaychi, pay yanapa-

washpan nima pi arkawanana pa paypa
shiminta alita yachachinaynipa *Kristu
ñukanchirayku ruranayashkanmanta
ñawpa mana yachashkanchita. Chayta
yachachishkayniraykumi karselpi
kahuni. ⁴Yaya Diosta mañaychi kay
karselpi kahushpaynipas chay shimita
runakunata yachachishpa katinaynipa,
imashnami ruranayni tiyan.

⁵Kankuna Jesukristuta kirikkuna,
yuyaywa kawsaychi mana kirikkuna
chawpipi. Karan atipashkaykichi uras
mana killashpa alikunata ruraychi.
⁶Paykunawa kwintashpa kahushpayki-
chi tukuy uras paykunata yuyashpa ali
shimikunawa kwintaychi shutipa
kashkata. Chasna paykunawa kwintash-
paykichi yachankichi imashnami karan
shukta ayninaykichi tiyan.

Pablokuna kirikkunata saludanahun

⁷⁻⁸Ñukamanta yachanaykichipa
imashnami kay karselpi kahuni munashka
wawkinchi Tikikota kankunama kachahuni
kankunata kwintak rinanpa. Payka ñukata
alita yanapawakmi kan. Ñukawa pakta
Amunchi Jesusta kasuk alita yachachik
kan. Payta kankunama kachahuni
ñukamanta yachanaykichipa, chaymantapas
kankunata sinchikuchinanpa ashwan
alita Yaya Diosta kasunaykichipa.
⁹Tikikowa pakta kachahuni chay llaktayki-
chimanta riksishkaykichi munashka
wawkinchi Onesimota. Pay Jesukristuta
alita kirik tukushka. Kay wawkinchikunaka
kankunata kwintankakuna imashnami
kaypi kahunchi.

¹⁰Wawkinchi Aristarko karselpi churay
tukushka masini kankunaryku saluduta
kachan. Bernabepa primun Markuspas
kankunaryku saluduta kachan. Ñami
kankunata rimashkani, Markus kankunata
pasyak rishpan alita wasikichipi yaykuchi-
naykichipa. ¹¹Chay wawkinchi Jesús Justo
shutiyupas kankunaryku saluduta kachan.

Tukuy Jesukristuta kasuk ñukanchi israel
runakunamanta chay kimsa wawkinchiku-
nallami ñukawa pakta Yaya Dios
runakunata kamachinanmanta
yachachishpa purihunkuna. Chasna
purishpankunami ñukata yanapawashpa
sinchikuchiwashkakuna. ¹²Llaktaykichi-
manta runa wawkinchi Epafraspas
kankunaryku saluduta kachan. Paypas
*Kristu Jesusta kasuk kashpan Yaya Diospa
shiminta yachachin. Tukuy uras kankunaryku
Yaya Diosta sinchita mañashpa
kawsan, kankuna Yaya Diosta sumakta
yuyak allillata rurak tukunaykichipa
chaymantapas tukuy paypa munashkanta
alita riksikkuna. ¹³Yachani pay kankunaryku
tukuy shunku munashkawa Yaya
Diosta mañahushkanta. Laodisea llaktapi,
Yerápolis llaktapi kirikkunarykupas alita
mañan. ¹⁴Munashkanchi wawkinchi doktor
Lukaspas, wawkinchi Demaspas kankunaryku
saluduta kachanahun.

¹⁵Laodisea llaktapi kirik masinchikunata
saludapaychi. Chasnallatata pani
Ninfata wasinpi tantarikkunatapas
saludapaychi. ¹⁶Kay killkata kankunapura
leyishkaykichiwasha Laodisea
llaktama kachaychi, chaypi kawsak
kirik masinchikunapas leyinankunapa.
Chasnallatata Laodisea llaktama
kachashkayni killkata kankunapipas
paktashpan leyiychi. ¹⁷Chaymanta
wawkinchi Arki- pota rimaychi:
Jesukristu kanta kamachishka paypa
shiminta yachachinaykipa. Chay
kamachishkanta alita paktachiy nishpa.

¹⁸Ñuka kíkin makiniwa killkashpaynim
kay saluduta kachahuni. Mana kunkariy-
chichu karselpi kahushkaynita. Yaya Dios
kankunata llakichishpan yanapachun.

Chayllata killkashkanchi.

Wawkikichikuna turikichikuna
Pablo, Timoteo

PUNTIRU PABLOPA KILLKASHKAN KILLKA TESALÓNIKA LLAKTAPI JESUKRISTUTA KIRIKKUNARAYKU

**Pablokuna Tesalónika llaktapi
kawsak kirikkunata saludanahun**

1 ¹Munashkanchi wawkinchikuna paninchikuna, ñuka Pablo Silvanowa Timoteowa pakta kay kartata killkahunchi tukuy kankuna Tesalónika llaktapi tantarik Yaya Diospa wawan-kuna, Jesukristuta kirikkunaryku. Yaya Dios kankunata llakichishpan yanapachun kushilla kawsanaykichipa.

**Tesalonikapi Jesusta kirikkuna
alita rikuchikkuna
kanankunamanta riman**

²Tukuy uras mañahushpanchi kushikushpa agradesinchi Yaya Diosta kankunaryku. ³Yaya Diosta agradesinchi sumakta Jesukristupi sinchikushpa kawsahushkaykichita rikuchihushkaykichirayku, payta runa masikichikunatas pas yuyashpa paykunata alita yanapashpa sinchita tarawahushkaykichirayku, chaymantapas Jesukristupa kutimunanta mana sakishpa chapahushkaykichirayku. ⁴Wawkinchikuna paninchikuna, alita yachanchi Yaya Dios kankunata yapa yuyashpan akllashkanta paypa wawankuna kanaykichipa.

⁵Kankunata kay suma ali shimita Jesukristu runakunata kishpichinan-

manta rimahushpanchi manami shimillawachu yachachirkanchi. Ashwan Yaya Diospa yachayninwami yachachirkanchi. Paypa Espíritun ñukanchiwa pakta kahushpan kankunata riksichirka rimashkanchika shutipa kananta. Ñukanchi chay shimita shutipa kashkanta yachashpa kankunata yachachirkanchi. Chaymantapas yachachishkanchita paktachishpa kawsashpanchi kankunata rikuchirkanchi shutipa kananta. Alita yachankichi imashna alitami rikuchishkanchi kankunata yanapananchipa shutipa kirikkuna tukunaykichipa.

⁶Rikuchishkanchimanta yachakushpaykichi ñukanchishina Amunchi Jesusshinapas alita rurak tukushkankichi. Shuk runakuna kankunata parisichishpankunatata Yaya Diospa Espíritun kankunata kushichishpan Jesukristumanta ali shimita kushikushpa kasurkankichi alimi ñukarayku nishpa. ⁷Chasna kawsashpaykichi tukuy Masedonia allpapi tukuy Akaya allpapi kawsak Jesusta kirikkunata rikuchishkankichi imashnami alita kawsanankuna tiyan.

⁸Kankunamanta Yaya Diospa shimin paktarka tukuy partima. Mana Masedoniallapichu, mana Akayallapichu

paktarka. Maypipas rishpanchi uyanchi Yaya Diosta kiriushkaykichimanta. Ñukanchika mana atipanchichu rimanata kirik kahushkaykichimanta. ⁹Ashwan tukuy runakuna kwintanahun imashnami kankunapi paktashpanchi ali munaywa ñukanchita yakyuchirkankichi. Chaymantapas kwintanahun imashnami runakunapa rurashkankuna yanka dioskunata wichushkankichi kikin Yaya Dios kawsatana kushichishpa kawsanaykicipa. ¹⁰Chaymantapas kwintanahun Yaya Diospa Wawan Jesús silumanta kutimunanta alita chapahushkaykichita. Chay Jesustami Yaya Dios wañushkanmanta kawsachirka. Paymi ñukanchita kishpichik kan mana Yaya Dios uchanchikunaranti sinchi piñaywa kastigananpa.

**Imashnami Tesalonikapi kawsak
runakuna Pablokunata
yakyuchirkakuna**

2 ¹Wawkinchikuna paninchikuna, kankuna ña yachankichi ñukanchi kankunama rishkanchika mana yanka kashkanta, ashwan Jesusmanta yachachishpanchi kirik tukurkankichi. ²Alita yachankichi manara kankunapi paktashpanchi Filipos llaktapi ñukanchita yapa millaypata rurashkankunata. Chaypi yapa parisishpanchispas Yaya Dios ñukanchita sinchikuchishpan kankunama rirkanchi. Chasna sinchikushpanchi llaktaykicipi yapa ñukanchita chiknik runakuna tiyashpanpas mana manchashpachu chay suma ali shimita Yaya Diosmanta kankunata yachachirkanchi. ³Ali yuyaywa kankunata kunarkanchi Jesusta kirinaykicipa. Mana millaypa yuyawachu yachachirkanchi kankunata pantachichishpa llullachishpa. ⁴Ashwan Yaya Dios paktachinanchita riksishpan ñukanchita akllashka paypa suma ali

shiminta Jesukristu runakunata kishpichinanmanta yachachinanchipa. Mana rimanchichu mishki shimiwa runakunata kushichinanchipa, ashwan Yaya Diosta kushichinanchipami rimanchi. Paymi shunkunchita riksin.

⁵Kankuna yachankichi Yaya Diospas yachan ali yuyaywa kahushkanchita. Nima ima uras kankunata llullachishpa kushichishkanchichu, nima imanchikunata mirachinayashpa yachachishkanchichu. ⁶Manami yachachishkanchichu kankuna ñukanchita kushichishpa rimanaykicipa alimi kankichi nishpa. Nima shuk runakuna ñukanchita chasna rimanankunapa munashkanchichu.

⁷Jesukristumanta yachachik *apostol-kuna kashpanchimi kankunata atipanchima karka tapunata ñukanchita aputashina kushichinaykicipa. Chasna tapunata atipashpanchipas manami shuk apushinachu kankunawa karkanchi. Ashwan kankunata shuk mama wawanta alita kuyrakshina kuyrarkan-chi. ⁸Kankunata yapa yuyashpanchi manami Yaya Diospa suma ali shimin-lلاتاچي riksichirkanchi. Ashwan ñukanchita wañuchinahuma karka chaypi kushilla wañunchima karka yapa yuyashkanchi runakuna tukushkaykichirayku.

⁹Wawkinchikuna paninchikuna, kankuna yuyarinkichi imashnami tarawarkanchi kankunapi Yaya Diospa suma ali shiminta yachachihushpanchi. Puncha tutapas parisishpa sampayakta tarawarkanchi kawsananchirayku mana kankunamanta chapashpa kawsananchipa. ¹⁰Kankuna rikushkankichi, Yaya Diospas yachan kankuna kirikkunata alillata rikuchishkanchita. Yaya Diospa munashkanllata rurashpa kawsashkan-chi. Nima pi ñukanchimanta atipanchu nima mayma rimak rinata. ¹¹⁻¹²Chaymantapas yachankichi kankunarayku

shuk yaya paypa wawankunata alita wiñachikshina kashkanchita. Karan shukta kankunamanta alita kunashkanchi, alita sinchikuchishkanchi. Yaya Dios kankunata akllashka shuk puncha paypa ali kamachinan mushu mundupi kawsanaykichipa, suma manchariyya chuyahlla kahushkanta rikunaykichipa. Chasna kashpan kankunata sinchita kunarkanchi paypa wawankunashina payta kushichishpa kawsanaykichipa.

¹³Ñukanchi kankunata Yaya Diospa shiminta yachachishpanchi alita kirishkankichi. Mana runamantachu kay shimika, ashwan Yaya Diosmanta shimimi nishpa shunkuykichipi yaykuchishkankichi. Chasna yayarish-kaykichika alimi kashka. Yaya Diospa shiminllatami yachachishkanchi. Chay shimimi kankuna kirikkunata yuyachishpan alikunata rurashpa kawsahunkichi. Chasna tukushkaykichirayku ñukanchi tukuy uras Yaya Diosta agradesinchi. ¹⁴Wawkikuna panikuna, kankunapuramanta runakuna kankunata yapa parisichishpankuna Judea allpapi tantarik Jesukristuta kirik Yaya Diospa runan masinchikuna parisishkankunashina parisihunkichi. Paykunapas kikin israel masinkunamanta parisichiy tukurakuna. ¹⁵Ñawpa ñukanchi israel runakunapa yaya rukunchi wañukuna wañuchirkakuna Yaya Diospa yachayninwa yachachikunata. Chaymanta paykunamanta miray masinikuna wañuchirkakuna Amunchi Jesustapas. Kunan ñukanchita wañuchinayashpa llaktankunamanta kallpachishkakuna. Chasna rurashpan-kunami Yaya Diospa rikushkanpi mana alichu kanahun. Chaymantapas tukuy runakunata chiknikkuna kanahun. ¹⁶Ñukanchi kankuna mana israel runakunamanta runakunata yachachinayashpanchi kankunapas kishpinayki-

chipa ñukanchita arkahunkuna. Chasna rurashpankuna tukuy uras uchankunata mirachishpa mirachishpa kawsanahun piñayta Yaya Diospa shunkunpi sumakta untachinankunakama. Chasna Yaya Dios atunta piñarishpan paykunata sinchita kastiganka.

Pablokuna Tesalónika llaktama kutinayashkankunamanta riman

¹⁷Wawkinchikuna paninchikuna, ñukanchita kankunamanta llukshichishpankuna wakchatashina musyarirkanchi. Chasna shuk ratu kankunamanta karupi kahushpanchitas shunkunchika kankunapi kahun. Tukuy uras shunkunchimanta pacha yapa kankunata rikunayashpa achka kuti rinata kamashkanchi. ¹⁸Yapa munashkanchi kankunama rinata. Ñuka Pablo achka kuti kankunama rina kashkani. Supay ñukanchita arkashkanrayku mana atipashkanchichu rinata. ¹⁹⁻²⁰Amunchi Jesukristu kutimushpan yachanchi ñukanchita kushichinanta kankuna yachachishkanchita kirishkaykichirayku, shukkunapas kirishkankunaryku. Chay uras kankunamanta shukkunamantapas yapa kushikushuchi. Kankuna yachachishkanchita kasushkaykichirayku, shukkunapas kasushkankunaryku Jesús kutimushpan ñukanchita kushichishpa rimanka kay runakunata alita yachachishkanchi nishpa.

3 ¹⁻²Nima imata kankunamanta yachashpanchi shunkunchika llakiwa sinchiyarka. Chasna kashpan yuyarirkanchi ashwan ali kama wawkinchis Timoteota kankunama kachashpa sapallanchi kiparinanchipa Atenas llaktapi. Pay suma ali shimita Jesukristumanta yachachik kashpan Yaya Diosta yanapakmi kan. Payta kankunama kachashkanchi kankunata

sinchikuchinanpa, chaymantapas alita kunananpa tukuy shunkuykichimanta pacha Jesukristuta kirishpa kawsanaykipcha. ³Chasna rurananpami kachashkanchi kankuna parisihushkaykichipi Jesukristumanta mana anchurinaykipcha. Ñami yachankichi chasna parisina tukuy ñukanchirayku tiyananta. ⁴Kankunapi kahushpanchira ña rimarkanchi runakuna ñukanchita parisichinankunamanta. Chasna rimashkanchishinami shutipa parisishkankichi. ⁵Chasna parisihushkaykichita yachashpayni mana atiparkaniachu ashwan awantanata mana yachashpa imashna katihunkichi nishpa. Chayrayku Timoteota kacharkani kankunamanta yachak rinanpa Jesusta kirishpallachu katihunkichi manachu. Yapa manchashkani uchata rurachinayak supayka kankunata mana alikunata munachishpan Yaya Diosta manana kasunaykipcha. Chasna tukunkichimaka tukuy yachachishkanchika yankami kama.

⁶Kunan ña Timoteo kankunamanta kutimushpan suma shimita ñukanchita kwintak shamushka. Kwintashka alita Jesusta kirishpa, yuyanakushpa kawsahushkaykichita. Chaymantapas ñukanchita yapa rikunayashpa kahunkichi imashnami ñukanchipas kankunata yapa rikunayanchi. ⁷Chasna alita Jesuspi sinchikushpa kawsahushkaykichita yachashpanchi ñukanchita achka kuti ima pishishpanpas runakuna ñukanchita parisichishpankunapas kankunamanta kushikushkanchi. ⁸Kankuna mana sakishpa Jesuspi sinchikuhushkaykichita yachashpanchi llakiwa kahushkanchimanta sumakta kushillayashkanchi. ⁹Imashnashi agradesinchima Yaya Diosninchita chasna ñukanchita yapa

kushillayachishkanrayku mana sakishpa paypi sinchikuhushkaykichita yachashpanchi. ¹⁰Puncha tutapas Yaya Diosta tapunchi ñukanchita kachananpa kankunata rikuk rinanchipa. Chaymantapas tapunchi ñukanchita kachananpa kankunata shuk shuk manara yachakushkaykichita yachachinanchipa, ashwan Jesusta kirishpa kawsanaykipcha.

¹¹Yayanchi Dios Amunchi Jesuspas ñukanchita yanapachun atipananchipa kankunama rinata. ¹²Yaya Dios kankunata yanapachun ashwanta ashwanta shukwa shukwa yuyankushpa kawsanaykipcha kankunapura tukuy runakunawapas. Kankunata yanapachun tukuy runakunata yapa yuyakkuna tukunaykipcha. Imashnami ñukanchi kankunata yuyanchi, chasnalillata kankunapas runakunata yuyashpa kawsaychi. ¹³Chasna kashpaykichimi Yaya Dios shunkuykichita sinchikuchinka payllata kasushpa alillata rurashpa kawsanaykipcha. Chaypina Amunchi Jesukristu tukuy payta kasukkunawa pakta kutimushpan Yayanchi Diospa rikushkanpi ucha illa kankichi. Chasna kachun.

Imashnami Yaya Diosta kushichishpa kawsananchi tiyan

4 ¹Wawkinchikuna paninchikuna, kunan ashwanta yuyachishpa killkanchi. Ña ñukanchimanta yachakushkankichi imashnami kawsanaykichi tiyan Yaya Diosta kushichishpa. Ñukanchi Amunchi Jesusta kasushpa kankunata atunta tapunchi ashwanta ashwanta Yaya Diosta kushichishpa kawsanaykipcha. Ña payta kushichishpa kawsahushipaykipas ashwan ali kama tukuy uras ashwanta payta kushichishpa kawsanaykipcha. ²Amunchi Jesuspa rimashkanta

kankunata rimashkanchirayku yachan-
kichi imashnami kawsanaykichi tiyan.

³Yaya Dios munan payllata kasushpa
kawsanaykichipa. Mana munanchu
musayanakushpa kawsanaykichipa.
⁴Ashwan Yaya Dios munan, kankuna
karikuna, shuk warmillata warmiyanay-
kichipa. Pay munan kankuna warmiki-
chiwa alita kawsanaykichipa, runakuna-
pas yuyarinankunapa alitami kawsana-
hun nishpa. ⁵Yaya Dios mana munan-
chu warmikichiwa tupanakunata
munashpalla kawsanaykichipa, payta
mana riksik runakunashina. ⁶Chayman-
tapas Yaya Dios mana munanchu shuk
kari shuk wawkita millaypata
rurananpa warminwa shuk ratu
kawsashpa. Yuyariychi Yaya Dios
kankunata kastigananta chay tukuy
uchata rurashkaykichimanta,
imashnami ña kankunata achka kuti
rimarkanchi. ⁷Yaya Dios ñukanchita
akllashka paypa munashkanta rurashpa
kawsananchipa. Mana munanchu
aychanchipa millaypa munashkanta
rurashpa kawsananchipa. ⁸Chasna
kashpan maykan runachari kay
yachachishkanchi shimita mana kasuna-
yanchu, chayka mana kasunchu
kankunata Espiritunta kuk Yaya Diosta.
Chasna runaka mana kanchu ñukanchi
runakunata mana kasuk, ashwan kikin
Yaya Diostami mana kasunchu.

⁹Kunan ña mana atipanichu yuyana-
kushpa kawsanaykichimanta kankuna-
rayku killkanata. Yaya Dios kankunata
ñ a yachachishka shukwa shukwa
yuyanakushpa kawsanaykichipa. ¹⁰Ña
tukuy Masedonia allpapi Jesusta kirik
wawkunawa panikunawa yuyana-
kushpa kawsahunkichi. Wawkunawa
panikuna, chasna yuyanakushpa
kawsahushpaykichipas yapa munanchi
kankunapura ashwanta ashwanta
yuyanakushpa kawsanaykichipa.

¹¹Chaymantapas munanchi tukuy
runakunawa alichashpa kushilla
kawsanaykichipa. Ama satiriyichichu
shukkunapa rurahushkankunapi. Ña
kankunata yachachishkanchishina mana
killashpa kankuna kikin tarawashpa
kawsanaykichi tiyan. ¹²Chasna alita
tarawashpa kawsaychi Jesusta mana
kirik runakuna kankunamanta alita
yuyarinankunapa. Ama shukkunamanta
chapashpa kawsaychichu.

**Jesukristu kuti shamushpan tukuy
kirikkuna payta
tinkunankunamanta riman**

¹³Munashkanchi wawkinchikuna
paninchikuna, munanchi yachanayki-
chipa imashnami Jesusta kirishpa
wañushkakunaka tukunahun, mana
llakinaykichipa Jesusta mana kirik
runakunashina. Paykuna shuti, wañush-
pankuna Yaya Dioswa mana kawsak
rinkakunachu. ¹⁴Ñukanchi yachanchi
Jesús wañushkanta, chaymanta
kawsarishkanta. Chasna kashpan
yachanchi Yaya Dios Jesusta kirik
runakunatapas wañushpankuna chasna-
llatata kawsachinanta, Jesús kutimush-
pan paywa pakta shamunankunapa.
¹⁵Amunchi Jesús ñukanchita rimash-
kanta kunan kankunata rimanchi.
Amunchi Jesús kuti shamushpan payta
kirishpa wañushkakunatara
kawsachinka. Ñukanchi kawska
kirikkuna mana paykunamanta puntiru-
chu Jesusma rishunchi. ¹⁶Yaya Dios
kamachishpan trompetanka sinchita
uyarinka, *angelkunapa atun apun
sinchita Jesús ña shamuhushkanta
rimanka. Chasnallapi Amunchi
Jesukristu silumanta uraykunka. Chay
uras puntiru Jesusta kirishpa wañushka-
kuna kawsarimunkakuna. ¹⁷Chaymanta
Yaya Dios ñukanchi kawska kirikkunata
chay kawsarimushkakunawa pakta puyu

chawpipi pushanka Amunchi Jesusta wayrapi tinkunanchipa. Chaymanta pacha wiñaypa paywa kawsashunchi.¹⁸ Chay shimiwa sinchikuchinakuyuchi mana llakiywa kiparinaykichipa.

**Imashnami Jesukristuta kuti
shamunanta chapashpa
kawsananchi tiyan**

5 ¹Wawkinchikuna paninchikuna, ima watami ima punchami Jesukristu kuti shamunka nishpa mana ashwanta kankunaryku killkananchi tiyan. ²Kankuna ña alita yachankichi Amunchi Jesukristu kunkaymanta shamunanta, imashnami shuk shuwa kunkaymanta paktan tutapi, nima pi yuyaruhushkanpi. ³Runakuna rimashpankuna kushilla kawsashunchi, mana tiyanchu nima imata manchananchipa nishpa, kunkaymanta paktanka wañuya paykunarayku. Imashnami shuk warmi chichuka kunkaymanta nanachin wawayananpa, chasnashinami Jesús kunkaymanta paktanka. Imashnami warmi chichuka mana kishpinchu wawayananmanta, chasnashinami Jesusta mana kirik runakunaka mana kishpinkakunachu Yaya Diospa kachanan wañuymanta.

⁴Imashnami mana rikushpa kanchi amsapi, chasnashinami paykunaka mana yachanahunchu Jesuspa shamunanta. Kankunaka wawkinchikuna paninchikuna, mana paykunashinachu amsapishina kahunkichi. Kankunaryku Jesuspa shamunana punchaka mana kunkaymantachu paktanka, imashnami shuk shuwaka kunkaymanta paktan. ⁵Kankuna Jesusta kirikkuna punchapishinami kawsahunkichi Jesuspa shamunanta yachashpa. Mana kawsahunkichihu kunkaylla amsapishina. ⁶Chasna punchapishina kawsak kashpanchi akuyuchi mana

puñushkashina kunkaylla kashunchichu, imashnami shukkunaka kanahun. Ashwan likcharishkashina chapashpa kashunchi. Mana machashkashina yuyay illa kawsashunchichu. Ashwan alita yuyarishpa kashunchi. ⁷Maykanchari puñun, puñun tutapi. Maykanchari machan, kawsan amsapi.

⁸Ñukanchi punchapishina kawsak kashkanchirayku ali yuyaywa kawsashunchi. Mana kashunchichu machashkashina yuyay illa. Ashwan Jesukristupi sinchikushpa payta yuyashpa kawsashunchi. Chasna kawsashpanchimi shuk suntalu aserumanta arkahuk kamisata churarishkashina kanchi. Chaymantapas kushilla Yaya Dios ñukanchita kishpichinanta chapashpa kawsashunchi. Chasna kawsashpanchimi shuk suntalu umanta aserumanta kaskunwa arkahushkashina kanchi. ⁹Yaya Dios mana munanchu kastigarinanchita yapa sinchita piñarishpa kastigahushkanpi. Ashwan munan Amunchi Jesukristuranti kishpichiy tukunanchita. ¹⁰Jesukristu ñukanchirayku wañurka kawska kashpanchi wañushka kashpanchipas paywa kawsananchipa. ¹¹Chasna kashpan sinchikuchinakuyuchi, yanapanakuyuchi tukuy uras ashwan alita kirishpa kawsanaykichipa, imashnami ña rurahunkichi.

**Pablokuna kirikkunata ashwanta
kunanahun imashnami alita
kawsankakuna**

¹²Munashkanchi wawkinchikuna paninchikuna, munanchi kankunata yachachikkunata yuyashpa kawsanaykichipa. Yuyariychi Jesús paykunata kushkanta, chaymantapas kankunata kunashpa yuyachishpa sinchita tarawahushkankunata. ¹³Chasna tarawahushkankunaryku paykunata achkata

yuyanaykichi tiyan. Ama piñanakuyuchi-chu, ashwan kushilla kawsaychi shukwa shukwa.

¹⁴Wawkikuna panikuna, rimashkay-
kichi mana tarawanata munak
wawkikunata panikunata rimaychi
alita tarawashpa kawsanankunapa.
Chaymantapas sampa manchaysiki
runakunata sinchikuchiychi.
Maykankunachari sampa kanahun
kiriushkankunapi, chaykunata
yanapaychi. Tukuy runakunata mana
sampayashpa ali munaywa yanapay-
chi. ¹⁵Shuk runa kankunata millay-
pata rurashpanka nima pi kankuna-
manta rantipaychichu. Ashwan
alikunallata ruraychi kirik masikichi-
kunarayku, tukuy runakunaryakupas.
¹⁶Tukuy uras kushikuychi. ¹⁷Yaya
Diosta mañashpalla kawsaychi.
¹⁸Parisishpaykichipas kushikushpay-
kichipas Yaya Diosta agradesishpa
kawsaychi. Yaya Dios munan,
Jesukristuta kirikkuna kashpanchi
chasna agradesishpa kawsananchipa.

¹⁹Ama arkaychichu Yaya Diospa
Espíritun kankunawa ruranayahush-
kanta. ²⁰Shuk kirik masikichikuna
paypa yuyachishkanta rimashpan-
kuna ama yuyariyichihu mana
valinchu nishpa. ²¹Tukuy shimiku-
nata alita uyashpaykichi yuyariyichi
alichu manachu. Shutipa kashkata
rimak yanapak shimikunallata

wakaychaychi. ²²Nima shuk mana ali
ruranakunata ruraychichu.

Mañanamanta saludanamanta riman

²³Mañanchi kushilla kawsanata kuk
Yaya Diosta kankunata aliyachinanpa
ali yuyayyulla kanaykichipa. Chayman-
tapas Yaya Dios kankunata tukuy
aychaykicha almaykicha yuyayki-
chita wakaychachun, Amunchi
Jesukristu shamunan uras kankunata
alikunallata yuyarishpa rurashpa
kahushkaykicha tarinanpa. ²⁴Yaya
Dioska tukuy rimashkanta paktachik
kashpanmi kankunata rimashpan
wawankuna kanaykichipa, yanapan-
kami alillata yuyarik rurak tukunayki-
chipa.

²⁵Wawkinchikuna paninchikuna,
kankunapas ñukanchirayku mañaychi.

²⁶Tukuy Jesusta kirikkunata aylluyki-
chitashina yuyashpa saludaychi.

²⁷Amunchi Jesukristu rimawashpan
ñuka Pablo kankunata kamachihuni kay
killkashkanchita tukuy kirik wawkiku-
narayku panikunaryaku leyinaykichipa.

²⁸Amunchi Jesukristu kankunata
llakichishpan yanapachun.

Chayllata killkashkanchi.

Wawkikichikuna turikichikuna
Pablo, Silvano, Timoteo

ISHKAYNIN PABLOPA KILLKASHKAN KILLKA TESALÓNIKA LLAKTAPI JESUKRISTUTA KIRIKKUNARAYKU

Pablokuna Tesalónika llaktapi
kawsak kirikkunata saludanahun

1 ¹Munashkanchi wawkinchikuna
paninchikuna, ñuka Pablo
Silvanowa Timoteowa pakta kay kartata
killkahunchi tukuy kankuna Tesalónika
llaktapi tantarik Yayanchi Diospa
wawankuna, Jesukristuta kirikkuna-
rayku. ²Yaya Dios Amunchi
Jesukristupas kankunata llakichishpan
yanapachun kushilla kawsanaykichipa.

Jesukristu shamuhushpan kirik
mana kirikkunapas imashnami
tukunkakuna

³Wawkinchikuna paninchikuna, tukuy
uras ashwanta ashwanta Jesusta
kirishpa shukwa shukwa yuyanakushpa
kawsahushpaykichi Yaya Diosta tukuy
uras kankunaryaku yapa agradesinanchi
tiyan. ⁴Chasna kawsahushkaykicha
kushilla kwintanchi maypipas Jesusta
kirikkuna tantarishka kahushkankunapi.
Kwintanchi imashnami Yaya Diosta
chiknik runakuna kankunata parisichi-
hushpankopas mana sakishpa nima
sampayashpa Jesusta kirishpalla
kawsahunkichi, chaymantapas
imashnami tukuy parisihushkaykichipi
sinchikuhunkichi. ⁵Chasna Jesusta

kirihushkaykichirayku parisihushkayki-
chita rikushpankuna runakuna riksinkaka-
kuna, Yaya Dios kankunata ali kamachi-
nan mushu mundupi yaykuchishpan
alita rurananta.

⁶Tukuy Yaya Diospa rurashkanka
alimi kan. Chayrayku kankunata
parisichik runakunataka payka chasna
parisichishkankunamanta paykunatana
parisichinka. ⁷Kankuna parisihukkunata
ñukanchiwa pakta parisihushkanchi-
manta samachinka. Amunchi Jesús
paypa yapa atipak *angelkunawa nina
chawpipi tukuy runakunapa rikushkanpi
silumanta shamushpan Yaya Dios tukuy
chayta ruranka. ⁸Tukuy mana payta
riksinayashkakunata kastiganka,
chaymantapas Amunchi
Jesukristumanta suma ali shiminta
mana kasunayashkakunata. ⁹Paykuna
wiñayapa parisinankunata musyashpa
kastigarinkakuna. Wiñayparayku
anchurishka kankakuna Yaya
Diosmanta. Paypa atun yachayninwa
rurananta, suma punchahlla rikuchi-
nanta wiñayparayku nima ima uras
ashwan rikunkakunachu. ¹⁰Jesukristu
chay Yaya Diospa kastiganan punchapi
shamuhushpan ñukanchi sumakta
aliyachishkan runankunawa shamunka.
Jesusta mana kirikkunaka ñukanchi

kirikkunata rikushpankuna ucha illa tukushkanchita atunta mancharishpa yuyarinkakuna Jesús yapa ali kananta. Kankuna yachachishkanchita kirishkay-kichirayku tukuy ñukanchi Jesusta kirikkunawa chaypi kanaykichi tiyan.

¹¹Chayrayku tukuy uras kankunaryku mañanchi Yaya Dios kankunata yanapananpa ali tukunaykichipa. Yaya Dios kankunata kayarka Jesukristuwa pakta kawsanaykichipa. Chasna kashpan kankunata yanapachun, kayay tukushka runakunashina alikunallata rikuchishpa kawsanaykichipa. Chaymantapas mañanchi Yaya Dios kankunata atun yachayninwa yanapananpa, tukuy ali munashkaykichikunata, tukuy Jesuspi sinchikushpa rurahushkaykitchitas paktachinaykichipa. ¹²Tukuy chayta Yaya Dios kankunawa paktachishpan runakuna kankunata rikushpankuna Amunchi Jesusta kushichishpa rimankakuna yapa ali kanki nishpa. Chaymantapas kankunata ali shimikunawa kushichinakuna, Yayanchi Dios Amunchi Jesukristuwa pakta kankunata llakichishpankuna aliyachishkankunaryku.

Jesús manara shamuhushpan Yaya
Diosta yapa chiknik runa
rikurinanmanta riman

2 ¹⁻²Wawkinchikuna paninchikuna, Amunchi Jesukristu shamunan punchamanta yuyarishpaykichi ñukanchi paywa tantachiy tukunanchimantapas ama llullachiy tukuychichu. Jesús paktanan puncha ñami paktarihun nishkata uyashpaykichi ama utkalla yuyaykichiha pantachiy tukuychichu, nima manchariychichu. Tiyan Jesuspa paktananmanta llullachishpa yachachikuna Yaya Diospa Espíritu yuyachishpan rimani nishpa. Shukkunaka

rimanahun Pablo mi rimashka nishpa. Shukkunapas rimanahun Pablo mi killkashka Jesús paktanan puncha ñami paktarihun nishpa. Tukuy chasna rimashkankunata ama kiriychichu.

³Ama llullachiy tukuychichu nima imapi. Jesuspa paktanan punchaka manara paktarishpan achka runakunami manana Yaya Diosta kasunayankakunanchu. Tukuy parti Yaya Diosta chikninkakuna, millaypa ruranankunata yapa mirachinkakuna. Chaymantapas Yaya Diosta yapa chiknik runa tiyanka. Tukuymanata uchasapa kashpan Yaya Diospa munashkanta nima imapi kasunayashpa sumakta piñarishpa kawsanka. Payka Yaya Diosmanta karupi wiñaypa parisinanpa wichuy tukunan tiyan. ⁴Chay runami Yaya Diosta, tukuy yanka dioskunata, tukuy maykantami runakuna kirinahun, kushichinahun, mañanahun, chayta piñarishpa tukuchinayanka. Pay kikinllata valichirishpa kawsanka. Chasna kashpan Yaya Diospa atun wasinpi yakyushpan amuyanka. Chaypi tiyarishpan ñukami Yaya Dios kani nishpa rimanka.

⁵Manachu yuyarinkichi kankunawa kahushpayni tukuy chayta ña yachachishkaynita? ⁶Kankuna yachankichi maykanmi kunan arkahun chay Yaya Diosta yapa chiknik runa paktananta. Rikurinan puncha manara paktarishpan mana tiyankarachu.

⁷Kunan ña runakuna Yaya Diosta mana kasunayashpa millaypata rurahunkuna. Yaya Dios ñukanchita asirtachishpanlla yachanchi supaykunapa atun apu chay runakunawa yuyarishkanta paktachinata ña kollarishkanta. Chasna kashpanpas tiyan shuk maykanmi arkahun. Chay puntiru anchuchiy tukunan tiyan millaypa ruranakuna yapa miranankunapa. ⁸Chaywashalla Yaya Diosta yapa

chiknik runa rikurinka. Chaymanta Amunchi Jesús shamuhushpan punchahlla rikuchishpa shuk pukush-kanllawa payta wañuchishpan wiñayparayku parisinanpa wichunka.

⁹Chay Yaya Diosta yapa chiknik runaka rikurishpan runakunata llullachishpa supaykunapa atun apupa yachayninwa atun yachaywa tukuy ruranakunata, achka nima ima uras rikushkunkunata, suma mana atipaypaku-nata ruranka. ¹⁰Mana yuyariyapa yapa millaypa yuyayyu kashpan ali yuyayyu-shina tukushpan tukuy imatapas ruranka runakunata llullachinanpa. Chasna rurashpan llullachinka tukuy maykunkunami wiñaypa chay nina mana wañukma rinkakuna. Chay runakuna mana munarkakunachu Yaya Diospa ali rimashkanta yuyashpa kasunata. Chayrayku Yaya Dioska paykunata mana chay nina mana wañukmanta kishpichinkachu. ¹¹Paypa ali rimashkanta mana munashkankunaryku Yaya Dios paykunarayku kachanka llullachik supaykunata yuyayninkunata pantachichishpankuna chay runakuna tukuy llullakunata kirinankunapa. ¹²Yaya Diospa ali rimashkanta mana kasushpankuna ashwan millaypa rurahushkunkunapi kushikushpankuna wiñayparayku parisinankunapa kastigay tukunkakuna.

**Pablokuna kirikkunata kunanahun
yachachishkankunallata kirishpa
kawsanankunapa**

¹³Amunchi Jesuspa yuyashkan wawkinchikuna paninchikuna, kankunaryukuka tukuy uras Yaya Diosta agradesinanchi tiyan. Yaya Dios manarapas allpata rurahushpanra ña munashka kankuna kastigananmanta kishpishka kanaykichipa. Paypa Espíritun kankunata yanapashpan Yaya

Diospa munashkanta rurashpa kawsanaykichipa, chaymantapas Yaya Diospa ali rimashkanta kirishkaykichi-rayku paypa kastigananmanta kishpishka kankichi. ¹⁴Yaya Dios paypa suma ali shiminta yachachihushkan-chiwa kankunata kayashka suma punchahlla kawsanapi Amunchi Jesukristuwa pakta kawsak rinayki-chipa. ¹⁵Chayrayku wawkikuna panikuna, chaypi kahushpanchi kankunata yachachishkanchita, killkash-kanchipi yachachishkanchitapas alita shunkuykichipi wakaychaychi. Ñukanchi kankunata yachachishkanchi maykantami yachakushkanchi. Chayllata kirishpa kataychi. ¹⁶Yayanchi Dios Amunchi Jesukristupas ñukanchita yuyashpan wiñayparayku kushillaya-chishka. Chaymantapas ñukanchita llakichishpan shuk puncha suma kawsanapi yaykunanchita rimashka. ¹⁷Yaya Dios kankunata yanapachun sinchikuchichun alikunata rurashpa rimashpa kawsanaykichipa.

**Pablokuna kirikkunata tapunahun
paykunarayku mañanankunapa**

3 ¹Wawkinchikuna paninchikuna, kunan kaykunallatami killkahunchi. Mañaychi ñukanchirayku atipananchipa Amunchi Jesukristupa shiminta yachachinata, utkalla tukuy partima paktananpa. Kankuna paypa shiminta yapa alimi nishpa Yaya Diosta agradesishpa kirishkankichi. Kunan mañaychi shuk runakunapas kankuna-shina kirinankunapa. ²Yachanchi mana tukuy runakunachu munanahun Jesukristuta kirinata. Chayrayku mañaychi Yaya Dios ñukanchita millaypa shunkuyu millaypa yuyayyu chiknik runakunamanta kishpichinanpa.

³Yachanchi Amunchi Jesukristu nima ima uras ñukanchita sakinanta. Chasna

kashpanmi kankunata sinchikuchinka, chaymantapas wakaychanka supay mana millaypata rurachinanpa.⁴ Amunchi Jesukristuta kirishkaykichirayku ñukanchi kirinchi tukuy kankunata kamachishkanchikunata paktachihush-kaykichita, chaymanta alita paktachishpa katinaykichitapas.⁵ Amunchi Jesukristu kankunata yanapachun alita asirtanaykichiha maytukuy atuntami Yaya Dioska kankunata yuyan. Chaymantapas kankunata yanapachun parisishpaykichipas mana sampayashpa Yaya Diosta kasunaykichiha, imashnami paypas Yayanta kasurka chasna.

**Karan shuk kikin
tarawashkanmanta kawsachun**

⁶Chaymanta wawkikuna panikuna, Amunchi Jesukristu munashkanshina kankunata kamachinchia mana tarawanata munak wawkikunamanta panikunamantapas anchurinaykichiha. Yachachishkanchita mana kasunayashpankunaka paykunamanta anchuriyichi.⁷ Kankuna yachankichi ñukanchi kankunawa kahushpanchi mana killashpa alita tarawashpa kawsashkanchita. Kankunapas ñukanchimanta yachakushpa alita tarawashpa kawsanaykichi tiyan.⁸ Kankunawa kahushpanchi mana tapushkanchichu yanka mikunanchipa kankunamanta. Ashwan puncha tutapas parisishpa sampayakta tarawarkanchi munashkanchita rантинанчика, mana kankunamanta chapashpa kawsananchipa.⁹ Ali kama karka kankunamanta mikunata tapunanchipa. Chasna kashpanpas mana tapushkanchichu. Ashwan kankunata rikuchirkanchi imashnami kankunapas tarawashpa kawsanaykichi tiyan.¹⁰ Kankunawa kahushpanchi kankunata kamachishkanchi: Shuk runa mana tarawanata munashpanka ama mikunata kuychichu nishpa.

¹¹Yachashkanchi shukkuna kankunapi tiyan, paykuna kikin tarawashkankunamanta kawsanankunapa mana tarawanata munakkuna. Paykuna tukuy runakunapa rurahushkankunapi satirishpa yanka kawsanahun.

¹²Maykankunami chasna mana tarawanata munak runakuna, kankunata Amunchi Jesukristu munashkanshina kamachinchia: Manana satirishpa kawsaychichu. Ashwan alita tarawashpa kawsaychi kankuna kikinpa tarawash-kaykichimanta mikunaykichiha.

¹³Tukuy kankuna wawkinchikuna paninchikuna, ama sampayaychichu alikunata ruranata.¹⁴ Maykanmi mana kasunayanchu kay killkanchipi rimashkanchita, paywa ama ishkayyaychichu nima tantariyaychichu, killananmanta pinkarinanpa.¹⁵ Chasna rurashpaykichipas ama paykunata chikniyaychichu, ashwan wawkikichikunatashina panikichikunatashina kunaychi.

**Pablokuna killkanata
tukuchihushkankunapi kirikkunata
saludanahun**

¹⁶Kushilla kawsayta kuk Amunchi Jesukristu kankunata yanapachun imashnami pasashpaykichipas tukuy uras kushilla kawsanaykichiha. Pay kachun tukuy kankunawa.

¹⁷Kay tukurina parti ñuka Pablo kankunata saludani kikin makiniwa killkashpayni. Kasnami rikurin killkashkaynika. Chasna tukuy killkaynippi killkashpayni yachankichi ñuka killkashkaynita.

¹⁸Amunchi Jesukristu tukuy kankunata llakichishpan yanapachun.

Chayllata killkashkanchi.

Wawkikichikuna turikichikuna
Pablo, Silvano, Timoteo

PUNTIRU PABLOPA KILLKASHKAN KILLKA TIMOTEORAYKU

Pablo killkan Timoteorayku

1 ¹⁻²Munashkayni wawkini Timoteo, ūnuka Pablo kay kartata killkahuni kanrayku. ūnuka Jesukristupa *apostolin kani. Yaya Dios Jesukristuwa pakta akllawashka paypa kachashkan kanaynipa. Yayanchi Dios ūnukanchita kishpichishpan chapahunchi Jesukristu kuti shamunanta. Kanka yachachishkaynita uyashpayki *Kristuta kirishkaykiryaku kikin wawaynishinami kanki. Yayanchi Dios, Amunchi Jesukristupas kanta yuyashpan llakichishpan yanapachun kushilla kawsanaykipa.

Pablo Timoteota kuna yanka rimashpa yachachihukkunata mana kasunanca

³Wawkini, chay Masedonia allpama rihushpayni rimashkaynishina, kutikashka kanta rimani: Efeso llaktapi kipariy alita yachachinaykipa. Chaypi kiparishpayki kamachi yachachinakunata mana Jesukristumanta chikan yachachinakunata yachachinakunapa. ⁴Kamachi yachachinakunata mana yanki kwintukunata manana kasunakunapa, chaymanta manana yuyarishpa kawsanakunapa chay mana tukurik killkarishkakunata pikunamantami ñawpamanta pacha mirashkakuna

nishpa. Runakuna chaykunamanta mana shuk yuyayllawa kashpankuna chaykunata yuyarishpa kawsashpanchi yanka yuyarishpalla kiparinchi, rimana kushpa shukwa shukwa. Nima imapi yanapanchu Yaya Diospa munashkan-shina *Kristupi sinchikushpa kawsanan-chipa. ⁵ūnukanchi Yaya Diospa shiminta yachachinanchika kanmi kirikkuna yuyanakushpa kawsanankunapa runa masinkunawa. Mana uchata rurashpa, ali yuyaywa kashpa, shunkunchimanta pacha Kristuta kirishpa kawsashpanchi atipanchi yuyanakushpa kawsanata. ⁶Shuk kirik masinchikuna Yaya Diospa ali yachachishkanta manana kasunayanahunchu, chayrayku yanka shimikunamanta rimanakushpa kawsanahun. ⁷Chay runakunaka munanahun Yaya Diospa kamachishkanta yachachik kanata. Chasna kashpanpas mana asirtanahunchu paykuna kikin yachachihushkankunata. Alitami yachachihuni nishpa yuyarihushpankunapas paykuna kikin mana asirtanahunchu.

⁸Yachanchi Yaya Diospa kamachishkanka ūnukanchirayku ali kananta munanantashina yachachishpanchi. ⁹⁻¹⁰Yuyariyichi Yaya Diospa kamachishkanka mana kanchu ali rurak runakunaryaku. Ashwan kanmi mana kasukkunaryaku paykunata riksichinanpa mana

alita rurashpa kawsahushkankunata. Kaykunami mana ali runakunaka: Mana Yaya Diosta kasuk, uchata rurak, Yaya Dioska manami alichu chasnallatata paypa shiminka manami alichu nishpa rimakkuna, yayankunata wañuchik-kuna, shuk runakunatas wañuchik-kuna, shuk kari kari masinwa musayak-kuna, shuk musayakkunapas, runa masinta apishpankuna rantichikkuna, llullakkuna, yanka nishpa shutipata-shina rimakkuna, chaymanta tukuy shukkunapas, maykankunami chay suma ali yachachinakunata mana kasunahunchu.¹¹ Chayta yachakunchi Yaya Diospa suma ali shiminpi Jesukristu ñukanchita kishpichinan-manta. Chay Yaya Dios yapa ali atun yachayyu kananta riksichik shimita runakunata alita yachachinaynipa tukuy uras chasnalla ali yuyayyu Yaya Diosmi kamachiwashka.

Pablo Yaya Diosta agradesin payta llakichishkanrayku

¹²Ñukata sinchikuchiwak Amunchi Jesukristuta achkata agradesini paypa shimenta runakunata yachachinaynipa kamachiwashkanwa rikuchishkanrayku munashkanta rurak kanaynita yuyarish-kanta. ¹³Ñawpa yapa piñarishpayni Jesusmanta millaypata rimapayarkani. Chaymantapas tukuy Jesukristuta kirikkunata chiknishpayni kulluchinayshpa puripayarkani. Kay Jesuska mana Yaya Diospa Wawanchu, chayrayku mana kiriyichihu nishpa rimapayarkani. Manara Jesukristuta kirihushpayni alitami rurahuni nishpa chasna rurapayarkani. Mana alita yachashpa chayta rurahushpayni Yaya Dioska llakichiwashka. ¹⁴Chasna Yayanchi Dios atunta llakichiwashkan-raykumi paypa Wawan *Kristu Jesuswa shukllashina tukushkaynirayku kunanka

achkata yanapawahun payta yuyashpa kirishpa kawsanaynipa.

¹⁵Kayka shutipami, tukuy runakuna kirinankuna tiyan: Jesukristuka kay allpama shamurka uchayukunata kishpichinanpa. Chay tukuy uchayukunamanta ñukaka ashwan uchayumi kapayarkani.

¹⁶Yaya Dios llakichiwashka tukuy runakuna yachanankunapa Jesukristu runakunata llakichik kananta. Jesukristuka ñukata llakichiwashpan rikuchirkka tukuy payta kirikkunata chasnallatata kishpichinanta wiñaypa paywa pakta kawsanankunapa. ¹⁷Akuychi tukuya kamachik atun apu, wiñaypa kawsak, mana rikuypa, shuklla shutipa Yaya Diosta tukuy uras wiñayparayku yuyashpa atunyachishpa kushichishhunchi. Chasna kachun.

¹⁸⁻¹⁹Wawkini Timoteo, wawaynishina kashpayki kanta kamachini sinchikurishpa runakunata yachachinaykipa. Imashnami ñawpa shuk wawlikuna Yaya Diospa Espíritun yuyachishpan kanmanta rimarkakuna, chasnashina Yaya Diospa shimenta alita kirishpa ali kashkata yachashkaykilata kasushpa yachachiy, chikanta yachachikkuna tiyashpanpas. Shukkunaka ali kashkata yachashkankunata manana kasunayashkankunaryku kunanka manana Jesukristuta kirinahunchu.

²⁰Chasna manana kirik runakunamanta shukka kan Himeneo shutiyu, shukka Alejandro shutiyu. Ñukaka supaykunapa apunpa makinpi churashpa sakirkani paykunata kastigachun nishpa manana Yaya Diosmanta millaypata rimashpa kawsanankunapa.

**Jesusta kirikkuna tukuy
runakunarayku Yaya Diosta
mañanamanta yachachin**

2 ¹Kunan uyawaychi. Tukuy manta puntiru Yaya Diosta mañashpa kawsaychi. Yaya Diosta mañaychi agradesiychi tukuy runakunarayku.

²Chasnallatata tukuy ñukanchita kamachik apukunarykupas mañaychi. Paykuna alita kamachishpankuna tukuy runakunawa pakta kushilla Yayanchi Diosta kasushpa, alita rurashpa kawsashunchi. ³Chasna alita mañashpa kawsashpanchika ñukanchita kishpichik Yayanchi Diostami kushichinchí.

⁴Yayanchi Dioska munanmi tukuy runakunata uchankunamanta kishpichinata. Chaymantapas munan paypa shimin riksichishkan shutipa kashkata riksinankunapa.

⁵Shutipa Dioska shuklla Yaya Diosmi. Chaymantapas shukllami tiyan ñukanchi runakunaryku chay shuklla Yaya Dioswa uchanchikunamanta alichak. Paymi ñukanchishina runa tukushkaka Jesukristu. ⁶Payka wañurka tukuy runakunata uchanchikunamanta wañuna kashkanchimanta kishpichinanpa. Kunanmi chayta Yaya Dioska munan ñukanchi tukuy runakunata yachachinanchipa. ⁷Chayrayku Yaya Dios ñukata churawashka Jesukristumanta yachachik *apostol kanaynipa, mana israel runakunapas Jesukristuta kirinankunapa, paypa rimashkanka shutipa kananta yachanan-kunapa. Tukuy chay Jesukristumanta yachachihushkaynika shutipami mana llullashpachu rimahuni.

⁸Chayrayku munani wawkikunaka tukuy tarishkaykichi Yayanchi Diosta ali yuyaywa mañanankunapa.

Makinkunata mañanankunapa

alsashpankuna mana kachun piñay shunkuwa, nima ishkay yuyaywa.

⁹Chasnallatata munani panikunapa churarinankunaka ali rikurinanpa.

Mana kanahuchun karikunata mana alikunata yuyachik, nima kanahuchun runakuna paykunata rikushpa kanankunapa. Chukchankunata alillata ñakchanahuchun. Mana kanahuchun yapa

alicharishkankunaryku runakuna paykunata rikuulla kanankunapa. Mana sumayanahuchun yapa chaniyu imakunawa, nima churarinahuchun yapa chaniyu churarinakunata runakuna mana paykunata rikuulla kanankunapa. ¹⁰Ashwan warmikunaka alita rurashpa rikuchishkankunawa suma kanankunata rikuchinahuchun. Chasnami ali kan Yaya Diosta kirikmi kani nishpa rimak warmikunarykuka.

¹¹*Yaya Diospa wasinpi tantarishka kahushpaykichi panikunaka chay yachachihuk runapa rimahushkanta chunlla alita uyashpa yachakunahuchun alimi ñukarayku nishpa. ¹²Mana munanichu Yaya Diospa wasinpi tukuy tantarishka kahushkaykichi panikuna yachachinankunapa, nima kanahuchun karikunata kamachikkuna, ashwan chunllalla uyanahuchun. ¹³Yachanchi Yaya Dios puntiru karita Adán shutiyuta rurashkanta. Chaywashara warmita Eva shutiyuta rurarka. ¹⁴Chaymanta supay llullachirka Adanpa warmin Evata, mana Adantachu llullachirka. Evata supay llullachishpan Yaya Diosta mana kasushkanwa uchata rurarka. ¹⁵Chasna uchata rurashkanrayku warmikuna wawayashpankuna nanayta parisinkunkuna kashpanpas kishpichiy tukunkakunami, Yaya Diospi sinchikushpa, runa masinkunata yuyashpa, Yaya Diosta kasushpa, pay kikinta kuyrarishpa alita rikuchishpa kawsashpankuna.

Jesukristuta kirikkunata yachachikkuna imashnami kanankuna tiyan

3 ¹Kunanka shuk ali rimanata rimashkayki. Shuk wawkinchi kanta rimashpanka ñuka Jesukristuta kirikkunata yachachishpa yanapanayani nishpa, chay wawkinchita rimay chay munanaykika alimi, yapa ali tarawanata

ruranata yuyarinki nishpa. ²Chasna kashpanpas shuk yachachik wawkika alita rurashpa kawsak kanan tiyan, mana nima pi rimanankunapa payka mana alitachu rurashpa kawsahun nishpa. Payka shuk warmiyulla kanan tiyan. Chaymanta mana alikunamanta kuyrarinata yachak, alita yuyarik kanan tiyan. Maykan runa wasinma shamushpanka ali yuyaywa kayak kanan tiyan. Chaymanta alita yachachinata yachak kanan tiyan. ³Mana machak, mana makanakuk, mana piñanakuk, nima rimanakuk kanan tiyan. Mana kullkita yapa munashpa kawsak kanan tiyan. Ashwan runa masinkunawa yanapanakushpa yuyanakushpa kawsak kanan tiyan.

⁴Chay wawkika tukuy wasinpi kawsakkunata alita rikuchishpa yachaywa kamachinata yachak kanan tiyan. Wawankunata alita yachachinan tiyan, alita kasushpa, alita rimashpa kawsanankunapa. ⁵Kikin wasinpi kawsakkunata mana alita kamachinata kuyranata yachashpanka manami atipankachu Yaya Diosta kirikkunata alita yachachinata imashnami kawsanankuna tiyan.

⁶Kirikkunata yachachikka mana kachun shuk mushu kirik. Chay mushu kirik wawkika apushinami kani nishpa yuyarishpan chay puntiru Yaya Diospa *angelshina urmanka pay kikinta atunyachirishkanrayku. Chasna kashpanka Yaya Dioska chay supay tukushka angeltashinami payta kastiganan tiyan.

⁷Chaymantapas shuk wawkika yachachik kanayashpanka alita rurak kanan tiyan, mana kirik runakunapas paymanta alita rurashpa kawsak nishpa yuyarinankunapa. Mana alita rurashpa kawsak kashpanka runakuna paymanta millaypata rimanahuma. Chaypina

supayka payta llullachima ashwan mana alikunata rurananpa.

Kirikkunata yanapakkuna imashnami kanankuna tiyan

⁸Chasnallatata shuk wawki kirikkunata yanapak tukunata munashpanka alita rurak kanan tiyan, tukuy runakuna payta alita yuyanankunapa. Mana llullak, mana machak, mana llullachishpa runakunamanta kullkita apinata munak kanan tiyan. ⁹Chay yanapak wawkika Yaya Diosmanta yachakushkanta alita kirik kanan tiyan. Nima imamanta shunkunpi rimay tukuhushka kachun mana alichashkan-rayku. ¹⁰Chaymantapas chay yanapak tukunayahuk wawkita alita rikuychi, alitachu manachu rurahun nishpa. Alita rurashpa kawsahushpanka payta rimaychi yanapak tukunarpa. ¹¹Chay yanapak wawkipa warminpas alita rurashpa kawsak kanan tiyan. Mana llullashpa, mana yanka shukta shukta rimashpa kawsak kanan tiyan. Ashwan mana alikunamanta kuyrarinata yachak, rimashkanta alita paktachik warmi kanan tiyan. ¹²Chay yanapak wawkika shuk warmiyulla kanan tiyan.

Chaymanta wawankunata, tukuy wasinpi kawsakkunatas alita kawsanankunapa yachaywa kamachinata yachak kanan tiyan. ¹³Chay yanapakka churay tukushkanpi alita rurak kashpanka tukuy runakunami payta alimi nishpa rikunkakuna. Chasnami chay yanapakka alita sincikunka *Kristu Jesusta katihushkanmanta mana pinkashpa shukkunatas rimananpa.

Imashna sumami Yaya Dios ñukanchirayku rurashkanka

¹⁴Wawkini Timoteo, kay kartata kanrayku killkahuni, mana unayashpa

kanta rikuk rinaynita yuyarishpayni.
¹⁵Imashnamanta unayashpaynika kay kartayniwa ña kanta puntiru rimani yachanaykipa imashnami ñukanchikuna kirikpura kawsananchi tiyan Yaya Diospa ayllun kashpanchi. Chay Yaya Diospa ayllun kanchi kawsa Yaya Diosta kirikkuna. Paypa shutipa kashkata rimak shiminta alita riksishpanchimi yachachik kanchi. Nima pi atipankachu chay shimita ñukanchimanta chinkachinata, nima ñukanchita kirichinata mana shutipa kashkata. ¹⁶Imashna sumami chay ñawpa mana yachashkanchi kunan Yaya Dios ñukanchita riksichishkanka.

*Kristuka silumanta shamushpan runa tukushpan kay allpapi wawayarika.

Chasna tukushpan Yaya Diospa Espiritunwa kashpan rikuchirka ali mana uchayu kananta.

*Angelkuna Jesukristu wawayarishkanta, wañushkanmanta kawsarishkanta rikurkakuna.

Paypa runankunaka tukuy llaktaku-napi yachachirkakuna Jesukristu kishpichik kananta.

Tukuy parti kay allpapi runankunaka payta kirirkakuna.

Yaya Dios payta suma punchahlla kawsananpi yaykuchirka paywa pakta kamachinanpa.

Manana Yaya Diosta kasunayakkunamanta riman

4 ¹Wawkini, Yaya Diospa Espiritunka sumakta ñukanchita riman, Jesukristu shamunan puncha kuchuya-hushpan shuk payta kirikkunaka manana payta kirinayankakunananchu. Shuk runakunapa llullachishpa rimash-kankunatana kirishpa kawsankakuna. Supaypa yuyachishkan yachachinakunata kasushpa kawsankakuna. ²Llullak

runakuna paykunata llullachishpanguna yachachishkankunata kirishpa kasunkakuna. Chay llullachishpa yachachikku-naka mana alita rurashkankunamanta manana llakinata yachak kanahun.

³Paykunaka yachachinahun ama warmiyankichichu, ama kusayankichichu nishpa. Chaymanta shuk shuk mikunakunata ama mikunkichichu nishpa. Yaya Dios tukuy mikunata rurarka mikunanchipa. Chayrayku ñukanchi *Kristuta kirikkuna, ali kashkata mana ali kashkata riksikkuna Yaya Diosta agradesishpa tukuy mikupakunata atipanchi mikunata.

⁴Tukuy Yaya Diospa rurashkankunaka alimi. Chayrayku imatapas Yaya Diosta agradesishpa apihušpaykichi ama rimaychichu kayka mana valinchu nishpa. ⁵Yaya Diospa rimashkanta kasushpanchi payta agradesishpanchi ima mikunapas alimi mikunanchipa.

Jesukristupa kamachishkan runa alita ruranamanta yachachin

⁶Wawkini, imashna kirinanchi tiyan nishpa Yaya Diospa shiminta, shutipa kashkata riksichik yachachishkayniku-natapas alita yachakushkanki. Chaykunaka kanta alita sinchikuchihun. Kunanka tukuy chay wawkinchikunata paninchikunatapas alita yachachiy. Chasna yachachishpaykimi Jesukristuta alita kasuk kanki.

⁷Runakunapa yanka kwintashkankuna mana Yaya Diosmanta kashkata ama kasuychu. Ashwan yachakuy Yaya Diospa rimashkanllata kasushpa kawsanata. ⁸Aychanchita sampayakta kuyuchina uchillastu ali kan, aychanchita sinchikushpa alita kawsananchipa. Chasna kashpanpas ashwan ali kan Yaya Diospa munashkanta rurashpa kawsananchipa. Chasna rurashpanchimi kay allpapi alita kawsanchi. Chayman-

tapas siluma Yaya Dioswa kawsak rishunchi. ⁹Chay rimashkayni shimika shutipami, chayrayku tukuy runakuna kirinankuna tiyan. ¹⁰Chayrayku sinchita tarawashpa parisishpa Yaya Diospa shiminta tukuy runakunata yachachinch'i. Tukuy shunkunchimanta pacha kirishpa yachanchi Yaya Dios kawsa ñukanchita kishpichinanta. Payllami kishpichik kan. Tukuy runakunarayku alichashka kishpichiy tukunankunapa. Ñukanchita kishpichinka, payta kirishpa kawsashpanchi.

¹¹Wawkini, tukuy kay kanta yachachishkaynita kanpas alita rimashpa yachachiy. ¹²Nima pi kanta rimachun: Payka mana yapa rukuchu, chayraykumi mana kasunichu nishpa. Mana yapa ruku kashpaykipas ama pinkaychu yachachinata. Ashwan Yaya Diospa munashkanta rurashpa kawsashpaykimi kirikkunata rikuchinki imashnami kawsanankuna tiyan. Alita rimashpa, alita rurashpa, tukuyta yuyashpa, Jesukristuta sumakta kirishpa, allillata yuyarishpa kawsashpaykimi rikuchinki paykunatapas kanshinallatata rurashpa kawsanankunapa.

¹³Wawkini, manara shamuhushpay-nira tukuy kirikkunawa tantarishpayki-chi Yaya Diospa shiminta leyishpa uyachiy, yachachishpa sinchikuchi wawkikunata panikunatapas. ¹⁴Ama sakiychu yachachinata. Yaya Dios Espiritunwa kankunata sinchikuchik wawkikunata yuyachishpan munananta rimashpa makinkunata umaykipi churarkakuna. Chasna mañahushpan-kuna Yaya Dios yachachinaykipa kanta yachayta kushpa atipachishkanta yuyariy.

¹⁵Chayrayku wawkini, Yaya Dios kanta yachachinata atipachishkanta yuyarishpa yachachiylla. Chasnami

karan puncha ashwan alita kawsahush-kaykita tukuy runakuna rikunkakuna.

¹⁶Yuyaywa kawsay mana uchata ruranaykipa. Kanta yachachishkaynita alita yuyarishpa yachachiy. Chasna alita rurahushkaykita katiy. Chasna rurashpa kawsashpaykimi Yaya Dioska kanta kishpichinka. Chasnallatata tukuy yachachishkaykita kasukkunatapas Yaya Dioska kishpichinka.

Kirikkunata kunanamanta yachachin

5 ¹Wawkini, shuk ruku wawki mana alita rurashpanka mana piñashpa payta kunay. Ashwan yayaykitashina yuyashpa kunay. Chasnallatata shuk musu wawkitapas kikin wawkikitashina yuyashpa kunay. ²Chasnallatata paya panikunata mamaykitashina yuyashpa kunay. Shipas panikunatapas chasnallatata ali yuyaywa, mana millaypata yuyarishpa, kikin panikitashina kunay.

Warmi mashintukuna yanapanamanta yachachin

³Kunanka rimashkayki mashintu panikunamanta. Shuk pani mashintupa mana ayllun tiyashpanka yanapay.

⁴Maykan pani mashintu wawayu nituyu kashpanka chay wawakuna yachakuna-huchun mamankunata alita yuyashpa yanapanankunapa. Mamankunata yuyanankuna tiyan, paykunata wiñachishkanrayku. Chasna chay wawankunaka mamankunata yuyashpa yanapashpankunami Yaya Diospa rikushkanpika ali kan. ⁵Ashwan shuk wakcha pani mashintu Yaya Dios yanapananta chapashpa kawsashpan punchanti tutanti payta mañashpa kan. ⁶Shuk pani mashintu aychan munash-kata rurashpa kawsahushpanka Yaya Diospa rikushkanpika wañushkashinami kan. ⁷Kanka yachachiy chay pani

mashintukunata alita rurashpa Yaya Diosta mañashpa kawsanankunapa, mana nima pi rimanankunapa chay Jesukristuta kirik mashintuka mana alitachu rurashpa kawsan nishpa.

⁸Karan ñukanchi Jesukristuta kirikkuna mamanchikunata yuyashpa yanapananchi tiyan. Maykan kirik runaka mana mamanta ayllunkunatapas yanapashpanka Jesukristuta mana kirikshina tukun, chay mana kirikkunamanta pasami millaypata rurak kan.

⁹Wawkini, kunanka yachachishkayki imashna pani mashintukunapa shutinkunatami killkankichi tantarik kirikkuna yanapahushkankuna kanankunapa nishpa. Chay mashintukunaka paya kanan tiyan shuk kusanllawa kawsashka. ¹⁰Tukuy runakunapa rikushkypi alita rurak warmi kanan tiyan. Wawankunata alita wiwashka kashpanka pasyakkunatapas wasinpi ali munaywa kayak, Jesukristuta kirik masinkunatapas kushilla yanapak, parisihukkunatapas yanapak, chay tukuy alikunata rurashpa kawsak kashpanka atipanchi yanapanata.

¹¹Shuk pani mashintukuna manara paya kashpankunaka ama killkaychichu kirikkuna yanapahushkankuna kanankunapa. Pakta paykuna manana kusayashpa kanllata sirvishpa kawsasha nishpa *Kristuta rimashkankunata paktachinankunaranti aychankuna munashkankunata ruranayanahuma. Chasna kashpanmi kutikashka kusayanata munankakuna. ¹²Chasna kuti kusayashpankunaka uchayu kanahun Kristuta rimashkankunata mana paktachishkankunaryku. ¹³Chaymantapas chay manara paya mashintukuna kirikkuna yanapahushkankuna tukushpankunaka yacharinahuma killanata. Karan wasipi yanka kwintashpa purinahuma. Tukuy

imakunapi satirishpa, mana alikunata rimashpa kawsanahuma.

¹⁴Chayrayku munani, maykan pani mashintu manara paya kashpanka sukama kusayanampa, wawayashpan wawankunata alita wiñachinampa, wasinpi tukuy rurana kashkata alita rurashpa kawsanampa. Chasna kusanwa alita kawsashpanka mana kirik runanaka manami atipankakunachu millaypata paymanta rimanata. ¹⁵Ñami tiyan shuk pani mashintukuna manana Jesukristuta kasunayashpankuna supaykunapa apuntana kasukkuna.

¹⁶Shuk wawkikunapa panikunapa ayllunkunapi mashintu tiyashpanka paykuna payta yanapanankuna tiyan. Chasna rurashpankunami kirik masinkunaka mana chay mashintukunata yanapanankuna tiyanchu. Chasnami atipankakuna yanapanata wakcha warmi mashintu kirik masinchikunata.

Kirikkunata sinchikuchik wawkikunamanta riman

¹⁷Chay aklarishka kirikkunata sinchikuchik wawkikuna alita yanapashpankuna tukuy kirikkunaka paykunata yuyanankuna tiyan. Shukkuna paykunamanta Yaya Diospa shiminta yachachikkuna kashpankuna alita yachachishkankunaryku ashwan sumakta yuyankichi. ¹⁸Yaya Diospa killkachishkypi kasnami yachachin:

Shuk tarawak wakra triguta wishku-hushkanpi ama shiminta tapay-chichu nishpa.

Chasnallatata riman:

Shuk tarawak runaka munanmi pagay tukunata nishpa.

Chayrayku chay Yaya Diospa shiminta yachachik wawkikunata yanapashpa shuk imata kunanchi tiyan.

¹⁹Shuk aklarishka kirikkunata sinchikuchik wawkimanta shuk runa

rimama uchatami rurashka nishpa, chaytaka mana chasnalla kiriychu. Ashwan ishkay kimsa runakuna sapallankuna chasnallatata rimashpan-kuna uchata rurashkanta rikushkanimi nishpa, chaypira paykunata kirinki. ²⁰Chay shutipa uchata rurahuk wawkita kayay, tukuy kirikkunapa tantarish-kanpi kunashpa rimanaykipa, manana chasna rurashpa kawsanana. Chasna rurashpaykimi tukuy kirikkunapas mancharishpankuna kuyrarinkakuna mana chasna ruranankunapa. ²¹Waw-kini, Yaya Diospa, Jesukristupa, Yaya Diospa akllashkan *angelkunapa rikushkanpi rimani kanta: Tukuy kirikkunata chasnallatata kunay. Kikin aylluyki, kikin amiguyki kashpanpas millaypata rurashpanka ama rimaychu payka mana millaypata rurashkachu nishpa.

²²Shuk wawki kirikkunata yachachik kanata munashpanka alita rikuy, chay wawkika alitachu manachu kawsahan nishpa. Mana kunkaymanta mana alita yuyarishpa makikita churashpa mañaychu payrayku yachachik kananpa. Mana alita yuyarishpa shuk wawkita akllankima. Payka millaypata ruramaka, tukuy payta riksik runaku-nami kanmantapas rimankakuna mana alita rurak masin kanaykita. Mana chasna yuyarinankunapa alita rurashpalla kawsay.

²³Wawkini, karan ratu wiksa nanaywa kahushpayki ama yakullata upyaychu. Uchillastu *vinutapas upyay aliyanay-kipa.

²⁴Shuk wawkita akllashpayki kirikkunata sinchikuchik kananpa, alita yuyari. Shuk runakunapa uchata rurashkankunata kunalla yachanchi manara Yaya Dios paykunata kastigash-panra. Shuk runakunapa uchata rurashkankuna pakalla kashpan

chaytaka mana kunalla yachanchichu. Yaya Dios puntanpi churashpan tapushpanmi chaypira yachashunchi. ²⁵Chasnallatata shuk wawki alita rurahushpanka kunalla yachanchi alita kawsahushkanta. Shukpika alita rurahushkankunata mana utkalla yachanchichu. Chasna kashpanpas chay ali rurashkankunaka mana pakallachu kiparinahun.

Kirik patronyu tarawanankunamanta riman

6 ¹Tukuy patronpi tarawak kirikkuna patroyninkunata yuyashpa, mana aynishpa alita tarawanankuna tiyan. Chasna alita tarawashpankunami nima pi atipankachu millaypata rimanata Yaya Diosmanta, nima yachachishkan-chimanta mana valinchu nishpa rimanata. ²Patroyninkuna Jesukristuta kirik kashpankuna mana paykunawa parihuyashpa kanahuchun, manana alita kasukkuna, kirik masinkuna kashkankunaryku. Paykunata ashwan alita kasushpa, mana killashpa paykun-rayku tarawanankuna tiyan, Jesusta kirikkuna, Yaya Diospa yuyashkankuna kashkankunaryku.

Kullkita yapa munashpa kawsanaka mana ali ruranakunapa sapinmi

Wawkini, tukuy kay rimahushkaynita tukuy kirikkunata yachachi. ³Tiyan runakuna mana alita yachachikkuna. Paykunaka Amunchi Jesukristu alita yachachishkanta mana kasunayanahunchu. Imashnami Jesukristuta kirishpa kawsashunchi nishpa yachachishkanchi-tapas mana kasunayanahunchu. ⁴Yaya Diospa shiminta mana asirtashpankuna paykuna kikin yuyayninkunallawa tukuymanta ashwan yachak tukunaya-nahun. Maykankunamantami runakuna mana shuk yuyayllawa kanahun, mana

sakishpa chaykunamanta yuyarishpa rimanakushpa kawsanahun. Chasna kawsashpankuna shukkunawa parihuyanata munakkuna tukunahun, chikninkuk, piñanakuk, kaminakuk runakuna, shukkunamanta yanka millaypata yuyarikkuna.⁵ Paykunaka shukkunawa ayninakushpalla kawsanahun. Millaypata yuyayyu runakuna kanahun, shutipa kashkata riksichik Yaya Diospa shiminta mana asirtakkuna. Paykunaka yuyarinhun, Jesukristuta kasuk tukushpayni achka imakunata apisha nishpa. Chasna runakunamanta anchuriy.

⁶ Shutipami ñukanchikuna Jesukristuta kasushpa kawsashpanchi ashwan achkata apinchí Yaya Diosmanta, ima ñukanchipa tiyashkanllawa kushilla kawsashpanchi mana shunkunchita imakunapi churashpa.⁷ Kay allpapi wawayarirkanchi shinalla mana imayu. Chasnallatami wañushpanchipas mana imata apashunchichu.

⁸ Chayrayku mikunanchi, churarinanchi tiyashpanka akuychi kushilla kawsashunchi. ⁹ Maykan runakunami kullkiyanata munashpankuna yapa kamay tukuhushpankuna utkalla mana alikunata ruranahun. Tukllapi yaykushkashina kanahun. Tukuy uras ashwan kullkita munashpa, mana alita rurashpa kawsanahun. Paykuna kikinpa mana valik waklichik munanankunawa waklichirishpankuna kullunkakuna. ¹⁰ Yapa kullkita munashpa kawsashpanchi tukuy mana alikunata ruranchi. Shukkuna yapa kullkita munak tukushpankuna Jesukristuta kirinata sakishkakuna. Chasna mana Yaya Diosta kasunayashpankunami yapa parisishpa kawsanahun.

Pablo Timoteota yachachin alita rurashpa kawsanapana

¹¹ Wawkini Timoteo, Yaya Diosta kasuk runa kashpayki ama chay mana

kasunayak runakunashina yapa kullkiyanata munashpa kawsaychu. Alillata rurashpa Yaya Diosta kasushpa, Jesukristuta kirishpa, chay llaktapi kawsak runakunawa yuyanakushpa kawsay. Ali yuyaywa runakunata yanapahushkaykipi mana sampayaychu. Runa masikikunata llakichishpa kawsay, mana yuyarishpa paykunamanta ashwan ali kanaykita.¹² Shuk ali suntalu wañunakunapi sinchikukshina Jesukristuta alita kirishpa katiy Yaya Dioswa wiñaypa kawsak rinaykipa. Chasna paywa kawsak rinaykipa Yaya Dioska kanta kayarka, chaymantapas Jesukristuta kirik tukushkaykiti achka runakunapa puntanpi rimashkanki.

¹³ Yaya Dios tukuy kawsakkunata kawsayta kukmi kanta rikuhan. Chasnallatamí Jesukristu kanta rikuhan, maykanmi *romanokunapa apunkuna *Pilatopa puntanpi wañuchiay tukunata mana manchashpa rimarka tukuymanta ashwan atun apu kananta. Paykunapa rikuhashkanpi kanta kamachimi:

¹⁴ Tukuy kanta rimashkaynita mana pasa pasata alita yachachiy, Amunchi Jesukristu kuti kay allpama shamunankama nima pi kanmanta rimananpa mana kuskatachu yachachin nishpa.

¹⁵ Yaya Dios munashkan punchami Jesukristuta kuti kay allpama kachanka. Payka shuklla tukuy uras chasnalla ali yuyayyu tukuymanta yachayyumi kan. Payka tukuy atun apukunamanta atun apumi, tukuy kamachikkunamanta atun kamachikmi.¹⁶ Yaya Diosllami nima ima uras wañunchu. Payka kawsanmi suma chuyahlla punchapi, chaypi nima maykan runa atipanchu payta kayllanata. Nima maykan runa payta rikushkachu, nima maykan atipanchu rikunata payta. Payllata tukuy runakuna atunyachishpa kushichinahuchun.

Paylla tukuy uras wiñaypata ñukanchi

runakunata kamachichun. Chasna kachun.

**Kullkiyu kirikkuna imashnami
kawsanankunapa tiyan**

¹⁷Wawkini, chay yapa kullkiyu wawzikunata panikunata yachachiy: Mana yuyarinkichichu shukkunamanta ashwan valik kanaykichita. Ama shuk ratu tukurik kullkikichi kankunata yanapak kananta yuyarishpa kawsaychchu. Ashwan Yaya Dioslla yanapanata atipak kananta yuyarishpa kawsaychi, payka ūukanchita kushichishpa munashkanchimanta pasatami kun nishpa. ¹⁸Chaymantapas yachachiy, alikunata rurashpa kawsanankunapa. Achka ali ruranankunawa achka imayushina tukunahuchun. Mana mitsashpa kuchun maykanpachari pishin. Imankuna tiyashkakunawa shukkunata yanapashpa kawsanahu-chun. ¹⁹Chasna kawsashpankunami silipi kawsanarayku alicharishpa

rihukshina kanahun sumakta kushichiy tukunankunapa, chaymanta shutipa kawsyta charik kanankunapa.

Pablopá tukuchishkan shimi

²⁰Wawkini Timoteo, Yaya Dios munashpan paypa shiminta yachachik tukushpayki chay shimita mana chikanyachishpa alita yachachiy. Yaya Diosta mana kasushpa yanka rimak runakunapa rimashkankunata ama kasuychu, nima chay yanka llullachishpa yachay nishkankuna chikan chikan yuyaykunata. ²¹Shuk chaykunata yachakushpa katikkuna Jesukristuta kirinankunata sakishkakunami.

Yaya Dios kankunata llakichishpan wakaychachun.

Chayllata killkashkani.

Wawkiki
Pablo

ISHKAYNIN PABLOPA KILLKASHKAN KILLKA TIMOTEORAYKU

Pablo killkan Timoteorayku

1 ¹⁻²Munashkayni wawkini Timoteo,
yuyashkayni wawaynishina
kashpayki ñuka Pablo kay kartata
killkahuni kanrayku. Yaya Dios munash-
pan Jesukristuka akllawashka *apostol-
nin kanaynipa. Kachawashka runaku-
nata yachachinaynipa, tukuy
Jesukristuta kirik runakunaka wiñaypa
paywa kawsankakuna nishpa rimash-
kanta. Yayanchi Dios, Amunchi
Jesukristupas kanta yuyashpan
llakichishpan yanapachun kushilla
kawsanaykipa.

Pablo Timoteota yuyachin
Jesusta alita katinanpa

³Wawkini, kanta yuyarishpaynimi
punchapi tutapipas mañahushpayni
Yaya Diosta agradesini kanrayku. Nima
imamanta shunkuynipi rimay tukushpa
payta ali yuyaywa kushichishpa
kawsani, imashnami ñawpa yaya
rukuyni wañukunapas Yaya Diosta
kushichishpa kawsapayarkakuna.
⁴Ñawpa sakinaku hushpanchi llakishpa
wakashkaykita yuyarishpayni yapa
kanta rikunayani. Kuti rikunakunchi-
maka, yapa kushikuynima. ⁵Chaymanta-
pas yuyarini tukuy shunkuykimanta
pacha Jesukristuta kirihushkaykita. Kan

kirihushkaykishina mama payayki
Loida, mamayki Eunise ña puntiru
kirishpa kawsapayarkakuna. Chasnalla-
tata kantapas yuyarini, paykunashina
sumakta Jesukristuta kirishpa
kawsahushkaykita.

⁶Chayrayku makinita kanpi churashpa
mañashkayni uras Yaya Dios
Espiritunwa yachachik kanaykipa
atipachishkanta yuyachini, ashwanta
sinchikurishpa Yaya Diospa rimash-
kanta alita yachachinaykipa. ⁷Yaya Dios
ñukanchima kachashkan Espiritunka
mana kanchu manchaysiki, ashwan
ñukanchita yanapan mana manchashpa
kawsananchipa. Payka ñukanchita
sinchikuchin, chaymanta yanapan runa
masinchikunata yuyashpa, Yaya Diosta
kasushpa yuyaywa kawsananchipa.

Mana manchashpa
Jesukristumanta rimay

⁸Chayrayku wawkini, ama pinkaychu
rimanata Jesukristuta katik kanayki-
manta. Chasnallatata ama pinkaychu,
ñuka Yaya Diospa rimashkanta
yachachihushkaynirayku karselpi
kahushkaynimanta. Kanta chiknihush-
pankuna parisihu shpaykipas Yaya Dios
kanta sinchikuchinka chay suma ali
shimita Jesukristu runakunata
kishpichinanmanta yachachishpa

katinaykipa. Chayrayku ama manchaychu ñukanchiwa pakta kanpas chayma parisinaykita. ⁹Yaya Dios ñukanchita kishpichirka, chaymantapas kayarka payrayku kawsananchipa. Mana ñukanchita kishpichirkachu alita rurashkanchirayku, ashwan pay kikin munashkanraykumi kishpichishka. Manara kay allpata nima runata rurahushpanra ñukanchikunata yapa yuyashpanmi munarka Jesukristuta kirishpanchi kishpichinata. ¹⁰Yapa yuyahushkanta rikuchirka ñukanchita Kishpichik Jesukristuta ñukanchima kachashkanwa. Jesús wañushkanmanta kawsarishpan wañuya winsirka. Paypa suma ali shiminwa runakunata kishpichinanmanta riksichirka imashnami Yaya Dioswa kawsay mana tukurikta tarinchi.

¹¹Yaya Dioska ñukata akllawashka paypa *apostolin kanaynipa.

Kachawashka paypa suma ali shiminwa tukuy parti runakunata yachachinaynipa. ¹²Chasna chay ali shimita yachachihushkaynirayku kay karselpi churawashpankuna parisihushpaynipas mana pinkarini-chu. Alita yachani pipimi sinchikuhuni. Paymi kan yapa yuyawak Jesukristu. Yachani paymi yachachinaynipa kuwashkan shininta shamunan punchakama yachayninwa alita wakaychananta runakuna chasnalla uyanankunapa.

¹³Wawkini, chay suma ali yachachinata kanta yachachishkaynishina, kanpas chasnallatata katiy alita yachachishpa shukkunatapas. *Kristu Jesuswa shuk yuyayllawa kashpayki payta alita kirishpa runa masikikunata yuyashpa kawsay. ¹⁴Yaya Diospa Espíritun ñukanchipi kawsashpanmi ñukanchita yanapan. Chayrayku Yaya Diospa suma shininta, maykantami yachachinaykipa kamachiy tukushkanki, mana chikanyachishpa alita yachachiy.

¹⁵Wawkini, ña yachanki chay chikniwak runakuna apiwashpanguna tukuy Asia allpamanta wawkunkuna sapallaynita sakiwashkankunata. Paykunamanta chay ishkay wawkunkuna Figelo Hermogenespas sakiwarkakuna. ¹⁶Ashwan wawkinchi Onesiforoka mana pinkashpachu kay karselpi kahushkay-nipi achka kuti shamurka, yanapawashpa sinchikuchiwashka. Chayrayku Yaya Diosta mañani tukuy paypa aylunkunata llakichishpan yanapananpa. ¹⁷Chaymantapas chay wawkinchika kay *Roma llaktapi paktashkan uraslla, mana sampayashpachu maskawarka tariwanankama. ¹⁸Ña yachanki chay wawkinchi Efeso llaktapipas ñukanchita achkata yanapashkanta. Chayrayku mañani Amunchi Jesukristu tapuy tukunanchi punchapi chay wawkinchita sumakta llakichinampa.

Parishpapas alita Jesukristuta katinamanta yachachin

2 ¹Wawayni, Jesukristu kanta sumakta yanapahushpan sinchikuy alita payta kasushpa kawsanaykipa. ²Yaya Diospa rimashkanta achka runakunata yachachishkaynita uyashkanki. Kanpas chasnallatata chay yachachishkaynita yachachiy ali munaywa paktachik runakunata, maykankunami alita yachachinata yachanahun, paykunapas shukkunatana yachachinankunapa.

³Wawkini, kanpas ñukashina parisihushpaykipas shuk ali suntalushina apunchi Jesukristuta sumakta kasushpa kawsay. ⁴Shuk runa ali munaywa suntalu tukushpan wañunakunama rihushpanka mana shuk runakunapa rurahushkanpi satirishpa kawsanchu. Ashwan munama apunta kasushpa payta kushichinata. ⁵Chasnallatata

pelotata pukllak runapas mana atipanchu gananayahushkanta apanata, chay pukllanarayku kamachishkakunata mana kasushpanka. ⁶Chasnallatatami chakranpi sinchita tarawak runapas tukuy imata chakranpi tarpushpan payrami chay tarpunpa muyunta pallan. Chasnashinami ñukanchipas sinchikushpa Jesusta kasushpa kawsashpanchika paypa kunayahushkanta apishunchimi. ⁷Wawkini, chay rimashkaynita alita yuyariy. Jesukristumi kanta yanapanka tukuya alita asirtanaykipa.

⁸Yuyariy Jesukristuta, payka ñawpa atun apu Davidpa ayllunmanta wawayarishka, chaymanta wañushkanmanta kawsarirka ñukanchikunata kishpichinanpa. Chay suma ali shimitami yachachihuni. ⁹Chayta yachachihushkayniraykumi parisuhuni. Yachachishkaynita mana kasuk runakunaka makinikunata runa wañuchiktashina kadenawa watawashpankuna karselpi churawashkakuna. Chasna ñukata watawashpankunapas Yaya Diospa shimintaka manami atipanahunchu arkanata shuk partima paktanana. ¹⁰Chayraykumi parisihushpaynipas awantahunilla. Yapa munani tukuy Yaya Diospa akllashkan masinchikunapas Jesukristuta kirishpankuna kishpichiy tukunkunkunapa, paywa tantaylla wiñaypa punchahllapi kawsak rinankunapa.

¹¹Kay shimika shutipami:

Jesukristu wañushkanrayku ñukanchipas wañushkashina tukushpanchi pay kawsarimushkanrayku ñukanchipas kawsari-shunchi paywa pakte kawsananchipa. ¹²Kay allpapi kawsashushpanchira parisihushpanchipa mana sampayashpa Jesukristuta kirishpalla

kawsashpanchika paywa paktami kamachik tukushunchi. Jesusta mana riksichu nishpanchika paypas rimanka manami kankunata riksichu nishpa. ¹³Ñukanchi Jesusta rimashkanchita kanta kasushpa kawsasha nishpa mana paktachishpanchikas payka tukuy rimashkanta paktachik kashpanmi ñukanchita rimashkanta paktachinlla. Mana atipanchu rimanata rimashkaynita mana paktachishanchu nishpa.

Yaya Diospa kamachishkan runa alita kawsananmanta yachachin

¹⁴Wawkini, Jesukristumanta yachachishkaynita tantarishkaykichipi alita yuyachi yirik masinchikunata. Paykunata kasna kunay: Yaya Diospa rikushkanpi kankunata rimani mana yanka shimikunata rimanakushpa kawsanaykichi nishpa. Chasna rimanakushpa kawsanaka mana valinchu, ashwan shuk uyahukkunapa yuyayninkunatami waklichin. ¹⁵Kan atipashkaykita ruray shutipa kashkata riksichik Yaya Diospa shiminta alita yachachishpayki paypa rikushkanpi ali kamachishkan runa kanaykipa. Chasna kashpaykimi Yaya Diospa puntanpi mana pinkanayki tiyanchu.

¹⁶Chay mana Yaya Diosmanta yanka rimanakunamanta anchuriy. Chasna yanka shimikunata rimakkunaka karan puncha ashwanta Yaya Diosmanta anchurishpa rinahun. ¹⁷Chasna mana ali yachachikkunapa rimahushkankuna aychanchita ismochik unkuysinami miran. Tukuy uras ashwan shukkunapas rimashkankunata kirishpa kawsanahun. Chasna mana alita yachachikkunamanta Himeneo Filetopas kanahun. ¹⁸Payku-

naka shutipa kashkata yachashkanku-nata sakishpankunana kasna
yachachishpa yanka rimanahun: Kirik runakunapa kawsarinankunaka ñami pasashka. Mananami tiyankachu shuk kawsarinaka nishpa. Chasna rimashpan-kuna Jesukristuta kirikkunamanta shukkunata llullachinahun Yaya Diospa shiminta manana kiranankunapa.

¹⁹Chasna kashpanpas Yaya Dios yanapashpan shutipa kirikkunaka shuk wasipa orkoynin suma shayachirishka-shinami. Yaya Dios paykunapa amun kashpan kasna killkarishkashina kanahun: Ñuka Yaya Dioska kay wawaynikunata alitami riksini nishpa. Chaymanta: Kay Jesukristuta kiranimi nishpa rimak runakunaka sakinankuna tiyan mana ali ruranakunata nishpa.

²⁰Shuk atun wasipi achka imakuna tiyan. Shuk imakunaka oromanta, shukkunaka kullkimanta, shukkunaka kaspimanta, shukkunaka sapiramanta rurashkashina kanahun. Chay imakunamanta shukkunata amunka yapa valichishpan kushikuna tantarinakunara-yakkulla surkushpan churan. Shukkunata wasurata wichunallapa churan.

²¹Maykankunami chay mana alita yachachikkunamanta anchurishpan nima imapi kasun, paykunami chay amun yapa valichishkan imakunashina kanahun. Yaya Dios tukuy uchata rurashkankunamanta pichan paypa munashkanta rurashpa kawsanankunapa. Chasna tukushpankunami Amunchi Jesukristuka maypipas atipan churanata munashkanta ruranankunapa. Paykunaka alichay tukushka kanahun tukuy alikunata ruranankunapa.

²²Chasna kashpan ama kawsaychu millaypata yuyarishpa ruranayashpa shuk musukunashina. Ashwan kanka alita rurashpa, Jesukristuta kirishpa, payta runakunatapas yuyashpa, tukuy

runakunawa kushilla kawsay. Tukuy shunkunkunamanta pacha Yaya Diosta mañak wawkikunawa pakta kawsay. ²³Yanka nishpa nima imapi yanapak rimanakunapi ama satiriychu, nima sakiychu tantarishkaykichipi shukkuna chasna rimanakushpa katinankunapa. Ña yachanki runakuna chasna rimankushpankuna piñanakushpa kawsanan-kunata.

²⁴Ñukanchikunaka Jesukristupa kamachinan runakuna kashpanchi mana piñanakushpa kawsananchi tiyanchu. Tukuy runa masinchikunata yuyashpa kawsananchi tiyan. Ali yuyaywa runa masinchikunata kunananchi tiyan. Alita yachachinata yachananchi tiyan. Shukkuna ñukanchita mana alita rurashpankuna mana piñarishpa nima rantipashpa ali yuyaywa sinchikurishpa kawsananchi tiyan. ²⁵Chay manana Jesukristuta kasunayak runakunata yuyashpa alita kunananchi tiyan. Chasna kunashpanchimi chapanchi Yaya Dios paykunata yanapananpa kuti kasunankunapa. Chasna kasukkunana kashpankuna riksinkakuna Yaya Dios shiminpi riksichishkan shutipa kashkata. ²⁶Chasna atipankakuna kishpinata supay paykunata llullachishkanmanta. Paypa munashkanllata ruranankunapa llullachiy tukushkankunamanta kuti atipankakuna alita yuyarinata, supaypa munashkanta manana ruranankunapa.

Imashnami runakunaka kawsankakuna Jesús shamunan punchakama

3 ¹Wawkini, kayta alita yachanayki tiyan, Jesukristu kuti kay allpama shamunanka kuchupi kashpan runakunaka yapa millaypata rurashpankuna achkata parisinanchita. ²Runakunaka paykuna kikinpa munashkankunalla-tami rurankakuna, yapa kullkita

munashpalla kawsankakuna. Paykuna kikinta atunyachishpa rimakkuna kankakuna. Shukkunamanta ashwan ali kani nishpa yuyarinkakuna. Yaya Diosmanta millaypata rimankakuna, yayankunata mana kasunkakunachu. Nima imamanta yachankakunachu agradesinata. Yaya Diospa munashkanta mana kasunkakunachu.³ Paykunaka nima pita yuyankakunachu, nima maykanwa llakichinakushpa kawsankakunachu. Shukkunamanta llullashpa rimankakuna. Paykunapa aychankuna munashkallata rurashpa kawsankakuna. Mana llakichishpachu runa masinkunata parisichinkakuna. Mana munankakunachu alikunata rurashpa kawsanata.

⁴ Runa masinkunata riksichishpa apichinkakuna. Mana alita yuyarishpa imatapas rimashpa rurashpa kawsankakuna. Paykuna kikin yuyayninkunapi atunyachirishka kankakuna. Yaya Diosta yuyanankunaranti yanka nishpa paykuna kikin munashkunkunallata rurashpa kawsankakuna.⁵ Paykunaka Yaya Diosta kirikkunashinami rikurinkakuna. Chasna rikurishpangunapas kawsanankunawa rikuchinahun Yaya Diospa yachayninta mana riksik kanankunata. Wawkini, chay mana ali rurak runakunawaka ama ishkayaychu, paykunamanta anchuriy.

⁶ Shukkuna paykunamanta alishina tukushpa shuk wasikunapi yakyunahun utkalla kirik warmikunata llullachinankunapa paykunatana kasushpa kawsanankunapa. Chay warmikunaka yapa uchata rurashpa kawsapayashpankuna chay uchakunata rurashkunkunawa yuyayninkunapi llashawa nitirishkashina kashpankuna achka millaypa munanankunata yuyarishpa kawsanahun.⁷ Tukuy uras yachakuhushpankunapas mana atipanahunchu asirtanata Yaya Dios shiminpi riksichishkan shutipa kashkata.

⁸ Ñawpa Egipto allpapi chay ishkay puruhukuna Janes shutiyu Jambres shutiyu Yaya Diospa runan Moisesta chiknishpa remarkakuna: Kanka manami Yaya Diospa rimashkantachu yachachinki nishpa. Chasnallatatum kunanpas chay mana alita yachachikkuna shutipa kashkata chikninahun. Mana alita yuyarishpanguna millaypa yuyayyu kanahun. Jesukristuta kirishkankunaka mana ali kananta rikuchirkakuna.⁹ Chasna yanka nishpa rimakkunaka mana ñukanchita atipankakunachu llullachinata. Ñukanchikuna Yaya Diosta kasushpa kawsashpanchika yachashunchimi chay runakuna yuyay illashina kanankunata. Chasnallatatum ñawpapas Yaya Diosta kasuk runakunaka yacharkakuna chay ishkay puruhukuna yuyay illashina kashkankunata.

**Pablo Timoteota kunashpan
sinchikuchin**

¹⁰ Wawkini, kanka yachachishkaynita alita yachakushpayki kasushkanki. Alita rurashpa kawsanaynita katishkanki. Tukuy uras Yaya Diospa munashkanta kasunata munahushkaynita yachashpayki kanpas chasnallatata kawsanki. *Kristuta kirishpa, runa masinikunawa yuyanakushpa, ali yuyaywa sinchikurishpa parisinakunata awantashpa kawsahushkaynita yachashpayki kanpas chasnallatata kawsanki.¹¹ Antioquia llaktapi, Ikonio llaktapi, Listra llaktapi-pas runakuna yapa chikniwashpankuna parisichiwashkunkunata yachashpayki kanpas parisichiy tukuhushkaykipi ñukashina sinchikunki. Tukuy chaynamantami Yaya Dioska yanapawashpan kishpichiwarka.¹² Ña yachanchi Jesukristuta kirikkuna kashkanchirayku Yaya Diospa munashkanta rurashpa kawsanata munashpanchi runakuna

ñukanchita chiknishpa parisichinankunata.¹³ Millaypa yuyayyu runakunaka, llullachik runakunapas ashwanta ashwanta mana alitachu rurashpa kawsankakuna. Shukkunata llullachishpankuna shukkunana paykunata llullachinkakuna.

¹⁴Chay runakuna chasna kawsahushpankunapas kanka yachachishkaynita yachakushkaykita alita kasushpa kawsay. Chay yachachishkaynika shutipa kananta kirishkanki. Alita yachanki pimantami yachakushkanki. Nuka Yaya Diosta alita kasushpa kawsashpayni yachachishkaynita ali kananta riksichishkanki.¹⁵Yuyariy wawamanta pacha Yaya Diospa killkachishkanta yachakushkaykita. Chaymi ñukanchita yachachin alita Jesukristupi sinchikushpa kawsahushpanchi uchata rurashpa kawsanamanta kishpichiy tukuhushkanchita.¹⁶Yaya Diospa killkachishkanka paypa Espíritun runakunata yuyachishpanmi killkarishka kahun. Chasna kashpan ñukanchita alita yanapan ali kashkata yachakunanchipa. Mana ali rurashkanchikunata riksichin. Chaymanta yachachin imashnami alikunata rurashpa kawsashunchina. Ñukanchita yachachishpa kunashpa yanapan alillata rurashpa kawsananchipa.¹⁷Chasna Yaya Dios killkachishkanwa ñukanchi paypa runankunata yachachin tukuy alikunata atipananchipa ruranata.

4 ¹Kristu Jesús kutikashka shamunka tukuy runakunata kamachik kananpa. Chasna shamushpan wañushkakunata kawsakkunatapas tapunka alitachu rurashkakuna manachu nishpa. Chayta yuyarishpayni paypa rikushkanpi Yaya Diospa rikushkanpi-pas kanta sinchita kunashpa rimani:
²Yaya Diospa shiminta alita yachachiy. Runakuna alita kasushpankuna mana

kasunayashpankunapas tukuy uras alita yachachiy. Ali yuyaywa mana piñarishpa runakunata yachachiy alita rurashpa kawsankunapa. Rurashkakuna mana ali kashpanka paykunata alita kunashpa yanapay alitana rurak kanankunapa. Shukkuna mana kasunayashpankunaka alita asirtachiy imashnami tukunkakuna, chaymanta rimay manana chasna katinankunapa. Kasuk runakunataka alita kunashpa sinchikuchiy.

³Shuk punchami chay suma ali yachachinakunata manana uyanayankakunanachu, ashwan paykuna kikinpa munashkankunallatami katinayankakuna. Chasna kashpankunami paykunashina yuyarik achka yachachikkunata maskankakuna paykuna kikinpa munashkankunata yachachinankunapa.

⁴Yaya Dios shiminpi riksichishkan shutipa kashkata kasunankunaranti, chay runakunaka yanka rimana shikunatana kasunkakuna.⁵Kanka wawkini, tukuy uras alikunallata rurashpa kawsay. Runakuna kanta chiknishpankuna parisichihushpankunapas chay suma ali shimita Jesukristu ñukanchita kishpichinanmanta yachachishpalla katiy. Jesukristupa kamachinan runa kashpayki alita paktachiy paypa munashkanta.

⁶Yaya Diospa shimita alita yachachishkayniraykumi ñukataka wañuchinaya-wahunkuna. Chasna wañunayniwa Yaya Diosta kawsaynita kushpa kushichishami, imashnami *saserdotenchikuna *vinuta talishpa rurapayanahun shuk obeña maltata wañuchishpa Yaya Diosta kushichishpa rupachihushkankunapi. Ñami paktarihn wañuchiwanankuna punchaka.

⁷Ñukaka Jesukristuta kirishkaynimanta pachami parisishpaynipas kunankama alita kasushpa kawsashkanki. Runakuna piñarishpankunapas paypa shiminta yachachishpa-

lla katischkani. Chasnami Jesukristu ruranaynipa munashkanta paktachishkani kay kawsahushkaynipi.⁸ Chasna alita rurashpa kawsashkaynirayku alllata rurak tukuy runakunata rurashkankunamanta tapushpan rimak Amunchi Jesukristuka kuti shamushpan sumakta kushichiwanka. Mana ñukallatachu chasna alita kushichinka, ashwan tukuy paypa shamenanta alita yuyashpa chapahuk runakunatapas chasnallatamatmi kushichinka.

Pablo kartanta tukuchihushpan rimashkan

⁹Wawkini, utkalla rikuk shamuway. ¹⁰Wawki Demaska Jesusta mana kirikkunashina kawsanata munashpan sakiwashkami. Tesalónika llaktama rishka. Wawki Kresenteka rishkami Galasia allpapi llaktakunama yachachinanza. Wawki Titopas Dalmasia allpapi llaktakunama rishka. ¹¹Wawki Lukasllami ñukawa kaypi kiparishka. Shamuhushpayki wawki Markusta pushamupay ñukata tukuy imapi yanapawananza. ¹²Wawki Tikikotaka Efeso llaktamami kachashkani kirikkunata chaypi yanapananza. ¹³Shamuhushpayki kapaynita apamupay, Troas llaktapi wawki Karpopa wasinpi sakishkaynita. Chaymanta libruynikunata apamupay. Tukuymanta ashwan munaynima apamupanaykipa chay karamanta rurarishkapi killkarishkakunata.

¹⁴Fierrota tarawak Alejandro shutiyu chikniwashpan achka mana alikunata rurashkanwa arkawarka. Chasna parisichiwashkanraykumi Yaya Dioska payta kastiganka. ¹⁵Chay Alejandroka yachachishkaynita mana ali kananta rimashpa yachachihushkaynipi yapa arkawashka. Chayrayku mana kasuychu llullachishpa yanka rimahushkanta.

¹⁶Kay *Roma llaktapi kamachik apukunapa puntanpi churay tukushpa puntiru tapuwahushkankunapi nima shuk

wawkinchikuna yanapawashkakunachu ayninata, tukuymi sakiwarkakuna. Chasna sakiwashpankunapas mana munanichu Yaya Dios paykunata kastigananpa. ¹⁷Amunchi Jesukristumi chay apukunapa puntanpi kahushkaynipi sinchikuchiwashpan sumakta yanapawashka tukuy mana israel runakunatapas paypa shiminta yachachinata paktachinaynipa. Chasna Yaya Dios munashkanshina paykunapas Jesús runakunata kishpichinanmanta uyashkakuna. Yaya Dios yanapawashpan kishpirkani mana chay chikniwak apukuna wañuchiwanankunapa. ¹⁸Chasnallatatami payka kuyrawanka tukuy mana alikunamanta. Kuyrawankami siluma pushawanana kushilla paywa kawsak rinaynipa. Tukuy runakuna tukuy uras wiñayparayku payta atunyachishpa kushichinahuchun. Chasna kachun.

Ña kartanta tukuchihushpan Pabloka tukuy kirikkunata saludan

¹⁹Wawkini Timoteo, saludapay paninchi Priskata, wawkinchi Akilata, wawkinchi Onesiforopa ayllunkunatas. ²⁰Wawkinchi Erastoka Korinto llaktapimi kiparishka. Wawki Trofimotaka unkushkatami sakishkani Mileto llaktapi.

²¹Wawkini, manara tamya killakuna paktahushpanra utkalla shamuway.

Wawkinchi Eubulo, wawkinchi Pudente, wawkinchi Lino, paninchi Klaudia, chasnallatata tukuy kaypi kahuk kirikkunapas kanrayku saluduta kachahunkuna.

²²Amunchi Jesukristu tukuy uras kanwa kashpan munashkanta kanpi paktachichun. Yaya Dios tukuy kankunata llakichishpan yanapachun.

Chayllata killkashkani.

Wawkiki
Pablo

PABLOPA KILLKASHKAN KILLKA TITORAYKU

Pablo killkan Titorayku

1 ¹Munashkayni wawkini Tito, ñuka kani Pablo, Yaya Diospa kamachish-kan, chaymanta Jesukristupa *apostolniin. Akllashka kani tukuy kankuna Yaya Diospa akllashkan masinikunata yachachishpa yanapananypa alita paypi sinchikushpa kawsanaykichipa, chaymantapas shutipa kashkata alita riksinaykichipa imashnami Yaya Diospa rikushkanpi ali kashunchi nishpa. ²Paypa rikushkanpi ali kashpanchi paywa wiñaypa siluma kawsak rinanchita yachanchi. Manara kay allpata rurahush-panra mana llullak Yaya Dios ña rimarka ñukanchi runakuna wiñaypa paywa pakta kawsananchita. ³Yaya Dios chay rimashkan shiminta riksichinan puncha kunan ña paktarishpan ñukanchita riksichishka. Ñukanchita kishpichik Yaya Dioska ñukata churawashka, paypa rimashkanta yachachishpayni chay shiminta riksichinay-nipa.

⁴Kanka kikin wawaynishinami kashpayki ñukawa pakta *Kristuta kirik kashkayki-rayku kay kartata killkahuni kanrayku. Yayanchi Dios, ñukanchita kishpichik Jesukristupas kanta llakichishpan yanapachun kushilla kawsanaykipa.

Jesukristuta kirikkunata yachachik Titomanta riman

⁵Wawkini Tito, chay Kreta islapi kanta sakishkani, chaypi rurananchipa

pishishkata ruranaykipa. Karan llaktapi kirikkunamanta shukkunata akllash-payki churay yachachikkunata yanapashpa kirikkunata sinchikuchik wawkikuna kanankunapa, imashnami kanta rimarkani chasna. ⁶Chay akllanayki wawkika alita kawsak runa kanan tiyan, nima pi millaypata rimanankunapa paymanta. Chaymantapas shuk warmiyulla kanan tiyan. Wawankunapas Jesukristuta kirik kanankuna tiyan, nima pi rimanankunapa millaypata rurak wawakunami kaykunaka, yayankunatapas mana kasunahunchu nishpa.

⁷Yaya Diospa runankunata yuyachi-nanpa yanapananpa churashka kashpan alita kawsak kanan tiyan, nima pi millaypata rimanankunapa paymanta. Mana kanan tiyanchu pay kikinpa munashkanllata rurak, nima pita kasuk. Chaymanta mana piña, mana machaysiki, mana makanakuyiski, nima kullkita llullachishpa apiysiki kanan tiyan.

⁸Ashwan payta pasyak runata alita wasinpi yaykuchik kanan tiyan. Tukuy shunkunmanta pacha alikunata rurak kanan tiyan, sumakta yuyarik, tukuy runa masinkunata chasnalla Yaya Dios munashkanshina rurak, Yaya Diosta alita kasuk, pay kikinta mana ali ruranakunamanta kuyrarinata yachak kanan tiyan. ⁹Shutipa Yaya Diospa shiminta kirik masinkunata yachachi-

hushkanta paypas alita paktachinan tiyan. Chasnallami atipanka shukkunata chay suma ali yachachihushkan shimita yachachishpa sinchikuchinata, chaymantapas Yaya Diospa shiminta mana munakkunata pantachishkankunata riksichishpa yanapanata.

**Yanka mana Yaya Diosta kasushpa
yachachikkunamanta riman**

¹⁰Wawkini, kirikkuna chawpipi tiyan achka runakuna Yaya Diosta mana kasunata munakkuna. Paykunaka yanka shimikunata yachachishpa runakunata llullachishpa kawsanahun. Tukuymanta ashwan chasna llullachishpa yachachinahun Moisespa killkashkanta kasuk achka israel masinikuna. ¹¹Chay llullachik runakunaka chasna yanka mana ali yachachinakunawa achka runa masinkunata ayllunkunanti llullachinahun. Kulkita apinata munashpangunkulla chasna yanka mana alita yachachishpa purinahun. Chay yanka yachachihukkunatacha chunllayachinanchi tiyan mana chasna yachachinankunapa.

¹²Chay Kreta islamanta shuk killkata yachak runa paypa ayllunkunamanta rimarka kasna: Kay Kreta islapi kawsak masinikunaka yuyay illa, llullaysikukunami kanahun. Chaymanta upyaysiki, mikuysiki, killaysiki kanahun nishpa.

¹³Chay runapa chasna rimashkanka shutipami karka. Chayrayku wawkini, chay Kreta islapi kirik masinchikunata sinchi shimiwa kunashpa yachachiy Yaya Diosta kasushpa alita kawsanankunapa. ¹⁴Chaymanta yachachiy chay israel masinikunapa yuyayninkunamanta yanka rimanankunata mana kasunankunapa. Yachachiy shutipa kashkata mana kasuk runakunapa kamachishkankunata mana kasunankunapa.

¹⁵Na yachanchi maykankunami ali yuyaywa kanahun, alikunallata yuyarishpa kawsanahun, paykunarayku tukuy Yaya Diospa rurashkanka ali kananta. Ashwan Yaya Diosta mana kasuk runakunaka mana alita yuyarik kashpangunkuna nima ima ali paykunaryku tiyanchu. Yapa millaypakunatami yuyarik kanahun. Ali kashkata yachashkankunata mana kasushpangunkuna ali kashkata manana alita yachanahunchu. ¹⁶Paykunaka Yaya Diostami riksinchinishpa rimanahun. Chasna rimashpankunapas mana Yaya Diosta riksik runakunashinami kawsanahun. Chasna kashpangunkunami millaypata ruranahun. Yaya Diosta mana kasuk kashpangunkunami mana atipanahunchu alikunata ruranata.

**Pablo Titota kunan alita
yachachinap**

2 ¹Kanka wawkini, Yaya Diospa shiminta alita yachakushpayki chay kirikkunata suma ali yachachinankunata yachachinayki tiyan, imashnami Yaya Diosta kasushpa alita rurashpa kawsankakuna. ²Tukuy chay ruku wawkikunata yachachiy, mana machashpa, nima ukupanakushpa, alita yuyarishpa kawsanankunapa. Chasna kawsahushpangunkunami shukkunaka alita paykunamanta rimankakuna. Chaymanta yachachiy Yaya Diosta alita kirinankunapa, runa masinkunawa alita yuyanakushpa, paykunata yanapahushkunkunapi mana sampayashpa kawsanankunapa. ³Chasnallatata tukuy paya panikunata yachachiy alita rikuchishpa kawsanankunapa, imashnami Yaya Diosrayku kawsakkuna kawsanankuna tiyan. Mana shukta shukta rimashpa purinahuchun. Mana machashpa kawsanahuchun. Alita rikuchishpa kawsashkankunawa

alikunata yachachinahuchun. ⁴⁻⁵Chas-nami mushu kusayu panikunata yachachinkakuna kusankunata wawan-kunata yuyashpa kawsanata, alita yuyarishpa, alita rurashpa kawsananku-napa, wasipi ruranakunata alita ruranata, shukkunata yuyashpa yanapa-nata, kusankunata sumakta kasunata, mana millaypa ruranakunapi satirishpa kawsanankunapa. Chasna kashpanku-nami paykunata rikushpankuna nima pi rimankachu Yaya Diospa shimin mana alichu nishpa.

⁶Chaymanta wawkini, chay musu wawkikunata, shipas panikunatapas kunashpa yachachiy, alita yuyarishpa mana paykuna kikin munashkankuna-llata rurashpa kawsanankunapa. ⁷Kanka alillata rurashpa kawsay, kanta rikushpankuna paykunapas alita rurashpa kawsanankunapa. Paykunata ali yuyaywa ali shimikunawa yanapak yuyaykunata kushpa yachachiy. ⁸Chasna alita rimashpa yachachishpay-kimi chay Jesusta mana kirik runaku-naka pinkarinkakuna. Mana atipankaku-nachu ñukanchimanta millaypata rimanata.

⁹Patronyu wawkikunata panikunata kunay mana aynishpa tukuy ima kamachihushkankunapi alita kasushpa patroyninkunata kushichinankunapa. ¹⁰Mana shuwanahuchun, ashwan nima imata apishpa sumakta tarawanahu-chun, tukuy runakuna rikushpankuna asirtanankunapa maytukuy sumami ñukanchita kishpichik Yaya Diospa shiminka paykunata yachachihush-kanka.

¹¹Yaya Dioska ñukanchita riksichishka yapa yuyashpan llakichishkanta, tukuy ñukanchi kay allpapi kawsak runakuna atipananchipa kishpishka kanata.

¹²Yaya Dioska chasna ñukanchikunata yuyashpanmi yachachin, payta mana

kasushpa, ñukanchi kikin mana ali munashkanchikunata rurashpa kawsash-kanchita ña sakishpanchi yuyawana, alillata rurashpa, payta kasushpa kawsananchipa kay allpapi. ¹³Chasna kawsananchi tiyan atun yachayyu Yayanchi Dios ñukanchita Kishpichik Jesukristu suma yachayninwa chuyahlla rikurishpa kutikashka shamunanta chapahushkanchirayku. Chasna paypa shamunanmanta yachashpanchimi alita kushikushpa payta chapashpa kawsahunchi. ¹⁴Jesukristuka kruspi wañurka ñukanchikunata mana alita rurakkuna kashkanchimanta kishpichi-narpa. Payka ñukanchita uchanchikuna-manta llakichishpan shunkunchita pichashka paypa runankuna kananchipa, tukuy munaywa alikuna-tana ruranayakkuna.

¹⁵Wawkini, kay rimashkaynita tukuy kirikkunata yachachinayki tiyan. Kirikkunata sinchikuchiy mana ali ruranakunata mana ruranankunapa. Rurashkankuna mana ali kashpanka Yaya Dios kushkan yachaywa paykunata alita kunashpa yanapay alitana rurak kanankunapa. Chasna alita kunashpa yachachinki nima pi rimanankunapa mana munanichu kasunata paytaka nishpa.

Jesukristuta kirikkuna alita rurashpa kawsanankuna tiyan

3 ¹Chay wawkikunata panikunatapas yuyachiy, tukuy llaktakunapi kamachik apukunata alita kasushpa kawsanankunapa. Yachachiy apunkuna shuk ali imapi tarawachishpankuna ali munaywa ruranankunapa. ²Chasnallata paykunata yuyachiy, mana shukkunamanta millaypata rimanankunapa, nima piwa piñanakushpa kawsanankunapa. Ashwan tukuy runakunawa llakichinakushpa kawsanahuchun, mana

yuyarishpa paykunamanta pasa
kanankunata.

³Nawpaka ñukanchikunapas chay runa masinchikunashina Yaya Diosta mana kasuk, mana yuyarinayu, mana alita rurak karkanchi. Mana ali munashkanchikunata musyashkanchikunata kasushpa, ñukanchi kikinllata kushichinata munashpa kawsapayarkanchi. Millaypata rurashpa, piñarishpa, maykanpa ima tiyashkanta munarishpa, shukkunawa parihuyanayashpa kawsapayarkanchi. Chasnallatata chikniy tukushpa, chikninakushpa kawsapayarkanchi.

⁴Ashwan Jesukristu shamushpan ñukanchita Kishpichik Yaya Dios ali shunku kananta, ñukanchi runakunata yapa yuyahushkanta paywa rikuchirka. ⁵Ñukanchita llakichishkanraykumi mana alita rurak kashkanchimanta kishpichishka. Manami kishpichishka-chu alikunata rurashkanchirayku. Ñukanchita kishpichishpan yakuwa mayllashkashina uchanchikunamanta pichay tukushkanchi mushumanta wawayarishkashina kananchipa. Yaya Diospa Espíritu ñukanchita mushuachishpanmi kunanka alitana rurashpa kawsahunchi. ⁶Ñukanchita Kishpichik Jesukristu wañushkanrayku Yaya Dioska Espiritunta mana mitsashpachu ñukanchima kachamushka. ⁷Chay Espiritunta ñukanchita kushka, ñukanchita llakichishpan paypa rikushkanpi ucha illa kananchipa, chaymantapas atipananchipa paywa wiñaypa kawsak rinata, maykantami chapashpa kahunchi. ⁸Tukuy kay yachachishkaynika shutipami.

Chayrayku munani kay yachachishkaynita yachachishpalla katinaykipa, Yaya Diosta kirik masinchikuna alita yachakushpankuna alita rurashpa kawsanankunapa. Chasna kawsanami

ali kan ñukanchi runakunaryaku.

⁹Chaymanta ama yanka rimanakushpa kawsaychu. Chay pikunamantami ñawpamanta pacha mirashkakuna nishpa killkarishkakunamanta rimanakunankunapi ama satiriychu, nima piñanakunapi, nima chikninakushpa kawsanapi. Chasnallatata Moisespa killkashkan kamachishkamanta yanka rimanakunapi ama satiriychu. Chasna rimanakunaka yanka nishpami kan, nima imapi yanapanchu.

¹⁰Shuk runakuna chay ali yachachishkanchimanta chikanta yachachishpa shukkunata pantachichishpankuna kirikkuna manana shuk yuyayllawa kawsanankunapa, paykunata sinchita kunay mana chasna katinankunapa. Chasna kunashpayki mana kasushpankunaka kuti kunay. Chaypipas mana kasunayashpankunaka tantarinaykichimanta wichuy. ¹¹Mana kasunayashpankunaka ña yachanki mana alita yuyarishpa, mana alita rurashpa kawsahushkankunata. Mana alita rurahushkankunata yachashpankunata chasnalla katishpankuna paykuna kikin kastigay tukunankunata maskanhun.

Titopa rurananmanta riman

¹²Wawkini, kay Nikópolis llaktapimi kahuni. Kaymantami wawki Artemasta kanma kachasha. Pay mana atipashpanka rinata, wawki Tikikotami kachasha. Chay wawki paktashpan utkalla shamusy rikuwanaykipa. Kaypimi munani tamya punchakunata pasanata. ¹³Chay ishkay alita yachachik wawzikuna chay *abogado Senas shutiyuta, chaymanta wawki Apolostapas shuk llaktakunama rihuashpankuna tukuy ima munashkankunata kuy nima ima paykunata pishinanpa. ¹⁴Chaymanta tukuy kirik masinchikunata yachachiy ali munaywa alikunata rurashpa

kawsanankunapa. Nima imayukunata yanapanahuchun. Chasna rurashpanku-nami Jesusta kirishkunkunaka mana yankachu kanka.

Pablo saludan kirikkunata

¹⁵Tukuy ñukawa kahuk kirik masinchikuna kanrayku saluduta kachanahun. Chasnallatata kanpas ñukanchita yuyak

Jesukristuta kirik masinchikunata saludapay.
Yaya Dios kankunata llakichishpan yanapachun.

Chayllata killkashkani.

Wawkiki
Pablo

PABLOPA KILLKASHKAN KILLKA FILEMONRAYKU

**Pablo Timoteowa Filemonta
saludanahun**

¹Munashkanchi wawkinchi Filemón, ñuka Pablo wawki Timoteowa pakta kay kartata kanrayku killkahunchi. Ñuka Pablo Jesukristupa shiminta yachachik kashpaynimi kay karselpi churawashkakuna. Kan yuyashkanchi wawkinchi ñukanchishina Jesukristupa shiminta yachachikrayku kay kartata killkahunchi. ²Chaymanta paninchi Apiarayku, ñukanchishina sinchita parisishpa yachachik wawkinchi Arkiporaykupas, tukuy wasikipi tantarik wawkikuna panikunaraykupas kay kartata killkahunchi. ³Yayanchi Dios, Amunchi Jesukristupas kankunata llakichishpan yanapachun kushilla kawsanaykicipa.

**Pablo riman Filemonmanta
kushikushkanta**

⁴⁻⁵Wawkini, ñuka Pablo yachashkani Amunchi Jesusta kirishpa, tukuy kirik masinchikunatapas alita yuyashpa kawsahushkaykita. Chayta yachashpaynimi tukuy uras mañahushpayni Yaya Diosta agradesini kanrayku. ⁶Kan Jesusta kirihushkaykita shukkunata rimashpa kawsahunki. Chayraykumi Yaya Diosta mañani kanta yanapananpa ashwan alita ashwanta ashwanta asirtanaykipa pay ñukanchipi yapa alita

rurashkanta *Kristuta kushichishpa kawsananchipa. ⁷Yapa kushilla kahuni, chaymantapas alita sinchikushkani kirikkunata yuyashpa kawsahushkaykita yachashpayni. Wawkini, paykunata alita sinchikuchishkaykirayku kushikushkani.

**Pablo Filemonta tapun Onesimota
llakichinanpa**

⁸Alita rurak kashpayki shuk imata ruranaykipa tapunayani. *Kristupa kamachishkan kashpayni atipaynima kanta kamachinata. ⁹⁻¹⁰Chasna kamachinata atipashpaynipas mana kamachishkaykichu, yuyanaku hushkan-chiraykumi kanta tapuni kasuwanaykipa. Ña ruku kashpayni chaymanta Kristu Jesuspa shiminta yachachishkay-nirayku kay karselpi kahushpayni kanta tapuni Onesimorayku. Payka kay karselpi Jesukristumanta yachachishkaynita kirishkanraykumi kikin waway-nishina tukushka.

¹¹Kay rantishkayki runa Onesimoka ñawpa kanrayku mana alitachu kasushpa tarawak karka. Kunanka mana chasnachu. Ñukata alitami yanapawahan, kanma kutishpan kantapas alitanami kasushpa yanapanka.

¹²Kay wawkinita kunan kanma kachahuni. Yapa yuyashkayni wawkini kashpan ñukatashina alita yaykuchi.

¹³Jesukristu runakunata kishpichinan-

manta yachachihushkaynirayku kay karselpi kahushpayni munaynima karka kay wawkini Onésimo ñukawa kiparishpan kanranti yanapawanapanpa.¹⁴ Chasna munashpaynipas kan manara ari nishpaykika manami atipanichu payta kiparichinata. Manami munanichu kan mana munakta paywa yanapawanaykita. Ashwan ali kama, kan kikin munashpayki paywa yanapawanaykipa.

¹⁵Onesimoka shuk punchakunatachari kanmanta anchuchirishka kashka, chaymanta wiñayparayku kanwa kawsananpana.¹⁶ Mananami rantishkayki runashinallachu kanwa kawsanka, ashwan kunanka kamachinaykimanta ashwan tukurka. Yuyashka wawkinchimi tukushkana. Ñukaka payta yapami yuyani. Kanka ñukamanta ashwan pasata yuyanayki tiyan, kanta yanapak runayki kashkanrayku chaymantapas Jesukristuta kasuk masiki tukushkanrayku.

¹⁷Imashnami ñukata kikin wawkitashina yuyawanki, chasnallatata paytapas yuyashpayki wasikipi yaykuchi. ¹⁸Wawki Onésimo shuwashpa mitikushka kashpanka chasnallatata shuk imamanta kanta liwiushpanka ñukami pagashkayki. ¹⁹Ñuka kayta kikin makiniwa killkahuni pagashkaykimi nishpa. Chasna rimashpaynipas ama kunkaychu kanta yachachishkaynirayku Jesukristuta katik tukushkaykita. Chasna kashpanmi kanka achkata

liwiwahuksina kahunki.²⁰ Chay-rayku wawkini, parihu Jesukristuta kirikkuna kashpanchi kay wawkinchita alita wasikipi yaykuchi. Chasnashpayki shunkuynita kushichi-pay, imashnami ali kan rurananchipa Kristuwa shukllashina tukushkanchirayku.

²¹Chasna killkani yachashpayni kasuwanaykita. Yachanimi tukuy munashkaynimanta pasata ruranaykitas.

²²Chaymantapas shuk kwartuykita alichapay wasikipi paktanaynipa. Kirini Yaya Diosta mañahushkaykichirayku pay ñukata kuti kankunama paktachinanta.

Wawkikuna saluduta kachanahun Filemonrayku

²³Wawkinchi Epafraspas *Kristu Jesuspa shiminta yachachishkanrayku karselpi churay tukushka masini kanrayku saluduta kachahun. ²⁴Chaymanta Yaya Diospa shiminta yachachik masinikuna Markus, Aristarko, Demas, Lukaspas kanraykumi saluduta kachahunkuna.

²⁵Amunchi Jesukristu kankunata llakichishpan munashkanta karan shuk kankunapi paktachichun.

Chayllata killkashkanchi.

Wawkikichi
Pablo, Timoteo

JESUKRISTUTA KIRIK HEBREO RUNAKUNARAYKU KILLKA

Jesukristuka ñukanchima
shamurka Yayan Diosta
riksichinanpa

Yaya Diospa Wawanka
angelkunamanta pasa
yachayyumi kan

1 ¹Ñawpa Yaya Dioska kacharka paypa yachaynina yachachikkunata, yaya rukunchi wañukunata achka kuti yachachinankunapa chikan chikan yachachinakunawa. ²Ashwan kunan kay allpa tukurihushkan punchakunapi Wawan Jesukristutami kacharka yuyarishkanta ñukanchita riksichinanpa. Manara nima ima tiyahushpanrami Yaya Dioska Wawanwa pakta tukuy tiyashkata rurarka. Chaymanta payta churarka tukuya kamachik kananpa. ³Jesukristumi ñukanchita riksichin Yayan Dios chuyahlla punchashina yapa ali, chaymantapas atun yachayyu kananta. Pay tukuy kananwa rikuchishkanwa riksichin imashnami Yaya Dioska. Payka yapa yachayyu rimashkanllawa tukuy ima tiyakkunata kuyran. Paymi kay allpama shamushpan ñukanchiranti wañushpan uchanchikunamanta picharka. Chaywashami siluma rishpan tukuy manta pasa atun yachayyu Yayan Diospa kuskan partima tiyarirka paywa pakta tukuya kamachinanpa.

⁴Yaya Dios Jesukristuta churarka tukuy *angelkunamanta ashwan yachayyu kananpa. Payta Wawayni nishpan tukuy angelkunamanta pasa kananta rikuchirka. ⁵Nima shuk angelta rimarkachu:

Kanka kikin wawaynimi kanki, kunan kanta wawata rurash-kaynirayku nishpa.^a

Chaymantapas nima shuk angelta rimarkachu:

Ñukaka yayakimi kani, kanka kikin wawaynimi kanki nishpa. Ashwan *Kristullatami chasna rimarka.

⁶Chaymanta Yaya Dioska shuklla Wawanta kay allpama kachahushpan tukuy paypa angelkunata rimarka:

Chay wawaynita kushichiyichi nishpa.

⁷Chay angelkunamantaka kasna rimarka:

Paykunataka wayratashinami, nina sintihuktashinami kachani munashkaynita ruranankunapa nishpa.

^a Rikuy Jesukristuta Katikkunamanta Kwintak Killkapi 13.33, Hebreo Runakunaryku Killkapi 5.5, Biblia kastellanopi Salmos 2.7

- ⁸Wawantakaranti kasnami rimarka:
Kanka Dios kashpaykimi
kamachinki wiñayparayku.
Kuska alillatami kamachinki.
- ⁹ Kanka alillata munakmi kanki,
chikninkimi millaypa ruranakuna-
nata. Chayraykumi ñuka
Yayayki Dioska kanta akllash-
kani kamachinaykipa. Tukuy
runa masikunamanta kantaka
ashwantami kushillaryachisha
nishpa.
- ¹⁰Chaymantapas Wawanta rimarka:
Kan Dios kashpaykimi nima ima
tiyashpanra allpata silutapas
rurashkanki.
- ¹¹ Tukuy chaykunaka chinkarinkaku-
nami, ashwan kanka chasnalla
wiñaypa kawsanki.
Tukuy chaykunaka churarinashi-
nami mawkayashpan liki liki
tukunkakuna.
- ¹² Chasna tukushpankuna shuk mawka
churarinatashinami wichunki.
Shuk mawka churarinata mushuwa
kampyahukshina chay mawka
allpata, mawka siluta
wichushpa mushutana ruranki.
Tukuy allpa silu tukurishpankuna-
pas kanka tukuy uras chasnala-
maki kanki, wiñaypata
kawsanki nishpa.
- ¹³Yaya Dioska Wawan Jesukristullatami
rimarka:
Kuskayni parti tiyariy kamachinaykipa
ñukawa pakta, kanta chikniki
runakunata winsinaynikama
kanta kasunankunapano nishpa.
Manami nima shuk paypa angelkunata
chasna rimarkachu. ¹⁴Angelkunaka
Yaya Diostami alita kasuk kanahun.
Chasna kasuk kashpankunami Yaya
Dioska paykunataka kachan, tukuy
maykunamami kishpina kankakuna,
chaykunata yanapanankunapa.

**Kishpichirishka kashpanchi mana
kunkaylla kawsashunchichu**

2 ¹Jesukristu tukuya kamachinan
kashpan akuychi chay uyahushkan-
chi shimita ashwan alita asirtashpa
kasushpa kawsashunchi. Pakta ali
ñampita rihushkanchita pantachishpa
chinkarinchima. ²Ñawpa Yaya Dioska
paypa *angelkunatami kachashpa
kamachishkankunata Moisés wañuta
riksichirka yaya rukunchi wañukunata
yachachinarpa. Chay angelkunalla
rimashkan kamachishkakunaka alita
kasunankunapami karka. Tukuy
chaykunata mana kasukkunataka Yaya
Dioska rurashkankunashina kuskanpi
kastiganan karka. ³Imashnashi Yaya
Diospa kastigananmanta kishpinchima,
ñukanchita kishpichinanpa yapa ali
atun yachaywa rurashkanta mana
munashpanchika. Chasna ñukanchita
kishpichinanmanta Jesukristu kikinmi
puntiru yachachirka. Chaymanta
maykunamami paypa rimashkanta
yachakurkakuna, chaykunapas
ñukanchita rimarkakuna shutipa
kananta. ⁴Chaymantapas Yaya Diosmi
paypa yachayninha nima ima uras
rikushkanchikunata, suma mana
atipaypakanata, atun yachaywa
ruranakunata ñukanchita riksichishka
yachananchipa shutipa pay ñukanchita
kishpichinanta. Chasnallatatami
Espíritunta ñukanchita kushka chay
Espíritun karan shukta atipachinarpa
pay munashkanshina.

**Jesukristuka shamurka runa
tukushpan runa masinkunata
yanapananpa**

⁵Yaya Dioska manami *angelkunataka
rimarkachu chay rimahushkanchi
shamuhuk mushu munduta kamachi-
nankunapa. ⁶Ashwan Jesukristutami

runa tukushpan rimarka chay mushu munduta kamachinanpa. Chasna kashpanmi Yaya Diospa killkachishkanpi shuk runa kasna riman:

Yaya Dios, ñukanchi runa kashpanchi manami nima imachu kanchi. ¿Imaraykuta ñukanchita yapa yuyanki?

⁷ Kay allpapi kawsahushpanchirami kanpa angelkunata rimashkanki ñukanchimanta ashwan atipak kanankunapa. Chaymanta silipi paktashpanchimi ñukanchitaka ruranki kanshina suma atun yachayyuta, tukuy paykuna ñukanchita kushichinankunapa.

⁸ Ñukanchita kushkanki yachaykita tukuy silipi kay allpapi tiyakkunata kamachinanchipa nishpa.

Chasna kashpanmi yachanchi Yaya Dios ñukanchita kushkanta tukuy silipi allpapi tiyakkunata llamputa kamachinanchipa. Chasna rimashpanpas tukuyta kamachinanchitaka manarami rikuhun-chirachu. ⁹ Chasna kashpanpas yachanchi Yaya Dios Jesukristuta ña atun aputa rurashkanta yachayninha kamachinanpana tukuyta. Kay allpama kachashpan runa tukushpan shuk ratulla angelkuna ashwan yachayyu karkakuna. Ñukanchita yapa llakichishpan Yaya Dios munarka Wawan Jesukristu ñukanchirayku wañunanpa. Chasna wañushpanra Yaya Dioska paytaka suma atun yachayninta kurka tukuy payta kushichinankunapa.

¹⁰ Yaya Dioska tukuytami rurarka payraykulla kanankunapa payta kushichinankunapa. Chasna kashpan payka munan tukuy wawankuna paywa pakta suma chuyahllapi kawsanankunapa. Chayraykumi paykunaryku Kishpichik Jesukristuta kay allpama

kacharka achkata parisinanpa. Chasna parisishpa wañushpanrami atiparka runakunata kishpichinata paywa wiñaypa kawsanankunapa. ¹¹ Kunan tukuy Yaya Diospa wawankuna kanchi, ñukanchi maykankunami uchanchikunamanta picarishka kanchi, chaymanta Jesukristupas, maykanmi uchanchikunamanta pichashpa aliyachishka. Chayraykumi payka mana pinkanchu, ñukanchikunata wawkinikuna paninikuna nishpa rimanata. ¹² Kasnami payka nin:

Yayayni Dios, yapa alimi kanki nishpa rimasha wawkinikunata paninikunata. Paykunawa tantarishpayni takinakunata takisha kanta kushichishpa nishpa.

¹³ Chaymanta nin:

Ñukaka Yaya Diospimi sinchikuni nishpa.

Chasnallatatumi riman:

Kaypimi kahuni, tukuy Yaya Diospa kuwashkan runakunawa pakta. Paykuna kanahun kikin waway-nikunashina nishpa.

¹⁴ Imashnami ñukanchi runakuna nanayta unkuya wañuya parisinchí, yawaryu aychayu kashkanchirayku, chasnallatatumi Jesukristupas wawayarirka ñukanchishina runa kananpa. Chasna runa tukurka wañushkanwa ñukanchita wañuchik supayta winsinanpa, manana atipananpa wañuywa manchachishpa ñukanchita kamachinata. ¹⁵ Chayta rurarka ñukanchi runakuna wañuya manchashkanchirayku tukuy uras kamachirishkashina kawsahushkanchimanta kishpichinanpa, manana wañuya manchak, wañuywa manchachishpa kasuchik supayta kasukkuna kananchipa.

¹⁶ Jesukristuka manami shamurkachu kay allpama angelkunata yanapananpa, ashwan payka shamurkami ñukanchi

Abrahamshina payta kirik runakunata yanapananpa.¹⁷ Chayraykumi payka ñukanchishina runa tukunan karka. Chasnara atiparka ñukanchita llakichik, Yaya Diosta alita kasuk shuklla atun yachayyu *saserdotenchi tukunata, Yaya Diospa puntanpi uchanchikunamanta paywa alichananpa.¹⁸ Pay kikin parisishkanrayku, chaymanta supay llullachinayashpa kamahushkanpi winsishkanrayku kunanka atipan ñukanchita yanapanata supay llullachinayashpa kamay tukuhushkanchipi.

Jesuska Moisesmanta pasami kan

3 ¹Wawkikuna panikuna, Yaya Dioska kankunata akllashka payraykulla kanaykichipa. Chayrayku tukuy shunkuykichimanta pacha Jesusta yuyariyichi, maykanmi Yaya Diospa Kachashkan kashka paypa shiminta yachachinampa, chaymantapas maykanmi shuklla atun yachayyu *saserdote kan. Pay chasna kananta kiriushkanchita runakunata rimashpa kanchi. ²Chay Jesuska Yaya Diospa munashkanta alita paktachik kashka, imashnami ñawpa Moisés wañuka Yaya Diosta kasuk kashpan yaya rukunchi wañukunata alita yanaparka. ³Yuyariyichi shuk wasita rurak amuta ashwanta valichinchi chay rurashkan wasimanta. Chasnashinami Jesuska Moisesmanta ashwanta kushichiy tukunan tiyan.

⁴Wasikunataka runakunami ruranahun, ashwan Yaya Dioska tukuy ima tiyakkunata ñukanchikunatas rurashkami.

⁵Moiseska alita paktachik Yaya Diospa kamachinan runa karka Yaya Diospa akllashkan runankunata kamachinanpa. Yaya Diospa munashkanta rurashkanwa rikuchirka maykantami Yaya Dios achka watawashara rimashpa asirtachinan karka. ⁶Ashwan *Kristuka Yaya Diospa shuklla

Wawanmi. Yayan Diosta alita kasushpan ñukanchi paypa akllashkan runankunata ashwan alita kamachin. Kushilla mana sampayashpa shamunanta chapashpa kawsashpanchika chay paypa akllashkan runankunamichi kanchi.

Yaya Diosta mana sakinamanta yachachin

⁷⁻⁸Yaya Diospa runankuna kashpanchi akuychi uyashunchi Yaya Diospa Espíritu ñukanchita rimahushkanta Yaya Dios killkachishkanpi rimashkata:

Kunan rimahushkaynita uyahushpaykichika alita kasuychi. Ama chay mana kasunayak yaya rukuykichi wañukunashina tukuychichu. Paykunaka chay chunlla chakishka allpapi purihushpankuna mana alitachu kasuwarkakuna. Ñukata kamawarkakuna alitachu manachu paykunata yanapani nishpa.

⁹Ñuka paykunata chusku chunkawatata yanapashkaynita rikushpankunapas paykunaka ñukata kamawarkakuna alitachu manachu paykunata yanapani nishpa.

¹⁰Chayraykumi piñarishpayni kasna rimarkani:

Paykunaka tukuy urasmi shunkunkunapi mana yuyariwashpankuna ñukamanta anchurishka purinahun, mana kasunayawashpankuna nishpa.

¹¹Chasna kashpanmi piñarihushkaynipi rimarkani:

Shutipami kay rimashkaynitaka paktachisha. Manami nima ima uras yaykunkakunachu chay kushikuna llaktaynipi samanan-kunapa nishpa.

¹²Wawkikuna panikuna, kuyrariyichi shunkuykichipi mana millaypa yuyaywa kanaykichipa, kawsa Yaya Diosta kiriushkaykichimanta mana anchurinaykichipa. ¹³Ashwan kawsahushpaykichira karan puncha kankunapura sinchikuchinakuychi Yaya Diospa shiminwa. Chasna sinchikuchinakushpa kawsashpaykichimi supayka manami atipankachu kankunata llullachinata uchata rurashpaykichi manana Yaya Diosta kasunayakkuna kanaykichipa. ^{14*}Kristuwa pakta kawsananchipaka puntiru payta kirishkanchishinalla mana sakishpa payllapi sinchikushpa kawsananchi tiyan. Chasna kawsashpanchirami paywa pakta kushikushpa kawsashunchi.

¹⁵Kasnami killkarishkapi riman: Kunan Yaya Diospa rimahushkanta uyahushpaykichika alita kasuychi. Ama chay ñawpa mana kasunayak runakunashina tukuychichu nishpa.

¹⁶¿Maykankunata Yaya Diospa rimashkanta uyahshpanapas mana kasunayarkakunachu? Tukuy Egipto allpamanta Moiseswa pakta llukshishka runakunami mana Yaya Diospa rimashkanta kasunayarkakunachu. ¹⁷Chaymanta ¿maykankunatata Yaya Dioska chusku chunka watata piñarishka karka? Chay mana payta kasunayak runakunatami piñarishka karka. Chasna mana kasunayashkankunarykumi Yaya Dioska kastigashpan chay chunlla chakishka allpapi wañurakuna.

¹⁸Chaymanta ¿maykankunatata Yaya Dioska rimarka: Shutipami kay rimashkaynita paktachisha. Manami nima ima uras yaykunkakunachu chay kushikuna llaktaynipi samanankunapa nishpa? Chay payta mana kasunayakkunatami chasna rimarka. ¹⁹Chasna kashpanmi yachanchi chay runakuna Yaya Dios

paykunata kunayashkan allpapi mana yaykunata atipashkankunata, payta mana kasunayashkankunaryku.

Yaya Dioswa kushikuna llaktanpi samananchimanta riman

4 ¹Chayrayku Yaya Dios manara paktachishpanra paywa pakta kushikuna llaktanpi samananchita rimashkanta, kuyrarinanchi tiyan, pakta kankunamanta shukkuna Yaya Diosmanta anchurishpaykichi manana yaykunkichimachu. ²Yaya rukunchi wañukunatashina Yaya Dioska ñukanchitapas suma ali shimita ñukanchita kishpichinanmanta rimashka. Paykuna Yaya Diospa suma ali shimita uyashpankunapas nima imapi paykunata yanaparkachu, chay shimita kirikkunawa pakta kirishpa mana kasunayashkankunaryku. ³Ñukanchi Jesusta kirikkunaka yaykushunchimi Yaya Diospa kushikuna llaktanpi samananchipa. Chay payta mana kasuk runakunamantaka piñarish-pami Yaya Dioska rimarka:

Shutipami kay rimashkaynitaka paktachisha.

Manami nima ima uras yaykunkakunachu chay kushikuna llaktaynipi samanankunapa nishpa.

Yaya Dioska chayta rimarka, tukuy rurashkankuna, chay kushikuna llaktaynipi paywa pakta samananchipa, kay munduta rurashkanmanta pacha ña rurashka kashpanpas.

⁴Kasnami Yaya Diospa killkachishkanpi kanchisnin punchamanta riman:

Yaya Dioska tukuy rurashkanta tukuchishpan kanchisnin puncha samarkana nishpa.

⁵Chay samana llaktata yuyachishpa Yaya Diospa killkachishkanpi kuti riman mana payta kasuk runakunamanta kasna:

Paykunaka manami nima ima uras
yaykunkakunachu chay kushi-
kuna llaktaynipi samananku-
napa nishpa.

⁶Chasna rimashpan yachanchi shukkuna
tiyanan tiyan chaypi yaykunankunapa.
Chay ñawpa kawsak runakuna mana
atiparkakunachu yaykunata Yaya
Diospa suma ali shiminta runakunata
kishpichinanmanta mana kasushkanku-
narayku. ⁷Chayrayku Yaya Dioska shuk
punchata churashka chaypi yaykunanchipa.
Kunan puncha nishpa rimash-
kanwa riksichirka kunan kananta.
Achka wata yaya rukunchi wañukunata
rimashkanwasha chay ali allpapi
yaykunankunata Yaya Dioska yaya
rukunchi David wañutaka killkachirka
ña rimashkaynishina:

Kunan Yaya Diospa rimahushkanta
uyahushppaykichika alita kasuy-
chi. Ama tukuychichu mana
kasunayak runakunashina
nishpa.

⁸Chay ali kamachik Josueka yaya
rukunchi wañukunata chay Yaya Diospa
rimashkan ali allpapi yaykuchishpan
paykunaka Yaya Dios kunayashkan
samanata mana riksirkakunarachu.
Chay samanapi paktanahuma karka,
Yaya Dioska achka watawasha mana
kutikashka shuk puncha tiyananmanta
rimamachu karka chay samanapi
paktananchipa.

⁹Chayrayku tiyanra tukuy Yaya Diosta
kasuk runakunarayku kushikushpa
paywa samanankuna. ¹⁰Imashnami
Yaya Dioska tukuy imata rurashkanwa-
sha kushilla samarka, chasnallatatami
ñukanchikunapas Yaya Diospa
kushikuna llaktanpi yaykushpanchika
tukuy rurashkanchikunamanta kushilla
samashunchi. ¹¹Yaya Dioswa kushilla
samananchipaka akuychi sinchikushpa
paypa shiminta alita kasushunchi.

Chasna sinchikushpa katihushpanchimi
nima maykan chay ñawpa mana kasuk
runakunashina kawsanan tiyanchu.

¹²Yaya Diospa shiminka kawsa yachayyu
kashpan ishkanti parti wiluyu sablimanta
ashwan pasa wiluyu pitihuksina pitishpan
tukuy ukupi kashkata riksichin. Yaya
Diosmanta kashkata, ñukanchi kikinmanta
kashkata, tukuy yuyayninchikunapi
shunkunchikunapi kashkata ñukanchita
ricksichin, chaymantapas yuyarinanchiku-
naka alichu manachu, ali yuyaywachu
rurananchikunata ruranchi manachu
nishpa. ¹³Yaya Dioska tukuy yuyayninchikunata
alita riksin. Paymanta nima shuk
rurashkan runa atipanchu pakanata.
Tapunan puncha paktarishpan tukuy
rurashkanchikunamanta payta rimananchi
tiyan.

**Jesukristuka parisishkanraykumi
shuklla atun yachayyu
saserdotenchi kan**

¹⁴Ñukanchipa tiyan shuklla atun
yachayyu *saserdotenchi. Payka Jesúz,
Yaya Diospa Wawanmi. Kawsarimush-
kanwashami Yaya Diospa kawsanan
silipi yaykushpan paypa kuchunpi
paktarka. Chayrayku akuychi payllapi
sinchikushpalla payta kirihushkanchita
rimashpa kawsashunchi. ¹⁵Kay shuklla
atun yachayyu saserdotenchi manami
kanchu sampayanata parisinata mana
riksik. Ashwan ñukanchitashina
supayka paytapas achka kuti uchata
rurachinayarka. Ñukanchishina tukuypi
kamay tukushka karka, uchata shuti
mana rurarkachu. ¹⁶Chayrayku akuychi
kushikushpa, tukuy shunkunchimanta
pacha paypi sinchikushpa, Yaya Dios
llakichishpa tukuyta kamachikta
kayllayashunchi. Chasna kayllayashpan-
chimi yanapay tukunata munahushkan-
chipi payka ali shunku kashpan
ñukanchita llakichishpan yanapan.

5 ¹Karan saserdote kunapa atun apuka runapura mantallami akllarishka kan runa masinkunaryaku uchankunamanta Yaya Dioswa alichanarpa. Payka churay tukushka kan tarpu kunapa puntiru muyunkunata wiwakunatapas Yaya Diosta rikuchishpa rupachinarpa, Yaya Dios runakunata uchankunamanta pichanarpa. ²Karan saserdote kunapa atun apu runa masinkunashina pantachikllatata kashpan mana yachakkunata mana alita rurashpa kawsakkunatapas llakichinata yachak kan. ³Paypas pantachik kashpanmi pay kikinraykupas wiwakunata rupachishpan mañanan karka Yaya Dios uchanmanta pichanarpa, imashnami tukuy runakunaryku rurapayan uchata rurashkankunaryku.

⁴Yaya Dioska ñawpa Aronta akllarka runakunaryku saserdote kananpa. Chaymanta chay Arontashina Yaya Dios tukuy saserdote kunata akllarka wiwakunata rupachishpa payta mañanankunapa. Nima shuk runa pay kikin munashpan atipanchu saserdote kanata, mana Yaya Dios kikin akllashpanka.

⁵Chasnallatata *Kristupas mana pay kikinlla munashpachu yaykurka shuklla atun yachayyu saserdote kananpa. Ashwan Yaya Diosmi payta churarka shuklla atun yachayyu saserdote kananpa. Kasnami Yaya Dioska payta rimarka:

Kanka kikin wawaynimi kanki,
kunan kanta wawata rurash-
kaynirayku nishpa.^b

⁶Chaymantapas Yaya Dioska killkachishkanpi shukta riman:
Ñuka kantaka akllashkanimi,
wiñayparayku chay ñawpa

Melkisedekshina saserdote
kanaykipa nishpa.^c

⁷Jesukristu kay allpapi kawsahush-panra sinchita wakashpa, sinchita kaparishpa mañarka Yayan Diosta, maykanmi yachayninwa wañunan kashkanmanta atipama karka payta kishpichinata.^d Chasna mañashpanpas yapa munarka Yayan Diosllpa munananta ruranata. Chayraykumi Yaya Dioska paypa mañashkanta uyashpan sinchikuchirka mana wañuyta manchanarpa. ⁸Jesukristu Yaya Diospa shuklla Wawan kashpanpas parisihush-panrami yachakushka imashna rurashpami tukuy uras Yayanta kasunka. ⁹Parisishpa wañushpanmi tukuyi Yayan Diosta kasuk kananta rikuchirka. Chasna alita kasushkanraykumi tukuy payta kasuk runakunata uchankunamanta kishpichik tukushka wiñaypa paywa pakta kawsanankunapan. ¹⁰Chasna Jesukristu Yaya Diospa munashkanta paktachishkanraykumi Yaya Dioska payta churarka chay ñawpa Melkisedekshina shuklla atun yachayyu saserdote kananpa.

**Jesukristuta kirishpa katiychi
ashwanta ashwanta
yachakunaykichipa**

¹¹Wawkikuna panikuna, ashwan achkata munani kankunata yachachinata. Chasna munashpaynipas mana atipaypachu kan ashwanta asirtachik shimikunata tarinaynipa, mana utkalla asirtak kashkaykichirayku. ¹²Achka kuti Yaya Diospa shiminta kankunata yachachishkani. Kunanka kankunapas ña yachachikkuna kankichima karka. Chasna kashpanpas kunankamami

b Rikuy Jesukristuta Katikkunamanta Kwintak Killkapi 13.33, Hebreo Runakunaryku Killkapi 1.5, Biblia kastellanopi Salmos 2.7

c Rikuy Biblia kastellanopi Salmos 110.4
d Rikuy Mateopa Killkashkan Killkapi 26.36-46

manara atipankichirachu shukkunata yachachinata. Ashwan kutikashka munankichi yachachinaynipa chay puntiru asirtana kashkanchita Yaya Diospa rimashkanmanta. Kunkunaka ña aychata mikunata atipakkunashina kankichima karka. Ashwan chuchuk wawakunashinara kankichi manara mikunata atipakkuna.¹³ Chasna chuchuk wawakunashinara kashpayki-chi manara yachankichirachu maykanmi ali, maykanmi mana alichu kan nishpa.¹⁴ Imashnami rukukunalla aychata alita mikunata yachak kanahun, chasnashinami Yaya Diospa shiminta ña alita kasukkunalla atipanahun puntiru asirtana kashkanchimanta pasa yachachinakunata asirtanata. Paykuna alita yachanahun maykanmi ali, maykanmi mana alichu, tukuy uras ashwanta ashwanta yachakushpa riushkankunaryku.

**Yaya Diosta kirihushkanchita
sakinaka atun uchami**

6 ¹Wawkikuna panikuna, akuychi kawsashunchi ruku runakunashina, Jesukristupa yachachishkankunata ashwanta yuyarishpa yachakushpa. Manami tukuy uras chayllatata yachakushpa kawsashunchichu. Ñami yachakushkanchi mana alita rurashpa kawsananchitaka sakinanchi tiyan nishkata, chaymanta Yaya Diospi alita sinchikunanchimanta nishkatapas. ²Ñami yachakushkanchi bawtisarina-manta, Yaya Diosta kirik masinchipa umanpi makinchita churashpa payrayku Yaya Diosta mañananchimanta, wañushpanchi kutikashka kawsarinanchimanta, chaymantapas shuk puncha Yaya Dios tukuy runakunata mana alita rurashkankunamanta wiñayparayku kastigananmanta. ³Yaya Dios ñukanchita yanapashpan akuychi

ashwanta Jesukristupa ali yachachish-kanta yachakushunchi ruku runakuna-shina kananchipa.

⁴⁻⁶ Yuyarishunchi, maykankunaka Jesukristuta shuk kuti kirik tukushkakuna, chaymanta payta katihushkanku-namanta anchurishkakuna, mana atipankakunachu mushumanta kirik tukunata. Yaya Diospa shiminta kirishpa punchapina purihukshina kashkakuna. Imashnami mishki mikunata kamanchi, chasnashinami paykunaka Yaya Diospa llakichinanta musyashkakuna. Yaya Diospa Espíritu paykunata yanaparka Jesukristuta riksinankunapa. Shuk mishki mikunata kamakshina Yaya Diospa shiminta rikshishpankuna ali kananta yachashkakuna. Chaymanta rikshishkakuna Yaya Diospa atun yachayninta, maykanmi rikuchin kamachinan kallarishkanta. Tukuy chaykunata rikshishpankunapas Jesukristuta kirinankunata sakishpanku-naka manana atipankakunachu mushumanta uchankunamanta llakirishpa Jesukristuta katinata. Manana Jesukristuta kirinayashpanku-nami Yaya Diospa Wawanta kuti kruspi wañuchik runakunashina kanahun. Chasna kashpankunami paykunaranti runakunaka Jesukristumanta millaypata rimankakuna.

⁷ Maykankunaka Yaya Diosrayku shuk ali allpashina kanahun, paykunatami Yaya Dioska sumakta yanapanka. Chasna ali allpapika tamyashpan sumakta upyarin. Achka ali tarpuunkunata amunrayku wiñachin. ⁸ Maykankunaka kashayu kiwakunallata wiñachik allpashinami kanahun, nima imarayku valinahunchu. Imashnami pichak runakuna kashayu kiwakunata rupachi-nahun, chasnashinami Yaya Dios chay runakunata nina mana wañukpi kastiganka.

**Yaya Dioska rimashkanta
paktachinan kashpan payllapi
sinchikushunchi**

⁹Munashkanchi wawkinchikuna paninchikuna, chasna sinchi shimikunawa rimashpanchipas yachanchi kankuna Jesukristuta kirishpa kawsahushkaykichita. Chasna kawsahushpaykichi yachanchi kishkishka kanaykichita. ¹⁰Yaya Dios alillata rurak kashpan mana kunkanchu alita rurahushkaykichita. Payta yuyahushkaykichirayku alita rurashpa kawsashkankichi, tukuy Yaya Diosta kasuk masikichikunata yuyashpa yanapashpa kawsashkankichi. Kunankama chasnalla katihunkichi.

¹¹Yapa munanchi tukuy kankuna wañunaykichikama ali munaywa yanapanakushpa alita rurashpa kawsanaykichita. Chasna rurashpaykichi siluma rinaykichita chapashpa kahushkaykichishina chayma Yaya Dioswa kawsak rinkichimi. ¹²Ama kunkaylla kawsaychichu. Ashwan alita kirikkunapa kawsahushkankunamanta yachakushpa paykunashina kawsaychi. Paykuna alita Yaya Diospo sinchikushpa mana sampayashpa tukuy rimashkanta paktachinanta chapashpa kawsahushkankunaryku Yaya Dios kunata rimashkanta apinkakuna.

¹³Yaya Dios ñawpa yaya rukunchi Abraham wañuta shuk paktachinan shimita rimashpan shutipa paktachinanta riksichik shimikunawa rimarka. Nima maykan ashwan yachak paymanta tiyashpan chay yachakpa uyashkanpi chay paktachinan shimita rimananpa, pay sapallan rimarka manana nima pi ali kanaynita kirinahuchun kay rimahushkaynita mana paktachishpanika nishpa. ¹⁴Kasna rimarka: Shutipami kay rimashkaynita paktachi-

sha. Ari, kanta yuyashpaynimi yanapashkayki. Chaymantapas achka miraykikunatami kanta kusha nishpa.

¹⁵Chasna Yaya Dioska rimashpan Abrahamka mana sampayashpachu chaparka Yaya Dios rimashkanta paktachinanta. Chayraykumi Yaya Dios rimashkanshina yanapay tukurka.

¹⁶Shuk runaka runa masinta shuk imamanta rimashkanta kirichinayashpan paymanta pasa kahukpa shutinta kirichina rimanakunapi churashpa rimama. Chasna rimashpanrami chay runa masinka alita kirima. ¹⁷Chasnallatami Yaya Diospas paktachinan shimita kirichinayashpa shutipa paktachinanta riksichik shimikunawa rimarka. Chasna rurashpan munarka chay runakuna, maykunkunarykumi chay rimashkanka karka, alita yachanankunapa payka rimashkanta mana shukta shukta yuyarishpa paktachinanta. ¹⁸Chasna paktachina shimita rimashkanrayku, chaymantapas chay shimita shutipa paktachinanta riksichik shimikunawa sinchikushikanrayku kirihushkanchipi alita sinchikuchiy tukuhunchi. Alita yachanchi Yaya Dios mana shukta shukta yuyarinanta. Payka rimashkanpi manami atipanchu llullachinata. Chasna kashpan ñukanchi maykunkunami paypi sinchikuk tukushkanchi paypa rimashkanta paktachinanta chapashpalla kushikushpa katishunchi. ¹⁹Rikuychi, tukuy lanchakunapa tiyan shuk llasha fierromanta rurarishka yakupi kacharinnakunapa. Chayta yakupi kacharishpankunami chay lanchaka chawpi yakupipas mana atipanchu uraykunata. Ñukanchi Yaya Diospa rimashkanta paktachinanta tukuy shunkunchimanta pacha chapashpa kawsahushpanchi alita chayllapi shayachik llashata Yaya Diospo kacharishkanchishina kawsahun-

chi mana anchurishpa paymanta. Chay llasha kacharishkanchishinaka *Yaya Diospa wasinpi rakta llachapa washama Yaya Dioswa tinkunakuna kwartupi-shina silipi apirishka kahun. ²⁰Chay-mami Jesúś ūukanchimanta ñawpashka. Payka wiñayparayku Melkisedekshina shuklla atun yachayyu *saserdotenchi kananpa churay tukushpan ūukanchi-rayku Yaya Dioswa alichananpa chaypi yaykurka.

**Jesukristuka Melkisedekshina
shuklla atun yachayyu
saserdote kan**

7 ¹Chay ñawpa kawsak Melkise-dekka^e Salem llaktapa atun apumi karka. Chaymantapas payllatatami atun yachayyu Yaya Diospa *saserdote karka. Chay urasmi Abrahamka shuk atun apukunawa wañunakushpan paykunata winsishpa kallpachirka. Llaktanma kutishpanmi chay saserdote Melkisedekka llaktanmanta llukshishpan Abrahamta tinkuk rirka. Chasna tinkuk rishpanmi Abrahamta rimarka Yaya Dios payta ashwanta yanapashpa kushichinanta. ²Chasna Melkisedek payta rimashpan Abrahamka tukuy chay winsishkan apukunata kichushkan-manta karan pachakmanta chunkata chay saserdote Melkisedekta kurka. Chay Melkisedekpa shutinka ninayanmi alita kamachik apu. Payka Salempa apun karka. Chay Salem ninayan kushilla kawsana. Chayraykumi chay Salempa apun ninayan Kushilla Kawsanapa apun. ³Manami nima pi yachanchu Melkisedekpa yayanmanta mamanmantapas. Nima pi yachanchu paypa yaya rukunkuna wañukunaman-tapas. Nima pi yachanchu wawayarish-kanmanta wañushkanmantapas. Payka

Yaya Diospa Wawan Jesukristushina wiñayparayku saserdote kan.

⁴Wawkinikuna paninikuna, alita yuyariyichi. ūukanchi kikinpa yayanchi ruku Abraham wañuka chay apukunata kichushkanmanta karan pachakmanta chunkata Melkisedekta kurka. Chayrayku yachanchi Melkisedekka tukuymanta pasa kashkanta. ⁵Leví wañupa miraykunapas, maykankunami saserdote kuna kanahun Moisés wañupa killkashkan kamachishkashina shuk pachak tiyashkanmanta chunkata apinahun. Paykuna ūukanchi israel masinkunamanta apinahun mana ūukanchimanta pasa kashpankunapas. Chaymanta chayta apinahun Abraham-manta mirashka runakuna kashpankuna. Mana apinahunchu paymanta pasa kashkankunaryku. ⁶Ashwan chay Melkisedekka mana Levimanta miray kashpanpas payta yaya rukunchi Abrahamka shuk pachak tiyapushkan-manta chunkata kurka. Abrahammi karka maykantami Yaya Dioska ali paktachinan shimita rimarka. Chay Abrahamtami Melkisedekka rimarka Yaya Dios payta ashwanta yanapashpa kushichinanta.

⁷Alita yachanchi maykanmi shukta riman ashwanta yanapay tukunanta, payka chay yanapay tukuna kashka-manta ashwan yachayyu kananta.

⁸Chay Levimanta miray saserdote kuna, maykankunatami shuk pachakmanta chunkata kunchi, wañuk runakunallami kanahun. Ashwan chay Abrahammanta shuk pachakmanta chunkata apishka Melkisedekmanta Yaya Diospa killkachishkanpi riman kawsalla kahushkanta. ⁹Abraham Melkisedekta shuk pachakmanta chunkata kushpan Levimanta mirashka saserdote kunapas

chayta kushkakunashina karkakuna, paykuna shuk pachkmanta chunkata apikkuna kashpankunapas.¹⁰ Abraham chay saserdote Melkisedekwa tinkunkushkan uras manara Levika, nima paymanta mirashkakunapas tiyarkarachu. Chasna kashpanpas paymanta mirana kashpankuna Abraham kawsashkan uras paykunapas ña kawsashina karkakuna.

¹¹Chay Levimanta miraykuna saserdote tekuna churay tukushkankunaryku Yaya Dios ñukanchi israel runakunata kamachishkankunata kurka. Chasna saserdote tekuna kashpankunapas manami atiparkakunachu uchakunata pichanata. Chay Levimanta mirashka saserdote-kuna uchanchikunata pichanata atipanahuma karka, manami munanchimachu karka Yaya Dios shuk ashwan atipak saserdoteta churananpa Melkisedektashina. Ashwan Levipa miray Aronshina saserdote kunalla ali kanahuma karka.

¹²Yaya Dios Melkisedektashina mushu saserdotetana churashpan maykanmi mana Levimanta mirashka saserdote kuhnashinachu kan, chay Moisespa killkashkan kamachishkakunatapas mushuyachinan tiyan. ¹³Chay mushu saserdote maykanmantami nin Amunchi Jesukristu kashpan yachanchi mana Levipa miraymanta kananta, ashwan shukpa miraymantami kan. Chay miraykunamanta nima maykan saserdote karkachu. ¹⁴Tukuy alita yachanchi payka Judapa miraymanta kananta. Chay miraymanta Moiseska mana rimarkachu saserdote tekuna tiyananta.

¹⁵Chay churay tukushka mushu saserdote Melkisedekshina kashkan-rayku ashwan alita yachanchi Levipa miray saserdote kunamanta yapa chikan kananta. ¹⁶Payka manami saserdote

tukushkachu kamachirishka kashkata Levipa miraymanta saserdote tekuna kanan tiyan nishkata paktachishkan-rayku. Ashwan payka saserdote kan, wiñayparayku kawsak kashkanrayku. ¹⁷Kasna Yaya Dioska killkachishkanpi payta riman:

Ñukami kanta churashkani
wiñayparayku Melkisedekshina
saserdote kanaykipa nishpa.

¹⁸Chay Moisespa killkashkan kamachishkakunaka mana ñukanchita yanapashpan uchata rurak kahushkan-chimanta kishpichiy tukunanchipa, Yaya Dioska rimarka kankunata kishpichinaynipa manana chay kamachishkaynikunata kasushkayki-chita tapushanachu nishpa. ¹⁹Mana nima pi Moisespa killkashkan kamachishkakunata paktachishpa atiparkachu uchankunamanta picharishka ucha illa tukushpa alita rurashpa kawsanata. Chayrayku Yaya Dios Jesukristuta churarka saserdote-chi kananpa. Payka ñukanchita uchanchikunamanta pichashkanrayku kunan shuti Yaya Diospi paktanata atipananchita yachanchi.

²⁰Yaya Dioska rimashpan Jesukristu shuklla atun yachayyu saserdote kananta shutipa paktachinanta riksichik shimikunawa rimarka. Chay Levipa miraymanta saserdote tekuna mana chasna rimanawachu churay tukurkakuna. Paykunaka saserdote tekuna tukurkakuna Levipa miray kashkankunarykulla. ²¹Ashwan Yaya Dioska Jesukristuta rimashpan saserdote kananpa, shutipa paktachinanta riksichik shimikunawa rimarka. Kasnami payta rimarka:

Ñukami Yaya Dios kashpayni kay rimahushkaynita shutipa paktachisha. Mana chikan chikanta yuyarishpa kay rimahushkayni-

manta llakirishanchu. Kanta churashkani wiñayparayku saserdote kanaykipa nishpa.

²²Chasna Jesukristu wiñayparayku saserdote kananpa churay tukushpan yachanchi Yaya Dios chay ñawpa paywa alichanamanta kunan ñukanchirayku ashwan ali paywa alichanata rurashkanta. ²³Chay Levimanta miray saserdote kuna wañuk runakuna kashkankunaryku mana atipapayana-hunchu wiñayparayku saserdote kuna kanata. Chayraykumi paykunaka achka kapayanahun. ²⁴Ashwan Jesukristuka mana wañuk runa kashpanmi wiñayparayku saserdote tukushka. ²⁵Chayraykumi payka tukuy payta kirishpa Yaya Diosta kayllayak runakunata atipan kishpichinata wiñayparayku. Wiñaypa kawsahuk kashpanmi Yaya Diosta mana sampayashpachu mañan, tukuy payta kasushpa kawsak runakunaryku.

²⁶Chasna atun yachayyu saserdote-tami munashkanchi: Yaya Diosrayku kawsakta, mana nima shuk millaypata rurakta, ucha illata, runa masinkuna uchata rurahushpankunapas mana uchata rurakta, tukuy allpapi silipi kawsakkunamanta pasa tukushkata. ²⁷Shuk atun yachayyu saserdoteta munashkanchi, maykanmi mana Levimanta miray saserdote kuna atun apushinachu karan puncha shuk wiwakunata rupachinan tiyan Yaya Dios pay kikinpatara uchankunamanta llakichishpan pichanarpa. Chaymantara chay saserdote ka atipapayan runa masinkunaryku wiwakunata rupachinata Yaya Dios uchankunamanta llakichinanpa. Ashwan Jesuska kikin kawsayninta kushpa kruspi wañushpan wiñayparayku Yaya Dioswa alicharka ñukanchita uchanchikunamanta llakichinanpa. ²⁸Yaya Dioska kamachishkankunata Moisesta kushpan

kamachirkka chay Levipa miraykuna-manta tukuy uras shukka saserdote kuna atun apu kananpa, paykuna Yaya Dios ruranankunapa munashkanta mana alita paktachinata atipashpankunapas. Paypa Wawan shuklla atun yachayyu saserdote kananpa Yaya Dioska shutipa paktachinanta riksichik shimikunawa rimarka chay kamachishkankunata kushkanwasha. Chay Wawan shuti Yaya Dios rurananpa munashkanta wiñayparayku paktachirkka.

**Jesuska ñukanchirayku shuk
mushu alichanata
Yaya Dioswa rurashka**

8 ¹⁻²Wawkikuna pamikuna, tukuy chay rimashkaynimanta ashwan alimi kan kay rimashkaynika: Ñukanchipa tiyan shuklla atun yachayyu *saserdote, maykanmi silipi kawsak atun yachayyu tukuya kamachik Yaya Diospa kuskan parti tiyashpan ñukanchita yanapan. Chay Yaya Diospa kawsanan siluka manami runakunapa rurashkashinachu. Yaya Diospa rurashkan kashpanmi shutipa payta mañana wasi kan. Jesukristu ñukanchipa shuklla atun yachayyu saserdote kashpanmi chay Yaya Diospa kawsanan silipi rurahushkanwa tukuy runakunata yanaphun.

³Tukuy saserdote kuna atun apunkunaka churay tukunahun wiwakunata rupachishpa Yaya Diosta kunankunapa, runakunata uchankunamanta llakichinanpa. Chasna kashpan shuklla atun yachayyu saserdotenchipapas shuk ima tiyanan tiyan Yaya Diosta kunanpa.

⁴Jesukristu mana Levimanta miray kashpan kay allpapi kamaka, nima saserdotechu kama, kay allpapi ña achka saserdote kuna tiyashkanrayku maykankunami Moisespa killashkan kamachishkakunata kasushpa wiwakunata rupachishpa Yaya Diosta kunahun.

⁵Chay saserdotekunapa ruranankuna karkakuna silipi pasahushkata amsanlla riksichiklla, imashnami shuk dibuhupi rikushkanchika pishillata rikuchin shutipa rikuchinayashkanta, chaymanta-pas imashnami intipi rikushkanchi shukpa almanka amsanlla rikuchin amunpa rikurinanta chasna. Ñawpa Moiseska Yaya Diosta mañana karpa wasita shayachina kashpan Yaya Dios payta rimarka:

Ama kunkariychu kanta rikuchish-kaynita. Chay Sinaí urkupi kanta rikuchishkayni silipi kahushkatashina tukuya alita ruray nishpa.

Chayrayku yachanchi kay allpapi kahushkaka silipi kahushkata amsanlla riksichiklla kananta.

⁶Ashwan saserdotenchi Jesukristupa rurahushkankunaka chay shuk saserdo-tekunapa rurashkankunamanta yapa pasa alimi kan. Ñukanchiranti wañushpan wiwakunata wañuchinanchimanta ashwan alita ñukanchirayku Yaya Dioswa alichashka. Chay alichana tiyananmanta paktachinan shimita Yaya Dioska ñawpa rimarka. Chay rimash-kanka Moisés wañuta rimashkanmanta ashwan alita yanapay tukunanchimanta karka.

⁷Chay ñawpa Moisespa killkashkan kamachishkakunaka ñukanchi runakunata alita yanapanahuma karka Yaya Diospa rikushkanpi ali kananchipa, Jesukristuka manami ñukanchirayku chay mushu alichanata Yaya Dioswa rurak shamumachu karka. ⁸Yaya Dioska ñawpa paypa akllashkan runakuna Moisespa killkashkan kamachishkaku-nata mana kasushkankunata rikushpan mana alita rurashkankunata yuyachishpa rimarka:

Uyaychi. Shuk punchami ñukaka kankuna Judapa miraykunawa,

chaymanta kankuna mana Judapa miraymanta chay shuk israel runakunawapas shuk mushu alichanata rurasha.

⁹Chay mushu alichanata kankuna-rayku rurashkaynika manami chay ñawpa yaya rukuykichi wañukunaryku rurashkayni-shinanachu. Ñawpa yaya rukuykichi wañukunataka Egipto allpamanta llukshichish-payni paykunata rimarkani imashnami kawsanankuna tiyan ñuka paykunata yanapay-naynipa. Paykunaka manami munarkakunachu rimashkay-nita kasunata. Chayraykumi manana paykunata yanaparka-nichu.

¹⁰Shuk punchami kankunapa mirayki-chikunaryku ñukawa shuk mushu alichanata rurasha. Chay urasmi kamachishkayni-kunata yuyayninkunapi shunkunkunapi churasha paykunata yuyachishpa kawsanpana, ñukata kasuwashpana kawsanankunapa. Chasna kawashpankunami ñukaka paykunapa Yaya Diosninkuna kasha. Paykunaka wawayniku-nami kankakuna.

¹¹Tukuy chay wawaynikunaka, uchillakuna atunkunapas riksiwankakunami. Chasna tukuy runakuna riksiwashpan-kunami manana nima pi runa masinkunata, ayllunkunata yachachinkakunanachu riksiwanankunapa.

¹²Ñukaka uchankunamanta llakichishpa pichasha. Mananami uchankuna-taka yuyarishanachu nishpa.

¹³Chasnami Yaya Diospa mushu alichanata rurashkanmanta yachanchi,

chay ñawpa rurashkan alichana mawka-yashkashina manana valik kananta. Ña yachanchi tukuy mawkayashkaka utkalla tukurinanta.

Imashnami kay allpapi Yaya Diosta kushichishunchi

9 ¹Yaya Dioska chay ñawpa yaya rukunchi wañukunaryku paywa alichanata rurashpan paykunata rimarka imashnami kay allpapi payta kushichinankuna tiyan, chaymantapas imashnami payta mañana wasita ruranankuna tiyan nishpa.

²Chay uras shuk karpa wasita rurarkakuna. Chay ukupi tiyarka ishkay kwartukuna. Chay puntiru kwartupi tiyarka kanchis makiyu lamparín. Chaymanta tiyarka pankunata churana mesa Yaya Dios chaypi kananta rikuchina pankunawa. Chay kwartuka *saserdoteckuna Yaya Diosta mañanan-kuna kashpan Yaya Diosta Mañana Kwantu shutiyu karka.

³Chaymanta shuk rakta suma awarishka llachapa washapi shuk ukuniru kwantu karka, Yaya Dioswa Tinkunakuna Kwantu shutiyu. ⁴Chay kwartupi tiyarka orowa armachirishka tuchpashina mishkinlla asnak wikita rupachina. Chaymanta chaypi tiyarka tablamanta rurarishka atun maleta. Chay maletaka ukunmanta washanmantapas orowa armachirishkami karka. Chay maleta ukupika tiyarka oromanta rurarishka tinahastu. Chay tinahastu ukupi tiyarka ñawpa silumanta urmashka mikuna *maná shutiyu. Chaymanta chay maleta ukupi tiyarka Aronpa tulan wiñarishka. Chaymantapas tiyarka Yaya Diospa kamachishkankuna rumimanta tablakunapi killkarishka. ⁵Chay maletapa awanpi tiyarka oromanta rurarishka ishkay *angelkunashina Yaya Dios chaypi

kahushkanta rikuchinankunapa. Paykunapa rikrankunaka chay maletapa tapan ishkay mayankunamanta chutachishpa chawpinta tapakta karkakuna, maypimi yawarta wicha wicha rurapayarkakuna Yaya Dios runakunata uchankunamanta llakichinanpa. Manami munanichu kunan tukuy chay maletamanta shukllankama shukllankama kwintanata.

⁶Tukuy chaytami Yaya Dioska chay ñawpa runakunata yachachishpan rurarkakuna. Chay puntiru kwartupi karan puncha saserdoteckunalla yaykupayarkakuna lamparinpi wirata untachinankunapa, panta churanankunapa, chaymanta chay mishkinlla asnak wikita rupachinankunapa. ⁷Chay llachapa washa kwartupika shuk kutilla karan wata chay saserdoteckunapa atun apunlla yaykupayarka. Chasna yaykushpan wañuchishka wiwakunapa yawarninta apapayarka Yaya Diosta rikuchinampa, pay kikinpa, tukuy runakunapa mana yachashpa uchata rurashkankunata llakichinanpa. ⁸Chay puntiru kwartupika saserdoteckunallami atiparkakuna yaykunata Yaya Diosta mañanan-kunapa. Chay ukuniru kwartupi saserdoteckunapa atun apunlla atiparka yaykunata. Tukuy chaykunawa Yaya Diospa Espiritunka ñukanchita yachachin, chay ishkay kwartukuna tiyashpanra tukuy runakuna manara atipashkankunata yaykunata Yaya Dios kahushkani.

⁹Chay ñawpa tiyashkawa Yaya Dioska ñukanchita yachachin kunan shuti ña paktarishkanta. Chay ñawpa payta kirik runakunaka paypa rikushkanpi wiwakunata wañuchishpankunapas chasna Yaya Diosta kushichikkunata mana yanaparkachu yuyayninkuna ali tukunarpa. ¹⁰Tukuy paykunapa ruranankuna Yaya Diosta kushichisha

nishpa mana shunkunkunata alichanata atipak kapayanahun, mikunamanta upyanamanta imashna mayllanamanta kamachirishkakunallata kasushpa ruranakuna kashkankunarayku. Chasna ruranankunapa Yaya Dioska kamachirka mushu alichanata ruranankamalla.

¹¹Kunanka *Kristu shamushka shuklla atun yachayyu saserdotenchi tukunanpa. Payka mana yaykurkachu runa rurashka karpa wasipi, ashwan Yaya Diospa kawsanan silupimi yaykurka. Chasna yaykushpan ñukanchita yapa achkata yanapahun. Chay silipi kawsananka kay allpapi karpa wasimantaka ashwan valik kan. Chaypi shuti atiparka ñukanchi runakunaryku Yaya Dioswa alichanata tukuy mana alita rurashkanchikunamanta.

¹²Kristuka mana wiwa kabrakunapa, wakra wawakunapa yawarninta apashpachu Yaya Diospa kawsanani yaykurka. Payka kruspi wañushpanmi pay kikinpa yawarnin shuturishpan yaykurka. Shuk kutilla wiñayparayku Yaya Diospa kawsanan silipi yaykushpa Yaya Diospa tukuy kamachishkan ruranakunata paktachirka uchakunata llakichinanpa. Pay wañushpan yawarnin shuturishkanraykumi Yaya Dioska ñukanchita uchanchikunaranti kastigangan kananmanta wiñayparayku kishpichishka paywa kawsananchipa.

¹³Saserdotenchikunaka wiwa kabrakunapa wakra karikunapa yawarninwa ñukanchi israel runakunata wicha wicha rurapayanahun. Wakra wawakunata rupachipayanahun, chaymanta uchpata yakuwa chapushpanguna ñukanchita wicha wicha rurapayanahun. Chay yawarta uchpawa yakuwa chapushpanguna ñukanchita wicha wicha rurashpanguna uchanchikunamanta picharishkashina kiparipayanchi.

¹⁴Ashwan Kristu shamushpanna

wañushpan kikin yawarnin shuturirka. Chasna ñukanchita shutipa uchanchikunamanta pichashka. Yaya Diospa wiñaypaya kawsak Espíritun payta yanapashpanmi pay kikinta mana uchayuta Yaya Diosta kushpa kruspi wañurka. Chasna Kristu wañushpanmi yawarnin shuturishpan yuyayninchipi tukuy nima imapi yanapak ruranakunata rurananchipa kamachiy tukuhushkanchita yuyayninchimanta pichan wiñaypaya kawsak Yaya Diosninchitana kasushpa kawsananchipa.

¹⁵Chasna Jesukristu wañushkanrayku Yaya Dios atiparka ñukanchi runakunaryku shuk mushu alichanata paywa ruranata. Chayta rurashpanmi chay mushu alichana manara tiyashpan Moisespa killkashkan kamachishkakunata kasunayashpa kawsak runakunata-pas Yaya Dioska uchankunamanta llakichin. Chasnami tukuy payta kayashkan runakunata llakichishpan rimashkanshina siluma pushanka paywa pakta wiñayparayku kawsanankunapa.

¹⁶Wawkikuna panikuna, rikuychi. Shuk runa manarapas wañuhushpanra wawankunata rimama wañushkanwasha pikunarykumi tukuy ima charishkanka kiparinka nishpa. Chay runa shutipa wañushkanta apukuna yachashpankunarami wawankunaka atipanahuma tukuy yayankunapa charishkanta apanata. ¹⁷Chay runa kawsahushpanra manami atipanahumachu nima imata apanata. Pay wañushpanrami shuti atipanahun rimashkanshina paypa imankunata apanata.

¹⁸Chasnashina ñawpa Yaya Dios yaya rukunchi wañukunawa puntiru alichanata rurahushpan wiwakunata wañuchishpa paykunapa yawarninta wichashpangunara valik tukurka.

¹⁹Kasnami karka: Moiseska yaya rukunchi wañukunata tukuy Yaya

Diospa kamachishkankunata yachachishkanwasha shuk puka lana llachapata shuk uchillastu isopo ramapi watarka. Chaymanta wakra wawakunata wiwa kabrakunata wañuchishpan yawarninta yakuwa chapurka. Chay isopo ramata ukuchirka yawar yakuwa chapurishkapi. Chaymanta chay ukuchishka ramawa Yaya Dios payta killkachishkan killkata runakunatapas wicha wicha rurarka.²⁰ Chasna wichahushpan paykunata rimarka: Kay yawarwa kankunata wicashpayni yachankichi Yaya Dios kankunaryku chay alichanata paywa rurashkanta paktachinan tiyan nishpa.²¹ Chaymanta Moiseska chay Yaya Diospa karpa wasinta, tukuy ima ukupi tiyashkakunatapas wiwakunata wañuchishpan chay yawarwa wicha wicha rurarka.²² Yaya Diospa kamachishkanpi riman tukuy yawarwa wichay tukunan tiyan paypa rikushkanpi ali kananpa nishpa. Shuk shuk imakunallami mana yawarwa wichay tukunata munanahunchu picarishka kanankunapa. Yaya Dioska manami runakunata uchankunamanta llakichinchu mana yawar shuturishka tiyashpanka.

Kristuka uchanchikunata pichananpami wañurka

²³ Yaya Dioska munarka runakuna payrayku rurashkankunaka payta kayllayakkunapas wiwakunapa yawarninwa wichay tukushpa picarishka kanankunata. Kay allpapi kahushkaka silipi kahushkata amsanlla riksichiklla kashpankunapas pichay tukunata munashpankuna silipi kananpa kahushkakunaka ashwan sumakta picarishka kanankuna tiyan. Chayrayku wiwakunapa yawarninmanta ashwan yapa valikpa yawarin shuturinan karka sumakta pichay tukunanku-

napa.²⁴*Kristuka manami kay allpapi runakunapa rurashkan *Yaya Diospa wasinpichu yaykurka, maykanmi silipi kahushkata amsanlla riksichiklla kan. Ashwan payka wañushkanmanta kawsarimushpan silupimi yaykurka Yaya Diospa puntanpi mañashpa ñukanchikunata yanapananpa.

²⁵ Payka manami achka kuti uchanchikunarianti wañushkachu, manami achka kuti siluma yaykushkachu. *Saserdote-kunapa atun apuka karan watami Yaya Diospa wasinpi ukuniru kwartupi yaykun. Wiwakunapa yawarnintami apashpa rin, manami pay kikinpatachu.

²⁶ Kristuka achka kuti siluma yaykuma karka, imashnami chay saserdote-kunapa atun apuka karan wata Yaya Diospa wasinpi ukuniru kwartupi yaykun, kay allpata rurashkanmanta pachami achka kuti wañuma karka. Ashwan Yaya Dios munashkan urasmi Kristuka shuk kutilla wañuk shamurka, wiñayparayku tukuy runakunapa uchankunata pichananpa.

²⁷ Tukuy ñukanchi runakunami shuk kutilla wañunanchi tiyan. Chaywashami Yaya Dioska ñukanchita rimanka alitachu manachu rurashkanchi nishpa.

²⁸ Chasnallatata Kristupas shuk kutilla kruspi wañurka achka runakunata uchankunamanta pichananpa. Chaymanta kutikashkami shamunka, manami uchanchikunata pichananpacchu, ashwan ñukanchi payta chapashpa kahukkunata Yaya Diospa kawsanan siluma pushananpana.

Jesukristu wañushkanraykumi
mana munanchinachu wiwakunata
wañuchinata Yaya Dios
uchanchimanta pichananpa

10¹Moisespa killkashkan kamachishkakunapi Yaya Dios ñawpa runakunata yachachirka uchankunaryku wiwakunata wañuchi-

nankunapa. Chay kamachishkankunaka shuk llantushinalla kan, shuk puncha Jesukristu wañushpan uchanchikunata pichashpan ñukanchita kishpichinan-manta. Chay ñawpa kamachishkakunata kasushpa, runakuna karan wata achka kuti wiwakunata wañuchishpankunapas manami atiparkakunachu shunkunkunapika ali tukunata. ²Chay kamachishkakunawa runakuna ucha illa tukunata atipanahuma karka, mana yuyarinahumachu karka Yaya Dios uchankunamanta llakichinanta. Chaymanta manana wiwakunata wañuchinahumachu karka. ³Ashwan chay runakunaka karan wata wiwakunata wañuchishpankunkuna uchayu kanankunata yuyarinahun. ⁴Yachanchi kari wakrakunapa wiwa kabrakunapa yawarninkunata shutuchishpanchi manami atipanchichu uchanchikunamanta pichay tukunata.

⁵Chayraykumi Yaya Dioska munarka Wawan Jesukristu uchanchikunaryku wañuk shamenanpa. ^{*}Kristuka chasna shamushpanmi Yaya Diosta rimarka:

Yayayni, manami munankichu
runakuna wiwakunata
wañuchishpa rupachinankunawa, imakunata kushkankunawa kanta kushichinankunapa. Ashwan ñukata kay allpama kachawashkanki runa tukunaynipa.

⁶ Runakuna wiwakunata
wañuchishpa uchankunaryku
rupachishpankuna kanta mana
atipanahunchu kushichinata.
⁷Chasna kanta mana atipashpankuna kushichinata, ñuka rimashkani: Allpama risha munashkaykita ruranaynipa. Killkachishkayki ñukamanta rimashkashina rurasha nishpa.

⁸Moisespa killkashkan kamachishkkunapi runakuna wiwakunata

wañuchishpa rupachinankunapa rimashpanpas Jesukristu Yayan Diosta rimarka: Mana munankinachu runakuna imakunata kushkankunawa, uchankunaryku wiwakunata wañuchishpa rupachinankunawa kanta kushichinankunapa nishpa. ⁹Chaymanta Jesukristuka Yayan Diosta rimarka: Allpamami risha munashkaykita ruranaynipa. Chasna rimashpanmi yachanchi Yaya Dioska manana ñawpashina wiwakunata wañuchinanchikunata munananta. Ashwan munarka Wawan Jesukristu wañushpan ñukanchi runakunata uchanchikunamanta llakichinata. ¹⁰Chasna kashpanmi Jesukristuka Yaya Diospa munashkanta rurashpa kruspi wañushpan Yaya Diospa tukuy kamachishkan ruranakunata uchakunata llakichinanta wiñayparayku paktachirka. Chayraykumi Yaya Dioska ñukanchikunata llakichishpan uchanchikunamanta pichashka.

¹¹*Saserdotenchikunaka karan punchami achka kuti wiwakunata wañuchishpa rupachinahun Yaya Dios runakunata uchankunamanta pichananpa. Chasna achka kuti rurashpankunapas chay rurashkankunawa runakunaka manami atipanahunchu uchakunamanta alita picharishka kanata. ¹²Ashwan Jesukristuka wañushkanwa uchakunaryku Yaya Diospa tapushkanta wiñayparayku paktachirka. Chaymanta Yaya Diospa kuskan parti tiyarik rirkay paywa paktakamachinanta. ¹³Kunanka chaypi tiyahushpanmi chapahun Yaya Dioska tukuy payta chiknik runakunata winsinankama payta kasunankunapana. ¹⁴Jesukristuka wañushkanwa Yaya Dios uchakunaryku tukuy tapushkanta paktachirka. Chasnami tukuy maykan-kunami uchanchikunamanta

picharishka kanchi Yaya Diosrayku kawsananchipa, payka wiñayparayku shunkunchita alichashka Yaya Diospa munashkanta rurashpa kawsananchipa.

¹⁵Yaya Diospa Espiritunpas chasnalla-tatami riman:

¹⁶ Yaya Dios runankunata rimashkan-washa shuk punchami kanku-napa miraykichikunaryku ñukawa shuk mushu alichanata rurasha nishpa, kasna rimarka: Chay urasmi kamachishkayni-kunata shunkunkunapi yuyan-ninkunapi churasha paykunata yuyachishpa kawsanankunapa, paykuna ñukata kasuwashpana kawsanankunapa nishpa.^f

¹⁷ Chaymantapas rimarka: Mananami uchankunataka nima ima uras yuyarishanachu nishpa.

¹⁸ Chasna ñawpa rimashkanta paktachishka kashpanmi kunanka ñukanchikunata llakichishpa uchanchi-kunamanta pichashka. Chasna uchanchikunata pichashpanmi manana wiwakunata wañuchinata munanchichu Yaya Dios uchanchikunamanta llakichi-nanpa.

Yaya Diosta ashwan alita munananchimanta yachachin

¹⁹ Wawkikuna panikuna, Jesukristu wañushpan yawarnin shuturishkanray-kumi kunanka atipanchi mana manchashpa Yaya Diosta kayllayanata paywa kwintananchipa. ²⁰ Chasna Jesukristu ñukanchirayku shuk mushu ñampitashina rurashka mushu kawsayta Yaya Diosmanta tarinanchipa. Imashnami wañushkan uras *Yaya Diospa wasinpi ukuniru kwartuta arkak llachapa likirishpan manana nima ima runakunata arkarkachu Yaya Dioswa

tinkunakuna kwartupi yaykunankunapa, chasnashinami pay wañushkanrayku manana nima ima ñukanchita arkanchu Yaya Diosta kayllayananchipa.

²¹ Kunanka Jesukristuka shuklla atun yachayyu *saserdotenchi kashpan tukuy ñukanchi Yaya Diosta kirikkunata alita yanapan. ²² Payka mana alita rurashkan-chikunamanta ñami pichashkana. Imashnami armahushpanchi aychanchita yakuwa mayllanchi, chasnami Yaya Dioska chuya yakuwashina shunkunchita mayllashka yuyayninchipi mana alita rurashkanchikunaryku rimay tukuhushkanchimanta.

Chayrayku akuychi Yaya Diosta tukuy shunkunchimanta pacha payllapi sinchikuspa mañashunchi. ²³ Yaya Dioska ñukanchita tukuy rimashkankunataka paktachinkami. Chayrayku akuychi mana chikanta chikanta yuyarishpa Yaya Dios rimashkanta paktachinanta alita kirishpa, payta kirikkunata kishpichinanta runakunata rimashpa kawsashunchi.

²⁴ Akuychi ashwanta shukwa shukwa yanapanakushunchi, alita yuyanakushpa, alita rurashpa kawsananchipa.

²⁵ Yachanchi ña Jesukristupa shamunanka kuchu kahushkanta. Chayrayku akuychi shukwa shukwa yanapanakushunchi alita rurashpa kawsananchipa. Ama sakishunchichu tantarinata Yaya Diosta kushichinan-chipa, imashnami shukkuna yacharish-kakuna manana tantarinata.

²⁶ Yaya Diospa rimashkan shutipa kashkanta riksishkanchiwasha ñukanchi kikin munashpa uchata ruranata katinchimaka, Jesukristu uchanchikunanti wañushkanrayku kishpichiy tukushkanchitawichukshina kanchima. Chasna kashpan manana tiyanchu

uchanchikunaranti wañushpan
ñukanchita uchanchikunamanta
kishpichikka.²⁷ Ashwan ñukanchiray-
kuka kayllami kiparima: Manchaywa
Yaya Diospa kastigananta chapana,
chaymanta chay sinchi nina maykanmi
tukuy Yaya Diosta chiknikkunata
kulluchinka.

²⁸Maykan runami Moisés wañupa
killkashkan kamachishkakunata mana
kasushpanka ishkay kimsa runakuna
apupa puntanpi karan shuk sapallan
chasnalla rikushkankunata rimashpan-
kuna chay apuka chay mana alita rurak
runataka mana llakichishpachu
wañuchinankunapa kamachima.

²⁹Chasna kastigak apukunamanta
ashwan sinchitami Yaya Dioska
kastiganka paypa Wawanta chiknishpa
mana valichik runakunataka, Jesukristu
wañushpan yawarnin shuturishkata
mana valinchu nishpa yuyarik runaku-
natapas. Chay Wawanpa yawarnin
shuturishkanraykumi Yaya Dioska
paykunapa uchankunata pichashka
paypa puntanpi ucha illa kanankunapa,
chaymantapas tukuy ñukanchi runaku-
narayku paywa mushu alichanata
rurashka. Chasnallatata Yaya Dioska
sinchitami kastiganka ñukanchita yuyak
llakichik Espiritunta mana valichishpa
millaypata rimakkunatapas.³⁰ Chayta
paktachinanta yachanchi ñawpa
killkachishkanpi Yaya Dios kikin kasna
rimak kananta yachashkanchirayku:

Ñukami tukuy mana alita rurak
runakunawa alichasha.
Ñukami paykunataka kasti-
gasha nishpa.

Chaymantapas riman:

Ñukami tukuy ali rurak wawayni-
kunarayku alillata rurasha.
Tukuy mana ali rurak waway-
nikunataka kastigashami
nishpa.

³¹Chay wiñaypa kawsak Yaya Dioska
shuk runata kastigananpa apishpan
yapa manchaypami.

**Parishipanchipas mana Yaya
Diosmanta anchurinanchipa
yachachin**

³²Wawkikuna panikuna, yuyariyichi
Jesukristupa yachachishkanta puntiru
kirishpaykichi shutipa kashkata
riksishpa punchapishina kawashashkayki-
chita. Chay uras Jesukristuta kasushkay-
kichirayku achka parisinata
sinchikushpa awantashkankichi.

³³Chiknik runakuna shuk kankunaman-
tata tukuy runakunapa rikushkankunapi
kamishpa makashpa parisichishkakuna.
Shukkunaka chay parisichiy tukushka-
kunata sinchikushpa paykunawa
pakta parisishkankichi.³⁴ Karselpi
taparishka kahukkunata llakichishpa
yanapashkankichi. Chay kankunata
chiknik runakuna ima charishkaykichita
kichushpangunapas manami piñarishp-
achu ashwan kushikushpa sakishkanki-
chi, yachashpaykichi Yaya Diospa
kawsanan silupi ashwan ali, mana
tukurik kawsay kankunaryku
tiyashkanta.

³⁵Chayrayku imatapas parisihushpay-
kichika Jesukristullapi sinchikushpa
kawsaychi. Chasna kawsashpaykichika
Yaya Dioska kankunata atunta kushilla-
yachinka.³⁶ Sinchikunata yachakunayki-
chi tiyan, Yaya Diospa munashkanta
rurashpa kawsashpaykichi paktachi-
nanta rimashkanshina siluma pushay
tukushpa paywa pakta kawsanayki-
chipa.³⁷ Kasnami Yaya Diospa
killkachishkanpi riman:

Kankunata kishpichikka manami
unayashpachu utkallami
shamunka.

³⁸ Maykanmi ñukapi kirishpa
sinchikurin, payllami

aliyachishkayni kashkanrayku
ñukawa wiñaypa kawsanka.
Manana ñukapi sinchikushpa
ñukamanta anchurishkataka
manami alitachu rikusha
nishpa.

³⁹Ñukanchikunaka Jesukristuta alita
katikkunami kanchi, maykunkunami
siluma Yaya Dioswa wiñaypa kawsak
rina kanchi. Manami kanchichu Yaya
Diosmanta anchurik runakuna, maykan
kunami wiñayparayku kastigay
tukunkakuna.

**Yaya Diosta kirishpa kasuk
runakunamanta riman**

11 ¹Wawkikuna panikuna, Yaya
Diosta kirishpa kasushpa
kawsashpanchimi alita yachanchi payka
tukuy rimashkanta paktachinanta.
Manara rikushpanchipas yachanchi
tukuy Yaya Diospa rimashkanka shutipa
kananta. ²Chay ñawpa yayanchi ruku
wañukunamanta Yaya Dioska rimarka:
Ñuka paykunata ali kanankunata rikuni
ñukata kiriwashkankunaryku nishpa.

³Ñukanchikunapas Yaya Diosta
kirishpanchimi yachanchi rimashkan
llawa tukuy kay tiyakkunata
rurashkanta, tukuy rikuwashkanchiku
nata mana rikuypakunamanta
rurashkanta.

⁴Ñawpa Abel wañuka Yaya Diosta
kirishpanmi shuk suma wiwanta
wañuchirka Yaya Diosta kushichinanpa.
Chasna Yaya Diosta kirishpa shuk
wiwanta kushpan wawkin Kaín Yaya
Diosta kushkanwa kushichinayashkan
manta ashwan alita Yaya Diosta
kushichirka. Chayraykumi Yaya Dioska
Abelta rimarka ali rurakmi kanki
nishpa. Chasna Abel alita Yaya Diosta
kirishpa kushichishpanmi wañushka
kashpanpas kunankama ñukanchita
yachachin imashnami Yaya Diosta

kirishpa kushichishpa kawsashunchi
nishpa.

⁵Ñawpa yaya rukunchi *Enokpas
Yaya Diosta alita kirishpa kawsash
panmi Yaya Dioska kawsallata siluma
pusharka. Payka manami wañurkachu.
Chasna Yaya Dios payta siluma
pushashpanmi nima pi kay allpapika
rikurkanachu. Kasnami Yaya Diospa
killkachishkanpi riman: Yaya Dios
Enokta manarapas pushahushpanra
Enokka payta kushichishpa kawsapa
yarka nishpa.

⁶Manami nima pi atipanchu Yaya
Diosta kushichinata, mana payta
kirishpa kawsashpanka. Paywa
kawsanata munashpanchika puntiru
kirinanchi tiyan Yaya Dios tiyashkanta.
Chaymanta kirinanchi tiyan, tukuy
shunkunchimanta pacha Yaya Diosta
maskashpanchika pay ñukanchita
llakichishpan yanapananta.

⁷Ñawpa yaya rukunchi Noé wañupas
Yaya Diosta kirishpanmi rimashkanta
kasurka. Yaya Dios payta rimashpan
pasanan kashkata, maykantami manara
rikyupa karka, chay rimashkanta
kirishpanmi Noeka shuk atun lanchata
rurarka chay atun untaymanta
warminwa tukuy wawankunawa pakta
kishpinanpa. Chasna Yaya Diosta
kirishpa atun lanchata rurashpan
rikuchirka Yaya Diospa rimashkanta
mana kasukkuna mana alita rurashkan
kunata. Payka chay atun untaymantaka
kishpirka, Yaya Diospa rimashkanta
kirishpa kasushkanrayku. Chayraykumi
Yaya Dioska payta rimarka ali rurakmi
kanki nishpa.

⁸Ñawpa yaya rukunchi Abraham
wañupas Yaya Diosta kirishpanmi
rimashkanta kasurka. Kawsahushkayki
llaktamanta llukshishpayki kunayash
kayni allpama riy nishpa rimashkanta
kasurka. Chay llaktamanta llukshirka

mana yachashpanpas maytami rihun nishpa. ⁹Yaya Diosta kirishpanmi payta kunata rimashkan allpapi kawsak rirka, manara kuy tukushpanpas. Chasna kashpanmi shuk allpamanta runashina karpa wasillapi chay allpapi kawsapayarka. Chasnallatatami wawan Isaak, nitun Jakobpas kawsapayarkakuna.

Paykunatapas Yaya Dios rimarka chay allpallatata kunanta. ¹⁰Chasna Abraham Yaya Diospa rimashkanta kirishpanmi chaparka Yaya Diospa suma rurashkan mana waklinata yachak silipi tiyak llaktama rinanta.

¹¹Abrahamka Yaya Diosta kirishpanmi warmin Sara machura kashpanpas atiparka payta chichuchinata. Yapa ruku kashpanpas Yaya Diosmi payta sinchikuchirka shuk wawata rurananpa Yaya Dios rimashkanta paktachinanta kirishkanrayku. ¹²Chasna Abraham ña ruku kashpanpas paymanta mana yupaypa achka runakuna mirarkakuna. Imashnami istrillakunaka silipi, tiyukunapas yaku mayanpi mana yupaypa kanahun, chasnami mirarkakuna.

¹³Manara Yaya Dios chay allpata kunanpa rimashkanta paktachishpanpas tukuy chay yaya rukunchikunaka payta kirishpallami wañurkakuna. Chasna mana chay allpata kuy tukushpankunapas karumantallami rikuksina kushikurkakuna, kirishpankuna shuk puncha Yaya Dios kunata rimashkanta paktachinanta. Purishpa kawsahushpankunami yuyarirkakuna shuk allpamanta pasyak runakunashina kay allpapi kanankunata. ¹⁴Chasna yaya rukunchikunaka kirishpa purihushpankuna riksichirkakuna shuk mushu kawsanata maskahushkankunata. ¹⁵Yuyarinahuma karka chay maskahushkankuna kawsanaka chay llukshishkankuna llakta kananta, unay atipanahuma karka

kutinata. ¹⁶Ashwan paykunaka munarkakuna shuk ashwan ali kawsanama rinata, chay Yaya Diospa kawsanan llaktama silipi. Chasna kashpanmi Yaya Dioska mana pinkarinchu paykunapa Yaya Diosninkuna kanata. Chay silupimi ña rurashka shuk ali llaktata paykunarayku.

¹⁷⁻¹⁸Abrahamka Yaya Diosta kirishpanmi shuklla wawan Isaakta Yaya Dios rimashkanshina wañuchishpa rupachinanpa rirka. Yaya Dios alita payta kasuk kananta riksichinayashpan chasna rurananpa kamachishkanwa kamarka. Abrahamka payta kasushpan mana mitsashpachu shuklla wawanta wañuchinan karka, maykanmantami Yaya Dios paktachinan shimita rimarka kasna: Wawayki Isaakmantallami kikin miraykikuna kankakuna nishpa. ¹⁹Abrahamka yacharkami Isaak wañushpan Yaya Dios payta kawsachinata atipananta. Chasna kirishpanmi Yaya Dios payta wawanta kutichirka, imashnami shuk wañushka kashkamanta kawsachishkatashina.

²⁰Ñawpa yaya rukunchi Isaak wañupas Yaya Diosta kirishpanmi ña ruku kahushkanpi pasananta yachashpan wawankuna Jakobta Esauta rimarka Yaya Dioska paykunata yanapashpa kushichinanta.

²¹Ñawpa yaya rukunchi Jakob wañupas Yaya Diosta kirishpanmi ña wañunan paktarihushpan Josepa ishkay wawankunata rimarka Yaya Dioska paykunata yanapashpa kushichinanta. Chasna Yaya Diospa yachayninwa rimahushpan tulandi urkitarishpa Yaya Diosta kushichirka.

²²Ñawpa yaya rukunchi José wañupas Yaya Diosta kirishpanmi wañunan paktarihushpan wawinkunkunata rimarka shuk puncha tukuy paykuna chay Egipto allpamanta llukshinankunata.

Chaymantapas rimarka llukshihushpan-kuna paypa tullunkunata apananku-napa, chay Yaya Diospa rimashkan allpapi wañushkakunata churana uchkupi churashpankuna tapananku-napa.

²³Ñawpa Moisespaya yankuna Yaya Diosta kirishpankunami wawayarish-kanwasha kimsa killata payta pakarka-kuna. Chay uras kawsashkankuna Egipto allpapi kamachik atun apu kamachirka tukuy chayra wawayarishka kari wawastukunata wañuchinanku-napa. Moiseska wawayarishpan yayan maman rikurakuna suma wawastu kashkanta. Yaya Diosta kirishpankunami chay atun aputa mana manchashpa wawanta kishpichirkaka-kuna.

²⁴Chay Moisés wañupas Yaya Diosta kirishpanmi ña musu kashpan manana munarkachu chay Egipto allpapa atun apupa warmi wawanpa wawanshina kanata. ²⁵Payka chay atun apupa nitunshina kashpan yacharka tukuy chay atun apupa tiyashkanwa kushikushpa kawsanata atipananta. Chasna kashpanpas mana munarkachu uchata rurashpa shuk ratulla kushikushpa kay allpapi kawsanata. Chayrayku yuyarirka, ashwan ali kan Yaya Diospa akllashkan israel masiniku-nawa pakta parisishpa kawsanaynipa nishpa. ²⁶Imashnami Jesukristu Yaya Diospa kushilla kawsananta silipi sakishpa pinkaypata kruspi wañurka, chasnallatamti Moisespas tukuy ima Egiptopisumati tiyashkakunata sakirka israel masinkunata parisihushkankunanta kishpichinana. Payka yacharka Yaya Dios payta shuk puncha kushichi-nanta.

²⁷Chasna Yaya Diosta kirishpanmi chay atun apu piñarihushkanta mana manchashpachay Egipto allpamanta

llukshirka. Yaya Diosta mana ñawipura rikushpanpas rikunakuhukshinami mana sampayashpachu payllata kasushpalla kawsapayarka.

²⁸Chasna Yaya Diosta kirishpa kawsashpanmi Moiseska yaya rukunchi wañukunata rimarka tantarina *Paskua shutiyuta ruranankunapa. Paykunata yachachirka chay uras karan yaya shuk obeha maltata wañuchishpa yawarninwa wasinkunapa punkunta wicha wicha ruranankunapa, wañuchik *angelka paykunapa puntiru wawankunata mana wañuchinanpa.

²⁹Chay ñawpa yaya rukunchi wañukanapas Yaya Diosta kirishpankunami pay Puka Atun Kuchata paskachishpan allpata rishpa kunkaylla chimparka-kuna, imashnami allpata kunkaylla purihushkashina mana manchaypa yaku tiyashkapi. Paykunata chiknishpa apanakuhuk egipto runakunaka chayta rishpa chimpanata munashpankuna chay yakuwa llampu kulluchi tukurka-kuna.

³⁰Ñawpa yaya rukunchi wañukunaka Yaya Diosta kirishpankunami kanchis punchata muyurishpankuna chay kuntrankunapa llaktan Jerikó muyukta rumikunamanta kincharishkaka llampu paki paki tukushpan urmarka.

³¹Chay ñawpa puta warmi Rahab wañupas Yaya Diosta kirishpanmi mana wañurkachu chay Jerikó llaktanpi Yaya Diosta mana kasuk runakunawa pakta. Payka chay ishkay rikunapa shamushka yaya rukunchi wañukunata wasinpi pakarka mana chay Jerikopi kawsak runakuna wañuchinankunapa.

³²Chaymanta tiyanrami achka Yaya Diosta kiriik runakunamanta kwintanay-nipa. Chasna kashpampas timpu pishiwan Gedeonmanta, Barakmanta, Sansomanta, Jeftemanta, Davidmanta, Samuelmanta, chaymanta Yaya Diospa

yachayninwa yachachikkunamantapas kwintanaynipa.³³ Chasna Yaya Diosta kirishpankunami shuk runakuna atun apukunata winsishpa atun allpakunata amuyarkakuna, Yaya Diospa munashkanshina kuska ruranakunallata rurashpa kawsapayarkakuna, Yaya Dios paykunata kunayashkanta kuy tukurkakuna, atiparkakuna pumakunata arkanata mana paykunata mikunankunapa.³⁴ Chasnallatata Yaya Diosta kirishpankunami atun sintihuk ninata arkarkakuna mana paykunata wañuchinanpa, kuntrankunamanta kishpirkakuna mana ishkay wiluyu sabliwa wañuchiay tukunankunapa, sampa runakuna tukushpankuna sinchikurkakuna, wañunakunapi kuntrankunata winsishpa kallpachishpankuna sinchi runakuna tukurkakuna.³⁵ Yaya Diosta kirishpankunami shuk warmikunapas wañushka ayllunkunata Yaya Dios kawsachishpan kutichiy tukurkakuna.

Shukkunaka Yaya Diosta kirishpankunami chiknik runakunamanta yapa parisichiy tukushpankuna wañurkakuna. Manami munarkakunachu Yaya Diosta sakinata wañuymanta kishpinankunapa. Ashwan munarkakunami Yaya Dios paykunata mushumanta kawsachishpan siluma kawsak rinata.³⁶ Chaymanta Yaya Diosta kasuk runakunamanta shukkunata asichirkakuna, makarkakuna, shukkunataka kadenawa watarkakuna, karselpi churarkakuna.³⁷ Shukkunataka rumiwa tuksishpami wañuchirkakuna. Shukkunataka seruchuwa chawpinpi pitishpami wañuchirkakuna, shukkunataka sabliwa pitishpami wañuchirkakuna. Shukkunataka wasinkunamanta kallpachishpankunami llachapa illa, obeha karata kabrapa karata churarishpa shukma shukma purirkakuna. Chasna chiknik runakuna paykunata parisichihushpankunami

llakiywa, nima imayu kawsarkakuna.³⁸ Paykunaka chunlla chakishka allpapi urukukunapi pantashkashina purirkakuna shukma shukma. Manchashpankuna urku uchkukunapi allpa uchkukunapi kawsarkakuna. Yapa ali kashpankopas Yaya Diosta mana kasuk runakunaka paykunata mana valichishkakunachu. Yapa millaypata rurak kashpankuna mana valishkakunachu chasna ali runakuna paykunapa chawpinkunapi kawsanankunapa.

³⁹ Tukuy chay runakunaka alita Yaya Diosta kirishpankunami Yaya Dioska paykunata rimarka ali rurak runakuna kanankunata. Chasna rimashpanpas kay allpapi kawsahushpankunara mana apirkakunachu Yaya Dios paykunata kunata rimashkanta.⁴⁰ Yaya Dioska yuyarirka ashwan ali kananta paykuna ñukanchikunawa pakta rimashkanta kuy tukunankunapa. Mana munarkachu paykuna sapallankuna munashkanshina ali tukunata, ashwan munarka ñukanchiwa pakta ali tukunankunata.

Jesukristupi sinchikurishpa kawsanamanta yachachin

12 ¹Chayrayku wawkikuna panikuna, imashnami chay ñawpa kawsak kirik masinchikunaka Yaya Diosta alita kirishkakunata rikuchishkakuna, ñukanchita rikuhashpankuna akuychi ñukanchipas paykunashina alita Yaya Diosta kirishpa kawsashunchi. Chay tukuy yanka llashashina kirananchita arkahuskata sakishunchi. Tukuy manta ashwan utkalla sakishunchi ñukanchita kadenawashina utkalla watak uchata ruranakunata. Akuychi mana sampayashpa Yaya Diosllapi sinchikurishpa kawsashunchi tukuy arkahuskata winsishpa Yaya Diospi paktananchikama.

²Akuychi Jesukristupi sinchikurishpa kawsashunchi. Payka ñukanchita

yanapan Yaya Diosta kirinanchipa, chaymantapas yanapanka kirishpalla katinanchipa. Parishishkanwasha silipi Yaya Dioswa kushikushpa kawsananta yachashpan Yayanta kasushpanmi wañuchik runakunashina pinkaypata shuk kruspi wañurka. Chaymanta Yaya Diospa kuskan partima silipi tiyari kirkpa paywa pakta tukuy runakunata kamachinana.

³Chayrayku Jesús achkata parisish-kanta yuyariyichi. Payta chiknik runakuna parisichihushpankuna payka ali yuyayllawami chay parisinakunata awantarka. Chayta yuarishpaykichimi kankunapas mana sampayankichichu, nima sakinkichichu Yaya Diosta kasushpa kawsanata.

⁴Na sinchikushpaykichipas mana uchata ruranaykichipa, manarami rikuchishkankichirachu wañunaykichi-kama mana uchata rurashpa sinchikush-kaykichita. Manarami kankunata wañuchinata munashkakunachu uchata mana ruranayashkaykichirayku. ⁵Nami Yaya Dios kankunata yachachishkankunata kunkashkankichi. Wawaynikuna nishpa paypa killkachishkanpi kankunata kasnami riman:

Wawayni, kanta alita yachachihush-kaynirayku parisihushpaykika ama piñariychu. Mana alitachu rurashkanki nishpa rimash-payni ama llakirishpa ñukamanta anchuriychu. ⁶May-kankunatami yuyani, paykunata mana alita rurashkankunamanta kastigashpa, mana alikunata mana ruranankunapa kasuchishpa alita yachachini. Maykantami wawayni kanki nishpa rimani, paytaka mana alita rurashkanta musyachishpa sinchita asutihushkashina yachachini nishpa.

⁷Chasna alita yachachiy tukuhushkay-kichirayku parisishpaykichi ali yuyaywa awantaychi, kankunarayku ali kananta yuyarishpaykichi. Yaya Dioska kankunata chasna ruran kikin wawankuna kashkaykichirayku. Rikuchi ñmanachu shuk ali yayaka mana alita rurashkanmanta kastigashpa, mana alikunata mana rurananpa kasuchishpa wawanta yachachinma alita yachakunanpa? Ari. Tukuy ali yayakunami wawankunata chasna yachachinahun alita ruranankunapa. ⁸Chasnallatatami Yaya Dioska ñukanchi kikin wawankunata yachachin alita rurananchipa. Kankunata mana alita rurashkaykichi-manta mana kastigashpana nima kasuchishpana mana alikunata mana ruranaykichipa, manami Yaya Diospa kikin wawankunachu kankichi.

⁹Ñukanchikunaka wawakunara kashpanchi yayanchikunaka mana alita rurashkanchimanta kastigashpa, mana alikunata mana rurananchipa kasuchishpa ñukanchita yachachishkakuna. Chasna ñukanchita yachachish-pankunami paykunata yuyashpa kasupayarkanchi. ñManachu silipi kawsak Yayanchi Diostaka ashwan alita yuyashpa kasushpa kawsanchima paywa pakta kawsananchipa? ¹⁰Yayan-chikunaka shuk timpu kay allpapi kawsananchikama, paykuna kikin yuyarihushkankunata kaymi kan ali nishpa, mana alita rurashkanchimanta kastigashpa, mana alikunata mana rurananchipa kasuchishpa ñukanchita yachachirkakuna. Ashwan Yaya Dioska ñukanchitaka chasna yachachishpan shuti yachachin maykanmi ñukanchirayku ali kan payshina ucha illa kananchipa. ¹¹Yaya Dioska mana alita rurashkanchimanta kastigashpa, mana alikunata mana rurananchipa kasuchishpa ñukanchita yachachihush-

kan uras mana kushikunchichu, ashwan nanayta musyashpanchimi llakirinchi. Chaymanta shuti achka kuti yachachish-kanta yachakushpanchi kushillana paypa munashkanta rurashpa kawsanchi.

**Sinchikurishpa Yaya Diosta
kasunamanta riman**

¹²Kankuna, maykankunami manana alita Jesukristuta katihunkichi, shuk runa makinkuna chakinkuna sampayashkashina kashpaykichi kuti mushumanta sinchikuriychi. ¹³Alita rurashpa ali ñampita purihuksina kawsaychi, chay sampayashpa Jesukristuta katihuk kirik masinchikuna ñukanchita rikushpankuna mana takarishpa urmanankunapa, ashwan paykunapas aliyashpankuna sinchikurishkana alita purihuksina katinankunapa.

¹⁴Tukuy runa masikichikunawa alichashpa alita kawsaychi. Chaymanta Yaya Diospa munashkanta rurashpa kawsaychi. Uchata rurashpa kawsash-paykichi manami atipankichichu Yaya Dioswa pakta kawsak rinata.

¹⁵Chayrayku shukwa shukwa yanapanakuichi, nima shuk kirik masikichi Yaya Dios payta uchankunamanta llakichish-kanta kunkashpan paymanta anchurinanpa. Ama kawsaychichu piñanakushpa, mana alita rurashpa. Mana alita rurashpa kawsashpaykichi aya sulimanta upyachihukshina kirik masikichikunata waklichinkichi.

Chasnami achka manana alichu kankakuna Yaya Diospa rikushkanpika.

¹⁶Ama musayanakushpa kawsaychichu. Ama kaychichu Esaú shutiyu wañushina Yaya Diospa kunayahushkanta mana valichik. Payka puntiru wawayarish-kanta manami valichirkachu, yayan Isaak payta Yaya Diosmanta kunaya-

hushkanta. Chayraykumi wawkin Jakobta shuk platu mikunallawa tukuy Yaya Dios payta kunayahushkanta kampyarka. ¹⁷Ña yachankichi Esauka chaymanta munarka yayan Isaak ña wañuna kahushpan puntiru wawa apina kashkata kunanta rimanarpa, chaymantapas Yaya Dios payta yanapashpa kushichinanta. Chasna munashpanpas yayanka manami atiparkanachu payta chayta rimanata, ña wawan Jakobta rimashka kashkanrayku. Esaú achkata llakirishpa wakashpanpas manana atiparkachu alichanata paypa mana ali rurashkanta. Kankunapas Esaupa rurashkanta yakashpaykichi ama payshina Yaya Diospa kunayahushkanta mana munanichu nishpa kawsaychichu.

¹⁸Kankunaka ashwan atuntami rikushkankichi chay ñawpa kawsak yaya rukunchikuna rikushkankunamanta. Manami musyaypakanallatachu llankaypakanallatachu rikushkankichi. Paykunaka chay Sinaí urku sintihukashina rikurakuna, Moisés wañu Yaya Diosmanta paypa kamachishkankunata apishkan uras. Chay urkutaka amsa tutashinami puyuka arkarka. Sinchi wayrapi manchaypakanatami rayukanaka uyarirkakuna. ¹⁹Chaymanta chay urkupi sinchita trompetata pukuhuktakuyarkakuna. Kankunaka mana uyashkankichichu Yaya Dios chay chunka kamachishkan shimikunata rimahushkanta. Yaya rukunchikuna chayta uyashpankuna mancharishpa Moisesta rimarkakuna: Manami ashwanta munanchichu uyanata Yaya Diospa manchaypa rimahushkan shimita nishpa. ²⁰Yapami mancharkakuna uyahushpankuna Yaya Diospa kamachishkanta kasna rimahushkanta: Shuk runa, shuk wiwa kay urkuta kayllayahushpanka rumikunawa tuksishpa wañuchiychi nishpa. ²¹Chay

rikuhushkankuna Yaya Dios rimahush-kanta uyahushkankuna yapa manchaypa kallpaypa kashpan Moises-pas rimarka: Ñukaka yapa mancharish-paynimi chukchurihuni nishpa.

²²Kunkunaka manami chasna manchaywa kawsanaykichi tiyanchu. Sion nishka urkupimi, wiñaypa kawsak Yaya Diospa llaktanpi paktashkashina kahunkichi. Chayka silipi kahuk Jerusalén llaktami. Chaypimi waranka waranka *angelkunawa pakta Yaya Diosta kushichishpa kawsahukschina kahunkichi. ²³Kankuna tukuy ñukanchi kirik masikichikunawa pakta washani-rukunamanta ashwan kuy tukuk puntiru wawashina Yaya Diosrayku tukushhankichi. Chay wawankuna kushilla tantarishkapi paktashkashina kahunkichi, maykunkunapami shutinchikunaka silipi killkarishka kanahun wiñaypa Yaya Dioswa kawsananchipa. Yaya Dioswa pakta kawsakkuna tukushhankichi, maykanmi tukuy ñukanchi runakunata tapunka alitachu manachu rurashkanchi nishpa. Yaya Diospa aliyachishkan ñawpa kawsak kirik masinchikunawa tantarishkashina kahunkichi.

²⁴Jesuswa pakta kawsakkuna tukush-kankichi, maykanmi ñukanchirayku shuk mushu alichanata Yaya Dioswa rurashka. Chay ñawpa kawsak runa Kainka wawkin Abelta wañuchishpan yawarnin shuturishpan Yaya Dioska kastiganan karka. Ashwan Jesús wañushpan yawarnin shuturishpanmi Yaya Dioska ñukanchita uchanchikunamanta llakichishka. Jesús wañushkan-raykumi Yaya Dioska chay ñawpa alichanata rurashkanmanta kunanka ñukanchiwa shuk mushu alichanata rurashka.

²⁵Chayrayku ama rimaychichu manami kasunayanichu kay rimahukta

nishpa. Ñawpa Yaya Dios kay allpapi urkumanta rimashkanta mana kasuk runakunaka manami kishpirkakunachu paypa kastigananmanta. Ashwan ñukanchi silumanta rimahushkanta mana kasushpanchika manami atipashunchichu paypa kastiganan-manta kishpinata. ²⁶Ñawpa Yaya Dioska Sinaí urkumanta runakunata rimahush-pan tukuy allpatami kuyuchirka. Ashwan kunanka ñukanchita riman:

Shuk puncha kuti rimahushpayni mana allpallatachu kuyuchisha, ashwan silutapas kuyuchishami nishpa.

²⁷Chasna Yaya Dios shuk puncha kuti nishpa rimahushpan yachanchi payka tukuy rurashkan wakliypakunata anchuchinanta tukuy mana wakliypaku-nallana kiparinankunapa. ²⁸Yaya Dios ñukanchita kamachinanta nima pi atipanchu waklichinata. Chayrayku akuychi agradesishunchi Yaya Diosta, tukuy shunkunchimanta pacha paypa munashkanta rurashpa, payta yuyashpa kushichishpa kawsashunchi. ²⁹Yuyariy-chi, payka shuk nina sintihukschina tukuyta tukuchikmi kan.

Yaya Diosta kushichishpa kawsanamanta riman

13 ¹Wawkikuna panikuna, tukuy Jesukristuta kirik masikichikunawa mana sampayashpa yuyanakushpalla kawsaychi. ²Kankunapi paktak runakunata ali munaywa wasikichipi kayaychi. Shuk runakunaka chasna paktak runakunata kayashpankunami mana yakashsha *angelkunata yaykuchirkakuna.

³Karselpi kahuk runa masikichikunata yuyariychi. Kankunapas karselpi kahunkichimaka, munankichimami shuk runakuna kankunata yanapanan-kunata. Parisichirishkakunata llakichishpa yanapaychi, kankunapas paykunawa pakta parisihukschina.

⁴Tukuy kankuna warmiyu karikuna warmikichillawa kawsaychi. Chasnallata kusayu warmikunapas kusaykichi-llawa kawsaychi. Yaya Dioska tukuy shukpa warminwa, shukpa kusanwa musayakkunataka kastigankami. Chasnallatata shuk musayakkunatapas kastiganka.

⁵Chaymanta ama kullkita munashpalla kawsaychichu. Chay charihushkaykichi-llawa kushilla kawsaychi. Yuyariyichi Yaya Diospa kasna rimashkanta: Ñukaka kankunata mana kunkashkaykichi-llawa, nima sakishkaykichi-llawa nishpa. ⁶Chasna Yaya Dios ñukanchita rimashkanrayku akuychi payllapi sinchikurishpa rimashunchi:

Yaya Diosmi ñukata yanapan.

Chayrayku nima pita, nima imata manchanichu. ¿Imana-chiwamata shuk runaka? nishpa.

⁷Yuyariyichi chay puntiru kankunata Yaya Diospa shiminta yuyachishpa yachachik runakunata. Paykunaka alitami rurashpa Jesukristuta kirishpalla kawsarkakuna wañunankunakama. Kankunapas paykunashinallatata alita Jesukristuta kirishpalla kawsaychi.

⁸Jesukristuka wiñaypa kawsak kashpanmi ñawpamanta pacha kunanpas, tukuy uras chasnallami kan.

⁹Chayrayku ama kasuychichu chay achka chikan yachachishkakunata, maykunkunami mana Jesukristupa yachachishkakunachu kanahun. Yaya Dios ñukanchita llakichishpa yuyahush-kanrayku shunkuykichipi sinchikuriy-chi. Ama yuyariyichichu shuk mikunata mikushpa, shuk mikunata sasishpaya yanapay tukunaykichita shunkuykichipi sinchikurinaykichipa. Chasna ruranakuna nima imapi yanapashkakunachu.

¹⁰Jesukristu kruspi wañushkanray-kumi ñukanchikunaka uchanchikuna-

manta pichay tukushkanchi Yaya Diosta kushichishpa kawsananchipa. Ñawpamanta pacha *saserdote-kunaka wiwakunata rupachishpankuna yuyarinahun, chaykunata rurashpanchimi Yaya Dioska ñukanchita uchanchimanta llakichinka nishpa. Chasna yuyarishpa rurashpa katikkunaka manami atipankakunachu ñukanchiwa pakta uchankunamanta pichay tukunata. ¹¹Chay wañuchishka wiwakunapa yawarninta saserdote-kunapa atun apuka apashpa rin chay ukuniru kwartu ukuma Yaya Dioska runakunata uchankunamanta llakichinanpa. Chaymanta chay wañuchishka wiwakunapa aychantaka llakta washamami apanahun tukuya rupachinankunapa. ¹²Chasnashinami Jesuspas chay Jerusalén llakta washama wañurka kikin yawarnin shuturishpan ñukanchikunata uchanchikunamanta pichananpa. ¹³Akuychi ñukanchikunapas llakta washama rihuksina chay ñawpa kamachirishka kashkata kasushpa kawsashkanchimanta anchuri-shunchi, Jesusshina Yaya Diospa munashkanta rurashpa chiknik runakuna parisichihushkakunata awantashpa kawsananchipa. ¹⁴Manami unaytachu chiknik runakuna chawpipi kay allpapi kawsashunchi. Ashwan chapahunchimi Yaya Diospa mana tukurik kawsananma rinanchita.

¹⁵Chayrayku akuychi, Jesukristu ñukanchita yanapahushpan tukuy uras Yaya Diosta agradesishpa kushichishun-chi. Kushikuhushpanchi payta rimashunchi Yaya Dios, tukuy manta yapa alimi kanki nishpa. Chay kushichinanchika shuk suma imata kunanchinami Yaya Diosraykuka. ¹⁶Ama kunkariyichichu shukwa shukwa yanapanakushpa kawsanata. Shuk ima kankunapa tiyashkanwa shuk mana imayu runakunata yanapaychi. Chasna

yanapanakushpa kawsahushkaykichiwa
Yaya Diosta shuk suma imata
kuhukshina kushichinkichi.

¹⁷Chaymanta Yaya Diospa shiminta
yachachik kankunata sinchikuchik
wawkikunata kasuychi. Paykunaka
kankunata kuyrashpa yanapanahun.
Yaya Diostami rimanankuna tiyan,
alitachu manachu kuyrashkakuna
nishpa. Chayrayku paykunata kasuychi
kushikushpa mana llakishpa kankunata
kuyranankunapa. Mana paykunata
kasushpaykichika kankunapas parisinki-
chimi.

¹⁸Wawkikuna panikuna, Yaya Diosta
mañaychi ñukanchita yanapananpa.
Chasna tapushpanchipas yuyarinchi nima
imamanta shunkunchipi rimay tukuhush-
kanchita. Tukuypimi alita rurashpa
kawsanata munanchilla. ¹⁹Ashwan munani
Yaya Diosta mañanaykichipa, atipanaynipa
utkalla kankunama rinata.

**Killkata tukuchishpa sinchikuchina
shimikuna saludukuna**

²⁰Ñukanchita kushilla kawsayta kuk
Yaya Dios ñukanchirayku shuk mushu
alichanata paywa wiñayparayku
rurashka, Jesukristu wañuhushpan
yawarnin shuturishkanrayku. Amunchi
Jesukristuta wañushkanmanta
kawsachishpan shuk yapa ali obehata

kuyrahuksina ñukanchita alita
yanapak tukurka. ²¹Chay kushilla
kawsayta kuk Yaya Dioska kankunata
yanapachun tukuy imapi paypa
munashkanta paktachishpa alita
rurashpa kawsanaykichipa. Jesukristuka
ñukanchita yanapashpanmi atipashun-
chi ruranata maykanmi ali Yaya Diospa
rikushkanpika. Chayrayku tukuy uras
wiñayparayku Jesukristuta atunya-
chishpa kushichishunchi. Chasna
kachun.

²²Wawkikuna panikuna, yapami
munani kay kankunata kunashpa
sinchikuchishpa killkashkaynita ali
yuyaywa leyinaykichipa. Manami
achkatachu killkashkani.

²³Chaymanta yachanaykichipa
rimashkaykichi: Ñami wawkinchi
Timoteoka karselmanta llukshishka.
Utkalla kayma shamushpanka paywa
paktami risha kankunata rikunanchipa.

²⁴Tukuy kankunata yachachishpa
sinchikuchik wawkikunata, Yaya Diosta
shuk kasuk masinchikunatapas
saludapaychi. Kay Italia allpapi kawsak
kirikkunami kankunaryku saluduta
kachanahun.

²⁵Yaya Dios kankunata llakichishpan
yanapachun.

Chayllata kankunaryku killkashkani.

SANTIAGOPA KILLKASHKAN KILLKA

**Santiago israel masinkunamanta
kirik masinkunata saludan**

1 ¹Ñuka kani *Santiago, Yaya Diospa
Amunchi Jesukristupapas
kamachishkan runa. Kankuna allpanchi-
manta shikwarishka israel kirik
masinikunarayku killkani. Tukuy
kankuna chunka ishkay ñawpa yaya
rukunchi wañukunapa miraymanta
Yaya Diospa runankunata, tukuy allpapi
shikwarishka kahukkunata saludan.

**Kirikkuna imashna
parisihspankunapas
kushikunahuchun**

²Wawkinikuna paninikuna, imatapas
parisihushpaykichika kushikuychi.
Supay kankunata uchata rurachinata
munashpanka mana kasushpa kushikuy-
chi. ³Ña yachankichi Jesukristupi
sinchikushpa kawsanahunchu manachu
nishpa kamay tukuhushkaykichikunapi
alita sinchikurishpaykichi ashwan alita
katik tukushpa rinaykichita. ⁴Chay
kamanakunapi alita sinchikurishkayki-
chirayku ashwan alita katik tukushpa
rishpaykichi tukuy uras ashwan alita
Jesukristuta kasunkichi, tukuy yuyayki-
chi ali tukunankama tukuypi.

⁵Mana yachashpaykichika imashna
sinchikurinata tapuychi Yaya Diosta.
Payka kankunata yanapankami, tukuy
payta tapuk runakunataka kushilla

mana mitsashpachu nima pinkachishpa-
chu yuyayta kun. ⁶⁻⁸Tapunaykichi tiyan
yuyayta Yaya Diosta tukuy shunkuyki-
chimanta pacha. Tapushpaykichika ama
yuyariyichihu ¿Yaya Dioska kuwanka-
chu manachu? nishpa. Chasna yuarish-
paykichika kankichimi ulas wayrawa
shuk partima shuk partima apay
tukushkashina ishkay yuyayyu
runakuna. Kankuna chasna kashpayki-
chika Yaya Dioska tapushkaykichitaka
manami kankunata kunkachu.
Chayrayku Yaya Diosta alita kirishpa
tapunaykichi tiyan.

**Kullkiyu runamanta nima imayu
runamantapas riman**

⁹Nima imayu kashkaykichirayku
parisihushpaykichika kushikuychi, Yaya
Dios kankunata akllashkanrayku
wiñaypa kawsanaykichipa paywa pakta.
¹⁰⁻¹¹Kankuna kullkiyu runakuna
kashpaykichika kushikuychi Yaya Dios
kankunata runakunapa rikushkanpi
atun kashkaykichimanta anchuchishpan.
Chaypimi riksinkichi maykanmi ali kan
Yaya Diospa rikushkanpika. Shuk
kullkiyu runa, kullkiniwa tukuya
atipani nishpa yuyarikka shuk
sisashinami wañunka. Sinchi inti
rupawa sisapa sapinka chakirishpan
kunkaymanta chawpi sisahushkanpi
wañurin suma sisa kahushkanmanta.
Inti chakichishpan urman, suma

rikurishkanka chinkarin. Chasnallata-tami shuk kullkiyu runapas achka suma imakunayu kashpanpas kullkinta mirachihushkanpi kunkaymanta wañunka.

**Maymantami mana alita
ruranayananchikunaka shamun**

¹²Tukuy parisinakunapi, tukuy kamay tukuhushkaykichipas sinchikurishpaykichi kushillami kankichi. Chasnami uchata ruranayashpaykichipas mana rurashanchu nishpa Yaya Diosta kasushpaykichi kushillami kankichi. Millaypata yuyarinayashpaykichipas mana yuyarishanchu nishpa alillata yuyarishpaykichi kushillami kankichi. Chasnai sinchikurishpaykichimi chay tukuy kamay tukuhushkaykichipi, Yaya Dioska ali rurak runakuna kankichi nishpa kankunata wiñaypa suma kawsayta kunka. Chasnai payta yuyahukkunata kunanpami rimarka. ¹³Mana alikunata ruranata yuyarishpaykichi ama rimaychichu Yaya Diosmi chasnai millaypata yuyachiwahun nishpa. Payka manami nima shuk millaypata ruranata yuyarinchu. Chayraykumi mana atipanchu mana ali ruranakunata yuyachinata. ¹⁴Karan ñukanchi kikinpa yuyayninchimantami mana ali ruranakunata yuyarinchi. Chay mana ali yuyarinanchikunaka ñukanchita llullachishpa munachinahun mana alikunata rurananchipa. ¹⁵Millaypata munashkanchita yuyarishpa katishpanchimi chay mana ali yuyarinaka atunyashpan uchata ruranchina. Mana alita rurashkanchika achkayashpan ñukanchita ashwanta ashwanta Yaya Diosmanta anchuchin. Chasnai tukushpanchi wañunanchi tiyan wiñaypa parisinanchipa.

¹⁶Munashkayni wawkinikuna paninikuna, ama yuyarinkichichu Yaya

Dios ñukanchita millaypata rurachinayashkanta. Chasnai yuyarishpaykichika pantachinkichimi yuyaykichita. ¹⁷Yaya Dios alikunallata kun. Imatapas kushpan chayka kanmi alilla. Tukuy silipi kahuk suma punchayachikkunata rurak kashpanmi payka chaykunamanta yapa suma kan, nima shuk millaypa yuyay paypi tiyashkanrayku. Chasnai ali kashkanmanta mana chikanyanchu, tukuy uras chasnalla ali kan. ¹⁸Chasnai ali kashpanmi Yaya Dios kikin munashkanrayku ñukanchita mushu runata rurashka shutipa kashkata riksichik shiminwa. Chasnai rurashka tukuy runakunamanta paypa wawankuna kananchipa, payta kushichishpa kawsananchipana.

**Yaya Diospa shiminta
kasunamanta riman**

¹⁹Munashkayni wawkinikuna paninikuna, yuyariychi kay killkashkaynita. Tukuy uras Yaya Diospa shiminta alita uyashpa kawsaychi, tukuy runa masikichipa rimashkankunatapas. Manara alita yuyarishpaykichika ama runa masikichita rimaychichu, nima utkalla paykunata piñariychichu. ²⁰Piñarinaka nima imapi yanapanchu Yaya Diospa munashkanta rurananchipa. ²¹Kankunaka tukuy millaypakuña yuyaykichi pi yiyashkanta anchuchichu, millaypata rurashkaykichitapas sakiychi. Yaya Diospa shiminta yachakushkaykicha ali yuyawa kasushpa katiyichi alimi ñukarayku nishpa. Chay shimi yachakushkaykicha kasushpa kawsashpaykichika kishpichirishkami kankichi.

²²Ama Yaya Diospa shiminta uyashpalla kawsaychichu, ashwan paypa rimashkanta ruraychi. Uyashpalla kawsashpaykichika kankuna kikinllami llullachirinkichi. ²³Ñukanchi Yaya Diospa shiminta uyashpanchi mana

kasushpanchika shuk runa uyanta espehuwa yanka rikurishkashinami kanchi.²⁴ Chasna uyanta espehupi rikurishpan shuk partima anchurishpan chay rikurishkantaka kunkarinna imashna rikunayumi uyanka kan. Chasnami kanchi Yaya Diospa shiminta mana kasushpanchi.²⁵ Ashwan Yaya Diospa suma kuska yachachishkanta ali yuyaywa yachakunanchi tiyan. Chay yachachishkanwa Yaya Dios ñukanchita yanapan ñukanchi kikin munashkanchillata rurashpa kawsashkanchimanta kishpinanchipa. Paypa yachachishkanta mana sakishpa, mana chikanta yuyarishpa yachakushpanchi uyashkanchita mana kunkarinchinachu, ashwan chay yachachishkanta ruranchina. Chasna kashpan tukuy rurahushkanchipi kushillami kanchi.

²⁶ Shuk kankunamanta yuyarinkichichari Yaya Diosta kushichishpa kawsani nishpa. Chasna yuyarishpaykichipas mana sakishpaykichika mana alikunata rimanata kankuna kikinllami llullachirinkichi. Manami Yaya Diosta kushichinkichichu. Tukuy Yaya Diosrayku rurashkaykichika yankami kan.²⁷ Yaya Diosta shutipa kushichinayashpanchika wakchakunata mashintukunatapas yanapashpa kawsananchi tiyan tukuy paykunapa munahushkankunapi. Chaymantapas mana kawsashunchichu Yaya Diosta mana kasukkunashina.

Tukuy runa masinchikunata parihuta valichinamanta riman

2 ¹Wawkinikuna paninikuna, tukuymanta yapa suma Amunchi Jesukristuta kirishkaykichirayku ama shuk runakunata valichiychichu ashwanta shukkunamanta. ²⁻³Shuk kullkiyu runa oromanta anillyu, suma mushu churarishkawa yaykushpan

maypimi tantarishka kahunkichi Yaya Diospa shiminta yachakunaykichipa, paytaka tiyachinkichi suma ali tiyarinapi. Shuk nima imayu runa yaykushpan ismu churarishkawa, paytaka rimankichi: Munashpaykika shayariy washama, tiyariypas allpapi nishpa. ⁴Kankuna kullkiyu runata ashwanta valichishpaykichika nima imayu runamanta mana ali yuyaywa yuyarikkunami kankichi.

⁵ Alita yuyariyichi, munashkayni wawkinikuna paninikuna, Yaya Dioska manami chasnachu yuyarin. Payka akllashkami runa masinkunapa rikushkanpi mana valik runakunata paypi sinchikushpankuna yapa valik tukunankunapa, chaymantapas paypa ali kamachinan mushu munduma paywa pakta wiñaypa kawsak rinankunapa. Chasna paywa kawsak rinankunapa payta yuyakkunata rimarka.

⁶ Kankunaka chay Yaya Diospa akllashkan nima imayu runakunatami pinkachinkichi mana nima imata kankunata rurashpankunapas. Alita yuyariyichi. ¿Pikunata llullachishpa kankunamanta shuwahanuh? ¿Manachu kanahun chay kullkiyu runakuna? Kankuna liwishkaykichita mana paganata atipashpaykichika ¿pikunata kankunata mana munakta apukunama pushanahu liwishkaykichita pagachinankunapa? ¿Manachu chay kullkiyu runakuna? ⁷Paykunallatatami millaypata rimashpa kanahun Amunchi Jesukristumanta, maykanmantami ñukanchipas shutiyachirishkanchi Jesukristuta kirikkuna nishpa.

⁸ Yaya Diospa killkachishkanpi tukuymanta ali kamachishkanka riman: Runa masikikunata kan kikintashina yuyay nishpa. Chay kamachishkanta kasushpaykichika alita rurashpami kawsankichi. ⁹Shuk runata shuk

runamanta ashwanta valichishpayki-chika runa masikichita manami parihutachu yuyankichi. Chasnaka uchatami rurahunkichi Yaya Diospa kamachishkanta mana kasuhushkaykichirayku.¹⁰ Maykanchari tukuy Yaya Diospa rimashkanta kasuhushpan shuk partistullata mana kasushpanka tukuy Yaya Diospa kamachishkantami mana kasunchu.

¹¹Yuyarishunchi. Shuklla Yayanchi Dios rimarka: Ama shukpa warminwa, ama shukpa kusanwa musayaychichu nishpa. Payllatatum rimarka: Ama wañuchichichu runa masikichita nishpa. Kunanka shuk kari shukpa warminwa mana musayashpanpas wañuchimaka runa masinta, chasna runaka Yaya Diospa kamachishkantaka manami kasunchu.

¹²Chasna kashpan alikunallata rimashpa rurashpa kawsaychi. Yuyariy-chi Yaya Dios kankunata kishpichish-kanrayku shuk punchami tapunka shutipachu Jesuspa kamachishkanshina kawsashkankichi nishpa.¹³ Kankuna runa masikichita llakichishpaykichi chay tapunan punchaka Yaya Diospas kankunata llakichinkami. Runa masikichita mana llakichishpaykichika chay punchami Yaya Dioska kankunata mana llakichishpachu kastiganka.

**Yaya Diosta kirik kahushkanchita
alita rurananchiwa
rikuchinanchimanta riman**

¹⁴Wawkinikuna paninikuna, ¿imata valin shuk kankunamanta rimashpayki-chi kirinimi Jesukristuta nishpa, mana rikuchishpaykichika shutipa payta kasushpa kawsahushkaykichita? Chasna mana rikuchishpa kirihushpaykichika manami Yaya Diospa kastigananmanta kishpichiy tukunkichichu.¹⁵⁻¹⁶ Shuk wawki shuk panipas llachapa illata,

mikuna illata rimankimaka Yaya Dios kanta yanapachun tukuy munashkaykita tarinaykipa nishpa. Chasna rimashpaykipas mana payta kunkimachu llachapanta mikunanta, chay rimashkaykika manami nima imapi payraykuka valimachu.¹⁷ Chasnallatatum mana shutipa Yaya Diospa munashkanta rurashpa kawsashpaykika kirihushkaykika wañushkashina yanka nishpami kan.

¹⁸Shuk runa ñukata chay killkashkaynimanta ayniwamaka: Ñukaka kanmanta ashwan alita kirihuni Jesukristuta. Kanka ñukamanta ashwan alita payta kasuhunki. Chasna chikan kashpanchipas ishkanti chasnalla kirik kanchi nishpa. Chasna rimak runataka ñukaka ayninimami: Rikuchiway shutipa Jesukristuta kirihushkaykita, mana paypa munashkanta rurashpa kawsahushpayki. Chasnaka manami atipankichu. Ñuka shuti rikuchishkayki Jesukristuta shutipa kirihushkaynita paypa munashkanta rurashpa kawsahushkayniwa.¹⁹ Kan kirinki shuklla Yaya Dios tiyananta. Alimi. Chasnallatatum supaykunapas kirinahun. Yaya Diosta manchashpan-kuna chukchurinahun.²⁰ Mana asirtak runa, yuyari. Alita asirtay. Yaya Diosta kirishpayki mana alita rurashpa kawsahushpaykika manami valinchu nima imarayku kirinaykika. Chasna nishpami ayninima.

²¹Akyuchi yaya rukunchi wañu Abrahammanta yuyarishunchi. Payka Yaya Diospa kamachishkanta kasuhushpan shuklla wawan Isaakta mana mitsashpachu wañuchinayarka. Chasna payta kasushkan-rayku Yaya Dioska Abrahamta rimarka: Kunanka rikushkaynipi ucha illami kanki nishpa.²² Chasnamtami yachanchi Abrahamka mana yuyayinllapichu Yaya Diosta kirishpa kawsashkanta. Ashwan

kirishpan rimashkanta kasupayarka. Chasna kasushpa kawsashpan ashwanta ashwanta alita kirik tukurka.²³ Chasnami Abrahamka paktachirka Yaya Diospa killkachishkanpi paymanta kasna nishpa killkarishkata: Abrahamka Yaya Diosta kirishkanraykumi Yaya Dioska payta rimarka kunanka rikushkaynapi ucha illami kanki nishpa. Chaymantapas chasna shutipa kirishkanraykumi Yaya Dioska payta rimarka yuyashkayni runami kanki nishpa.²⁴ Chasna kashpanmi yachanchi Yaya Dios ñukanchikunatapas mana kirishkanchiraykullachu rimananta rikushkanpi ucha illata rurashkanta, ashwan payta kasushkanchiraykumi chasna rimanka.

²⁵ Chaymanta akuychi yuyarishunchi mama payanchi wañu Rahabmanta. Payka chikan runakunamanta karka. Chaymantapas puntiruka puta karka. Chaymanta ñawpa apunchi wañu Josué runankunata Rahabpa llaktanma kachashpan Rahabka paykunata yanapashpa wasinpi pakarka. Chasna yanapashpan Yaya Diosta kasurkana. Chaymanta chay runakunata ñampita mitikunkunapa riksichishpan runa masinkunamanta kishpichirka. Chasna rurashpa Yaya Diosta kasushkan-raykumi payka Yaya Diospa rikushkanpi ali tukurka.

²⁶ Chasnallatatumi ñukanchikunapas alita rurashkanchiwa rikuchinanchi tiyan shutipa Yaya Diosta kirik kahushkanchita. Imashnami shuk runa alma illaka mana kawsanchu, ashwan wañushka kan, chasnashinami ñukanchi Jesukristuta kirikkunapas kanchi, kirishkanchita rurashkanchiwa mana rikuchishpanchi.

Shiminchimanta riman

3 ¹Wawkikuna panikuna, mana achka kankunamanta yachachik-kuna tukunayanahuchun. Ña yachankichi Yaya Dioska ñukanchi yachachikku-

nata shuk kirikkunamanta ashwan sinchita kastiganka mana alita rurashpanchi.² Yuyariyichi tukuy ñukanchikuna achka chikan imapi mana alitachu ruranchi. Maykanmi alikunlla taman, chayka ña tukuyipi alilla kan. Chasna runami tukuy aychantapas wakaycharin tukuy mana ali ruranakanamanta.

³ Rikuychi kaballuta. Sinkanpi waskawa watashpanchi waskallata aysashpa tukuy aychanta kuskanchanchi ñukanchita purichinanpa.⁴ Chasnallatatumi kan lanchapas. Atun kashpanpas sinchi wayra tankahushpanpas uchilla timón payta purichin maymachari kapitanka munan.⁵ Chasnallatatumi shiminchika uchilla kashpanpas ñukanchita winsin.

Nina tsalitapas rikuychi. Shuk nina tsalistuka shuk atun wasita rupachin.⁶ Shiminchika nina tsalishinami. Shiminchimanta millaypa shimikuna llukshin ninashina. Chasnami shiminchika tukuy kawsananchita waklichin, imashnami shuk nina tsalistu shuk atun wasita rupachin. Tukuy mana ali rimananchika supaymantami. Pay ñukanchita yuyachishpan chasna rimanchi.

⁷⁻⁸ Ñukanchi runakunaka kita piña animalkunata mansuyachinchii. Chasna manchaypa animalkunata mansuya-chishpanchipas ñukanchi kikinpa uchilla shiminchita mana atipanchichu winsinata. Amunta shiminka mana kasunata munanchu. Chayraykumi shiminchika shuk suliman runata wañuchikshina kan.

⁹ Shiminchicha Yayanchi Diosta rimanchi ali kananta. Chaymanta chay shinchiwallatatumi piñarishpa rimanchi runa masinchikunata mana ali kanankunata, pay kikintashina Yaya Dioska rurashka kashpanpas.¹⁰ Chay shinchinimantalla ali rimanakuna,

mana ali rimanakunapas llukshinahun. Wawkinikuna paninikuna, chasnaka mana alichu.

¹¹Allpa uchkumanta yaku llukshi-hukta rikuychi. Shuk allpa uchkumantalla ali yaku llukshihushpan ¿aya yakupas llukshimachu? Manami ishkay chikan yaku llukshimachu.

¹²Tarpu kaspitapas rikuychi.

¿Papayuka muyuyamachu palanta muyuta? ¿Palantaka muyuyamachu papayu muyuta? Manami atipanchu chikan muyuta muyuyanata. Chasnash-nami kankuna Yaya Diosta kirik kashpaykichi shimikichimanta ali shimikunalla llukshinankuna tiyan.

Shutipa yachak kanamanta riman

¹³Shuk kankunamanta alita yuyarik shutipa yachak tukunayashpanka tukuy paypa kawsahushkanpi alita rurahush-kanwa rikuchinan tiyan. Shutipa yachak kashpanka mana yuyarinchu ñuka runa masinikunamanta ashwan yachakmi kani nishpa. Ashwan runa masinta yuyahushkanta rikuchinan tiyan.

¹⁴Shunkuykichipi piñarishpa runa masikichikunawa parihuyanata munankichima. Tukuy kankuna kikinpa munashkaykichillata shuk runakunata rurachinata munankichima. Chaymantapas kankuna kikinraykulla yuyarishpa kankichima. Chasna kashpaykichi-ka ama yuyariyichu yachakmi kani nishpa. Chasna yuyarishpaykichi-ka mana shutipa yachakchu kankichi, ashwan kankuna kikinllami llullachiri-hunkichi. ¹⁵Yaya Dioska manami ñukanchita chasna yuyachinchu. Ashwan ñukanchi kikinllami chasna yuyarinchi, chaymantapas supay chasna yuyarin. ¹⁶Chayrayku shuk runa masikichiwa piñarishpa parihuyanata munashpaykichi-ka tukuy kankuna kikin munashkaykichillata shuk runakunata

rurachinayashpa kashpaykichi-ka kankuna kikinraykulla yuyarishpa, manami shuk yuyayllawachu kawsanki-chi, ashwan tukuy millaypakan-uta rurashpami kawsankichi.

¹⁷Yaya Dios ñukanchita yuyachish-panmi alikunallata rurashpa kawsanchi. Chasna kashpan mana makanakushpa, nima piñanakushpa kawsanchichu. Ashwan runa masinchita yuyashpa kasushpa llakichishpa kawsanchi. Chaymanta mana shuk runata shuk runakunamanta ashwanta yuyanchichu. Mana yanka nishpa yuyarin-chichu mana alita yachashpanchi. Mana washata rimanchichu, ashwan alita rurashpa kawsanchi. ¹⁸Shuk runa kushilla kawsanata munashpan runa masinkunawa, tukuy alikunata rurashpa kawsan tukuywa chasna kushilla kananpa. Chasna runataka Yaya Diosmi yanapan kuskata kawsanana.

Yaya Diosta mana kasukkunashina kawsanayashpanchi paypa kunrankuna kanchi

4 ¹Yuyariyichi imaraykumi piñana-kushpa chikninakushpa kawsankichi. ²Manachu kankuna kikinpa munashkaykichillata yuyarishkaykichi-rayku chasna kawsankichi? ³Kankunaka shuk imata yapa munarishpa kawsankichi. Munarishpaykichi-pas mana atipankichichu apanata. Chayrayku runa masikichikunapa imankunata yapa kichunayashpa wañuchinkichi. Chasna rurashpaykichi-pas nima imata atipankichichu kichunata. Chayrayku rimana-kushpa makanakushpa runa masikichiwa kawsankichi. Chasna kawsashpaykichi-pas nima imata rurankichichu. Munashkaykichi-ka mana apinkichichu, Yaya Diosta mana tapushkaykichi-rayku. ⁴Yaya Diosta tapushpaykichi-pas payka manami

kunkachu, mana ali yuyawa tapushkaykichirayku. Mana kankunata kunkachu, kankuna kikinraykulla tapushkaykichirayku munashkaykichita ruranaykichipa.

⁴Shuk warmi kusanta sakishkashinami Yaya Diosta sakishka runakunaka kankichi. ⁵Manachu yachankichi Yaya Diosta mana kasushpaykichika payta chiknik runakuna kanaykichita? Yaya Diosta mana kasukkunashina kawsanayashpaykichika paypa kunrankunami kankichi. ⁶Paypa killkachishkanpi mana yankachu kasna riman: Yaya Dioska Espiritunta kushka ūukanchikunapi kawsanampa. Chay Espíritun ūukanchikunata yuyashpan yapa munan paylla Amunchi kananpa. Manami munanchu shukta kasunanchipa nishpa. ⁷Shukta kasushkanchimanta Yaya Dios piñarishpanpas ūukanchita kastigana imata yapa yuyashpan llakichin. Chasnallatata Yaya Diospa killkachishkanpi riman: Maykan runami Yaya Diosta runa masintapas kasushpa yuyashpa kawsan, chay runataka Yaya Diosmi llakichishpan yanapanka. Maykan runami pay kikinmanta ali yachak kanayashpa Yaya Diosta runa masintapas mana kasushpa nima yuyashpa kawsan, chasna runataka Yaya Dioska manami yanapan-kachu nishpa.

⁸Chasna kashpan Yaya Diosta kasushpana kawsaychi. Supayta mana kasushpa sinchikuraychi. Jesukristulla Kamachik Amuykichi kashkanta rimashpa payta kamachiychi anchurinanpa. Chasnami payka kankunamanta mitikunka. ⁹Yaya Diosta kayllayaychi paypas kankunata kayllayanpana. Uchasapa runakuna, millaypata rurashpa kawsanaykichita sakiyichi. Ishkay yuyayyu runakuna, tukuy millaypa yuyaykichikunata shunkuyki-chimanta pichaychi. Tukuy shunkuyki-

chimanta pacha Yaya Diosta yuyaychi. ¹⁰Tukuy shunkuykichimanta pacha llakiriychi mana ali yuyayyu kahushkaykichirayku. Uchaykichita yuyarish-paykichi llakirishpa wakaychi. Manana kushilla asiychichu, ashwan asinayki-chiranti wakaychi. Kushikunaykichiranti llakiriychi. ¹¹Tukuy shunkuykichimanta pacha llakirishpaykichi tukuy mana alita rurashkaykichikunata Yaya Diosta rimaychi. Chasna rurashpaykichimi Yaya Dioska kankunata kushichinka.

**Yaya Diosllami atipan rimanata
pimi ali, pimi mana alichu**

¹¹Wawkinikuna paninikuna, mana washanchanakushpa kawsaychichu kankunapura. Runa masikichikunamanta mana ali kahushkankunata rimashpaykichi, chaymantapas mana alita rurashpa kawsak kashpan kastigay tukunan tiyan, ūuka shuti alimi kani nishpa rimashpaykichi runa masikita yuyay nishpa Yaya Diospa kamachishkanta mana alichu nishpa rimahukshina kankichi. Chasna kashpaykichimi chay kamachishkanta kasuna imata alichu manachu nishpa rimakkuna kankichi.

¹²Yaya Diosllami kurka kamachinakunata tukuy runakunaryku. Payllami atipan rimanata pimi alita rurahun, pimi mana alitachu rurahun. Paylla atipan runakunata kastigananmanta kishpichinata, chaymantapas wiñayparayku nina mana wañukpi wichunata. Kankunaka pita kankichi runa masikichikunamanta rimanaykichipa pimi ali, pimi mana alichu. ¹³Yaya Diosmanta pasachu kankichi rimanaykichipa pimi ali, pimi mana alichu nishpa?

**Mana yachanchichu imashnami
kaya tukushunchi**

¹³Kunan kankuna Yaya Diosta mana yuyarishpa kawsakkuna, uyaychi

rimahushkaynita. Kankunaka yuyaynikichi pi kasna rimankichi: Kunanmi rihuni, mana kunan kashpanka kayami risha chay llaktama shuk watarayku rantishpa rantichishpa kullkinita mirachinaynipa nishpa.¹⁴ Mana yachashpaykichitata imashnami kaya tukunkichi chasna rimashpa kawsankichi. ¿Manachu yachankichi kawsaykichi kashnishina kashkanta? Shuk ratu rikurin, chaymanta shuk ratustumanta chinkarin. Chasnami kan kawsaykichi.

¹⁵Chayta yuarishpa kasna rimashpa kawsaychi: Yaya Dios munashpanka kawsasha, kawsashpaynika tarawasha nishpa. ¹⁶Ashwan kankunaka yuyarinkichi ñuka kikinpa ursaynillawa yuyaynilawa tukuya atipani ruranata nishpa. Chasnaka manami alitachu yuyarihunkichi. ¹⁷Maykanchari ali rurana kashkata yachashpantata mana ruranchu, chayka payrayku uchami kan.

Mana ali shunku achka imayu runakunamanta riman

5 ¹Kunan kankuna achka imayu runakuna, uyaychi rimahushkaynita. Atunta parisinaykichi tiyan. Chayta yuarishpaykichi kaparishpa wakaychi. ²⁻³Tukuy imaykichikunaka ismunkami, llachapaykichikunata kumehenkuna mikunkakuna, kullkikichikuna ismunka, kullkimanta oromanta tiyashkapas muhusyarinka. Chasnaka kashpantata kay allpa tukurinan puncha paktarihuškanpi kullkikichillata mirachishpa kawsahunkichi. Tukuy chay mirachihushkaykichi imaykichikuna ismushkanta rikushpaykichi yachankichi yanka nishpa mirachishpa kawsashkaykichita. Chasnaka yanka kawsashkaykichita yuarishpaykichi nina sintihukwashina chay yuyayku-nawa wiñaypa parisinkichi. ⁴Kankunaka

runakunata tarawachishkankichi chakraykichipi tukuy tarpuvichikuna- napa muyunkunata pallanankunapa. Chasna tarawachishpaykichipas mana pagashkankichichu. Paykunaka chasna parisishkankunata llakiya wakashpami Tukuya Atipak Yaya Diosta rimashkakuna. Wakashpa rimashkankunata Yaya Dioska uyashkami. ⁵Kankuna kay allpapi tukuy imata charishpaykichi munashkaykichita rurashpa kawsahunkichi. Mana yuyayyu wiwa wirayahuk-shina kankichi. Mana yuyarinkichichu imashnami tukunkichi. Imaykichikunata mirachishpa, munashkaykichita rurashpa kawsahunkichi. Yaya Diospa kastiganan ura ña kuchupi kahushpan-pas mana yuarishpa kunkaylla kawsahunkichi. ⁶Ali kawsak runakunata llullashpa rimankichi millaypata rurak runami nishpa. Paykunata wañuchishpaykichi kankunata nima imata rurashkakunachu.

Imashnami Amunchi Jesukristuta chapananchi tiyan

⁷Wawkinikuna paninikuna, kunan tukuya parisihushpaykichipas Amunchi Jesukristuta mana sampayashpa chapashpalla kawsaychi, kuti shamush-pan kankunata kishpichinankama. Chakranpi tarpuk runata rikuychi. Payka kushilla chapan tarpushkan tamyawa wiñashpan muyuyananta. Yachan muyuyashpan pallananta.

⁸Chasnallatatami kankunapas Amunchi Jesukristupa shamunanta mana sampayashpa sinchi shunkuwa chapanaykichi tiyan, shamunan puncha ña kuchuyahushkanrayku.

⁹Wawkinikuna paninikuna, shuk runa masikichikunamanta mana ali yuarish- kaykichita ama rimak riychichu shuk runa masikichita, Yaya Dios kankunata mana kastigananpa. Payka ñami

shamuna kan runakunata kawsashkan-kunamanta tapushpan paykunawa alichanarpa.

¹⁰Wawkinikuna paninikuna, yuyariyichi imashnami ñawpa Yaya Diospa yachayninwa yachachikkunaka sinchita parisirkakuna. Yaya Diospa kamachishkan karkakuna paypa shiminta yachachinankunapa. Sinchita parisishpankunapas mana sampayashpa Yaya Diosta kasurkakuna. Chasnallatata kankunapas katiyichi.

¹¹Yuyariyichi, paykunamanta rimanchi kushikunankuna tiyan nishpa, parisihush-kankunapi mana sampayashpa sinchikurishkunkunaryku. Chaymanta Yaya Diosta alita kasuk Job wañumanta yachakuychi imashnami parisihushkanpi sinchikurirka. Chaymantapas paymanta yachakuychi imashnami Yaya Dios payta tukuy parisihushkanmanta kishpichirka. Chasna Yaya Dioska rurarka yapa llakichik yuyak kashkanrayku.

¹²Wawkinikuna paninikuna, tukuy yachakushkaykichimanta puntiru yachakuychi parisihushpaykichipas shutipa kashkallata rimanaykichipa. Nima ima uras runakunapa puntankunapi rimahushkaykichita kirichinayashpa kirichina rimanakunawa rimaychichu. Nima siluta, nima allpata, nima pita, nima maykan imakunatapas churashpa kirichina rimanakunawa rimaychichu. Ari nishpaykichika ari kachun. Mana nishpaykichika mana kachun. Tukuy rimashkaykichita chasnalla paktachik kaychi, chaymanta imatapas rimashpaykichika shutipa kachun. Shutipa kashkallata rimashpa kawsaychi Yaya Dios kankunata mana kastigananpa.

**Imashnami Yaya Diosta
mañananchi tiyan yanapay
tukunanchipa**

¹³Shuk kankunamanta parisihushpanka Yaya Diosta mañachun. Shuk kankunamanta kushilla kahushpanka Yaya Diosta

takishpa kushichichun. ¹⁴Shuk kankunamanta unkushka kahushpanka kirikkunata sinchikuchik wawkikunata kayachun paypi aseitiwa kakushpa payrayku mañanankunapa, Amunchi Jesukristu munashkan-shina. ¹⁵Chay kirikkunata sinchikuchik wawkikuna ali yuyawa Jesukristuta kirishpa mañashpankunaka unkushkaka ampirinkami, Yaya Dios payta atarichinka. Uchata rurashka kahushpanka Yaya Dios chayta pichashpan manana yuyankanachu.

¹⁶Chayrayku karan shuk uchaykichita rimaychi kankunapura. Chaymantapas Yaya Diosta mañaychi karan shukray-ku ampirinaykichipa. Yaya Dios uchanmanta llakichishka runa mañashpanka tukuyta atipak Yaya Diosmi yanapan.

¹⁷Yachakuychi Yaya Diospa yachay-ninwa ñawpa yachachik Elias mañashkan-manta. Ñukanchishina runa karka. Yaya Diosta mañarka mana tamyananpa. Chayrayku tukuy chay allpapi kimsa wata chawpita mana tamyarkachu.

¹⁸Chaymanta kutikashka Yaya Diosta mañarka tamyananpa. Chaypina tamyachirka. Tarpukunaka kutikashka aliyahshpankuna muyuyarkakunana.

¹⁹Wawkinikuna paninikuna, kay killkahushkaynita tukuchinaynipa kutikashka kankunata rimani runa masikichikunata llakichinaykichipa. Shuk kankunamanta Yaya Diospa shiminta manana kasuhushpanka payta yanapak ryichi uchanta sakishpan kutikashka Yaya Diosta kasuk tukunanpa. ²⁰Chasna rurashpaykichika uchata rurak runakunata, wiñayparayku kastigarinankunamantami kishpichinkichi. Chaymantapas paykunata yanapankichi achka uchata rurashkunkunamanta llakichiy tukunankunapa.

Chayllata killkashkani.

Wawkikichi turikichi
Santiago

PUNTIRU PEDROPA KILLKASHKAN KILLKA

**Pedro saludan shikwa kawsahuk
kirikkunata**

1 ¹⁻²Munashkayni wawkinikuna paninikuna, ñuka Pedro Jesukristupa kamachishkan chaymanta kachashkan kani paypa shiminta yachachinaynipa. Ñawpamanta pacha Yaya Dios yachashpan Jesusta kirina kanaykichita kankunata akllarka payta kasuk runakuna kanaykichipa. Espiritunta kankunama kachashpan kankunata aliyachirka. Chasna kashpanmi Yaya Diosta kasukkuna tukushkankichi, chaymantapas uchaykichikunamanta llakichishka. Chasna llakichiy tukushkankichi Jesukristu uchaykichikunaranti wañushpan yawarnin shuturishkanrayku. Kunan Amuykichi kashpan kay allpapi shuk allpamanta runakunashina kawsankichi Yaya Diosta mana kasukkuna chawpipi. Kankuna Ponto, Galasia, Kapadosia, Asia, Bitinia allpakuñapi kawsakkunaryku killkani. Yaya Dios kankunata tukuy uras ashwanta llakichichun chaymantapas yanapachun kushilla kawsanaykichipa.

**Yaya Dioswa kawsak
rinanchimanta yachachin**

³Wawkinikuna paninikuna, akuychi Amunchi Jesukristupa Yayanta paypa Yaya Diosninta kushichishunchi yapa

alimi kanki nishpa. Ñukanchita yapakta llakichishkanrayku Espiritunwa mushu kawsayta kushpa mushu runata rurashka. Chasna kashpanmi kushikushpa chapanchi shuk puncha silipi Yaya Dioswa kawsak rinanchita. Jesukristuta wañushkanmanta kawsachimushkanrayku yachanchi ñukanchitapas chasnallatata kawsachinanta paywa kawsak rinanchipa.

⁴Chasna paywa kawsak rishpaykichi Yaya Dios kankunata yapa ali kawsanata silipi kunka, maykantami kunan kankunaryku wakaychahan. Chayka manami waklinkachu, nima tukurinkachu, tukuy uras alilla kanka, nima pi uchata rurankanachu. ⁵Yaya Dios kankunata atun yachayninwa wakaychanka tukuy parisinakunamanta kishpichishka ali kawsana silipi paktanaykichipa, paypi sinchikushpa kawsashkaykichirayku. Chasna ñukanchita kishpichinanta unay rimashpan shutipa paktachishkanta alpa tukurinan uras riksichinka.

⁶Chayta yachashpaykichi atunta kushikuychi. Kunan kay allpapi kawsahushpaykichira shuk punchakuna Yaya Diosta kiriushkaykichipi achka imapi kamarishka kahushkaykichirayku parisishpaykichipas kushikuychi.

⁷Chasna parisishpaykichi atipankichi rikuchinata Yaya Diosta shutipa kirikkuna kanaykichita. Orota yuyariy-

chi. Orota ninapi churanchi kamanan-chipa shutipa oro kananta. Chaymantapas churanchi, oro kashpan tukuy susyan rupananpa, orollana kiparinanpa. Mana oro kashpanka llampu rupan. Shutipa oro kashpanka mana rupanchu. Chasna kashpan yachanchi shutipa oro kananta. Yaya Diosta kirishpaykichi parisinakunawa kamarishka kanaykichi tiyan, imashnami oro ninawa chasna. Yaya Diosta kirishpalla katishpaykichi chay kirinaykichika tukurik oromanta yapa valin. Chasna alita kirishkaykichita rikushpan Jesú斯 kuti shamushpan Yaya Dios kankunata rimanka alita kirik runakunami kankichi nishpa. Chaymantapas kankunata kushichishpan atun yachayyu tukuypi alilla kanaykichipa ruranku.

⁸⁻⁹Kankuna Jesukristuta nima ima uras rikushpaykichipas payta yuyahunkichi. Kunanpas payta mana rikuhush-paykichipas paypi sinchikunkichi. Chasna Jesukristuta kirishpa kawsash-paykichi yachankichi Yaya Dios kankunata kishpichihushkanta kirishkaykichishina paktachinanta. Chayta yuyarishpaykichi ña atunta kushikuhunkichi. Chay kushikuhushkaykichika mana rimaypachu mana asirtaypachu atunmi kan.

¹⁰⁻¹¹Ñawpa Yaya Diospa yachayniwa yachachikkuna unay manara paktarishpan ña rimarkakuna Yaya Dios llakichishpan ñukanchikunata kishpichinanmanta. Yaya Diospa Kachanan Kishpichikpa Espíritun paykunapi kahushpan manara paktarihuhspan paykunata yachachirka chay Kishpichikpa parisinanmanta, chaymantapas parisishkanwasha tukuymanta ashwan suma atun apu tukunanta. Paykuna yapa ashwanta yachanayashpankuna tukuy killkarishkakunapi

maskarkakuna. Yapa yachanayarkakuna ima urasmi paktanka chay kishpichikka, chaymantapas pimi kanka nishpa.

¹²Yaya Dios paykunata riksichirka chay rimahushkankunaka runakunata kishpichinanmanta mana paykuna kawsahushkankunapi paktachinanta, ashwan shuk puncha paktachinan karka. Chay ñawpa Yaya Diospa kishpichinanmanta rimashkankunaka kunan chay kishpichik Jesukristu shamushpan ñukanchirayku ña paktarishka. Yaya Dios Espiritunta silumanta ñukanchi Jesuswa purikkunama kachashpan yuyachishkanshina kankunata chay suma ali shimita Jesukristu runakunata kishpichinanmanta yachachishkanchi. Tukuy chayta *angelkunapas yapa yachanata munanahun, imashnami Yaya Dios runakunata kishpichin. Chasna kashpanpas mana atipanahunchu yachanata.

Yaya Diosta kirikkuna payshina alillata rurashpa kawsanahuchun

¹³Tukuy chay kankunaryaku Yaya Dios rurashkanta yuyarishpaykichi achka yuyaykichita sakiychi. Shuk yuyayllawa tukuy shunkuykichimanta pacha yuyarishpaykichi chapaychi Jesukristu rikurinan uras Yaya Dios kankunata llakichishpan kishpichihushkanta alita paktachinanta. ¹⁴Yaya Diosta kasuk wawankuna kashkaykichirayku ama munashkaykichita rurashpa kawsaychiku, imashnami ñawpa Yaya Diosta manara riksishpaykichi kawsapaykankichi. ¹⁵⁻¹⁶Yaya Dios killkachishkanpi riman:

Ñuka ucha illa alikunallata rurak
kashpayni kankunapas
ñukashina alikunallata
rurashpa kawsaychi nishpa.

Yaya Dios, maykanmi kankunata kayashka paywa kawsanaykichipa

alillata rurak kashpan kankunapas
payshina alillata rurashpa kawsaychi.

¹⁷Kankuna mañashpaykichi Yaya
Diosta rimankichi Yayayni nishpa.
Chasna payta shuk ayllyukichitashina
rimashpaykichipas ama yuyariyichihu
shukkunamanta ashwan alitami llakichi-
wanka nishpa. Yaya Dioska tukuy
runakunata rurashkankunamanta
chasnalla tapunka alitachu rurashpa
kawsashkakuna manachu nishpa.
Manami valichinkachu shuk runata
shuk runakunamanta ashwanta. Chayta
alita yuyarishpa payta kasushpa
kawsaychi, kay allpapi shuk allpamanta
runakunashina kawsahushpaykichira.
¹⁸⁻¹⁹Yaya rukuykichi wañukunashina
yanka kawsapayarkankichi. Paykunapa
kawsashkankunamanta yachakushpayki-
chi kankunapas chasnallatata kawsapa-
yarkankichi. Yaya Dioska kankunata
chay mana payta kasushpa yanka
kawsashkaykichimanta kishpichishka.
Mana kankunata kishpichishkachu
tukurik kullkiwa. Ashwan Jesukristu
kankunaranti kruspi wañushpan sumá
yawarnin shuturishpan kishpichiy
tukushkankichi. Imashnami shuk sumá
obehata wañuchishpankuna yawarninta
shutuchipayanahun uchankunamanta
llakichiy tukunankunapa, chasnashi-
nami sumá ucha illa Jesukristuka
wañushpan yawarnin shuturirka
uchanchimanta picharishka kananchipa.
Chayta yachashpaykichi Yaya Diosta
kasushpa kawsaychi.

²⁰Manara Yaya Dios kay allpata
rurahushpanra ña yuyarirka
Jesukristuta kachananta chasna
wañushpan runakunata kishpichinanpa.
Chay yuyarishkanta Yaya Dioska
unaymanta kunan paktachishka
ñukanchikunaryku kay allpa
tukurihushkan punchakunapi.

²¹Jesukristu kankunaryku wañushpan

chaymanta kawsarimushkanwasha
Espiritunta kachashpan Yaya Diosta
kasuk tukushkankichi. Chay Yaya
Diosmi Jesukristuta wañushkanmanta
kawsachishka, chaymantapas tukuy
apukunamanta atun apu kananpa silipi
yaykuchishka. Chayta rurarka kankuna
payta kirishpa kawsanaykichipa,
chaymantapas tukuy shunkuykichi-
manta pacha chapashpa kawsanayki-
chipa kankunatas wañushpaykichi
kawsachinanta paywa pakta silipi
kawsanaykichipa.

²²Kunanka kankuna Yaya Diospa
shutipa kashkata riksichik shiminta
kasushkaykichirayku uchaykichikunamanta
picharishka tukushkankichi ali
yuyaywa wawkikunawa panikunawa
yuyanakushpa kawsanaykichipa.
Chasna kashpan tukuy shunkuykichi-
manta pacha mana sampayashpa
shukwa shukwa yuyanakushpa kawsay-
chi. ²³Yuyariyichi Yaya Dios kankunata
mushu runata rurashkanta. Paypa mana
tukurik shiminwa kankunata yuyachish-
pan mushu wawatashina rurashka.
Mana runa wañukmantachu mushu
wawashina tukushkankichi kuti wañuk
runalla kanaykichipa. Ashwan Yaya
Dios paypa mana tukurik shiminwa
kankunata yuyachishpan chasna
tukushkankichi wiñaypa kawsayyuna
kanaykichipa. Chay shimika wiñaypa
kawsayyushina mana tukurik tukuy uras
chasnalla rimak kan. ²⁴Chasnallatata
Yaya Diospa killkachishkanpi riman:

Tukuy runakuna kiwashina wañuk
kanahun. Kiwaka chakirin,
sisanka urman, chaymanta
wañun. Runakuna kiwashina
shuk ratulla kawsan, chaymanta
wañun. Tukuy rurashkankuna
kiwa sisashinami chinkarin.

²⁵Ashwan Yaya Diospa shiminika
manami nima ima uras tukurin-

kachu, wiñayparayku chasnalla
rimak kan nishpa.

Chay shimitami kankunata yachachishi-
kanchi Jesukristu runakunata kishpichik
kan nishpa.

2 ¹Chayrayku tukuy mana ali
ruranakunata sakiyichi. Ama
runakunata llullachichiychu. Ama
rimanaykichillawa ali yuyayyu
tukushpa kawsaychichu. Ama shukpa
tiyashkanta munarishpa kawsaychichu.
Ama runa masikichimanta washata
rimaychichu. ²⁻³Ashwan sinchikuychi
Yaya Diospa shiminta uyashpa.
Imashnami shuk mushu wawayarishka
wawaka yapa munan chuchunata,
chasnashina munaychi Yaya Diospa
shiminta yachakushpa kasushpa
kawsanata tukuy uras ashwanta
ashwanta kirinaykichipa. Amunchi
Jesukristu llakichiyiki yapa ali kananta
ña alita yachashpaykichi ashwanta
ashwanta payta kirishpa kawsaychi
Yaya Dios kankunata kishpichihush-
kanta alita paktachinankama.

**Jesukristupi sinchikuk runakunalla
Yaya Diospa rikushkanpi ali
kanahun**

⁴Amunchi Jesusta kayllayaychi.
Paymi shuk rumishina chaymantapas
wiñaypa kawsayyu. Tukuy paypi
sinchikukkunata wiñaypa kawsayta kun.
Mana chikanyanchu, tukuy uras chasnalla
sinchi kan. Achka runakuna mana
munashpankuna payta kirinata, shuk
yapa chaniyu rumita mana alichu
nishpa wichuhukkunashina kanahun.
Yaya Dios shuk wasihu runashina
kashpan chay runakunapa mana
munashkankuna rumita suma ali yapa
chaniyu kan nishpa akllashka wasinta
kallarinanpa. ⁵Amunchi Jesusta
kayllayashpaykichimi kankunapas
rumishina chaymanta wiñaypa

kawsayyu tukushkankichi. Yaya Dios
rumimanta wasihukschina kashpan
kankunamanta wasinta rurahun
Espiritunwa kankunapi kananpa.
Chaymantapas kankunata yanapahun
uchaykichimanta picharishka paypa
munashkanllata rurak *saserdoteckuna-
shina kanaykichipa. Saserdoteckuna
wiwakunata Yaya Diosrayku
rupachishpa payta kushichipayahanun.
Ashwan kunanka kankuna Yaya Diosta
yuyashpa kasushpa agradesishpa
kawsanaykichiwa kushichiychi.
Jesukristu ñukanchiranti wañushkan-
rayku chaymanta Yaya Diospa puntanpi
ñukanchirayku tapushpan Yaya Dioska
kawsayninchiwa payta kushichihush-
kanchimanta rimanka ali kan nishpa.

⁶Yaya Dios ñawpa killkachishkanpi
tukuy rumikunata sinchikuchik
rumimanta rimashpan ña
Jesukristumanta yachachirka
imashnami ñukanchirayku kananta.
Kasna nin:

Rikuychi Jerusalén llaktaynipi
wasinita rurashpayni puntiru
churasha shuk rumita,
maykanmi tukuy wasinita
sinchikuchik kanka. Chayka
akllarishka suma ali rumimi
kan. Maykankunachari paypi
sinchikunahun, chaykunaka
mana chinkarinkakunachu
nishpa.

⁷Jesukristu chay tukuy rumikunata
sinchikuchik rumishina kashpan
kankuna paypi sinchikukkunaryku
payka tukuymanta yapa ali kan. Mana
paypi sinchikukkunaka shuk mana
yachak rumimanta wasita rurakkuna-
shina kanahun, tukuymanta ashwan ali
rumita wichushpankuna mana churash-
kunkunaryku. Chaykunamanta Yaya
Diospa ñawpa killkachishkanpi kasna
riman:

Shuk runa wasinta rumimanta rurashpan tarawak runankuna shuk ali sinchi rumita mana munashpankuna mayanpi churarkakuna mana alichu nishpankuna. Chay rumitaka wasinta rurak amuka akllashpan chay wasinta tukuy rumikunamanta sinchikuchik rumi kananpa churarka nishpa.

⁸Chaymantapas riman:

Chay rumillatata tukushka maykanpimi achka runakunaka takarishpa urmankakuna nishpa.

Chay rumi nishkaka Jesusmi kan. Chay takarishpa urmakkunashina kanahun Jesusta mana munakkuna. Yaya Diospa shiminta mana kasushkankunaryku wiñaypa kastigarinkakuna. Chasna payta mana kasukkuna kastigarinankunata Yaya Dios ñawpamanta pacha ña rimarka.

⁹Ñukanchi Jesuspi sinchikkunaka Yaya Diospa akllashkan ayllun kanchi. Chay tukuy manta suma atun apu Yaya Diospa runankuna kanchi payta kasushpa tukuy runakunata pay kikinta riksichinanchipa, chaymantapas tukuy runakunaryku mañananchipa. Yaya Dios apunchi kashkanrayku tukuy uchanchikunamanta picharishka shuk llaktamantalla runakunashina tukushkanchi. Yaya Dios Amunchi tukushpan payllapa kanchi. Chasna tukushkanchi Yaya Dios ali yachak kananta, ali rurashkankunatas tukuy runakunata rimananchipa. Paymi ñukanchikunata akllashka amsapishina kahushkanchimanta paypa suma punchahllashina kahushkanta riksishpana paywa pakta kawsananchipa. ¹⁰Manara Jesukristuta kirik kashpanchira nima imarayku valik runakuna kapayarkanchi. Kunanka Yaya

Diospa ayllun kanchi. Chaymantapas manara Jesukristuta kirik kashpanchira Yaya Dios ñukanchikunata piñarishka. Kunanka ñukanchikunata yuyashpan llakichin.

**Imashnami Yaya Diosta mana
kasuk runakuna chawpipi
kawsananchi tiyan**

¹¹Munashkayni wawkinikuna paninikuna, shuk allpamanta runakunashina shuk ratulla kay allpapi kawsashpaykichi kankunata rimani manana kankuna kikin munashkaykichita rurashpa kawsanaykichipa. Chay mana ali munanaykichika ali yuyaykichipa kuntranmi kan. Shunkuykichi pi makanakuuhkshina kanahun imashnashi winsinima nishpa. Chasna kashpan mana alikunata ruranayashpaykichipas ama ruraychichu. ¹²Yaya Diosta mana riksik runakuna chawpipi alita rurashpa kawsaychi. Paykuna kankunamanta yanka rimashpankunapas mana alita rurakkuna kanaykichita, alillata rurashpa kawsaychi. Chay alita rurahushkaykichikunata rikushpankunami Yaya Dios paykunata shutipa ali kashkata riksichinan uras payta kushichishpa kankunamanta rimankakuna chay wawaykikunaka kan yanapashkaykirayku alita rurashpa kawsashkakuna nishpa.

¹³⁻¹⁴Chaymanta Amunchi Jesús munashkanrayku tukuy apukunata kasuychi. Allpaykichi pi kamachik tukuy apukunamanta ashwan atun aputa kasunaykichi tiyan, chaymanta tukuy paypa churashkan apukunatas. Kamachishkan kanahun tukuy millaypata rurakkunata kastiganankunapa, tukuy alita rurakkunata kushichinankunapa.

¹⁵Yaya Dioska munan alita rurashpa kawsanaykichipa, chay ali kawsanayki-

chiwa shutipa kashkata mana riksinayak millaypata rimak runakunata pinkachishpa chunllayachinaykichipa.¹⁶ Yaya Dios kankunata kishpichishpan kastigarina kashkaykichimanta, kushilla kawsaychi imashnami kishpichirishka runakunaka kawsanahun. Chasna kashpanpas ama yuyariyichchu Yaya Dios llakichiwashkan-rayku tukuy munashkaynita atipani ruranata nishpa. Ashwan kunanka tukuypi Yaya Diossalata kasushpa kawsaychi.

¹⁷Tukuy runakunamanta kasna yuyarishpa kawsaychi Yaya Diospa rurashkan valik runa masinikuna nishpa. Tukuy kirik masikichikunata yuyashpa kawsaychi. Yaya Diosta alita kasushpa kawsaychi tukuy apukunamanta ashwan atun apumi nishpa. Allpaykichipi kamachik atun aputa ali yuyawa kasuychi atun apumi kan nishpa.

Jesukristushina parisinanchimanta yachachin

¹⁸Kankuna patronyu runakuna apuyu runakunapas, chay kankunata kamachikkunata ali yuyawa kasushpa kawsaychi apuynimi kan nishpa. Shuk kamachik ali shunku kashpan shuk piña kashpanpas chasnalla alita kasushpa kawsaychi. ¹⁹Kankunata yankamanta parisichihushpankuna ali yuyawa awantaychi. Yaya Diosta kasuk kashkaykichirayku chasna alita awantashpaykichi Yaya Diosmi kankunamanta kushikunka. ²⁰Kamachikkunaka mana alita rurashkaykichimanta kankunata kastigashpankunaka alimi kan. Chasnampa kastiganankunata parisihushpaykichi liwita pagahukshinami kankichi. Alillata rurahushpaykichipas kankunata yankamanta parisichihushpankuna ali yuyawa awantashpaykichimi shuti Yaya Dioska kankunamanta kushikunka. ²¹Jesukristuka alikunallata rurashpa kawsashpanpas parisirka kankunarayku.

Yaya Dioska munan Jesukristupa parisishkanmanta yachakushpaykichi kankunapas yankamanta parisihushkaykichita payshina alita awantanaykichi. ²²Jesukristuka nima shuk millaypata rurarkachu, nima shuk llullata rimarkachu. ²³Pinkachishpanku-napas mana rantipashpa aynipayarkachu. Parisichihushpankunapas mana manchachishpa rimarkachu Yaya Dios paykunata rantipananta. Ashwan tukuya Yaya Diospa makinpi sakishka. Payka yacharka Yaya Dios shuk puncha mana alita rurakkunata kastigananta.

²⁴Jesukristu ñukanchipa uchanchikunamanta uchayu tukushpan pay kikinpa uchanmantashina kruspi wañurka. Chasna wañuhushpan ñukanchikunanti Yaya Diospa kastigananta parisirka. Payka wañurka ñukanchi manana uchata rurashpa kawsanchipa, ashwan Yaya Diospa munashkantana rurashpa kawsanchipa. Pay parisishkanraykumi ñukanchikunaka aliyachishka tukushkanchi. ²⁵Ñawpa kankunaka pantashka obehashina kawsapayarkankichi. Kunanka Jesukristuta kasuk tukushkankichina. Paymi kankunata kuyran obebakunata alita kuyrakshina, chaymantapas yanapan ali yuyawa kawsanaykichi.

Warmiyukunata kusayukunata yachachin

3 ¹⁻²Chasnallatata kunan kankunapas kusayu warmikuna, kusaykichita kasushpa kawsaychi. Kusaykichi Yaya Diospa shiminta mana kirishpanpas payta alita kasushpa kawsaychi. Chasnami nima imata rimashpaykichipas Yaya Diosta kasushpa alita rurashpa kawsahushkaykichita kusaykichika rikushpan paypas Yaya Diospa shiminta kirinka. ³⁻⁴Ama suma rikurinaykichita yuyarishpa kawsaychichu. Ama

yuyarishpa kawsaychichu imashnashi chukchaynita ashwan sumakta alichay-nima nishpa. Nima yuyarishpa kawsay-chichu imashnashi yapa chaniyu trahita churarishpa suma yapa chaniyu wallkakunata anillukunata churarishpa ashwan alita rikurinima nishpa. Ashwan yuyarishpa kawsaychi imashnashi ali shunkuwa ali yuyaywa runakunata yuyashpa paykunawa kushilla kawsay-nima nishpa. Chasna kawsahushkayki-chika shutipami valin Yaya Diospa rikushkanpika, chaymantapas nima ima uras tukurinkachu.⁵ Chasnallatata ñawpa Yaya Diosta kasuk warmikunapas ali kashkankunata rikuchirkakuna. Tukuy shunkunmanta pacha Yaya Dios paykunata alita kushichinanta kirishpankuna kusankunata alita kasushpa kawsapayarkakuna.⁶ Yaya rukunchi wañu Abrahampa warmin Sarapas kusanta amuyni kamachiwak nishpa alita kasushpa kawsapayarka. Kankunapas payshinallatata kusayki-chita kasushpa alita rurashpa kawsay-chi. Runakuna kankunata mancha-chishpa mana alikunata rurachinayash-pankuna mana kasuychichu, nima manchaychichu. Chasna alita rurashpa kawsashpaykichimi Sarashina alita rurakkuna kankichi.

⁷Kunan kankuna warmiyu karikuna, warmikichipa yuyarishkankunata munash-kankunata musyashkankunata yuyarishpa asirtashpa paykunawa alita kawsaychi. Warmikichi mana kankuna karikunashina sinchi kanankunata yuyarishpaykichi paykunata yuyashpa kawsaychi. Chaymantapas yuyariychi Yaya Dios warmikichita kankunatashina wiñaypa kawsayta kushkanta kankunawa pakta siluma kawsak rinankunapa. Mana chasna alita warmikichita kawsashpaykichika Yaya Dioska manami uyankachu mañashkayki-chita.

Alita rurashpa kawsahushpanchilla atipanchi parisihushkanchimanta kushikunata

⁸Manara kay killakashkaynita tukuchishpayni kankunata kuti rimani: Shuk yuyayllawa kushilla kawsaychi. Shuk runa masikichi llakiyya kahush-pan paywa pakta llakiriychi. Shuk runa masikichi kushilla kahushpan paywa pakta kushikuychi. Kirik masikichiwa yuyanakushpa kawsaychi yuyashkayki-chi aylluykichiwashina. Chaymantapas llakichinakushpa kawsaychi. Ama shukkunamanta ashwan yachak kanaykichta yuyarishpa kawsaychichu.⁹ Runakuna kankunata millaypata rurashpankunapas ama rantipaychichu. Shukkuna kankunata millaypata rimash-pankunapas ama millaypata rimashpa ayniychichu. Ashwan paykunaryku alikunallata ruraychi. Ali shimikunallata paykunata rimaychi. Yaya Dios kankunata yanapashpa kushichichun nishpa paykunata rimaychi. Yaya Dioska kankunata akllashka alikunallata runakunaryku rurashpa paykunata allillata rimashpa kawsanaykichipa, paypas kankunaryku alikunallata rurananpa.

¹⁰Chasnallatata ñawpamanta pacha killkarishka kan:

Maykankunami kushilla kawsanayana-hun, chaymantapas unayta kawsanayananahun, paykunaka mana millaypata, nima llullata rimashpa kawsanankuna tiyan.

¹¹Chaymantapas tukuy millaypa ruranakunata sakishpa alikunallata rurashpa kawsanankuna tiyan. Tukuy atipashkankunata ruranankuna tiyan runa masinkunawa kushilla kawsanankunapa.

¹² Yaya Dios ali rurak runakunata kuyran, chaymantapas mañash-

kankunata alita uyan. Millay-pata rurak runakunata Yaya Dioska piñarin nishpa.

¹³Kankuna tukuy uras alikunallata rurashpaykichika runakunaka manami kankunata millaypata ruranayankaku-nachu. ¹⁴Chasna alita rurashpa kawsashpaykichi shuk runa kankunata millaypata rurashpan ama llakirinkichi-chu. Yaya Dios kankunata yanapashpan kushillami kankichi. Kankunata manchachinayashpa rimashpankuna ama manchaychichu nima muspariyichi-chu. ¹⁵Ashwan tukuy shunkuykichi-manta pacha Jesukristu alillata rurak shuklla kankunata kamachik kananta yuyarishpaykichi payllata kasuychi. Runakuna kankunata tapushpankuna φ imaraykutaya parisishpaykichipas Yaya Dios kankunata tukuy parisinamanta kishpichinanta kirishpalla kawsankichi? nishpa, kankunaka ali shimikunawa paykunata ayniichi. ¹⁶Ali shunkuwa paykunata valichishpa rimaychi. Alita rurashpa kawsaychi nima imamanta shunkuykichi rimay tukushka kanaykichipa. Chasna kawsashpaykichi shuk runakuna kankunamanta alita Jesukristuta kasushpa kawsahushkayki-chimanta llullashpa millaypata rimashpankuna kikin rimashkankunamanta pinkarinankuna tiyan. ¹⁷Millaypata rurashkaykichimanta parisishpaykichika mana alita rurashkaykichimanta pagahukkunashinami kankichi. Chayrayku Yaya Dios munashpanka parisinaykichiipa, ashwan alimi alita rurashkaykichimanta parisinaykichiipa.

¹⁸Jesukristupas parisirkta alita rurashkanmantalla. Ñukanchi mana alita rurakkuna kashpanchi pay alillata rurak kashpan ñukanchiranti uchanchikunamanta wañushpan parisirkta. Ñawpa Yaya Dios rimarka runakuna tukuy uchankunaryku wiwakunata wañuchi-

nankunapa, rupachishpankuna uchankunamanta llakichirishka kanankunapa. Kunanka Jesukristuka chayta tukuchirka tukuy ñukanchi runakunapa uchanchikunamanta pay kikin shuk kuti wañushkanllawa. Chasna ñukanchiranti wañurka Yaya Diostana riksishpa paywa pakta kawsananchipa. Jesukristu runa kashpan wañurka. Chaymanta wiñaypa kawsak Dios kashpan kawsarimurka.

¹⁹Pay wiñaypa kawsayyu kashpan aychanta sakishkanwasha rirkta wañush-kakuna watarishkashina kahukkunata yachachinanpa. ²⁰Ñawpa Noé kawsash-kan uras chay wañushkakunaka Yaya Diosta mana kasushpachu kawsarka-kuna. Noé atun lanchata rurahushkanpi runa masinkunata rimarka Yaya Diosta kasunankunapa. Yaya Dios mana munashpan chinkarinankunata unayta chaparka payta kasunankunapa. Mana kasunayashpankuna tukuy allpata yakuwana untachirka paykuna yakupi chinkarinankunapa. Noé rurashkan lanchapi pusak runakunalla chay atun untaymanta kishpirkakuna.

²¹Yaya Dios chay pusak runakunata yakumanta kishpichishkanka bawtisari-namanta ñukanchita yachachin. Mana bawtisarinchicha aychanchita mayllananchipa, ashwan bawtisarin-chimi tukuy shunkunchimanta pacha Yaya Diosta tapushpanchi tukuy millaypa yuyayninchita anchuchinanpa alita rurashpana kawsananchipa. Chasna bawtisarishpanchi yachanchi Jesúsi wañushkanmanta kawsarimush-kanrayku ñukanchitapas wiñaypa wañuymanta kishpichinanta. ²²Chay Jesusmi siluma kawsak rishka. Yaya Dios payta tukuymanta aputa rurashka. Chasna kashpan tukuy *angelkunamanta, tukuy supaykunamanta, tukuy apukunamanta, tukuy yachayyu

kahukkunamantapas ashwan atun kamachik tukushka. Yaya Diospa kuskan parti tiyahun paywa pakta kamachinarpa.

**Tukuy rurashkanchikunamanta
Yaya Diosta ayninanchi tiyan**

4 ¹Wawkinikuna paninikuna,
Jesukristu kay allpapi kahushpan
atunta parisirka ñukanchikunaryku.
Chasna kashpan kankunapas ama
manchaychichu payshina parisinayki-
chipa. Chasna parisishpanchimi manana
munashunchinachu millaypata rurashpa
kawsanata. ²Chasna kashpan manana
mana ali munananchikunata rurashpa
kawsashunchichu, ashwan kay allpapi
kawsananchipa pishihushkanpi Yaya
Diospa munashkanta rurashpa
kawsashunchina. ³Unayta millaypata
rurashpa kawsapayarkankichi,
imashnami Yaya Diosta mana kasuk
runakuna kawsanahun chasna. Ña
chaylla kachun. Tukuy millaypa
munashkaykichita rurashpa kawsapa-
yarkankichi. Mana alita kawsak
warmikunawa karikunawa kawsapayar-
kankichi. Yapakta mikushpa, upyashpa,
machashpa kawsapayarkankichi.
Machanaykichipa, tukuy millaypaku-
nata shukwa shukwa ruranaykichipa
tantaripayarkankichi. Mana atipaya
millaypa ruranakunawa diosminchikuna
nishkaykichita kushichinayashpa
kawsapayarkankichi.

⁴Kunanka manana katinkichinachu
millaypata rurashpa Yaya Diosta mana
kasukkunawa pakta. Paykunaka
¿imarakuta manana ñukanchishina
ruranahunchu? nishpa mana asirtash-
pankuna kankunamanta millaypata
rimanahun. ⁵Shuk puncha Yaya Dios
paykunata tapunka ¿imashnata
kawsashkankichi? nishpa. Chay uras
tukuy millaypa kawsashkankunata

rimanankuna tiyan. Yaya Dioska ñami
tukuy runakunata rurashkankunamanta
tapushpa rimana kahun, kawsahukku-
nata, wañushkanmanta kawsachishkan-
kunatapas, pimi kastigay tukunka, pimi
kishpichiy tukunka nishpa. ⁶Tukuy
runakunata rurashkankunamanta
chasnalla tapunanza tukuy runakunama
yachachikkunata kacharka. Chasna
kashpan wañushkakunapas kawsahush-
pankunara paypa suma ali shiminta
runakunata kishpichinanmanta uyarka-
kuna. Yaya Dios munarka kirishpan-
kuna paykunatas wiñaypa kawsayta
kunata paywa pakta kawsanankunapa.
Chasna kirishpankunami tukuy Yaya
Diosta mana kasukkunawa pakta
wañushpankunapas mana tukurikta
Yaya Dioswa kawsanahun.

**Yuyanakushpa Yaya Dios kushkan
yachaywa yanapanakushpa
kawsananchipa yachachin**

⁷Wawkinikuna paninikuna, kay
allpanchika ñami tukurina kahun. Chayta
yuyarishpa alita rurashpa kawsaychi tukuy
shunkuykichimanta pacha Yaya Diosta
mañashpa. ⁸Tukuymanta ashwan alimi
mana sampayashpa alita yuyanakushpa
kawsashpaykichi. Chayrayku chasna
yuyanakushpa kawsaychi. Chasna
kawsashpaykichimi runakuna kankunata
millaypata rurashkankunamanta
llakichishpa kawsankichi. ⁹Shukwa shukwa
pasyanakushpaykichi kushilla mana
rimarishpa wasikichipi kayanakuychi.
¹⁰Yaya Dios ñukanchi runakunata karan
shukta yachayta kushpa chikan chikanta
atipachirka. Chasna kashpan Yaya Diospa
kushkan yachaywa yanapanakushpa
kawsaychi chay atipachishkanka mana
yanka kananpa. ¹¹Yachachihushpaykichi
rimaychi imashnami Yaya Dios rimanaya-
hun chasna. Runakunata yanapahušpayki-
chi yachaynika ursaynika Yaya Diosman-

tami nishpa yanapaychi. Imatapas rurashpaykichi ruraychi, Jesukristu yanapashpan runakunaka Yaya Dios atun ali kananta riksishpa payta kushichinankunapa. Yaya Dioska tukuy uras wiñayapayrayku manchariyipa alimi tukuy manta ashwan yachayyumi kan. Chayrayku tukuy runakuna payta kushichishpa rimanahu-chun yapa ali tukuy manta ashwan yachayyumi kanki nishpa. Chasma kachun.

**Yaya Diosta kasukkuna
parisinankunamanta riman**

¹²Munashkayni wawkinikuna paninikuna, kunan yapa parisihushpaykipicas ama yuyariyichchu imaraykushi chasma parisihuni nishpa. Ñawpamanta pacha ña yachankichi chasma parisinan-chita shutipa Yaya Diosta kasuk kananchita rikuchinanchipa. Chayrayku chasma parisihushpaykichiaka ama manchariyichchu. ¹³Ashwan Jesukristushina parisihushkaykichirayku kushikuychi. Chasma parisihushkaykichi kushikushhpakichika Jesukristu kuti shamushpan suma chuyahlla kahushkanta rikuchishpa yapami kushikunkichi.

¹⁴Jesukristuta kasuhushkaykichirayku runakuna kankunata millaypata rimashpa pinkachinayahushpapkuna Yaya Dios kankunata yanapashpan kushillami kankichi. Chasma parisihushkaykichi kushilla kashpaykichi yachankichi Yaya Diospa suma tukuya atipak Espíritun kankunapi kahushkanta. ¹⁵Parisiushspakichika chay parisina kachun alita rurashkaykichimantalla. Parisihushkaykichiaka mana kachun shuk runata wañuchishkaykichi-manta, nima shuwashkaykichimanta, nima shuk millaypata rurashkaykichimanta kastigay tukushkaykichirayku. Chaymantapas parisihushkaykichiaka mana kachun shuk runakunapa rurashkankunapi satirishkaykichimanta. ¹⁶Jesukristuta kasuk kashkaykichirayku parisishpaki-chika ama

pinkariyichichu, ashwan Yaya Diosta kushichishpa agradesiyichi Jesukristupa runankuna tukushkaykichirayku.

¹⁷Kunan Yaya Dioska ña kallarishka millaypa rurashkankunamanta runaku-nata kastiganata. Puntiru ñukanchi wawankunata kastigahun. Wawankuna kashpanchipas chasma parisihushpanchi imashna atuntashi parisinkakuna Yaya Diospa suma ali shiminta Jesukristu runakunata kishpichinanmanta mana kirikkunaka. ¹⁸Yaya Diospa wawankuna kashpanchipas parisishpara kishpishun-chi. Chasma kashpan imashnashi Yaya Diosta mana kasukkunaka tukunkakuna. ¹⁹Chayrayku Yaya Dios munashkan-shina parisihushpanchi, akuychi alikunallata rurashpa, tukuy shunkun-chimanta pacha Yaya Diospi sinchikushpa kawsashunchi kasna nishpa: Yaya Dios ñukanchita yuyash-pan rurashka. Tukuya atipak kashpan ñukanchita alita kuyran. Shiminta paktachik kashpan ñukanchita kishpichinkami.

**Pedro kirikkunata sinchikuchik
wawkunata, kirik musukunata,
tukuy kirikkunatapas kunan**

5 ¹Ñuka kankunashina kirikkunata sinchikuchik kashpayni kunanka kankuna chaypi kirikkunata sinchikuchik wawlkunata kunashpa rimani. Jesukristu parisishpa wañushkanta rikushkaynita rimak kani. Chaymanta Jesukristu kuti shamushpan suma chuyahlla atun yachayyu kahushkanta rikuchishpa ñuka kankunawa pakta Jesukristushina suma chuyahlla ali yachayyu tukushunchi. Chasma kashpanmi kankunata rimani. ²Tukuy Yaya Diosta kasukkunata kuyraychi alita obehata kuyrakkunashina. Yaya Dios kankunata churashka kirik wawlkunata panikunata kuyranaykichi-pa. Tukuy shunkuykichimanta pacha nima

maykan kankunata kamachishpanpas alita paktachiychi. Chaytami Yaya Dioska munan. Mana paykunata kuyrachichu kullkiti munashpa, ashwan tukuy shunkuykichimanta pacha kuyraychi.

³Paykunarayku ama kaychichu shuk kamachik apushina. Ashwan alita rurashpa kawsanaykichiwa yanapaychi, rikushpan-kuna paykunapas alita rurashpa kawsanan-kunapa. ⁴Chasna paykunata alita kuyrash-paykichi tukuy kuyrakkunamanta alita kuyrak Jesukristu shamushpan kankunata kushichinka. Suma chuyahlla kawsanani yaykuchinka chaypi wiñaypa paywa pakta kawsanaykichiwa.

⁵Chaymanta kankuna musukunata rimani. Kankuna kirikkunata sinchikuchik wawzikunata kasushpa kawsaychi. Tukuy kankuna shukwa shukwa kasunakushpa kawsaychi. Ñawpa Yaya Diospa killkachishkanpi riman:

Yaya Dioska chiknimmi paylla yachak-shina kanayak runataka. Payta runakunatapas yuyakkunataka yuyashpanmi yanapan nishpa.

⁶⁻⁷Chasna kashpan tukuya atipak Yaya Diosta yuyashpa, tukuypi agradesishpa, ali yuyaywa kasuychi. Tukuy imamantapas yuyarishpa musparishpa kahushkay-kichita Yaya Diosta rimashpa makinpi sakiychi. Paymi kankunata yapa yuyashpan yanapanka. Chasna kawsashpaykichi Yaya Dioska pay munashkan uras kankunata kushichishpa atunyachinka.

⁸Tukuy uras sumakta yuyarishpa karan shuk kuyrariychi mana ruranaykichiwa nima rimanaykichiwa mana alikunata. Kuntraykichi supaykunapa apunka kankunata llullachishpa Yaya Diosmanta anchuchinayashpa kawsan, imashnami shuk puma kantashpa yarkaywa mikunata maskahukschina.

⁹Tukuy shunkuykichimanta pacha mana sampayashpa Jesukristupi sinchikushpa

supaykunapa apunta mana kasuychichu. Ña yachankichi mana kankunalla chasna parisihushkaykichiwa. Tukuy allpapimi ñukanchi kirik masikichiku-naka chasnallatata parisihunchi.

¹⁰Shuk ratu parisishkaykichiwa Yaya Dios kankunata ña aliyachishkanta sumakta paktachinka. Paymi kankunata sinchikuchinka mana sakishpa payllata kasushpa kawsanaykichiwa. Chay Yaya Diosmi ñukanchita yuyashpan llakichin. Paymi ñukanchita akllashka kawsanani yaykunanchipa, wiñayparayku Jesukristuwa tantachishpan payshina suma chuyahlla atun yachayyu tukunanchipa.

¹¹Yaya Dios tukuymanta ashwan atun ali yachayyu kashpan paylla tukuya wiñayparayku kamachichun. Chasna kachun.

Pedro saludan kirik masinkunata

¹²Kay alita Jesukristuta kirik wawki Silvanota killkachishpayni kay killkastuta kankunaryku kachani. Kaywa munani kankunata sinchikuchinata chaymantapas yuyachinata Yaya Dios kankunata parisihushkaykichiwa yanapashkanrayku shutipa llakichik kananta riksishkaykichiwa. Chayta yuyarishpa nima imata manchashpa sinchikuchi.

¹³Babilonia llaktapi Jesukristuta kirikkuna kankunata saludanahun. Paykunatapas kankunatashina Yaya Diosmi akllashka paypa wawankuna kanankunapa. Chaymanta wawaynishina kahuk wawki Markuspas kankunata saludan. ¹⁴Shukwa shulkwa yuyanakushpa saludanakuyuchi yuyashka ayllu kichiwashina. Tukuy kankuna *Kristuta kirikkuna shuk yuyayllawa kushilla kawsaychi.

Chayllata killkachishkani.

Wawkikichi turikichi
Pedro

ISHKAYNIN PEDROPA KILLKASHKAN KILLKA

Pedro Jesukristuta kirik
masinkunata saludan

1 ¹Munashkayni wawkinikuna paninikuna, ñuka Simón Pedro Jesukristupa kamachishkan, paypa shiminta yachachinaynipa kachashkan kankunaryku killkami. Ñukanchita Kishpichik Jesukristu rimashkanta tukuy runakunaryku chasnalla paktachik Diosninchi kashpan kankunata chasnalla Espiritunwa yanapashka paypi sinchikunaykicipa, imashnami ñukanchi yachachikkunatapas yanapashka paypi sinchikunanchipa. ²Yaya Dios kankunata yanapachun payta Amunchi Jesukristutapas ashwanta ashwanta alita riksishpa rinaykicipa. Chasna riksishpa rishpaykichi ashwanta ashwanta llakichishpa yanapachun kushilla kawsanaykicipa.

Imashnami Jesukristuta kirikkuna
rikuchishpa kawsanankuna tiyan

³Yaya Dios tukuya atipak yachayninwa ñukanchita yanapashpan payta riksishkan-chi. Chasna payta riksishpanchi tukuya ñukanchita kurka paytana yuyashpa munashkanllata rurashpa kawsananchipa. Ali atun yachayninta suma kahushkanta riksichishpa ñukanchita kayarka paypa wawankuna kananchipa. ⁴Yaya Dios chasna atun yachayyu yapa ali kashpan ñukanchita yapa ali paktachinan shimiku-nata rimarka imashnami pay yanapashpan

tukushunchi. Chasna rimarka ñukanchita aliyachinanmanta yapa suma rimashkanta alita kirishpa kawsashpanchi payshina alillata rurak kananchipa. Chasna kawsanata atipanchimi manana chay millaypa munananchikunata kasuk kashkanchirayku, imashnami Yaya Diosta mana kasukkuna millaypa munanankunata rurashpa tukuy uras ashwanta waklishpa rishpa kawsanahun.

⁵Chasna kashpan mana Jesukristuta kirishpalla kipariyichihu. Ashwan paypi alita sinchikushpa tukuy shunkuykichi-manta pacha alikunallata rurashpa kawsaychi. Chasna alita rurashpa kawsash-paykichi tukuy uras ashwan alita Yaya Diosta riksiyichi, chaymantapas paypa munashkanta. ⁶Chasna Yaya Diosta tukuy uras ashwan alita riksishpaykichi aychayki-chita wakaycharishpa kawsaychi. Chasna aychaykicha wakaycharishpa kawsash-paykichi mana sampayaychichu Jesukristuta kirishpa kawsahushkaykicipi. Chasna mana sampayashpa kirishpaykichi tukuy rurahushkaykicipi Yaya Dios chaypi kahushkanta yuyariyichi. ⁷Chasna tukuy rurahushkaykicipi Yaya Diosta yuyarish-paykichi tukuy Jesukristuta kirik masikichikunata yuyashpa kawsaychi. Chasna tukuy kirik masikichikunata yuyashpaykichi tukuy runa masikichikunatapas yuyashpa kawsaychi.

⁸Tukuy chayta rurashpa, tukuy uras ashwanta yachakushpa kawsashpayki-

chimi Amunchi Jesukristuta riksishkay-kichika manami yankachu kanka.

⁹Maykan runami kirishkanwasha mana tukuy chayta rurashpa ashwanta yachakushpa kawsanchu, payka wiskushinami kan. Manana yuyarina-yanchu Yaya Dios payta uchankunamanta pichashkanta Yaya Diosshina alillata rurak kananpa.

¹⁰Wawkinikuna paninikuna, mana chasna tukunaykichipa tukuy atipash-kaykitchita ruraychi Yaya Dios kankunata shutipa akllashkanta rikuchinaykichipa. Chasna kawsashpaykichimi mana chinkarinkichichu. ¹¹Ashwan Yaya Dios kankunata kushikushpa yaykuchinka ñukanchita Kishpichik Amunchi Jesukristupa ali kamachinan mushu mundu mana tukurikpi.

¹²Kankunaka tukuy chay yachachish-kanchita ñami alita yachankichi. Ñami Yaya Diospa shutipa kashkata rimak shiminta kasushpa kawsahunkichi, imashnami ñawpa kankunata yachachishkakuna. Chasna kashpanpas mana sakinichu kankunata tukuy chayta kutikashka kutikashka yuyachinata.

¹³⁻¹⁴Amunchi Jesukristu rimawashka ñami kuchuyahun wañunaykika nishpa. Kawsahushpaynira kankunata tukuy chay yachachishkanchikunata yuyachinayni tiyan mana puñushkashina kunkaylla kawsanaykichipa. ¹⁵Tukuy chaykunata mana sakishpa kankunata yuyachihuni wañushkayniwasha mana kunkarinaykichipa.

Pedro Jesukristu Dios kananta rikushkanmanta riman

¹⁶Ñuka yachachik masinikunawa pakta kankunata Amunchi Jesukristupa atun yachayninmanta, kuti shamunamantapas rimashpanchi alita yachachishkanchi. Mana yachachish-kanchichu kwintukunamanta

yachakushkanchita, maykankunatami runakuna alita yuyarishpa yuyaynin-manta surkushkakuna. Ashwan ñukanchi kikin ñawinchiwa Amunchi Jesukristuta atun yachayyu suma chuyahlla kashkanta rikushpanchi kankunata paymanta yachachishkanchi.

¹⁷⁻¹⁸Shuk puncha Amunchi Jesukristu ñukanchita pusharka shuk urku awama. Chay urku Yaya Diospa akllashkan karka yachayninta rikuchinanpa. Chay urku awapi paktashpanchi Yaya Dios Jesukristuta atunyachishpan rikuranchi suma chuyahlla tukushkanta. Chaymantapas uyarkanchi tukuymanta ashwan yachayyu Yaya Dios suma punchahlla silumanta kasna rimahush-kanta: Kay Jesuska munashkayni wawaynimi. Paymi ñukata sumakta kushichiwan nishpa.

¹⁹Ñawpa Yaya Diospa yachayninwa yachachikkuna ña Jesukristupa shamunamanta killkarkakuna. Ñukanchi Jesukristuta rikushkanchirayku kunan sumakta yachanchi chay ñawpa killkashkankuna shutipa kananta. Chasna kashpan chay killkarishkakunata alita yachakushpa tukuy shunkuykichimanta pacha kiriichi. Chay killkarishkakunaka ñukanchita ali shutipa kashkata riksishshpankuna shuk lampara amsapi puntanchima rikuchihukshinami kanahun. Chay lampara sintihun pakarinankama, istrilla ruyunchi pakarihushkanpi rikurinankama. Jesús chay istrilla ruyunchi pakarihushkanpi rikurihukshina kashpan pay kuti shamushpan chaypira chay ñawpa killkashkankunata manana munashchinachu. Chay uras Jesús kikin tukuyta ñukanchita asirtachinka.

²⁰⁻²¹Alita yuyariichi, ñawpa Yaya Diospa yachayninwa yachachikkuna mana paykuna kikin yuyayninkunaman-

tachu yachachirkakuna. Ashwan Yaya Diospa Espíritun paykunata yuyachishpan Yaya Diospa rimashkanta rimarkakuna. Chay ñawpa Yaya Diospa yachayninwa yachachikkuna paypa Espíritun yuyachishkanllata killkashpankuna nima pi atipanchu chay killkarishkata pay kikinlla yuyarishpan asirtanata. Yaya Diospa Espiritunmi asirtachinan tiyan. Chayta tukuymanta puntiru asirtaychi.

**Llullachishpa
yachachikkunamanta riman**

2 ¹Ñawpa israel runa masinchi wañuku-napi ña tiyarka llullachishpa yachachikkuna. Chasnallatatami kankunapipas tiyanka chasna yachachikkunaka. Paykunaka kankunata llullachishpa yuyayninkunata yachachinkakuna kankuna manana Jesukristullata kirishpa kawsanaykichipa. Chasna yachachishpankunami kishpichishkan Amunkuna Jesusta manana riksinayakkuna tukunkakuna. Mana ali yachachishkankunamanta kunkaymanta wiñayparayku kastigay tukunkakuna. ²Achka runakuna chay llullachikkunata katishpa paykunashina millaypata rurashpa kawsankakuna. Chay millaypa kawsashkankunata rikushpankuna Yaya Diospa shiminta mana riksik runakunata Yaya Diospa shutipa kashkata riksichik shiminmanta asichishpa rimankakuna mana ali kananta. ³Chay llullachishpa yachachikkuna kullkikichita munashpankunnalla kankunata paykuna kikin yuyayninkunamanta yachachinkakuna. Chasna llullachikkunata Yaya Dios unaymanta pacha ña yuyarishka sinchita kastigananta. Chayrayku manami kishpinkakunachu Yaya Dios atunta kastigananmanta.

⁴Yuyariyichi Yaya Dios ñawpa mana alita rurak *angelkunata rurashkanta.

Paykunatapas mana llakichirkachu uchata rurashpankuna. Ashwan mana alita rurak angelkunata manchaypa wakaychananpiwichurka. Chaypi watarishka kanahun manchaypa amsapi yapa sinchita parisishpalla. Taparishka kiparinkakuna Yaya Diospa atun kastiganan puncha paktarinankama chay uras wiñayparayku kastigay tukunankunapa.

⁵Chaymanta yuyariyichi Yaya Dios Noé kawsashkan uras payta mana kasunayak runakunata rurashkanta. Paykunatapas mana llakichirkachu Noepa yachachishkanta mana kasushpankuna. Ashwan atun yaku untaywa chay millaypata rurak runakunata kastigarka. Tukuy runakunamanta Yaya Dios paypa munashkanta yachachik Noellata kanchis ayllunkunawa pakta wañuymanta kishpichirka.

⁶Chaymantapas yuyariyichi Yaya Dios Sodoma llaktapi Gomorra llaktapi millaypata rurak runakunata kastigashkanta. Paykunatapas mana llakichishpachu llaktankunanti uchpa tukunankama rupachirka. Chasna rurarka yachananchipa chaywascha millaypata rurak runakunata chasnallatata kastigananta. ⁷Chay llaktakunamanta shukllata, alita kawsak Lot^a shutiyuta wañuymanta kishpichirka. Payka llaktanpi kawsak runa masinkuna tukuy chay millaypata rurahushkankunata rikushpan yapa llakiywa parisirka. ⁸Chay ali kawsak runa Lotka paykuna chawpipi kawsashpan tukuy puncha millaypa kawsashkankunata rikushpa millaypa rimashkankunata uyashpa kawsapayarka. Chasna mana awantaypa millaypakuata rikushpan tukuy uras yapa parisipayarka.

⁹Yaya Dios chay ñawpa payta kasukkunata alita yanaparka mana runa masinkunashina millaypata rurashpa

kawsanankunapa. Chasna kashpan yachanchi ñukanchi payta kasukkunata-pas alita yanapananta runa masinchikuna millaypata rurachinayashpangkuna mana rurananchipa. Mana alita rurakkunataka kastigashpa wakaycha-hun atun kastiganan punchakama, chay uras wiñayparayku sinchita kastiga-npana.¹⁰ Tukuymanta ashwan atuntami Yaya Dios chay millaypata rurashpa kawsak mana alita yachachikkunata kastiganka. Paykunaka mana pinkari-nata yachak runakuna kashpangkunami millaypata munashkankunallata rurashpa kawsanahun.

Nima pita kasunayashpangkuna tukuy apukunata chikninahun. Ñukanchi runakunamanta ashwan atun yachayyu wayrapi kawsak kamachikkunata mana manchashpachu asichishpa millaypata rimanahun.¹¹ Angelkuna chay wayrapi kawsak kamachikkunamanta ashwan yachayyu kashpangkunapas mana atipanahunchu paykunata asichishpa pinkachishpa Yaya Diospa puntanpi rimanata millaypata rurashkaykichi-manta kastigay tukunkichi nishpa.

¹²Chay llullachishpa yachachik runakunaka animalkunashina yuyay illami shunku illami kawsanahun. Aychankunapa munashkankunallata rurashpa katinahun. Maykunkunatami mana riksinhahunchu mana yachanahunchu, chaykunamanta mana pinkashpa asichishpa millaypata rimanahun. Imashnami animalkuna kawsanahun tukllapi apirishpangkuna wañuchiy tukunkunapa, chasnallatatami paykunapas wawayarishkakuna animalkunashina yuyay illa kawsahushkanku-napi kunkaymanta kastigay tukushpangkuna wañunankunapa.¹³ Runakunata millaypata rurashpa parisichishkanku-naryku paykunapas parisinankuna tiyan. Paykuna mana pinkashpa

kushikunahun millaypata munashkanku-nata ruranankunapa. Kankuna Yaya Diosta kasukkuna tantaylla mikunayki-chipa tantarishpaykichi paykuna kankunawa kanahun. Awa inti kashpan-pas machashpa, yapakta mikushpa, kankunata llullachishpa, millaypata yuyayninkunata rurachinayashpa chawpikichipi kanahun. Paykunaranti Yaya Diosta mana riksik runakuna kankunamanta asichishpa millaypata rimanahun.

¹⁴Paykunaka karan rikushkankuna warmita musayanata munarishpa kawsanahun. Nima ima uras aminahun-chu millaypata ruranata. Manara yapa alita Jesukristupi sinchikuk runakunata llullachinahun millaypata rurananku-napa. Paykunapa yuyayninkunaka yacharishkakuna imankunata mirachi-nallata yuyarinankunapa. Yaya Dioska chay runakunataka sinchitami kastiganka.¹⁵ Ali ñampimanta anchurishpangkuna pantashkakunashina kawsanahun. Ñawpa kawsak Beorpa wawan *Balaamshina kullkillata munashpa mana alita rurashpa kawsanahun. Balaamka ali ruranamanta ashwan kullkitami valichirka. Yapa kullkiti munak kashpanmi kullkiranti yaya rukunchi wañukunapa kuntranku-nata kasushpa yaya rukunchikunata shinkuranayarka Yaya Dios paykunata kulluchinanpa.¹⁶ Chasna shuk burrupa awanpi riushpan chay wiwanka chay yachachik Balaamta riksichirka mana alita ruranayashkanta. Runashina rimashpan payta arkarka muspa yuyaywashina ruranayashkanta mana rurananpa.

¹⁷Chasna llullachishpa yachachikkuna-ka shuk poso yaku illashinami kanahun. Puyu wayrawa apay tukushkashinami kanahun. Paykunaka sinchita kastigay tukunkakuna.

Wiñayparayku manchaypa amsapi wichuy tukunkakuna.¹⁸ Suma uyaypa shimikunawa llullachishpa rimanahun. Chay shiminkuna alishina kashpankunapas wayra kaspi uchkuyushina kanahun. Paykuna kikin millaypa munanankunata rurashkunkunawa runakunata llullachinahun. Jesukristuta ña kirina kahukkunata, Yaya Diospa kastiganamanta kishpina kahukkunata llullachinahun.¹⁹ Paykunata llullachishpa rimanahun: Yachachishkanchita kasushpaykichimi kamachirishkashina kawsashkaykichimanta kishpichirishka tukunkichi nishpa. Chasna rimashpankunapas uchata ruranata mana sakinata atipashpankuna paykuna kikin kamachirishkashina kawsanahun. Ñukanchika yachanchi maykanchari winsin, chaymi kamachin. Chayrayku millaypa yuyayninchali ali yuyayninchita winsik tukushpan chay millaypa yuyayninchipa munashkanta rurashpa kawsananchi tiyan.

²⁰Chay llullachishpa yachachikkuna ñukanchita Kishpichik Amunchi Jesukristuta riksishpankuna millaypata rurashpa kawsashkankunamanta shuk ratu ña kishpichirishka kashkakuna. Chaymanta manana Jesukristuta kasunayashpankuna kuti munarkakuna chay millaypakanllatata rurashpa kawsanata. Chasna kashpan ñawpa mana alita rurashpa kawsashkankunamanta ashwan millaypata rurashpa kawsak tukushkakuna.²¹ Chay runakunaka alita rurashpa kawsanata alita riksishkakuna. Chasna kashpanpas Yaya Dios paykunata riksichishkan ali kamachishkankunata manana kasunaynahunnachu. Paykunaraykuka ashwan ali kama karka nima ima uras Yaya Diospa munashkanta rurashpa ali kawsanata riksinankunapa.

²²Kutikashka ñawpa kawsashkankuna-

shina millaypata rurashpa kawsashpankuna kay rimanakunaka paykunapi paktarishkakuna: Allkuka kiwnashkanta kuti mikun. Kuchika sumakta mayllarishka kashpanpas kutikashka kutin turupi armananpa.

Jesukristupa kuti shamunanmanta riman

3 ¹Munashkayni wawkinikuna paninikuna, kay ishkaynин kartata kankunaryaku killkani. Kay ishkanti killkashkayniwa kankunata kutikashka yuyachini alita yuyarishpa kawsanaykipcha. ²Alita yuyariychi ñawpa Yaya Diospa yachayninha yachachikkunapa shuk puncha paktarinan kashkata rimashkunkunata. Chaymantapas yuyariychi ñukanchi Jesukristupa kachashkan yachachikkunapa rimashkanchikunata, ñukanchita Kishpichik Amunchi Jesukristupa kamachishkashina kankunata yachachishpanchi.

³Tukuy chay yachachishkanchikunamanta kayta alita yuyariychi: Kay allpa tukuriushkan punchakunapi tiyanka kankunamanta asichishpa rimakkuna. Paykunaka paykuna kikinpa millaypa munanankunata rurashpa kawsankunkuna. ⁴Kankunata asichishpa rimakkuna: Jesukristu kuti shamusha nishpa rimashpanpas yankami shamunanta chapahunkichi. Rimashkanta manami paktachinkachu. Imashi chay tukuy unaymantaka shamunka. Yaya rukunchikuna ña wañurkakuna chasna paktachinanta chapashpa. Kunankama tukuy chasnalla kan. Yaya Dios kay allpata rurashkanmanta pachami nima ima chikanyashkachu nishpa.

⁵⁻⁶Chasna rimakkunaka yapa pantachinahun. Mana kirinayashpankuna mana asirtanahunchu ñawpa shuk silu shuk allpa tiyashkanta, maykantami Yaya Dioska chinkachirka runakuna

mana payta kasushkankunayku. Chay ñawpa siluta allpata rimashkanllawa rurarka. Allpata yakumanta llukshichishpan rurarka. Chaymanta chay allpa rurashkantaka tukuy payta mana kasukkunawa pakta yakuwallata untachishpan chinkachirka.

⁷Chasnallatatumi kay siluta kay allpata Yaya Dios akllashkan punchakamalla wakaychahun. Yaya Dios rimashkanraykulla kiparinahun, payta mana kasuk runakunata kastiganan puncha paktashpan paykunawa pakta tukuya ninawa rupachinarpa.

⁸Munashkayni wawkinikuna paninikuna, alita yuyariyichi. Ñukanchi yuyarinchi shuk waranka wataka achka wata kananta. Yaya Dioska mana chasnachu yuyarin. Payraykuka shuk punchaka kanmi shuk waranka watashina, shuk waranka wataka kanmi shuk punchashina. ⁹Chasna kashpan shukkuna rimashpankuna Yaya Dios yapa unayan Jesukristu kuti shamunanmanta rimashkanta paktachinanpa nishpa, manami alita yuyarinahunchu. Ashwan Yaya Dios kankunata yapa yuyashpan chapahunrami tukuy kankuna uchata rurashpa kawsashkaykichita sakishpa paytana kasushpa kawsanaykichipa. Mana munanchu nima shuk kankunamantha chinkarinarpa. Chayrayku Jesukristu kuti shamunanmanta rimashkanta manara paktachihunrachu.

¹⁰Amunchi Jesukristu kuti shamushpan kunkaymanta paktanka imashnami shuwaka paktan tutapi nima pi yuyarihushkanpi. Chay uras siluka manchaypa rayushina uyarikta ninawa rupanka. Inti, killa, istrillakunapas ninawa chullurinkakuna. Chasnallatatumi allpaka tukuy kay allpapi tiyashkunkunawa pakta rupankakuna.

¹¹Chasna kay tukuy tiyashkunkunaka manchaypata tukurinanta yachashpaykichi tukuy mana ali ruranakunata

sakishpa, tukuy shunkuykichimanta pacha Yaya Diosta kasushpa kawsanaykichi tiyan. ¹²⁻¹³Chasna alita rurashpa tukuy shunkuykichimanta munashpa Jesukristupa kutimumanta chapaychi. Tukuy atipashkaykichita ruraychi utkalla paktananpa. Yachanchi Jesús shamuhushpan kay silu rupashpanra tukuy chaypi tiyashkakuna ninawa chullurishpankuna Yaya Dios rimashkanshina mushu siluta mushu allpata rurananta. Chaypi tukuy alillata rurashpa kawsashunchi, mana tiyankachu mana alita rurakkunaka. Chay mushu silutami allpatami chapanchi.

**Jesukristu kuti shamunanta
chapashpa alita rurashpa
kawsanamanta riman**

¹⁴Munashkayni wawkinikuna paninikuna, chay mushu siluta mushu allpata chapahushkaykichirayku atipashkaykichita ruraychi Yaya Dios kankunata suma alicharishka ucha illata tarinarpa, chaymantapas tukuy runakunawa kushilla kahushkaykichita. ¹⁵Alita yuyariyichi, Amunchi Jesukristu kankunata llakichishkanraykulla manara shamunrachu. Yapa munan tukuy kankuna kishpichirishka kanaykichita. Chasnallatata munashkanchi wawkinchi Pablopas Yaya Dios payta yachayta kushpan kankunaryku killkashka. ¹⁶Karan killkashkanpi kankunata Jesukristu kuti shamunanmanta yachachishka. Shuk parti killkashkunkapi mana shuk ratu asirtaypata killkashpanmi mana

yachakunayak runakuna, manara alita Jesukristuta kirishpa kawsak runakunapas yuyayminkunamanta munashkunkunatashina chikanyachinahun. Chasnallatatumi Yaya Diospa shuk killkachishkunkunatas chikanyachinahun. Chasna mana alita rurashpankuna

paykuna kikin wiñaypa kastigarinanku-nata maskanahun.

¹⁷Munashkayni wawkinikuna paninikuna, ña yachashkaykichirayku llullachishpa yachachikkuna tiyananta, kuyrariychi mana llullachiy tukunayki-chipa. Chay yachachikkuna yuyayninku-napi pantachirishka kanahun, nima imata kasukkuna, mana alita rurakkuna. Ama paykunashina kawsaychichu mana tukunaykichipa Jesukristuta kirishkay-kichimanta shuk ratu chikanta yuyarik-

kuna. ¹⁸Ashwan ñukanchita Kishpichik Amunchi Jesukristuta tukuy uras ashwan alita riksishpa kawsaychi, chaymantapas kankunata llakichishpa yuyashkanta. Payllata yuyashpa kushichiychi, kunan tukuy uraspas wiñayparayku. Chasna kachun.

Chayllata killkashkani.

Wawkikichi turikichi
Pedro

PUNTIRU JUANPA KUNASHPA KILLKASHKAN

Yaya Diospa yuyayninta riksichik
wiñaypa kawsayta kuk
Jesukristumanta riman

1 ¹Munashkayni wawkinikuna paninikuna, ñuka Juan kankunaryaku Jesukristumanta killkani. Manara nima ima tiyashpanra payka ña tiyarka. Ñukanchi paywa pakta purikkuna shiminta uyashkanchi, paytaka kikin ñawinchiwami rikushkanchi, chaymantapas ñukanchi kikin makinchiwa aychanta llankashkanchi. Payka Yayan Diospa yuyayninta riksichikmi kan. Ñukanchi runakunata wiñaypa Yaya Dioswa kawsayta kukmi kan. ²Payta rikushpanchi alita kawsahushkanta riksishkanchi, imashnami Yaya Diosmanta kawsayka nishpa. Payka puntiru Yayan Dioswami karka, chaymanta kay allpama shamurka ñukanchi payta rikunanchipa. Chay rikushkanchi wiñaypa Yayan Dioswa kawsayta kuksantami kankunata rimahunchi.

³Rikushkanchitami uyashkanchitami kankunata rimahunchi, kankunapas alita kirishpaykichi ñukanchiwa pakta shuk yuyayllawa kawsanaykichipa. Chasna kankunapas ñukanchiwa pakta Yaya Dioswa Wawan Jesukristuwapas shuk yuyayllawa kawsashunchi. ⁴Kaytami kankunaryaku killkahuni ali kirikkuna tukushpaykichi kushikushpalla kawsananchipa.

Yaya Dios punchashina
kananmanta riman

⁵Kankunaryaku killkahuni Jesukristu ñukanchita rimashkanta kasna: Yaya Dioska punchashinami alillata rurakan. Paypika manami tiyanchu nima shuk millaypa yuyayka nishpa. ⁶Ñukanchi amsapishina millaypata rurashpa kawsahushpanchitata rimashpanchika Yaya Dioswa shuk yuyayllawami kanchi nishpa, rimananchikunawa tukuy rurananchikunawapas llullaysikunami kanchi. ⁷Yaya Dios punchapishina alillata rurashpa kawsan. Ñukanchi payshina punchapishina alillata rurashpa kawsashpanchika shuk yuyayllawa shukwa shukwa yuyanakushpa kawsanchi. Chaymantapas chasna kawsashpanchi Yaya Dioska ñukanchita uchayu kashkanchimanta llakichishpan pichan, Wawan Jesukristu wañushpan yawarnin ñukanchiranti shuturishkanrayku.

⁸Rimashpanchika mana uchayuchu kani nishpa ñukanchi kikin llullachirinch, manami alitachu yuyarishpa rimanchi. ⁹Uchata rurashkanchikunata amirishpa, nima imata nima pita uchachishpa Yaya Diosta kuskata rimashpanchika yachanchi payka uchanchikunamanta llakichinanta. Rimashkanta paktachik kashpanmi ñukanchita uchanchikunamanta llakichin, chaymantapas tukuy ñukanchipi mana ali

kashkata pichan.¹⁰ Yaya Dios riman tukuy ñukanchi runakuna uchayu kananchita. Ñukanchi rimashpanchika mana uchata rurashkanichu nishpa Yaya Dios llullaysiki kananta rimahukshina kanchi, chaymantapas paypa shimintaka manami shunkun-chipi wakaychashkanchichu.

**Jesukristu runakunarayku Yaya
Dioswa alichak kananmanta riman**

2 ¹Munashkayni wawaynikunashina kashpaykichimi kayta kankunarayku killkahuni mana uchata ruranaykicipa. Kunkaymanta mana yuyarihushkaykicipa uchata rurashpaykichika ama llakirishpa kipariyichichu. Ñukanchirayku tiyan uchanchikunamanta Yaya Dioswa alichak, paymi kan allilita rurak Jesukristu. ²Ñukanchi uchanchiwa Yaya Diosta piñachishpanchi Jesukristu ñukanchita piñayninmanta arkašpan wañurka. Chasna uchanchikunaryku tukuy runakunapa uchankunarykupas wañushpan Yaya Dioska ñukanchi runakunata uchanchikunamanta llakichin.

³Yaya Diospa kamachishkunkunata kasushpa kawsahushpanchi yachanchi payta alita riksik kananchita. ⁴Kamachish-kunkunata mana kasushpanchitata Yaya Diosta riksini nishpa rimashpanchika llullaysikunami kanchi, mana shutipa kashkatachu yuyarinchi. ⁵Yaya Diospa rimashkanta kasushpa kawsashpanchimi payta sumakta yuyakkuna kanchi. Chasna kashpanchimi yachanchi paywa shuk yuyallawa kananchita. ⁶Yaya Diospa wawanmi kani nishpa rimashpanchika kawsananchi tiyan imashnami Jesukristuka kawsarka chasna.

**Shuk mushu
kamachinamanta riman**

⁷Munashkayni wawkinikuna paninikuna, Jesukristu ñukanchita kamachirka yuyanakushpa kawsanan-

chipa. Chay kamachinanmanta kankunarayku kuti killkani. Puntiru Yaya Diospa shiminta uyashkaykichi-manta pacha chay kamachinata ña riksinkichi. Manami kanchu mushu kankunarayku. ⁸Chaymantapas kankunarayku killkahushkayni kamachinaka ñawpamanta pacha uyashkaykichika mushullatatami kan, Jesukristu ñukanchita chayta mushumanta yachachishkanrayku. Pay chay kamachinata kasushpa kawsash-kanta ali kashkata rikushpankuna runakunaka chay kamachina ali kananta yachanahun. Chaymantapas kankuna kasushpa kawsahushkaykichita ali kananta rikushpankuna chay kamachina ali kananta yachanahun. Chay amsashina kahuk supaykunapa apunka tukuy parti ñami winsirishka tukuhun. Chay shutipa punchashina kahuk Jesukristuka payta winsihushkan-raykumi ña sumakta punchayachihun.

⁹Punchapishinami alita rurashpa kawsani nishpa rimashpanchitata shuk kirik masinchita chiknishpanchika amsapishinarami kawsahunchi. ¹⁰Kirik masinchikunata yuyashpa kawsashpanchimi shutipa punchapishina kawsanchi, chaymantapas shunkunchikunapi mana tiyanchu millaypa yuyarinaka uchata rurananchipa. ¹¹Kirik masinchikunata chiknishpanchika amsapi muyuhukkunashinami kawsanchi. Chasna supaypa llullachishkan kashpanchimi kamachish-kanta rurashpa kawsanchi. Chasna kashpanchimi manana yachanchichu, imashnami chasna kawsahushkanchi-manta tukushunchi.

¹²Wawaynikunashina kashpaykichimi kayta kankunarayku killkahuni uchayki-chikunamanta llakichirishka kashkayki-chita yuyarinaykicipa. Yaya Dioska pay kikin munaymi tukuya rurarka chasna llakichirishka tukunaykicipa.

¹³Kankuna rukukunarayku killkahuni *Kristuta riksishkaykichita yuyarinaykipicha, maykanmi ña tiyarka manarapas nima ima tiyashpanra. Kankuna musukunarayku killkahuni uchata rurachinata munak supaykunapa apunta winsishkaykichita yuyarinaykipicha.

¹⁴Wawaynikunashina kashpaykichimi kankunarayku killkahuni Yaya Diosta riksishkaykichita yuyarinaykipicha. Kankuna rukukunarayku killkashkani Kristuta riksishkaykichita yuyarinaykipicha maykanmi ña tiyarka manarapas nima ima tiyashpanra. Kankuna musukunarayku killkashkani ali sinchi kanaykichita yuyarinaykipicha. Chaymanta killkashkani Yaya Diospa shiminta tukuy shunkuykichimanta pacha kasuhushkaykichita yuyarinaykipicha, chaymantapas uchata rurachinata munak supaykunapa apunta winsishkaykichita yuyarinaykipicha.

¹⁵Ama munaychichu Yaya Diosta mana kasukkunapa kawsahushkankunashina kawsanata. Chaymantapas ama paykunashina munarishpa kawsaychichu. Maykan runami Yaya Diosta mana kasuk runakunashina kawsanata munan, manami Yaya Diosta yuyanchu. ¹⁶Yaya Diosta mana kasuk runaka munanmi pay kikinpa munashkanllata rurashpa kawsanata. Tukuy rikuskanta munarishpami kawsan, chaymantapas iman tiyastushkanwa pay kikinta atunyachishpa kawsan. Chasna yuyarinakunaka manami kanahunchu Yaya Diosmanta, ashwan paypa kuntranmantami kanahun. ¹⁷Kay allpaka tukuy paypi tiyakkunawa pakta chinkarinkakuna. Ñukanchi imakunata munashpa kawsashpanchi nima imayu tukushunchi. Tukuy Yaya Diosta mana kasuk runakunaka tukuy mana ali munanankunawa pakta chinkarishpami kawsahunkuna. Ñukanchi Yaya Diosta

kasuk runakunaka wiñaypami kawsashunchi.

Jesukristuta chiknik runakunamanta riman

¹⁸Wawaynikunashina kashpaykichimi kankunata rimani. Allpanchika ñami tukurina kan. Ña uyashkankichi Jesukristuta yapa chiknik runa paktananmanta. Kunanka ña rikuhunchi Jesukristuta achka chiknkkuna paktashkankunata. Chasna kashpanmi allpa tukurinanka kuchupi kahushkanta yachanchi. ¹⁹Chay Jesukristuta chiknkkuna puntiru ñukanchiwa tantarishpankuna kirik masinchikunami nishpa yuyarirkanchi. Chaymanta anchurirkakunana. Puntirumanta pachami Yaya Diosta mana shutipa kasukkunachu kashkakuna. Shutipa payta kasuk kanahuma karka ñukanchiwa paktami kiparinahuma karka. Ñukanchimanta anchurishpankuna Yaya Dioska ñukanchita riksichirka paykuna mana kanankunata ñukanchi payta kasukkunamanta.

²⁰Kankunataka Jesukristu Espiritunta kushka. Chasna kashpanmi yachankichi imami shutipa imami mana shutipachu.

²¹Mana kunganrachu killkahuni kankunata shutipa kashkata yachachinaynipa. Ña shutipa kashkata yachashpaykichimi kankunarayku killkahuni. Chasna kashpan yachankichi shutipa kashkata rimanamanta llullaka mana llukshinanta.

²²Chasna llullamanta kankunata rimashpayni akuychi yuyarishunchi maymantami kan. ¿Pita kan llullata rimak? Tukuy maykunkunami rimanhun Jesùs mana kanchu chapashkanchi Yaya Diospa Kachanan Kishpichik nishpa, paykunami llullata rimakkuna kanahun. Chasna llullata rimakka chay kishpichik *Kristuta yapa chiknik

runami kan. Yaya Diospa Wawan Kristuta Yayan Diostapas manami riksinayanchu. ²³Maykan runami mana riksinayanchu Yaya Diospa Wawanta, paypaka manami Yaya Dioska yayanchu kan. Maykan runami Yaya Diospa Wawanranti runa masinkunapa puntanpi mana pinkashpa shayarin, chasna runapaka Yaya Dioska yayanmi kan.

²⁴Chasna kashpan puntirumanta pacha uyashkaykichita shunkuykichipi wakaychashpaykichi chayta kasushpa kirishpa kawsaychi. Chay puntirumanta pacha uyashkaykichita shunkuykichipi wakaychashpaykichi Yaya Diospa Wawanwa Yayanwapas tukuy uras shuk yuyayllawami kawsankichi. ²⁵Chay paykunawa shuk yuyayllawa kawsanaka chay ali wiñaypa kawsaymi kan, maykantami Yaya Dioska ñukanchita kunanta rimarka. ²⁶Kaykamalla kankunaryku killkashkani kankunata llullachinayak runakunamanta. ²⁷Yaya Dioska ñami kankunata Espiritunta kushka kankunapi kawsanarpa. Chasna kashpanmi manana munankichinachu shuk kankunata yachachinanpa, maykanmi ali, maykanmi mana alichu nishpa. Yaya Diospa Espiritunka kankunata tukuy chaykunata yachachin. Payka shutipa kashkata yachachin, manami llullanchu. Chasna kashpan paypa yachachishkanta kasushpa kawsaychi Jesukristuwa shuk yuyayllawa kawsanaykichipa.

²⁸Wawaynikunashina kashpaykichimi kunkun kankunata rimani Jesukristuwa shuk yuyayllawa kawsanaykichipa, pay shamuhushpan mana manchanaykichipa nima pinkanaykichipa. ²⁹Na yachankichi Jesukristu alillata rurak kananta. Chasna kashpanmi yachankichi tukuy payshina alillata rurak runakunapas Yaya Diospa wawankuna kananchita.

Yaya Diospa wawankunamanta riman

3 ¹Rikuychi maytukuytata Yaya Dioska ñukanchita yuyan. Runa kashpanchipas wawaynikuna kankichi nishpami ñukanchita riman. Yaya Diosta mana kasuk runakunaka chasna paypa wawankuna tukushkanchita mana asirtanahunchu, payta mana riksishkankunaryku. ²Munashkayni wawkinikuna paninikuna, ñami kunanka Yaya Diospa wawankuna kanchi. Manara yachanchirachu imashna sumami tukushunchi silupi. Kayllata yachanchi, Jesukristu shamushpan payshina yapa ali tukunanchita, payta shutipa rikushpanchi imashnami kan. ³Jesukristu ucha illa alillata rurak kan. Chayrayku paywa kananchita chapahushpanchi uchata rurashkanchimanta alicharishpa alita rurashpa kawsahunchina payshina ali kananchipa.

⁴Maykan runami uchata rurashpa kawsan, payka manami kasunchu Yaya Diospa kamachishkanta. Uchaka rimanayanmi Yaya Diospa kamachishkanta mana kasuna. ⁵Alita yachankichi Jesukristu ucha illa kananta. Kay allpama shamurka ñukanchikunata tukuy uchanchikunamanta pichanarpa. ⁶Paywa shuk yuyayllawa kawsashpanchi manami katinchichu uchata rurashpa. Shuk runa uchata rurashpa kawsakka manami payta riksishkachu.

⁷Wawaynikunashina kashpaykichimi kunkun kankunata rimani. Ama kasuchichu kunkunata llullachinayak runata. Jesukristuka alillata rurakmi. Ñukanchipas alillata rurashpa kawsashpanchi Yaya Diospa rikushkanpi Jesukristushina ali kanchi. ⁸Maykan runami uchata rurashpa kawsan, payka supaykunapa apunta kasukmi kan,

supay puntirumanta pacha uchata
ruraysiki kashkanrayku. Yaya Diospa
Wawanka kay allpama shamurka,
supaykunapa apun ñukanchita
kamachik kashkanmanta wkichushpan
tukuy waklichishkanta alichanapá,
manana payta kasushpa kawsananchipa.
⁹Yaya Dios ñukanchita Espiritunta
kushkanrayku paypa wawankuna
kashpanchi manana katinchichu uchata
rurashpa. Pay yuyayinchita mushuya-
chishka manana munananchipa uchata
rurashpa kawsanata. Mananami uchata
rurashpa kawsanchinachu, Yaya Dios
yayanchi kashkanrayku. ¹⁰Shuk runapa
kawsahushkanta rikushpanchi yachan-
chi pimi Yaya Diospa wawan, pimi
supayta kasuk. Maykan runami mana
alita rurakchu, chaymantapas kirikkuna-
ta mana yuyakchu, manami Yaya
Diospa wawanchu kan.

**Shukwa shukwa yuyanakushpa
kawsanamanta riman**

¹¹Kankuna puntirumanta pacha
uyashkankichi kasna nishpa yachachish-
kanchita: Shukwa shukwa yuyana-
kushpa kawsaychi. ¹²Ama kashunchichu
ñawpa kawsak Kaín^a wañushina. Payka
supayta kasuk kashpanmi wawkinta
wañuchirka. Millaypata rurak
kashpanmi alita rurashkanta rikushpan
wawkinta wañuchirka.

¹³Wawkinikuna paninikuna, Yaya
Diosta mana kasuk runakuna kankunata
chiknishpankuna ama manchariyichichu.
Ña yachankichi kankunata chikninan-
kuna tiyan. ¹⁴Ñukanchi kirik masinchikuna-
nata yuyashpanchi yachanchi
wañushkashina Yaya Diosta mana kasuk
kashkanchimanta kawsarimushkashina
tukushkanchita. Maykan runami kirik
masinta mana yuyanchu, payka

wañushkashinami Yaya Diosta mana
kasuk kan. ¹⁵Maykan runami kirik
masinta chiknik kan, payka runata
wañuchikshinami kan. Ña yachankichi
runata wañuchik runapika manami
Yaya Diospa Espiritunka kawsanchu
wiñaypa Yaya Dioswa kawsananpa.

¹⁶Jesukristu ñukanchirayku wañush-
pan yapa ñukanchita yuyashkanta
yachashkanchi. Chasna ñukanchita
rikuchirka imashnami ñukanchipas kirik
masinchikunata yuyananchi tiyan.
Ñukanchipas paykunarayku wañunata
munananchi tiyan. ¹⁷Shuk kirik
masinchipa mikunan llachapan illata
rikunchima. Ñukanchipa tiyama tukuy
munashkanchi. Chasna tiyashpantata
mana yanapanchimaka manami Yaya
Diosta yuyashpa kawsanchichu.

**Yaya Dioswa shuk yuyayllawa
kawsanamanta riman**

¹⁸Wawaynikunashina kashpaykichimi
kankunata rimani, akuychi kirik
masinchikunata ali munaywa
yanapashpa yuyashunchi. Mana yanka
rimashunchichu kirik masinita yuyani
nishpa. ¹⁹Paykunata shutipa yuyashpa
kawsashpanchimi yachanchi Yaya
Diospa shutipa kashkata riksichik
shiminta kasuhushkanchita. Shunkun-
chipi rimay tukushpanchi mana alichu
kanki nishpa, chay yuyahushkanchita
rikuchirka chunllayachinchi. Chasnami
mana manchashpa kushilla Yaya
Dioswa kawsanchi. ²⁰Mana alita
rurashkanchikunamanta shunkunchipi
rimay tukushpanchi yachanchi Yaya
Dios shunkunchimanta ashwan alita
yachak kananta. Paymi tukuyta yachan.

²¹Munashkayni wawkinikuna
paninikuna, tukuy uchanchikunata
alicharishpa kawsashpanchimi Yaya Dios

ñukanchita uchanchikunamanta llakichish-kanta yachanchi. Chasna manana shunkunchipi rimay tukushpanchi mana alita rurashkanchimanta kushillami mana manchashpachu Yaya Diosta mañanchi.
²²Chasna mañashpanchimi Yaya Dios tukuy tapushkanchikunata paktachinka ñukanchi kamachishkankunata paktachishpa munashkanta rurashpa kawsahushkanchirayku.
²³Paypa kamachishkanka kanmi tukuy shunkunchimanta pacha Wawan Jesukristupi sinchikunanchipa, chaymantapas yuyanakushpa shulkwa shulkwa kawsananchipa, imashnami Jesukristu ñukanchita kamachirkia.
²⁴Yaya Diospa kamachishkanunata paktachihushpanchi paywa shuk yuyayllawami kawsanchi, chasnallatatami Yaya Diopas ñukanchiwa shuk yuyayllawa kawsan. Paypa kushkan Espiritunka shunkunchipi kawsahushpan yachanchi Yaya Dioswa shuk yuyayllawa kahushkanchita.

**Imashnami riksinci pimi ali
yachachik pimi llullachishpa
yachachik**

4 ¹Munashkayni wawkinikuna panikuna, ama kiriychichu tukuy runakunapa yachachishkankunata, Yaya Diospa Espiritunmi kayta yuyachiwashka nishpa rimakkunata. Kay allpapi achka tiyan llullachishpa yachachikkuna Yaya Diosmantami rimashkaynika nishpa. Paykunata uyashpa, kawsanankunata rikushpa alita yuyariyi yachanaykichipa shutipachu Yaya Diospa Espiritunka paykunata yuyachihun manachu.
²Maykan runami Jesukristumanta riman, Yaya Dios kashpan runa tukurka ñukanchishina aychayu nishpa, paymi shuti Yaya Diospa Espiritunpa yuyachishkanta rimak kan. Chasna alita yachachishpan yachanchi Yaya Diospa Espiritun paypi kahushkanta.
³Maykan runami Jesukristu runa

tukushkanta mana yachachinchu, payka manami Yaya Diospa Espiritunpa yuyachishkanchu kan. Ashwan supaykunapa apunpa yuyachishkanmi kan, imashnami Jesukristuta yapa chiknik runapas shamushpan paypa yuyachishkan kanka. Chay chiknik runaka shamunan kashkata ña uyashkankichi. Payta yuyachikka ñami Yaya Diosta mana kasuk runakunapa chawpinkunapi kahun.

⁴Wawkinikuna panikuna, Yaya Diospa wawankunami kankichi. Kankunapi kawsak Yaya Diospa Espiritun chay Yaya Diosta mana kasuk runakunata yuyachikmanta ashwan yachayyu kan. Chayrayku chay llullachishpa yachachikkunata mana kasushpaykichi paykunaka mana atipashkakunachu kankunata llullachinata.
⁵Yaya Diosta mana kasuk runakunamanta kashpankunami chay mana kasukkunapa yuyarishkankunata yachashkankunata yachachinahun. Tukuy Yaya Diosta mana kasukkunaka paykunata yachak kanankunata yuyarishpa uyanahun.
⁶Ñukanchi kankunata puntiru yachachikkunaka Yaya Diospa wawankunami kanchi. Tukuy Yaya Diosta riksik runakunami yachachishkanchita uyanahun. Maykan-kunami mana Yaya Diospa wawankuna kanahunchu, paykunaka yachachishkan-chita mana uyanahunchu. Chasna kashpan ñukanchita uyahushpaykichi yachanchi Yaya Diospa shutipa kashkata riksichik Espiritun kankunata yuyachik kananta. Ñukanchita mana uyahushpaykichi yachanchi llullachik supay kankunata yuyachik kananta.

**Yaya Dios yuyak kashkanrayku
shukwa shukwa yuyanakushpa
kawsananchi tiyan**

⁷Munashkayni wawkinikuna panikuna, yuyanakunaka Yaya

Diosmanta kashpan akuychi shukwa shukwa yuyanakushpa kawsashunchi. Chasna yuyanakushpa kawsashpanchimi Yaya Diospa wawankuna kanchi, chaymantapas payta shutipa riksinchita rikuchinch. ⁸Yaya Dios yuyak kashkanrayku runa masinta mana yuyak runaka manami Yaya Diosta riksinchu. ⁹Yaya Dios shuklla Wawan payshina Yaya Diosllatata kay allpama kacharka, pay wañushpan ñukanchita kishpichinanpa wiñaypa paywa pakte kawsananchipa. Chasnami ñukanchita yapa yuyahushkanta riksichirka. ¹⁰Chaymantapas yapa ñukanchita yuyahushkanta yachanchi payta manara yuyashpanchi payra ñukanchita yuyashkanrayku. Uchanchikunawa payta piñachishpanchi Wawanta kacharka ñukanchita piñayninmanta arkašpa wañunarpa ñukanchita uchanchikunamanta llakichinanpa.

¹¹Munashkayni wawkinikuna paninikuna, Yaya Dios ñukanchita chasna yapa yuyashpan ñukanchipas shukwa shukwa yuyanakushpa kawsananchi tiyan. ¹²Ñukanchi runakunamanta nima pi nima ima uras Yaya Diosta rikushkanchichu. Chasna kashpanpas shukwa shukwa yuyanakushpa kawsashpanchi yachanchi Yaya Dios ñukanchipi kawsahushkanta. Chaymanta chasna yuyanakushpa kawsashpanchi yachanchi Yaya Dios ñukanchita yuyashkanka mana yanka kashkanta, ashwan yanaparkami ñukanchipas yuyanakushpa kawsananchipa.

¹³Yaya Dios Espiritunta ñukanchita kushka. Chasna kashpan yachanchi pay ñukanchipi kawsahushkanta, chaymantapas ñukanchi paywa shuk yuyayllawa kawsahushkanchita. ¹⁴Kay allpapi Yaya Diospa Wawan kawsahushpanra ñukanchi kankunata yachachikkuna payta rikushkanchi. Chasna kashpan yachachihunchi Yayan Dios payta

kachashkanta tukuy runakunata kastigarinanchi kashkanchimanta kishpichik kananpa. ¹⁵Runa masinchikunapa puntankunapi mana pinkashpa rimashpanchika Jesús Yaya Diospa Wawanmi kan nishpa, Yaya Dioswa shuk yuyayllawami kawsanchi, Yaya Diospas Espiritunwa ñukanchipi kawsan.

¹⁶Ñukanchi yachashkanchi kirishkanchi Yaya Dios ñukanchita yuyahushkanta. Payka runakunata yuyakmi kan. Ñukanchipas runa masinchikunata yuyak kashpanchi Yaya Dioswa shuk yuyayllawa kawsanchi, Yaya Diospas Espiritunwa ñukanchipi kawsan.

¹⁷Yaya Diosta runa masinchikunatas yuyashpalla kawsashpanchi Yaya Dios ñukanchikunata rurashkanchikunamanta tapunan puncha nima imata manchananchi tiyanchu, kay allpapi Jesukristushina alita kawsashkanchirayku. ¹⁸Yaya Dios ñukanchita yuyashpan chaymanta ñukanchipas payta yuyashpanchi manana kastigananta manchashpachu kawsashunchi. Yaya Diosta yuyashpa kawsashpanchimi payta yuyanawa shunkunchika untarin. Chasna kashpan tukuy manchay ñukanchimanta anchurinan tiyan. Kastigay tukunanchita manchashpa kawsahushpanchika manara tukuy shunkunchimanta pacha Yaya Diosta yuyahunchirachu.

¹⁹Manara Yaya Diosta yuyashpanchira payka ñukanchita yuyarka. Chayrayku kunan ñukanchipas payta yuyanchi.

²⁰Shuk runa kirikkunata chiknik kashpantata rimashpanka Yaya Diosta yuyanimi nishpa, llullaysikimi kan. Rikuhashkan kirikkunata mana yuyashpanka manami atipanchu yuyanata mana rikushkan Yaya Diostaka. ²¹Yaya Dios ñukanchita kamachirka payta yuyashpanchi kirik masinchikunatas yuyananchipa.

**Mana alita rurachikta
winsinanchimanta riman**

5 ¹Jesús chapashkanchi Yaya Diospa Kachanan Kishpichik kananta kirishpanchi Yaya Diospa wawankunami kanchi. Paypa wawankuna kashpanchi payta yuyashpa kawsanchi. Chasna kashpan tukuy wawankunatapas yuyashpa kawsanchi. ²Payta yuyashpanchimi chaymantapas kamachishkanta paktachishpanchimi yachanchi tukuy wawankunatapas yuyahushkanchita. ³Yaya Diosta yuyashpanchika kamachishkanta kasunchi. Chay kamachishkanka manami kanchu shuk shimi shunkunchita kichkiyachik, ashwan kasuypami kan. ⁴Yaya Diospa wawankuna kashpanchimi chay mana alikunata rurachikta manana kasushpanchimi winsinchi. Tukuy shunkuchimanta pacha Jesukristupi sinchikushpa payllata kasushpanchimi chay mana alikunata rurachikta winsinchi. ⁵Jesús Yaya Diospa shuklla Wawan payshina Yaya Diosllatata kananta kirishpanchimi chay mana alikunata rurachikta winsik runakunami kanchi.

**Jesús Yaya Diospa Wawan kananta
riksichikkunamanta riman**

⁶Chay Yaya Diospa shuklla Wawan payshina Yaya Diosllatata Jesukristu kay allpama shamurka. Kayma shamushpan yakupi bawtisarirka. Chaymanta ñukanchiranti kruspi wañushpan yawarnin shuturirkka. Pay shamushpan mana shamurkachu yakupi bawtisarinanllapa, ashwan kruspi wañushpan yawarnin shuturinanpapas shamurka. Yaya Diospa Espíritun shutipa kashkata riksichik kashpanmi ñukanchita riksichin Jesukristu Yaya Diospa Wawan kananta. ⁷⁻⁸Manami

Yaya Diospa Espiritunllachu ñukanchita Jesús Yaya Diospa Wawan kananta riksichin. Yakupi bawtisarishkanmanta, chaymanta wañushpan yawarnin shuturishkanmantapas Yaya Diospa Wawan kananta yachanchi. Chay kimsantimantami chasnalla Yaya Diospa shuklla Wawan payshina Yaya Diosllatata kananta yachanchi.

⁹Ñukanchi runa masinchikunapa rimashkankunata kirinchi. Chasna kashpanmi Yaya Dios ñukanchita riksichishkanta ashwan kirinchan tiyan, pay runakunamanta ashwan shutipata rimak kashkanrayku. Paymi ñukanchita riksichin Jesús paypa Wawan kananta. Chayrayku akuychi paypa riksichishkanta kirishunchi. ¹⁰Maykan runami Yaya Diospa Wawanpi sinchikun, paymi shunkunpi yachan Yaya Dios Jesusmanta wawaynimi nishpa rimashkanka shutipa kananta. Maykan runami chay Yaya Diospa rimashkanta mana kirinchu, payka Yaya Dios llullanmi nishpa rimahuksinami kan, Wawan Jesusmanta rimashkanta mana kirishkanrayku. ¹¹Yaya Dios Wawan Jesukristuta kachashpan ñukanchita suma wiñaypa paywa kawsayta kurka. Jesukristupi kirishpanchi ñukanchita wiñaypa kawsayta kushpan riksichirka Jesukristu paypa Wawan kananta. ¹²Maykan runapimi Yaya Diospa Wawanka kawsan, paymi wiñaypata Yayan Dioswa kawsanka. Maykan runapimi Yaya Diospa Wawanka mana kawsanchu, payka manami Yayan Dioswa kawsahunchu, chaymantapas manami siluma Yayan Dioswa kawsak rinkachu.

**Shuk kunanakuna Yaya Diospa
wawankunarayku**

¹³Yaya Diospa Wawanpi sinchikun, paymi shuk kunanakuna Yaya Diospa wawankunarayku

kayta killkahuni wiñaypa Yaya Dioswa kawsanaykichita yachanaykichipa.

¹⁴Yaya Diosta munashkantashina tapushpanchika payka tukuy tapushkan-chitami uyanka. Chayta yakashpanchi kushikushpa paypi sinchikunchi.

¹⁵Tukuy payta tapushkanchita uyananta yakashpanchi chasnallatatami yachan-chi chay tapushkanchita ña paktachish-kanta.

¹⁶Shuk kunkunamanta kirik masikichi uchata rurahuskanta rikushpaykichi chay uchata rurashkanrayku mana wiñaypa wañuya parisina kashpan payrayku Yaya Diosta mañaychi. Chasna mañashpaykichi chay uchata rurashkanka llakichiypa kashpan Yaya Dios payta kishpichinkha wiñaypa wañuya parisina kashkanmanta. Shuk uchakuna tiyan mana llakichiypachu, chaykunata rurashpanchimi wiñaypa wañuya parisinanchi tiyan. Chasna uchakunata rurakkunaraykuka mana mañaychihu. ¹⁷Tukuy mana ali ruranakunami kan ucha. Chasna kashpanpas manami karan uchata rurashkanchikunamantachu wiñaypa wañuya parisishunchi.

¹⁸Yachanchi Yaya Diospa wawankuna kashpanchi manana uchata rurashpa katihushkanchita. Yaya Diospa Wawan ñukanchita kuyrahushpanmi supayka ñukanchita manana atipanchu nima imata ruranata. ¹⁹Yachanchi Yaya Diospa wawankuna kananchita, chaymanta yachanchi tukuy Yaya Diosta mana kasuk runakuna supayku-napa apunpa kamachishkankuna kanankunata.

²⁰Chaymantapas yachanchi Yaya Diospa Wawan kay allpama shamush-kanta. Paymi ñukanchita riksichirka shuklla shutipa Yaya Diosta. Jesukristuta riksishkanchirayku shuklla shutipa Yaya Dioswa shuk yuyayllawa kawsanchi. Yaya Diospa Wawan Jesukristuka shutipa Yaya Diosmi kan, ñukanchi runakunata wiñaypa kawsayta kuk. ²¹Wawkinikuna paninikuna, ama kasuychichu yanka dioskunata.

Chayllata killkashkani.

Wawkikichi turikichi
Juan

ISHKAYNIN JUANPA KUNASHPA KILLKASHKAN

**Shutipa kashkata
riksishpa yuyanakushpa
kawsanamanta riman**

¹Munashkayni wawkinikuna paninikuna, ñuka ruku yachachik kayta killkahuni kankuna shuk llaktapi tantarik Yaya Diospa akllashkan runakunaryku. Yapa yuyashkayni runakunami kankichi. Mana ñukallachu kankunata yuyani, tukuy ñukanchiwa pakta shutipa kashkata riksichik Yaya Diospa shiminta kasukkunapas kankunata yuyanahunmi. ²Yaya Diospa shutipa kashkata riksichik shimin ñukanchita yuyachihushkanraykumi kankunata yuyanchi. Chay shutipa kashkata rimashkanka wiñayparayku shunkunchipi wakaycharishkami kan.

³Chay shutipa kashkata riksichik Yaya Diospa shiminta kirishpa, shukwa shukwa yuyanakushpa kawsashpanchi Yaya Dios paypa Wawan Jesukristupas ñukanchita alita yanapanka. Ñukanchita yuyashpa tukuya turanka kispichinanpa. Uchanchikunamanta llakichinka, chaymantapas ñukanchita yanapanka runa masinchikunawa kushilla kawsananchipa.

⁴Yaya Dios ñukanchita kamachirka paypa shiminta alita kasunanchipa. Chayrayku shukkuna kankunamanta shutipa kashkata riksichik shiminta kasukkunata tarishpayni yapa kushikushkani. ⁵Kunan wawkinikuna paninikuna, tukuy kankunata rimani

shukwa shukwa yuyanakushpa kawsanaykichipa. Chay kamachinaka mana kanchu mushu, ashwan Jesukristuta kirishkaykichimanta pacha ñia uyashkankichi. ⁶Yaya Diospa kamachishkanta paktachishpa kawsahushpanchi shutipa yuyanakushpa kawsanchi. Kirik tukushkaykichimanta pacha chay kamachishkanta uyashkankichi kasunaykichipa.

**Llullachishpa
yachachikkunamanta riman**

⁷Kay allpapi tiyan achka llullachishpa yachachikkuna. Paykuna Jesukristumanta llullachishpa yachachinahun mana shutipa runa tukushkanta. Chasna rimakkunaka ashwan tukuymanta llullachikkunami kanahun, chaymantapas Jesukristuta yapa chiknikkunami kanahun. ⁸Alita kuyrarishpa kawsaychi chay llullachishpa yachachikkuna mana kankunata llullachinankunapa. Kankunata llullachishpankunaka tukuy ali rurashkaykichi yankami kanka. Chayta yuyarishpaykichi kuyrarishpa kawsaychi Yaya Dios tukuy ali rurashkaykichimanta kankunata kushichinanpa.

⁹*Kristupa yachachishkanmanta anchurishpaykichi Yaya Dioska manami yayaykichichu kan. Kristupa

yachachishkanta katishpaykichika Yaya
Dioska yayaykichimi kan, chaymanta
paypa Wawan Kristu kankunapi kawsan.
¹⁰Shuk runa paktashpan Kristupa mana
yachachishkantashina yachachik, ama
payta wasikichipi yaykuchiychichu,
nima kwintachiychichu. ¹¹Chasna
runawa kwintashpaykichika millaypata
rurahushkanpi paywa ishkayyashkashi-
nami kankichi.

¹²Achka tiyawashpanpas kankuna-
rayku killkanaynipa, mana munanichu

killkashpa rimanata. Ashwan munani
kankunata rikuk rinata ñawipura
kwintashpanchi kushikushpalla
kananchipa. ¹³Kay llaktapi tantarik
wawkikuna panikuna kankunawa pakta
Yaya Diospa akllashkan wawankuna
kankunata saludanahun.

Chayllata killkashkani.

Wawkikichi turikichi
Juan

KIM SAYNIN JUANPA KUNASHPA KILLKASHKAN

Juan Gayota
kushichishkanmanta riman

¹Munashkayni Gayo, ñuka ruku yachachik kayta kanrayku killkahuni. Yapa yuyashkayni runami kanki.

²Munashkayni wawkini, yachani ña alita Yaya Diospi sinchikurihushkaykita. Chasna kashpan payta mañani kanta wakaychashpan tukuypi alita yanapananpa, chaymantapas nima shuk unkuy kanta apinanca. ³Shuk kirik masinchikuna shamushpankuna Yaya Diospa shutipa kashkata riksichik shiminta alita kasuhushkaykita kwintawashkakuna. Chayta yachashpayni achkata kushikushkani. ⁴Wawaynikunashina kahuk runakuna shutipa kashkata kasushpa kawsahushpankuna atunta kushikuni. Chaymanta pasa kushikunaka ñukarayku mana tiyanchu.

⁵Munashkayni wawkini, tukuy uras shuk llaktakunamanta Jesukristuta kirik masinchikunata alita yanapashpa kawsahunki, paykunata mana riksishpaykipas. ⁶Jesukristuta kirikkuna tantarishkanchipi ñukanchita kwintashkakuna maytukuytami paykunata yuyashpa yanapashkanki. Wawkini, kuti kanpi paktashpankuna Yaya Dios munashkanshina paykunata munahushkankunapi yanapay, katinankunapa alilla maytachari Yaya Diospa shiminta yachachik rihunkuna. ⁷Jesukristumanta

yachachishpa purihushkankunaryku paykunata yanapay. Manami munashkakunachu Yaya Diosta mana kasukkuna paykunapa pishihushkanpi yanapanan-kunata. ⁸Chasna kashpanmi ñukanchi kirikkuna pishihushkata kushpa paykunata yanapananchi tiyan, shutipa kashkata yachachihushkankunapi yanapak kananchipa.

Juan riman Diotrefeska mana alita rurashkanmanta

⁹Kankuna chaypi tantarik Jesukristuta kirikkunaryku killkashpayni Diotrefeska paylla kamachik kanayash-kanrayku killkashkaynita mana kasushkachu. ¹⁰Chasna kashpan kankunama rishpayni tantarishkayki-chipi tukuy paypa rurashkanta rimasha, yanka millaypa shimikunata ñukanchimanta rimashpa purihushkanta. Payka manami rimashkanllawachu kiparishka, ashwan shuk partimanta kirikkuna paktashpankuna wasinpi mana yaykuchinayanchu. Shuk kankuna Jesukristuta kirikkunamanta paykunata yaykuchinayashpaykichi payka mana munashpan kankunata tantarinaykichi-manta wichun.

¹¹Munashkayni wawkini, ama ruraychu runakuna mana alita rurashkankunata-shina. Ashwan runakuna alita rurashkankunatashina ruray. Maykan runami alita rurak kan, payka Yaya Diospa wawanmi.

Maykan runami mana alita rurakchu kan,
payka manami Yaya Diostaka riksinchu.
¹²Wawkinchi Demetriomanta tukuy
runakuna alita rurak kananta rimanhun.
Chaymantapas Yaya Diospa shutipa
kashkata riksichik shimin paymanta ali
kananta rimahukshina kan chay shimita
kasuhushkanwa rikuchishkanrayku.
Ñukanchipas alita rurak kananta rimanchi.
Kanka yachanki shutipa kashkata
rimahushkanchita.

**Juan saludashpa
killkashkanta tukuchin**

¹³Ñukapa achka tiyawashpanpas
kanrayku killkanaynipa, mana

munanichu killkashpa rimanata.
¹⁴Ashwan munanimi utkalla kanta
rikuk rinata ñawipura kwintanan-
chipa. ¹⁵Yaya Dioska kanta yanapachun
kushilla kawsanaykipa. Kaypi
kahuk kanpa munashkayki wawkin-
chikuna paninchikuna kanta saluda-
nhun. Chaymantapas chaypi kahuk
munashkanchi wawkinchikunata
paninchikunata saludapay karan
shukta.

Chayllata killkashkani.

Wawkiki
Juan

JUDASPA KILLKASHKAN

Judas Jesukristuta kirikkunata saludan

¹Munashkayni wawkinikuna paninikuna, ñuka Judas Jesukristupa kamachishkan runa kani, chaymantapas *Santiagopa wawkin. Kankunaka Yaya Diospa kayashkankuna kashpaykichi Jesukristuta kirishpa kawsanaykichipa kankunaryaku killkani. Yayanchi Diospa munashkan Jesukristupa alita kuyrashkan runakuna kankichi. ²Yaya Dioska kankunata tukuy uras ashwanta llakichichun, chaymantapas yanapachun ashwanta ashwanta kushilla yuyanakushpa kawsanaykichipa.

Llullachishpa yachachikkunamanta riman

³Munashkayni wawkinikuna paninikuna, yapakta munashpayni kankunaryaku killkani Yaya Dios ñukata kankunatapas chasnalla kishpichishkamanta. Yaya Dioska ñukanchi paypa runankunaryaku shuk shimillatami kacharka kirinanchipa imashnami kishpishunchi nishpa. Chay shimitami ña kankunata alita yachachishpanchi kirirkankichi. Ashwan shuk shimika mana tiyankachu. Kunanka killkanayni tiyan kankunata alita kunanaynipa chay kirishkaykichi shimillata kirishpalla, mana manchashpa yachachishpalla kawsanaykichipa.

⁴Shuk runakunaka llullachishpami kankunapi yaykushhkakuna. Paykunaka kanahunmi Yaya Diosta chiknik runakuna. Yaya Dios llakichisiki kan nishpa yuyarishpankuna tukuy millaypa munanankunallata rurashpa kawsanahun. Chasna millaypata rurak kashpankunami shuklla ñukanchita Kamachik Amunchi Jesukristumanta manami paytaka riksinichu nihuk runakunashinami kanahun. Chasna runakunamantami Yaya Dioska ñawpamanta pacha ña rimarka paykunata wiñayparayku sinchita kastigananta.

⁵Ña alita yachashpaykichipas kutikashka kankunata yuyachini Yaya Dios ñawpamanta pacha mana alita rurakkunata kastigashkanta. Yaya rukunchi wañukuna Egipto allpapi kawsahushpankuna paykunata sinchita kamachishpa parisichirkakuna. Yaya Dios paykunata llakichishpan chay Egipto allpamanta llukshichirka. Chasna puntiru tukuy paykunata egipo runakunamanta kishpichishpanpas chaymanta tukuy manana payta kirinayakkunata mana ashwan llakichishpachu llamputa kulluchirka. ⁶Ñawpa mana alita rurak *angelkunatapas Yaya Dios kastigarka. Paykunaka manana angelkunashina kawsanayashpankuna Yaya Diospa kushkan kawsanankunamanta llukshirkakuna. Yaya Dios paykunata chasna mana alita rurashkankunamanta

kastigashpan mana ismuk kadenaku-nawa watashpachay manchaypa amsa wakaychananpi wichurka. Chaypi taparishka kiparinkakuna Yaya Diospa atun kastiganan puncha paktarinan-kama chay uras wiñayparayku kastigay tukunankunapa.⁷ Chay ñawpa llaktakuna Sodomapi Gomorrapi, chay llaktakuna muyukta llaktakunapipas mana alita kawsak runakunatapas Yaya Dioska kastigarka. Paykunaka chay Yaya Diospa kastigashkan angelkunashina mana alita kawsakkuna karkakuna. Runakunapuralla tupana-kushpa kawsanahuchun kari warmin-llawa warmi kusanllawa nishpa Yaya Diospa rimashkanta mana kasushpa yapa millaypata kawsarkakuna. Chasna kawsashkankunamantami Yaya Dios paykunata kastigashpan wiñaypata mana wañuk ninapi parisinahun. Chasna Yaya Dios paykunata kastigashpanmi yachanchi tukuy mana alita rurak runakunata chasnallatata sinchita kastigananta.

⁸Chasna Yaya Dios ñawpa kastigashkanta yachashpankunatata chay kankunapi yaykushkakuna llullachik-kuna chay ñawpa millaypata kawsak runakunashinami kawsanahun. Chasna kawsashpankunami paykuna kikin aychankunata wikiwa mapayachihuk-shina kanahun. Paykuna kikin yuyayninkunamantami muskuyninkunamantami yachachinahun. Nima pita kasunata munashpankuna tukuy apukunata chikninahun. Mana pinkarinata yachak runakuna kashpankunami atun yachayyu wayrapi kawsak kamachikkunamantapas asichishpa millaypata rimahanun.⁹ Nima angelkunata atun kamachik angel Miguel atiparkachu supaykunapa aputa

asichishpa pinkachishpa rimanata ñawpa paywa Moisés wañupa aychan-manta rimanakushpangkuna pimi apanka nishpa. Supay kashpanpas paytaka manami asichishpa pinkachishpa rimarkachu millaypata rurashkanmanta kastigay tukunanta. Ashwan kasnalla rimarka: Yaya Dios kanta mana alita rurashkaykikunamanta rimachun nishpa.¹⁰ Chay llullachik runakunaka mana riksishkankunamanta mana yachashkankunamanta mana pinkashpa asichishpa millaypata rimahanun. Paykunaka mikushpalla mapakushpalla kawsak yuyay illa shunku illa animalkunashina kawsanallata yachanahun. Chasna kawsashkankunawa paykuna kikinlla waklichirishpa wañunkakuna wiñayparayku kastigay tukunankunapa.

¹¹Ay, imashna kastigushi paykuna-rayku tiyanka. Yaya Diosta kasukkunata llullachishpangkuna manana payta kasushpa kawsanankunapa, chay ñawpa kawsak wawkinta wañuchik Kainshina^a wañuchik kanahun. Chay ñawpa yachachik *Balaam wañushina kullkiranti llullachik tukushpangkuna paykuna kikin llullachirinahun. Chaymantapas chay ñawpa kawsak Yaya Diosta mana kasunayak runa Koreshina^b mana kasunayashpangkuna paykuna kikin wañuya maskanahun.

¹²Chay llullachik runakunaka mana pinkashpachu kankunawa kanahun yuyanakushpa tantaylla mikuhushkaykipichi. Paykunaranti Yaya Diosta mana riksik runakuna kankunamanta asichishpa millaypata rimahanun. Paykunaka chawpikichipi kushilla mana pinkashpa nima shukkunata yuyarishpa saksakta mikunahun upyanahun. Yachachikkuna kashpangunapas kirikkunata yachachishpa kuyrananku-

napa paykuna kikinllata kuyrak runakuna kanahun. Yaku illa yana puyukunashina llullachikmi kanahun. Wayra apashkashinami pantarkakuna. Shuk kaspi muyu illashina mana valik kanahun, pankankuna wicherishka chakirishkashina, chaymantapas ankun surkurishka wañushkashina. ¹³Sinchi wayrapi atun yaku marpa ulasinkunashina mana samanata yachak kanahun. Imashnami ulaskuna sinchi wayrapi ulasyahushpankuna putskuta wichunahun, chasnashinami chay llullachik runakunaka mana samashpa pinkaypa rurashkankunata rikuchinahun. Llukshinnankunata pantachishka istrillakunashina kanahun ñampita pantachishkata mana yanapak. Chasna kashpankunami Yaya Dios paykunata chay manchaypa amsapi wichunka wiñayparayku chaypi parisinankunapa.

¹⁴⁻¹⁵Yaya Dios chasna runakunata kastigananmanta yaya rukunchi *Enokpas ñawpa kay allpapi kahushpanra ña rimarka. Chay puntiru runa Adanmanta kanchisnin mirayin Enokka kay manara paktarishkata rimarka kasna:

Kuyrariyichi. Amunchika paypa mana yupaypa waranka waranka angelkunawa shamunka tukuy mana alita rurak runakunata kastigananpa. Tukuy payta mana kasuk uchayu runakunataka payta mana kasunayashpa piñachishpa millaypata rurashkankunamanta, tukuy payta chiknishpa mana alita rimashkankunamantapas kastiganka nishpa.

¹⁶Chay mana alita rurak runakunaka tukuymanta rimarishpa kawsanahun. Nima imapi kushikunayanahunchu. Paykuna kikin munanankunallata

kasushpa kawsanahun. Yachak tukushpa ali shimikunawa llullachinahun. Runa masinkunata mishki shimikunawa kushichishpa rimanahun paykunamanta yanka apinankunapa.

Yaya Diosta kasukkunata kunana shimikuna

¹⁷Munashkayni wawkinikuna paninikuna, yuyarinaykichi tiyan Jesukristupa *apostolinkuna manara paktarishpan ña kankunata rimashkankunata. ¹⁸Kasna kankunata rimarkakuna: Kay alpa tukurihushkan punchakunapi tiyanka mana pinkashpa Yaya Diospa rimashkanmanta asichishpa mana alita rimakkuna. Paykunaka Yaya Diosta mana kasushpa paykuna kikinpa millaypata munanankunallata rurashpami kawsankakuna nishpa. ¹⁹Chay asichishpa rimakkuna kankunata yuyachinahun rimanakushpa chikninkushpa manana shuk yuyayllawa kawsanaykicipa. Paykunaka animalkunashina aychankunapa munashkankunallata kasunahun. Manami nima imapi Yaya Diospa Espíritun yuyachishkan runakuna kanahunchu.

²⁰Munashkayni wawkinikuna paninikuna, kankunaka Yaya Diospa shiminta alita shukwa shukwa yachachinakuychi tukuy uras ashwan alita Jesukristipi sinchikushpa payta kasushpa kawsanaykicipa. Chaymantapas Yaya Diospa Espíritun kankunata yuyachishkanshina Yaya Diosta mañaychi. ²¹Pay kankunata yapa yuyashkanta yuyarishpa payshina runakunata yuyashpa kawsaychi. Chaymantapas mana sampayashpa chapaychi Amunchi Jesukristu kankunata llakichishpa pushananta wiñaypa paywa pakta silupi kawsanaykicipa. ²²Kankunapi kahuk ishkay yuyayyu runakunataka yuyashpa

kunaychi alita Jesukristullapi sinchikunankunapa.²³Chaymantapas shukkuna ninapi sintihukshina ña chinkarina kahukkunataka ninamanta surkuhukkunashina utkalla yanapaychi kishpinan-kunapa. Shuk mana alita rurak runakanatapas llakichiychi. Chasna paykunata llakichishpaykichimi alita kuyrarinayki-chi tiyan. Tukuy mana ali rurashkankunata chikniychi mana kankunapas paykunashina shuk imapi mana alita ruranaykichipa.

**Judas Yaya Diosta
atunyachishpa riman**

²⁴Yaya Dios tukuya atipak kashpan yachan kankunata wakaychanata mana uchapi urmanayki-

chipa. Chaymantapas munan Jesukristu kuti shamushpan kankunata ucha illata yapa kushillakunata suma punchahlla puntanpi churanata.

²⁵Chay shuklla Yaya Diosmi Jesukristuta kachashpan ñukanchita Kishpichik kan. Payllami suma mana rikuypa punchahlla kan, atun suma apu, tukuya kamachik, tukuya atipak, wiñaypamanta pacha kawsak, kunankama, wiñayparayku. Chasna kachun.

Chayllata killkashkani.

Wawkikichi turikichi
Judas

JESUKRISTU JUANTA KAY ALLPAPI SILUPIPAS ÑA PASANAN KANANMANTA RIKUCHISHKANTA KWINTAK KILLKA

Juan killkan Jesukristu payta
riksichishkanta

1 ¹Ñuka Juan kayta killkahuni
Jesukristu ñukata riksichiwashkanta
imashnami kay allpapi silupipas ña
pasanan tiyan. Manara nima pi yachash-
panra Yaya Dioska Jesukristuta
riksichirka imashnami kay allpapi
silupipas tukunka, payna ñukanchi
runankunata riksichinarpa. Chaymanta
Jesukristuna paypa *angelta kacharka
Yaya Dios payta riksichishkanta ñuka
paypa kamachishkan runantana riksichi-
wananpa, ñukana tukuy Jesukristupa
kamachishkan runakunata riksichinay-
nipa.

²Ñukaka Yaya Diospa rimashkan-
tami rimani. Chaymanta Jesukristu
chay Yaya Diospa rimashkanka
shutipami nishkanta rimani.
Chaymantapas rimani rikuwashkayni-
llapi muskuypishina rikushkaynita.
³Kushillami kankakuna maykan
runakunami kay Yaya Diospa
riksichiwashkanta leyinahun,
chaymantapas maykankunami
uyashpankuna kay killkarishkata
kasunahun. Yachanchi tukuy kay
Yaya Diospa riksichiwashkanka ña
paktarinan kananta.

Juan kanchis llaktakunapi kawsak
Jesukristuta kirik runakunarayku
killkan

⁴Ñuka kankunarayku killkani kay
Asiapi kanchis llaktakunapi Jesukristuta
kirik runakunarayku. Yaya Dios
kankunata llakichishpan yanapachun
kushilla kawsanaykichipa. Paymi
ñawpamanta pacha tiyarka, kunankama
kawsan, chaymantapas shamunan tiyan.
Chaymantapas Yaya Diospa puntanpi
kahuk Espíritun, maykanmi tukuy
alikunapi yanapahun, kankunata
llakichishpan yanapachun kushilla
kawsanaykichipa. ⁵Chasnallatata
Jesukristupas kankunata llakichishpan
yanapachun kushilla kawsanaykichipa.
Paymi shutipa kashkata riman. Tukuy
wañushka runakunamanta paymi
puntiru kawsarirka manana kuti
wañunanpa. Payka tukuy kay allpapi
apukunamanta atun kamachikmi. Payka
ñukanchita yuyan. Ñukanchiranti
wañushpan yawarnin shuturishkan-
rayku uchanchikunata pichashka.
⁶Paymi ñukanchita akllashka paywa
pakta kamachinanchipa. Chaymantapas
ñukanchita akllashka runakunata Yaya
Diosta riksichinanchipa, tukuy paykuna-
rayku mañakkuna kananchipa. Tukuy

runakuna wiñayparayku Jesukristullata atunyachishpa kushichinahuchun. Paylla tukuy uras wiñayparayku tukuyta kamachichun. Chasna kachun.

⁷Wawkinikuna paninikuna, alita uyawaychi. Jesukristuka shamunkami puyu chawpipi tukuy ñukanchi runakunata kamachik kananpa. Tukuy payta rikushunchi. Payta klabashpa wañuchik runakunapas rikunankuna tiyan. Tukuy kay allpapi chikan chikan allpkunapi kawsak mana payta kasuk runakuna payrayku llakirishpa wakankakuna: Imaraykushi mana payta kasushkanchichu nishpa. Chasnami kanka.

⁸Tukuypa amun Yaya Diosmi riman: Imashnami abesedarioka A-letrawa kallarin Z-letrawa tukurin, chasnashnami ñuka tukuyta kallarichik tukuyta tukuchik kani. Rimashpayni tukuy kallarin, chaykamalla nishpayni tukuy tukurin. Ñukami kani ñawpamanta pacha, kunankama kawsani, chaymantas pas shamanayni tiyan. Ñukami tukuyta atipak kani nishpa.

**Juan rikuhashkanllapi
muskuypishina Kristuta
rikushkanmanta riman**

⁹Ñuka Juan kirik masikichimi kani. Kankunawa pakta shuk yuyayllawa Jesuswa kani. Kankunashinami parisini. Ñukapas kankunawa pakta Yaya Diospa ali kamachinan mushu mundupi Jesukristuwa pakta tukuyta kamachishunchi. Kankunashina ñukapas imapi parisishpaynipas sinchikurishpayni mana sakishanchu Jesusta kasushpa kawsanata. Yaya Diospa shiminta yachachishkaynirayku, Jesús shutipa kashkata rimashkanta yachachishkayniraykupas kastigawashpankuna isla Patmospi churawarkakuna.

¹⁰Chaypi kashpayni shuk domingo puncha Yaya Diospa Espíritun sumakta

tukuypi yuyachiwarka. Chasna tukushpaynimi washaynimanta uyarkani shuk kurmitatashina sinchita rimahukta.¹¹Chay rimahukka rimawarka: Kay rikunaykitaka shuk killkapi killkay. Chaymanta kachay chay kanchis llaktakunapi ñukata kiriwak runakunarayku, Efeso llaktarayku, Esmirna llaktarayku, Pérgamo llaktarayku, Tiatira llaktarayku, Sardis llaktarayku, Filadelfia llaktarayku, chaymantapas Laodisea llaktarayku.

¹²Chaypina tikrarirkani chay rimawahukta rikunaynipa. Chaypi rikurkani kanchis oromanta lamparín tiyarinakunata.¹³Chay lamparín tiyarinakuna chawpipi rikurkani runashina rikunayu shayahukta. Pay churarishka kahurka atun apupa suni churarinanta. Pichunpi watarishka kahurka oromanta chumpita.¹⁴Chukchanka karka utkumanta yapa yura mana rikupya rantipak. Ñawinkunaka rikurirkina nina sintihukshina.¹⁵Chakinkunaka karka shuk chuya fierro ninapi pukayachishkashina. Paypa shiminka shuk atun yaku urkumanta urmahukshina uyarirkina.¹⁶Kuska makinpika charihurka kanchis istrillakunata. Rimahushpan shiminmanta llukshirkina ishkanti parti wiluyu sablishina. Uyanka inti chawpi puncha sinchita intihukshina rikurirkina.

¹⁷Chasna payta rikushpayni wañushkashina paypa puntanpi allpama urmarkani. Chaypina kuska makinta ñukapi churashpan rimawarka: Ama manchawaychu. Manarapas nima ima tiyashpanra ñia tiyarkani. Tukuy imakuna tukurishpanpas ñukaka kawsashallami.¹⁸Ñukami kani Tukuy Uras Kawsak. Kashkani wañushka. Chaymanta kawsarishpayni kawsani wiñayparayku. Ñuka kani runakunata kastigarinankunamanta kishpichik,

chaymantapas kani runakunata wiñaypata kastigarinankunapa wichuk.

¹⁹Tukuy rikushkaykita killkay. Washa rikuchinaynukunatapas rikushpayki killkay. Puntiru killkanki kunan pasahushkanmanta, chaymanta killkanki tukuy pasananta rikuchinaynita.

²⁰Ñami rikushkanki kanchis istrillakunata kuska makinipi charihuskaynita. Chaymantapas rikushkanki kanchis lamparín tiyarinakunata. Kunanka rimashkayki kay rikushkaykika imatami rimanayan. Chay kanchis istrillakunaka kanahun kay kanchis llaktakunapi kiriwak runaynikunata yachachikkuna. Chay kanchis lamparín tiyarinakunaka kanahun chay kanchis llaktakunapi kiriwak runaynikuna nishpa Jesukristuka rimawarka.

**Jesukristu Juanta riman Efeso
llaktapi kawsak payta
kirikkunarayku killkananpa**

2 ¹Chaymanta Jesukristu ñuka Juanta rimawarka: Killkay Efeso llaktapi kiriwakkunata yachachikrayku kasna: Ñuka chay kanchis istrillakunata kuska makinipi charihuk, chay kanchis lamparín tiyarinakuna chawpipi purihuk kankuna chaypi kawsak runaynikunata rimani:

²Ñukami tukuy rurashkaykichita riksini. Yachani mana sampayashpa alita yachachishpa sinchita tarawahushkaykichita. Chaymanta yachani millaypata rurak runakunata chawpiki-chimanta anchuchishkaykichita. Chaymanta yachani Yaya Diospa yachayninwa yachachihuni nishpa yanka rimak runakunata yachachihuskankunamanta alita tapushkaykichita. Chasna llullaysiki kanankunata riksishkankichi. ³Chaymantapas yachani mana sampayashpa kasuwahushkayki-

chita. Chasna ñukata kasuwashkaykichirayku achkata parisishkankichi. Chasna parisishpaykichipas mana sakiwashkan-kichichu.

⁴Chasna mana sakiwashpa kawsash-paykichipas rikuhuni manana tukuy shunkuykichimanta pacha yuyawahushkaykichita, imashnami puntiru yapa yuyapayawarkankichi. Chaymantapas manana alita yuyanakushpa kawsahun-kichinachu kankunapura. ⁵Alita yuyariyichi imashnami tukushkankichi. Manana alita yuyawahushkaykichita yuyarishpaykichi llakiriyichi. Kutikashka ñukata yuyawashpa kankunapurapas alita yuyanakushpa kawsaychi. Mana kashpaka kunkaymanta kankunata wichusha manana lamparín tiyarinashina kanaykichipa. ⁶Shuk parti kushikuni kankunamanta. Kankunaka chiknihunkichi *nikolaitakunapa rurashkankunata, maykankunatami ñukapas chiknini.

⁷Maykankunachari kankunamanta Yaya Diospa Espíritun karan llaktakunapi kiriwak runaynikunata rimahushkanta uyanahun kasunahuchun. Kankuna parisihushpaykichipas kasuwashpalla kawashashpaykichika karashkaykichimi chay kawsayta kuk kaspiqa muyunta wiñaypa kawsanaykichiqa. Chay kaspika Yayayni Diospa suma kushilla kawsanapimi. Chasnami Jesukristuka rimawarka kankunaráyku killkanaynipa.

**Jesukristu Juanta riman Esmirna
llaktapi kawsak payta
kirikkunarayku killkananpa**

⁸Chaymanta kuti rimawarka: Killkay Esmirna llaktapi kiriwakkunata yachachikrayku kasna: Ñukami kani tukuyta kallarichik tukuyta tukuchik. Rimashpayni tukuy kallarin, chaykama-lla nishpayni tukuy tukurin. Kashkani

wañushka. Chaymanta kawsarishkani. Chasna kashpayni kankuna chaypi kawsak runaynikunata rimani:

⁹Nuka riksini kasuwashkaykichirayku sinchita parisihushkaykichita. Yachani nima imayu kanaykichita. Chasna mana imayu kashpaykichipas ñukata kirishpa kawsahushkaykichirayku achka imayushinallatata kankichi. Chaymanta yachani shuk israel runakuna kankunamanta millaypata rimashkunkunata. Yaya Diospa akllashkan runakuna kanchi nishpa rimanahun. Chasna rimashpankopas supayta kushichik runakunami kanahun. ¹⁰Kankuna ima parisinaykichita yachashpaykichipas ama manchaychichu. Supaykunapa apun shuk kankunata karselpi satichinka kamanarpa shutipachu kasuwak kankichi manachu nishpa. Chasnami kankunaka shuk punchaku-nata parisinaykichi tiyan. Kankunata wañuchinayashpankopas alita sinchikuriychi kawsanaykichikama mana sakishpa kasuwanaykichipa. Chasna kashpaykichimi kankunata yaykuchisha wiñaypa ñukawa kawsanaykichipa.

¹¹Maykankunachari kankunamanta Yaya Diospa Espíritun karan llaktaku-napi kiriwak runaynikunata rimahush-kanta uyanahun kasunahuchun. Kankuna parisihushpaykichipas kasuwashpalla kawsashpaykichika manami wiñaypa parisinaykichipa wichuy tukunkichichu. Chasnami Jesukristuka rimawarka kankunarayku killkanaynipa.

**Jesukristu Juanta riman Pérgamo
llaktapi kawsak payta
kirikkunaryku killkananpa**

¹²Chaymanta kuti rimawarka: Killkay Pérgamo llaktapi kiriwakkunata yachachikrayku kasna: Ñukami chay

ishkanti parti wiluyu sablitashina charik kankunata rimani:

¹³Ñuka yachani supaykunapa apun amuyashkan llaktapi sumakta kamachishkan runakuna chawpipi kawsahushkaykichita. Chasna kashpan-pas mana sakishpachu kasuwankichi. Chay llaktaykichi, maypimi supayku-napa apunpas kawsan ñukamanta tukuy uras rimak Antipasta wañuchirkakuna. Nima chay uras sakishkankichichu ñukapi sinchikurinaykichita.

¹⁴Chasna mana sakishpa kasuwash-paykichipas rikuhuni shukta shukta mana ali rurahushkaykichita. Kankunapa chawpikichipi tiyan mana sakinayakkuna chay *Balaam wañupa millaypa yachachishkanta. Chay Balaamka ñawpa yaya rukunchi wañukunapa kuntrankuna apu Balak wañuta yanapashpa kunarka paykunata uchata rurachinanpa. Chasna kunash-pan yaya rukunchikunaka Balakta kasushpa mikurkakuna wiwakunapa aychanta, maykankunatami wañuchipa-yarkakuna yanka dioskunata kushichinankunapa. Chaymantapas musayana-kushpa kawsarkakuna kuntrankunapa yanka dioskunata kushichinankunapa. Chasna rurak runakunallatatumti tiyan kankunapipas. Chaymanta tiyan Balaamshina yuyayyu runakuna.

¹⁵Chaymantapas tiyan chawpikichipi *nikolaitakunapa yachachishkankunata mana sakinayakkuna. ¹⁶Llakiriychi chay mana ali rurakkunata mana anchuchish-kaykichirayku. Kutikashka ñukallata kasuwashpa kawsaychi. Mana kashpaka kunkaymantami kankunata kastigasha. Rimahushpaynilla sabliwa tuksihuk-shina chay mana ali rurakkunata kulluchisha.

¹⁷Maykankunachari kankunamanta Yaya Diospa Espíritun karan llaktaku-napi kiriwak runaynikunata rimahush-

kanta uyanahun kasunahuchun. Kankuna parisihushpaykichipas kasuwashpalla kawsashpaykichika karashkaykichimi mana riksishkaykichi silumanta mikunata wiñaypa ñukawa kawsanaykichipa. Chaymantapas kushkaykichimi shuk yura rumita mushu shutikichi killkarishkawa. Chay mushu shutikichita nima pi riksinkachu, kankuna apik amukunallami riksinkichi. Chasnami Jesukristuka rimawarka kankunarayku killkanaynipa.

**Jesukristu Juanta riman Tiatira
llaktapi kawsak payta
kirkkunarayku killkananpa**

¹⁸Chaymanta kuti rimawarka: Killkay Tiatira llaktapi kiriwakkunata yachachikrayku kasna: Ñukami kani Yaya Diospa Wawan. Ñawinika nina sintihuksinami. Chakinika chuya fierro ninapi pukayachishkashinami. Chasna kashpaynimi kankunata rimani:

¹⁹Ñukami tukuy rurashkaykichita riksini. Chaymanta yachani ñukata runa masikichikunatapas yuyahushkaykchita. Yachanimi ñukapi alita sinchikuhushkaykichita, chaymanta runa masikichikunata yanapahushkaykichitapas. Parisishpaykichipas mana sampayashpachu alikunata rurashpa kawsahunkichi. Chaymantapas yachanimi puntiru alita rurashkaykichikunamanta kankuna ashwan alikunata rurashkaykichita.

²⁰Chasna kashpaykichipas rikuhuni kankuna sakishkaykichita chay warmi Jesabel kankunata yachachinanpa. Yaya Diospa yachayninwami yachachihuni yanka nishpami kankunata llullachishpa yachachihun. Kankunata yachachin yanka dioskunata kushichishpa musayanakunaykichipa, chaymantapas chay yanka dioskunaryku wañuchishkunkuna wiwakunapa aychankunata

mikunaykichipa. ²¹Unay ña payta rimashkani chay millaypa ruranankunata sakishpa ñukatana kasuwananpa. Kunankama mana munanchu musayashpa kawsahushkanta sakinata. ²²Chayraykumi kunan payta sinchi unkuywa kastigasha. Payshina rurashpa kawsakkunatapas sinchitami parisicha millaypa kawsahushkankunata mana sakishpankunaka. ²³Chaymantapas payta kasukkunataka parisichishpami wañuchisha. Chasna rurashpaynimi tukuy parti kiriwak runaynikuna yachankichi tukuy kankuna runakunapa yuyarihushkaykichita riksinaynita. Chaymantapas yachankichi karan mana alita rurakta kastiganaynita, karan alita rurakta kushichinaynita.

²⁴Kunanka kankuna chay Tiatira llaktapi chay millaypa yachachishkata mana katikkunata rimani. Kankunaka manami chay warmishinachu supaykunapa apu yuyarishkanta yachakushpa kawsashkankichi. Chasna ña alita kasuwahushkaykichirayku mana ashwanta kankunata kamachinichu. ²⁵Kayllata kankunata kamachini: Kasushpalla katiwaychi shamunayni punchakama.

²⁶Parisihushpaykichipas kawsanaykichikama munashkaynita rurashpa kawsashpaykichika kankunatami churasha ñukawa pakta tukuy llaktakunamanta runakunata kamachikkuna kanaykichipa. ²⁷⁻²⁸Chasnallatamatmi Yayaynika ñukatapas churawarka tukuy kay allpapi llaktakunamanta runakunata kamachik kanaynipa. Kankuna ñukawa pakta kamachikkuna tukushpaykichi shuk fierromanta rurarishka barawa tinahata pakihuskina mana kasukkunata sinchita kastigashpa kamachishunchi. Chaymanta pakarishushkapi rikurik ruyunchitashina kankunata kusha.

Ñukaka chay ruyunchishinami kani. Imashnami ruyunchika rikurishpan amsaka tukurin, chasnashinami kankunawa kawsak shamushpayni tukuy mana alikuna tukurinankuna tiyan.

²⁹Maykankunachari kankunamanta Yaya Diospa Espíritun karan llaktaku-napi kiriwak runaynikunata rimahush-kanta uyanahun kasunahuchun. Chasnami Jesukristuka rimawarka kankunaryku killkanaynipa.

**Jesukristu Juanta riman Sardis
llaktapi kawsak payta
kirikkunarayku killkananpa**

3 ¹Chaymanta kuti rimawarka: Killkay Sardis llaktapi kiriwakkunata yachachikrayku kasna: Ñuka tukuy alikunapi yanapak Espiritupa amun, chaymantapas chay kanchis istrillaku-nata charihuk kankunata rimani:

Ñukami tukuy rurashkaykichita riksini. Runa masikichikuna kankunamanta alita Yaya Diosta kasukkuna nishpa rimahushpanapas yachani wañushkashina mana kasuwakkuna kahushkaykichita. ²Wañushkashina kahushkaykichimanta atariyichi. Chaymanta sinchikuchiychi manara wañushkashina kahukkunata, ña wañunalla kahunkuna. Riku huni rurahushkaykichika Yayayni Diospa rikushkanpi mana ali kahushkankunata. ³Yuyariyichi kankunata yachachishkan-kunata. Chayta yuyarishpaykichi alitana shunkuykichipi wakaychaychi. Kuti mushumanta Yaya Diosta kasushpa kawsaychi. Wañushkashina kahushkay-kichimanta mana atirishpaykichika shuk shuwa kunkaymanta paktamuhuk-shina nima pi yuyarihushkanpi kunkay-manta kankunata kastigak shamusha.

⁴Kankuna Sardispi kirikkunamanta tiyan masna runalla alita kasuwakkuna.

Kankuna chay alita kasuwakkunami churarishkaykichita mana wikiyachik-kunashina kankichi. Alita rurashpa kawsashkaykichirayku suma yura churarishka purinkichi ñukawa.⁵Parisi-hushpaykichipas kasuwashpalla kawsashpaykichika suma yurata churachishkaykichi. Shutikichita mana pichashanchu chay wiñaypa Yaya Dioswa kawsak runakunapa shutinkuna killkarishkankunamanta. Chaymantapas Yaya Diospa puntanpi, paypa ^{*angelku-}napa puntanpipas kankunamanta kushikushpa rimasha alita kasuwashpalla kawsashkakuna nishpa.

⁶Maykankunachari kankunamanta Yaya Diospa Espíritun karan llaktaku-napi kiriwak runaynikunata rimahush-kanta uyanahun kasunahuchun. Chasnami Jesukristuka rimawarka kankunaryku killkanaynipa.

**Jesukristu Juanta riman Filadelfia
llaktapi kawsak payta
kirikkunarayku killkananpa**

⁷Chaymanta kuti rimawarka: Killkay Filadelfia llaktapi kiriwakkunata yachachikrayku kasna: Ñukami kani ucha illa, alillata rurak. Tukuy ñukapa rimashkaynika shutipami. Yayayni Diospa kawsananta tapashpayni nima maykan atipanchu paskanata paywa kawsanarpa. Chasnallatatami paskash-payni nima maykan atipanchu tapanata runakuna mana yaykunankunapa. Chasna kashpayni kankunata rimani:

⁸Ñukami tukuy rurashkaykichita riksini. Kankunaryku punkuta paskashpa sakishkani runakunata yaykuchinaykichipa. Chaytaka nima maykan atipanchu tapanata. Kankuna mana yapa yachayyu kashpaykichipas rimashkaynita kasushpalla kawsashkankichi. Chaymantapas manami ñukamanta rimashkankichichu mana payta riksinchichu nishpa. ⁹Llaktaykichipi tiyan

supayta kushichik runakuna. Paykunaka llullaysikikuna kashpankuna Yaya Diospa akllashkan runakuna kanchi nishpa yanka rimanahun. Chay runakunata kankunamanta yanka millaypata yuyarishkankunata riksichishpayni puntaykichipi kunkurinkakuna, kankunata yuyahushkaynita yachashpankuna.

¹⁰Kankunaka mana sampayashpa kasuwaychi nishpa rimashkaynita alita kasushkankichi. Chayrayku ñukapas kankunata wakaychashkaykichi mana ñukamanta anchurinaykichipa tukuy kay allpapi kawsak runakunaryku atun parisinakuna paktashpankuna. Chasna paykuna parisinkakuna yachanaynipa millaypata rurahushkankunata sakinkakunachu manachu nishpa. ¹¹Ñuka ña shamusha. Chasnalla alita kasuwaychi mana nima maykan kankunata kichunarpa kasuwashpalla kawsakkunata Yayayni Dios kunayahushkanta.

¹²Kankuna parisuhushpaykichipas kasuwashpalla kawsashpaykichika kankunata orkontashina rurasha wiñaypa Yayayni Diospa wasinpi kawsanaykichipa. Chaymanta kankunapi killkasha paypa shutinta, chaymantapas llaktanpa shutinta. Chay llaktanka kankami silumanta shamuhuk paypa ruranan Mushu Jerusalén shutiyu. Chaymantapas kankunapi killkasha mushu shutinita.

¹³Maykankunachari kankunamanta Yaya Diospa Espíritun karan llaktaku-napi kiriwak runaynikunata rimahushkanta uyanahun kasunahuchun. Chasnami Jesukristuka rimawarka kankunaryku killkanaynipa.

**Jesukristu Juanta riman Laodisea
llaktapi kawsak payta
kirikkunaryku killkananpa**

¹⁴Chaymanta kuti rimawarka: Killkay Laodisea llaktapi kiriwakkunata yachachikrayku kasna: Ñukami kani

tukuy Yaya Diospa rimashkanta paktachik. Tukuy ñukapa rimashkaynika shutipami. Tukuy uras Yayayni Dios yachachiwashkanllatami rimani. Yayayni Dios munashpan siluta allpata tukuy chaypi tiyashkakunatas rurarkani. Chasna kashpaynimi kankunata rimani:

¹⁵Ñukami tukuy rurashkaykichita riksini. Yachanimi riksiwak kashpaykichipas mana alita kasuwahushkaykichita. Chasna kashpaykichimi nima rupa yakushina nima chiri yakushina kankichi. Ali kama rupa kanaykichipa mana kashpaka chiri kanaykichipa. ¹⁶Chasna nima rupa nima chiri kahushkaykichirayku kankunataka millashpaynimiwichushkaykichi.

¹⁷Chaymantapas rimahunkichi: Tukuy imayu kanchi. Tukuy uras alilla kawsanchi. Nima ima ñukanchita pishinchu nishpa. Manami yuyarinkichichu imashnami shutipa kankichi. Rikushkaynipika llakiya kawsakkuna, nima imayu, llatan, wisku runakunashina kankichi.

¹⁸Kankunata kunani: Tapuwaychi chasna mana ali kahushkanchimanta ñukanchita kishpichiy nishpa. Ñukamanta rantiychi ninamanta llukshishka orota rikushkaynipi shutipa imayu kanaykichipa. Chaymanta rantiychi yura churarinata, rikushkaynipi pinkaypa llatan kahushkaykichimanta churarinaykichipa. Chaymantapas rantiychi rimilluta wiskushina kahushkaykichimanta ampirinaykichipa. ¹⁹Kankunata yuyahushkaymiraykumi sinchi shimiwa kunani. Mana ali yuyaywa kawsahushkaykichita sakiychi, kutikashka tukuy shunkuykichimanta pacha kasuwanaykichipana.

²⁰Ñukami wasikichi punkupishina kayashpa chapahuni shunkuykichipi yaykuchiwanaykichipa. Yaykuchiwashpaykichika parihu mikuhukshinami kawsashunchi.

²¹Kankuna parisuhushpaykichipas kasuwashpalla kawsashpaykichika

imashnami ñukapas Yayayni Diosta kasushpalla kawsashkani, kankunata aputa rurasha ñukawa pakta kamachinaykichipa, imashnami ñukapas Yayaynipa kuchunpi tiyarishpayni apu tukushkani paywa pakta kamachinaynipa.

²²Maykankunachari kankunamanta Yaya Diospa Espíritun karan llaktaku-napi kiriwak runaynikunata rimahush-kanta uyanahun kasunahuchun. Chasnami Jesukristuka rimawarka kankunaryku killkanaynipa.

Silipi Yaya Diosta

kushichinankunamanta riman

4 ¹Chaymanta rikuhashkaynillapi muskuyipishina rikurkani shuk punku paskarishkata silipi. Chaypi chay kurmitashina sinchita rimawakka kutikashka rimawarka: Sikamuy kayma, rikuchishkayki pasanan kashkata. ²Chay ratu Yaya Diospa Espíritun sumakta tukuypi yuyachiwarka. Chasna tukushpayni rikurkani silipi Yaya Diospa suma kamachinan tiyarinanta. Chaymantapas rikurkani pay kikinta chay tiyarinanllapi tiyahukta. ³Payka kashkami mana rikupya yapa chuya, suma rumi jaspeshina, rumi kornalina-shina rikunayu. Paypa tiyarinan muyukta karka shuk chuyahlla tsunki rikuchihuk chuya rumi esmeraldashina killu.

⁴Chaymanta chay suma tiyarinan muyukta ishkay chunka chusku apupa tiyarinankunata rikurkani. Chay tiyarinakunapi tiyarishka kahurkakuna ishkay chunka chusku rukukuna. Paykunaka yurata churarishka karkakuna. Chaymantapas umankunapi oromanta tawasampatashina churarishka karkakuna. ⁵Yaya Diospa tiyarinanmanta ilampakuna llukshirkakuna, chaymanta rimahushkakuna

uyarirka, chaymantapas rayukuna. Chay tiyarinan puntanpi kanchis kaspi llachapawa watarishkakuna sintirkakuna. Chaykunaka rimanayarka Yaya Diospa Espíritun paypa wawankunata tukuy alikunapi yanapak kananta.

⁶Chaymantapas tiyarinan puntanpi shuk atun yakushina tiyarka, pasakta rikupya, espehushina chuya.

Chay tiyarinan muyukta tiyarka chusku chikan rikunayu kawsakkuna. Paykunaka puntan parti washan partipas tapakta ñawinkunawa karkakuna. ⁷Chay kawsakkunamanta chay puntiru rikushkaynika tukuya winsik pumashina rikunayu karka. Chay ishkaynin rikushkaynika llashata aysashpan yanapak kari wakrashina rikunayu karka. Chay kimsaynin rikushkaynika runashina rikunayu karka. Chaymanta chay chuskuynin rikushkaynika atun yachayyu suma anka pawahukshina rikunayu karka. ⁸Karan chay chusku kawsakkuna sokta rikrayukuna karkakuna. Chay rikrankuna ukunpi awanpipas ñawinkunaka tapakta karkakuna. Tutanti punchanti mana sampayashpachu rimarkakuna:

A Yaya Dios, yapa ali ucha illami kanki.

Tukuypa apunmi kanki.

Kanka tukuya atipakmi kanki.

Ñawpamanta pacha tiyak kunankama kawsakmi kanki, chaymantapas shamunayki tiyan nishpa.

⁹Chasna kamachinan tiyarinanpi tiyahuk tukuy uras kawsak Yaya Diosta karan ratu atunyachishpa yuyashpa agradesishpa kushichirkakuna. ¹⁰Karan chay chusku kawsakkuna kushichihush-kunkunapi chay ishkay chunka chusku rukukunapas tukuy uras kawsak Yaya Diosta kushichishpa paypa puntanpi

kunkurirkakuna yapa alimi kanki nishpa. Chaypina paypa kushkan oromanta tawasampankunatashina kutichishpa mana kanwa parihuchu kanchi nishpa puntanpi churarkakuna.

¹¹ Kanllami ali kanki Amunchi, Yaya Diosninchi.

Kanllami tukuya rurashkanki.
Kan munashkaykiraykumi tukuy rurashka kan.

Chayrayku kanllami suma atun yachayyu kanki.

Tukuy kanllata yuyashpa kushichi-nanchi tiyan.

Kanllami tukuya kamachik kanki nishpa chay rukukunaka rimarkakuna.

**Shuk killka wankurishkata,
chaymanta shuk Obeha Maltata
rikushkanmanta riman**

5 ¹Chaymanta rikurkani chay tiyarinanpi tiyahuk Yaya Diospa kuska makinpi shuk killka wankurishkata. Chay killka rikushkaynika awanpi ukunpi killkarishkami karka, chaymantapas kanchis parti ratachirishka karka shillkillu apirik wikiwashina mana paskarinanpa. ²Chaymanta rikurkani shuk atun yachayyu *angelta. Payka sinchita rimashpami tapuhurka: ¿Pita ali kan Yaya Diospa puntanpi chay killka wankurishkata wikiwa ratachirishkata pakishpan paskananpa? nishpa. ³Mana tiyashkachu nima shuk runa, nima shuk angel, nima silipi, nima allpapi, nima allpa ukupi chay killka wankurishkata paskananpa, chaymanta paskashpan leyinanpa. ⁴Mana nima pi ali tiyashpan Yaya Diospa rikushkanpi chay killka wankurishkata paskananpa, chaymanta paskashpan leyinanpa, atunta llakirishpayni wakarkani. ⁵Chasna wakahushpayni chay rukukunamanta shuk rimawarka: Ama

ashwanta wakaychu. Tiyanmi chay wankurishkata paskanata atipakka. Chay yaya rukuykichi Judá wañupa ayllunkunamanta shuk pumashina kuntrankunata winsik runami tiyan. Payka atun apuykichi David wañupa miraymantami. Yaya Diospa kuntranta winsirka. Paymi atipan chay killka wankurishka kanchis parti wikiwa ratachirishkankunata pakishpan paskanata.

⁶Chaypi Yaya Diospa kamachinan tiyarinan puntanpi chusku kawsakkuna chay ishkay chunka chusku rukukuna chawpinkunapi shuk Obeha Maltata rikurkani, chaypi shayahukta. Payka rikurirkka ñukanchi runakunapa uchanchikunaryku shuk obeha maltata wañuchishkanchishina. Kanchis kachuyu, kanchis ñawiyu karka. Chay kanchis ñawinkunaka ninayan tukuy parti allpapi kachashkan alikunapi yanapak Yaya Diospa Espíritu. ⁷Chay Obeha Maltaka apak rirk'a chay killka wankurishkata chay kamachinan tiyarinanpi tiyahukpa kuska makinmanta. ⁸Chay killka wankurishkata apishpan chay chusku kawsakkuna, chay ishkay chunka chusku rukukunapas paypa puntanpi kunkurirkakuna. Tukuy paykunapa tiyarka *arpankuna uyachishpa payta kushichinankunapa. Chaymanta chariurukakuna oromanta matita untakta mishkinlla asnak wikita rupachishpankuna payta kushichinankunapa. Chay mishkihlla asnak kushninka awata sikahushkashinami kanahun ñukanchi kasukkunapa mañahushchika Yaya Diosrayku. ⁹Chaypi takirkakuna shuk mushu takinata kasna:

Kanllami Yaya Diospa rikushkanpi ali kanki chay killka wankurishkata apinaykipa, chaymanta wikiwa ratachirishkankunata pakishpayki paskanaykipa.

Kanka tukuy runakunapa uchankunarayku wañushpayki yawarniki shuturirka.

Chasna wañushpaykimi supaykunapa apunta kichurkanki karan allpamanta shuk runakunata, karan shimita rimakkunamanta shuk runakunata, chaymantapas karan ayllukunamanta shuk runakunata Yaya Diospa wawankuna kanankunapa.

¹⁰ Paykunata shuk llaktallapi kawsak runakunatashina rurarkanki, shuk apullata kasushpa kawsanankunapa.

Chaymanta akllashkanki mañashpa Yaya Dioswa alichak runankuna kanankunapa.

Shuk puncha allpapi kamachinkunkuna nishpa.

¹¹ Chaymantana achka angelkunata rikurkani. Shiminkuna uyarishkakunata uyarkani. Paykunaka kahurkakuna chay kamachina tiyarina, chay chusku chikanrikunayu kawsakkuna, chay rukukuna muyukta. Mana yupappa achka waranka warankakunami karkakuna. ¹² Chaypi sinchita rimarkakuna:

Runakunapa uchankunaryku obeha maltashina wañuchirishkalla Yaya Diospa rikushkanpi ali kan tukuy runakuna payta kushichinankunapa.

Payllami ali kan Yayan Dios payta churananpa tukuy kawsakunata kamachik kananpa.

Payllami ali kan tukuy iman tiyashkata kunanpa.

Payllami ali kan tukuy yachayta kunanpa.

Payllami ali kan Yayan Dios tukuy manta suma atun yachayyu rurananpa.

Payllami ali kan tukuy payta kushichinankunapa nishpa.

¹³ Chaymantapas tukuy Yaya Diospa rurashkankunaka silupi, allpapi, allpa ukupi, atun yaku ukupipas rimahushkankunata uyarkani kasna nishpankuna:

Akuychi tukuy ñukanchi kawsakkuna chay kamachinan tiyari-nanpi tiyahukta agradesishpa yuyashpa atunya-chishpa kushichishunchi chay Obeha Maltatapas.

Paykunallami suma atun yachayyu kanahun.

Paykunallami tukuy ñukanchikunata tukuy uras wiñayparayku kamachinahuchun.

Akuychi tukuy ñukanchikuna paykunallata kushichishpa kawsashunchi.

¹⁴ Chaypina chay chusku kawsakkuna rimarkakuna alitami rimashkankichi nishpa. Chaymantapas chay ishkay chunka chusku rukukunaka kunkurishpankuna Yaya Diosta Jesukristutapas atunyachishpa kushichirkakuna.

Chay Obeha Maltaka chay kanchis wiki ratachirishkata pakinanmanta riman

6 ¹ Chaymanta rikurkani chay Obeha Maltaka chay kanchis wiki ratachirishkakunamanta puntirunta pakihushkanta. Chasnallapi uyarkani chay chusku kawsakkunamanta shukka rayushina uyarik shimiwa kayahukta jshamuy! nishpa. ² Chasna kayashpan shuk yura kaballu llukshishkanta rikurkani. Chay kaballupa awanpi tiyahukka makinpi shuk balistata charihurka. Chaypina payta apichirkakuna apupa tawasampatashina kuntrankunata winsishkanrayku. Chasna winsik kashpan kuti rirka kunrankunata winsinanpa.

³ Chaymanta chay Obeha Maltaka chay ishkaynин wiki ratachirishkata

pakishpan uyarkani chay chusku kawsakkunamanta ishkaynin kayahuskanta *ıshamuy!* nishpa. ⁴Chaypina shuk puka kaballu llukshirka. Chay awanpi tiyahukka kamachirishka karka runakunapa yuyayninkunata waklichinanpa, manana kushilla kawsanankunapa. Chaypi payta shuk atun sablitashina kurkakuna runakunata yuyachinanpa makanakushpa wañunakushpa shukwa shukwa kawsanankunapa.

⁵Chaymanta chay Obeha Maltaka chay kimsaynin wiki ratachirishkata pakishpan uyarkani chay chusku kawsakkunamanta kimsaynin kayahuskanta *ıshamuy!* nishpa. Chaypina shuk yana kaballuta rikurkani. Chay awanpi tiyahukka makinpi charihurka shuk balansata. ⁶Chaypi chay chusku kawsakkunapa chawpinkunamanta shuk rimahuktashina uyarkani: Yarkay punchakuna kashpan shuk puncha tarawana kullkiwa atipankichi rantinata shuk kilo mikuna trigullata, mana kashpaka kimsa kilo pukrikunapa mikuna sebadallata. Ama yanka usuchinkichihu chay myu wirayuta chay *vinu tarputapas, yarkay punchakuna kashpanpas runakunaryku mana pishinanpa.

⁷Chaymanta chay Obeha Maltaka chay chuskuynin wiki ratachirishkata pakishpan uyarkani chay chusku kawsakkunamanta chuskuynin kayahuskanta *ıshamuy!* nishpa.

⁸Chaypina shuk tsala kaballuta rikurkani. Chay awanpi tiyahukka Wañuy shutiyumi karka. Allpapi paktashpan achka runakunami wañurkakuna. Payka kamachirishka karka shuk parti allpapi runakunata wañuchichinanpa. Chayrayku runakuna paykunapura wañunakushpa wañurkakuna. Shukkunaka yarkaywa unkuywa wañurkakuna. Shukkunaka allpapi

kawsak animalkunawa wañuchiyy tukurkakuna.

⁹Chaymanta chay Obeha Maltaka chay pichkaynin wiki ratachirishkata pakishpan rikurkani silipi shuk wañushkakunapa almankunata. Paykunaka Yaya Diospa shiminta Jesukristupa rimashkantapas mana sakishpa kirishkankunarykumi wañuchiyy tukurkakuna. Chasna wañuchiyy tukushpangkuna Yaya Diosrayku wiwakunata rupachina tuchpashina rikunayu ukupi kahurkakuna. ¹⁰Chaypi sincita rimarkakuna: Tukuya kamachik Yaya Dios, ucha illa alillata rurak, tukuy rimashkaykita paktachik *ıima urasta allpapi kawsakkunata rurashkankunamanta tapunki?* *ıIma urasta ñukanchita wañuchik runakunata kastiganki?* ¹¹Chaymanta paykunata kurkakuna yura churarinata. Chaypina Yaya Dioska paykunata rimarka: Chapaychira shuk ratu Jesukristuta shuk kasuk masikichikunapas kankunashina wañuchiyy tukunankunaka. Paykunapas akllarishkami kanahun wañuchiyy tukunankunapa.

¹²Chaymanta chay Obeha Maltaka chay soktaynin wiki ratachirishkata pakishpan rikurkani shuk sinci allpa kuyuya. Chaypina intika yanayarka, imashnami shuk runa ayllun wañushpan yanata churarin chasna. Purahushka killaka yawarshinami pukayarka.

¹³Chaymantapas achka istrillakuna silumanta urmarkakuna, imashnami llullu myukunaka manara pukuhushpankuna sinci wayrawa wicharinahun.

¹⁴Siluka shuk kara wankurihushkashi-nami wankurishpa chinkarinka. Tukuy urkukunaka islakunapas anchuchiy tukurkakuna chay kahushkankunamanta. ¹⁵Chayta rikushpangkuna tukuy runakuna pakarkakuna. Atun apukuna, yachayyukunapas, suntalukunapa

apunkunapas, chaymantapas tukuy apukuna pakarkakuna. Achka imayu runakuna, patronyu mana patronyu runakunapas, tukuy pakarkakuna. Mana atipashpankuna sinchikunata shukkuna-naka uchukukunapi, shukkunaka urku rumikuna chawpipi pakarkakuna.

¹⁶Chaypina rimarkakuna: Imashnashi urku rumikuna awanchipi tularinahuma chay kamachinan tiyarinanpi tiyahuk Yaya Diospa rikuhashkanmanta ñukanchita pakanankunapa, chay Obeha Maltaka ñukanchita piñarishpa kastiganayahushkanmantapas. ¹⁷Nami paktashka Yaya Diospa atun kastiganan punchaka. Pitaya atipama sinchikunata paypa puntanpi nishpa.

**Yaya Diospa akllashkan runakuna
urintinkunapi killkay
tukushkankunamanta riman**

7 ¹Tukuy chaykunata rikushkayniwasha chusku *angelkunata rikurkani, chusku parti silu allpapi tuksirishkakunapi ñawipura rikunakushpa shayahukkunata. Paykunaka chay chusku partimanta wayrakunata arkahurkakuna allpapi, yakupi, kaspikunapi mana nima musyay-pata wayrananpa. ²Kamachirishka kahushpankuna allpata yakuta waklichinankunapa ña chay wayrakunata kacharinalla kahurkakuna. Chaypina rikurkani shuk angelta inti llukshinamanta shamuhukta. Paymi apamuhurka shuk imata, chaywa shuk runakunapi killkananpa shuklla kawsak Yaya Dios amunkuna kananta. Chay angelka chay chusku angelkunatami kaparishpa rimarka:

³Amara waklichiyhirachu allpata, yakuta, nima kaspikunata! Puntiru killkananchira tiyan Yayanchi Diosta kasuk runakunapa urintinkunapi, paypa kashkan-kunarayku.

⁴Chasna chay runakunapi killkashkan-washa uyarkani masna runakunami

urintinkunapi killkarishka karkakuna. Tiyarka shuk pachak chusku chunka chusku waranka runakuna tukuy Yaya Diospa akllashkan runakunapa ayllunkunamanta. ⁵⁻⁸Karan chay chunka ishkay ayllukunamanta chunka ishkay waranka urintinkunapi killkarishka karkakuna. Chay Judá wañupa miraymanta, Rubén wañupa miraymantapas, Gad wañupa miraymantapas, Neftalí wañupa miraymantapas, Manasés wañupa miraymantapas, Simeón wañupa miraymantapas, *Leví wañupa miraymantapas, Isakar wañupa miraymantapas, Sabulón wañupa miraymantapas, José wañupa miraymantapas, chaymantapas Benjamín wañupa miraymanta tukuy chasnalla urintinkunapi killkarishka karkakuna.

**Juan nima yupaypa
achka runakunata yura
churarishkakunata
rikushkanmanta riman**

⁹Chaymanta nima yupaypa achka runakunata rikurkani silipi. Paykuna karkakuna karan shuk allpakunamanta, karan ayllukunamanta, karan shimita rimakkunamantapas. Tukuy chay nima yupaypa achka runakunaka shayahlla kahurkakuna kamachinan tiyarinanpi tiyahuk Yaya Diospa puntanpi, chay Obeha Maltapa puntanpipas. Tukuy yurata churarishka kahurkakuna. Chaymantapas makinkunapi charihlla kahurkakuna chipati pankakunata Yaya Diosta kushichihushpankuna kuyuchi-nankunapa. ¹⁰Chaypina kaparishpa rimarkakuna:

Kan tukuyta kamachik Yayanchi Dios, kan Obeha Malta, ñukanchikunata kishpichik kankichi nishpa.

¹¹Tukuy *angelkunaka chay Yaya Diospa suma kamachinan tiyarinan, chay rukukuna, chay chusku kawsak-kuna muyukta shayahurukakuna. Chaypina chay kamachinan tiyarinan puntapi allpakama kumurishpa kunkurirkakuna Yaya Diosta kushichinankunapa kasna nishpangkuna:

¹² Alitami kanmanta chay runakunaka rimahunkuna.

Kanllata Yayanchi Dios, tukuy atunyachishpa kushichinahu-chun.

Tukuy rimanahuchun suma atun yachayyu tukuya yachak kanki nishpa.

Tukuy kanllata agradesinahuchun. Kanllata tukuy yuyashpa kushichinahuchun.

Tukuyta kamachik kashpayki kanllata tukuy kasunahuchun.

Tukuy kawsakkunaka rimanahuchun kanllami tukuya atipak kanki nishpa.

Tukuy uras wiñayparayku chasna kachun.

¹³Chaypina chay ishkay chunka chusku rukukunamanta shukka tapuwarka: ¿Yachankichu pikunata chay rikushkayki yurata churarishka mana yupaya runakunaka, chaymantapas maymantataya shamushkakuna? nishpa.

¹⁴Chasna rimawashpan aynirkani: Manami yachanichu. Kankunallami yachankichi, rimaway pikunataya chay runakunaka nishpa.

Chaypi chay rukuka rimawarka: Chay yurata churarishka runakunaka chay atun parisina punchakunapi kawsash-pangkuna Yaya Diosta kasushpallami katirkakuna. Imashnami churarinaykichi-kunata sumakta taksashpaykichi susya illa tukun, chasnashinami chay runakunaka chay Obeha Malta wañush-

pan yawarnin shuturishkanrayku paypi kirishpankuna ucha illa tukushkakuna.

¹⁵Chasna uchankunamanta llakichirishka kashpankunami Yaya Diospa kamachinan tiyarinan puntapi shayahunkuna. Punchanti tutanti wasinpi sirvishpa kawsanahun. Chasna kawsahushpankunami chay kamachinan tiyarinanpi tiyahuk Yaya Dioska tukuy uras paykunawa kawsahushpan alita kuyran. ¹⁶Paykunaka manana yarkankakunachu, nima yakunayankakunachu, Jesukristuta alita riksishkankunarayku kushillana kawsanahun. Nima intita, nima rupayta parisinkakunachu.

¹⁷Chaymanta chay Yaya Diospa kamachinan tiyarinan puntapi kahuk Obeha Maltaka paykunata alita kuyranka, wiñaypa kawsayta kuk tukyariq yakuma pushanka chay yakuta upyashpa kushilla kawsanankunapa. Yaya Dioska ñawinkuna yakuta chakichishpan manana wakashpa nima llakishpa kawsankakunachu nishpa.

Chay Obeha Maltaka chay kanchisnin wiki ratachirishkata pakishkanmanta riman

8 ¹Chaymanta chay Obeha Maltaka chay killka wankurishkapa kanchisnin wiki ratachirishkata pakirka. Chasna pakishpan chawpi urata silipi chunlla tukurka.

²Chaypina rikurkani chay kanchis *angelkunata, Yaya Diospa puntanpi wiñay shayarinankunapi shayahukkunata. Karan shukta shuk trompetata kurkakuna.

³⁻⁴Chaymanta rikurkani shuk angelta shuk oromanta rurarishka apinayu kallanata apamuhtukta mishkinlla asnak wikita chaypi churashpa rupachinanpa. Chay angelka Yaya Diospa tiyarinan puntapi kahuk oromanta rurarishka tuchpashina mayanpi shayarirka.

Chaypi payta achka mishkinlla asnak wikiwa chapurishkakunata kurkakuna, chay tuchpashinapi rupachishpan Yaya Diospa runankunapa mañashkankunaka paypa rikushkanpi ali kanankunapa. Chay kushnika tukuy mañashkankunawa pakta Yaya Diosta kushichishpa angelpa charihushkan kallanamanta awata rirkka.⁵ Yaya Dios mañashkankunata aynishpan chay angelka chay apinayu kallanapi chay tuchpashinamanta shuk piti nina tsalita untachirka. Chaymanta chay tsalita allpama wicherka. Chaypina sinchi rayu uyarirka, sinchi ilampa rikurirka, chaymantapas sinchita allpaka kuyurirka.

**Chay kanchis angelkunamanta
chusku trompetankunata
pukushkankunamanta riman**

⁶Chaypina chay kanchis *angelkunaka trompetankunata alsarkakuna pukunkunapa.

⁷Chaypi puntiru angelra trompetanta pukurka. Chasna pukuhushpan tamya chiririwa sinchiyashka bolastukuna ninawa yawarwa chapurishkakuna sinchita allpama urmarkakuna. Chasna urmeshpankuna tukuy allpata tukuy sachata kimsa parihu partikunapi tupushpa, chay kimsamanta shuk parti tupu ruparka, chasnallatata tukuy kawsa kiwakunamantapas.

⁸Chaypina ishkaynin angelka trompetanta pukurka. Chasna pukuhushpan shuk atun sintihuk urkushina atun yaku marpi urmarka. Chaypi tukuy chay atun yaku marta kimsa parihu partikunapi tupushpa, chay kimsamanta shuk parti tupu yawar tukurka. ⁹Chasna yawar tukushpan chay atun yaku marpi kawsakkunata yupashpa kimsa parihu muntunpi churashpa, chay kimsamanta shuk muntun tupu wañurkakuna. Chay

atun yaku marpi purik barkukunamanta lanchakunamantapas shuk muntun tupu chinkarirkakuna.

¹⁰Chaymanta kimsaynin angelka trompetanta pukurka. Chasna pukuhushpan shuk atun istrillaka shuk kaspi punkarawa armachirishka sintihukshina silumanta urmarka. Tukuy yakukunata yupashpa kimsa parihu yupashkapi churashpa, chay sintihuk istrillaka chay kimsamanta shuk yupashka tupupi urmarka, chasnallatata yaku umakunapipas. ¹¹Chay istrillapa shutinka karka Aya. Chasna urmeshpan chay yakukunaka aya tukurkakuna. Chay aya yakuta upyash-punkuna achka runakuna wañurkakuna.

¹²Chaymanta chuskuynin angelka trompetanta pukurka. Chasna pukuhushpan tukuy intita tukuy killata kimsa parihu partikunapi tupushpa, chay kimsamanta shuk parti tupu waklirka, chasnallatata tukuy istrillakanamantapas. Chasna waklishpankuna chay parti amsa tukurka. Manana alita punchayachihushpankuna chasnallatata shuk parti tupu puncha tutapas amsa tukurkakuna.

¹³Chaymanta shuk ankata rikurkani kuska silu awapi pawarihukta. Chay ankaka sinchita kaparishpa rimarka: Alaw, alaw, alaw chay allpapi Yaya Diosta mana kasushpa kawsakkuna. Chay kimsa manara pukuk angelkunaka trompetankunata pukushpankuna manchaypa parisinakunata parisinkakuna nishpa.

**Chay kanchis angelkunamanta
pichkaynin angelka
pukushkanamanta riman**

9 ¹Chaymanta pichkaynin *angelka trompetanta pukurka. Chasna pukuhushpan rikurkani allpapi shuk istrillashina silumanta urmeshkata.

Chay urmashka istrillashina kahukta kurkakuna chay supaykunata tapana manchaypa uchku punkupa llawinta.
²Chaypina chay manchaypa uchku punkunta paskarka. Chasna paskashpan chay uchkkumanta achka kushni llukshirka atun ninamantashina. Chay kushnika intita amsayachirka wayrata-pas arkarka.

³Chay kushnimanta achka atun chilikkunashina llukshishpankuna tukuy allpapi shikwarirkakuna. Chay atun chilikkunaka kamachirishka karkakuna uputintikunashina tuksinankunapa.

⁴Chaymanta kamachirishka karkakuna nima kiwakunata, nima tarpu kunata, nima kaspikunata waklichinankunapa. Ashwan kamachirishkami karkakuna chay mana urintinkunapi killkarishka runakunata parisichinankunapa.

⁵Paykunaka kamachirishka karkakuna chay runakunata mana wañuchinankunapa, ashwan pichka killata parisichinankunallapa. Chasna chay chilikkunaka chay runakunata tuksishpa parisichishpankuna sinchita nanarka shuk uputinti tuksishkashina.

⁶Chasna chay runakunaka yapa parisishpankuna rimankakuna imashnashi utkalla wañuynima nishpa. Chasna wañunayashpankunapas mana atipankakunachu wañunata, chay wañunakunkuna puncha manara paktarishkanrayku.

⁷Chay chilikkunaka wañunakunankunapa alicharishka kaballukunashinami parihu kuchupura karkakuna. Umankunapi shuk oromanta tawasampatashina churarishkakunami karkakuna. Uyankunaka rikurirka runakunapa uyankunashina. ⁸Chukchankunaka shuk warmipa chukchanshinami karkakuna. Kirunkunaka shuk pumapa kirunshinami karkakuna. ⁹Chaymanta shuk aserumanta rurarishka arkana kamsata churarishkakunashinami karkakuna.

Pawahushpankuna rikrankunaka achka kaballukuna wañunakunapa karroknata aysashpa rihukkunashinami yapa sinchita uyarirkakuna. ¹⁰Chay chilikkunapa chupankunapi shuk uputinti kashashinami karkakuna. Chay kashankunawa atiparkakuna runakunata tuksinata. Chasna tuksishpankuna pichka killata chay runakunata parisichirkakuna. ¹¹Chay chilikkunapa kamachik apunkunaka chay supaykunata tapana manchaypa uchku kuyrak karka. Paypa shutinka karka *hebreo shimipi Abadón. Chaymanta *griego shimipi shutinka karka Apolión, chayka rimanayanmi waklichik.

¹²Chasna chay chilikkunaka tuksishpankuna chay puntiru manchaypa parisinami paktarirka. Chaymanta ishkay manchaypa parisinakunaramtiyan.

**Chay kanchis angelkunamanta
soktaynin angelka
pukushkanmanta riman**

¹³Chaymanta soktaynin *angelka trompetanta pukurka. Chasna pukuhushpan uyarkani chay Yaya Diospa puntanpi kahuk oromanta rurarishka tuchpashina chawpimanta shuk rimahushkata. ¹⁴Chaypina chay rimahukka chay soktaynin trumpetata pukuk angelta rimarka: Chay Eufrates atun yaku mayanpi chusku watarishka angelkunata paskakriy nishpa. ¹⁵Chaypina chay angelka paskak rirka chay chusku watarishka angelkunata.

Paykunaka alicharishka karkakuna chay ura, chay puncha, chay killa, chay wata tukuy runakunata yupashpa kimsa parihu muntunpi churashpa, chay kimsamanta shuk muntun tuputa wañuchinankunapa. ¹⁶Chaymanta uyarkani maytukuy suntalukunami kaballupi wañunakuk rinkakuna. Ishkay

pachak waranka warankakunami karkakuna.

¹⁷Tukuy kaykunata rikuhushkaynillapi muskuypishina rikurkani. Chay kaballukunapi purihuk runakunaka aserumanta arkana kamisata churarishkami karkakuna. Paykunapa kamisankunaka karkakuna ninashina puka, silushina killu, *asufrishina killuwa pintarishka muruhlla. Chay kaballukunapa umankunaka shuk pumapa umanshinami karkakuna. Shiminkunamanta nina kushni asufriwa llukshirka.

¹⁸Chay llukshihuk nina kushni asufriwa tukuy runakunata yupashpa kimsa parihu muntunpi churashpa, chay kimsamanta shuk muntun tupu wañurkakuna. ¹⁹Chay kaballukunaka shiminkunamanta llukshihushkankunawa chupankunawapas wañuchik karkakuna. Chay chupankunaka machakuyashina rikurirkakuna. Chay machakuyakunapa umanwashina runakunata waklichirkakuna.

²⁰Chay kishpishka runakunaka chay wañuykunata rikushpangunapas millaypata rurashpa kawsahushkankunata mana sakirkakunachu. Supaykunata kasushpa kushichishpa katirkakuna. Chay oromanta, kullkimanta, bronsementa, rumimanta, kaspimanta, mana rikuk, nima uyanata atipak, nima purinata atipak runakunapa rurashkankunata Yaya Diostashina mañashpa katirkakuna. ²¹Chaymanta mana sakirkakunachu runa masinkunata wañuchinata, nima supaykunata kayashpa ruranankunata. Chaymanta mana sakirkakunachu musayanakushpa kawsanankunata, nima shuanankunatas.

**Shuk angel uchilla
killka wankurishkata
apamushkanmanta riman**

10 ¹Chaymanta atun yachayyu *angelta rikurkani, shuk puyu chawpipi silumanta uraykumuhushkata.

Uman awapika shuk tsunki rikurirka. Uyanka intishinami rikurirka. Chankanmanta chakinkama shuk nina sintihukshina rikurirka. ²Makinpi shuk uchilla killka paskarishkata apamurka. Chaypina kuska chakinwa atun yaku marpi, lluki chakinwa allpapi shayarik shamurka. ³Chasna shayarik shamushpan shuk pumashina sinchita kaparirka. Chasna kaparihushkanpi kanchis kuti rayuka sinchita uyarirka. Chay rayukanaka shuk rimahushkashinami uyarirkakuna. ⁴Chay rayu rimahushkata killkanayashpayni silumanta uyarkani shuk shimi rimawahushkata: Ama killkaychu chay kanchis kuti rayu uyarihushkapi uyashkaykita. Wakay-chay yuyaykillapi mana nima pi yachananpa nishpa.

⁵Chaypina chay rikushkayni angelka atun yaku marpi allpapipas shayahukka kuska makinta awama alsarka tukuy yachanankunapa chasnashushkanllapi rimananka shutipa kananta. ⁶Chasna makinta alsashpan rimarka: Tukuy uras kawsak, siluta allpata atun yaku marta, tukuy chaykunapi tiyakkunatapas rurak Yaya Dios kastigawachun kasna rimanaynika mana shutipa, kashpanka: Kunanka Yaya Dioska mananami chapannachu. Ñami tukuy rimashkanta paktachihun. ⁷Chay kanchisnin angel trompetanta pukunan uras paktashpan tukuy Yaya Dios runakunawa rurananta yuyarishkanka paktarinkami, imashnami ñawpa paypa yachayninwa yachachikkunata rimarka nishpa.

⁸Chaymanta chay Yaya Diospa puntanpi kahuk mesamanta rimahukka kutikashka silumanta rimawahushkata uyarkani kasna nishpa: Apakriy chay killka paskarishkata, chay atun yaku marpi allpapipas shayahuk angel makinpi charihushkata.

⁹Chasna rimawashpanmi chay angelta tapuk rirkani: Chay killkarishkastuta

kuway nishpa. Chaypina chay angelka kuwashpan rimawarka: Kaykaya. Apashpayki mikuy. Chayta mikushpayki shimikipika mapa mishkishinami kanka. Wiksayki ukupika aya tukushpanmi nanachinka.

¹⁰Chaypina chay killkarishkastuta chay angelmanta apishpayni mikurkani. Chasna mikushpayni shiminipi shuk mapa mishkishina karka. Mikushkayni-washa wiksayni ukupika aya tukushpan nanachiwarka.

¹¹Chaypina chay angelka rimawarka: Kanmi runakunata kutikashka rimanayki tiyan pasananmanta. Achka llaktakunapi kawsak runakuna parisinankunamanta rimanayki tiyan, chaymanta achka muntun runakuna karan muntun chikan shimita rimakkuna parisinankunamanta, chay runakunata kamachik apunkuna parisinankunamantapas rimanayki tiyan nishpa.

**Ishkay ali
yachachikkunamanta riman**

11 ¹Chasna muskuypishina rikuwashkaynillapi shuk tupuna kaspita kuwashpan shuk rimawarka: Kay kasiwa *Yaya Diospa wasinta tupukriy. Chay wasinpi rupachina tuchpashinatapas tupukriy. Chaymanta-pas chaypi Yaya Diosta kushichishpa mañahuk runakunata yupakriy. ²Chay Yaya Diospa wasinmanta ashwan kanchama pampa kincharishkataka mana tupunkichu. Chay pampa kincharishkapika Yaya Diosta mana kasuk runakunami yaykushpanguna amuyankakuna. Chasnallatatami chay runakunaka Yaya Diospa llaktan Jerusalenta amuyashpanguna chusku chunka ishkay killata waklichinkakuna nishpa. ³Chaymanta Yaya Dioska rimawarka: Waklichinankuna uras chay

ñukamanta alita yachachik ishkay runaynikunataka yachaynitami kusha runakunata pasananmanta rimashkay-nita yachachinankunapa. Paykunaka churarishka kankakuna llakihuk churarishkashina runakuna uchanku-nata yuyarinankunapa. Chasna churarishka chay shuk waranka ishkay pachak sokta chunka punchata runaku-nata yachachinkakuna nishpa.

⁴Chasna Yaya Dioska rimawashpan yacharkani chay ishkay yachachikkuna chay ñawpa Yaya Diospa yachay-ninwa yachachik wañukunaka tukuy allpapi kamachik Yaya Diospa puntanpi rikushkankuna ishkay olivos kaspikuna ishkay lamparinkunapas kanankunata.

⁵Maykan runakunapas chay ishkay yachachikkunata millaypata ruranayashpanguna Yaya Dios paykunata kuyrashpan shiminkunamanta ninatashina llukshichinka llampu kuntrankunata rupachinanpa. Tukuy paykunata millaypata ruranayak runakunaka wañunankuna tiyan. ⁶Chay ishkay yachachikkuna Yaya Diospa yachayninwa atipankakuna tamyata arkanata Yaya Diospa shiminta yachachihushkankuna tukurinan punchakama. Chaymanta atipankaku-nami tukuy yakukunata yawarta ruranata. Chaymantapas masna kutipas atipankakuna tukuy manchaypata rurashpa runakunata parisichinata uchankunata yuyarinankunapa.

⁷Chaymanta chay ishkay yachachikkuna chayachihushkankunata tukuchish-panguna chay supaykunata tapana uchkumantami shuk manchaypa animalshina rikunayu llukshimunka. Chasna llukshimushpan chay animalalka chay ishkay yachachikkunata chiknishpan kallarinka wañunakunata. Chaypi paykunata winsishpa wañuchinka. ⁸Chasna paykunata wañuchishpan chay yachachik-

kunapa aychankunata wichunkakuna chay Jerusalén llaktapa ñampi chawpipi. Chay llaktallapillatatum paykunapa Amunkunata kruspi wañuchirkakuna. Chaypi kawsak runakuna chay Babilonia atun llaktapi kawsakkunashina millaypata rupashpa Yaya Diosta mana kasushpa kawsankakuna. Chaymantapas Sodoma llaktapi kawsakkunashina Egipto allpapi kawsakkunashina millaypakuñata rurashpa kawsankakuna.

⁹Chasna chay ishkay yachachikkuna wañuchiý tukushkankunawasha kimsa puncha chawpita tukuy partimanta runakuna chay ishkay wañushkakunapa wicherishka aychankunata rikunkakuna. Tukuy ayllukunamanta, tukuy chikan shimita rimakkunamanta, tukuy allpukunamatas runakuna aychankunata rikunkakuna. Chasna chay wicherishka aychankunata rikushpankuna manami munankakunachu nima pi paykunata pampanankunapa. ¹⁰Chay ishkay yachachikkuna wañushpankuna tukuy llaktakunapi kawsak runakuna atunta kushikunkakuna manana paykunata killachishkankunaryku, imashnami killachishpa kawsapayrakuna millaypata rurashkankunata yuyachishpankuna. Chasna kushikushpankuna fiestata rurashpa regalukunata shukta shukta kunakunkakuna.

¹¹Chay ishkay yachachikkunapa aychankunata kimsa puncha chawpita wicherishka kashpankuna Yaya Dioska wañushkankunamanta kawsachimurka. Chaypina atarimurkakuna. Chasna atarimushkankunata rikushpankuna runakunaka atunta mancharishpa kiparirkakuna. ¹²Chaymanta uyarkakuna silumanta shuk sinchi shimiwa chay ishkay yachachikkunata rimahushkata ñiskamuychi kayma! nishpa. Chaypina puyu ukupi siluma rirkakuna. Chay paykunata chiknik runakunaka rihushkakunata rikurakunami. ¹³Chasna siluma rishpankuna shuk sinchi allpa kuyuy

tiyarka. Chasna allpa kuyurishpan chay llaktapi wasikunata yupashpa chunka parihu muntunpi churashpa, chay chunkamanta shuk muntun tupu wasikuna tularishpankuna urmarkakuna. Chaypi kanchis waranka runakunami wañurkakuna. Chay wañuymanta kishpishka runakunaka manchaywa kiparishpankuna chay silipi kawsak Yaya Diosta atun yachayyumi kanki nishpa rimarkakuna.

¹⁴Chasnami chay ishkaynin manchaypa parisinaka ña paktarirka. Chaymanta utkallami kimsaynin manchaypa parisinaka paktarinka.

Chay kanchisnin angelka trompetanta pukushkanmanta riman

¹⁵Chaypina chay kanchisnin *angelka trompetanta pukurka. Chasna pukuhushpan achka sinchita kaparishpa rimahushkakunata uyarkani kasna nishpa:

Kunan shuti Yaya Diosninchika paypa Kachashkan Kishpichi-kwa pakta ña tukuy allpapi kawsak runakunata kamachinata kallarishkakuna.

Kunanmanta pachami wiñayparayku kamachinkakuna.

¹⁶Chaypina Yaya Diospa puntanpi apupa tiyarinankunapi tiyahuk ishkay chunka chusku rukukunaka allpakama kumurishpankuna payta kushichishpa atunyachirkakuna:

¹⁷ A Yaya Dios,
Tukuya apunmi kanki.
Tukuya atipak kanki.
Ñawpamanta pacha tiyak,
kunankama kawsak kanki.
Kunan atun yachaykita rikuchishpayki kallarishkanki kamachinata.
Chayrayku kanta atunta agradesinchi.

¹⁸ Tukuy llaktakunapi kawsak runakuna kanta mana kasuna-yashpa yapa piñarirkakuna.

Chasna piñarishpankuna
ñami kanpapas piñarinayki
punchaka paktarishka.
Ñami paktarishka tukuy wañushka-
kunata kawsachishpayki
rimanaykipa pimi kastigarinka,
pimi kishpinka nishpa.
Ñami paktarishka tukuy runaykiku-
nata alita rurashkunkunaryku
kushichinayki punchaka.
Kanpa yachaykiwa shimikita alita
yachachikkunata kushichinki.
Chaymantapas tukuy kanta kasuk
yuyak runakunata kushichinki,
mana imananchu
yachayyu mana yachayyu kashpan-
kunapas.
Ñami paktarishka kay allpapi
waklichishpa kawsak
runakunata kastiganayki punchaka.
Parisichishpa kawsashkankunaryku
paykunana wiñaypata parisi-
nankuna tiyan nishpa.

¹⁹Chasna chay rukukunaka rimashpan-
kuna rikurkani silipi *Yaya Diospa
wasinpa punkun paskarikhukta. Paypa
wasin ukupi rikurkani chay Yaya Diospa
kamachishkankuna ñawpa killkarishkapa
wakaychanan maletata orowa armachirish-
kata. Chasna chay wasi punkuka paskarish-
pan sinchi ilampakuna rikurirkakuna,
sinchita rimashkashinami uyarirka,
chaymantapas sinchi rayukuna uyarirka-
kuna. Chay urasllatamí sinchi allpa
kuyuy tiyarka. Chaymanta achka tamya
chiriwa sinchiyashka bolakuna sinchita
urmarkakuna.

**Juanka shuk warmita,
shuk manchaypa purawashina
rikunayutapas
rikushkanmanta riman**

12 ¹Chaymanta rikurkani silipi
shuk manchariypa suma rikuna-
yuta, Yaya Diosta kasuk runakuna

pasanankunamanta yachachinayahush-
kata. Chay rikushkaynika shuk warmi
karka intiwa wankurishka, imashnami
shuk llachapawa. Chay warmipa chakin
ukupi rikurkani killata. Chaymantapas
umanpi rikurkani chunka ishkay
istrillakunamanta rurarishka tawasam-
patashina. ²Chay warmika chichu
kashpan ña wawayanarpa wiksan
nanahushpan sinchita kaparirka.

³Chaymantapas rikurkani silipi shuk
yapa manchaypa rikunayuta, supayku-
napa apun ruranamanta yachachinaya-
hushkata. Chay rikushkaynika chakiyu
puka purawashinami karka, kanchis
umayu, chunka kachuyu. Chay kanchis
umankunapika apupa tawasampankuna-
tashina churarishka karka. ⁴Chay
purawashina manchaypa rikunayuka
tukuy istrillakunata yupashpa kimsa
parihu yupashkapi churashpa, chay
kimsamanta shuk yupashka tupu
istrillakunata chupanwa silumanta
allpama urmachirka. Chaymanta chay
purawaka chay wawayanalla warmipa
puntanpi shayarirka wawayashpan
wawanta mikunanza.

⁵Chaypina chay warmika shuk kari
wawata wawayarka. Chay wawanka
tukuy llaktakunamanta runakunata
shuk puncha fierromanta rurarishka
barawa sinchita kamachinan tiyan.
Chay purawaka chay wawata mikuna-
yashpan Yaya Dios payta pusharka
kamachinan tiyarinan puntama paywa
pakta kamachinanpa.

⁶Chasna Yaya Dios wawanta pushash-
pan mamanka chunlla chakishka
allpama mitikurka. Chaypi Yaya Dioska
shuk ali kawsanata payrayku alicharka
chaypi payta shuk waranka ishkay
pachak sokta chunka punchata
wakaychananpa.

⁷Chaykunata rikushkayniwasha silipi
rikurkani achka kallarihushkakunata

makanakunata. Chay *angelkunapa atun kamachik angel Miguelmi tukuy paypa kamachinan angelkunawa pakta makanakurkakuna chay purawashina rikunayu supaykunapa apunwa, tukuy paypa kamachinan supaykunawapas siluta amuyanayahushpankuna. ⁸Chasna makanakushpankuna chay purawaka tukuy kamachinan supaykunawa paktami makay tukurkakuna. Chayraykumi silumanta wichuy tukushka karkakuna, supaykunapa apun manana Yaya Diosta runakunamanta rimak rinanpa mana ali rurashkankunata, nima tukuy runakunata kamachinanpa. ⁹Chay purawaka chay ñawpamanta pacha runakunata llullachishpa kawsak machakuyami. Paypa shutinka Washanchakmi, chaymanta shuk shutinka Yaya Diospa Kuntran Supaykunapa Apunmi. Payka tukuy runakunata llullachik kan. Paymi tukuy kamachinan supaykunawa pakta allpama wichuy tukurka.

¹⁰Chaymanta uyarkani silipi sinchi shimiwa rimahushkata kasna:

Kunan shuti ñami Yayanchi Dioska wawankunata supaykunapa apunta kichushkanta rikuchin. Kunan ñami atun yachayninta rikuchihun.

Ñami kallarishka kamachinata.

Chaymantapas Kachashkan Kishipchiktapas ña churashka paywa pakta kamachinanpa.

Kunan shuti ña supaykunapa apunka silumanta wichuy tukushka.

Manara wichuy tukushpan Yayanchi Diosta kasuk masinchikunamanta punchanti tutanti mana alita rurashkankunata rimak ripayarka.

¹¹Chay Obeha Maltaka wañushpan yawarninka shuturirkha Yaya Dios tukuy payta kasukkunata llakichinanpa.

Chay Yaya Diosta kasuk masinchikunaka yawarnin shuturishkanpi sinchikushkankunaryku chay supaykunapa apunta winsirkakuna.

Chaymanta Yaya Dios paykunata kishpichishkanta rimashpa kawsashkankunaryku chay supaykunapa apunta winsirkakuna.

Chaymantapas winsirkakuna runakuna wañuchihushpankunapas mana sakishpa Yaya Diosta kasushkankunaryku.

¹²Chasna supaykunapa apunta winsishkankunarykumi akuychi atunta kushikushunchi tukuy silipi kawsakkuna.

Alaw tukuy allpapi kawsak runakuna. Kankunarykuka atuntami llakirinchi, chay supaykunapa apun kankunama uraykushkanrayku. Payka yachashpan runakunata kamachihushkan ña tukurihushkanta yapa sinchita piñarishka nishpa.

¹³Chasna chay purawashina rikunayuka allpama wichuy tukushpan kallarirka chay warmi kari wawata wawayashkata wañuchinayashpa katinata.

¹⁴Chasna payta katishpan Yaya Dioska chay warmita atun ankapa rikrankunata kurka, pawashpan chay chunlla chakishka allpama pakak rinanpa. Maypimi Yaya Dioska payrayku alicharka, chaypi kimsa wata chawpita payta karashpa wakaycharka chay purawaka mana apinanza.

¹⁵Chaypina chay purawaka shimananta achka yakuta kacharka chay warmita sinchita shutuhuk yakuwa chinkachinanpa. ¹⁶Chasna chay manchaypa yakuta kachashpan allpaka

chay warmita yanapashpa paskarirka. Chaypina chay purawapa kachashkan yakuka llampu yaykurka.¹⁷ Chasna chay purawaka mana atipashpan chay warmita wañuchinata sinchita piñarirka. Chasna piñarishpan tukuy chay warmpa mirayninkunawa makanakuk rirka. Chay mirayninkunaka Yaya Diospa kamachishkanta Jesukristupa yachachishkantapas mana sakishpa kasuk runakunami kanahun.

**Juanka ishkay
manchaypa animalkunata
rikushkanmanta riman**

13 ¹Chasna chay purawaka piñarishpan atun yaku mar mayanpi shayarirka. Chaypina shuk manchaypa animalta chay yakumanta llukshimuhukta rikurkani. Chay animalpas chay purawashina kanchis umayu chunka kachuyumi karka. Karan kachunpika apupa tawasampatashinami churarishka karka. Chay kanchis umankunapika Yaya Diosta yapa piñachik chay animalpa shutinkuna killkarishka karkakuna. ²Chay animal rikuskaynika shuk yana pumashina rikunayumi karka. Chakinkunaka osopashinami karkakuna. Paypa shiminka shuk atun pumapashinami karka. Chaypina chay purawaka payta kurka atun yachayninta runakunata sinchita kamachinanca.

³Chay pumashina rikunayuka shuk umanpi wañuya pitirishkayumi karka. Chaymanta chay pitirishkanka ampirishka karka. Tukuy allpapi kawsak runakunaka chay wañuya pitirishkamanta ampirishkanta rikushpankuna mancharirkakuna. Chasna wañuya winsik kashkanta rikushpankuna payta kirishpa katirkakuna. ⁴Chaymantapas chay manchaypa purawashina rikunayuta kushichishpami kawsarka-

kuna, chay manchaypa animal yakumanta sikamushkata yachayninta kushkanrayku. Chaymanta chay yakumanta sikamushka animaltapas kushichishpa kawsarkakuna: Mana tiyanchu nima shuk kanshina atun yachayyuka. Nima maykan atipanchu kanta winsinata nishpa.

⁵Chay purawaka yachayninta kushpan chay manchaypa animalka pay kikinta atunyachishpa Yaya Diosmanta millaypata rimashpa kawsarka. Yaya Dioska payta sakirka chusku chunka ishkay killakunata munashkanta rurashpa kawsanarpa. ⁶Chaypina Yaya Diosta pukllachishpa paymanta millaypata rimashpa kawsarka. Yaya Diospa kawsananmanta paywa pakta silipi kawsakkunamantapas millaypata rimashpa kawsarka.

⁷Chaymanta Yaya Dioska sakirka akllashkan runakunawa makanakushpan chay animalka winsinarpa. Chasna winsishpan tukuy ayllukunamanta runakunata, tukuy chikan shimita rimak runakunata, tukuy allpkunamanta runakunatapas kamachikmi tukurka.

⁸Chaypina tukuy allpapi kawsak mana Yaya Diosta kasuk runakunaka payta kushichishpa kawsankakuna. Paykunapa shutinkunaka manami killkarishkachu kahunkuna chay Yaya Dioswa kawsak runakunapa shutinkuna killkarishkapi. Chay killkaka ñukanchi runakunapa uchanchikunaryku wañushka Obeha Maltapami kan. Chaypika Yaya Dioska kay munduta rurashkanmanta pachami paywa kawsak runakunapa shutinkunaka killkarishka kanahun.

⁹ Maykankunachari uyanahun kay rimahushkaynita alita shunkunpi wakaychachun:
¹⁰ Yaya Dios munashpan shukkunata apishpa karselpi

churanankunapa, chaykunaka
karselma rinankuna tiyan.
Yaya Dios munashpan
shukkunata sabliwa wañuchinanku-
napa,
chaykunaka sabliwa wañuchi
tukunankuna tiyan.

Chasna parisinakuna tiyashpan
ñukanchi Yaya Diospa akllashkan
runakunaka payllata yuyashpa mana
sakishpa alita paypi sinchikunanchi
tiyan.

¹¹Chaymanta rikurkani shuk animal-
shina rikunayuta allpa ukumanta
llukshimuhukta. Chay animalka obeha
maltashina ishkay kachuyumi karka.
Chasna obeha maltashina kachuyu
kashpanpas paypa rimananka chay
manchaypa purawapa rimananshinalla-
tatami karka. ¹²Chay animalka tukuy
chay wañuypa pitirishkanmanta
ampirishka animalpa munashkanta
rurashpa kawsarka, payshina yachayyu-
llatata kashpan. Chasna tukuy allpapi
kawsak runakunata yuyachirka chay
ampirishka animalta kushichishpa
kawsanankunapa.

¹³Chasna chay ampirishka animalta
yanapashpan tukuy runakunapa
rikushkankunapi atun yachaywa nima
ima uras rikushkankunata rurarka.
Ninatapas silumanta allpama
urmachirka. ¹⁴Chasna Yaya Dios
sakishkanrayku chay animalka chay
ampirishka animalpa rikushkanpi atun
yachaywa runakuna nima ima uras
rikushkankunata rurashpan tukuy
allpapi kawsak runakunata llullachirka.
Chasna runakunata llullachishpan chay
sabliwa wañuypata pitirishkanmanta
kawsarishka animalshina rikunayuta
rurachirka chayta runakuna kushichi-
nankunapa. ¹⁵Chaymanta chay
animalka Yaya Dios sakishkanrayku
chay kushichishkankunata shuk

kawsashina rimakta rurarka. Chay
rurachishkan animalshina rikunayuta
mana mañak runakunata wañuchi-
chirka. ¹⁶Chaymanta kamachirka tukuy
runakuna mana kuska makinpi
kashpanka urintinkunapi killkarishka
kanankunapa. Tukuy kamachirishka
karkakuna killkarinankunapa, yachayyu
mana yachayyu runakunapas, kullkiyu
mana kullkiyu runakunapas, chaymanta
patronyu mana patronyu runakunapas.
¹⁷Maykan runakunami mana killkarish-
kachu karkakuna mana atiparkakuna-
chu rantinata nima rantichinata. Tukuy
runakuna kamachirishka karkakuna
chay animalpa shutinwa, mana
kashpanka paypa shutinpa numerunwa
killkarinankunapa.

¹⁸Kaykunamanta rimashkaynita
asirtanaykichipaka Yaya Diosmanta
yachayta munankichi. Chay yachaywa
alita yachakuychi yachanaykichipa pimi
kan chay pitirishkanmanta ampirishka
manchaypa animalka, mana kankunata
llullachinanpa. Paypa shutinpa
numerunka rimanayan shuk runapa
shutinta. Chay numerunka sokta pachak
sokta chunka soktami.

**Juanka Yaya Diosta kasuk
runakuna shuk mushu takinata
takihushkankunata
rikushkanmanta riman**

14 ¹Chaymanta chay Obeha
Maltata rikurkani maypimi Yaya
Diospa llaktanka, chay Sion urkupi
shayahushkata. Chaymanta shuk pachak
chusku chunka chusku waranka runaku-
natami paywa pakta tantaylla kahukku-
nata rikurkani. Chay runakunapa
urintinkunapika chay Obeha Maltapa
shutin killkarishka karka, paypa
Yayanpa shutinpas.

²Chaymantapas uyarkani silumanta
shuk atun yaku urkumanta urmahukta-

shina. Chayllatatami shuk sinchi rayushina uyarirka. Chaymantapas karka achka takishpa *arpankunata waktahushkashina yapa suma.

³Chay achka runakunaka Yaya Diospa kamachinan tiyarinan puntanpi, chay chusku kawsakkunapa, chay ishkay chunka chusku rukukunapa puntankunapi shuk mushu takinata takirkakuna. Chay shuk pachak chusku chunka chusku waranka runakunalla atiparkakuna chay mushu takinata yachakunata, tukuy allpapi kawsak runakunamanta paykunalla uchankunamanta kishpichirishka kashkankunarayku. ⁴Chay Yaya Diosta kasuk runakunaka chay runa masinkunapa rurashkankuna yanka dioskunata manami kushichirkakunachu. Paykunaka kay allpapi Yaya Diosllatami kasushpa kawsarkakuna. Chaymantapas chay Obeha Maltata alita kasushpa katirkakuna. Chay Obeha Maltaka chay runakunata tukuy allpapi kawsak runakunamanta supaykunapa apunta kichurka paypa Yayan Diospapas kanankunapa. ⁵Chasna kashpanmi Yaya Diospa rikushkanpika ucha illa kanahun, nima shuk llullata rimashkunata tarishkachu.

Juanka kimsa

angelkunapa rimashkankunata
uyashkanmanta riman

⁶Chaymanta rikurkani shuk *angelta kuska silu awapi pawarihukta. Chay angelka tukuy allpapi kawsak runakunata yachachirka tukuy uras chasnalla rimak Yaya Diospa ali shimita runakunata kishpichinanmanta. Tukuy allpaku-napi kawsak runakunata, tukuy ayllukanamanta runakunata, tukuy chikan shimita rimak runakunatas yachachirka. ⁷Chay angelka sinchita kaparishpami rimarka: Ñami Yaya Dioska tukuy payta mana kasuk runaku-

nata kastiganan uraka paktarishkana. Chayrayku Yaya Diosta manchashpa alita kasuychi. Payllatana yuyashpa kushichiychi. Paymi siluta, allpata, atun yaku marta, tukuy yaku umakunatas rurarka. Chayrayku payllata kushichishpa mañaychi.

⁸Chasna rimashkanwasha shuk angelna tukuy millaypata rurachik runakuna chinkarinankunamanta rimarka. Chay runakunata yanka shutiyachishpan chay ñawpa millaypaku-nata rurachik runakunapa llaktan Babilonia rimarka kasna: Ñami chinkarirkana chay Babilonia atun llaktaka. Ñami chinkarishkana. Chay Babilonia llaktapi kawsak runakunaka mana sakinayashpa tukuy millaypaku-nata rurarkakuna. Chasna rurashpan-kuna tukuy allpapi kawsak runakunata llullachishpa yachachirkakuna paykunata katishpa yuyay illashina tukuy millaypaku-nata ruranankunapa. Paykunata yachachirkakuna Yaya Diosta sakishpa yanka dioskunata kushichishpa kawsanankunapa, imashnami shuk warmi kusanta sakishpan shukwa shukwa kawsakshina.

⁹⁻¹⁰Chasna chay ishkaynin angel rimashkanwasha shuk angelna sinchita kaparishpa rimarka: Yaya Dioska atunta piñarishpa kastiganan tiyan chay pitirishkanmanta ampirishka animalta kushichishpa, payshina rikunayu rurarishkata mañashpa kawsak runakunata. Chaymantapas alimi nishpa urintinkunapi, shukkunaka makinkunapi chay animalpa shutinwa killkarishpankuna mana llakichishpachu sinchita kastiganan tiyan. Paykunaka chay Obeha Maltapa tukuy paypa angelku-napa puntankunapi nina *asufriwa sintihukpi atunta parisinkakuna.

¹¹Chasna Yaya Dios paykunata kastigashpan chay manchaypa animalta

kushichik, chay animalshina rikunayuta mañak, shutintapas killkarishka runaku-naka wiñayparayku parisinkakuna. Mana samashpachu punchanti tutanti chay nina asufriwa sintihukpi parisinkakuna.

¹²Tukuy chayta yachashpaykichi kankuna Yaya Diospa wawankuna mana sampayashpa alita sinchikunaykichi tiyan. Yaya Diospa kamachishkankunata alita kasushpa Jesukristullapi sinchikushpa kawsanaykichi tiyan nishpa.

¹³Chaymanta shuk rimawahushkata silumanta uyarkani: Kay rimanaynita killkay. Kunanmanta pacha kushillami kankakuna Jesukristupi kirishpa wañukkunaka nishpa.

Chasna rimashpan Yaya Diospa Espiritunka aynirka: Ari. Chasna wañuk runakunaka parisinankunamantami samankakuna, manana parisinkakuna-nachu. Jesukristuta alita kasushkankunarykumi Yaya Dioska paykunata kushichinka nishpa.

**Juanka Yaya Dios tukuy
payta mana kasuk
runakunata kastigananta
rikushkanmanta riman**

¹⁴Chaymanta rikurkanimi shuk yura puyuta. Chay yura puyupa awanpi rikurkani shuk runashina rikunayu tiyahukta. Paypa umampika oromanta tawasampatashina churarishkami karka. Makinpika shuk sablitashina wiluyu kumurishkata apamurka.

¹⁵Chaypina *Yaya Diospa wasinmanta shuk *angel llukshimurka. Allpapi kawsak runakunata muyukunatashina rikushpan sinchita kaparishpa chay yura puyupa awanpi tiyahukta rimarka: ¡Ñami pallanayki uraka paktarishkana! Chay allpapi muyukunaka ñami pukush-kakuna pallanaykipa. Chayrayku chay wilu sablikwa pallakriy nishpa.

¹⁶Chaypina chay yura puyupa awanpi tiyahukka chay allpapi muyukunata sablinwa pitishpan pallarka.

¹⁷Chaymanta chay silipi kahuk Yaya Diospa wasinmanta shuk angelna llukshimurka. Chasna llukshimushpan paypas shuk sablitashina wiluyu kumurishkata apamurka.

¹⁸Chaymanta Yaya Diospa wasinpi kahuk tuchpashina ukumanta shuk angelna llukshimurka. Payka Yaya Diospa churashkan karka ninawa tukuy munashkanta rurananpa. Allpapi kawsak runakunaka millaypata rurashkankunawa pukushka uva muyukunatashina rikushpan chay wilu sablitashina apamuk angeltaka sinchita kaparishpa rimarka: Chay sablikwa allpapi kahuk uva chakrakunamanta muyukunata pallakriy, ñami pukushkakuna nishpa.

¹⁹⁻²⁰Chaypina chay angelka chay wilu sablinwa allpapi kahuk uvakunataka pitishpa pallarka. Chasna pallashpanna churarka llakta kanchapi shuk atun kincharishkapi chaypi saru saruy tukunankunapa. Yaya Dios runakunata yapa piñarishkanrayku chasnashina kastigay tukunkakuna. Chasna saru tukushpankunana uva churanankunamanta yakunka llukshimuhukshina yawar llukshimurka. Chasna kashpanmi rikurkani achka yawar untarishkata kimsa pachak kilometro tuputa kaballukunapa kunkan sikin awankama.

**Juanka kanchis kastigak
angelkunata rikushkanmanta riman**

15 ¹Chaymanta shuk atun mancha-riypata silipi rikurkani pasananmanta yachachiwashkata. Chay rikushkaynika karkakunami chay kanchis *angelkuna runakunata kastigankunapa riuhkkuna. Paykunaka paktachinkakunami runakunapi kanchis

atun parisinakunata. Chasna mana alita rurak runakunata kastigashpankunara Yaya Diospa piñayninka pasarinka.

²Chaymantapas rikurkani shuk atun yakutashina pasakta rikuypa espehu-shina chuya. Chay yakushina rikunayuka ninawa chapurishkashina karka. Chay chuya yakushina mayanpika chay manchaypa animalta mana kushichik runakunami shayahur-kakuna. Paykunaka chay animalshina rurarishka rikunayuta mana mañakchu karkakuna. Chaymantapas mana killkarishkachu karkakuna chay animalpa shutinwa, nima numerunwapas. Chasna Yaya Diospa kuntrankunata mana kasushpa winsishpankuna Yaya Diospa kushkan *arpankunawa payta kushichishpa chaypi shayahurkakuna. ³Yaya Dios paykunata kishpichishkan-manta takirkakuna, imashnami Yaya Diosta kasuk Moisés wañupas ñawpa takirka. Chaymantapas uchanchikun-rayku wañushka Obeha Maltaka kishpichik kananmanta takirkakuna kasna:

A Yaya Dios, tukuy rurashkaykiku-naka manchariypa alikunami kanahun.

Kanka tukuypa apunmi, tukuyta atipakmi kanki.

Alikunallata rurak kashpayki tukuy runakunata rurashkanchiku-namanta chasnallami tapunki.

Alita rurashkakunataka kishpi-chinki.

Mana alita rurashkakunataka kastiganki.

Manami shukta shukmanta ashwanta valichinkichu.

Tukuy rimashkaykika shutipami kan. Tukuy llaktakunapi kawsak runaku-nata kamachikmi kanki.

⁴ Kanllami ucha illa alillata rurak kanki.

Chayrayku tukuy runakuna kantaka manchananchi tiyan. Kanmi tukuypa apun kanki. Tukuy runakuna kanta atunya-chishpa kushichinanchi tiyan. Tukuy llaktakunapi kawsak runaku-naka alillata rurak kanaykita rikunkakuna.

Chayrayku kanta kushichishpa mañak rinkakuna nishpa.

⁵Chaymanta rikurkani silipi *Yaya Diospa wasin ukupi kwartun paskari-hushkata. ⁶Chay wasi ukumanta chay kanchis parisinakunawa kastiganapa rihuk kanchis angelkunaka llukshimur-kakuna. Paykunaka suma yura chuya churarishkakunami karkakuna. Pichun-kunapika oromanta chumpita watarish-kami karkakuna. ⁷Chaypina Yaya Diospa puntanpi chusku kawsakkunamanta shukka chay kanchis angelkunata oromanta rurarishka matita kurka, karan shukta shuk matita. Chay matikunaka chay tukuy uras kawsak Yaya Diospa sinchi piñaynin untakta karkakuna. ⁸Chaypina tukuy Yaya Diospa wasin ukupi kushni tukurka, suma atun yachayyu tukuyta atipak Yaya Dios chaypi kahushkanrayku. Chasna tukushpan nima pi atiparkachu chay wasinpi yaykunata chay angelkuna tukuy chay kanchis kastigukunata paktachinankunakama.

**Juanka kanchis angelkuna kanchis
kastigukunata
paktachishkankunata
rikushkanmanta riman**

16

¹Chaymanta uyarkani *Yaya Diospa wasinmanta chay kanchis *angelkunata sinchita rimahushkata: Talik riychi chay kanchis matikichikunata Yaya Diospa sinchi kastigananta chay allpapi paktachinay-kichipa.

²Chaypina chay puntiru angelka matinta allpapi talik rirkka. Chasna talishpan tukuy chay manchaypa animalpa shutinwa killkarishka, payshina rikunayu rurarishkata mañak runakunaka shuk yapa nanak mana ampiriyipa llagawa unkurkakuna.

³Chaymanta chay ishkaynin angelka matinta atun yaku marpi talik rirkka. Chasna talishpan yakuka ismu yawar tukurka, imashnami shuk wañushka runapa yawarninshina. Chasna tukushpan tukuy chay yakupi kawsak-kunaka wañurkakuna.

⁴Chaymanta chay kimsaynin angelka matinta tukuy shutuk yakukunapi tukuy allpa ukumanta tukyarik yakukunapipas talik rirkka. Chasna talishpan chay yakukunapas yawar tukurkakuna.

⁵Chasnallapi uyarkani chay yakukanata kuyrak angelka Yaya Diosta rimahuskanta kasna:

A Yaya Dios, chasna tukuy mana ali rurak runakunata kastigashkay- kirayku yachanchi alillata rurak kanaykita.

Kanka ucha illami kanki, ñawpamanta pacha tiyak, kunankama chasnalla kawsanki.

⁶ Chay runakunaka kanpa yachay- kiwa yachachikkunata wañuchirkakuna.

Chaymantapas uchankunamanta pichashkayki runaykikunamanta shukkunata wañuchish- pankuna yawarninkuna shuturika.

Chayrayku chay wañuchik runakunata kastigashpa yawar yakuta upyachichishpayki alita rurash- kanki nishpa.

⁷ Chasna yakukunata kuyrak angelka rimashpan Yaya Diospa wasinpi kahuk tuchpashinamanta kasna rimahuktayuarkani:

Ari, chay angelka alitami rimashka. Tukuya apun, tukuya atipak Yaya Diosmi kanki.

Chay mana alita rurak runakunata kastigashpayki alitami rurash- kanki nishpa.

⁸ Chaymanta chay chuskuynin angelka matinta intipi talik rirkka. Chasna talishpan intika runakunata ninashina rupachishpan sinchita nanachirka. ⁹ Chasna runakunata rupachishpanpas paykunaka mana uchankunamanta llakirirkakunachu Yaya Diostana kasunankunapa. Paykuna atunta kastigarishpanapas mana munarkakunachu atun yachayninta yuyarishpa paytana kushichishpa kawsanata.

Ashwan chay parisinakunata paktachik Yaya Diosmanta chiknishpa rimarkakuna payka mana alichu nishpa.

¹⁰ Chaymanta chay pichkaynin angelka matinta chay manchaypa animalpa kamachinan tiyarinapi talik rirkka. Chasna talishpan tukuy chay manchaypa animalta kasuk runakunapa llaktankunaka amsa tukurka. Chaypina tukuy runakunaka manchaywa sinchi nanaywa kallunkunata kanirirkakuna.

¹¹ Chasna sinchi nanayta parisishpanuk- napas mana sakirkakunachu millaypata rurahushkankunata. Ashwan llagankunawa inti rupachishkawa amsawa yapa parisishkankunaryku silupi kawsak Yaya Diosmanta chiknishpa rimarkakuna payka mana alichu nishpa.

¹² Chaymanta chay soktaynin angelka matinta chay Eufrates atun yakupi talik rirkka. Chasna talishpan chay yakuka llampu chakirirkka. Chasna yakuka chakirishpan atun ñampishina tukurka inti llukshinamanta atun apukuna tukuy suntalunkunawa chayta shamunankunapa. ¹³ Chaypina rikurkani kimsa saposhina rikunayu supaykuna llukshihushkakunata. Shuk supayka

chay manchaypa purawapa
shiminmanta llukshimurka. Shuk
supayka chay manchaypa pumashina
animalpa shiminmanta llukshimurka.
Shuk supayna chay manchaypa
animalta yanapakpa shiminmanta
llukshimurka. ¹⁴Chay kimsa supayku-
naka atun yachaywa achka nima ima
uras runakuna rikushkankunata
rurashpami kawsankakuna. Chasna
rurashpanguna tukuy allpapi kamachik
atun apukunata suntalunkunawa pakta
llullachishpa tantachinkakuna.
Paykunata tantachinkakuna tukuyta
atipak Yaya Diospa atun kastiganan
punchapi wañunakunankunapa.

¹⁵Chaypina uyarkani Jesukristuka
rimawahushkanta kasna: Alita uyaway.
Ñukaka shamushami kunkaymanta,
imashnami shuk shuwaka paktan nima
pi yuyarihushkanpi. Kushilla kankakuna
maykan runakunami alita kasuwashpa
shamunaynita chapanahun. Chasna
kasuwashpa shamunaynita chapahush-
paykichika kankichimi tukuy uras
churarishkaykichita alita kuyrarihuk-
shina. Chasna kashpaykichika
shamunayni uraska mana pinkarinkichi-
chu, imashnami shuk runa pinkarin
llatanta tarik shamushpanchi nishpa.

¹⁶Chaypina rikurkani chay kimsa
supaykunaka tukuy apukunata suntalun-
kunawa pakta tantachihushkankunata
chay pampa *hebreo shimpipi
Armagedón shutiyupi.

¹⁷Chaymanta chay kanchisnin angelna
matinta wayrapi talik rirka. Chasna
talishpan Yaya Diospa wasinpi kamachii-
nan tiyarinanmanta uyarkani sinchita
rimahushkata kasna: Kaywami Yaya
Dioska tukuy mana alita rurak runaku-
nata kastigananta tukuchin nishpa.

¹⁸Chasnallapi tiyarka ilampa, sinchi
rayu, sinchi allpa kuyuypas. Runakuna
allpapi kawsashkankunamanta pachami

nima ima uras tiyarkachu chasna sinchi
allpa kuyuya. ¹⁹Chasna tukuy allpaka
sinchita kuyushpan Yaya Diospa
kuntrankunapa atun llaktaka kimsa piti
tukurka. Tukuy allpakanapi atun
llaktakuna piti piti tukurkakuna. Yaya
Dioska chay Babilonia atun llaktapi
kawsak runakunapa yapa millaypata
rurashkankunata mana kunkarkachu.
Chayrayku atunta piñarishpanmi
paykunata sinchita kastigarka. ²⁰Tukuy
islakuna tukuy urkukunapas llampu
chinkarirkakuna. ²¹Silumanta achka
tamya chiriwa sinchiyashka atun
bolakuna sinchita urmarkakuna. Chay
bolakunaka chusku chunka kilo parti
llasharkakuna. Chasna Yaya Dioska
paykunata sinchita kastigashpanpas
uchankunamanta mana llakirirkakuna-
chu. Ashwan chay wañuyamanta
kishpishka runakunaka chay bolaku-
nawa yapa parisishkankunaryku Yaya
Diosmanta chiknishpa rimarkakuna
payka mana alichu nishpa.

**Juanca shuk puta warmishina
llaktata rikushkanmanta riman**

17 ¹Chaymanta chay kanchis
matikunata talik *angelkunamanta
shukka rimawak shamurka: Shamuy, kanta
rikuchinaynipa Yaya Dioska chay achka
yakukuna chawpipi tiyahuk tukuyta
millaypata rurachik putashina llaktata
kastigananta. Chay llaktapi kawsakkunaka
Yaya Diosta sakishpankuna llaktankunaka
shukwa shukwa kawsak puta warmishina
yanka diosunata kushichik tukurka.
²Tukuy allpapi kamachik atun apukunaka
chay putawa ishkayyashpa millaypata
rurashpa kawsarkakuna. Chaypina tukuy
allpapi kawsak runakuna chay putashina
llaktamanta yachakushpankuna sinchi
*vinuwa machashkashina yanka
dioskunata yuyashpa kawsarkakuna
nishpa.

³Chasna chay angelka rimawashkan-washa Yaya Diospa Espíritun sumakta tukuypi yuyachiwashpan chay angelka shuk chunlla chakishka allpama apawarka. Chaypina rikurkani shuk warmita chay manchaypa animalpa awanpi tiyariishpan chay animalta purichihushkanta. Chay animalka pukami karka. Chaymantapas kanchis umayu, chunka kachuyu karka. Yaya Diosta yapa piñachik shutinkuna tapakta killkarishka karka.

⁴Chay warmika shuk apu warmishina suma puka ankashta churarishkami karka. Oromanta rurarishkata, yapa chaniyu chuya rumimanta rurarishkata, yapa chaniyu yura chuya wallkatapas churarishkami karka. Makinpika shuk oromanta rurarishka pusilluta apamurka. Chay pusillunpika millanayappa ismu tiyarka rikuchinanpa chay warmi millaypa yuyayyu, tukuy millaypakuñata rurak uchasapa kananta. Chasna kashpanmi achka runakuñata millaypakuñata yuyachin Yaya Diosta sakishpa yanka dioskuntana kushichinankunapa. ⁵Chaymanta urintinpika shuk mana riksiyapa shutin killkarishka karka. Chay shutinka rimanayan tukuyta atipak Babilonia llakta. Shukwa shukwa kawsak putashina yanka dioskuntana kushichinayashpa Yaya Diosta sakikkunapa maman. Tukuy millaypakuñata rurak runakuñata maman. ⁶Chay warmika Yaya Diospa akllashkan runakuñata Jesukristumanta rimashkakunapa yawarninwa machashka karka. Paykuñata yapa chiknishpan wañuchi-payarka. Chasna chay llaktata rikushpayni yapa mancharirkani.

⁷Chasna mancharishka kahushkaynipi chay chunlla allpama apawak angelka rimawarka: Ama mancharyichu. Ñukami rimashkayki imatami ninayan

chay warmi rikushkaykika, chaymanta purichihushkan kanchis umayu, chunka kachuyu animal rikushkaykika. ⁸Chay rikushkayki manchaypa animalka ñawpami kawsa karka. Kunanka manana kawsannachu. Chaymanta chay supaykunata tapana manchaypa uchkuñanta llukshimushpan kuti rikurinka. Chaymantana wiñaypa kastigarinka. Chay uras tukuy allpapi kawsak Yaya Diosta mana kasukkunaka chay wañushka kashkanmanta kawsarimushka animalta rikushpankuna mancharinkakuna. Chay runakuñata shutinkunaka Yaya Dios allpata rurashkanmanta pacha mana killkarishkaku kanahun chay wiñaypa paywa kawsak runakuñata shutinkuna killkarishkapi nishpa.

⁹Chay angelka yachachiwashpalla katirka: Kay rimahushkaynita asirtanay-kichipaka alita yuyarikkuna kashpaykip-chipas Yaya Diosmanta yachayta munankichi. Chay manchaypa animalpa kanchis umankunaka ninayan kanchis urukunka. Chay urukunkapimi chay warmika tiyahun. Chaymanta chay kanchis umankullatata ninayan kanchis atun apukuna. ¹⁰Chay kanchis atun apukunamanta pichka manana kamachinahunchu. Kunanka soktayninmi kamachihun. Chay kanchis-nin apuka manara tiyanrachu. Pay shamushpanka mana unaytachu kamachinka. ¹¹Chaymanta chay manchaypa animalka, maykanmi ñawpa kawsarka kanmi pusaknín shuk atun kamachik. Kunanka mana kawsanchu, chaymanta kuti shamunan tiyan. Payka chay kanchis apukunashinami kan. Shamushpanka shuk ratumantami wiñayparayku kastigarinka.

¹²Chay rikushkayki manchaypa animalpa chunka kachunkunaka kanahunmi chunka manara kamachik atun

apukuna. Paykunaka shuk ratu chay manchaypa animalwa pakta kamachinkakuna.¹³ Chay chunka apukunaka shuk yuyayllawa kashpangkuna chay manchaypa animalta atun apunkunata rurankakuna.

¹⁴ Chaypina chay chunka apukunaka chay Obeha Maltawa makanakunkakuna. Chasna makanakushpangkuna chay Obeha Maltaka tukuy payta kasukkunawa pakta chay apukunataka winsinkakuna. Chay Obeha Maltaka tukuy kamachikkunamanta atun kamachikmi, tukuy atun apunkunamanta atun apumi. Payta kasuk runakunaka Yaya Diospa akllashkan runakunami, payta mana sakishpa kawsakkuna nishpa.

¹⁵ Chaymanta chay angelka rimawash-palla katirka: Chay rikushkayki yakunaka, maypimi chay puta warmi tiyahukta rikushkanki, kanahunmi achka llaktakunapi kawsak runakuna, achka chikan shimita rimak runakuna.

¹⁶ Chay rikushkayki manchaypa animal, chay chunka kachunkunapas chay puta warmishina llaktata chikninkakuna. Tukuy imankunata kichushpangkuna shuk warmi llatantashinami sakinkakuna. Paypa aychantapas mikunkakuna. Puchurishkata llampu rupachinkakuna.¹⁷ Chasma ruranan-kunapa Yaya Dios paykunata yuyachirka paypa munashkanta paktachinankunapa. Chay chunka apukunaka shuk yuyayllawa kashpangkunami chay manchaypa animalta apunkunata rurankakuna. Chasna chay animalta kasunkakuna Yaya Diospa rimashkan paktarinankama.

¹⁸ Chay puta warmika kanmi tukuy allpakunamanta atun apunkunata kamachik llakta nishpa.

Chay Babilonia atun llakta tukurinamanta riman

18 ¹ Chaymanta rikurkani shuk *angel silumanta uraykumu-hushkata. Payka yapa atun yachayyumi

karka. Intishina punchayachik kashpan tukuy allpata punchayachirka.

² Chaypina sinchita kaparishpan rimarka: Ñami tukurishka millaypata rurachik runakunaka Babilonia atun llakta nishkaka. Ñami tukurishkana. Supaykunapa kawsanankunami tukushkana. Tukuy runakunapa chiknishkan millaypata mana mikupya pawakkunapa wasinkuna tukushka.³ Chay Babilonia manara tukurishpan tukuy allpakunamanta runakuna chaypi kawsak runakunamanta yachakushpangkuna sinchi *vinuwa machashkashina tukuy millaypukunata rurashpa kawsarkakuna. Tukuy allpapi kamachik atun apukunaka chay Babiloniapi kawsakku-nawa ishkayashpa Yaya Diosta sakishpa yanka dioskunatana kasurkakuna, shuk warmi kusanta sakishpan shukwa shukwa kawsakshina. Chay llaktapi kawsak runakunaka tukuy imata munarishpangkuna mana riksiyapa achka suma imakunata rantishpa kawsashkankunaryaku tukuy llaktakunamanta wirakuchakunaka yapa kullkiyu tukurkakuna nishpa.

⁴ Chaymanta uyarkani silumanta rimahushkata: Kankuna kasuwak runaynikunaka chay llaktamanta llukshiychi mana chay llaktapi kawsak runa masikichishina millaypata ruranaykichi. Mana munanichu paykunawa pakta kastigay tukunaykichi.⁵ Ucha rurashkankunata yapa mirachirkakuna. Yaya Dioska tukuy chay millaypata rurashkankunata manami kunkarishkachu nishpa.⁶ Chaymanta chay kastigak angelkunata rimarka: Chay runakunataka rantipaychi imashnami runa masinkunata rurarkakuna. Chasna rantipahushpaykichi ishkay kuti ruraychi. Runakunata millaypata rurachishkankunamanta ishkay kuti parisichiychi.⁷ Paykunataka sinchi

nanaywa llakiyu parisichiychi. Achka imayu kashkankuna tuputa, paykuna kikin atunyashkankuna tuputa rantipay-chi. Paykunaka shunkunkunapika yuyarinahun: Shuk atun apushina suma kawsananpi tukuy parti kamachishpa kawsanchi. Manami kanchichu shuk mashintushina pukri llakiya. Nima ima uras llakiya parisishunchichu nishpa.

⁸Chasna yuyarishkankunaryakumi kunkaymanta shuk punchallapi kastigalinkakuna unkuywa, yarkaywa, llakiyu. Chaymanta ninawa rupachiy tukunkakuna. Chasnami tukuyapa apun Yaya Dioska atun yachayyu kashkan-rayku paykunata kastiganka.

⁹Chay tukuy allpapi kamachik atun apukunaka paykunawa pakta yanka dioskunata kushichishpa achka suma imakunayu kawsashpankuna chay llaktapa kushninta rikushpankuna llakiyu kaparishpa wakankakuna.

¹⁰Paykunapas chasna parisinankunata manchashpankuna karumantalla rikushpankuna rimankakuna: ¡Alaw, alaw, sinchi kamachik Babilonia atun llakta! Kunkaymanta ña kastigarinayki uraka paktashka nishpa.

¹¹Tukuy partimanta wirakuchakunapas llakiyu kaparishpa wakankakuna: ¡Alaw, manana tiyannachu apamush-kanchita rantik runakunaka! nishpa.

¹²Paykunaka orota, kullki ruranakuna fierrokunata, tukuy maku yapa chaniyu chuya rumikunata, yapa chaniyu yura chuya wallkakunatas apamushkakuna. Chaymanta suma llapchastu yura llachapa lino tarpumanta awarishkata, yapa chaniyu chuya llachapa sedata, puka ancash apukunapa churarinan llachapakunatas apamushkakuna. Chaymanta suma mishkinlla asnak kaspikunata, suma chaniyu elefantekunapa kirunkunamanta rurarishka imakunata, suma sedroshina valik

kaspikunamanta, bronsemanta, fierromanta, marmol suma muru rumikunamanta rurarishka imakunatas apamushkakuna. ¹³Chaymanta kanelata, shuk mishkinlla asnak kakunkunata, yanka diosninkunaryku rupachina wikikunata, mirra kaspimanta mishkinlla asnak wikita, perfumitapas apamushkakuna. Chaymanta vinuta, mikunankuna aseiteta, suma harinata, trigutapas apamushkakuna. Chaymanta wakrakunata, obebakunata, kaballukunata, kaballukunapa aysanankuna karrokunatas apamushkakuna. Chaymanta runakunatas apamushkakuna rantichinankunapa. ¹⁴Chaypina chay llaktata rimankakuna: Mananami mikunkichinachu chay mishki muyukanata, maykunkunatami yapa munaripa-yarkankichi. Tukuy suma imakunata charishkaykichika, chaywa atunyashpa rikuchishkaykichikunaka tukurirkakuna. Nima ima uras tarinkichinachu nishpa.

¹⁵⁻¹⁶Tukuy chaykunata rantichik runakunaka chay llaktamanta kullkiyashpankuna paykunapas chasna kastigarinankunata manchashpankuna karumantalla rikunkakuna. Chaypina llakiyu sinchita kaparishpa wakankakuna kasna: ¡Alaw, alaw, atun llakta! Kanmi shuk warmi suma yura linomanta churarishtashina karkanki. Shuk apushina puka ankashta churarishtashina karkanki. Orota, yapa chaniyu yura chuya wallkakunata, suma chuya rumikunatas churarishtashina karkanki. ¹⁷Imashnataya kunkaymanta tukuy suma imaykichikunanti tukurishkanki nishpa.

Tukuy atun yaku marpi lanchakunata purichikkuna, chaypi tarawakkuna, chaypi rihuukunapas mancharishpankuna karullapimi kiparinkakuna. ¹⁸Chay

rupahushka llaktapa kushninta
rikushpankuna kaparinkakuna: Kunanka
manana tiyannachu chasna suma atun
llaktaka nishpa.¹⁹ Sinchita llakirishkan-
kunarayku pulbuta apishpankuna
umankunapi churankakuna. Chasna
rurashpa sinchita kaparishpa wakanka-
kuna kasna: ¡Alaw, alaw, atun llakta!
Tukuy ūukanchi atun yaku marpi purik
lanchayukunaka kanmanta kullkiyar-
kanchi yapa imakunayu kashkayki-
rayku. Kunanka kunkaymantami
tukurishkanki nishpa.

²⁰Kankunaka tukuy silipi kawsakkuna
kushikuchi chay llakta tukurishkan-
rayku. Kankuna tukuy Yaya Diospa
runankuna, paypa shiminta yachachik-
kuna, paypa yachayninwa pasananta
rimakkunapas kushikuchi Yaya Dios
chay llaktata kankunata parisichishkan-
manta kastigashpa rantipashkanrayku
nishpa.

²¹Chaypina shuk yapa ursayu angelta
atun rumita alsahushkanta rikurkani.
Chay rumika kashka yapa atun llasha
triguta kutana rumishina. Chayta
alsashpan atun yaku marpiwichushpan
rimarka: Chasnami wichuy tukunki,
Babilonia atun llakta. Nima ima uras
kuti rikurinkinachu.²²Nima ima uras
kutikashka kanpi takishpa *arpakunata
waktankakunachu, nima flautata, nima
trompetata pukunkakunachu, nima
imata takishpa uyachinkakunachu.
Nima ima uras kutikashka kanpi
tarawak runakunaka tiyankachu, nima
kawsanaykichipa mikunaykichi triguta
kutana uyarinkachu.²³Nima ima uras
kutikashka kanpi lamparinka sintinkachu,
nima runakuna kasarahushpan-
kuna kushikuhushkankunaka uyarinkachu.
Wirakuchaykikunaka kullkinku-
nawa tukuy allpapi apukunata
kamachirkakuna. Suma ali rikurinayu
kashkaykiwa tukuy llaktakunamanta

runakunata llullachishkanki kashina
millaypata rurashpa kawsanankunapa.

²⁴Kanpi Yaya Diospa yachayninwa
yachachikkunata wañuchishpankuna
yawarninkuna shuturirkta, chaymanta
shuk runankunatas wañuchishpan-
kuna yawarninkuna shuturirkta.
Uchayumi kanki tukuy allpapi runaku-
nata wañuchishkankunamanta nishpa.

*Silipi Yaya Diosta takishpa
kushichishkankunamanta riman*

19 ¹Chaymanta uyarkani mana
yupaypa achka sinchita
rimahukkunata silipi kasna:

Tukuy Yaya Diosta kushichiychi.
Yayanchi Diosllami runakunata
kishpichik kan. Payllami suma
atun yachayyu, tukuyta kama-
chik kan.

² Millaypata rurakkunata kastigan,
alita rurakkunata kishpichin.

Chasna alita rurak kashpanmi chay
puta warmishina kahuk llaktata
kastigarka, tukuy allpapi kawsak
runakunata mana ali kawsananta
yachachishkanrayku.

Payta kastigashpan Yaya Dios payta
kasuk runakunata wañuchish-
kanmanta rantiparka nishpa.

³Chaymanta kuti rimarkakuna:
Tukuy Yaya Diosta kushichiychi
chay millaypa llaktaka
wiñayparayku rupahushpan
kushnihushkanrayku nishpa.

⁴Chaypina chay ishkay chunka chusku
rukukunaka, chay chusku kawsakkuna-
pas kamachinan tiyarinanpi tiyahuk
Yaya Diospa puntanpi kunkurishpan-
kuna payta atunyachishpa kushichirkakuna.
Chay achkakunapa rimashkanku-
nata uyashpankuna aynirkakuna:

Alitami rimashkankichi.

Tukuy Yaya Diosta kushichinahu-
chun nishpa.

⁵Chaymanta Yaya Diospa tiyarinan kuskamanta shuk rimahushkata uyarkani:

Tukuy kankuna Yaya Diosninchita yuyashpa kasukkuna payta kushichiyichi.

Tukuy kankuna yachakkuna mana yachakkunapas payta kushichiyichi nishpa.

*Jesukristu payta
kirkkunawa tantarishpan
fiesta tiyananmanta riman*

⁶Chaymanta kuti uyarkani chay achka rimahushkakunata. Shuk atun yaku urkumanta urmahukshina, chaymantapas sinchi rayushina uyarirka kasna:

Tukuy Yaya Diosta kushichiychi. Tukuypa apunimi, tukuyta atipak Yaya Diosninchika ña kamachinata kallarishka.

⁷ Akuychi kushikushunchi.

Shunkunchimanta pacha atunta kushikushunchi.

Payta yuyashpa kushichishunchi. Kunanka Obeha Maltapa kasaranan punchaka ñami paktarishka.

Payta kirik runakuna shuk kwintachishka warmishina ñami alicharishka kahunkuna paywa wiñaypa kawsanankunapa.

⁸ Suma yura chuyahlla linomantashina Yaya Diospa kushkanta churarishkami kahunkuna nishpa.

Chay suma lino ninayan Yaya Diospa runankunapa alita rurashpa kawsash-kankuna.

⁹Chasna chay achka rimahushkankunata uyashkayniwasha chay rimawash-kaka kuti rimawarka: Kay rimahushkay-nita killkay. Kushillami kankakuna chay Obeha Maltapa kasaranan fiestama kayashkankunaka nishpa. Chaymanta

rimawashpalla katirka: Kay rimashkanya Yaya Diospa rimashkanmi. Tukuy paypa rimashkanka shutipallami nishpa.

¹⁰Chasna rimawashkanta uyashpayni paypa puntanpi kunkurirkani payta atunyachishpa kushichinaynipa.

Chaypina payka rimawarka: Ama chasna rurawaychu. Ñukapas kanshina Yaya Diosta kasuk, chaymantapas kanshina Jesukristupa yachachishkanta alita katik runakunashinallatatami kasuk kani. Payllata kushichiy. Chay Jesukristupa yachachishkanka tukuy Yaya Diospa yachayninwa yachachikkunata yuyachikmi kan nishpa.

*Chay yura kaballupi tiyahuk
winsishkanmanta riman*

¹¹Chaymanta silu paskarishkata rikurkani. Chaypi shuk yura kaballuka rikurirkka. Paypa awanpi kahukka Tukuy Uras Alita Paktachik shutiyu, chaymantapas Tukuy Paypa Rimashkanka Shutipami kan nishpa shutiyu. Alillata rurak kashpan millaypata rurakkunata kastiganka, alita rurakkunata kishpichinka, chaymantapas kuntrankunawa makanakun. ¹²Paypa ñawinkunaka shuk nina sintihuksinami rikurirkka. Umanpika churarishka karka winsik apu kananta rikuchik achka tawasampakunatashina. Chaymantapas shuk shutinka mana asirtaypawa killkarishka karka, payllami asirtarka.

¹³Paypa churarishkanka llampu yawarwa armachirishkami karka. Paypa shutinka karka Yaya Diospa Yuyayninta Riksichik. ¹⁴Paypa washalla tukuy silipi kawsak paywa pakta kuntrankunata winsikkuna yura kaballukunapi tiyarishpa katihurkakuna. Tukuy paykunaka suma yura linomanta churarishkami karkakuna. ¹⁵Paypa shiminmantaka llukshirka ishkay wiluyu sablishina tukuy llaktakunamanta payta

mana kasuk runakunata chaywa winsinanpa. Chaymanta chay runakunata fierromanta rurarishka barawa sinchita kamachinka. Uvakunata sarushpa yakunta surkuhukshinami paykunataka kastiganka. Chasna kastigashpan tukuya atipak Yaya Diospa piñayninta riksichinka.¹⁶ Paypa awaniru churarishkanpika chankanpipas shutinka killkarishkami karka kasna: Tukuy Atun Apukunamanta Atun Apumi, Tukuy Kamachikkunamanta Atun Kamachikmi nishpa.

¹⁷Chaymanta rikurkani intipi shayari-huk *angelta. Payka chawpi silupi pawak ankakunataka sinchita kaparishpan rimarka: ¡Urakuyuchi, tantariyichi Yaya Diospa achka kastigashkan runakunapa aychanta mikunaykichipa!¹⁸ Mikuk riychi atun apukunapa aychanta, suntalukunapa apunkunapa aychanta, sinchi mana manchak runakunapa aychanta, chaymantapas kaballukunapa aychanta, paykunata purichik runakunapa aychanta, tukuy shuk runakunapapas, patronyu mana patronyu, yachayyu mana yachayyu runakunapa aychanta. Tukuy Yaya Diospa kunrankunapa aychankunata mikuk riychi.

¹⁹Chaymanta rikurkani chay manchaypa animalta tukuy atun apukunawa suntalunkunawa tantarishka kahukkunata. Chasna tantarishka kahurkakuna chay yura kaballupi tiyahukwa tukuy payta katikkunawapas makanakunankunapa. ²⁰Chaypi chay manchaypa animalta runakunata llullachik yanapaknina pakta apirkakuna. Chay yanapakninka atun yachaywa nima ima uras rikushkankunata rurashkanwa runakunata llullachipayarka. Chasna runakunata llullachishpan killkarishka karkakuna chay animalpa shutinwa, chaymantapas

payshina rikunayu rurarishkata kushichirkakuna. Chasna chay manchaypa animalta yanapaknina pakta apishpankuna kawsakunata chay *asufriwa sintihuk mana wañuk ninama wichurkakuna.²¹ Chaymanta tukuy atun apukuna suntalunkunawa pakta chay yura kaballupi tiyahukpa shiminmanta llukshihuk sablishinawa wañuchiyl tukurkakuna. Chasna wañushpankuna tukuy allpapi kawsak ankakunaka saksaktami mikurkakuna.

**Jesukristuta kirikkuna paywa pakta
shuk waranka watata
kamachinankunamanta riman**

20 ¹Chaymanta rikurkani shuk *angelta silumanta uraykumu-hukta. Makinpi apamurka chay supaykunata tapana manchaypa uchku punkupa llawinta, chaymantapas shuk atun kadenata. ²Chaypina chay manchaypa purawata apirka. Chay purawaka chay puntiru Yaya Diospa rurashkan runakunata Llullachik Machakuyami. Shuk shutinka Washanchakmi, chaymanta Yaya Diospa Kuntran Supaykunapa Apunmi. Chay angelka payta apishpan kadenawa watarka shuk waranka watarayku.

³Chasna payta watashpan chay manchaypa uchkuma wichurka. Chaymanta chay uchkupa punkuna llawinwa taparka. Sumakta sinchiyak wikiwapas ratachishpan taparka. Chasna chay purawata alita taparka tukuy llaktakunamanta runakunata chay shuk waranka wata tukurinankama manana llullachinanpa. Chaymantami shuk raturayku llukshinan tiyan.

⁴Chaymanta rikurkanina apukunapa tiyarinankunata. Chaypi tiyarihurkakuna, maykunkunatami Yaya Diospa yachayninta kushka runa masinkunata kawsashkankunamanta tapunankunapa.

Chaymantapas rikurkani Jesusta katishkankunaryku wañuchi y tukushkakunapa almankunata. Paykunaka mana sakishpa Jesukristupa yachachishkanta Yaya Diospa shimintapas yachachipayarkakuna. Chay manchaypa animalta, payshina rikunayu rurarishkatapas manami mañapayarkakunachu. Chaymantapas mana munarkakunachu chay animalpa shutinwa killkarinata. Chayrayku mana urintinkunapi, nima makinkunapi killkarishkachu kapayarkakuna. Chaypina paykunaka kawsarimushpan-kuna Jesukristuwa pakta shuk waranka watata kamachirkakuna.⁵ Chay runakunami wañushkakunamanta puntiru kawsarishkakuna kanahun. Chay shuk wañushkakunaka manara kawsarimush-kakunarachu. Jesukristu chay waranka watata kamachishkanwasha paykunapas kawsarimunkakuna.⁶ Kushilla kankakuna tukuy wañushkakunamanta puntiru kawsarimushkakunaka. Paykunami Yaya Diospa wawankuna kanahun. Manami kuti wañunkakunana-chu. Yaya Diospa Jesukristupapas runankunami kanahun runakunaryku mañanankunapa, chaymanta Yaya Diosta riksichinankunapa. Jesukristuwa pakta chay waranka watata kamachin-kakuna.

**Supaykunapa apun wichuy
tukushkanmanta riman**

⁷ Chay waranka watawasha Yaya Dios supaykunapa apunta chay manchaypa uchkumanta llukshichinka. ⁸ Chay uchkumanta llukshishpan tukuy allpapi llaktakunamanta runakunata llullachishpan tantachinka. Yaya Diosta chiknik llaktakuna kashpankuna yanka shutiyachirishka kanahun Gog Magogpas.^a

Chay llaktakunapa suntalunkunaka yapa achka kankakuna, mana yupapya, imashnami tiyu. Paykunaka tantarinkakunami Yaya Diospa llaktanpi kawsak runankunawa wañunakunankunapa. ⁹ Chay allpapi tapakta kashpankuna Yaya Diospa runankunapa llaktanma sikarkakuna. Chaypina paykunaka chay arkanapa shamushka Yaya Diospa runankunapa tampunkunawa pakta yuyashkan Jerusalén llaktanta muyukta arkarkakuna. Chaypina nina silumanta urmeshpan chay kuntrankunata llampu rupachirka. ¹⁰ Chaypi runakunata llullachishpa tantachik supaykunapa apunka wichuy tukurka chay *asufriwa sintihuk nina mana wañukpi, maypimi chay manchaypa animal payta yanapakwa pakta wichuy tukurkakuna. Chaypimi puncha tutanti wiñayparayku parisinkakuna.

**Yaya Dios tukuy runakunata
wañushkankunamanta
kawsarishkankunawasha
alitachu rurashkanki nishpa
tapunanmanta riman**

¹¹ Chaymantapas rikurkani shuk atun yura kamachina tiyarinata, chaypi tiyahuktapas. Chasna Yaya Dios rikurishpan siluka allpapas paypa rikushkanpi mana ali kashpankuna chinkarirkakuna. Manana nima maypi rikurirkakunanchu. ¹² Chaymantapas rikurkani tukuy wañushkakuna kawsarishkakunata, yachayyukuna mana yachayyukunapas chay tiyarinan puntanpi shayahukkunata. Chaypina Yaya Dioska killkarishkakunata paskachirka. Chay shuk killkarishkatas paskachirka, maypimi runankunapa shutinkunaka killkarishka kanahun wiñaypa paywa kawsanankunapa.

Chaypina tukuy chay kawsarishkakuna alitachu manachu rurashpa kawsashkankunamanta tapuy tukurakkuna. Yaya Dios paykunapa rurashkankunata killkakunapi rikushpan mana ali rurashkankunamanta kastigarka.¹³ Chay wañushkakunaka atun yaku marmanta, chay wañushkakunata wakaychanamantapas tukuy wañushkankunamanta kawsarishpa shamushka karkakuna. Tukuy paykunami mana ali rurashkankunamanta kastigay tukurakkuna.¹⁴ Chaymanta chay kawsayta kichuk chay wañushkakunata wakaychakwa paktami chay mana wañuk ninapi wichuy tukurakkuna. Chay ninami kan kawsarishkakuna kuti wañushpankuna wiñaypa parisinankuna.¹⁵ Chaymanta-pas tukuy maykunkunami mana killkarishkachu kanahun chay Yaya Diospa runankunapa shutinkuna killkarishkapi, paykunami chay ninapi wichuy tukurakkuna.

**Yaya Dioska tukuya
mushuyachishkanmanta riman**

21 ¹Chaymanta rikurkani shuk mushu siluta, shuk mushu allpata. Chay puntiru silu, allpa, atun yaku marpas manana tiyarkakunanchu. ²Chaypina Yaya Diospa llaktan Mushu Jerusalén paypa kuchunmanta urayku-muhukta rikurkani. Chayka suma alicharishka karka, imashnami shuk kwintachishka warmika kusayanana churarin. ³Chaymanta uyarkani sinchita kaparishpa rimahushkata Yaya Diospa kamachinan tiyarinanmanta kasna: Chayka Yaya Diospa kawsanamri runakuna chawpipi. Kunanmanta pacha paykunawami kawsanka. Paykunaka paypa runankunami kankakuna. Yaya Diosllami paykunapa Yaya Diosninkuna kashpan wiñaypa paykunawa kawsanka. ⁴Chaymantapas paykunapa ñawinku-

napa yakunta chakichinka. Manana tiyankanachu wañuy, nima llakina, nima wakana, nima nanay. Tukuy ñawpa tiyashkakunaka tukurishka kankakuna nishpa.

⁵Chaypina chay kamachinan tiyarinanpi tiyahukka rimarka: Ñukami tukuya mushuyachini nishpa. Chaypi ñukatana rimawarka: Rimashkaynika shutipami kan. Tukuya paktachinaynita rikunkichimi. Chayrayku rimashkaynita killkay nishpa.

⁶Chaymanta rimawarka: Ñami tukuy rimashkaynita paktachishkani. Imashnami abesedarioka A-letrawa kallarin Z-letrawa tukurin, chasnashinami ñuka tukuya kallarichik tukuya tukuchik kani. Rimash-payni tukuy kallarin, chaykamalla nishpayni tukuy tukurin. Maykunkunami yakunayak runakunashina kanahun, paykunataka wiñaypa kawsayta kuk yakutashina yanka kushpami upyachisha. ⁷Parisihushpaykichipas kasuwashpalla kawsashpaykichika kankunata kunaynita rimashkaynitaka amuyankichimi.

Ñukallami kasha Yaya Diosnikichi.

Kankunaka kankichimi wawaynikuna.

⁸Maykan runakunami parisinankunata manchashpankuna sakiwanahun, maykunkunami mana ñukapi sinchikunahunchu, maykunkunami millaypata ruranahun, runata wañuchinahun, chaymantapas maykunkunami musayanakushpa kawsanahun, supaykunata kayachiikkunapas, maykunkunami yanka dioskunata kushichinahun, chaymantapas tukuy maykunkunami llullanahun wichuy tukunkakuna chay *asufriwa sintiuk mana wañuk ninama, maykantami rimanchi kawsarishkakuna kuti wañushpankuna wiñaypa parisinankuna.

**Yaya Diospa llaktan Mushu
Jerusalemanta riman**

⁹Chasna Yaya Dios rimashkanwasha shuk *angel shamurka. Payka chay

kanchis angelkunamanta karka, maykankunami matinkunata talishpan-kuna chay kanchis tukurina kastiguku-nata paktachirkakuna. Chaypina rimawarka: Shamuy kanta rikuchinay-nipa chay kwintachishkan warmita, chay Obeha Maltapa warminta nishpa. ¹⁰Chaypina Yaya Diospa Espíritun sumakta tukuypi yuyachiwashpan chay angelka apawarka shuk atun urku awama. Chaypimi rikuchiwarka Yaya Diospa Jerusalén suma llaktanta, paypa kuchunmanta uraykumuhukta. ¹¹Chay llaktaka karkami Yaya Diosschina mana rikuypa punchayachik, shuk yapa suma chuya rumi sintihuksina, shuk jaspe rumishina yapa suma chuya pasakta rikurik. ¹²Chay llaktaka atun awa muyukta kincharishka karka. Chay kinchaka chunka ishkay punkuyu karka. Karan punkupika shuk angelmi kuyrarka. Chay punkukunapika chay Israelpa^b wawankunamanta chunka ishkay miraykunapa chunka ishkay shutinkunami killkarishka karkakuna. ¹³Kimsa punkukunaka inti llukshina-manta karkakuna, kimsa punkukuna anak partimanta karkakuna, kimsa punkukuna uray partimanta karkakuna, kimsa punkukunaka inti yaykunamanta karkakuna. ¹⁴Chay llaktapa rumiwa kincharishkanpa sapinka chunka ishkay atun rumikunayu karka. Chay rumiku-naka tukuy awankunapi kahuk rumiku-nata sinchikuchikmi karkakuna. Chay atun rumikunapika chay Obeha Maltapa chunka ishkay *apostolkunapa shutinkuna killkarishka karkakuna.

¹⁵Chay ñukawa kwintak angelka shuk oromanta tupuna kaspita charihurka chaywa chay llaktata, punkunkunata, kincharishkantapas tupunanza. ¹⁶Chay llaktapa sunininka anchuyninpas

chasnalla parihu karkakuna. Chasna chay llaktata tupunan kasiwi tupush-pan chunka ishkay waranka *estadios tupu karka. Chay llaktapa sunininka anchuyninka awayninka chasnalla parihu karkakuna. ¹⁷Chaymantapas chay llaktapa kincharishka awayninta tupurka. Runakunapa tupunanza tupushpan shuk pachak chusku chunka chusku kuti chawpi makinchu karka.

¹⁸Chay llaktapa kincharishkanka suma chuya jaspe rumimanta rurarishka karka. Kikin llaktaka oromantalla rurarishka karka, espehushina chuya, pasakta rikurik. ¹⁹Chay kincharishkanpa sapin chikan suma chuya rumikuna karkakuna. Chay sapinpa puntiru atun rumika jaspe rumi karka. Ishkaynin atun rumika safiro rumi karka. Kimsay-nin atun rumika ágata rumi karka. Chuskaynin atun rumika esmeralda rumi karka. ²⁰Pichkaynin atun rumika ónise rumi karka. Soktaynin atun rumika kornalina rumi karka. Kanchis-nin atun rumika krisólito rumi karka. Pusaknin atun rumika berilo rumi karka. Iskuynin atun rumika topasio rumi karka. Chunkaynin atun rumika krisopraso rumi karka. Chunka shuknin atun rumika jasinto rumi karka. Chunka ishkaynin atun rumika amatista rumi karka. ²¹Chay kincharishkappa chunka ishkay punkunkunaka yapa chaniyu atun yura chuya wallkakuna karkakuna. Karan punkunkunaka shuk wallkallawa rurarishka karkakuna. Chay llaktapa chawpinpi kahuk anchu ñampika oromantalla espehushina chuya pasakta rikurik karka.

²²Chay llaktapi manami rikurkanichu Yaya Diosta mañana wasintaka. Chay llaktapi kawsak runakunaka maypipas tukuyupa apun tukuyta atipak Yaya

Diosta chay Obeha Maltatapas kushichinkakuna, tukuy parti paykunawa kahushkankunaruayku.

²³Chay llaktapika manami munanahu-chu intita, nima killata punchayachi-nankunapa. Yaya Dios kikin mana rikuypata punchayachik kashpanmi chay llaktata punchayachirka.

Chaymanta chay Obeha Maltapas chay llaktata punchayachik kan.

²⁴Tukuy allpakunamanta runakuna chay llaktapa punchayachishkanpi kawsankakuna. Tukuy allpakunamanta atun apukunaka tukuy yapa suma tiyapushkankunata chay llaktama churak rinkakuna.

²⁵Chay llaktapi mana tuta tiyashpan punkunkunata nima ima uras tapankakunachu, tukuy uras paskarishkalla kankakuna.

²⁶Tukuy llaktakunamanta chay llaktama rishpankuna tukuy yapa suma tiyapush-kankunata churak rinkakuna. Chaymantapas tukuyta churak rinkakuna, maykan tiyapushkankunamantami runakuna paykunata kushichirkakuna.

²⁷Chay llaktapika nima ima uras yaykunkakunachu uchankunamanta mana picharishka runakunaka, nima millaypata rurak runakuna, nima llullachikkunapas. Chaypika yaykunkakunami maykan runakunallapami shutinkuna killkarishka kanahun chay Obeha Maltapa killkanpi wiñaypa Yaya Dioswa kawsanankunapa.

22 ¹Chaymanta chay angelka rikuchiwarka shuk suma chuya yaku shutuhukta. Chayka wiñaypa kawsayta kuk yakumi karka. Suma chuya pasakta rikurik karka. Chay yakuka Yaya Diospa tiyarinanmanta chay Obeha Maltapa tiyarinanmantapas llukshirka.

²Chay llakta ali anchu ñampi chawpita shuturka. Chay yaku mayankunapika wiñaypa kawsayta kuk muyuyak kaspikuna tiyarka. Chay kaspikunaka muyuyanahun karan wata

chunka ishkay kuti, shuk kuti karan killa. Paypa pankunkunaka tukuy llaktakunamanta runakunata ampik karkakuna.

³Chay llaktapika manana tiyankanachu Yaya Diospa kastiganan runakunaka. Yaya Dios chay Obeha Maltawa pakta chay llaktapi tiyarish-pankuna kamachinkakuna. Tukuy runankunami paykunallata kushichishpa kawsashunchi.

⁴Chaypika ñawipurami Yaya Dioswa rikunaku-shunchi. Paypa shutinwami urintinchikunapika killkarishka kashunchi.

⁵Chaypika manana tiyankachu tuta. Manami munashunchinachu lamparin-kunata, nima intita. Yaya Dios ñukanchipa amunchi kashpan ñukanchi-rayku punchayachinka. Chaypinami paywa pakta tukuy uras wiñaypata kamachishunchi.

Jesukristupa shamunan ña kuchupi kananmanta riman

⁶Chaymanta Jesukristuka rimawarka: Tukuy kay rimashkaynika shutipami kan, tukuy chaykunaka paktarinkakunami. Tukuya apun Yaya Dios, maykanmi paypa yachayninwa yachachikkunata yuyachin, paypa *angelta kacharka kankuna paypa runankunata utkalla pasananta rikuchinampa.

⁷Alita yuyariychi, ñukaka utkallami kuti shamusha. Kushilla kankakuna maykankunami kay pasanamanta killkarishka shimita kasunahun nishpa.

⁸Chaypina ñuka Juan chaykunata rikushpayni uyashpayni rikuchiwak angelpa puntanpi kunkurirkani payta kushichinaynipa.

⁹Chasna paypa puntanpi kunkurishpayni rimawarka: Ama chasna rurawaychu. Ñukapas kanshina Yaya Diosta kasuk kani. Chaymanta Yaya Diospa yachayninwa yachachik masikikunashinallatatami,

tukuy kay killkarishkata kasuk runaku-nashinallatami Yaya Diosta kasuk kani. Yaya Diosninchillata kushichiy nishpa.

¹⁰Chaymanta Jesukristuka rimawarka: Ama pakalla wakaychaychu kay killkapi pasananmanta killkarishkata, ña paktarinan punchakuna paktarihushkankunaryku. ¹¹Millaypata rurak runakunaka millaypallata rurashpa katinahuchun. Millaypa yuyayyu runakunaka millaypa munanankunallata katinahuchun. Alita rurashpa kawsak runakunaka alillata rurashpa katinahuchun. Uchankunamanta picharishka ucha illa runakunaka Yaya Diosta yuyashpa kasushpalla katinahuchun. ¹²Alita yuyariyichi, ñukaka utkallami shamusha. Shamushpayni karan runata rurashkan tuputa kusha. ¹³Imashnami abesedarioka A-letrawa kallarin Z-letrawa tukurin, chasnashinami ñuka tukuya kallarichik tukuya tukuchik kani. Rimashpayni tukuy kallarin. Chaykamalla nishpayni tukuy tukurin. Manarapas nima ima tiyashpanra ña tiyarkani. Tukuy imakuna tukurishpanpas ñukaka kawsashallami. Ñukamantami tukuy kallarirka, chaymantapas chasnallatami ñuka munashpaynilla tukurinka. ¹⁴Kushilla kankakuna maykankunami llachapanta taksarishka runakunashina uchankunamanta picharishka kanahun. Paykunallami chay llaktapa punkunkunata yaykunkakuna, chaymantapas chay wiñaypa kawsayta kuk kaspipa muyunta mikunkakuna. ¹⁵Tukuy allkushina kawsak runakunaka, supaykunata kayachikkuna, musayak-kuna, runata wañuchik runakuna, yanka dioskunata kushichikkuna, chaymanta tukuy llullaysiki runakunapas Yaya Diospa kawsanan kanchallapi

kiparinkakuna, manami yaykunkakuna-chu.

¹⁶Ñuka Jesusmi ñukapa angelta kacharkani tukuy parti tantarihuk kasuwak runaynikunata tukuy kaykunata rimananpa. Ñukami kani atun apu David wañupa miraymanta. Chaymantapas chay istrilla ruyunchi pakarihushkapi rikurikshina kani nishpa. ¹⁷Yaya Diospa Espíritun ñukanchi chay Obeha Maltapa runankunawa pakta rimanchi shamuy Amunchi Jesús nishpa. Kankunapas chasna kayashkanchita uyashpaykichi payta munashpa kayaychi shamuy nishpa. Tukuy kankuna, maykankunami yakunayak runakunashina kankichi, shamuychi chay wiñaypa kawsayta kuk yakuta yanka apishpa upyanaykichipa. ¹⁸Tukuy kankunata kay killkapi pasananmanta killkashkaynita uyak runakunata rimani: Kay rimashkaynita chikanyachishpa mirachishpaykichika Yaya Dioska kankunata kay killkapi killkashkayni manchaypa parisinakunawa kastiganka. ¹⁹Chaymantapas kay killkapi pasananmanta killkashkaynita chikanyachishpa pishichishpaykichika Yaya Dioska kankunata arkanka kay killkapi killkashkayni wiñaypa kawsayta kuk kaspipa muyunta mana mikunaykichipa, nima kay killkapi killkashkayni paypa suma kawsananpi kawsanaykichipa.

²⁰Tukuy chaykunamanta shutipami nishpa rimak Jesukristuka nin: Utkallami shamusha nishpa.

Chasna kachun. Shamuy Amuyni Jesús.

²¹Pay tukuy kankunata llakichishpan alita rikuchun.

Chayllatami ñuka Juan killkashkani.

SHUK SHUK RIMANAKUNATA ASIRTACHIK KILLKA

Abogado ninayan kamachinakunata alita yachak. Chasna yachak kashpan alita rimashpa apukunapa puntanpi yanapan maykankunatami apuma pushanahun mana alitachu rurashka nishpa.

Agripa kan shuk shuti. Kay shutiwa ishkay apukuna karkakuna. Puntiruka kashka yayan chaymanta wawan. Paykunata romano tukuymanta atun apu churarka apu kanankunapa. Rikuy Herodes nishkata ashwan puntapi.

Angel kan shuk griego shimi. Chay ninayan kachashka shuk shimita rimak rinanpa. Inkama pasachishkanchipi angel ninchi mana rikuya kawsakkunallata mana wañunata yachakkunata. Chay angelkunaka kanahumi Yaya Dioswa silipi kawsakkuna. Shuk uraska tukunahumi rikuya. Yaya Dios kamachishpan yanapanahun kuyranahun runakunata. Chasna rurashuskankunapi makanakunankuna tiyan supayku-nawa.

Shuk uras kacharishka kanahun runakunata kastiganankunapa. Shuk uras shuk runakunata rikurirkakuna Yaya Diospa shuk shimi rimashkanta rimanankunapa.

Tiyan mana ali angelkunapas. Puntiru ali kahushpankunara Yaya Dioswa karkakuna. Chaymanta manana angelkunashina kiparinayashpankuna wichuy tukush-pankuna supaykunana tukurkakuna.

Apostol ninayan shuk runapa kachashkan runa kamachishkanta rurananpa. Jesús kay allpapi kahushpan paypa chunka ishkay akllashkan runankunata apostol kankichi nirka. Chaymanta pacha chay chunka ishkayta apostol nirakkuna. Jesús yayanma kutishkanwasha payta apichik Judasranti maskarkakuna Jesuswa purik runakunamanta shuk runata kananpa apostol. Rikuy Jesusta Katikkunamanta Kwintak Killkapi 1.12. Pablopas riman pay kikimanta apostol kananta, Jesús kikin siluma kutishkanwasha payta rikurishpan akllashkanrayku, chaymanta Jesús kikin payta yachachishkanrayku. Chay apostolkunaka Jesusta kirikkunata yachachipayarkakuna manara Jesuspa rimashkan rurashkan killkarishka kashpanra. Chaymantapas rimarkakuna shukkunapa yachachishkankunka alichu manachu nishpa.

Areópago ninayan Arespa luman. Ares karka shuk griego runakunapa kirishkankunka yanka dios. Chay Arespa luman griego shimipi

Areópago karka Atenas llaktapi. Atenaspi puntiru kallarishpankuna apukuna paykunama pushashkankuna runakunata tantaylla yuyarishpa tapunankunapa kastigarinkachu manachu nishpa, chay lumapi tantaripayarkakuna. Chaymanta shukmana tantarinankunapa rishpankuna chay tantarinatapas Areópago nirkakuna.

Arpa kan achka waskakuna suma rurashka kaspi sumakta watashpa timplachirishka. Chayta uyachinch'i waskankunata kinkrayninmanta shilluhukshina aysashpa. Shukkuna kanahun shuk runa tupu, shukkunaka ashwan uchilla kanahun.

Artemisa kashka griego runakunapa shuk kirishkankuna yanka warmi diospa shutin. Griego runakuna yuyarirkakuna pay killata kuyrak, aychakunata sachakunata kuyrak, mitayuta maskak runakunata yanapak kananta. Kaspimanta rumimantapas rurashpankuna kayka kanmi Artemisa nishpa rimarkakuna.

Romano runakunapaka shuk kirishkankuna yanka warmi dios Diana shutiyu karka. Payta kirikkuna yuyarirkakuna tarpukunata alita wiñachik, animalkunata runakunatas alita mirachik kananta. Kaspimanta rumimantapas rurashpankuna kayka kanmi Diana nishpa rimarkakuna.

Chaymanta runakuna yuyarishpankuna chay Diana Artemisa chasnalla kanankunata, chay ishkay chikan rikunayukunata shukllatana rurarkakuna. Shukkuna chay warmi diosta Diana nirkakuna. Shukkunaka payta Artemisa nirkakuna.

Payrayku rurarkakuna shuk atun wasita Efeso llaktapi, griego runakuna romano runakunapas payta

atunyachishpa kushichinankunapa. Shuk runakuna chikan llaktakunama purihushkankunapi shuk runakunapa suma rurashkankunata rikushpankuna kwintarkakuna. Chasna kwintashpankuna chay timpu runakuna yuyarirkakuna kay allpapi kanchis yapa suma ali rurarishkakuna tiyashkanta. Chay kanchismanta Efesopi yanka warmi diosrayku rurashkankuna atun wasi shuk karka.

Asufri kan pukushkashina killu. Allpa ukupi nina tiyashpan wañushpan asufri rumiyashkata tarinchi. Nina tiyashpan allpa ukupi tarinchi allpa uchcumanta llukshihukta yaku rupata. Chay yaku rupapi asufri chullurishpan rikunchi killuta. Chakirishka asufrika kanchama surkushpanchi sumakta sintin. Kushninka yapa millaypata asnan. Yaya Diospa killkachishkanpi asufri asirtachinayan Yaya Dios sinchiba kastigananta. Rikuy Lukaspa Killkashkan Killkapi 17.29; Pasanan Kananmanta Kwintak Killkapi 9.17, 14.10, 19.20, 20.10, 21.8.

Baal: Ñawpa Kanaan allpapi kawsak runakunapa kushichishkankuna yanka dioskunata Baal nirkakuna. Baal ninayan amu, kusa. Runakuna yuyarirkakuna tukuya alita wiñachik mirachik kananta. Baalta kushichinanchipa nishpa tukuy mana alikunata rurashpa kawsarkakuna. Shukwa shukwa musayashpa, mikunakunata apamushpa, shuk uras shuk wawankunata wañuchishpa, payshina rurashkakuna kashkata muchashpa kushichirkakuna. Rikuy Biblia kastellanopi 1 Reyes 14.24, 19.18; Jeremías 19.5; Oseas 13.2; chaymanta inkapi Romapi Kirikkunaryku Killkapi 11.4.

Balaam karka shuk runa ñawpa kawsak pasananta rikushpan rimak. Madián allpapi kawsak karka. Yapa kullkita munak kashpan israel runakunapa kuntrankunata yanapashpa kunarka paykunata uchapi urmachinankunapa, Yaya Dios manana yanapananpa. Chasna kunashpan chay kuntrankunata rimarka: Israel runakunata kankunamanta warmikunata kuychi. Chasna kushpaykichimi uchapi urmachinkichi nishpa.

Balaampa kunashkanta kasush-pankuna israel runakunata uchapi urmachirkakuna. Chay mana israel warmikuna israel karikunata kusayashpankuna yachachirkakuna paykunapa kirishkankuna yanka dioskunata kushichinankunapa. Chaymanta shuk shuk warmikunawa musayashpa, chay yanka dioskun-rayku apamushka mikunata mikushpa, chay yanka dioskunata kushichishpankuna Yaya Diosta sakirkakuna. Rikuy Números killkapi 22-24, 25.1-3, 31.16; Ishkaynin Pedropa Killkashkan Killkapi 2.15; Judaspa Killkash-kanpi 11; Pasanan Kananmanta Kwintak Killkapi 2.14.

Beelsebú kan supaykunapa apunpa shuk shutin. Chay shutin ishkay shimita tantachishka kan. Shuk kan Beel, arameo shimipi Baal, ninayan amu. Shukka kan Sebú. Mana alita yachanchichu imatami ninayan chay shimika. Shukkuna yuyarinahun israel runakuna supaykunapa apunta chay Ekron llaktapi kawsak mana israel runakunapa rurashkankuna yanka diospa shutinta shutiyachishkankunata. Chay rurash-kankuna yanka dios Baalsebub nirkakuna, ninayanmi

siputuchikunapa amun. Chay yanka diosta pukllachishpa israel runakuna paypa shutinta supaykunapa apuntachari shutiyachirkakuna.

Enok Yaya Diosta alita kasuk kushichik runami karka. Yayanka Jared shutiyu karka. Enok mana wañurkachu. Yapa ali kashpan Yaya Dioska payta kawsata siluma pusharka. Paymanta leyinchi Génesis killkapi 5.18, 21-24, chaymantapas Hebreo Runakuna-rayku Killkapi 11.5. Judaspa Killkashkanpi 14-15 leyinchi shuk Enokpa rimashkanta. Chay rimash-kanka killkarishkami kan Killka Enok shutiyupi 1.9. Chay killkashkanka manami tarinchichu chay Ñawpa Yaya Diospa Killkachishkan Shimipi, ashwan shuk killkami kan.

Epikúreo nirkakuna griego runa yachak Epikuro shutiyuta katik runakunata. Paykuna yuyarirkakuna tukuya rurak Yaya Dios mana tiyananta, chaymantapas runakunata tapuk mana alita rurashkankunamanta kastigak Yaya Dios mana tiyananta. Chaymantapas yachachirkakuna mana rikuypa imastukuna muyurihushkanpi tinkunakushpan-kuna tukuy ima tiyashkakuna tukushkunkunata. Chaymanta yachachirkakuna imaraykumi kawsanchi nishpa, kushilla kananchipami kawsanchi. Chaymantapas yachachirkakuna imashna rurashpami kawsanchi kushilla. Tukuy manchayta nanaykunatas yuyarishkanchiwa winsishpa manana musyananchipa, tukuy ali suma kashkata gustashpa, runakunata amiguyashpa, tukuy aychanchipa sinchi munanakunata mana kasushpa kawsashpanchimi kawsanchi kushilla nishpa rimarkakuna. Chaymanta paykunaka mana kirirkakunachu

runakuna wiñaypa kawsananchita, ashwan kirirkakuna wañushpanchi kuti mana rikuypa imastukuna tukunanchita, imashnami karka manara nima ima tiyashpanra chasna.

Estadios kan griego runakunapa shuk tupurishka 185 metro parti.

Estoiko nirakuna griego runa yachak Senón shutiyuta katik runakunata. Paykunaka kirirkakuna shuk dios tukuy ima tiyashkakunata rurash-kanta kuyrahushkantapas. Chaymantapas kirirkakuna tukuy tiyashkakuna shuk puncha rupanankunata. Chaymanta kirirkakuna kushilla kananchipami kawsanchi nishpa. Kushillami kawsanchi yachakushpan-chi yuyarinata, tukuy imashnami kahun chasnallami ali kan nishpa. Tukuy uras alita rurashpa kawsananchi tiyan nishpa yachachirkakuna. Alita kawsanata atipanchi munanan-chikunata mana kasushpanchi, tukuy nanaykunata yuyarishkanchiwa winsishpanchi manana musyananchipa nishpa rimarkakuna. Chaymanta yachachirkakuna alita yuyarishpa kawsananchi tiyan nishpa, tukuy uras ali yuyarishkan-chillata kasushpa, munananchikunata musyananchikunatas mana kasushpa. Chaymantapas yachachirkakuna chasnallami runakunata yanapashpa kawsananchi tiyan. Mana runakunata yuyashpa kawsananchi tiyan, nima kuyashpa, nima munashpa, mana parisinan-chipa.

Fariseo ninayan shuk runa tantarishka fariseokunapi. Chay fariseokuna israel runakuna karkakuna. Paykunaka tantarishka karkakuna Moisés wañupa killkashkan kamachishkakuna alita yachaku hushpankuna

paktachinankunapa. Chay muntun runakunata fariseokuna nirakuna. Tukuy israel runakunamanta ashwan Moisespa killkashkanllata yuyarishpa kawsarkakuna. Chaymanta israel runa masinkunata yachachirkakuna imatami ninayanahun chay kamachirishkakunaka, chaymantapas imashna rurashpami kawsanankuna tiyan Yaya Diosta kushichinankunapa.

Israel runakunata kamachik tantaylla yuyarishpa apukunapa tantarinanmanta shuk apukuna chay muntun fariseokunapi tantarishka karkakuna. Jesús kay allpapi kahushpan achka fariseokuna Moisés wañupa killkashkan kamachishkakunallata yuyarishpa kawsarkakuna, manana yuyarirkakunachu imashnami Yaya Diosta runa masinkunatapas yuyashpa kawsankunkuna.

Felix karka shuk apu. Ñawpa kapayarka *rantishka runa. Romano tukuy manta atun apu Klaudio payta kishpichirka rantishka runa kashkamanta. Chaymanta churarka Judea allpapi kamachik apu kananpa.

Festo karka romano runa Judea allpapi kamachik. Felix apu kashkanmanta llukshishkanwasha romano tukuy manta atun apu Nero shutiyu Festota churarka chaypi kamachik kananpa.

Gadara: Rikuy ukunikpi Gerasa nishkata.

Gerasa karka shuk llakta Galilea kucha uraypi, Gadara llakta uraypipas. Ñawpa Jesukristumanta killkarishkakunata shuk shuk makinkunawa killkarkakuna. Chay killkak runakuna chay Gerasa llakta pa allpanpi kawsakkunata mana chasnallachu rimarkakuna. Shukkuna killkarka-

kuna gerasenos. Chayka ninayan Geresa llaktapa allpanpi kawsakkuna. Shukkunaka killkarkakuna gadarenos. Chayka ninayan Gadara llaktapa allpanpi kawsakkuna. Shukkunana killkarkakuna gergesenos. Chayka ninayan Gergesa llaktapa allpanpi kawsakkuna. Chasna chikanta killkashpankunapas yachanchi tukuy chay runakunallatata kashkunkunata. Inkama pasachishkanchipi Mateopa Killkashkan Killkapi 8.28 rimashkanchi Gadara, Markuspa Killkashkan Killkapika 5.1 rimashkanchi Gerasa, Lukaspa Killkashkan Killkapi-pas 8.26-37 rimashkanchi Gerasallatata.

Griego kan shuk runa Gresia allpapi wawayarishka. Chaymantapas shuk runapa yayan maman Gresia allpamanta kashpankuna payta nirkakuna griego. Chaymantapas israel runakunaka shuk runakunata rimarkakuna griego runakuna, griego shimita rimashpankuna.

Chaymanta griego runakunapa shiminta griegollatata ninchi. Jesús allpapi kahushkan uras chay shimita tukuy romano runakunapa amuyashkan allpakunapi rimarkakuna. Chay allpakunapi chikan chikan shimita rimakkuna kawsashpankuna tukuy griego shimita yachakurkakuna asirtanakunankunata.

Hebreo kan israel runakunapa shimin. Jesukristu manara allpama shamushpan Abrahampa miray israel runakuna hebreo shimita rimarkakuna. Tukuy Ñawpa Yaya Diospa Killkachishkan Shimi hebreo shimpipi killkarishka kan. Shuk masna shimikunalla arameo shimpipi killkarishka kanahun. Jesús allpapi kahushpan israel runakuna arameo

shimita rimarkakuna. Chaymanta hebreo shimita yachakurkakuna Ñawpa Yaya Diospa Killkachishkan Shimita shuk killkakunatas yachakunankunata. Kunan Israel allpapi kawsak israel runakunaka kuti hebreo shimita rimahanuh.

Hermes karka griego runakunapa shuk kirishkankuna yanka dios. Tukuy kirishkankuna yanka dioskunamanta pasa dios Seuspa yanapak karka. Chay dios Seuspa rimashkanta shukkunata rimashpa purik karka.

Herodes kan shuk shuti. Kay shutiwa israel runakunapa shuk apunkuna karkakuna. Mateopa Killkashkan Killkapi kapítulo ishkaypi riman atun apu Herodesmanta. Chay shuk apunkuna Herodes shutiyullatata chay atun apu Herodesmanta mirarkakuna.

Chay atun apu Herodeska Judea allpapi, Samaria allpapi, Galilea allpapi, chaymanta shuk kuchu allpakunapipas kamachik karka. Romano tukuymanta atun apu payta chaypi yaykuchirka apu kananpa. Chay atun apu Herodeska Jerusalén llaktapi Yaya Diospa wasinta kallarirka rurachinata. Chayrayku Jesús allpapi kawsashkan uras chay wasi ña tiyarka, manara tukuchishpankunapas. Atun apu Herodes wañurka Jesukristu wawastu kahushkanpi.

Chay atun apu Herodespa shuk wawanpas Herodes shutiyullatata karka. Paypa shuk shutinka Antipas karka. Jesús yachachishpa purihushkan uras chay Herodes Antipaska Galilea allpapi, Perea allpapipas kamachik karka. Payka Bawtisak Juanta wañuchichirka. Jesusta wañuchinankunapa apishpankuna Judea allpapi

kamachik Pilatoka payma kacharka. Chay Herodesmanta leyinchi Mateopa Killkashkan Killkapi kapítulo 14; Markuspa Killkashkan Killkapi kapítulo 6; Lukaspa Killkashkan Killkapi kapítulokuna 3, 8, 9, 13, 23; chaymantapas Jesusta Katikkunamanta Kwintak Killkapi kapítulokuna 4, 13.

Shuk atun apu Herodeska chay puntiru atun apu Herodespa nitun karka. Paypa shuk shutinka Agripa karka. Paymanta leyinchi Jesusta Katikkunamanta Kwintak Killkapi kapítulo 12. Payka puntiru Israel anakpi shuk allpakanapi kamachik karka. Chaymanta chay romano tukuymanta atun apuka payta shuk allpata kurka, chaymanta kuti shuk allpata shuk allpata kurka. Chasna payka tukuy chay yaya rukun atun apu Herodes wañupa kamachishkan allpakanapillata kamachik tukurka.

Chay Herodes Agripapa wawan Herodes Agripa shutiyullatata karka. Paymanta leyinchi Jesusta Katikkunamanta Kwintak Killkapi kapítulokuna 25-26. Chay killkapi paytaka Agripa nishkakunalla. Pay apu kashpan romano runa Festo Judea allpapi apu karka.

Igu kaspi kan shuk tarpu Israel allpapi, kuchu allpakanapipas sumakta wiñak. Chay kaspika munan shuk watalunkata wiñananpa. Chaymantara muyuyan. Karan wata kimsa kuti muyuyan. Muyunka yapa mishkimi. Karanti mikunchi. Chay igu kaspipa muyunkunata pallashkankunawasha makinkunawa shuk muntunta apishpa niti niti rurashpankuna chakichirkakuna. Chay chakirishkatana aparkakuna purihuskankunapi mikunankunapa. Shuk igu kaspi mana muyuyashpanka yantaraykulla valin.

Impuestu: Shuk allpapi kamachik apuka chay kamachishkanpi kawsak runakunata kullkita kobrachin chikan chikan rurahushkankunapi paganarpa. Runakuna tarawashpa ganashkankunamanta, rantichishkankunamantapas paykunata kamachik apukunaka shuk partita kobrashpankuna impuestu ninchi. Ashwanta yachanaykipa rikuy ukunikpi Impuestuta kobra brak nishkata.

Impuestuta kobra brak: romano runakuna israel runakunapa allpankunata amuyashpankuna masna llaktakunarayku shuk kobra chikta churarkakuna. Chay kobra chikta rimarkakuna masna kullkitami karan wata romano tukuymanta atun apurayku kachanan karka. Chay kobra chikna maskarka shuk israel runakunata israel masinkunata chay impuestuta kobranankunapa. Romano tukuymanta atum apu tapushkan kullkimanta ashwanta chay kobra chikka kobra chipayarka paypas gananarpa. Chasnallatata paypa maskashkan kobra kkunapas rurapayarakuna. Chasna runakunata achkata kobra shpa kullkiyapayarkakuna. Chay rayku israel runakuna yapa chiknipayarkakuna chay israel masin impuestuta kobra kkunata. Mana chay raykuchu paykunata chiknipayarkakuna, ashwan chay kunrankuna romano runakunawa tarawashpa ishkayashkankunaraykupas chiknipayarkakuna. Chaymantapas yuyarirkakuna chay kobra kkunata Yaya Diospa rikushkanpi uchasapa kanankunata. Yaya Diosta mana kirik romano runakunawa mikupayarkakuna, chaymantapas samana punchakunapi tarawapayarkakuna. Chasna ruranakuna mana alichu karka israel runaku-

naraykuka. Yuyarirkakuna chasna ruranakunawa Yaya Diosta piñachinankunata. Chayrayku mana chay kobrakkunawa tantaripayarkakunachu. Rikuy Mateopa Killkashkan Killkapi 9.10-13, 11.19, 18.17, 21.31; Markuspa Killkashkan Killkapi 2.15-17; Lukaspa Killkashkan Killkapi 5.29-31, 7.34, 15.1, 18.10-14.

Insienso ninchi chikan chikan mishkinlla asnak wikikunawa chapushpa rurashkata. Chay wikikuna chapurishkaka chakirishpan pulbushpunkuna saserdotelekunaka Yaya Diospa wasinpi chayta rupachinan tuchpashina orowa armachirishkapi rupachipayarkakuna. Saserdotelekuna karan tutamanta karan chishipi chay mishkinlla asnak wikikuna chapurishkata chay orowa armachirishka tuchpashinapi rupachipayarkakuna. Karan wata saserdotelekuna atun apun Yaya Dioswa tinkunakunan kwartupi insiensowa yaykupayarka. Rikuy Lukaspa Killkashkan Killkapi 1.9-13. Chay insienso kushni payta arkarka Yaya Dioswa tinkunaku hushkani mana wañunanpa. Chaymantapas ñawpa Yaya Dios israel runakunata yapa piñarishpa kastigahushpan saserdote Arón wañuka insiensota rupachishpa Yaya Diospa piñayninta pasachirka. Moisés wañupa killkashkankunapi leyinchi chay insiensomanta. Rikuy Éxodo killkapi 30.7-8, 34-38; Levítico killkapi 16.12-13, chaymanta Números killkapi 16.46-48. Biblia kastellanopi Salmos 141.2, inkapi Pasanan Kananmanta Kwintak Killkapias 5.8, 8.3-5 leyinchi chay insienso Yaya Diosta kasukkunapa mañahushkankunashina kananta,

chaymantapas mañahushkankunata alichakshina kananta.

Judas: Judaspa shuk shutin karka Tadeo. Rikuy Mateopa Killkashkan Killkapi 10.3; Markuspa Killkashkan Killkapi 3.18.

Kristu kan griego shimi. Chayka ninayan aseitewa kakushka. Chayllatata kan hebreo shimipi Mesias. Chay shimillatata inkapi rimanchi Yaya Diospa Kachashkan Kishpichik. Chay Kristu nishkaka hebreo shimipi Mesias nishkaka Yaya Diospa Wawanpa shuk shutin tukurka. Payta shutiyachishkankuna shutin Jesú karka. Chay Jesuswa Kristu nishkankunawa shuk shutilla tukurka Jesukristu.

Latino kan romano runakunapa rimashkan shimin. Romano runakuna achka allpakunata amuyashpankuna chay shimita achka parti yachakurakuna. Jesukristu kay allpapi kahushkanpi tukuy romano runakunapa amuyashkan allpakunapi griego shimita latino shimitapas yachakurakuna, chikan chikan shimita rimak kashpankuna asirtanakunankunapa.

Levadura kan upyanata mikunata urtiyachik punkichik. Panta rurahushpa levadurata churanchi punkichinanpa. Chasnami mana sinchichu tukun.

Israel runakuna Paskua punchakunapi mana mikunahunchu pan levadurayuta kanchis punchawashakama. Yaya Diospa kamachishkanta kasushpankuna pan mana levadurayullata mikunahun. Rikuy Éxodo killkapi 12.8, 15, 18-20.

Israel runakuna shuk pankunata Yaya Diosrayku rupachichinan-kunapa apamushpankuna levadura illallata atiparkakuna apamunata. Rikuy Biblia kastellanopi Levítico 2.4-10.

Achka kuti Yaya Diospa killkachishkanpi levadura nishkaka rimanayan mana ali yachachinakunata mana ali yuyaykunata maykankunami waklichinahun runakunapa yuyayninkunata. Rikuy Mateopa Killkashkan Killkapi 16.6; Markuspa Killkashkan Killkpapi 8.15; Lukaspa Killkashkan Killkapi 12.1; Korintopi Kirikkunaryku Puntiru Killkapi 5.6-8.

Shuk parti Yaya Diospa killkachishkanpi levadura nishkaka asirtachin imashnami Yaya Diospa kamachishkan runakuna kay allpapi mirankakuna. Rikuy Mateopa Killkashkan Killkapi 13.33; chaymantapas Lukaspa Killkashkan Killkapi 13.21.

Leví karka hebreo shimipi shutin.

Griego shimipi karka Mateo. Rikuy ashwan puntapi Mateo nishkata.

Levitakuna karkakuna sacerdotekunata yanapakkuna israel runa Leví wañupa miraykuna. Chay Leví Jakob wañupa chunka ishkay kari wawankunamanta shuk karka. Shuk Levipa miray Arón wañumantalla sacerdotekuna karkakuna. Paykunataka mana levitakuna nirkakunachu, chay yaya rukunkuna wañumantalla kashpankunapas.

Chay levitakuna tarawanankuna karka Yaya Diospa wasinta kuyranankunapa, alichanankunapa, pichanankunapa. Chaymanta shuk tarawanankuna karka wiwakunata wañuchinankuna, runakuna Yaya Diospa wasinma apamushpankuna mana ali rurashkankunamanta llakichiy tukunankunapa. Tukuy kay yanapashkankunata tarinchi Números killkapi 3.6-9, 4.4-16, 24-26, 31-32; chaymanta Biblia kastellanopi 1 Crónicas 23.4-5, 25-26, 28-32; Ezequiel 44.10-14.

Maná kan Yaya Dios israel runakunata kushkan mikuna Egipro allpamanta Kanaan allpama rihushpankuna.

Yaya Dios paykunata egipto runakunamanta kishpichishpan chusku chunka watata chusha allpapi purihushpankuna kay maná shutiyu mikunata kurka mana yarkaywa wañunankunapa. Karan puncha chay mikunata allpapi shikwarishkata tarishpankuna silumanta mikunami nirkakuna. Chay mikuna karka shuk mishki yura pashina rurarishka bolastu. Intipi chulluripayarka.

Mateo karka griego shimipi shutin.

Hebreo shimipi karka Leví. Chay runa Mateollatata Leví ninchi.

Nikolaita: Nikolaitakunata nirkakuna shuk mana alita yachachikpa katikkunata. Mana alita yachanchichu imatami kirirkakuna. Yuyarinchi yanka dioskunata kushichishpa millaypata rurashpa kawsashkunkunata.

Paskua kan israel runakunapa tukuy tantarinankunamanta atun tantarina punchakuna. Chay punchakunapi ñawpa Yaya Dios paykunata Egipto allpapi parisihushkunkunamanta kishpichishkanta yuyarishpa kushikunahun. Israel runakunaryku mushu wata kallarin marso killapi. Chay Paskua tiyarka karan wata chay puntiru killapi.

Ñawpa israel runakuna Egipto allpapi kawsahushpankuna egipto runakuna paykunata yapa parisichipayarkakuna. Chasna parisihushpankuna Yaya Dioska Moisesta rimarka: Israel masikunata rimakriy: Kachasha angelta egipto runakunapa puntiru kari wawankunata wañuchinanpa. Chay tuta shuk ali kari obeha maltata wañuchiichi. Wañuchishpaykichi

mana nima shuk tullunta pakinkichichu. Yawarninwa wasiki-chi punkuta kakunkichi, kachanayni angelka chay yawarta rikushpan wawaykichikunata mana wañuchik rinanpa. Chay obehepa aychanta shuk aya pankakunawa mikunkichi, chaymantapas mikunkichi pan mana punkichishkata. Chaymanta llamputa utkalla mikunkichi. Mikushpaykichi churarishka kaychi utkalla llukshinaykichipa, manana chayllapi kamachirishka kawsanaykichipa nishpa. Chasna Yaya Dioska ñawpa Moisesta rimashpan israel runakuna kasushpankuna Yaya Dios paykunata kishpichirka. Rikuy Éxodo killkapi 12.1-42. Chayta yuyarishpa ñawpamanta pacha karan Paskua kallarina tuta chasnallatata rurashpa mikunahun.

Chay ali kari obeha maltawa Yaya Dioska rikuchinayarka shuk puncha Jesukristuta kachashpan chay obeha maltashina wañunanta payta kasuk runakunata kishpichinanpa kastiganan-manta, chaymantapas supay paykunata kamachihushkanmanta kishpichinanpa. Rikuy Puntiru Pedropo Killkashkan Killkapi 1.18-19; Pasanan Kananmanta Kwintak Killkapipas 5.6.

Pentekostés karka israel runakunapa shuk atun tantarinankuna puncha. Karan wata kimsa atun tantarinankuna tiyarka. Chay puntiru atun tantarina Paskua punchakuna kallarinanmanta pichka chunka punchata yupashpa tantarirkakuna chay Pentekostés puncharayku. Chay uras Israel allpapi trigota pallana punchakuna tukurirkakuna. Chay Pentekostés punchapi israel runakuna Jerusalén llaktapi tantaripayarkakuna Yaya Diosta tukuy chay pallashkankunamanta

agradesinankunapa. Rikuy Deuteronomio killkapi 16.9-10.

Pilato karka romano runa. Paypa kastan Ponsio karka. Romano tukuymanta atun apu Tiberio shutiyu ishkay chunka wata Jesukristu wawayarishkanwasha Pilatota yaykuchirka Judea allpapi apu kananpa. Jesukristu kay allpapi yachachishpa purihushkan uras Pilato Judea allpapi kamachik karka. Paypa apun Siria allpapi kamachik karka. Chay romano tukuymanta atun apu chay ishkay apukunata kamachik karka. Israel runakuna Pilatota sumakta chiknirkakuna Pilato Yaya Diosta mana kasushpan paykunata pukllachihukshina rurashkanwa piñachishkanrayku. Chaymanta imaraykupas utkalla runakunata wañuchichipayarka. Chay romano tukuymanta atun aputa yuyaywa yanapak Pilatopa amigun kashpan Pilatoka yacharka mana kastigay tukunanta. Chay amigun wañushpan mancharka israel runakuna paymanta rimak rishpan-kuna kastigay tukunanta. Chasna kashpan israel runakuna Jesusta payma pushashpankuna wañuchichinankunapa, mana yapa munashpanpas paykunata kasurka.

Rantishka runa: Ñawpa kullkiyu runakuna kamachinankunapa runakunata rantipayarkakuna. Chay rantirishka runakuna tukuy uras kamachirishka kawsapayarkakuna. Nima ima uras atiparkakunachu paykuna kikinpa munashkankunata ruranata. Shuk runakuna yapa liwishkankunaryku rantichirishka tukurirkakuna, shukkunaka apiy tukushpankuna chay apik runakunaka rantichipayarkakuna.

Roma karka romano runakunapa atun llaktankuna Italia allpapi. Chay

llaktamanta romano tukuymanta atun apu tukuy amuyashkan llaktakunata kamachirka. Chay amuyashkan allpakunapi payta kasuk runakunata churarka apu kanankunapa. Jesukristu allpapi kahushkan uras shuk apukunata churashpan Israel allpatapas kamachipayarka. Chasna kashpan Israelpi tiyarka romano suntalukuna. Chaymantapas chay romano tukuymanta atun apu israel runakunata impuestuta kobrapayarka.

Romano karka shuk runa Roma allpapi wawayarishka. Chaymantapas shuk runapa yayankuna Roma allpamanta kashpankuna paypas romano karka. Romano runakuna achka allpakunata amuyashpankuna shuk shuk allpaku-napi wawayarishka runakunapas romanokuna tukurkakuna. Chaymantapas shukkuna yayankuna mana romanokuna kashpankunapas kullkita pagashpankuna romanokuna tukurkakuna. Chay romanokunapa shimin karka latino.

Saduseo ninayan shuk runa tantarishka saduseokunapi. Chay saduseokuna kamachik israel runakuna karkakuna chay Israelpi shuk kamachik runakunawa pakta. Chay saduseokuna tantarishkapi achka saserdote kuna kullkiyu shuk israel runakunapas karkakuna. Tukuy israel runakunata kamachik tantaylla yuyarishpa apukunapa tantarinapi tantarishka karkakuna. Chay apukunamanta ashwan achka saduseokuna karkakuna. Saserdote kunapa atun apupas saduseokunapi tantarishka karka. Payllatata tantaylla yuyarishpa kamachik apukunapa atun apu karka. Chay saduseokuna Moisés wañupa killkashkanta katishpa killkashkanllata yachachir-

kakuna. Mana munarkakunachu shuk yachachikkuna Moisés pa killkashkanka kasnami ninayan nishpa yachachishkankunata. Chayrayku mana shuk yuyayllawachu karkakuna fariseokunawa. Chay saduseokunaka mana kirirkakunachu runakuna wañushkankunawasha kawsarinankunata, nima kirirkakunachu runakuna wiñaypa kawsanan-kunata.

Samana puncha karka israel runakunaryku karan semana tukurinan puncha, tukuy paykuna chawpipi kawsakkunaraykupas.

Ñawpa chusha allpapi purihushpankuna Yaya Dios israel runakunata kamachirka chay puncha tarawanankunamanta samanankunapa. Rikuy Éxodo killkapi 35.2-3. Chasna samahushkankunawa Yaya Dios munarka rikuchinankunapa payta yuyahushkankunata, payta kushichishpa kawsahushkankunata.

Yaya Dios kay allpata rurashpan kanchisnin puncha tukuy rurashkunamanta samarka. Chasna kashpan rimarka chay punchaka paypa kananta. Munarka chay puncha tukuy punchakunamanta chikan kananpa. Rikuy Génesis killkapi 2.3.

Yaya Dios yuyak kashpan chay samana punchata kurka runankunata rikuchinanpa paylla tukuy parisishkanchikunamanta samananchita kunanta. Chaymantapas samana punchata kurka rikuchinanpa pay kikin munashpan israel runakunata tukuy runakunamanta akllashkanta paypa runankuna kanankunapa. Rikuy Éxodo killkapi 31.13.

Moisés wañuka Yaya Diospa kamachishkanta killkashkanwasha samana punchapi ama tarawankichichu nishpa, shuk

runakunaka yuyayninkunamanta yachachirkakuna imashna rurash-pami chay kamachishkata paktachinkakuna nishpa. Manana yuyarirkakunachu Yaya Dios chay punchata runakunata yuyashkan-rayku kushkanta, ashwan yuyayninkunamanta mirachishpa yachachir-kakuna chay kamachishkakunata. Chay achka kamachinakunaka runakunarayku kashkakuna shuk llasha paykunata nitihukschina mana paktachiypa. Chayrayku Jesúis allpapi kahushpan chay yachachikkunata mana kasushpa kuti asirtachirkira Yaya Dios chay punchata kushkanta runakuna kushilla samanankunapa.

Chay samana puncha israel runakunarayku kallarin viernes inti yaykuhushkanmanta sábado inti yaykuhushkankama.

Samana puncha purina kan shuk kilometro parti purina. Moisepsa killashkanta shuk yachachikkuna shuk yachachirkakuna runakuna samana puncha shuk kilometro parti tupullata purinankunapa. Ashwanta purishpangunkaka Yaya Diospa kamachishkanta mana paktachinankunata yuyarirkakuna. Éxodo killkapi 16.29, chaymanta Números killkapi 35.5 yachakushpanchi Yaya Dios chasna munashkanta yachashkanchi nishpa rimarkakuna.

Samaria kan shuk allpa. Chay allpaka kan Judea allpamanta anakpi Galilea allpamanta uraypi. Chaypi samari-tano runakunaka kawsapayarkakuna.

Samaria kan shuk llaktallatata. Chay llaktaka kan Samaria allpapi. Chay Samaria llaktaka tukuy Samaria allpapi llaktakunamanta ashwan atunmi.

Samaritano runakuna karkakuna Samaria allpapi kawsakkuna. Ñawpa

chay Samaria allpapi kawsak israel runakunaka chikan runakunawa apinakushpa chapurirkakuna. Chasna chapurishpangunkuna chay chikan runakunapa yanka diosninkunata kushichirkakuna. Chayrayku Judea allpapi kawsak israel masinkuna chay samaritano runakunata piñarishpa kawsapayarkakuna.

Ñawpa Judeapi kawsak israel runakuna allpangunkamanta llukshichiy tukushpangunkuna, achka watawasha allpangunkama kutishpangunkuna chay samaritano runakuna paykunata arkanayarkakuna mana mushumanta ruranankunapa chay urmachirishka Jerusalén llaktankunata, Yaya Diospa wasintapas.

Chaymantapas samaritano runakuna Gerísim urkupi Yaya Diospa shuk wasinta rurarkakuna chaypi mañanankunapa. Judea allpapi kawsak israel runakuna yuyarirkakuna chasna rurashkankunaka mana ali kananta.

Tukuy chaykunaryku Judeapi kawsak israel runakuna chay samari-tano runakunata piñarishpa kawsapayarkakuna. Yaya Diospa rikushkanpi yapa uchayu kanahun nishpa manana paykunawa tantaripayarkakunachu mana paykunapas uchayu tukunankunapa. Judeamanta shuk partima rishpangunkuna nima samaritano runakunapa allpangunkunata pasanayarkakunachu, ashwan chay allpa washata pasapayarkakuna.

Santiago karka masna runakunapa shutin. Kay shuti griego shimipi Jakobo kan, hebreo shimipi Jakob. Shuk Jakobo karka Jesuspa chunka ishkay runankunamanta shuk. Shuk Jakoboka karka Jesuspa wawkin.

Jesusta kirik kashkankunaryku paykunata wañuchishpankuna yapa ali kashkankunata yuyarishpa San Jakobo nirkakuna. Chay San Jakobo nishkata utkalla rimashpa Santiago kiparirka.

Saserdote karka runakunapa mana alita rurashkankunamanta Yaya Dioswa alichak, runakunarayku Yaya Diosta mañak. Yaya Dios akllarka chay chunka ishkay israel ayllukunamanta shukllata paypa miraymanta saserdoteckuna kanankunapa. Chay aylluka karka Levi wañupa miray. Paypa miraymanta Arón wañupa miraykunallata akllarka saserdoteckuna kanankunapa. Rikuy Éxodo killkapi 28.1-2, 41, 29.29, 40.12-15. Tukuy uras shuk muntun saserdoteckuna Yaya Diospa wasinpi tarawapayarkakuna. Puntiru shuk muntun saserdoteckuna yaykupayarakuna tarawanankunapa, chaymanta kuti shuk muntunllatata yaykushpa chasna katirkakuna. Chay saserdoteckuna alltiparkakuna runakuna Yaya Diospa wasinma apamushkankuna wiwakunata rupachinata Yaya Dios uchankunamanta llachichinanpa. Rikuy Levítiko killkapi 1.3-9, 16.29-34. Chaymantapas paykunalla alltiparkakuna Yaya Diospa wasinpi payta mañana kwartipi yaykunata. Karan puncha shuk saserdote chaypi tutamanta chishipipas insiensota rupachipayarka. Rikuy Éxodo killkapi 28.1-2, 41, 29.29, 40.12-15.

Chay saserdoteckuna tiyarka atun apunkuna. Chay atun apupa ayllunkuna tukuy saserdoteckuna apukunallatata karkakuna. Chay atun apullatata karka chay tantaylla yuyarishpa kamachik apukunapa atun apunkuna. Paylla atiparka

karan wata shuklla kuti chay Yaya Dioswa tinkunakuna kwartipi yaykunata. Rikuy Levítiko killkapi 16.2, 29-34.

Yaya Diospa Mushu

Killkachishkan Shimipi yachachin paypa wawan Jesukristu ñukanchipa shuklla atun yachayyu saserdotenchi tukushkanta. Chayrayku manana ñawpashina tukuy chay saserdoteckuna munanchinachu. Rikuy Hebreo Runakunarayku Killkapi 7.20—8.6.

Chaymantapas yachachin Jesukristuta kirikkuna saserdoteckuna kanankunata. Rikuy Puntiru Pedropo Killkashkan Killkapi 2.9.

Selote ninchi shuk runata tukuy shunkunwa pakta ruranayashkanta rurashpan nima wañuya manchashpa.

Romano runakuna Israel allpapi kamachishpankuna tiyarka shuk israel runakuna romano runakunata piñarikkunapi katikkuna. Paykunata selotekuna nirkakuna.

Seus karka griego runakunapa shuk yanka diosninkuna, tukuy yanka diosninkunamanta pasa.

Tadeo karka Santiagopa wawan Judaspá shuk shutin. Lukaspa Killkashkan Killkapi 6.16 nin Judas. Jesusta Katikkunamanta Kvintak Killkapipas nin Judasllatata. Mateopa Killkashkan Killkapika 10.3, Markuspa Killkashkan Killkapipas 3.18 nin Tadeo.

Vinu kan shuk upyana uva shutiyu muyu yakumanta rurarishka. Chay uva yakuta levadurawa chapushpa putskuyashpan ninchi vinu. Achkata upyashpaka machachin. Uva waskaka tarpu kan. Ramayashpan muntun muntun mishki muyukunata muyuyan.

Yaya Diospa wasin: Tukuy Israel allpapi shuklla Yaya Diospa wasin

tiyarka. Chay wasika karkami Jerusalén llaktapi. Chaypimi tukuy partimanta shamushpankuna israel runakunaka Yaya Diosta mañapayar-kakuna. Chay wasika mana karkachu shulklla wasi, ashwan achka wasikuna rurarishka karka. Tukuy chay pampankunata wasikunawa muyukta kincharishkata Yaya Diospa wasin nishkakuna. Chay wasikunaka karkakunami rurarishka atun uchilla rumikunawa, kaspikunawapas.

Tukuy chay wasikunawa kincharishkakunamanta ashwan kanchama kincharishkapi mana israel runakunapas atiparkakuna yaykunata.

Chay ashwan puntama wasiku-nawa kincharishkakunapi israel runakunalla atiparkakuna yaykunata.

Chay ashwan ukupi kahuk kincharishkapika israel karikunalla yaykupayarkakuna. Chay kincharishkapillatata tiyarka uchankunamanta llakichiy tukun-anunapa apamushkan wiwakunata rupachinankuna tuchpashina.

Chay kincharishkapillatata chawpi pampamanta suninma karka chay suma wasi ishkay kwartuyu, maypimi saserdoteckunalla yaykupa-yarkakuna. Puntiru kwartupi tukuy saserdoteckuna atiparkakuna

yaykunata, chaymanta shuk paykunata yanapak levitakunapas. Chaypi tiyarka insiensota rupachinan tuchpashina orowa armachirishkaka. Chay atun llachapawa taparishka washapi kahuk kwartupi saserdote-kunapa atun apunlla shuk kutilla karan wata yaykupayarka. Chay kwartuta ninchi Yaya Dioswa tinkunkunaka kwartu.

Manara Yaya Diospa wasin Jerusalén llaktapi tiyashpanra Moisés wañupa karpawa rurachishkan Yaya Diospa wasin tiyarka.

Puntiru Yaya Diospa wasinta Jerusalén llaktapi israel runakunapa atun apu Salomón wañuka rurarka. Rikuy Biblia kastellanopi 1 Reyes kapitulokuna 6—7; 2 Crónicas kapitulokuna 3—4.

Jesukristu allpapi kahushkan uras atun apu Herodespa rurachishkan Yaya Diospa wasin tiyarka. Chay Herodeska kallarirka chay wasita rurananpa chunka iskun wata pishishpanra Jesukristu wawayarinanpa. Chay wasita tukuchirkakuna sokta chunka chusku wata Jesukristu wawayarishkanwasha. Kanchis chunka wata Jesukristu wawayarishkanwasha romano runaku-naka chay wasita urmachirkakuna. Chaymanta pacha manana chasna wasi tiyammachu.